



O Novo Testamento
de nosso Senhor Jesus Cristo

em Pacaás Novos
do Brasil

Novo Testamento

O Novo Testamento de nosso Senhor Jesus Cristo

Novo Testamento

O Novo Testamento de nosso Senhor Jesus Cristo

Em Pacaás Novos do Brasil [pav]

Visite www.ScriptureEarth.org/pav para
mais recursos bíblicos em Pacaás Novos.

© 2023, Missão Novas Tribos do Brasil (MNTB)

<https://novastribosdobrasil.org.br>

ENDEREÇO:

Rua Itália Qd. 57

Lt. 5-7 Vila Santa Isabel

Anápolis, GO.

CEP: 75083-310

Este trabalho está licenciado sob uma Licença Creative
Commons Atribuição-NãoComercial-SemDerivações 4.0
Internacional (CC BY-NC-ND).

<https://creativecommons.org/licenses/by-nc-nd/4.0/legalcode.pt>

Índice

Novo Testamento

Mateus	Mt	1
Marcos	Mc	136
Lucas	Lc	214
João	Jo	352
Atos	At	440
Romanos	Rm	564
1 Coríntios	1Co	620
2 Coríntios	2Co	672
Gálatas	Gl	704
Efésios	Ef	724
Filipenses	Fp	741
Colossenses	Cl	753
1 Tessalonicenses	1Ts	765
2 Tessalonicenses	2Ts	776
1 Timóteo	1Tm	782
2 Timóteo	2Tm	797
Tito	Tt	808
Filemom	Fm	815
Hebreus	Hb	818
Tiago	Tg	858
1 Pedro	1Pe	872
2 Pedro	2Pe	886
1 João	1Jo	895
2 João	2Jo	907
3 João	3Jo	909
Judas	Jd	911
Apocalipse	Ap	916

Mateus

Ca xirao' nucun Mateus con Jeju Cristo

Oro hwanana nucun Jeju Cristo

Lucas 3.23-38

1 Je i ca' ca xirao' to xine wixicocon oro hwanana nucun Jeju Cristo pane. Judeu nana. Hwanana ne non taramaxicon Davi cara pane, hwanana ne non Abraão cara pane quem.

²Abraão ma', wanxi' ac con na Isaque.

Isaque ma', wanxi' ac con na Jacó.

Jacó ma', wanxi' ac con na Judá cocon oro xurucun.

³Judá ma', wanxi' ac con na Peres con Zera. Wiricam Tamar co wijima non Peres con Zera.

Peres ma', wanxi' ac con na Esrom.

Esrom ma', wanxi' ac con na Arão.

⁴Arão ma', wanxi' ac con na Aminadabe.

Aminadabe ma', wanxi' ac con na Nasom.

Nasom ma', wanxi' ac con na Salmom.

⁵Salmom ma', wanxi' ac con na Boaz. Wiricam Raabe co wijima non Boaz.

Boaz ma', wanxi' ac con na Obede. Wiricam Rute co wijima non Obede.

Obede ma', wanxi' ac con na Jessé.

⁶Jessé ma', wanxi' ac con na Davi co taramaxicon pane.

Davi ma', wanxi' ac con na Salomão. Wiricam wara manacon Urias co wijima non Salomão.

⁷Salomão ma', wanxi' ac con na Roboão.

Roboão ma', wanxi' ac con na Abias.

Abias ma', wanxi' ac con na Asa.

⁸Asa ma', wanxi' ac con na Josafá.

Josafá ma', wanxi' ac con na Jorão.

Jorão ma', wanxi' ac con na Uzias.

⁹Uzias ma', wanxi' ac con na Jotão.

Jotão ma', wanxi' ac con na Acaz.

Acaz ma', wanxi' ac con na Ezequias.

¹⁰Ezequias ma', wanxi' ac con na Manassés.

Manassés ma', wanxi' ac con na Amom.

Amom ma', wanxi' ac con na Josias.

¹¹Josias ma', wanxi' ac con na Jeconias cocon xurucun.

Je i ma' oro xec nein ca quep tococwa oro wari' nein Israel pane, pain ca cut mama' qui' tococwa pain macarain Babilônia pane. ¹²Cut mama' pin iri tata pain Babilônia ne,

wanxi' ac con na Salatiel Jeconias.

Salatiel ma', wanxi' ac con na Zorobabel.

¹³Zorobabel ma', wanxi' ac con na Abiúde.

Abiúde ma', wanxi' ac con na Eliaquim.

Eliaquim ma', wanxi' ac con na Azor.

¹⁴Azor ma', wanxi' ac con na Sadoque.

Sadoque ma', wanxi' ac con na Aquim.

Aquim ma', wanxi' ac con na Eliúde.

¹⁵Eliúde ma', wanxi' ac con na Eleazar.

Eleazar ma', wanxi' ac con na Matã.

Matã ma', wanxi' ac con na Jacó.

¹⁶Jacó ma', wanxi' ac con na José.

José ma', an ac cam na Maria co wijima non Jeju.

Jeju ma', wirico co Cristo ma', ac i ma' na ca tomi' cocon oro wari' quem.

¹⁷Ac i ma' nana oro hwanana nucun Jeju pane. Ma' 3 na ca cut in to ni cut in to ni xam' xucucun oro waram winacocon hwanana nucun. Wanxi' cain' non Isaque Abraão, wanxi' tiquin' wanxi' tiquin', ma' 14 pin iri na ca wanxi' tiquin' nucucun waram winacocon ne, hwet ac cocon na Davi. Wanxi' ac con Salomão na Davi. Wanxi' tiquin' wanxi' tiquin', ma' 14 pin iri na ca wanxi' tiquin' nucucun ne, hwet ac cocon na Jeconias cocon oro win ma' ca co cut mama' wawa pain Babilônia. Caram ma' iri nana ne,

1.16 Ca' na ca tomi' mao nein ca Cristo wa cocon oro judeu pane. Iri' wari' co wara tora' ca Iri' Jam pane ta nonon. Iri' Taramaxicon tara, wirico tara co to' witan toton nonon oro wari' ta nonon.

wanxi' tiquin' wanxi' tiquin', ma' 14 pin iri na ca wanxi' tiquin' nucucun ne, hwet ac cacam na Maria co wijima non Cristo pane.

Ca pan' qui' nucun Jeju

Lucas 2.1-7

¹⁸Ca' na ca pan' qui' nucun Jeju Cristo pane. Jicon ma', Maria ma', an tam na José ira. Om ca an querec xequequem, tomi' xo' e' xequequem, nam' ac cama na. Je Tamataracon Iri' Jam ca mi' nam pain ca nam' nequem ma'. ¹⁹He ac ca na taxicam. Xut xo' taxipa' na taxicam pane. Tomi' ha' taxipa' nain ca xirao' nucun Moisés quem. Je ca an pe pin tam paxi' cam ma' ira. Xi nam' pe ara cama ta na. An pe e' tam, ma' ta om hwet ne wixicam ta na. Om ta tomi' hwet toton oro wari' cam ta na.

²⁰Pain ca coromicat coromicat wet cain i ma' ne, tohwein' ac con na jam co taramaja mi' non Iri' Jam. Wirico jam co hwet pan non pain ca tohwein' nucun José. José winacon taramaxicon Davi ac con na. Ta hehe ma cam me ta. An ram narima' nem ma', Maria ma'. Je Tamataracon Iri' Jam ca mi' nam pain ca nam' nequem ta na ca tomi' con ma'. ²¹Pan' qui' ac ca tara cawinacam. O' ma' ac mon tara, Jeju ac mon tara. To' witan toton ara xi' nonon oro win ma' ca ma', mi' toton ara xi' nonon pain ca witan ca' cacain ca wap wa pain ca caracat nucucun quem na ca tomi' con ma'.

²²Je Tamataracon Iri' Jam ca mi' nam pain ca nam' wa pane. Ma' ta hwet ne capija ca wara tomi' pe ta' pane, pain ca tomi' hwet rain ta ton profeta pane na Iri' Jam. Ca' na con:

²³Nam' tara xojam' co om tape.

Pan' qui' ac ca tara cawinacam.

O' ma' ac cocon tara, Emanuel ac cocon tara ta.

Ac i ma' na ca wara tomi' pe nucun pane. Pain ca Emanuel cocon ma', je i ma' wixicon pain capijaxut pain ca judeu urut ca'. Pe ho' napari' Iri' Jam ta na ca tomi' mao nein.

²⁴Querec iri na José ne, tomi' ha' ac con na jam co taramaja mi' non Iri' Jam. An ac cam na. ²⁵An paxi' nam, ane om quep cam ne. Pain ca om

1.21 Ma' na ca tomi' mao ne wixicon Jeju ma'. Co to' witan ta na ca tomi' mao ne wixicon. **1.22** Wari' co profeta ma', tomi' hwet taxipa' nain capijacon Iri' Jam ca an hwet mi' non Tamataracon.

pan' querec ca cawinacam ma', om ca quep cam. Om om, pan' qui' ho' na cawinacam. O' ma' ac con na, Jeju ac con na quem.

Ca pe torotop mi' querec te cocon Jeju wari' co maqui' nanain pira

2 Pan' pe nain Belém Jeju, pain macarain Judeia ma'. Je ca pan' pe ca pane. Pain ca taramaxicon taramaxicon wet ca Herodes pane, je ca pan' qui' ca Jeju. Om om, maqui' ac caca na caram ma' co noro taxipa' nonon oro pijo'. Maqui' nanain pira pain ca maqui' ac ca xina. Xuruxut xuruxut hwet ac cacain na Jerusalém. ²Tomi' querec ac caca na: Mon taramaxicon co xo' pan' qui' ma', co taramaxicon pe ho' toton nuhu' pain ca judeu hwe ca' quem? Querec ara xi' urut con pijo' nucun pain macaraxut pane, pain ca maqui' ac ca xina ma'. Je ca maqui' urut ca'. Ma' ta pe torotop mi' querec te xun urut con ta na ca tomi' querec caca ma'.

³Taraju iri nain i ma' taramaxicon Herodes ma' ne, pain ca xo' pan' qui' ca xucun taramaxicon ma', toron tamana ac ne na ximicon. Teretem teretem pi' pin ac caca na oro wari' pain Jerusalém ma' quem. ⁴Tomi' cut in tomi' cut in pi' pin ac tococwa na oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés. Tomi' querec ac tococwa na: Main ca pan' pe ta' ca Cristo quem? Cain' ca xirao' pe cacain oro profeta pane, ac i ma' na ca tomi' tococwa ma'.

⁵Pan' pe tarain Belém pain Judeia ta ac caca na. Je ca xirao' pe ca profeta pane nana. Ca' na ca xirao' pe nucun pane nana:

⁶Wahu' pain ca to hwein Belém pain macarain Judá ca', tomi' inuhu'.

Paric to paxi' hwe, ane hwara' opa pan hwe ne.

Hwara' opa tiquin' ca' huhun co to nanain oro cote
ne cidade pain Judá ma'.

Xi om ne ca pan' pe ho' xim ara cuhu' taramaxicon, pan'
pe tarain Belém ma' pahu'.

Querec wet querec wet xam' turuhu' pain ca oro wari' ne xuhu' ca'.

Win ne ca querec wet taxipa' xine ovelha ma',

ac i ma' tara pain ca querec wet taxipa' cuhu' pain
ca wari' nein Israel hwe ma'.

2.4 Oro sacerdote ma', taramaja to nanain cote ne xiricon Iri' Jam. Tomi' mi' nonon con Iri' Jam oro wari', tom tain' mi' nonon pain carawa nucucun quem. **2.6** Judá na xijein wixinain macarain Judeia.

Ac i ma' na ca xirao' pe cain capijacon Iri' Jam profeta pane na ca tomi' cocon Herodes ma'.

⁷Tomi' cut in ac tococwa na caram ma' co noro nonon pijo' ma' quem. Tomi' noc xa tata. Xica' to nana, wirico Herodes ma', wiricoco co noro nonon pijo' ma' quem. Tomi' querec ac tococwa na: Cain' ca hwet ca pijo' ma' quem? Pain cara pane ra? Xo' hwet na ra? Cain' cain' ca quem? Tomi' xine ta tata. Tomi' hwet ac cocon na. ⁸Mama' jein Belém ta ac tococwa na. Mo querec je. Pirao' xo' jun pije' ma'. Mam' iri jun ne, tomi' ac mahu' tara. Ma' ta hwet ton, ma' ta pe torotop mi' querec te ton quem, ac i ma' na ca tomi' mixein tococwa ma'.

⁹Taraju iri nanain ca tomi' nucun taramaxicon ma' ne, maji ta ac caca na. Xuruxut xuruxut, querec ac cocon na pijo' co wara querec qui' caca pain i cain. Ac ca o tococwa na. O o, wara ca' na ca pe ca pije' ma', xat ac ca na. ¹⁰Tomi' querec te tamana nana pain ca querec cocon pijo' ma'. Mija na ca tomi' querec te caca. ¹¹Xuruxut xuruxut, wara ca' na xirim ma', corom mama' ac caca na. Querec ac cocon na pije' cam jicon ma', Maria na. Pe torotop mi' querec te ac cocon na. Pa ac cacain na panaxicocon ca cut to cacain carawa nucucun ca awi tamana ma'. An hwet mi' ac cocon na pain carawa ca mi' querec te xun cocon ma'. Je ouro, je incenso, je mirra ma' quem, ac i ma' na oro carawa ca mi' querec te cocon Jeju pane.

¹²Tomi' ac tococwa na pain ca tohwein' nucucun. Ma' tara xumuhu' con taramaxicon Herodes me ta tata. Ta in hwet hun me ta ac tococwa na. Ma ac caca na, moji'ac ca' xun ta, ac ni xin xijein wana ta, in mama' ac cacain na macaracocon.

Ca jein mama' cacamain Egito José cam Maria con Jeju

¹³Mama' iri nana caram ma' co noro nonon pijo' ma' ne, tohwein' ac ca na José. Tohwein' non jam co taramaja mi' non Iri' Jam. Tequi' pe ra ta José. An mao ron pije' ma'. An mao ram jicon ma' quem. Jein mama' jein Egito cain. To wet ac hwein i cain tara. Aram aram tomi' ac xuhu' tara, in qui' ac hwe tara. Pirao' ton ara xi' non pije' Herodes ma'. To' pa' pin ton ta na, ac i ma' na ca tomi' con pain ca tohwein' nucun.

¹⁴Tequi' pe ac ca na. Maji ta, mama' towa ac cacama na, mama' ac cacamain na Egito. ¹⁵To ac cacamain na i cain. Mon to wet mon to wet,

2.11 Oro xijein waraqui pana na incenso je mirra ma'. Tom iri ta ne, hu awi ac ne na.

mi' pin iri na Herodes ma' ne, paca' ac cacamain na Egito, in mama' ac cacamain na macaracacam. Ac i ma' na ca hwet pin ne capiiacon Iri' Jam ca wara tomi' pe ca con profeta pane, pain ca pe qui' cain Egito panxica pane. Ca' na ca wara tomi' pe ca con pane:

Paca' rain Egito ta arain ac ton na panxita',
paca' ac cain na quem.

Ac i ma' na ca wara tomi' pe nucun pane.

¹⁶Mixein nanapa' xin caram pacara ne ta ac ca na Herodes ma'. Mana' tamana ac ca na. Mama' jein Belém ta ac tococwa na oro soldado nucun. To' parapa' to parapa' pi' pin jujun ca tarama' nucucun oro hwijima', wiricoco co to nanain Belém, wiricoco co to nanain oro cidade ca to ja' pan nain quem, to' parapa' to' parapa' pi' pin jujun ta tata. Oro hwijima' co ma' 2 na cawaxi' nucucun, cocon oro hwijima' co om hwet querec nanain ca 2 ne cawaxi' nucucun ma' quem, to' parapa' to' parapa' pi' pin jujun ta na ca tomi' cocon ma'. Je ara xi' na ca tomi' nucucun caram pacara pane, pain ca tomi' querec wixite tococwa pane. Ma' 2 na cawaxi' pain ca xo' hwet pa' caparut pijo' pane nana pane.

¹⁷Ac i ma' na ca hwet pin ne ca wara tomi' pe nucun Iri' Jam ma', pain ca tomi' hwet rain capiia qui' con profeta Jeremias cara pane. Ca' na con pane:

¹⁸Taraju ac tacacama na oro narima' co awaran to nanain Ramá ma'.
Mija na ca awaran nequequem.
Wiricacam waram jinacam Raquel co awaran nana ma'.
Awaran nonon humaxicacam.
Om ca am moin' je na cacama.
Cono' pin ara xi' nana humaxicacam.

Ac i ma' na ca tomi' pe ca profeta Jeremias pane.

Ca in mama' cacamain Israel

¹⁹Mi' pin iri na Herodes ne, om om, tohwein' ac ca na José. Wirico jam co taramaja mi' non Iri' Jam co hwet non pain ca tohwein' nucun pain ca pe pe wet cain Egito pane. ²⁰Tequi' pe ra ta José ac con na. An mao ron pije' ma'. Maji ram jicon ma' quem. In mama' jein macarahu' pain Israel. Cono' pin ara xi' nana co to' pa' xun nonon pije' pane na ca tomi' con ma'.

²¹ Tequi' pe ac ca na. Maji nanam, in mama' ac cacamain na macaracacam pain Israel. ²² Xuruxut xuruxut, taraju ho' na José: Taramaxicon pe nain Judeia Arquelau ma', pe pin nain maxicon cote ca, ac i ma' na ca taraju ca ma'. Jin' pin ac ca na quem. Jin' nain ca mao wa pain Judeia. Tomi' ac ca na Iri' Jam, tomi' non pain ca tohwein' nucun. Ta mama' hwein i cain me ta non. Ma ac ca na, mama' ac cacamain na macarain Galileia ma'. ²³ To pin ac cacamain na Nazaré cain, je i ma' wixinain cidade ca to pin cacama pane. Ma' ta hwet pin ne capija ca wara tomi' pe ta' pane, pain ca tomi' hwet rain ta toton oro profeta pane na Iri' Jam. Ca' na con pane:

Maqui' tarain Nazaré wari' co wara tomi' pe ta' cwa'.

Ac i ma' na ca tomi' pe nucun pane.

Ca pijim' nucun João co ja' nonon pain com oro wari'

Marcos 1.2-8; Lucas 3.1-18

3 Pain pin iri na ne, maqui' ac ne na oro xec nein ca ja' taxipa' com João pane, pain ca pijim' pe cain mahweri pain Judeia pane. ² Ca' na ca pijim' nucun: Cwirin' je, xi om ne ca wixicam pin ta' ara ne xec nein ca taramaxicon pe ho' pin ton cocon oro wari' Iri' Jam ta na. ³ Wirico João co xirao' pe ca profeta Isaías cara pane. Ca' na ca xirao' pe nucun pane:

Ma' na wari' co merem pe nain mahweri.

Wara quep xo' mi' jun pain wana Taramaxicon nuhu'.

Quep tan pan mi' jun pain wana ta.

Ac i ma' na ca xirao' pe nucun Isaías pane.

⁴ Pe taxipa' nain tenenein camelo João pane, wirico co ma' womicon pane. Tucu pan xucun pain tapari carawa pain ximijacon. Cao' taxipa' na can, xac taxipa' na tawi quem. ⁵ Xuruxut xuruxut hwet nonon João oro wari' co to nanain Jerusalém. Co to nanain oro xijein cidade pain Judeia, co to ja' pan nanain iri' cwerein com ma', pain Jordão ma', xuruxut xuruxut hwet nonon quem. ⁶ Tomi' hwet pin iri nanain ca caracat nucucun ne, ja' pan ac cocon na pain com João ma'. Ja' pe tata pain Jordão ma'.

2.23 Nazaré na cidade ca wara to cacama José cam Maria pane. **3.3** Ca' na ca tomi' mao nein ca xirao' pe nucun Isaías: Wari' co quep xo' mi' non pain wana Taramaxicon nexi' ma', co quep tan pan mi' non pain wana ma' quem, ac ca winim' xo' con na. Ac ca an pe xo' cain na ximicon con. Ac je na ca tomi' mao ne ca xirao' pe nucun profeta Isaías cara pane.

⁷Mija nana oro fariseu cocon oro saduceu co hwet nonon João ma'. Ma' ta ja' capari' pain com ta nana. Querec iri nonon João pain ca maqui' nucucun ma' ne, tomi' ac cocon na: He! Ja' xi' com hwe ra oro caxicon em', ac i ma' na ca tomi' tococwa ma'. Witan ca' xin hwein ca mana' tamana nucun Iri' Jam ra? Ma' co jein ca' jun nuhu' ma' quem? ⁸Xi iri'o' hwe ta ac tococwa na. Xucun wari' pin xihwe. Ma' ta querec pin' xine ca cwirin' nuhu' pain ca caracat nuhu' ta. ⁹Ta tomi' ximama' ca' hwe me: Om na, om ta wap caparut Iri' Jam, xi iri' hwanana ne ara urut con hwanana nuxut Abraão cara pane ta, om ca na camain' ne, pain ca tomi' ximama' ac i ma' hwe ta. Cain' cain' xihwe quem? Je ca tomi' xuhu' ca' ac tococwa na. Ha' ara xi' non Iri' Jam pain ca to' waram winacon Abraão pin cain oro pacun ca' inuhu'. ¹⁰Wap ho' xim cuhu' Iri' Jam ma' ira. Noro jun wari' co wara an pin nain iriquixi quit ma', co ta' caracat pin tain nain oro pana pain iri' caximain ma'. Oro panaji memem ca om mi xo' winain ma', ta' caracat pin tain tara, wixicaracao' mi' ac ca pain xe tara quem. Ac i ma' xim turuhu' Iri' Jam pain ca wap xim cuhu' quem. Ac i ma' na ca tomi' tococwa ma'.

¹¹Ja' inuhu' pain com, xi om ne ca cwirin' pin ara hwe ta ac tococwa na. Wara maqui' paxi' ina, ane maqui' ta' pa'ao' ca xucun co hwara' opa tiquin' ca' napa' ne. Iri' wari' na quem. Om ca hohot ne pain ca quep xiho' camain' ton pain ca cut mi' ton pain caji caximacon ma', xi iri' wari' ta' ta. Mo ta cwirin' pin hwein ca caracat nuhu' ma', mi' ac cuhu' tara pain Tamataracon Iri' Jam. Mo ta om cwirin' je na hwein ca caracat nuhu' ma' quem, wixicaracao' mi' ac cuhu' tara pain cote ne xe ta. ¹²An to ni ca' toton nonon oro co tomi' ha' nonon cocon oro co om tomi' ha' nonon quem. Win ca wari' co an pe ni ca' tain nain ca xao pe xine tocwi trigo pain tococi ma' quem. An nain ca mam' pahop nucun, pahop ac cain na tococi, an pe ni ac cain na iri' tocwi pain xirinain, wixicaracao' mi' ac cain na tococi pain xe ca om jo' ra ha' ma' quem na ca tomi' cocon oro wari' João pane.

3.7 Judeu nana oro fariseu cocon oro saduceu pane. Taramaxicon to ho' nonon oro win ma' caca. Hohot tiquin' ca' ururun oro win ma' nexi' cwa' pan xucucun oro fariseu. Oro saduceu ma' iri nana ne, om ca howa xo' caca. Om nana oro jam co taramaja mi' nonon Iri' Jam, om ca e' mami' xi' caca oro wari' co cono' nana quem nana. **3.12** Pain ca tomi' mi' con wari' co pahop nain tocwi trigo João ma', wirico Jeju co tomi' mi' ca. Main an to ni toton oro wari'. Co cwirin' pin nana ma', an to ni ac tococwa tara. Co om cwirin' je na nana ma' iri nana ne, wixicaracao' mi' ac tococwa tara pain cote ne xe ca om jo' ra ha' ta na.

Ca ja' con pain com Jeju João

Marcos 1.9-11; Lucas 3.21-22

¹³Maqui' ac cain na macarain Galileia Jeju ma'. Hwet ac cain na Jordão ma'. Ma' ta ja' capa' pain com João ta na.

¹⁴Ja' ne pain com ta ac con na.

He, cain' cain' xima quem ac ca na João. Para ja' ne pain com mapa' quem? Xi caracat ma ta. Ja' pan ximapa' ta non. Tomi' paxi' non, ane om ca na con ne.

¹⁵Je i ma' ira João ac con na. Tomi' ha' ne e', ja' ne e'. Na e' na pain ca tomi' ha' xun Iri' Jam ta non.

Ma ac con na, ja' ac con na quem.

¹⁶Ja' pin iri ta ne, hwet ca' ac cain na com. Ane ane pa ac ne na nanawin. Querec ac cain na Tamataracon Iri' Jam pain ca quiiji' hwet con ma'. Ac ca quiiji' qui' ca xucu' na pain ca quiiji' hwet con ma', pain ca xat con ma'. ¹⁷Tomi' pan ac con na Iri' Jam. Maqui' nain pawin ca tomi' nucun. Mon cwa' panxita' co om noc camain' ta' cwa'. Hohot tamana napa' ta na ca tomi' con ma'.

Ca tomi' querec con pain ca caracat wa Jeju Caxicon Jam

Marcos 1.12-13; Lucas 4.1-13

4 An mao ac con na Jeju Tamataracon Iri' Jam. An mao non pain cote ne mahweri. Ma' ta tomi' querec quem Caxicon Jam ta non. ²Mon to wet ac cain na i cain. Om ca cao' ca. Noc nain ca cao' wa. Ma' ta tomi' ton Te ta na. Ma' 40 na xec, ma' 40 na xim pain ca om cao' ca pane quem. Pe' pin ac ca na. ³Hwet ac con na Caxicon Jam ma', co tomi' querec taxipa' pain ca caracat wa ma'. Tomi' ac con na: Ara capam' pin ximain oro pacun ca' quem. Win ne ca Panxica Iri' Jam ina ma ma' na ca tomi' querec con ma'.

⁴Om na ta ac con na Jeju. Ac i ca' na ca xirao' pe xine pain capijacon Iri' Jam:

Om ca xica' pe ne capam' ca to' e' nain ca wari' wa ma'.

Tomi' ha' iri tarain oro capija wari' ne,

je ca to' e' non ta na ca xirao' nein con ta.

Ac i ma' na ca tomi' in pin con Caxicon Jam.

⁵An mao ac con na pain Jerusalém ma'. Wara ca' na xonein cote ne xiricon Iri' Jam ma', pain iri' tamain ma', an xat pe ac con na. ⁶Tomi' ac con na: To' jao cun mao rain macan' cain. Win ne ca Panxica Iri' Jam ina ma ma'. Xi xirao' pe ara xine pain capijacon ma' pum:

Querec wet jun ta totoron oro jam co taramaja mi' nonon pum.

Quep cam' teterec pain micocon.

Ma' ta om wein mao ne caximacon pain pacun ta totoron pum.

Ac i ma' na ca xirao' pe xine pum ta non.

⁷Om na ta ac con na Jeju. Ac i ca' na ca xirao' pe xine pain capijacon Iri' Jam quem.

Ta tomi' querec mon Taramaxicon co Iri' Jam ne ma cwa' me ta.

Ac i ma' na ca tomi' con ma'.

⁸An mao ac con na pain iri' cote ne pacun ca mao tamana pawin. An mao non pain iri' tamain. An hwet mi' ac con na pain ca awi nein oro xijein macan' pain pira. Tomi' ac con na: ⁹Mo ta pe torotop mi' querec te mapa' pain ca taramaxicon ne mapa' ca', mi' mi' pi' pin ac xim tara pain oro macan' ca querec pira ma cain. Ac i ma' na ca tomi' con ma' quem.

¹⁰In ca' ne ta Caxicon Jam ac con na Jeju. Xi xirao' pe ara xine pain capijacon Iri' Jam ta:

Pe torotop mi' querec te e' ron Taramaxicon co Iri' Jam ne ma ta.

Xica' pe tara co ma' co tomi' ha' wa pain ca taramaja mi'

tocwa ta na ca xirao' nein con ta.

Ac i ma' na ca tomi' in pin con Caxicon Jam Jeju.

¹¹Paca' ac con na Jeju Caxicon Jam. Maqui' ac caca na oro jam co taramaja mi' nonon Iri' Jam ma' quem. Quep xiho' ac cocon na Jeju.

Ca taramaja pe pin tain Galileia ta ca Jeju

Marcos 1.14-15; Lucas 4.14-15

¹²Taxi' pin iri non João Jeju ne, pain ca tao' pe pin tocwa ma', in mao ac cain na Galileia. ¹³Wa' mao paxi' nain Nazaré ma', ane om mon to wet cain i cain ne. Pe pin tain Cafarnaum ta ac ca na. Cafarnaum ca pe ja' pan nain cote ne com pain Galileia ma', ca pe ja' pan nain oro xijein cidade

pain Zebulom je Naftali ma', je ca pe pan ta' ca Jeju quem. ¹⁴Ma' ta hwet pin ne capijacon Iri' Jam ca xirao' pe ca profeta Isaías cara pane. Ca' na ca xirao' pe nucun pane:

¹⁵Je ca tomi' toton oro co om judeu nana ma',
co to nanain Galileia ma',
co to nanain macarain Zebulom je Naftali ma',
co to nanain wanaji cote ne com ma',
pain xijein cacarain Jordão ma'.

¹⁶To paxi' nanain ca jitacat nein xim ira,
ane querec cacain cote ne naran ne.
Jin' paxi' nanain ca cono' wa ira,
ane toha pin cocon naran ne.

Ac i ma' na ca xirao' pe ca profeta Isaías pane.

¹⁷In mao iri nain Galileia Jeju ne, pijim' pin ac ca na, je win pijim' pin ca pane. Cwirin' je, xi om ne ca wixicam pin ta' ara ne xec nein ca taramaxicon pe ho' pin ton cocon oro wari' Iri' Jam ta na ca pijim' nucun.

Ca ja' ja' xine tococwa co taxipa' ca

Marcos 1.16-20; Lucas 5.1-11; João 1.35-42

¹⁸Xut ac cain na cacarain cote ne com pain Galileia ma'. Querec ac tococwa na caram ma' co ma' 2 nana ma'. Simão co Pedro na xijein wixicon ma'. André na wixicon coxa' ca ma' quem. Xin mi' nana pain com caji wi ca mam' pa' caca hwam. Xi pa' taxipa' ara caca hwam ma', vender vender ac cocon na quem, je i ma' ca taramaja nucucun pane. ¹⁹Tomi' ac tococwa na: Harahap je, ja' ja' xine. Ca' na ac xuhu' tara pain ca cut in wa wari'. Win ne ca cut in taxipa' hun hwam cwa', ac i ma' jujun oro wari' quem. Ma' ta howa cacapa' pahu' ta inuhu' na ca tomi' tococwa ma'.

²⁰Ma ac caca na, an to hap pin ac cacain na ca mam' pa' caca hwam. Ja' ja' ac cocon na Jeju.

4.13 Taraju pa' je e'. Galileia na wixinain macan', Galileia na wixinain cote ne com ca pe nain quem. Nazaré je Cafarnaum ma' iri na ne, je i ma' wixinain oro cidade ca to nain Galileia. Zebulom je Naftali ma' iri na ne, je i ma' wixinain macaracocon oro wari' co hwanana ne nonon Zebulom con Naftali cara pane. **4.16** Pain ca tomi' mi' cain naran ma', tomi' joc mam' mi' non Jeju. **4.18** Pedro na xijein wixicon Simão con Jeju. Ma' nana wari' co Simão Simão wet nonon, ma' nana co Simão Pedro nonon, ma' nana co Pedro e' nonon quem.

²¹ Xut tiquin' mao ac ca na, querec ac tococwa na xucucun ma', Tiago con coxa' ca João ma' quem. Mana panxica Zebedeu nana. To ho' nonon cote caca pain mam' horoho nucucun. Ara xo' nanain ca mam' pa' caca hwam ma'. Tomi' ac tococwa na: Harahap je, ja' ja' xine tata.

²² Ma ac caca na, om ca hehe caca. Paca' hap nonon cote caca, paca' nanain mam' horoho nucucun ma', ja' ja' ac cocon na Jeju.

**Ca pijim' mao cain Galileia Jeju, ca
quep xio mija tococwa oro wari' quem**

Lucas 6.17-19

²³ Jeju ma', xut mao ac cain na oro xijein cidade pain Galileia ma'. Ca' na pe nain oro xirim ca cut in xucucun oro win judeu urut quem. Pijim' mi' tata pain capijacon Iri' Jam ma', pain ca taramaxicon pe ho' pin xim cuhu' Iri' Jam ta tococwa ma'. Quep xio ac tococwa na oro wari' pain oro xijein ca caxi nucucun quem. ²⁴ Taraju ac caca na oro wari' co to nanain pira pain oro xijein cidade pain Síria ma' quem. Quep xio nonon oro wari' Jeju ta na ca taraju nucucun. Je ca cut qui' cut qui' pi' pin tococwa oro wari' co caxi nana ma', co jain jain nana pain oro ca caxi tamana nucucun ma'. Mo nana: Co corom to ho' nonon caxicon jam ma', co pa' taxipa' nonon tamanain ma', co carama to nana ma', quep xio quep xio pi' pin ac tococwa na. ²⁵ Mija nana wari' co ja' ja' nonon quem. Maqui' nanain oro xijein cidade pain Galileia, maqui' nanain oro xijein cidade pain Decápolis quem. Maqui' nanain Jerusalém, maqui' nanain oro xijein cidade pain Judeia, je pain oro xijein cidade pain xijein cacarain Jordão ma' quem.

Oro wari' co param mi' wawa pain ca awi wa

Lucas 6.20-23

5 Mija nana wari' co ja' ja' nonon Jeju ma'. Querec iri tata ne, piri' mao ac cain na pacun, xao pe ac cain na tamain. Hwet iri nonon co taxipa' ca ne, ² pijim' ac tococwa na. Ca' na ca tomi' cocon ma':

³Param mi' tata pain ca awi wa oro wari' co ximin nana ma', xi wari' ne ara tococwa pain ca taramaxicon pe ho' xun tococwa ma'.

⁴Param mi' tata pain ca awi wa oro wari' co awaran nana pain xocori ca'. Wiricoco ara xi' nana co to' hwara' opa ca Iri' Jam pain ca tomi' xo' tococwa ma'. Ma' ta pi' pin ne ca tomi' xaxa' nucucun ta tata.

⁵Param mi' tata pain ca awi wa oro wari' co om xec xec nana ma'. Wiricoco ara xi' nana co mene mene pi' pin xin nanain oro xijein macan' ta.

⁶Param mi' tata pain ca awi wa oro wari' co ac ca pe' caca na pain ca jain jain cacain ca awi nucun Iri' Jam ma', je pain ca tama' hohot xuxun Iri' Jam na caca ma'. Wiricoco ara xi' nana co mi' pan xun wawa pain ca hohot cocon ta.

⁷Param mi' tata pain ca awi wa oro wari' co xiram pa' nonon oro win ma' caca ma'. Wiricoco ara xi' nana co xiram pa' wawa ta.

⁸Param mi' tata pain ca awi wa oro wari' co win xumu e' nonon Iri' Jam ma'. Wiricoco ara xi' nana co querec xun nonon ta.

⁹Param mi' tata pain ca awi wa oro wari' co quep xiho' nonon co mana' caracan xucucun ma'. Wiricoco ara xi' nana co mana panxica Iri' Jam xun tococwa ta.

¹⁰Param mi' tata pain ca awi wa oro wari' co ja' tequi' quep em' wawa pain ca ara cacain ca param nucun Iri' Jam ma'. Wiricoco ara xi' nana co wari' ne ca Iri' Jam pain ca taramaxicon pe ho' cocon ta.

¹¹Wahu' pain ca tomi' xirac xihwe pain ca howa mahu' ma', je pain ca ja' tequi' quep em' xihwe ma', je pain ca tama' tomi' xina ximama' xihwe ma', ara ac i ma' iri xihwe pata' ne, param mi' ac xihwe tara pain ca awi wa ta. ¹²Tomi' querec te je pain ca to' i'ina ac i ma' xihwe. Tomi' querec te tamana je. Xi om ne ca awi tamana ara ne oro ca mi' xim cuhu' Iri' Jam pain pawin cain ta. Ac i ma' ara xi' na ca ja' tequi' quep em' qui' tococwa oro profeta co wara ma' nana pane.

5.3 Tomi' mi' tata wari' co ximin nana pain ca om cocon oro carawa ma', tomi' mi' tata wari' co querec pin' xucucun pain ca om hohot cocon Iri' Jam quem. Tomi' mi' tata co coromicat ca' xucucun: Mo ta om xiram pa' capa' Iri' Jam, om ta hwet ac ton pain ca taramaxicon pe nucun ta, wiricoco nana co tomi' mi' wawa ma'. **5.4** Tomi' mi' tata wari' co tomi' xaxa' nana pain ca caracat nucucun.

Ca an xiho' xin sal je naran

¹³Wahu' pain ca howa mahu' ma', ac sal hwe cocon oro wari' pain macan' ca' ac tococwa na. Noro jein sal ma'. Mo ta wita wita om ne sal ma', mo ta camain' pin ne. Cain' xi wita mami' ne quem? Wita mami' tara ra? Om na, om ca wita mami' ne. Wixicao' pin e' ta, xom pin ac cacain na oro wari' co xuruxut in nana ma'.

¹⁴Ac naran hwe quem. Win ne cidade ca pe nain tamain pacun ma'. Tom pin iri na oro naran nein ne, om ca xaraxa mami' ac ne, querec querec xam' nanain oro wari'. ¹⁵Noro jun wari' co tom nain naran ma' quem. Om ca tatep pa' ca pain too. Tom an hwet pe na pain maxinain. Toha mi' ac tococwa na oro wari' co to nanain xirim. ¹⁶Je ca tomi' xuhu' ca'. Ac i ma' tara ca toha ne naran nuhu' ta. Toha mi' jujun oro wari'. Ma' ta querec pin' cacain ca ara hwe ma', pain ca ara hwein ca awi wa ma'. Ma' ta awi na xin Iri' Jam ta cocon Cotere' co pe pawin pahu'.

Capijacon Iri' Jam

¹⁷Cain' ca coromicat mi' mahu' quem ac tococwa na. Tomi' am pin tarain ca xirao' nucun Moisés ma' mahu' ra? Tomi' am pin tarain ca xirao' to nucucun oro profeta cara pane quem ma' mahu' ra? Je ca maqui' cain macan' ca', ac i ma' na ca coromicat mi' mahu' ra? Om na, om ca maqui' ta' pain ca tomi' am pin tain ca xirao' nucun Moisés ta'. Om ca maqui' ta' pain ca tomi' am pin tain ca xirao' to caca oro profeta ta' quem, om na. Maqui' ina, ma' ta hwet pin ne oro ca xirao' to caca pata' ina, je ca maqui' ta' ca'. ¹⁸Je ca tomi' xuhu' ca', tomi' iri'o' inuhu'. Oro ca xirao' pe ca Moisés pane, je oro ca xirao' to caca oro profeta pane, om ta pan' am camain' ne ta. Om ta pan' am camain' ne wijimain ca xirao' nucucun quem. Hwet hwet pi'

5.13 Ac i ca' na ca tomi' mao nein ca tomi' nucun pain sal: Pain ca ac sal hwe ma', ha' nuhu' pain ca to' awi huhun oro win ma' hwe ma'. Ha' nuhu' pain ca quep xiho' huhun, ma' ta om pan teretem pan teretem tiquin' caca ma'. Win ne sal ma'. To' wita nain carawa sal. Aramao iri irin carawa pain sal ne, om ac ne na ca cunu ne. Ac i ma' huhun oro wari' pain macan' ca' na ca tomi' tococwa ma'. **5.14** Ac i ca' na ca tomi' mao nein ca tomi' nucun pain naran: Pain ca ac naran hwe ma', ac ca toha mi' huhun na oro wari' pain ca an hwet pe hwein ca xuruxut xo' nuhu'. Querec pin' ac cacain na ca iri'o' wa con Iri' Jam pahu'. Ac i ma' huhun oro wari' pain macan' ca na ca tomi' tococwa ma'.

pin tara. Pain ca ma' ma' wet ne nanawin pain macan' ca', om ta pan' am camain' ne wijimain ca xirao' to nein cocon. Hwet hwet pi' pin tara ta.

¹⁹ Je ca tomi' xuhu' ca' ac tococwa na. Oro wari' co om tomi' ha' nanain oro ca tomi' nucun Iri' Jam ca tomi' ha' je capari', iri' wijimain ca xirao' nein paxi' tara ca om tomi' ha' caca ma'. Mo ta tomi' ca' tococwa oro win ma' ca quem: Ta tomi' ha' hwein me ta, mo ta tomi' ac i ma' cocon oro win ma' caca ma', ximin pan ac caca tara. Om ta hwara' opa camain' caca pain ca taramaxicon pe ca Iri' Jam, coco' e' tatara. Ane om ac i ma' ne cocon oro wari' co tomi' ha' nana ne. Mo ta tomi' ha' cacain oro ca tomi' nucun Iri' Jam ca tomi' ha' je capari'. Mo ta tomi' ha' jein ta cocon oro win ma' caca quem. Hwara' opa tatara caram ma', hwara' opa to tatarain ca taramaxicon pe ca Iri' Jam ta.

²⁰ Je ca tomi' xuhu' ca': Tomi' ha' jein oro ca tomi' nucun Iri' Jam. Coromicat ac i ca' paxi' hwe pain xocori ca': Tomi' ha' nana oro fariseu ma', tomi' ha' nana oro co ca' na taxipa' nanain ca xirao' nucun Moisés ma' quem, ac i ma' paxi' na ca coromicat nuhu' pain xocori ca'. Ane tomi' pan xuhu' pain i ca' ne: Mo ta om tomi' ha' tiquin' ca' huhun pain oro ca tomi' nucun Iri' Jam ma', om ta to ho' camain' huhun oro wari' co taramaxicon pe ho' ca Iri' Jam ta. Tomi' iri'o' inuhu' ta.

Ca mana' wa

²¹ Tomi' ac tococwa na: Wara taraju hwein ca tomi' tococwa oro hwanana nexi' pane. Ta to' pa' mon wari' me ta tata. Wari' co to' pa' non win ma' ca ma', tomi' mi' ac tocwa tara pain ca wap wa pain ca wum co em' ta tocwa ta, ac i ma' paxi' na ca tomi' tococwa pane. ²² Ane tomi' pan xuhu' pain i ca' ne: Wari' co mana' ximao non win ma' ca ma', tomi' mi' ac tocwa tara pain ca wap wa pain ca wum co em' ta tocwa. Wari' co tamanain ma ta non win ma' ca pain ca tomi' ximao con ma' quem, o mi' ac tocwa tara cocon oro juiz co tomi' mi' taxipa' nonon oro caracat pain ca wap wa ma'. Wari' co tomi' noro non win ma' ca pain ca iri' tamanain ma, om ca awi camain' ma ta con ma', ximin na co ma' ta. Hohot na pain ca xin mi' tocwa pain cote ne xe ta.

²³ Je ca tomi' xuhu' ca', tomi' inem pain ca tom tain' mi' ton mon pain winam Iri' Jam ma'. Mo ta hwet pin main cote ne xiricon Iri' Jam ma', pain ca tom tain' mi' ton pain wina ta ma ma', mo ta mam' pe wet mon

win ma' ma pain ca mana' quem ma'. ²⁴An pe ac main tara winam pain ca tom tain' pe xine ma'. Hwet hap ac mon tara, tomi' xo' ac mon tara, tomi' querec te mami' xijexi' ta xa' ac mon tara. In hwet ac main tara, tom tain' mi' ac mon tara pain winam Iri' Jam ta.

²⁵Tomi' inem pain ca dever mon pain dinheiro wari' ma' quem. Mo ta dever mon pain, am tomi' ca' quem: Dever mapa' pain dinheiro ta, mo hwet xun juiz ma', tomi' hwet ton pum ac quem tara. Om na, tomi' xo' hap xijexi' ta ac mon tara pain ca xuruxut xuruxut wet hwein wana ma', pain ca om hwet querec hun juiz pain xiricon ma'. Mo ta om tomi' xo' hap xujuhu', am tomi' hwet con juiz pum. Am quep quem, am an mao ron co cwa' ta con co tao' pe ma' pum, am tao' pe quem quem. ²⁶Je ca tomi' xim ca', tomi' iri'o' inem. Mo ta om pagar pi' pin main dinheiro ca pagar ron quem juiz ma', om ac ne tara ca hwet ca' ac main xirinain ca tao' to tao' to to wa ma'. Tomi' iri'o' inuhu' ta na ca tomi' tococwa ma'.

Ca quep tacama xequem narima'

²⁷Tomi' ac tococwa na: Wara taraju hwein ca tomi' tococwa oro hwanana nexi' pane ac tococwa na. Ta quep mam manacon win ma' ma me ta, ac i ma' paxi' na ca tomi' tococwa pane. ²⁸Ane tomi' pan xuhu' pain i ca' ne: Wari' co querec param nam narima' ma', co quep xitam na cam ma', wara quep pin nam pain ximicon pain ca coromicat nucun ta. ²⁹Tomi' inem pain ca caracat ma pain ca querec param ximao ma ma'. Mo ta to' caracat quem tucum ma', pain ca querec param ximao main ca om awi wa ma', noro maho' rain. Ac ca horohot pin main tara tucum ma', ac ca wixicao' pin main tara. Cain' cain' xira quem? Hohot xira pain ca ma' ma' wet ne tucum pain ca mao main cote ne xe ra? Om xi hohot ne ta. Hohot pan xira pain ca om pin ne tucum pain ca mao main pawin ta. ³⁰Wum quem, pain ca caracat ma pain ca ara main ca om awi wa ma' quem. Mo ta to' caracat quem mum ma', pain ca ara main ca om awi wa ma', ara maho' rain e'. Ac ca ton tapit pin main tara mum ma', ac ca xin pin main tara quem. Cain' cain' xira quem? Hohot xira pain ca ma' ma'

5.26 Pain ca tomi' ac i ma' ca Jeju ma', tomi' mi' paxi' napari' pain ca om pagar ac xin ca caracat nexi' ca', xi mija ara ne ca caracat iri'. Dever tamana urun Iri' Jam. Na e' na pain ca tomi' hwet xun pain ca caracat nexi' pain ca om wap xuhu' ta querec capari' ca', xic am pin ac cain na, om pin ac capari' na ca caracat wa ta.

wet ne mum pain ca mao main cote ne xe ra? Om xi hohot ne ta. Hohot pan xira pain ca om pin ne mum pain ca mao main pawin ta.

Ca an pe pin tacama narima'

³¹ Tomi' ca' tata oro hwanana nexi' pane ac tococwa na. Wari' co an pe pin tam nam manacon ma', na e' na pain ca xirao' mi' cam pain documento. An pe pin inem ta tara ca xirao' nein con, ac i ma' paxi' na ca tomi' tococwa pane. ³² Ane tomi' pan xuhu' pain i ca' ne: Wari' co an pe pin nam manacon ma', pain ca om caracat cama ma', pain ca om quep cam xucun tarama' ma', mo ta an pe ximao cam, em' pan ac ca tara. Caracat mi' nam manacon, xi om ne ca tarama' nequem tarama' nequem wet ara ca ta non Iri' Jam. Mo ta an mami' con xucun tarama', caracat ac cama tara. Tarama' co an nam narima' co an pe pin ca tarama' nequem ma' quem, caracat ac ca tara quem. Ac i ma' na ca tomi' tococwa ma'.

Ca tomi' an hwet xin wixicon Iri' Jam pain oro ca ara xi' iri'

³³ Wara taraju hwein ca tomi' tococwa oro hwanana nexi' pane ac tococwa na. Ara tain iri rain oro ca ara ta' ma ne, mo ta tomi' hwet main wixicon Taramaxicon Iri' Jam pain ca tomi' an pe nem ma', mo ta tomi' ca' ma, taraju napa' Iri' Jam ta, mo ta om ara tain, wap ma' tarapa' ne, mo ta tomi' ac i ma' ma pain ca tomi' an pe nem ma'. Na e' na pain ca ara main. Om ca na camain' ne pain ca mixein ma ma', pain ca om ara main ca tomi' an pe nem ta. Ara ara pi' pin rain ca tomi' an pe nem ta, ac i ma' paxi' na ca tomi' tococwa pane. ³⁴ Ane tomi' pan xuhu' pain i ca' ne: Ta tomi' waraju camain' hwein oro wixinain carawa pain oro ca ara xi' hwe me ta. Ta tomi' waraju hwein wixinain pawin me ta, xi xao pe ara cain pawin Iri' Jam pain ca taramaxicon pe ho' capari' ta. ³⁵ Ta tomi' waraju hwein wixinain macan' quem me, xi ton pe ara cain caximacon pain macan' Iri' Jam pain ca taramaxicon pe ho' capari' ta. Ta tomi' waraju hwein wixinain Jerusalém quem me, xi cidade nucun Taramaxicon nexi' ara ne ta. ³⁶ Wum pain ca tomi' pe pin tain main ca ara ta' ma ma', ta tomi' waraju main wixinain winam pain cwerem ma' me. Xi ara towo' taxi' main tenenem ta. Om ca ara mixem taxi' main quem. ³⁷ Je ca tomi' xim ca': Mo ta ara tain main oro ca ara ta' ma ma', ara tain ta e' ra. Mo ta

om ara tain main, om ta ara tain ta e' ra. Mo ta tomi' waraju ximao main oro wixinain carawa pain ca tomi' pe pin main ca tomi' nem ma', wirico Caxicon Jam co mi' nem pain ca tomi' waraju nem ma'.

Ca win mapa' ne wa

Lucas 6.29-30

³⁸Wara taraju hwein ca tomi' tococwa hwanana nexi' pane ac tococwa na. Wari' co xucun' tot pin nain tocon win ma' ca ma', hohot na pain ca xucun' tot pin xine tocon quem. Wari' co to' cat pin nain xicon win ma' ca ma', hohot na pain ca to' cat pin xine xicon quem, ac i ma' paxi' na ca tomi' tococwa pane. ³⁹Ane tomi' pan xuhu' pain i ca' ne: Ta win mapa' ne hun wari' co pan tem me. Wum pain ca mana' quem wari' ma', mo ta wap quem, pain xijein orocoxum ma', mo ta wap mami' xim quem quem, je i ma' ira, jami mi' ron pain xijein orocoxum ma', wap mami' ne pain me ac mon tara quem. ⁴⁰Tomi' inem pain ca xina con juiz wari' ma' pum. Mo ta tomi' ca' con, ara cup napa' co ma' ta, pagar tarapa', mi' tarapa' con iri' curucun womicon ta tara pain ca xina con juiz pum. Je i ma' ira, ta mana' mon me ta, om ta mi' e' mon con iri' curucun womum ma'. Mi' ron con iri' curucun womum, mi' ron con to' om capin' nem ma' quem. ⁴¹Mo ta tomi' merem quem wari' ma', mo ta an tiquin' rain caramaju ca' quem, xica' pe tara quilômetro pain ca an tiquin' main ta terem, mo ta tomi' ac i ma' quem. Om ta xica' pe ne quilômetro ca an tiquin' main. Ma' 2 tara quilômetro pain ca an tiquin' main con. ⁴²Mo ta mi' ne quem, pain caramajum wari' ma', mi' ac mon pain tara. Mo ta wajim' quem, pain, mo ta mi' in hwet xim pain quem. Ta miri'om mon me, mi' ron pain.

Ta noc huhun co noc nunuhu' ma' me ta tata

Lucas 6.27-28; Lucas 6.32-36

⁴³Wara taraju hwein ca tomi' tococwa oro hwanana pane ac tococwa na. Ta noc mon win ma' nem me ta. Noc ron co noc nem ta, ac i ma' paxi' na ca tomi' tococwa pane. ⁴⁴Ane tomi' pan xuhu' pain i ca' ne: Ta noc huhun co noc nunuhu' ma' me. Tomi' mi' jujun con Iri' Jam oro wari' co ja' tequi' quep em' nunuhu' ma' quem. ⁴⁵Ma' ta querec pin' xihwe pain ca an xiho' hun Cotere' co pe pawin ma', pain ca om noc taxipa' cocon oro wari'

co noc pan nonon ma'. Win ne ca ja' toha con xina ma'. Toha toha mi' xam' tata oro wari', toha mi' tata co pan teretem nana ma', toha mi' tata co awi nana ma' quem. Ac i ma' na pain ca tomi' pan' cain xowi' quem. Pan' pa' pan' pa' xam' tata oro wari', pan' pa' tata co xuruxut xo' nana ma', pan' pa' tata co om xuruxut xo' nana ma' quem.

⁴⁶Je ca tomi' xuhu' ca': Mo ta om noc e' huhun oro wari' co om noc nunuhu' ma'. Cain' cain' xuru' Iri' Jam pain i ma' quem? Mi' turuhu' pain oro ca awi wa pain ca om noc e' huhun co om noc nunuhu' ma' ra? Om na. Ac i ma' ara xi' nana oro caxicon wari' co an xiho' nonon co cut in taxipa' nanain oro imposto ca pagar je tococwa oro wari' ma'. Om ca noc cocon co om noc pan nonon. ⁴⁷Mo ta tomi' querec te e' huhun oro wari' co tomi' querec te nunuhu' ma' quem, hohot tara pain i ma' pahu' ra? Awi tiquin' ca' huhun oro wari' pain ca ara ac i ma' hwe ra? Om na quem. Ac i ma' ara xi' nana oro wari' co om howa nonon Iri' Jam ma', tomi' querec te e' nonon co tomi' querec te pan nonon ma'.

⁴⁸Je ca tomi' xuhu' ca': Iri' wari' je. Win ca Cotere' co pe pawin cwain ta.

Ca xiram pa' tococwa oro wari' co om nonon carawa

6 Ma' tara xumuhu' me. Ara iri jein ca awi wa pain ca ara xin hwein ca param nucun Iri' Jam ne, ta ara hwet to hwein cocon oro wari' me ta ac tococwa na. Ta querec ma' tatarapa' pain hwe me. Mo ta querec ma' tatarapa' pain hwe, om ta mi' cuhu' pain oro ca awi wa Cotere' co pe pawin cwain.

²Je ca tomi' xuhu' ca', tomi' inem pain ca xiram pa' ton mon wari' co om non carawa ma', pain ca mi' ton mon pain caramajum ma'. Ta mi' xec xec mon pain me. Ta an xiho' momon oro wari' co ac ca iri'o' xi' ca' tara me nana ma'. Mi' xec xec to ara xi' nanain oro xirim ca cut in to xucucun ma'. Mi' xec xec to nanain wana ca xuruxut in to caca oro wari' ma' quem. Ma' ta querec pin' cacapari' oro wari' ta nana. Ma' ta awi tamana nana xin ne cacapari' ta nana. Je ca tomi' xuhu' ca', tomi' iri'o' inuhu': Oro wari' co mi' xec xec ac i ma' nana ma', om ta cut pan cacain oro ca awi wa con Iri' Jam. Xi wara cut pin ara cacain ca tomi' querec te nucucun oro win ma'

5.46 Imposto ma', je i ma' dinheiro ca pagar je caca oro taramaxicon pain governo. Ma' ta ha' caparut pain ca taramaja wa pain ca governo urut ca' nana. Je cwerein pain cara pane, je cwerein pain xocori ca' quem, pain ca pagar jein imposto ta cacapari' oro taramaxicon.

caca pain ca xec xec ximama' nucucun ta. ³Wum pain ca xiram pa' mon wari' co om non carawa ma' iri na ne, pain ca mi' ton mon pain caramajum ma', mi' hohomu ac mon pain tara. Xica' to je pain ca mi' xujuhu' pain. ⁴Ma' ta om taxi' quequem oro wari' pain ca mi' mon pain caramajum. Cut mi' ac quem, pain tara ca awi wa Cotere'. Taraju pa' ra e': Ara iri irin ca awi wa pain ca xica' pe nexi' ne, om paxi' na ca querec cacapari' oro wari' ma'. Ane querec pan capari' Cotere' ne ta. Wirico tara co cut mi' nem pain oro ca awi wa quem.

Ca tomi' xun Iri' Jam

Lucas 11.1-4

⁵Tomi' xun iri jun Iri' Jam ne, ta an xiho' huhun oro wari' co ac ca iri'o' xi' ca' tara me nana ma', co tomi' xec xec nonon Iri' Jam pain ca tomi' xun cocon ma'. Tomi' xun iri nonon ne, coromicat ximama' ac xucucun na: Tomi' pe iri ton Iri' Jam pain oro xirim ca cut in to xijexi' ne, querec pin' ac cacapa' tara oro win ma' ne pain ca tomi' ton ta. Ac i ma' tatarapa' pain ca tomi' pe ton Iri' Jam pain ximijain wana ma' quem. Querec pin' tatarapa' pain ca tomi' ton ta, ac i ma' na ca coromicat ximama' nucucun pain ca an hwet pe pan xucucun pain ca tomi' cocon Iri' Jam. Je ca tomi' xuhu' ca', tomi' iri'o' inuhu': Om ta cut pan cacain carawa ca awi con Iri' Jam. Xi wara cut pin ara cacain ca tomi' querec te nucucun oro win ma' caca pain ca xec xec ximama' nucucun ta.

⁶Wum iri na ne, pain ca tomi' ton mon Iri' Jam ma', corom mao ac main tara man pain tequipain xirim ma', tao' pa' ac main tara manain, tomi' ac mon tara Cotere' co om querec wa. Taraju pa' ra e': Tomi' ton iri mon Iri' Jam pain ca xica' pe nem ne, om paxi' na ca querec quequem oro wari' cwa', ane querec pan quem Cotere' ne ta. Wirico tara co mi' nem pain oro ca awi wa quem.

⁷Tomi' xun Iri' Jam iri je ne, ta tomi' ximama' e' hwe me, pain ca tama' in hwet in hwet hwein ca wara tomi' nuhu'. Ac i ma' ara xi' nana co om howa nonon Iri' Jam ma'. Tomi' ha' tarapari' ma' nonon pain ca tomi' tamana e' nucucun. ⁸Ta an xiho' huhun me. Wara taxi' ara xi' nuhu' Cotere' pain carawa ca param hwe ma', pain ca om cuhu' carawa ma'. Wara taxi' nuhu' pain ca om tomi' querec hun ma' quem. ⁹Tomi' xun iri jun ne, tomi' ca' jun:

Coturur Iri' Jam co pe pawin.

Param urut pum pain ca querec pin' querec pin' pi' pin quequem
oro wari' pain ca awi tamana nem pain ca Iri' Jam nem.

¹⁰Param urut pum pain ca maqui' hap ne xec pain ca taramaxicon
pe ho' taramaxicon pe ho' xam' momon oro
wari' pain oro xijein macan' ca' quem.

Param urut pum pain ca tomi' ha' tomi' ha' xam' quequem oro
wari' pain oro xijein macan' ca' quem.

Win caca oro jam co taramaja mi' nenem ma', pain ca tomi' ha'
tomi' ha' pi' pin quequem pain pawin ma'.

¹¹Mi' xut pain carawa ca cao' wa pain xec ca' quem.

¹²Xic am pin rain ca caracat nuxut ca' quem.

Win ne ca mana' mana' om pin urut cocon oro wari' pain ca
caracat nucucun pain ca ara cup cacaparut ca'.

Tomi' xo' urut cocon, om ca mana' mami' urut cocon.

¹³Narain ho' xut pain ca tomi' querec caparut Caxicon Jam quem.

To' witan ca' xut con quem.

Wum pan ara xi' na co Iri' Taramaxicon cara ma'.

Tama' hwarar opa cara ma quem.

Tama' awi tamana na ta cara nenem oro wari' cwa' quem.

Amém, iri'o' na ca tomi' ne ta.

Ac i ma' je pain ca tomi' xun hun Iri' Jam ta na ca tomi' tococwa ma'.

¹⁴Je ca tomi' xuhu' ca' ac tococwa na. Mo ta mana' mana' om pin huhun
oro wari' pain ca caracat nucucun ma', pain ca ara cup cucuhu' ma', xic
am pin ac cain tara ca caracat nuhu' Cotere' co pe pawin cwain. ¹⁵Mo ta
mana' cara huhun pain, om ta xic am pin cain ca caracat nuhu' Cotere' co
pe pawin cwain quem.

Ca an pe xine ca cao' wa con Iri' Jam

¹⁶Mo ta an to xin hwein ca cao' wa con Iri' Jam ma', pain ca momon
tomi' e' xun hun ma', ta naro hwe me ta ac tococwa na. Ta an xiho' huhun
oro wari' co ac ca iri'o' xi' ca' tara me nana pain ca an to pin cacain ca
cao' wa con Iri' Jam. Naro ximama' nana. Ma' ta querec pin' cacapari' oro
wari' pain ca an to urut pain ca cao' wa pain ca momon tomi' e' urut con
Iri' Jam cwa' nana. Je ca tomi' xuhu' ca', tomi' iri'o' inuhu': Om ta cut pan

cacain oro ca awi wa con Iri' Jam. Xi wara cut pin ara cacain ca tomi' querec te nucucun oro win ma' caca pain ca xec xec ximama' nucucun ta.

¹⁷ Je ca tomi' xuhu' ca', tomi' inem pain ca an pe main ca cao' wa pain ca momon tomi' e' ton mon Iri' Jam ma'. Ac pain oro xijein xec ma' tara pum, hohoc rain tucum, pan xic rain tenenem quem. ¹⁸ Ma' ta om querec pin' quequem oro wari' pain ca an pe main ca cao' wa ma', pain ca momon tomi' e' ton mon Iri' Jam. Taxi' e' terem Cotere' co om querec wa ma'. Taraju pa' ra e': An pe iri rain ca cao' wa pain ca momon tomi' e' ton mon pain ca xica' pe nem ne, om paxi' na ca querec quequem oro wari' cwa', ane querec pan quem Cotere' ne. Wirico tara co cut mi' nem pain oro ca awi wa ta.

Ca cut in xo' xine carawa pain pawin

¹⁹ Ta cut in xo' tamana hwein oro carawa pain macan' ca' me ta ac tococwa na. Cao' ara xi' nain caramajixi' caxicon tohoro' pain macan' ca'. Cao' nain caxicon tohoro', tot mao na quem. Ma' nana co joc pa hot nanain xirixi', cut noc xa ac cacain na quem. ²⁰ Je ca tomi' xuhu' ca': Cut in xo' tamana e' jein carawa pain pawin cain. Xi ma' ca caxicon tohoro' pain i cain ta. Om ca tot mao ne caramajixi' pain i cain, om ca corom taparu caca co cut noc xa xi' nana pain i cain, om ca cut noc xa cacain caramajixi' pain i cain quem. ²¹ Jain jain e' iri irin oro caramajixi' ca cut in xo' iri' pain macan' ca' ne, pain ca ara e' xin ca param nexi' ca', je i ma' tara ca win xumu iri'. Ane om ac i ma' ne pain oro caramajixi' ca cut in xo' iri' pain pawin cain ne. Jain jain e' iri irin ne, je i ma' tara ca win xumu mao iri' quem, je cwerein ta.

²² Ac naran nein cwerexi' na tocoxi' quem ac tococwa na. Ac ca toha capari' na pain cwerexi', ac ca tom xuruxut iri' na pain ca toha capari' tocoxi'. Je ca tomi' xuhu' ca', tomi' inem pain ca toha xo' ne tucum ma'. Mo ta toha xo' quem tucum ma', toha toha pi' pin ac nein tara cwerem. ²³ Mo ta om awi ne tucum ma' quem, mo ta paxi' ma, ac ca jo' pin ne na naran nem ma'. Ac ca om xiram pa' momon na oro win ma' nem, ac ca narain ho' momon na pain caramajum. Ac ca pe main na ca jitacat nein

6.22 Pain ca pijim' joc mam' mi' cain tocoxi' Jeju cwa', ac ca tomi' capari' na pain ca howa nexi' ca'. Mo ta xuruxut xo' iri' pain ca howa xun ca', ac ca querec pira iri' na, ac ca toha mi' capari' na naran pain ximixi'.

xim. Je ca tomi' xim ca': Mo ta win xumu e' main caramaji macan' ca', ac ca jo' pin ne na naran nem, ac ca pe main na iri' xim.

²⁴Om ca taramaja mi' 2 ac tococwa oro taramaxicon. Mo ta param tocwa xucun, noc ac tocwa tara xucun. Mo ta win xumu tocwa xucun, tomi' napat ac tocwa tara xucun. Je ca tomi' xuhu' ca': Om ca taramaja mi' ac hun Iri' Jam pain ca taramaja mi' taramaja mi' wet hwein dinheiro ta.

Caramajixi' con Iri' Jam

Lucas 12.22-31

²⁵Tomi' ac tococwa na: Je ca tomi' xuhu' ca': Ta toron ne xumuhu' pain ca ma' xirapa' na hwein oro caramaji macan' ca to' e' nuhu' me, je carawa ca cao' xi' hwe, je carawa ca toc xi' hwe, wirico wom co to xi' hwe ma' quem, ta toron ne xumuhu' pain me. Hohot paxi' na ca ma' capari' carawa ca cao' wa, ane hohot tamana pan ne ca e' nexi' ne. Hohot paxi' na ca ma' capari' wom co to iri' quem. Ane hohot tamana pan ne cwerexi' ca' ne.

²⁶Noro jein oro me ca toin mama' nein pawin ma'. Om paxi' na ca tota ne. Om ca oin' nein oro tocwi pain xitot, om ca cut nein caramaji, om nain xirim ca cut to xo' nein quem. Ane pa' mi' pan cain Cotere' co pe pawin ne. Je ca tomi' xuhu' ca': Querec wet paxi' nain oro me Cotere' ma'. Ane querec wet tamana pan cuhu' ne. ²⁷Je ca tomi' xuhu' ca' ac tococwa na. Iri' Jam ma', wara an to xo' nain oro xec nein ca e' e' wet nexi'. Ha' turuhu' pain ca mam' e' e' tiquin' wijimain ca' hwein pain ca toron tamana ne xumuhu' quem ra? Om ca ha' cuhu' ta.

²⁸Para toron ximama' ne xumuhu' con wom co to xi' hwe quem? Noro jein oro hwijein pana pain ca horon pin ne ma'. Om paxi' na ca taramaja ne, om paxi' na ca tu mi' xijein con wom quem. ²⁹Ane om ca wom co awi co awi tiquin' ca' nain hwijein pana ca' ne, om om na. Caramaju tamana paxi' na Salomão cara pane, awi tamana paxi' na womicon pane. Ane awi tamana ca' con womicon Salomão oro hwijein pana ca' ne. Tomi' iri'o' inuhu' ta. ³⁰To' awi tamana paxi' nain hwijein pana Iri' Jam ma', ane om e' cara ne ne. Awi nain xec ca', xec cono' pin ac ne na, tom pin ac xine na quem. Ane querec wet cain Iri' Jam ne, to' awi tamana nain. Je ca tomi' xuhu' ca': Om ta querec wet mip cuhu' quem ra? Om ta mi' cuhu' con wom quem ra? Ac ca om howa mip hun a xira. ³¹Je ca tomi' xuhu' ca': Ta toron ne xumuhu' me. Ta tomi' xujuhu' pain ca main xi carawa ca

cao' xi' ca' ne hwe me. Ta main xi carawa ca toc xi' ca' ne hwe me. Ta mon xi wom co to xi' cwa' ne hwe me. ³²Xi ac i ma' ara caca oro wari' co om howa nonon Iri' Jam ta. Tama' win xumu e' nanain carawa ca cao' wa, je carawa ca toc wa, wirico wom co to wa quem. Ane taxi' pan cuhu' Cotere' co pe pawin cwain ne, taxi' nuhu' pain ca om cuhu' carawa ca cao' wa. Taxi' nuhu' pain ca om cuhu' carawa ca toc wa. Taxi' nuhu' pain ca om cuhu' wom quem. Taxi' nuhu' pain ca ma' xirapari' na hwein quem. ³³Win xumu cain' jun Iri' Jam. Tomi' ha' jun pain ca taramaxicon pe ho' cuhu' ma'. Cut mi' ac cuhu' tara pain oro carawa ca om nuhu' ma'. ³⁴Je ca tomi' xuhu' ca': Ta toron ne xumuhu' pain oro ca to' i'ina nuhu' pain xijein xec me. Hohot turuhu' pain xijein xec. Ma' paxi' turuhu' oro ca to' i'ina cuhu' pain xijein xec ma'. Je i ma' ira, ta toron ximama' ne xumuhu' pain me. Mo ta wara toron ximama' ne xumuhu' pain, ac ca to' hwara' pin hwein na. To wet iri ne ma' jein ta.

Ca tomi' em' xijexi'

Lucas 6.37-42

7 Ta tomi' em' xujuhu' pain ca pan teretem wa me ta ac tococwa na. Ma' ta om tomi' em' cuhu' pain ca pan teretem wa Iri' Jam ta. ²Mo ta tomi' em' xujuhu' pain ca pan teretem wa ma', ac i ma' tara ca tomi' em' xim cuhu' pain ca pan teretem wa Iri' Jam quem. Ca tomi' em' tamana nuhu' ma', win hwe ma' ac cuhu' tara, tomi' em' ac i ma' ac cuhu' tara pain ca pan teretem wa quem.

³Tomi' inem pain ca tomi' em' mon win ma' ma pain wijimain ca caracat nucun ma' ac tococwa na. Tomi' em' iri mon ne, an xiho' ac mon na wari' co noro e' nain wijimain tohoromi pana ca pe nain tocon win ma' ca ma'. Xi querec pin' pan cain cote ne pana ca pe nain tocon ta! ⁴Hot pin tain wijimain tohoromi pana ca pe nain tucum ma' xa' mon win ma' ma ra? Je i ma' ne ma ra? Cain' cain' xima quem? Ma' na ca tomi' ac i ma' ac ma ra? Pe ara xi' nain tucum cote ne pana ta. ⁵Ac ca iri'o' ta' ca' tara me ma ra? Hot pin cain' rain cote ne pana ca pe nain tucum ma'. Querec toha ac ma tara, ha' pin ac quem tara pain ca hot pin main wijimain tohoromi pana ca pe nain tocon win ma' ma ma'. Ac i ma' na ca tomi' tococwa ma'.

⁶Ta pijim' mi' huhun pain capiacaon Iri' Jam oro wari' co tomi' napat nanain pain ca om howa nucucun me ta ac tococwa na. Noro jein carawa

ca awi ca an terem' mi' tocwa oromijac ma'. Mo ta an terem' mi' hun pain, xin in taqui' hwet ac cuhu' tara oromijac. Noro jein wijimain pacun ca awi tamana ma', pérola ma'. Mo ta wixicao' mi' xine pain caji mijac ma', xom tapiripit pin ac nein tara quem. Ac i ma' na ca tomi' tococwa ma'.

Ca mi' ne tocwa pain carawa Iri' Jam

Lucas 11.9-13

⁷Tama' mi' ne jun pain oro ca param nuhu' Iri' Jam ta ac tococwa na. Mi' ac cuhu' pain tara. Tama' pirao' jein carawa ca param hwe con. Mam' ac hwein con tara. Tama' tomi' jun pain ca quep xiho' xut ta hun ma' quem. Ac ca tataca hwein tara pana ca mam' tao' pa' nein manain xiricon ma', ac ca pa xat mi' cuhu' pain tara quem. Quep xiho' ac cuhu' tara quem. ⁸Xi taraju wet ara tococwa oro wari' co mi' ne nonon pain carawa ta. Oro co tama' mi' ne nonon pain carawa ma', mi' mi' xam' ac tococwa pain tara. Oro co tama' pirao' nanain carawa ca param caca con, mam' ac cacain con tara. Oro co tama' tomi' nonon pain ca quep xiho' xut me cocon ma', co ac ca tama' tataca tataca cacain na manain xiricon ma', ac ca pa xat mi' tococwa pain tara man quem, quep xiho' ac tococwa tara quem.

⁹Am ma' ca win ma' nuhu' co wanxi' ma'. Cain' cain' ta' ca pain ca mi' ne pain capam' pan con panxica ma'? Mi' xiron pain pacun ra? Om na. ¹⁰Cain' cain' ta' ca pain ca mi' ne con hwam con quem? Mi' xiron con em' ra? Om na quem. ¹¹Je ca tomi' xuhu' ca' ac tococwa na. Wahu' pain ca wari' hwe ma', caracat paxi' hwe, ane ma' ne xumuhu' ne. Xiram pa' taxi' huhun mana panxihwe pain ca mi' e' huhun pain carawa ca awi. Cain' cain' ca Cotere' co pe pawin cain quem? Om ta xiram pa' tamana pan ca quem? Om ta mi' cocon pain carawa ca awi oro wari' co mi' ne nonon pain ra? Mi' pan totoron pain ta.

¹²Je ca tomi' xuhu' ca': Oro ca ara mi' ma' tatarapari' ne huhun oro wari' ma', je i ma' tara ca ara mi' huhun quem. Wari' co ara ac i ma' ma', ac ca tomi' ha' pi' pin cain na oro ca xirao' nucun Moisés cocon oro profeta cara pane. Ac i ma' na ca tomi' tococwa ma'.

Wijimain wana

¹³⁻¹⁴Ma' 2 na wana ta ac tococwa na. Wanaji cote ne xe ma', hwara' na quimain. Xut hohot na. Mija nana wari' co xuruxut nanain quem. Wana ca mao nain ca e' cara to wa ma' iri na ne, om ca hwara' ne quimain. Om paxi' na ca xut ac xine. Ma' paric ca' e' nana co mam' nanain quem. Je ca tomi' xuhu' ca': Xuruxut mama' jein wijimain wana ca mao nain ca e' cara to wa ta. Ac i ma' na ca tomi' tococwa ma'.

Oro wari' co pijim' mixein taxipa' nana

Lucas 6.43-45

¹⁵Ma' tara xumuhu' me, ta taraju wet huhun oro wari' co profeta urut ta ximama' nunuhu' pain ca pijim' mixein nucucun ma' me ta ac tococwa na. An xiho' paxi' nanain ovelha ca awi pain ca om mana' nein ma', ac ca awi caca e' na pain curucucun. Ane om awi pan ne ximicocon ne. An xiho' e' nonon copacao' co om awi pain ca mana' nucun. ¹⁶Querec pin' iri jein ca pan teretem nucucun ne, taxi' ac huhun tara pain ca mixein nucucun. Noro jein caji pi ma'. Wina tara caji pi ra, mi tarain uva ra? Om na. Caji nahwarac ca to' taratan wari' ma' quem, wina tara ra, mi tarain figo ra? Om na quem. ¹⁷Oro panaji memem ma' quem, awi iri na panaji ne, wina awi ac ne na. Pan tem iri na panaji ne, wina pan tem ac ne na quem. ¹⁸Panaji memem ca awi ma', om ca wina pan tem ac ne. Panaji memem ca pan tem ma', om ca wina awi ac ne quem. ¹⁹Oro panaji memem ca om wina awi ma', ta' caracat pi' pin ac xine na, wixicao' mi' ac xine na pain xe quem. ²⁰Je ca tomi' xuhu' ca': Querec pin' iri jein ca pan teretem nucucun oro wari' co profeta urut ta ximama' nana pain ca pijim' mixein cucuhu' ma' ne, taxi' ac huhun tara pain ca mixein nucucun ta.

²¹Oro wari' co Taramaxicon ne nanapa' ma', Taramaxicon ne Taramaxicon ne paxi' nanapa', ane om taramaxicon pe ho' taramaxicon pe ho' xam' cocon Te Iri' Jam co pe pawin ne. Taramaxicon pe ho' e' tata co ara nanain ca param nucun Te. ²²Maqui' iri tara xec nein ca tomi' xo' toton ta' oro wari' pain oro carawa ca ara caca pain ca e' e' wet nucucun ca' ne, mija ac caca tara co tomi' mixein ca' nanapa': Taramaxicon nuxut, Taramaxicon nuxut, om ca querec pin' maparut ra? Om ca tomi' hwet taxipa' urut pain wuxum pain ca pijim' urut pain capijam pane ra? Om

ca tomi' hwet taxipa' urut pain wuxum pain ca tomi' jein pin urut cocon oro caxicon jam pane ra, je pain ca an hwet urut pain ca hwara' opa nem pain ca ara urut pain carawa ca om ara taxi' ne ca wari' wa pane quem? Tomi' mixein ac i ma' tatarapa'. ²³Tomi' ac toton tara: Om ca querec pin' camain' xuhu' pane ta. In ca' xine ta oro caracat co pan teretem nana, ac i ma' tara ca tomi' toton ta na ca tomi' tococwa ma'.

**Wari' co quep pe nain xirim pain pacun, xucun
wari' co quep pe nain xirim pain namaji quem**

Lucas 6.46-49

²⁴Je ca tomi' xuhu' ca' ac tococwa na. Wari' co taraju wet nain ca tomi' ne ca', co tomi' ha' napa' ma' quem, ma' na ximicon. An xiho' non wari' co coromicat xo' ma', co quep pe nain xiricon pain pacun. Quep pin iri nain xiricon ne, ²⁵aram aram pan' ac ne na xowi'. Pan' tamana pan' tamana, we' pin ac ne na com. Nuru mip ac ne na hotowa pain xiricon. Nuru mip nuru mip paxi' na hotowa pain xiricon ma', ane om pa cat mao ne ne. Xi om ne ca pe ho' ara nein pacun ta.

²⁶Wari' co taraju paxi' nain ca tomi' ne ma' iri na ne, taraju paxi' napa', ane om tomi' ha' capa' ne. An xiho' non wari' co om coromicat xo' ma', co quep pe nain xiricon pain namaji. Quep pin iri nain xiricon ne, ²⁷aram aram pan' ac ne na xowi'. Pan' tamana pan' tamana, we' pin ac ne na com. Nuru mip iri nain xiricon hotowa ne, pa cat mao ac ne na. Pa caracat pi' pin na. Ac i ma' na wari' co tomi' ha' nain ca tomi' ne ca', ac i ma' na wari' co om tomi' ha' nain quem. Ac i ma' na ca pijim' ca Jeju pane.

²⁸Maho' iri nain ca pijim' wa ne, wa wa ac caca na oro wari' co taraju nanain ca pijim' nucun. ²⁹Xi an hwet pan ara cain ca hwara' opa nucun pain ca ca' na cain capijacon Iri' Jam ta. Om ca an xiho' tococwa oro co tomi' capijacocon e' nana pain ca ca' na taxipa' nanain ca xirao' nucun Moisés ma'.

Ca quep xio pin tocwa wari' co ma' non caji nan

Marcos 1.40-45; Lucas 5.12-16

8 Quiji' ca' ac cain na pacun Jeju. Mija nana wari' co ja' ja' nonon. ²Hwet ac con na wari' co ma' non caji nan. Lepra na wixinain ca caxi

nucun. Pe torotop mi' ac con na, tomi' ac con na: Taramaxicon ne. Mo ta quep xio xim mapa' ma', taxi' inem pain ca quep xio taxi' mapa' ta non.

³An piri' iri nain micon ne, quep ac con na, tomi' ac con na: Param inain, xio pin ra ta non. Xio hap pin ac ca na, om pin con na caji nan.

⁴Tomi' ac con na Jeju: Taraju wet ne e'. Ta tomi' hwet momon oro wari' pain ca quep xio xim ca' me ta non. Hwet e' ron sacerdote co taramaja pe nain cote ne xiricon Iri' Jam ac con na. Noro rain cwere pain ca xio pin ta' ca' ac mon tara, mi' ac mon tara pain carawa ca tomi' capari' Moisés pain cara pane, pain ca tomi' xo' capari' con wari' co xio pin pain caji nan. Mi' ron pain, tom mi' ron pain Iri' Jam me ac mon tara. Tom tain' iri tarain ne, querec pin' ac quequem tara oro wari' pain ca xio nem ma', je pain ca querec hohot pin quem Iri' Jam ma' quem na ca tomi' con ma'.

**Ca quep xio pin tocwa co taramaja mi' non
taramaxicon nucucun oro soldado**

Lucas 7.1-10

⁵⁻⁶Mao ac cain na Cafarnaum Jeju ma'. Wa' mao iri na ne, xut hwet ac con Jeju na taramaxicon nucucun oro soldado ma'. Romano na. Ma' 100 nana oro soldado co taramaxicon ne nonon. Tomi' ac con na: Taramaxicon ne. Caxi tamana na wari' ne co taramaja mi' e' napa'. Carama pe na, om ca meo mami' ca pain ca caxi tamana nucun. Terem' e' na, terem' pe nain xuru cain. Jain jain na pain ca caxi tamana nucun ta non.

⁷Hwet ton, quep xio ton ta ac con na Jeju.

⁸Om na ta Taramaxicon ne ac con na. Om ca ha' ne pain ca corom main xuru, xi awi ta' ta. Tomi' pira e' ron, xio tara ta e' ron. Xio pin ac ca tara. ⁹Tomi' ha' terem ca caxi nucun ta, taxi' ina. Win ne ca tomi' ha' pan toton oro taramaxicon ne ca', ma' nana oro soldado ne co tomi' ha' nanapa' quem, je cwerein parut. Mao rain i cain inon xucun, mao ac ca na. Hap ra ta ac ton na xucun, hap ac ca na quem. Ara rain i ca' ac ton na wari' ne co taramaja mi' e' napa', ara ac cain na quem na ca tomi' con ma'.

¹⁰Taraju iri nain i ma' Jeju ne, wa wa tamana ac con na, tomi' ac tococwa na oro wari' co ja' ja' nonon ma': Howa tamana napa' co cwa' ta! Tomi' iri'o' inuhu', om ca querec camain' ton win judeu ta' co an xiho' non pain ca howa nucun ta. ¹¹Je ca tomi' xuhu' ca'. Mija tatara oro xucucun wari' co maqui' nanain oro xijein macan' pain pira. Cao' querec te wi xi',

xao to ho' ac xucucun tara pain pana ca mam' cao' to wa pain pawin cain, pain ca taramaxicon pe ca Iri' Jam cwain, xao to ho' totoron hwanana nexi' Abraão con Isaque con Jacó. ¹²Oro judeu co wara tora' paxi' wawa pain cara pane iri nana ne, pain ca mama' tatarain pawin ca taramaxicon pe ca Iri' Jam paxi' wawa pane, wixicaracao' mi' ac tococwa tara pain ca jitacat tamana nein. Oro wari' co jain jain to nanain i cain, awaran tamana ac caca tara, cacacao' ac cacain tara xicocon pain ca jain jain tamana nucucun ta na.

¹³Tomi' ac con na taramaxicon nucucun oro soldado Jeju: In mao rain xurum ta. Xio pin na wari' nem. Win ne ca howa mapa' ma' ac con na. Xio hap pin ac ca na wari' nucun ta.

Ca quep xio pin cocon oro wari' Jeju

Marcos 1.29-34; Lucas 4.38-41

¹⁴Mao ac cain na xiricon Pedro Jeju ma', querec ac cam na japinacon co caxi ma'. Terem' na, xi om ne ca xain ara cama ta. ¹⁵Quep ac cam na pain micam, xain xain om pin ac cama na. Tequi' pe ac cama na, ara mi' pan ac con na pain carawa ca cao' wa quem.

¹⁶Xo' um pin iri na ne, o qui' mija ac tococwa na con Jeju oro wari' co corom to ho' nonon caxicon jam. Tomi' e' na, hwerehwet ca' jujun e' na, hwerehwet ca' ac tococwa na. Quep xio quep xio pi' pin ac tococwa na oro wari' co caxi nana ma' quem. ¹⁷Quep xio pin iri tata ne, hwet pin ac ne na ca wara tomi' pe ca profeta Isaías cara pane. Ca' na ca tomi' pe nucun:

Cut ca' napari' pain ca caxi nexi'.

Quep xio napari' ta.

Ac i ma' na ca wara tomi' pe ca Isaías pane.

Oro wari' co ja' ja' xun paxi' nonon Jeju

Lucas 9.57-62

¹⁸Querec iri nonon oro wari' Jeju ne, pain ca to to mam' cocon ma', tomi' ac tococwa na co taxipa' ca ma'. Pan horoho mama' xin xijein cacarain com cain e' ac tococwa na. ¹⁹Om ca mama' querec caca, xut hwet ac con na wari' ma', co ca' na taxipa' nain ca xirao' nucun Moisés ma'. Tomi' ac

con na: Taramaxicon co ca' na taxipa' capijacon Iri' Jam ac con na. Ja' ja' cara xim pain oro ca mao ta' ma ma' na ca tomi' con ma'.

²⁰ Tomi' ac con na Jeju: Noro rain oro carawa pain mi ma'. Ma' ma' xam' nain ca pi'am to nein. Noro rain oro me ma' quem. Ma' ma' xam' nain xirinain quem. Wata' iri na ne, pain ca Iri' Wari' ta' ca', om napa' xirim ca pe xo' ta' ca' na ca tomi' con ma'.

²¹ Tomi' ac con na xucun ma', co taxipa' paxi' non ma': Wata' quem Taramaxicon ne ac con na. Ane na e' capa' pain ca in hwet cain' ton te ne. Mi' pin iri tara ne, an corom pe pin iri tain curucun pain manain pacun ne, ja' ja' ac xim tara. Ma ma? Ac i ma' na ca tomi' con ma'.

²² Om na ta ac con na Jeju. Ja' ja' ho' ne pain xocori ca'. Oro win ma' ma co om howa nanapa' ma', co an xiho' nonon co cono' nana ma', wiricoco pan tatara co cut corom to pan nonon co cono' nana ta na ca tomi' con ma'.

Ca tomi' om pin cain camana' Jeju

Marcos 4.35-41; Lucas 8.22-25

²³ Maji ta ac ca na Jeju, piton pe ac cain na mam' horoho wa ma', ja' ja' ac cocon na co taxipa' ca ma' quem. ²⁴ Pan horoho pan horoho. Ane ane maqui' ac ne na camana' ca nuru mip tamana. Wap tamana na com ta! Moin' pin tain na mam' horoho nucucun com ira. Ane pi'am ca Jeju ne. ²⁵ Ho' querec xun ta ac caca na co taxipa' ca ma', ho' querec ac cocon na quem. To' witan xut ta Taramaxicon nuxut. Cono' pin xi' urut ta na ca merem caca ma'.

²⁶ Cain' cain' xihwe quem ac tococwa na. Para jin' tamana hwe ma' quem? Howa wijimain e' mahu' ra tata. Tequi' pe pin ac ca na, tomi' in pin ac cain na hotowa pain ca wap tamana nein com. Nuru nuru om pin ac ne na, tacana pe pin ac ne na com ma' quem. ²⁷ Wa wa ac cocon na.

8.20 Pain ca Iri' Wari' ina ta ca Jeju pane, ac ca tomi' ta' ca na ira: Maqui' paxi' inain pawin, ane ac wari' ta' ne. Wata' co iri' taramaxicon ta, co wara tomi' pe ca Iri' Jam pane. Ca' na ca wara tomi' pe ca pata' pane: Main hwet turuhu' Iri' Wari' ne co to' witan xim nuhu' ta nuhu' pata' pane. To' witan ca' turuhu' pain ca caracat nuhu' ta nuhu' pata' pane, ac i ma' na ca tomi' ta' ca Jeju ira. **8.20** Tomi' mi' iri non pain ca om napa' xirim ca pe xo' ta' ca' con Jeju ma' ne, tomi' xo' ac i ca' paxi' non: Mo ta ja' ja' mapa', om terem xirim ca pe xo' ma. Win ne ca om pan capa' xirim ca pe xo' ta' ca' quem, ac i ma' paxi' na ca tomi' xo' con ma'.

Cain' cain' ca co cwa' ne ta? Tomi' ha' ximao non oro carawa ra? Tomi' ha' non camana' pain com quem ra xucucun.

Ca quep xio pin tococwa wari' co corom to ho' nonon caxicon jam

Marcos 5.1-20; Lucas 8.26-39

²⁸ Pan horoho pan horoho, hwet pin iri nanain xijein cacarain ma' ne, je pain macaracocon oro wari' nein Gadara ma', hwerehwet qui' ac caca na wari' co corom to ho' nonon caxicon jam. Ma' 2 nana. Maqui' nanain oro manain pacun ca cut corom to tococwa co cono' nana ma'. Mana' tamana nana. Om ca wixicam ac tococwa. Moji'ac ca' taxipa' tata ira. Hwerehwet qui' iri nana ne, xuruxut cam' ac cocon na Jeju. ²⁹ Merem mip ac cocon na: Cain' cain' xim maparut quem Panxica Iri' Jam? Quep em' xim maparut pain ca om maqui' querec ne xec nein ca mama' jein xe xim caparut Iri' Jam ra, ac i ma' na ca merem nucucun.

³⁰ Cao' to nain i ma' caji mijac ma'. Mija na caji mijac. Iritocwinain ta. ³¹ Jain jain ac caca na oro caxicon jam nucucun quem. Mo ta tomi' jein pin xim maparut, mama' jein caji mijac cain ac maparut tara. Corom hwet jein ta ac maparut tara, ac i ma' na ca merem nucucun.

³² Mama' jein ta ac tococwa na. Hwerehwet ca' ac cocon na, corom hwet ac cacain na caji mijac ma', tamanain to pin ac ne na quem. Jein quiji' mama' ac nein na ca tamaja ne macan' ma', jein jein, wara ca' na com ma', pan corom mama' ac ne na, cono' cono' pi' pin ac ne na quem.

³³ Caram ma' co querec wet nanain caji mijac ma', jein mama' ac caca na. Tan' mama' iri nanain cidade ne, tomi' hwet ac cacain na ca ara ca Jeju ma', pain ca quep xio pin tococwa caram ma' co corom to ho' nonon caxicon jam ira. ³⁴ Maji con ta ac xucucun na, jein hwet ac cocon na Jeju. Hwet iri nonon ne, jain jain ac caca na, mao ra ta, paca' rain macaraxut ta ac cocon na pain ca tomi' mip cocon ma'.

Ca quep xio pin con co carama pe Jeju

Marcos 2.1-12; Lucas 5.17-26

9 In mama' xi' ta ac ca na Jeju, piton to ac cacain na mam' horoho wa ma', pan horoho in mama' ac cacain na xijein cacarain cain, mama' ac cacain na cidade nucun Jeju. ² Maqui' ac caca na wari' co an mamam'

nonon co carama pe ma'. Terem' pe nain witacon. Querec pin' iri tata pain ca howa cocon ne, tomi' ac con na co carama pe ma'. Hwara' opa ra e' arain. Xic am pin inain ca caracat nem ta na ca tomi' con ma'.

³To nanain i ma' oro co ca' na taxipa' nanain ca xirao' nucun Moisés. Coromicat ximama' ac caca na: Cain' cain' xira con ne? Iri' Jam ina xi' ma na ron, ac i ma' na ca coromicat ximama' nucucun.

⁴Ane taxi' cocon Jeju ne, taxi' pan nonon pain ca coromicat nucucun. Tomi' ac tococwa na: Para coromicat ac i ma' hwe pain xumuhu' ma' quem? Om ca awi camain' ne ca coromicat nuhu' ta. ⁵I'ina xirapa' pain ca xic am tain ca caracat nem ton co carama pe cwa' ra? I'ina xirapa' pain ca tequi' pe ra ta, xut ra ta ton ra? Cain' xi i'ina ac capa' quem? ⁶Je ca tomi' xuhu' ca' ac tococwa na. Tomi' ton. Ma' ta taxi' mahu' pain ca mi' capa' pain ca hwara' opa wa Iri' Jam ta. Tomi' napa' pain ca Iri' Wari' ta' ca', xic am pin rain ca caracat nucucun oro wari' co to nanain oro xijein macan' ta napa'. Tomi' ac con na co carama pe: Tequi' pe ra. An rain witam ca mam' terem' pe ma ma'. Mao rain xurum ta na ca tomi' con ma'.

⁷Tequi' pe ac ca na, mao ac cain na xiricon. ⁸Querec iri nanain i ma' oro wari' ma' ne, wa wa pin ac caca na, in ac tamana ac cocon na Iri' Jam quem. Awi na Iri' Jam ta, mi' non pain ca hwara' opa wa wari' cwa', pain ca quep xio ron co carama pe cwa' ta con ca' na ca tomi' caca ma'.

Ca ja' ja' ne capa' pain ca Mateus ta' ca'

Marcos 2.13-17; Lucas 5.27-32

⁹Mao ta' ta ac ca na Jeju, xut mao ac ca na. Xut xut, querec ac capa' na pain ca Mateus ta' ca'. Xao pe pe inain ca taramaja pe ta' ma', pain ca cut in tain oro imposto nucucun oro wari' ma'. Ja' ja' ne e' ac capa' na. Tequi' pe ac ta' na, ja' ja' ac ton na quem.

¹⁰Cao' pe ac cain na xuru Jeju cocon co taxipa' ca ma' quem. Mija nana co cut in taxipa' nanain oro imposto ma', mija nana oro xucucun co hwet taxipa' wixicocon pain ca pan teretem nucucun ma' quem. Xao to ho'

9.10 Wari' co cut in taxipa' nanain oro imposto ca pagar je tococwa oro wari' pane, taramaja mi' nonon oro taramaxicon nucucun oro romano, taramaja mi' nonon taramaxicon Herodes quem. Mija nana co mixein ho' mixein ho' nonon oro win judeu caca quem. Cut in tiquin' ca' nanain dinheiro ca cut in je tococwa pane. Cut mi' wijimain iri tata pain oro taramaxicon ne, pe ho' wijimain ac cocon na quem. Je ca noc tococwa pane. Noc tamana nonon oro win judeu caca pane.

nanaparut pain pana ca mam' cao' pe wa ma'. ¹¹ Querec iri nanaparut oro fariseu ma' ne, pain ca cao' to ho' urut cocon oro caracat ma', tomi' querec ac cacaparut pain ca taxipa' urut con Jeju. Cain' cain' xira co ma' co ca' na nuhu' pain capiiacon Iri' Jam ma' quem? Para cao' pe ho' cocon co cut in taxipa' nanain oro imposto ca pagar je cacapari' oro taramaxicon quem? Para cao' pe ho' cocon oro caracat ma' quem na ca tomi' cacaparut ma'.

¹² Taraju nonon Jeju ma' quem. Tomi' ac cocon na: Om ca cwirin' je toton oro wari' co awi urut xi' ma nana ma'. Cwirin' je e' inonon co querec pin' pan xucucun pain ca caracat nucucun. Win ne ca om aramao xio tococwa oro wari' co om caxi nana ma'. Aramao xio e' tata co caxi nana ma'. ¹³ Je ca tomi' xuhu' ca': Na e' na pain ca taraju pa' hwein capiiacon Iri' Jam ca'. Je i ca' ca tomi' nucun:

Param inuhu' pain ca xiram pa' huhun oro wari'.

Noc inuhu' pain ca tom tain' mi' e' mahu' pain carawa nuhu' ta.

Ac i ma' na ca tomi' cuhu' Iri' Jam pain capiiacon ca' tata. Je ca tomi' xuhu' ca' ac tococwa na. Om ca cwirin' je toton co wara xuruxut xo' nana ma'. Cwirin' je e' inonon oro caracat cwa', je ca maqui' ta' ca' na ca tomi' tococwa ma'.

**Ca om na ne pain ca joc wanan xine ca pijim' nucun
Jeju pain wara ca pijim' nucucun oro hwanana**

Marcos 2.18-22; Lucas 5.33-39

¹⁴ Maqui' ac caca na co taxipa' ca João ma', co ja' taxipa' com ma', tomi' ac cocon na Jeju: An to taxipa' urut pain ca cao' wa, ma' ta tomi' xun Iri' Jam urut. Ac i ma' nana oro fariseu ma' quem. Para om ac i ma' caca co taxipa' ma ma' quem nonon.

¹⁵ Om na, noro jujun oro wari' co tomi' querec te xucucun pain ca an tam narima' ca win ma' nucucun ma' ac tococwa na. Ma' tara ca tomi' xaxa' ac caca pain ca pe ho' pe ho' wet cocon win ma' nucucun co an tam nam narima' ra? Om ca an to ac cacain, xi tomi' querec te ara caca ta.

Ame hwe e', main maqui' tara oro xec nein ca an ca' tococwa con, an to pin ac cacain tara ca cao' wa con ac i ma' na ca tomi' tococwa ma'.

¹⁶Noro jun wari' co oc xo' ton non wara wom co wein ma' quem ac tococwa na. Om ca oc tacan mi' con con xocoricon pawiricon wom. Mo ta oc tacan mi' con con xocoricon pawiricon wom ma', wixicon pin ac ca tara pain ca aram aram hohoc ton con quem, cote ne pin ac ne tara ca wein nucun. ¹⁷Ac i ma' na con wari' co ji'ao an pe xo' tain nain comi uva ca om mana' querec ma' quem. Om ca ji'ao an pe xo' cain pain wara tapari carawa. Mo ta ji'ao an pe xo' cain xocori comi uva ca om mana' querec pain wara tapari carawa ma', wein mao ac ne tara tapari carawa pain ca aram aram mana' ta' ne ca moin' nein ma', ao mao ac ne tara comi. Em' pin ac ne tara tapari carawa ma' quem. Je ca ji'ao an pe xo' e' xine xocori comi uva pain xocori tapari carawa ma'. Om ac ne na ca waraju xine comi uva je tapari carawa quem na ca tomi' tococwa ma'.

Ca quep xio pin cam narima' Jeju, je pain ca to' e' mami' cam pije' quem

Marcos 5.21-43; Lucas 8.40-56

¹⁸Tomi' tomi' wet nonon oro wari' Jeju ma', maqui' ac ca na co win ma' ne nonon co querec wet nonon oro win judeu caca pain xirim ca cut in to xucucun ma'. Pe torotop mi' ac con na Jeju. Tomi' ac con na: Mi' pin na panxita' ta, xo' mi' pin na. Hap ra ta, quep ram pain mum ma', ma' ta e' mami' cama ta na ca tomi' con ma'.

¹⁹Ma ac ca na, hwet ac con na, warut pain ca taxipa' urut con ca' quem, hwet pi' pin urut con.

9.15 Ac i ca' ta' na ca tomi' ca Jeju: Wiricoco co taxipa' ta' co an xiho' nonon oro wari' co tomi' querec te xucucun pain ca an tam narima' ca win ma' nucucun ma'. Tomi' querec te nana pain xocori ca', pain ca pe ho' pe ho' wet toton ca'. Ame hwe e', main maqui' tara xec nein ca to' pa' pin xim cacapa' co noc nanapa' ma'. Tomi' xaxa' ac caca tara co taxipa' ta' cwa', an to pin ac cacain tara ca cao' wa pata'. Ac i ma' na ca tomi' ca ma'.

9.17 Pain ca pijim' joc mam' mi' tococwa con wara wom con xocoricon pawiricon ma', je pain comi uva ca om mana' querec ma' quem, ca' na ca tomi' mao nein ca pijim' nucun: Oro wari' co hohot naparut ta nanain oro ca tomi' nucucun oro hwanana ma', co hohot naparut ta nanain oro ca ca' na nucucun oro fariseu ma' quem, noc nanain xocori ca pijim' ne ta na. I'ina nonon pain ca howa ni ca' cacain oro wara ca howa nucucun. I'ina nonon pain ca howa pin cacain xocori ca pijim' ne ta na.

²⁰ Xuruxut xuruxut, maqui' ac cama na narima' co ao tamana ma' quem. Ma' 12 na cawaxi' pain ca ao tamana cama. Hwet ac con na Jeju pain waracon, quep ac camain na cacaracon womicon. ²¹ Coromicat ca' ara xi' na pain ximicam: Mo ta quep e' tain cacaracon womicon cwa', xio pin ac ta' tara ta na ca coromicat nequem.

²² Quep iri non ne, xat tucu in pan ac ca na, querec ac cam na. Hwara' opa ra e' arain ac cam na. Xio pin ma, xi om ne ca howa ara mapa' pain ca quep xio taxi' ta' ca' ac cam na. Xio hap pin ac cama na quem.

²³ Xut mao ac ca na Jeju quem. Hwet pin iri nain xiricon co ma' co querec wet nonon oro win judeu ca pain ca cut in xucucun ma' ne, corom iri na ne, querec ac tococwa na wari' co awaran nanam pije'. Mija nana. Teretem tamana nana. Mija na ca tomi' xaxa' caca, je ca on cacain xiwiwio' ma' quem. Tomi' ac tococwa na: ²⁴ Hwrehwet mama' pi' pin je ta. Om ca mi' pin cama pije' ta. Pi'am e' na, ac i ma' na ca tomi' tococwa ma'. Tatam' tatam' pi' pin ac cocon na, tomi' ximama' nonon quem.

²⁵ Hwrehwet mama' iri nana ne, corom mao ac cain na man ca terem' pe cama pije' ma'. Quep ac cam na pain micam, tequi' pe ac cama na quem. ²⁶ Tomi' hwet tomi' hwet xam' ac cacain na oro wari' pain oro xijein cidade ma' quem.

Ca quep xio pin tococwa co om tococon, je pain ca quep xio pin tocwa xucun co om capijacon quem

²⁷ Mao ta' ta iri na Jeju ne, ja' ja' ac cocon na caram ma' co om tococon. Ma' 2 nana. Merem ac caca na: Xiram pa' xut ta Winacon Davi na ca merem nucucun ma'.

²⁸ Corom mao iri nain xirim Jeju ne, xuruxut hwet ac cocon na co om tococon ma'. Tomi' querec ac tococwa na: Howa mahu' quem? Ha' non pain ca quep xio capari' mahu' ra, howa ac i ma' mahu' ra na ca tomi' querec tococwa ma'?

9.23 Je curucucun oro judeu pane. Mi' pin iri na wari' ne, on ac cacain na xiwiwio', teretem tamana ac caca na quem. **9.27** Taraju pa' je e'. Ac i ma' na ca tomi' taxipa' caca oro judeu pane, pain ca tomi' mi' cocon Cristo co wara tomi' pe ca Iri' Jam pane, pain ca main maqui' tara wari' ne co to' witan xim nuhu' ta tococwa pane. Cristo nonon, Winacon Davi nonon, je je ari na ca tomi' mao nein cocon. Pain ca Winacon Davi cocon Jeju caram ma' co om tococon ma', querec pin' nonon pain ca Cristo ca ma', pain ca to' witan toton cocon oro wari' ma'.

E'e', howa urut pum ta Taramaxicon nuxut ac cocon na.

²⁹ Quep ac cain na tococon, tomi' ac cocon na: Quep xio xuhu'. Win ne ca howa mahu' ma' nonon.

³⁰ Querec mami' ac caca na quem. Tomi' mip ac tococwa na: Ta tomi' hwet huhun pain oro wari' me ta tata.

³¹ Tomi' ac i ma' paxi' tata, ane om tomi' ha' caca ne. Mama' iri nana ne, tomi' hwet tomi' hwet xam' ac cocon pain na oro wari' pain oro xijein cidade ma'.

³² Mama' iri nana ne, maqui' ac caca na xucucun ma'. O mi' nonon con Jeju co corom pe ho' non caxicon jam. Om na capiiacon quem. ³³ Tomi' mo pin iri ta caxicon jam ne, tomi' pin ac ca na. Wa wa ac caca na oro wari' ma' quem. Om ca querec camain' tocwa wari' co an xiho' non co cwa' ta, pain ca tomi' mo pin con caxicon jam pain Israel pane nana.

³⁴ Ane tomi' ximama' cocon oro fariseu ma' ne. Wirico taramaxicon nucucun oro caxicon jam co mi' non pain ca hwara' opa nucun. Wirico co mi' non pain ca tomi' jein pin cocon oro caxicon jam ta nonon.

Ca xiram pa' cocon oro wari' Jeju

³⁵ Maji ta ac ca na Jeju ma', mama' ac urut pain na oro xijein cidade, je pain oro ca paric to ne xirim ma' quem. Ca' na pe ac cain na oro xirim ca cut in to xujuxut pain ca judeu urut ma'. Pijim' mi' tata pain capiiacon Iri' Jam pain ca taramaxicon pe ho' ton cocon ma'. Quep xio ac tococwa na oro wari' pain oro xijein ca caxi nucucun quem. ³⁶ Querec iri tata oro wari' ne, xiram pa' ac tococwa na, xi ximin ara caca ta. Mija na carawa ca to' i'ina nonon. Om na wari' co quep xiho' nonon quem. An xiho' nanain ovelha ca om ma' camain' wari' co querec wet nain. ³⁷ Tomi' ac caparut na pain ca taxipa' urut con ca'. Noro jujun oro wari' cwa'. Taraju xin paxi' nanain capiiacon Iri' Jam. An xiho' paxi' nanain cote ne trigo ca paca' pin ma'. Ane ma' paric ca' e' caca wari' co cat xin nanain ne, je pain ca pijim' mi' xun cocon pain capiiacon Iri' Jam ma' quem. ³⁸ Je ca tomi' xuhu' ca' ac caparut na. Tomi' jun Iri' Jam co ac waximain xitot ma'. Tomi' ca' jun: Tomi' roron oro wari' nem co taramaja mi' nenem ma', pijim' mi' jujun pain capiia oro wari' ta roron. Ac ca taramaja mama' cacain totam ma' tara, ac ca cat cacain cote ne trigo ma' tara pain ca pijim' cacain capijam ta, ac i ma' tara ca tomi' hun Iri' Jam ta na ca tomi' caparut ca'.

Ca tora' cocon oro apóstolo Jeju

Marcos 6.7-13; Lucas 9.1-6

10 Tomi' ac caparut na Jeju. Tomi' naparut pain ca taxipa' urut con ca', pain ca ma' 12 urut ca'. Harahap je, tomi' xuhu' ta ac caparut na. Mi' inuhu' pain ca tomi' jein pin huhun oro caxicon jam ta. Mi' inuhu' pain ca quep xio pin huhun oro wari' co caxi nana quem, wiricoco co ximin nana pain ca caxi tamana nucucun, ac i ma' na ca tomi' caparut. ²Ma' 12 urut pain ca tomi' ac i ma' caparut Jeju ma', pain ca apóstolo je pain ca tomi' hwet huhun pain capiija oro wari' ta caparut. Mo urut: Simão ma', co o naparut ma'. Pedro na xijein wixicon Simão ma'. Ma' ac ca na coxa' ca ma' quem, André ma'. Ma' ac ca na Tiago con coxa' ca João ma' quem. Mana panxica Zebedeu nana Tiago con João ma'. ³Ma' ac ca na Filipe con Bartolomeu con Tomé ma'. Wata' quem, pain ca Mateus ta' ca'. Cut in taxipa' inain oro imposto ca pagar je tococwa oro wari' pane ira. Ma' ac ca na Tiago panxica Alfeu ma'. Ma' ac ca na Tadeu ma'. ⁴Ma' ac ca na Simão co jain jain tamana nonon oro win ma' ca pain ca witan ca' xun cocon oro romano ma'. Ma' ac ca na Judas Iscariotes ma' quem. Wirico Judas Iscariotes co quep xiho' nonon oro taramaxicon pain ca quep xun cocon Jeju ma', ame hwe e'. Ac i ma' urut pain ca taxipa' urut con Jeju pane, pain ca apóstolo je caparut pane.

Ca tomi' xo' tococwa pain ca taramaja nucucun

⁵Tomi' xo' ac caparut na pain ca taxipa' urut con ca', pain ca 12 urut ca'. Ta mama' hwein ca to caca co om judeu nana pain ca aram aram tomi' hwet xun huhun pain capiija oro wari' me ta. Ta mama' camain' hwein oro cidade nucucun oro wari' nein Samaria quem me. ⁶Pirao' e' jujun oro wari' nein Israel ma', co an xiho' nanain ovelha ca pan' ara'am ma'. ⁷Pijim' ca' jujun, wixicam pin ta' na xec pain ca taramaxicon pe ho' pin ton cocon oro wari' Iri' Jam ta tara ca pijim' nuhu'. ⁸Quep xio pin jujun oro wari' co ma' nonon caji nan, wiricoco oro wari' co ma' nonon

10.2 O' ma' ni iri non Simão Jeju ne, pain ca Pedro pin ra ta con pane, ca' na ca coromicat nucun: Hwara' opa pan ra cocon oro win apóstolo ma ma'. Ac ca taramaxicon pe ho' momon tara, ac i ma' na ca coromicat nucun Jeju pane. Ma' nana wari' co Simão Simão wet nonon, ma' ac caca na co Simão Pedro nonon, ma' ac caca na co Pedro e' nonon quem.

oro xijein ca caxi wa quem. To' e' mami' jujun co cono' pin nana, tomi' jein pin jujun oro caxicon jam nucucun oro wari' quem. Ta pagar xut me huhun oro wari' co quep xiho' hwe me, xi pagar xine pan xuhu' pain ca mi' e' xuhu' pain ca hwara' opa nuhu' ta. ⁹Ta cut hwein dinheiro me, ta cut mama' camain' hwein me ta. ¹⁰Ta cut hwein caji coco ca mam' cut wa carawa ma' quem me. Ta cut tocwan hun wom je caji caxim je pana ca mam' pan xu wa quem me. Mi' pan tuturu' pain carawa ca cao' wa oro wari' co quep xiho' xi' hwe, xi hohot ara ne pain ca mi' xihwe pain carawa pain ca taramaja nuhu' ta naparut.

¹¹Tomi' ac caparut na: Tan' mama' iri jein oro xijein cidade ne, je pain oro ca paric to ne xirim ma' quem, pira' ac hun tara wari' co tomi' querec te nuhu' ma', co harahap je ta nuhu' ma'. Wirico tara co hwet hwe, to ho' ac hun tara. Om ta paca' hun, mon to wet mon to wet maqui' pa' ac cuhu' tara xec nein ca hwet xun huhun xucucun wari' pain xijein cidade. ¹²Corom iri jein xiricon ne, tomi' ac huhun tara oro co to nanain ma'. Param urut con Iri' Jam pain ca mi' cuhu' pain ca om toron ne xumuhu', je pain ca mi' cuhu' pain oro ca awi wa ca' jujun. ¹³Mo ta tomi' querec te cucuhu', mi' ac tococwa tara pain ca om toron ne ximicocon, mi' ac tococwa tara pain oro ca awi wa quem. Mo ta om tomi' querec te cucuhu', om ta mi' tococwa pain ca om toron ne ximicocon, om ta mi' tococwa pain oro ca awi wa quem. ¹⁴Mo ta om tomi' querec te cuhu' wari' ma', mo ta om caca oro win ma' ca pain xiricon co taraju tain nanain ca pijim' nuhu' ma', mo ta om ma' camain' ca wari' pain cidade nucucun co taraju xin nanain ca pijim' nuhu' ma' quem, paca' ac huhun tara, wap camara' ac hwein tara ximirinain macaracocon pain caximahu' pain ca paca' hwein cidade nucucun. Ma' ta querec pin' xujuhu' pain ca pan teretem nuhu' pain ca noc hwein ca taraju wa ca pijim' nuxut ca' ac huhun tara. ¹⁵Je ca tomi' xuhu' ca', tomi' iri'o' inuhu' ta ac caparut na. Maqui' iri tara xec nein ca wap toton oro wari' pain ca caracat nucucun Iri' Jam ne, wap tamana ac cocon tara co om tomi' querec te nunuhu' pain ca pijim' nuhu' ma'. Wap paxi' toton oro wari' nein Sodoma cocon oro wari' nein Gomorra co caracat tamana nana pain cara pane. Ane wap tamana pan ton cocon oro wari' co om tomi' querec te nunuhu' pain ca pijim' nuhu' ma' ne, ac i ma' na ca tomi' caparut ma'.

¹⁶Tomi' ac caparut na: Pain ca pijim' mi' jujun pain capi' oro wari' ta xuhu' ca', ac ca hwet jujun oro caxicon copacao' ta xuhu' na, xi awi caca

ta. Ac oro ovelha huhun quem, xi narain ho' taxi' xujuhu' cocon ta. Je ca tomi' ca' xuhu' ca': Querec je me! Ma' tara xumuhu' cocon me. Win ca em' pain ca tama' noro xaxa' nucun pain ca om mon to wet ne winacon ma', ac i ma' je cocon oro wari' co noc nunuhu' ma'. Ane na e' ne pain ca om mana' huhun ne. Win ca xucu' pain ca om mana' taxi' ca quem. ¹⁷ Ma' tara xumuhu' me, xi quep xim ara cucuhu' oro wari' ta. Cut mi' ac cucuhu' tara cocon oro taramaxicon co juiz nana, wap to ac cucuhu' tara pain oro xirim ca cut in to xucucun ma' quem. ¹⁸ Cut mi' tuturuhu' cocon oro taramaxicon, tomi' querec ac cucuhu' tara pain oro ca ara hwe ma'. Ara ac i ma' tuturuhu', xi om ne ca howa ara mahu' ta. Je i ma' ira, na e' na pain ca tomi' hwet huhun pain capiija oro taramaxicon cocon oro wari' co om judeu nana ta. ¹⁹ Ta toron ne xumuhu' pain ca aram aram quep xim cucuhu' oro taramaxicon co tomi' querec xim nunuhu' quem me. Ta cain' cain' xuxun ne hwe me. Ta cain' xi tomi' narain ho' ac xijexi' ne hwe me, ta tomi' ac i ma' hwe me ta. Ame hwe e', coco' quima hwet xun iri jujun ne, mi' ac cuhu' tara pain ca tomi' wa Iri' Jam. ²⁰ Xi wahu' ne co tomi' xi' pan nana. Je Tamataracon Cotere' tara co tomi' pan pahu' ta naparut.

²¹ Ma' tara wari' co tomi' mi' ton non cocon oro taramaxicon cwaji' ca ma'. Mon cwa' aji' cwa', to' pa' pin jun ta totoron. Ac i ma' tara co wanxi' ma' quem. Mon cwa' panxita' cwa', to' pa' pin jun panxita' cwa' totoron. Ac i ma' tatara mana panxica wari' ma' quem, noc pin totoron cote caca cacam jicocon ma', to' parapa' pin ac tacacama tara quem. ²² Noc noc pi' pin tuturuhu' oro wari', xi om ne ca howa ara mahu' ta. Ane tomi' xuhu' pain i ca' ne: Wari' co howa cara napa' ma', pain ca howa howa pi' pin pa' con oro ca quep em' wa ma', wirico tara co to' witan wa ta. ²³ Mo ta quep em' to cucuhu' pain cidade ca to hwe ma', jein mama' ac hwein tara xijein cidade. Tomi' pe mi' inuhu' pain i ca' quem: Om ta mama' pi' pin querec hwein oro xijein cidade pain Israel ca', maqui' pa' ac xuhu' tara. Wata' pain ca Iri' Wari' ta' ca', maqui' pa' ac xuhu' tara pain ca taramaja taramaja wet nuhu' ta naparut.

²⁴ Noro jun wari' co ca' na wa pain oro ca taxi' wa ma' ac caparut na. Om ca taxi' tiquin' ca' con co ca' na pan non ma'. Wari' co taramaja mi' e' non taramaxicon nucun ma' quem, om ca hwara' opa tiquin' ca' con taramaxicon nucun. ²⁵ Carawa ca ara mi' tocwa co ca' na ma', ara mi' ac tocwa tara co ca' na wa ma' quem. Carawa ca ara mi' tocwa taramaxicon ma', ara mi' ac tocwa tara co taramaja mi' e' non ma' quem, je cwerein,

hohot na ta je. Je ca tomi' xuhu' ca': Taramaxicon paxi' ina, ane tomi' noro cacapa' co noc nanapa' cwa' ne. Caxicon Jam ma ta nanapa'. Wahu' iri na pain ca wari' ne xuhu' ca' ne, tomi' xirac tamana tuturuhu' quem. Ac ca om tomi' xirac homa cacapa' na pain xocori ca'. Ame hwe e', tomi' xirac tamana pan tuturuhu' ta naparut.

²⁶ Je ca tomi' xuhu' ca' ac caparut na. Ta jin' huhun oro wari' co quep em' xim nunuhu' me ta. Oro ca om taxi' querec caca oro wari' con Iri' Jam ma', pijim' mi' jujun pain oro wari' ta. Ta joc xim camain' hwein me ta. ²⁷ Ca tomi' ne pain ca tomi' noc xa xuhu' pain ca paric to nexi' pain xirixi' ca', pain ximijain xim ca', tomi' hwet pi' pin ac huhun tara pain oro wari' pain tocon xina. ²⁸ Ta jin' huhun oro wari' me ta. To' parapa' taxi' paxi' nanain ca cwere wa, ane om to' parapa' taxi' cacain ca tamatara wa ne. Iri' Jam iri na ne, ha' non pain ca wap cain ca cwere wa, ha' non pain ca wap cain ca tamatara wa pain cote ne xe quem. Je ca tomi' xuhu' ca': Wirico pan tara co jin' hwe ta. ²⁹ Noro jein wijimain me ma' quem ac caparut na. Om ca hwara' ne dinheiro nein. Mo ta cut 2 xin irin, wijimain e' tara dinheiro nein ca pagar jein capari' waximain, xi iri' carawa ne ta. Ane querec wet cain Cotere' ne. Mo ta noc cain pain ca mi' pin wa, om ca mi' pin ximao ne. ³⁰ Ac i ma' nuhu' quem, mam' pe wet cara nuhu', taxi' pi' pin nain oro coxumuhu', taxi' nain tununuhu' pain ca mija nein quem. Querec wet nuhu' quem. ³¹ Je ca tomi' xuhu' ca' ac caparut na. Win ne ca querec wet cain wijimain me ma'. Ane awi tiquin' ca' hwein ca mija nein wijimain me con ne. Je ca tomi' xuhu' ca': Ta jin' huhun oro wari' co quep em' xim nunuhu' ma' me ta na ca tomi' caparut ca'.

³² Tomi' ac caparut na: Wari' co tomi' hwet nonon oro win ma' ca pata' pain ca Taramaxicon ne inon Jeju ta cocon pata', ame hwe e'. Main tomi' ca' ton Te co pe pawin cwain: Wari' ne inon co cwa' ta ton con. ³³ Wari' co tomi' ca' nonon oro win ma' ca ma' iri na ne, pain ca om ca querec pin' ton Jeju ta, om ca Taramaxicon ne ton ta cocon ma', ame hwe e'. Main tomi' ca' ton Te co pe pawin cwain: Om ca wari' ne ton co cwa' ta ton con ta naparut.

³⁴ Cain' ca coromicat mao mahu' quem ac caparut na. Ja' tomi' querec te toton nonon oro wari', je ca maqui' cain macan' ca', ac i ma' na ca coromicat nuhu' pata' ra? Ta coromicat ac i ma' hwe me ta. Maqui' iri inain macan' pane ne, mana' caracan ac xucucun na oro wari'. Xi to' i'ina ara toton pain ca pijim' mi' toton pain capijacon Iri' Jam ta. Ma' nana co

tomi' querec te nanain, ma' nana co noc nanain quem. Noc ac xucucun na quem. ³⁵Panxica wari' ma', mana' non cote ca pata', xi maqui' ara ta' ta. Ac i ma' na cainacam narima' ma' quem, mana' nam jicam pata'. Ac i ma' na manacon cawinacam ma' quem, mana' nam tamanacam pata'. ³⁶Pain ca nari xequequem ma', noc caracan xequequem pata'. Ac i ma' na ca tomi' caparut.

³⁷Wari' co tomi' querec te tamana non cote ca cam jicon ma', mo ta om tomi' querec te tiquin' ca' capa' cacam, om ca hohot ne pain ca taxipa' capa'. Mo ta tomi' querec te tamana cacam mana panxica wari' ma', mo ta om tomi' querec te tiquin' ca' capa' cacam, om ca hohot ne pain ca taxipa' capa' quem. ³⁸Wari' co ja' ja' xim paxi' napa' ma', mo ta xiram pa' cain curucun pain ca jin' cain ca mi' pin wa pain ca taxipa' capa' ma', om ca hohot ne pain ca taxipa' capa' ma'. ³⁹Wari' co win xumu e' nain ca param pan nucun pain macan' ca', om ta e' cara pe cain pawin. Wari' co miri'om nain ca param pan nucun pain macan' ca' iri na ne, pain ca win xumu e' capa' ma', wirico tara co e' cara pe tain nain pawin ta naparut.

⁴⁰Wari' co tomi' querec te nuhu' ma', tomi' querec te napa' quem ac caparut na. Wari' co tomi' querec te napa' ma', tomi' querec te non co cwain co hwet roron oro wari' pain macan' ta napa' quem. ⁴¹Wari' co tomi' querec te non co pijim' hwet nain capijacon Iri' Jam ma', mo ta tomi' querec te con pain ca pijim' nucun ma', mi' ac tocwa tara pain oro ca awi wa. An tarain co pijim' ma', an ac cain tara co tomi' querec te non ma' quem, je je ari tara carawa ca cut xi' caca. Wari' co tomi' querec te non co xut xo' ma' quem, mo ta tomi' querec te con pain ca xut xo' nucun ma', mi' ac tocwa tara pain oro ca awi wa. An tarain co xut xo' ma', an ac cain tara co tomi' querec te non ma' quem, je je ari tara carawa ca cut xi' caca ta.

⁴²Mo ta ma' ca wari' co xiram pa' non win ma' ca co taxipa' napa' ma'. Xiram pa' inem, xi om ne ca taxipa' ara mon Jeju ta, mo ta tomi' ac i ma' con pain ca xiram pa' con ma', ame hwe e'. Main mi' toron pain ca awi wa Iri' Jam ta. Tomi' iri'o' ina, wijimain paxi' tara carawa ca mi' con win ma' ca ma', am cam mi' e' con pain wijimain ca xio ne com ma', om paxi' tara ca hwara' opa ca win ma' ca co xiram pa' ca ma'. Je i ma' ira, mo ta xiram pa' con, aram aram mi' pan ac con tara pain ca awi wa Iri' Jam ta na ca tomi' caparut Jeju pane.

Ca tomi' querec cocon Jeju co taxipa' ca João co ja' taxipa' com

Lucas 7.18-35

11 Pi' pin iri na ca tomi' xo' caparut pain ca taxipa' urut con Jeju ma' ne, mao ac cain na oro xijein cidade pain Galileia. Ca' na toton pain capiiacon Iri' Jam oro wari' cwain, pijim' mi' toton pain ta ac ca na.

²Wara tao' pe ta pain xirinain ca tao' to tao' to to wa João ma', co ja' taxipa' nonon pain com oro wari' pane. Je ca taraju pe con Jeju ma' quem: Awi tamana na oro ca ara ca Jeju ta na ca taraju nucun. Taraju iri nain ne, tomi' ac tococwa na co taxipa' ca ma'. Mo tomi' jun Jeju e'. ³Tomi' querec ca' jun: Wum tara co wara tomi' pe ca Iri' Jam pane ra, co main maqui' tara ta ca pane ra? Winim' jun xucun maparut ra? Ac i ma' tara ca tomi' querec hun ta tata. Hwet ac cocon na, tomi' querec ac cocon na quem.

⁴Je i ca' ca tomi' xo' cocon Jeju: In hwet jun João ta. Tomi' hwet ac hun tara pain oro ca taraju hwe ca', je pain oro ca querec hwe ca' quem.

⁵Querec pin' nana co om tococon. Xuruxut pin nana co xuruxut xirac nana. Xio pin nana co ma' nonon caji nan. Taraju pin nana co om taraxicocon. E' mami' nana co cono' nana. Pijim' mi' inonon pain capiiacon Iri' Jam oro wari' co ximin nana quem, pain ca to' witan pin xim cuhu' Iri' Jam ta toton ca'. ⁶Tomi' jun pain i ca' quem: Wari' co howa cara napa' ma', co om tara con ta'a napa' ma', wirico tara co param mi' ca pain ca awi wa Iri' Jam ta, ac i ma' na ca tomi' xo' tococwa ma'.

⁷Mama' iri nana co taxipa' ca João ne, tomi' ac cocon na oro wari' Jeju. Tomi' mi' nonon con João. Ma' carawa ca querec xi' hwe pain ca mama' hwein mahweri pane? Querec xun hun wari' co pijim' ximao ra, co an xihó' nain caji quiwo' ca meo ximao pain hotowa ra? Om na. ⁸Ma' co querec xi' hwe pane quem? Querec xun hun wari' co caramaju ra, co pe non wom co awi ra? Om na quem. Xi to ara cacain xiricon taramaxicon oro wari' co caramaju ac i ma' nana ta. ⁹Ma' co querec xi' hwe pane quem? Querec xun hun profeta ra? Iri'o' na, wirico profeta co querec hwe pane. Querec hun profeta co hwara' opa tamana. Hwara' opa tiquin' ca' nonon oro xucucun profeta. Tomi' iri'o' inuhu' ta. ¹⁰Wirico João co xirao' pe ca profeta pane, pain ca xirao' pe cain ca tomi' nucun Iri' Jam pane, pain ca tomi' capa' pain ca main mao rain macan' ta capa' pane. Ca' na ca xirao' pe nucun pane:

Main tomi' ton wari' co tomi' hwet tain nain capiia ca'.

Tomi' ca' ton pum: O ra ta ton,
 tomi' xo' ac tococwa tara oro wari' pum.
 Ma' ta winim' xo' quequem.

Ac ca wara ara xo' cain wanajum ma' tara pain ca tomi'
 xo' tococwa oro wari' pum ta.

Ac i ma' na ca xirao' pe ca profeta pane, pain ca xirao' pe cain ca tomi' xo'
 capa' Iri' Jam con João pane na.

¹¹ Je ca tomi' xuhu' ca', tomi' iri'o' inuhu' ta ac tococwa na. Iri' wari'
 na João co ja' taxipa' com, hwara' opa na. Om na xucun wari' co tiquin'
 ca' non pain ca hwara' opa nucun, om nana oro hwanana co hwara' opa
 tiquin' ca' nonon quem, om paxi' nana. Ane hwara' opa tiquin' ca' pan
 con João wari' co om hwara' opa camain' ne, co taramaxicon pe ho' ca
 Iri' Jam pain ca howa capa' ma', hwara' opa tiquin' ca' pan non João ta.

¹² Pijim' paxi' nonon oro wari' João pane, pijim' mi' paxi' nonon con Iri'
 Jam co taramaxicon pe ho' pin ton nonon quem. Ane noc urut con ta
 cocon Iri' Jam ne. Noc urut con pain ca taramaxicon pe ho' caparut ta
 nana. Je curucucun pane, pain ca xo' pijim' ten qui' ca pane, mao ac ne
 ma' na cocon, noc urut con noc urut con wet nana pain xocori ca' quem.
 To' quiji' pin xun nonon oro wari' co taramaxicon pe ho' ca Iri' Jam quem.

¹³ Ca pijim' nucun João pane, pain ca tomi' hwet cocon oro wari' pain ca
 maqui' ne ca', xirao' pe ac i ma' nain Moisés cara pane. Wara xirao' pe
 nain ca maqui' ne pane. Oro profeta cara pane quem, xirao' pe nanain
 ca maqui' ne ca'. Aram aram maqui' pa' ac cocon na João cwa'. ¹⁴ Mija
 paxi' nana oro win ma' hwe co om howa je ha' nanain ca tomi' nucucun
 oro profeta ma'. Wahu' iri na ne, pain ca howa xin hwein ma', xin ne ac
 hwein tara ca tomi' xuhu' ca'. João ma', wirico co ac Elias ta. Wirico co
 xirao' pe caca oro profeta pane. Maqui' cain' tara Elias, aram aram maqui'
 ac ca tara wari' co wara tomi' pe ca Iri' Jam ta nana pane. Wirico João co
 xirao' pe caca pane. ¹⁵ Mo ta taraju pa' xixi' na hwe ma', je ta taraju wet
 qui' hwe ta na.

¹⁶ Ma' co an xiho' caca oro wari' pain xocori ca' quem ac tococwa na.
 Om na, pijim' joc mam' mi' xuhu' cocon wari' co an xiho' caca cwa'. An xiho'
 nonon oro hwijima' co merem caracan xucucun pain ca waraju nucucun.
 Xao to nanain ca xao to to caca oro wari' pain ximijain cidade, merem ac
 xucucun na. ¹⁷ On mi' paxi' urut pahu' pain xuwiwio' ca', ane om pi' xirao'
 hwe ne, ac i ma' na ca merem nucucun hwijima'. Merem ac xucucun na

quem: Awaran waraju xi' paxi' urut pahu' pain ca ac ca mi' pin ca ne win ma' nexi' cwa' urut pahu', ane om awaran hwe ne. Ac i ma' na ca merem nucucun oro hwijima' pain ca om ha' xucucun pain ca waraju nucucun.

¹⁸Ac i ma' maparut pain ca pijim' nuxut ca' quem ac tococwa na. An xiho' huhun oro hwijima' pain ca noc urut pain noc urut pain xucucun pain ca waraju nucucun. Noro jun João ma'. An pe nain ca cao' wa pain ca tomi' ton con Iri' Jam. Om ca toc cain comi uva quem. Tomi' ximama' pan ac hun na: Corom pe ho' non Caxicon Jam ta hun. ¹⁹Wata' pain ca Iri' Wari' ta' ca' iri na ne, cao' ina, toc inain comi uva quem. Tomi' ximama' ac mahu' na: Xocomu ma, toc tamanain pe ma, taxipa' momon oro caracat ma', oro co cut in taxipa' nanain oro imposto ma', wiricoco oro wari' co hwet taxipa' wixicocon pain ca pan teretem nucucun ma' quem, wiricoco nana co taxipa' ma ma', ac i ma' na ca tomi' ximama' mahu'. Tomi' ximama' ac i ma' paxi' maparut, ane tomi' iri'o' urut pain ca pijim' nuxut ne. Oro wari' co taraju nanapa' pain ca pijim' ne ca', mo ta querec cocon oro co xuruxut xo' nana pain ca tomi' ha' cacapa' ma', querec pin' ac cacapa' tara pain ca tomi' iri'o' ta' ca' na ca tomi' tococwa ma'.

Oro wari' co om cwirin' je ha' nana

Lucas 10.13-15

²⁰Tomi' ac ca na Jeju ma', pain ca tomi' em' tococwa oro wari' co to nanain oro xijein cidade pain i cain. Xi an hwet mi' tamana paxi' ara tococwa pain ca hwara' opa nucun pain ca ara cain ca om ara taxi' ne ca wari' wa ira. Ane om cwirin' je na caca ne. ²¹Wa inuhu' me oro wari' co to nanain Corazim ma'! Wa inuhu' me oro wari' co to nanain Betsaida ma' quem! Ximin hwe. Wap tamana turuhu' Iri' Jam ta. An hwet mi' paxi' inuhu' pain ca hwara' opa ne ca', querec paxi' mahu' pain ca ara tain oro ca om ara taxi' ne ca wari' wa ca'. Ane om cwirin' je ha' hwe ne. Mo xi an hwet mi' ac i ma' toton pain ca hwara' opa ne oro caracat co to nanain Tiro je Sidom cara pane, wara cwirin' pin ac caca xira pain cara pane, wara to ac cocon xira caxicon wom, wara maxoc pa' ac xucucun xira pain topacon pain winacocon pain ca an hwet pe cacain ca cwirin' pin cacain ca pan teretem nucucun pane quem, ac i ma' paxi' xirara pane. ²²Ane tomi' pan xuhu' pain i ca' ne, tomi' iri'o' inuhu': Maqui' iri tara xec nein ca wap toton oro wari' pain ca caracat nucucun Iri' Jam ne, wap ac cuhu'

tara. Wap pije' totoron oro caracat co to nanain Tiro je Sidom cara pane. Wahu' iri na ne, pain ca to hwein Corazim je Betsaida ma', wap tamana pan ac cuhu' tara ta! ²³Wahu' quem oro wari' co to nanain Cafarnaum ma'. Xec xec a xihwe! Awi urut, querec pin' taraparut pain ca awi nuxut xi' ma hun Iri' Jam ra? Om na ta! Wixicaracao' mi' turuhu' pain cote ne xe ta! An hwet mi' paxi' inuhu' pain ca hwara' opa ne ca', querec paxi' mahu' pain ca ara tain oro ca om ara taxi' ne ca wari' wa ca'. Ane om cwirin' je na hwe ne. Mo xi an hwet mi' ac i ma' toton pain ca hwara' opa ne oro caracat co to nanain Sodoma cara pane, cwirin' pin ac caca xira, ma' ma' wet ac ne xira cidade nucucun pain xocori ca', ac i ma' paxi' xira cocon. ²⁴Ane tomi' pan xuhu' pain i ca' ne: Maqui' iri tara xec nein ca wap toton oro wari' pain ca caracat nucucun Iri' Jam ne, wap ac cuhu' tara. Wap pije' totoron oro wari' co to nanain Sodoma cara pane. Wahu' iri na ne, pain ca to hwein Cafarnaum ma', wap tamana pan ac cuhu' tara ta! Tomi' iri'o' inuhu' ta ac i ma' na ca tomi' tococwa pane.

Ca mi' xim capari' pain ca xao to wa xin ximixi' Jeju

Lucas 10.21-22

²⁵Tomi' ac con na Iri' Jam Jeju: Tomi' querec te inem ta Te. Wum co Taramaxicon pe nain pawin je macan' ca'. Tomi' querec te inem pain ca tora' momon oro wari' co om xec xec nana cwa', co an xiho' nonon oro hwijima' pain ca om xec xec nucucun ca'. An hwet mi' momon pain oro ca joc xim ma cocon oro wari' co taxi' urut xi' ma nana ma'. ²⁶Je ca param nem ma' quem Te. Hohot nem pain ca xiram pa' momon ta na ca tomi' con Iri' Jam.

²⁷Wirico Te co mi' napa' pain ca hwara' opa tiquin' ca' toton oro wari' ta ac tococwa na. Mi' napa' pain ca querec pin' tain oro ca coromicat nucun quem. Oro ca param nucun, oro ca ara nucun quem, taxi' taxi' pi' pin inain con. Querec pin' napa' pain ca Panxita' capa' ca' quem. Om na xucun wari' co querec pin' nain oro ca coromicat ne. Xica' pe na Te co querec pin' nain oro ca coromicat ne. Wata' iri na ne, pain ca Te ton ca', querec pin' inon quem. Oro wari' co an hwet mi' ta' con, querec pin' nonon quem na ca tomi' tococwa ma'.

²⁸Tomi' ac tococwa na quem: Wahu' pain ca jam' ca' hwein oro ca jain jain nuhu' pain ca tama' tomi' ha' xun paxi' huhun co hu nunuhu' ma', ac

ca an tiquin' hwein na carawa ca xite. Tomi' inuhu': Harahap je, wixicam xine me. To' wa pin ac tain tara xumuhu'. ²⁹Ja' ja' xine, na ra xine pain ca hu xim xuhu' ca'. Xao to wa ac hwein tara xumuhu'. Xi tomi' wixite ara xuhu' ta. Om ca xec xec ta' pain ca tomi' pan hot e' xuhu' ca'. ³⁰Om ca i'ina tomi' ha' xine oro ca hu ne ta na ca tomi' tococwa ma'.

**Ca tomi' em' cacaparut oro fariseu pain ca om xao to
wa urut pain xumuxut pain sábadó**

Marcos 2.23-28; Lucas 6.1-5

12 Om ca pain homa ne, maqui' ac ne na xec nein ca xao to wa urut pain xumuxut, pain sábadó ma'. Maji ta ac caparut na Jeju, xuruxut mama' ac urut pain na totain trigo. Warut pain ca taxipa' urut con ca', pe' ac urut na quem. Je ca caracat urut pain xirinain trigo ma'. Caracat urut pain, cao' ac urut pain na tocwi. ²Ma' nana oro fariseu co querec nanaparut pain ca caracat urut pain quem. Taramaja nana ra ac xucucun na, tomi' ac cocon na Jeju: Noro roron co taxipa' ma ma'. Taramaja nana pain sábadó ca', pain ca caracat cacain xirinain trigo ma'. Tomi' caho' ara xi' napari' ca xirao' nucun Moisés pain ca taramaja wa pain sábadó ta nonon.

³Om na ta ac ca na Jeju. Om ca noro hwein capiñacon Iri' Jam ra, pain ca pijim' xine ca ara ca taramaxicon Davi cara pane, pain ca pe' qui' ca Davi cocon oro win ma' ca pane? ⁴Corom mao nain xiricon Iri' Jam pane, cao' ac cain na capam' ca an toco' mi' tocwa Iri' Jam. Cao' wi na cocon oro win ma' ca quem. Tomi' caho' paxi' tata pain ca cao' wa, xi xica' to tatara oro sacerdote co cao' nanain ta ara ne ca xirao' nucun Moisés ta. ⁵Ac i ma' na cocon oro sacerdote ma' quem. Om ca noro hwein ca xirao' nucun Moisés pain ca pijim' qui' tococwa oro sacerdote pain ca taramaja to cacain xiricon Iri' Jam pain sábadó quem ra? Tomi' caho' paxi' tata oro wari' pain ca taramaja wa pain sábadó ma', ane om tomi' em' tococwa oro sacerdote pain ca taramaja caca pain sábadó ne. ⁶Je ca tomi' xuhu' ca' ac tococwa na. Ma' pin ina. Wata' co hwará' opa cwa', pain ca iri' taramaxicon ta' ca'. Taramaxicon hwará' opa tiquin' ca' inonon oro co tomi' mi' nunuhu' pain oro coximain xiricon Iri' Jam ta. ⁷Noro jein ca tomi' nucun Iri' Jam pain capiñacon ca'. Ca' na con:

Param inuhu' pain ca xiram pa' huhun oro wari'.

Noc inuhu' pain ca tom tain' mi' e' mahu' pain carawa nuhu' ta. Ac i ma' na ca tomi' ca Iri' Jam pain capijacon. Mo xi taraju pa' hwein ca tomi' nucun ca', om xi tomi' em' huhun co taxipa' ta' cwa'. Xi em' caca ta na ca tomi' tococwa ma'.

⁸Je ca tomi' xuhu' ca' ac tococwa na. Taramaxicon ina. Wata' pain ca Iri' Wari' ta' ca', Taramaxicon pan ina. Wata' co tomi' xo' nuhu' pain oro ca ara xi' hwe pain sábadó quem na ca tomi' tococwa ma'.

Ca quep xio pin tocwa wari' co xirac micon

Marcos 3.1-6; Lucas 6.6-11

⁹Mao ta' ta ac ca na Jeju, mao ac cain na xirim ca cut in to xucucun ma'. ¹⁰Pe nain i ma' wari' co xirac micon ma'. To nanain i ma' oro fariseu co tocojin' nonon Jeju quem. Ja' noro nonon. Je ca tomi' querec cocon ma': Hohot tara pain ca quep xio wa pain sábadó ra? Om ca tomi' cahó capari' pain Iri' Jam ra na ca tomi' cocon ma'.

¹¹Tomi' ac tococwa na: Am ma' ca win ma' nuhu' co wina nain ovelha ma'. Cain' cain' ta' ca pain ca pan' mao nein man ovelha nucun pain sábadó ma' quem? Om ta taramaja ca ra? Om ta an hwet tain cain ra? ¹²Je ca tomi' xuhu' ca': Hohot paxi' na pain ca quep xiho' xine ovelha ma', ane hohot tamana pan ne pain ca quep xiho' tocwa wari' ne. Je ca taxi' xin i ca': Hohot na pain ca ara xin ca awi wa pain sábadó ta. Om ca tomi' cahó capari' pain Iri' Jam ta ac tococwa na.

¹³Tomi' ac con na co xirac micon ma': Coc matam rain mum ma' ta non. Coc matam ac cain na, awi pin ac ne na con. Ac wirain pin na, awi pi' pin na con.

¹⁴Hwrehwet mama' ac caca na oro fariseu ma' quem. Tomi' xo' xijexi' ta, ma' ta to' pa' pin xun Jeju ta xucucun.

Ca wata' ne co wara tomi' pe pin ca Iri' Jam pane ta ca Jeju

¹⁵Taxi' nonon oro fariseu Jeju quem. Taxi' nonon pain ca to' pa' pin xun cocon ma'. Je ca mao ni ca' tococwa ma'. Ja' ja' ac cocon na oro wari'. Mija nana co ja' ja' nonon. Quep xio quep xio xam' ac tococwa na quem. ¹⁶Tomi' mip ac tococwa na: Ta tomi' hwet mahu' cocon oro wari' me ta tata.

¹⁷ Quep xio pin tata oro wari', ma' ta hwet pin ne ca wara tomi' pe ca profeta Isaías cara pane, pain ca xirao' pe cain ca tomi' nucun Iri' Jam pane. Ca' na con:

¹⁸ Noro jun wari' ne co tora' ta' cwa', co taramaja mi' napa' cwa'.

Om ca noc ton.

Hohot tamana napa'.

Mi' ton pain Tamatara.

Pijim' toton oro wari' pain oro xijein macan'.

Oro wari' co om judeu nana ma', tomi' hwet pan ac tococwa
tara pain ca ara xo' ne ca',

pain ca main wap ton toton oro wari' co pan teretem nana ma'.

¹⁹ Om ta tomi' mana' ca,

om ta merem ca,

om ta xec xec ca,

om ta tomi' ximao pe cain oro wanaji cidade.

²⁰ Om ta tomi' mana' cocon co naro nana ma',

co an xiho' e' nanain taparain pana ca torotop xat ma',

co an xiho' e' nanain naran ca jo' pin ta' ma'.

Taramaja ac i ma' tara.

Taramaja taramaja maqui' pa' ac con tara xec nein ca to'
quiji' pin tain cain oro ca om awi wa.

²¹ Howa ac cocon tara oro wari' co to nanain oro

xijein macan' ma' quem.

Ac i ma' na ca xirao' pe ca profeta Isaías con Jeju pain cara pane ta.

**Ca tomi' napat cocon Jeju pain ca wirico Caxicon Jam co
mi' nem pain ca hwara' opa nem ta cocon pane**

Marcos 3.20-30; Lucas 11.14-23

²² Ma' ac caca na wari' co o mi' nonon con Jeju wari' co corom pe ho' non caxicon jam. Om na tocon, om na capijacon quem. Quep xio pin ac con na Jeju. Tomi' pin ac ca na, querec pin' ac ca na quem. ²³ Wa wa ac cocon na oro wari' co querec nanain i ma'. Winacon Davi tara co cwa' ra, co wara tomi' pe ca Iri' Jam pane ra? Wirico tara ra nonon.

²⁴ Taraju iri nonon oro fariseu ma' ne, tomi' ximama' ac cocon na Jeju: Om na, om paxi' na ca hwara' opa pan ca pain ca tomi' jein pin cocon oro

caxicon jam ta. Wirico Belzebu ma', co taramaxicon nucucun oro caxicon jam ma', wirico co mi' non pain ca hwara' opa nucun. Je ca ha' con pain ca tomi' jein pin cocon oro caxicon jam ta na ca tomi' ximama' cocon ma'.

²⁵ Taxi' nain ca coromicat nucucun Jeju quem. Tomi' ac tococwa na: Noro jujun oro wari' co to ho' xucucun pain macaracocon ma'. Mo ta mana' caracan xucucun, to' quiiji' pin ac xucucun na, om pin ac caca na quem. Ac i ma' nana oro wari' co to ho' xucucun pain cidade nucucun ma', wiricoco co nari xucucun ma' quem. To ho' paxi' xucucun, nari paxi' xucucun. Mo ta mana' caracan xucucun, noc pin ac xucucun na, to ho' to ho' om pin ac xucucun na quem. ²⁶ Ac i ma' na con Caxicon Jam cocon oro win caxicon jam ca ma' quem. Mo xi mana' caracan xucucun, mo xi tomi' jein pin caracan xucucun, ma' xira ca hwara' opa cara ac caca quem ra? Om na. To' om pin ac xucucun xira pain ca hwara' opa nucucun. ²⁷ Tomi' ximama' ca' mahu': Wirico Belzebu co mi' nem pain ca hwara' opa wa, je ca ha' quem, pain ca tomi' jein pin momon oro caxicon jam ta mahu'. Cain' cain' caca oro win ma' nuhu' ma' quem? Ma' co mi' nonon pain ca hwara' opa wa quem? Para ha' cocon pain ca tomi' jein pin cocon oro caxicon jam ma' quem? Je ca tomi' xuhu' ca', tomi' ximama' hwe ta pan nunuhu' oro win ma' nuhu' pain ca tomi' ac i ma' mahu' ta. ²⁸ Ane mi' pan capa' pain ca hwara' opa wa Tamataracon Iri' Jam ne. Je ca ha' capa' pain ca tomi' jein pin toton oro caxicon jam cwa'. Je ca to' querec pin' pan cuhu' pain ca maqui' pin ne xec nein ca taramaxicon pe ho' pin cuhu' Iri' Jam ta na ca tomi' tococwa ma'.

²⁹ Je ca tomi' xuhu' ca' ac tococwa na. Noro jun wari' co cut noc xa tain nain caramaxicon waximain xirim co hwara' opa ma'. Ha' toron pain ca cut noc xa e' cain caramaxicon pain ca om pao' pe querec con ra? Om ta ha' con. To' pa hot pin iri tarain manain xiricon ne, pao' pe ac con tara waximain, ha' pin ac con tara pain ca cut noc xa pi' pin cain caramaxicon.

³⁰ Wari' co om xin ne nain ca tomi' ne ca', wirico co noc napa'. Wari' co om quep xiho' napa', wirico co to' i'ina napa' pain ca taramaja ne quem.

³¹ Je ca tomi' xuhu' ca': Oro wari' co pan teretem nana ma', co ara nanain

12.29 Pain ca pijim' joc mam' mi' tococwa con wari' co hwara' opa ma', co hwara' opa tiquin' ca' non wari' co cut noc xa tain nain caramaxicon ma', tomi' xo' ca' tata: Wara to' quiiji' pin inon Caxicon Jam, xi om ne ca hwara' opa tiquin' ca' ara ton ta. Je ca ha' capa' pain ca tomi' jein pin toton oro caxicon jam co corom to ho' nonon oro wari' ta na ca tomi' xo' tococwa ma'.

oro xijein ca caracat wa ma', oro wari' co tomi' napat nonon Iri' Jam ma' quem, xic am pin ac xine tara ca caracat nucucun. Wari' co tomi' napat nain Tamataracon Iri' Jam ma' iri na ne, om ta xic am pin xine ca caracat nucun ta. ³²Wari' co tomi' napat napa' pain ca Iri' Wari' ta' ca' quem, xic am pin ac xine tara ca caracat nucun. Wari' co tomi' napat nain Tamataracon Iri' Jam ma' iri na ne, om ta xic am pin camain' xine ca caracat nucun ta. Om om tara, om tara pain oro xec nexi' ca', om om tara pain oro xec ca maqui' ta' ma' quem na ca tomi' tococwa ma'.

³³Noro jein panaji memem ma' quem ac tococwa na oro fariseu. Panaji memem ca awi ma', wina awi na. Panaji memem ca om awi ma' iri na ne, wina pan tem na quem. Xac querec iri xine winain ne, querec pin' ac xine na panaji pain ca awi nein, je pain ca om awi nein quem. ³⁴Je ca tomi' xuhu' ta oro caxicon em'. Ma' tara ca awi ac ne ca tomi' nuhu' pain ca om awi pan nuhu' ra? Carawa ca coromicat taxipa' hwe pain iri' xumuhu' ma', je ca tomi' hwet hwe pain capijahu' ma' quem. ³⁵Noro jun wari' co awi ca coromicat nucun ma'. Ac ca cut toco' xo' cain na ca awi ne capijacon pain ximicon, an hwet ac cain na pain ca tomi' nucun. Wari' co om awi ca coromicat nucun ma' iri na ne, ac ca cut toco' xo' cain na ca om awi ne capijacon pain ximicon, an hwet ac cain na pain ca tomi' nucun quem.

³⁶Ane tomi' pan xuhu' pain i ca' ne, tomi' iri'o' inuhu' ta ac tococwa na. Maqui' iri tara xec nein ca wap toton oro wari' pain ca caracat nucucun ta na Iri' Jam ne, tomi' ac tococwa tara: Para tomi' ximama' hwe pane, tomi' hwet xine pain oro ca tomi' ximama' nuhu' cara pane, ac i ma' tara ca tomi' tococwa. ³⁷Wahu' pain i ma' quem, mo ta hohot ne ca tomi' nuhu' pain ca e' e' wet nuhu' ca', tomi' ac cuhu' tara: Hohot hwe, xi om ne ca hohot ara ne ca tomi' nuhu' pane. Mo ta om hohot ne ca tomi' nuhu' pain ca e' e' wet nuhu' ca', tomi' ac cuhu' tara quem: Om ca hohot hwe, xi om ne ca tomi' ximama' ara hwe pain ca e' e' wet nuhu' pane, na e' na pain ca mama' hwein xe ta, ac i ma' tara ca tomi' cuhu' ta na ca tomi' tococwa ma'.

12.32 Pain ca tomi' ac i ma' ca Jeju ma', tomi' mi' non wari' co cwirin' pin nain ca caracat nucun. Cwirin' pin iri nain ne, xic am pin ac xine na ca caracat nucun.

**Ca ara rain oro ca to' querec pin' naparut pain ca pe
ho' quem Iri' Jam ta cocon Jeju ma'**

Lucas 11.29-32

³⁸Ma' ac caca na oro fariseu cocon oro co ca' na taxipa' nanain ca xirao' nucun Moisés ma', tomi' ac cocon na Jeju: Tomi' xim urut pum ta Taramaxicon co ca' na taxipa' capijacon Iri' Jam. Ara rain carawa ca to' querec pin' naparut pain ca pe ho' quem ca hwara' opa nucun Iri' Jam ta. Querec xixi' na urut pain pum ta nonon.

³⁹Wa inuhu' me ac tococwa na. Wahu' pain ca wari' nuhu' pain oro xec nexi' ca', caracat tamana hwe. Xi howa camain' hun Iri' Jam ta. Ara rain carawa ca to' querec pin' naparut pain ca pe ho' quem ca hwara' opa nucun Iri' Jam ma' mahu' ra? Om ta ara tain pahu'. Xica' pe tara Iri' Jam co ara tain nain. Ame hwe e', carawa ca ara ta' ca ca', an xiho' tarain carawa ca ara non profeta Jonas cara pane, co tomi' hwet nain capijacon pane.

⁴⁰Win ne pain ca corom pe cain moji cote ne hwam Jonas cara pane. Ma' 3 na xec, ma' 3 na xim quem, pain ca corom pe cain moji cote ne hwam con Iri' Jam pane. Ac i ma' ta' pain ca Iri' Wari' ta' ca' quem. Corom pe tain macan'. Ma' 3 tarapa' xec, ma' 3 tarapa' xim quem, pain ca corom pe tain macan' ta. ⁴¹Ame hwe e'. Main maqui' tara xec nein ca wap xim cuhu' pain ca wari' nuhu' ta napari' Iri' Jam pain oro xec nexi' ca'. Wap xim iri turuhu' pain oro ca caracat nuhu' ne, coco' ja' pan ac cucuhu' tara oro wari' nein Nínive cara pane. Tomi' em' ac cucuhu' tara: Em' nana caram cwa' ta tuturuhu'. Tomi' ac i ma' tatara, xi cwirin' pan ara caca pain ca hu qui' cocon Jonas pane. An to pin ac cacain na ca caracat nucucun pane. Je ca tomi' xuhu' quem: Je xi cwirin' qui' hwein ca hu pan xuhu' pain xocori ca' quem? Xi hwara' opa tiquin' ca' ara ton Jonas cara pane. Hwara' opa tiquin' ca' ton ca' ira inuhu' ta na ca tomi' tococwa ma'. ⁴²Ac i ma' tara cam pacara pane quem, co taramaxicon pe ho' nonon oro wari' nein Sabá cara pane ac tococwa na. Main maqui' tara xec nein ca wap xim cuhu' Iri' Jam pain ca wari' nuhu' pain oro xec nexi' ca'. Wap xim iri turuhu' pain oro ca caracat nuhu' ne, xat ja' pan ac cuhu' tara taramaxicon nein Sabá cara pane, tomi' em' ac cuhu' tara: Em' nana caram cwa' ta turuhu'. Tomi' ac i ma' tara, xi maqui' ara camain iri' pira pain ca taraju wet ton con Salomão co taxi' tamana pane. Je ca tomi' xuhu' quem: Je xi taraju wet

qui' mahu' pain ca tomi' pan xuhu' pain xocori ca' quem? Xi taxi' tiquin' ca' ara ton Salomão cara pane. Taxi' tiquin' ca' ton ca' ira inuhu' ta na ca tomi' tococwa ma'.

Ca in hwet con wari' caxicon jam

Lucas 11.24-26

⁴³Tomi' xun caxicon jam co corom pe ho' non wari' ma' ac tococwa na. Hwet ca' iri non ne, xut ximao e' ac cain na mahweri ca om pe ne com. Xao pe wa tain xumu paxi' na. Noro noro, om iri na ca mam' cain ca xao pe wa pe ne ximicon ne. ⁴⁴In hwet ton wari' co wara corom pe ho' ta' cara pane ac xucun na. In hwet iri non ne, tomi' querec te ac ca na. Awi na curucun co cwa' ta, ac xirim ca awi tamana, ac xirim ca ton ho' awi tequipain ta na co cwa' ta. Om na xucun jam co corom pe ho' non quem ac xucun na. ⁴⁵Hwet mao mami' ac ca na, o qui' 7 ac tococwa na oro win caxicon jam ca co om awi camain' nana ma'. Maji ta, corom to ho' xun co cwain co wara corom pe ho' ta' pane ac tococwa na, corom to ho' pin ac cocon na quem. Pan tem paxi' na caxicon jam co o pan nonon oro win caxicon jam ca ma', ane pan teretem tamana pan caca co o qui' ca ma' ne. Ximin tamana pin ac ca na wari' pain ca corom to ho' cocon ma' quem. Ca ma' xica' pe qui' con caxicon jam pane, amon ximin piye' paxi' na ira. Pain ca ma' mija pin cocon ma' iri na ne, ximin tamana pin ac ca na quem. Je ca tomi' xuhu' pain ca wari' nuhu' pain oro xec nexi' ca' ac tococwa na. Main ac i ma' turuhu' Caxicon Jam quem. Wara ximin paxi' hwe. Ame hwe e', main to' ximin mip pin turuhu'. Xi cwirin' hwein ca caracat tamana nuhu' pain ca om howa mahu' ta na ca tomi' cocon oro wari' Jeju pane.

Ca tomi' xun Jeju ta cama jicon cocon xurucun

Marcos 3.31-35; Lucas 8.19-21

⁴⁶Tomi' tomi' wet iri nonon oro wari' Jeju ne, maqui' ac cama na jicon cocon xurucun. Hwet to nana. Tomi' xun Jeju ta ac cacama na. ⁴⁷Hwet to nana xerem cam jim ta Jeju ac con na wari' ma'. Tomi' xim nenem ta na ca tomi' con ma'.

⁴⁸Ma' co na' ta' quem? Ma' co xere ta' quem? Ac i ma' na ca tomi' querec con ma'. ⁴⁹Xiximi' ac caparut na pain ca taxipa' urut con ca'. Wiricacam caram cwa' co na' ta' cwa', co xere ta' cwa' quem ac ca na. ⁵⁰Je ca tomi' xuhu' ca' ac tococwa na. Oro wari' co ara nanain ca param nucun Te co pe pawin cain, wiricacam co xere ta' ta, wiricacam co na' ta' quem na ca tomi' caparut pane.

**Ca pijim' joc mam' mi' caparut con wari'
co wixicaracao' nain tocwi trigo pain totacon**

Marcos 4.1-9; Lucas 8.4-8

13 Pain xec nein ca hwet cocon Jeju jicon cocon xurucun ma', hwet ca' ac cain na xirim, mao ac cain na cacarain cote ne com, xao pe ac ca na quem. ²Mija nana wari' co coco' coco' mam' nonon ma'. Om ca paric camain' caca. Je ca piton pe tain mam' horoho wa ta ca ma'. Xao pe ac ca na, coco' to ac cacain na namaji pain cacarain com oro wari' ma' quem. ³Mija na ca pijim' cocon oro wari' Jeju quem, pijim' joc mam' mi' tata pain oro carawa. Ca' na ca pijim' tococwa ma':

Taraju wet je. Wixicaracao' tain tocwi trigo pain tota ta ac ca na wari' ma'. ⁴Wixicaracao' wixicaracao', ma' ac ne na tocwi trigo ca camara' to nain cacarain wana. Maqui' ac ne na oro wijimain me, itac pin ac nein na quem. ⁵Ma' ac ne na tocwi trigo ca camara' to nain pacun ca ma' wijimain macan' ma' quem. Orot hap na i ma', xi mija ne macan' ta. ⁶Hwet iri na xina ne, nonoc ac cain na, cono' pin ac ne na quem, xi mama' nein pira caximain ta. ⁷Camara' to ac nein na pi wirain tocwi trigo ma' quem. Hwara' ac ne na pi ma', mo' ac nein na quem. ⁸Oro wirain tocwi trigo ca camara' to nain macan' ca awi ma' iri na ne, mi xo' tamana ac ne na. Pain xijein arain ma', mi 100 na. Pain xijein arain ma', mi 60 na. Pain xijein arain ma', mi 30 na quem. ⁹Mo ta taraju pa' xixi' na hwe ma', je ta taraju wet qui' hwe ta na pain ca pijim' joc mam' mi' tococwa con wari' co wixicaracao' nain tocwi trigo pain totacon pane.

Ca tomi' querec urut con pain ca pijim' joc mam' mi' nucun

Marcos 4.10-12; Lucas 8.9-10

¹⁰Tomi' querec xun e' ac urut na pain ca taxipa' urut con ca', mo hwet ac urut con na. Para pijim' joc mam' mi' momon pain oro carawa pain ca ca' na momon oro wari' pain capiiacon Iri' Jam ma' quem urut con.

¹¹Tomi' ac caparut na: Wara coromicat xo' na Iri' Jam pane. Main taramaxicon pe ho' toton oro wari' co howa nanapa' ta na, ac i ma' paxi' na ca coromicat xo' nucun pane. Ane om tomi' hwet tococwa pain oro wari' ne. Wahu' pain ca taxipa' mahu' ca', an hwet mi' nuhu' pain ca coromicat xo' nucun. Mi' nuhu' pain ca taraju pa' wa. Oro xucucun wari' co om howa nanapa' ma' iri nana ne, om ca mi' tococwa pain ca taraju pa' wa quem.

¹²Wari' co taraju wet ma', co taraju pa' xo' nain ca taraju nucun ma', mi' hwara' mami' ac tocwa tara pain ca taraju pa' wa. Wari' co om taraju pa' nain ca taraju nucun ma' iri na ne, pain ca om taraju wet xo' ca ma', an ca' ac tocwa pain tara wijimain ca taraju pa' nucun ma' quem. ¹³Je ca pijim' joc mam' mi' toton pain oro carawa pain ca ca' na toton pain capiiacon Iri' Jam ca'.

Querec paxi' nanapa' pain oro ca ara ta' ca',

ane om querec pin' caca ne.

Taraju paxi' nana,

ane om taraju wet caca ne.

Om ca taraju pa' camain' caca.

¹⁴Hwet pin na ca xirao' pe nucun profeta Isaías cara pane, pain ca xirao' pe cain capiiacon Iri' Jam pane, hwet pin na cocon oro wari' co om taraju pa' je na nana cwa'. Ca' na ca xirao' pe cain ca tomi' nucun Iri' Jam pane:

Taraju wet ho' taraju wet ho' paxi' hwein capiia ca',

ane om taraju pa' hwein ne.

Om ta taraju pa' camain' hwein quem.

Querec ho' querec ho' paxi' hwein oro ca ara ta' ca',

ane om querec pin' hwein ne.

Om ta querec pin' camain' hwein quem.

¹⁵Xi coromicat xo' je na hwe ta.

Ac ca tatep pa' hwein na tarajuhu'.

Ac ca pi'am to hwe na quem.

Xi miri'om ara mahu' ta.

Mo xi om ac i ma' hwe,
 ha' ac cuhu' xira pain ca querec pin' mahu'.
 Ha' ac cuhu' xira pain ca taraju wet mahu'.
 Ha' ac cuhu' xira pain ca taraju pa' hwe pain iri' xumuhu'.
 In hwet ac mahu' xira,
 to' witan ac xuhu' xira quem.

Ac i ma' na ca tomi' ca Iri' Jam pane, pain ca xirao' pe cain ca tomi' nucun profeta Isaías cara pane ta naparut.

¹⁶Ane tomi' pan xuhu' pain i ca' ne ac caparut na. Param mi' nuhu' pain ca awi wa Iri' Jam ma', xi querec pin' ara mahu' ta. Taraju pa' mahu' quem. ¹⁷Je ca tomi' xuhu' ca', tomi' iri'o' inuhu' ta ac caparut na: Mija nana oro profeta cocon oro wari' nucun Iri' Jam cara pane, co querec xixin na nanain oro ca querec hwe pain xocori ca'. Ane om querec cacain ne. Mija nana co taraju xixin na nanain oro ca taraju hwe pain xocori ca'. Ane om taraju cacain ne na ca tomi' caparut pane.

**Ca tomi' xo' caparut pain ca pijim' joc mam' mi'
 nucun con wari' co wixicaracao' nain tocwi trigo**

Marcos 4.13-20; Lucas 8.11-15

¹⁸Tomi' ac caparut na: Taraju wet je, tomi' xo' xuhu' pain ca tomi' mao ne ca pijim' ne ca', pain ca pijim' joc mam' mi' xuhu' con wari' co wixicaracao' nain tocwi trigo pain totacon ta naparut. ¹⁹Oro wari' co tomi' joc mam' mi' nanain cacarain wana ca wixicaracao' to xine tocwi trigo ma', taraju paxi' nanain capijacon Iri' Jam pain ca taramaxicon pin nucun ma', ane om taraju pa' cacain ne. Maqui' ac ca na Caxicon Jam, cut ca' ac tococwa pain na oro ca wixicaracao' mi' wa pain ximicocon. ²⁰Oro wari' co tomi' joc mam' mi' nanain pacun ca ma' wijimain macan' ma' iri na ne, taraju paxi' nanain capijacon Iri' Jam. Tomi' querec te hap paxi' nanain, howa pin paxi' nanain quem. ²¹Ane om tomi' querec te cara cacain ne. Om ca corom mao nein ximicocon capijacon Iri' Jam ca taraju caca. Maqui' iri na carawa ca to' i'ina nonon ne, ja' tequi' quep em' iri tata oro wari' pain ca howa cacain capijacon Iri' Jam ma' ne, an to hap ac cacain na ca howa wa. ²²Oro xucucun ma' iri nana ne, co tomi' joc mam' mi' nanain macan' ca ma' pi ma', taraju paxi' nanain capijacon Iri' Jam. Aram aram coromicat ni ca' ac cacain na. Toron ximama' ac ne na

ximicocon pain oro ca to' i'ina nonon, caramaju xixi' na nana quem. Mo xi quep xiho' cocon oro caramaji macan' ca', ane om quep xiho' cocon ne, mixein e' nonon. Ac ca mo' nein pi na capijacon Iri' Jam pain ximicocon. Ac ca om wina ne na, xi to' xucun wari' tococwa pain ta. ²³Oro wari' co tomi' joc mam' mi' nanain macan' ca awi ma' iri nana ne, taraju nanain capijacon Iri' Jam. Taraju pa' nanain quem. Horon tiquin' ac caca na, win ne ca mi ne tocwi trigo ma'. Pain xijein arain ma', mi 100 na. Pain xijein arain ma', mi 60 na. Pain xijein arain ma', mi 30 na quem. Ac i ma' na ca horon tiquin' caca pain ca howa nucucun quem. Ac i ma' na ca tomi' xo' caparut pain ca pijim' joc mam' mi' nucun con wari' co wixicaracao' tocwi trigo pain totacon pane.

**Ca pijim' joc mam' mi' tococwa con wari' co wixicaracao'
mi' nain tocwi caji tononoin pain totain trigo**

²⁴Pijim' mami' xuhu' ta ac tococwa na oro wari' ma'. Pijim' joc mam' mi' xuhu' con Iri' Jam ma', pain ca taramaxicon pe ho' cocon oro wari' ma'. Carawa ca ara ne pain ca taramaxicon pe ho' tococwa ma', an xiho' nain carawa ca ara ne con wari' ma', co wixicaracao' tain nain tocwi trigo pain totacon. Awi na tocwi trigo ca wixicaracao' ca. ²⁵Om om, maqui' towa ac ca na wari' co noc non waximain xitot. Pi'am pi'am pi' pin ca' nonon oro wari', maqui' towa ac ca na, wixicaracao' mi' ac ca pain trigo na tocwi caji tononoin ma'. Mao ac ca na quem. ²⁶Tarama' pin iri na tocwi trigo ma' ne, taparapa' pin iri na xirinain ne, hwet qui' ac ne na caji tononoin quem.

²⁷He ac caca na caram ma' co taramaja mi' nonon waximain xitot ma', hwet ac cocon na, tomi' ac cocon na quem. Oin' paxi' main tocwi trigo ca awi pain totam pane taramaxicon. Para tarama' wi nein caji tononoin ma' quem na ca tomi' cocon ma'.

²⁸Om na, wari' co noc napa' ta, wirico tara co wixicaracao' mi' na pain tota tocwi caji tononoin ma' ac ca na.

Param maparut pain ca horohot pi' pin xut pain oro caji tononoin quem ra ac cocon na.

²⁹Om na ta ac ca na. Mo ta horohot pin xin hwein oro caji tononoin ma', horohot mapi' ac hwein tara trigo ma' quem. ³⁰Miri'om jein, horon wi ma' tara ne jein. Maqui' pan tara xec nein ca caracat xine e'. Maqui' iri tara xec nein ne, tomi' ac toton tara co caracat jein ta ta' ma'. Horohot cain'

jein caji tononoin ma'. Tucu jein arain, ma' ta tom pin xine ta ac toton tara. Caracat ac hwein tara trigo, an toco' xo' ac hwein tara pain xirinain ta ac toton tara quem. Ac i ma' na ca pijim' joc mam' mi' tococwa con wari' co wixicaracao' mi' nain tocwi caji tononoin pain totain trigo pane.

Ca pijim' joc mam' mi' tococwa pain wijimain tocwi mostarda

Marcos 4.30-32; Lucas 13.18-19

³¹ Pijim' mami' xuhu' ta ac tococwa na, pijim' joc mam' mi' xuhu' con Iri' Jam ma', pain ca taramaxicon pe ho' cocon oro wari' ma'. Carawa ca ara ne pain ca taramaxicon pe ho' cocon oro wari' ma', an xiho' nain carawa ca ara nain wijimain tocwi mostarda ma', ca oin' pe cain totacon wari' ma'. ³² Ma' paxi' na oro wirain tocwi memem ca wijimain, ane iri' wijimain pan ne tocwi mostarda ne. Hwara' pin iri na ne, hwara' tiquin' ca' ac nein na oro wirain ca oin' ximama' wa pain xitot quem. Cote ne pana pin na. Maqui' ac ne na oro wijimain me, quep pe ac nein na xirinain pain oro taparain quem. Ac i ma' na ca pijim' joc mam' mi' tococwa pain wijimain tocwi mostarda pane.

Ca pijim' joc mam' mi' tococwa pain ca to' memerem nein capam'

Lucas 13.20-21

³³ Pijim' mami' xuhu' ta ac tococwa na, pijim' joc mam' mi' xuhu' con Iri' Jam ma', pain ca taramaxicon pe ho' cocon oro wari' ma'. Carawa ca ara ne pain ca taramaxicon pe ho' cocon oro wari' Iri' Jam ma', an xiho' nain carawa ca ara ne pain ca an camain ca to' memerem nein capam' narima' ma'. Maxoc hwara' iri nain trigo ne, joc wanan ac camain na ca to' memerem nein capam'. Ara pi' pin iri nain oro ca ara nein ne, an pe ac

13.30 Pain ca pijim' ac i ma' ca Jeju ma', to' querec pin' napari' pain ca querec wet xo' taxipa' capari' Iri' Jam. Om ca mana' hap capari' pain ca ara xin carawa ca om hohot non. Winim' napari', querec wet cara napari'. **13.32** Pain ca pijim' ac i ma' ca Jeju ma', tomi' mi' tata co taxipa' ca cocon oro wari' co howa nonon pane, pain ca paric to caca pane. Pijim' pijim' tiquin' ac tococwa na oro xucucun wari' ma', aram aram mija pin ac caca na oro wari' co howa nonon Jeju pain oro xijein macan'.

camain na, memerem pin ac ne na quem. Ac i ma' na ca pijim' joc mam' mi' tococwa pain ca to' memerem nein capam' pane.

Para pijim' joc mam' mi' e' tococwa pain oro ca pijim' wa Jeju pane quem

Marcos 4.33-34

³⁴Oro ca pijim' nucun Jeju pane, pain ca pijim' mi' tococwa pain capiiacon Iri' Jam oro wari' pane, pijim' joc mam' mi' tata pain oro carawa. Oro ca pijim' nucun pane, pijim' joc mam' mi' e' tata pain oro carawa. ³⁵Ma' ta hwet pin ne ca wara tomi' pe ca profeta pane, pain ca wara an hwet pe cain ca tomi' nucun Jeju pain cara pane. Ca' na ca tomi' ca pane:

Pijim' toton oro wari' iri ta' ne,

pijim' joc mam' mi' ac toton tara pain oro ca pijim' ne pain ca
ca' na toton pain capiiacon Iri' Jam.

Tomi' hwet ac toton tara pain oro carawa ca om an
hwet querec ca Iri' Jam ira,

ca om taraju camain' caca oro wari' pain cara pane,
pain ca xo' tomi' ma' pin cain macan' pane.

Ac i ma' na ca wara an hwet pe cain ca tomi' nucun Jeju profeta pane.

Ca tomi' xo' caparut pain ca pijim' nucun pain tocwi caji tononoin

³⁶Mao ta' ta ac ca na Jeju ma', paca' ac tococwa na oro wari' ma', in hwet ac cain na xiricon. Tomi' querec xun e' ac urut na pain ca taxipa' urut con ca', mo hwet ac urut con na. Tomi' xo' mi' xut pain ca tomi' mao ne ca pijim' nem pain ca pijim' joc mam' mi' main caji tononoin ne urut con.

³⁷Tomi' xo' ac caparut na: Wari' co wixicaracao' nain tocwi trigo ca awi ma', tomi' joc mam' mi' napa' pain ca Iri' Wari' ta' ca'. ³⁸Totacon ma' iri na ne, an xiho' nain macan' ca to pan caca oro wari'. Trigo ca awi tocwi ma', an xiho' nonon oro wari' co taramaxicon pe ho' ca Iri' Jam. Caji tononoin ma' iri na ne, an xiho' nonon oro wari' nucun Caxicon Jam quem. ³⁹Wari' co wixicaracao' nain tocwi caji tononoin ma', co noc non waximain xitot ma', an xiho' non Caxicon Jam. Xec nein ca caracat xine trigo ma', an xiho' nain oro xec nein ca win pi' pin ta' ne macan'. Oro wari' co caracat nanain

13.33 To' jimao pin nain trigo ca to' memerem nein capam'. Ac i ma' na ca to' jimama' tococwa oro wari' co taramaxicon pe ho' ca Iri' Jam quem.

trigo ma' iri nana ne, an xiho' nonon oro jam co taramaja mi' nonon Iri' Jam quem.

⁴⁰Je ca tomi' xuhu' ca' ac caparut na. Win ne ca horohot xine caji tononoin ma', win ne ca tom pin xine ma' quem, ac i ma' tara pain oro xec nein ca win pi' pin ta' ne macan' quem. ⁴¹Tomi' ac toton tara oro jam co taramaja mi' nanapa' ma', wata' pain ca Iri' Wari' ta' ca', tomi' pan ac toton tara: Cut in jujun oro caracat ta, cut in ca' jujun pain ximijacocon oro wari' co taramaxicon ne nonon Iri' Jam ma' ac toton tara, cut in ac tococwa tara co to' caracat nonon oro win ma' nucucun cocon oro wari' co pan teretem taxipa' nana ma'. ⁴²Wixicaracao' mi' ac tococwa tara pain cote ne xe. Oro wari' co jain jain to nanain i cain, awaran tamana ac caca tara, cacacao' ac cacain tara xicocon pain ca jain jain tamana nucucun. ⁴³Oro wari' co iri' wari' nana pain ca tomi' ha' cocon Iri' Jam ma' iri nana ne, ac ca toha tamana caca tara. Win ne ca toha ca xina ma', ac i ma' tara ca toha to cacain ca taramaxicon pe ca Cotere' Iri' Jam. Mo ta taraju pa' xixi' na hwe ma', je ta taraju wet qui' hwe ta na ca tomi' caparut Jeju pain ca tomi' xo' caparut pain ca pijim' nucun pain tocwi caji tononoin pane.

Ca pijim' joc mam' mi' tococwa pain carawa ca awi tamana ca tequi' pa' pe wa pain xitot

⁴⁴Pijim' ac caparut na: Carawa ca ara ne pain ca taramaxicon pe ho' xirapa' na tocwa Iri' Jam ma', an xiho' nain carawa ca ara nain iri' carawa ca awi tamana ca tequi' pa' pe xine pain xitot. Ma' na wari' ma', co mam' nain ma', tequi' pa' mami' ac cain na quem. Tomi' querec te tamana nain. Mo vender pi' pin tain oro caramaju e' ac ca na, mao ac ca na, vender pi' pin ac cain na oro caramaxicon. In hwet mami' ac cain na xitot ma', an pin ac cain na quem. Ac i ma' na ca pijim' joc mam' mi' caparut pain carawa ca awi ca mam' pe xine pain xitot pane.

13.44 Wari' co tomi' querec te tamana nain carawa ca awi ca mam' pe cain xitot ma', pain ca jain jain cain ma', na e' na pain ca jain jain ac i ma' xun Iri' Jam pain ca taramaxicon pe ho' xim capari' quem.

Ca pijim' joc mam' mi' tococwa pain wijimain pacun ca awi tamana

⁴⁵ Pijim' ac caparut na: Carawa ca ara ne pain ca taramaxicon pe ho' xirapa' na tocwa Iri' Jam ma', an xiho' nain carawa ca ara ne con wari' co cut taxipa' nain oro carawa, vender tiquin' ac cain na quem. Pirao' taxipa' nain wijimain pacun ca awi tamana ma', pérola na wixinain. ⁴⁶ Mam' iri nain ca awi tamana nein ne, mo vender pi' pin tain oro caramaju e' ac ca na, mao ac ca na, vender pi' pin ac cain na oro caramaxicon. In hwet mami' ac cain na, an pin ac cain na quem. Ac i ma' na ca pijim' joc mam' mi' caparut con wari' co an nain wijimain pacun ca awi tamana pane.

Ca pijim' joc mam' mi' caparut pain caji wi ca mam' quep wa hwam

⁴⁷ Pijim' ac caparut na: Carawa ca ara ne pain ca taramaxicon pe ho' toton cocon oro wari' Iri' Jam ma', an xiho' nain carawa ca ara ne cocon oro co xin nanain cote ne caji wi ca mam' pa' wa hwam. Mija na oro xucun hwam co quep caca. ⁴⁸ Moin' pin iri na hwam cocon ne, cuc in qui' ac cocon na pain namaji. Xao to ac caca na, an to ni xun co awi, an to ni xun co om awi quem ta ac xucucun na. Co awi ma', an ho' pa' mi' ac tocwa na pain coco. Co om awi ma' iri na ne, wixicaracao' hwerehwet pin ac tocwa na quem.

⁴⁹ Je ca tomi' xuhu' ca' ac caparut na. Maqui' iri tara xec nein ca pi' pin ta' ne macan' ne, ac i ca' tara, maqui' ac caca tara oro jam co taramaja mi' nonon Iri' Jam ma'. An to ni ac tococwa tara co iri' wari' nana pain ca tomi' ha' cocon Iri' Jam, an to ni ac tococwa tara oro wari' co caracat nana ma' quem. ⁵⁰ Co pan teretem nana ma', wixicaracao' mi' ac tococwa tara pain cote ne xe. Oro wari' co jain jain to nanain i cain, awaran tamana ac caca tara, cacacao' ac cacain tara xicocon pain ca jain jain tamana nucucun. Ac i ma' na ca pijim' joc mam' mi' caparut pain caji wi ca mam' quep wa hwam pane.

13.46 Ca pijim' nucun Jeju con wari' co an nain pérola ma', an xiho' nain ca pijim' nucun con wari' co jain jain nain carawa ca awi ca mam' pe cain xitot. Na e' na pain ca jain jain ac i ma' xun Iri' Jam pain ca taramaxicon pe ho' xim capari' quem.

**Capijacon Iri' Jam ca an xiho' nain
xocorinain carawa je wara carawa quem**

⁵¹ Tomi' querec ac caparut na pain ca taxipa' urut con ca'. Taraju pa' hwein ca tomi' mao nein oro ca pijim' joc mam' mi' xuhu' cara ne naparut. Taraju pa' urut pain ta ac urut con na.

⁵² Je ca tomi' xuhu' ca' ac caparut na. Taxi' pin hwein ca ca' na wa capijacon Iri' Jam. Xi ca' na xo' ara xuhu' ta. Ha' nuhu' pain ca ca' na huhun pain capijacon Iri' Jam, ha' nuhu' pain ca ca' na huhun pain xocori capija ca' quem, pain ca ca' na xuhu' pain ca taramaxicon pin nucun Iri' Jam quem. Ca' na iri hwein capijacon Iri' Jam je xocori capija ca' ne, an xiho' ac hun na waximain xirim co an hwet qui' nain oro xocori caramaxicon je oro wara caramaxicon ma' quem. Mi' tiquin' ac tococwa na pain oro win ma' ca ma'. Ac i ma' na ca tomi' caparut ma'.

Ca in mao cain Nazaré Jeju

Marcos 6.1-6; Lucas 4.16-30

⁵³ Pijim' pijim' xam' iri naparut pain oro ca pijim' nucun Jeju ma' ne, mao ac ca na. ⁵⁴ Wa' mao iri nain macaracon ma' ne, pijim' pe ac cain na xirim ca cut in to xucucun ma'.

He, cain' cain' ca co cwa' ne ta? Ma' co mi' non pain ca coromicat xo' nucun pain ca taxi' tamana nucun ma' quem ac xucucun na oro wari' co taraju nonon ma'. Ma' co mi' non pain ca ara an hwet pe cain ca hwara' opa nucun pain ca ara cain oro ca om ara taxi' ne ca wari' wa ma' quem nana. ⁵⁵ Om ca panxica co pacara pane ca ra, co ara taxipa' nain pana cara pane ca ra? Om ca cawiji con Maria ra? Om ca aji' con José con Tiago con Simão con Judas cwa' quem? ⁵⁶ Om ca to ho' cacapari' oro mon xojam' co aji' nonon cwa' ra? Om ca to ho' cacapari' pain Nazaré ca' ra? Cain' cain' xira ne? Ma' co mi' non pain oro ca ara taxi' nucun ma' quem ne na ca tomi' nucucun ma'. ⁵⁷ Cain' cain' xira con ne nana, miri'om ac cocon na quem. Om ca howa camain' cocon.

Ane tomi' pan cocon Jeju ne: Tomi' querec te paxi' ta profeta pain oro xijein cidade ma'. Pain iri' macaracon ma' iri na ne, om ca tomi' querec te tocwa. Iri' ca nari nucun ma', noc pan nonon ta na ca tomi' tococwa ma'.

13.54 Nazaré na wixinain macaracon Jeju. Je ca pe pan ca pain ca xo' hwara' nucun.

⁵⁸Je ca om ha' con pain ca ara tamana pe cain Nazaré oro ca om ara taxi' ne ca wari' wa pane. Xi howa cocon ta.

Ca ton tapit pin xine winacon João co ja' taxipa' com pane

Marcos 6.14-29; Lucas 9.7-9

14 Om ca pain homa ne, taraju ac ca na taramaxicon Herodes ma', taraju nain oro ca tomi' hwet nucucun oro wari' con Jeju. ²Tomi' ac tococwa na oro wari' nucun co taramaja mi' e' nonon ma'. João co ja' taxipa' com pane ta. Wirico tara, e' mami' tara João co ja' taxipa' com pane! Je tara ca ha' con pain ca ara cain ca om ara taxi' ne ca wari' wa ta na ca tomi' nucun Herodes ma'.

³⁻⁴Coromicat ac i ma' paxi' non Jeju Herodes ma', ane wara mi' pin ca João ne. Ca' na ca mi' pin nucun João pane. Herodes ma', an pin nam manacon coxa' ca ma', Filipe ma'. Herodias na wixicam. Je ca tomi' ho' tomi' ho' con Herodes João ma' quem. Tomi' caho' nem pain ca an wa manacon coxa' ma Iri' Jam ta non pain ca pan to' cain taraxicon. Quep jun ta ac tococwa na oro soldado nucun ma' quem. Quep jun, pao' pe jun, tao' pe jun pain xirinain ca tao' to tao' to to wa ta tata. ⁵To' pa' pin ton paxi' na, ane jin' tococwa oro wari' ne. Mo ta to' pa' pin ton, mana' tatarapa' ta tata. Xi om ne ca profeta na ta ara cocon João pane.

⁶Aram aram maqui' ac ne na xec nein ca mam' pe wet cacain ca pan' qui' nucun Herodes pane. Cut in ac xucucun na, wirico Herodes, wiricoco oro win ma' ca quem. Tomi' querec te xi' e' ac xucucun na, corom ac cama na cainacam Herodias ma'. Pi' xirao' in pi' xirao' in pe ac camain na ca xao to morojam' to caca ma'. Tomi' querec te tamana nam Herodes ma'. ⁷Tomi' ac cam na: Ma' carawa ca param ma quem? Carawa ca mi' ne pain mapa' ma', mi' ac xim pain tara. Tomi' iri'o' inem, om ca mixein ta'. Taraju napa' Iri' Jam pain ca tomi' an pe mi' xim pain ca tomi' ne ca'. Mo ta om mi' xim pain, wap ma' tarapa' Iri' Jam ne. Ac i ma' na ca tomi' cam ma'.

⁸Cain' cain' xiton quem ac cam na jicam ma' quem.

Om na, ton tapit mi' ho' ne pain winacon João co ja' taxipa' com ta ron ta ac cam na.

Ma'e, mo in hwet ac con na, ton tapit mi' ho' ne pain winacon João co ja' taxipa' com ma'. An pe tatarain pain too ta. Param ho' inain ta na ca tomi' con ma'.

⁹Cain' cain' xira pata' ne ta ac ca na Herodes. Om xi tomi' an pe mi' tam pain ca tomi' ne cara ne ta ca' xucun. Ane na e' ne pain ca tomi' ha' cam ne, xi om ne ca tomi' an pe mi' ara cam pain ca tomi' nucun ta. Wixipa' tata oro win ma' ca co taraju nonon pain ca tomi' nucun quem. Je ca tomi' tococwa oro wari' co taramaja mi' e' nonon ma'. Tomi' ha' jein ca tomi' nequem ta tata. ¹⁰Mo hwet jun João pain xirinain ca tao' to tao' to to wa cain, ton tapit pin ac hwein tara winacon ta tata. Ton tapit pin ac cacain na winacon. ¹¹An qui' ac cacain na pain too. Mi' ac cacam pain na, mi' tiquin' mi' ac cam na pain jicam ma' quem. ¹²Maqui' ac caca na co taxipa' ca João ma', an mao ac cacain na curucun, an corom pe ac cacain na pain manain pacun. Tomi' hwet ac cocon na Jeju quem.

Ca tomi' hwara' pin cain capam' con hwam Jeju

Marcos 6.30-44; Lucas 9.10-17; João 6.1-15

¹³Taraju iri na Jeju ne, pain ca ton tapit pin xine winacon João co ja' taxipa' com ma', maji ta ac caparut na pain ca taxipa' urut con ca', piton to ac urut pain na mam' horoho wa, pan horoho mama' ac urut na. Xica' to urut, mama' urut pain ca om pe ca wari'. Ane taxi' pin cacaparut oro wari' ma' ne, taxi' nanaparut pain ca mama' nuxut. Je ca maqui' cacain oro xijein cidade ma', ja' ja' ac cacaparut na pain macan'. ¹⁴An tac iri urut pain mam' horoho nuxut ne, piri' ac ca na Jeju. Querec ac tococwa na oro wari' quem. Mija nana wari' ta. Om ca paric camain' caca. Xiram pa' tata, quep xio quep xio ac tococwa na co caxi nana ma'.

¹⁵Irawin pin iri na ne, mo tomi' xun Jeju ta ac urut na pain ca taxipa' urut con ca', xuruxut hwet ac urut con na. Irawin pin na ta Jeju. Om nain i ca' xirim ca cut pe xine carawa ca cao' wa quem urut con. Mama' je ximomon oro wari' cwa'. Ma' ta mama' cacain oro ca paric to ne xirim ma', cut pan ac cacain tara carawa ca cao' wa ta na ca tomi' urut con.

¹⁶Om na, hohot na pain ca mon to wet to cacain i ca'. Mi' pan jujun pain carawa ca cao' wa ta ac caparut na.

¹⁷Cain' cain' xuxut quem ac urut con na. Ma' 5 e' naparut wijimain capam' ca'. Ma' 2 e' naparut hwam cwa' quem urut con.

¹⁸Cut mi' xine pain ta ac caparut na.

¹⁹Xao to jein tononoin ma' ac tococwa na oro wari' ma'. Cut ac cain na capam' ca ma' 5 ma', wirico hwam co ma' 2 ma' quem. Cut iri nain ne,

noro pawin ac ca na, tomi' ac con na Iri' Jam. Tomi' querec te urut pum pain ca mi' maparut pain capam' con hwam cwa' quem Te non, jicaracat ac cain na capam', cut mi' ac caparut pain na. Cut mi' ac caparut na con hwam quem. Maxiram' mi' ac urut cocon pain na oro wari'. ²⁰ Cao' cao' xam' ac caca na. Ma'am ca' nanain, ma'am ma'am pi' pin nana. Pan cut xin pawirinain ta ac urut na, cut ho' cut ho' ac urut pain na pain coco. Moin' 12 na cotain parut. ²¹ Ac ca ma' 5.000 caca na ca tarama' nucucun co cao' nana. Ma' paxi' nana oro narima' cocon oro hwijima' quem, ane om tomi' tacacama ne.

Ca xut cain quimain com Jeju

Marcos 6.45-52; João 6.16-21

²² Pan cut pin iri urut pain pawirinain capam' con hwam ne, tomi' ac caparut na Jeju, tomi' naparut pain ca taxipa' urut con ca'. Piton to jein mam' horoho wa ma'. Wara pan horoho mama' jein xijein cacarain cain ta naparut. Querec querec mama' toton oro wari' pa'ao', aram aram hwet ac xuhu' tara quem naparut.

²³ Querec querec mama' iri nonon oro wari' Jeju ne, piri' mao xica' pe ac cain na pacun. Tomi' ton Te ta na. Aram aram xo' um pin na con. Xica' pe na pain i cain.

²⁴ Wara pan horoho pan horoho hwet pin urut pain ximijain com ma', wara to pira ca' urut pain cacarain com. Wap tamana na com ma' quem, wap mip nain mam' horoho nuxut, xi nuru cam' ara caparut hotowa ta. ²⁵ Iri' ximijain xim naparut, om ca hwet querec ca xina, xut hwet ac caparut na Jeju. Xut hwet naparut pain quimain com.

²⁶ Querec iri urut con pain ca xut cain quimain com ma' ne, jin' tamana ac urut na, merem ac urut na: Jima ta, jima ta ac urut na pain ca merem nuxut.

²⁷ Ane tomi' hap caparut Jeju ne. Om na, ta jin' mahu' me ta, wata' ta. Quereme je ta naparut.

²⁸ Wum ra ac con na Pedro. Mo ta wum ne, hap ra ne, xut hwet ne pain quimain com ca' ne e'. Ac i ma' na ca tomi' con ma'.

²⁹ Hap ra ta ac con na.

Quiji' ca' ac cain na mam' horoho wa ma', xut mao ac cain na quimain com. Xut hwet ton paxi' na ira. ³⁰ Querec iri nain ca wap tamana ne com

pain ca nuru tamana ne hotowa ma' ne, jin' pin ac ca na quem. Pan corom mao ta' na ira. Quep xiho' ne ta Taramaxicon ne ac con na.

³¹ Coc matam hwet hap ac con na Jeju pain micon, quep xat ac con na. Para tara con ta'a mapa' quem? Je xi howa mip mapa' quem? Ac i ma' na ca tomi' con ma'.

³² Piri' to ac cacain na mam' horoho wa ma', nuru nuru om pin ac ne na hotowa quem. ³³ In ac ac cocon na, pe torotop mi' ac cocon na. Panxica Iri' Jam ma ma' ira ac cocon na quem.

Ca quep xio pin tococwa oro wari' pain Genesaré

Marcos 6.53-56

³⁴ Horoho horoho tiquin' ac urut na. Wirico Jeju, warut pain ca taxipa' urut con ca', horoho mama' ac urut na pain xijein cacarain cote ne com. Tan' mama' ac urut na pain macarain Genesaré ma'. ³⁵ Querec pin' iri nonon Jeju oro wari' co to nanain i cain ne, jein mama' ac cacain na oro xijein cidade. Maqui' na Jeju, maqui' na Jeju ta xucucun, tomi' hwet tomi' hwet xam' ac xucucun na con. Mija ac caca na oro wari' co cut mi' nonon cocon co caxi nana ma'. ³⁶ Jain jain nonon, ta narain ho' maparut pain ca quep urut pum ca', quep e' xut con cacaracon womum ma' nonon. Xio xio pi' pin ac caca na co quep nonon cacaracon womicon ma' quem.

Ca tomi' in pin tococwa oro fariseu pain ca pijim' ximama' nucucun

Marcos 7.1-23

15 Ma' ac caca na oro fariseu cocon oro co ca' na taxipa' nanain ca xirao' nucun Moisés. Maqui' nanain Jerusalém. Hwet ac cocon na Jeju. Tomi' querec ac cocon na: ² Para om tomi' ha' caca co taxipa' ma ma'? Para om tomi' ha' cacain oro ca ara je cacapari' oro hwanana nexi' co taramaxicon nana pain cara pane quem? Xi hohoc xo' mam' cacain micocon pain ca cao' xi' nucucun ta na ca tomi' querec cocon ma'.

15.2 Je curucucun oro judeu pane. Ca' na ca coromicat nucucun: Mo ta quep xin carawa ca om hohoc con Iri' Jam ma', em' pin ac iri' tara. Na e' na pain ca hohoc xo' xin mixi', ma' ta querec hohoc mami' capari' Iri' Jam ta nana. Je ca hohoc xo' mam' taxipa' cacain micocon pain ca cao' xi' nucucun pane.

³Wahu' quem inuhu' ac tococwa na. Para om tomi' ha' hwein capijacon Iri' Jam ca tomi' ha' je cuhu' quem? Tomi' ha' e' hwein oro ca tomi' pan nuhu' ta. ⁴Noro jein ca tomi' pan nucun Iri' Jam ca'. Tomi' ha' ron cote ma cam jim me. Quep xihu' raram quem, ac i ma' na ca tomi' capari' Iri' Jam. Tomi' napari' pain i ca' quem: Wari' co tomi' napat non cote ca cam jicon ma', to' pa' pin ac tocwa tara ta napari'. ⁵Wahu' iri na ne, tomi' ca' huhun oro win ma' nuhu' pain ca pijim' huhun ma': Ma' paxi' turuhu' carawa ca mam' quep xihu' xun hun cote hwe cam juhu' ma'. Mo ta tomi' cain' hwehwem: Carawa ne ca', wara tomi' pe mi' inon pain Iri' Jam ta. Om ca mi' ac xuhu' pain, mo ta tomi' ac i ma' hwehwem, ⁶hohot ac ne tara pain ca om quep xihu' hwehwem ta na ca tomi' pan nuhu' pain ca pijim' huhun ma'. Ac i ma' na ca miri'om hwein capijacon Iri' Jam ta. Xi om ne ca tomi' ha' e' ara hwein oro ca tomi' pan nuhu' ta ac tococwa na. ⁷Ac ca iri'o' xi' ca' tara me hwe ra! Iri'o' na ca tomi' nucun Isaías cara pane, pain ca tomi' hwet cain capijacon Iri' Jam cocon oro hwanana nuhu' pane ta ac tococwa na. Ca' na con pane:

⁸Tomi' ca' na Iri' Jam:

Tomi' ha' urut pum ta paxi' nanapa' oro wari' cwa',
ane tomi' capijacocon e' caca ne.

Om ca tomi' querec te iri'o' cacapa'.

Ac ca to pira ca' cacapa' na pain ximicocon ta.

⁹In ac paxi' nanapa' pain ca pe torotop mi' cacapa' ca',
ane om tomi' querec te toton pain ne.

Xi tomi' mixein ara caca pain ca tomi' nucucun ta.

Om na, oro capijaxut ca ca' na urut pahu' ca',
maqui' non Iri' Jam ta nonon oro win ma' caca.

Xi maqui' capa' ca pijim' nucucun pain ca ca' na cacain capija ta.

Maqui' nonon oro hwanana nucucun ta.

Ac i ma' na ca tomi' hwet cain capijacon Iri' Jam Isaías pane, pain ca pan to' cain taraxicocon oro hwanana nuhu' pane na ca tomi' tococwa ma'.

¹⁰Harahap je ta ac tococwa na oro wari'. Taraju wet xine, ma' ta taraju pa' hwe quem tata. ¹¹Om ca to' em' cuhu' carawa ca corom hwet nuhu' pain capijahu' ma', pain ca cao' nuhu' ma'. Carawa ca hwet ca' nain capijahu' ma', pain ca tomi' ximama' nuhu' ma' iri na ne, je i ma' ca to' em' nuhu' ta. Om ac ne na ca querec hohot cuhu' Iri' Jam na ca tomi' tococwa ma'.

¹²Tomi' xun e' ac urut con na pain ca taxipa' urut con ca', mo hwet ac urut con na. Tomi' querec ac urut con na: Taxi' momon oro fariseu cara ne? Mana' nenem pain ca tomi' nem cara ne urut con.

¹³Je i ma' ira ac caparut na. Oro fariseu ma', an xiho' nanain memem ca om oin' ca Te co pe pawin cwain. Ame hwe e', main horohot pi' pin totoron ta. ¹⁴Miri'om jujun. Ca' na xuhu' urut pahu' pain capijacon Iri' Jam paxi' nonon oro wari' ma'. Ma' ta taraju pa' hwein paxi' nonon. Ane om taraju pa' pan cacain ne. An xiho' nonon oro co om tococon ma', co coc papan paxi' nonon oro win ma' caca co om tococon ma' quem. Noro jun wari' co om tocon ma'. Mo ta coc papan ton con win ma' ca co om tocon ma' quem, pan' horot mama' pi' pin ac cacain tara man, ac i ma' na ca tomi' caparut ma'.

¹⁵Tomi' xo' xut pain ca tomi' nem cara ne, pain ca om to' em' capari' carawa ca cao' wa ma ne ac na Pedro.

¹⁶Cain' cain' xihwe quem? Om ca taraju pa' querec hwe ra ac ca na. ¹⁷Om ca taraju pa' hwe ra inuhu'. Carawa ca corom hwet nuhu' pain capijahu' ma', pain ca cao' nuhu' ma', corom hwet e' nuhu' pain pemenuhu'. Aram aram ira' pin ac hwein na quem. ¹⁸Ca tomi' nuhu' ca hwet qui' nain capijahu' pain ca tomi' ximama' nuhu' ma' iri na ne, maqui' nain xumuhu'. Je i ma' ca to' em' nuhu' ta. Je ca om querec hohot cuhu' Iri' Jam quem. ¹⁹Xi maqui' ara nein ca xumu wa oro carawa ca to' em' nain ca wari' wa ta. Mo na: Ca coromicat pan teretem wa ma', ca to' pa' wa wari' ma', ca quep tacacama oro manacocon oro wari' ma', je pain ca quep ne cocon xucun tarama' oro narima' ma' quem, oro ca caracat wa pain ca quep ximama' wa ma', ca cut noc xa wa carawa ma', ca tomi' mixein wa ma', ca tomi' napat wa ma' quem. ²⁰Je i ma' carawa ca to' em' nain ca wari' wa ta. Ca om hohoc xo' mam' xine ca mu wa pain ca cao' xi' wa ma' iri na ne, om ca to' em' nein ca wari' wa i ma' ta na ca tomi' xo' caparut pain ca taxipa' urut con ca'.

Ca quep xio pin tacama cainacam narima' co om judeu

Marcos 7.24-30

²¹Maji ta ac caparut na Jeju, mama' ac urut na pain macarain Tiro je Sidom. ²²Maqui' ac cama na narima' co om judeu ma'. Wari' nein Canaã

na. Xut hwet ac con na Jeju, merem ac con na: Taramaxicon ne! Winacon Davi! Co hwanana ne non Davi cara pane! Wum co wara tomi' pe ca Iri' Jam pane ta. Xiram pa' ne cam caina cwa'. Ximin na. Corom pe ho' nam caxicon jam ta non.

²³ Tomi' ac i ma' paxi' non Jeju ma', ane miri'om cam ne. Om ca tomi' camain' cam. Xuruxut hwet ac urut con na pain ca taxipa' urut con ca', tomi' ac urut con na. In mao ra ram cam ma' ta Jeju, xi ja' ja' merem ara capari' ta. Mija a xira ta urut con.

²⁴ Om ca hwet roron co om judeu nana ta capa' Iri' Jam quem ac caparut na. Hwet e' roron oro judeu co an xiho' nanain ovelha ca pan' ara'am ca' non waximain napa' ta na ca tomi' caparut ma'.

²⁵ Xut hwet pan ac con na narima' ma'. Pe torotop mi' ac con na, quep xiho' ne ta Taramaxicon ne ac con na quem.

²⁶ Om na, om ca hohot ne pain ca cut ca' toton pain carawa ca cao' wa oro hwijima' ma', pain ca wixicaracao' mi' ton pain oro wixicon oromijac cwa' quem na ca tomi' cam ma'.

²⁷ Taxi' paxi' ina quem Taramaxicon ne ac cama na. Ane om narain ho' tocwa pain ca cao' wa oro wixicon oromijac ma' ne. Cao' nain oro pawirinain carawa ca cao' pawuru caca co wina nonon ma', ca cao' pawuru to cacain pana ca mam' cao' to caca ma'. Je xi xiram pa' ac i ma' mapa' pain ca om judeu ta' ca' quem na ca tomi' con ma'.

²⁸ Wa inem me narima', howa tamana mapa' ta ac cam na. Xiram pa' terem Iri' Jam ta. Ara mi' terem pain ca param ma ma' na ca tomi' cam ma'. Xio hap pin ac cama na cainacam.

Ca quep xio mija tococwa oro wari'

²⁹ Maji ta ac caparut na Jeju, xuruxut mama' ac urut na pain cacarain cote ne com pain Galileia ma'. Piri' mao tain pacun ca' e' ac ca na, piri' piri' xao pe ac ca na quem. ³⁰ Mija nana wari' co xuruxut hwet nonon. Om ca paric camain' caca. Cut qui' nonon oro co caji at nana ma', co om tococon

15.22 Canaã na wixinain macaracam. **15.26** Pain ca pijim' joc mam' mi' nucun Jeju ma', cocon oro hwijima' co cao' camara' nanain pawirinain carawa ma', wiricoco co tomi' joc mam' mi' nonon oro win judeu ca. Oro wixicon oromijac ma' iri na ne, wirico co tomi' joc mam' mi' nonon co om judeu nana quem. Ca' paxi' na ca tomi' cam: Om ca hohot ne pain ca quep xiho' cain' xuhu' pain ca om judeu hwe ma'. Quep xiho' cain' toton oro win ma' ta' co judeu nana cwa' nam.

ma', co om capijacocon ma' quem. Cut qui' mija nonon co ma' nonon oro xijein ca caxi wa ma' quem. An to ja' pan ac cocon na pain caximacon Jeju. Quep xio quep xio xam' ac tococwa na. ³¹ Wa wa ac cocon na oro wari' pain ca querec cacain ca ara ca ma'. Tomi' pin nana co om capijacocon ma'. Xio pin nana co caji at nana ma'. Xuruxut xo' pin nana co xuruxut xirac nana ma'. Querec pin' nana co om tococon ma' quem. Awi tamana na Iri' Jam co howa iri' pain ca waram winacon Israel iri' cwa' nana pain ca tomi' nucucun.

Ca tomi' hwara' mami' cain capam' con hwam Jeju

Marcos 8.1-10

³² Harahap je ac caparut na pain ca taxipa' urut con ca'. Tomi' ac caparut na: Xiram pa' inonon oro wari' cwa'. Ma' 3 ara xi' na xec pain ca to ho' cacapari' ca'. Om nonon carawa ca cao' wa quem. Noc inonon pain ca mama' je toton pain ca pe' nucucun. Mo ta mama' je toton pain ca pe' nucucun ma', am xuruxut camara' to cacain wana pain ca naro ne curucucun pain ca pe' tamana nucucun ta na ca tomi' caparut.

³³ Cain' cain' xixi' quem ac urut con na. Main xi mam' pe xin carawa ca to' ma'am nonon pain i ca' quem, xi ma' ne xirim ca cut pe xine ta. Mija ara xi' nana oro wari' cwa' quem urut con.

³⁴ Cain' ca ma' cuhu' capam' quem ac caparut na.

Ma' 7 e' naparut capam' ca'. Ma' paric ca' e' naparut wixicon hwam cwa' quem ac urut con na.

³⁵ Xao to jein macan' ta ac tococwa na oro wari'. ³⁶ Cut pin iri nain capam' ca ma' 7 ma' ne, wirico hwam ma' quem, tomi' ac con na Iri' Jam: Tomi' querec te urut pum pain ca mi' maparut pain capam' con hwam cwa' quem Te non, jicaracat ac cain na, cut mi' ac caparut pain na pain ca taxipa' urut con ca'. Maxiram' mi' ac urut cocon pain na oro wari' ma' quem. ³⁷ Cao' cao' ma'am pin ac caca na. Ma'am ca' nanain, ma'am ma'am xam' nana. Pan cut xin pawirinain ta ac urut na pain ca taxipa' urut con ca', cut ho' cut ho' ac urut pain na pain coco. Moin' 7 na cotain parut. ³⁸ Ma' 4.000 nana ca tarama' nucucun co cao' nana ma'. Ma' paxi' nana oro narima' cocon oro hwijima' co cao' nana ma' quem, ane om tomi' tacacama ne.

³⁹Mama' je iri nonon oro wari' Jeju ne, maji quem ac caparut na, piton to ac urut pain na mam' horoho wa, pan horoho mama' ac urut na pain macarain Magadã cain.

**Ca ara rain carawa ca to' querec pin' naparut pain ca
pe ho' quem Iri' Jam ta cocon Jeju**

Marcos 8.11-13; Lucas 12.54-56

16 Xuruxut hwet ac cocon na Jeju oro fariseu cocon oro saduceu. Tomi' querec xun ta nana. Am iri'o' ca, am om iri'o' ca quem nana. Je ca tomi' cocon ma': Ara rain carawa ca to' querec pin' naparut pain ca pe ho' quem ca hwara' opa nucun Iri' Jam ta nonon.

²Ane tomi' in pin tococwa ne. Cain' ca tomi' hwe pain ca querec hwein nanawin pain irawin quem? Mo ta awi tamana ne nanawin pain ca corom mao ta' ca xina ma', tomi' ac hwe na: Xec awi tara xina ta ac hwe na. ³Xec iri na ne, pain iri' xo' xec ma', mo ta mixem ne nanawin ma', tomi' ac hwe na: Pan' ta' na xowi' pain xec ca' ac hwe na quem. Je ca tomi' xuhu' ca' ac tococwa na. Noro iri hwein nanawin ne, querec pin' ac hwein na ca awi ca xina je pain ca pan' ta' ne xowi' ma'. Je xi querec pin' hwein carawa ca ara ta' pan ca Iri' Jam pain macan' ca' quem? ⁴Wa inuhu' me ac tococwa na. Wahu' pain ca wari' nuhu' pain oro xec nexi' ca', caracat tamana hwe. Xi howa camain' hun Iri' Jam ta. Ara rain carawa ca to' querec pin' naparut pain ca pe ho' quem Iri' Jam ma' mahu' ra? Om ta ara tain pahu'. Xica' pe tara Iri' Jam co ara tain nain. Ame hwe e', carawa ca ara ta' ca ca', an xiho' tarain carawa ca ara non Jonas cara pane.

Mao ta' ina ta ac tococwa na, mao ac ca na quem.

Ca pijim' ximama' nucucun oro fariseu cocon oro saduceu

Marcos 8.14-21

⁵Maji ta ac urut na pain ca taxipa' urut con Jeju cwa', pan horoho mama' ac urut na pain xijein cacarain com. Om ca cut mam' urut pain capam'. Ji'am pin urut pain.

16.4 Noro xin Mateus 12.40. Tomi' non Jonas cara pane, pain ca ma' 3 ne xec pain ca corom pe cain moji cote ne hwam pane. Ac i ma' ta' pain ca ma' 3 xim capa' xec pain ca corom pe tain manain pacun ta na Jeju quem.

⁶Ma' tara xumuhu' me ac caparut na Jeju. Ein jein ca to' memerem nein capam' nucucun oro fariseu cocon oro saduceu ta naparut.

⁷Na ra ac urut na. Xi cut mam' xin capam' ta, je ca tomi' ac i ma' capari' ca' xujuxut.

⁸Taxi' naparut Jeju quem, taxi' naparut pain ca tomi' ac i ma' xujuxut. Para tomi' ac i ma' xujuhu' pain ca om cuhu' capam' ma' quem naparut. Je xi howa mip mahu' quem ac caparut na. ⁹Om ca taraju pa' querec hwe ra ac caparut na. Om ca mam' pe wet hwein capam' ca ma' 5 e' capari' pane, pain ca jicaracat mi' toton pain co 5.000 nana pane? Cain' ca ma' ne cotain pawirinain ca cut ho' moin' hwe pane quem? ¹⁰Om ca mam' pe wet hwein capam' ca ma' 7 e' capari' pane quem, pain ca jicaracat mi' toton pain co 4.000 nana. Cain' ca ma' ne cotain pawirinain ca cut ho' moin' hwe pane quem? ¹¹Je xi taraju pa' mahu' pain ca om tomi' mi' tain capam' ca' quem? Ma' tara xumuhu' me, ein jein ca to' memerem nein capam' nucucun oro fariseu cocon oro saduceu inuhu' ta na ca tomi' xo' caparut ma'.

¹²Na ra ac urut na, taraju pa' pin ac urut na quem. Om na xin ca tomi' mi' capari' pain iri' ca to' memerem nein capam' ca' ne urut. Tomi' mi' napari' pain oro ca pijim' ximama' nucucun oro fariseu cocon oro saduceu ta urut.

Ca tomi' hwet pin cain iri' wixicon Jeju Pedro

Marcos 8.27-30; Lucas 9.18-21

¹³Mama' xin oro cidade ca to ja' pan nain Cesareia Filipe cain ta ac ca na Jeju, xuruxut mama' ac urut na quem. Tan' mama' iri urut ne, tomi' querec ac caparut na pain ca taxipa' urut con ca'. Om ta cain' ca wari' ca ne cacapa' oro wari' ra? Cain' ca coromicat mi' cacapa' pain ca Iri' Wari' ta' quem naparut.

¹⁴Om na, ma' nana co João co ja' taxipa' com cara pane xi' ma nenem ac urut con na. Ma' nana oro xucucun co profeta Elias cara pane xi' ma nenem. Ma' ac caca na co profeta Jeremias cara pane xi' ma nenem. Oro xucucun ma' iri nana ne, om na, xucun profeta xi' ma nenem quem na ca tomi' urut con ma'.

¹⁵Wahu' quem? Cain' ca coromicat mi' pan mahu' quem ac caparut na.

¹⁶Wum co Cristo ta. Panxica Iri' Jam co e' cara ma ta ac con na Simão Pedro.

¹⁷Param mi' nem pain ca awi wa Iri' Jam ta Simão panxica João ac con na Jeju. Xi wari' ca co an hwet mi' nem pain ca tomi' nem ma', pain ca Cristo ma ta mapa' ma', pain ca Panxica Iri' Jam ma ta mapa' ma'. Te ma', co pe pawin cain, wirico co an hwet mi' nem pain ca tomi' nem. ¹⁸Je ca tomi' xim ca' Simão ac con na. Pedro na xijein wuxum. Xi om ne ca ac pacun ara ma ta. Je ara xi' na ca tomi' mao nein wuxum. Ca tomi' hwet nem ma' quem, pain ca howa inem pain ca Cristo ma ma', pain ca Panxica Iri' Jam ma mapa' ma', ac iri' cote ne pacun na. Oro wari' co howa ac i ma' xi' nanapa' ma', iri' wari' ne ac toton tara, to' hwara' opa ac toton tara quem. Om ta to' quiji' pin ac cocon Caxicon Jam co taramaxicon pe ho' nonon oro win caxicon jam ca quem. ¹⁹To' taramaxicon pin toton cocon oro wari' co taramaxicon pe ho' ca Iri' Jam quem. Carawa ca tomi' caho' ma pain macan' ca', wara tomi' caho' nain Iri' Jam pain pawin cain. Carawa ca hohot na ta ma pain macan' ca', wara hohot na ta nain Iri' Jam pain pawin cain quem na ca tomi' con Pedro Jeju ma'.

²⁰Tomi' mip ac caparut na pain ca taxipa' urut con ca'. Ta tomi' hwet mahu' cocon oro wari' pain xocori ca' me, ta tomi' hwet huhun pain ca Cristo ta' ca' me naparut.

**Ca wara tomi' pe cain ca mi' pin ta' nucun
je pain ca e' mami' ta' nucun quem**

Marcos 8.34–9.1; Lucas 9.22-27

²¹Je i ma' xec nein ca tomi' xo' pin caparut Jeju pane. Tomi' xo' pin naparut pain ca taxipa' urut con ca'. Tomi' ho' tomi' ho' ac caparut na. Na e' na pain ca mao tain Jerusalém ta. Wa' mao iri tain i cain ne, quep em' ac cacapa' tara oro taramaxicon nexi' pain ca judeu iri' ca', cocon oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés. To' jain jain tamana tatarapa', to' pa' pin ac cacapa' tara. Ma' 3 pin iri tarapa' xec pain ca mi' pin ne ne, e' mami' ac ta' tara ta na ca tomi' xo' caparut ma'.

²²Quep ac cain na taparacon Jeju Pedro. Coc papan hwet mao ac con na, tomi' ac cain na taraxicon: Om na ta Taramaxicon ne. Nain ho' terem pain Iri' Jam ta. Om ta to' pa' quequem oro wari' ta non.

²³ Xat tucu in hwet ac con na Jeju. Ac Caxicon Jam a xima pain ca tomi' querec mapa' ta Pedro. Mo ca' ne ta ac con na. To' i'ina mapa'. An xiho' main pacun ca pe wana ma', pain ca tao' pan' pin ton mapa' ca'. Om ca an xiho' main ca coromicat nucun Iri' Jam. An xiho' e' main ca coromicat nein ca wari' wa ta na ca tomi' con Pedro Jeju.

²⁴ Tomi' ac caparut na pain ca taxipa' urut con ca'. Wari' co ja' ja' xim napa' ma', miri'om ac cain tara ca param nucun. Om ta xiram pa' camain' cain curucun pain ca jin' cain ca mi' pin wa. Ac ca an tiquin' pan cain tara panaxicon ca mam' tatatain mi' xun tocwa ma'. Ja' ja' ac capa' tara ta. ²⁵ Xi e' cara pe tain cain pawin wari' co win xumu e' nain ca param pan nucun pain macan' ta. Wari' co miri'om nain ca param pan nucun pain macan' ca' iri na ne, pain ca win xumu e' capa' ma', wirico tara co e' cara pe tain nain pawin ta. ²⁶ Je ca tomi' xuhu' ca' ac caparut na. Mo ta ma' ma' xam' capari' oro carawa pain macan' ca'. Mo ta miri'om xin ca e' cara wa pain pawin cain, mo ta mama' xin cote ne xe quem. Ma' na ca quep xiho' ac capari' oro caramaji macan' ca cut iri' pain ca e' e' wet nexi' ra? Om ca quep xiho' capari' ta! Xi ma' ne caramaji macan' ca mam' an in ac xin ca e' cara nexi' ta. ²⁷ Je ca tomi' xuhu' ca' ac caparut na. Ja' ja' xine. Ta jin' huhun oro wari' co quep em' xim nunuhu' pain ca ja' ja' mahu' me. Maqui' ta' ara xi' na xec nein ca in qui' ta' ne ca', wata' pain ca Iri' Wari' ta' ca', in qui' ac tain tara pawin. Maqui' wi ta' cocon oro jam co taramaja mi' nanapa'. Maqui' wi ta' pain ca hwara' opa nucun Te quem. Pagar ac toton tara oro wari', pagar toton pain oro ca ara caca pain ca e' e' wet nucucun. Win ne ca ara hwe pane toton, mi' mi' xam' ac toton pain tara. Wahu' quem, win ne ca ara hwe pain ca ja' ja' mahu' pane xuhu', pagar pagar xam' ac xuhu' tara quem. ²⁸ Wahu' pain ca to ho' mahu' ca', ma' tatara co querec xim nanapa' pain ca taramaxicon pe ho' pin toton toton oro wari' ne quem. Querec tatarapa' pain ca Iri' Wari' ta' ca'. Om ta cono' querec caca, wara querec tatarapa', ame hwe e'. Tomi' iri'o' inuhu' ta na ca tomi' caparut ma'.

16.28 Pain ca tomi' cain i ma' Jeju ma', ac ca tomi' tococwa na pain ca querec jimao pin ta' ne tocon pain cote ne pacun ma', pain ca hwet pa' xun cocon Elias con Moisés ma', pain ca mon cwa' Panxita' co om noc camain' ta' cwa' ton con Cote ca quem. Noro jein Mateus 17.1-8.

Ca jimao pin ne tocon Jeju

Marcos 9.2-13; Lucas 9.28-36

17 Ma' 6 pin iri na xec pain ca wara tomi' xo' caparut pain ca mi' pin ta' nucun Jeju ne, maji ta ac tococwa na Pedro con Tiago con João ma', coxa' ca Tiago ma', piri' mama' ac cacain na cote ne pacun. Xica' to nana caram ma'. ²Ca noro noro cocon Jeju ma', jimao pin ac ne na tocon. Toc meremem pin na con, an xiho' non xina. Towo' tamana pin na womicon quem. An xiho' nain naran ca toha mip ma'. ³Hwrehwet qui' ho' ac caca na Moisés con Elias cara pane. Pijim' nonon Jeju quem.

⁴Tomi' ac con na Jeju Pedro: Awi na pain ca to xin i ca' quem Taramaxicon ne. Mo ta param mapa' pain ca quep mi' xuhu' pain wijimain xirim, quep 3 ac tain tara. Mene rain wirain, mene tarain wirain Moisés ma', mene tarain wirain Elias ma' quem na ca tomi' nucun.

⁵Tomi' tomi' wet na Pedro ma', hwet qui' ac ne na tajain nanawin ca toc meremem tamana. Tatep pa' ac tococwa na. Taraju ac cacain na ca tomi' wa ma', ca maqui' nain nanawin ma'. Mon cwa' panxita' co om noc camain' ta' cwa'. Hohot tamana napa' ta. Taraju wet jun ta na.

⁶Taraju iri nanain ca tomi' nucun Iri' Jam ne, jin' tamana ac caca na. Camara' tucu hwet mi' ac cacain na macan'. ⁷Xut hwet ac tococwa na, quep ac tococwa na. Tequi' to je. Ta jin' hwe me ta tata.

⁸Noro pawin iri nana ne, wara om pin na Moisés con Elias. Om ca querec mami' tococwa. Querec xica' pe e' nonon Jeju.

⁹Quiji' mama' ac cacain na pacun. Pain ca xuruxut xuruxut wet nucucun ma', tomi' ac tococwa na: Ta tomi' hwet huhun oro wari' pain ca querec hwe pata' me. To' e' mami' cain' tarapa' Te ta. Wata' pain ca Iri' Wari' ta' ca', to' e' mami' cain' tarapa' Te. Tomi' hwet ac huhun pain tara ca querec hwe pata' ta na ca tomi' tococwa ma'.

¹⁰Tomi' querec ac cocon na co taxipa' ca ma': In qui' cain' tara nonon Elias oro co ca' na taxipa' nanain ca xirao' nucun Moisés ma'. In qui' cain' tara, maqui' ac ca tara co tomi' pe pin ca Iri' Jam pane nana. Cain' cain' xirara quem? Para tomi' ac i ma' caca quem? Ac i ma' na ca tomi' querec cocon ma'.

¹¹Tomi' iri'o' nana ta ac tococwa na. In qui' cain' tara ta nonon Elias oro profeta pane. Ma' ta an to xo' cain ximicocon oro wari' nucun Iri' Jam pain ca winim' cocon co wara tomi' pe ca pane nonon. ¹²Ac i ma' paxi' na

ca tomi' caca pane, ane tomi' pan xuhu' pain i ca' ne: Wara in qui' paxi' na Elias cara pane, ane om querec pin' cocon oro taramaxicon ne. Quep em' nonon, om ca xiram pa' camain' cocon. Ac i ma' tatarapa' pain ca Iri' Wari' ta' ca' quem. Quep em' tatarapa' quem na ca tomi' tococwa ma'.

¹³Taraju pa' pin ac cacain na ca tomi' nucun. Om na xin ca tomi' con Elias cara pane. Tomi' non João co ja' taxipa' com ta nana.

Ca quep xio pin tocwa pije' co pa' taxipa' tamanain

Marcos 9.14-32; Lucas 9.37-45

¹⁴In hwet iri nanaparut pain ca to to wet urut pain xiquijinain pacun ma' ne, wara cut in tamana xucucun oro wari'. Xut hwet ac con na Jeju wari' ma'. Pe torotop mi' ac con na. ¹⁵Xiram pa' ne con panxita' ta Taramaxicon ne ac con na. Pa' taxipa' non tamanain. Pa' mip tamana non. Pan' hwet ho' pan' hwet ho' nain xe je pain com quem. ¹⁶O mi' paxi' inonon con co taxipa' ma cwa'. Ma' ta quep xio hun inonon. Ane om quep xio taxi' cocon ne na ca tomi' ca ma'.

¹⁷Wa inuhu' me ac ca na Jeju. Wahu' pain ca wari' nuhu' pain oro xec nexi' ca', om ca howa camain' mahu'. Caracat tamana hwe ta. Pain pin paxi' na ca pe ho' xuhu' ca'. Je xi howa mahu' quem? Cain' cain' xita' quem? Ha' tara pain ca winim' cara xuhu' pain ca howa xim mahu' ra? Je i ma' ira, an qui' ron pije' ma' ta ac ca na.

¹⁸Tomi' in pin ac con na caxicon jam nucun. Hwet ca' ron pije' cwa' non, hwet ca' ac con na, xio hap pin ac ca na quem.

¹⁹Xica' to pin iri urut ne, xuruxut hwet ac urut con na Jeju. Tomi' querec ac urut con na: Para om ha' caparut pain ca tomi' mo pin urut con caxicon jam cara ne urut con.

²⁰Xi howa homa mahu' ta ac caparut na. Je ca tomi' xuhu' ca', tomi' iri'o' inuhu': Noro jein wijimain tocwi mostarda ma'. Iri' wijimain na. Iri' wijimain ac i ma' paxi' tara ca howa nuhu' quem. Je i ma' ira, mo ta howa wijimain e' mahu', ha' ac cuhu' tara pain ca tomi' ca' hwein cote ne pacun ca': Ju in mao rain i cain, ac i ma' tara ca tomi' hwein. Ju in mao ac nein i cain tara quem. Mo ta howa ac i ma' mahu', ha' ha' xam' turuhu' oro carawa ta na ca tomi' caparut ma'. ²¹Ane i'ina pan ca caxicon jam co an xiho' non co pacara ne ne, con pije' cara ne ac caparut na. Ha' e' non wari'

co tomi' mi' non con Iri' Jam ma', co an pe nain ca cao' wa pain ca tomi' mi' con con quem na ca tomi' caparut ma'.

²² Cut in iri xujuxut pain Galileia ne, tomi' ac caparut na Jeju: Iri' Wari' paxi' ina, ane ma' ca wari' co tomi' mi' xim napa' cocon oro co noc nanapa' ne. O mi' ac cacapa' tara cocon oro co to' pa' pin xun nanapa' ma'. ²³ To' pa' pin ac cacapa' tara quem. Ma' 3 pin iri tarapa' xec pain ca mi' pin ne ne, to' e' mami' ac capa' tara Iri' Jam ta na ca tomi' caparut.

Tomi' xaxa' tamana ac urut na quem.

Imposto nein cote ne xiricon Iri' Jam ca pagar je tococwa oro judeu

²⁴ Maji pain Cafarnaum ta ac urut na, xuruxut mama' ac urut na. Warut, Jeju, ca' urut. Tan' mama' iri urut pain i cain ne, xuruxut hwet ac cocon na Pedro caram ma' co cut taxipa' nanain wijimain imposto nein cote ne xiricon Iri' Jam ma'. Tomi' querec ac cocon na: Cain' cain' ca taramaxicon nuhu' ma' quem? Om ca pagar cain imposto nein cote ne xiricon Iri' Jam ra? Ac i ma' na ca tomi' querec cocon ma'.

²⁵ Pagar cain ma' ira ac ca na Pedro. Corom mao ac cain na xirim ca to caca ma'.

Tomi' querec ton Jeju paxi' na ira, ane tomi' cain' pan con Jeju ne: Cain' cain' ne ca coromicat nem ma' quem Simão Pedro ac con na. Ma' co pagar jein imposto caca oro taramaxicon ma' quem? Pagar jein tata oro ca nari nucucun ra? Om ca pagar jein tococwa oro xucucun wari' ra? Ac i ma' na ca tomi' querec con ma'.

²⁶ Pagar jein tata oro xucucun wari' ta ac ca na Pedro.

Awi na ca tomi' nem ma' ac con na. ²⁷ Om xi pagar jein capari' pain ca iri' win ma' ne xun Iri' Jam quem. Ane hohot ne pain ca pagar pan xin ne. Ma' ta om mana' cacapari' co pagar jein nanapari' ma'. Je ca tomi' xim ca' Pedro ac con na. Mao rain com cain. Xin rain macori pi nem ma', quep ac mon tara hwam co cao' cain' nain puxum ma'. Pa iri rain capijacon ne, mam' ac main tara moeda pain capijacon. Ma' 4 tara dracma nein. Mao

17.24 Imposto nein cote ne xiricon Iri' Jam ma', je i ma' dinheiro ca pagar je ca taramaxicon nucucun oro sacerdote ma'. Ma' ta ha' caparut pain ca taramaja wa pain cote ne xiricon Iri' Jam ta na. Je cwerein pain cara pane. **17.27** Dracma ma', je i ma' dinheiro nucucun oro grego pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na dracma pain ca taramaja nucun.

ac main i cain tara, pagar ac main tara imposto ne, pagar ac main tara imposto nem ma' quem na ca tomi' con Pedro Jeju pane.

**Wari' co hwara' opa tiquin' ca' nonon oro xucucun wari'
co taramaxicon pe ho' ca Iri' Jam**

Marcos 9.33-48; Lucas 9.46-50

18 Om ca pain homa ne, xuruxut hwet ac urut con na Jeju ma'. Warut pain ca taxipa' urut con ca', tomi' querec ac urut con na: Ma' co hwara' opa tiquin' ca' nonon oro xucucun wari' co taramaxicon pe ho' ca Iri' Jam quem na ca tomi' querec urut con.

²Pe nain i ma' pije' quem. Hap ra ta pije' ac con na Jeju, an xat ac con na pain ximijaxut. ³Tomi' ac caparut na: Coromicat ni je. An xiho' jejem oro wixicacam hwijima' pain ca coromicat nequequem. Mo ta om an xiho' hwehwem pain ca om xec xec taxi' nequequem ca', om ta hwet camain' hun Iri' Jam pain ca taramaxicon pe ca pain pawin cain, tomi' iri'o' inuhu'.

⁴Wari' co an xiho' non wixicon pije' cwa', pain ca om xec xec taxi' nucun ca', hwara' opa tiquin' pan ca' totoron oro xucucun wari' co taramaxicon pe ho' ca Iri' Jam ta.

⁵Noro jun pije' cwa', co om hwara' opa cwa' ac caparut na. Wari' co tomi' querec te non pain ca om hwara' opa nucun ca', coromicat ca' iri na ne: Tomi' querec te inem, xi om ne ca howa ara ton Jeju ma', mo ta coromicat ac i ma' ca pain ca tomi' querec te inem con ma', ac ca tomi' querec te capa' na quem. ⁶Wari' co to' caracat non win ma' ca co om hwara' opa ma', co an xiho' non pije' co howa napa' cwa' iri na ne, wap tamana ac con tara Iri' Jam. Mija tara ca jain jain ca con. Mo xi tucu xine iri' cote ne pacun ca mam' ep xine trigo pain paramacon ma', mo xi xin pocom mi' tocwa pain iri' ca xopain ne cote ne com ma', jain jain pije' ac ca xira. Pain ca wap ton con Iri' Jam pain ca to' caracat con wari' co an xiho' non pije' cwa' iri xira ne, mija tamana pan ac ne xira ca jain jain nucun con ta na ca tomi' caparut ma'.

⁷Ximin nana oro wari' pain macan' ca', xi mija ara ne oro ca to' caracat nonon ta ac caparut na. To' caracat paxi' tata wari' ma', je cwerein mao na. Ane ximin tamana pan xi' caca oro wari' co to' caracat nonon oro win ma' caca ne. Wap tamana pan totoron Iri' Jam ta.

⁸Je ca tomi' xuhu' ca', tomi' inem pain ca to' caracat quem mum ma' ac caparut na. Mo ta to' caracat quem mum je caximam ma' ac caparut na. Mo ta to' caracat quem mum pain ca mam' ara main ca om awi wa ma', ara maho' rain e'. Mo ta to' caracat quem caximam pain ca mam' xut mao main ca caracat pe ta' ma ma' quem, mao maho' rain i cain e'. Ac ca ton piripit pin main tara, ac ca wixicao' pin main tara, ac je tara. Hohot na pain ca mao main pawin pain ca om ne mum ma'. Hohot na pain ca mao main pawin pain ca om ne caximam ma' quem. Cain' cain' xira quem? Hohot xira pain ca xin mi' xima pain cote ne xe ca om jo' ra ha' ma', pain ca ma' ma' wet ne mum pain caximam ra? Om xi hohot ne ta. ⁹Ac i ma' tara tucum ma' quem. Mo ta to' caracat quem tucum pain ca querec param ximao main ca om awi wa ma'. Ta tomi' ha' main me. Ac ca hot pin main tara, ac ca xin pin main tara quem. Hohot na pain ca mao main pawin pain ca om ne tucum ta. Cain' cain' xira quem? Hohot xira pain ca xin mi' xima pain cote ne xe ca om jo' ra ha' ma', pain ca ma' ma' wet ne tucum ra? Om xi hohot ne ta na ca tomi' caparut ma'.

Ca pijim' joc mam' mi' tococwa pain ovelha ca pan' am

Lucas 15.3-7

¹⁰Ma' tara xumuhu' me ac caparut na. Ta noc camain' huhun oro wari' co an xiho' nonon hwijima' co om hwara' opa nana cwa' me. Je ca tomi' xuhu' ca': Oro jam co taramaja mi' nonon Iri' Jam ma', co querec wet taxipa' nonon ma', tama' to ho' nonon Te co pe pawin cain. ¹¹Je ca maqui' ta' ca' ac ca na. Wata' pain ca Iri' Wari' ta' ca', maqui' ina, ma' ta to' witan toton inonon oro wari' co pan' ara'am nana ta naparut.

¹²Tomi' xun wari' co ma' 100 non ovelha ma' ac caparut na. Xut ximao xica' pe ac ne na. Cain' cain' ta' ca quem? Om ta pirao' tain ca ra? Pirao' tain tara. Paca' tarain oro wirain ma', ca ma' 99 nein ma', pain ca cao' to nein tononoin pain ca tamaja pan ne pacun ma'. Mo pirao' tain e' ac cain tara ca xut ximao ma'. ¹³Mam' pin iri tarain ne, tomi' querec te tamana ac cain tara. Tomi' querec te paxi' nain oro wirain ma', ca ma' 99 nein ca om xuruxut ximama' ma'. Ane tomi' querec te tamana pan tain cain ca xica' pe nein ca pan' am ma' ne, pain ca mam' pin cain ma', tomi' iri'o' inuhu' ta. ¹⁴Ac i ma' na Cotere' co pe pawin quem. Noc nain ca pan' am xica' pe ca wari' co an xiho' non piye' pain ca howa con ma' na ca tomi' caparut ma'.

Co win howa iri' co caracat

¹⁵ Tomi' ac caparut na: Mo ta ma' ca co win howa hwe co caracat ma', tomi' inem pain ca ara cup quem co win howa ma ma'. Hwet ac mon tara, tomi' xo' ac mon tara pain ca em' nucun. Xica' to je, om tara win ma' hwe. Mo ta ha' quem, mo ta cwirin' pin ca, ha' pin ac cuhu' tara pain ca tomi' querec te mami' xujuhu' pain ca xere xujuhu' ma'. ¹⁶ Mo ta om ha' quem pain ca xica' to nuhu' ma', tomi' ac mon tara xucun co win howa ma ma'. Am 2 caca co tomi' ma ma'. Maji con e', tomi' xo' mami' ton pain ca em' nucun ta. Win ne ca tomi' capari' capijacon Iri' Jam ca', pain ca na e' na pain ca ma' tocwan caca co taraju nunuhu' pain ca tomi' xo' hun wari' pain ca caracat nucun capari'. ¹⁷ Mo ta om ha' cuhu' quem, mo ta om cwirin' camain' ca pain ca tomi' hun ma', tomi' hwet ac momon tara pain oro win howa hwe pain ca cut in xujuhu' ma'. Mo ta om ha' camain' cocon oro win howa hwe pain ca cut in xujuhu' ma' quem, ac wari' co om howa non Iri' Jam maparut ta ac hun tara, ac iri' caxicon wari' co caracat maparut ta, xi cwirin' ra na ma ta ac hun tara ta na ca tomi' xo' caparut con co win howa iri' co caracat ma'.

¹⁸ Je ca tomi' xuhu' ca', tomi' iri'o' inuhu' ta ac caparut na. Carawa ca tomi' caho' hwe pain macan' ca', wara tomi' caho' nain Iri' Jam pain pawin. Carawa ca hohot na ta hwe pain macan' ca', wara hohot na ta nain pain pawin quem.

¹⁹ Tomi' iri'o' inuhu' pain i ca' quem: Wahu' pain ca tomi' xun Iri' Jam hwe pain macan' ca', am 2 e' paxi' hwe. Mo ta ac je ac je ari ne ca coromicat nuhu' pain ca tomi' xun hun ma', ha' ac cuhu' tara Te co pe pawin cain. ²⁰ Xi pe ho' ara toton co cut in xucucun pain ca howa cacapa' ta. Mo ta ma' 2 caca, mo ta ma' 3 caca, pe ho' inonon ta na ca tomi' caparut ma'.

Ca na e' ne pain ca tama' ji'am pin xin ca mana' nexi' pain ca ara cup xijexi'

²¹ Xut hwet ac con na Jeju Pedro ma', tomi' querec ac con na: Taramaxicon ne. Mo ta ara cup capa' co win howa ta' cwa', tomi' xo' ac ton tara, maho' xin ca mana' wa ta ac ton tara. Mo ta ara cup mami' capa', tomi' xo' mami' ac ton tara. Mo ta ara cup mami' capa', tomi' xo' mami' ac ton tara. Mo ta ara cup mami' capa' quem. Cain' xi tomi' xo' mami' ac ton

quem? Ma' 7 tara ca tomi' xo' ton pain ca caracat nucun ra na ca tomi' querec con Jeju Pedro.

²² Om na ta Pedro ac con na. Om ca na ne pain ca toron ximao ne xumum pain ca tama' caracat nucun ma', pain ca je i ca' je i ca' mami' main oro ca caracat nucun. Oro ca ara cup mami' quem ma', na e' na pain ca tomi' xo' mami' mon. Na e' na pain ca maho' xin ca mana' wa ta mami' mon pain ca ara cup ho' ara cup ho' quem ma'. Mana' mana' om pin ron pain ca caracat nucun ta na ca tomi' con Pedro.

²³ Je ca tomi' xuhu' ca', tomi' xin carawa ca ara ne pain ca taramaxicon pe ho' capari' Iri' Jam cwa'. An xiho' nain carawa ca ara ne con taramaxicon co coromicat ca' ma': Tomi' xo' toton oro co taramaja mi' e' nanapa' cwa'. Mo ta ma' ne carawa ca dever cacapa' ma', pagar pin ac cacapa' pain tara ta na ca coromicat nucun. ²⁴ Tomi' xo' toton iri nonon ne, o qui' ac tocwa na co dever tamana non ma'. Iri' cote ne dinheiro ca dever con. Mo xi ma' 10.000 ne cawaxi' ca taramaja ca, om xi pagar pin ac cain dinheiro ca dever con taramaxicon nucun. ²⁵ Ane om con dinheiro ca mam' pagar con ne. Na ra pan ac ca na taramaxicon, tomi' ac con na wari' nucun. Vender ron, taramaja mi' e' toron xucun taramaxicon. Wirico, wiricam manacon, wiricoco mana panxica, vender raram ta. Je oro caramaxicon quem, vender pi' pin rain. Je i ma' tara ca mam' pagar capa' pain ca dever capa' ta na ca tomi' nucun.

²⁶ Jain jain ac ca na, pan' hwet ac con na pain caximacon taramaxicon nucun. Ame ma e', ta toron ne xumum me ta taramaxicon ne. Main pagar pagar pi' pin xim pain ca dever xim ca' na ca tomi' nucun.

²⁷ Xiram pa' ac con na. Maho' inain, om ta pagar ne mami' xim pain. Ac ca om dever mapa' pain tara. In mao rain xurum ta ac con na quem.

²⁸ Mao ac ca na, xut cam' ac con na win ma' ca co win taramaja ca ma'. Dever wijimain pan non co ma'. Ma' 100 e' na denário ca dever con. Quep mip ac con na pain canemicon. Juhum' pa' ton na ira. Pagar ne pain ca dever mapa' ta ac con na.

²⁹ Jain jain ac ca na, pan' hwet ac con na pain caximacon. Ame ma e', ta toron ne xumum me ta. Main pagar xim pain ta ac con na.

18.28 Denário na wixinain dinheiro nucucun oro romano pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na denário pain ca taramaja nucun.

³⁰Ane om ha' con ne. Noc inain ta ac con na, mo hwet ac cain na xirinain ca tao' to tao' to to wa ma', tao' pe jun ta ac tococwa na. To wet iri ca ma'. Mo ta pagar pin capa' pain ca dever capa' ma', om pin ac hun tara ta na ca tomi' tococwa ma'.

³¹Querec iri nonon oro co win taramaja ca ma' ne, querec iri nanain ca ara con win ma' ca ne. Mana' tamana ac cocon na, tomi' hwet ac cocon na taramaxicon nucucun.

³²Hap ra ta ac con na taramaxicon. Om ca awi camain' ma. Iri' caxicon pije' ma ta ac con na. Xiram pa' ne e' pan mapa' ne ira. Je ca xiram pa' xim ca'. Om ta pagar mapa' pain cote ne dinheiro ca dever mapa' ta inem.

³³Je xi xiram pa' qui' mon win ma' ma quem? Win ne ca xiram pa' xim ne non.

³⁴Mana' tamana ac con na. Tao' pe pin jun ta ac tococwa na co querec wet nanain xirinain ca tao' to tao' to to wa ma'. Wap mip jun ta. Mo ta pagar pin capa' pain ca dever capa' ma', om pin ac hun tara ta tata.

³⁵Je ca tomi' xuhu' ca' ac caparut na Jeju. Mo ta om tomi' xo' xujuhu' pain ca ara cup xujuhu' ma', pain ca xere xujuhu' pain ca howa nuhu' ma', mo ta om maho' xin ca mana' wa ta xujuhu' pain iri' xumuhu' ma'. Wap ac i ma' wap ac i ma' xam' ac cuhu' tara Te co pe pawin cain ta na ca tomi' caparut pane.

Ca tomi' xo' tococwa pain ca an pe tacama narima'

Marcos 10.1-12

19 Pi' pin iri na ca tomi' nucun ne, maji ta ac caparut na, paca' ac urut pain na Galileia. Mama' urut pain oro xijein cidade ca to nain Judeia ma', pain xijein cacarain Jordão ma'. ²Mija nana wari' co ja' ja' nanaparut. Quep xio quep xio xam' ac tococwa na co caxi nana ma'.

³Ma' ac caca na oro fariseu co xuruxut hwet nonon ma'. Am tomi' xo' ca, am om tomi' xo' ca quem nonon. Je ca tomi' querec cocon ma'. Hohot na pain ca an pe ximao wa narima' ra? Om ca narain ho' capari' pain Iri' Jam ra? Ac i ma' na ca tomi' querec cocon Jeju.

⁴Om ca noro hwein capiiacon Iri' Jam ra ac tococwa na. Ca' na ca xirao' pe xine con: Quep iri non wari' Iri' Jam pain cara pane ne, pain ca xo' quep qui' con wari' pane, quep ac con na tarama', quep ac cam na narima' quem. ⁵Je ca xirao' pe xine pain i ca' quem: Tarama' ma', pe ho' pe ho'

om pin toron cote ca cam jicon. Pe ho' pin ac cam tara manacon. Ac ca xica' pe pin ne tara cwerequequem ta na ca xirao' pe nucun pane. ⁶ Je ca tomi' xuhu' ca' ac tococwa na. An pin iri nam narima' tarama' ma' ne, xica' pe pin ac ne na cwerequequem. Om ca tocwan mami' ne cwerequequem. Je ca om na camain' ne pain ca to ni ca' xequequem ta. Xi wirico ara ca Iri' Jam co mi' nanam pain ca an xequequem ta na ca tomi' tococwa oro fariseu ma'.

⁷ Tomi' querec mami' ac cocon na: Je xi narain ho' capari' pain ca an pe pin wa narima' Moisés pane quem? Hohot na ta ara xi' nain pane. Mo ta an pe pin tam cam narima' tarama' ma', na e' na pain ca xirao' mi' cam pain documento. An pe pin inem ta tara ca xirao' nucun pain documento. Mi' xo' iri taram pain ne, hohot ac ne tara pain ca an pe pin cam ta na ca xirao' nucun Moisés pane ta nonon.

⁸ Xi opain ara ne xumuhu' ta ac tococwa na. Je ca xirao' cain i ma' Moisés pane. Ane om wara coromicat ac i ma' ca Iri' Jam pain cara pane ne, pain ca xo' quep qui' con wari' pane. ⁹ Je ca tomi' xuhu' ca' ac tococwa na. Wari' co an pe pin nam manacon ma', pain ca om caracat cama ma', pain ca om quep cam xucun tarama' ma', mo ta an pe ximao cam, mo ta an pin cam xequem narima' ma' quem, caracat ac ca tara. Ac i ma' na ca tomi' xo' tococwa ma'.

¹⁰ Wa ina me ac urut na pain ca taxipa' urut con ca'. Mo ta om na ne pain ca an pe pin tacama narima' ma', awi na pain ca om an tacama ta urut.

¹¹ Tomi' ac caparut na Jeju: Oro wari' ma', om ca taraju pa' xam' ac cacain ca tomi' nuhu' ma', pain ca awi na pain ca om an tacama narima' ta hwe ma' naparut. Taraju pa' e' nana co mi' wawa pain ca coco' e' wa ma'. ¹² Noro jujun oro wari' co om cut nana narima' ma', xi om ne ca wara ma' ara cocon ca xirac wa pain ca xo' camara' nucucun. Ma' ac caca na oro xucucun co om cut nana narima', xi om ne ca wac ara xine towiracocon. Ma' ac caca na oro xucucun co om cut nana narima', xi om ne ca win xumu e' ara cacain ca taramaja nucucun pain ca taramaja mi' cocon Iri' Jam. Co ha' tarapa' nain ca taraju pa' wa i ma', taraju pa' ma' tatara ne na ca tomi' xo' caparut pain ca an tacama narima' je pain ca om an tacama quem.

**Ca na e' ne pain ca an xiho' xuxun oro
hwijima' co om xec xec querec nana**

Marcos 10.13-16; Lucas 18.15-17

¹³Ma' ac cacama na co o qui' nanam humaxicacam. O mi' nanam con Jeju. Ma' ta quep mamam pain winacacam pain ca tomi' mi' mamam con Iri' Jam ta nonon. Ane tomi' in pin urut cacam pain ca taxipa' urut con Jeju ca' ne. Ta cut mi' hun cacam humajuhu' me ta urut cacam.

¹⁴Tomi' in pin ac caparut na Jeju. Ta narain ho' hwehwem pain ca hwet cacapa' hwijima' cwa' me. Ta tomi' in pin hwehwem me ta. Oro wari' co an xiho' nanam pain ca om xec xec nequequem ma', pain ca howa cacapa' ma', wiricoco tatara co taramaxicon pe ho' ca Iri' Jam ta naparut.

¹⁵Quep ac tacacama na pain winacacam. Param inon Iri' Jam pain ca ara mi' cuhu' pain oro ca awi wa ta hwijima' tata. Mao ac ca na quem.

**Ca to' i'ina capari' oro caramajixi' pain ca xin ne xun
Iri' Jam pain ca taramaxicon pe ho' xim capari'**

Marcos 10.17-31; Lucas 18.18-30

¹⁶Ma' ac ca na wari' co xut hwet non Jeju. Tomi' querec ac con na: Taramaxicon co ca' na taxipa' capijacon Iri' Jam ac con na. Cain' cain' xita' quem? Ma' carawa ca awi ca ara ra mapa', ma' ta e' cara pe ho' ton Iri' Jam quem na ca tomi' querec con ma'.

¹⁷Para tomi' querec mapa' pain carawa ca awi quem ac con na. Ma' xica' pe na co awi. Mo ta e' cara pe ho' ton mon Iri' Jam ma', na e' na pain ca tomi' ha' main oro ca xirao' nucun Moisés ca tomi' ha' je capari' ta non.

¹⁸Main ca xirao' nucun ca tomi' ha' je capari' ca' quem ac ca na.

Main ca' con ac con na. Ta to' pa' mon wari' me ta. Ta quep mam manacon win ma' ma me ta. Ta an noc xa ma me ta. Ta tomi' mixein mi' mon pain ca em' wa win ma' ma me ta. ¹⁹Tomi' ha' ron cote ma cam jim ta. Ta noc momon win ma' ma me ta. Win ne ca om noc pan xijem ma'. Je ca tomi' ha' je capari' ca' na ca tomi' xo' con ma'.

²⁰Om na, tama' tomi' ha' tomi' ha' pi' pin inain i ma' ta. Ma' tara xijein carawa ca ara ra mapa' quem ac con na.

²¹Tomi' ac ca na: Mo ta iri' wari' xita' na ma ma', mo ta an xiho' ton Iri' Jam ma pain ca om noc cocon oro wari' ma' quem, mo vender vender pi'

pin ac main tara oro caramajum. Cut iri rain dinheiro nein ne, cut mi' ac momon pain tara co om nonon carawa. Caramaju pe ac main tara pawin cain. Cut mi' cut mi' pi' pin iri roron pain dinheiro nem ne, in hwet ac mapa' tara, ja' ja' ac mapa' tara ta non.

²²Taraju iri nain i ma' ne, in ca' ac con na Jeju, tomi' xaxa' mao ac ca na quem, xi caramaju tamana ara ca ta.

²³Tomi' ac caparut na Jeju, tomi' naparut pain ca taxipa' urut con ca'. Je ca tomi' xuhu' ca', tomi' iri'o' inuhu': Wari' co caramaju ma', i'ina tamana non pain ca xin ne con Iri' Jam pain ca taramaxicon pe ho' xim ta con ma'. ²⁴Win ne camelo ma'. Cote ne carawa na camelo. Ha' xirain pain ca corom nein wijimain manain ca mam' oc tocwa wom ra? Om xi ha' nein. I'ina xirain, om xi corom ac nein. Ac i ma' na con wari' co caramaju ma' quem. I'ina tamana non pain ca xin ne con Iri' Jam pain ca taramaxicon pe ho' ton con ta. Tomi' iri'o' inuhu' ta na ca tomi' caparut pane.

²⁵Taraju iri urut pain ca tomi' nucun ma' ne, wa wa tamana ac urut na. Cain' cain' xira quem? Cain' xi witan ac wa quem urut con.

²⁶Noro ac caparut na. Om na, wari' ma', om ca to' witan pan ac xucun. Iri' Jam ma' iri na ne, ha' non pain ca to' witan cocon oro wari'. Ha' ha' pi' pin non oro carawa ta naparut.

²⁷Tomi' ac con na Pedro. Win urut ca'. An to an to pi' pin urut pain oro caramajuxut, ma' ta ja' ja' xim urut pum. Ma' carawa ca awi ca mi' xim caparut Iri' Jam quem na ca tomi' con ma'.

²⁸Ame hwe e' ac caparut na. Maqui' cain' tara xec nein ca quep xocori pin tain cain oro carawa pain macan' ta na Iri' Jam ca'. Xao pe ho' pin ac tain tara ca mam' xao pe ne pain ca taramaxicon pin ta' ta' ca'. Wata' pain ca Iri' Wari' ta' ca', taramaxicon hwara' opa pin ac ta' tara ta. Awi tamana tara ca taramaxicon ne. Taramaxicon wi ac mahu' tara quem. Wahu' pain ca taxipa' mahu' ma', xao to xao to xam' ac hwein tara ca mam' xao pe nucun taramaxicon. Ma' 12 tara ca mam' xao to nuhu' pain ca taramaxicon wi mahu'. Taramaxicon to ho' ac huhun tara waram winacocon mana panxica Israel cara pane, co ma' 12 nana cara pane. Tomi' iri'o' inuhu'.

²⁹Oro wari' co paca' nanain xiricocon cocon xurucucun cocon cote caca cacam jicocon cacam mana panxicaca je totacocon quem, oro wari' co ara ac i ma' nana pain ca taramaja mi' xim cacapa' ma', cut tamana ac cacain tara carawa ca awi. Mija tara carawa ca awi ca cut xi' caca ma', mija tiquin' ca' tarain carawa ca paca' caca. Moin' tamana tara cocon. Mi' ac

tococwa tara pain ca om pi' ra ha' ne ca e' wa quem. ³⁰Je ca tomi' xuhu' ca': Oro co hwara' opa nana pain xocori ca', ame hwe e'. Mija ac caca tara co hwara' opa hwara' opa om pin xi' nana. Oro co om hwara' opa nana pain xocori ca' iri na ne, ame hwe e'. Mija ac caca tara co hwara' opa pin xi' nana quem na ca tomi' xo' caparut pain ca taxipa' urut con ca'.

**Ca pijim' joc mam' mi' caparut cocon
wari' co taramaja to nanain totain uva**

20 Pijim' ac caparut na: Carawa ca ara ne pain ca taramaxicon pe ho' toton cocon oro wari' Iri' Jam ma', an xiho' nain carawa ca ara ne con waximain totain uva ma'. Iri' xo' xec pin iri na ne, mo tomi' xo' toton caram ma' co taramaja xi' nana ma' ac ca na, mo hwet ac tococwa na. ²Tomi' xo' ac tococwa na: Mo ta taramaja to xin hwein totain uva ne ma', mi' xica' pe mi' xica' pe xam' ac xuhu' tara pain denário, ac i ma' na ca tomi' xo' tococwa ma'. Ma, mama' ac caca na quem.

³Om ca pawin homa ca xina, in hwet ac cain na ca xao to to caca oro wari' pain cidade ma'. Querec ac tococwa na caram ma' co to ximama' e' nana ma'. ⁴Wahu' quem ac tococwa na. Taramaja mama' jein totain uva ne ta. Pagar xo' xuhu' quem ac tococwa na.

⁵Mama' ac cacain na totacon.

Tocon xina pin iri na ne, mo tomi' mami' toton wari' e' ac ca na, tomi' xo' mami' ac tococwa na oro xucucun.

Piquirim pin iri na xina ne, mo tomi' toton xucucun ta ac ca na, tomi' xo' ac tococwa na quem.

⁶Irawin pin ta' iri na ne, in mao mami' ac cain na ca cut in to xucucun ma'. Mam' ac tococwa na oro xucucun co to to wet nanain i ma'. Cain' cain' xira pahu' quem ac tococwa na. Pain iri' xo' xec cara ne ca to ximama' e' hwe ma'. Je xi taramaja hwe quem ac tococwa na.

⁷Xi ma' ca wari' co taramaja je naparut ta ac cocon na.

Je xi mo taramaja mama' hwein tota cain quem ac tococwa na.

Mama' ac caca na quem.

⁸Irawin pin iri na ne, tomi' ac con na co querec wet taxipa' nain caramaxicon. Harahap je roron co taramaja to nanain tota ma'. Pagar

20.2 Ca xica' pe nein denário ma', je ara xi' na ca mam' pagar taxipa' caca oro waximain xitot pain ca taramaja wa pain ca xica' pe nein xec pane.

roron pain ca taramaja nucucun. Pagar cain' roron co xo' tomi' ta' pain irawin ca' ne, pagar ac momon tara oro xucucun, aram aram hwet ac momon tara co wara tomi' cain' ta' pain xo' xec cara ne, pagar pi' pin ac momon tara quem na ca tomi' con ma'.

⁹Caram ma' co xo' taramaja nanain irawin ma', an xica' an xica' xam' ac cacain na denário.

¹⁰Hwet iri tata co wara taramaja nanain iri' xo' xec cara ne, coromicat ac caca na: Mi' hwara' tarapari' pain denário ta nana. Ane om mi' hwara' tococwa pain ne. An xica' an xica' xam' nanain denário quem.

¹¹An pin iri nanain ne, tomi' mana' pin ac cocon na taramaxicon. ¹²Caram cwa' co taramaja e' nanain irawin cara ne, taramaja wijimain e' nana. Warut iri na ne, taramaja qui' urut pain iri' xo' xec cara ne. Taramaja tamana urut. Nahwere' tamana urut pain ca xain caparut xina quem. Para an an ari ne ca pagar maparut ma' quem na ca tomi' querec cocon pain ca mana' nucucun.

¹³Tomi' ac ca na waximain xitot ma', tomi' non win ma' caca co mana' nana ma'. Tomi' xim inem win ma' ne. Om ca mixein xim. Tomi' xo' inem pain xo' xec cara ne, xin ne ac mapa' na pain ca mi' xica' pe xim pain denário pain ca taramaja nem pain xec ca' xim ne ira. ¹⁴An rain denário nem ta. In mao rain xurum quem. Denário ca mi' toton caram cwa' co xo' taramaja nanain irawin cara ne, wata' ara xi' na co mi' toton pain na. An an ari tarain inain ca xica' pe nein denário ca mi' xim ca' quem. ¹⁵Om ca hohot ne pain ca ara pan tain ca param ne pain dinheiro ne ra? Cain' cain' xima quem? Ac ca noc mi' momon na pain ca xiram pa' toton ca'. Ac i ma' na waximain totain uva cocon oro co taramaja mi' nonon ma'.

¹⁶Je ca tomi' xuhu' ca' ac caparut na. Co om hwara' opa nana pain xocori ca', ame hwe e', main hwara' opa pin tatara. Co hwara' opa nana pain xocori ca' iri nana ne, ame hwe e'. Main hwara' opa hwara' opa om pin tatara quem na ca tomi' caparut.

**Ca tomi' pe mami' cain ca mi' pin
ta' nucun je pain ca e' mami' ta' nucun quem**

Marcos 10.32-34; Lucas 18.31-34

¹⁷Maji pain Jerusalém ta ac caparut na Jeju, xuruxut mama' ac urut na quem. Xuruxut xuruxut, tomi' ac caparut na pain ca taxipa' urut con

ca', pain ca ma' 12 urut ca'. Harahap je, xuruxut ni ca' xuxun oro wari' cwa' naparut, tomi' ac caparut na: ¹⁸Taraju wet xine e'. Mama' xin irin Jerusalém ta. Tan' mama' iri xi' ne, quep ac cacapa' tara co noc nanapa'. Wata' pain ca Iri' Wari' ta' ca', quep ac cacapa' tara, o mi' ac cacapa' tara cocon oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma'. Em' ma, na e' na pain ca to' pa' pin xima ta ac cacapa' tara. ¹⁹O mi' ac cacapa' tara cocon co om judeu nana ma' quem. Tatam' tatarapa', tomi' xirac ac cacapa' tara, wap ac cacapa' tara quem. Tatatain mi' ac cacapa' tara pain pana, wa wa mi' pin pe ac tain tara. Ma' 3 pin iri tara xec pain ca mi' pin ne ne, e' mami' ac ta' tara ta naparut.

Ca tomi' ton con Jeju jicocon mana panxica Zebedeu

Marcos 10.35-45

²⁰Tomi' ton Jeju ta ac cama na jicocon mana panxica Zebedeu ma', Tiago con João ma', co taxipa' nonon Jeju ma'. Harahap je e' ac tococwa na humaxicam, xuruxut hwet ac cocon na Jeju. Pe torotop mi' ac con na. Jeju, tomi' xim inem ira ac con na.

²¹Ma' carawa ca param ma quem ac cam na.

Tomi' pe mi' ne pain ca tomi' nem cocon humaju cwa', co 2 nana cwa' ac con na. Maqui' iri tara xec nein ca taramaxicon pin ta' ma ne, mi' ac momon tara pain ca xao to ho' quequem pain iri' cwerem je pain parajum ma' quem na ca tomi' con ma'.

²²Xi taxi' hwein carawa ca wajim' mahu' ta ac tococwa na. Jain jain tamana ta' pain ca quep em' xim cacapa' oro wari' ta. Ha' turuhu' pain ca jain jain xiho' ac i ma' mahu' quem na ca tomi' tococwa ma'.

Ha' naparut ta nonon.

²³Je i ma' ira, an xiho' xim mahu' pain ca jain jain ta' ne ca' ira. An xiho' xim mahu' pain ca quep em' xim cacapa' oro wari' quem ac tococwa na. An xiho' ac i ma' xim paxi' mahu', ane om wata' ne co tora' pan toton

20.21 Taraju pa' jein ca tomi' mao ne ca xao to ho' xine iri' curucun je paraxicon taramaxicon ma'. Xao to ho' pin iri nanain iri' curucun je paraxicon taramaxicon wari' ne, querec pin' ac tococwa na pain ca taramaxicon wi xucucun. Ac i ma' na Jeju ma' quem. Xao pe ho' pin iri nain iri' curucun Iri' Jam ne, querec pin' ac tocwa na pain ca Taramaxicon wi pin con quem.

nonon oro wari' co xao to ho' xim nanapa' ne. Wirico pan na Te co wara tora' an to xo' nonon wari' co xao to ho' xim nanapa' ta na ca tomi' tococwa ma'.

²⁴Warut pain ca taxipa' urut con Jeju cwa', pain ca ma' 10 urut ca', taraju iri urut pain i ma' cocon mana panxica Zebedeu ma' ne, mana' ac urut cocon na. Om ca taraju hohot caparut ca tomi' nucucun.

²⁵Harahap pi' pin je ta, tomi' xim inuhu' ta ac caparut na Jeju. Hwara' opa nana oro taramaxicon nucucun oro tatirim ma', tomi' ha' xut ximama' nonon oro wari' nucucun. Om ca xiram pa' camain' cocon pain ca taramaxicon hwara' opa to ho' cocon ma' quem. Wara taxi' hwein i ma'. ²⁶Ane om na ne pain ca an xiho' huhun ne. Jimama' je. Mo ta param hwein ca taramaxicon wa ma', om ta xec xec hwe, taramaja mi' pan jujun oro win ma' hwe ma'. ²⁷Mo ta param huhun oro win ma' nuhu' pain ca querec pin' cucuhu' pain ca hwara' opa nuhu' ma', na e' na pain ca taramaja mi' huhun. Win ca wari' co taramaja mi' e' non taramaxicon nucun ma', ac i ma' je pain ca taramaja mi' e' huhun oro win ma' hwe ta. ²⁸Win ta' ca', pain ca Iri' Wari' ta' ca'. Om ca maqui' ta' pain ca taramaja mi' xine xuhu', om na. Taramaja mi' pan xim inuhu'. Mi' pin caho' xim inuhu', ma' ta witan mija hwe ta inuhu'. Je ca maqui' ta' ca' na ca tomi' caparut ca'.

Ca quep ma' pin xine tococon wari'

Marcos 10.46-52; Lucas 18.35-43

²⁹Xuruxut mama' ac urut na, paca' ac urut pain na Jericó. Mija nana wari' co ja' ja' nanaparut. Om ca paric camain' caca. ³⁰Ma' 2 ac caca na co xao to to nanain cacarain wana ma'. Om na tococon. Taraju ac caca na: Maqui' na Jeju ta, maqui' na Jeju ta nana oro wari'. Taraju iri tata ne, merem ac caca na: Taramaxicon nuxut nana, Winacon Davi nana, xiram pa' xut ta na ca merem nucucun.

³¹Tomi' in pin ac cocon na oro wari' co ja' ja' nonon ma' quem. Merem maho' je ta paxi' tata, ane om ha' caca ne. Merem merem tiquin' nana, merem mip nana. Taramaxicon nuxut. Winacon Davi. Xiram pa' xut ta na ca merem nucucun.

³²Xat ac ca na Jeju. Harahap je ac tococwa na. Ma' i ma' pahu' quem? Ma' carawa ca ara mi' xine mahu' quem tata.

³³Om na, querec xixi' na urut ta Taramaxicon ac cocon na.

³⁴Xiram pa' ac cocon na Jeju. Quep ac cain na tococon, querec mami' hap ac caca na. Ja' ja' ac cocon na Jeju.

Ca wa' mao cain Jerusalém Jeju

Marcos 11.1-11; Lucas 19.28-40; João 12.12-19

21 Wixicam pin iri urut pain Jerusalém ne, hwet ac urut pain na Betfagé ma', ca pe ja' pan nain Pacun Nein Oliveira ma'. Tomi' ac tococwa na win ma' nuxut pain ca taxipa' urut con ca'. Ma' 2 nana co tomi' ca. ²Mama' jein ca paric to ne xirim ma', ca querec hwe ma'. Hwet pin iri jein ne, mam' ac hwein tara aramanain burro ca ma' wijimain ma', ca tucu pan wa ma'. Tacom' horohot jein, cut qui' ac hwein tara ta. ³Mo ta ma' i ma' pahu' quem cuhu' wari' ma', tomi' ac hun tara: Om na, param inain na Taramaxicon nuxut ta ac hun tara. Ma, cut mama' jein ta ac cuhu' tara. Om ta narain ho' cuhu' pain na ca tomi' tococwa ma'.

⁴Cut qui' jein burro ta tata co taxipa' ca ma', ma' ta hwet pin ne ca wara tomi' pe ca profeta pane tata. Ca' na ca wara tomi' pe ca con pane:

⁵Tomi' jujun oro wari' co to nanain Jerusalém ma'.

Taraju wet je! Hwet nuhu' taramaxicon nuhu' ta!

Om ca xec xec ca.

Xao pe pe nain xonein wijimain burro.

Ac i ma' na ca tomi' pe ca profeta pane.

⁶Mama' ac caca na, ara pi' pin ac cacain na ca tomi' nucun Jeju. ⁷Cut qui' nanain aramanain burro je wijimain ma'. Cum xo' ac cacain na xonein con womicocon, xao pe ac cain na Jeju. ⁸Mija nana wari' co xuruxut wi nanaparut ma'. Om ca paric camain' caca. Ma' nana co cum xo' nonon womicocon pain wana. Ma' nana oro xucucun co ton nanain taparain pana, an toco' mi' ac cocon na pain wana ma' quem. ⁹Merem ac caca na

21.1 Wijimain cidade na Betfagé. Pe ja' pan nain Jerusalém je Pacun Nein Oliveira ma'.

21.8 Cum xo' iri nonon womicocon pain wana oro wari' ne, je pain ca an toco' mi' cocon pain taparain pana pain wana ma' quem, ac i ma' na ca an hwet mi' cocon pain ca in ac cocon ma', je pain ca tomi' querec te tamana cocon quem.

oro wari', wiricoco co o nonon ma', wiricoco co maqui' nana pa'ao' ma' quem, merem ca' nana:

In ac xun Winacon Davi cwa'.

Tomi' querec te xun co cwa' co mam' maqui' nain ca hwara'
opa nucun Iri' Jam cwa'.

In ac xun Iri' Jam co pe nain iri' pawin cwain ta.

Ac i ma' na ca merem nucucun.

¹⁰Tan' mama' iri urut pain Jerusalém ne, teretem teretem xam' ac caca na oro wari' co to nanain i ma'. Cain' ca wari' ca co cwa' quem ac xucucun na.

¹¹Om na, wirico co cwa' Jeju cwa', wirico co cwa' profeta co maqui' nain Nazaré pain Galileia ta nana co ja' ja' nanaparut ma'.

**Ca tomi' jein hwerehwet pin tococwa co vender to
nanain carawa pain cote ne xiricon Iri' Jam**

Marcos 11.15-19; Lucas 19.45-48; João 2.13-22

¹²Corom mao ac cain na ca tao' caho' nein cote ne xiricon Iri' Jam Jeju ma'. Tomi' jein hwerehwet pin ac tococwa na oro wari' co cut nanain carawa ca tom tain' xi' caca ma', wiricoco co vender nanain quem, tomi' jein hwerehwet tomi' jein hwerehwet pi' pin tata. Joc camara' pin ac cain na oro pana ca taramaja to caca co meo taxipa' nanain oro xijein dinheiro ma', joc camara' pin ac cain na oro pana ca mam' xao to to caca co vender taxipa' nonon xucu' ma' quem. ¹³Tomi' carapita ac tococwa na. Ca' na ca xirao' pe xine ca tomi' nucun Iri' Jam pain capiacaon ta: Cote ne xuru ca', je tara ca tomi' to cacapa' oro wari' cwa' ta na ca xirao' pe nein con. Wahu'

21.12 Oro sacerdote pain cote ne xiricon Iri' Jam pane, noc tamana nanain dinheiro nucucun oro romano pain dinheiro nucucun oro grego, xi xirao' pe ara cacain jamicon wari' pain ta nana. Noc nain i ma' Iri' Jam ta nana. Je ca taramaja to cacain ca tao' caho' nein cote ne xiricon Iri' Jam caram ma' co meo nanain oro xijein dinheiro ma' quem. Maqui' iri nana oro wari' co tom tain' mi' xun nonon pain carawa Iri' Jam ne, co cut xin nanain boi pain ovelha con xucu' ma', cut ca' ac tococwa na pain dinheiro nucucun tatirim, mi' in hwet ac tococwa pain na iri' dinheiro nein cote ne xiricon Iri' Jam. Ha' ac tococwa na pain ca mam' cut cacain carawa ca tom tain' xin caca pane. Oro co meo nanain dinheiro ma', mixein tamana nana quem. Horon iri na dinheiro nucucun tatirim ca cut caca ma' ne, mi' in hwet wijimain e' ac cacain na dinheiro nein cote ne xiricon Iri' Jam ma' quem.

iri na ne, ara em' pin hwein. Ara xiricocon oro wari' co an noc xa taxipa' nanain carawa pin hwein ta na ca tomi' carapita tococwa ma'.

¹⁴To nanain i ma' co om tococon. Ma' nana co caji at nana ma' quem. Hwet ac cocon na Jeju pain ca tao' caho' nein xiricon Iri' Jam ma', quep xio pin ac tococwa na quem. ¹⁵Oro taramaxicon nucucun oro sacerdote ma', cocon oro co ca' na taxipa' nanain ca xirao' nucun Moisés ma' iri nana ne, mana' tamana ac caca na pain ca querec cacain ca ara ca Jeju ma', pain ca quep xio pin cocon co caxi nana ma'. Mana' tamana nana pain ca taraju cocon oro hwijima' pain ca merem to cacain ca tao' caho' nein xiricon Iri' Jam ma' quem, pain ca in ac xun Winacon Davi ta caca ma'. ¹⁶Om ca taraju main ca tomi' caca hwijima' cwa' ra? Je xi tomi' in pin momon quem nonon Jeju pain ca mana' nucucun.

Taraju toton ca' ira ac tococwa na. Om ca noro camain' hwein ca xirao' pe ca profeta pain capijacon Iri' Jam ra? Ca' na ca xirao' pe nein con:

In ac nonon Iri' Jam oro hwijima'.

Oro hwijima' co xoc xoc wet nana catat quem, in ac nonon Iri' Jam.

Wirico Iri' Jam co mi' nonon pain ca in ac cocon ma'.

Ac i ma' na ca tomi' tococwa ma'.

¹⁷Hwrehwet ca' ac urut cocon na, paca' ac urut pain na Jerusalém. Mama' ac urut pain na Betânia. Je i cain ca pi'am to urut ma'.

Ca tomi' noro cain panaji figo Jeju

Marcos 11.12-14; Marcos 11.20-24

¹⁸Iri' xo' xec pin iri na ne, in mama' xin Jerusalém ta ac caparut na Jeju, mama' ac urut na. Xuruxut xuruxut, pe' ac ca na Jeju. ¹⁹Querec ac cain na panaji figo ma'. Xat pe nain cacarain wana ma'. Xut hwet ac cain na, am ma' ne winain quem paxi' na. Ane om ne winain ne. Ma' e' na tenenein. Tomi' noro ac cain na panaji. Om ta wina mami' camain' ma ta nain pain ca tomi' noro cain ma'. Mi' pin hap ac ne na con.

²⁰Querec iri urut pain i ma' ne, pain ca taxipa' urut con ca', wa wa tamana ac urut na. Mi' pin hap na panaji figo ra urut.

²¹Je ca tomi' xuhu' ca', tomi' iri'o' inuhu' ta ac caparut na. Mo ta howa hun Iri' Jam pain ca ha' con pain ca ara cain ca wajim' hun ma'. Mo ta om tara con ta'a camain' hun. Ha' ac cuhu' tara pain ca ara hwein ca ara mi' tain panaji figo ca'. Om ta xica' pe ne i ma' quem. Mo ta tomi' ca' hwein

cote ne pacun ma': Tequi' pe ra ta, xin pocom pan xijem pain cote ne com cain, mo ta tomi' ac i ma' hwein. Ha' ac cuhu' tara, tequi' pe ac ne tara, xin pocom pan ac xijein tara pain cote ne com. ²²Oro ca mi' ne hun Iri' Jam ma', pain ca tomi' hun ma', mo ta howa hun pain ca ara mi' xim cuhu' pain ca mi' ne hun ma', ara mi' ac cuhu' pain tara quem na ca tomi' caparut.

**Ca tomi' querec cocon Jeju pain ca ma' co mi' nem
pain ca ara main oro ca ara ma ma' quem cocon**

Marcos 11.27-33; Lucas 20.1-8

²³Corom mao ac cain na ca tao' caho' nein cote ne xiricon Iri' Jam Jeju ma', ca' na ac tococwa na pain capijacon Iri' Jam oro wari'. Ca' na ca' na wet iri tata pain ne, xuruxut hwet ac cocon na oro taramaxicon nucucun oro sacerdote cocon oro taramaxicon nuxut pain ca judeu urut ca'. Tomi' querec ac cocon na: Ma' co mi' nem pain ca ara main oro ca ara ma ma' quem? Ma' co ara rain nem pain quem na ca tomi' querec cocon ma'.

²⁴⁻²⁵Wata' quem, tomi' querec xim inuhu' quem ac tococwa na. Tomi' querec xuhu' con João cara pane, co ja' taxipa' nonon pain com oro wari' pane. Ma' co ja' roron pain com oro wari' non quem? Mi' non pain Iri' Jam ra? Mi' non pain wari' ra? Mo ta tomi' hwet mahu' pain wixicon co tomi' non pane, tomi' hwet ac xuhu' pain tara wixicon co ara rain napa' pain oro ca ara ta' ca' ac tococwa na.

Cain' xi tomi' xun quem ac xucucun na. Mo ta mi' non pain Iri' Jam xun, tomi' querec mami' ac capari' tara, para om howa hun quem tarapari'. ²⁶Mo ta mi' non pain wari' xun. Cain' cain' xixi' quem? Jin' ara xi' ururun oro wari' cwa'. Xi profeta na João profeta na João pi' pin ara caca ta nana pain ca tomi' xo' xucucun ma'.

²⁷Om ca taxi' urut ta ac cocon na.

Je i ma' ira, om ta tomi' hwet tain wixicon co ara rain napa' pain oro ca ara ta' ca' quem na ca tomi' tococwa ma'.

Ca pijim' joc mam' mi' tococwa con wari' co ma' 2 nana mana panxica

²⁸Pijim' hwet xuhu' cocon mana panxica wari' ac tococwa na. Ma' 2 nana. Pijim' hwet xuhu' cocon, tomi' hwet ac mahu' tara pain ca taraju pa' nuhu' quem tata.

Ma ac caca na.

Ma' na wari' pane ac tococwa na. Ma' 2 nana mana panxica. Tomi' ac con na co pan' cain' ma': Taramaja rain totaxi' pain xec ca' arain non.

²⁹Noc inain ta ac ca na. Noc inain paxi' na, ane aram aram in ne ximicon ne, mao ac cain na xitot.

³⁰Tomi' ac con na coxa' ca ma' quem: Taramaja rain totaxi' pain xec ca' arain non. Ma ac ca na. Ma paxi' na, ane om mao ca ne.

³¹Tomi' querec ac tococwa na: Ma' co tomi' ha' pan non cote ca quem tata.

Wirico co pan' cain' ta nonon.

Je ca tomi' xuhu' ca', tomi' iri'o' inuhu' ta ac tococwa na. Oro caracat ma', cocon oro caxicon wari' cacam oro caxicam narima' ma' quem, hohot nonon Iri' Jam, om ca i'ina cacam pain ca xin ne cocon Iri' Jam pain ca taramaxicon pe ho' tatam cacam ta. Wahu' iri na ne, om ca hohot hun Iri' Jam. I'ina tamana nuhu' pain ca xin ne hun pain ca taramaxicon pe ho' xim cuhu' ma'. ³²Xi hwet ara cuhu' João co ja' taxipa' com cara pane ta. Ma' ta an hwet mi' xuhu' pain ca xuruxut xo' wa con Iri' Jam ta nuhu'. Ane om howa hwein ca pijim' nucun ne. Oro caxicon wari' cacam oro caxicam narima' ma' iri nana ne, howa nonon João. Wahu' iri na ne, querec paxi' hwehwem pain ca howa nequequem. Ane om cwirin' hwe ne. Om ca howa hwein ca pijim' nucun João quem na ca tomi' tococwa ma'.

Ca pijim' joc mam' mi' tococwa cocon co taramaja to nanain totain uva

Marcos 12.1-12; Lucas 20.9-19

³³Tomi' ac tococwa na: Pijim' mami' xuhu', pijim' joc mam' mi' xuhu' cocon oro co taramaja to nanain totain uva, taraju wet je e'. Ma' na waximain xitot pane. Oin' ac cain na totain uva. Tao' caho' ac cain na, xe' ac cain na manain cote ne pacun ca mam' hum' pe xine cominain uva quem. Quep ac cain na xirim ca mao pawin ma' quem, ma' ta piri' pe ca wari' co querec wet nain ta na. Tomi' xo' ac tococwa na wari' co taramaja to taxipa' nanain xitot. Taramaja to jein totain uva ne ca' ac tococwa na. Paca' iri tara memem ne, mene ac hwein tara xijein cacarain ma', mene ac tain tara xijein cacarain ca' quem, ac i ma' tara ca pagar xuhu' pain ca taramaja nuhu' ta ac tococwa na. Mao tain pira ina ta ac tococwa na, mao ac ca na quem.

³⁴Wixicam pin iri na oro xec nein ca paca' pin ne memem ne, tomi' ac ca na waximain xitot ma', tomi' tata co taramaja mi' e' nonon pain ca pe pan ca ma'. Hwet jujun co taramaja to nanain totain uva ne cain, cut ac hwein tara memem ne cocon ta tata. Ma ac caca na, mama' ac caca na quem.

³⁵Hwet iri nanain totain uva ne, quep ac tococwa na. To' ac tocwa na xucun. To' pa' pin ac tocwa na xucun. To' to' mi' pin ac tocwa na pain pacun xucun ma' quem.

³⁶Tomi' ac tococwa na oro xucucun co taramaja mi' e' nonon pain ca pe pan ca ma'. Mija tiquin' ca' tata co wara tomi' ca pane. Hwet jujun co taramaja to nanain totain uva ne cain, cut ac hwein tara memem ne cocon ta tata. Mama' ac caca na. Tan' mama' iri nanain i cain ne, quep ac tococwa na, quep xirac ac tococwa na quem. Win ne ca quep xirac tococwa oro xucucun pane, ac i ma' na ca quep xirac tococwa caram ma' quem.

³⁷Quep xirac pin iri tata caram ma' ne, coromicat pan ac ca na waximain xitot. Tomi' ha' totoron panxita' cwa' na. Je ca tomi' con iri' panxica: Hwet roron ta arain. Cut pan rain memem ne cain ta na ca tomi' con ma'.

³⁸Ane om tomi' ha' caca co taramaja to nanain totacon ma' ne. Querec iri nonon panxica ne, pain ca xut qui' nucun ma', tomi' xo' ac xucucun na: Wirico co ma' panxica waximain xitot ta xucucun. Mi' pin iri tara cote ca ne, mene pin ac cain tara totain uva ca' xucucun. To' pa' pin xun ta ac xucucun na. Menexi' pin ac ne tara totain uva ca' xucucun. Ma ac xucucun na. ³⁹Quep ac cocon na, xin hwet ca' ac cocon na pain xitot, to' pa' pin ac cocon na quem. Ac i ma' nana co taramaja to nanain totain uva pane na ca pijim' nucun Jeju.

⁴⁰Tomi' querec ac tococwa na: Cain' cain' ta' ca waximain xitot pain ca aram aram hwet xun tococwa co taramaja to nanain totacon ma' quem na ca tomi' querec tococwa ma'.

⁴¹Om na, na e' na pain ca to' parapa' pin tococwa ta nana. Om ta xiram pa' camain' tococwa. Xi caracat tamana ara caca ta. Noro ac tococwa tara oro xucucun quem, taramaja to jein tota ca' ac tococwa tara. Paca' pin iri tara memem pain oro xijein cawaxi' ne, mi' xo' ac cocon tara pain munucun quem na ca tomi' caca ma'.

⁴²Je ca tomi' xuhu' ca' ac tococwa na. Om ca noro camain' hwein ca xirao' pe xine pain capijacon Iri' Jam ra? Ca' na ca xirao' pe xine:

Pacun ca noc pin caca wari' co quep xin paxi' nanain xirim ma',

aram aram iri' pacun ca to' teren nain xirim pin na.

Wirico Iri' Jam pan na co ara nain i ma'.

Wa wa tamana ac urun na quem.

Ac i ma' na ca xirao' pe xine pain capijacon Iri' Jam pane na ca tomi' tococwa ma'.

⁴³Je ca tomi' xuhu' ca' ac tococwa na. Iri' Jam ma', wari' ne paxi' nuhu' pain ca taramaxicon pe ho' toton cuhu' ira. Ane noc pin mahu' ne. Je ca maho' pin xim cuhu' pain ca judeu hwe ma'. Wari' ne wari' ne om pin xim nuhu' Iri' Jam. Wari' ne pin toton oro xucucun wari' co tomi' ha' xun nonon ma'. ⁴⁴Wari' co noc pin nain pacun ca aram aram to' teren nain xirim ca', ac ca pan' hwet cain tara. To' caracat pin ac tocwa tara. Ac ca pan' hwet tocwa tara quem. Xao niri pin ac tocwa tara ta na ca tomi' tococwa ma'.

⁴⁵Oro taramaxicon nucucun oro sacerdote cocon oro fariseu ma', taraju nanain oro ca pijim' nucun Jeju ma', pain ca pijim' joc mam' mi' cain oro carawa. Tomi' mi' napari' ron ac caca na. ⁴⁶Je ca quep xun paxi' cocon ma'. Ane jin' cocon oro wari' ne, xi taxi' ara cocon oro wari' pain ca profeta na Jeju ta cocon ta.

Ca pijim' joc mam' mi' tococwa con taramaxicon co an ta' narima' panxica

Lucas 14.15-24

22 Pijim' mami' xuhu' ta ac ca na Jeju, pijim' joc mam' mi' ac tococwa na con taramaxicon co an ta' narima' panxica ma'. Ca' na ca pijim' nucun: ²Carawa ca ara ne pain ca taramaxicon pe ho' cocon oro wari' Iri' Jam ma', an xiho' nain carawa ca ara ne con taramaxicon ma', co an ta' narima' panxica. Taramaxicon ma', tomi' ac ca na: Cut in xi', cao' querec te wi xijexi' pain ca an ta' narima' panxita' cwa' ta na. ³Tomi' ac tococwa na wari' nucun ma', co taramaja mi' e' nonon ma'. Harahap je jujun oro wari' co wara tomi' ta' pane, pain ca cao' querec te wi xijexi' e' toton pane

21.42 Pain ca tomi' nucun Iri' Jam cwa', tomi' mi' non Jeju. Wirico Jeju co an xiho' nain pacun ca noc pin xine ma'. Wiricoco oro taramaxicon co an xiho' nonon wari' co quep xin paxi' nanain xirim ma' quem. Ca' na ca tomi' ta' ca Iri' Jam ma'. Main noc paxi' toton Jeju oro taramaxicon. Ame hwe e', main Taramaxicon pan tara ta. Wata' pan tara co Taramaxicon ra non ta na Iri' Jam, ac i ma' na ca tomi' ta' ca ma'.

tata. Ma ac caca na, mama' ac caca na. Tomi' paxi' tata, ane noc urut pain ta caca ne.

⁴Tomi' ac tococwa na oro xucucun wari' co taramaja mi' e' nonon ma'. Mo tomi' mami' jujun oro wari' co wara tomi' ta' pane. Awori pi' pin na oro carawa ca cao' querec te wi xi' iri' ta. Wara to' parapa' pin urut pain boi nuxut je oro wijimain boi nuxut ca homa tamana quem. Awori pi' pin na. Harahap je, cao' querec te wi xijexi' con panxita' co an ta' narima' ta jujun ta na ca tomi' tococwa ma'.

⁵Mama' ac caca na. Tomi' mami' paxi' tata, ane om ha' caca ne. Miri'om nonon, mama' ni ca' nonon. Mao nain totacon xucun. Mao ac cain na ca vender pe wa carawa xucun ma' quem. ⁶Oro xucucun ma' iri nana ne, quep ac cocon na oro wari' nucun taramaxicon, to' to' ac cocon na, to' parapa' pin ac cocon na quem.

⁷Mana' tamana ac ca na taramaxicon. To' parapa' pin jujun ta ac tococwa na oro soldado nucun. To' parapa' pin jujun caram cwain co to' parapa' pin nonon oro wari' ne cara ne. Tom pin jein cidade nucucun quem ta na ca tomi' tococwa ma'.

⁸Tomi' ac tococwa na oro wari' nucun co taramaja mi' e' nonon ma'. Awori pin paxi' na oro carawa ca mam' tomi' querec te wi xi' iri' con panxita' co an ta' narima' cwa' quem. Ane miri'om cacapa' co harahap je paxi' ta' ne. Om ca hohot ne pain ca maqui' caca quem, xi tomi' ha' pan caca ta. ⁹Je ca tomi' xuhu' ca' ac tococwa na. Mama' jein oro wana cain. Tomi' tomi' xam' jujun oro wari' co mam' to hwe pain wana cain ta tata.

¹⁰Mama' ac cacain na oro wana. Cut in cut in pi' pin ac tococwa na oro wari' co mam' caca ma'. Cut in ac tococwa na co awi nana, cut in ac tococwa na co om awi nana quem. Mija nana wari' co maqui' nana, xao xao tamana xucucun pain xirinain ca cao' querec te to xi' caca ma'.

¹¹Mo querec toton oro wari' co maqui' nana ne ac ca na taramaxicon ma', corom ac ca na, querec ac con na wari' co om pe non iri' wom nein ca mam' tomi' querec te wa ma'. ¹²Tomi' querec ac con na: Cain' cain' xima quem win ma' ne? Para corom ma pain ca om pe mon iri' wom ma' quem non. Hehe ac ca na.

¹³Tomi' ac tococwa na wari' nucun co taramaja mi' e' nonon ma'. Tucu jein caximacon co cwa' ta, tucu jein micon ma' quem. Xin hwet mi' jun pain ca jitacat nein cain. Oro wari' co jain jain to nanain i cain, awaran tamana ac caca tara, cacacao' ac cacain tara xicocon pain ca jain jain

tamana nucucun ta na ca tomi' tococwa ma'. Ac i ma' na taramaxicon co tomi' nonon oro wari' pain ca cao' querec te wi xijexi' con panxita' co an ta' narima' ca ma'.

¹⁴ Je ca tomi' xuhu' ca' ac tococwa na. Ma' mija paxi' nana co tomi' ca Iri' Jam ma'. Ane ma' paric ca' e' caca co tora' ca ne na ca tomi' tococwa ma'.

Ca tomi' querec tococwa pain ca pagar xine imposto

Marcos 12.13-17; Lucas 20.20-26

¹⁵ Hwrehwet mama' ac caca na oro fariseu ma'. Tomi' xo' ac xucucun na: Cain' cain' xuxun quem? Tomi' querec xun e'. Mo ta tomi' ximao ca, querec pin' ac tocwa tara pain ca om iri'o' nucun ta nana.

¹⁶ Mo tomi' jun e' ac tococwa na oro win ma' caca cocon oro win ma' ca taramaxicon Herodes ma' quem. Ma ac caca na, mo hwet ac cocon na Jeju. Tomi' ac cocon na: Tomi' xim urut pum ta taramaxicon co ca' na taxipa' capijacon Iri' Jam. Taxi' urut pum pain ca om mixein ma ma'. Ca' na xo' maparut pain capijacon Iri' Jam ca an hwet mi' naparut pain ca xuruxut xo' wa pain ca tomi' ha' je caparut ca'. Querec querec ac wiricoco pi' pin nenem oro wari' ma' quem. Co hwara' opa nana ma', co om hwara' opa nana ma' quem, querec querec ac wiricoco nenem, xi tomi' querec te paxica' momon ta. ¹⁷ Je ca tomi' querec xim urut pum ca' ac cocon na. Cain' cain' ne ca coromicat nem quem, pain ca tomi' capari' Moisés quem? Hohot na pain ca pagar tocwa pain imposto taramaxicon nucucun oro romano ra? Om ca hohot ne ra? Ac i ma' na ca tomi' querec ximama' cocon Jeju ma'.

¹⁸ Ane querec pin' cocon Jeju ne, querec pin' nonon pain ca mixein nucucun. Ac ca iri'o' xi' ca' tara me hwe ra ac cocon na. Para tomi' querec ximama' mahu' ma'? Param mahu' pain ca tomi' pan tem wa ra tata. ¹⁹ Je i ma' ira, mi' xine pain moeda ca mam' pagar xine imposto ta ac tococwa na. An mi' ac cocon na pain denário.

²⁰ Tomi' querec ac tococwa na: Ma' jamicon co cwa', pain moeda ca'? Ma' wixicon co cwa' ca xirao' pe xine pain quem na ca tomi' querec tococwa ma'.

²¹ Jamicon taramaxicon nucucun oro romano ta. Wixicon quem nonon.

Je ca tomi' xuhu' ca' ac tococwa na. Carawa ca mene ca taramaxicon nucucun oro romano ma', mi' ac hun pain tara. Carawa ca mene ca Iri' Jam ma' iri na ne, mi' ac hun pain tara quem na ca tomi' tococwa ma'.

²²Taraju iri nanain ca tomi' nucun ne, wa wa ac cocon na. Paca' ac cocon na, mama' ac caca na quem.

Ca tomi' querec cocon pain ca e' mami' xi' caca co wara cono' nana ma'

Marcos 12.18-27; Lucas 20.27-40

²³Pain xec nein ca tomi' querec cocon Jeju pain imposto oro fariseu ma', ma' ac caca na oro saduceu ma', co howa ca' nana quem: Om ca e' mami' xi' caca co wara cono' nana ta na ca howa nucucun. Tomi' querec xun Jeju ta ac caca na, xuruxut hwet ac cocon quem. ²⁴Tomi' xim urut pum ta taramaxicon co ca' na taxipa' capijacon Iri' Jam ac cocon na. Ca' na ca xirao' mi' capari' Moisés cara pane: Mo ta mi' pin ca wari' ma', mo ta om wanxi' mi' cam manacon ma', na e' na pain ca an cam coxa' ca. Ma' ta wijima cama con ta taram. Pije' co aram aram wanxi' mi' cam ma', ac ca wanxi' con tara cwaji' ca co wara mi' pin ta, ac i ma' na ca xirao' mi' capari' Moisés pane. ²⁵Je ca tomi' querec xim urut pum quem ac cocon na. Ma' na win ma' nuxut pane. Ma' 6 nana xurucun. Co pan' cain' pane, an ac cam na narima', aram aram mi' pin ac ca na. Om ca wanxi' ca. Mi' pin ca' nam manacon. An ac cam na coxa' ca co ja' corom mao non ma' quem. ²⁶Ac i ma' na co ma' quem. An nam manacon cwaji' ca, aram aram mi' pin ac ca na. Om ca wanxi' ca. Ac i ma' na co ja' corom mao non co ma' quem. An nam manacon cwaji' ca, aram aram mi' pin ac ca na. Om ca wanxi' ca co ma' quem. Ac i ma' ac i ma' pi' pin nana, an an xam' nanam manacon cwaji' caca co pan' cain' pane, aram aram cono' ac caca na, om ca wanxi' camain' caca pane. ²⁷Cono' pin iri nana waram taxicam ne, aram aram mi' pin ac cama na narima' ma' quem. ²⁸Je ca tomi' querec xim urut pum ca' quem ac cocon na. Maqui' iri tara xec nein ca e' mami' xi' caca co wara cono' nana ma' ne. Mon xira co narima' ne tam nam quem? Ma' 7 ara xi' nana co an nanam pane, an an xam' nanam pane na ca tomi' querec cocon ma'.

²⁹Om ca coromicat xo' hwe ta ac tococwa na. Om ca taraju pa' hwein capijacon Iri' Jam ca xirao' to caca oro profeta cara pane, xi querec pin' hwein ca hwara' opa tamana nucun ma', pain ca ha' con pain ca to' e'

mami' cocon oro wari' co wara cono' nana ma' quem. ³⁰E' mami' iri tatara co wara cono' nana ne, an xihó' ac cocon tara oro jam co taramaja mi' nonon Iri' Jam. Om ta cut caca narima'. Ca narima' nequequem ma', om ta cut cacama tarama' quem. ³¹Pain ca e' mami' xi' caca co wara cono' nana ma' iri na ne, wara tomi' xo' nuhu' Iri' Jam ma'. Om ca noro hwein capijacon con Abraão con Isaque con Jacó cara pane ra? Wara pain paxi' na ca cono' caca pane, ane tomi' ca' con Moisés Iri' Jam pane ne: ³²Wata' co Iri' Jam cwa'. Iri' Jam ne napa' Abraão cwa', Iri' Jam ne napa' Isaque cwa', Iri' Jam ne napa' Jacó cwa' quem. Iri' Jam ne Iri' Jam ne wet nanapa' ta na ca tomi' con Moisés Iri' Jam pane. Je ca taxi' xuxun pain ca e' e' wet nucucun quem. Xi Iri' Jam ne cocon Iri' Jam oro wari' co wara cono' nana ta. Iri' Jam ne e' nonon oro wari' co e' nana ta na ca tomi' tococwa ma'.

³³Taraju iri nanain ca tomi' nucun oro wari' ma' ne, wa wa ac cocon na. Ac i ma' na ca pijim' jimaó nucun ra ac xucucun na.

Ca xirao' nucun Moisés ca awi tiquin' ca' nain oro wirain ca xirao' nucun

Marcos 12.28-34; Lucas 10.25-28

³⁴Jeju ma', tomi' hehe pin nonon oro saduceu. Taxi' pin iri nanain i ma' oro fariseu ne, cut in ac xucucun na, xuruxut hwet ac cocon na Jeju. ³⁵Tomi' pan ac ca na win ma' caca ma', co tomi' xo' taxi' nain oro ca xirao' nucun Moisés ma'. Tomi' querec ton e' ac ca na. Am tomi' ximao ca, am om tomi' ximao ca quem na. Je ca tomi' querec con Jeju: ³⁶Tomi' xim inem ta co ca' na taxipa' capijacon Iri' Jam. Mija paxi' na oro ca xirao' nucun Moisés ca tomi' ha' je capari' ca'. Ma' ca xirao' nucun ca awi tiquin' ca' nain oro wirain ca xirao' nucun quem na ca tomi' querec con ma'.

³⁷Tomi' ac ca na Jeju. Main ca' con:

Ta noc hun Iri' Jam co Taramaxicon ne hwe me ta.

Na e' na pain ca tomi' querec te mip hun pain iri' xumuhu'.

Jain jain jun pain ca tomi' querec te mip hun ta.

Ta coromicat ni ca' hun me ta.

22.33 Oro saduceu pane, pain ca om ta e' mami' xi' caca co wara cono' nana ta caca ma', jain jain nonon oro wari' pain ca howa an xihó' cocon. Na e' na pain ca an xihó' cacapari' pain ca howa nexi' ca' nana. Je ca tomi' querec cocon Jeju cocon caram ma' co cono' ca' nanam manacocon. Hehe tara Jeju, om ta tomi' xo' ac capari' xi' paxi' nonon. Ane tomi' xo' tococwa ne. Hehe pan ac caca na. To' quiiji' pan tata pain ca howa ximama' nucucun.

Ac i ma' napari'. ³⁸Je i ma' ca xirao' nucun ca awi tiquin' ca' nain oro wirain ca xirao' nucun. ³⁹Ma' na wirain ca xirao' nucun ca awi quem. An xiho' nain i ca' ca tomi' ta' ne. Ca' na ca xirao' nein:

Ta noc huhun oro win ma' nuhu' me ta.

Win ne ca om noc pan xujuhu' ma' quem ta.

Ac i ma' napari' quem. ⁴⁰Wari' co tomi' ha' nain ca xirao' nucun Moisés ca tomi' ta' ne, ha' ac con tara pain ca tomi' ha' cain oro xijein ca xirao' nucun. Ha' ac con tara pain ca tomi' ha' cain oro ca xirao' nucun oro profeta ma' quem na ca tomi' con ma'.

**Ca tomi' querec tococwa pain ca ma' co iri' hwanana ne ca
Cristo co wara tomi' pe ca Iri' Jam pane tococwa**

Marcos 12.35-37; Lucas 20.41-44

⁴¹Cut in cut in wet xucucun oro fariseu ma', pain ca tomi' cocon Jeju ma'. Tomi' querec pan ac tococwa na quem: ⁴²Cain' cain' ne ca coromicat nuhu' con Cristo quem? Ma' co hwanana ne ca quem tata.

Hwanana ne non taramaxicon Davi cara pane ac cocon na.

⁴³Cain' cain' xira quem ac tococwa na. Davi cara pane, co wina non Cristo pane, Taramaxicon ne non quem. Je Tamataracon Iri' Jam ca mi' non pain ca tomi' nucun pane. Para Taramaxicon ne con pain ca xirao' pe nucun quem? Xi tomi' ac i ca' ara ca Davi pain ca tomi' mi' con Cristo pane:

⁴⁴Tomi' non Taramaxicon ne Iri' Jam co iri' Taramaxicon ma'.

Xao pe ho' ne pain iri' cwere ca'.

Aram aram maqui' pa' ac quem tara xec nein ca to' quiji'

pin toton ta' co noc nenem ma'.

Taramaxicon pe ho' cara ac momon tara ta.

Ac i ma' na ca tomi' xucucun Iri' Jam con Cristo pane ta na ca xirao' nucun Davi pane.

⁴⁵Je ca tomi' xuhu' ca' ac tococwa na. Taramaxicon ne non Cristo Davi cara pane. Cain' cain' xira quem? Ma' tara ca wina ac con quem ra na ca tomi' tococwa ma'.

22.44 Noro jein ca tomi' xo' nein pain macan' pain Mateus 20.30 pain ca xao pe ho' tocwa Iri' Jam pain iri' curucun. **22.45** Cristo co to' witan roron oro wari' ta ca Iri' Jam pane, winacon Davi paxi' na pain ca wari' nucun pane. Ane Taramaxicon ne pan con Davi ne, xi om ne ca Taramaxicon pan ara ca Cristo pain ca Iri' Jam nucun ta.

⁴⁶Hehe ac cocon na. Maho' pin ac cacain na ca tomi' querec ximama' cocon ma', xi hehe ara cocon ta.

Ca tomi' em' tococwa co ac ca iri'o' xi' ca' tara me nana

Marcos 12.38-39; Lucas 11.43-46; Lucas 20.45-46

23 Tomi' ac ca na Jeju, tomi' nonon oro wari', tomi' naparut pain ca taxipa' urut con quem. ²Ca' na ca tomi' caparut: Oro fariseu cocon oro co ca' na taxipa' nanain ca xirao' nucun Moisés ma', je i ma' ca taramaja nucucun. Ca' na taxipa' nanain ca xirao' nucun Moisés. Tomi' xo' paxi' nanain quem. ³Je ca na e' ne pain ca tomi' ha' hwein ca tomi' nucucun ma'. Ane om na ne pain ca an xiho' huhun pain ca ara nucucun ne, xi tomi' ha' pan cacain ca xirao' nucun Moisés ca ca' na caca ta. ⁴To' i'ina nonon oro wari' pain ca tama' tomi' ha' xut tomi' ha' xut paxi' cocon pain oro ca tomi' pan nucucun. Ac ca pao' pe cacain na iri' ca xite ne carawa ma', ac ca an tiquin' jein ta cocon na pain ca tama' tomi' ha' xut ximama' cocon ma'. Ane om quep xiho' cocon pain ca tomi' ha' wa ne, om ca an tiquin' xiho' camain' cocon pain. ⁵Xin to e' nana pain oro ca ara caca ma'. Win ne ca mam' xec xec cacain cote ne tapari carawa ca xirao' to cacain capijacon Iri' Jam ma', tucu ac cacain na pain jitaracocon pain taparacocon. Win ne ca oc xirac cocon cote ca tamacon womicocon ma' quem. Ma' ta querec pin' cacapari' oro wari' pain ca awi nexi' ca' nana pain oro ca ara nucucun pain ca howa xo' iri' xi' ma caca ma'. ⁶Param nanain ca xao to xo' wa cocon oro taramaxicon pain ca cao' querec te wi nucucun ma', param nanain ca xao to xo' wa cocon oro taramaxicon pain oro xirim ca cut in to xucucun ma' quem. ⁷Tomi' querec te xo' tatarapari' oro wari' co xao to to nanain ximijain cidade quem nana. In ac tatarapari' pain ca ca' na xuxun pain capijacon Iri' Jam ta nana quem.

⁸Wahu' iri na ne, pain ca taxipa' mahu' ma', om ca na ne pain ca in ac pan xujuhu' pain ca ca' na xujuhu' pain capijacon Iri' Jam. Xi ma' xica' pe ara ta' pain ca ca' na xuhu' ca'. In ac pan xine ta. An an ari xujuhu' pain ca xere xujuhu' quem. ⁹Om ca na ne pain ca te ximao hun wari' pain ca in ac ximao hun quem. Xi ma' xica' pe ara ca Cote hwe ta, Cotere' co pe pawin cwain. In ac pan jun ta. ¹⁰Om ca na ne pain ca taramaxicon ne xine huhun oro wari' quem. Xi ma' xica' pe ara ta' pain ca taramaxicon ne mahu' ca', pain ca Cristo ta' ca'. ¹¹Je ca tomi' xuhu' ca': Wari' co taramaxicon ina ta

ma' pahu', wirico tara co taramaja mi' nuhu' ta. ¹²Oro wari' co xec xec nana ma', pain ca hwara' opa ina xi' ma caca ma', to' wixipa' to' wixipa' xam' ac tococwa tara. Oro wari' co om xec xec nana ma' iri nana ne, pain ca om ca hwara' opa ta' ta caca ma', to' hwara' opa pin ac tococwa tara quem na ca tomi' caparut.

**Ca pan to' cain taraxicocon oro fariseu cocon oro co
ca' na taxipa' nanain ca xirao' nucun Moisés**

Marcos 12.40; Lucas 11.39-52; Lucas 20.47

¹³Tomi' ac tococwa na: Wa inuhu' me oro co ca' na taxipa' nanain ca xirao' nucun Moisés! Wa inuhu' quem oro fariseu! Ximin hwe ta. Ac ca iri'o' xi' ca' tara me hwe. Wap tamana turuhu' Iri' Jam ta. Xi to' i'ina ara huhun oro wari' pain ca ca' na pan teretem huhun pain capijacon ta. Ac ca narain ho' huhun na pain ca xin ne cocon Iri' Jam pain ca taramaxicon pe ho' xuhu' ta cocon ma'. Om pan na ca xin ne hun pain ca taramaxicon pe ho' xim cuhu' ma', narain ho' huhun pain ca xin ne cocon pain quem.

¹⁴Wa inuhu' me oro co ca' na taxipa' nanain ca xirao' nucun Moisés! Wa inuhu' quem oro fariseu! Ximin hwe ta. Ac ca iri'o' xi' ca' tara me hwe. Wap tamana turuhu' Iri' Jam ta. Xi mixein ara hwehwem oro narima' co cono' ca' nanam waram taxicacam ta, cut noc xa ac hwein na oro caramaxicacam quem. Cote ne ac ne na ca tomi' nuhu' pain ca tomi' hun Iri' Jam quem. Ma' ta awi nana xin caram ma' ne cacapari' oro wari' ta paxi' hwe. Ane om awi pan hwe ne. Je ca wap mip toton cuhu' Iri' Jam ta.

¹⁵Wa inuhu' me oro co ca' na taxipa' nanain ca xirao' nucun Moisés! Wa inuhu' quem oro fariseu! Ximin hwe ta. Ac ca iri'o' xi' ca' tara me hwe. Wap tamana turuhu' Iri' Jam ta. Jain jain paxi' huhun co om judeu nana ma', pain ca pijim' mama' hwein oro xijein macan' ma'. Pan horoho mama' hwein cote ne com, xuruxut mama' ac hwein na oro xijein macan' pain pira. Pijim' xuxun, ma' ta an xiho' cacapari' pain ca howa nexi' ca' hwe. Am ma' xica' pe ca co an xiho' napari', je i ma' ira, xica' pe ma' tarapari' ne, ac i ma' paxi' hwe pain ca jain jain huhun oro wari' pain oro pira. Ma' pin iri na wari' co an xiho' pin nuhu' ne, ara em' pin ac hun na, ac iri' panxica Caxicon Jam pin ac ca na pahu'. Pan tem tiquin' ca' ac cuhu' na pain ca pan teretem nuhu' quem. Wap tamana ac tocwa tara pain cote ne xe ta.

¹⁶Wa inuhu' me. Ximin hwe ta. Wap tamana turuhu' Iri' Jam ta. Xi taraju pa' hwein capijacon ta. Ac ca om ne na tucuhu' ma'. O toton paxi' huhun oro win ma' hwe, ane om pan ne tucuhu' ne. Ca' na ca pijim' huhun: Wari' co tomi' pe pin tain nain oro ca ara ta' ca ma', mo ta an hwet cain wixinain cote ne xiricon Iri' Jam pain ca tomi' nucun ma', hohot ac ne tara pain ca om ara cain ca tomi' pe pin nucun. Ane om ac i ma' ne pain ca an hwet cain wixinain ouro ca to nain cote ne xiricon Iri' Jam ne. Mo ta tomi' pe pin tain cain oro ca ara ta' ca, mo ta an hwet cain wixinain ouro ca to nain cote ne xiricon Iri' Jam quem, na e' na pain ca ara cain ca tomi' pe pin nucun ta, ac i ma' na ca pijim' nuhu' ma'. ¹⁷Om ca coromicat xo' camain' hwe! Ac ca om ne na tucuhu' ta. Awi paxi' na ouro ca to nain cote ne xiricon Iri' Jam ma', ane awi tamana pan ne cote ne xiricon ne. Awi tiquin' ca' nain ouro ca to nain, xi je ara ne ca in ac pe tocwa pain ta. ¹⁸Pijim' ca' hwe quem: Wari' co tomi' pe pin tain nain oro ca ara ta' ca ma', mo ta an hwet cain wixinain pana ca tom tain' pe cain carawa ma', hohot ac ne na pain ca om ara cain ca tomi' pe pin nucun. Ane om ac i ma' ne pain ca an hwet cain wixinain carawa ca tom tain' ca ne. Mo ta tomi' pe pin tain cain oro ca ara ta' ca, mo ta an hwet cain wixinain carawa ca tom tain' ca ma', na e' na pain ca ara cain ca tomi' pe pin nucun, ac i ma' na ca pijim' nuhu'. ¹⁹Om ca taraju pa' camain' hwe. Ac ca om ne na tucuhu' ta. Awi paxi' na carawa ca tom tain' mi' tocwa Iri' Jam ma', ane awi tamana pan ne pana ca tom tain' pe xine ne. Awi tiquin' ca' nain carawa ca tom tain' pe xine ma', xi om ne ca tom tain' pe ara xine pain panaxicon ta. ²⁰Je ca tomi' xuhu' ca' ac tococwa na. Wari' co an hwet nain wixinain pana ca tom tain' pe xine carawa pain ca tomi' pe pin cain carawa ca ara ta' ca ma', om ca an hwet xica' pe cain wixinain pana ca tom tain' pe cain carawa ma'. An hwet nain wixinain carawa ca tom tain' ca ma' quem. ²¹Ac i ma' na pain ca an hwet cain wixinain cote ne xiricon Iri' Jam quem. Wari' co an hwet nain wixinain cote ne xiricon Iri' Jam pain ca tomi' pe pin cain carawa ca ara ta' ca ma', om ca an hwet xica' pe cain wixinain xiricon Iri' Jam. An hwet nain wixicon Iri' Jam co pe ho' nain quem. ²²Ac i ma' na pain ca an hwet cain wixinain pawin quem. Wari' co an hwet nain wixinain pawin pain ca tomi' pe pin cain carawa ca ara ta' ca ma', om ca an hwet xica' pe cain wixinain pawin ca taramaxicon pe ca Iri' Jam. An hwet nain wixicon Iri' Jam co taramaxicon pe nain i cain

quem. Je ca tomi' xuhu' ca': Ca' na pan teretem hwein capijacon Iri' Jam ma' ira!

²³ Wa inuhu' me oro co ca' na taxipa' nanain ca xirao' nucun Moisés! Wa inuhu' quem oro fariseu! Ximin hwe ta. Ac ca iri'o' xi' ca' tara me hwe. Wap tamana turuhu' Iri' Jam ta. Mi' paxi' hun pain dízimo nuhu' Iri' Jam ma', ane mi' e' hun pain dízimo nein oro wijimain carawa nuhu' ne, mi' e' hun pain dízimo nein oro wijimain ca mam' aramao hwein carawa ma', je hortelã pain erva-doce pain cominho ma'. Mi' paxi' hun pain Iri' Jam ma', ane om tomi' ha' hwein iri' ca param nucun ca awi tiquin' ca' nain oro dízimo ne. Om ca xuruxut xo' hwe cocon oro win ma' hwe. Om ca xiram pa' huhun oro wari'. Om ca howa ac xihwe pain ca mixein nuhu' quem. Awi paxi' na pain ca mi' hun pain iri' dízimo nuhu' ma', ane om na ne pain ca miri'om hwein oro wirain ca tomi' nucun pain ca tomi' ha' jein ca param ne ta cuhu', je pain ca xuruxut xo' je cuhu', je pain ca xiram pa' jujun oro wari' ta cuhu' ne. Tomi' ha' xuhun quem. ²⁴ Om ca taraju pa' hwein capijacon Iri' Jam ta. Ac ca om ne na tucuhu' ma'. O toton paxi' huhun oro win ma' hwe ma', ane om pan ne tucuhu' ne. An xiho' hun wari' co pan an paxi' non wixicon tohoro' pain tocwa nucun ma', ane itac mapi' cain cote ne carawa pain ne.

²⁵ Wa inuhu' me oro co ca' na taxipa' nanain ca xirao' nucun Moisés! Wa inuhu' quem oro fariseu! Ximin hwe ta. Ac ca iri'o' xi' ca' tara me hwe. Wap tamana turuhu' Iri' Jam ta. Ac ca hohoc xo' hwein na too ca mam' cao' hwe ma', je ca mam' toc hwe ma' quem. Ac ca awi ne na xonein ma' pahu', ane mixem cara pan ne quimain ne. Ac i ma' pan hwe quem. Hohoc xo' paxi' hwein curuhu' ma', ane mixem cara ne xumuhu' ne. Param ximama' e' hwein oro caramaxicocon oro win ma' hwe, ara e' hwein oro ca param ximama' pan nuhu' quem. ²⁶ Om ca taraju pa' hwe ta oro fariseu. Ac ca om ne na tucuhu'. An to xo' cain' jein xumuhu' ma', awi iri'o' ac hwe tara pain oro ca ara nuhu'. Win ca wari' co hohoc cain' nain quimain ca mam' toc nucun pain ca mam' cao' nucun ma', awi ac ne na xonein ma' quem.

²⁷ Wa inuhu' me oro co ca' na taxipa' nanain ca xirao' nucun Moisés! Wa inuhu' quem oro fariseu! Ximin hwe ta. Ac ca iri'o' xi' ca' tara me hwe. Wap tamana turuhu' Iri' Jam ta. Xi an xiho' ara hwein manain pacun ca

23.23 Ac i ca' na wari' co mi' nain dízimo nein oro carawa ca cut ca ma'. Cut 100 iri nain oro caramaxicon ne, mi' 10 ac con pain na Iri' Jam. Cut 10 iri nain oro caramaxicon ne, mi' xica' pe ac con pain na quem.

cut corom to tococwa co cono' nana ta. Win ne ca toto towo' hwein xonein ma'. Ac ca awi ne paxi' na pain xonein pahu'. Ma' pain quimain ma' iri na ne, moin' nain aracocon co cono' nana. Moin' nain cojicocon quem. ²⁸ Ac i ma' hwe quem. Ac ca xuruxut xo' hwe e' na pain curuhu' ma', ane om ara xo' hwe pain iri' xumuhu' ne. Mija na ca pan teretem hwe pain ca ac ca iri'o' xi' ca' tara me hwe pain ca pan teretem nuhu' ta.

²⁹ Wa inuhu' me oro co ca' na taxipa' nanain ca xirao' nucun Moisés! Wa inuhu' quem oro fariseu! Ximin hwe ta. Ac ca iri'o' xi' ca' tara me hwe. Wap tamana turuhu' Iri' Jam ta. Xi ara xo' taxipa' ara hwein oro manain pacun ca cut corom to tococwa oro profeta cocon oro wari' co xuruxut xo' nana pain ca tomi' ha' taxipa' cocon Iri' Jam pane. Tama' ara awi cara hwein quem. ³⁰ Tomi' ximama' ac hwe na: Mo xi wara ma' urut pain cara pane, pain ca e' e' wet caca oro hwanana nuxut pain cara pane, om xi quep xiho' urut cocon pain ca to' parapa' pin cocon oro profeta pane, ac i ma' na ca tomi' ximama' nuhu' ma'. ³¹ Je ca tomi' xuhu' ca' ac tococwa na. Pain ca tomi' ac i ma' hwe ma', querec pin' ac xihwe na pain ca hwanana ne huhun co to' parapa' pin nonon oro profeta cara pane. An xiho' huhun pain ca pan teretem nucucun quem. ³² Je i ma' pahu', to' parapa' taxipa' nonon oro profeta hwanana nuhu' pane. Ac i ma' je pain xocori ca' quem, to' pa' pin xine quem, ara ara pi' pin jein ca ara nucucun oro hwanana nuhu' pain ca to' parapa' pin cocon oro profeta pane ta.

³³ Mija hwe xin ta ac tococwa na. An xiho' hun em' co huru caxi. Ma' na ca witan ca' ac hun Iri' Jam pain ca wixicaracao' mi' xim cuhu' pain cote ne xe ra? ³⁴ Ame hwe e', mam' xuhu' cocon oro profeta cocon oro co taraju pa' nanain capijacon. Mam' xuhu' cocon oro xucucun co ca' na taxi' nanain capijacon quem. Ma' ac caca tara co to' parapa' pin hwe pain ca tatatain mi' huhun pain pana. Quep em' to ac huhun tara oro xucucun pain oro xirim ca cut in to xucucun ma', wap ac huhun tara quem. Ja' tequi' quep em' ac huhun tara pain oro cidade ca to caca, ja' tequi' ac huhun tara pain oro xijein cidade ca jein mama' xi' caca quem. ³⁵ Je ca wap xim

23.27 Wari' co judeu pane, co xom nain pacun ca corom pe ne cojicon co mi' pin ma', em' pin ac ca na. Na e' na pain ca tacana pe ca. Om ca hwet ac tococwa oro win ma' ca, om ca corom mao ac cain xiricon Iri' Jam quem. Xijein semana pin iri na ne, hohot pin ac ne na pain ca hwet mami' xucucun, hohot pin ac ne na pain ca mao cain xiricon Iri' Jam. Pain Jerusalém pane, toto towo' taxipa' nanain xonein oro pacun ca cut corom to tococwa co cono' nana, ma' ta querec pin' pan cacain oro wari' pane, ma' ta om xom mapi' cacain quem nana.

cuhu' Iri' Jam ma', ame hwe e'. Wap turuhu', xi om ne ca an xiho' ara huhun oro hwanana nuhu' co to' parapa' pin nonon oro wari' co xuruxut xo' nana pane. Mija nana pane. Caim cara pane, to' pa' cain' non coxa' ca Abel cara pane, co xut xo' pane. Mao ac ne ma' na cocon oro hwanana, to' parapa' ho' to' parapa' ho' nonon co xuruxut xo' nana pane, aram aram to' pa' pin ac cocon na Zacarias panxica Baraquias cara pane, to' pa' pe nonon pain ca tao' caho' nein cote ne xiricon Iri' Jam pane. Pe in qui' na pana ca tom tain' pe xine carawa, pe in mao ac ne na xiricon Iri' Jam, ma' iri' ximijain, to' pa' pe ac cocon na Zacarias pane. ³⁶ Je ca tomi' xuhu' ca', tomi' iri'o' inuhu' ta ac tococwa na. Wap turuhu' Iri' Jam ta, wap turuhu' pain ca wari' nuhu' pain xocori ca'. Xi om ne ca pan teretem tamana ara caca oro hwanana nuhu' pane ta na ca tomi' tococwa pain ca pan to' cain taraxicocon.

**Ca tomi' xaxa' ca Jeju pain ca xiram pa'
cocon oro wari' co to nanain Jerusalém**

Lucas 13.34-35

³⁷ Tomi' xaxa' ina pahu' ac tococwa na oro wari' nein Jerusalém. Wahu' paxi' nana co to' parapa' nonon oro profeta pane. Wahu' paxi' nana co to' to' cono' pin nonon pain pacun oro wari' co mam' cuhu' Iri' Jam pane quem. Ane xiram pa' xuhu' ne. Om ca noc camain' xuhu'. Tama' cut in xuxuhu' na paxi' inuhu'. Tama' querec wet xuxuhu' na paxi' inuhu'. Win con jicon me pain ca cut corom to con oro wixicon pain tapaxicon ma', ac i ma' xuhu' paxi' inuhu' ta. Ane noc mahu' ne. ³⁸ Paca' pin turuhu' Iri' Jam ta, paca' pin tarain cote ne xiricon ca' pahu'. Om ta pe mami' cain. ³⁹ Om ta querec mami' mahu' quem, tomi' iri'o' inuhu'. Ame hwe e', main maqui' tara xec nein ca tomi' ca' xim mahu': Tomi' querec te xun co ma' co mam' maqui' nain ca hwará' opa nucun Iri' Jam ta, ac i ma' tara ca tomi' xim mahu'. Je i ma' tara xec nein ca querec mami' xim mahu' ta na ca tomi' tococwa oro wari' nein Jerusalém pane.

Oro ca hwet pa' ton nonon oro wari' pain ca aram aram in qui' ta' ca Jeju

Marcos 13.1-31; Lucas 21.5-37

24 Maji ta ac caparut na Jeju, mama' ac urut na. Hwrehwet ca' xin iri urut pain ca tao' caho' nein cote ne xiricon Iri' Jam ma' ne, xuruxut hwet ac urut con na pain ca taxipa' urut con ca'. Noro rain xiricon Iri' Jam pain oro quirinain ca'. Awi na xin ne urut con.

²In ac hwein oro xirim ca' ra ac caparut na. Ame hwe e', main maqui' tara xec nein ca to' pa horohot pi' pin xin xine oro xirim ca'. Om ta to wet xica' pe camain' ne oro pacun nein. To' pa horohot pi' pin ac xine tara ta. Tomi' iri'o' inuhu' ta na ca tomi' caparut ma'.

³Mama' ac urut na pain Pacun Nein Oliveira ma'. Xao pe ac ca na Jeju. Xuruxut hwet ac urut con na. Xica' to urut, wirico Jeju, warut pain ca taxipa' urut con ca' quem. Tomi' querec ac urut con na: Ma' xec ca hwet pin ta' ne oro ca tomi' ma ca' ne? Cain' xi querec pin' ac urut pain ca wixicam pin ne xec nein ca in qui' ta' nem je pain ca pi' pin ta' ne macan' ca' quem na ca tomi' querec urut con ma'.

⁴Om na, ma' tara xumuhu' me ac caparut na. Ta howa huhun oro wari' co mixein xim nunuhu' pain oro carawa ca maqui' ta' ma' me. ⁵Xi mija xi' ara caca oro wari' co wata' ta nana pain ca an hwet cacain wuxu ca'. Wata' co Cristo tatara, mixein ac tococwa tara oro wari'. Mija tatara wari' co howa nonon quem. ⁶Taraju ac huhun tara oro wari' pain ca to' parapa' caracan xucucun pain macarahu' ca', je pain ca to' parapa' xucucun pain oro xijein macan' pain pira quem. Je i ma' ira, ta jin' hwe pain me. Na e' na pain ca mixein ac i ma' tococwa oro wari', je pain ca mana' caracan ac i ma' xucucun ma' quem, je curucucun mao tara. Ane om pi' pin hap ta' ne macan' ne, ame hwe e'. ⁷To' parapa' caracan ac xucucun tara oro wari', oro taramaxicon nucucun ma' quem, mana' caracan ac xucucun tara. Jain jain tamana tatara oro wari' pain oro xijein macan'. Om pin tara oro carawa ca cao' wa. Cocoroc tamana tara macan'. ⁸Oro ca jain jain nucucun oro wari' pain ca xo' hwet pa' cocon oro ca xirac wa ma', an xiho' tarain ca caxi nequem narima' pain ca xo' caxi cam cawinacam ma', ac i ma' tara cocon oro wari' quem. Ame hwe e', main jain jain tamana tatara ta.

⁹Noc ac cucuhu' tara oro wari' pain oro xijein macan'. Quep ac cucuhu' tara, cut mi' ac cucuhu' tara cocon oro taramaxicon. Ma' ta quep em' xihwe, ma' ta to' parapa' pin xihwe ta tuturuhu'. Noc noc pi' pin tuturuhu',

xi om ne ca howa ara mahu' ta. ¹⁰Aram aram mija pin ac caca tara co an to pin nanapa'. Howa howa om pin tatarapa'. Noc ac xucucun tara, tomi' mi' caracan ac xucucun tara cocon oro taramaxicon. ¹¹Mija tatara oro wari' co profeta urut ximama' nana quem. Pijim' mixein ac caca tara, mija tatara wari' co pijim' mixein caca. ¹²Pan teretem tamana ac caca tara oro wari' pain oro xijein macan'. Mija tatara. Je ca tomi' querec te tomi' querec te om xun cocon oro win ma' caca ma'. ¹³Wari' co howa cara napá' ma' iri na ne, pain ca howa howa pi' pin pa' cain oro ca quep em' wa ma', wirico tara co to' witan wa ta. ¹⁴Pijim' mama' ac cacain tara oro xijein macan' oro wari' ne quem. Tomi' hwet tomi' hwet xam' ac cocon tara oro wari' pain capijacon Iri' Jam ma', pain ca tomi' xo' cocon pain ca taramaxicon pin ta' ca Iri' Jam ma'. Taraju taraju xam' iri tatara oro wari' ne, pi' pin ac ne tara macan' ta.

¹⁵Je ca tomi' xuhu' ca' ac caparut na. Main xat pe tarain cote ne xiricon Iri' Jam caji pacun ca Iri' Jam xi' ma ca. To' em' pin tarain cote ne xiricon Iri' Jam. Wara xirao' pe nain profeta Daniel cara pane. (Wahu' pain ca noro hwein ca xirao' ne ca', taraju pa' je ta.) Querec iri jein ne, ¹⁶jein ca' ac hwein tara. Wahu' pain ca to hwein oro cidade pain Judeia ma', jein mama' ac hwein tara oro pacun. ¹⁷Wari' co hwet pe ca' nain xiricon ma', mo mao hap ac ca tara. Om ta na ne pain ca corom in mao cain xiricon pain ca cut tain cain caramaxicon. Mo mao hap e' tara ta. ¹⁸Wari' co pe nain totacon ma' quem, om ta na ne pain ca in mao cain xiricon pain ca cut ton con oro womicon. Mo mao hap e' tara ta. ¹⁹Oro narima' co nam' nana pain oro xec nein ca jein mama' xi' cacama ma', wiricacam co ma' nanam wixicacam hwijima' ma' quem, jain jain tamana tatara. I'ina tamana tataram pain ca jein mama' wa. ²⁰⁻²¹Mija tara ca jain jain caca oro wari' pain oro xec nein ca jein mama' xi' caca. Om ca wara querec camain' xine ca jain jain wa ca an xiho' nain pane, pain ca xo' ma' ten qui' ne macan' con Iri' Jam pane, je win jain jain tamana xi' caca oro wari'. Om ta jain jain ac i ma' mami' caca quem. Je ca tomi' xuhu' ca': Tomi' mi' xujuhu' con Iri' Jam ta, tomi' ca' jun: Xiram pa' xut ta Iri' Jam. Mi' xut

24.15 Ma' na iri' caxicon taramaxicon nucucun tatirim pain cara pane, pain ca om maqui' querec ca Jeju pane. To' em' pin nain cote ne xiricon Iri' Jam pane, xi om ne ca quep ara cain caji pacun ca Iri' Jam xi' ma ca, an xat pe ac cain na pain tequipain xiricon Iri' Jam. Wirico co xirao' pe ca Daniel pane. Wara pain paxi' na caxicon taramaxicon pane, ane maqui' ta' ca xucun co an xiho' non ne na Jeju quem. Je ca tomi' tococwa co taxipa' ca ma'. **24.15** Am wirico Mateus ca co tomi' nain i ca'. Ac ca om tomi' pan cain na Jeju.

pain ca awi ne xec pain ca jein mama' xi' urut quem. Om tara pain oro xec ca xio tamana ta, om tara pain sábadu quem, ac i ma' tara ca tomi' mi' xujuhu' con Iri' Jam. ²² Mo xi om to' wijimain pin cain oro xec nein ca jain jain nucucun oro wari' Iri' Jam ma', om xi witan camain' caca. Ane to' wijimain pin tain cain ne. Xi ma' ara caca oro wari' nucun co tora' ca ma'.

²³⁻²⁴ Ma' tataru wari' co tomi' mixein ca' xi' nana: Wata' co Cristo ta tataru. Ca' ac caca tara oro xucucun ma' quem: Wata' co profeta ta tataru pain ca tomi' mixein nucucun. Mixein xuxun oro wari' cwa' tataru, am ha' capari' pain ca mixein xuxun oro wari' co tora' ca Iri' Jam cwa' quem tataru, ara ara ac cacain tara oro ca om ara taxi' ne ca wari' wa ma', wa wa ac cocon tara oro wari'. Je ca tomi' xuhu' ca' ac caparut na. Mo ta tomi' ximama' ca' cucuhu' wari' ma': Noro je, mon cwa' Cristo cwa', mo ta tomi' ac i ma' cucuhu'. Mo ta tomi' ca' cucuhu' quem: Mon cwain Cristo cwain, mo ta tomi' ximama' ac i ma' cucuhu', ta howa huhun me ta. ²⁵ Ma' tara xumuhu' me. Wara tomi' xo' inuhu' pain ca om hwet querec cuhu', wara tomi' hwet pi' pin inuhu' pain oro carawa ca hwet pa' xim nuhu' ta.

²⁶ Je ca tomi' xuhu' ca', mo ta tomi' ca' cucuhu': Noro je. Mon cwain, co pe mahweri cwain, mo ta tomi' ac i ma' cucuhu', ta jein hwet hun me ta. Mo ta tomi' ca' cucuhu' quem: Noro jun. Corom pe nain xirim ca', mo ta tomi' ac i ma' cucuhu' quem, ta howa huhun me ta. ²⁷ In qui' ta' iri ta' pain ca Iri' Wari' ta' ca' ne, ane ane maqui' ac ta' tara, querec querec xam' tatarapa' oro wari' pain oro xijein macan'. Win ne ca ane ane coc wein ca comerem ma', pain ca coc wein qui' cain pira pain quirinain pawin cain, ca coc wein mao ac cain na xijein quirinain pawin cain quem, ac i ma' ta' pain ca maqui' hap ne ta. Querec querec xam' tatarapa' oro wari' ta. ²⁸ Win ne pain ca mi' pin pe nein mahweri carawa ma', taxi' taxi' pi' pin nanain oro wari'. Xi om ne ca cut in cut in ara xucun maho ta. Ac i ma' tara pain ca in qui' ta' ne quem. Hwet pin iri tara oro ca tomi' ne ca' ne, taxi' taxi' pi' pin ac cacapa' tara oro wari' pain ca wixicam pin ne ca in qui' ta' ne ta.

²⁹ Pain oro xec ma', pain ca win pi' pin ne ca jain jain tamana nucucun oro wari' ma', mixem pin tara tocon xina. Toha toha om pin tara panawo'. Camara' qui' tarain pawin oro pijo'. Cocoroc cocoroc pi' pin tara oro coximain pawin quem. ³⁰ Hwet qui' ac nein pawin tara i ma' ma', ca to' querec pin' tococwa oro wari' pain ca maqui' ta' ne ca'. Wata' pain ca Iri' Wari' ta' ca', maqui' ac ta' tara. Mam' maqui' tain ca hwara' opa ne pain ca toc meremem tamana ne. Oro wari' pain oro xijein macan' ma', awaran

awaran xam' ac caca tara pain ca querec cacapa' pain ca maqui' ta' pain tajain nanawin. ³¹ On mip ac ne tara caji taracom. Tomi' ac toton tara oro jam co taramaja mi' nanapa' ma'. Mama' jein oro xijein macan', cut in cut in xam' jujun oro wari' co tora' ca Iri' Jam ta, cut in qui' jujun pain oro xijein macan' pain pira ta, ac i ma' tara ca tomi' toton ta.

³² Noro jein panaji figo ma' ac caparut na. Xi to' querec pin' ara capari' pain i ca' ta. Taraju pa' jein ta. Hwerekwet pin iri na xocori tarajain tenenein ne, taxi' pin ac hwein na ca wixicam pin ne oro xec pain ca xain toto ca xina. ³³ Ac i ma' tara pain ca in qui' ta' ne quem. Querec iri jein ca hwet pin ne oro ca tomi' hwet xuhu' ca' ne, taxi' ac hwein tara ca wixicam pin ne xec pain ca in qui' ta' ne. Om ta pira mami' ne. ³⁴ Om ta cono' cono' pi' pin querec caca oro wari' co e' e' wet nana pain xocori ca', hwet pa' ac cocon tara oro ca tomi' hwet xuhu' ca'. Tomi' iri'o' inuhu' ta. ³⁵ Main om pin tara pawin pain macan' ca'. Oro ca tomi' ne ca' iri na ne, om ta pan' ara'am camain' ne ta. To wet cara tara ta na ca tomi' caparut ma'.

Ca om taxi' xine xec nein ca in qui' ta' ca Jeju

Marcos 13.32-37; Lucas 17.20-37

³⁶ Om na wari' co taxi' nain iri' xec nein ca in qui' ta' ne ta ac caparut na. Om ca taxi' cacain oro jam co to nanain pawin, om ca taxi' tain quem. Xica' pe na Te co taxi' nain ta. ³⁷ Ac pain oro xec nein ca e' e' wet ca Noé cara pane tara, ac i ma' tara pain ca in qui' ta' ne ca', pain ca Iri' Wari' ta' ca'. ³⁸ Pain ca om we' querec ne com pain cote ne xowi' pain cara pane, ara e' nanain oro ca ara taxipa' caca oro wari' pane. Co cao' nana, co toc nana, co cut nana narima', co cut nana tarama' pain ca narima' nequequem ma' quem, ara e' nanain ca param nequequem. Ac i ma' ac i ma' nana, om om maqui' pa' ac cocon na xec nein ca corom cain mam' horoho wa Noé cacam oro ca nari nucun pane. ³⁹ Co hwerekwet to nana pane, om ca taxi' cacain ca we' pa' xun cocon com. Om ta cono' iri' nana. Ane cono'

24.34 Ca tomi' nucun Jeju ca', pain ca main hwet pa' toton oro ca tomi' hwet xuhu' ca' ca ma', tomi' mi' nain ca to' pa horohot pin xin xine cote ne xiricon Iri' Jam pain Jerusalém. Iri'o' na ca tomi' nucun quem. Oro wari' co e' e' wet nana pain ca xo' tomi' ac i ma' ca pane, ma' nana co e' e' wet nana pain ca pa horohot pin xine cote ne xiricon Iri' Jam pane. Om ca cono' querec caca pane.

pin caca ne. Aram aram we' pa' pin nonon com, cono' cono' pi' pin ac caca na. Ac i ma' tara pain ca in qui' ta' ne quem, pain ca Iri' Wari' ta' ca'.

⁴⁰Maqui' ta' iri tara xec nein ca in qui' ta' ne ne, am ma' 2 caca wari' co taramaja to nanain xitot. An mao ac tocwa tara xucun, an pe pin ac tocwa tara xucun. ⁴¹Am ma' 2 cacama oro narima' co ep nana quem. An mao ac tacama tara xequem, an pe pin ac tacama tara xequem quem. ⁴²Je ca tomi' xuhu' ca' ac caparut na. Ma' tara xumuhu' pain ca winim' xo' mahu' me. Xi taxi' hwein xec nein ca in qui' ta' ne ta. ⁴³Mam' pe wet jein carawa ca ara non waximain xirim co wara cut noc xa ca' wa pain caramaxicon ma'. Mo xi taxi' tocwa caxicon wari' co cut noc xa ma', mo xi taxi' cain iri' hora nein xim pain ca maqui' ta' nucun quem, querec wet ac cain xira xiricon. Nain ho' ac cain xira pain ca joc pa hot xine quem. ⁴⁴Je ca tomi' xuhu' ca' ac caparut na. Na e' na pain ca awori xo' hwe pain ca winim' xim mahu' ma'. Xi in qui' ho' ta' ara ta' ta. Wata' pain ca Iri' Wari' ta' ca', in qui' ho' ta'. Om ca taxi' hwein hora nein ca in qui' ta' ne quem na ca tomi' caparut ma'.

⁴⁵Na e' na pain ca an xiho' hun wari' co taramaja xo' ma', co coromicat xo' pain ca taramaja mi' xo' con taramaxicon nucun ta ac caparut na. Mao tain pira iri na taramaxicon nucun ne, tomi' mam' ac con na: Querec wet roron oro win ma' ma co taramaja mi' e' nanapa' cwa', querec wet xo' roron pa'ao'. Mi' xo' roron pain carawa ca cao' wa quem na ca tomi' mam' con ma'. ⁴⁶Mo ta in qui' ca taramaxicon nucun ma', mo ta querec pin' con pain ca querec wet xo' cocon oro win taramaja ca ma', tomi' querec te ac con tara, hohot tamana mapa' pain ca taramaja xo' mi' mapa' ca' ac con tara. ⁴⁷Tomi' ac con tara: Mi' xim inem pain ca querec wet querec wet pi' pin main oro caramaju ca', ac i ma' tara ca tomi' con taramaxicon nucun. Tomi' iri'o' inuhu' ta. ⁴⁸Ane om ac i ma' ne pain ca om tomi' ha' ta' nucun ne. Am caxicon wari' ca, am om taramaja xo' ca, am coromicat ca' ca: Om om na taramaxicon ne cara ne, om ta in hap ca ma' toron pain ca coromicat nucun. ⁴⁹Am wap ximao cocon oro win taramaja ca ma', am miri'om cain ca taramaja nucun pain ca waraju wi xijexi' cocon co toc tamanain to nanain caji tocwa ca mana' ma' quem. ⁵⁰Ame hwe e', main maqui' pa' toron taramaxicon nucun pain xec nein ca om winim' pan con ma'. Maqui' pa' toron pain iri' hora nein ca om winim' xo' camain' con ma'. ⁵¹Wap tamana ac tocwa tara, mao rain ca to pan caca oro wari' co ac ca iri'o' xi' ca' tara me nana ma' ac tocwa tara quem. Oro wari' co jain

jain to nanain i cain, awaran tamana ac caca tara, cacacao' ac cacain tara xicocon pain ca jain jain tamana nucucun na ca tomi' caparut pane.

Ca pijim' joc mam' mi' caparut cacam oro mon xojam' Jeju

25 Tomi' ac caparut na: Carawa ca ara ta' ne pain ca in qui' ta' ta' ca', pain ca taramaxicon pin ta' ta' ca', an xiho' tarain carawa ca ara nanam oro mon xojam' co winim' xun nonon wari' co an ta' narima' ma'. Ma' 10 nana oro mon xojam' co winim' xun nonon. Cut nanain naran nequequem, maji xuruxut cam' xun e' ac cacama na. ²Oro mon xojam' ma', ma' 5 nana co om coromicat xo' nana, ma' 5 ac cacama na co coromicat xo' nana quem. ³Co om coromicat xo' nana ma', cut paxi' nanain naran nequequem, ane om ji'ao xo' mam' cacamain xijein comi naran ma' ne. ⁴Co coromicat xo' nana ma' iri nana ne, cut nanain naran nequequem, cut nanain xijein too ca wara ji'ao pe cacamain comi naran ma' quem. ⁵Om om ac ca na co an ta' narima' ma' quem. Om ca maqui' hap ca. Je ca in pin ne matacacam ma', pi'am pi'am pi' pin ac cacama na.

⁶Ximijain xim pin iri na ne, merem ac ca na wari': Maqui' na co an ta' narima' ma'! Harahap je, xuruxut cam' jun e' ac ne na ca merem nucun.

⁷Tequi' to ac cacama na oro mon xojam' ma'. Ara xo' ac cacamain na naran nequequem. ⁸Tomi' ac cacama na co om coromicat xo' nana ma': Ji'ao wijimain mi' xut pain comi naran nuhu' ma', xi jo' pin ta' ara ne naran nuxut ta nanam co coromicat xo' nana ma'.

⁹Om na ta ac tacacama na. Comi naran ca ma' naparut ca', om ca xam' pi' pin ac capari' pain oro naran nexi'. Mo ta ji'ao wijimain mi' xut pahu' pain, pe ho' wijimain pin e' ac caparut tara. Mo ta param hwein comi naran, mo cam je ta ac tacacama na.

¹⁰Na ra ac cacama na, maji cam xi e', mama' ac cacama na. Om ca in querec cacama, maqui' ac ca na co ma' co an ta' narima' ma'. Caram ma' co coromicat xo' nana ma', co wara awori naran nequequem ma', corom wi ac cocon na co an ta' narima' ma', corom mama' ac cacamain na xirim ca tomi' querec te wi to xi' cacama ma'. Tao' pa' pin ac xine na manain xirim.

¹¹Om ca pain homa ne, in qui' ac cacama na co om coromicat xo' nana ma'. Merem ac cacama na: Taramaxicon nuxut. Taramaxicon nuxut. Pa xut. Corom xi' urut na ca merem nequequem.

¹²Om ca querec pin' xuhu' ta ac ca na co an ta' narima' ma'. Tomi' iri'o' inuhu', om ca querec pin' xuhu' ta tata na ca pijim' caparut Jeju.

¹³Je ca tomi' xuhu' ca' ac caparut na. Ma' tara xumuhu' pain ca winim' xo' mahu' me. Xi taxi' hwein xec nein ca in qui' ta' ne ta. Om ca taxi' camain' hwein hora nein ca in qui' ne quem na ca tomi' caparut.

Ca pijim' joc mam' mi' tococwa con taramaxicon pain ca in qui' nucun

Lucas 19.11-27

¹⁴Tomi' ac caparut na: Carawa ca ara ta' ne pain ca in qui' ta' ta' ca', an xiho' tarain carawa ca ara nonon wari' co taramaja mi' e' nonon taramaxicon nucucun. Taramaxicon nucucun ma', mao tain pira ac ca na, tomi' cut in mam' ac tococwa na co taramaja mi' e' nonon ma', cut mi' ac tococwa na pain dinheiro nucun. Tomi' xo' ac tococwa na: Main ca' dinheiro ne ca'. Querec wet xo' jein pa'ao' me. Taramaja xo' jein pa'ao' quem, ma' ta hwara' pin ne pahu' ta tata. ¹⁵Mi' mi' xam' ac tococwa na pain moeda nein prata. Ma' 5 na moeda ca mi' con co taramaja taxi' nain ma', ma' 2 ac ne na ca mi' con xucun co taramaja taxi' pije' nain ma', ma' xica' pe e' ac ne na ca mi' con xucun co om taramaja taxi' homa nain ma' quem. Mi' mi' xam' pin iri tata pain ne, mao ac cain na pira.

¹⁶Co cut 5 nain moeda nein prata ma', mao hap ac ca na, cut tamana ac cain na oro carawa, vender tiquin' ac cain na, aram aram moin' pin ac ne na con, cut 5 mami' ac cain na moeda nein prata. ¹⁷Ac i ma' na co cut 2 nain ma' quem. Cut nain oro carawa, vender tiquin' ac cain na, aram aram moin' pin ac ne na con, cut 2 mami' ac cain na quem. ¹⁸Co an xica' pe e' nain iri na ne, mao ac ca na, xe' ac cain na wijimain man pain macan', tequi' pa' noc xa ac cain na dinheiro nucun taramaxicon nucun.

¹⁹Pain pain, aram aram in qui' ac ca na taramaxicon nucucun. Tomi' querec ac tococwa na: Ma' carawa ca ara hwe pain dinheiro ne cara pane quem tata.

²⁰Co cut 5 nain moeda nein prata pane, xut hwet ac con na, cut mi' ac con na pain oro xijein moeda nein prata ca cut mami' ca ma'. Noro

25.15 Iri' cote ne dinheiro na ca xica' pe nein moeda nein prata ma'. Talento na wixinain pain Português. Wari' co taramaja mi' non xucun wari' ma', mo xi ma' 15 ne cawaxi' pain ca momon taramaja mi' con pain oro xijein xec ma', an xica' pe ac cain xira moeda nein prata.

ra taramaxicon ac con na. Cut mi' 5 mapa' pain moeda nein prata pane ira. Mam' taramaja ac tain na, cut 5 mami' ac tain na quem na ca tomi' con ma'.

²¹ Awi na ta ac con na. Awi na ca taramaja nem, taramaja xo' ma ma' ira. Mam' taramaja xo' main wijimain dinheiro ne cara pane. Je ca mi' hwara' mami' xim xim pain, ma' ta mam' taramaja xo' mami' main quem. Maji tomi' querec te wi xi' e' ac con na.

²² Co cut 2 nain moeda nein prata pane, xut hwet ac con na quem. Noro ra taramaxicon ac con na. Cut mi' 2 mapa' pain moeda nein prata pane ira. Mam' taramaja ac tain na, cut 2 mami' ac tain na quem na ca tomi' con ma'.

²³ Awi na ta ac con na. Awi na ca taramaja nem, taramaja xo' ma ma' ira. Mam' taramaja xo' main wijimain dinheiro ne cara pane. Je ca mi' hwara' mami' xim xim pain, ma' ta mam' taramaja xo' mami' main quem. Maji tomi' querec te wi xi' e' ac con na quem.

²⁴ Xut hwet ac con na co an xica' pe e' nain moeda nein prata. Tomi' ac con na: Taxi' inem pain ca om xiram pa' taxi' momon oro wari' ta taramaxicon. An xiho' mon wari' co cut taxipa' nain oro memem ca om oin' ca ma'. An xiho' mon wari' co top nain caramaji totacon xucun wari' ma' quem na ca tomi' ximao nucun. ²⁵ Je ca jin' xim ca' ac con na. Coromicat ac xije na: Mo ta pan' am ca' capa' dinheiro nucun taramaxicon ne ca', mana' ac capa' tara, ac i ma' na ca coromicat ne pum. Je ca tequi' pa' pin tain dinheiro nem pain macan'. Noro ra, main ca' dinheiro nem ca' na ca tomi' con ma'.

²⁶ Caxicon pije' co jam' cwerein ta ac con na taramaxicon nucun. Taxi' mapa' pain ca an xiho' ton wari' co cut taxipa' nain oro memem ca om oin' ca ma'. Taxi' mapa' pain ca an xiho' ton wari' co top nain caramaji totacon xucun wari' quem. ²⁷ Je xi an pe xo' main dinheiro ne pain banco quem, taramaja xo' ac cacain xira co taramaja taxi' nanain dinheiro. In qui' iri xita' ne, cut mi' ac cacapa' pain xira wara jaminain je xocori ca cut mami' caca pain ca mam' taramaja cacain quem na pain ca pan to' cain taraxicon.

²⁸ Tomi' ac tococwa na xucucun co taramaja mi' e' nonon ma'. An ca' jun pain moeda nein prata ma', mi' ac hun tara pain co ma' 10 non ma' quem. ²⁹ Wari' co taramaja xo' ma', co win xumu nain ca taramaja nucun ca mi' ton ca', mi' hwara' mami' ac ton tara pain ca taramaja wa. Mija tara

ca taramaja wa ca mi' ton. Wari' co om taramaja xo' ma' iri na ne, co om win xumu nain ca taramaja nucun ca mi' ton ca', an ca' ac ton pain tara wijimain ca taramaja nucun ta na ca tomi' ca ma'.

³⁰ Tomi' ac tococwa na oro xucucun co taramaja mi' e' nonon ma'. Co cwa' co jam' curucun cwa', pain ca noc cain ca taramaja wa ca', xin mi' jun pain ca jitacat tamana nein cain. Oro wari' co jain jain to nanain i cain, awaran tamana ac caca tara, cacacao' ac cacain tara xicocon pain ca jain jain tamana nucucun ta. Ac i ma' na cocon oro wari' co taramaja mi' e' nonon taramaxicon nucucun ma' na ca pijim' caparut Jeju pane.

**Xec nein ca tomi' xo' toton oro wari' pain oro carawa ca ara
caca pain ca e' e' wet nucucun ta na Iri' Jam**

³¹ Wata' pain ca Iri' Wari' ta' ca', in qui' ta' ina ta ac caparut na. Mam' maqui' ta' pain ca hwara' opa ne. Maqui' wi ta' cocon oro jam co taramaja mi' nanapa' quem. Maqui' ta' iri ta' ne, xao pe ac tain tara iri' ca mam' xao pe nucun taramaxicon, iri' taramaxicon pin ac ta' tara ta. ³² Tomi' cut in ac tococwa tara oro wari' pain oro xijein macan'. Coco' quima hwet ac cacapa' tara, cut to ni ac toton tara co xuruxut xo' nana, cut to ni ac toton tara co om xuruxut xo' nana quem. Win ca wari' co querec wet taxipa' nain ovelha ma', co cut to ni ca' nain ovelha nucun pain bode nucun ma'. ³³ Oro wari' co xuruxut xo' nana ma', cut to ni ac toton tara pain iri' cwere. Oro wari' co om xuruxut xo' nana ma' iri na ne, cut to ni ac toton tara pain paraju quem. Win ca wari' co querec wet taxipa' nain oro winacon ma' quem. Cut to ni ca' na pain iri' curucun ovelha nucun, cut to ni ca' ac ca na pain paraxicon bode nucun ma' quem. Ac i ma' toton oro wari' co xuruxut xo' nana ma'. Ac i ma' toton oro wari' co om xuruxut xo' nana ma' quem.

³⁴ Tomi' ac toton tara co to nanain iri' cwere ma', co xuruxut xo' nana ma'. Wahu' pain ca param mi' cuhu' pain ca awi wa Te ma', harahap je. To ho' cara xine, taramaxicon pe ho' ac xuhu' tara. Wara coromicat an pe xo' nain i ma' Te pahu' pain cara pane, pain ca xo' ma' ten qui' xine macan' pane. ³⁵ To ho' cara xine inuhu', xi om ne ca xiram pa' ara mahu' pane toton. Om iri napa' carawa ca cao' wa pane ne, mi' ac mahu' pain na. Toc xita' com na ina me iri ina pane ne, cam mi' ac mahu' pain na quem. Tatirim paxi' ina pane, ane hap ra mahu' ne, corom hwet ac xuhu' na pain

xuruhu' pane toton. ³⁶Om iri napa' wom co pe ta' pane ne, mi' ac mahu' con na, pe ron co cwa' ta ac mahu' na. Caxi iri ina pane ne, querec wet ac mahu' na. Tao' pe iri nanapa' pain xirinain ca tao' to tao' to to wa pane ne, xiram pa' ac mahu' na, mo querec ac mahu' na quem. Ac i ma' tara ca tomi' toton co xuruxut xo' nana ma'.

³⁷Tomi' querec ac cacapa' tara co xuruxut xo' nana ma'. Cain' cain' xira quem Taramaxicon nuxut tatarapa'. Ma' xec ca querec urut pum pain ca pe' nem pane quem, pain ca mi' urut pum pain carawa ca cao' wa quem tatarapa'. Ma' xec ca querec urut pum pain ca toc xita' com na ma pane quem, pain ca cam mi' urut pum pain com pane quem tatarapa'. ³⁸Ma' xec ca querec urut pum pain ca tatirim ma pane, pain ca hap ra urut pum pain ca corom hwet maparut pain xuruxut quem? Ma' xec ca querec urut pum pain ca om quem wom co pe wa pane quem? Ma' xec ca mi' urut pum con wom pane quem tatarapa'. ³⁹Ma' xec ca mo querec urut pum pain ca caxi nem pane quem? Ma' xec ca mo querec urut pum pain ca tao' pe pin quem pain xirinain ca tao' to tao' to to wa pane quem? Ma' xec ca xiram pa' urut pum pain ca mo querec xun e' urut pum pane quem? Ac i ma' tara ca tomi' querec cacapa'.

⁴⁰Wata' pain ca Taramaxicon ta' ca', tomi' ac toton tara: Quep xiho' iri huhun oro wari' co howa nanapa' pane ne, co xere ta' pane, co om hwara' opa camain' nana pane, wata' pan ac ne na co quep xiho' hwe pane. Tomi' iri'o' inuhu' ta, ac i ma' tara ca tomi' toton ta.

⁴¹Tomi' ac toton tara co to nanain paraju quem, co om xuruxut xo' nana quem: Wahu' pain ca tomi' noro cuhu' Te ma', to ni ca' xine. Mama' jein cote ne xe ca om jo' ra ha' cain, ca wara quep awori mi' tocwa pain Caxicon Jam cocon oro jam nucun co taramaja mi' nonon cwain. ⁴²Xi xiram pa' mahu' pane ta. Om ca mi' mahu' pain carawa ca cao' wa pain ca cao' xita' na ina me ta' pane. Om ca cam mi' mahu' pain com pain ca toc xita' na ina me ta' pane. ⁴³Om ca hap ra, corom hwet xut me mahu' pain ca tatirim ta' pane. Om ca mi' mahu' con wom pain ca om capa' wom co pe ta' pane. Om ca querec wet mahu' pain ca caxi ta' pane, je pain ca tao' pe cacapa' pain xirinain ca tao' to tao' to to wa pane. Ac i ma' tara ca tomi' toton ta.

⁴⁴Tomi' querec ac cacapa' tara: Cain' cain' xira quem Taramaxicon nuxut ac cacapa' tara. Ma' xec ca querec urut pum pain ca pe' nem pane quem? Ma' xec ca querec urut pum pain ca toc xita' com na ma pane

quem? Ma' xec ca querec urut pum pain ca tatirim ma pane quem? Ma' xec ca querec urut pum pain ca om quem wom co pe wa pane quem? Ma' xec ca querec urut pum pain ca caxi nem pane quem? Ma' xec ca querec urut pum pain ca tao' pe pin quequem pain xirinain ca tao' to tao' to to wa pane quem? Ma' xec ca om quep xihó' urut pum pane quem? Ac i ma' tara ca tomi' querec cacapa'.

⁴⁵ Tomi' ac toton tara: Om iri na ca quep xihó' huhun oro wari' co howa nanapa' ne, co om hwara' opa camain' nana pane, wata' ac ne na co om quep xihó' hwe pane quem. Tomi' iri'o' inuhu' ta, ac i ma' tara ca tomi' toton ta.

⁴⁶ Je ca tomi' xuhu' ca' ac caparut na. Oro wari' co om xuruxut xo' nana ma', mama' ac cacain' tara ca wap to xun tococwa. Om ta pi' ra ha' ne ca wap cara tococwa ta. Oro wari' co xuruxut xo' nana ma' iri na ne, mama' ac cacain' tara ca e' cara to xi' caca quem. Om ta pi' ra ha' ne ca e' cara nucucun ta na ca tomi' caparut pane.

Ca tomi' xo' xucucun pain ca to' pa' pin xun cocon Jeju

Marcos 14.1-2; Lucas 22.1-2; João 11.45-57

26 Pi' pin iri na ca pijim' nucun Jeju ne, tomi' ac caparut na pain ca taxipa' urut con ca'. ² Taxi' hwein ca wixicam pin ne Páscoa. Ma' 2 pin iri tara xec ne, maqui' ac ne tara, ma' ac ca tara wari' co tomi' mi' xim napa' cocon oro taramaxicon. Tatatain mi' ac cacapa' tara pain pana. Wata' pain ca Iri' Wari' ta' ca', tatatain mi' tatarapa' pain pana, wa wa mi' pin pe ac tain tara ta na ca tomi' caparut.

³ Cut in ac xucucun na oro sacerdote co taramaxicon nana ma', cocon oro taramaxicon nuxut pain ca judeu urut ma' quem. Cut in xucucun pain cote ne xiricon sacerdote co iri' taramaxicon ma'. Caifás na wixicon.

⁴ Tomi' xo' ac xucucun na: Cain' xi quep noc xa ac xun Jeju quem? Na e' na pain ca om taxi' cacapari' oro wari' ta. Quep xun, to' pa' pin jun ta ac xuxun tara oro taramaxicon nucucun oro romano cwa'. ⁵ Om ta quep xun pain oro xec nein ca tomi' querec te nexi' ca'. Ma' ta om teretem caca oro wari' ta na pain ca tomi' xo' xucucun ma'.

26.2 Páscoa na wixinain xec nein ca tomi' querec te xucucun oro judeu pain ca mam' pe wet cocon oro hwanana nucucun pain ca to' witan ca' tococwa pain Egito pain cara pane.

Ca ji'ao mi' tocwa pain caji towaxi' Jeju

Marcos 14.3-9; João 12.1-8

⁶To ac urut pain na Betânia ma'. Wirico Jeju, warut pain ca taxipa' urut con quem, mama' ac urut pain na xiricon Simão co ma' non caji nan pane ira. ⁷Cao' cao' wet iri na Jeju ne, xut hwet ac con na narima' ma'. An nain caji towaxi' ca hu awi ma', ca wara ji'ao pe cama pain caji too ca mam' quep xine pain ca awi ne pacun ca taramac tamana. Mija na dinheiro nein caji towaxi' ma' quem. Ji'ao mi' ac con na pain winacon Jeju.

⁸Querec iri urut cam pain ca ji'ao mi' con pain winacon caji towaxi' ma' ne, mana' ac urut cam na. Para waraju camain caji towaxi' ma' quem urut. ⁹Je xi vender camain quem? Cut tamana ac camain xira cote ne dinheiro nein. Mi' tiquin' ac tococwa xira pain oro wari' co om nonon carawa, ac i ma' na ca tomi' nuxut.

¹⁰Jeju ma', taxi' naparut pain ca tomi' nuxut. Je ca tomi' caparut ma': Para tomi' em' hwem narima' cwa' quem? Miri'om jem. Hohot na pain ca an hwet mi' ac i ma' capa' pain ca tomi' querec te nequem. ¹¹Tama' ma' ara xi' nunuhu' oro wari' co om nonon carawa. To ho' cara tuturu' pa'ao'. Ha' tuturu' pain ca tama' quep xiho' huhun quem. Wata' iri na ne, om ta pe ho' cara xuhu'. ¹²Narima' cwa', pain ca ji'ao mi' capa' pain caji towaxi' ca', ac ca wara ji'ao mi' capa' pain caji towaxi' na pain cwere pain ca aram aram an corom pe pin xim cacapa' pain manain pacun quem. ¹³Je ca tomi' xuhu' ca', tomi' iri'o' inuhu'. Oro wari' co pijim' mama' xin nanain pira ma', pain ca tomi' hwet xun cacapa' cocon oro xucucun wari' ma', pijim' hwet ac cacain tara ca ara mi' capa' cam cwa' ta. Mam' pe wet cara ac tacama tara ta na ca tomi' caparut ma'.

Ca quep xiho' xuhu' pain ca quep xun hun Jeju ta cocon oro taramaxicon nucucun oro sacerdote Judas

Marcos 14.10-11; Lucas 22.3-6

¹⁴Win ma' nuxut ma', co to' 12 naparut pain ca taxipa' urut con Jeju cwa', co Judas Iscariotes caca oro wari' ma', hwet ac cocon na oro taramaxicon nucucun oro sacerdote. ¹⁵Tomi' ac cocon na: Cain' cain' ne moeda nein prata ca mi' xim mahu' pain ca quep xiho' xuhu' con Jeju quem? Tomi' mi' xuhu' con, quep ac hun tara ta nonon.

Mi' 30 xut pum pain moeda nein prata con ta ac cocon na, cut mi' 30 ac cocon pain na quem.

¹⁶Noro ac con na. Cain' xi tomi' mi' toton con ne xucun. Hohot tara pain xec ca' ra? Hohot tara pain xim ca' ra na.

Ca toc wi urut pain comi memem con Jeju

Marcos 14.12-26; Lucas 22.7-23

¹⁷Maqui' pin iri na iri' xec nein ca cao' querec te e' cacain capam' ca om joc wanan wa pain ca to' memerem nein ne, xuruxut hwet ac urut con na Jeju ma', pain ca taxipa' urut con ca'. Tomi' querec ac urut con na: Main ca ara to jein maparut pain carawa nein Páscoa pain ca cao' querec te nexi' quem urut con.

¹⁸Tomi' xo' ac caparut na: Xuruxut mama' jein cidade ma'. Piraó' ac hun tara win ma' nexi' cara ne. Tomi' ac hun tara: Tomi' nem Taramaxicon nexi' co ca' na taxipa' napari' pain capijacon Iri' Jam ta jun. Wixicam pin iri na ca mi' pin ta' ne ta nem ta jun. Tomi' querec te wi ta' cocon co taxipa' ta' pain carawa nein Páscoa ca' quem nem ta jun. Je ca tomi' xim ca' nem, cao' querec te to xut pain xurum ta nem ta jun quem na ca tomi' caparut ma'.

¹⁹Ma ac urut na, ara ac urut pain na ca tomi' xo' caparut Jeju. Ara an to xo' urut pain carawa ca cao' querec te xi' urut pain Páscoa quem.

²⁰Xo' um pin iri na ne, cao' xi' ta ac caparut na Jeju ma', xao to ac urut na. Wirico, warut pain ca taxipa' urut con ca' quem, pain ca 12 urut ca', xao to xi' ta, xao to ho' ac xujuxut na, ²¹cao' ac urut na quem. Cao' cao', tomi' ho' naparut Jeju: Ma' napari' co quep xiho' toton nonon co noc nanapa' ma', co quep xim nanapa' ma' naparut. Win ma' nuhu' ta naparut. Tomi' iri'o' inuhu', tomi' mi' tarapa' cocon co noc nanapa' ta naparut.

²²Tomi' xaxa' tamana ac urut na. Taramaxicon ne ac urut con na. Wata' tara pum ra ac urut con na. Wata' tara pum ra wata' tara pum ra xam' urut con.

²³Wirico co cwa' co xin cam wi napa' pain capam' pain too ca mam' cao' wa ca', wirico tara co tomi' mi' xim napa' cocon co noc nanapa' ta ac caparut na. ²⁴Mi' pin ta' ina pain ca Iri' Wari' ta' ca'. Win ne ca xirao' pe cacapa' oro profeta pane. Mi' pin ta' paxi' ina. Ane ximin pan ta' ca co ma' co tomi' mi' xim napa' cocon co noc nanapa' ma' ne, co quep xim nanapa'

ma'. Ximin tara. Hohot xira pain ca om pan' ne ca pije' nucun cam jicon ta na ca tomi' caparut ma'.

²⁵ Tomi' querec ac con na Judas ma', co tomi' mi' ton non ma': Cain' cain' ma quem Taramaxicon co ca' na taxipa' capijacon Iri' Jam? Wum ta mapa' ra? Ac i ma' na ca tomi' con ma'.

Wum ma' ira. Win ne ca tomi' pan ma ma' na ca tomi' con ma'.

²⁶ Cao' ac urut na, cao' cao'. An ac cain na capam' Jeju. Tomi' querec te urut pum pain ca mi' maparut pain capam' ca' quem Te na, jicat caracan ac cain na, mi' ac caparut pain na. Cao' jein ta ac caparut na. Capam' ca', an xiho' nain cwere ta ac caparut na.

²⁷ An ac cain na ca mam' toc wa ca ji'ao pe xine comi memem ma' quem. Tomi' querec te urut pum pain ca mi' maparut pain comi memem ca' quem Te iri na ne, an mi' ac caparut pain na. Toc toc xam' je ta ac caparut na. ²⁸ Comi memem ca', an xiho' nain cocu ta ac caparut na. Je ca to' querec pin' cuhu' pain ca tomi' an pe xo' mi' cuhu' Iri' Jam cwa', pain ca to' witan xim cuhu' ca'. Ao mao iri tara cocu pain ca mi' pin ta' ne ca' ne, je win ara pin tain cain ca wara tomi' an pe nucun. Mija tara oro wari' co mi' pin caho' ta' ta' quem. Xic am pin ac xine tara ca caracat nucucun pata'. ²⁹ Om ta toc mami' tain comi memem pain xocori ca'. Tomi' iri'o' inuhu', om ta toc mami' tain pain xocori ca'. Om om, maqui' pa' ac capa' tara iri' xec nein ca toc pe tain ta' pain i cain quem, pain ca taramaxicon pe ca Te cwain, toc wi ac xuhu' tara pain xocori comi memem ta ac caparut na quem.

³⁰ Com iri urut pain tamara' pain ca in ac urut con Iri' Jam ne, hwerehwet mama' ac urut na, mama' ac urut pain na Pacun Nein Oliveira ma'.

Ca paca' xim mahu' pain xim ca' caparut pain ca taxipa' urut con ca'

Marcos 14.27-31; Lucas 22.31-34; João 13.36-38

³¹ Tomi' ac caparut na pain ca taxipa' urut con ca'. Pain xim ca', om ta xec querec ne, paca' paca' pi' pin ac mahu' tara. Xi xirao' pe ara xine pain capijacon Iri' Jam pata' pane. Ca' na pata':

To' pa' pin ton co querec wet taxipa' nain ovelha ma',
wawaran mama' ac ne tara oro ovelha nucun.

Ac i ma' na ca xirao' pe xine ca tomi' nucun Iri' Jam pata' pane. ³²Ane e' mami' ta' ta' ne. E' mami' iri ta' ne, wara mao ac tain tara Galileia. Maqui' ac hwe tara pa'ao' na ca tomi' caparut ma'.

³³Tomi' pan ac con na Pedro: Paca' paca' pi' pin paxi' tetere oro xucucun co taxipa' ma cwa'. Wata' iri na ne, om ta paca' camain' xim ta na ca tomi' con ma'.

³⁴Om na ta Pedro ac con na. Tomi' toton momon oro wari' pain xim ca'. Om ta aca querec ca me, wara tomi' ac momon tara: Om ca querec pin' ton ta ac momon tara pata'. Ma' 3 tara ca tomi' ac i ma' toton ma quem. Tomi' iri'o' inem ta Pedro na ca tomi' con ma'.

³⁵Om na ta ac ca na, om ta tomi' ac i ma' toton. Mo ta to' pa' wi pin xim cacapa' pum, je i ma' ira, om ta tomi' camain' toton pain ca om ca querec pin' ton ta toton pum na. Ac je ac je pi' pin na ca tomi' nuxut pain ca taxipa' urut con quem.

Ca pe cain Getsêmani Jeju

Marcos 14.32-42; Lucas 22.39-46

³⁶Maji ta ac caparut na Jeju, mama' ac urut pain na totain oliva ma', ca Getsêmani caca oro wari' ma'. Wirico Jeju, warut pain ca taxipa' urut con ca' quem, mama' ac urut na pain Getsêmani. Xao to to jein i ca', pain ca tomi' ton Te pain i cain ta ac caparut na.

³⁷Harahap je ta ac tococwa na Pedro cocon mana panxica Zebedeu ma', co ma' 2 nana ma'. O mama' ac tococwa na. Xuruxut xuruxut, tomi' xaxa' ac ca na Jeju. Jain jain pin na. Mija na. ³⁸Tomi' xaxa' tamana ina ta ac tococwa na. Mija na ca tomi' xaxa' ta', pain iri' xumu ca', mija ina ta! Tomi' xaxa' tomi' xaxa' mi' pin ma' ac ta' pain tara, ac je na pata'. Mon to wet jein i ca' ac tococwa na. Ta pi'am hwe me, momon querec wi xi' ta tata.

³⁹Xut xut xat, pe torotop tucu hwet mi' ac cain na macan'. Tomi' ac con na Cote ca: Te ac con na. Am xin ne mapa' pain ca tomi' xim ca'. Nain ho' ne pain ca jain jain ta' ne ca', pain ca mi' pin ta' ne ca' quem Te. Tara pum, nain ho' ne pain me paxi' inem, ane param e' tain ca param pan nem ne. Noc inain ca param ne ca' na ca tomi' con Cote ca.

⁴⁰In hwet ac tococwa na. Wara pi'am nana. Tomi' ac con na Pedro: Pi'am hwe ra Pedro? Om ca momon querec wi ac mahu' ra? Xica' pe tara

hora nein ca querec wi xi' ta xuhu' ne ira non Pedro. ⁴¹ Ta pi'am hwe me ta ac tococwa na. Momon tomi' jun Iri' Jam, ma' ta om ja' camara' xihwe pain ca tomi' querec cuhu' Caxicon Jam ta. Tomi' ha' xi' paxi' hwe pain xumuhu' ma', ane om hwara' opa hwe pain curuhu' ma' ne na ca tomi' tococwa ma'.

⁴² In ca' mami' ac tococwa na, tomi' mami' ton Te ta ac ca na quem. Te ac con na. Am om xin ne mapa' pain ca tomi' xim ca', pain ca nain ho' ne pain ca jain jain ta' ne pain ca mi' pin ta' ne ca' xim ca'. Mo ta jain jain ra mapa', mo ta mi' pin ra mapa' quem. Je i ma' pum ta Te. Param e' inain ca param pan nem ta na ca tomi' con ma'.

⁴³ In hwet ac tococwa na, wara pi'am mami' nana quem, xi in tamana ara ne matacocon ta.

⁴⁴ Paca' mami' ac tococwa na, tomi' mami' ac con na Cote ca. Je win 3 pin ne ca tomi' con Cote ca. Ac ca wara tomi' con cara ne na pain ca tomi' mami' con ma'.

⁴⁵ In hwet ac tococwa na co taxipa' ca ma'. Tomi' ac tococwa na: Pi'am pi'am wet hwe ra? Xao to wa xao to wa wet hwe in xumuhu' ra tata. Maqui' pin nana co quep xim nanapa' cwa'. Wata' pain ca Iri' Wari' ta' ca', quep ho' xim nanapa'. Maqui' pin na co tomi' mi' xim napa' cocon oro caracat ta. ⁴⁶ Tequi' to je ta. Maji cocon. Maqui' nain i ma' co tomi' mi' xim napa' cocon ta ac tococwa na.

Ca quep cocon Jeju

Marcos 14.43-50; Lucas 22.47-53; João 18.1-11

⁴⁷ Tomi' tomi' wet na Jeju, maqui' ac ca na Judas ma', co to' 12 naparut pain ca taxipa' urut con Jeju cwa'. Mija nana wari' co ja' ja' nonon. Om ca paric camain' caca, mija nana. Wiricoco oro taramaxicon co hwet jun nonon. Mo nana: Oro taramaxicon nucucun oro sacerdote ma', oro taramaxicon nuxut pain ca judeu urut ca' quem, wiricoco co hwet jun nonon. Cut nana cote ne quit je pana ca mam' wap wa quem.

⁴⁸ Judas ma', co tomi' mi' toton nonon con Jeju ma', wara tomi' xo' nonon oro wari' co ja' ja' nonon ma'. Ma' ta querec pin' hun ta nonon. Ca' nonon: Wari' co xup ta' ma', wirico tara co quep hwe ta nonon. ⁴⁹ Xut hwet hap ac con na. Maqui' ina ta Taramaxicon co ca' na taxipa' capijacon Iri' Jam na ca tomi' con ma'. Xup ac con na.

⁵⁰ Ara ho' rain ca ara ta' ma ma' win ma' ne ac con na Jeju.

Xuruxut hwet hap ac cocon na, quep ac cocon na, pa' pe ac cocon na quem. ⁵¹ Coc xicot ac cain na cote ne quit win ma' nuxut co xat pe ho' non Jeju ma', wara ca' na wari' co taramaja mi' e' non sacerdote co iri' taramaxicon ma', to' pa' ton na ira, ton mapi' ac cain na taraxicon.

⁵² Om na, joc corom pin rain cote ne quit nem pain jainain ma' ta ac con na Jeju. Oro wari' co mam' mixita nanain cote ne quit nucucun ma', mam' cono' pin ac caca tara pain cote ne quit quem. ⁵³ Cain' cain' ne ca coromicat nem quem? Om ta quep xihó' con Cote ca mapa' ra? Mo xi quep xihó' ne ton, mam' hap ac capa' xira cocon oro jam co taramaja mi' nonon. Mija xira ca 1.000 nucucun. Om xi narain ho' capa' cocon ta. ⁵⁴ Ane om na capa' pain ca quep xihó' ne ton ne. Mo xi quep xihó' ne ton, pan' am ac ne xira ca xirao' to caca oro profeta co wara tomi' pe nanain carawa ca ara xim napa' ta na ca tomi' con win ma' nuxut ma'.

⁵⁵ Cain' cain' xihwe quem ac tococwa na oro wari' co quep xun nonon ma'. Para cut hwein cote ne quit je pana mam' wap wa pain ca quep xim mahu' ma' quem? Ac ca an noc xa taxipa' ta' carawa na pahu' ra na ca tomi' tococwa ma'. Wara pe ho' paxi' inuhu' pain oro xijein xec pane, pain ca ca' na pe tain cote ne xiricon Iri' Jam capijacon pane. Je xi quep qui' mahu' pain i cain pane? ⁵⁶ Je i ma' pahu' ta ac tococwa na. Oro ca ara napa' ca', ca xirao' to caca oro profeta pain capijacon Iri' Jam pane, na e' na pain ca hwerehwet pin ne pain xocori ca', ac i ma' na ca tomi' tococwa ma'.

Paca' ac urut con na Jeju pain ca taxipa' urut con ca'. Jein mama' jein mama' pi' pin urut.

Ca an mi' tocwa cocon oro taramaxicon co hwara' opa tamana nana

*Marcos 14.53-65; Lucas 22.66-71; Lucas
23.1-25; João 18.12-14; João 18.19-24*

⁵⁷ Caram ma' co quep nonon Jeju ma', an mao ac cocon na pain xiricon sacerdote co iri' taramaxicon. Caifás na wixicon taramaxicon. Wara cut in xucucun pain i ma' oro co ca' na taxipa' nanain ca xirao' nucun Moisés ma', cocon oro taramaxicon nuxut pain ca judeu urut ca' quem. ⁵⁸ Ja' tequi' pira ca' non Jeju Pedro ma' quem. Xut ac ca na, wara ca' na ca tao' cahó' nein xiricon sacerdote co iri' taramaxicon ma', corom mao ac ca na, xao

pe ho' ac cocon na oro guarda ma' quem. Querec ta' carawa ca ara ton non Jeju ta xucun.

⁵⁹ Tomi' xo' ac xucucun na oro taramaxicon nucucun oro sacerdote ma', cocon oro xucucun taramaxicon co cut in xucucun pain ca Sinédrio caca ma'. Pirao' xuxun wari' co xina ximama' napari' con Jeju ta. Querec inon pain ca caracat nucun, pan tem tamana na, tomi' mixein ac i ma' tatarapari'. Taraju iri xuxun ne, ha' ac capari' tara pain ca tomi' hwet xuxun pain oro taramaxicon nucucun oro romano ma', to' pa' pin ac cocon tara ta, ac i ma' paxi' na ca tomi' xo' pan xucucun. ⁶⁰ Ane om mam' tocwa wari' co tomi' hwet xo' nain con ne. Mija paxi' nana wari' co xina nana ma', ane tomi' ximama' e' caca ne. Om ca an an ari xijein ca tomi' ximama' nucucun.

Aram aram ma' pin ac caca na co xuruxut hwet nonon oro taramaxicon ma'. Ma' 2 nana. ⁶¹ Tomi' hwet xut pahu' con Jeju ta ac cocon na. Ca' na ca taraju urut pane, taraju urut con pain ca tomi' cain i ca' pane nana. Ha' napa' pain ca to' pa horohot pin tain cote ne xiricon Iri' Jam ta na. Ma' 3 pin iri tara xec nein ne, quep mami' pan ac tain tara ta na ca tomi' ca pane, taraju urut con ta nana.

⁶² Tequi' pe ac ca na sacerdote co iri' taramaxicon. Tomi' querec ac con na Jeju: Je xi tomi' in pin momon caram cwa', pain ca tomi' em' quequem ca' quem non.

⁶³ Ane tacana pe ca Jeju ne. Om ca tomi' in pin camain' tococwa.

Tomi' ac con na: Wum co Cristo cwa' ra? Tomi' xo' xut e'. Xi taraju ara quem Iri' Jam co e' cara ta. Taraju nem pain ca tomi' nem quem. Wum co Panxica Iri' Jam ra non.

⁶⁴ Wata' cwa' ira. Win ne ca tomi' pan ma ma' ac ca na Jeju. Ane tomi' tomi' pi' pin xuhu' pain i ca' ne. Main maqui' tara xec nein ca querec xim mahu' pain ca xao pe ho' ton Iri' Jam co hwara' opa pan. Wata' pain ca Iri' Wari' ta' ca', querec ac mahu' tara pain ca xao pe ho' tain iri' curucun pain

26.59 Ma' 70 nana oro taramaxicon co cut in xucucun. Sinédrio nonon oro wari' pain ca cut in xucucun. Ma' na iri' taramaxicon nucucun oro sacerdote, ma' nana oro xucucun taramaxicon nucucun oro sacerdote ma' quem, ma' nana oro fariseu cocon oro saduceu ma' quem. Ac juiz nana, taraju nonon oro wari' co tomi' em' nonon oro win ma' caca, tomi' mi' tomi' mi' ac tococwa na pain ca wap wa oro wari' co em' nana quem. **26.63** Para tacana pe ca Jeju quem? Jin' na ron? Wixipa' na ron? Om na ta! Taxi' tata pain ca xina ximama' nucucun. Miri'om e' tata. Je ca tacana pe ca ma'. Je ca om tomi' in pin camain' tococwa.

i cain. Querec ac mahu' tara pain ca maqui' wi ta' pain tajain nanawin quem ta na ca tomi' con ma'.

⁶⁵ Taraju iri nain ca tomi' nucun Jeju sacerdote co iri' taramaxicon ma' ne, i' pin ac con na womicon. Xi mana' tamana ara ca ta. Tomi' ximao non Iri' Jam co cwa' ta. Je xi om tomi' hwet jein ca em' nucun co cwa' mami' xuxun oro wari' cwa' quem? Taraju pin iri hun pain ca tomi' ximao nucun ma', pain ca wata' co Cristo ta ca ma'. ⁶⁶ Cain' ca coromicat hwe con quem ac ca na.

Em' na ta, na e' na pain ca to' pa' pin tocwa ta ac caca na.

⁶⁷ Ma' ac caca na co cupa' nonon pain tocon ma', to' to' ac cocon na. Ma' ac caca na oro xucucun co wap nonon quem. ⁶⁸ Ma' co to' nem cwa' quem? Tomi' hwet rain wixicon co to' nem cwa'. Win ne ca wata' co Cristo cwa' ta ma ma', ac i ma' na ca tomi' ximama' nucucun.

Ca tomi' ximao ca Pedro pain ca om ca querec pin' ton Jeju ta ca

Marcos 14.66-72; Lucas 22.54-62; João 18.15-18; João 18.25-27

⁶⁹ Tahwet xao pe na Pedro ma' quem. Xao pe pe nain ca tao' caho' nein xirim. Xut hwet ac con na xojam' co taramaja pe nain i ma'. Tomi' ac con na: Pe ho' mon Jeju co maqui' nain Galileia ma' quem non.

⁷⁰ Om na ta ac cam na. Om ca taxi' tain ca tomi' ma ma' ta nam. Taraju taraju xam' nonon pain ca tomi' ac i ma' ca ma'.

⁷¹ Xut hwet ac cain na man ca corom ac xine ca tao' caho' nein xirim ma' quem. Querec ac con na xequem xojam' co taramaja pe nain i ma'. Tomi' ac cama na cam ma' quem, tomi' nonon oro wari' co to nanain i ma'. Co ma' ma', pe ho' non Jeju co maqui' nain Nazaré ta nonon.

⁷² Tomi' in pin mami' ac ca na Pedro. Om na! Om ca querec pin' ton co ma' ta na. Taraju napa' Iri' Jam quem. Mo ta mixein ta', wap ac capa' tara ta. Om ca querec pin' ton ta na.

⁷³ Om om, xuruxut hwet ac cocon na Pedro co to nanain i ma'. Tomi' ac cocon na: Wari' nucun Jeju ma ma' ira. Win ne ca tomi' an xiho' momon oro wari' nucun ma', ac iri' ca tomi' nucucun ma ma' ira na ca tomi' cocon ma'.

⁷⁴ Tomi' ximao ac ca na Pedro: Om na ta! Tomi' iri'o' inuhu' ta. Taraju napa' Iri' Jam ta. Om ca querec pin' ton co ma' ta. Mo ta om tomi' iri'o' ta', wap ac capa' tara Iri' Jam ta na.

Aca ho' na me. ⁷⁵Mam' pe wet ac cain na ca tomi' nucun Jeju pane. Om ta aca querec ca me, tomi' ac momon tara, om ca querec pin' ton ta ac momon tara pata', ma' 3 tara ca tomi' ac i ma' toton ma quem Pedro, ac i ma' na ca wara tomi' con pane. Hwet mao ac ca na, aca tamana ac ca na quem.

Ca an mi' cocon con Pilatos Jeju

Marcos 15.1; Lucas 23.1-2; João 18.28-32

27 Xec pin iri na ne, pain iri' xo' xec ma', tomi' xo' tomi' xo' pi' pin ac xucucun na oro taramaxicon nucucun oro sacerdote ma', cocon oro xucucun taramaxicon nuxut pain ca judeu urut ca' quem. Ca' tara ca ara xun Jeju cwa', ma' ta to' pa' pin cocon oro romano ta na ca tomi' xo' pan xucucun. ²Pao' pe ac cocon na, an mao ac cocon na, o mi' ac cocon na con taramaxicon Pilatos.

Ca tucu juhum' pa' pan xucun Judas

Atos 1.18-19

³Judas ma', co quep xiho' nonon oro taramaxicon pain ca quep cocon Jeju ma', taxi' pin iri nonon oro taramaxicon pain ca mi' pin ma' tara ne cocon Jeju ma' ne, tomi' xaxa' tamana ac ca na. Om xi tomi' mi' toton con pane ne na ca coromicat nucun. Mi' in hwet toton pain moeda nein prata ca mi' cacapa' cara ne, ca 30 ca' ne na, mo hwet ac tococwa na oro taramaxicon nucucun oro sacerdote cocon oro taramaxicon nuxut pain ca judeu urut ca' quem. ⁴Tomi' ac tococwa na: Caracat ina ta. Om xi tomi' mi' xuhu' con Jeju ne, xi em' ca ta tata.

Para mo merem maparut ma' quem ac cocon na. Wum co em' pan ma' ira na ca tomi' cocon ma'.

⁵Wixicaracao' in pin ac cain na moeda nein prata ma', pain tequipain cote ne xiricon Iri' Jam ma'. Hwet mao ac ca na, tucu juhum' pa' ac xucun na pain macon pain canemicon, mi' pin ac ca na quem.

⁶Cut in xo' ac cacain na moeda nein prata oro taramaxicon nucucun oro sacerdote ma'. Tomi' ac xucucun na: Moeda nein prata ca', om ca na ne pain ca cut in mami' ac xin pain maxinain pain xiricon Iri' Jam ta, xi

om ne ca mam' pagar ara urun pain co pacara ne, ma' ta tomi' mi' maparut con Jeju ta urun pane, ma' ta to' pa' pin tocwa ta urun pane xucucun.

⁷ Cain' cain' xixin ne ac xucucun na. Om na, mam' an xin totacon co cwain co ara taxipa' nain tapaxi' cwain ta. Cono' to iri tatarain Jerusalém oro tatirim ne, je tara ca cut corom to tococwa pain oro manain pacun nein ta xucucun. ⁸ Je ca o' ma' mi' xine xitot pain wic ma'. Totain Wic nanain. Totain Wic Totain Wic wet nanain wixinain pain xocori ca' quem. ⁹ Ac i ma' na ca hwet pin ne ca xirao' pe nucun profeta Jeremias cara pane. Ca' na con pane:

Cut in xo' nanain moeda nein prata ma', ca ma' 30 ma',
ca mam' pagar xim con ta caca oro taramaxicon nucucun
oro wari' nein Israel ma'.

¹⁰ Mam' an ac cacain na totacon co ara taxipa' nain tapaxi'.
Je ca tomi' capa' Iri' Jam ta.

Ac i ma' na ca xirao' pe ca Jeremias cara pane.

Ca tomi' querec con Jeju Pilatos

Marcos 15.2-15; Lucas 23.1-25; João 18.28-40; 19.1-16

¹¹ An mi' iri nonon con Pilatos Jeju ne, tomi' querec pan ac con na Pilatos: Wum co iri' taramaxicon nucucun oro judeu cwa' ra non.

Wata' cwa' ira. Win ne ca tomi' ma ma' ta ac ca na Jeju.

¹² Tomi' em' ac cocon na oro taramaxicon nucucun oro sacerdote cocon oro taramaxicon nuxut pain ca judeu urut ca' quem. Em' na co cwa' ta, om ca awi camain' ca, pan tem na ta nonon.

Ane tacana pe ca Jeju ma' ne. Om ca tomi' in pin camain' ca.

¹³ Tomi' querec ac con na Jeju Pilatos ma'. Om ca taraju momon pain ca tomi' em' quequem ra ac con na taramaxicon.

¹⁴ Ane tacana pe pan ca Jeju ne, om ca tomi' camain' ca. Wa wa tamana ac con na taramaxicon.

¹⁵ Taramaxicon Pilatos cara pane, pain oro cawaxi' pain xec nein Páscoa pane, pain ca tomi' querec te wi urut pain ca judeu urut ca', pa hwet taxipa' non wari' co tao' pe wa. Je curucun pane, pa hwet taxipa' non wari' co tao' pe wa, pa hwet mi' taxipa' tata con oro wari' pane. Pa hwet mi' xut con co param urut cwa' iri nana ne, pa hwet mi' ac tococwa na con. Je curucun taramaxicon pane. ¹⁶ Pain ca quep qui' con Jeju pane, ma' na wari' co pe

nain xirinain ca tao' to tao' to to wa ma'. Iri' caxicon wari' na, taxi' taxi' pi' pin nonon oro wari' pain ca pan tem nucun. Barrabás na wixicon.

¹⁷ Cut in iri xucucun oro wari' ma' ne, tomi' querec pan ac cocon na Pilatos: Mon xi pa hwet ta' cwa' ne? Ma' co param hwe? Param hun Barrabás cwa'? Param hun Jeju co to' witan roron oro wari' ta ca Iri' Jam cwa' quem nonon oro win ma' ca ma'. Tomi' xine ta ac tococwa na. ¹⁸ Ma' na ximicon Pilatos. Querec pin' tata oro taramaxicon nuxut pain ca judeu urut ca', querec pin' tata pain ca noc ximama' pan cocon Jeju. Querec pin' tata oro wari' pain ca tomi' querec te tamana pan cocon quem. Je ca o mi' cacapa' con ta na ca coromicat nucun.

¹⁹ Xao pe xao pe wet nain ca mam' xao pe nucun Pilatos ma', ca tomi' xo' pe tococwa oro wari' ma'. Maqui' ac ca na wari' co mo pin nain ca xirao' nequem manacon. Mi' ac con pain na. Ca' na ca xirao' nequem: Miri'om roron caram ma' co quep em' xun nonon tarama' ma' me. Xi pan tem ca ta. Tohwein' inon pain xim ca' ne. To' jain jain tamana napa', toron tamana napa' xumu con ta na ca xirao' mi' con taxicam.

²⁰ Ane wara tomi' cocon oro wari' oro taramaxicon nucucun oro sacerdote cocon oro taramaxicon nuxut pain ca judeu urut ma' ne. Pa hwet mi' xut con Barrabás ta jun, to' pa' pin jun Jeju ta roron oro soldado nem ta jun quem nonon. Tomi' tomi' na pin ac cocon na quem.

²¹ Tomi' querec mami' ac cocon oro wari' na taramaxicon ma' quem: Mon xi pa hwet ta' cwa' ne? Ma' co param hwe? Param hun Barrabás cwa'? Param hun Jeju cwa' nonon.

Om na, param urut con Barrabás ta ac cocon na.

²² Cain' cain' xiton Jeju cwa', co Cristo ta caca oro win ma' ca ma' quem ac tococwa na.

Om na, na e' na pain ca to' pa' pin tocwa pain ca tatatain mi' tocwa pain pana ta nana.

²³ Cain' cain' xira pahu'? Para em' na hun ma' quem ac tococwa na.

Merem mip merem mip ac caca na: Om na, na e' na pain ca to' pa' pin tocwa pain ca tatatain mi' tocwa pain pana ta nana.

²⁴ Querec pin' ac tococwa na oro wari' pain ca om ha' je na caca ma'. Querec pin' tata pain ca teretem pin xi' caca quem. Je ca tomi' con wari' nucun ma': Cam mi' ne pain com pain wijimain bacia ma'. Hohoc tain mu ta na. Querec querec xam' ac cocon na oro wari' pain ca hohoc cain micon. Tomi' ac tococwa na: Querec mahu' pain ca hohoc tain mu ca'. Je

ca an hwet mi' xuhu' pain ca om hohot capa' pain ca to' pa' pin ron ta mahu' con co cwa' na ca tomi' tococwa ma'. Om ca wata' ne co em' cwa', xi param tain ca to' pa' pin tocwa ta. Wahu' co em' pan nana cwa' ira na ca tomi' tococwa ma'.

²⁵ Je i ma' ira ac caca na oro wari', merem merem xam' nana. Warut pan co em' cwa' ira, warut, wiricoco mana panturut cwa' quem, wap ma' taraparut Iri' Jam ne nana pain ca merem ximama' nucucun.

²⁶ Ma ac ca na, pa hwet mi' ac tococwa na con Barrabás. Wap jun Jeju cwa' ta ac tococwa na oro soldado nucun, wap wap ac cocon na. An mao jun ta, to' pa' pin jun pain ca tatatain mi' hun pain pana ta ac tococwa na.

Ca tatam' cocon Jeju oro soldado, je pain ca tomi' xirac cocon quem

Marcos 15.16-20

²⁷ Oro soldado ma', an corom mao ac cocon na Jeju pain xiricon taramaxicon. Tomi' cut in ac cocon na oro win soldado caca ma', coco' coco' mam' pin ac cocon na quem. ²⁸ Hot ca' nonon con womicon, pe ac cocon na con cote ca wom ma', co ac womicon taramaxicon co paca' awi ma'. ²⁹ Ton ac cacain na caji macon ca puxu ma', mo' ac cacain na, mo' mo' an xiho' ac cacain na caji waji' ca to taxipa' caca oro taramaxicon ma', pe ac cocon na pain winacon. Mi' ac cocon na pain pana ma', ca an xiho' paxi' nain panaxicocon oro taramaxicon ca mam' mo taxipa' caca ma'. Ma' ta! An rain panajum ca', pain iri' cwerem ma' ac cocon na. Pe torotop mi' mixein ac cocon na. Awi na taramaxicon nucucun oro judeu cwa' ta nana pain ca tomi' xirac cocon ma'.

³⁰ Cupa' cupa' ac cocon na, an ca' ac cocon na pain panaxicon, to' to' ac cocon na pain winacon. ³¹ Tatam' tatam' noc pin iri nonon ne, hot ca' ac cocon na con wom co paca' ma', pe mami' ac cocon na con iri' womicon. An hwet mao ac cocon na quem. Ma' ta tatatain mi' xun pain pana ta nonon.

27.29 Oro taramaxicon pain cara pane, mam' mo taxipa' nanain panaxicocon pain iri' curucucun. Ma' ta querec pin' cacapa' oro wari' ne pain ca taramaxicon ta' ca' nana pane. Je ca an rain panajum pain iri' cwerem cocon Jeju oro soldado ma' quem, tatam' tatam' ac cocon na pain ca tomi' xirac cocon ma'.

Ca tatatain mi' cocon pain pana Jeju

Marcos 15.21-32; Lucas 23.26-43; João 19.16-27

³²Hwrehwet ca' iri nanain cidade ma' ne, win quima ac cocon na wari' ma'. Simão na wixicon. Wari' nein Cirene na Simão. Quep ac cocon na oro soldado, an tiquin' rain panaxicon Jeju cwa' nonon. ³³Xuruxut xuruxut hwet ac cacain na ca tamaja pan ne macan' ma', ca Gólgota caca oro wari' ma'. Maxinain Tacawaji' na ca tomi' mao nein Gólgota.

³⁴Wara joc wanan nanain comi uva pain waraqui pana ca wijein' tamana ma'. Ma' ta! Toc rain ta nonon. Toc querec iri nain ne, noc inain ta ac ca na quem.

³⁵Tatatain mi' iri nonon pain pana ne, tomi' ac xucucun na oro soldado. An an xam' xun womicon cwa' ta ac xucucun na. Ma' xi an non co cwa' ne, ma' xi an non co cwa' ne xucucun, ara ac cacain na ca ara taxipa' caca ma', ma' ta taxi' xun wom co an xi' iri' cwa' xucucun.

³⁶Cut pin iri nonon womicon ma' ne, xao to ac cacain na xiquijnain panaxicon ma'. Querec wet ac cocon na.

³⁷An ac cacain na pana ca xirao' pe xine ca pan tem na ta tocwa ma'. Ca' na ca xirao' nein: Wirico co cwa' Jeju cwa'. Taramaxicon nucucun oro judeu na ta na ca xirao' nein. Tatatain mi' ac cacain na pain tamain panaxicon pain tamacon.

³⁸Tatatain mi' iri nonon pain panaxicon Jeju ne, ma' 2 ac caca na wari' co tatatain mi' wawa pain pana ma' quem. Iri' caxicon wari' nana, cut noc xa taxipa' nana carawa. Pe nain iri' curucun xucun, pe ac cain na paraxicon xucun ma' quem.

³⁹Tomi' xirac tomi' xirac nonon oro wari' co xuruxut tiquin' ca' nonon ma'. Nanaquin mixein mi' nonon pain winacocon, ⁴⁰tomi' ximama' ac cocon na quem: Wum co to' pa horohot pin tain nain cote ne xiricon Iri' Jam pane ra? Ma' 3 pin iri tara xec ne, quep mami' pan ac tain tara ta ma pane ira nonon. Je xi to' witan qui' xijem quem? Quiji' ca' ximain panajum

27.32 Wijimain cidade na Cirene. **27.34** Comi uva ca wara joc wanan caca pain waraqui pana ma', ac remédio na. To' om pin xirain ca caxi nucun pain ca tatatain mi' cocon pain pana. Ane noc inain ta ca Jeju ne. **27.35** Ara taxipa' ac i ca' nana pane: Xirao' xirao' xam' nanain wixicocon pain oro wijimain pacun ma', xin xin ac cacain na. Ma' ta taxi' xijexi' con wom co an xi' iri' cwa' nana. Xin iri nanain ne, noro ac cacain na, mam' ac cacain na oro wixicocon con womicon. Wum tara, an ron co cwa' ta ac xucucun na con.

ma' quem. Win ne ca Panxica Iri' Jam ina ma ma' na ca tomi' ximama' cocon ma'.

⁴¹ Tomi' xirac nonon, tatam' tatam' nonon oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés cocon oro taramaxicon nuxut pain ca judeu urut ma' quem. Win caca oro wari' ma'. ⁴² Tomi' ximama' ca' nana: Quep xiho' paxi' nonon oro wari' pane, ane om ha' con pain ca quep xiho' pan xucun ne. Taramaxicon nucucun oro judeu na ron? Mo ta quiji' hap ca' cain pana ma', howa pin ac xun tara ta. ⁴³ Howa inon Iri' Jam ta na. Je xi to' witan ho' con quem? Tara con. Am xiram pa' con. Xi Panxica Iri' Jam ina ara ca ta na ca tomi' ximama' nucucun ma'. ⁴⁴ Tomi' xirac tomi' xirac ac i ma' nonon co tatatain wi ca ma' quem.

Ca mi' pin nucun Jeju

Marcos 15.33-41; Lucas 23.44-49; João 19.28-30

⁴⁵ Tocon xina pin iri na ne, xim pin ac ne na. Iri' xim na, xim xim pi' pin na pain oro xijein macan'. Piquirim pin iri na xina ne, pain 3 hora ma', toha pin mami' ac ca na quem.

⁴⁶ Piquirim pin iri na xina ne, pain 3 hora ma', merem ac ca na Jeju. Merem mip na: *Eloí, Eloí, lamá sabactâni* na ca merem nucun. Pain ca merem ac i ma' ca ma', ca' na ca tomi' mao nein: Iri' Jam ne, Iri' Jam ne, para paca' mapa' ma' quem, ac i ma' na ca tomi' mao ne ca merem nucun.

⁴⁷ Ma' nana wari' co coco' to nanain i ma', co taraju nanain ca merem nucun ma' quem. Tomi' ac caca na: Merem non Elias cara pane nana pain ca taraju ec nucucun. ⁴⁸ Mi' ton pain caji comi uva ca tup ca' e' ac ca na win ma' caca ma', mo hwet hap ac cain na caji hoho hoho ma', xin cam ac cain na pain caji comi uva. Moin' pe ac ne na, an pe ac cain na pain tamain taparain pana. Ma' ta! Toc rain ta ac con na. ⁴⁹ Ane tomi' in pin cocon oro win ma' ca ma' ne: To wet iri ca ma'. Querec xi' e'. Am maqui' ca Elias con. Am to' witan ton con na ca tomi' ximama' nucucun.

⁵⁰ Merem mami' ac ca na Jeju, merem mip na. Mi' inem pain tamatara ca' Te. Querec wet rain ta non. Mi' ac con pain na quem.

27.50 Mi' pin iri na Jeju pane ne, om ca mi' pin e' ca. Mi' inem pain tamatara ta Te non Cote ca, mi' ac con pain na, mi' pin ac ca na quem.

⁵¹ Ane ane wein mao ac ca na cote ca wom co wa pe nain cote ne xiricon Iri' Jam ma', co tao' caho' nain iri' ca pe ne panaxicon pain iri' paxicom cain. Wein ac nain ximijacon. Wein quiji' mao nain macan'. Cocoroc ac ne na macan', pa horohot pin ac ne na oro cote ne pacun. ⁵² Pa pin ac ne na oro manain pacun ca cut corom to tococwa co wara cono' nana ma', to' e' mami' mija ac tococwa na co wara howa nana pain ca e' e' wet nucucun quem. ⁵³ E' mami' iri na Jeju ma' ne, hwerehwet ca' ac cacain na oro manain pacun ca cut corom to tococwa ma', mama' ac cacain na Jerusalém ma', ca pe pan ne cote ne xiricon Iri' Jam ma'. Mija nana wari' co querec nonon pain Jerusalém.

⁵⁴ Taramaxicon ma', cocon oro soldado nucun co querec wet nonon Jeju ma', querec iri nanain ca cocoroc ne macan' ma' ne, querec iri nanain oro ca ara ne con Jeju ma' ne. Jin' tamana ac caca na. Iri' Panxica Iri' Jam ca ma' ira nana.

⁵⁵ Mija nana oro narima' co noro pira nonon ma'. Wiricacam co wara ja' ja' qui' nonon Jeju pain Galileia pane, co quep xiho' nonon pane. ⁵⁶ Mo nana: Maria Madalena ma', Maria jicon Tiago con José ma', jicocon mana panxica Zebedeu ma', ma' nana oro xequequem ma' quem, noro pira nonon Jeju.

Ca an corom pe xine curucun Jeju pain manain pacun

Marcos 15.42-47; Lucas 23.50-56; João 19.38-42

⁵⁷ Xo' um pin ta' iri na ne, maqui' ac ca na wari' co caramaju ma'. José na wixicon. Wari' nein Arimateia na José ma'. Howa non Jeju pane. ⁵⁸ Mo hwet ac con na Pilatos ma', mi' ne pain curucun Jeju ta ac con na. Ma, mi' jun pain ac tococwa na oro wari' nucun. ⁵⁹ An mao ac cain na curucun, wiric pa' pin ac cain na con cote ca xocoricon wom co awi. Om ca mixem ca, towo' na. ⁶⁰ An corom pe ac cain na curucun Jeju pain manain pacun ma', ca an corom pe pe xin cacain cwere oro ca nari ne pain ca aram aram mi' pin ta' ne pan ca ma'. Om ca pain homa ne ca xe' xine. Xocorinain ta. Je ca an corom pe pe cain curucun Jeju. An corom pe pin iri nain ne, joc in ac cain na cote ne pacun pain manain ma', tao' pa' pin ac cain na, mao ac ca na quem. ⁶¹ Xao to nanain i ma' Maria Madalena cam xequem Maria ma'. To nanain ca pe ac ne manain pacun ma'.

Ca querec wet cacain manain pacun ca an corom pe xine curucun Jeju oro soldado

⁶²Xec pin iri na ne, pain sábadu ma', xuruxut hwet ac cocon na Pilatos oro taramaxicon nucucun oro sacerdote cocon oro fariseu ma'.
⁶³Taramaxicon ac cocon na. Mam' pe wet urut pain ca tomi' nucun co pacara ne, co tama' mixein cara ne. Ca' na ca tomi' nucun pain ca e' e' wet nucun pane: Ma' 3 pin iri tara xec pain ca mi' pin ne ne, e' mami' ac ta' tara ta na ca tomi' mixein nucun pane. ⁶⁴Je ca tomi' xim urut pum ca' taramaxicon ac cocon na. Na e' na pain ca tomi' momon oro soldado nem. Querec wet xo' jein manain pacun ca an corom pe pe xine curucun Jeju ta roron. Ma' 3 tara xec nein ca querec wet xo' cacain. Ma' ta om maqui' caca co taxipa' nonon ma', ma' ta om an noc xa mao cacain curucun ma'. Mo ta ha' cocon pain ca an noc xa mao cacain curucun ma', tomi' ximama' ac cocon tara oro wari', e' mami' na ta ac cocon tara. Pain ca e' e' wet nucun pane, mixein taxipa' tata oro wari' pane. Mo ta tomi' mixein mami' tococwa oro wari' pain ca e' mami' na ta cocon ma', tiquin' mao tara ca mixein tococwa oro wari' pain xocori ca' quem na ca tomi' cocon Pilatos.

⁶⁵Ma ac ca na taramaxicon. Cut mama' jujun oro soldado cwa'. Wahu' pan tara co taxi' nana pain ca querec wet xo' jein ta huhun ta tata.

⁶⁶Mama' ac caca na, xirao' pin ac cacain na pacun ca mam' tao' pa' xine manain pacun. Ma' ta taxi' xun wari' co meo nain ta nana. Querec wet xo' jein ta ac tococwa na oro soldado ma', mama' ac caca na.

Ca e' mami' ca Jeju

Marcos 16.1-8; Lucas 24.1-12; João 20.1-9

28 Pi' pin iri na sábadu ne, xec pa' ac cacam na pain domingo. Iri' xo' xec pin iri na pain domingo ne, maji querec xin manain pacun ca an corom pe pe xine curucun Jeju ta ac cama na Maria Magdalena cam xequem Maria ma', mama' ac cacama na.

²Ane ane cocoroc mip ac ne na macan', xi qui' qui' ara cain pawin jam co taramaja mi' non Iri' Jam ta. Xut hwet ac cain na manain pacun, joc panajao' pin ac cain na pacun ca tao' pa' nain manain ma', xao pe ac cain na pacun ma' quem. ³Ac ca coc wein ca comerem na ca joc xec ca jam co taramaja mi' non Iri' Jam ma'. Towo' tamana na womicon quem.

⁴Jin' tamana ac caca na oro soldado co querec wet nanain manain pacun ma'. Cocoroc tamana nana pain ca jin' nucucun. Camara' mama' ac cacain na macan'. Ac ca cono' pin caca na quem.

⁵Tomi' ac cacam na oro narima' jam co taramaja mi' non Iri' Jam ma': Ta jin' mahu' me ta. Taxi' inuhu' pain ca pirao' hun Jeju co tatatain mi' wa pain pana pane. ⁶Om pin nain i ca'. E' mami' na ta. Win ne ca wara tomi' pe cain pane. Harahap je, noro jein ca terem' pe ca ira. ⁷Mama' harahap je ta ac cacam na. Tomi' jujun co taxipa' ca ma', e' mami' na ta jujun. Tomi' ca' jujun quem: Wara mao nain Galileia cain. Mama' je quem, je i cain tara ca querec pe hun ta jujun. Ta ji'am pin hwein ca tomi' xuhu' ca' me nanam.

⁸Hwrehwet ca' hap ac cacamain na manain pacun ma'. Jin' paxi' nana, ane tomi' querec te tamana cacama ne. Maji jein hwet xuxun co taxipa' ca cwain. Tomi' hwet xuxun pain ca ara ne con Jeju ta nana.

⁹Ane ane win quima ho' ac cacam na Jeju pain wana. Ma' i ma' pahu' quem ac cacam na.

Xuruxut hwet ac cocon na, pe torotop mi' ac cocon na, pe horoman tapan' ac cacamain na caximacon. Tomi' querec te tamana nonon pain ca in ac cocon ma'.

¹⁰Ta jin' hwe me ta ac cacam na. Mo tomi' jujun xere cwain. Mama' jein Galileia cain jujun. Je i cain tara ca querec pe mahu' ta nuhu' ca' jujun ta na ca tomi' cacam ma'.

Ca tomi' mixein nucucun oro soldado

¹¹Jein jein wet iri nanain wana oro narima' ma' ne, in mama' ac cacain na cidade win ma' caca oro soldado co querec wet nanain manain pacun ira. Mo hwet nonon oro taramaxicon nucucun oro sacerdote ma', tomi' hwet tomi' hwet pi' pin nonon pain carawa ca ara ca ara pe ne pain manain pacun ma'.

¹²Tomi' cut in xuxun oro win taramaxicon iri' pain ca judeu iri' ca' nana, cut in ac xucucun na, tomi' xo' ac xucucun na. Cut mi' moin' ac tococwa na pain dinheiro oro soldado ma'. ¹³Tomi' ac tococwa na: Tomi' ca' jujun oro wari' me: Pi'am iri urut ne, maqui' towa ac caca na co taxipa' ca ma'. An mao ac cacain na curucun, ac i ma' tara ca tomi' huhun oro wari' ta tata. ¹⁴Mo ta taxi' cuhu' taramaxicon ma', tomi' xo' ac xut con

tara, om ca em' caca ta xut con pahu', tomi' tomi' na pin ac xut con tara. Om ac ne tara ca quep xirac cuhu' ma', ac i ma' na ca tomi' tococwa oro soldado ma'.

¹⁵Ma ac caca na, cut mama' ac cacain na dinheiro. Tomi' ha' ac tococwa na oro taramaxicon nucucun oro sacerdote ma', tomi' mixein tomi' mixein ac tococwa na oro wari' ma'. Wiricoco co taxipa' ca co an mao nanain curucun ta nana pain ca tomi' mixein nucucun. An xin tiquin' ac cacain na oro win judeu urut co taraju nonon ma' quem. An xin tiquin' an xin tiquin' wet nanain ca tomi' mixein nucucun pain xocori ca' quem.

Ca hwet pa' caparut Jeju pain ca taxipa' urut con ca'

Marcos 16.14-18; Lucas 24.36-49; João 20.19-23; Atos 1.6-8

¹⁶Maji pain Galileia ta ac urut na pain ca taxipa' urut con Jeju ca', mama' ac urut na. Ma' 11 pin e' urut pain ca taxipa' urut con ca'. Hwet ac urut pain na pacun ca wara tomi' xo' caparut Jeju pane. ¹⁷Querec iri urut con ne, pe torotop mi' ac urut con na pain ca in ac urut con. Pe torotop mi' paxi' urut con, ane ma' caca win ma' nuxut co hehe nana ne. Wirico tara ron nana pain ca hehe nucucun.

¹⁸Xut hwet ac caparut na, tomi' ac caparut na: Mi' napa' pain ca taramaxicon wa Te Iri' Jam. Taramaxicon pe pi' pin rain pawin je macan' ta napa'. ¹⁹Je ca tomi' xuhu' ca': Hwet hwet xam' jujun oro wari' pain oro xijein macan'. Pijim' hwet jujun pain capiija, ma' ta taxipa' cacapa'. Ja' jujun pain com quem. Ja' iri jujun ne, an hwet ac hwein tara wixicon Te, je pain wuxu pain ca Panxita' capa' ca', je pain wixinain Tamataracon quem. ²⁰Ca' na jujun pain oro capiija ca tomi' xuhu' pane quem, ma' ta tomi' ha' tomi' ha' xam' cacain ta. Mam' pe wet jein i ca' quem: Pe ho' cara xuhu'. Pi' pin pa' ma' tarapa' macan' ca' pahu', om ta an to camain' xuhu'. Ac i ma' na ca tomi' caparut pain ca taxipa' urut con ca'.

Je i ma'.

Marcos

Ca xirao' nucun Marcos con Jeju Cristo

Ca pijim' nucun João co ja' taxipa' nonon pain com oro wari'

Mateus 3.1-12; Lucas 3.1-18

1 Je i ca' ca pijim' xine oro ca ara ne con Jeju Cristo Panxica Iri' Jam pain cara pane, pain ca xo' pijim' ten qui' tocwa pane. ²Win ne ca xirao' pe ca profeta Isaías cara pane. Ca' na con pane:

Main tomi' ton wari' co tomi' hwet tain nain capija.

Tomi' ca' ton pum: O ra ta ton.

Wara quep xo' tarain wanajum.

³Merem pe tarain mahweri.

Wara quep xo' mi' jun pain wana Taramaxicon nuhu'
totoron oro wari'.

Quep tan pan mi' jun pain wana ta totoron quem.

Ac i ma' na ca xirao' pe nucun Isaías pane.

⁴Wirico João co wara tomi' pe wa pane, pain ca tomi' hwet tarain capija ta ca Iri' Jam pane. Je ca pe cain mahweri pane. Ja' nonon pain com oro wari', pijim' ac cocon na: Ja' je com, ma' ta querec pin' xihwe pain ca cwirin' pin hwein ca caracat nuhu', je pain ca xic am pin cain ca caracat nuhu' Iri' Jam quem ta tata. ⁵Xuruxut xuruxut hwet nonon oro wari' co to nanain oro xijein cidade pain Judeia ma', wiricoco oro wari' co to nanain Jerusalém ma' quem. Tomi' hwet pin iri nanain ca caracat nucucun ne, ja' pan ac cocon na pain com João ma'. Ja' pe tata pain iri' cwerein com ma', pain Jordão ma'. ⁶Pe taxipa' nain tenenein camelo João pane, wirico co ma' womicon pane. Tucu pan xucun pain tapari carawa

1.2 Wari' co profeta ma', tomi' hwet taxipa' nain capijacon Iri' Jam ca an hwet mi' non pain Tamataracon. **1.3** Ca' na ca tomi' mao nein ca xirao' pe nucun Isaías: Wari' co quep xo' mi' non pain wana Taramaxicon nexi' ma', co quep tan pan mi' non pain wana ma' quem, ac ca winim' xo' con na. Ac ca an pe xo' cain na ximicon con. Ac je na ca tomi' mao ne ca xirao' pe nucun profeta Isaías cara pane.

pain ximijacon. Cao' taxipa' na can, xac taxipa' na tawi quem. ⁷Ca' na ca pijim' nucun: Maqui' ho' tara wari' co hwará' opa tiquin' ca' napa'. Iri' wari' na. Om ca hohot camain' ne pain ca wina quiji' mi' ton pain ca tacom' mi' ton pain macorinain caji caximacon ma', xi iri' wari' ta' ta. ⁸Ja' e' inuhu' pain com ca'. Co ma' iri tara ne, mi' turuhu' pain Tamataracon Iri' Jam ta na ca tomi' tococwa pane.

Ca ja' con pain com Jeju João

Mateus 3.13–4.11; Lucas 3.21-22; Lucas 4.1-13

⁹Pain oro xec nein ca ja' qui' cocon pain com oro wari' João pain cara pane, maqui' ac cain na Nazaré Jeju. Maqui' nain Nazaré ca pe nain macarain Galileia. Ja' ac tocwa na pain com. Wirico João co ja' non. Ja' pe non pain Jordão ma'. ¹⁰Je win hwet ca' cain com Jeju ma', querec ac cain na nanawin pain ca pa ne ma'. Querec ac cain na Tamataracon Iri' Jam pain ca quiji' hwet con ma' quem. Ac ca quiji' qui' ca xucu' na pain ca quiji' hwet con ma'. ¹¹Tomi' pan ac con na Iri' Jam. Maqui' nain pawin ca tomi' nucun. Panxita' inem ta arain non. Om ca noc camain' xim. Hohot tamana mapa' ta na ca tomi' con ma'.

Ca tomi' querec con pain ca caracat wa Jeju Caxicon Jam

Mateus 4.1-11; Lucas 4.1-13

¹²Tomi' ac con na Jeju Tamataracon Iri' Jam: Mao rain mahweri cain ta non. ¹³Mon to wet ac cain na i cain. Ma' 40 na xec pain ca mon to wet cain i cain. Tomi' querec ac con na pain ca caracat wa Caxicon Jam. Ma' nain i cain caji carawa ca mana' quem. Ane quep xiho' cocon oro jam co taramaja mi' nonon Iri' Jam ne.

Ca xo' taramaja pin ca Jeju

Mateus 4.12-22; Lucas 4.14-15; 5.1-11; João 1.35-42

¹⁴Tao' pe pin iri ta João ma' ne, mao ac cain na Galileia Jeju. Pijim' ac cain na capijacon Iri' Jam ca tomi' hwet napari' pain ca to' witan xim capari' ca'. ¹⁵Ca' na ca pijim' nucun pane: Wixicam pin na xec nein ca taramaxicon pe ho' xim capari' Iri' Jam ta na. Cwirin' je, howa jein

capijacon ca tomi' hwet nuhu' pain ca to' witan xim cuhu' ta na ca pijim' nucun pane.

¹⁶Xut ac cain na cacarain cote ne com ma', Galileia ma'. Querec ac tococwa na Simão con coxa' ca ma', André ma'. Xin mi' nana pain com caji wi ca mam' pa' caca hwam. Xi pa' taxipa' ara caca hwam ma', vender vender ac cocon na quem, je i ma' ca taramaja nucucun pane. ¹⁷Tomi' ac tococwa na: Harahap je, ja' ja' xine. Ca' na ac xuhu' tara pain ca cut in wa wari'. Win ne ca cut in taxipa' hun hwam cwa', ac i ma' jujun oro wari' quem. Ma' ta howa cacapa' pahu' ta inuhu' na ca tomi' tococwa ma'.

¹⁸Ma ac caca na, an to hap pin ac cacain na ca mam' pa' caca hwam. Ja' ja' ac cocon na Jeju.

¹⁹Xut tiquin' mao ac ca na. Xut xut, querec ac tococwa na mana panxica Zebedeu ma', Tiago con coxa' ca João ma'. To nanain mam' horoho nucucun. Ara xo' nanain ca mam' pa' caca hwam ma'. ²⁰Harahap je ta ac tococwa na. Ma ac caca na, paca' ac cocon na cote caca ma', Zebedeu ma', wiricoco oro co cut nanain dinheiro pain ca taramaja mi' cocon ma' quem, an to pin tata pain mam' horoho nucucun. Ja' ja' ac cocon na Jeju.

Ca tomi' mo pin con caxicon jam Jeju

Lucas 4.31-37

²¹Mama' ac cacain na Cafarnaum. Maqui' pin iri na xec nein ca xao to wa ne ca xumu wa ne, pain sábado ma', mao ac cain na xirim ca cut in to xucucun oro win judeu urut ma'. Pijim' ta' ta ac ca na, ca' na ac tococwa na pain capijacon Iri' Jam. ²²Wa wa wa wa xam' nonon oro wari' co taraju nanain ca pijim' nucun, xi an hwet pan ara cain ca hwara' opa nucun pain ca ca' na cain capijacon Iri' Jam ta. Om ca an xiho' tococwa oro co tomi' capijacocon e' nana pain ca ca' na taxipa' nanain ca xirao' nucun Moisés ma'.

²³Pijim' pijim' wet na Jeju ma', pain ca pijim' pe cain xirim ca cut in to xucucun ma', merem ac ca na wari' co corom pe ho' non caxicon Jam. ²⁴Cain' cain' xim maparut quem Jeju co maqui' nain Nazaré? To' om pin xim maparut ra? Querec pin' inem ta! Wum co Iri' Wari' co wara tora' ca Iri' Jam pane! Iri' Panxica ma ta! Ac i ma' na ca merem ca ma'.

²⁵ Tomi' in pin ac con na Jeju. Merem maho' ra ta! Hwet ca' ron co cwa' ta na ca tomi' con ma'.

²⁶ Pa' mip ac con na tamanain. Wirico caxicon jam co ara mi' non pain tamanain ma'. Merem mip ac ca na, hwet ca' ac con na quem.

²⁷ Wa wa wa wa pi' pin ac caca na oro wari' ma'. Cain' cain' xira con ne? Pijim' jimao na ron. Ac taramaxicon na, hwara' opa tamana na ta! Hwrehwet ca' jujun oro wari' ta iri tata oro caxicon jam ne, tomi' ha' pan ac cocon na, ac i ma' na ca tomi' xucucun.

²⁸ Oro wari' co to nanain oro xijein cidade pain Galileia ma', taraju hap ac cacain na oro ca ara ca ma'.

Ca quep xio pin cocon oro wari' Jeju

Mateus 8.14-17; Lucas 4.38-41

²⁹ Hwrehwet ca' iri nanain xirim ca cut in to xucucun ne, mama' ac cacain na xiricon Simão con André. Ja' ja' nonon Tiago con João ma' quem. ³⁰ Terem' na japinacon Simão ma', xi om ne ca xain ara cama ta. Tomi' hwet ac cocon na Jeju cam. ³¹ Xut hwet ac cam na, quep ac cam na pain micam, quep xiho' ac cam na pain ca tequi' pe cama ma'. Xain xain om pin ac cama na, ara mi' pan ac cocon na pain carawa ca cao' wa quem.

³² Xo' um pin iri na ne, wara corom mao na xina, o qui' o qui' pi' pin ac tococwa na con Jeju oro wari' co caxi nana ma', cocon oro co corom to ho' nonon caxicon jam ma' quem. ³³ Oro wari' co to nanain cidade ma', maqui' maqui' pi' pin ac caca na, xao xao ac cacain na manain xirim ca corom ac wa ma'. ³⁴ Quep xio mija ac tococwa na co caxi nana ma'. Oro xijein ca caxi wa cocon, quep xio quep xio ac tococwa na. Mija nana oro caxicon jam co tomi' jein pin ca ma' quem. Narain ho' ac tococwa na pain ca tomi' wa, xi om ne ca querec pin' ara cocon pain ca Panxica Iri' Jam ca ma'.

Ca pijim' mao cain capijacon Iri' Jam pain Galileia Jeju

Lucas 4.42-44

³⁵ Xec pin ta' iri na ne, om ca xec querec ne, xim xim wet na, tequi' pe ac ca na Jeju. Hwet mao ac ca na, mao ac cain na ca om pe ca wari'.

Momon tomi' ac con na Cote ca. ³⁶ Pirao' ac con na Simão cocon oro win ma' ca ma' quem.

³⁷ Mam' iri nonon ne, tomi' ac cocon na: Pirao' pirao' pi' pin nenem oro wari' ta nonon.

³⁸ Om na, maji ta ac tococwa na. Hwet xuxun oro wari' co to nanain oro ca paric to ne xirim ma', ca to ja' pan napari' ma'. Ma' ta pijim' mi' toton co to nanain i cain ta tata. Je ca maqui' ta' ca' tata.

³⁹ Je ca mao mao pi' pin cain oro xijein cidade pain Galileia Jeju pane. Pijim' pe nain oro xirim ca cut in to xucucun oro win judeu urut ma', tomi' jein pin ac tococwa na oro caxicon jam nucucun oro wari' quem.

Ca quep xio pin tocwa wari' co ma' non caji nan

Mateus 8.1-4; Lucas 5.12-16

⁴⁰ Hwet ac con Jeju na wari' co ma' non caji nan. Lepra na wixinain ca caxi nucun. Pe torotop mi' ac con na, jain jain ac ca na pain ca tomi' mip con ma'. Mo ta quep xio xim mapa' ma', taxi' inem pain ca quep xio taxi' mapa' ta non.

⁴¹ Xiram pa' tamana ac con na Jeju. An piri' iri nain micon ne, quep ac con na, tomi' ac con na: Param inain, xio pin ra ta non.

⁴² Xio hap pin ac ca na, om pin ac con na caji nan.

⁴³ Tomi' ac con na Jeju, tomi' mip non: Wara mao ra e'. ⁴⁴ Taraju wet ne e'. Miri'om roron oro wari' ma'. Ta tomi' hwet momon pain ca quep xio xim ca' me ta non. Hwet e' ron sacerdote co taramaja pe nain cote ne xiricon Iri' Jam ac con na. Noro rain cwere pain ca xio pin ta' ca' ac mon tara, mi' ac mon tara pain carawa ca tomi' capari' Moisés pain cara pane, pain ca tomi' xo' capari' con wari' co xio pin pain caji nan. Mi' ron pain, tom mi' ron pain Iri' Jam me ac mon tara. Tom tain' iri tarain ne, querec pin' ac quequem tara oro wari' pain ca xio pin nem ma', je pain ca querec hohot pin quem Iri' Jam ma' quem na ca tomi' con ma'.

⁴⁵ Ane om tomi' ha' ca ne. Paca' iri non ne, tomi' hwet pin ac tococwa na oro wari' pain ca quep xio pin con Jeju. Taraju taraju pi' pin nanain oro wari'. Je ca mao noc xa e' cain oro cidade Jeju. Mo mo pe mao paxi'

1.44 Oro sacerdote ma', taramaja to nanain cote ne xiricon Iri' Jam. Tomi' mi' nonon con Iri' Jam oro wari', tom tain' mi' nonon pain carawa nucucun quem.

na, xut mao e' nain ca om pe ca wari'. Ane jein hwet cara cocon oro wari' co maqui' nanain oro cidade ma' ne.

Ca quep xio pin con wari' co carama pe Jeju

Mateus 9.1-8; Lucas 5.17-26

2 Om ca pain homa ne, wa' mao mami' ac cain na Cafarnaum Jeju. Wa' qui' na Jeju ta, pe pin nain xiricon win ma' ca ta ac caca na oro wari'. ²Mija nana na oro wari' pain xiricon ma'. Mija nana, xao xao nanain tequipain xirim ma', xao xao nana co hwet to nana ma' quem. Om ca wixicam ac xine man ca corom ac wa cocon. Pijim' hwet ac tococwa na pain capijacon Iri' Jam.

³Maqui' ac caca na wari' co an mamam' nonon wari' co carama pe ma'. Ma' ⁴nana co an mamam' nonon. ⁴Ane om ha' cocon pain ca an mamam' mi' cocon con Jeju ne, xi mija ara caca oro wari' ta. Je ca pa cacain xonein xirim ma', pain ca xat pe pan ca Jeju ma'. Pa pin iri nanain ne, an quiji' ja' pan mi' xun con Jeju ta ac caca na, an quiji' pe ac cocon na pain witacon ca mam' terem' pe ca ma'.

⁵Querec pin' iri tata pain ca howa cocon ne, tomi' ac con na co carama pe ma': Xic am pin inain ca caracat nem ta arain na ca tomi' con ma'.

⁶Xao to nanain i ma' oro co ca' na taxipa' nanain ca xirao' nucun Moisés. Coromicat ximama' ac caca na: Cain' cain' xira con ne? ⁷Para tomi' ac i ma' ca ma' quem xucucun. Iri' Jam ina xi' ma na ron? Xi xic am pin taxi' cain ca caracat wa ca wari' wa ta! Xica' pe na Iri' Jam co xic am pin taxi' nain ca caracat wa ta na ca coromicat ximama' nucucun.

⁸Taxi' nonon Jeju pain ca coromicat ac i ma' caca ma'. Taxi' ximao na ximicon. Para coromicat ac i ma' hwe pain xumuhu' ma' quem ac tococwa na. ⁹I'ina xirapa' pain ca xic am tain ca caracat nem ton co carama pe cwa' ra? I'ina xirapa' pain ca tequi' pe ra ta, an mao rain witam ca terem' pe ma ma', xut ra ta ton ra? Cain' xi i'ina ac capa' quem? ¹⁰Je ca tomi' xuhu' ca' ac tococwa na. Tomi' ton. Ma' ta taxi' mahu' pain ca mi' capa' pain ca hwara' opa wa Iri' Jam ta. Tomi' napa' pain ca Iri' Wari' ta' ca', xic am pin

rain ca caracat nucucun oro wari' co to nanain oro xijein macan' ta napa'. Tomi' ac con na co carama pe: ¹¹Tequi' pe ra. An rain witam ca mam' terem' pe ma ma'. Mao rain xurum ta na ca tomi' con co carama pe ma'.

¹²Tequi' pe hap ac ca na, an ac cain na witacon ca mam' terem' pe ca ma', hwet mao ac ca na quem. Querec querec pi' pin nonon oro wari' pain ca hwet mao nucun ma'. Wa wa wa wa pi' pin ac caca na. Awi na Iri' Jam ta nana. Om ca querec camain' xine ca quep xio tocwa wari' co carama pe pane ta nana.

Ca ja' ja' ne con Levi Jeju

Mateus 9.9-13; Lucas 5.27-32

¹³Mao mami' ac cain na cacarain cote ne com Jeju. Mija nana wari' co hwet nonon. Om ca paric camain' caca. Ca' na ac tococwa na pain capijacon Iri' Jam. ¹⁴Xut xut tiquin' ac ca na, querec ac con na Levi ma', panxica Alfeu ma'. Xao pe pe nain ca taramaja pe ca ma', pain ca cut in cain oro imposto nucucun oro wari' ma'. Ja' ja' ne e' ac con na Jeju. Tequi' pe ac ca na, ja' ja' pin ac con na quem.

¹⁵Cao' pe ac cain na xiricon Levi Jeju. Wirico Jeju, wiricoco co taxipa' ca ma' quem, cao' to ho' ac cocon na. Mija nana oro caracat co cao' to ho' nonon ma' quem, wiricoco co cut in taxipa' nanain oro imposto ma', oro xucucun co hwet taxipa' wixicocon ma' quem, cao' to ho' nonon quem. Xi mija ara caca co ja' ja' nonon ta. ¹⁶Querec iri nonon oro fariseu co ca' na taxipa' nanain ca xirao' nucun Moisés ma' ne. Querec iri nonon pain ca cao' pe ho' cocon oro caracat ne, co hwet taxipa' wixicocon ma', cocon co cut in taxipa' nanain oro imposto ma', tomi' querec ac cocon na co taxipa'

2.10 Pain ca Iri' Wari' ina ta ca Jeju pane, ac ca tomi' ta' ca na ira: Maqui' paxi' inain pawin, ane ac wari' ta' ne. Wata' co iri' taramaxicon ta, co wara tomi' pe ca Iri' Jam pane. Ca' na ca wara tomi' pe ca Iri' Jam pata' pane: Main hwet turuhu' Iri' Wari' ne co to' witan xim nuhu' ta nuhu' pata' pane. To' witan ca' turuhu' pain ca caracat nuhu' ta nuhu' pata' pane, ac i ma' na ca tomi' ta' ca Jeju ira. **2.13** Levi na xijein wixicon Mateus. **2.15** Imposto ma', je i ma' dinheiro ca pagar je caca oro taramaxicon pain governo. Ma' ta ha' caparut pain ca taramaja wa pain ca governo urut ca' nana. Je cwerein pain cara pane, je cwerein pain xocori ca' quem, pain ca pagar jein imposto ta cacapari' oro taramaxicon. **2.16** Judeu nana oro fariseu pane. Ac taramaxicon nana. Tomi' ca' nonon oro win judeu caca: Na e' na pain ca tomi' ha' xin oro ca xirao' nucun Moisés ca tomi' ha' je capari' Iri' Jam ta. Na e' na pain ca tomi' ha' xin oro ca xirao' nucucun oro hwanana nexi' ca tomi' ha' je cacapari' quem. Ma' ta querec hohot capari' Iri' Jam ta nana pane.

ca ma': Cain' cain' xira co ma' co ca' na taxipa' nuhu' pain capiiacon Iri' Jam ma' quem? Para cao' pe ho' cocon co cut in taxipa' nanain oro imposto ma'? Para cao' pe ho' cocon oro caracat ma' quem na ca tomi' cocon ma'.

¹⁷Taraju nonon Jeju ma' quem. Tomi' ac cocon na: Om ca cwirin' je toton oro wari' co awi urut xi' ma nana ma'. Cwirin' je e' inonon co querec pin' pan xucucun pain ca caracat nucucun. Win ne ca om aramao xio tococwa oro wari' co om caxi nana ma'. Aramao xio e' tata co caxi nana ma'. Ac i ma' ina quem, cwirin' je e' inonon oro caracat. Je ca maqui' ta' ca' na ca tomi' tococwa ma'.

**Ca om na ne pain ca joc wanan xine ca pijim' nucun
Jeju pain wara ca pijim' nucucun oro hwanana**

Mateus 9.14-17; Lucas 5.33-39

¹⁸Co taxipa' ca João co ja' com ma', an to taxipa' nanain ca cao' wa pain ca tomi' xun Iri' Jam caca pane. Ac i ma' nana oro fariseu ma' quem, an to taxipa' nanain ca cao' wa pain ca tomi' xun Iri' Jam caca pane. Ma' ac caca na wari' co xuruxut hwet nonon Jeju ma'. Tomi' ac cocon na: Noro roron co taxipa' ca João ma'. Noro roron co taxipa' caca oro fariseu ma' quem. An to taxipa' nanain ca cao' wa, ma' ta tomi' xun Iri' Jam nana. Para om ac i ma' caca co taxipa' ma ma' quem na ca tomi' querec cocon ma'.

¹⁹Om na, noro jujun oro wari' co tomi' querec te xucucun pain ca an tam narima' ca win ma' nucucun ma' ac tococwa na. Ma' tara ca an to ac cacain ca cao' wa pain ca pe ho' pe ho' wet cocon win ma' nucucun co an tam nam narima' ra? Om ca an to ac cacain, xi tomi' querec te ara caca ta. Om ca ha' cocon pain ca an to cacain ca cao' wa pain ca pe ho' pe ho' wet cocon co an tam nam narima' ma'. ²⁰Ame hwe e', main maqui' tara oro xec nein ca an ca' tococwa con. Je tara oro xec nein ca an to pin cacain ca cao' wa con na ca tomi' tococwa ma'.

²¹Noro jun wari' co oc xo' ton non wara wom co wein ma' quem ac tococwa na. Om ca oc tacan mi' con con xocoricon pawiricon wom. Mo

2.16 Wari' co cut in taxipa' nanain oro imposto pane, taramaja mi' nonon oro taramaxicon nucucun oro romano, taramaja mi' nonon taramaxicon Herodes quem. Mija nana co mixein ho' mixein ho' nonon oro win judeu caca. Cut in tiquin' ca' nanain dinheiro ca cut in je tococwa pane. Cut mi' wijimain iri tata pain oro taramaxicon ne, pe ho' wijimain ac cocon na quem. Je ca noc tococwa pane. Noc tamana nonon oro win judeu caca pane.

ta oc tacan mi' con con xocoricon pawiricon wom ma', wixicon pin ac ca tara pain ca aram aram hohoc ton con quem, cote ne pin ac ne tara ca wein nucun. ²² Ac i ma' na con wari' co ji'ao an pe xo' tain nain comi uva ca om mana' querec ma' quem. Om ca ji'ao an pe xo' cain pain wara tapari carawa. Mo ta ji'ao an pe xo' cain xocori comi uva ca om mana' querec pain wara tapari carawa ma', mana' iri tara ca moin' nein ne, wein mao ac ne tara tapari carawa. Em' pin ac ne tara comi uva, em' pin ac ne tara tapari carawa ma' quem. Je ca ji'ao an pe xo' e' xine xocori comi uva pain xocori tapari carawa ma' na ca tomi' tococwa ma'.

**Ca tomi' em' tococwa co taxipa' ca Jeju pain ca
om xao to wa cacain ximicocon pain sábadó**

Mateus 12.1-14; Lucas 6.1-5

²³ Maqui' iri na sábadó ne, xut mao ac cain na totain trigo Jeju. Wirico, wiricoco co taxipa' ca quem, xuruxut mama' ac cacain na totain trigo. Xuruxut xuruxut, caracat ac cacain na xirinain trigo co taxipa' ca ma'. Ma' ta cao' xin ta nana.

²⁴ Ma' nana oro fariseu co tomi' ca' nonon Jeju ma': Noro roron co taxipa' ma ma'. Para taramaja caca pain sábadó ca', pain ca caracat cacain xirinain trigo ma'? Tomi' caho' ara xi' napari' ca xirao' nucun Moisés pain ca taramaja wa pain sábadó ta na ca tomi' querec cocon ma'.

²⁵ Om na ta ac cocon na Jeju. Om ca noro hwein capijacon Iri' Jam ra pain ca pijim' xine ca ara ca taramaxicon Davi cara pane, pain ca pe' qui' caca pain ca om qui' cocon carawa ca cao' wa Davi cocon oro win ma' ca pane? ²⁶ Pain oro xec pain cara pane ca iri' taramaxicon nucucun oro sacerdote Abiatar pane, corom mao ac cain na xiricon Iri' Jam Davi. Cao' ac cain na capam' ca an toco' mi' tocwa Iri' Jam. Cao' xica' to xirarain oro sacerdote. Tomi' caho' paxi' tata pain ca cao' wa oro xucucun wari'. Ane cao' pan cain Davi ne. Cao' jein quem ac tococwa na oro win ma' ca quem na ca tomi' tococwa ma'.

2.22 Pain ca pijim' joc mam' mi' tococwa con wara wom con xocoricon pawiricon ma', je pain comi uva ca om mana' querec ma' quem, ca' na ca tomi' mao nein ca pijim' nucun: Oro wari' co hohot naparut ta nanain oro ca tomi' nucucun oro hwanana ma', co hohot naparut ta nanain oro ca ca' na nucucun oro fariseu ma' quem, noc nanain xocori ca pijim' ne ta na. I'ina nonon pain ca howa ni ca' cacain oro wara ca howa nucucun. I'ina nonon pain ca howa pin cacain xocori ca pijim' ne ta na.

²⁷ Tomi' ac tococwa na: Mi' napari' pain xec nein ca xao to wa ne ca xumu wa Iri' Jam, ma' ta quep xiho' cuhu' pain ca wari' nuhu' ta napari'. Om ca mi' e' capari' pain ca tomi' ha' e' xun pain ca om taramaja wa pain xec nein ca xao to wa ne ca xumu wa ta. ²⁸ Je ca tomi' xuhu' ca' ac tococwa na. Taramaxicon ina. Wata' pain ca Iri' Wari' ta' ca', Taramaxicon pan ina. Wata' co tomi' xo' nuhu' pain carawa ca ara xi' hwe pain xec nein ca xao to wa ne ca xumu wa quem na ca tomi' tococwa ma'.

Ca quep xio pin tocwa wari' co xirac micon

Mateus 12.9-14; Lucas 6.6-11

3 Oro xijein xec ma' iri na ne, corom mao mami' ac cain na xirim ca cut in to xucucun oro win judeu urut Jeju. Pe nain i ma' wari' co xirac micon ma'. ²To nanain i ma' co tocojin' nonon Jeju quem. Je ca ja' noro cocon ma'. Quep xio ton tara pain xec nein ca xao to wa ne ca xumu wa ca' ra? Om ta quep xio ton ca ra, ac i ma' na ca coromicat nucucun.

³Tomi' ac ca na Jeju, tomi' non wari' co xirac micon: Tequi' pe ra e'. Hap ra, xat pe rain ximijaxut ca' non.

⁴Tomi' querec ac tococwa na co tocojin' nonon ma'. Cain' cain' xixi' pain xec nein ca xao to wa ne ca xumu wa ca' quem? Ma' ca ara je capari' Iri' Jam quem? Om ca hohot ne pain ca quep xiho' xun wari' ra? Hohot na pain ca quep em' xun ra? Om ca hohot ne pain ca to' witan xun ra? Hohot na pain ca to' pa' pin xun ra? Ac i ma' na ca tomi' querec tococwa ma'. Hehe ac caca na quem. Om ca tomi' camain' caca.

⁵Noro ac tococwa na pain ca to to mam' pin cocon ma'. Mana' tata, tomi' xaxa' na cocon quem. Xi noc ara cacain ca taraju pa' wa ta. Tomi' ac con na co xirac micon ma': Coc matam rain mum ma' ta non. Coc matam ac cain na, awi pin ac ne na con.

⁶Hwrehwet mama' ac caca na oro fariseu ma'. Hwet ac cocon na oro win ma' ca taramaxicon Herodes ma' quem. Tomi' xo' xijexi' ta, ma' ta to' pa' pin xun Jeju ta xucucun.

Ca quep xio pin tococwa oro wari' pain cacarain com

⁷Maji ta ac ca na Jeju, mama' xin cacarain cote ne com ma' ac tococwa na co taxipa' ca ma', mama' ac caca na quem. Mija nana wari' co ja' ja'

nonon. Om ca paric camain' caca. Maqui' nanain Galileia. ⁸Ma' nana co maqui' nanain Judeia quem. Maqui' nanain Jerusalém, maqui' nanain macarain Idumeia ma', maqui' nanain xijein cacarain com ma' quem, pain xijein cacarain Jordão ma', maqui' nanain oro xijein cidade ca to ja' pan nain Tiro je pain Sidom ma' quem, je ca maqui' caca oro wari' pane. Mija nana. Taraju ara xi' nanain oro ca ara ca Jeju pane. Hwet ac cocon na.

⁹Mija nana wari' ta ac ca na, tomi' ac tococwa na co taxipa' ca ma': An tac xo' mi' xine pain wijimain mam' horoho wa ma'. Xao pe tain, ma' ta om xao xao cacapa' oro wari' cwa' ta tata. ¹⁰Xi mija ara caca co quep xio ca pane ta. Je ca xao xao tamana cocon oro wari' co caxi nana ma'. Ma' ta quep xun nonon. ¹¹Oro wari' co corom to ho' nonon oro caxicon jam ma', querec iri nonon Jeju ne, pe torotop mi' pe torotop mi' ac cocon na. Merem pan ac caca na oro caxicon jam nucucun. Panxica Iri' Jam ma ta nonon Jeju pain ca merem nucucun. ¹²Ane tomi' in pin tococwa ne. Ta tomi' hwet mahu' cocon oro wari' me ta tata pain ca tomi' mip tococwa ma'.

Ca tora' cocon oro apóstolo Jeju

Mateus 10.1-4; Lucas 6.12-16

¹³Jeju ma', piri' mao ac cain na ca tamaja pan ne macan'. Harahap je ac tococwa na co param pan ca ma'. Hwet ac cocon na. ¹⁴Tora' 12 ac tococwa na. Apóstolo je pain ca tomi' hwet huhun pain capija oro wari' ta ac tococwa na. Taxipa' xine, main pijim' ac hwein tara capijacon Iri' Jam, pijim' mama' ac hwein tara pain pira. ¹⁵Mi' xuhu' pain ca tomi' jein pin huhun oro caxicon jam quem ac tococwa na. ¹⁶Ma' 12 nana co tora' ca ma'. Mo nana: Simão ma', co wara o' ma' ni ca pane, pain ca Pedro pin ra ta con pane. ¹⁷Ma' ac ca na Tiago con coxa' ca João ma'. Mana panxica Zebedeu nana Tiago con João ma'. Tocwan na wixicocon con Jeju. Boanerges tara xijein wixicocon nonon. Ac comerem nana ta na ca tomi' mao ne xijein wixicocon. ¹⁸Ma' ac ca na André con Filipe con Bartolomeu con Mateus con Tomé ma'. Ma' ac ca na Tiago panxica Alfeu ma'. Ma'

3.16 O' ma' ni iri non Simão Jeju ne, pain ca Pedro pin ra ta con pane, ca' na ca coromicat nucun: Hwara' opa pan ra cocon oro win apóstolo ma ma'. Ac ca taramaxicon pe ho' momon tara, ac i ma' na ca coromicat nucun Jeju pane. Ma' nana wari' co Simão Simão wet nonon, ma' ac caca na co Simão Pedro nonon, ma' ac caca na co Pedro e' nonon quem.

ac ca na Tadeu ma'. Ma' ac ca na Simão co jain jain tamana nonon oro win ma' ca pain ca witan ca' xun cocon oro romano ma'. ¹⁹Ma' ac ca na Judas Iscariotes ma' quem. Wirico Judas Iscariotes co quep xiho' nonon oro taramaxicon pain ca quep xun cocon Jeju pane, ame hwe e'. Ac i ma' nana oro co apóstolo je ca Jeju pane.

Ca tomi' napat cocon Jeju pain ca wirico Caxicon Jam co mi' nem pain ca hwara' opa nem ta cocon pane

Mateus 12.22-32; Lucas 11.14-23

²⁰Corom mao ac cain na xirim Jeju. Maqui' mami' ac caca na oro wari' quem. Mija nana ta! To' i'ina nonon Jeju cocon co taxipa' ca ma'. To' i'ina nonon pain oro carawa ca ara xi' caca, om ca ha' cocon pain ca cao' wa quem. ²¹Taraju iri nana oro ca nari nucun ma' ne. Cain' cain' xira ne ac caca na. Tamanain na ron! Harahap je con! O in qui' xun ta nana.

²²Oro co ca' na nanain ca xirao' nucun Moisés ma', co maqui' nanain Jerusalém ma', tomi' ximama' ac cocon na Jeju: Om na, corom pe ho' non Belzebu ta. Wirico Belzebu co taramaxicon nucucun oro caxicon jam ma', wirico co mi' non pain ca hwara' opa nucun. Wirico co mi' non pain ca tomi' jein pin cocon oro caxicon jam ta nonon.

²³Harahap je, tomi' xo' xuhu' ta ac ca na Jeju: Ma' tara ca tomi' mo pin ac xucun Caxicon Jam ra tata, pijim' joc mam' mi' ac tococwa na cocon oro wari' co to ho' xucucun pain macaracocon. ²⁴Noro jujun oro wari' co to ho' xucucun pain macaracocon ma'. Mo ta mana' caracan xucucun, to ho' to ho' om pin ac xucucun na. ²⁵Ac i ma' nana oro wari' co nari xucucun ma' quem. Nari paxi' xucucun, xica' pe paxi' na xiricocon. Mo ta mana' caracan xucucun, to ho' to ho' om pin ac xucucun na quem. ²⁶Ac i ma' na con Caxicon Jam cocon oro win caxicon jam ca ma' quem. Mo xi mana' caracan xucucun, mo xi tomi' jein pin caracan xucucun, om xi hwara' opa mami' caca. To' om pin ac xucucun xira pain ca hwara' opa nucucun. ²⁷Je ca tomi' xuhu' ca' ac tococwa na. Noro jun wari' co cut noc xa tain nain caramaxicon waximain xirim co hwara' opa ma'. Om ca ha' con pain ca cut noc xa e' cain caramaxicon pain ca om pao' pe querec con ma'. To' pa hot pin iri tarain manain xiricon ne, pao' pe ac con tara

waximain, ha' pin ac con tara pain ca cut noc xa pi' pin cain caramaxicon. ²⁸ Je ca tomi' xuhu' ca', tomi' iri'o' inuhu' ta ac tococwa na. Oro wari' co pan teretem nana ma', co ara nanain oro xijein ca caracat wa ma', oro wari' co tomi' napat nonon Iri' Jam ma' quem, xic am pin ac xine tara ca caracat nucucun. ²⁹ Wari' co tomi' napat nain Tamataracon Iri' Jam ma' iri na ne, om ta xic am pin camain' xine ca caracat nucun ta. Pe ho' cara toron ca caracat nucun ta na ca tomi' tococwa ma'.

³⁰ Tomi' ac i ma' na Jeju pane, xi om ne ca tomi' napat ara cocon pain ca corom pe ho' non Caxicon Jam ta cocon ma'.

Ca tomi' xun Jeju ta cama jicon cocon xurucun

Mateus 12.46-50; Lucas 8.19-21

³¹ Maqui' ac cama na jicon Jeju cocon xurucun. Hwet to nana, tomi' ron Jeju ta ac cocon na wari' ma'. ³² Mija nana wari' co xao to xao to mam' pin nonon Jeju ma' quem. Hwet to nana xerem cam jim ta Jeju ac cocon na. Tomi' xim nenem ta na ca tomi' cocon ma'.

³³ Ma' co na' ta' quem? Ma' co xere ta' quem na ca tomi' querec ca ma'. ³⁴ Noro ac tococwa na oro wari' co xao to xao to mam' pin nonon ma'. Wiricacam caram cwa' co na' ta' cwa', co xere ta' cwa' quem ac ca na. ³⁵ Oro wari' co ara nanain ca param nucun Iri' Jam ma', wiricacam co xere ta' ta, wiricacam co na' ta' quem na ca tomi' tococwa ma'.

Ca pijim' joc mam' mi' tococwa con wari' co wixicaracao' nain tocwi trigo pain totacon

Mateus 13.1-23; Lucas 8.1-15

4 Ca' na toton pain capiiacon Iri' Jam ta ac ca na Jeju ma', ca' na pe ac cain na cacarain cote ne com. Mija nana wari' co coco' coco' mam' nonon ma'. Om ca paric camain' caca. Je ca piton pe tain cain mam' horoho wa ca ho pe cacarain com ma'. Xao pe ac ca na. Coco' to pan ac

3.27 Pain ca pijim' joc mam' mi' tococwa con wari' co hwara' opa ma', co hwara' opa tiquin' ca' non wari' co cut noc xa tain nain caramaxicon ma', tomi' xo' ca' tata: Wara to' quiji' pin inon Caxicon Jam, xi om ne ca hwara' opa tiquin' ca' ara ton ta. Je ca ha' capa' pain ca tomi' jein pin toton oro caxicon jam co corom to ho' nonon oro wari' ta na ca tomi' xo' tococwa ma'. **3.28** Pain ca tomi' ac i ma' ca Jeju ma', tomi' mi' non wari' co cwirin' pin nain ca caracat nucun. Cwirin' pin iri nain ne, xic am pin ac xine na ca caracat nucun.

cacain na namaji pain cacarain com oro wari' ma' quem. ²Pain ca ca' na tococwa pain capijacon Iri' Jam oro wari' pane, mija na ca pijim' joc mam' mi' tococwa pain oro carawa pane.

³Taraju wet je e' ac tococwa na. Wixicaracao' tain tocwi trigo pain tota ta ac ca na wari' ma', ⁴wixicaracao' wixicaracao', ma' ac ne na tocwi trigo ca camara' to nain cacarain wana. Maqui' ac ne na oro wijimain me, itac pin ac nein na quem. ⁵Ma' ac ne na tocwi trigo ca camara' to nain pacun ca ma' wijimain macan' ma' quem. Orot hap na i ma', xi mija ne macan' ta. ⁶Hwet iri na xina ne, nonoc ac cain na, cono' pin ac ne na quem, xi mama' nein pira caximain ta. ⁷Camara' to ac nein na pi wirain tocwi trigo ma' quem. Hwara' ac ne na pi ma', mo' ac nein na quem. Om ca wina ac ne pain. ⁸Oro wirain tocwi trigo ca camara' to nain macan' ca awi ma' iri na ne, orot ac ne na, hwara' pin ac ne na, mi xo' tamana ac ne na quem. Pain xijein arain ma', mi 30 na tocwi. Pain xijein arain ma', mi 60 na tocwi. Pain xijein arain ma', mi 100 na tocwi quem. Ac i ma' na ca pijim' joc mam' mi' tococwa con wari' co wixicaracao' nain tocwi trigo pain totacon pane.

⁹Tomi' ac tococwa na: Mo ta taraju pa' xixi' na hwe ma', je ta taraju wet qui' hwe ta tata.

¹⁰Aram aram xica' to ac caca na. Mo nana: Wirico Jeju, wiricoco co taxipa' ca ma', co ma' 12 nana ma', wiricoco oro xucucun co to ho' nonon ma' quem. Tomi' querec ac cocon na: Para pijim' joc mam' mi' maparut con wari' co wixicaracao' nain tocwi trigo pain totacon quem? Cain' ca tomi' mao ne ca pijim' nem quem na ca tomi' cocon ma'.

¹¹Om na, wara coromicat xo' na Iri' Jam pane ac tococwa na. Main taramaxicon pe ho' toton oro wari' co howa nanapa' ta na, ac i ma' paxi' na ca coromicat xo' nucun pane. Ane om tomi' hwet tococwa pain oro wari' ne. Wahu' pain ca taxipa' mahu' ca', an hwet mi' nuhu' pain ca coromicat xo' nucun. Mi' nuhu' pain ca taraju pa' wa. Oro xucucun wari' co om howa nanapa' ma' iri nana ne, pijim' joc mam' mi' e' inonon pain oro ca pijim' wa. ¹²Ma' ta hwet pin ne ca xirao' pe nucun profeta cara pane. Ca' na con pane:

Querec paxi' nana,
ane om querec pin' caca ne.
Taraju taraju paxi' nana,
ane om taraju pa' caca quem ne.

Mo xi taraju pa' caca,
 in hwet ac cocon Iri' Jam xira,
 xic am pin ac xine xira ca caracat nucucun ta.

Ac i ma' na ca xirao' pe nucun profeta cara pane ta na ca tomi' tococwa ma'.

¹³ Tomi' querec ac tococwa na: Om ca taraju pa' hwein i cara ca pijim' ta' cara ne ra? Cain' xi taraju pa' ac hwein oro wirain ca pijim' ta' ma' quem tata. ¹⁴ Tomi' xo' xuhu' pain ac tococwa na. Wari' co wixicaracao' nain tocwi trigo ma', tomi' joc mam' mi' non wari' co pijim' nain capijacon Iri' Jam. ¹⁵ Tocwi trigo ma', ca camara' to nain cacarain wana ma', tomi' joc mam' mi' nain capijacon Iri' Jam. Carawa ca ara nain pain ca itac pin nein oro wijimain me ma', tomi' joc mam' mi' nain carawa ca ara nonon oro wari' co taraju paxi' nanain capijacon Iri' Jam. Taraju iri nanain ne, maqui' hap ac ca na Caxicon Jam, cut ca' ac tococwa na pain capijacon Iri' Jam ca wixicaracao' mi' wa pain ximicocon. ¹⁶ Carawa ca ara nain tocwi trigo ca wixicaracao' mi' wa pain pacun ca ma' wijimain macan' ma' iri na ne, tomi' joc mam' mi' nain carawa ca ara nonon oro xucucun wari' co taraju paxi' nanain capijacon Iri' Jam. Tomi' querec te hap paxi' nanain, howa pin paxi' nanain quem. ¹⁷ Ane om tomi' querec te cara cacain ne. Tomi' joc mam' mi' nanain pana ca om corom mip caximain pain macan' ma', om ca corom mao nein ximicocon capijacon Iri' Jam. Maqui' iri na carawa ca to' i'ina nonon ne, ja' tequi' quep em' iri nonon oro wari' pain ca howa cacain capijacon Iri' Jam ma' ne, an to hap ac cacain na ca howa wa. ¹⁸ Carawa ca ara nain tocwi trigo ca wixicaracao' mi' wa pain pi ma' iri na ne, tomi' joc mam' mi' nain carawa ca ara nonon oro xucucun wari' co taraju paxi' nanain capijacon Iri' Jam. ¹⁹ Ane coromicat ni ca' cacain ne. Ma' pin iri na oro ca to' i'ina nonon ne, toron ximama' ac ne na ximicocon. Caramaju xixi' na nana quem. Mo xi quep xiho' cocon oro caramaji macan' ca', ane om quep xiho' cocon ne, mixein e' nonon. Win xumu e' nanain oro ca param nucucun quem. Ac ca mo' nein na capijacon Iri' Jam oro caramaji macan' pain ximicocon. Ac ca om wina ne na, xi to' xucun wari' tococwa pain ta. ²⁰ Carawa ca ara nain tocwi trigo ca wixicaracao' mi' wa pain macan' ca awi ma' iri na ne, tomi' joc mam' mi' nain carawa ca ara nonon oro wari' co taraju nanain capijacon Iri' Jam. Howa ac cacain na, ac ca mi caca na quem. Win ne ca mi ne arain trigo ma'. Mi 30 na wirain ma'. Mi 60 na wirain ma'. Mi 100 na wirain ma' quem. Ac i ma' na ca

horon tiquin' caca pain ca howa nucucun. Ac i ma' na ca tomi' xo' tococwa pain ca pijim' joc mam' mi' tococwa con wari' co wixicaracao' nain tocwi trigo pain totacon pane.

Ca pijim' joc mam' mi' tococwa pain naran

Lucas 8.16-18

²¹ Cain' cain' ca wari' co tom nain naran quem ac tococwa na. Tatep pa' na pain too ra? An corom pe na pain tequipain tapit ra? Om na! Tom an hwet pe na pain maxinain. ²² Je ca tomi' xuhu' ca' ac tococwa na. Oro ca tomi' ne ca', pain ca ca' na xuhu' pain capijacon Iri' Jam ca', om paxi' na ca taraju pa' cacain oro wari'. Ac ca joc xim tococwa pain na pain xocori ca'. Ame hwe e', main mi' totoron pain ca taraju pa' wa Iri' Jam. Oro ca tomi' ne ca om taraju pa' caca pain xocori ca', main tomi' xo' totoron pain. ²³ Mo ta taraju pa' xixi' na hwe ma', je ta taraju wet qui' hwe ta ac tococwa na.

²⁴ Taraju wet jein ca tomi' xuhu' ca' ac tococwa na. Mo ta taraju wet hwein, mi' ac huhu' tara pain ca taraju pa' wa Iri' Jam. Mo ta taraju wet taraju wet tiquin' hwein, mi' mi' tiquin' ac huhu' tara pain ca taraju pa' wa quem. ²⁵ Je ca tomi' xuhu' ca': Wari' co taraju wet ma', co taraju pa' xo' nain ca taraju nucun ma', mi' hwara' mami' ac tocwa tara pain ca taraju pa' wa. Wari' co om taraju pa' nain ca taraju nucun ma' iri na ne, pain ca om taraju wet xo' ca ma', an ca' ac tocwa tara pain wijimain ca taraju pa' nucun ma' quem na ca tomi' tococwa ma'.

Ca pijim' joc mam' mi' tococwa pain tocwi trigo ca to' jimama' xine

²⁶ Tomi' ac tococwa na: Carawa ca ara ne pain ca taramaxicon pe ho' cocon oro wari' Iri' Jam ma', an xiho' nain carawa ca ara nain tocwi trigo ma', ca wixicaracao' ca wari' pain totacon. ²⁷ In ca' ac cain na, taramaja ni ca' ac cain na quem. Pain xec, taramaja ac ca na, xim iri na ne, pi'am ac ca na quem. Oro xijein xec ma' iri na ne, aram aram orot pin ac ne na tocwi trigo ma'. Hwara' pin ac ne na quem. Om paxi' na ca taxi' cain carawa ca to' hwara' pin nain, ane hwara' pan ne ne. ²⁸ Je macan' ca to' orot pan nain tocwi trigo. To' wina nain. Hwet cain' na arain, hwet ac ne na xirinain, hwerehwet ac ne na tocwi quem. ²⁹ Paca' pin iri na ne, cat ac cain na waximain, xi maqui' pin ara ne xec nein ca cat xin xine ta. Ac i

ma' na ca tomi' tococwa pain ca pijim' joc mam' mi' tococwa pain tocwi trigo ca to' jimama' xine pane.

Ca pijim' joc mam' mi' tococwa pain wijimain tocwi mostarda

Mateus 13.31-35; Lucas 13.18-21

³⁰ Tomi' mami' ac ca na: Ma' carawa ca ara ne pain ca taramaxicon pe ho' cocon oro wari' Iri' Jam quem? Main xi ca pijim' wa ca pijim' joc mam' mi' xuhu' pain quem? Taraju wet je e', an xiho' nain ca pijim' mi' xim xuhu' ca'. ³¹ Carawa ca ara ne ma', pain ca taramaxicon pe ho' cocon oro wari' Iri' Jam ma', an xiho' nain carawa ca ara nain wijimain tocwi mostarda ma'. Iri' wijimain na tocwi mostarda. Om na xijein tocwi memem ca an xiho' nain oro ca oin' to iri' pain totaxi'. ³² Oin' pin iri xin ne, hwara' pin ac ne na, hwara' tiquin' ca' ac nein na oro wirain ca oin' ximama' wa pain xitot. Tapara na quem, iri' cote ne taparain ta. Ha' nain oro wijimain me pain ca quep pe nein xirinain pain ca xio ne oro taparain ma' quem na ca tomi' tococwa ma'.

³³ Ac i ma' na ca pijim' cocon oro wari' Jeju pane. Pain ca taraju taraju wet cocon pain ca pijim' mi' tococwa pain capijacon Iri' Jam ma', pijim' joc mam' mi' e' tata pain oro carawa. ³⁴ Oro ca pijim' nucun pane, pain ca pijim' qui' tococwa oro wari' pane, pijim' joc mam' mi' e' tata pain oro carawa. Xica' pe pin iri na cocon co taxipa' ca ne, tomi' xo' pin ac tococwa na pain ca pijim' nucun quem.

Ca tomi' om pin cain camana' Jeju

Mateus 8.23-27; Lucas 8.22-25

³⁵ Xo' um pin iri na ne, maji pan horoho mama' xin xijein cacarain cain e' ac cocon na co taxipa' ca Jeju ma'. ³⁶ Mama' urut ta ac tococwa na oro wari' ma', piton to ac cacain na mam' horoho wa ma', ca wara xao

4.29 Ma' carawa ca ara nain tocwi trigo pain ca oin' xine ma'? To' hwara' pin nain Iri' Jam. Ac i ma' napari' pain ca taramaxicon pe ho' capari' quem. Wirico pan co to' horon napari' pain ca howa nexi'. Ca howa xun ca', ca to' horon pan capari' ca', aram aram maqui' ta' iri tara xec nein ca cut xim capari' ne, cut mama' ac capari' tara ta. **4.32** Pain ca pijim' ac i ma' ca Jeju ma', tomi' mi' tata co taxipa' ca cocon oro wari' co howa nonon pane, pain ca paric to caca pane. Pijim' pijim' tiquin' ac tococwa na oro xucucun wari' ma', aram aram mija pin ac caca na oro wari' co howa nonon Jeju pain oro xijein macan'.

pe pe ca Jeju ma'. Pan horoho mama' ac caca na. Ma' nana wari' co ja' ja' xun nonon quem, pan horoho ni nanain oro wirain mam' horoho wa ma'. ³⁷ Pan horoho pan horoho. Ane ane maqui' pa' ac cocon na camana' ca nuru mip tamana. Wap tamana na com ta! Wap cam' wap cam' nain mam' horoho nucucun ma', moin' pin tain na com ira. ³⁸ Pi'am pe nain nomoji mam' horoho wa Jeju ma' quem. Mam' pi'am nain ca mam' wina ca ma'. Ho' querec ac cocon na co taxipa' ca. Taramaxicon co ca' na taxipa' capijacon Iri' Jam! Pan corom mama' xi' iri' ta! Cain' cain' xima quem? Cono' ma' xi' ne ma ra na ca merem cocon ma'.

³⁹ Tequi' pe ac ca na, tomi' in pin ac cain na camana'. Mana' mana' om ra ta com ac cain na, tacana pe ra ta hotowa ac cain na hotowa ma' quem. Tacana pe pin ac ne na hotowa ma', mana' mana' om pin ac ne na com quem.

⁴⁰ Cain' cain' xihwe quem ac tococwa na co taxipa' ca ma'. Para jin' tamana hwe ma' quem? Om ca howa querec mahu' ra tata.

⁴¹ Xi jin' tamana ara caca ta. Cain' cain' ca co cwa' ne ta ac xucucun na. Tomi' ha' ximao non oro carawa ra? Tomi' ha' non camana' pain com quem ra xucucun.

Ca quep xio pin tocwa wari' co corom pe ho' non caxicon jam

Mateus 8.28-34; Lucas 8.26-39

5 Pan horoho pan horoho hwet ac cacain na xijein cacarain ma', je pain macaracocon oro wari' nein Gerasa ma'. ² Piri' mao iri na Jeju ne, hwet qui' ac ca na wari' co corom pe ho' non caxicon jam. Maqui' nain oro manain pacun ca cut corom to tococwa co cono' nana. Xut cam' ac con na Jeju. ³ Wari' ma', pe taxipa' nain oro pacun ca cut corom to tococwa co cono' nana. Pao' pe xun paxi' nonon oro wari' ma', ane om na ca ne. Pao' pe xun pain arain too paxi' nonon quem. Ane om na camain' ca ne. ⁴ Pao' pe ho' pao' pe ho' paxi' nonon pain oro arain too ma', pain caximacon pain micon ma'. Ane cuc tapiripit cain arain too ca pe micon ma' ne, jicat pin ac cain na arain too ca pe caximacon ma' quem. Hwara' opa paxi' nana co quep xun nonon ma', ane om ha' cocon pain ca quep cocon ne. Xi hwara' opa tamana ara ca ta. ⁵ Tama' xut in ximao pe nain oro pacun ca cut corom to tococwa co cono' nana, je pain oro ca tamaja pan ne macan'

ma' quem. Tama' u ximao na pain xec je pain xim ma', tama' mam' curuc ximao pan xucun pain pacun ma' quem.

⁶ Querec pira iri non Jeju ne, mo hwet ac con na, pe torotop mi' ac con na. ⁷ Merem mip ac con na: Cain' cain' xim mapa' quem Jeju Panxica Iri' Jam co Iri' Taramaxicon pan? Ac i ma' na ca merem mip con ma'. Ta quep em' mapa' me ta, tomi' mip inem. Tomi' an pe mi' ron pain ca tomi' nem Iri' Jam pata', om ta quep em' ton ta ron pata' ta non. ⁸ Merem ac i ma' na wari' ma', xi om ne ca wara hwet ca' ron co cwa' ta ara con caxicon jam nucun ta.

⁹ Tomi' querec pan ac con na Jeju: Cain' cain' ne wuxum quem non.

Om na, Iritocon napa' wuxu ta ac ca na. Xi mija ara urut pain ca caxicon jam urut ca' na ca tomi' ca ma'. ¹⁰ Jain jain na wari' ma', pain ca tomi' mip con Jeju ma'. Ta tomi' hwerehwet mama' momon pain pira caxicon jam ne me ta na ca tomi' mip nucun.

¹¹ Cao' to nain i ma' caji mijac ma'. Mija na caji mijac. Iritocwinain ta. Cao' to nain ca tamaja pan ne macan'. ¹² Jain jain ac caca na oro caxicon jam nucun wari' ma'. Mama' jein caji mijac ma' xut me. Ma' ta corom hwet urut pain ta na ca tomi' mip cocon Jeju.

¹³ Mama' jein ta ac tococwa na. Hwerehwet ca' ac cocon na, corom hwet ac cacain na caji mijac ma' quem. Mija na caji mijac. Ac ca ma' 2.000 ne na. Tamanain to pin ac ne na quem. Jein quiji' mama' ac nein na ca tamaja ne macan' ma', jein jein, wara ca' na com ma', pan corom mama' ac ne na, cono' cono' pi' pin ac ne na quem.

¹⁴ Caram ma' co querec wet nanain caji mijac ma', jein mama' ac caca na, tomi' hwet ac cocon na oro wari' co to nanain cidade, wiricoco oro co to nanain oro xitot ma' quem. Tomi' hwet nonon pain oro carawa ca ara ne ma'. Maji querec xi' e' ac caca na. ¹⁵ Jein hwet iri nonon Jeju ne, querec ac cocon na co ma' co mija nana oro caxicon jam co corom to ho' nonon ma' ira. Xao pe pin na. Pe pin na wom. Tamanain tamanain om pin na. Jin' pin ac caca na. ¹⁶ Caram ma' co querec nanain ca ara ca Jeju ma', tomi' hwet nonon co xo' maqui' nana ma'. Tomi' hwet nonon pain carawa ca ara non co ma' co corom to ho' nonon caxicon jam ma' ira. Tomi' hwet nonon pain carawa ca ara nain caji mijac ma' quem. ¹⁷ Taraju iri nana oro wari' ne, jain jain ac caca na, mao ra, paca' rain macaraxut ca' ac cocon na Jeju.

¹⁸ Piton pe tain iri nain mam' horoho wa Jeju ne, hwet xim ta Jeju ac ca na co ma' co corom to ho' nonon caxicon jam pane.

¹⁹ Om na ta ac con na Jeju. In mao rain xurum. In hwet roron oro ca nari nem ta. Tomi' hwet roron pain ca ara mi' quem Iri' Jam ca', pain ca quep xio pin quem ca', pain ca xiram pa' quem ca' na ca tomi' con ma'.

²⁰ In mao ac ca na, pijim' mao ac cain na oro xijein cidade pain Decápolis ma'. Xiram pa' napa' Jeju ta, quep xio pin napa' ta na ca pijim' tococwa ma'. Wa wa wa wa pi' pin ac cocon na oro wari'.

Ca quep xio pin cam narima' Jeju, je pain ca to' e' mami' cam pije' quem

Mateus 9.18-26; Lucas 8.40-56

²¹ Pan horoho in mama' ac cacain na xijein cacarain com Jeju cocon co taxpá' ca ma'. Piri' mama' iri nana ne, coco' coco' mam' pin ac cocon na oro wari' pain cacarain cote ne com ma'. Mija nana wari' ta. Om ca paric camain' caca. ²² Maqui' ac ca na wari' co win ma' ne nonon co querec wet nonon oro win judeu caca pain xirim ca cut in to xucucun ma'. Jairo na wixicon. Querec iri non Jeju Jairo ne, pe torotop mi' ac con na pain caximacon. ²³ Jain jain na, tomi' mip ac con na: Hap ra, mi' pin ta' na panxita' ta. Quep ram pain mum ta. Ma' ta xio pin cama, ma' ta om mi' pin cama ta non.

²⁴ Ma ac ca na, hwet ac con na.

Ja' ja' nonon oro wari' quem. Mija nana wari' ta. Om ca paric camain' caca. Xao xao tamana nonon. ²⁵ Pe nain i ma' narima' co ao tamana ma' quem. Ma' 12 na cawaxi' pain ca ao tamana cama ma'. ²⁶ Mija paxi' nana oro doutor co aramao nanam quem. Jain jain tamana na cocon. Pi' ca' nam dinheiro pain ca pagar cocon. Aramao paxi' nanam, ane om xio cama ne. Ximin pin na pain ca ao tamana nequem. ²⁷⁻²⁸ Taraju iri tata oro wari' pain ca tomi' hwet cacain ca ara ca Jeju pain ca quep xio taxi' cocon co caxi nana ma' ne, coromicat ac cama na pain ximicam: Mo ta quep e' ton womicon ma', xio pin ac ta' tara ta na ca coromicat nequem. Mo hwet ton ta ac cama na, joc tutup ac tococwa na oro wari'. Joc tutup joc tutup hwet ac con na pain waracon, quep ac con na womicon. ²⁹ Om hap pin ac ne ca ao ximao cama na quem ma'. Taraju pin' xequem pain ca to' xio pin cam Jeju.

³⁰Wara taxi' xucun Jeju pain ca mam' to' xio pin con wari' pain ca hwara' opa nucun. Xin in hwet ac tococwa na oro wari' co xao xao nonon ma'. Ma' co quep napa' con womu cwa' quem tata.

³¹Cain' cain' xima quem ac cocon na co taxipa' ca ma'. Om ca querec momon oro wari' co xao xao nenem cwa' ra? Para ma' co quep napa' cwa' ma ma' quem? Xi mija ara caca wari' co quep nenem cwa' ta na ca tomi' cocon ma'.

³²Ane noro noro wet tococwa oro wari' co to to mam' pin nonon ma' ne. Ma' ta taxi' ton wari' co quep napa' ta na.

³³Narima' ma', taxi' pin iri xequem pain carawa ca ara nam ne pain ca to' xio pin cam Jeju ma', xut hwet ac con na. Pe torotop mi' ac con na pain caximacon. Jin' na, cocoroc na pain ca jin' nequem. Tomi' hwet ac con na pain ca caxi nequem, je pain ca quep con womicon, je pain ca xio pin cama con.

³⁴Tomi' ac cam na: Xio pin ma ta arain, xi om ne ca howa ara mapa' pain ca quep xio taxi' ta' ca' ac cam na. In mao ra. Ta toron mami' ne xumum me. Om pin na ca caxi nem ta na ca tomi' cam ma'.

³⁵Tomi' tomi' wet nam narima' ma', maqui' ac caca na wari' ma', maqui' nanain xiricon Jairo ma', co querec wet nonon oro win judeu ca pain ca cut in xucucun ma'. Mi' pin na panxima ta ac cocon na. Om xi hap ra mami' mon Taramaxicon co ca' na taxipa' capijacon Iri' Jam ta nonon.

³⁶Taraju nonon Jeju quem, taraju paxi' nonon pain ca tomi' nucucun ma', ane miri'om cocon ne. Tomi' ac con na Jairo: Ta jin' ma me. Howa e' ne pain ca quep xio taxi' tam ta non.

³⁷To wet je pa'ao', ta ja' ja' mahu' me ta ac tococwa na oro wari' co ja' ja' nonon ma'. Xica' to nana Pedro con Tiago con coxa' ca ma', João ma', co harahap je ca ma'. Maji ta ac tococwa na. ³⁸Hwet pin iri nanain xiricon Jairo ma' ne, querec ac tococwa na oro wari' co teretem nana ma'. Mija nana, awaran tamana nana. ³⁹Corom ac ca na Jeju. Tomi' ac tococwa na: Cain' cain' xihwe quem? Para teretem hwe ma'? Para awaran hwe ma' quem? Om ca mi' pin cama pije' ta. Pi'am e' na, ac i ma' na ca tomi' tococwa ma'.

⁴⁰Tatam' tatam' pi' pin ac cocon na, tomi' ximama' nonon quem. Ane tomi' tococwa ne: Hwrehwet mama' je e' tata. Harahap je ta ac con na cote cama cam jicam ma'. Harahap je quem tata co taxipa' ca co ja' ja' nonon ma' quem. Corom mama' ac cacamain na man ca terem' pe cama

pije' ma'. ⁴¹Quep ac cam na pain micam. Talita cumi ac cam na. Pain ca talita cumi cam ma', tequi' pe ra ta pije' na ca tomi' mao nein.

⁴²Tequi' pe hap ac cama na, xut ac cama na quem. Ma' 12 na cawaxi' nequem. Wa wa tamana ac ca na cote cama cam jicam. ⁴³Tomi' mip ac tacacama na: Ta tomi' hwet huhun pain oro wari' me ta, ta tomi' hwet huhun pain ca to' e' mami' tam ca' me ta tata. Mi' jem pain carawa ca cao' wa ta ac tacacama na quem.

Ca in mao cain Nazaré Jeju

Mateus 13.53-58; Lucas 4.16-30

6 Mao ac ca na Jeju ma', mao ac cain na macaracon. Ja' ja' nonon co taxipa' ca ma' quem. ²Maqui' pin iri na sábadu ne, ca' na toton pain capijacon Iri' Jam ta ac ca na, pijim' pe ac cain na xirim ca cut in to xucucun oro win judeu urut ma'. Oro wari' co taraju nonon ma', mija nana co in ac nonon pain ca pijim' nucun. He, cain' cain' ca co cwa' ne ta nana. Ma' co mi' non pain oro ca ara taxi' nucun ma'? Ma' co mi' non pain ca taxi' tamana nucun ma' quem? Ma' co mi' non pain ca ara cain oro ca om ara taxi' ne ca wari' wa ma' quem nana. ³Om ca wirico co cwa' co ara taxipa' pana cara pane ra ac caca na. Om ca cawiji con Maria cwa' ra? Om ca aji' con Tiago con José con Judas con Simão cwa' ra? Om ca to ho' cacapari' oro mon xojam' co aji' nonon cwa' ra? Cain' cain' xira ne nana, miri'om ac cocon na quem. Om ca howa camain' cocon.

⁴Tomi' ac ca na Jeju: Tomi' querec te paxi' ta profeta pain oro xijein cidade ma'. Pain iri' macaracon ma' iri na ne, om ca tomi' querec te tocwa. Noc pan nonon oro win ma' ca cocon iri' ca nari nucun na ca tomi' tococwa ma'. ⁵Je ca om ha' con pain ca ara pe cain Nazaré oro ca om ara taxi' ne ca wari' wa ma'. Quep xio e' tata co caxi nana ma'. Paric nana, om om nana. Quep iri tata pain micon ne, xio xio pin ac caca na. ⁶He, para om howa cacapa' oro win ma' ne cwa' ne ta ac ca na pain ca coromicat nucun.

Ca tomi' xo' tococwa oro apóstolo pain ca taramaja xi' nucucun

Mateus 10.5-14; Lucas 9.1-6

Hwet toton oro wari' co to nanain oro ca paric to ne xirim ma' ac ca na Jeju ma', mao ac ca na, ca' na ac tococwa na pain capiçon Iri' Jam oro wari'. ⁷ Harahap je, tomi' xuhu' ta ac tococwa na co taxipa' ca ma', co ma' 12 nana ma'. Wawaran mama' je pain oro xijein macan' ta ac tococwa na. Mama' 2 mama' 2 xam' je pain ca hwet xun huhun oro wari' ma', pain ca cwirin' jein ca caracat nuhu' ta huhun ma'. Mi' inuhu' pain ca tomi' jein pin huhun oro caxicon jam ta na ca tomi' tococwa ma'.

⁸ Ca' na ca tomi' xo' mam' tococwa ma'. Mama' xi' iri je ne, ta cut hwein oro caramajuhu' me, an xica' pe jein pana ca mam' pan xu wa. Carawa ca cao' wa ma', je caji coco ca mam' cut wa carawa ma', je dinheiro ma' quem, ta cut hwein me ta. ⁹ To jein caji caxim nuhu' ma'. Ta cut tocwan hun wom quem me. ¹⁰ Hwet iri jujun oro wari' pain oro xijein xirim ne, to ho' ac hun tara co pi'am to ho' xine pain xuru ca' nuhu' ma'. Om ta paca' hun. Mon to wet mon to wet maqui' pa' ac cuhu' tara xec nein ca hwet xun huhun xucucun wari' pain xijein cidade. ¹¹ Mo ta hwet xun huhun xucucun wari' co to nanain oro ca paric to ne xirim ma' quem, mo ta om tomi' querec te cucuhu'. Mo ta om ma' camain' ca wari' co taraju xin nanain ca pijim' nuhu' ma', paca' ac huhun tara, wap camara' ac hwein tara ximirinain macaracocon pain caximahu' pain ca paca' huhun ma'. Ma' ta querec pin' xujuhu' pain ca pan teretem nuhu' pain ca noc hwein ca taraju wa ta ac huhun tara quem. Ac i ma' na ca tomi' xo' tococwa pane.

¹² Mama' ac caca na, pijim' mi' ac tococwa na pain capiçon Iri' Jam oro wari' ma' quem. Cwirin' je, an to pin jein ca caracat nuhu' ta tata. ¹³ Mija ac caca na oro caxicon jam co tomi' jein pin caca ma', mija nana oro co caxi nana co ji'ao mi' caca pain winacocon pain homain ma' quem. Ac i ma' na ca quep xio pin tococwa ma'.

Ca ton tapit pin xine winacon João co ja' taxipa' com

Mateus 14.1-12; Lucas 9.7-9

¹⁴ Taramaxicon Herodes ma', taraju ac cain na ca tomi' nucucun oro wari' pain ca tomi' hwet cacain oro ca ara ca Jeju. Xi taraju taraju pi' pin ara cocon ta. Ma' nana co tomi' ca' nana ma': Om na, wirico co cwa' João

cara pane, co ja' taxipa' nonon pain com oro wari' pane. E' mami' na João cara pane. Je tara ca ha' con pain ca ara cain oro ca om ara taxi' ne ca wari' wa ta, ac i ma' na ca tomi' caca ma'. ¹⁵Om na, wirico co cwa' Elias cara pane ac caca na oro xucucun ma'. Oro xucucun ma' iri nana ne, om na, xucun profeta tara, win caca oro profeta cara pane ta nana.

¹⁶Herodes ma', taraju iri nain ca tomi' nucucun ne, tomi' ac ca na: Om na, wirico tara João cara pane. Ton tapit pin jein winacon paxi' inonon oro wari' ne co taramaja mi' nanapa' pane, ane e' mami' ca ne. Wirico tara ta na.

¹⁷Ac i ma' na ca coromicat nucun Herodes con Jeju ma', xi wara quep ara con João pane ta. Quep jun, pao' pe jun, tao' pe jun pain xirinain ca tao' to tao' to to wa ta tata oro wari' nucun pane. Xi om ne ca noc pan ara con João Herodias ta. Wara an paxi' nam Herodias Filipe ma', coxa' ca Herodes ma'. Ane an pan cam Herodes ma' ne. ¹⁸Pan to' ac cain na taraxicon Herodes João ma'. Tomi' caho' nem pain ca an wa manacon coxa' ma Iri' Jam ta non.

¹⁹Je ca noc con João Herodias pane. To' pa' pin ton non, ane nain ho' con Herodes ne. Nain ho' non cam manacon. ²⁰Xi jin' ara con ta. Jin' non pain ca querec pin' con pain ca xut xo' nucun je pain ca taramaja mi' con Iri' Jam ma'. Je ca nain ho' con ma'. Taraju taxipa' non pain ca pijim' nucun quem. Taraju iri non ne, i'ina ac ne na ximicon. Ane hohot cara con ca taraju wa ne.

²¹Aram aram maqui' ac ne na xec nein ca ara tain cama ca param nequem Herodias ma', pain xec nein ca mam' pe wet cacain ca pan' qui' nucun Herodes pane. Harahap je, cao' querec te wi xijexi' ta ac tococwa na oro win taramaxicon ca cocon oro taramaxicon nucucun oro soldado nucun ma' quem. Harahap je tata oro win ma' ca co caramaju tamana nana ma' quem, co to nanain Galileia ma'. ²²Pain ca tomi' querec te pan xucucun ma', corom ac cama na cainacam Herodias ma'. Pi' xirao' in pi' xirao' in ac cama na, tomi' querec te ac cam na Herodes ma'. Tomi' querec te nanam oro win ma' ca co win tomi' querec te ca ma' quem.

Tomi' ac cam na: Ma' carawa ca param ma quem? Carawa ca mi' ne mapa' ma', mi' ac xim pain tara. ²³Tomi' an pe mi' ac cam na pain ca tomi' nucun: Mo ta mi' ne pain xijein cacarain macaraxi' mapa', mi' ac xim pain tara. Tomi' iri'o' inem, om ca mixein ta'. Taraju napa' Iri' Jam pain

ca tomi' an pe mi' xim pain ca tomi' ne ca'. Mo ta om mi' xim pain, wap ma' tarapa' Iri' Jam ne. Ac i ma' na ca tomi' cam ma'.

²⁴ Hwet mao ac cama na, tomi' querec ac cam na jicam. Ma' xi carawa ca mi' ne ton quem na ca tomi' querec cam jicam ma'.

Om na, ton tapit mi' ne pain winacon João co ja' taxipa' com ta ron ta ac cam na.

²⁵ Mo in hwet hap ac con na taramaxicon. Param inem pain ca ton tapit mi' mapa' pain winacon João co ja' taxipa' nonon pain com oro wari' ta. An pe tatarain pain too ta. Param ho' inain ta na ca tomi' con ma'.

²⁶ Cain' cain' xira pata' ne ta ac ca na Herodes. Om xi tomi' an pe mi' tam pain ca tomi' ne cara ne ta ca' xucun. Ane na e' ne pain ca tomi' ha' cam ne, xi om ne ca tomi' an pe mi' ara cam pain ca tomi' nucun ta. Wixipa' tata oro win ma' ca co taraju nonon pain ca tomi' nucun quem. Je ca om an in cain ca tomi' nucun.

²⁷ Tomi' hap ac con na soldado nucun: Ton tapit pin rain winacon João ma'. An qui' ac main tara ta na ca tomi' con ma'. Mao ac cain na xirinain ca tao' to tao' to to wa ma', ton tapit pin ac cain na winacon. ²⁸ An qui' ac cain na pain too. Mi' ac cam pain na, mi' tiquin' mi' ac cam na pain jicam ma' quem. ²⁹ Taraju iri nana co taxipa' ca ma' ne, pain ca mi' pin nucun ma', maqui' ac caca na, an mao ac cacain na curucun. An corom pe ac cacain na pain manain pacun.

Ca tomi' hwara' pin cain capam' con hwam Jeju

Mateus 14.13-21; Lucas 9.10-17; João 6.1-15

³⁰ In hwet ac cocon na Jeju oro apóstolo ma'. Tomi' hwet ac cocon na pain oro ca ara caca pain ca ca' na cocon pain capijacon Iri' Jam oro wari' ma' quem. ³¹ Mija nana wari' co hwet nonon, to to, paca' ca' ac cocon na, maqui' maqui' ac caca na oro xucucun, to to, paca' paca' ca' ac cocon na quem. Mija nana, to' i'ina nonon Jeju cocon co taxipa' ca ma'. To' i'ina nonon pain oro carawa ca ara xi' caca, om ca na cocon ca cao' wa quem. Je ca tomi' cocon co taxipa' ca Jeju ma'. Harahap je, mama' xin i cain ta, pain ca om pe ca wari' cain. Xica' to xi', xao to wa pije' ac hwein tara xumuhu' ta na ca tomi' tococwa ma'.

³² Piton to ac cacain na mam' horoho wa, pan horoho mama' ac cacain na ca om pe ca wari'. ³³ Xica' to xi' paxi' nana, ane mija caca wari' co

querec nonon pain ca mama' nucucun ne. Querec pin' nonon quem. Maji cocon ta, ac xin macan' ta ac caca na, jein mama' ac caca na. Maqui' ac cacain na oro xijein cidade nucucun ma', jein mama' ac cacain na i cain, jein jein, wara tan' ca' ac cocon na quem.

³⁴ An tac iri nanain mam' horoho nucucun ne, piri' ac ca na Jeju. Querec ac tococwa na oro wari'. Mija nana wari' ta. Om ca paric camain' caca. Xiram pa' ac tococwa na, xi an xiho' ara cacain ovelha ca om ma' camain' wari' co querec wet nain ta. Ca' na toton pain capiijacon Iri' Jam ta ac ca na, ca' na ac tococwa pain na quem.

³⁵ Wara irawin pin na. Mo tomi' xun Jeju ta ac caca na co taxipa' ca ma', xuruxut hwet ac cocon na. Irawin pin na ta Jeju. Om nain i ca' xirim ca cut pe xine carawa ca cao' wa quem. ³⁶ Mama' je ximomon oro wari' cwa' ac cocon na. Ma' ta mama' cacain oro xitot, je pain oro ca paric to ne xirim ma', cut pan ac cacain tara carawa ca cao' wa ta nonon.

³⁷ Om na, mi' pan jujun pain carawa ca cao' wa ta ac tococwa na.

Cain' cain' xuxut quem ac cocon na. Xi ma' caparut cote ne dinheiro ta. Mo xi cut tamana xuxut pain carawa ca cao' wa, mo xi mi' 200 urut pain denário pain. Cain' cain' xuxut quem ne nonon.

³⁸ Cain' ca ma' ne capam' pahu'? Noro jein ac tococwa na.

Taxi' iri nanain ne, tomi' ac cocon na: Ma' 5 naparut wijimain capam' ca'. Ma' 2 naparut hwam cwa' quem nonon.

³⁹ Xao to ni xao to ni xam' jein tononoin ma' quem jujun oro wari' ta ac tococwa na. Awi na tononoin ma' quem. Xao to awi nonon oro wari'. ⁴⁰ Xao to ni xao to ni xam' ac caca na. Ma' 50 nana pain i ca', ma' 100 ac caca na pain i ma'. Ma' 50 ac caca na pain i cain, ac i ma' ac i ma' pi' pin nana. ⁴¹ Cut ac cain na capam' ca ma' 5 ma', wirico hwam co ma' 2 ma' quem. Cut iri nain ne, noro pawin ac ca na, tomi' ac con na Iri' Jam: Tomi' querec te urut pum pain ca mi' maparut pain capam' con hwam cwa' quem Te non, jicaracat ac cain na capam', cut mi' ac tococwa pain na co taxipa' ca ma'. Maxiram' mi' jujun pain oro wari' ta ac tococwa na. Ac i ma' na con hwam quem. Jicaracat non, maxiram' mi' ac tococwa na con oro wari'. ⁴² Cao' cao' xam' ac caca na. Ma'am ca' nanain, ma'am ma'am

6.37 Denário ma', je i ma' dinheiro nucucun oro romano pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na denário pain ca taramaja nucun.

pi' pin nana. ⁴³Pan cut xin pawirinain ta ac caca na co taxipa' ca ma', cut ho' cut ho' ac cacain na pain coco. Moin' 12 na cotain pain pawirinain capam' je pawiricon hwam. ⁴⁴Ma' 5.000 nana ca tarama' nucucun co cao' nana quem.

Ca xut cain quimain com Jeju

Mateus 14.22-36; João 6.16-21

⁴⁵Pan cut pin iri nanain pawirinain capam' con hwam co taxipa' ca ne, tomi' ac ca na Jeju: Piton to jein mam' horoho wa ma' ac tococwa na. Wara pan horoho mama' jein xijein cacarain pain Betsaida cain ta tata. Querec querec mama' toton oro wari' pa'ao', aram aram hwet ac xuhu' tara quem ac tococwa na quem.

⁴⁶Querec querec mama' iri nonon oro wari' Jeju ne, piri' mao ac cain na pacun. Tomi' ton Te ta na.

⁴⁷Xo' um pin iri na ne, wara to pin nanain ximijain com pain mam' horoho nucucun co taxipa' ca ma'. Jeju ma' iri na ne, pe cara nain pacun. Xica' pe na. ⁴⁸Querec pira ac tococwa na pain ca pan horoho caca ma'. I'ina nonon, xi nuru cam' ara cocon hotowa ta. Xec pin ta' iri na ne, om ca hwet querec ca xina, xut hwet toton ta ac ca na, xut hwet ac tococwa na quem. Xut hwet tata pain quimain com. Xut xut, wixicam pin ac tococwa na, ac ca xut tiquin' ca' toton ca paxi' na ira. ⁴⁹Querec iri nonon pain ca xut cain quimain com ma' ne, coromicat ximama' ac caca na. Jima tara ron nana, merem merem nana. ⁵⁰Querec querec pi' pin nonon. Jin' tamana nana.

Ane tomi' hap ca Jeju ne. Om na, ta jin' mahu' me ta, wata' ta. Quereme je ta tata. ⁵¹Piton pe ac cain na mam' horoho wa ma', nuru nuru om pin ac ne na hotowa. Wa wa tamana ac cocon na. ⁵²Xi querec pin' cocon pain iri' ca hwara' opa tamana nucun pain ca mi' pan con pain ca to' hwara' pin cain capam' Iri' Jam ta. Opain ara xi' na ximicocon ta.

⁵³Horoho mama' ac cacain na xijein cacarain cote ne com ma'. Tan' mama' iri nanain macarain Genesaré ma' ne, tucu pan ac cacain na mam' horoho nucucun ma'. ⁵⁴Piri' iri nana ne, querec pin' hap ac cocon na Jeju oro wari'. ⁵⁵Maji tomi' xuxun oro win ma' nexi' ta ac caca na, jein mama' ac cacain na oro xijein cidade ma'. Maqui' na Jeju ta, an mamam' mi' xun

6.44 Ma' paxi' nana oro narima' cacam oro hwijima' quem. Ane om tomi' tacacama ne.

cocon oro win ma' nexi' co caxi nana cwa' ac caca na. Mon quem? Mao nain i cain ta, maji con, an toco' ac tococwa na pain wi, an mamam' mi' ac tococwa na con Jeju. ⁵⁶ Je curucucun pane. Oro ca mao nucun Jeju ma', pain ca hwet cocon oro wari' co to nanain oro ca paric to ne xirim ma', je pain oro cidade ma', je pain oro xitot ma' quem, jain jain nana oro wari'. Cut qui' tata co caxi nana ma', an to to ac tococwa na pain ca xao to to caca oro wari' pain ximijain cidade ma'. Ta narain ho' maparut pain ca quep urut pum ca', quep e' xut con cacaracon womum ma' ac cocon na Jeju. Co quep nonon pain cacaracon womicon ma', xio xio pi' pin ac caca na quem.

Ca tomi' in pin tococwa oro fariseu pain ca pijim' ximama' nucucun

Mateus 15.1-20

7 Ma' ac caca na oro fariseu cocon oro co ca' na taxipa' nanain ca xirao' nucun Moisés. Maqui' nanain Jerusalém. Hwet ac cocon na Jeju. ² Querec ac tococwa na co taxipa' ca Jeju pain ca cao' ximama' e' caca ma', pain ca om tomi' ha' cocon oro hwanana nucucun pain ca om hohoc xo' mam' cacain micocon. He ac caca na. Em' nana caram ma' ta! Je xi hohoc xo' mam' cacain micocon pain ca cao' xi' nucucun ta nana.

³ Ac i ma' taxipa' nana oro fariseu cocon oro judeu ma'. Cao' xi' iri nana ne, hohoc xo' mam' ac cacain na micocon, ma' ta om em' iri' ta nana. Hohoc xo' iri nanain ne, cao' ac caca na. Ac i ma' na ca tomi' ha' cocon hwanana nucucun co taramaxicon nana pain cara pane, je curucucun mao na. ⁴ Maqui' iri nanain oro xirinain ca cut pe wa carawa ma' ne, hohoc xo' mam' ac xucucun na pain com, cao' cao' ac caca na. Ma' na oro wirain capijacocon hwanana nucucun ca tomi' ha' je cocon oro wari' ma' quem. Hohoc xo' nanain ca mam' toc caca ma', hohoc xo' nanain mam' ji'ao xo' cacain com ma', je oro too mam' hoc cacain carawa ma', je oro ca mam' xao to caca ma' quem. Je curucucun mao na.

⁵ Tomi' querec ac cocon na Jeju oro fariseu cocon oro co ca' na taxipa' nanain ca xirao' nucun Moisés. Para om tomi' ha' caca co taxipa' ma

7.4 Je curucucun oro judeu pane. Ca' na ca coromicat nucucun: Mo ta quep xin carawa ca om hohoc con Iri' Jam ma', em' pin ac iri' tara. Na e' na pain ca hohoc xo' xin mixi', ma' ta querec hohoc mami' capari' Iri' Jam ta nana. Je ca hohoc xo' mam' taxipa' cacain micocon pain ca cao' xi' nucucun pane.

ma'? Para om tomi' ha' cacain oro ca ara je cacapari' oro hwanana nexi' co taramaxicon nana pain cara pane quem? Xi hohoc xo' mam' cacain micocon pain ca cao' xi' nucucun ta na ca tomi' cocon ma'.

⁶Ac ca iri'o' xi' ca' tara me hwe ra ac tococwa na. Iri'o' na ca xirao' nucun Isaías cara pane, pain ca tomi' hwet cain capijacon Iri' Jam cocon oro hwanana nuhu' pane ta ac tococwa na. Ca' na ca xirao' pe ca pane:

Tomi' ca' na Iri' Jam:

Tomi' ha' urut pum ta paxi' nanapa' oro wari' cwa'.

Ane tomi' capijacocon e' caca ne.

Om ca tomi' querec te iri'o' cacapa'.

Ac ca to pira ca' cacapa' na pain ximicocon ta.

⁷In ac paxi' nanapa' pain ca pe torotop mi' cacapa' ca'.

Ane om tomi' querec te toton pain ne.

Xi tomi' mixein ara caca pain ca tomi' nucucun ta:

Om na, oro capijaxut ca ca' na urut pahu' ca',

maqui' non Iri' Jam ta nonon oro win ma' caca.

Xi maqui' capa' ca pijim' nucucun pain ca ca' na cacain capija ta.

Maqui' nonon oro hwanana nucucun ta.

Ac i ma' na ca tomi' hwet cain capijacon Iri' Jam Isaías pane, pain ca pan to' cain taraxicocon oro hwanana nuhu' pane na ca tomi' tococwa ma'.

⁸Miri'om hwein oro capijacon Iri' Jam ca ara je capari' ta. Tomi' ha' e' hwein oro ca tomi' pan nuhu' ta na ca tomi' tococwa ma'.

⁹Tomi' ac tococwa na: Hohot tara ma' hwein ca an to hwein oro capijacon Iri' Jam ca tomi' ha' je capari', ma' ta tomi' ha' xin capijacocon hwanana nexi' hwe ra ac tococwa na. ¹⁰Noro jein ca xirao' nucun Moisés ca' ac tococwa na. Tomi' ha' ron cote ma cam jim ta. Quep xiho' raram quem, ac i ma' na ca xirao' mi' capari' Moisés cara pane. Xirao' mi' napari' pain i ca' quem: Wari' co tomi' napat non cote ca cam jicon ma', to' pa' pin ac tocwa tara ta napari'. ¹¹Wahu' iri na ne, tomi' ca' huhun oro win ma' nuhu' pain ca pijim' huhun ma': Ma' paxi' turuhu' carawa ca mam' quep xiho' xun hun cote hwe cam juhu' ma'. Mo ta tomi' cain' hwehwem: Carawa ne ca', wara tomi' pe mi' inon pain Iri' Jam ta. Om ca mi' ac xuhu' pain, mo ta tomi' ac i ma' hwehwem, ¹²hohot ac ne tara pain ca om quep xiho' hwehwem ta na ca tomi' pan nuhu' pain ca pijim' huhun ma'. ¹³Ac i ma' na ca miri'om hwein capijacon Iri' Jam ta. Xi om ne ca tomi' ha' e' ara hwein oro ca tomi' pan nuhu' ta. Mija na oro wirain ca tomi' nuhu' ca

pan teretem ac i ma' ma' quem. Ac i ma' na ca tomi' tococwa oro fariseu pain ca pijim' ximama' nucucun pane.

¹⁴ Tomi' mami' ac tococwa na oro wari'. Harahap je ta ac tococwa na. Taraju wet taraju wet pi' pin xine ta. Ma' ta taraju pa' hwe quem tata.

¹⁵ Oro carawa ca corom hwet nuhu' pain capijahu' ma', pain ca cao' nuhu' ma', om ca to' em' ac cuhu'. Ca coromicat nuhu' ca maqui' nain xumuhu' ma' iri na ne, je pain ca tomi' ximama' nuhu' ma' quem, je i ma' ca to' em' nuhu' ta. Om ac ne na ca querec hohot cuhu' Iri' Jam. ¹⁶ Mo ta taraju pa' xixi' na hwe ma', je ta taraju wet qui' hwe ta na ca tomi' tococwa ma'.

¹⁷ Corom ca' iri nonon oro wari' Jeju ne, pain ca corom cain xirim ma', tomi' querec pan ac cocon na co taxipa' ca ma'. Cain' cain' ne ca tomi' ma cara ne? Para tomi' joc mam' mi' momon pain carawa ca to' em' nonon ma'? Tomi' xo' xut pain e' nonon.

¹⁸ Cain' cain' xihwe quem? Om ca taraju pa' querec hwe ra ac tococwa na. Om ca taraju pa' hwe ra inuhu'. Carawa ca corom hwet nuhu' pain capijahu' ma', pain ca cao' nuhu' ma', om ca to' em' ac cuhu' ta. ¹⁹ Xi corom hwet cuhu' pain xumuhu' ta. Corom hwet e' nuhu' pain pemenuhu' pain munuhu', ira' pin ac hwein na quem, ac i ma' na pain ca tomi' xo' tococwa ma'. Pain ca tomi' xo' ac i ma' ca ma', je ca to' taraju pa' capari' pain ca om tomi' caho' mami' capari' pain oro carawa ca cao' wa Iri' Jam. Awi awi pi' pin na oro carawa ca cao' wa ta napari'.

²⁰ Tomi' tomi' tiquin' ac tococwa na: Ca coromicat nuhu' ca maqui' nain xumuhu' ma', je i ma' ca to' em' nuhu' ta. Je ca om querec hohot cuhu' Iri' Jam quem. ²¹ Xi maqui' ara nein iri' ca xumu wa oro carawa ca to' em' nain ca wari' wa ta. Mo na: Ca coromicat pan teretem wa ma', ca caracat wa pain ca quep ximama' wa ma', ca cut noc xa wa carawa ma', ca to' pa' wa wari' ma', ca quep tacacama oro manacocon oro wari' ma', je pain ca quep ne cocon xucun tarama' oro narima' ma' quem, ²² ca param ximama' wa ma', ca pan teretem ximama' wa ma', ca mixein wa ma', ca tamanain to wa pain oro ca quep ximama' wa ma', ca noc wa wari' ma', ca tomi' napat wa ma', ca xec xec wa ma', ca om coromicat xo' wa ma'. ²³ Oro ca pan teretem wa ca tomi' xuhu' ca', maqui' nain ca xumu wa. Je i ma' ca to' em' nain ca wari' wa ta na ca tomi' tococwa ma'.

Ca quep xio pin tacama cainacam narima' co om judeu

Mateus 15.21-28

²⁴ Maji ta ac ca na Jeju ma', mama' ac cacain na oro xijein cidade ca to ja' pan nain Tiro je Sidom. Corom tain xirim ma' ac ca na, corom mao ac cain na. Noc paxi' tata oro wari' pain ca taxi' cocon pain ca pe cain i cain, ane aram aram taxi' pin cocon ne. ²⁵ Pe nain i ma' narima' ma', co taraju nonon oro wari' pain ca maqui' na Jeju ta caca ma'. Corom pe ho' nam cainacam caxicon jam. Je ca maqui' hap cama ma', pe torotop mi' ac con na Jeju quem. ²⁶ Om ca judeu cama narima' ma'. Fenício nana oro win ma' cama, Síria na wixinain macaracam. Tomi' nain capijacocon oro grego quem. Tomi' mip ac con na Jeju: Tomi' mo ca' ram con caxicon jam caina cwa' non.

²⁷ Om na, ame ma e' ac cam na. Cao' cao' ma'am cain' tatara oro hwijima' cwa' e', xi hohot ne pain ca cut ca' toton pain carawa ca cao' wa oro hwijima' ma', pain ca wixicaracao' mi' ton pain oro wixicon oromijac cwa' quem nam.

²⁸ Taxi' paxi' ina quem Taramaxicon ne ac cama na. Ane om narain ho' tocwa pain ca cao' wa oro pawirinain carawa wixicon oromijac ma' ne. Cao' nain oro pawirinain carawa ca cao' pawuru caca oro hwijima' ma', ca cao' pawuru to cacain pana ca mam' cao' to caca ma'. Je xi xiram pa' ac i ma' mapa' pain ca om judeu ta' ca' quem na ca tomi' con ma'.

²⁹ Awi na ca tomi' nem ta ac cam na. Mo in mao ra. Hwet ca' nam caxicon jam cainam ta nam.

³⁰ In mao ac camain na xiricam. Wa' mao iri na ne, wara hwet ca' nam caxicon jam. Terem' pe nain caji wi nequem. Tacana pe pin na quem.

Ca quep xio pin tocwa wari' co om taraxicon, co om capijacon quem

³¹ Maji ta ac ca na Jeju ma', paca' ac cacain na oro xijein cidade ca to ja' pan nain Tiro ma'. Xuruxut tiquin' ca' ac cacain na xijein cidade pain

7.30 Pain ca pijim' joc mam' mi' nucun Jeju ma', cocon oro hwijima' co cao' camara' nanain pawirinain carawa ma', wiricoco co tomi' joc mam' mi' nonon oro win judeu ca. Oro wixicon oromijac ma' iri na ne, wirico co tomi' joc mam' mi' nonon co om judeu nana quem. Ca' paxi' na ca tomi' cam: Om ca hohot ne pain ca quep xiho' cain' xuhu' pain ca om judeu hwe ma'. Quep xiho' cain' toton oro win ma' ta' co judeu nana cwa' nam.

Sidom ma' quem. Aram aram hwet ac cacain na cote ne com pain Galileia ma', je pain oro xijein cidade pain Decápolis ma'. ³²Ma' ac caca na oro wari' co o qui' nonon wari' co om taraxicon, wirico co om capijacon ma' quem. Jain jain nana con, tomi' mip ac cocon na: Quep ron pain mum win ma' nuxut cwa'. Ma' ta xio pin ca pum na ca tomi' cocon ma'.

³³Hap ra ta ac con na Jeju, wirico, wirico wari' ma' quem, xuruxut to ni ca' ac cocon na oro wari'. Joc corom ac cain na micon pain taraxicon. Cupa' ac cain na micon, quep ac cain na petehwet nucun ma' quem. ³⁴Noro pawin ac ca na, wereme to ac ca na pain ca xiram pa' con ma'. Efatá ac ca na, je ca tomi' ca pain capijacocon oro judeu. Pain ca Efatá ca ma', taraju ho' ra ta na ca tomi' mao nein ca tomi' nucun. ³⁵Tomi' iri nain i ma' ne, taraju hap pin ac ca na. Teren teren om pin ac ne na petehwet nucun, tomi' xo' pin ac ca na quem.

³⁶Ta tomi' hwet huhun oro wari' pain ca quep xio ton co cwa' ta ac tococwa na. Tomi' caho' paxi' tata pain ca tomi' hwet wa ma', ane tomi' hwet cacain ne. Ca tomi' caho' tococwa pain ca tomi' hwet wa ma', ca tomi' hwet tomi' hwet tiquin' pan ac cacain na quem. ³⁷Wa wa tamana ac cocon na oro wari'. Oro ca ara ca ma', awi tamana na ta nana. To' taraju pin non wari' co om taraxicon ma', to' tomi' pin non wari' co om capijacon ma' quem ta na ca tomi' caca ma'.

Ca tomi' hwara' mami' cain capam' con hwam Jeju

Mateus 15.29-39

8 Oro xijein xec ma' iri na ne, mija mami' ac caca na oro wari'. Om ca paric camain' caca. Om nonon carawa ca cao' wa quem. Harahap je ac cocon na co taxipa' ca Jeju ma'. Tomi' ac tococwa na: ²Xiram pa' inonon oro wari' cwa'. Ma' 3 ara xi' na xec pain ca to ho' cacapari' ca'. Om nonon carawa ca cao' wa quem. ³Mo ta in mama' jein xuruhu' toton pain ca pe' nucucun ma', xuruxut camara' to ac cacain tara wana pain ca naro ne curucucun pain ca pe' tamana nucucun. Xi ma' ara caca co maqui' nanain pira ta tata.

⁴Cain' cain' xixi' quem ac cocon na co taxipa' ca ma'. Main xi mam' pe xin carawa ca to' ma'am nonon pain i ca' quem, xi ma' ne xirim ca cut pe xine ta nonon.

⁵Cain' ca ma' cuhu' capam' quem ac tococwa na.

Ma' 7 e' naparut capam' ca' ac cocon na.

⁶Xao to jein macan' ta ac tococwa na oro wari'. Cut pin iri nain capam' ca ma' 7 ma' ne, tomi' ac con na Iri' Jam: Tomi' querec te urut pum pain ca mi' maparut pain capam' ca' quem Te non, jicaracat ac cain na, cut mi' ac tococwa na pain co taxipa' ca ma'. Ma' ta maxiram' mi' huhun pain oro wari' ma' ta tata. Maxiram' mi' ac tococwa pain na. ⁷Ma' paric ca' e' nonon oro wixicon hwam quem. Tomi' querec te urut pum pain ca mi' maparut con hwam cwa' quem Te ac ca na, maxiram' mi' jujun con ta ac tococwa na co taxipa' ca ma' quem. ⁸Cao' cao' ma'am pin ac caca na oro wari' ma'. Ma'am ca' nanain, ma'am ma'am pi' pin nana. Pan cut xin pawirinain ta ac caca na co taxipa' ca ma', cut ho' cut ho' ac cacain na pain coco. Moin' 7 na cotain cocon. ⁹Ac ca ma' 4.000 caca na ca tarama' nucucun co cao' nana ma'.

Mama' je iri nonon oro wari' Jeju ne, ¹⁰maji quem ac tococwa na co taxipa' ca ma', piton to ac cacain na mam' horoho wa, pan horoho mama' ac cacain na macarain Dalmanuta cain.

**Ca ara rain oro ca to' querec pin' naparut pain ca
pe ho' quem Iri' Jam ta cocon Jeju**

Mateus 16.1-4

¹¹Maqui' ac caca na oro fariseu. Tomi' querec xun ta nana. Am iri'o' ca, am om iri'o' ca quem nana. Je ca tomi' cocon ma': Ara rain carawa ca to' querec pin' naparut pain ca pe ho' quem ca hwara' opa nucun Iri' Jam ta nonon. ¹²Wereme to ac ca na pain ca tomi' xaxa' nucun cocon. Wa inuhu' pain ca wari' nuhu' pain oro xec nexi' ca' ac tococwa na. Para ara rain carawa ca to' querec pin' naparut pain ca pe ho' quem ca hwara' opa nucun Iri' Jam mahu' quem? Om ta ara tain pahu'. Tomi' iri'o' inuhu' ta tata. ¹³In ca' ac tococwa na, in hwet ac cain na mam' horoho nucucun ma', horoho mama' ac cacain na xijein cacarain com.

**Ca tomi' napat ximama' nucucun oro
fariseu cocon oro wari' nucun Herodes**

Mateus 16.5-12

¹⁴ Pain ca horoho mama' xin xijein cacarain com caca ma', om ca cut cacain capam' co taxipa' ca ma'. Ji'am pin nanain. Ma' xica' pe nonon capam' pain mam' horoho nucucun ma'. ¹⁵ Tomi' mip ac tococwa na: Ma' tara xumuhu' me. Ein jein ca to' memerem nein capam' nucucun oro fariseu cocon oro wari' nucun Herodes ta tata.

¹⁶ Na ra ac caca na co taxipa' ca ma'. Xi ma' capari' capam' ta, je ca tomi' ac i ma' capari' ca' nana.

¹⁷ Taxi' pan nonon Jeju quem, taxi' tata pain ca tomi' ac i ma' xucucun. Para tomi' ac i ma' xujuhu' pain ca om cuhu' capam' ma' quem ac tococwa na. Om ca taraju pa' querec hwe ra? Om ca querec pin' querec mahu' pain iri' ca hwara' opa tamana ne ra pain ca mi' pan capa' pain ca to' hwara' pin tain capam' Iri' Jam quem. Opain na xumuhu' ra? ¹⁸ Ma' paxi' na tucuhu'. Je xi querec pin' hwein ca querec hwe ma' quem? Ma' paxi' na tarajuhu'. Je xi taraju pa' hwein ca tomi' xuhu' ca' quem? Om ca mam' pe wet hwein ¹⁹ ca ma' 5 e' capari' capam' cocon wari' co ma' 5.000 nana pane ra? Jicaracat mi' inonon pain, ma'am ca' ac cacain na. Cain' ca ma' ne cotain pawirinain ca cut ho' moin' hwe pane quem?

Ma' 12 naparut ta ac caca na.

²⁰ Om ca mam' pe wet hwein ca ma' 7 e' capari' capam' cocon wari' co ma' 4.000 nana pane quem ra? Jicaracat mi' inonon pain, ma'am ca' ac cacain na. Cain' ca ma' ne cotain pawirinain ca cut ho' moin' hwe pane quem?

Ma' 7 naparut ta ac caca na.

²¹ Om ca taraju pa' querec hwe ra ac tococwa na.

8.21 Om ca taraju pa' cacain ca tomi' nucun Jeju co taxipa' ca ma'. Om paxi' na ca tomi' mi' cain ca to' memerem nein capam'. Tomi' mi' nain ca tomi' ximama' nucucun oro fariseu cocon oro wari' nucun Herodes ma'. Win ne ca to' memerem nein capam' ma', pain ca to' hwara' pin nein capam', ac i ma' na ca tomi' ximama' nucucun ta tata. Tomi' ximama' iri nonon Jeju ne, taraju ac caca na oro wari' co an xin tiquin' nanain ma', aram aram taraju taraju xam' ac caca na oro xucucun wari'. Je ca ma' tara xumuhu' cocon me tococwa co taxipa' ca ma'. Ta taraju wet hwein ca tomi' ximama' nucucun me ta tata.

Ca quep ma' pin mami' cain tocon wari' co pe nain Betsaida

²² Mama' ac cacain na Betsaida. Ma' ac caca na oro wari' co o qui' nonon co om tocon ma'. Quep xio ron win ma' nuxut cwa' ac cocon na. ²³ Ma ac ca na Jeju, quep ac cain na micon, coc papan mao ac con na, o hwet ca' ac con na pain oro xirim ca to caca oro win ma' ca ma'. Cupa' ac cain na tocon, quep ac con na pain micon. Tomi' querec ac con na: Querec ma quem? Ma' carawa ca querec ma ma' non.

²⁴ Noro in noro in ac ca na. Querec paxi' ina. Querec inonon oro wari' ma'. Xuruxut paxi' nana. Ac pana nanapa' ta na ca tomi' ca ma'.

²⁵ Quep mami' ac cain na tocon. Querec pin' ac ca na. Ma' pin mami' na tocon. Querec toha awi tamana pin non. ²⁶ In mao rain xurum ta ac con na. Ta in mao main oro xirim ca to caca oro win ma' nem me, in mao e' rain xurum ta non.

Ca tomi' hwet pin cain iri' wixicon Jeju Pedro, je pain ca tomi' pe cain ca mi' pin ta' nucun pain ca e' mami' ta' nucun quem

Mateus 16.13-20; Lucas 9.18-27

²⁷ Maji ta ac caca na, hwet ac cocon na oro wari' co to ho' xucucun pain oro ca paric to ne xirim ma', ca to ja' pan nain Cesareia Filipe ma'. Wirico Jeju, wiricoco co taxipa' ca ma' quem, mama' ac caca na. Pain ca xuruxut xuruxut wet caca ma', tomi' querec ac tococwa na: Om ta cain' ca wari' ca ne cacapa' oro wari' ra? Cain' ca coromicat mi' cacapa' pain ca Iri' Wari' ta' ca' quem na ca tomi' querec tococwa ma'.

²⁸ Om na, ma' nana co João co ja' taxipa' com cara pane xi' ma nenem ac cocon na. Ma' nana oro xucucun co profeta Elias cara pane xi' ma nenem. Oro xucucun ma' iri nana ne, om na, xucun profeta xi' ma nenem quem na ca tomi' cocon ma'.

²⁹ Wahu' quem? Cain' ca coromicat mi' pan mahu' ma' quem ac tococwa na.

Wum co Cristo ta ac con na Pedro.

8.29 Ca' na ca tomi' mao nein ca Cristo wa cocon oro judeu pane. Iri' wari' co wara tora' ca Iri' Jam pane ta nana. Iri' Taramaxicon tara, wirico tara co to' witan toton nonon oro wari' ta nana.

³⁰ Tomi' mip ac tococwa na: Ta tomi' hwet mahu' cocon oro wari' pain xocori ca' me, ta tomi' hwet huhun pain ca Cristo ta' ca' me tata.

³¹ Tomi' xo' ac tococwa na: Na e' na pain ca jain jain tamana ta' ta' ca'. Wata' pain ca Iri' Wari' ta' ca', jain jain tamana ta'. Noc tatarapa' oro taramaxicon nexi' pain ca judeu iri' ca'. Noc tatarapa' oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma' quem. To' pa' pin tatarapa' quem. Ma' 3 pin iri tarapa' xec pain ca mi' pin ne ne, e' mami' ac ta' tara ta na ca tomi' tococwa ma'.

³² Tomi' xo' ac i ma' tata pain oro carawa ca ara ton non. Quep ac cain na taparacon Jeju Pedro. Coc papan hwet mao ac con na, tomi' carapita ac con na: Ta tomi' ac i ma' ma me ta non.

³³ Xat tucu in hwet ac con na Pedro Jeju. Noro tata co taxipa' ca ma' quem. Tomi' carapita ac con na Pedro: Ac Caxicon Jam a xima pain ca tomi' querec mapa' ta Pedro. Mo ca' ne ta ac con na. Om ca an xiho' main ca coromicat nucun Iri' Jam. An xiho' e' main ca coromicat nein ca wari' wa ta na ca tomi' carapita con Pedro Jeju.

³⁴ Harahap je, tomi' xo' xuhu' ta ac tococwa na oro wari' cocon co taxipa' ca ma'. Wari' co ja' ja' xim napa' ma', miri'om ac cain tara ca param nucun. Om ta xiram pa' camain' cain curucun pain ca jin' cain ca mi' pin wa. Ac ca an tiquin' pan cain tara panaxicon ca mam' tatatain mi' xun tocwa ma'. Ja' ja' ac capa' tara ta. ³⁵ Xi e' cara pe tain cain pawin wari' co win xumu e' nain ca param pan nucun pain macan' ta. Wari' co miri'om nain ca param pan nucun pain macan' ca' iri na ne, pain ca win xumu e' capa' ma', je pain ca pijim' hwet cocon oro wari' pain capijacon Iri' Jam pain ca to' witan toton cocon ca', wirico tara co e' cara pe tain nain pawin ta. ³⁶ Je ca tomi' xuhu' ca' ac tococwa na. Mo ta ma' ma' xam' capari' oro carawa pain macan' ca'. Mo ta miri'om xin ca e' cara wa pain pawin cain, mo ta mama' xin cote ne xe quem. Ma' na ca quep xiho' ac capari' oro caramaji macan' ca cut iri' pain ca e' e' wet nexi' ra? Om ca quep xiho' capari' ta! ³⁷ Xi ma' ne caramaji macan' ca mam' an in ac xin ca e' cara nexi' ta. ³⁸ Mija nana wari' co caracat tamana nana pain oro xec nexi' ca'. An to pin nonon Iri' Jam. Mo ta ma' ca wari' co wixipa' napa' ma', pain ca noc capa' pain ca wari' ne ton ca', pain ca noc cain ca tomi' ne ca' quem, to' wixipa' ac capa' tara pain ca Iri' Wari' ta' ca'. Maqui' wi iri ta' cocon oro jam co taramaja mi' nonon Te ne, pain ca mam' maqui' tain ca hwara'

opa nucun ma', wixipa' ac ta' con tara, om ta wari' ne ton ta na ca tomi' tococwa ma'.

9 Tomi' ac tococwa na: Wahu' pain ca to ho' mahu' ca', ma' tatara co querec pin' xun nonon Iri' Jam pain ca taramaxicon pe ho' xim cuhu' ta. Om ta cono' querec caca, wara querec tatarain ca taramaxicon hwara' opa nucun, ame hwe e'. Tomi' iri'o' inuhu' ta na ca tomi' tococwa ma'.

Ca jimao pin ne tocon Jeju

Mateus 17.1-13; Lucas 9.28-36

²Ma' 6 pin iri na xec pain ca wara tomi' xo' tococwa pain ca mi' pin ta' nucun Jeju ne, maji ta ac con na Pedro con Tiago con João ma', piri' mama' ac cacain na cote ne pacun. Xica' to nana pain i cain. Ca noro noro cocon Jeju ma', jimao pin ac ne na tocon. ³Toc meremem pin na womicon. Towo' tamana na con. Towo' tiquin' ca' non wom co to' to' cacama oro narima' cwa'. Om ca querec camain' tocwa wom co an xiho' non pain ca towo' nucun. ⁴Hwrehwet qui' ac caca na Elias con Moisés cara pane. Pijim' nonon Jeju quem.

⁵Tomi' ac con na Jeju Pedro. Awi na pain ca to xin i ca' quem Taramaxicon co ca' na taxipa' capijacon Iri' Jam. Quep 3 xut pain wijimain xirim. Mene rain wirain. Mene tarain wirain Moisés ma'. Mene tarain wirain Elias ma' quem na ca tomi' con ma'. ⁶Jin' tamana nana co taxipa' ca ma'. Je ca tomi' ximao ac i ma' ca Pedro.

⁷Hwet qui' ac ne na tajain nanawin. Tatep pa' ac tococwa na. Taraju ac cacain na ca tomi' wa ma', ca maqui' nain nanawin ma'. Mon cwa' Panxita' co om noc camain' ta' cwa'. Taraju wet jun ta na ca tomi' nucun.

⁸Noro in noro in ac caca na. Ane ane om pin na Moisés con Elias. Om ca querec mami' tococwa. Querec xica' pe e' nonon Jeju.

⁹Quiji' mama' ac cacain na pacun. Pain ca xuruxut xuruxut wet nucucun ma', tomi' ac tococwa na: Ta tomi' hwet huhun pain oro wari' ca querec hwe pata' me. To' e' mami' cain' tarapa' Te ta. Wata' pain ca Iri' Wari' ta'

9.1 Pain ca tomi' cain i ma' Jeju ma', ac ca tomi' tococwa na pain ca querec jimao pin ta' ne tocon pain cote ne pacun ma', pain ca hwet pa' xun cocon Elias con Moisés ma', pain ca mon cwa' Panxita' co om noc camain' ta' cwa' ton con Cote ca quem. Noro jein Marcos 9.2-8.

ca', to' e' mami' cain' tarapa' Te. Tomi' hwet ac huhun pain tara ca querec hwe pata' ta na ca tomi' tococwa ma'.

¹⁰Ma ac caca na. Om paxi' na ca tomi' hwet cacain, ane tomi' pan e' xucucun pain ne. Ma' tara ca e' mami' ac wa con ra? Cain' cain' xira con ne, ac i ma' xucucun. ¹¹Tomi' querec ac cocon na quem: In qui' cain' tara nonon Elias oro co ca' na taxipa' nanain ca xirao' nucun Moisés ma'. In qui' cain' tara, maqui' ac ca tara co tomi' pe pin ca Iri' Jam pane nana. Cain' cain' xirara quem? Para tomi' ac i ma' caca quem? Ac i ma' na ca tomi' querec cocon ma'.

¹²Tomi' iri'o' paxi' nana ta ac tococwa na. In qui' cain' tara ta nonon Elias oro profeta pane. Ma' ta an to xo' cain' ximicocon oro wari' nucun Iri' Jam pain ca winim' cocon co wara tomi' pe ca pane paxi' nonon. Ac i ma' paxi' na ca xirao' pe cacain ca in qui' nucun Elias pane. Je ca tomi' xuhu' ca' ac tococwa na. Mo xi an to xo' xine ximicocon oro wari' ma', je xi om xirao' pe ca' caca oro profeta pane quem: Na e' na pain ca jain jain tamana ca co wara tomi' pe ca Iri' Jam ma', co Iri' Wari' ma'. Na e' na pain ca noc cocon oro wari' ta, je xi om xirao' ac i ma' caca pane quem? ¹³Ane tomi' pan xuhu' pain i ca' ne: Wara in qui' paxi' na Elias cara pane. Ane quep em' cocon oro taramaxicon ne, om ca xiram pa' camain' cocon. Wara xirao' pe nanain i ma' oro profeta pane, xirao' pe nanain i ma', pain capijacon Iri' Jam con, xirao' pe nanain oro carawa ca ara ton non ta na ca tomi' tococwa ma'.

Ca quep xio pin tocwa pije' co pa' taxipa' tamanain

Mateus 17.14-23; Lucas 9.37-45

¹⁴In hwet iri tata oro xucucun co taxipa' ca pain ca to to wet cacain xiquijinain pacun ma' ne, querec ac tococwa na oro wari' co to to mam' pin nonon ma'. Mija nana wari' ta, om ca paric camain' caca. Ma' nana oro co ca' na taxipa' nanain ca xirao' nucun Moisés quem. Tomi' caracan nonon co taxipa' ca Jeju. Mija na ca tomi' in pin xucucun pain ca tomi' caracan xucucun. ¹⁵Querec iri nonon Jeju oro wari' ma' ne, teretem ac caca na pain ca wa wa nucucun pain ca tomi' querec te nucucun con. Jein hwet ac cocon na. Maqui' ma maqui' ma ac cocon na.

9.13 Noro jein Mateus 17.13. Om ca tomi' con Elias Jeju ma'. Tomi' non João co ja' taxipa' nonon pain com oro wari' pane. An xiho' non Elias João cara pane.

¹⁶Ma' ca tomi' caracan xujuhu' ma' quem ac tococwa na.

¹⁷Tomi' ac ca na wari' co xat pe ho' nonon oro wari' ma': An mi' xim paxi' inem con panxita' cwa' taramaxicon co ca' na taxipa' capijacon Iri' Jam. Om ca tomi' ac ca. Xi ma' ara ca caxicon jam co corom pe ho' non ta. ¹⁸Quep iri non ne, xin mi' ac con na pain macan'. Toroto ac ne na morocacon pain capijacon, cacacao' tamana ac cain na xicon, xao pin ac ne na curucun quem. Tomi' mo pin jun caxicon jam nucun paxi' inonon co taxipa' ma cwa'. Ane om ha' cocon ne na ca tomi' con ma'.

¹⁹Wa inuhu' me ac ca na Jeju. Wahu' pain ca wari' nuhu' pain oro xec nexi' ca', om ca howa camain' mahu'. Pain pin paxi' na ca pe ho' xuhu' ca'. Je xi howa mahu' quem? Cain' cain' xita' quem? Ha' tara pain ca winim' cara xuhu' pain ca howa xim mahu' ra? Je i ma' ira, an qui' ron pije' ma' ta ac ca na.

²⁰An mi' ac cocon na con. Querec iri non Jeju caxicon jam nucun ne, pa' hap ac con na tamanain. Pan' mao ac cain na macan', xin tem xin tem ac ca na, toroto ac ne na capijacon pain morocacon.

²¹Tomi' querec ac con na cote ca pije' Jeju ma': Cain' ca ma' ne cawaxi' pain ca pa' con tamanain quem non.

Om na, wara pa' qui' non pain iri' ca pije' nucun, mao ac ne ma' na con. ²²Caxicon jam nucun ma', xin mi' ho' xin mi' ho' non pain xe je pain com quem. Ma' ta to' pa' pin ton ta na. Am ha' quem, pain ca quep xiho' maparut ma', xiram pa' xut. Quep xiho' xut e' na ca tomi' con ma'.

²³Mo ta ha' quem mapa' ra ac con na. Cain' cain' xima quem? Om na carawa ca tanacam' napa' pain ca howa mapa' ta na ca tomi' con ma'.

²⁴Howa paxi' inem ta ac con na pain ca tomi' hap con ma'. Quep xiho' ne e'. Mi' ne pain ca howa mip xim ta non.

²⁵Querec iri tata oro wari' pain ca jein hwet cocon ne, tomi' in pin ac con na caxicon jam nucun pije'. Tomi' mip inem ta caxicon jam. Wum co to' om pin nain capijacon pije' cwa'! Wum co to' om pin nain taraxicon ca' quem! Paca' ron ta! Ta corom in hwet camain' mon me ta na ca tomi' con ma'.

²⁶U ac ca na caxicon jam ma'. To' cocoroc mip ac con na, hwet ca' ac con na, maram pin ac ne na curucun pije' ma' quem. Ac ca mi' pin ca na. Je ca mi' pin na ta cocon oro wari' ma' quem. Mija nana wari' co tomi' ac i ma' nonon. ²⁷Ane quep cain micon Jeju ne. An tequi' pe ac con na, tequi' pe xat pin ac ca na quem.

²⁸Corom mao iri nain xirim Jeju ne, tomi' querec ac cocon na co taxipa' ca ma'. Xica' to nana, om nonon xucun wari'. Para om ha' caparut pain ca tomi' mo pin urut con caxicon jam cara ne nonon.

²⁹Om na, caxicon jam co an xiho' non co pacara ne, co corom pe ho' non pije' cara ne, na e' non wari' co tomi' mi' non con Iri' Jam ma', co an pe nain ca cao' wa pain ca tomi' mi' con quem na ca tomi' tococwa ma'.

³⁰Maji ta ac xucucun na, mama' ac caca na, xuruxut tiquin' ca' ac cacain na macarain Galileia. Jeju ma', noc nonon oro wari' pain ca taxi' cocon pain ca to cacain i cain quem. ³¹Xi om ne ca ca' na ara tococwa pain capijacon Iri' Jam co taxipa' ca ma'. Tomi' ac tococwa na: Iri' Wari' paxi' ina. Ane ma' ca wari' co tomi' mi' xim napa' cocon oro co noc nanapa' ne. O mi' ac cacapa' tara cocon oro co to' pa' pin xun nanapa'. To' pa' pin ac cacapa' tara quem. Ma' 3 pin iri tarapa' xec pain ca mi' pin ne ne, to' e' mami' ac capa' tara Iri' Jam ta, ac i ma' paxi' na ca tomi' tococwa ma'. ³²Ane om taraju pa' cacain ca tomi' nucun ne. Hehe nana pain ca tomi' querec cocon pain quem.

Wari' co hwara' opa tiquin' ca' nonon oro win ma' ca ma'

Mateus 18.1-9; Lucas 9.46-50

³³Tan' mama' ac cacain na Cafarnaum ma'. Corom mao iri nain xirim Jeju ne, tomi' querec ac tococwa na co taxipa' ca ma', co ma' 12 nana ma'. Ma' ca tomi' caracan xujuhu' pain wana ma' ne na ca tomi' querec tococwa ma'. ³⁴Hehe ac caca na. Wixipa' nana, xi tomi' caracan ara xucucun ta. Wata' co hwara' opa tiquin' ca' nuhu' ta xucucun. Om na, wata' ta, hwara' opa tiquin' ca' inuhu' ta ac ca na xucun. Wata' pan ta ac ca na xucun ma' quem.

³⁵Xao pe ac ca na Jeju. Harahap je, xao to ho' xine ta ac tococwa na co taxipa' ca ma', co ma' 12 nana ma'. Tomi' ac tococwa na: Wari' co taramaxicon ta' ma', om ta xec xec ca. Taramaja mi' e' totoron oro win ma' ca ma' na ca tomi' tococwa ma'.

³⁶Pe nain i ma' pije' quem. Hap ra ta pije' ac con na Jeju, an xat ac con na pain ximijacocon. Pe horoman tapan' ac con na. ³⁷Tomi' ac tococwa na co taxipa' ca ma': Noro jun pije' cwa', co om hwara' opa cwa'. Wari' co tomi' querec te non pain ca om hwara' opa nucun ca', coromicat ca' iri na ne: Tomi' querec te inem, xi om ne ca howa ara ton Jeju ma', mo ta

coromicat ac i ma' ca pain ca tomi' querec te inem con ma', ac ca tomi' querec te capa' na. Om ca xica' pe querec te capa'. Tomi' querec te iri napa' ne, tomi' querec te non co cwain co hwet roron oro wari' napa' ma' quem na ca tomi' tococwa ma'.

³⁸Taramaxicon co ca' na taxipa' capijacon Iri' Jam ac con na Jeju João. Querec urut con wari' co tomi' jein pin nonon oro caxicon jam. Wirico Jeju co tomi' jein pin roron ta napa' cocon ta na. Tomi' in pin paxi' urut con, xi win ma' ne capari' ta na ca tomi' con ma'.

³⁹Ta tomi' in pin hun me ta ac tococwa na. Wari' co an hwet nain ca hwara' opa wa ma', pain ca ara cain carawa ca om ara taxi' ne ca wari' wa ma', mo ta an hwet cain wuxu pain ca wirico Jeju co ara rain napa' ta ca ma', om ca ane ane tomi' napat ac capa' ta. ⁴⁰Ta tomi' in pin hun me, xi quep xiho' ara capari' wari' co om ari napari' ta. ⁴¹Je ca tomi' xuhu' ca', tomi' iri'o' inuhu' ta ac tococwa na. Wari' co xiram pa' nuhu' ma', pain ca mi' cuhu' pain wijimain carawa ma', am cam mi' xim cuhu' pain wijimain com. Mo ta tomi' ca' cuhu': Cam mi' xim pain wijimain com ca', xi om ne ca howa ara mon Cristo ta, mo ta tomi' ac i ma' cuhu'. Main mi' ac con tara pain oro ca awi wa Iri' Jam ta na ca tomi' tococwa ma'.

⁴²Wari' co to' caracat non win ma' ca co om hwara' opa ma', co an xiho' non pije' co howa napa' cwa', wap tamana ac con tara Iri' Jam ta ac tococwa na. Mija tara ca jain jain ca con. Mo xi tucu xine cote ne pacun pain paramacon ma', mo xi xin pocom mi' tocwa pain cote ne com quem, jain jain pije' ac ca xira. Pain ca wap ton con Iri' Jam pain ca to' caracat con wari' co an xiho' non pije' ma' iri xira ne, mija tamana pan ac ne xira ca jain jain ca con ta. ⁴³Je ca tomi' xuhu' ca', tomi' inem pain ca to' caracat quem mum ma'. Mo ta to' caracat quem mum ma', pain ca ara main ca om awi wa ma', ara maho' rain e'. Ac ca ton tapit pin main tara mum ma', ac je tara. Hohot na pain ca mao main pawin pain ca om ne mum ma'. Cain' cain' xira quem? Hohot xira pain ca xin mi' xima pain cote ne xe ma', pain ca ma' ma' wet ne mum ra? Om xi hohot ne ta. Pain cote ne xe cain, om ca jo' ra na camain' ne xe pain i cain ta. ⁴⁴Om ca cono' camain' ca cwamicocon orojima' pain i cain, om ca jo' ne xe pain i cain quem. ⁴⁵Mo ta to' caracat quem caximam ma' quem, pain ca xut mao main ca caracat pe ta' ma ma', mao maho' rain i cain e'. Ac ca ton tapit pin main tara. Hohot na pain ca mao main pawin pain ca om ne caximam ma'. Cain' cain' xira quem? Hohot xira pain ca xin mi' xima pain cote ne

xe ma', pain ca ma' ma' wet ne caximam ra? Om xi hohot ne ta. ⁴⁶ Pain cote ne xe cain, om ca cono' camain' ca cwamicocon orojima' ta, om ca jo' ne xe pain i cain quem. ⁴⁷ Mo ta to' caracat quem tucum ma' quem, pain ca querec param ximao main ca om awi wa ma', noro maho' rain e'. Ac ca hot pin main tara. Hohot na pain ca mao main pawin ca taramaxicon pe ca Iri' Jam ma', pain ca om ne tucum ma'. Cain' cain' xira quem? Hohot xira pain ca xin mi' xima pain cote ne xe ma', pain ca ma' ma' wet ne tucum ra? Om xi hohot ne ta. ⁴⁸ Pain cote ne xe cain, om ca cono' camain' ca cwamicocon orojima' ta, om ca jo' ne xe pain i cain quem.

⁴⁹ Je ca tomi' xuhu' ca' ac tococwa na. Ma' ma' xam' napari' oro ca to' i'ina napari' ca'. Quep xiho' napari', to' om pin nain ca om awi nexi' pain ca xuruxut nexi'. Win ne sal ma', pain ca om cunu ne carawa ca aramao xine pain sal ma'. Win ne xe pain ca tom tom pi' pin nein oro ca om awi wa ma' quem. Ac i ma' na ca quep xiho' capari' oro ca to' i'ina napari' ca' quem. ⁵⁰ Awi na sal, to' wita awi nain oro carawa ca cao' wa. Mo ta wita wita om ne, mo ta camain' pin ne, cain' xi wita mami' ac ne quem? Je ca tomi' xuhu' ca': An xiho' jein sal pain ca quep xiho' caracan xujuhu' ma'. Xin ne xujuhu', tomi' querec te xujuhu' ta na ca tomi' tococwa ma'.

Ca tomi' xo' tococwa pain ca an pe tacama narima'

Mateus 19.1-12

10 Maji ta ac ca na Jeju, mama' ac cacain na oro xijein cidade ca to nain Judeia ma', pain xijein cacarain Jordão ma'. Maqui' mami' nana oro wari' ma', hwet ac cocon na, ca' na ac tococwa na pain capiiacon Iri' Jam quem. Je curucun pane.

² Ma' ac caca na oro fariseu co xuruxut hwet nonon quem. Tomi' querec xun ta nana. Am tomi' xo' ca, am om tomi' xo' ca quem nonon. Je ca tomi' querec cocon ma': Hohot na pain ca an pe wa narima' ra? Om ca narain ho' capari' pain Iri' Jam ra? Ac i ma' na ca tomi' querec cocon Jeju.

³ Cain' ca tomi' ha' je cuhu' Moisés cara pane quem ac tococwa na.

⁴ Hohot na ta napari' pane ac cocon na. Ca' na ca tomi' ha' je capari' pane: Wari' co an pe pin tam nam manacon ma', xirao' mi' ac cam tara pain documento. An pe pin inem ta tara ca xirao' nuncun pain documento. Mao ra ta ac cam tara quem, ac i ma' na ca tomi' capari' Moisés pane ta nonon.

⁵Ac i ma' paxi' na ca xirao' mi' cuhu' pane ac tococwa na. Xi opain ara ne xumuhu' ta nuhu'. ⁶Ane om ac i ma' ne pain cara pane ne, pain ca xo' quep qui' con wari' Iri' Jam pane. Ca' na ca xirao' pe xine con: Quep iri non wari' Iri' Jam pain cara pane ne, quep ac con na tarama', quep ac cam na narima' quem. ⁷Je ca xirao' pe xine i ca' quem: Tarama' ma', pe ho' pe ho' om pin toron cote ca cam jicon. Pe ho' pin ac cam tara manacon. ⁸Ac ca xica' pe pin ne tara cwerequequem ta na ca xirao' pe xine pane. Je ca tomi' xuhu' ca' ac tococwa na. An pin iri nam narima' tarama' ma' ne, xica' pe pin ac ne na cwerequequem. Om ca tocwan mami' ne cwerequequem. ⁹Je ca om na camain' ne pain ca to ni ca' xequequem tarama' cam manacon ta. Xi wirico ara ca Iri' Jam co mi' nanam pain ca an xequequem ta na ca tomi' tococwa oro fariseu ma'.

¹⁰In mama' iri nanain xirim ne, tomi' querec mami' ac cocon na co taxipa' ca ma'. Cain' cain' xira con wari' co an pe pin nam manacon quem nonon.

¹¹Om na, wari' co an pe pin nam manacon ma', mo ta an pin cam xequem narima' ma', caracat ac ca na pain ca ara cup pin cam wara manacon. ¹²Narima' co an pe pin non tarama' nequem ma' quem, mo ta an pin con xucun tarama' ma', caracat ac cama tara quem na ca tomi' xo' tococwa ma'.

**Ca na e' ne pain ca an xiho' xuxun oro hwijima'
pain ca om xec xec querec nucucun**

Mateus 19.13-15; Lucas 18.15-17

¹³Ma' ac cacama na co o qui' nanam humaxicacam. O mi' nanam con Jeju. Ma' ta quep mamam pain winacacam pain ca tomi' mi' mamam con Iri' Jam ta nonon. Ane tomi' in pin cacam co taxipa' ca ne. Ta cut mi' hun cacam humajuhu' me ta nanam.

¹⁴Querec iri nonon co taxipa' ca Jeju ne, pain ca tomi' in pin cacam ma', om ca hohot con. Mana' ac tococwa na. Ta narain ho' hwehwem pain ca hwet cacapa' hwijima' cwa' me ta. Ta tomi' in pin hwehwem me ta. Oro wari' co an xiho' nanam pain ca om xec xec nequequem ma', pain ca howa cacapa' ma', wiricoco tatara co taramaxicon pe ho' ca Iri' Jam ta. ¹⁵Je ca tomi' xuhu' ca', tomi' iri'o' inuhu': Mo ta om an xiho' hwehwem hwijima' pain ca tomi' querec te cocon Iri' Jam pain ca taramaxicon pe

ho' xuhu' ta cocon ma', om ta hwet camain' hun pain ca taramaxicon pe ca pain pawin cain ta na ca tomi' tococwa ma'.

¹⁶Pe horoman tapan' ac tacacama na hwijima', quep ac tacacama na pain winacacam. Param inon Iri' Jam pain ca ara mi' cuhu' pain oro ca awi wa ta hwijima' na ca tomi' tacacama ma'.

**Ca to' i'ina capari' oro caramajixi' pain ca xin ne xun
Iri' Jam pain ca taramaxicon pe ho' xim capari'**

Mateus 19.16-30; Lucas 18.18-30

¹⁷Mama' xi' urut ta iri na Jeju ne, xuruxut xuruxut, mo qui' ac ca na wari' ma'. Pe torotop mi' non, tomi' querec ac con na: Taramaxicon co awi, co ca' na taxipa' capijacon Iri' Jam ac con na. Cain' cain' xita' quem? Param inain ca e' cara pe ho' ton Iri' Jam ta non.

¹⁸Para awi ma mapa' quem ac con na. Om na wari' co awi. Xica' pe na Iri' Jam co awi. ¹⁹Taxi' ara xi' main oro capijacon Iri' Jam ca tomi' ha' je capari' pane. Ca' na con: Ta to' pa' mon wari' me ta. Ta quep mam manacon win ma' ma me ta. Ta an noc xa ma me ta. Ta tomi' mixein mi' mon pain ca em' wa win ma' ma me ta. Ta mixein mon win ma' ma me ta. Tomi' ha' ron cote ma cam jim ta, ac i ma' na ca tomi' ha' je capari' ta na ca tomi' xo' con ma'.

²⁰Om na, tama' tomi' ha' tomi' ha' pi' pin inain i ma' ta Taramaxicon co ca' na taxipa' capijacon Iri' Jam. Tomi' ha' qui' inain pain ca pije' ne pane ac con na.

²¹Noro ac con na Jeju. Xiram pa' non. Ma' xica' pe na carawa ca om ara querec ma ma' ac con na. Mo vender vender pi' pin rain oro caramajum. Cut iri rain dinheiro nein ne, cut mi' ac momon pain tara co om nonon carawa. Caramaju pe ac main tara pawin cain. Cut mi' pi' pin iri roron pain dinheiro nem ne, in hwet ac mapa' tara, ja' ja' ac mapa' tara ta non.

²²Hehe ac ca na. Om ca taraju hohot con ca tomi' nucun Jeju. In ca' ac con na, tomi' xaxa' mao ac ca na, xi caramaju tamana ara ca ta.

²³Noro in noro in ac ca na Jeju. Tomi' ac tococwa na co taxipa' ca ma': Oro wari' co caramaju nana ma', i'ina tamana nonon pain ca xin ne cocon Iri' Jam pain ca taramaxicon pe ho' toton cocon ta na ca tomi' tococwa ma'.

²⁴ Cain' cain' xira con ne nana co taxipa' ca ma'. Wa wa nanain ca tomi' nucun. Tomi' mami' ac tococwa na: Oro wari' co howa nanain caramaxicocon ma', i'ina tamana nonon pain ca xin ne cocon Iri' Jam pain ca taramaxicon pe ho' toton cocon ta hwijima' ac tococwa na. ²⁵ Win ne camelo ma'. Cote ne carawa na camelo. Ha' xirain pain ca corom nein wijimain manain ca mam' oc tocwa wom ra? Om xi ha' nein. I'ina xirain, om xi corom ac nein. Ac i ma' na con wari' co caramaju ma' quem. I'ina tamana non pain ca xin ne con Iri' Jam pain ca taramaxicon pe ho' ton con ta na ca tomi' tococwa ma'.

²⁶ Cain' cain' xira con ne ac caca na co taxipa' ca ma'. Wa wa tamana nonon. Cain' xi witan ac wa quem xucucun.

²⁷ Noro ac tococwa na. Om na, wari' ma', om ca to' witan pan ac xucun. Iri' Jam ma' iri na ne, ha' non pain ca to' witan cocon oro wari'. Ha' ha' pi' pin non oro carawa ta na ca tomi' tococwa ma'.

²⁸ Tomi' ac con na Pedro. Win urut ca'. An to an to pi' pin urut pain oro caramajuxut ta. Ma' ta ja' ja' xim urut pum ta non.

²⁹ Om na, je ca tomi' xuhu' ca', tomi' iri'o' inuhu' ta ac tococwa na. Wari' co paca' nain xiricon cocon xurucun cam jicon con cote ca cocon mana panxica ma', je totacon ma' quem, wari' co ara ac i ma' ma', pain ca taramaja mi' xim capa' pain ca pijim' hwet toton cocon oro wari' pain ca to' witan ton toton ca', ³⁰ wara cut tamana tarain carawa ca awi pain xocori ca'. Mija tara carawa ca awi ca cut ta' ca ma', mija tiquin' ca' tarain carawa ca paca' ca. Moin' tamana tara con. Mija toron xirim cocon xurucun cacam waram jicon cocon mana panxica je totacon quem. Ma' paxi' tatara wari' co ja' tequi' quep em' nonon pain ca taramaja mi' capa' ma' quem. Je i ma' ira, aram aram mi' ac tocwa tara pain ca om pi' ra ha' ne ca e' wa quem. ³¹ Je ca tomi' xuhu' ca': Oro co hwara' opa nana pain xocori ca', ame hwe e'. Mija ac caca tara co hwara' opa hwara' opa om pin nana. Oro co om hwara' opa nana pain xocori ca' iri na ne, ame hwe e'. Hwara' opa pin ac caca tara quem na ca tomi' xo' tococwa co taxipa' ca ma'.

**Ca tomi' pe mami' cain ca mi' pin ta' nucun,
je pain ca e' mami' ta' nucun quem**

Mateus 20.17-19; Lucas 18.31-34

³²Maji pain Jerusalém ta ac caca na, xuruxut mama' ac caca na. O na Jeju ma', ja' tequi' ac cocon na oro win ma' ca ma'. Wa wa nonon co taxipa' ca ma', xi mao tain Jerusalém ta ara ca ta. Oro wari' co ja' ja' nonon ma' iri na ne, jin' nana quem. Xuruxut xuruxut, tomi' mami' ac tococwa na co taxipa' ca ma', co ma' 12 nana ma'. Harahap je, xuruxut ni ca' xuxun oro wari' cwa' tata, tomi' hwet ac tococwa na pain carawa ca ara ton non ma'. ³³Taraju wet xine e'. Mama' xin irin Jerusalém ta. Tan' mama' iri xi' ne, quep ac cacapa' tara co noc nanapa'. Wata' pain ca Iri' Wari' ta' ca', quep ac cacapa' tara, o mi' ac cacapa' tara cocon oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma'. Em' ma, na e' na pain ca to' pa' pin xima ta ac cacapa' tara. O mi' ac cacapa' tara cocon co om judeu nana ma' quem. ³⁴Tatam' ac cacapa' tara, tomi' xirac ac cacapa' tara, cupa' ac cacapa' tara, wap ac cacapa' tara, to' pa' pin ac cacapa' tara quem. Ma' 3 pin iri tara xec pain ca mi' pin ne ne, e' mami' ac ta' tara ta tata.

Ca tomi' xun Jeju ta ca Tiago con João

Mateus 20.20-28

³⁵Tomi' xun Jeju ta ac ca na Tiago con João ma', mana panxica Zebedeu ma'. Xuruxut hwet ac cocon na. Tomi' xim urut pum Taramaxicon co ca' na taxipa' capijacon Iri' Jam ac cocon na. Ma' na carawa ca param urut. Ara mi' xut pain urut pum na ca tomi' cocon ma'.

³⁶Ma' carawa ca ara mi' xut pain mahu' ma' quem ac tococwa na.

10.32 Mija nana oro judeu co noc tamana nonon Jeju pain Jerusalém. Taxi' nonon co taxipa' ca ma' quem. Je ca wa wa cocon ma'. Ac ca coromicat ca' caca con na: Je xi om mao cain Jerusalém quem nana, ac je na ca coromicat nucucun con.

³⁷ Om na, maqui' iri tara xec nein ca taramaxicon pin ta' ma ne, mi' ac maparut tara pain ca xao to ho' xut pum pain iri' cwerem je pain parajum ma' quem na ca tomi' cocon ma'.

³⁸ Xi taxi' hwein carawa ca wajim' mahu' ta ac tococwa na. Jain jain tamana ta' pain ca quep em' xim cacapa' oro wari' je pain ca to' pa' pin xim cacapa' quem. Ha' turuhu' pain ca jain jain xiho' ac i ma' mahu' quem na ca tomi' tococwa ma'.

³⁹ Ha' naparut ta nonon.

Je i ma' ira, an xiho' xim mahu' pain ca jain jain ta' ne ca' ira. An xiho' xim mahu' pain ca quep em' xim cacapa' oro wari', je pain ca to' pa' pin xim cacapa' quem. ⁴⁰ An xiho' ac i ma' xim paxi' mahu', ane om wata' ne co tora' pan toton nonon oro wari' co xao to ho' xim nanapa' pain iri' cwere je paraju ne. Wara tora' an to xo' tata co xao to ho' nanapa' ta na ca tomi' tococwa ma'.

⁴¹ Oro xucucun co taxipa' ca ma', co ma' 10 nana ma', taraju iri nanain i ma' con Tiago con João ma' ne, mana' ac cocon na. Om ca taraju hohot cocon ca tomi' nucucun. ⁴² Harahap pi' pin je ta, tomi' xim inuhu' ta ac cocon na Jeju. Oro taramaxicon co querec pin' wawa pain ca taramaxicon to ho' cocon oro tatirim ma', tomi' ha' xut ximama' nonon oro wari' nucucun. Hwara' opa nana. Om ca xiram pa' camain' cocon pain ca taramaxicon hwara' opa to ho' cocon ma' quem. Wara taxi' hwein i ma'. ⁴³ Ane om na ne pain ca an xiho' huhun ne. Jimama' je. Mo ta param hwein ca taramaxicon wa ma', om ta xec xec hwe, taramaja mi' pan jujun oro win ma' hwe ma'. ⁴⁴ Mo ta param huhun oro win ma' nuhu' pain ca querec pin' cucuhu' pain ca hwara' opa nuhu' ma', na e' na pain ca taramaja mi' taramaja mi' pi' pin huhun. Win ca wari' co taramaja mi' e' non taramaxicon nucun ma', ac i ma' je pain ca taramaja mi' e' huhun oro win ma' hwe ta. ⁴⁵ Win ta' ca'. Wata' paxi' na co Iri' Wari' cwa'. Ane om maqui' ta' pain ca taramaja mi' xine xuhu' ne, om na. Taramaja mi' pan xim inuhu'. Mi' pin caho' xim inuhu', ma' ta witan mija hwe ta inuhu'. Je ca maqui' ta' ca' na ca tomi' tococwa ma'.

10.37 Taraju pa' jein ca tomi' mao ne ca xao to ho' xine iri' curucun je paraxicon taramaxicon ma'. Xao to ho' pin iri nanain iri' curucun je paraxicon taramaxicon wari' ne, querec pin' ac tococwa na pain ca taramaxicon wi xucucun. Ac i ma' na Jeju ma' quem. Xao pe ho' pin iri nain iri' curucun Iri' Jam ne, querec pin' ac tocwa na pain ca Taramaxicon wi pin con quem.

Ca quep ma' pin cain tocon Bartimeu Jeju

Mateus 20.29-34; Lucas 18.35-43

⁴⁶Hwet ac cain na Jericó Jeju cocon co taxipa' ca ma'. Tiquin' mama' xi' iri nana ne, ja' ja' ac cocon na oro wari'. Mija nana wari' ta. Om ca paric camain' caca. Xuruxut xuruxut. Ma' pain i ma', wara xao pe pe nain cacarain wana Bartimeu panxica Timeu ma'. Om na tocon. Mi' ne taxipa' nonon pain dinheiro oro wari'. ⁴⁷Taraju ac tococwa na oro wari' ma'. Maqui' na Jeju ma', co wari' nein Nazaré ma' na ca merem nucucun. Merem pan ac ca na quem: Jeju, Winacon Davi. Xiram pa' ne ta Jeju na ca merem nucun.

⁴⁸Mija nana co tomi' in pin nonon ma'. Merem maho' ra ta paxi' nonon, ane om ha' ca ne. Merem merem tiquin' na, merem mip na: Winacon Davi. Xiram pa' ne ta Winacon Davi na ca merem nucun.

⁴⁹Xat ac ca na Jeju. Hap ra ta jun ta ac tococwa na.

Tomi' ac cocon na: Hwara' opa ra e'. Tequi' pe ra ta. Hap ra nem Jeju ta nonon.

⁵⁰Xin an pe ac con na to' om capin' nucun ma', tequi' pe hap ac ca na, xut hwet ac con na.

⁵¹Ma' carawa ca ara mi' ne mapa' ma' quem ac con na Jeju.

Om na, querec mami' xita' na ina ta Taramaxicon co ca' na taxipa' capiiacon Iri' Jam ac con na.

⁵²Mao ra ta ac con na. Xio pin ma, xi om ne ca howa ara mapa' ta non. Querec mami' hap ac ca na, ja' ja' ac con na Jeju.

Ca wa' mao cain Jerusalém Jeju

Mateus 21.1-11; Lucas 19.28-40; João 12.12-19

11 Wixicam pin iri nanain Jerusalém ma' ne, hwet ac cacain na ca paric to ne xirim ma', pain Betfagé ma', je pain Betânia ma', ca to ja' pan nain Pacun Nein Oliveira ma'. Tomi' ac tococwa na co taxipa'

10.47 Taraju pa' je e'. Ac i ma' na ca tomi' taxipa' caca oro judeu pane, pain ca tomi' mi' cocon Cristo co wara tomi' pe ca Iri' Jam pane, pain ca main maqui' tara wari' ne co to' witan xim nuhu' ta tococwa pane. Cristo nonon, Winacon Davi nonon, je je ari na ca tomi' mao nein cocon. Pain ca Winacon Davi cocon Jeju Bartimeu ma', querec pin' non pain ca Cristo ca ma', pain ca to' witan ton cocon oro wari' ma'.

ca ma'. Ma' 2 nana co tomi' ca ma'. ²Mama' jein ca paric to ne xirim ma', ca querec hwe ma'. Hwet pin iri jein ne, mam' ac hwein tara wijimain burro ca tucu pan wa ma', ca om xao pe querec camain' wa ma'. Tacom' hot jein, an qui' ac hwein tara ta. ³Mo ta ma' i ma' pahu' quem cuhu' wari' ma', mo ta para tacom' hot hwein quem cuhu', tomi' ac hun tara: Om na, param inain na Taramaxicon nuxut ta ac hun tara. An in qui' ho' tain na ta jun quem na ca tomi' tococwa ma'.

⁴Ma ac caca na, mama' ac caca na, mam' ac cacain na wijimain burro pain wana. Wara tucu pan pe ta pain cacarain man ca corom ac xine xirim ma'. Tacom' hot ac cacain na. ⁵To nanain i ma' wari' co tomi' querec nonon quem. Ma' i ma' pahu'? Para tacom' hot hwein wijimain burro ma' quem nonon.

⁶Tomi' hwet ac cocon na pain ca tomi' nucun Jeju. Ma, an mao jein ta ac cocon na. ⁷An mi' ac cocon pain na Jeju, cum xo' ac cacain na xonein con womicocon, xao pe ac cain na Jeju. ⁸Mija nana wari' co cum xo' nonon womicocon pain wana ma'. Ma' nana oro xucucun co an toco' mi' nonon pain oro wijimain taparain pana ca ton qui' caca pain oro xitot ma' quem. ⁹Merem ac caca na co o nonon ma', wiricoco co maqui' nana pa'ao' ma' quem, merem ca' nana: In ac xun Iri' Jam ta! Tomi' querec te xun co cwa' co mam' maqui' nain ca hwara' opa nucun Iri' Jam cwa' nana. ¹⁰Tomi' querec te xun co cwa' co taramaxicon pe tain nain maxicon hwanana nexi' Davi cara pane ta. In ac xun Iri' Jam co pe nain iri' pawin cain ta. Ac i ma' na ca merem caca ma'.

¹¹Wa' mao ac cain na Jerusalém Jeju, corom mao ac cain na ca tao' caho' nein cote ne xiricon Iri' Jam quem. Noro noro pi' pin iri tata oro wari' pain oro ca ara caca ma' ne, hwet mao ac ca na. Maji ta ac tococwa na co taxipa' ca ma', co ma' 12 nana ma'. Mama' ac cacain na Betânia, xi om ne ca wara irawin pin ara ne ta.

¹²Xec pin iri na ne, maji ta ac caca na, paca' ac cacain na Betânia. Xuruxut xuruxut, pe' ac ca na Jeju. ¹³Querec pira ac cain na panaji figo ma'. Mija na tenenein. Querec xi' ta, am ma' ne winain ta ac ca na. Xut

11.7 Je ca xirao' pe ca profeta con Jeju pain cara pane. Ca' na ca xirao' pe nucun: Taraju wet je oro wari' nein Jerusalém! Hwet nuhu' taramaxicon nuhu' ta! Om ca xec xec ca, xao pe pe nain xonein wijimain burro, ac i ma' na ca xirao' pe ca profeta pane. **11.8** Cum xo' iri nonon womicocon pain wana oro wari' ne, je pain ca an toco' mi' cocon pain oro wijimain taparain pana ma' quem, ac i ma' na ca an hwet mi' cocon pain ca in ac cocon ma', je pain ca tomi' querec te tamana cocon ma'.

hwet iri nain ne, om ca mam' cain memem, om na winain. Ma' e' na tenenein. Xi hwet querec ne xec ca wina pin ne ta. ¹⁴Tomi' noro ac cain na panaji. Om ta xac mami' xine winam ta nain pain ca tomi' noro cain ma'. Taraju nonon pain ca tomi' cain i ma' co taxipa' ca ma' quem.

**Ca tomi' jein hwerehwet pin tococwa co vender to
nanain carawa pain cote ne xiricon Iri' Jam**

Mateus 21.12-17; Lucas 19.45-48; João 2.13-22

¹⁵Tan' mama' iri nanain Jerusalém ma' ne, corom mao ac cain na ca tao' caho' nein cote ne xiricon Iri' Jam Jeju ma'. Tomi' jein hwerehwet pin ac tococwa na oro wari' co cut nanain carawa ca tom tain' xi' caca ma', wiricoco co vender nanain quem, tomi' jein hwerehwet tomi' jein hwerehwet pi' pin tata. Joc camara' pin ac cain na oro pana ca taramaja to caca co meo taxipa' nanain oro xijein dinheiro ma', joc camara' pin ac cain na oro pana ca mam' xao to to caca co vender taxipa' nonon xucu' ma' quem. ¹⁶Tomi' in pin ac tococwa na co cut nanain caramaxicocon ca vender xi' caca ma' quem. Cut maho' jein caramajuhu' pain ca xuruxut tiquin' hwein xiricon Iri' Jam ta tata. ¹⁷Cain' cain' xihwe quem ac tococwa na. Om ca xirao' ca' xine ca tomi' nucun Iri' Jam pain capijacon ra? Ca' na ca xirao' pe nein ta: Cote ne xuru ca', je tara ca tomi' to tomi' to pi' pin cacapa' oro xucucun wari' ta na ca xirao' pe nein con. Wahu' iri na ne, ara em' pin hwein. Ara xiricocon oro wari' co an noc xa taxipa' nanain carawa pin hwein ta na ca tomi' carapita tococwa ma'.

¹⁸Oro taramaxicon nucucun oro sacerdote ma', cocon oro co ca' na taxipa' nanain ca xirao' nucun Moisés ma' quem, taraju nanain ca tomi'

11.17 Oro sacerdote pain cote ne xiricon Iri' Jam pane, noc tamana nanain dinheiro nucucun oro romano pain dinheiro nucucun oro grego, xi xirao' pe ara cacain jamicon wari' pain ta nana. Noc nain i ma' Iri' Jam ta nana. Je ca taramaja to cacain ca tao' caho' nein cote ne xiricon Iri' Jam caram ma' co meo nanain oro xijein dinheiro ma' quem. Maqui' iri nana oro wari' co tom tain' mi' xun nonon pain carawa Iri' Jam ne, co cut xin nanain boi pain ovelha con xucu' ma', cut ca' ac tococwa na pain dinheiro nucucun tatirim, mi' in hwet ac tococwa pain na iri' dinheiro nein cote ne xiricon Iri' Jam. Ha' ac tococwa na pain ca mam' cut cacain carawa ca tom tain' xin caca pane. Oro co meo nanain dinheiro ma', mixein tamana nana quem. Horon iri na dinheiro nucucun tatirim ca cut caca ma' ne, mi' in hwet wijimain e' ac cacain na dinheiro nein cote ne xiricon Iri' Jam ma' quem.

nucun Jeju. Tomi' xo' ac xucucun na: Cain' cain' xuxun quem? Cain' xi to' pa' pin ac xun quem xucucun. Jin' ara xi' nonon Jeju, xi wa wa pan ara cocon oro wari' ta. Wa wa wa wa pi' pin nonon. Taraju hohot ara xi' nonon ca pijim' nucun.

¹⁹ Irawin pin iri na ne, paca' ac cain na Jerusalém Jeju cocon co taxipa' ca ma'.

²⁰ Xec pin iri na ne, in mama' xin Jerusalém ta ac caca na, xuruxut xuruxut tiquin' ca' ac cacain na panaji figo cara pane. Querec ac cacain na pain ca cono' pin ne tenenein ma'. Mi' pin na caximain ma' quem. ²¹ He ac ca na Pedro, mam' pe wet ac cain na ca tomi' noro cain Jeju pane. Noro rain panaji figo ca tomi' noro ma pane Taramaxicon co ca' na taxipa' capijacon Iri' Jam. Mi' pin na ta non.

²² Om na, howa jun Iri' Jam pain ca ara tain cain oro ca ara ra hun ma' ac ca na Jeju. ²³ Je ca tomi' xuhu' ca', tomi' iri'o' inuhu' ta ac tococwa na. Mo ta tomi' ca' hwein cote ne pacun ma': Tequi' pe ra ta, xin pocom pan xijem pain cote ne com cain, mo ta tomi' ac i ma' hwein. Mo ta om tara con ta'a camain' hwe pain xumuhu' quem. Mo ta howa hwe pain ca tequi' pe tara, xin pocom pan ac xijein tara pain cote ne com cain ta hwein ma'. Ha' ac cuhu' tara, tequi' pe ac ne tara, xin pocom pan ac xijein tara pain cote ne com. ²⁴ Je ca tomi' xuhu' ca' ac tococwa na. Oro ca mi' ne hun Iri' Jam ma', pain ca tomi' hun ma', na e' na pain ca howa hun pain ca ara mi' xuhu' pain cuhu' ma'. Ac ca wara ara mi' cuhu' pain tara pain ca howa hun ma'. Ara mi' ac cuhu' pain tara quem. ²⁵ Mo ta tomi' xun Cotere' Iri' Jam hwe, mo ta mana' hun wari' pain ca ara cup cuhu' ma'. Mana' mana' om pin jun pain. Ma' ta xic am pin cain ca caracat nuhu' Cotere' co pe pawin cwain. ²⁶ Mo ta mana' cara hun pain ca ara cup cuhu' ma'. Om ac ne tara ca xic am pin cain ca caracat nuhu' Cotere' co pe pawin cwain quem na ca tomi' tococwa co taxipa' ca ma'.

**Ca tomi' querec cocon Jeju pain ca ma' co mi' nem
pain ca ara main oro ca ara ma ma' quem cocon**

Mateus 21.23-27; Lucas 20.1-8

²⁷ In mama' ac cacain na Jerusalém. Xut in ac cain na ca tao' caho' nein cote ne xiricon Iri' Jam Jeju ma'. Xuruxut hwet pan ac cocon na oro taramaxicon nucucun oro sacerdote cocon oro co ca' na taxipa' nanain ca

xirao' nucun Moisés cocon oro xucucun taramaxicon nuxut pain ca judeu urut ca'. Tomi' querec ac cocon na: ²⁸Ma' co mi' nem pain ca ara main oro ca ara ma ma' quem? Ma' co ara rain nem pain na ca tomi' querec cocon ma'.

^{29–30}Wata' quem, tomi' querec xim inuhu' quem ac tococwa na. Tomi' querec xuhu' con João cara pane, co ja' taxipa' nonon pain com oro wari' pane. Ma' co ja' roron pain com oro wari' non quem? Mi' non pain Iri' Jam ra? Mi' non pain wari' ra? Tomi' xine. Mo ta tomi' hwet mahu' pain wixicon co tomi' non pane, tomi' hwet ac xuhu' pain tara wixicon co ara rain napa' pain oro ca ara ta' ca' ac tococwa na.

³¹Cain' xi tomi' xun quem ac xucucun na. Mo ta mi' non pain Iri' Jam xun, tomi' querec mami' ac capari' tara, para om howa hun quem ac capari' tara. ³²Mo ta mi' non pain wari' xun. Cain' cain' xixi' quem? Om ca tomi' ac xin i ma' ta nana. Jin' ara xi' nonon oro wari' oro taramaxicon ma', xi iri' profeta na João iri' profeta na João pi' pin ara caca ta.

³³Om ca taxi' urut ta ac cocon na.

Je i ma' ira, om ta tomi' hwet tain wixicon co ara rain napa' pain oro ca ara ta' ca' quem na ca tomi' tococwa ma'.

Ca pijim' joc mam' mi' tococwa cocon oro co taramaja to nanain totain uva

Mateus 21.33-46; Lucas 20.9-19

12 Pijim' joc mam' mi' xuhu' cocon oro co taramaja to nanain totain uva ta ac tococwa na, pijim' ac tococwa na: Ma' na wari' pane. Oin' ac cain na totain uva. Tao' caho' ac cain na, xe' ac cain na manain cote ne pacun ca mam' hum' pe xine cominain uva quem. Quep ac cain na xirim ca mao pawin ma' quem, ma' ta piri' pe ca wari' co querec wet nain ta na. Tomi' xo' ac tococwa na co taramaja to taxipa' nanain xitot. Taramaja to jein totain uva ne ca' ac tococwa na. Paca' iri tara memem ne, mene ac hwein tara xijein cacarain ma', mene ac tain tara xijein cacarain ca' quem, ac i ma' tara ca pagar xuhu' pain ca taramaja nuhu' ta ac tococwa na. Mao tain pira ina ta ac tococwa na, mao ac ca na quem.

²Maqui' pin iri na oro xec nein ca paca' pin ne memem ma' ne, tomi' ac ca na waximain xitot ma', tomi' non co taramaja mi' e' non pain ca pe pan ca ma'. Hwet roron co taramaja to nanain totain uva ne cain, cut ac

main tara memem ne cocon ta na ca tomi' con ma'. Ma ac ca na, mao ac ca na quem. ³Ane om ha' cocon caram ma' co taramaja to nanain xitot ne. Quep nonon. To' ac cocon na. In mao ra ta ac cocon na quem. Om ca mi' cocon pain memem nucun waximain xitot.

⁴Tomi' ac con na xucun co taramaja mi' e' non pain ca pe pan ca ma'. Hwet roron co taramaja to nanain totain uva ne cain, cut ac main tara memem ne cocon ta non. Ma ac ca na, mao ac ca na quem. Ane om ha' cocon co ma' quem ne. To' nonon pain winacon, quep xirac tamana nonon quem.

⁵Hwet roron ta ac con na xucun ma'. Ane to' pa' pin cocon co ma' quem ne. Hwet jujun quem ac tococwa na oro xucucun ma' quem. Mija nana co hwet jujun ca ma'. Ane quep xirac quep xirac tococwa ne. Ma' nana co to' wawa ma', ma' ac caca na oro xucucun co to' parapa' pin wawa ma' quem.

⁶Xica' pe na wari' co pe ho' non waximain xitot ma', wirico panxica co om noc camain' ca ma'. Aram aram tomi' ac con na: Hwet roron quem arain. Cut pan rain memem ne cocon ta non. Ma ac ca na, mao ac ca na quem. Tomi' ha' totoron panxita' cwa' paxi' na ca coromicat nucun cote ca ira.

⁷Ane om tomi' ha' caca co taramaja to nanain xitot ma' ne. Querec iri nonon panxica ne, pain ca xut qui' nucun ma', tomi' xo' ac xucucun na: Wirico co ma' panxica waximain xitot ta xucucun. Mi' pin iri tara cote ca ne, mene pin ac cain tara totain uva ca' xucucun. To' pa' pin xun ta ac xucucun na. Menexi' pin ac ne tara totain uva ca' xucucun. Ma ac xucucun na. ⁸Quep ac cocon na, to' pa' pin ac cocon na, xin hwet ca' ac cocon na pain xitot quem. Ac i ma' nana co taramaja to nanain totain uva pane na ca pijim' nucun Jeju.

⁹Tomi' querec ac tococwa na: Cain' cain' ta' ca waximain xitot quem? Taraju wet xine e'. Hwet pan totoron oro co taramaja to nanain totacon, to' parapa' pin ac cocon tara, noro ac cocon tara oro xucucun co taramaja to nanain totain uva nucun quem. ¹⁰Je ca tomi' xuhu' ca' ac tococwa na. Om ca noro camain' hwein ca xirao' pe xine pain capijacon Iri' Jam ra? Ca' na ca xirao' pe xine:

Pacun ca noc pin caca wari' co quep xin paxi' nanain xirim ma', aram aram iri' pacun ca to' teren nain xirim pin na.

¹¹Wirico Iri' Jam pan na co ara nain i ma'.

Wa wa tamana ac urun na quem.

Ac i ma' na ca xirao' pe xine pain capijacon Iri' Jam pane na ca tomi' tococwa ma'.

¹²He, tomi' napari' ron ac caca na oro taramaxicon nuxut pain ca judeu urut ca', pain ca taraju cocon pain ca pijim' joc mam' mi' cocon cocon co to' pa' pin nonon panxica waximain totain uva ma'. Je ca quep xun paxi' cocon ma'. Ane jin' cocon oro wari' ne. Je ca om quep cocon ma'. Mama' ac caca na.

Ca tomi' querec tococwa pain ca pagar xine imposto

Mateus 22.15-22; Lucas 20.20-26

¹³Om ca pain homa ne, tomi' ac caca na oro taramaxicon nuxut pain ca judeu urut ca', tomi' nonon oro fariseu cocon oro win ma' ca taramaxicon Herodes ma' quem. Mo tomi' jun Jeju ta nonon. Tomi' querec jun. Mo ta tomi' pan tem ca, ha' ac capari' tara pain ca quep xun ta nonon.

¹⁴Xuruxut hwet ac cocon na, tomi' ac cocon na: Tomi' xim urut pum taramaxicon co ca' na taxipa' capijacon Iri' Jam. Taxi' urut pum pain ca om mixein ma ma'. Querec querec ac wiricoco pi' pin nenem oro wari' ma' quem. Co hwara' opa nana ma', co om hwara' opa nana ma' quem, querec querec ac wiricoco nenem, xi tomi' querec te paxica' momon ta. Ca' na xo' maparut pain capijacon Iri' Jam ca an hwet mi' napari' pain ca xuruxut xo' wa pain ca tomi' ha' je capari' quem. Je ca tomi' querec xim urut pum ca' ac cocon na. Hohot na pain ca pagar tocwa pain imposto taramaxicon nucucun oro romano ra? Om ca hohot ne ra? ¹⁵Cain' cain' xuxut quem? Pagar xuxun pain? Om ta pagar xuxun pain? Ac i ma' na ca tomi' querec ximama' cocon ma'.

Ane querec pin' cocon Jeju ne, querec pin' nonon pain ca ac ca iri'o' xi' ca' tara me caca ma'. Para tomi' querec ximama' mahu' ma' ac tococwa na. Param mahu' pain ca tomi' pan tem wa ra tata. Je i ma' ira, mi' xine pain denário ta. Noro tain ta ac tococwa na. ¹⁶An mi' ac cocon pain na quem.

12.11 Pain ca tomi' nucun Iri' Jam ca', tomi' mi' non Jeju. Wirico Jeju co an xiho' nain pacun ca noc pin xine ma'. Wiricoco oro taramaxicon co an xiho' nonon wari' co quep xin paxi' nanain xirim ma' quem. Ca' na ca tomi' ta' ca Iri' Jam ma'. Main noc paxi' totoron Jeju oro taramaxicon. Ame hwe e', main Taramaxicon pan tara ta. Wata' pan tara co Taramaxicon ra non ta na Iri' Jam, ac i ma' na ca tomi' ta' ca ma.

Tomi' querec ac tococwa na: Ma' jamicon co cwa', pain moeda ca'? Ma' wixicon co cwa' ca xirao' pe xine pain quem na ca tomi' querec tococwa ma'.

Jamicon taramaxicon nucucun oro romano ta. Wixicon quem nonon.

¹⁷ Je ca tomi' xuhu' ca' ac tococwa na. Carawa ca mene ca taramaxicon nucucun oro romano ma', mi' ac hun pain tara. Carawa ca mene ca Iri' Jam ma' iri na ne, mi' ac hun pain tara quem na ca tomi' tococwa ma'. Wa wa ac cocon na quem.

Ca tomi' querec cocon pain ca e' mami' xi' caca co wara cono' nana ma'

Mateus 22.23-33; Lucas 20.27-40

¹⁸ Xuruxut hwet ac cocon na Jeju oro saduceu. Howa ca' nana oro saduceu: Om ca e' mami' xi' caca oro wari' co wara cono' nana ta nana. Tomi' ac cocon na Jeju: ¹⁹ Tomi' xim urut pum ta taramaxicon co ca' na taxipa' capijacon Iri' Jam ac cocon na. Ca' na ca xirao' mi' capari' Moisés cara pane: Mo ta mi' pin ca wari' ma', mo ta om wanxi' mi' cam manacon ma', na e' na pain ca an cam coxa' ca. Ma' ta wijima cama con ta taram. Pije' co aram aram wanxi' mi' cam ma', ac ca wanxi' con tara cwaji' ca co wara mi' pin ta, ac i ma' na ca xirao' mi' capari' Moisés pane. ²⁰ Je ca tomi' querec xim urut pum quem ac cocon na. Ma' na wari' co ma' 6 nana xurucun. Co pan' cain' pane, an ac cam na narima', aram aram mi' pin ac ca na. Om ca wanxi' ca. ²¹ Co ja' corom mao non co pan' cain' ma', an ac cam na, aram aram mi' pin ac ca na. Om ca wanxi' ca quem. Ac i ma' na co ja' corom mao non co ma' quem, an nam manacon cwaji' ca, aram aram mi' pin ac ca na. Om ca wanxi' ca co ma' quem. ²² Ac i ma' ac i ma' pi' pin nana, an an xam' nanam manacon cwaji' caca co pan' cain' pane, aram aram cono' pin ac caca na, om ca wanxi' camain' caca pane. Aram aram mi' pin ac cama na narima' ma' quem. ²³ Je ca tomi' querec xim urut pum ca' quem ac cocon na. Maqui' iri tara xec nein ca e' mami' xi' caca co wara cono' nana ma' ne. Mon xira co narima' ne tam nam quem? Ma' 7 ara xi' nana co an nanam pane na ca tomi' querec cocon ma'.

²⁴ Om ca coromicat xo' hwe ta ac tococwa na. Om ca taraju pa' hwein capijacon Iri' Jam ca xirao' to caca oro profeta cara pane, xi querec pin' hwein ca hwara' opa tamana nucun ma', pain ca ha' con pain ca to' e' mami' cocon oro wari' co wara cono' nana ma' quem. ²⁵ E' mami' iri tatara

co wara cono' nana ne, an xiho' ac cocon tara oro jam co taramaja mi' nonon Iri' Jam. Om ta cut caca narima'. Ca narima' nequequem ma', om ta cut cacama tarama' quem. ²⁶Pain ca e' mami' xi' caca co wara cono' nana ma', xirao' mi' nuhu' pain Moisés cara pane. Om ca noro hwein ca xirao' nucun pain ca pijim' qui' cain wijimain pana ca wiran ximao pane ra? Wara pain paxi' na ca cono' caca Abraão con Isaque con Jacó cara pane, ane tomi' ca' con Moisés Iri' Jam pane ne: Wata' co Iri' Jam cwa'. Iri' Jam ne napa' Abraão cwa', Iri' Jam ne napa' Isaque cwa', Iri' Jam ne napa' Jacó cwa' quem. Iri' Jam ne Iri' Jam ne wet nanapa' ta na ca tomi' con Moisés Iri' Jam pane. ²⁷Je ca taxi' xuxun pain ca e' e' wet nucucun quem, xi Iri' Jam ne cocon Iri' Jam oro wari' co wara cono' nana ta. Iri' Jam ne e' nonon co e' nana ta. Je ca tomi' xuhu' ca' ac tococwa na. Om ca coromicat xo' camain' hwe ta. Om ca taraju pa' hwein capijacon Iri' Jam ca xirao' to caca oro profeta cara pane, xi querec pin' hwein ca hwara' opa tamana nucun pain ca ha' con pain ca to' e' mami' cocon oro wari' co wara cono' nana ta. Ac i ma' na ca tomi' tococwa ma'.

Ca xirao' nucun Moisés ca awi tiquin' ca' nain oro wirain ca xirao' nucun

Mateus 22.34-40

²⁸Ma' ac ca na co ca' na taxipa' nain ca xirao' nucun Moisés ma'. Taraju nonon pain ca tomi' xucucun ma'. Querec pin' non Jeju pain ca tomi' xo' cocon ma' quem. Je ca xut hwet con ma'. Tomi' querec ac con na: Ma' ca xirao' nucun Moisés ca awi tiquin' ca' nain oro wirain ca xirao' nucun quem na ca tomi' querec con ma'.

²⁹Tomi' ac con na Jeju: Main ca' ca awi tiquin' ca' nain oro wirain:
Taraju wet je ta oro wari' nein Israel.

Iri' Jam ne urun Taramaxicon nexi' cwa'. Xica' pe na
Taramaxicon nexi' co Taramaxicon.

³⁰Ta noc hun Iri' Jam co Taramaxicon ne hwe ma' me ta.

Na e' na pain ca tomi' querec te mip hun pain iri' xumuhu'.

12.27 Oro saduceu pane, pain ca om ta e' mami' xi' caca co wara cono' nana ta caca ma', jain jain nonon oro wari' pain ca howa an xiho' cocon. Na e' na pain ca an xiho' cacapari' pain ca howa nexi' ca' nana. Je ca tomi' querec cocon Jeju cocon wari' co cono' ca' nanam manacocon. Hehe tara Jeju, om ta tomi' xo' ac capari' xi' paxi' nonon. Ane tomi' xo' tococwa ne. Hehe pan ac caca na. To' quiiji' pan tata pain ca howa ximama' nucucun.

Jain jain jun pain ca tomi' querec te mip hun ta.

Ta coromicat ni ca' hun me.

An hwet pe jein ca om noc hun pain oro ca ara hwe ta.

Ac i ma' napari'. ³¹Ma' na wirain ca xirao' nucun ca awi quem. An xiho' nain i ca' ca tomi' ta' ne. Ca' na ca xirao' nein:

Ta noc huhun oro win ma' hwe me ta.

Win ne ca om noc pan xujuhu' ta.

Ac i ma' napari' quem. Om na wirain ca xirao' nucun Moisés ca awi tiquin' ca' nain i ca' ca tomi' ta' ne na ca tomi' con ma'.

³²Awi na ta taramaxicon co ca' na taxipa' capijacon Iri' Jam. Iri'o' na ca tomi' nem ta. Xica' pe na Iri' Jam co Iri' Jam. Om na xucun, xica' pe na.

³³Na e' na pain ca tomi' querec te mip xun pain iri' ximixi'. Ta coromicat ni ca' xun, an hwet pe xin ca om noc xun pain oro ca ara iri' ca'. Ta noc xuxun oro win ma' nexi' quem. Win ne ca om noc pan xijexi' ca'. Je ca param mi' capari' Iri' Jam. Param pije' nain oro carawa ca tom tain' mi' xun ca', param pije' nain oro xijein carawa ca mi' xun ca'. Param tamana napari' pain ca om noc xun je pain ca om noc xuxun oro win ma' nexi' quem na ca tomi' ca wari' ma'.

³⁴Jeju ma', querec pin' non pain ca taraju pa' nucun. Tomi' ac con na: Taraju pa' ma ma' ira. Om ta i'ina taramaxicon pe ho' xim quem Iri' Jam ta na ca tomi' con ma'.

Om pin ac caca na wari' co tomi' querec ximama' nonon ma', xi hehe ara cocon ta.

**Ca tomi' querec tococwa pain ca ma' co iri'
hwanana ne ca Cristo quem tococwa**

Mateus 22.41-46; Lucas 20.41-44

³⁵Pijim' pe iri nain ca tao' caho' nein cote ne xiricon Iri' Jam Jeju ma' ne, pain ca ca' na tococwa pain capijacon Iri' Jam oro wari' ma', tomi' querec ac tococwa na: Cain' cain' ne ca coromicat nuhu' cocon oro co ca' na taxipa' nanain ca xirao' nucun Moisés quem? Para winacon Davi cocon Cristo quem? ³⁶Xi tomi' ac i ca' ara ca Davi pain ca xirao' pe nucun pane ta, pain ca tomi' mi' con Cristo pane. Je Tamataracon Iri' Jam ca mi' non pain ca tomi' nucun pane. Ca' na ca tomi' ca pane:

Tomi' non Taramaxicon ne Iri' Jam co iri' Taramaxicon ma'.

Xao pe ho' ne pain iri' cwere ca'.

Aram aram maqui' pa' ac quem tara xec nein ca to' quiji'
pin toton ta' co noc nenem ma'.

Taramaxicon pe ho' cara ac momon tara ta.

Ac i ma' na ca tomi' xucucun Iri' Jam con Cristo pane ta na ca xirao' pe nucun Davi pane.

³⁷ Je ca tomi' xuhu' ca' ac tococwa na. Taramaxicon ne non Cristo Davi cara pane. Cain' cain' xira quem? Ma' tara ca wina ac con quem na ca tomi' tococwa ma'.

Mija nana wari' co taraju nonon Jeju ma'. Om ca paric camain' caca. Taraju hohot nonon ca tomi' nucun quem.

³⁸ Ca' na iri tata pain capijacon Iri' Jam ne, tomi' ac tococwa na: Ma' tara xumuhu' me, ta an xiho' huhun oro co ca' na taxipa' nanain ca xirao' nucun Moisés ma'. In ac tatarapari' oro wari' ta nana. Je ca to taxipa' cocon wom co awi tamana, mam' xuruxut in mam' xuruxut in nonon quem. Tomi' querec te xo' tatarapari' oro wari' co xao to to nanain ximijain cidade quem nana. ³⁹ Param nanain ca xao to xo' wa cocon oro taramaxicon pain oro xirim ca cut in to xucucun ma', param nanain ca xao to xo' wa cocon oro taramaxicon pain ca cao' querec te wi nucucun quem. ⁴⁰ Mixein nanam oro narima' co cono' ca' nanam waram taxicacam, cut noc xa ac cacain na oro caramaxicacam. Cote ne ac ne na ca tomi' nucucun pain ca tomi' cocon Iri' Jam ma' quem. Ma' ta awi nana ta cacapari' oro wari' ta nana. Ac ca iri'o' xi' ca' tara me nana. Wap tamana pan totoron Iri' Jam ta. Om ta wap homa tococwa oro xucucun co pan teretem nana ma'. Caram ma' iri nana ne, wap tamana pan ac tococwa tara ta na ca tomi' tococwa ma'.

**Narima' co mi' ca' nam taxicam, co mi' non pain
wijimain dinheiro nequem Iri' Jam pane**

Lucas 21.1-4

⁴¹ Jeju ma', xao pe tucu in hwet ac cain na pana ca cut ho' to cacain dinheiro ca mi' xin cacain cote ne xiricon Iri' Jam oro wari' ma'. Ja' noro ac tococwa na oro wari' pain ca cut ho' cacain dinheiro nucucun pain panaji.

12.37 Cristo co to' witan roron oro wari' ta ca Iri' Jam pane, winacon Davi paxi' na pain ca wari' nucun pane. Ane Taramaxicon ne pan con Davi ne, xi om ne ca Taramaxicon pan ara ca Cristo pain ca Iri' Jam nucun ta.

Mija nana co caramaju nana ma', co cut ho' nanain cote ne dinheiro. ⁴²Maqui' ac cama na narima' co mi' ca' nam taxicam. Ximin na, om nam carawa. Cut ho' 2 ac camain na wijimain moeda pain panaji dinheiro ma'. Om ca hwara' camain' ne wijimain dinheiro nein moeda ca mi' cama ma'. Iri' wijimain na.

⁴³Harahap je ta ac tococwa na co taxipa' ca ma'. Noro jem narima' ma', co mi' ca' nam taxicam ma'. Wijimain paxi' na dinheiro ca cut ho' cama pain panaji dinheiro ma', ane querec hwara' con Iri' Jam ne. Ac ca hwara' tiquin' ca' nein na oro cote ne dinheiro ca cut ho' caca oro xucucun wari' ma'. Tomi' iri'o' inuhu' ta. ⁴⁴Oro xucucun wari' ma', mi' hwara' paxi' nanain dinheiro nucucun. Ane pe ho' cara cocon oro wirain ne. Narima' co mi' ca' nam taxicam ma' iri na ne, om paxi' nam carawa. Ane mi' mi' pi' pin camain wijimain dinheiro ca pe ho' nam ne. Om pin nam dinheiro ca mam' cut cama carawa ca cao' cama na ca tomi' tococwa ma'.

**Oro ca hwet pa' toton nonon oro wari'
pain ca aram aram in qui' ta' ca Jeju**

Mateus 24.1-35; Lucas 21.5-37

13 Hwet ca' iri nain ca tao' caho' nein cote ne xiricon Iri' Jam Jeju ne, tomi' ac ca na co taxipa' ca ma': Noro rain oro quirinain xiricon Iri' Jam ca' Taramaxicon co ca' na taxipa' capijacon Iri' Jam. Awi tamana na. Iri' horonain pacun na ca mam' quep cacain ta non.

²In ac main oro horonain xirim ca' ra ac con na. Ame ma e', main maqui' tara xec nein ca to' pa horohot pi' pin xin xine oro xirim ca'. Om ta to wet xica' pe camain' ne oro pacun nein. To' pa horohot pi' pin ac xine tara ta na ca tomi' con ma'.

³Mama' ac cacain na Pacun Nein Oliveira ma'. Xao pe ac ca na Jeju. Querec pira nanain cote ne xiricon Iri' Jam pain xijein cacarain taparain com ma'. Tomi' querec pan ac con na Pedro con Tiago con João con André. Xica' to nana, om nana xucucun. Tomi' querec ac cocon na: ⁴Ma' xec ca hwet pin ta' ne oro ca tomi' ma ca' ne? Cain' xi querec pin' ac urut pain ca wixicam pin ne xec nein ca hwet pin ta' ne ca tomi' nem ma' quem na ca tomi' querec cocon ma'.

⁵Om na, ma' tara xumuhu' me ac tococwa na. Ta howa huhun oro wari' co mixein xim nunuhu' pain oro carawa ca maqui' ta' ma' me. ⁶Mija

tatara oro wari' co wata' ta nana pain ca an hwet cacain wuxu ca', mixein ac tococwa tara oro wari'. Mija tatara wari' co howa nonon quem. ⁷Ta jin' hwe pain ca aram aram taraju huhun oro wari' pain ca to' parapa' caracan xucucun pain macarahu' ca' me, je pain ca to' parapa' xucucun pain oro xijein macan' pain pira quem. Na e' na pain ca mixein ac i ma' tococwa oro wari', je pain ca mana' caracan ac i ma' xucucun ma' quem, je curucucun mao tara. Ane om pi' pin hap ta' ne macan' ne, ame hwe e'. ⁸To' parapa' caracan ac xucucun tara oro wari', oro taramaxicon nucucun ma' quem, mana' caracan ac xucucun tara. Jain jain tamana tatara oro wari' pain oro xijein macan'. Cocoroc tamana tara macan'. Om pin tara oro carawa ca cao' wa. Oro ca jain jain nucucun oro wari' pain ca xo' hwet pa' cocon oro ca xirac wa ma', an xiho' tarain ca caxi nequem narima' pain ca xo' caxi cam cawinacam ma', ac i ma' tara cocon oro wari' quem. Ame hwe e', main jain jain tamana tatara ta.

⁹Ma' tara xumuhu' me, xi quep xim ara cucuhu' oro wari' ta. Cut mi' ac cucuhu' tara cocon oro taramaxicon co juiz nana, wap to ac cucuhu' tara pain oro xirim ca cut in to xucucun ma' quem. Cut mi' tuturuhu' cocon oro taramaxicon, tomi' querec ac cucuhu' tara pain oro ca ara hwe ma'. Ara ac i ma' tuturuhu', xi om ne ca howa ara mahu' ta. Je i ma' ira, na e' na pain ca tomi' hwet huhun pain capiija ta. ¹⁰Na e' na pain ca pijim' mi' cain' tococwa pain capiija oro wari' pain oro xijein macan' ta. ¹¹Ta toron ne xumuhu' pain ca aram aram quep xim cucuhu' ma', je pain ca cut mi' xim cucuhu' cocon oro taramaxicon co tomi' querec xim nunuhu' ma' quem. Ta cain' xi tomi' narain ho' ac xijexi' ne hwe me. Coco' quima hwet xun iri jujun pain ca tomi' querec xim cucuhu' ne, mi' ac cuhu' tara pain ca tomi' wa Iri' Jam. Tomi' e' jujun pain ca tomi' je pan cuhu', xi wahu' ne co tomi' xi' pan nana ta. Je Tamataracon Iri' Jam pan tara co mi' xim nuhu' pain ca tomi' wa ta.

¹²Ma' tara wari' co tomi' mi' ton non cocon oro taramaxicon cwaji' ca ma'. Mon cwa' aji' cwa', to' pa' pin jun ta totoron. Ac i ma' tara co wanxi' ma' quem. Mon cwa' panxita' cwa', to' pa' pin jun panxita' cwa' totoron. Ac i ma' tatara mana panxica wari' ma' quem, noc pin totoron cote caca cacam jicocon ma', to' parapa' pin ac tacacama tara quem. ¹³Noc noc pi' pin tuturuhu' oro wari', xi om ne ca howa ara mahu' ta. Ane tomi' xuhu' pain i ca' ne: Wari' co howa cara napa' ma', pain ca howa howa pi' pin pa' con oro ca quep em' wa ma', wirico tara co to' witan wa ta.

¹⁴Main xat pe tarain cote ne xiricon Iri' Jam caji pacun ca Iri' Jam xi' ma ca ta ac tococwa na. Om xi pe nein i cain ta. To' em' pin tarain cote ne xiricon Iri' Jam. (Wahu' pain ca noro hwein ca xirao' ne ca', taraju pa' je ta.) Querec iri jein ne, jein ca' ac hwein tara. Wahu' pain ca to hwein oro cidade pain Judeia ma', jein mama' ac hwein tara oro pacun. ¹⁵Wari' co hwet pe ca' nain xiricon ma', mo mao hap ac ca tara. Om ta na ne pain ca corom in mao cain xiricon pain ca cut tain cain caramaxicon. Mo mao hap e' tara ta. ¹⁶Wari' co pe nain totacon ma' quem, om ta na ne pain ca in mao cain xiricon pain ca cut ton con oro womicon. Mo mao hap e' tara ta. ¹⁷Oro narima' co nam' nana pain oro xec nein ca jein mama' xi' cacama ma', wiricacam co ma' nanam wixicacam hwijima' ma' quem, jain jain tamana tatara. I'ina tamana tataram pain ca jein mama' wa. ¹⁸⁻¹⁹Om ta awi camain' ne oro xec nein ca jein mama' xi' caca oro wari'. Jain jain tamana tatara. Om ca wara querec camain' xine ca jain jain wa ca an xiho' nain pane, pain ca xo' ma' ten qui' ne macan' con Iri' Jam pane, je win jain jain tamana xi' caca oro wari'. Om ta jain jain ac i ma' mami' caca quem. Je ca tomi' xuhu' ca': Tomi' mi' xujuhu' con Iri' Jam ta, tomi' ca' jun: Xiram pa' xut ta Iri' Jam. Mi' xut pain ca awi ne xec pain ca jein mama' xi' urut quem. Om tara pain oro xec ca xio tamana ta, ac i ma' tara ca tomi' mi' xujuhu' con Iri' Jam. ²⁰Mo xi om to' wijimain pin cain oro xec nein ca jain jain nucucun oro wari' Iri' Jam ma', om xi witan camain' caca. Ane to' wijimain pin tain cain ne. Xi ma' ara caca oro wari' nucun co tora' ca ma'.

²¹⁻²²Ma' tatara wari' co tomi' mixein ca' xi' nana: Wata' co Cristo ta tatara. Ca' ac caca tara oro xucucun ma' quem: Wata' co profeta ta tatara pain ca tomi' mixein nucucun. Mixein xuxun oro wari' cwa' tatara, am ha' capari' pain ca mixein xuxun oro wari' co tora' ca Iri' Jam cwa' quem tatara, ara ara ac cacain tara oro ca om ara taxi' ne ca wari' wa ma', wa wa ac cocon tara oro wari'. Je ca tomi' xuhu' ca' ac tococwa na. Mo ta tomi' ximama' ca' cucuhu' wari' ma': Noro je, mon cwa' Cristo cwa', mo ta tomi' ac i ma' cucuhu'. Mo ta tomi' ca' cucuhu' quem: Noro je, mon cwain

13.14 Ma' na iri' caxicon taramaxicon nucucun oro tatirim pain cara pane, pain ca om maqui' querec ca Jeju pane. To' em' pin nain cote ne xiricon Iri' Jam pane, xi om ne ca quep ara cain caji pacun ca Iri' Jam xi' ma ca, an xat pe ac cain na pain tequipain xiricon Iri' Jam. Wirico co xirao' pe ca Daniel pane. Wara pain paxi' na caxicon taramaxicon pane, ane maqui' ta' ca xucun co an xiho' non ne na Jeju quem. Je ca tomi' tococwa co taxipa' ca ma'. **13.14** Am wirico Marcos ca co tomi' nain i ca'. Ac ca om tomi' pan cain na Jeju.

Cristo cwain, mo ta tomi' ximama' ac i ma' cucuhu', ta howa huhun me ta. ²³Ma' tara xumuhu' me. Wara tomi' xo' inuhu' pain ca om hwet querec cuhu', wara tomi' hwet pi' pin inuhu' pain oro carawa ca hwet pa' xim nuhu' ta.

²⁴Pain oro xec ma', pain ca win pi' pin ne ca jain jain tamana nucucun oro wari' ma', mixem pin tara tocon xina. Toha toha om pin tara panawo'. ²⁵Camara' qui' tarain pawin oro pijo'. Cocoroc cocoroc pi' pin tara oro coximain pawin quem. ²⁶Querec ac cacapa' tara oro wari' pain ca maqui' tain pawin. Wata' pain ca Iri' Wari' ta' ca', maqui' ac ta' tara pain tajain nanawin. Mam' maqui' tain ca hwara' opa tamana ne pain ca toc meremem ne. ²⁷Tomi' ac toton tara oro jam co taramaja mi' nanapa' ma': Mama' jein oro xijein macan' ta, cut in cut in pi' pin jujun oro wari' co tora' ca Iri' Jam ta, cut in qui' jujun pain oro xijein macan' pain pira ta, ac i ma' tara ca tomi' toton ta.

²⁸Noro jein panaji figo ma' ac tococwa na. Xi to' querec pin' ara capari' pain i ca' ta. Taraju pa' jein ta: Hwerekhwet pin iri na xocori tarajain tenenein ne, taxi' pin ac hwein na ca wixicam pin ne oro xec pain ca xain toto ca xina. ²⁹Ac i ma' tara pain ca in qui' ta' ne quem. Querec iri jein ca hwet pin ne oro ca tomi' hwet xuhu' ca' ne, taxi' ac hwein tara ca wixicam pin ne xec pain ca in qui' ta' ne. Om ta pira mami' ne. ³⁰Om ta cono' cono' pi' pin querec caca oro wari' co e' e' wet nana pain xocori ca', hwet pa' ac cocon tara oro ca tomi' hwet xuhu' ca'. Tomi' iri'o' inuhu' ta. ³¹Main om pin tara pawin pain macan' ca'. Oro ca tomi' ne ca' iri na ne, om ta pan' ara'am camain' ne ta. To wet cara tara ta na ca tomi' tococwa ma'.

Ca om taxi' xine xec nein ca in qui' ta' ca Jeju

Mateus 24.36-51

³²Om na wari' co taxi' nain iri' xec nein ca in qui' ta' ne ta ac tococwa na. Om ca taxi' cacain oro jam co to nanain pawin, om ca taxi' tain quem. Xica' pe na Te co taxi' nain ta. ³³Ma' tara xumuhu' pain ca winim' xo' mahu'

13.30 Ca tomi' nucun Jeju ca', pain ca main hwet pa' toton oro ca tomi' hwet xuhu' ca' ca ma', tomi' mi' nain ca to' pa horohot pin xin xine cote ne xiricon Iri' Jam pain Jerusalém. Iri'o' na ca tomi' nucun quem. Oro wari' co e' e' wet nana pain ca xo' tomi' ac i ma' ca pane, ma' nana co e' e' wet nana pain ca pa horohot pin xine cote ne xiricon Iri' Jam pane. Om ca cono' querec caca pane.

me. Xi taxi' hwein xec nein ca in qui' ta' ne ta. ³⁴Carawa ca ara ta' ne pain ca in qui' ta' ta' ca', an xiho' tarain carawa ca ara ne con waximain xirim co mao nain pira. Tomi' mam' ac tococwa na oro wari' co taramaja mi' e' nonon ma'. Querec wet jein xuru pain oro caramaju pa'ao' ac tococwa na, mi' mi' xam' ac tococwa na pain ca taramaja nucucun. Tomi' mam' ac con na wari' co querec wet nain man ca corom ac xine xiricon ma'. Ma' tara xumum pain ca winim' xo' mapa' pain ca in qui' ta' ne ta non, mao ac ca na. ³⁵Je ca tomi' xuhu' ca' ac tococwa na. Ma' tara xumuhu' pain ca winim' xo' mahu' pain ca an xiho' ton waximain xirim co mao nain pira. Xi taxi' mahu' pain ca aram aram in qui' ta' ne ta. Am maqui' tain irawin, am maqui' tain ximijain xim, am maqui' tain iri' xo' xec pain ca aca pin ca me, am maqui' tain ca hwet pin ca xina. ³⁶Mo ta ane ane maqui' pa' xuhu', na e' na pain ca wara winim' xo' mahu' ta. ³⁷Ca tomi' xuhu' ca', je ca tomi' tomi' pi' pin toton oro wari' co howa nanapa' ma'. Ma' tara xumuhu' me, winim' xo' xine ta na ca tomi' tococwa co taxipa' ca ma'.

Ca tomi' xo' xucucun pain ca to' pa' pin xun cocon Jeju

Mateus 26.1-5; Lucas 22.1-6; João 11.45-57

14 Wixicam pin ac ne na Páscoa ma', je oro xec nein ca tomi' querec te xucucun oro judeu ma', pain ca cao' e' cacain capam' ca om joc wanan wa pain ca to' memerem nein ma' quem. Om ca pira ne, ma' 2 e' na xec pain ca maqui' ta' ne ma'. Oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma' quem, tomi' xo' ac xucucun na. Cain' cain' xuxun Jeju quem? Cain' xi quep noc xa ac xun quem? Cain' xi to' pa' pin ac xun quem? ²Om ta quep xun pain oro xec nein ca tomi' querec te nexi' ca'. Ma' ta om teretem caca oro wari' ta, ac i ma' na ca tomi' xo' xucucun ma'.

Ca ji'ao mi' tocwa pain caji towaxi' Jeju

Mateus 26.6-13; João 12.1-8

³Pe ac cain na Betânia Jeju, cao' pe nain xiricon wari' ma'. Simão na wixicon. Ma' non caji nan Simão pain cara pane. Xut hwet ac con na Jeju

14.1 Páscoa na wixinain xec nein ca tomi' querec te xucucun oro judeu pain ca mam' pe wet cocon oro hwanana nucucun pain ca to' witan ca' tococwa pain Egito pain cara pane.

narima' ma'. An nain caji towaxi' ca hu awi ma', ca wara ji'ao pe cama pain caji too ca mam' quep xine pain ca awi ne pacun ca taramac tamana. Homain nardo na wixinain caji towaxi'. Mija na dinheiro nein. Jicat ac camain na tamain too nein, ji'ao mi' ac con na pain winacon Jeju.

⁴Ma' nana co cao' to ho' nonon ma' quem. Mana' nanam. Cain' cain' xira cam ne nana. Para waraju camain caji towaxi' ma' quem? ⁵Je xi vender camain quem? Cut ac camain xira cote ne dinheiro nein, 300 xira denário ca cut cama ta. Mi' tiquin' ac tococwa xira pain oro wari' co om nonon carawa na ca tomi' in pin cacam ma'.

⁶Ane tomi' ca Jeju ne: Je i ma' ira, to wet iri cama ma'. Miri'om jem. Para tomi' em' hwem ma' quem? Hohot na pain ca an hwet mi' ac i ma' capa' pain ca tomi' querec te nequem. ⁷Tama' ma' ara xi' nunuhu' oro wari' co om nonon carawa. To ho' cara tuturu' pa'ao'. Ha' tuturu' pain ca tama' quep xiho' huhun quem. Wata' iri na ne, om ta pe ho' cara xuhu'. ⁸Narima' cwa', mi' xim paxi' napa' pain carawa ca awi. Ane ma' e' cam homain nardo ca' ne. Je ca ji'ao mi' capa' pain. Win ne ca ji'ao mi' xim cacapa' pain homain towaxi' pain ca aram aram an corom pe xim cacapa' pain manain pacun ma', wara ji'ao mi' napa' pain homain towaxi' narima' cwa', pain ca e' e' wet ta' ca'. ⁹Je ca tomi' xuhu' ca', tomi' iri'o' inuhu'. Oro wari' co pijim' mama' xin nanain pira ma', pain ca tomi' hwet xun cacapa' cocon oro xucucun wari' ma', pijim' hwet ac cacain tara ca ara mi' capa' cam cwa' ta. Mam' pe wet cara ac tacama tara ta na ca tomi' tococwa ma'.

**Ca quep xiho' xuhu' pain ca quep xun hun Jeju ta cocon
oro taramaxicon nucucun oro sacerdote Judas**

Mateus 26.14-16; Lucas 22.3-6

¹⁰Judas Iscariotes ma', co to' 12 nonon co taxipa' ca Jeju ma', hwet ac cocon na oro taramaxicon nucucun oro sacerdote. Tomi' ac cocon na: Quep xiho' xuhu' pain ca quep xun hun Jeju. Tomi' mi' xuhu' con ta nonon.

¹¹Taraju iri nonon ne, tomi' querec te tamana ac caca na. Mi' xut pum pain dinheiro con ta ac cocon na. Ma ac ca na, noro noro ac con na. Cain' xi tomi' mi' toton con ne ac ca na. Hohot tara pain xec ca' ra? Am pain xim ca' tara quem na ca tomi' pan xucun.

Ca toc wi cacain comi memem con Jeju

Mateus 26.17-30; Lucas 22.7-23

¹²Maqui' pin iri na iri' xec nein ca cao' querec te e' cacain capam' ca om joc wanan wa pain ca to' memerem nein ne, pain xec nein ca to' pa' taxipa' cacain wijimain taramaji ovelha ca to' mam' pe wet nonon pain ca witan ca' cacain Egito oro hwanana pane, tomi' querec ac cocon na Jeju co taxipa' ca ma': Main ca ara to jein maparut pain carawa nein Páscoa pain ca cao' querec te nexi' quem nonon.

¹³Tomi' xo' ac tococwa na, ma' 2 nana co tomi' xo' ca ma'. Xuruxut mama' jein cidade ma'. Xut cam' ac cuhu' tara wari' co an nain caji tapaxi' pain com. Ja' ja' corom mao ac hun tara pain xirim. ¹⁴Tomi' ac hun tara waximain xirim ma': Tomi' nem Taramaxicon nuxut co ca' na taxipa' capijacon Iri' Jam ta. Main man ca tomi' pe mapa' pane, ca cao' querec te to xin urut pain carawa nein Páscoa quem nem. Cao' querec te wi ta' cocon co taxipa' ta' cwa' nem ta ac hun tara. ¹⁵Main i ca', piri' mama' xi' ta ac cuhu' tara. Querec jein ta ac cuhu' tara pain cote ne manain xiricon ma', ca wara awori to ne oro coximain ma'. Wara ara an to xo' jein pain i cain, ma' ta cao' querec te iri' ta ac tococwa na.

¹⁶Ma ac caca na, mama' ac cacain na cidade. Mam' ac cocon na wari' co tomi' ca Jeju, mam' nanain manain xirim ca tomi' ca quem. Ara an to xo' ac cacain na carawa ca cao' querec te xi' caca pain Páscoa quem.

¹⁷Xo' um pin iri na ne, maqui' ac ca na Jeju. Wirico, wiricoco co taxipa' ca ma', co ma' 12 nana ma', maqui' ac caca na. ¹⁸Cao' xi' ta, xao to ho' ac xucucun na, cao' cao' ac caca na. Cao' cao', tomi' ho' na Jeju: Ma' napari' co quep xiho' toton nonon co noc nanapa' ma', co quep xim nanapa' ma' nonon. Win ma' nuhu' ta nonon. Tomi' iri'o' inuhu', tomi' mi' tarapa' cocon co noc nanapa' ta nonon.

¹⁹Tomi' xaxa' tamana ac caca na. Wata' tara pum ra ac con na xucun ma', wata' tara pum ra ac cocon na oro xucucun ma' quem. Wata' tara pum ra wata' tara pum ra xam' nonon.

²⁰Win ma' nuhu' cwa' ac tococwa na. Win ma' nuhu' pain ca taxipa' mahu' ca', pain ca ma' 12 hwe ca'. Wirico tara co xin cam wi napa' pain capam' pain too ca mam' cao' wa ca' tata. ²¹Mi' pin ta' paxi' ina pain ca Iri' Wari' ta' ca'. Win ne ca xirao' pe cacapa' oro profeta pane. Mi' pin ta' paxi' ina. Ane ximin pan ta' ca co ma' co tomi' mi' xim napa' cocon co noc

nanapa' ma' ne, co quep xim nanapa' ma'. Ximin tara. Hohot xira pain ca om pan' ne ca pije' nucun cam jicon ta na ca tomi' tococwa ma'.

²² Cao' ac caca na, cao' cao'. An ac cain na capam' Jeju. Tomi' querec te urut pum pain ca mi' maparut pain capam' ca' quem Te na, jicat caracan ac cain na, mi' ac tococwa pain na. Ma' ta. Cao' jein. Capam' ca', an xiho' nain cwere ta ac tococwa na. ²³ An ac cain na ca mam' toc wa ca ji'ao pe xine comi memem ma' quem. Tomi' querec te urut pum pain ca mi' maparut pain comi memem ca' quem Te iri na ne, an mi' ac tococwa pain na. Toc toc pi' pin ac caca na. ²⁴ Comi memem ca', an xiho' nain cocu ta ac tococwa na. Je ca to' querec pin' cuhu' pain ca tomi' an pe xo' mi' cuhu' Iri' Jam cwa', pain ca to' witan xim cuhu' ca'. Ao mao iri tara cocu pain ca mi' pin ta' ne ca' ne, je win ara pin tain cain ca wara tomi' an pe nucun. Mija tatara oro wari' co mi' pin caho' ta' ta' quem. ²⁵ Om ta toc mami' tain comi memem ta ac tococwa na. Tomi' iri'o' inuhu', om ta toc mami' tain comi memem. Om om, maqui' pa' ac capa' tara iri' xec nein ca toc pe tain ta' pain i cain, pain ca taramaxicon pe ca Te cwain, toc ac tain xocori tara pain i cain ta na ca tomi' tococwa ma'.

²⁶ Com iri nanain tamara' pain ca in ac cocon Iri' Jam ne, hwerehwet mama' ac caca na, mama' ac cacain na Pacun Nein Oliveira ma'.

Ca paca' xim mahu' pain xim ca' cocon co taxipa' ca Jeju

Mateus 26.31-35; Lucas 22.31-34; João 13.36-38

²⁷ Tomi' ac tococwa na co taxipa' ca ma': Paca' paca' pi' pin xim mahu', xi xirao' pe ara xine pain capijacon Iri' Jam pata' pane. Ca' na pata':

To' pa' pin ton co querec wet taxipa' nain ovelha ma',
wawaran mama' ac ne tara oro ovelha nucun.

Ac i ma' na ca xirao' pe xine pain capijacon Iri' Jam pane, pain ca xirao' pe xine ca tomi' nucun pata' pane. ²⁸ Ane e' mami' ta' ta' ne. E' mami' iri ta' ne, wara mao ac tain tara Galileia. Maqui' ac hwe tara pa'ao' na ca tomi' tococwa ma'.

²⁹ Tomi' pan ac ca na Pedro: Paca' paca' pi' pin paxi' teterem oro xucucun co taxipa' ma cwa'. Wata' iri na ne, om ta paca' xim ta na ca tomi' con ma'.

³⁰ Om na ta Pedro ac ca na. Tomi' toton momon oro wari' pain xim ca'. Aca tara me, om ta aca mami' querec ca, wara tomi' ac momon tara: Om

ca querec pin' ton ta ac momon tara pata'. Ma' 3 tara ca tomi' ac i ma' toton ma quem. Tomi' iri'o' inem ta Pedro na ca tomi' con ma'.

³¹ Om na ta ac ca na, tomi' mip na. Om ta tomi' ac i ma' toton. Mo ta to' pa' wi pin xim cacapa' pum, je i ma' ira, om ta tomi' camain' toton pain ca om ca querec pin' ton ta toton pum na. Ac je ac je pi' pin na ca tomi' nucucun oro xucucun ma' quem.

Ca pe cain Getsêmani Jeju

Mateus 26.36-46; Lucas 22.39-46

³² Mama' ac cacain na totain oliva ma', ca Getsêmani caca oro wari' ma'. Tomi' pan ac cocon na co taxipa' ca Jeju ma'. Xao to to jein i ca', pain ca tomi' ton Te ta tata.

³³ Harahap je ta ac tococwa na Pedro con Tiago con João ma', o mama' ac tococwa na. Xuruxut xuruxut, toron tamana ac ne na ximicon Jeju. Jain jain pin na. Mija na. ³⁴ Tomi' xaxa' tamana ina ta ac tococwa na. Mija na ca tomi' xaxa' ta', pain iri' xumu ca', mija ina ta! Tomi' xaxa' tomi' xaxa' mi' pin ma' ac ta' pain tara, ac je na pata'. Mon to wet jein i ca'. Ta pi'am hwe me, momon querec je ta tata.

³⁵ Xut xut xat, terem' tucu mi' ac cain na macan'. Tomi' ac con na Cote ca. Am ha' quem, pain ca nain ho' mapa' pain carawa ca ara xim napa' pain xec ca' quem. ³⁶ Te. Te ac con na. Om na carawa ca tanacam' nem ta Te. Nain ho' ne pain ca jain jain ta' ne ca', pain ca mi' pin ta' ne ca' quem Te. Tara pum, nain ho' ne pain me paxi' inem. Ane param e' tain ca param pan nem ne. Noc inain ca param ne ca' na ca tomi' con Cote ca.

³⁷ In hwet ac tococwa na. Wara pi'am nana. Tomi' ac con na Pedro ma', co Simão na xijein wixicon ma'. Pi'am ma ra Simão? Om ca momon querec ac ma ra? Xica' pe tara hora nein ca querec je xuhu' ca' inuhu' ne non. ³⁸ Ta pi'am hwe me ta ac tococwa na. Momon tomi' jun Iri' Jam, ma' ta om ja' camara' xihwe pain ca tomi' querec cuhu' Caxicon Jam ta. Tomi' ha' xi' paxi' hwe pain xumuhu' ma', ane om hwara' opa hwe pain curuhu' ma' ne na ca tomi' tococwa ma'.

³⁹ In ca' mami' ac tococwa na, tomi' mami' ac con na Cote ca. Ac ca tomi' con cara ne na pain ca tomi' mami' con ma'. ⁴⁰ In hwet ac tococwa na, wara pi'am mami' nana quem, xi in tamana ara ne matacocon ta. Hehe ac cocon na.

⁴¹In mao mami' ac ca na, tomi' mami' ac con na Cote ca, in hwet mami' ac tococwa na. Je win 3 pin ne ca in hwet in hwet tococwa ma'. Tomi' ac tococwa na: Pi'am pi'am wet hwe ra? Xao to wa xao to wa wet hwein xumuhu' ra tata. Je i ma' ira, maho' jein ta ac tococwa na. Maqui' pin nana co quep xim nanapa' cwa'. Wata' pain ca Iri' Wari' ta' ca', quep ho' xim nanapa'. Maqui' pin na co tomi' mi' xim napa' cocon oro caracat ta. ⁴²Tequi' to je ta. Maji cocon. Maqui' nain i ma' co tomi' mi' xim napa' cocon ta na ca tomi' tococwa ma'.

Ca quep cocon Jeju

Mateus 26.47-56; Lucas 22.47-53; João 18.1-11

⁴³Tomi' tomi' wet na Jeju, maqui' ac ca na Judas ma', co to' 12 nonon co taxipa' ca ma'. Mija nana wari' co ja' ja' nonon. Wiricoco oro taramaxicon co ja' ja' jun nonon. Mo nana: Oro taramaxicon nucucun oro sacerdote ma', oro co ca' na taxipa' nanain ca xirao' nucun Moisés ma', oro taramaxicon nuxut pain ca judeu urut ca' quem, wiricoco co hwet jun nonon. Cut nana cote ne quit je pana quem. ⁴⁴Judas ma', co tomi' mi' toton nonon con Jeju ma', wara tomi' xo' nonon oro wari' co ja' ja' nonon ma'. Ma' ta querec pin' hun ta nonon. Ca' nonon: Wari' co xup ta' ma', wirico tara co quep hwe. Querec wet xo' jun pain ca an mao hun quem nonon.

⁴⁵Xut hwet hap ac con na. Taramaxicon co ca' na taxipa' capijacon Iri' Jam na ca tomi' con ma'. Xup ac con na. ⁴⁶Quep ac cocon na, pao' pe ac cocon na quem. ⁴⁷Coc xicot ac cain na cote ne quit wari' co xat pe nain i ma', wara ca' na co ma' co taramaja mi' e' non sacerdote co iri' taramaxicon ma', ton tapit pin ac cain na taraxicon.

⁴⁸Cain' cain' xihwe quem ac ca na Jeju. Para cut hwein cote ne quit je pana mam' wap wa pain ca quep xim mahu' ma' quem? Ac ca an noc xa taxipa' ta' carawa na pahu' ra na ca tomi' tococwa ma'. ⁴⁹Wara pe ho' paxi' inuhu' pain oro xijein xec pane, pain ca ca' na pe tain cote ne xiricon Iri' Jam capijacon pane. Je xi quep qui' mahu' pain i cain pane? Je i ma' pahu' ta ac tococwa na. Na e' na pain ca hwerehwet pin ne oro ca xirao' to caca oro profeta pain capijacon Iri' Jam pane ta na ca tomi' tococwa ma'.

⁵⁰Paca' ac cocon na co taxipa' ca ma'. Jein mama' jein mama' pi' pin nana. ⁵¹Ma' na xo' hwara' co ja' ja' non ma' quem. Wiric pa' e' xucun con

cote ca wom. Quep xun paxi' nonon quem. ⁵²Ane an pe pin con cote ca womicon ne, mo mao curucun ac ca na quem.

Ca an mi' tocwa cocon oro taramaxicon co hwara' opa tamana nana

⁵³An mao ac cocon na Jeju. An mi' nonon con sacerdote co iri' taramaxicon. Cut in ac xucucun na oro taramaxicon quem. Mo nana: Oro taramaxicon nucucun oro sacerdote ma', oro taramaxicon nuxut pain ca judeu urut ca', oro co ca' na taxipa' nanain ca xirao' nucun Moisés ma' quem. Cut in cut in pi' pin ac xucucun na. ⁵⁴Ja' tequi' pira ca' non Jeju Pedro ma' quem. Xut ac ca na, wara ca' na ca tao' caho' nein xiricon sacerdote co iri' taramaxicon ma', xao pe ho' ac cocon na oro guarda ma'. Nonoc ta' xe ta na.

⁵⁵Tomi' xo' ac xucucun na oro taramaxicon nucucun oro sacerdote ma', cocon oro xucucun taramaxicon co cut in xucucun pain ca Sinédrio caca ma'. Pirao' xuxun oro wari' co xina ximama' nanapari' con Jeju ta. Querec inon pain ca caracat nucun, pan tem tamana na, tomi' mixein ac i ma' tatarapari'. Taraju iri xuxun ne, ha' ac capari' tara pain ca tomi' hwet xuxun pain oro taramaxicon nucucun oro romano ma', to' pa' pin ac cocon tara ta, ac i ma' paxi' na ca tomi' xo' pan xucucun. Ane om mam' tocwa wari' co tomi' hwet xo' nain con ne. ⁵⁶Mija paxi' nana wari' co tomi' hwet ximama' nanain con. Ane om tomi' xo' caca ne. Om ca an an ari xijein ca tomi' nucucun.

⁵⁷Ma' ac caca na co tomi' hwet xut pahu' con ta nana ma' quem, xina ximama' ac caca na: ⁵⁸Taraju urut con pain ca tomi' ca' ca pane: To' pa horohot pin tain cote ne xiricon Iri' Jam ca quep caca wari' ca' nain xirim ca in ac to taxipa' xun Iri' Jam ca'. Ma' 3 pin iri tara xec nein ne, quep pan ac tain tara wirain xiricon Iri' Jam. Om tara wari' co quep nain ta na, ac i ma' na ca xina ximama' nucucun. ⁵⁹Tomi' ac i ma' paxi' nana, ane om an an ari xijein ca tomi' nucucun ne.

14.55 Ma' 70 nana oro taramaxicon co cut in xucucun. Sinédrio nonon oro wari' pain ca cut in xucucun. Ma' na iri' taramaxicon nucucun oro sacerdote, ma' nana oro xucucun taramaxicon nucucun oro sacerdote ma' quem, ma' nana oro fariseu cocon oro saduceu ma' quem. Ac juiz nana, taraju nonon oro wari' co tomi' em' nonon oro win ma' caca, tomi' mi' tomi' mi' ac tococwa na pain ca wap wa oro wari' co em' nana quem.

⁶⁰ Tequi' pe ac ca na sacerdote co iri' taramaxicon ma'. Xat pe nain ximijacocon. Tomi' querec ac con na Jeju: Je xi tomi' in pin momon caram cwa', pain ca tomi' em' quequem ca' quem non.

⁶¹ Ane tacana pe ca Jeju ne. Om ca tomi' in pin camain' tococwa.

Tomi' querec mami' ac con na: Wum co Cristo cwa' ra? Wum co Panxica Iri' Jam co awi cwa' ra non.

⁶² Wata' cwa' ira ac ca na Jeju. Main maqui' tara xec nein ca querec xim mahu' pain ca xao pe ho' ton Iri' Jam co hwara' opa pan. Wata' pain ca Iri' Wari' ta' ca', querec ac mahu' tara pain ca xao pe ho' tain iri' curucun pain i cain. Ame hwe e', wata' pain ca Iri' Wari' ta' ca', querec ac mahu' tara pain ca taramaxicon wi ta' con. Querec ac mahu' tara pain ca maqui' ta' pain tajain nanawin ta non.

⁶³ Taraju iri nain ca tomi' nucun Jeju sacerdote co iri' taramaxicon ma' ne, mana' tamana ac ca na, i' pin ac con na womicon. Xi mana' tamana ara ca ta. Je xi om tomi' hwet jein ca em' nucun co cwa' mami' xuxun oro wari' cwa' quem? ⁶⁴ Taraju pin iri hun pain ca tomi' ximao nucun ma', pain ca wata' co Cristo ta ca ma'. Cain' ca coromicat hwe con quem ac tococwa na.

Mi' pin tara ta, xi caracat ara ca pain ca tomi' ximao nucun ta ac caca na. Tomi' ac i ma' tomi' ac i ma' pi' pin nana.

⁶⁵ Ma' ac caca na co cupa' nonon ma'. Tatep pa' nanain tocon, to' to' ac cocon na quem. Ma' co to' nem cwa' quem? Tomi' hwet rain wixicon co to' nem cwa' ta nonon. An mao ac cocon na oro guarda ma', wap wap ac cocon na quem.

Ca tomi' ximao ca Pedro pain ca om ca querec pin' ton Jeju ta ca

Mateus 26.69-75; Lucas 22.54-62; João 18.15-27

⁶⁶ Pe nain i ma' Pedro ma', pain ca tao' caho' nein xiricon sacerdote co iri' taramaxicon ma'. Tomi' querec pe nonon Jeju pain tequipain xirim pain pawin ma', tahwet pe na Pedro pain macan' ma' quem. Xut tiquin' ca' ac con na xojam' co taramaja mi' e' non taramaxicon. ⁶⁷ Querec ac con

14.61 Para tacana pe ca Jeju quem? Jin' na ron? Wixipa' na ron? Om na ta. Taxi' tata pain ca xina ximama' nucucun. Miri'om e' tata. Je ca tacana pe ca ma'. Je ca om tomi' in pin camain' tococwa.

na pain ca nonoc cain xe. Noro noro ac con na. Tomi' ac con na: Pe ho' mon Jeju co maqui' nain Nazaré ma' quem non.

⁶⁸ Om na ta ac cam na. Om ca querec pin' ton, om ca taxi' tain ca tomi' ma ma' quem ac cam na. Xut hwet ac cain na man ca corom ac xine ca tao' caho' nein xirim ma'.

⁶⁹ Querec iri non pain ca pe cain i ma' ne, tomi' mami' ac cama na: Wari' nucun Jeju na co ma' ta tata oro wari' co to nanain i ma'. ⁷⁰ Tomi' in pin mami' ac ca na quem. Om na, om ca querec pin' ton ta nam.

Om om, tomi' ac cocon na caram ma' co xao to to nanain i ma' quem. Wari' nucun Jeju ma ma' ira. Xi wari' nein Galileia ara ma ta nonon.

⁷¹ Tomi' ximao ac ca na Pedro: Om na ta! Tomi' iri'o' inuhu' ta. Taraju napa' Iri' Jam ta. Om ca querec pin' ton co ma' co tomi' hwe ma'. Mo ta om tomi' iri'o' xuhu', wap ac capa' tara Iri' Jam ta na.

⁷² Aca mami' ac ca na me. Ma' 2 pin na ca aca nucun. Mam' pe wet ac cain na ca tomi' nucun Jeju pane. Om ta aca mami' querec ca me, tomi' ac momon tara: Om ca querec pin' ton ta ac momon tara pata', ma' 3 tara ca tomi' ac i ma' toton momon ma' quem Pedro non pane. Aca ac ca na quem.

Ca tomi' querec con Jeju Pilatos

Mateus 27.1-2,11-26; Lucas 23.1-25; João 18.28-40; 19.1-16

15 Xec pin iri na ne, pain iri' xo' xec ma', tomi' xo' ac xucucun na oro taramaxicon pain ca Sinédrio caca ma'. Mo nana: Oro taramaxicon nucucun oro sacerdote ma', oro xucucun taramaxicon nuxut pain ca judeu urut ca', oro co ca' na taxipa' nanain ca xirao' nucun Moisés ma' quem, tomi' xo' tomi' xo' pi' pin ac xucucun na. Pao' pe ac cocon na Jeju, an mao ac cocon na, o mi' ac cocon na con taramaxicon Pilatos.

² Wum co iri' taramaxicon nucucun oro judeu cwa' ra na ca tomi' querec con Pilatos.

Wata' cwa' ira. Win ne ca tomi' ma ma' ta ac ca na Jeju.

³ Tomi' em' tamana ac cocon na oro taramaxicon nucucun oro sacerdote ma'. Mija na ca caracat ca Jeju cwa' nonon.

⁴ Tomi' querec mami' ac con na Pilatos: Om ca tomi' in pin toton ma ra? Om ca taraju momon pain ca tomi' em' quequem pain ca caracat tamana na ta quequem ca' ra na ca tomi' con ma'.

⁵Ane tacana pe pan ca Jeju ne, om ca tomi' camain' ca. Wa wa tamana non Pilatos.

⁶Taramaxicon Pilatos cara pane, pain oro cawaxi' pain xec nein Páscoa pane, pain ca tomi' querec te wi caca oro judeu ma', pa hwet taxipa' non wari' co tao' pe wa. Je curucun pane, pa hwet taxipa' non wari' co tao' pe wa, pa hwet mi' taxipa' tata con oro wari' pane. Pa hwet mi' xut con co param urut cwa' iri nana ne, pa hwet mi' ac tococwa na con. Je curucun taramaxicon pane. ⁷Pain xocori ca' iri na ne, ma' na wari' co tao' pe wi wa cocon co noc nonon oro romano ma', co to' parapa' pin nonon pain ca mana' mana' mixita qui' tococwa soldado nucucun oro romano pane. Barrabás na wixicon. ⁸Maqui' ac caca na oro wari'. Mija nana wari'. Pa hwet mi' xut con wari' co tao' pe ma ma', win ma pane nonon Pilatos.

⁹Param mahu' pain ca pa hwet mi' xuhu' con co cwa' co taramaxicon ne hwe pain ca judeu hwe ma' ra na ca tomi' querec tococwa ma'. ¹⁰Ma' na ximicon Pilatos. Querec pin' tata oro taramaxicon nucucun oro sacerdote ma', querec pin' tata pain ca noc ximama' pan cocon Jeju ma'. Querec pin' tata oro wari' pain ca tomi' querec te tamana pan cocon quem. Je ca o mi' cacapa' con ta na ca coromicat nucun. ¹¹Ane wara tomi' cocon oro wari' oro taramaxicon nucucun oro sacerdote ma' ne. Noc urut con Jeju ta jun me nonon. Pa hwet mi' xut con Barrabás jun, tomi' tomi' na pin ac cocon na. Xin ne ac caca na, tomi' ac cocon na Pilatos: Om na, noc urut con Jeju ta, mi' xut con Barrabás ma', pa hwet mi' xut con Barrabás ta na ca tomi' cocon ma'.

¹²Cain' cain' xiton co cwa' quem, co taramaxicon ne hwe pain ca judeu hwe ma' quem ac tococwa na.

¹³Om na, na e' na pain ca tatatain mi' tocwa pain pana ta nana pain ca merem caca ma'.

¹⁴Cain' cain' xira pahu'? Para em' na hun ma' quem ac tococwa na.

Merem mip merem mip ac caca na. Om na, na e' na pain ca tatatain mi' tocwa pain pana ta nana.

¹⁵Ma ac ca na Pilatos. Ca' na ca coromicat nucun: Tomi' ha' toton, ma' ta tomi' querec te cacapa' ta na. Je ca pa hwet mi' tococwa con Barrabás ma'. Wap jun Jeju cwa' ta ac tococwa na oro soldado nucun, wap wap ac cocon na. An mao jun ta, tatatain mi' jun pain pana ta ac tococwa na.

Ca tatam' cocon Jeju oro soldado, je pain ca tomi' xirac cocon quem*Mateus 27.27-31; João 19.1-3*

¹⁶Oro soldado ma', an corom mao ac cocon na Jeju pain xiricon taramaxicon. Tomi' cut in ac cocon na oro win soldado caca ma' quem. ¹⁷Pe iri nonon con cote ca wom ma' ne, co ac womicon taramaxicon co paca' awi ma', ton ac cacain na caji macon ca puxu ma', mo' mo' ac cacain na caji waji' ca an xiho' paxi' nain ca to taxipa' caca oro taramaxicon pain winacocon ma', pe ac cocon na pain winacon. ¹⁸Pe torotop mi' mixein ac cocon na. Awi na taramaxicon nucucun oro judeu cwa' ta nana pain ca tomi' ximama' cocon ma'. ¹⁹To' ac cocon na pain winacon pain pana, cupa' cupa' ac cocon na quem. Pe torotop mi' ac cocon na, tomi' querec te mixein e' nonon quem. ²⁰Tatam' tatam' noc pin iri nonon ne, hot ca' ac cocon na con wom co paca' ma', pe mami' ac cocon na con iri' womicon. An hwet mao ac cocon na quem. Ma' ta tatatain mi' xun pain pana ta nonon.

Ca tatatain mi' cocon pain pana Jeju*Mateus 27.32-44; Lucas 23.26-43; João 19.16-27*

²¹Xuruxut mama' iri nanain wana ne, win quima ac cocon na wari' ma'. Simão na wixicon. Wari' nein Cirene na Simão. Cote ca Alexandre con Rufo na Simão ma'. Maqui' nain xitot. Quep ac cocon na oro soldado, an tiquin' rain panaxicon Jeju cwa' nonon. ²²An mao ac cocon na Jeju pain ca tamaja pan ne macan' ma', ca Gólgota caca oro wari' ma'. Maxinain Tacawaji' na ca tomi' mao nein Gólgota. ²³Wara joc wanan nanain comi uva pain waraqui mirra. Ma' ta. Toc rain ta paxi' nonon. Ane om toc cain ne. ²⁴Tatatain mi' ac cocon na pain pana. An an xam' xun womicon cwa' ta ac caca na oro soldado ma'. Ma' xi an non co cwa' ne, ma' xi an non co cwa' ne xucucun, ara ac cacain na ca ara taxipa' caca ma', ma' ta taxi' xun wom co an xi' iri' cwa' xucucun.

15.23 Comi uva ca wara joc wanan caca pain waraqui mirra ma', ac remédio na. To' om pin xirain ca caxi nucun pain ca tatatain mi' cocon pain pana. Ane noc inain ta ca Jeju ne. **15.24** Ara taxipa' ac i ca' nana pane: Xirao' xirao' xam' nanain wixicocon pain oro wijimain pacun ma', xin xin ac cacain na. Ma' ta taxi' xijexi' con wom co an xi' iri' cwa' nana. Xin iri nanain ne, noro ac cacain na, mam' ac cacain na oro wixicocon con womicon. Wum tara, an ron ta ac xucucun na con.

²⁵Om ca pawin ca xina ma', pain 9 hora ma', pain ca tatatain mi' cocon pain pana. ²⁶Xirao' pe ta ca pan tem na ta tocwa pain pana ma'. Tatatain mi' ac cacain na pain tamain panaxicon. Ca' na ca xirao' nein: Taramaxicon nucucun oro judeu ta na ca xirao' nein.

²⁷Tatatain mi' iri nonon pain panaxicon Jeju ne, ma' 2 ac caca na wari' co tatatain mi' wawa pain pana ma' quem. Iri' caxicon wari' nana, cut noc xa taxipa' nana carawa. Pe nain iri' curucun xucun, pe ac cain na paraxicon xucun ma' quem. ²⁸Ac i ma' na ca hwet pin ne ca xirao' pe xine pain capijacon Iri' Jam. Ca' na con pane: Ac ca caracat ca na cocon, xi to' pa' wi ara cocon cocon oro caracat ma' na ca xirao' pe xine con pane.

²⁹Tomi' xirac tomi' xirac nonon oro wari' co xuruxut tiquin' ca' nonon ma'. Nanaquin mixein mi' nonon pain winacocon, tomi' ximama' ac cocon na: Cain' cain' xima quem? Wum co to' pa horohot pin tain nain cote ne xiricon Iri' Jam pane ra? Ma' 3 pin iri tara xec ne, quep mami' pan ac tain tara ta ma pane ira nonon. ³⁰Je xi to' witan qui' xijem quem? Quiji' ca' ximain panajum ma' quem na ca tomi' ximama' cocon ma'.

³¹Tomi' xirac nonon, tatam' tatam' nonon oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma' quem. Win caca oro wari' ma'. Tomi' ximama' ca' nana: Quep xiho' paxi' nonon oro wari' pane. Ane om ha' con pain ca quep xiho' pan xucun ne. ³²Cristo na ron? Taramaxicon nucucun oro wari' nein Israel na ron? Je xi quiji' ca' cain pana quem? Querec iri xun pain ca quiji' ca' cain ne, howa pin ac xun tara ta na ca tomi' xirac nucucun. Tomi' xirac tomi' xirac nonon co tatatain wi wawa con quem.

Ca mi' pin nucun Jeju

Mateus 27.45-56; Lucas 23.44-49; João 19.28-30

³³Tocon xina pin iri na ne, xim pin ac ne na. Iri' xim na, xim xim pi' pin na pain oro xijein macan'. Piquirim pin iri na xina ne, pain 3 hora ma', toha pin mami' ac ca na quem. ³⁴Piquirim pin iri na xina ne, pain 3 hora ma', merem ac ca na Jeju. Merem mip na: *Eloí, Eloí, lamá sabactâni* na ca merem nucun. Pain ca merem ac i ma' ca ma', ca' na ca tomi' mao nein: Iri' Jam ne, Iri' Jam ne, para paca' mapa' ma' quem, ac i ma' na ca tomi' mao nein.

³⁵Ma' nana wari' co coco' to nanain i ma', co taraju nanain ca merem nucun ma' quem. Tomi' ac caca na: Taraju jun. Merem non Elias cara pane nana pain ca taraju ec nucucun.

³⁶Mi' ton pain caji comi uva ca tup ca' e' ac ca na win ma' caca ma', mo hwet ac cain na, xin cam ac cain na caji hoho hoho pain comi uva. Moin' pe ac ne na, an pe ac cain na pain tamain taparain pana. Ma' ta! Toc rain ta ac con na. To wet iri ca ma', querec xi' e' ac ca na. Am maqui' ca Elias con. Am hot ca' ton con pain panaxicon ca', ac i ma' na ca tomi' ximao nucun.

³⁷Merem ac ca na Jeju, merem mip na. Mi' pin ac ca na.

³⁸Wein mao ac ca na cote ca wom co wa pe nain cote ne xiricon Iri' Jam ma', co tao' caho' nain iri' ca pe ne panaxicon pain iri' paxicom cain. Wein ac nain ximijacon. Wein quiji' mao nain macan'. ³⁹Taramaxicon nucucun oro soldado ma', co xat ja' pan non ma', taraju iri non Jeju pain ca merem ca ne. Querec iri non pain ca mi' pin ac i ma' ca ma' ne. Tomi' ac ca na: Wa inon co cwa' me. Iri' Panxica Iri' Jam ca ma' ira na ca tomi' ca ma'.

⁴⁰Ma' nana oro narima' co noro pira nonon ma'. Mo nana: Maria Madalena ma', Salomé ma', Maria jicon Tiago con cwaji' ca José ma', ma' nana oro xequequem ma' quem. ⁴¹Wara ja' ja' nonon Jeju pane, pain ca pe qui' cain Galileia pane. Ja' ja' nonon, quep xiho' nonon quem. Mija nana oro xequequem co ja' ja' nonon pain ca maqui' cain Jerusalém ma' quem.

Ca an corom pe xine curucun Jeju pain manain pacun

Mateus 27.57-61; Lucas 23.50-56; João 19.38-42

⁴²Irawin pa' ac cocon na. Xec sábedo ta' na cocon, xec xao to wa xin ximixi' nana. Je ca wara an to xo' xin oro carawa nein sábedo pain xec ca' caca ma', je curucucun pane. ⁴³Je ca tomi' ton con Pilatos José ma'. Wari' nein Arimateia na José ma'. Win ma' ne nonon oro taramaxicon nucucun oro judeu co Sinédrio nana ma'. Hwara' opa na cocon oro win ma' ca pain ca Sinédrio caca. Wara taramaxicon pe ho' hap xirapari' Iri' Jam na na quem. Mo hwet ac con na Pilatos, om ca jin' con, mo hwet non. Mi' ne pain curucun Jeju ta ac con na.

⁴⁴He, mi' pin iri na ron ac ca na Pilatos ma'. Mo tomi' qui' ron taramaxicon nucucun oro soldado ma' ac con na wari' nucun ma', maqui' ac ca na. Mi' pin iri na ron Jeju ma' na ca tomi' querec con ma'.

⁴⁵Mi' pin na ta ac con na.

Ma, an mao rain curucun ta ac con na José quem.

⁴⁶An ac con na cote ca wom co awi José ma'. An quiji' ca' ac cain na curucun Jeju pain panaxicon, wiric pa' pin ac cain na con cote ca wom. Wara ca' na man ca wara xe' wa pain pacun ma', an corom pe ac cain na. Joc in ac cain na cote ne pacun pain manain ma', tao' pa' pin ac cain na. ⁴⁷Maria Madalena cam Maria jicon José ma', querec nanain manain pacun ca an corom pe pe xine curucun Jeju ma' quem.

Ca e' mami' ca Jeju

Mateus 28.1-10; Lucas 24.1-12; João 20.1-9

16 Corom pin iri na xina pain sábadó ma' ne, pain xec nein ca xao to wa e' cacain ximicocon oro wari' ma', cut ac cacamain na incenso. Ma' ta ji'ao mi' xin pain curucun ta nana. Mo nana: Maria Madalena ma', Salomé ma', Maria jicon Tiago ma' quem. ²Iri' xo' xec pain domingo ma' iri na cacam ne, toha pin iri na xina cacam ne, mama' xin manain pacun ca an corom pe pe cacain curucun ta ac cacama na. ³Xuruxut xuruxut tomi' ac xequequem na: Ma' wari' xira co joc mi' napari' pain pacun ca tao' pa' caho' nain manain ma' quem na ca tomi' xequequem ma'.

⁴Xuruxut xuruxut noro ho' nana. Querec nanain ca wara joc panajao' pin xine pacun ma'. Iri' cote ne pacun ta. ⁵Corom mama' ac cacama na, querec ac cocon na co xo' hwará ma'. Xao pe nain i ma', pain iri' cwerequequem ma'. Towo' na womicon. Jaxicao' pin nanam. Mija na ca jin' cacama ta.

⁶Ta jin' mahu' me ta ac cacam na. Pirao' paxi' hun Jeju co maqui' nain Nazaré pane, co tatatain mi' wa pain pana pane. E' mami' na ta. Om pin nain i ca'. Noro je. Je i ca' ca an terem' pe cacain curucun pane na ca tomi' cacam ma'. ⁷Mama' je ta ac cacam na. Tomi' jujun co taxipa' ca ma', tomi' jun Pedro ma' quem. Wara mao nain Galileia cain. Mama' je quem, je i cain tara ca querec pe hun ta jujun. Win ne ca wara tomi' pe cuhu' pane ta jujun ta na ca tomi' cacam ma'.

⁸Jin' tamana nana, mija na ca cocoroc cacama. Hwrehwet mama' ac cacama na, jein ca' ac cacamain na manain pacun. Om ca tomi' hwet cocon pain oro wari' quem, xi jin' tamana ara cacama ta.

Ca hwet pa' cam Maria Madalena Jeju

Mateus 28.9-10; João 20.11-18

⁹E' mami' iri na Jeju ne, pain iri' xo' xec pain domingo pane, hwet pa' cain' ac cam na Maria Madalena ma', co wara quep xio ca pane, pain ca tomi' jein ca' cam cocon oro caxicon jam co ma' 7 nana pane. ¹⁰Mo tomi' hwet toton co taxipa' ca e' ac cama na, mo hwet ac tococwa na. Tomi' xaxa' nana co taxipa' ca ma'. Awaran tamana nana. Tomi' hwet ac tococwa na pain ca hwet pa' cam Jeju. ¹¹Taraju iri nanam pain ca e' na ta cama ma' ne, pain ca querec inon ta cama ma'. Taraju paxi' nanam, ane om howa cacam ne.

Ca hwet pa' tococwa co howa nonon ma', pain ca xuruxut 2 cacain wanaji xitot ma'

Lucas 24.13-35

¹²Om om, hwet pa' ac tococwa na win ma' caca co taxipa' ca ma', co xuruxut mama' nanain wanaji xitot ma'. Ma' 2 nana. Jimao nonon, ac xucun wari' nonon. ¹³Querec pin' iri nonon ne, jein in hwet ac cocon na oro win ma' caca, tomi' hwet ac cocon na. Om ca howa cacain ca tomi' nucucun quem.

Ca hwet pa' tococwa co taxipa' ca ma'

Mateus 28.16-20; Lucas 24.36-49; João 20.19-23; Atos 1.6-8

¹⁴Aram aram hwet pa' ac tococwa na co taxipa' ca ma' quem, co ma' 11 nana ma'. Hwet pa' tata pain ca cao' nucucun. Tomi' mip ac tococwa na. Xi howa cacam co querec nonon pain ca e' mami' nucun ta. Para om howa hwe ma' quem? Om ca howa je na hwe ra tata. ¹⁵Mama' jein oro xijein macan' ta ac tococwa na. Pijim' hwet pijim' hwet xam' jujun pain capija pain ca to' witan toton ta' oro wari' ta na ca tomi' tococwa ma'.

¹⁶Tomi' ac tococwa na: Wari' co howa ma', co ja' com ma' quem, to' witan ca' ac tocwa tara pain ca caracat nucun. Wari' co om howa ma' iri na ne, em' ma ta ac tocwa tara, wap tamana ac tocwa tara ta. ¹⁷Oro wari' co howa nanapa' ma', ara ac cacain tara oro ca to' querec pin' nonon oro wari' pain ca pe ho' cocon ca hwara' opa nucun Iri' Jam. An hwet iri tatarain wuxu ne, tomi' jein pin ac cocon tara oro caxicon jam. Tomi' ac cacain tara xijein ca capiija wa ca om wara tomi' taxi' caca quem. ¹⁸Mo ta quep mapi' cocon em', om ta huru caxi tococwa. Mo ta toc cacain cominain ca mam' aramao wa, om ta toc xirac tococwa quem. Mo ta quep cocon pain micocon co caxi nana ma', xio pin ac caca tara quem na ca tomi' tococwa ma'.

Ca in mao cain pawin Jeju

Lucas 24.50-53; Atos 1.9-11

¹⁹Taramaxicon nexi' Jeju ma', tomi' ac i ma' iri nonon co taxipa' ca ma' ne, an piri' mao ac tocwa na pain pawin. Xao pe ho' pin ac cain na iri' curucun Iri' Jam. ²⁰Pijim' mama' ac cacain na oro xijein macan' co taxipa' ca ma' quem. Quep xiho' tamana nonon Taramaxicon nexi'. Mi' nonon pain ca ara cacain oro ca om ara taxi' ne ca wari' wa ma'. Ac i ma' na ca to' querec pin' tococwa pain ca pijim' iri'o' nucucun pane.

Je i ma'.

16.18 Om ca quep jun em' tococwa. Om ca toc jein cominain ca mam' aramao wa ta tococwa quem, om ca tomi' ac i ma' ca Jeju pane. Tomi' tata co quep mapi' nonon em', tomi' tata co toc mapi' nanain cominain ca mam' aramao wa. Tomi' tata co main quep xirac wawa pain ca howa nucucun quem. Am maqui' ta' ne xec nein ca quep jun em' cocon co noc nonon pain ca howa cacapa' ma'. Am toc jein cominain ca mam' aramao wa, xi om ne ca howa ara hun Jeju ta caca co noc nonon ma', ac i ma' na ca coromicat nucun Jeju pain ca tomi' ac i ma' ca pane.

Lucas

Ca xirao' nucun Lucas con Jeju Cristo

1 Tomi' querec te inem pain ca xirao' mi' xim ca' aji' Teófilo. Mija nana wari' co querec nanain oro ca ara ca Jeju pane, pain ca pe ho' qui' capari' pain cara pane, pain ca xo' pijim' qui' tocwa pane. Mija nana co xirao' to nanain oro ca pijim' wa con quem. Tomi' querec ac toton na. Tomi' querec wixite inonon pain oro ca ara ne con pane, pain ca xo' ara qui' ne con pain cara pane. Xirao' xo' tain oro ca ara ne con ta ac ta' na aji' Teófilo. ⁴Ma' ta querec pin' main ca iri'o' nein oro ca pijim' wa ca ca' na xima con Jeju pane inem, ma' ta om tara con ta'a camain' main con inem.

Ca pan' qui' ho' tara panxima ta con Zacarias jam co taramaja mi' non Iri' Jam

⁵Pain oro xec nein ca taramaxicon pe ho' qui' cocon oro wari' nein Judeia Herodes cara pane, ma' ac ca na wari' co sacerdote. Zacarias na wixicon. Taramaja wi na cocon oro win sacerdote ca pain ca iri' hwanana ne cocon hwanana Abias cara pane. Je ca oro wari' nucun Abias tococwa pane. Hwanana ne non Arão manacon Zacarias quem. Isabel na wixicam. ⁶Xuruxut xo' xuruxut xo' pi' nana, hohot nonon Iri' Jam. Xi om ne ca tomi' ha' tomi' ha' pi' pin ara cacamain oro capijacon ca tomi' ha' je cacam ma'. ⁷Om nanam piye' quem, xi ha' cam ca nam' wa ta. Mara' mara' pi' nana quem.

⁸Maqui' ac ne na xec pain ca taramaja to cacain cote ne xiricon Iri' Jam Oro Abias ma'. Taramaja na Zacarias ma' quem. Ara nain ca ara taxipa' ca pain ca sacerdote ca ma', pain ca taramaja mi' con Iri' Jam ma'. ⁹Wara tomi' mam' xucucun, je curucucun pane. Ma' xi corom nain cwa' ne, ma'

1.5 Oro sacerdote pane, taramaja to nanain cote ne xiricon Iri' Jam. Tomi' mi' nonon con Iri' Jam oro wari', tom tain' mi' nonon pain carawa nucucun quem. Tom pe nanain waraqui pana ca hu awi pain panaji ma' quem. Je i ma' ca taramaja nucucun oro sacerdote pane.

xi tom pe nain incenso pain panaji cwa' ne quem xucucun. Ara ac cacain na ca ara taxipa' caca ma', mam' ac cacain na wixicon Zacarias ma'. Wum ta ac cocon na. Ma ac ca na, corom mao ac ca na quem. ¹⁰Hwet to nana pain ca tao' caho' nein cote ne xiricon Iri' Jam oro wari' ma'. Tomi' tomi' pi' pin nonon Iri' Jam. Zacarias ma' iri na ne, tom pe nain incenso pain panaji pain tequipain xirim ma' quem.

¹¹Hwet qui' ac ca na jam co taramaja mi' non Iri' Jam. Hwet pa' non Zacarias. Xat pe nain iri' cwerein pana ca mam' tom pe cain incenso ma'. ¹²Xat pin ac ne na ximicon Zacarias. Cain' cain' xira ne ac xucun na. Jin' tamana na. ¹³Ane tomi' pan con jam ma' ne. Om na ta Zacarias, ta jin' mapa' me ta non. Taraju nem Iri' Jam pain ca tomi' mon ma'. Ha' nem quem. Nam' tara narima' nem Isabel ta. Pan' qui' ac ca tara panxima. O' ma' ac mon tara, João ac mon tara. ¹⁴Tomi' querec te tamana ac ma tara con, mija tatara oro wari' co tomi' querec te wi xim nenem pain ca pan' qui' nucun quem. ¹⁵Xi hwara' opa ta' ara ca pain ca taramaja mi' ton con Iri' Jam ta. Om ta na camain' ne pain ca toc cain ca mana' nein comi uva je oro tocwa ca mana' ma' quem. Pe ho' mip toron Tamataracon Iri' Jam, wara pe ho' mip toron pain ca xo' pan' qui' nucun. ¹⁶Quep xiho' mija totoron oro win ma' ma pain ca wari' nein Israel hwe ma', quep xiho' totoron pain ca cwirin' pin xin cacain ca caracat nucucun ma', in hwet ac cocon tara Iri' Jam co Iri' Taramaxicon ne caca oro hwanana nuhu' pane. ¹⁷Wirico tara panxima co wara o ta' na con Iri' Taramaxicon co wara tomi' pe ca Iri' Jam pane. Pijim' hwara' opa tamana tara, win ca profeta Elias cara pane, an xiho' toron Elias pain ca pijim' hwara' opa nucun. To' om pin tarain ca mana' caracan xucucun mana cote caca cocon mana panxicaca, tomi' querec te pin mami' ac xucucun tara. To' coromicat xo' pin ac cocon tara oro wari' co ari nonon Iri' Jam ma', aram aram coromicat an xiho' pin ac cocon tara co tomi' ha' nana ma' quem. Tomi' tomi' wara awori xo' totoron oro wari', ma' ta winim' xo' cocon Iri' Taramaxicon pain ca aram aram maqui' nucun. Ac i ma' na ca tomi' con Zacarias jam co taramaja mi' non Iri' Jam pane.

1.9 Waraqui pana na incenso. Tom iri ta ne, hu awi ac ne na. **1.9** Ara taxipa' ac i ca' nana pane: Xirao' xirao' xam' nanain wixicocon pain oro wijimain pacun ma', xin xin ac cacain na. Ma' ta taxi' xun cocon win ma' nucucun co ara tarain ta caca ma'. Xin iri nanain ne, noro ac cacain na, mam' ac cacain na wixicon. Wum tara ta ac cocon na, ara ac cain na quem. **1.11** Waraqui pana na incenso. Tom iri ta' ne, hu toto ac ne na. **1.17** Wari' co profeta ma', tomi' hwet taxipa' nain capijacon Iri' Jam ca an hwet mi' non Tamataracon.

¹⁸Iri'o' xita ac ca na Zacarias. Cain' xi taxi' ac tain ca iri'o' ne ca tomi' nem quem? Xi mara' pin ara ta' ta. Horon pin na narima' ne quem na ca tomi' con ma'.

¹⁹Om na ta Zacarias ac ca na. Gabriel ina. Wata' co xat pe ho' taxipa' non Iri' Jam pain ca taramaja mi' ton ca'. Hwet ron napa' Iri' Jam pum. Tomi' hwet ron pain carawa ca awi ca ara mi' ton ta' ca' napa' pum pain ca pan' qui' ta' ca panxima. ²⁰Taraju wet ne e' ac con na. Om pin ho' tara capijam ta. Xi howa mapa' pain ca tomi' ne ca', pain ca main pan' qui' tara panxima pain xec nein ca wara an pe xo' ca Iri' Jam ta xim ca'. Ame ma e', om ta tomi' mami' ac ma. Om om, maqui' pa' ac quem tara xec nein ca pan' qui' ta' ca panxima ma', tomi' mami' ac ma tara ta na ca tomi' con Zacarias Gabriel ma'.

²¹Pain ca tomi' tomi' wet xucucun ma', winim' winim' nonon Zacarias oro wari' co hwet to nana ma'. Cain' cain' xira con ne nana. Para om om ca quem? Je xi hwet qui' cain cote ne xiricon Iri' Jam ma' quem nana. ²²Aram aram hwet qui' ac ca na. Om ca tomi' ac ca quem.

Cain' cain' xira con ne ac caca na oro wari'. Am hwet pa' con Iri' Jam ta, je tara con. Am tohwein' ca con Iri' Jam pain cote ne xiricon ta, je tara con ta nana. Zacarias ma' iri na ne, xiximi' nonon pain ca tomi' hwet toton paxi' cocon pain carawa ca ara non ma'. Tomi' toton paxi' na, ane om pin ne capijacon ne.

²³Pi' pin iri na oro xec nein ca taramaja pe cain cote ne xiricon Iri' Jam Zacarias ne, in mao ac cain na xiricon. ²⁴Om ca pain homa ne, nam' ac cama na manacon ma', Isabel ma'. Mon to wet ac cama na. Ma' 5 na panawo' pain ca mon to wet e' cama pain xiricam. Om ca hwet mao cama, mon to wet e' na pain xiricam. ²⁵Aram aram xiram pa' pin napa' Iri' Jam ta ac cama na. Wirico co mi' napa' pain ca nam' ne ca'. To' om pin nain ca wixipa' ne cocon oro wari' pain ca om capa' pije' ira na ca tomi' cama ma'.

Ca pan' qui' ho' tara Jeju ta cam Maria jam co taramaja mi' non Iri' Jam

²⁶Ma' 6 pin iri na panawo' pain ca nam' cama Isabel ma' ne, tomi' ac con na Gabriel Iri' Jam: Mao rain cidade pain Nazaré cain, ca pe nain Galileia cain. ²⁷Hwet ram xojam' cwain. Ma' na wari' co an tam nam cwain, co iri' hwanana ne non taramaxicon Davi cara pane. José na wixicon. An ram paxi' non cote cama cam jicam. Ane om an querec cam ne, om ca quep

querec cam tarama' quem. Maria na wixicam. Mo tomi' ram e' ac con na Gabriel Iri' Jam. Ma, mao ac ca na.

²⁸ Hwet iri nam ne, tomi' ac cam na: Maqui' ina ta Maria. Tomi' querec te ra inem, xi om ne ca param mi' ara quem, pain ca awi wa Iri' Jam co Iri' Taramaxicon ta. Pe ho' nem quem na ca tomi' cam ma'.

²⁹ Taraju iri nain ca tomi' nucun ne, xat pin ac ne na ximicam. Cain' cain' xira con ne? Para tomi' ac i ma' capa' ne ta na ca coromicat nequem.

³⁰ Ane tomi' cam Gabriel ne: Om na ta Maria, ta jin' ma me ta. Tomi' querec te nem Iri' Jam. Param mi' nem pain ca awi wa. ³¹ Nam' ra nem, pan' qui' ac ca tara cawinam. O' ma' ac mon tara, Jeju ac mon tara. ³² Hwara' opa tamana tara, Iri' Panxica Iri' Jam co hwara' opa tamana pan. Mi' toron pain ca taramaxicon pe cain maxicon co iri' hwanana ne non Davi cara pane. ³³ Taramaxicon pe ho' cara ac cocon tara waram winacon Jacó cara pane, om ta pi' ra ha' ne ca taramaxicon pe ho' cara cocon ta. Ac i ma' na ca tomi' cam Maria Gabriel pane.

³⁴ Tomi' querec ac con na: Cain' xi nam' ac ta' quem, xi quep camain' capa' tarama' ta non.

³⁵ Om na, quiji' hwet terem Tamataracon Iri' Jam ta Maria ac cam na. Pe ho' terem ca hwara' opa nucun Iri' Jam co Iri' Taramaxicon pan. Je ca iri' wari' nucun Iri' Jam ta' ca pije' co pan' ta' ma' pum. Iri' Panxica Iri' Jam ta totoron quem nam. ³⁶ Nam' na ca nari nem Isabel ma' quem ac cam na. Horon pin paxi' na, ane nam' pin cama ne. Om ca nam' taxi' cama nanam oro win ma' cama ira. Ane ma' 6 pin ca panawo' pain ca nam' cama ne. ³⁷ Xi ma' ne carawa ca tanacam' non Iri' Jam ta Maria na ca tomi' cam ma'.

³⁸ Ma'e ac cama na. Taramaja mi' ton Iri' Jam ca' ira. Ara mi' tarapa' ca tomi' mapa' ta non.

In ca' ac cam na jam co taramaja mi' non Iri' Jam ma'.

Ca hwet cam Isabel Maria

³⁹ Om ca pain homa ne, mao ta' ta ac cama na Maria, mao hap ac camain na wijimain cidade pain oro ca tamaja pan ne macarain Judeia cain. ⁴⁰ Corom mao ac camain na xiricon Zacarias. Maqui' ina ta we ac cam na Isabel ma'. ⁴¹ Isabel ma', taraju iri nain ca tomi' nequem ma' ne, pain ca maqui' ina ta we cama ma', meo ac ca na pije' pain monocwam, pe ho' mip ac cam na Tamataracon Iri' Jam quem. ⁴² Tomi' ac cama na, tomi'

mip na: Tomi' querec te nem Iri' Jam ta Maria, tomi' querec te tiquin' ca' nem cacam oro xequequem narima' pain oro xijein macan' ta. Param mi' nem pain ca awi wa. Ac i ma' non cawinam co pan' ta' ma' pum quem. Tomi' querec te non, param mi' non pain ca awi wa ta. ⁴³Je ina me! Para xiram pa' capa' Iri' Jam cwa' ne? Xi mi' ara capa' pain ca hwet mapa' pain ca jicon Taramaxicon ne ma ta. ⁴⁴Taraju iri inain ca tomi' nem pain ca maqui' ina ta we mapa' ne, meo ac capa' na cawiji pain munu ca'. Xi tomi' querec te tamana pan ara ca ta. ⁴⁵Param mi' nem pain ca awi wa Iri' Jam ta Maria, xi om ne ca howa ara mon pain ca ara tain cain ca tomi' pe ca pane na ca tomi' cam Maria Isabel ma'.

Tamara' nequem Maria pain ca tomi' querec te con Iri' Jam

⁴⁶Tomi' ac cama na Maria:

Tomi' hwet inain ca awi tamana nucun Taramaxicon ne.

Maqui' nain iri' xumu ca tomi' ne ca'.

⁴⁷Tomi' querec te tamana inon Iri' Jam ne co to' witan napa' ta.

Tomi' querec te inon pain iri' xumu ca'.

⁴⁸Om paxi' na ca hwara' opa camain' ta' pain ca taramaja mi' ton ca'.

Ane xiram pa' pan capa' ne.

Param mi' nam pain ca awi wa Iri' Jam ta tatara oro wari' pata'.

Mao ac ne ma' tara pain ca tomi' cara ac i ma' caca pata'.

⁴⁹Xi ara mi' ara capa' pain oro carawa ca awi tamana

Iri' Jam co hwara' opa pan.

Awi tamana pan na ta!

⁵⁰Xiram pa' nonon oro wari' co tomi' ha' nonon ma', co querec

pin' nonon pain ca Iri' Jam nucun,

pain ca xo' ma' ten qui' caca pain cara pane,

xiram pa' xiram pa' wet tata waram winacocon cocon mana

panxicaca pain xocori ca' quem.

⁵¹Pain oro carawa ca ara ca ca',

je ca mam' an hwet mi' tococwa pain ca hwara' opa nucun.

Ja' wawaran tata oro wari' co xec xec nana pain iri' ximicocon ma',

co hwara' opa urut xi' ma nana ma'.

⁵²To' quiji' pin tata oro taramaxicon,

narain ho' tata pain ca taramaxicon mami' caca.

Oro wari' co om hwara' opa camain' nana ma' iri na ne,
to' hwara' opa ac tococwa na.

⁵³Oro wari' co pe' nana ma',
xiram pa' ac tococwa na,
to' ma'am ac tococwa na pain oro carawa ca awi.
Oro xucucun wari' co caramaju nana ma' iri nana ne,
om ca xiram pa' tococwa,
in ca' xine tata,
werem pa' e' nana.

⁵⁴Quep xiho' napari' pain ca waram winacon Israel iri'
ca', pain ca taramaja mi' xun ca'.

Om ca ji'am pin capari',
xiram pa' napari'.

⁵⁵Win ne ca wara tomi' pe con Abraão cocon oro
hwanana nexi' pane,

pain ca xiram pa' cara toton oro waram winahu' ta tococwa pane.
Ac i ma' na ca tomi' mao ne tamara' nequem Maria pain ca in ac con Iri'
Jam pane.

⁵⁶Mon pe ho' ac cam na Isabel Maria. Ac ca ma' 3 ca na panawo' pain
ca pe ho' cam pane. Aram aram in mao ac camain na xiricam.

Ca pan' qui' nucun João co ja' taxipa' nonon pain com oro wari'

⁵⁷Aram aram pan' qui' ac ca na cawinacam Isabel. ⁵⁸Tomi' hwet ac
tococwa na oro win ma' cama cocon oro ca nari nequem ma', pain ca pan'
qui' ca cawinacam ma'. Taraju iri nana ne, tomi' querec te wi ac cacam
na. Xiram pa' tamana cam Taramaxicon nexi' ma' ira nana.

⁵⁹Ma' 8 pin iri na xec nucun pije' ma' ne, cut in ac xucucun na pain ca
wac xirac xin taparinain ca xirac nucun ta caca ma'. O' ma' xat xun con
cote ca Zacarias cwa' paxi' nana. ⁶⁰Ane tomi' in pin cacam jicon ma' ne.
Om na, João xun urut con ta na.

⁶¹Cain' cain' xihwe quem? Xi ma' ca ca nari nuhu' co João na wixicon
ta ac cacam na.

⁶²Xiximi' ac cocon na Zacarias ma', pain ca cain' ca o' ma' ton mon pije' quem paxi' cocon ma'. ⁶³Xiximi' pan ac ca na pain micon ma', pain ca xirao' ta' paxi' ca ma' quem. Mi' ac cocon na pain wijimain pana, xirao' ac ca na: João na wixicon ta na ca xirao' nucun. Na ra ac caca na. Wa wa wa wa pi' pin nonon. ⁶⁴Xirao' pin iri nain i ma' Zacarias ne, tomi' hap pin mami' ac ca na. Ma' pin na capijacon. Awi tamana na Iri' Jam ta ac ca na. ⁶⁵Jin' jin' pi' pin ac cacama na oro win ma' cacama pain ca querec pin' cocon Iri' Jam pain ca hwara' opa tamana nucun. In ac nanain oro ca ara ne con Zacarias con panxica. Tomi' hwet tomi' hwet pi' pin ac tococwa na pain oro wari' co to nanain oro cidade ma', je pain ca tamaja pan ne macarain Judeia ma' quem. ⁶⁶Cain' cain' ta' ca pije' cwa' ne ac xucucun na co taraju nana ma'. Cain' cain' ta' ca pain ca aram aram hwara' pin nucun quem na ca tomi' xucucun ma'. Xi querec pin' ara cocon pain ca pe ho' con ca hwara' opa nucun Taramaxicon nexi' ta.

Tamara' nucun Zacarias pain ca tomi' querec te con Iri' Jam

⁶⁷Ac i ca' na con Zacarias ma', cote ca João ma'. Pe ho' mip iri non Tamataracon Iri' Jam ne, tomi' hwet pan ac cain na ca tomi' ra con ma'. Ca' na ca tomi' nucun:

⁶⁸Awi tamana na Iri' Jam co Iri' Taramaxicon cwa', co howa
iri' pain ca wari' nein Israel iri' ca'.

Na e' na pain ca tomi' hwet xin ca tomi' querec te nexi' con ta.
Xi hwet ara capari' pain ca wari' ne capari' ca'.

To' witan xim napari' quem.

⁶⁹Mi' napari' con wari' co hwara' opa tamana, co
to' witan xim napari'.

Iri' hwanana ne non taramaxicon Davi cara pane, co
taramaja mi' non pane.

⁷⁰Wara tomi' pe napari' con pain cara pane, pain ca an xin
tiquin' mi' roron pain ca tomi' ne oro wari' ta
tococwa oro profeta nucun pane.

⁷¹Ca' napari' cocon pane:

Main to' witan ca' xuhu' cocon oro wari' co noc nunuhu' ma' napari'.
To' witan ca' xuhu' pain ca hwara' opa nucucun napari'.

⁷²Tomi' pe ca' napari' quem:

Om ta ji'am pin tain ca wara tomi' an pe xo' ne pain ca tomi'
 pe qui' toton oro hwanana nuhu' cara pane,
 pain ca xiram pa' toton waram winahu' cocon mana
 panxihwe ta toton pane napari'.

⁷³ Je ca wara tomi' pe con iri' hwanana nexi' Abraão cara pane.

⁷⁴ To' witan toton waram winam ta non pari'.

To' witan ca' toton pain ca hwara' opa nucucun oro wari'
 co noc nonon ta non pari'.

Mi' ac toton tara pain ca quere me caca pain ca tomi' ha' xim
 cacapa' pain ca taramaja mi' xim cacapa' ta non pari'.

⁷⁵ Iri' wari' ne toton, mi' toton pain ca hohot cara cacapa',
 mao ac ne ma' tara cocon ta non pari',

ac i ma' na ca wara tomi' pe con hwanana nexi' Abraão pari' pane ta na
 Zacarias.

⁷⁶ Je ca tomi' xim ca' arain ac con na panxica.

Hwara' pin iri ra ne, iri' profeta nucun Iri' Jam co Iri'
 Taramaxicon pan ta ac ma tara.

Xi wara o ta' ara ma con Taramaxicon nexi' ta.

Tomi' xo' ac momon tara oro wari' con,
 ma' ta winim' xo' cocon.

Ac ca wara ara xo' main wanaxicon tara pain ca tomi' xo' momon ta.

⁷⁷ To' taraju pa' ac momon tara pain ca mam' to' witan ton cocon Iri'
 Jam pain ca xic am pin tain cain ca caracat nucucun.

⁷⁸ Ac i ma' xim napari' Iri' Jam nexi',

xi xiram pa' tamana ara capari' ta.

Je ca mam' xim capari' con wari' nucun co an xiho' non xina
 pain ca xo' hwet pin nucun pain xo' xec.

Maqui' toron Iri' Jam co pe nain pawin.

⁷⁹ Ac ca toha mi' tococwa tara oro wari' co to pira ca' nonon
 Iri' Jam ma', pain ca to cacain ca jitacat nein xim
 ca', pain ca jin' cacain ca cono' wa ca'.

Mi' toton pain ca taraju pa' wa, to' querec pin' toton con Iri' Jam.
 Ca' na tarapari' pain ca xuruxut xo' wa quem.

Ma' ta om toron ne xumuhu' ta napari'.

Ac i ma' na ca tomi' ca Zacarias pane, pain ca tomi' hwet cain capiacaon
 Iri' Jam con panxica pane.

⁸⁰Hwara' hwara' ac ca na pije' ma'. Ca hwara' hwara' ca ma', ca hwara' opa pin ca pain ximicon ma' quem. Pe taxipa' nain mahweri pane. Pe pe maqui' pa' ac con na xec nein ca pijim' pin cocon oro wari' pane quem.

Ca pan' qui' nucun Jeju

Mateus 1.18-25

2 Pan' qui' iri na João ne, om ca pain homa ne, tomi' ac ca na iri' taramaxicon nucucun oro romano ma', Augusto ma'. Tomi' tomi' pi' pin tata oro wari' co to nanain oro macan' ca taramaxicon pe ca pane. Na e' na pain ca xirao' to xine oro wuxuhu' ta tata. ²Je ca xo' xirao' to ten qui' xine wixicocon oro wari' pane. Pain ca taramaxicon taramaxicon wet ca Quirino pain Síria pane, je ca xirao' to xine wixicocon oro wari'. ³Oro wari' ma', mama' mama' pi' pin ac cacain na iri' cidade ca camara' to caca oro hwanana nucucun pane, ma' ta xirao' to xine wixixi' ta nana quem.

⁴Je ca mao ca José ma' quem, mao nain cidade ca camara' to caca hwanana nucun cara pane. Paca' nain cidade nucun pain Nazaré ma', ca pe nain Galileia ma', mao ac cain na Judeia cain, pain cidade ca pan' pe ne ca pije' nucun taramaxicon Davi cara pane. Xi iri' hwanana ne ara con Davi José ta. Belém na wixinain cidade ca pan' pe ca Davi pane. ⁵An mao nam Maria ma', co an ta' ca ma'. Xirao' to tatarain wixixi' ta nam. Nam na Maria ma' quem.

⁶Pain ca to to wet cacamain Belém ma', maqui' pin ac ne na xec nein ca pan' ta' ca cawinacam. ⁷Pain ca xo' tan' mama' cacama ma', noro paxi' nanain ca pi'am to wa pain xirim ca pi'am to caca oro wari' co maqui' nanain pira. Ane om mam' cacamain ca pi'am to wa ne. Pi'am to e' nanain xirinain burro je ovelha. Je ca pan' pe ca cawinacam. Je win ma' cam pije', wirico co pan' cain' cacam oro xequequem humaxicam co camara' xi' nana pa'ao'. Wiric pa' ac con na con wom, an terem' pe ac con na pain pana ca cao' to ne oro carawa.

⁸Pain xim nein ca pan' qui' ca cawinacam ma', ma' nana wari' co querec wet nanain ovelha nucucun. Hwet to nanain i ma', pain ca cao' to ne ovelha nucucun. Querec wet towa nanain. Pe xipana na Belém ma'. ⁹Hwet qui' ac ca na jam co taramaja mi' non Iri' Jam. Xat pe ho' nonon. Toha toha mam' pin nonon ca toc meremem nucun Iri' Jam quem. Jin' tamana nana. ¹⁰Ta jin' mahu' me ta ac tococwa na. Taraju wet xine. Tomi' hwet

xim inuhu' pain ca awi wa ca xo' hwet pa' nuhu' ma'. Ja' tomi' querec te tamana turuhu'. Ja' tomi' querec te ja' tomi' querec te pi' pin totoron oro wari' quem. ¹¹ Pan' qui' na wari' co to' witan xim nuhu' ta. Xo' pan' nain xim ca'. Pan' pe nain Belém ca', ca pan' pe pan ne ca pije' nucun taramaxicon Davi cara pane. Pije' co xo' pan' cwa', wirico co Cristo ma', co iri' Taramaxicon ma'. ¹² Mo querec je. Mam' iri jun pije' co wiric pa' wa con wom ne, co terem' pe nain pana ca cao' to ne oro carawa ma', taxi' ac mahu' tara pain ca tomi' iri'o' xuhu' ca' na ca tomi' tococwa ma'.

¹³ Ane ane hwerehwet qui' ac caca na oro jam co taramaja mi' nonon Iri' Jam. Mija nana. Om ca paric camain' caca. Awi na Iri' Jam awi na Iri' Jam ta nana pain ca tomi' querec te cocon ma'. Tomi' ac caca na: ¹⁴ Tomi' querec te tomi' querec te pi' pin nonon Iri' Jam oro co to nanain iri' pawin cain. Toron toron om pin tara ximicocon oro wari' co xiram pa' pan ca pain macan' ca' quem na ca tomi' caca ma'.

¹⁵ In mama' iri nanain pawin oro jam co taramaja mi' nonon Iri' Jam ma' ne, tomi' xo' ac xucucun na caram ma', co querec wet nanain ovelha nucucun ma'. Maji pain Belém ta. Querec xun pije' co xo' pan' ma', co tomi' hwet ca Iri' Jam ta nana.

¹⁶ Jein mama' ac cacain na Belém. Mam' nanam Maria con José, mam' nonon pije' ma' quem, co terem' pe nain pana ca cao' to ne oro carawa ma'. ¹⁷ Querec iri nonon pije' ne, tomi' hwet tomi' hwet pi' pin ac cocon na oro wari' pain ca tomi' nucun jam co taramaja mi' non Iri' Jam ma', pain ca tomi' hwet cocon con pije' ma'. ¹⁸ Oro wari' co taraju nanain ca tomi' nucucun ma', wa wa wa wa pi' pin ac caca na. ¹⁹ Maria ma' iri na ne, mam' pe wet cara ac camain na oro ca taraju cama ma', ca tomi' hwet cacam caram ma' co querec wet taxipa' nanain ovelha nucucun ma'. Om ca ji'am pin camain. Tama' coromicat e' nain.

²⁰ In mama' ac caca na caram ma' co querec wet nanain ovelha nucucun. Awi ma awi ma nonon Iri' Jam pain ca in ac cocon ma'. Tomi' querec te urut pum pain oro ca taraju urut pum, je pain oro ca querec urut pain ca hwet urut con pije' ma' quem. Iri'o' na ca tomi' nucun jam co taramaja mi' nem ta, ac pain ca tomi' hwet caparut na ta nonon pain ca tomi' querec te cocon ma'.

2.11 Ca' na ca tomi' mao nein ca Cristo wa cocon oro judeu pane. Iri' wari' co wara tora' ca Iri' Jam pane ta nonon. Iri' Taramaxicon tara, wirico tara co to' witan toton nonon oro wari' ta nonon.

²¹Ma' 8 pin iri na xec nucun pije' ma' ne, pain ca wac xirac xin taparinain ca xirac nucun caca ma', wac xirac ac cocon na, o' ma' pin ac cocon na quem. Jeju ta nonon. Je ca wara o' ma' con jam co taramaja mi' non Iri' Jam pane, pain ca om nam' querec con jicon pane.

Ca an mao cocon pain cote ne xiricon Iri' Jam Jeju

²²Aram aram maqui' pin ac ne na xec nein ca tomi' ha' xin cacamain ca xirao' nucun Moisés ma', cam narima' co xo' wijima ma'. An mao ac cocon na Jeju pain cote ne xiricon Iri' Jam pain Jerusalém. Ma' ta an hwet pe mi' xun con Iri' Jam ta nana. ²³Mon cwa' ta xun con Iri' Jam nana, win ne ca xirao' pe xine pain oro ca tomi' ha' je ca Iri' Jam. Ca' na ca xirao' pe xine con pane: Mi' tatarapa' cocon oro hwijima' co camara' cain' nana cacam jicocon ta, iri' mene toton ta na ca xirao' pe xine con pane. ²⁴An mao nonon Jeju pain cote ne xiricon Iri' Jam pain Jerusalém ma' quem, ma' ta mi' xun pain carawa nexi' ca' nana. Win ne ca xirao' pe xine pain oro ca tomi' ha' je ca pane. Ca' na ca xirao' pe xine con pane: Cut mi' 2 tatarapa' con wixicon parawom. Mo ta om cacam wixicon parawom, cut mi' 2 ac cacapa' tara con wixicon xucu' ta na ca xirao' pe xine con.

²⁵Ma' pe nain Jerusalém wari' ma', co Simeão na wixicon. Xut xo' na Simeão. Win xumu e' nain oro ca param nucun Iri' Jam. Winim' non wari' co to' om pin tain nain ca tomi' xaxa' nucucun oro wari' nein Israel ma', pain ca to' witan ton cocon ma'. Pe ho' mip non Tamataracon Iri' Jam quem. ²⁶Wara tomi' pe non Tamataracon Iri' Jam pane. Om ta mi' pin querec ma, querec ac mon tara Cristo co wara tomi' pe ca Iri' Jam pane na ca tomi' pe con pane. ²⁷Tomi' ac con na Tamataracon: Mao rain cote ne xuru ta non, mao ac ca na. An corom qui' iri non pije' cote ca cam jicon ma' ne, pain ca ara xin cacamain ca xirao' nucun Moisés ma', pain ca mon cwa' ta xun Iri' Jam ta cacama ma', ²⁸awin ac con na pain taparacon. Tomi' querec te ac con na Iri' Jam:

²⁹Mi' ho' ne pain ca mi' pin wa ta Taramaxicon ne.

2.22 Pain cara pane, cocon hwanana nucucun oro judeu pane, om ca querec hohot cama narima' co xo' wijima. Na e' na pain ca hohoc xo' xequem ta na ca xirao' nucun Moisés pane. Wiricam, wirico cote ca cawinacam quem, hohoc xo' ac xequequem na, querec hohot mami' ac cacam na Iri' Jam, je cwerequequem pane. **2.24** Om ca caramaju cama Maria con José. Je ca cut e' cacama wixicon coxut. Mo xi caramaju cacama, cut mi' ac tococwa xira pain wijimain taramaji ovelha Iri' Jam.

Wata' pain ca taramaja mi' xim ca', mi' ho' ne pain ca mi' pin wa me.
 Xi ma' ma' wet ne carawa ca winim' ta' ca', pain ca winim' ton
 wari' co to' witan ton nonon oro wari'.

Xi om ne ca hwet pin ara ne ca wara tomi' pe mi' mapa' pane ta.

³⁰ Xi querec ho' ara ton wari' co mi' maparut cwa', co
 to' witan xim naparut cwa'.

³¹ Mi' maparut con.

Querec pin' querec pin' pi' pin toton oro wari' pain
 oro xijein macan'.

³² Ac naran toton oro wari' co om judeu nana ma'.

To' querec pin' toton pain ca iri'o' ne capijam.

To' querec pin' toton pain ca wari' ne maparut quem,
 pain ca wari' nein Israel urut ca'.

Ac i ma' na ca tomi' con Iri' Jam Simeão ma', pain ca awin con Jeju pain
 taparacon.

³³ Tomi' ac i ma' iri non pije' Simeão ne, wa wa ac ca na cote ca cam
 jicon. ³⁴ Tomi' ac tacacama na: Param inon Iri' Jam pain ca ara mi' cuhu'
 pain oro ca awi wa ta tata. Taraju wet ne e' ac cam na Maria ma', jicon
 Jeju ma': Ma' na ca coromicat an pe xo' nucun Iri' Jam con cawinam cwa',
 cocon oro win ma' nexi' pain ca wari' nein Israel iri' ca'. Wirico cawinam
 tara co to' quiiji' mija toton nonon co om howa nonon ma', to' witan mija
 toton co howa nonon ma' quem, ac i ma' na ca coromicat an pe xo'
 nucun Iri' Jam con. Wirico Iri' Jam co mi' napari' con. Ma' ta querec pin'
 hwein wana ca hwet ac mahu' ta paxi' napari'. Ane ma' mija caca oro win
 ma' nexi' co tomi' in pin xun nonon ne. Noc urut pum ta toton. ³⁵ Querec
 pin' ac xine tara ca coromicat nucucun pain iri' ximicocon. Tomi' xaxa'
 tamana ac ma tara quem Maria. Ac ca xucun' pa' xim quem tara cote ne
 quit pain xumum na ca tomi' cam Maria Simeão ma'.

³⁶ Pe nain cote ne xiricon Iri' Jam narima' ma' quem. Ana na wixicam.
 Profetisa na. Cote cama ma', Fanuel ma', iri' hwanana ne non hwanana
 Aser cara pane. Horon tamana na Ana. Ma' paxi' nam tarama' pain cara
 pane. Wara mi' pin ca' nam taxicam pane. Ma' 7 e' na cawaxi' pain to ho'
 xequequem pane, mi' pin ac ca na. ³⁷ Om ca an mami' con tarama' Ana.

2.36 Narima' co profetisa ma', an xiho' non wari' co profeta ma' quem. An an ari na ca
 taramaja nequequem ma', pain ca tomi' hwet taxipa' cacamain capijacon Iri' Jam ca an
 hwet mi' cacam Tamataracon.

Wara tiqin' mao na cawaxi' nequem quem, ma' 84 na cawaxi' nequem. Om ca paca' camain' camain ca tao' caho' ne cote ne xiricon Iri' Jam. In ac taxipa' non Iri' Jam pain ca pe torotop mi' querec te con. An pe taxipa' nain ca cao' wa pain ca tomi' con, je cwerequem, pain xec je pain xim quem.

³⁸ Pain ca tomi' tomi' wet ca Simeão ma', je win maqui' cama Ana ma'. Xut hwet ac cacam na. Tomi' querec te inem con pije' cwa' ta Te Iri' Jam ac cama na. Tomi' hwet ac tococwa na oro wari' con pije' ma'. Tomi' hwet tomi' hwet xam' tata con co winim' nanain xec nein ca to' witan toton cocon oro wari' nein Jerusalém Iri' Jam.

³⁹ Ara ara pi' pin iri nanain oro ca ara je cacam Iri' Jam pain ca xirao' nucun Moisés ne, in mama' ac cacamain na cidade nequequem ma', pain Nazaré pain Galileia ma'. ⁴⁰ Hwara' hwara' ac ca na pije' ma'. Ca hwara' hwara' ca ma', ca hwara' opa pin ca ma', ca ximicon hwanana ca ma'. Quep xiho' non Iri' Jam, tama' ara mi' non pain oro ca awi wa quem.

Ca pije' nucun Jeju ma', pain ca pe cain cote ne xiricon Cote ca

⁴¹ Pain oro cawaxi' pane, mama' taxipa' nanain Jerusalém jicon Jeju con cote ca pane. Maqui' iri na oro xec nein Páscoa ne, mama' ac cacama na. Ma' ta tomi' querec te wi xi' cocon oro win ma' nexi' ta nana. ⁴² Ma' 12 pin iri na cawaxi' nucun Jeju ne, maji ta arain ac cocon na, win iri' pane nana, mama' ac cacama na. ⁴³ Pi' pin iri na oro xec nein ca tomi' querec te nequequem ne, in mama' xi' ta ac cacama na José cam Maria ma', mama' ac cacama na. Ane to wet ca pa'ao' Jeju ne. To wet nain Jerusalém. Om ca taxi' con jicon con cote ca. ⁴⁴ Ja' ja' napari' xi' ma nonon cocon oro win ma' cacama co xuruxut wi cacama ma'. Xuruxut xuruxut irawin pa' iri nanam ne, mon ne mon ne ac cacama na, pira' xun ta ac cocon na cocon oro ca nari nequequem cocon oro win ma' nequequem ma'. Mon quem mon quem nonon. ⁴⁵ Paxi' nonon. Pira' xun pain Jerusalém ta ac cacama na, in mama' ac cacama na. Mon quem mon quem nonon.

⁴⁶ Xec pa' ac cacam na, xec pa' ac cacam na. Xijein xec pin iri na ne, mam' ac cocon na. Mam' pe nonon pain ca tao' caho' nein cote ne xiricon Iri' Jam. Xao pe pe nain ximijacocon oro co ca' na taxipa' nanain capijacon Iri' Jam ma'. Taraju tata pain ca ca' na cacain, tomi' querec tomi' querec

2.41 Páscoa na wixinain xec nein ca tomi' querec te xucucun oro judeu pain ca mam' pe wet cocon oro hwanana nucucun pain ca to' witan ca' tococwa pain Egito pain cara pane.

ac tococwa na quem. ⁴⁷ Caram ma' co taraju nonon pain ca tomi' querec ca ma', wa wa wa wa pi' pin nonon quem. Taraju pa' na xin co cwa' ne ta? Tomi' xo' na xin ne ca' nonon.

⁴⁸ Jicon con cote ca ma', querec iri nonon pain ca xao pe ho' cocon co ca' na taxipa' nanain capiJacon Iri' Jam ma' ne, wa wa tamana ac cocon na. Cain' cain' ximaparut quem arain non jicon ma'. Mija na ca jain jain urut pum pain ca pira'o' urut pum ne non.

⁴⁹ Para pira'o' mahu' ma' quem ac cacam na. Om ca taxi' mahu' ra? Je xi pe tarain xiricon Cote ca mahu' quem nanam. ⁵⁰ Ac i ma' paxi' na ca tomi' cacam ma'. Ane om taraju pa' cacamain ca tomi' nucun ne.

⁵¹ Hwet ac tacacama na, xuruxut xuruxut in mama' ac cacamain na Nazaré. Tomi' ha' nanam quem. Jicon ma', om ca ji'am pin camain i ma' ca ara ne con cawinacam ma'. Mam' pe wet cara nain. ⁵² Hwara' hwara' ac ca na Jeju ma'. Aram aram hwara' pin ac ca na. Ximicon hwanana pin na, coromicat xo' na, ma' na ximicon. Hohot non Iri' Jam, hohot nonon oro wari' ma' quem.

Ca pijim' nucun João co ja' taxipa' nonon pain com oro wari'

Mateus 3.1-12; Marcos 1.2-8; João 1.19-28

3 Pain pin iri na ne, pain ca ma' 15 pin ne cawaxi' pain ca taramaxicon pe cain Roma Tibério César pane, taramaxicon pe nain Judeia Pôncio Pilatos. Taramaxicon pe nain Galileia Herodes. Taramaxicon pe nain Itureia je Traconites Filipe, coxa' ca Herodes. Taramaxicon pe nain Abilene Lisânias ma' quem. ² Anás con Caifás ma', wiricoco co iri' taramaxicon nana pain ca sacerdote to cacain Jerusalém ma' quem. Je i ma' cawaxi' con Iri' Jam pane, pain ca xo' tomi' con João panxica Zacarias pane. Tomi' pe non pain mahweri. Pijim' ho' rain capiJa ta non. ³ Ma ac ca na, pijim' mao ac cain na oro xijein cidade ca to ja' pan nain iri' cwerein com ma', Jordão ma'. Pijim' ac tococwa na oro wari': Ja' je com ta. Ma' ta querec pin' xihwe pain ca cwirin' pin hwein ca caracat nuhu', je pain ca xic am pin cain ca caracat nuhu' Iri' Jam quem ta tata. ⁴ Win ne ca xirao' pe ca profeta Isaías cara pane, pain ca xirao' pe qui' cain ca tomi' nucun Iri' Jam pane. Ca' na con pane:

Ma' na wari' co merem pe nain mahweri.

Wara quep xo' mi' jun pain wana Taramaxicon nuhu'.

Quep tan pan mi' jun pain wana ta.

⁵Tequi' pa' jein ca xocom coco' nein macan' ma'.

Oro pacun pain oro ca tamaja pan ne macan' ma' quem,
ara jao jao ma' pin jein.

An tan pan xo' jein oro wana ca mam' cat in ma'.

Tequi' pa' xo' jein oro ca xocom nein wana ma' quem.

⁶Oro wari' pain oro xijein macan' ma', querec pin' ac cocon tara Iri'
Jam pain ca to' witan taxi' capari' pain ca wari' nexi' ca'.

Ac i ma' na ca xirao' pe ca Isafas pane.

⁷Mija nana wari' co hwet nonon João pane, ma' ta ja' capari' pain com ta nana. Om ca paric camain' caca. Hwet iri nonon ne, tomi' ac tococwa na: He! Ja' xi' com hwe ra oro caxicon em', ac i ma' na ca tomi' tococwa ma'. Witan ca' xin hwein ca mana' tamana nucion Iri' Jam ra? Ma' co jein ca' jun nuhu' ma' quem? ⁸Xi iri'o' hwe ta ac tococwa na. Xucun wari' pin xihwe. Ma' ta querec pin' xine ca cwirin' hwein ca caracat nuhu' ta. Ta tomi' ximama' ca' hwe me: Om na, om ta wap caparut Iri' Jam, xi iri' hwanana ne ara urut con hwanana nuxut Abraão cara pane ta, om ca na camain' ne pain ca tomi' ximama' ac i ma' hwe ta. Cain' cain' xihwe quem? Je ca tomi' xuhu' ca': Ha' ara xi' non Iri' Jam pain ca to' waram winacon Abraão pin cain oro pacun ca' inuhu'. ⁹Wap ho' xim cuhu' Iri' Jam ma' ira. Noro jun wari' co wara an pin nain iriquixi quit ma', co ta' caracat pin tain nain oro pana pain iri' caximain ma'. Oro panaji memem ca om mi xo' winain ma', ta' caracat pin tain tara, wixicaracao' mi' ac ca pain xe tara quem. Ac i ma' xim turuhu' Iri' Jam pain ca wap xim cuhu' quem na ca tomi' tococwa ma'.

¹⁰Cain' cain' xuxut quem ac cocon na oro wari'.

¹¹Om na, wari' co ma' 2 non iri' curucun wom ma' pahu', na e' na pain ca mi' con con xucun co om non wom. Ac i ma' tara wari' co ma' moin' non carawa ca cao' wa quem. Mi' toron pain xucun co om non carawa ta ac tococwa na.

3.6 Ca' na ca tomi' mao nein ca xirao' nucion Isafas: Wari' co wara quep xo' mi' non pain wana Taramaxicon nexi' ma', co quep tan pan mi' non pain wana quem, co ara ac i ma' na pain oro wana ma', ac ca winim' xo' con na Taramaxicon nexi', ac ca an pe xo' cain na ximicon con. Ac je na ca tomi' mao ne ca xirao' pe nucion profeta Isafas cara pane.

¹²Ma' nana co cut in taxipa' nanain oro imposto ca pagar je tococwa oro wari' ma'. Hwet nonon João quem, xi om ne ca ja' taraparut pain com ta ara cocon ta. Cain' cain' xuxut quem taramaxicon co ca' na taxipa' capiacaon Iri' Jam ac cocon na.

¹³Om na, pagar jein imposto nuhu' iri jujun oro wari' ne, ta cut in tiquin' ca' hwein dinheiro nein ca cut in jein cucuhu' oro taramaxicon me ac tococwa na.

¹⁴Ma' ac caca na oro soldado co tomi' querec ca' nonon ma' quem: Warut quem? Cain' cain' xuxut quem ac cocon na.

Om na, ta to' jin' huhun oro wari' me, ta tomi' ca' huhun me: Mo ta mi' maparut pain dinheiro, om ta quep em' urut pahu', om ta mixein urut pahu', ta to' jin' ac i ma' camain' huhun me ta. Na e' na pain ca hohot na ta hwein dinheiro ca cut hwe pain ca taramaja nuhu' ma' quem ac tococwa na.

¹⁵Oro wari' pane, wara winim' nonon Cristo co wara tomi' pe ca Iri' Jam pane. Mija na ca jain jain cocon. Taraju iri nonon João ma' ne, pain ca pijim' ca ma', tomi' querec ac xucucun na: Om ta wirico ca ra? Wirico tara co Cristo co winim' iri' ra na ca tomi' querec xucucun ma'.

¹⁶Ane tomi' xo' ca' cocon João ne: Ja' paxi' inuhu' pain com ta, ane maqui' ta' ca xucun co hwara' opa tiquin' ca' napa' ne. Iri' wari' na. Om ca hohot ne pain ca taramaja mi' ton, om xi quep xiho' camain' ton pain ca tacom' mi' ton pain macorinain caji caximacoon ma', xi iri' wari' ta' ta. Mo ta cwirin' pin hwein ca caracat nuhu' ma', mi' ac cuhu' tara pain Tamataracaon Iri' Jam. Mo ta om cwirin' je na hwein ca caracat nuhu' ma' quem, wixicaracao' mi' ac cuhu' tara pain cote ne xe ta. ¹⁷An to ni ca' toton nonon oro co tomi' ha' nonon cocon oro co om tomi' ha' nonon quem. Win ca wari' co an pe ni ca' tain nain ca xao pe xine tocwi trigo pain tocoxi ma' quem. An nain mam' pahop nucun, pahop ac cain na tocoxi, an to ni ac cain na iri' tocwi pain xirinain, wixicaracao' mi' ac cain na tocoxi pain xe ca om jo' ra ha' ma' quem nonon. ¹⁸Ac i ma' na ca hu cocon oro

3.12 Imposto ma', je i ma' dinheiro ca pagar je caca oro taramaxicon pain governo. Ma' ta ha' caparut pain ca taramaja wa pain ca governo urut ca' nana. Je cwerein pain cara pane, je cwerein pain xocori ca' quem, pain ca pagar jein imposto cacapari' oro taramaxicon. **3.17** Pain ca tomi' mi' con wari' co pahop nain tocwi trigo João ma', wirico Jeju co tomi' mi' ca. Main an to ni toton oro wari'. Co cwirin' pin nana ma', an to ni ac tococwa tara. Co om cwirin' je na nana ma' iri nana ne, wixicaracao' mi' ac tococwa tara pain cote ne xe ca om jo' ra ha' ta na.

wari' João pane. Ma' na oro xijein ca pijim' nucun pain ca hu cocon quem. Pijim' mi' nonon pain capijacon Iri' Jam ca tomi' hwet napari' con wari' nucun co to' witan ton nonon quem.

¹⁹Pan to' nain taraxicon Herodes ma', co taramaxicon ma'. Xi om ne ca an pin ara cam Herodias ma', co narima' ne ca coxa' ca ma'. Ma' na oro xijein ca om awi wa ca ara ca quem, je ca pan to' cain taraxicon. ²⁰Om ca cwirin' ca quem. Caracat tiqin' mao ac ca na, quep ac con na João, tao' pe ac con na pain xirinain ca tao' to tao' to to wa ma' quem.

Ca ja' con pain com Jeju João

Mateus 3.13-17; Marcos 1.9-11; João 1.32-34

²¹Pain ca om tao' pe querec tocwa João pane, pain ca ja' ja' wet tococwa pain com oro wari' pane, ja' ac tocwa na Jeju quem. Ja' pin iri ta ne, pain ca tomi' tomi' wet con Cote ca ma', pa ac ne na nanawin. ²²Quiji' hwet ac con na Tamataracon Iri' Jam. Ac xucu' na cwerein. Tomi' pan ac con na Iri' Jam. Maqui' nain pawin ca tomi' nucun. Panxita' inem ta arain non. Om ca noc camain' xim. Hohot tamana mapa' ta na ca tomi' con ma'.

Oro hwanana nucun Jeju

Mateus 1.1-17

²³Ac ca ma' 30 ne na cawaxi' nucun Jeju pain ca pijim' ta' ca pane. Panxica José xi' ma nonon oro wari'.

José ma', panxica Eli na.

²⁴Eli ma', panxica Matate na.

Matate ma', panxica Levi na.

Levi ma', panxica Melqui na.

Melqui ma', panxica Janai na.

Janai ma', panxica José na.

²⁵José ma', panxica Matatias na.

Matatias ma', panxica Amós ma'.

Amós ma', panxica Naum na.

Naum ma', panxica Esli na.

Esli ma', panxica Nagai na.

²⁶Nagai ma', panxica Maate na.

Maate ma', panxica Matatias na.
 Matatias ma', panxica Semei na.
 Semei ma', panxica Joseque na.
 Joseque ma', panxica Jodá na.
²⁷ Jodá ma', panxica Joanã na.
 Joanã ma', panxica Ressa na.
 Ressa ma', panxica Zorobabel na.
 Zorobabel ma', panxica Salatiel na.
 Salatiel ma', panxica Neri na.
²⁸ Neri ma', panxica Melqui na.
 Melqui ma', panxica Adi na.
 Adi ma', panxica Cosã na.
 Cosã ma', panxica Elmadã na.
 Elmadã ma', panxica Er na.
²⁹ Er ma', panxica Josué na.
 Josué ma', panxica Eliezer na.
 Eliezer ma', panxica Jorim na.
 Jorim ma', panxica Matate na.
 Matate ma', panxica Levi na.
³⁰ Levi ma', panxica Simeão na.
 Simeão ma', panxica Judá na.
 Judá ma', panxica José na.
 José ma', panxica Jonã na.
 Jonã ma', panxica Eliaquim na.
³¹ Eliaquim na, panxica Meleá na.
 Meleá ma', panxica Mená na.
 Mená ma', panxica Matatá na.
 Matatá na, panxica Natã na.
 Natã ma', panxica Davi na.
³² Davi ma', panxica Jessé na.
 Jessé ma', panxica Obede na.
 Obede ma', panxica Boaz na.
 Boaz ma', panxica Salmom na.
 Salmom ma', panxica Naassom na.
³³ Naassom ma', panxica Aminadabe na.
 Aminadabe ma', panxica Ram na.

Ram ma', panxica Esrom na.
 Esrom ma', panxica Perez na.
 Perez ma', panxica Judá na.
³⁴Judá ma', panxica Jacó na.
 Jacó ma', panxica Isaque na.
 Isaque ma', panxica Abraão na.
 Abraão ma', panxica Terá na.
 Terá ma', panxica Naor na.
³⁵Naor ma', panxica Serugue na.
 Serugue ma', panxica Ragaú na.
 Ragaú ma', panxica Faleque na.
 Faleque ma', panxica Éber na.
 Éber ma', panxica Salá na.
³⁶Salá ma', panxica Cainã na.
 Cainã ma', panxica Arfaxade na.
 Arfaxade ma', panxica Sem na.
 Sem ma', panxica Noé na.
 Noé ma', panxica Lameque na.
³⁷Lameque ma', panxica Matusalém na.
 Matusalém ma', panxica Enoque na.
 Enoque ma', panxica Jareda na.
 Jareda ma', panxica Maalaleel na.
 Maalaleel ma', panxica Cainã na.
³⁸Cainã ma', panxica Enos na.
 Enos ma', panxica Sete na.
 Sete ma', panxica Adão na.
 Adão ma', panxica Iri' Jam na.

Ca tomi' querec con pain ca caracat wa Jeju Caxicon Jam

Mateus 4.1-11; Marcos 1.12-13

4 Pe ho' mip iri non Tamataracon Iri' Jam Jeju ne, in ca' ac cain na Jordão ma'. An mao ac tocwa na pain cote ne mahweri. Je Tamataracon Iri' Jam pan na ca an mao non ma'. ²Ma' 40 ac ne na xec pain ca momon tomi' querec con pain ca caracat wa Caxicon Jam. Om ca cao' camain' ca

pain oro xec ca mon to wet cain i cain. Pi' pin iri na oro xec nein ne, pe' pin ac ca na quem.

³Tomi' ac con na Caxicon Jam: Ara capam' pin ximain pacun ca' quem? Win ne ca Panxica Iri' Jam ina ma ma' na ca tomi' querec con ma'.

⁴Om na ta ac con na Jeju. Ac i ca' na ca xirao' pe xine pain capijacon Iri' Jam:

Om ca xica' pe ne capam' ca to' e' nain ca wari' wa ma'. Ac i ma' na ca tomi' in pin con Caxicon Jam.

⁵An mao ac con na pain iri' cote ne pacun ca mao tamana pawin. An mao non pain iri' tamain. An hwet mi' ac con na pain oro xijein macan' pain pira, an hwet mi' hap non pain, ac pain ca xopin' pin e' ne ca tucu wa na pain ca an hwet mi' hap con pain. ⁶Tomi' ac con na: Mi' xim pain ca taramaxicon pe ho' momon oro wari' pain oro xijein macan' cain. Mi' xim pain oro caramajinain quem. Mene mene pi' pin rain xim. Xi wara mi' ara capa' pain Iri' Jam ta. Ha' napa' pain ca mi' tiquin' ton pain co param ta' quem. ⁷Je ca tomi' xim ca': Mo ta pe torotop mi' querec te mapa' pain ca taramaxicon ne mapa' ca', mi' ac xim pain tara, mene mene pi' pin ac main tara ta na ca tomi' con ma'.

⁸Om na ta ac con na Jeju. Ac i ca' na ca xirao' pe xine pain capijacon Iri' Jam:

Pe torotop mi' querec te e' ron Taramaxicon co Iri' Jam ne ma ta.

Xica' pe tara co ma' co tomi' ha' wa pain ca taramaja mi' tocwa ta. Ac i ma' na ca xirao' nein con ta non.

⁹An mao ac con na pain Jerusalém ma'. Wara ca' na xonein cote ne xiricon Iri' Jam ma', pain iri' tamain ma', an xat pe ac con na. Tomi' ac con na: To' jao cun mao rain macan' cain. Win ne ca Panxica Iri' Jam ina ma ma'. ¹⁰Xi xirao' pe ara xine pain capijacon Iri' Jam ta:

Querec wet jun ta totoron oro jam co taramaja mi' nonon pum.

¹¹Quep cam' teterec pain micocon.

Ma' ta om wein mao ne caximacon pain pacun ta totoron pum. Ac i ma' na ca xirao' pe xine pum ta non.

¹²Om na ta ac con na Jeju. Ac i ca' na ca xirao' pe xine pain capijacon Iri' Jam:

Ta tomi' querec mon Taramaxicon co Iri' Jam ne ma cwa' me ta. Ac i ma' na ca xirao' pe xine con ta non quem.

¹³Pi' pin iri na oro ca tomi' querec con ma' ne, paca' ac con na. Oro xijein xec tomi' querec mami' ton ta ac ca na quem.

Ca in mao cain Galileia Jeju

Mateus 4.12-17; Mateus 13.53-58; Marcos 1.14-15; Marcos 6.1-6

¹⁴In mao ac cain na Galileia Jeju. Pe ho' mip non ca hwara' opa nein Tamataracon Iri' Jam quem. Tomi' hwet tomi' hwet pi' pin ac xucucun con na oro wari' pain oro xijein cidade pain i cain. ¹⁵Ca' na pe nain oro xirim ca cut in to xucucun oro judeu, awi na awi na pi' pin ac cocon na oro wari' quem.

¹⁶In mao ac cain na Nazaré, je i ma' cidade ca hwara' pe ca pain ca pije' nucun. Sábado pin iri na ne, corom mao ac cain na xirim ca cut in to xucucun ma'. Je curucun pane. Noro tain capijacon Iri' Jam ta ac ca na, tequi' pe ac ca na quem. ¹⁷An mi' ac cocon na pain ca joc top xine tapari carawa ca xirao' pe ne ca xirao' nucun profeta Isaías cara pane. Pa ac cain na, mam' ac cain na ca xirao' pe nucun ca noro ta' ca ma'. Ca' na ca noro nucun:

¹⁸Pe ho' napa' Tamataracon Iri' Jam.

Xi tora' ara capa' ta.

Pijim' hwet roron pain capija oro wari' co ximin nana ta napa',
 pijim' hwet roron pain capija ca tomi' hwet nonon pain
 ca to' witan ton toton ca' napa'.

Oro wari' co om tococon ma',
 pijim' hwet roron pain napa'.

To' querec pin mami' xuhu' ta nuhu' ta napa'.

To' witan roron co quep em' wawa ta napa'.

¹⁹Tomi' ca' roron ta napa':

Maqui' pin na xec nein ca xiram pa' pan toton oro wari'
 ta roron napa' Iri' Jam quem.

Ac i ma' na ca xirao' pe ca profeta Isaías ca noro ca Jeju ma'.

²⁰Pi' pin iri na ca noro cain ne, joc top in hwet ac cain na, an in mi' ac con pain na co cut xo' to nain oro ca xirao' nein capijacon Iri' Jam ma'.

4.17 Oro livro cocon hwanana pain cara pane, om ca an xiho' nein oro livro nexi' pain xocori ca'. An e' nanain tapari carawa, xirao' xirao' ac cacain na, joc top ac cacain na quem. Ac i ma' na livro nucucun hwanana pane.

Xao pe ac ca na quem. Momon noro momon noro pi' pin ac cocon na oro wari' co cut in xucucun ma'. ²¹ Tomi' ac tococwa na: Je i ca' xec nein ca win hwet pin ne capiacaon Iri' Jam ca xirao' pe xine pane, ca xo' taraju hwe ca' ne na ca tomi' nucun ma'.

²² Oro wari' co taraju nonon ma', awi na awi na pi' pin nonon. Wa wa paxi' nana pain ca taraju cacain ca pijim' taxi' tamana nucun, ane tomi' querec pan xucucun ne: Cain' cain' xira co cwa' quem? Om ca panxica José ca ra na ca tomi' querec pan xucucun.

²³ Tomi' ac tococwa na: Taxi' inuhu' pain ca tomi' ca' xim mahu' pain i ca' quem, ca tomi' taxipa' caca oro wari' ma'. Tomi' ca' xim mahu': Taraju urut pum pain ca quep xio pin momon oro wari' co to nanain Cafarnaum cain. Je xi quep xio pin momon oro wari' co to nanain macaraxi' ca' quem, ac i ma' paxi' xim mahu' ma' na ca tomi' tococwa ma'.

²⁴ Je ca tomi' xuhu' ca', tomi' iri'o' inuhu' ta ac tococwa na. Om ca tomi' querec te tocwa profeta pain iri' macaracon. ²⁵ Tomi' iri'o' inuhu' pain i ca' quem: Pain oro xec nein ca profeta ca Elias cara pane, to' om pin nain xowi' Iri' Jam. Ma' 3 pin iri na cawaxi' ne, je pain ximijain xijein ma' quem, pe' tamana ac caca na oro wari' pain oro xijein macan'. Ma' mija paxi' nana oro narima' co to nanain Israel pane, co cono' ca' nanam waram taxicacam pane. ²⁶ Ane om quep xiho' raram ta con Elias Iri' Jam ne. Om ca ma' camain' cacama co quep xiho' wawa pain Israel, om na. Quep xiho' ram ta non cam narima' co om judeu ma', co pe nain wijimain cidade ca pe ja' pan nain Sidom pane. Sarepta na wixinain cidade nequem. Wara mi' pin ca' nam taxicacam pane, quep xiho' ram ta ac con na Elias Iri' Jam. ²⁷ Ac i ma' na pain oro xec nein ca profeta ca Eliseu cara pane quem. Mija nana oro wari' co to nanain Israel ma', co ma' nonon caji nan quem. Ane om ma' camain' caca co quep xio pin wawa pain Israel pane ne. Quep xio xica' pe ta Naamã co wari' nein Síria pane na ca tomi' tococwa ma'.

4.23 Ca' na ca coromicat nucun Jeju cocon oro win ma' ca pain macaracon pain Nazaré ma': Om ca howa cacapa'. Param e' nanapa' pain ca quep xio pin toton, ma' ta querec pin' xut pum pain ca Cristo iri'o' ma ma' nanapa', ac i ma' na ca coromicat nucun Jeju.

²⁸Oro wari' co cut in xucucun pain i ma', taraju iri nanain ca tomi' ca ne, mana' tamana ac cocon na. Mana' mana' pi' pin nonon quem. ²⁹Tequi' to ac caca na, jein hwet ac cocon na, xin hwet pin ac cocon na, ja' tequi' hwet mao ac cocon na pain cidade. Ja' tequi' ja' tequi' hwet ac cocon na pain tamain pacun ca pe pan ne cidade nucucun ma'. Joc pan' pin xun paxi' nonon ira. ³⁰Ane witan ca' cocon ne. Joc tutup joc tutup nonon, mao ac ca na quem.

Ca tomi' mo pin con caxicon jam Jeju

Marcos 1.21-28

³¹Mao ac cain na Cafarnaum Jeju ma'. Pe nain Galileia. Sábado pin iri na ne, pain xec nein ca xao to wa ne ca xumu wa ma', pijim' ta' ta ac ca na, ca' na ac tococwa na pain capijacon Iri' Jam oro wari'. ³²Wa wa wa wa pi' pin nonon oro wari' co taraju nanain ca pijim' nucun. Xi an hwet pan ara cain ca hwara' opa nucun pain ca ca' na cain capijacon Iri' Jam ta.

³³Pain xirim ca cut in to xucucun ma', ma' na wari' co corom pe ho' non caxicon jam. Merem mip ac ca na pain ca jain jain nucun: ³⁴Cain' cain' xim maparut quem Jeju co maqui' nain Nazaré? To' om pin xim maparut ra? Querec pin' inem ta! Wum co Iri' Wari' co wara tora' ca Iri' Jam pane! Iri' Panxica ma ta! Ac i ma' na ca merem ca ma'.

³⁵Tomi' in pin ac con na Jeju. Merem maho' ra ta! Hwet ca' ron co cwa' ta na ca tomi' con ma'. Joc pan' ac con na wari' caxicon jam nucun, pain ximijacocon oro wari' ma'. Xin mi' non pain macan'. Hwet ca' ac con na. Hwet ca' e' non, om ca xa con.

³⁶Wa wa wa wa pi' pin ac caca na oro wari' ma'. Cain' cain' xira con ne? Ac taramaxicon na, hwara' opa tamana na ta! Hwrehwet ca' jujun oro wari' ta iri tata oro caxicon jam ne, hwrehwet ca' ac cocon na, ac i ma' na ca tomi' xucucun. ³⁷Tomi' hwet tomi' hwet pi' pin ac xucucun con

4.28 Wari' nucun Iri' Jam nana oro judeu pane, xi wiricoco ara caca co wara tora' wawa pane. Noc taxipa' nonon oro wari' co om judeu nana. Tomi' querec te e' napari' Iri' Jam pain ca oro wari' ne capari' ta nana. Caram ma' co mana' nonon Jeju ma', tomi' hwet iri tata cacam co om judeu nana ma', pain ca xiram pa' tacacama ma', coromicat ximama' ac caca na: Tomi' ximao na co cwa' ta, ac ca tomi' querec te tamana cocon na co om judeu nana Iri' Jam ta, ac ca tomi' querec te wijimain e' capari' na pain ca judeu iri' ca', ac je na ca tomi' hwet capari' Jeju cwa' nana pain ca coromicat ximama' nucucun. Je ca mana' mi' cocon Jeju ma'. **4.31** Cafarnaum na wixinain cidade nucun Jeju.

na oro wari' co to nanain oro xijein cidade ma', taxi' taxi' pi' pin ac cocon na quem.

Ca quep xio pin cocon oro wari' Jeju

Mateus 8.14-17; Marcos 1.29-34

³⁸Jeju ma', hwet ca' ac cain na xirim ca cut in to xucucun ma', mao ac cain na xiricon Simão. Caxi na japinacon Simão ma'. Xain tamana na. Xiram pa' ram ta Jeju ac cocon na. ³⁹Xut hwet ac cam na, wina quiji' hwet ac cam, tomi' in pin ac cain na ca xain nequem. Xain xain om pin ac cama na. Tequi' pe hap ac cama na, ara mi' pan ac cocon na pain carawa ca cao' wa quem.

⁴⁰Corom mao iri na xina ne, o qui' xuxun co caxi nana cwa', o mi' xuxun con Jeju ta ac caca na oro wari' ma', o qui' o qui' pi' pin ac cocon con na oro wari' co ma' nonon oro xijein ca caxi wa ma'. Quep xio quep xio xam' ac tococwa na. ⁴¹Mija nana oro wari' co corom to ho' nonon caxicon jam ma' quem. Tomi' jein pin iri tata ne, hwerehwet ca' ac cocon na. Hwerehwet ca' iri tata ne, merem merem ac cocon na Jeju: Panxica Iri' Jam ma ta nonon. Ane tomi' in pin tococwa ne. Narain ho' tata pain ca tomi' wa, xi om ne ca taxi' ara cocon pain ca Cristo ca ma', pain ca wirico co wara tomi' pe ca Iri' Jam pane.

⁴²Xec pin iri na ne, pain iri' xo' xec ma', mao tain ca om pe ca wari' ta ac ca na Jeju, mao ac ca na. Piraó' piraó' ac cocon na oro wari' ma' quem. Mam' iri nonon ne, tomi' ac cocon na, tomi' mip nonon: Ta paca' maparut me ta nonon.

⁴³Om na, na e' na pain ca pijim' mi' toton pain capijacon Iri' Jam oro wari' pain oro xijein cidade ta. Pijim' mi' toton pain capijacon Iri' Jam ca tomi' xo' nonon pain ca taramaxicon pe ho' ton cocon ta. Je ca mao rain macan' capa' Iri' Jam pane na ca tomi' tococwa ma'. ⁴⁴Tiquin' mao ac cain na oro xijein cidade pain Judeia ma' quem. Pijim' pijim' pe ac cain na oro xirim ca cut in to xucucun oro judeu ma' quem.

Ca ja' ja' xine tococwa co taxipa' ca

Mateus 4.18-22; Marcos 1.16-20; João 1.35-42

5 Maqui' ac ne na xec pain ca pe cain cacarain cote ne com pain Genesaré Jeju ma'. Mija nana wari' co xao xao nonon. Om ca paric camain' caca. Taraju xin capijacon Iri' Jam nana. ² Querec ac cain na mam' horoho wa pain cacarain cote ne com ma'. Ma' 2 na. Wara an tac to nanain caram ma' co pa' taxipa' nana hwam ma', co hohoc nanain caji wi ca mam' pa' caca hwam ma'. Querec iri nain Jeju ne, ³ piton pe ac cain na wirain ma', ca mene ca Simão ma'. Amon joc in mao ca' ra pain namaji mam' horoho wa ca' ac con na. Xao pe pe ac cain na mam' horoho wa ma', ca' na ca' na ac tococwa na pain capijacon Iri' Jam.

⁴ Pi' pin iri na ca tomi' nucun ne, tomi' ac con na Simão: Pan ho mao ra pain ca xopain ne com ma' ta ac con na. Wahu' quem, pa' je hwam quem ac tococwa na oro win ma' ca ma'. Xin mao je pain com caji wi ca mam' pa' wa hwam ta ac tococwa na.

⁵ Xin towa urut pain caji wi nuxut quem Taramaxicon co ca' na taxipa' capijacon Iri' Jam ac con na Simão. Mija urut, xec pa' e' naparut pain ca xin xin urut pain caji wi. Om ca cut camain' urut con hwam ta non. Ane tomi' pan ma ma' ne. Xin mao ta' pain com caji wi ta ac con na.

⁶ Xin iri nanain caji wi ne, cut tamana ac caca na hwam. Mija na, om ca paric camain' ca. Werewein pin ta' paxi' na caji wi ca mam' pa' caca ma'. ⁷ Weo ac cocon na oro win ma' caca ma', co to nanain wirain mam' horoho wa ma'. Ma' ta quep xiho' cacapari' ta nana. Pan ho hwet ac cocon na, cut ho' moin' ac cacain na mam' horoho wa con hwam ma', moin' moin' pi' pin na mam' horoho nucucun. Pan corom mama' xi' paxi' nana ira.

⁸ Querec iri nain i ma' Simão Pedro ne, pain ca cut tamana caca hwam ma', pe torotop mi' ac con na Jeju pain caximacon. In ca' ne ta Taramaxicon ne. Om ca na ne pain ca pe ho' cara mapa' ca', xi caracat taxipa' ara ta' ta na ca tomi' con ma'. ⁹ Wa wa tamana na Pedro pain ca cut tamana caca hwam ma'. Wa wa nana oro win ma' ca co to ho' nonon pain mam' horoho nucun ma' quem. Cain' cain' xira con ne nana. ¹⁰ Ac i ma' nana mana panxica Zebedeu Tiago con João ma' quem, co taramaja wi ca ma'.

5.1 Tocwan na wixinain Genesaré. Genesaré, Galileia, ca' na wixinain cote ne com. 5.8 Simão ma', Pedro na xijein wixicon con Jeju. Ma' ac caca na wari' co Simão Simão wet nonon, ma' ac caca na co Simão Pedro nonon, ma' ac caca na co Pedro e' nonon quem.

Om na, ta jin' ma me ta Simão ac ca na Jeju. Maho' rain ca cut wa hwam ta. Mi' ho' xim inem pain xijein ca taramaja wa pain xocori ca'. Cut in ho' roron wari' ta. Win ne ca cut in taxipa' mon hwam cwa', ac i ma' roron oro wari' ta. Ma' ta howa cacapa' pum ta inem na ca tomi' con ma'.

¹¹ An taratac pin ac cacain na mam' horoho nucucun pain namaji ma', maji con ta ac caca na, an to pin ac cacain na oro ca mam' pa' caca hwam ma', ja' ja' ac cocon na Jeju.

Ca quep xio pin tocwa wari' co ma' non caji nan

Mateus 8.1-4; Marcos 1.40-45

¹² Pe iri nain xijein cidade Jeju ma' ne, maqui' ac ca na wari' co ma' tamana non caji nan. Lepra na wixinain ca caxi nucun. Mija non nan pain curucun. Querec iri non Jeju ne, pe torotop tucu hwet mi' ac cain na macan', tomi' ac con na: Mo ta quep xio xim mapa' ma', taxi' inem pain ca quep xio taxi' mapa' ta non.

¹³ An piri' iri nain micon ne, quep ac con na, tomi' ac con na: Param inain, xio pin ra ta non. Xio hap pin ac ca na, om pin ac con na caji nan.

¹⁴ Tomi' ac con na Jeju, tomi' mip non: Taraju wet ne e'. Miri'om roron oro wari' ma'. Ta tomi' hwet momon pain ca quep xio xim ca' me ta non. Hwet e' ron sacerdote co taramaja pe nain cote ne xiricon Iri' Jam ac con na. Noro rain cwere pain ca xio pin ta' ca' ac mon tara, mi' ac mon tara pain carawa ca tomi' capari' Moisés pain cara pane, pain ca tomi' xo' capari' con wari' co xio pin pain caji nan. Mi' ron pain, tom mi' ron pain Iri' Jam me ac mon tara. Tom tain' iri tarain ne, querec pin' ac quequem tara oro wari' pain ca xio pin nem ma', je pain ca querec hohot pin quem Iri' Jam ma' quem na ca tomi' con ma'.

¹⁵ Tomi' ac i ma' paxi' non, ane taraju taraju tiquin' caca oro wari' ne. Taxi' taxi' pi' pin ac cocon na Jeju pain oro ca ara ca ma'. Je ca hwet mija cocon oro wari' quem. Mija nana wari', om ca paric camain' caca. Taraju xun nonon. Quep xio tarapari' pain ca caxi nexi' ca' nonon quem. ¹⁶ Ane mao taxipa' cain ca om pe ca wari' Jeju ne. Tomi' tomi' ac con na Cote ca.

Ca quep xio pin con wari' co carama pe Jeju

Mateus 9.1-8; Marcos 2.1-12

¹⁷Maqui' ac ne na xec pain ca ca' na tococwa pain capijacon Iri' Jam oro wari'. Pain ca ca' na tococwa ma', taraju nana oro fariseu cocon oro co ca' na taxipa' nanain ca xirao' nucun Moisés ma' quem. Maqui' nanain oro ca paric to ne xirim pain Galileia, je pain Judeia, maqui' nanain Jerusalém quem. Xao to to nanain i ma'. Jeju ma', pe ho' non ca hwara' opa nucun Iri' Jam quem. Je ca ha' con pain ca quep xio pin cocon oro wari' co caxi nana ma'. ¹⁸Maqui' ac caca na wari' co an mamam' nonon wari' co carama pe. Terem' pe nain witacon. Ma' 4 nana co an mamam' nonon ma'. An mamam' corom mao xun pain xirim paxi' nonon ira. Ma' ta an terem' pe mi' xun con Jeju ta nana. ¹⁹Ane om ha' cocon ne, xi mija ara caca oro wari' ta. Om ca paric camain' caca. Je ca piri' mama' cacain xonein xirim ma' quem. Pa ac cacain na, an quiji' ac cocon na pain ximijacocon oro wari' ma', an quiji' ja' pan mi' nonon pain iri' ca pe pan ca Jeju ma'.

²⁰Querec pin' iri tata pain ca howa cocon ne, tomi' ac con na co carama pe ma': Xic am pin inain ca caracat nem ta xa' na ca tomi' con ma'.

²¹Coromicat ximama' ac caca na oro fariseu cocon oro co ca' na taxipa' nanain ca xirao' nucun Moisés: Cain' cain' xira con ne? Para tomi' ac i ma' ca ma' quem? Iri' Jam ina xi' ma na ron? Xi xic am pin taxi' cain ca caracat wa ca wari' wa ta! Xica' pe na Iri' Jam co xic am pin taxi' nain ca caracat wa ta na ca coromicat ximama' nucucun.

²²Taxi' nonon Jeju pain ca coromicat ac i ma' caca ma'. Taxi' ximao na ximicon. Para coromicat ac i ma' hwe ma' quem ac tococwa na. ²³I'ina xirapa' pain ca xic am pin tain ca caracat nem ton co carama pe cwa' ra? I'ina xirapa' pain ca tequi' pe ra ta, xut ra ta ton ra? Cain' xi i'ina ac capa' quem? ²⁴Je ca tomi' xuhu' ca' ac tococwa na. Tomi' ton. Ma' ta taxi' mahu' pain ca mi' capa' pain ca hwara' opa wa Iri' Jam ta. Tomi' napa' pain ca Iri' Wari' ta' ca', xic am pin rain ca caracat nucucun oro wari' co to nanain

5.17 Judeu nana oro fariseu pane. Ac taramaxicon nana. Tomi' ca' nonon oro win judeu caca: Na e' na pain ca tomi' ha' xin oro ca xirao' nucun Moisés ca tomi' ha' je capari' Iri' Jam ta. Na e' na pain ca tomi' ha' xin oro ca xirao' nucucun oro hwanana nexi' ca tomi' ha' je cacapari' quem. Ma' ta querec hohot capari' Iri' Jam ta nana pane.

oro xijein macan' ta napa'. Tomi' ac con na co carama pe: Tequi' pe ra. An rain witam ca mam' terem' pe ma ma'. Mao rain xurum ta na ca tomi' con co carama pe ma'.

²⁵Tequi' pe hap ac ca na, querec querec pi' pin nonon oro wari' pain ca tequi' pe hap ca ma'. An ac cain na witacon ca mam' terem' pe ca ma', mao ac cain na xiricon. Tomi' querec te tamana na, awi na Iri' Jam ta na quem.

²⁶Wa wa wa wa pi' pin ac caca na oro wari' ma'. Awi na Iri' Jam ta nana. In ac tamana nonon Jeju pain ca querec pin' cocon pain ca hwara' opa ca ma'. Awi tamana na oro ca querec iri' pain xec ca' nana quem.

Ca ja' ja' ne con Levi Jeju

Mateus 9.9-13; Marcos 2.13-17

²⁷Jeju ma', quep xio pin iri non wari' co carama pe ne, hwet mao ac ca na, querec ac con na wari' co cut in taxipa' nain oro imposto. Xao pe pe nain ca taramaja pe ca ma', pain ca cut in cain oro imposto nucucun oro wari' ma'. Ja' ja' ne e' ac con na Jeju. ²⁸Tequi' pe ac ca na, an pe pin ac cain na oro ca taramaja nucun pain ca cut in taxipa' cain oro imposto cocon oro taramaxicon ma'. Ja' ja' ac con na quem.

²⁹Cao' querec te wi xijexi' con Jeju ta ac ca na Levi ma', tomi' ac tococwa na oro wari' ma', co cut in taxipa' nanain oro imposto ma', ma' nana oro xucucun quem. Mija nana wari' co cao' to ho' nonon pain xiricon.

³⁰Ane om querec hohot cocon oro fariseu cocon oro win ma' caca co ca' na taxipa' nanain ca xirao' nucun Moisés ma' ne. Tomi' ximama' ac cocon na co taxipa' ca Jeju: Para cao' to ho' huhun co cut in taxipa' nanain oro

5.24 Pain ca Iri' Wari' ina ta ca Jeju pane, ac ca tomi' ta' ca na ira: Maqui' paxi' inain pawin, ane ac wari' ta' ne. Wata' co iri' taramaxicon ta, co wara tomi' pe ca Iri' Jam pane. Ca' na ca wara tomi' pe ca Iri' Jam pata' pane: Main hwet turuhu' Iri' Wari' ne co to' witan xim nuhu' ta nuhu' pata' pane. To' witan ca' turuhu' pain ca caracat nuhu' ta nuhu' pata' pane, ac i ma' na ca tomi' ta' ca Jeju ira. **5.27** Levi na xijein wixicon Mateus. **5.27** Wari' co cut in taxipa' nanain oro imposto pane, taramaja mi' nonon oro taramaxicon nucucun oro romano, taramaja mi' nonon taramaxicon Herodes quem. Mija nana co mixein ho' mixein ho' nonon oro win judeu caca. Cut in tiquin' ca' nanain dinheiro ca cut in je tococwa pane. Cut mi' wijimain iri tata pain oro taramaxicon ne, pe ho' wijimain ac cocon na quem. Je ca noc tococwa pane. Noc tamana nonon oro win judeu caca pane.

imposto ma'? Para cao' to ho' huhun oro caracat ma' quem? Para toc to ho' huhun ma' quem na ca tomi' querec cocon ma'.

³¹⁻³² Tomi' ac cocon na: Om ca cwirin' je toton oro wari' co awi urut xi' ma nana ma'. Cwirin' je e' inonon co querec pin' pan xucucun pain ca caracat nucucun. Win ne ca om aramao xio tococwa oro wari' co om caxi nana ma'. Aramao xio e' tata co caxi nana ma'. Ac i ma' ina quem, cwirin' je e' inonon oro caracat. Je ca maqui' ta' ca' na ca tomi' tococwa ma'.

**Ca om na ne pain ca joc wanan xine ca pijim' nucun
Jeju pain wara ca pijim' nucucun oro hwanana**

Mateus 9.14-17; Marcos 2.18-22

³³ Ma' ac caca na wari' co tomi' ca' nonon Jeju: An to ho' an to ho' nanain ca cao' wa co taxipa' ca João ma', ma' ta tomi' xun Iri' Jam ta nana. Tomi' ho' tomi' ho' nonon quem. Ac i ma' nana co taxipa' caca oro fariseu ma' quem. Co taxipa' ma ma' iri nana ne, om ca an to cacain ca cao' wa pain ca toc wa. Cao' nana pain oro xijein xec, toc nana pain oro xijein xec quem na ca tomi' cocon ma'.

³⁴ Om na, noro jujun oro wari' co tomi' querec te xucucun pain ca an tam narima' ca win ma' nucucun ma' ac tococwa na. Ma' tara ca tomi' in pin ac huhun pain ca cao' wa pain ca pe ho' pe ho' wet cocon win ma' nucucun quem? Om ca an to ac cacain, xi tomi' querec te ara caca ta.

³⁵ Ame hwe e', main maqui' tara xec nein ca an ca' tococwa con. Je tara oro xec nein ca an to pin cacain ca cao' wa con na ca tomi' tococwa ma'.

³⁶ Pijim' joc mam' mi' ac tococwa na con wom pain ca om oc tacan mi' ac tocwa con wara wom con xocoricon pawiricon ma' quem. Pijim' ca' tata: Noro jun wari' co wein na wara womicon ma'. I' toron xocoricon wom pain ca oc tacan mi' ton con wara womicon ra? Om na. Mo ta i' con xocoricon wom ma', to' em' pin ac con tara. Om ta hohot con wara wom pawiricon xocoricon ma' quem. Xi an xiho' con ta. ³⁷ Ac i ma' na con wari' co ji'ao an pe xo' tain nain comi uva ca om mana' querec ma' quem. Om ca ji'ao an pe xo' cain pain wara tapari carawa. Mo ta ji'ao an pe xo' cain xocori comi uva ca om mana' querec pain wara tapari carawa ma', mana' iri tara ca moin' nein xocori ne, wein mao ac ne tara tapari carawa. Ao mao ac ne tara comi, em' pin ac ne tara tapari carawa ma' quem. ³⁸ Je ca na e' ne pain ca ji'ao an pe xo' e' cain xocori comi uva pain xocori tapari

carawa ma'. ³⁹Wari' co toc nain wara comi uva ma', noc nain xocori. Toc awi napa' wara comi uva ca', awi tiqin' ca' nain xocori ta ara xi' na. Ac i ma' na ca tomi' tococwa ma'.

**Ca tomi' em' tococwa co taxipa' ca Jeju pain ca
om xao to wa cacain ximicocon pain sábado**

Mateus 12.1-8; Marcos 2.23-28

6 Maqui' iri na sábado ne, xut mao ac cain na totain trigo Jeju. Wirico, wiricoco co taxipa' ca quem, xuruxut mama' ac cacain na totain trigo. Xuruxut xuruxut, caracat ac cacain na xirinain trigo co taxipa' ca ma', joc niri ac cacain na pain micocon. Cao' ac cacain na tocwi. ²Ma' nana oro fariseu co tomi' ca' nonon: Para taramaja hwe pain sábado ca', pain ca caracat hwein xirinain trigo ma'? Tomi' caho' ara xi' napari' ca xirao' nucun Moisés pain ca taramaja wa pain sábado ta na ca tomi' querec cocon ma'.

³Om na ta ac cocon na Jeju. Om ca noro hwein capijacon Iri' Jam ra pain ca pijim' xine carawa ca ara ca taramaxicon Davi cara pane, pain ca pe' qui' ca Davi cocon oro win ma' ca pane? ⁴Corom mao nain xiricon Iri' Jam pane, cut ac cain na capam' ca an toco' mi' tocwa Iri' Jam. Cao' ac cain na quem. Cao' xica' to xirarain oro sacerdote. Tomi' caho' paxi' tata pain ca cao' wa oro xucucun wari', ane cao' pan cain Davi ne. Cao' jein quem ac tococwa na oro win ma' ca quem. ⁵Je ca tomi' xuhu' ca' ac tococwa na. Taramaxicon ina. Wata' pain ca Iri' Wari' ta' ca', Taramaxicon pan ina. Wata' co tomi' xo' nuhu' pain carawa ca ara xi' hwe pain xec nein ca xao to wa ne ca xumu wa quem na ca tomi' tococwa ma'.

Ca quep xio pin tocwa wari' co xirac micon

Mateus 12.9-14; Marcos 3.1-6

⁶Om ca pain homa ne, pain xijein sábado ma', corom mao ac cain na xirim ca cut in to xucucun oro judeu Jeju. Pijim' ta' ta ac ca na, ca' na

5.39 Pain ca pijim' joc mam' mi' tococwa con wara wom con xocoricon pawiricon ma', je pain comi uva ca om mana' querec ma' quem, ca' na ca tomi' mao nein ca pijim' nucun: Oro wari' co hohot naparut ta nanain oro ca tomi' nucucun oro hwanana ma', co hohot naparut ta nanain oro ca ca' na nucucun oro fariseu ma' quem, noc nanain xocori ca pijim' ne ta na. I'ina nonon pain ca howa ni ca' cacain oro wara ca howa nucucun. I'ina nonon pain ca howa pin cacain xocori ca pijim' ne ta na.

ac tococwa na pain capijacon Iri' Jam. Pe nain i ma' wari' co xirac micon ma'. Iri' curucun na ca xirac ma'. ⁷Oro fariseu cocon oro co ca' na taxipa' nanain ca xirao' nucun Moisés ma', tocojin' nonon Jeju quem. Ma' ta ha' capari' pain ca tomi' em' xun ta nana. Je ca ja' noro cocon ma'. Quep xio ton tara pain xec nein ca xao to wa ne ca xumu wa pain sábadó ca' ra, ac i ma' paxi' na ca coromicat nucucun. ⁸Ane taxi' cocon Jeju ne, taxi' nonon pain ca coromicat ac i ma' nucucun. Tomi' ac con na co xirac micon ma': Tequi' pe ra e'. Hap ra, xat pe rain ximijaxut ca' non. Tequi' pe ac ca na, hwet ac con na pain ximijacocon.

⁹Tomi' ac tococwa na co tocojin' nonon ma': Tomi' querec xim inuhu'. Cain' cain' xixi' pain xec nein ca xao to wa ne ca xumu wa ca' quem? Ma' ca ara je capari' Iri' Jam quem? Om ca hohot ne pain ca quep xiho' xun wari' ra? Hohot na pain ca quep em' xun ra? Om ca hohot ne pain ca to' witan xun ra? Hohot na pain ca to' pa' pin xun ra na ca tomi' querec tococwa ma'.

¹⁰Noro noro xam' ac tococwa na pain ca to to mam' cocon ma'. Tomi' ac con na co xirac micon ma': Coc matam rain mum ma' ta non. Coc matam ac cain na, awi pin ac ne na con.

¹¹Mana' tamana ac caca na caram ma' co tocojin' nonon ma'. Cain' cain' xuxun quem ac xucucun na.

Ca tora' cocon oro apóstolo Jeju

Mateus 10.1-4; Marcos 3.13-19

¹²Om ca pain homa ne, mo tomi' ton Te ta ac ca na Jeju, mao ac cain na pacun. Tomi' ac con na, tomi' tomi' xec pa' ac con na quem. ¹³Xec pin iri na ne, harahap je ta ac tococwa na caram ma' co taxipa' nonon ma'. Tora' 12 ac tococwa na. Apóstolo je pain ca tomi' hwet huhun pain capija oro wari' ta ac tococwa na. ¹⁴Mo nana co tora' ca ma': Simão ma', co wara o' ma' ni ca pane, pain ca Pedro pin ra ta con pane. Ma' ac ca na coxa' ca ma' quem, André ma'. Ma' ac ca na Tiago con João con Filipe con Bartolomeu ma'. ¹⁵Ma' ac ca na Mateus con Tomé ma'. Ma' ac ca na Tiago

6.14 O' ma' ni iri non Simão Jeju ne, pain ca Pedro pin ra ta con pane, ca' na ca coromicat nucun: Hwara' opa pan ra cocon oro win apóstolo ma ma'. Ac ca taramaxicon pe ho' momon tara, ac i ma' na ca coromicat nucun Jeju pane. Ma' nana wari' co Simão Simão wet nonon, ma' ac caca na co Simão Pedro nonon, ma' ac caca na co Pedro e' nonon quem.

panxica Alfeu ma'. Ma' ac ca na Simão co jain jain tamana nonon oro win ma' ca pain ca witan ca' xun cocon oro romano ma'. ¹⁶Ma' ac ca na Judas panxica Tiago ma'. Ma' ac ca na Judas Iscariotes ma' quem. Wirico Judas Iscariotes co aram aram quep xiho' ton nonon co noc nonon Jeju ma', pain ca quep xun cocon ma', ame hwe e'. Ac i ma' nana co apóstolo je ca Jeju pane.

**Ca ca' na tococwa pain capijacon Iri' Jam, je
pain ca quep xio pin tococwa quem**

Mateus 4.23-25

¹⁷ Quiji' wi ac cocon na pain pacun ma', wirico Jeju, wiricoco co taxipa' ca ma' quem. Coco' to ac cacain na ca om tamaja nein ma' quem. Mija nana wari' co to nanain i ma'. Mija nana co wara taxipa' nonon, mija nana wari' co maqui' nanain oro xijein cidade pain Judeia, maqui' nanain Jerusalém, maqui' nanain cacarain iri' cote ne com pain Tiro je Sidom ma' quem. Om ca paric camain' caca. ¹⁸Taraju xun nonon, quep xio tarapari' pain ca caxi nexi' quem nonon. Oro wari' co corom to ho' nonon caxicon jam ma', tomi' jein pin ac tococwa na oro caxicon jam nucucun quem. ¹⁹Quep xuxun na nonon, jain jain jain jain pi' pin nonon. Xi pe ho' ara con ca hwara' opa wa ta. Je ca mam' quep xio quep xio pi' pin cocon quem.

**Oro wari' co param mi' wawa pain ca awi wa,
cocon oro co ximin xi' nana quem**

Mateus 5.1-12

²⁰Noro ac tococwa na co taxipa' ca ma'. Tomi' ac tococwa na:

Wahu' pain ca ximin hwe ma', param mi' nuhu' pain ca awi wa Iri' Jam. Xi wari' ne ara cuhu' pain ca taramaxicon pe ho' xim cuhu' ta.

6.20 Tomi' mi' tata wari' co ximin nana pain ca om cocon oro carawa ma', tomi' mi' tata wari' co querec pin' xucucun pain ca om hohot cocon Iri' Jam quem. Tomi' mi' tata co coromicat ca' xucucun: Mo ta om xiram pa' capa' Iri' Jam, om ta hwet ac ton pain ca taramaxicon pe nucun ta, wiricoco nana co tomi' mi' wawa ma'.

²¹ Wahu' pain ca pe' hwe pain xocori ca', param mi' nuhu' pain ca awi wa Iri' Jam. Xi maqui' ta' ara ne xec nein ca ma'am xi' hwe ta.

Wahu' pain ca awaran hwe pain xocori ca', param mi' nuhu' pain ca awi wa Iri' Jam. Xi maqui' ta' ara ne xec nein ca tomi' querec te xi' hwe ta.

²² Wahu' pain ca noc cucuhu' oro wari' ma', pain ca howa mahu' pain ca Iri' Wari' ta' ca', wahu' pain ca xin hwerehwet cucuhu' pain ca cut in to xucucun ma', je pain ca tomi' xirac cucuhu' ma', je pain ca tomi' ximama' cucuhu' pain ca pan teretem hwe ta cucuhu' ma', ara ac i ma' iri nunuhu' pata' ne, param mi' nuhu' pain ca awi wa Iri' Jam ta. ²³ Maqui' iri tara xec nein ca to' i'ina ac i ma' cucuhu' ne, tomi' querec te ac hwe tara. Tomi' querec te tamana je. Xi om ne ca awi tamana ara ne oro ca mi' xim cuhu' Iri' Jam pain pawin cain ta. Ac i ma' ara xi' nana oro hwanana nucucun pain cara pane, pain ca quep em' qui' cocon oro profeta pane.

²⁴ Wahu' pain ca caramaju hwe pain xocori ca' iri na ne, main maqui' tara xec nein ca ximin tamana xi' hwe. Xi wara ma' ara cuhu' carawa ca ja' tomi' querec te nuhu' pain xocori ca' quem.

²⁵ Wahu' pain ca ma'am hwe pain xocori ca', main maqui' tara xec nein ca ximin tamana xi' hwe. Xi pe' tamana xi' ara hwe ta.

Wahu' pain ca tomi' querec te e' hwe pain xocori ca', main maqui' tara xec nein ca ximin tamana xi' hwe. Xi awaran tamana xi' ara hwe pain ca tomi' xaxa' nuhu' ta.

²⁶ Wahu' pain ca awi na awi na pi' pin cucuhu' oro wari' pain xocori ca', main maqui' tara xec nein ca ximin tamana xi' hwe. Xi tomi' ac i ma' ara caca hwanana nucucun pain cara pane, pain ca awi nana awi nana

6.21 Pain ca tomi' mi' tococwa wari' co cao' xi' nana pain ca pe' nucucun ma', ca' paxi' na ira: Oro wari' co jain jain nanain oro caramaxicon Iri' Jam ma', co ac ca pe' caca na pain ca param tamana cacain capi'acon, je pain ca win xumu cacain oro ca param pan nucun quem, wiricoco tatara co mi' mi' pi' pin wawa pain oro caramaxicon ta na ca tomi' nucun. **6.21** Mija na oro ca to' i'ina wa ca to' awaran napari' pain xocori ca'. To' tomi' xaxa' napari' ca caxi nexi' pain oro ca jain jain nexi'. To' tomi' xaxa' napari' ca caracat nexi' quem, je ca to' tomi' xaxa' tamana pan capari'. Ane ja' tomi' querec te capari' Iri' Jam ne, xi om ne ca mi' pin caho' ara capari' Jeju ta. Xic am pin napari' pain ca caracat nexi'. **6.25** Hohot paxi' na pain ca caramaju iri', hohot paxi' na pain ca ma'am iri' pain ca cao' wa quem. Ane om hohot ne pain ca param e' xin oro caramaji macan' pain ca om howa xun Jeju quem. Mo ta om howa xun Jeju ma', ximin pan iri'. Ximin tamana iri', xi ma' capari' iri' carawa ca to' hohot napari' ta. Om ca ma' capari' Jeju.

qui' cocon oro profeta co tomi' hwet mixein e' nanain capijacon Iri' Jam pane ta na ca tomi' tococwa ma'.

Ta noc huhun co noc nunuhu' ma' me ta tata

Mateus 5.38-48

²⁷Wahu' pain ca taraju mahu' ma' iri na ne, tomi' ca' inuhu' ta ac tococwa na. Ta noc huhun co noc nunuhu' ma' me. Ara mi' jujun pain ca awi wa. ²⁸Mo ta tomi' noro cucuhu' oro wari' co quep em' nunuhu' ma', tomi' mi' jujun con Iri' Jam. Xiram pa' roron, mi' roron pain ca awi wa ca' jun pain ca tomi' mi' huhun con. ²⁹Tomi' inem pain ca mana' quem wari' ma' quem. Mo ta wap quem, pain xijein orocoxum ma', mo ta wap mami' xim quem quem, je i ma' ira, jami mi' ron pain xijein orocoxum, wap mami' ne pain me ac mon tara quem. Mo ta ma' ca wari' co an mao ton non to' om capin' nem ma', ta nain ho' mon con iri' curucun womum ma' quem me. ³⁰Oro wari' co mi' xut nenem pain carawa ma', mi' mi' xam' roron pain carawa ca mi' xut caca ma'. Mo ta ma' ca wari' co an ca' nem pain caramajum ma', ta mi' in hwet ne pain mon me. ³¹Je ca tomi' xuhu' ca'. Oro ca ara mi' ma' tatarapari' ne huhun oro wari' ma', je i ma' tara ca ara mi' huhun quem.

³²Je ca tomi' xuhu' ca': Mo ta om noc e' huhun oro wari' co om noc nunuhu' ma'. Cain' cain' xuruhu' Iri' Jam pain i ma' quem? Mi' turuhu' pain oro ca awi wa pain ca om noc e' huhun co om noc nunuhu' ma' ra? Om na. Ac i ma' ara xi' nana oro caracat ma'. Om ca noc cocon co om noc pan nonon. ³³Mo ta xiram pa' e' huhun oro wari' co xiram pa' nunuhu' ma'. Cain' cain' xuruhu' Iri' Jam quem? Mi' turuhu' pain oro ca awi wa pain ca xiram pa' e' huhun co xiram pa' nunuhu' ra? Om na quem. Ac i ma' ara xi' nana oro caracat ma'. Xiram pa' nonon co xiram pa' pan nonon ma'. ³⁴Mo ta wajim' cucuhu' pain oro carawa oro wari' ma', mo ta mi' e' huhun pain co main mi' in hwet xim tatarapa' pain hwe ma'. Cain' cain' xuruhu' Iri' Jam quem? Mi' turuhu' pain oro ca awi wa pain ca mi' e' huhun pain carawa ca wajim' caca co main in hwet mi' tatarapa' pain hwe ra? Om na quem. Ac i ma' ara xi' nana oro caracat ma'. Mo ta wajim' xucucun pain

6.26 Hohot paxi' na ca tomi' querec te iri'. Hohot paxi' na ca awi na awi na cacapari' oro wari' quem. Ane om hohot ne pain ca win xumu xin oro ca tomi' querec te nucucun oro wari' pain ca querec pin' xirarapari' pain ca awi nexi' na xuxun ta.

oro carawa ma', mo ta main mi' in hwet tatarapa' pain caca ma', mi' ac xucucun pain na. ³⁵Je ca tomi' xuhu' ca': Ta noc huhun co noc nunuhu' ma' me. Xiram pa' jujun. Mo ta wajim' cucuhu' pain oro carawa ma', mi' ac huhun pain tara. Ta main mi' in hwet tatarapa' pain hwe me. Main mi' ac cuhu' tara pain oro ca awi tamana Iri' Jam. Querec pin' ac cucuhu' tara oro wari' pain ca an xiho' huhun Iri' Jam co Iri' Taramaxicon pan. Xi xiram pa' ara cocon oro caxicon wari' Iri' Jam ta. Oro wari' co om tomi' querec te taxi' nana pain ca cut caca carawa ca awi, je i ma' ira, xiram pa' pan nonon Iri' Jam ta. Oro wari' co pan teretem nana ma', je i ma' ira, xiram pa' pan ac cocon na quem. ³⁶Xiram pa' taxipa' jujun oro wari' ta. Win ne ca xiram pa' taxipa' capari' Cotere' Iri' Jam quem na ca tomi' tococwa ma'.

Ca tomi' em' xijexi'

Mateus 7.1-6

³⁷Ta tomi' em' xujuhu' pain ca pan teretem wa me ta ac tococwa na. Om ac ne tara ca tomi' em' cuhu' pain ca pan teretem wa Iri' Jam quem. Ta tomi' mi' xujuhu' pain ca wap wa pain ca pan teretem wa me. Om ac ne tara ca tomi' mi' cuhu' pain ca wap wa pain ca pan teretem wa Iri' Jam quem. Mana' mana' om xujuhu' pain ca ara cup xujuhu' ma', xic am pin ac cain tara ca caracat nuhu' Iri' Jam ta. ³⁸Mi' querec te xujuhu' pain oro carawa, mi' pan ac cuhu' pain tara Iri' Jam quem. Mi' tamana turuhu' pain, win ca wari' co vender nain tocwi trigo ma'. Cut moin' nain, xin xam' nain, joc xoco' moin' ac cain na. An ho pa' mami' ac cain na, ma' ta moin' ne ca mam' cut nein pata' ta na. Ac i ma' turuhu' Iri' Jam quem, win hwe ma', pain ca mi' querec te caracan xujuhu' pain oro carawa ma', ac i ma' tara ca mi' xim cuhu' pain quem.

³⁹Tomi' ac tococwa na: Noro jun wari' co om tocon ma'. Ma' na ca coc papan ac con win ma' ca co om tocon ma' quem? Om ta pan' horot mama' pi' pin cacain man ra? ⁴⁰Noro jun wari' co ca' na wa pain oro ca taxi' wa ma' quem. Om ca taxi' tiquin' ca' con co ca' na pan non ma'. Mo ta taxi' taxi' pi' pin cain oro ca ca' na tocwa ma', an xiho' ac con tara co ca' na pan non ma', ac i ma' na ca pijim' tococwa ma'.

⁴¹Tomi' inem pain ca tomi' em' mon win ma' ma pain wijimain ca caracat nucun ma' ac tococwa na. Tomi' em' iri mon ne, an xiho' ac mon na wari' co noro e' nain wijimain tohoromi pana ca pe nain tocon win ma'

ca ma'. Xi querec pin' pan cain cote ne pana ca pe nain tocon ta! ⁴²Hot pin tain wijimain tohoromi pana ca pe nain tucum ma' xa' mon win ma' ma ra? Je i ma' ne ma ra? Cain' cain' xima quem? Ma' na ca tomi' ac i ma' ac ma ra? Xi ha' quem pain ca querec pin' main cote ne pana ca pe nain tucum ta. Ac ca iri'o' ta' ca' tara me ma ra? Hot pin cain' rain cote ne pana ca pe nain tucum ma'. Querec toha pin ac ma tara, ha' pin ac quem tara pain ca hot pin main wijimain tohoromi pana ca pe nain tocon win ma' ma ma' na ca tomi' tococwa ma'.

Ca an xiho' cacain panaji memem wari'

Mateus 7.15-20; Mateus 12.33-35

⁴³Tomi' xin oro panaji memem ma' quem ac tococwa na. Panaji memem ca awi ma', om ca wina pan tem ne. Panaji memem ca pan tem ma' iri na ne, om ca wina awi ne quem. ⁴⁴Mam' querec pin' irin oro panaji memem pain winain. Noro jein caji pi ma'. Wina awi na? Mi nain figo ra? Wina awi na caji nahwarac ca to' taratan wari' ma' quem? Mi nain uva ra? Om na. ⁴⁵Ac i ma' nana oro wari' quem. Wari' co awi ca coromicat nucun ma', ac ca cut toco' xo' cain na ca awi ne capijacon pain ximicon, an hwet ac cain na pain ca tomi' nucun. Wari' co om awi ca coromicat nucun ma' iri na ne, ac ca cut toco' xo' cain na ca om awi ne capijacon pain ximicon, an hwet ac cain na pain ca tomi' nucun quem. Je ca tomi' xuhu' ca': Carawa ca coromicat taxipa' iri' pain iri' ximixi' ca', je ca tomi' hwet iri' pain ca tomi' nexi' ca' quem na ca tomi' tococwa ma'.

Wari' co quep pe na xirim pain pacun, xucun wari' co quep pe nain namaji quem

Mateus 7.24-27

⁴⁶Para Taramaxicon ne Taramaxicon ne mahu' pain ca tomi' mahu' ma' quem? Xi tomi' ha' mahu' ta ac tococwa na. ⁴⁷Taraju wet xine pain ca tomi' xuhu' ca'. Wari' co hwet napa' ma', co taraju nain ca tomi' ne ca', co tomi' ha' napa' ma' quem, pijim' joc mam' mi' xuhu' con wari' co an xiho' non. ⁴⁸An xiho' non wari' co quep ta' na xirim. Xe' corom ac ca na pain iri' paxicom. Xe' corom xe' corom hwet iri nain pacun ne, cut in xo' ac cain na oro pacun nein caximain xiricon. Ma' ta teren ne nain. Je ca

quep pe cain xiricon. Aram aram pan' ac ne na xowi'. Pan' tamana pan' tamana, we' pin iri na com ne, cote ne com pin ac ne na quem. Weweweo in paxi' nain xirim com ma', ane om meo camain' ne ne. Xi tara quep pe ara xine pain pacun ta. ⁴⁹Wari' co taraju paxi' nain ca tomi' ne ma' iri na ne, taraju paxi' napa', ane om tomi' ha' capa' ne. An xiho' non wari' co quep pe e' nain xiricon pain macan'. Om ca cut in xo' cain oro pacun nein caximain xiricon pain pacun pain iri' paxicom. Quep pe e' nain xiricon pain macan'. Aram aram pan' ac ne na xowi'. Pan' tamana pan' tamana, we' pin iri na com ne, cote ne com pin ac ne na. Weweweo in iri nain xirim com ne, pa caracat mao ac ne na, pa horohot pi' pin ac ne na quem na ca tomi' tococwa ma'.

**Ca quep xio pin tocwa wari' co taramaja mi' non
taramaxicon nucucun oro soldado**

Mateus 8.5-13

7 Pi' pin iri na ca pijim' nucun Jeju ne, pain ca ca' na cocon pain capijacon Iri' Jam oro wari' ma', mao tain i cain ta ac ca na, wa' mao ac cain na Cafarnaum. ²Pe nain Cafarnaum taramaxicon nucucun oro soldado ma'. Romano na. Ma' 100 nana soldado co taramaxicon ne nonon. Ma' non wari' co taramaja mi' e' non ma', co tomi' querec te tamana ca ma'. Mija na ca caxi ca. Mi' pin ta' na ira. ³Taraju ac caca na oro wari' pain ca maqui' na cocon Jeju. Iri'o'? Mo tomi' mi' xine con e' ac tococwa na oro taramaxicon nucucun oro judeu ma'. Hap ra, quep xio ron wari' ne co taramaja mi' e' napa' cwa' nem taramaxicon nucucun oro soldado ta xine con me na ca tomi' tococwa ma'.

⁴Hwet pin iri nonon Jeju ne, tomi' hwet ac cocon na pain ca tomi' nucun taramaxicon nucucun oro soldado. Xiram pa' ron me, xi awi ara ca ta. Hohot na pain ca quep xio mon wari' nucun ta nonon pain ca jain jain nucucun pain ca tomi' mip cocon Jeju ma'. ⁵Tomi' querec te ara xi' napari' pain ca judeu iri' ca' ac cocon na. Quep mi' naparut pain xirim ca cut in to xujuxut quem nonon. ⁶Ma, maji ta ac ca na Jeju, ja' ja' ac cocon na quem.

Wixicam pin tain iri nain xiricon ne, xuruxut cam' ac cocon na oro win ma' ca taramaxicon. Wirico taramaxicon co xuruxut cam' jun ta nonon. Tomi' ac cocon na: Tomi' jun Jeju ta naparut taramaxicon nuxut

ta Taramaxicon. Ca' jun ta naparut pum: Ta toron mami' ne xumum pata' me Taramaxicon. Om ca ha' ne pain ca corom main xuru, xi awi ta' ta, tomi' ac i ma' jun ta naparut taramaxicon nuxut pum Taramaxicon. ⁷Je ca om xut cam' pan xim ca' nem. Ca' jun ta naparut pum: Ta toron mami' ne xumum pata' me ta Taramaxicon Jeju. Om ca hohot ne pain ca corom main xuru, xi awi ta' ta. Je ca querec pin' xije pain ca om hohot ne pain ca xut cam' pan xim ca' nem, xi awi ta' nem. ⁸Tomi' ca' nem quem ac cocon na: Tomi' ha' terem ca caxi nucun ta, taxi' ina. Win ne ca tomi' ha' pan toton oro taramaxicon ne ca', ma' nana oro soldado ne co tomi' ha' nanapa' quem, je cwerein parut. Mao rain i cain inon xucun, mao ac ca na. Hap ra ta ac ton na xucun, hap ac ca na quem. Ara rain i ca' ac ton na wari' ne co taramaja mi' e' napa', ara ac cain na quem ta, ac i ma' na ca tomi' cocon Jeju.

⁹Taraju iri nain i ma' Jeju ne, pain ca tomi' hwet cacain ca tomi' nucun taramaxicon oro nucucun ma', wa wa tamana ac con na. Tucu in hwet ac tococwa na oro wari' co ja' ja' nonon ma'. Howa tamana napa' taramaxicon nucucun oro soldado ma! Om ca querec camain' ton wari' co an xiho' non pain ca howa nucun. Tomi' iri'o' inuhu', om om nana oro judeu co an xiho' nonon pain ca howa nucun quem na ca tomi' tococwa ma'. ¹⁰In mama' ac cacain na xiricon taramaxicon nucucun. Tan' mama' iri nana ne, wara xio pin na wari' nucun.

Ca to' e' mami' con cawinacam narima' co wara mi' pin ca' nam taxicam

¹¹Om ca pain homa ne, mao ac cain na xijein cidade Jeju. Naim na wixinain. Ja' ja' nonon co taxipa' ca cocon oro xucucun wari' ma'. Mija nana wari' cocon. Om ca paric camain' caca. ¹²Hwet pin xin iri nanain cote ne man ca corom ac xine oro xirim ma' ne, wara an mamam' nanain pana ca an terem' pe tocwa co mi' pin ma'. An corom pe xin curucun pain manain pacun ta nana. Cawinacam narima' co wara mi' pin ca' nam taxicam na co mi' pin ma'. Xica' pe na cam, om na xucun cawinacam. Mija nana wari' nein cidade nequem co ja' ja' nanam quem. Om ca paric camain' caca. ¹³Querec iri nam Taramaxicon nexi' ne, xiram pa' ac cam na. Ta aca ma me ta nam.

¹⁴Wixicam pin ac cam na, quep ac cain na pana ca an terem' pe tocwa cawinacam. Coco' ac caca na co an mamam' nanain ma' quem. Tomi' inem ta arain. Tequi' pe ra ta na ca tomi' con ma'.

¹⁵Xao pe ac ca na, tomi' ac ca na. Mon cwa' cawinam cwa' ta ac cam na jicon ma'.

¹⁶Jin' tamana ac caca na oro wari' ma', in ac nonon Iri' Jam pain ca awi na awi na cocon ma'. Pe ho' pin napari' profeta co hwara' opa cwa'! Hwet pin capari' Iri' Jam pain ca xiram pa' toton capari' pain ca wari' ne capari' ca' ira! Ac i ma' na ca tomi' caca ma'. ¹⁷Oro wari' co to nanain oro xijein cidade pain Judeia ma', je pain oro xijein xirim ca to ja' pan nonon ma', taraju taraju pi' pin ac cacain na oro ca ara ca Jeju.

Ca tomi' querec cocon Jeju co taxipa' ca João co ja' taxipa' com

Mateus 11.1-19

¹⁸Co taxipa' ca João co ja' taxipa' com ma', mo hwet ac cocon na, tomi' hwet tomi' hwet pi' pin ac cocon na pain oro ca ara ca Jeju. Na ra ac ca na, harahap je ta ac tococwa na co taxipa' ca ma'. Ma' 2 nana co harahap je ca ma'. ¹⁹Mo hwet jun Taramaxicon nexi' ta ac tococwa na. Tomi' querec ca' jun: Wum tara co wara tomi' pe ca Iri' Jam pane, co main maqui' tara ta ca pane ra? Winim' jun xucun maparut ra? Ac i ma' tara ca tomi' querec hun ta tata.

²⁰Hwet ac cocon na Jeju, tomi' querec ac cocon na: Tomi' naparut João co ja' taxipa' com ma', tomi' querec ca' jun ta naparut pum nonon. Wum tara co wara tomi' pe ca Iri' Jam pane, co main maqui' tara ta ca pane ra? Winim' jun xucun maparut ra? Ac i ma' na ca tomi' querec jun ta caparut pum ta nonon.

²¹Pain xec nein ca hwet cocon Jeju co taxipa' ca João ma', quep xio tamana nonon wari' Jeju ma'. Quep xio pin tata co caxi tamana nana, tomi' jein pin tata oro caxicon jam co corom to ho' nonon quem. Mija nana wari' co om tococon ma' quem, quep ma' pin mami' ac cain na tococon. ²²Taraju iri nonon pain ca tomi' querec nucucun co taxipa' ca João ne, tomi' xo' ac tococwa na: In hwet jun João ta. Tomi' hwet ac hun tara pain oro ca querec hwe ca', je pain oro ca taraju hwe ca' quem. Querec pin nana co om tococon. Xuruxut pin nana co xuruxut xirac nana. Xio pin nana wari' co ma' nonon caji nan. Taraju pin nana co om taraxicocon. E'

mami' nana co cono' nana. Pijim' mi' inonon pain capijacon Iri' Jam oro wari' co ximin nana quem, pain ca to' witan pin xim cuhu' Iri' Jam ta toton ca'. ²³ Tomi' jun pain i ca' quem: Wari' co howa cara napa' ma', co om tara con ta'a napa' ma', wirico tara co param mi' ca pain ca awi wa Iri' Jam ta, ac i ma' na ca tomi' xo' tococwa ma'.

²⁴ Mama' iri nana co taxipa' ca João ne, tomi' ac cocon na oro wari' Jeju. Tomi' mi' nonon con João: Ma' carawa ca querec xi' hwe pain ca mama' hwein mahweri pane? Querec xun hun wari' co pijim' ximao ra, co an xiho' nain caji quiwo' ca meo ximao pain hotowa ra? Om na. ²⁵ Ma' co querec xi' hwe pane quem? Querec xun hun wari' co caramaju ra, co pe non wom co awi ma', co ma' non oro carawa ca param ca ma', wirico co querec xi' hwe ra? Om na quem. Xi to ara cacain xiricon taramaxicon oro wari' co caramaju ac i ma' nana ta. ²⁶ Ma' co querec xi' hwe pane quem? Querec xun hun profeta ra? Iri'o' na, wirico profeta co querec hwe pane. Querec hun profeta co hwara' opa tamana. Hwara' opa tiquin' ca' nonon oro xucucun profeta. Tomi' iri'o' inuhu' ta. ²⁷ Wirico João co xirao' pe ca profeta pane, pain ca xirao' pe cain ca tomi' nucun Iri' Jam pane, pain ca tomi' capa' pain ca main mao rain macan' ta capa' pane. Ca' na ca xirao' pe nucun pain ca tomi' xo' capa' con João pane:

Main tomi' ton wari' co tomi' hwet tain nain capija ca'.

Tomi' ca' ton pum: O ra ta ton,

tomi' xo' ac tococwa tara oro wari' pum.

Ma' ta winim' xo' quequem.

Ac ca wara ara xo' cain wanajum ma' tara pain ca tomi'
xo' tococwa oro wari' pum ta.

Ac i ma' na ca xirao' pe ca profeta pane, pain ca xirao' pe cain ca tomi' xo' capa' Iri' Jam con João pane.

²⁸ Je ca tomi' xuhu' ca' ac tococwa na. Iri' wari' na João, hwara' opa na. Om na xucun wari' co tiquin' ca' non pain ca hwara' opa nucun, om nana oro hwanana co hwara' opa tiquin' ca' nonon quem, om om paxi' nana. Ane hwara' opa tiquin' ca' pan con João wari' co om hwara' opa camain' ne, co taramaxicon pe ho' ca Iri' Jam pain ca howa capa' ma', hwara' opa tiquin' ca' pan non João ta na ca tomi' tococwa ma'.

²⁹ Oro wari' ma', cocon oro co cut in taxipa' nanain oro imposto ma' quem, taraju iri nonon Jeju pain ca tomi' ac i ma' ca con João ne, xin ne xin ne pi' pin ac cacain na ca coromicat an pe xo' nucun Iri' Jam ma', pain

ca na e' na pain ca cwirin' hwein ca caracat nuhu' ta pan tococwa ma'. Wara ja' ara xi' tata pain com pane. Wirico João co ja' nonon pain com pane. ³⁰Oro fariseu cocon oro co ca' na taxipa' nanain ca xirao' nucun Moisés ma' iri nana ne, om ca ja' tococwa pain com. Xi noc urut pain ta ara caca pain ca cwirin' jein ca caracat nuhu' ta tococwa.

³¹Je ca tomi' xuhu' ca' ac tococwa na. Ma' co an xiho' caca oro wari' pain xocori ca' quem? Om na, pijim' joc mam' mi' xuhu' cocon wari' co an xiho' caca cwa'. ³²An xiho' nonon oro hwijima' co merem caracan xucucun pain ca waraju nucucun. Xao to nanain ca xao to to caca oro wari' pain ximijain cidade, merem ac xucucun na: On mi' paxi' urut pahu' pain xuwiwio' ca', ane om pi' xirao' hwe ne, ac i ma' na ca merem nucucun hwijima'. Merem ac xucucun na quem: Awaran waraju xi' paxi' urut pahu' pain ca ac ca mi' pin ca ne win ma' nexi' cwa' urut pahu', ane om awaran hwe ne. Ac i ma' na ca merem nucucun oro hwijima' pain ca om ha' xucucun pain ca waraju nucucun.

³³Ac i ma' maparut pain ca pijim' nuxut ca' quem, an xiho' huhun oro hwijima' pain ca noc urut pain noc urut pain xucucun pain ca waraju nucucun. Noro jun João ma'. An pe nain ca cao' wa pain ca tomi' ton con Iri' Jam. Om ca toc cain comi uva quem. Tomi' ximama' pan ac hun na: Corom pe ho' non caxicon jam ta hun. ³⁴Wata' pain ca Iri' Wari' ta' ca' iri na ne, cao' ina, toc inain comi uva quem. Tomi' ximama' ac mahu' na: Xocomu ma, toc tamanain pe ma, taxipa' momon oro caracat ma', oro co cut in taxipa' nanain oro imposto ma', wiricoco oro wari' co hwet taxipa' wixicocon pain ca pan teretem nucucun ma' quem, wiricoco nana co taxipa' ma ma', ac i ma' na ca tomi' ximama' mahu'. ³⁵Tomi' ximama' ac i ma' paxi' maparut, ane tomi' iri'o' urut pain ca pijim' nuxut ne. Oro wari' co taraju nanapa' pain ca pijim' ne ca', mo ta querec cocon oro co xuruxut xo' nana pain ca tomi' ha' cacapa' ma', querec pin' ac cacapa' tara pain ca tomi' iri'o' ta' ca' na ca tomi' tococwa ma'.

Ca ji'ao mi' camain caximacon Jeju pain caji towaxi' caxicam narima'

³⁶Ma' ac ca na fariseu co hap ra non Jeju. Simão na wixicon. Hap ra, cao' pe ho' ne pain xuru ta non. Ma ac ca na, mao ac cain na xiricon, xao pe ho' ac con na pain pana ca mam' cao' to caca ma'. ³⁷Ma' na caxicam narima' co pe nain cidade ca pe pan ca fariseu ma' quem. Taraju ac cama

na: Cao' pe ho' non fariseu Jeju ta na ca taraju cama ma'. Iri'o'? Hwet ac con na. An nain caji towaxi' ca hu awi ma', ca wara ji'ao pe cama pain caji too ca mam' quep xine pain ca awi ne pacun ca taramac tamana. ³⁸Xat pe ac camain na waracon Jeju ma', pain caximacon. Aca aca ja' ac camain na caximacon pain comi tocwam, mam' xic ac camain na pain tenenequem. Xic xic cawain' pin iri nain caximacon ne, xup ac camain na, ji'ao mi' ac camain na pain caji towaxi' ma' quem.

³⁹Querec iri nain i ma' fariseu co cao' pe ho' ne non ma' ne, Simão ma'. Querec iri nam caxicam narima' pain ca ji'ao mi' con pain caji towaxi' caximacon Jeju ma' ne, coromicat pan ac xucun na: Cain' cain' xira co cwa' ne ta? Mo xi iri' profeta ca, querec pin' ac cam xira narima' co quep non ma', querec pin' xiram pain ca caxicam narima' cama ma' na ca coromicat nucun.

⁴⁰Tomi' pan ac con na Jeju quem. Tomi' xim inem ta Simão non.

Tomi' ra taramaxicon co ca' na taxipa' capijacon Iri' Jam ac ca na.

⁴¹Pijim' joc mam' mi' xim cocon wari' co wajim' nonon pain dinheiro wari' pane ac con na. Xiram pa' xut, mi' xut pain dinheiro. Main mi' in hwet xut pum pain ac cocon na. Ma, mi' ac tococwa pain na dinheiro ca param caca ma'. Xucun ma', ma' 500 na denário ca cut ca ma'. Xucun ma' iri na ne, ma' 50 e' na denário ca cut ca ma' quem. ⁴²Aram aram maqui' ac ne na xec nein ca mi' in hwet xine pain dinheiro ca dever mahu' ta pan ca wari' co xiram pa' nonon pane. Ane om cocon dinheiro ne. Om nonon dinheiro ca mi' in hwet xun cocon. Je i ma' ira pan ac ca na co ma' co xiram pa' nonon pane. Hohot na pain ca om mi' in hwet mahu' pain dinheiro ca dever mahu' ma'. Xic am pin tain ca xirao' pe nein pata' ac ca na. Ac i ma' na ca pijim' joc mam' mi' con cocon wari' co dever nana dinheiro pane.

Je ca tomi' xim ca' Simão ac ca na Jeju. Ma' co tomi' querec te tamana ton non quem? Tomi' querec te toron co wijimain e' na dinheiro ca dever ca ra? Om ta tomi' querec te tiquin' ca' con co cote ne tamana pan na dinheiro ca dever ca ra? Ac i ma' na ca tomi' querec con ma'.

7.38 Cao' querec te wi iri nana oro judeu pane ne, om ca xao to ho' xucucun pain pana ca mam' xao pe wa. Cao' toco' to nanain caji tapit, cut piri' ac cacain na caximacocon pain waracocon. Je ca ha' cam narima' pain ca xat pe camain caximacon Jeju. **7.41** Denário ma', je i ma' dinheiro nucucun oro romano pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na denário pain ca taramaja nucun.

⁴³Tara, am co ma' co cote ne pan na dinheiro ca dever ca pane, am wirico ca co tomi' querec te tamana pan non ta ac ca na Simão.

Awi na ca tomi' nem ta ac con na Jeju.

⁴⁴Tucu in hwet ac cam na narima' ma', tomi' ac con na Simão ma' quem. Je ca pijim' joc mam' mi' xim cocon wari' co dever nanain dinheiro pane ta Simão ac con na. Querec mam cam cwa', pain carawa ca ara mi' capa' ca'. Corom paxi' inain xurum ca', ane om cam mi' mapa' pain com pain ca hohoc tain ta' caxima ca' ne. Cam cwa' iri na ne, ja' napa' pain caxima pain comi tocwam, xic cawain' pin ac camain na pain tenenequem.

⁴⁵Om ca xup mapa' pain orocoxu pain ca xo' corom qui' tain xurum ca'. Cam cwa' iri na ne, corom qui' iri inain xurum ne, xup xup ac camain na caxima. ⁴⁶Om ca ji'ao mi' mapa' pain wina pain homain winain oliva. Cam cwa' iri na ne, ji'ao mi' ac capa' na pain caxima pain caji towaxi' ca hu awi. ⁴⁷Je ca tomi' xim ca' ac con na. Mija paxi' na ca caracat nequem cam cwa'. Ane xic am pin xine ne. Je ca tomi' querec te tamana capa' ca'. Wari' co xic am pin xine pain wijimain ca caracat nucun ma' iri na ne, tomi' querec te wijimain e' napa' quem na ca tomi' con Simão.

⁴⁸Tomi' ac cam na Jeju: Xic am pin inain ca caracat nem ta nam.

⁴⁹Cain' cain' xira co cwa' ne ta ac xucucun na oro wari' co cao' to ho' nonon ma'. Ma' na ca xic am ac cain ca caracat wa ra xucucun.

⁵⁰Tomi' ac cam na narima' Jeju: To' witan ca' xima pain ca caracat nem ta, xi om ne ca howa ara mapa' ta. In mao ra. Ta toron mami' ne xumum me ta nam.

Oro narima' co quep xiho' nonon Jeju

8 Om ca pain homa ne, maji ta ac ca na Jeju, mao ac cain na oro xijein cidade, je pain oro ca paric to ne xirim ma' quem, pijim' mi' ac tococwa na pain capijacon Iri' Jam pain ca taramaxicon pe ho' toton cocon ma'. Ja' ja' nonon co taxipa' ca ma', co ma' 12 nana ma'. ²Ma' nana

7.46 Hwet iri xucucun pain xiricocon oro judeu pane ne, tomi' querec te taxipa' pan na waximain xirim, tomi' querec te taxipa' non wari' co hwet non pain xiricon. Cam mi' taxipa' non pain com pain ca hohoc rain caximam ta con. Xup taxipa' nain orocoxicon, ji'ao mi' taxipa' non pain winacon pain homain winain oliva ma' quem. Ac i ma' na ca an hwet mi' con pain ca tomi' querec te nucun. Simão ma' iri na ne, om ca ac i ma' con Jeju quem. Ac ca om tomi' querec te con na pain ca hwet con pain xiricon. Ac ca miri'om con na, ac ca noc con na quem.

oro narima' co ja' ja' nonon quem, co wara quep xio ca pane, pain ca tomi' jein pin cocon oro caxicon jam co corom to ho' nanam, wiricacam co wara quep xio pin ca pain ca caxi nequequem quem. Mo nana: Maria co Madalena na xijein wixicam ma', co ma' 7 nana oro caxicon jam co hwerehwet ca' nanam pane. ³Ma' na Joana ma', manacon Cuza ma', co querec wet taxipa' nain caramaxicon taramaxicon Herodes pain xiricon. Ma' na Susana, ma' mija nana xequequem narima' co ja' ja' nonon Jeju quem. Xiram pa' nonon pane, mi' mi' nonon pain oro carawa pane.

**Ca pijim' joc mam' mi' tococwa con wari' co
wixicaracao' nain tocwi trigo pain totacon**

Mateus 13.1-23; Marcos 4.1-25

⁴Mija nana wari' co hwet nonon Jeju pane. Om ca paric camain' caca. Maqui' nanain oro xijein cidade. Pijim' joc mam' mi' ac tococwa na con wari' co wixicaracao' nain tocwi trigo pain totacon. ⁵Wixicaracao' tain tocwi trigo pain tota ta ac ca na. Wixicaracao' wixicaracao', ma' ac ne na tocwi trigo ca camara' to nain cacarain wana. Xom pin ac xine na, itac pin ac nein na oro wijimain me quem. ⁶Ma' ac ne na tocwi trigo ca camara' to nain pacun quem. Orot pin iri na ne, cono' pin ac ne na, xi xo' camain' ne wijimain macan' pain pacun ta. ⁷Camara' to ac nein na pi wirain tocwi trigo ma' quem. Hwara' wi ac ne na, mo' pan ac nein na tocwi trigo pi quem. ⁸Oro wirain tocwi trigo ca camara' to nain macan' ca awi ma' iri na ne, hwara' pin ac ne na, mi xo' tamana ac ne na. Pain ca xica' pe ne arain ma', mi 100 na tocwi quem.

Tomi' ac tococwa na: Mo ta taraju pa' xixi' na hwe ma', je ta taraju wet qui' hwe ta tata.

⁹Tomi' querec ac cocon na Jeju co taxipa' ca ma': Para pijim' joc mam' mi' ma con wari' co wixicaracao' nain tocwi trigo pain totacon quem? Cain' ca tomi' mao ne ca pijim' nem quem na ca tomi' cocon ma'.

¹⁰Om na, wara coromicat xo' na Iri' Jam pane ac tococwa na. Main taramaxicon pe ho' toton oro wari' co howa nanapa' ta na, ac i ma' paxi' na ca coromicat xo' nucun pane. Ane om tomi' hwet tococwa pain oro wari' ne. Wahu' pain ca taxipa' mahu' ca', an hwet mi' nuhu' pain ca coromicat xo' nucun. Mi' nuhu' pain ca taraju pa' wa. Ane om ac i ma' ne cocon oro xucucun wari' co om howa nanapa' ne. Ca' na toton pain capijacon Iri'

Jam iri inonon ne, pijim' joc mam' mi' e' inonon pain oro ca pijim' wa.
Ma' ta hwet pin ne ca xirao' pe nucun profeta cara pane. Ca' na con pane:

Querec paxi' nana,
ane om querec pin' caca ne.
Taraju taraju paxi' nana,
ane om taraju pa' caca quem ne.

Ac i ma' na ca xirao' pe nucun profeta cara pane ta na ca tomi' tococwa ma'.

¹¹ Tomi' xo' ac tococwa na: Ca' na ca tomi' mao ne ca pijim' ne ca', pain ca pijim' joc mam' mi' xuhu' con wari' co wixicaracao' nain tocwi trigo pain totacon ma'. Tocwi trigo ma', tomi' joc mam' mi' nain capijacon Iri' Jam. ¹² Carawa ca ara nain tocwi ca camara' to nain cacarain wana ma', pain ca itac pin nein oro wijimain me ma', tomi' joc mam' mi' nain carawa ca ara nonon oro wari' co taraju paxi' nanain capijacon Iri' Jam. Maqui' na Caxicon Jam, cut ca' ac tococwa na pain capijacon Iri' Jam ca wixicaracao' mi' wa pain ximicocon. Ma' ta om howa hwein ta tata, ma' ta om to' witan ca' cuhu' pain ca caracat nuhu' Iri' Jam ta tata. ¹³ Carawa ca ara nain tocwi trigo ca camara' to nain pacun ma', tomi' joc mam' mi' nain carawa ca ara nonon oro wari' co tomi' querec te paxi' nanain capijacon Iri' Jam pain ca xo' taraju cacain ma'. Ane om tomi' querec te cara cacain ne. Tomi' joc mam' mi' nanain pana ca om corom mip caximain pain macan' ma', om ca corom mao nein ximicocon capijacon Iri' Jam. Howa howa ca' nanain, maqui' iri na carawa ca to' i'ina nonon ne, quep em' iri nonon oro wari' pain ca howa cacain capijacon Iri' Jam ma' ne, an to pin ac cacain na ca howa wa. ¹⁴ Carawa ca ara nain tocwi trigo ca camara' to nain pi ma', tomi' joc mam' mi' nain carawa ca ara nonon oro wari' co taraju paxi' nanain capijacon Iri' Jam. Pain pin iri na ne, ma' ac ne na oro ca to' i'ina nonon. Win ne tocwi trigo pain ca mo' nein pi ma', ac i ma' na ca to' i'ina tococwa ma'. Toron toron na ximicocon, coromicat ni ca' ac cacain na capijacon Iri' Jam, win xumu win xumu ac cacain na oro caramaji macan' je oro ca param ximama' nucucun ca mam' tomi' querec te caca ma' quem. Om ca horon tiquin' caca pain ca howa nucucun. ¹⁵ Carawa ca ara nain tocwi trigo ca camara' to nain macan' ca awi ma' iri na ne, tomi' joc mam' mi' nain carawa ca ara nonon oro wari' co taraju nanain capijacon Iri' Jam ma', co an to xo' nanain pain ximicocon ma' quem. Ac ca mi xo' caca na pain ca howa nucucun. Win ne tocwi trigo ca mi xo' ma'. Xumu xo'

nana, tomi' ha' nana quem. Querec pin' ac tococwa na pain ca howa cara nucucun ma' quem na ca tomi' xo' tococwa pain ca pijim' joc mam' mi' tococwa con wari' co wixicaracao' nain tocwi trigo pain totacon pane.

Ca pijim' joc mam' mi' tococwa pain naran

Marcos 4.21-25

¹⁶Noro jun wari' co tom nain naran ma' quem ac tococwa na. Om ca tatep pa' ca pain tapaxi'. Om ca an corom pe ca pain tequipain tapit quem, om na. Tom an hwet pe na pain maxinain, ma' ta toha mi' tococwa oro wari' co corom nanain xirim ta na. ¹⁷Je ca tomi' xuhu' ca' ac tococwa na. Oro ca pijim' ne ca', ca om taraju pa' hwe pain ca pijim' mi' xuhu' con Iri' Jam ca', ac ca joc xim xihwe pain paxi' na pain xocori ca'. Ame hwe e', main mi' turuhu' pain ca taraju pa' wa Iri' Jam. Oro ca pijim' ne ca om taraju pa' hwe pain xocori ca', main tomi' xo' turuhu' pain. ¹⁸Je ca tomi' ca' xuhu' ca': Taraju wet jein ca tomi' xuhu' ca'. Wari' co taraju wet ma', co taraju pa' xo' nain ca taraju nucun ma', mi' hwara' mami' ac tocwa tara pain ca taraju pa' wa. Wari' co om taraju wet ma' iri na ne, co om taraju pa' xo' nain ca taraju nucun ma', an ca' ac tocwa tara pain wijimain ca taraju pa' nucun ma' quem na ca tomi' tococwa ma'.

Ca tomi' xun Jeju ta cama jicon cocon xurucun

Mateus 12.46-50; Marcos 3.31-35

¹⁹Mo querec xun e' ac cama na jicon cocon xurucun. Hwet xun paxi' nonon, ane om wixicam ac cocon ne. Xi mija ara caca oro wari' co coco' coco' mam' nonon ta. ²⁰Hwet to nana xerem cam jim ta Jeju ac con na wari' ma'. Tomi' xim nenem ta na ca tomi' con ma'.

²¹Tomi' pan ac ca na Jeju: Oro wari' co howa nanain capijacon Iri' Jam ma', co tomi' ha' nanain quem, wiricacam co na' ta' ta, wiricacam co xere ta' quem na ca tomi' ca ma'.

Ca tomi' om pin cain camana' Jeju

Mateus 8.23-27; Marcos 4.35-41

²²Maqui' ac ne na xec pain ca tomi' ca' cocon co taxipa' ca Jeju ma': Maji pan horoho mama' xin xijein cacarain com cain e' ac ca na, piton to ac cacain na mam' horoho wa, pan horoho mama' ac caca na. ²³Pain ca pan horoho pan caca co taxipa' ca ma', pi'am ac ca na Jeju. Maqui' pa' ac cocon na camana' ca nuru mip tamana quem. Wap tamana na com ta. Moin' pin tain na mam' horoho nucucun com ira. Cono' pin xi' nana ira. ²⁴Ho' querec xun ta ac cocon na co taxipa' ca ma', ho' querec ac cocon na quem. Taramaxicon co ca' na taxipa' capijacon Iri' Jam! Cono' pin xi' urut ta Taramaxicon nuxut na ca merem cocon ma'.

Querec ac ca na, tequi' pe ac ca na, tomi' in pin ac cain na camana' pain ca wap tamana nein com ma'. Nuru nuru om pin ac ne na camana', wap wap om pin ac ne na com quem. Tacana pe tacana pe pi' pin ac ne na. ²⁵Para om howa mahu' quem ac tococwa na.

Jin' tamana nana ta. Wa wa nonon quem. Cain' cain' ca co cwa' ne ta? Tomi' ha' ximao non oro carawa ra? Tomi' mip iri nain hotowa pain com ne, tomi' ha' ac con na quem na ca tomi' xucucun.

Ca quep xio pin tocwa wari' co corom pe ho' non caxicon jam

Mateus 8.28-34; Marcos 5.1-20

²⁶Pan horoho pan horoho hwet ac cacain na macaracocon oro wari' nein Gerasa ma', ca pe nain xijein cacarain cote ne com ma'. Pe in qui' na macarain Galileia, pe in mao ac ne na macaracocon oro wari' nein Gerasa. ²⁷⁻²⁸Piri' mao iri na Jeju ne, hwet qui' ac ca na wari' co corom to ho' nonon oro caxicon jam. Win ma' ne paxi' nonon oro wari' nein cidade ma', ane pe ximao pan ca ne. Wara pain na ca om pe mami' ca wom. Om ca pe cain xirim, pe taxipa' nain oro manain pacun ca cut corom to tococwa co cono' nana ma'. Querec iri non Jeju ne, merem ac ca na, xut cam' ac con na, pe torotop mi' ac con na pain caximacon. Merem mip na. Cain' cain' xim mapa' quem Jeju Panxica Iri' Jam co Iri' Taramaxicon pan? Ta quep em' mapa' me ta, tomi' mip inem ta na ca merem mip com ma'. ²⁹Xi wara tomi' mip ara con caxicon jam Jeju ta. Hwet ca' jun co cwa' ta, ac i ma' na ca tomi' mip con caxicon jam nucun. Mija ara xi' na ca quep mip

ho' quep mip ho' con caxicon jam nucun ta. Oro wari' ma', quep xun paxi' nonon, pao' pe paxi' nonon pain oro arain too ma', pain caximacon pain micon ma'. Ane cuc tapiripit cain ne. An mao an mao ac con na caxicon jam nucun pain ca om pe ca wari' ma'.

³⁰ Tomi' querec pan ac con na Jeju: Cain' cain' ne wuxum quem non.

Om na, Legião napa' wuxu ta ac ca na. Ac i ma' na ca wuxu mao ca, xi om ne ca mija ara caca oro caxicon jam co corom to ho' nonon ta. ³¹ Jain jain nana caxicon jam nucun ma', pain ca tomi' mip cocon Jeju ma'. Ta tomi' hwerehwet mama' maparut pain cote ne man ca om tawirinain cain, ca quep em' pe toton caparut Iri' Jam ta nonon.

³² Cao' to nain i ma' caji mijac ma'. Mija na caji mijac. Iritocwinain ta. Cao' to nain ca tamaja ne macan'. Jain jain ac caca na oro caxicon jam co corom to ho' nonon wari' ma'. Mama' jein caji mijac ma' xut me. Ma' ta corom hwet urut pain ta na ca tomi' mip cocon Jeju.

Mama' jein ta ac tococwa na. ³³ Hwerehwet ca' ac cocon na, corom hwet ac cacain na caji mijac ma'. Tamanain to pin ac ne na, jein quiji' mama' ac nein na ca tamaja ne macan' ma', jein jein, wara ca' na com ma', pan corom mama' ac ne na, cono' cono' pi' pin ac ne na quem.

³⁴ Caram ma' co querec wet nanain caji mijac ma', querec iri nanain caji mijac pain ca cono' cono' pi' pin ne ne, jein mama' ac caca na, tomi' hwet ac cocon na oro wari' co to nanain cidade, wiricoco oro co to nanain oro xitot ma' quem. Tomi' hwet nonon pain oro carawa ca ara ne ma'. ³⁵ Maji querec xi' e' ac caca na. Jein hwet iri nonon Jeju ne, querec ac cocon na co awi pin ma', xi om ne ca tomi' jein pin ara tococwa oro caxicon jam nucun ma'. Xao pe ho' nain caximacon Jeju. Pe pin na wom. Tamanain tamanain om pin na. Jin' pin ac caca na. ³⁶ Caram ma' co querec nanain ca ara ca Jeju ma', pain ca quep xio pin con co corom to ho' nonon caxicon jam ira, tomi' hwet ac cocon pain na co xo' maqui' nana ma'. ³⁷ Taraju iri nana oro wari' ne, jain jain ac caca na, mao ra, paca' rain macaraxut ca' ac cocon na Jeju. Tomi' mip ac i ma' nonon, xi om ne ca jin' tamana ara caca ta.

Na ra ac ca na Jeju, maji in mama' xi' e' ac ca na, piton to ac cacain na mam' horoho wa, horoho in mama' ac cacain na xijein cacarain cain.

8.30 Ca Legião wa ma', ma' na ca tomi' mao nein. Ca mija urut ta na ca tomi' mao nein. Ac i ma' na ca o' ma' cocon oro wari' ma', xi om ne ca mija ara caca oro caxicon jam co corom to ho' nonon ta.

³⁸Wari' co awi pin ma', xi om ne ca tomi' jein pin ara tococwa oro caxicon jam nucun ma', jain jain na, hwet xim ta paxi' non Jeju ma', ane tomi' in pin pan tocwa ne. ³⁹Om na, in mao rain xurum, tomi' hwet roron oro wari' nem ma'. Tomi' hwet roron pain oro ca ara mi' quem Iri' Jam ca', pain ca quep xio pin quem ca' na ca tomi' con ma'.

In mao ac ca na, tomi' hwet tomi' hwet pi' pin ac tococwa na oro wari' co to nanain cidade. Xiram pa' napa' Jeju ta, quep xio pin napa' ta na ca tomi' tococwa ma'.

Ca quep xio pin cam narima' Jeju, je pain ca to' e' mami' cam pije' quem

Mateus 9.18-26; Marcos 5.21-43

⁴⁰Pan horoho in mama' ac cacain na xijein cacarain com Jeju cocon co taxipa' ca ma'. Piri' mama' iri nana ne, mija nana wari' co winim' nonon. Tomi' querec te nonon quem. ⁴¹Maqui' ac ca na wari' co querec wet nonon oro win judeu ca pain xirim ca cut in to xucucun ma'. Jairo na wixicon. Xut hwet ac con na Jeju, pe torotop mi' ac con na pain caximacon. Tomi' ac con na, jain jain na pain ca tomi' mip con ma'. Hap ra, ja' ja' ne pain xuru me non. ⁴²Hap ra non Jeju, xi caxi ara cama panxica ta. Xica' pe na panxica, om na xerequem. Ac ca ma' 12 ne na cawaxi' nequem. Mi' pin ta' na ira. Je ca ja' ja' ne pain xuru con Jeju ma'. Ma ac ca na, hwet ac con na quem.

Mija nana wari' co ja' ja' nonon pain wana ma'. Xao xao tamana nonon. ⁴³Pe nain i ma' narima' co ao tamana ma' quem. Ma' 12 na cawaxi' pain ca ao tamana cama. Pi' ca' paxi' nam dinheiro pain ca pagar cocon oro doutor ma', ane om aramao xio taxi' cacam ne. ⁴⁴Hwet ac con na Jeju pain waracon, quep ac camain na cacaracon womicon. Ane ane ao ximao ao ximao om pin ac cama na ta.

⁴⁵Ma' co quep napa' quem ac ca na Jeju.

Om ina, om ca quep xim ta nana oro wari' ma', tomi' ac i ma' tomi' ac i ma' pi' pin nana. Je ca tomi' pan con Pedro ma': Cain' cain' xima quem Taramaxicon co ca' na taxipa' capijacon Iri' Jam? Mija nana wari' co xao xao nenem cwa' non.

⁴⁶Om na, ma' na wari' co quep napa'. Taxi' xije pain ca mam' to' xio pin ton wari' pain ca hwara' opa ne ta na.

⁴⁷Taxi' pin iri xequem narima' ma' ne, pain ca om joc xa ac con Jeju pain ca quep camain cacaracon womicon ma', jin' ac cama na, cocoroc na pain ca jin' nequem. Xut hwet ac con na, pe torotop mi' ac con na pain caximacon. Om na, wata' co quep nain cacaracon womum. Ma' ta xio ta' pum inem ira. Quep pin iri inon womum ne, xio hap pin ac ta' na ta, ac i ma' na ca tomi' hwet con ma'. Taraju taraju pi' pin nanam oro wari' pain ca tomi' hwet con ma'.

⁴⁸Tomi' ac cam na Jeju: Xio pin ma ta arain, xi om ne ca howa ara mapa' pain ca quep xio taxi' ta' ca' nam. In mao ra. Ta toron mami' ne xumum me ta na ca tomi' cam ma'.

⁴⁹Tomi' tomi' wet nam narima' ma', maqui' ac ca na wari', maqui' nain xiricon Jairo ma', co querec wet nonon oro win judeu ca pain xirim ca cut in to xucucun ma'. Mi' pin na panxima ta ac con na. Ta hap ra mami' mon Taramaxicon co ca' na taxipa' capijacon Iri' Jam me ta non.

⁵⁰Taraju na Jeju ma'. Tomi' ac con na Jairo: Ta jin' ma me ta. Howa e' ne pain ca quep xio taxi' tam ca'. Xio pin ac cama tara ta non.

⁵¹Hwet pin iri nanain xiricon Jairo ne, corom xi' e' ac tococwa na co taxipa' ca ma', wirico Pedro con João con Tiago ma'. Wirico cote cama pije', wiricam jicam ma' quem, corom hwet xim e' ac cacam na quem. Narain ho' tata pain ca corom wa oro xucucun wari' co ja' ja' nonon ma'.
⁵²Awaran tamana nana oro wari' co to nanain i ma'. Ta awaran hwe me ta ac tococwa na. Om ca mi' pin cama. Pi'am e' na, ac i ma' na ca tomi' tococwa ma'.

⁵³Tatam' tatam' pi' pin ac cocon na, tomi' ximama' nonon quem. Xi taxi' ara cacam pain ca mi' pin cama ta. ⁵⁴Ane quep cam pain micam ne. Tomi' ac ca na: Tequi' pe ra ta pije' na ca tomi' cam ma'. ⁵⁵E' mami' ac cama na, tequi' pe hap ac cama na. Mi' jem pain carawa ca cao' wa ta ac tacacama na quem. ⁵⁶Wa wa na cote ca cam jicam ma'. Ane tomi' tacacama ne: Ta tomi' hwet huhun pain oro wari' me ta, ta tomi' hwet huhun pain ca to' e' mami' tam ta tata.

Ca tomi' xo' tococwa oro apóstolo pain ca taramaja xi' nucucun

Mateus 10.1-15; Marcos 6.7-13

9 Tomi' cut in ac tococwa na co taxipa' ca ma', co ma' 12 nana ma'. Mi' inuhu' pain ca tomi' jein pin huhun oro caxicon jam, je pain ca quep

xio pin huhun oro wari' co caxi nana ta ac tococwa na. ²Pijim' mi' jujun pain ca taramaxicon pe ho' toton cocon oro wari' Iri' Jam ta. Quep xio pin jujun co caxi nana quem ac tococwa na. ³Tomi' xo' mam' ac tococwa na. Ta cut hwein oro caramajuhu' me. Pana ca mam' pan xu wa ma', je caji coco ca mam' cut wa carawa ma', je carawa ca cao' wa ma', je dinheiro ma', ta cut hwein me ta. Ta cut tocwan hun wom quem me. ⁴Mo ta hwet hun wari' pain xiricon ma', mo ta pi'am to ho' xine pain xuru ca' cuhu' ma', to ho' ac hun tara. Om ta paca' hun, mon to wet mon to wet maqui' pa' ac cuhu' tara xec pain ca hwet xun huhun xucucun wari' pain xijein cidade. ⁵Mo ta om tomi' querec te cucuhu' oro wari' pain ca hwet huhun pain cidade nucucun ma', wap camara' ac hwein tara ximirinain macaracocon pain caximahu' pain ca paca' xun huhun ma'. Ma' ta querec pin' xujuhu' pain ca pan teretem nuhu' pain ca noc hwein ca taraju wa ca pijim' nuxut ca' ac huhun tara. Ac i ma' na ca tomi' xo' tococwa pane.

⁶Mama' ac caca na, hwet ac cocon na oro wari' co to nanain oro ca paric to ne xirim ma', pijim' mi' ac cocon na pain ca taramaxicon pe ho' xim capari' Iri' Jam, quep xio quep xio ac cocon na co caxi nana ma' quem.

⁷Taramaxicon Herodes ma', taraju ac cain na ca tomi' nucucun oro wari' pain ca tomi' hwet cacain oro ca ara ca Jeju. I'ina ac ne na ximicon. Cain' cain' xira con ne na, xi ma' ara caca wari' co tomi' ca' nana ma': Om na, wari' co taraju hwe ma', wirico João cara pane, e' mami' tara João cara pane ta nana. ⁸Tomi' ca' nana oro xucucun ma' quem: Om na, wirico Elias cara pane, am wirico co in qui' nain macan' ca' nana. Oro xucucun ma' iri nana ne, om na, xucun profeta tara, wirico tara co e' mami' pain xocori ca' quem nana. ⁹Ane cain' cain' xira quem ca Herodes ne. Ton tapit pin jein winacon João ta inonon oro wari' ne pane. Co cwa' quem, co taraju ta' pain ca ara cain oro ca om ara taxi' ne ca wari' wa ca', cain' ca wari' ca quem na ca tomi' querec pan xucun ma'. Querec xiton na ina ta na quem.

Ca tomi' hwara' pin cain capam' con hwam Jeju

Mateus 14.13-21; Marcos 6.30-44; João 6.1-15

¹⁰In hwet iri nonon Jeju oro apóstolo ma' ne, tomi' hwet ac cocon na pain oro ca ara caca ma'. Harahap je ta ac tococwa na, mama' ac cacain na Betsaida ma', je i ma' wixinain cidade ca mama' caca ma'. Mama' xica' to nana, om na wari' co ja' ja' nonon. ¹¹Ane taxi' pin cocon oro wari' ne.

Maji cocon ta ac caca na, ja' ja' ac cocon na quem. Hwet iri nonon ne, tomi' querec te pan ac tococwa na. Tomi' hwet ac tococwa na con Iri' Jam pain ca taramaxicon pe ho' xim capari' ca'. Quep xio pin ac tococwa na co caxi nana ma' quem.

¹² Corom mao pin iri na xina ne, mo tomi' xun Jeju ta ac caca na co taxipa' ca ma', xuruxut hwet ac cocon na. Mama' je ximomon oro wari' cwa' ac cocon na. Ma' ta mama' cacain oro xitot, je pain oro ca paric to ne xirim ma'. Mam' ac cacain tara carawa ca cao' wa, mam' ac cacain tara ca pi'am to wa quem. Om ara xi' na wari' pain i ca', om nain i ca' xirim ca cut pe xine carawa ca cao' wa quem na ca tomi' cocon ma'.

¹³ Om na, mi' pan jujun pain carawa ca cao' wa ta ac tococwa na.

Cain' cain' xuxut quem ac cocon na. Ma' 5 e' naparut wijimain capam' ca', ma' 2 e' naparut hwam cwa' quem. Mo cut mi' pan jujun pain carawa ca cao' wa oro wari' cwa' maparut ra? Ac i ma' na ca tomi' cocon ma'.
¹⁴ (Ac ca ma' 5.000 caca na ca tarama' nucucun co to nanain i ma'.)

Om na, xao to ni xao to ni xam' je ta jujun oro wari' ta ac tococwa na. Ma' 50 ma' 50 xam' tatara pain ca xao to wi xujuhu' ta jujun quem tata. ¹⁵ Ara ac cacain na co taxipa' ca ma', xao to xao to pi' pin ac caca na oro wari'. ¹⁶ Cut ac cain na capam' ca ma' 5 ma', wirico hwam co ma' 2 ma' quem. Cut iri nain ne, noro pawin ac ca na, tomi' ac con na Iri' Jam. Tomi' querec te urut pum pain ca mi' maparut pain capam' con hwam cwa' quem Te non, jicaracat ac cain na, cut mi' ac tococwa pain na co taxipa' ca ma'. Maxiram' mi' jujun pain oro wari' ta ac tococwa na. ¹⁷ Cao' cao' xam' ac caca na. Ma'am ca' nanain, ma'am ma'am pi' pin nana. Pan cut xin pawirinain ta ac caca na co taxipa' ca ma', cut ho' cut ho' ac cacain na pain coco. Moin' 12 na cotain cocon.

Ca tomi' hwet pin cain iri' wixicon Jeju Pedro

Mateus 16.13-20; Marcos 8.27-9.1

¹⁸ Maqui' ac ne na xec nein ca tomi' con Cote ca Jeju ma'. Xica' pe na, ma' e' nana co taxipa' ca co to ho' nonon ma'. Om nonon xucun wari'. Tomi' querec ac tococwa na: Om ta cain' ca wari' ca ne cacapa' oro wari' ra? Cain' ca coromicat mi' cacapa' pain ca Iri' Wari' ta' ca' quem na ca tomi' tococwa ma'.

¹⁹Om na, ma' nana co João co ja' taxipa' com cara pane xi' ma nenem ac cocon na. Ma' nana oro xucucun co profeta Elias cara pane xi' ma nenem. Oro xucucun ma' iri nana ne, om na, xucun profeta cara pane xi' ma nenem, wirico tara co e' mami' ta nenem ta na ca tomi' cocon ma'.

²⁰Wahu' quem? Cain' ca coromicat mi' pan mahu' ma' quem ac tococwa na.

Wum co Cristo ta ac con na Pedro.

²¹Tomi' mip ac tococwa na: Ta tomi' hwet mahu' cocon oro wari' pain xocori ca' me, ta tomi' hwet huhun pain ca Cristo ta' ca' me tata.

²²Tomi' ac tococwa na: Na e' na pain ca jain jain tamana ta' ta' ca'. Wata' pain ca Iri' Wari' ta' ca', jain jain tamana ta'. Noc tatarapa' oro taramaxicon nexi' pain ca judeu iri' ca'. Noc tatarapa' oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma' quem. To' pa' pin tatarapa' quem. Ma' 3 pin iri tarapa' xec pain ca mi' pin ne ne, e' mami' ac ta' tara ta na ca tomi' tococwa ma'.

²³Tomi' tomi' pi' pin ac tococwa na oro wari'. Wari' co ja' ja' xim napa' ma', miri'om ac cain tara ca param nucun. Miri'om tarain ca param nucun pain oro xijein xec. Om ta xiram pa' camain' cain curucun pain ca jin' cain ca mi' pin wa. Ac ca an tiquin' pan cain tara panaxicon ca mam' tatatain mi' xun tocwa ma'. Ja' ja' ac capa' tara ta. ²⁴Xi e' cara pe tain cain pawin wari' co win xumu e' nain ca param pan nucun pain macan' ta. Wari' co miri'om nain ca param pan nucun pain macan' ca' iri na ne, pain ca win xumu e' capa' ma', wirico tara co e' cara pe tain nain pawin ta. ²⁵Je ca tomi' xuhu' ca' ac tococwa na. Mo ta ma' ma' xam' capari' oro carawa pain macan' ca', mo ta miri'om xin ca e' cara wa pain pawin cain, mo ta mama' xin cote ne xe quem. Ma' na ca quep xiho' ac capari' oro caramaji macan' ca cut iri' pain ca e' e' wet nexi' ra? Om ca quep xiho' capari' ta. ²⁶Mo ta ma' ca wari' co wixipa' napa' ma', pain ca noc capa' pain ca wari' ne ton ca', pain ca noc cain ca tomi' ne ca' quem, to' wixipa' ac capa' tara pain ca Iri' Wari' ta' ca'. To' wixipa' tarapa' pain ca mam' maqui' tain ca hwara' opa ne, je pain ca mam' maqui' tain ca hwara' opa nucun Te cocon oro jam co taramaja mi' nonon ta. ²⁷Wahu' pain ca to ho' mahu' ca', ma' tatara co querec pin' xun nonon Iri' Jam pain ca taramaxicon pe ho' xim cuhu'

ta. Om ta cono' querec caca, wara querec tatarain ca taramaxicon hwara' opa nucun, ame hwe e'. Tomi' iri'o' inuhu' ta na ca tomi' tococwa ma'.

Ca jimao pin ne tocon Jeju

Mateus 17.1-13; Marcos 9.2-13

²⁸Om ca pain homa ne, ac ca ma' 8 pin ne na xec pain ca wara tomi' xo' tococwa co taxipa' ca pain ca mi' pin ta' nucun ma', tomi' ton Iri' Jam ta ac ca na. Maji ta ac con na Pedro con João con Tiago ma', piri' mama' ac cacain na pacun. ²⁹Tomi' ac con na Iri' Jam, tomi' tomi', jimao pin ac ne na tocon. Towo' tamana pin ac ca na womicon quem. Toc meremem na, an xiho' non comerem pain ca coc wein ca pain pawin ma'. ³⁰Hwrehwet qui' ac caca na wari' ma', pijim' ac cocon na Jeju. Wirico Moisés con Elias cara pane. ³¹Toc meremem nana quem. Tomi' tomi' nonon Jeju pain ca mi' pin ta' nucun, je pain ca hwet pin ta' ne ca param nucun Cote ca pain ca mi' pin pe tain cain Jerusalém ma'.

³²Pi'am mip na Pedro cocon win ma' ca ma'. Mamiram pin iri nana ne, querec ac cocon na Jeju ma', pain ca toc meremem ca ma'. Querec nonon caram ma' co coco' to ho' nonon ma' quem, Moisés con Elias ma'. ³³In mama' xi' iri nana ne, tomi' ac con na Jeju Pedro. Awi na pain ca to xin i ca' quem Taramaxicon co ca' na taxipa' capijacon Iri' Jam. Quep 3 xut pain wijimain xirim. Mene rain wirain. Mene tarain wirain Moisés ma'. Mene tarain wirain Elias ma' quem na ca tomi' nucun. (Tomi' ximao na Pedro, xi coromicat xo' ca ta.)

³⁴Tomi' tomi' wet na Pedro ma', hwet qui' ac ne na tajain nanawin, tatep pa' ac tococwa na quem. Tatep pa' iri tata ne, jin' pin ac caca na. ³⁵Taraju ac cacain na ca tomi' wa ma', ca maqui' nain nanawin ma'. Mon cwa' Panxita' co tora' ta' cwa'. Taraju wet jun ta na ca tomi' nucun. ³⁶Tomi' ac i ma' iri na Iri' Jam ne, ma' xica' pe pin ac ca na Jeju. Co taxipa' ca ma', pain ca querec cacain i ma' con Jeju con Moisés con Elias ma', om ca ji'am pin cacain. Tama' coromicat e' nanain. Om ca tomi' hwet cocon pain oro wari'.

9.27 Pain ca tomi' cain i ma' Jeju ma', ac ca tomi' tococwa na pain ca querec jimao pin ta' ne tocon pain cote ne pacun ma', pain ca hwet pa' xun cocon Elias con Moisés ma', pain ca mon cwa' Panxita' co om noc camain' ta' cwa' ton con Cote ca quem. Noro jein Lucas 9.28-36.

Ca quep xio pin con pije' co pa' taxipa' tamanain

Mateus 17.14-23; Marcos 9.14-32

³⁷Xec pin iri na ne, quiji' ca' ac cacain na pacun ma'. Mija nana oro wari' co xuruxut cam' nonon ma'. Om ca paric camain' caca. ³⁸Merem mip ac ca na wari' co xat pe ho' nonon oro wari' ma'. Quep xiho' ne con panxita' cwa' Taramaxicon co ca' na taxipa' capiiacon Iri' Jam ac ca na. Xica' pe napa' panxita' cwa', om napa' xucun. ³⁹Corom pe ho' non caxicon jam. Quep mip ho' quep mip ho' non, ane ane u ac ca na, pa' ac con na tamanain, toroto ac ne na morocacon pain capiiacon. Om ca an pe hap con. Quep xirac to' jam' pin iri non ne, aram aram an pe wijimain ac con na quem. ⁴⁰Tomi' mo pin jun caxicon jam nucun paxi' inonon co taxipa' ma cwa'. Ane om ha' cocon ne na ca tomi' con ma'.

⁴¹Wa inuhu' me ac ca na Jeju. Wahu' pain ca wari' nuhu' pain oro xec nexi' ca', om ca howa camain' mahu'. Caracat tamana hwe ta. Pain pin paxi' na ca pe ho' xuhu' ca'. Je xi howa mahu' quem? Cain' cain' xita' quem? Ha' tara pain ca winim' cara xuhu' pain ca howa xim mahu' ra? Je i ma' ira, an qui' ron panxima ta ac con na cote ca.

⁴²Pain ca hwet ton ca pije' ma', xin mi' non pain macan' caxicon jam nucun. Pa' ac con na tamanain. Ane tomi' in pin pan con caxicon jam Jeju ne. Hwet ca' ron ta non, quep xio pin ac con na pije' ma'. Mon cwa' panxima cwa' ta ac con na cote ca quem. ⁴³Wa wa wa wa pi' pin ac caca na oro wari' pain ca querec pin' cacain ca hwará' opa tamana nucun Iri' Jam.

Wa wa wa wa pi' pin nonon Jeju pain ca querec cacain oro ca ara ca ma' quem. Je ca tomi' ca' tococwa co taxipa' ca ma': ⁴⁴Taraju wet xine pain ca tomi' xim xuhu' ca' tata. Iri' Wari' paxi' ina. Ane ma' ca wari' co tomi' mi' xim napa' cocon oro co noc nanapa' ne. O mi' ac cacapa' tara cocon oro co to' pa' pin xun nanapa' ma', ac i ma' paxi' na ca tomi' tococwa ma'. ⁴⁵Ane om taraju pa' cacain ca tomi' nucun ne. Cain' cain' xira con ne? Para tomi' ac i ma' capari' pain ca mi' pin ta' nucun quem na ca tomi' xucucun. Joc xim ara xi' tata pain ca tomi' mao nein ca tomi' nucun ma'. Wirico Iri' Jam co joc xim pan nonon pain. Je ca om taraju pa' caca ma'. Hehe nana pain ca tomi' querec cocon pain ca tomi' nucun.

Wari' co hwara' opa tiquin' ca' nonon oro win ma' ca ma'

Mateus 18.1-5; Marcos 9.33-41

⁴⁶ Tomi' caracan ac xucucun na co taxipa' ca ma'. Wata' co hwara' opa tiquin' ca' nuhu' ta xucucun. Om na, wata' ta, hwara' opa tiquin' ca' inuhu' ta ac ca na xucun. Wata' pan ta ac ca na xucun ma' quem. ⁴⁷ Jeju ma', taxi' nain ca coromicat nucucun ma'. Je ca hap ra con pije' co pe nain i ma'. Hap ra non, an xat ac con na pain quiricon. ⁴⁸ Noro jun pije' cwa', co om hwara' opa cwa' ac tococwa na co taxipa' ca ma'. Wari' co tomi' querec te non pain ca om hwara' opa nucun ca', coromicat ca' iri na ne: Tomi' querec te inem, xi om ne ca howa ara ton Jeju ma', mo ta coromicat ac i ma' ca pain ca tomi' querec te inem con ma', ac ca tomi' querec te capa' na. Tomi' querec te iri napa' ne, tomi' querec te non co cwain co hwet roron oro wari' napa' ma' quem na ca tomi' tococwa ma'. Je ca tomi' xuhu' ca' ac tococwa na. Wari' co om xec xec ma' pahu', co om hwara' opa pan ina ta pahu', wirico tara co hwara' opa pan pahu' ta na ca tomi' tococwa ma'.

⁴⁹ Tomi' ac con na Jeju João: Taramaxicon co ca' na taxipa' capijacon Iri' Jam. Querec urut con wari' co tomi' jein pin nonon oro caxicon jam. Wirico Jeju co tomi' jein pin roron ta napa' cocon ta na. Tomi' in pin paxi' urut con, xi win ma' ne capari' ta na ca tomi' con ma'.

⁵⁰ Ta tomi' in pin hun me ta ac tococwa na. Xi quep xiho' ara capari' wari' co om ari napari' ta na ca tomi' tococwa ma'.

Ca noc urut pum ta cocon Jeju oro wari' nein Samaria

⁵¹ Wixicam pin iri na oro xec nein ca in mao tain cain pawin Jeju ne, tomi' pan ac ca na: Maji ta. Na e' na pain ca mao tain Jerusalém ta na, mama' ac caca na. ⁵² Ma' nana co taxipa' ca co wara mama' je ca quem. Tomi' xo' jujun pain ca maqui' ta' pa'ao' ta' ca' ac tococwa na. Mama' ac caca na, tan' mama' ac cacain na ca paric to ne xirim pain Samaria. Noro ac cacain na xirim ca pi'am to xi' caca, noro nanain carawa ca cao' xi' caca ma' quem. ⁵³ Ane noc cocon Jeju oro wari' co to nanain i ma' ne. Noc urut con Jeju pain ca pi'am pe ho' caparut ta nana. Xi querec pin' ara cocon pain ca mao tain cain Jerusalém ta.

⁵⁴ Taraju iri na Tiago con João ne pain ca noc urut con Jeju pain ca pi'am pe ho' caparut ca' caca ma', tomi' querec ac cocon na Jeju: To'

camara' qui' jein pain pawin xe maparut ra? Ac i ma' tara ca to' parapa' pin jujun maparut ra nonon.

⁵⁵ Ane tucu in hwet pan cocon Jeju ne. Tomi' in pin ac cocon na. Je xi querec pin' hwein Tamataracon Iri' Jam ca xiram pa' jujun oro wari' ta nuhu' ma'? Xi maqui' ta' pain ca to' parapa' pin toton ta' oro wari' cwa' ta. Wata' pain ca Iri' Wari' ta' ca', maqui' ina, ma' ta to' witan toton oro wari' ta ina na ca tomi' tococwa pain ca tomi' in pin tococwa ma'. ⁵⁶ Xuruxut mama' ac cacain na xijein ca paric to ne xirim quem.

Oro wari' co ja' ja' xun paxi' nonon Jeju

Mateus 8.18-22

⁵⁷ Xuruxut mama' ac caca na. Pain ca xuruxut xuruxut wet caca ma', tomi' pan ac con na Jeju wari' ma'. Ja' ja' cara xim pain oro ca mao ta' ma ma' na ca tomi' con ma'.

⁵⁸ Tomi' ac con na Jeju: Noro rain oro carawa pain mi ma'. Ma' ma' xam' nain ca pi'am to nein. Noro rain oro me ma' quem. Ma' ma' xam' nain xirinain quem. Wata' iri na ne, pain ca Iri' Wari' ta' ca', om napa' xirim ca pe xo' ta' ca' na ca tomi' con ma'.

⁵⁹ Ma' ac ca na xucun co ja' ja' ne pan ca Jeju. Ane hehe ca ne. Ame ma e' Taramaxicon ne. In hwet cain' ton te ta. Mi' pin iri tara ne, an corom pe pin iri tain curucun pain manain pacun ne, ja' ja' ac xim tara. Ma ma? Ac i ma' na ca tomi' con ma'.

⁶⁰ Om na ta ac con na Jeju. Oro win ma' ma co om howa nanapa' ma', co an xiho' nonon co cono' nana ma', wiricoco pan tatara co cut corom to pan nonon co cono' nana ta. Wum iri na ne, hwet roron oro wari' ta. Pijim' hwet roron pain ca taramaxicon pe ho' toton cocon Iri' Jam ta na ca tomi' con ma'.

⁶¹ Ma' ac ca na xucun co tomi' ca' non Jeju: Ja' ja' xim paxi' inem ta Taramaxicon ne. Ane na e' ne pain ca in hwet cain' ton te cam na' cacam xere ne. Mao ina, ja' ja' ton Jeju ta tatam pum. Ma ma? Ac i ma' na ca tomi' con ma'.

9.58 Tomi' mi' iri non pain ca om napa' xirim ca pe xo' ta' ca' con Jeju ma', tomi' xo' ac i ca' paxi' non: Mo ta ja' ja' mapa', om terem xirim ca pe xo' ma. Win ne ca om pan capa' xirim ca pe xo' ta' ca' quem, ac i ma' paxi' na ca tomi' xo' con ma'.

⁶²Om na ta ac con na Jeju. Noro ron wari' co tota ma' ac con na Jeju. Mo ta tota ta' ca, mo ta an pe an pe cain ca taramaja nucun pain ca noro in cain waracon quem, om ca taramaja xo' ac ca. Ac i ma' na con wari' co ja' ja' xim paxi' napa' ma', co in hwet nain waracon ma' quem. Om ca taramaja xo' ac ca pain ca pijim' hwet cocon pain capijacon Iri' Jam oro wari' pain ca taramaxicon pe ho' toton cocon ma' quem na ca tomi' con Jeju ma'.

Ca ma' 72 caca co pijim' mama' jein pira ca Jeju

10 Om ca pain homa ne, tomi' xo' ac tococwa na oro xucucun co taxipa' ca ma'. Wirico Taramaxicon nexi' co tomi' xo' nonon. Ma' 72 nana co tomi' xo' ca ma': Main mao tain oro xijein cidade cain, mao tain oro ca to pan caca oro wari' ma' quem ac tococwa na. Wara mama' 2 mama' 2 xam' je, maqui' ta' pa'ao' ac tococwa na. ²Tomi' xo' mam' ac tococwa na: Noro jujun oro wari' cwa'. Taraju xin paxi' nanain capijacon Iri' Jam. An xiho' paxi' nanain cote ne trigo ca paca' pin ma'. Ane ma' paric ca' e' caca wari' co cat xin nanain ne, je pain ca pijim' mi' xun cocon pain capijacon Iri' Jam. Je ca tomi' xuhu' ca' ac tococwa na. Tomi' jun Iri' Jam co ac waximain xitot ma'. Tomi' ca' jun: Ma' paric ca' e' ara xi' nana wari' co pijim' xin nanain capijam. Tomi' roron oro wari' nem co taramaja mi' nenem ma', pijim' mi' jujun pain capija oro wari' ta roron. Ac ca taramaja mama' cacain totam ma' tara, ac ca cat cacain cote ne trigo ma' tara pain ca pijim' cacain capijam ta, ac i ma' tara ca tomi' hun Iri' Jam ta. ³Mama' ho' je. Pijim' mi' jujun pain capija oro wari' ta. Pain ca hwet jujun ta xuhu' ca', ac ca hwet jujun ca mija caca orotapan ta xuhu' na, xi awi caca ta. Ac oro wijimain ovelha huhun quem, xi narain ho' taxi' xujuhu' cocon ta. ⁴Ta cut hwein dinheiro me, ta cut hwein caji coco ca mam' cut wa carawa quem me. Ta cut tocwan hwein caji caxim quem me. Xuruxut cam' iri jujun oro wari' pain ca xuruxut hwein wana ma' ne, ta momon coco' hwe pain ca pijim' ximama' xujuhu' me.

⁵Hwet iri jun wari' pain xiricon ne, tomi' ca' cain' jun: Param urut con Iri' Jam pain ca mi' cuhu' pain ca om toron ne xumuhu', je pain ca mi' cuhu' pain oro ca awi wa ta, ac i ma' tara ca tomi' hun. ⁶Mo ta tomi' querec te cuhu' pain ca tomi' ac i ma' hun ma', mi' ac tococwa tara pain ca om toron ne ximicocon, mi' ac tococwa tara pain oro ca awi wa quem.

Mo ta om tomi' querec te cuhu', om ta mi' tococwa pain ca om toron ne ximicocon, om ta mi' tococwa pain oro ca awi wa quem. ⁷Mo ta tomi' querec te cuhu', pi'am to ho' ac hun tara. Ta pi'am to pi'am to hwein xiricocon oro win ma' ca quem, pi'am to ho' cara e' jun pain xiricon. Mo ta cao' xi' cuhu', mo ta toc xi' cuhu' quem, cao' ac hwein tara carawa ca mi' cuhu', toc ac hwein tara oro ca toc je cuhu' ma' quem. Win ca wari' co taramaja ma', na e' na pain ca pagar tocwa pain ca taramaja nucun. Je ca hohot ne pain ca quep xiho' xihwe pain ca pijim' hwein capijacon Iri' Jam ma' quem.

⁸Je ca tomi' xuhu' ca' ac tococwa na. Mo ta hwet huhun oro wari' pain cidade nucucun ma', mo ta tomi' querec te cucuhu', cao' ac hwein tara oro carawa ca cao' je cucuhu'. ⁹Mo ta ma' caca oro win ma' caca co caxi nana, quep xio pin ac huhun tara. Tomi' ca' jujun quem: Wixicam pin na xec nein ca taramaxicon pe ho' xim cuhu' Iri' Jam ta jujun. ¹⁰Ane om ac i ma' ne pain cidade pain ca om tomi' querec te cucuhu' oro wari' nein ma'. Mo ta om tomi' querec te cucuhu', mama' ac hwein tara oro wanaji cidade nucucun, tomi' ac huhun tara: ¹¹Maho' urut pahu'. Wap camara' urut pain ximirinain macarahu' ca quep caparut pain caximaxut ca' pahu'. Ma' ta querec pin' xujuhu' pain ca pan teretem nuhu' pain ca noc hwein ca taraju wa ca pijim' nuxut ca' jujun. Tomi' ca' jujun quem: Mam' pe wet jein ca tomi' urut pahu' ca'. Wixicam pin na xec nein ca taramaxicon pe ho' toton oro wari' Iri' Jam ta jujun. ¹²Je ca tomi' xuhu' ca' ac tococwa na. Maqui' iri tara xec nein ca wap toton cocon oro wari' Iri' Jam pain ca caracat nucucun ne, wap tamana ac cocon tara caram ma' co to nanain cidade ma', co om tomi' querec te nunuhu' pain ca pijim' nuhu' ma'. Wap paxi' toton oro wari' nein Sodoma co caracat tamana nana pain cara pane. Ane wap tamana pan toton cocon oro wari' co to nanain i ma' ta na ca tomi' tococwa ma'.

¹³Tomi' ac tococwa na oro wari' co to nanain oro cidade ma': Wa inuhu' me oro wari' co to nanain Corazim ma'! Wa inuhu' me oro wari' co to nanain Betsaida ma' quem! Ximin hwe. Wap tamana turuhu' Iri' Jam ta. An hwet mi' paxi' inuhu' pain ca hwara' opa ne ca', querec paxi' mahu' pain ca ara tain oro ca om ara taxi' ne ca wari' wa ca'. Ane om cwirin' je ha' hwe ne. Mo xi an hwet mi' ac i ma' toton pain ca hwara' opa ne oro caracat co to nanain Tiro je Sidom pain cara pane, wara cwirin' pin xirara, wara to xiroron caxicon wom, wara maxoc pa' ac xucucun xira

pain topacon pain winacocon pain ca an hwet pe cacain ca cwirin' pin cacain ca pan teretem nucucun pane quem, ac i ma' paxi' xirara pane. ¹⁴Wap toton iri toton oro caracat Iri' Jam ne, wap tamana pan ac cuhu' tara quem. Wap pije' toton oro caracat co to nanain Tiro je Sidom pain cara pane. Wahu' iri na ne, pain ca to hwein Corazim je Betsaida ma', wap tamana ac cuhu' tara. ¹⁵Wahu' quem oro wari' co to nanain Cafarnaum ma'. Xec xec a xihwe! Awi urut, querec pin' taraparut pain ca awi nuxut xi' ma hun Iri' Jam ra? Om na ta! Wixicaracao' mi' turuhu' pain cote ne xe ta na ca tomi' tococwa ma'.

¹⁶Tomi' ac tococwa na co taxipa' ca ma', co pijim' mama' jein pira ca ma'. Wari' co taraju wet nuhu' pain ca pijim' hun ma', taraju wet napa' quem. Wari' co noc nuhu' pain ca pijim' nuhu' ma', noc napa' quem. Wari' co noc napa' ma', noc non co cwain co hwet ron oro wari' napa' quem na ca tomi' tococwa ma'.

¹⁷Co taxipa' ca ma', co ma' 72 nana ma', pijim' mama' ac cacain na pira. Pain pain, aram aram in qui' ac caca na. Tomi' querec te tamana nana. Tomi' hwet ac cocon na Jeju: An hwet iri urut pain wuxum ne, ha' ac caparut na pain ca ara urut pain oro ca om ara taxi' ne ca wari' wa Taramaxicon nuxut. Tomi' ha' nanaparut oro caxicon jam quem nonon.

¹⁸Tomi' ac tococwa na: Taxi' inon Caxicon Jam ma', co taramaxicon pe ho' nonon oro caxicon jam ma'. Querec inon pain ca pan' qui' hap cain pawin pane. Ac comerem pain ca coc wein ca pain pawin na, ac i ma' na ca pan' qui' hap ca pane. ¹⁹Je ca tomi' xuhu' ca' ac tococwa na. Mi' inuhu' pain ca hwara' opa tiquin' ca' hwein oro carawa ca to' ara xim nuhu' ma'. Mo ta ac ca xom hun ne em' con cun ma', om ta to' ara cuhu'. Hwara' opa paxi' turuhu' Caxicon Jam ma' quem, ane ha' xim cuhu' pain ca to' quiji' pin hun ne. Om ta ha' camain' ne pain ca to' ara xihwe ta. ²⁰Ane tomi' xim xuhu' pain i ca' ne: Ta tomi' querec te e' hwe pain ca tomi' ha' cucuhu' oro caxicon jam pain ca tomi' jein pin huhun ma' me. Tomi' querec te pan e' je pain ca xirao' to xine wuxuhu' pain pawin cain na ca tomi' tococwa ma'.

²¹Tomi' querec te pan ac ca na Jeju. Je Tamataracon Iri' Jam ca ja' tomi' querec te non ma'. Tomi' ac ca na: Tomi' querec te inem ta Te. Wum co Taramaxicon pe nain pawin je macan' ca'. Tomi' querec te inem pain ca tora' momon oro wari' co om xec xec nana cwa', co an xihonon oro hwijima' pain ca om xec xec nucucun ca'. An hwet mi' momon pain oro

ca joc xim ma cocon oro wari' co taxi' urut xi' ma nana ma'. Je ca param nem ma' quem Te. Hohot nem pain ca an hwet mi' momon pain ta na ca tomi' con Iri' Jam.

²²Wirico Te co mi' napa' pain ca hwara' opa tiquin' ca' toton oro wari' ta ac tococwa na. Mi' napa' pain ca querec pin' tain oro ca coromicat nucun quem. Oro ca param nucun, oro ca ara nucun quem, taxi' taxi' pi' pin inain con. Querec pin' napa' pain ca Panxita' capa' ca' quem. Om na xucun wari' co querec pin' nain oro ca coromicat ne. Xica' pe na Te co querec pin' nain oro ca coromicat ne. Wata' iri na ne, pain ca Te ton ca', querec pin' inon quem. Oro wari' co an hwet mi' ta' con, querec pin' nonon quem na ca tomi' tococwa ma'.

²³Tucu in hwet ac tococwa na co taxipa' ca ma', tomi' ac tococwa na. Xica' to nana, om nonon xucun wari'. Param mi' nuhu' pain ca awi wa Iri' Jam ma', xi querec ara hwein oro ca ara ta' ca'. ²⁴Je ca tomi' xuhu' ca' ac tococwa na. Mija nana oro profeta cocon oro taramaxicon cara pane, co querec xixin na nanain oro ca querec hwe pain xocori ca'. Ane om querec cacain ne. Mija nana co taraju xixin na nanain oro ca taraju hwe pain xocori ca'. Ane om taraju cacain ne na ca tomi' tococwa ma'.

Wari' nein Samaria co xiram pa' non wari' co to' wa pain wana

²⁵Om ca pain homa ne, maqui' ac ca na wari' co tomi' xo' taxi' nain oro ca xirao' nucun Moisés. Tomi' querec ton Jeju ta na. Am pijim' xo' ca, am om pijim' xo' ca, ac i ma' na ca coromicat nucun. Tomi' querec ac con na: Taramaxicon co ca' na taxipa' capijacon Iri' Jam ac con na. Cain' cain' xita' quem? Param inain ca e' cara pe ho' ton Iri' Jam ta non.

²⁶Cain' ca xirao' ca Moisés cara pane quem ac con na Jeju. Om ca taraju pa' main quem? Tomi' hwet ne pain ca taraju pa' nem quem na ca tomi' con ma'.

²⁷Om na, xirao' ca' na pane ac ca na.

Ta noc hun Iri' Jam co Taramaxicon ne hwe me ta.

Na e' na pain ca tomi' querec te mip hun pain iri' xumuhu'.

Jain jain jun pain ca tomi' querec te mip hun ta.

An hwet pe jein ca om noc hun pain oro ca ara hwe ma' quem.

Ta coromicat ni ca' hun me ta

napari'. Xirao' ca' na quem:

Ta noc huhun oro win ma' nuhu' me ta.

Win ne ca om noc pan xujuhu' ma' quem.

Ac i ma' napari' ta non.

²⁸ Awi na ca tomi' nem ta ac con na Jeju. Mo ta tomi' ha' main ca xirao' nucun Moisés ca tomi' ma ne, e' cara ac ma tara ta non.

²⁹ Ac ca taraju pa' ta' ca' tara me na co ma' co tomi' querec non Jeju ma'. Je ca tomi' querec tiquin' con ma' quem: Ma' wari' co win ma' ne ta' quem non.

³⁰ Om na, taraju wet ne pain ca pijim' joc mam' mi' xim con wari' co judeu ma', co mao tain nain Jericó ma' ac ca na Jeju. Pe nain Jerusalém, mao tain Jericó ac ca na, xut mao ac cain na wana. Xut cam' ac tococwa na oro co cut noc xa xin nanain caramaxicon. Horohot ca' nonon con womicon, to' to' ac cocon na, jein mama' ac caca na quem. Ximin na, mi' pin ta' na ira. ³¹ Om om, maqui' ac ca na sacerdote ma', co tom tain' taxipa' carawa pain cote ne xiricon Iri' Jam. Judeu na. Ac nain wana ca terem' pe ca wari' ma'. Querec iri non pain ca terem' pe cain i ma' ne, xut tiquin' ca' ac con na pain xijein cacarain wana. ³² Ac i ma' na xucun co judeu ma' quem. Levita na. Hwet pin iri nain ca terem' pe ca wari' ma' ne, querec iri non ne, xut tiquin' ca' ac con na pain xijein cacarain wana ma' quem. ³³ Aram aram maqui' ac cain wana na wari' nein Samaria. Hwet pin ac con na co terem' pe nain i ma'. Querec iri non ne, xiram pa' ac con na. ³⁴ Xut hwet ac con na, aramao ton ta ac na, an ac cain na comi uva je homain winain oliva, ji'ao mi' ac con pain na pain oro nonacon. Wiric pa' ac con na con wom. Wara ca' na burro nucun ma', an piri' pe ac con pain na, an mao ac con na pain xirim ca pi'am to caca oro wari' co maqui' nanain pira. Querec wet pe ac con na pain i cain. ³⁵ Xec pin iri na ne, cut mi' 2 ac con na pain denário waximain xirim ma'. Querec wet ron pa'ao' ac con na. Mo ta om ha' ne ca 2 nein denário con pain ca cut tain main

10.32 Taramaja to nanain cote ne xiricon Iri' Jam oro levita pane. Quep xihó' nonon oro sacerdote. Iri' hwanana ne nonon Levi panxica Jacó cara pane. Je ca oro levita tococwa ma'. **10.33** Oro wari' nein Samaria pane, judeu paxi' nana hwanana nucucun pain cara pane, ane cut cacam tatirim co om howa nonon Iri' Jam ne. Aram aram howa ni pin ac caca na. Camara' iri nana mana panxicaca cocon waram winacocon ne, howa ximama' ac caca na quem. Oro judeu co howa howa wet nonon Iri' Jam ma', noc nonon oro wari' nein Samaria. Caxicon wari' hwe ta nonon. Xi an xihó' maparut pain ca howa xo' nuxut ta nonon.

oro ca mam' querec wet mon ma', pagar ac xim pain tara pain ca aram aram in qui' ta' ne. Ac i ma' na ca tomi' con waximain xirim.

³⁶ Tomi' ac ca na Jeju, tomi' non co tomi' xo' taxi' nain oro ca xirao' nucun Moisés ma': Je ca tomi' xim ca'. Ma' 3 nana wari' co querec nonon co to' caca oro co an noc xa nanain caramaxicon. Mon co iri' win ma' ne non quem? Cain' cain' ne ca coromicat nem cocon quem na ca tomi' querec con ma'.

³⁷ Co ma' co xiram pa' non ma', wirico co iri' win ma' ne non ta ac ca na.

Je i ma' ira ac con na Jeju. Ara ac i ma' ra, win ca ne ron ta na ca tomi' con ma'.

Ca mao cain xiricacam Marta cam Maria Jeju

³⁸ Xuruxut mama' ac caca na Jeju cocon co taxipa' ca ma'. Xuruxut xuruxut tan' mama' ac cacain na ca paric to ne xirim ma'. Ma' na narima' co cao' pe ho' xut pain xuruxut ca' nonon ma'. Marta na wixicam.

³⁹ Ma' na coxa' cama quem. Maria na wixicam. Taraju wet xiton na non Jeju pain ca ca' na cacam pain capijacon Iri' Jam. Je ca xao pe ho' con pain caximacon. ⁴⁰ Marta ma' iri na ne, toron na ximicam pain ca taramaja taramaja cama ma', pain ca hoc camain carawa ca cao' wa. Aram aram hwet ac con na Jeju, tomi' ac con na: Taramaxicon ne. Xica' pe ina pain ca taramaja ta' ca', pain ca hoc tain carawa ca cao' xi' iri' ca'. Hohot nem pain ca om quep xiho' capa' xa' cwa' ra? Tomi' ram me. Quep xiho' ram cove ma ta ram me na ca tomi' con Jeju Marta ma'.

⁴¹ Marta Marta ac cam na Taramaxicon nexi'. Toron tamana na xumum pain oro carawa ca ara ma ma'. ⁴² Ane ma' xica' pe ne carawa ca ara ra xim ca' ne. Na e' na pain ca taraju wet mapa' pain ca ca' na tain capijacon Iri' Jam ta. Je ca param cama coxa' ma cwa', taraju wet napa' pain ca ca' na tain capijacon Iri' Jam. Carawa ca param cama ca', pain ca taraju wet capa' ca', awi tiquin' ca' nain carawa ca ara pan ma ma' quem, pain ca hoc main carawa ca cao' xi' iri' ma'. Om ta tomi' in pin tam pain na ca tomi' cam ma'.

Ca tomi' xun Iri' Jam

Mateus 6.5-15; Mateus 7.7-12

11 Maqui' ac ne na xec pain ca tomi' pe ton Te pain i cain ta ca Jeju. Tomi' tomi' ac con na. Pi' pin iri na ca tomi' con ne, tomi' pan ac con na co taxipa' ca ma'. Taramaxicon nuxut ac con na. Ca' na xut pain ca tomi' xut con Iri' Jam me. Win ca João cara pane, pain ca ca' na tococwa pain ca tomi' wa Iri' Jam co taxipa' ca pane na ca tomi' con ma'.

²Tomi' ac tococwa na: Tomi' xun iri jun ne, tomi' ca' jun:

Coturur Iri' Jam.

Param urut pum pain ca querec pin' querec pin' pi' pin quem
oro wari' pain ca awi tamana nem pain ca Iri' Jam nem.

Param urut pum pain ca maqui' hap ne xec nein ca taramaxicon
pe ho' taramaxicon pe ho' pi' pin momon oro
wari' pain macan' ca' quem.

³Mi' xut pain carawa ca cao' wa pain oro xijein xec quem.

⁴Xic am pin rain ca caracat nuxut ca' quem.

Xi mana' mana' om pin ara urut cocon oro wari' pain ca caracat
nucucun pain ca ara cup cacaparut ta.

Tomi' xo' urut cocon, om ca mana' mami' urut cocon.

Narain ho' xut pain ca tomi' querec caparut Caxicon Jam quem.

Ac i ma' je pain ca tomi' xun hun Iri' Jam ta na ca tomi' tococwa ma'.

⁵Je ca tomi' xuhu' ca' ac tococwa na. Am ma' ca win ma' nuhu' co param nain carawa. Am hwet con win ma' ca pain xiricon. Hwet non pain ximijain xim. Xiram pa' ne me win ma' ne. Mi' 3 ne pain capam' me ac con na. ⁶Xi maqui' ara cain pira win ma' ne ta. Om om napa' carawa ca cao' ra ton quem, am ac i ma' ne ca tomi' con win ma' ca co corom pe nain xiricon ma'.

⁷Cain' xi tomi' con quem? Ca' xiron? Om na, to' i'ina maho' ne e'. Wara tao' pa' inain manain xuru ca'. Terem' wi ina cocon mana panxita' cwa' quem. Om ca tequi' pe ac ta' pum, om ca mi' ac xim pain carawa ca mi' ne mapa' ma', ac i ma' xiron ra? ⁸Om na, je ca tomi' xuhu' ca' ac tococwa na. Tequi' pe tara, mi' ac con tara pain capam'. Om paxi' na ca xiram pa' mi' con pain ca win ma' ne con ma', om na. Xiram pa' mi' pan non pain ca tomi' cara con pain ca mi' ne mi' ne con ma'. Je ca tequi' pe ca ma', mi' ac con na pain oro carawa ca mi' ne ca ma'.

⁹ Je ca tomi' xuhu' ca' ac tococwa na. Tama' mi' ne jun pain carawa ca param hwe Iri' Jam. Mi' ac cuhu' pain tara. Tama' pirao' jein carawa ca param hwe con. Mam' ac hwein con tara. Tama' tomi' jun pain ca quep xiho' xut ta hun ma' quem. Ac ca tataca hwein tara pana ca mam' tao' pa' nein manain xiricon ma', ac ca pa xat mi' cuhu' pain tara. Quep xiho' ac cuhu' tara quem. ¹⁰ Xi taraju wet ara tococwa oro wari' co mi' ne nonon pain carawa ta. Oro co tama' mi' ne nonon pain carawa ma', mi' mi' xam' ac tococwa pain tara. Oro co tama' pirao' nanain carawa ca param caca con, mam' ac cacain con tara. Oro co tama' tomi' nonon pain ca quep xiho' xut me cocon ma', co ac ca tama' tataca tataca cacain na manain xiricon ma', ac ca pa xat mi' tococwa pain tara man quem, quep xiho' ac tococwa tara quem.

¹¹ Wahu' pain ca wanxi' hwe ma', mo xi mi' ne con hwam cucuhu' mana panxihwe ma', cain' cain' xihwe quem? Mi' xuxun con em' hwe ra? Om na. ¹² Mo xi mi' ne con araxicun me cucuhu', cain' cain' xihwe quem? Mi' xuxun con cun hwe ra? Om na quem. ¹³ Je ca tomi' xuhu' ca' ac tococwa na. Wahu' pain ca wari' hwe ma', caracat paxi' hwe, ane ma' ne xumuhu' ne. Xiram pa' taxi' huhun mana panxihwe pain ca mi' e' huhun pain carawa ca awi. Cain' cain' ca Cotere' co pe pawin cain quem? Om ta xiram pa' tamana pan ca quem? Om ta mi' cocon pain Tamataracon oro wari' co mi' ne nonon pain ra? Mi' pan totoron pain ta na ca tomi' tococwa ma'.

Ca tomi' napat cocon Jeju pain ca wirico Caxicon Jam co mi' nem pain ca hwara' opa nem ta cocon pane

Mateus 12.22-32; Marcos 3.20-30

¹⁴ Jeju ma', tomi' mo pin non caxicon jam co to' om pin nain capijacon wari' ma', pain ca corom pe ho' con ma'. Hwet ca' iri non ne, tomi' pin ac ca na co om capijacon ira. Wa wa pin ac caca na oro wari' ma' quem. ¹⁵ Ane ma' caca co tomi' ca' nana ne: Om na, wirico Belzebu con, co taramaxicon nucucun oro caxicon jam ma', wirico co mi' non pain ca hwara' opa nucun. Wirico co mi' non pain ca tomi' jein pin cocon oro caxicon jam ta nonon. ¹⁶ Ma' nana oro xucucun co mam' pe wet ca' nonon quem: Am iri'o' ca, am om iri'o' ca quem nonon. Je ca tomi' ca' cocon quem: Ara rain oro ca to' querec pin' naparut pain ca pe ho' quem ca hwara' opa nucun Iri' Jam ta nonon.

¹⁷ Ane taxi' pan cocon Jeju ne. Wara taxi' nonon pain ca coromicat ac i ma' nucucun. Tomi' ac tococwa na: Noro jujun oro wari' co to ho' paxi' xucucun pain macaracocon ma'. Mo ta mana' caracan xucucun. To' quiji' pin ac xucucun na, om pin ac caca na quem. Ac i ma' nana oro wari' co nari xucucun ma' quem. Nari paxi' xucucun, xica' pe paxi' na xiricocon. Mo ta mana' caracan xucucun, noc pin ac xucucun na, to ho' to ho' om pin ac xucucun na quem. ¹⁸ Ac i ma' na con Caxicon Jam cocon oro win caxicon jam ca ma' quem. Mo xi mana' caracan xucucun, ma' xira ca hwara' opa cara ac caca quem ra? Om na. To' om pin ac xucucun xira pain ca hwara' opa nucucun. Tomi' ac i ma' inuhu', xi om ne ca tomi' em' ca' ara mahu' ta: Wirico Belzebu ma', co taramaxicon nucucun oro caxicon jam ma', wirico co mi' nem pain ca tomi' jein pin momon oro caxicon jam ta, ac i ma' na ca tomi' em' mahu' ma'. ¹⁹ Tomi' ximama' ca' mahu': Wirico Belzebu co mi' nem pain ca hwara' opa wa, je ca ha' quem, pain ca tomi' jein pin momon oro caxicon jam ta mahu'. Cain' cain' caca oro win ma' nuhu' ma' quem? Ma' co mi' nonon pain ca hwara' opa wa quem? Para ha' cocon pain ca tomi' jein pin cocon oro caxicon jam ma' quem? Je ca tomi' xuhu' ca', tomi' ximama' hwe ta pan nunuhu' oro win ma' nuhu' pain ca tomi' ac i ma' mahu' ta. ²⁰ Ane mi' pan capa' pain ca hwara' opa wa Iri' Jam ne. Je ca ha' capa' pain ca tomi' jein pin toton oro caxicon jam cwa'. Je ca to' querec pin' pan cuhu' pain ca maqui' pin ne xec nein ca taramaxicon pe ho' pin cuhu' Iri' Jam ta na ca tomi' tococwa ma'.

²¹ Je ca tomi' xuhu' ca' ac tococwa na. Wari' co hwara' opa ma', co mam' nain ho' nain xiricon pain cote ne quit je pana ma', mo ta nain ho' xo' cain xiricon cocon oro wari' ma', om ta cut noc xa ac xine caramaxicon. ²² Mo ta maqui' ca xucun wari' co hwara' opa tiquin' ca' non ma'. Mo ta to' quiji' pin con, horohot ca' ac con tara pain oro ca mam' tac caho' xucun ca howa paxi' ca ma', cut ca' ac con tara pain oro caramaxicon ma' quem, cut mi' tiquin' ac tococwa tara pain oro win ma' ca ma' quem ta nonon.

11.22 Tomi' ac i ma' iri na Jeju ne, pain ca tomi' mi' con wari' co hwara' opa pan ma', co to' quiji' pin non co ma' co nain ho' paxi' nain xiricon pain caramaxicon ma', ac ca tomi' ca' ca na: Hwara' opa paxi' na Caxicon Jam. Ane hwara' opa tiquin' ca' ton ne. Ha' napa' pain ca to' quiji' pin toton oro win caxicon jam ca co taramaja mi' nonon ma', ac je na ca tomi' nucun ma'.

²³Wari' co om xin ne nain ca tomi' ne ca', wirico co noc napa'. Wari' co om quep xiho' napa', wirico co to' i'ina napa' pain ca taramaja ne ta ac tococwa na.

²⁴Tomi' xun caxicon jam co corom pe ho' non wari' ma' ac tococwa na. Hwet ca' iri non ne, xut ximao e' ac cain na mahweri ca om pe ne com. Xao pe wa tain xumu paxi' na. Noro noro, om iri na ca mam' cain ca xao pe wa pe ne ximicon ne, in hwet ton wari' co wara corom pe ho' ta' cara pane ac xucun na. ²⁵In hwet iri non ne, tomi' querec te ac ca na. Awi na curucun co cwa' ta, ac xirim ca awi tamana, ac xirim ca ton ho' awi tequipain ta na co cwa' ta ac xucun na. ²⁶Hwet mao mami' ac ca na, o qui' 7 ac tococwa na oro win caxicon jam ca co om awi camain' nana ma'. Maji ta, corom to ho' xun co cwain co wara corom pe ho' ta' pane, corom to ho' pin ac cocon na. Pan tem paxi' na caxicon jam co o pan nonon oro win caxicon jam ca ma'. Ane pan teretem tamana pan caca co o qui' ca ma' ne. Ximin tamana pin ac ca na wari' pain ca corom to ho' cocon ma' quem. Ca ma' xica' pe qui' con caxicon jam pane, amon ximin pije' paxi' na ira. Pain ca ma' mija pin cocon ma' iri na ne, ximin tamana pin ac ca na quem na ca tomi' tococwa ma'.

²⁷Tomi' tomi' wet na Jeju, tomi' ac cama na narima' co pe ho' nonon oro wari' co taraju nonon ma': Iri' Jam ma', param mi' nam pain ca awi wa jim ta. Param mi' nam pain ca awi wa, xi om ne ca wijima ara quem pane ta. Mi' nem pain catat pane quem na ca tomi' cama ma'.

²⁸Om na, param mi' pan tata pain ca awi wa oro wari' co taraju nanain capijacon Iri' Jam ma', co tomi' ha' nonon ma' quem. Wiricoco co param mi' wawa pain ca awi wa ta ac tococwa na.

Ca an hwet pe rain ca hwara' opa nem cocon Jeju ma'

Mateus 12.38-42

²⁹Ca mija mija caca oro wari' co maqui' nana ma', ca mija mija caca ma', tomi' ac ca na Jeju: Wa inuhu' me ac tococwa na. Wahu' pain ca wari' nuhu' pain oro xec nexi' ca', caracat tamana hwe. Ara rain carawa ca to' querec pin' naparut pain ca pe ho' quem ca hwara' opa nucun Iri' Jam ma' mahu' ra? Om ta ara tain pahu'! Xica' pe tara Iri' Jam co ara tain nain. Ame hwe e', carawa ca ara ta' ca ca', an xiho' tarain carawa ca ara

non Jonas cara pane. ³⁰ Carawa ca ara non Jonas cara pane, pain ca to' witan ca' tocwa pain moji cote ne hwam pane, je ca to' querec pin' cocon oro wari' nein Nínive pane. Querec pin' nonon Jonas pain ca hwet roron oro wari' nein Nínive ta con Iri' Jam pane. Ac i ma' tarapa' carawa ca ara ton napa' quem, pain ca e' mami' ta' ta' quem. To' querec pin' ac xihwe tara pain ca wari' nuhu' pain oro xec nexi' ca', querec pin' ac mahu' tara pain ca hwet roron oro wari' pain macan' ta capa' Iri' Jam. ³¹ Ame hwe e'. Main maqui' tara xec nein ca wap xim cuhu' Iri' Jam pain ca wari' nuhu' pain oro xec nexi' ca'. Wap xim iri turuhu' pain oro ca caracat nuhu' ne, xat ja' pan ac cuhu' tara taramaxicon nein Sabá cara pane, tomi' em' ac cuhu' tara: Em' nana caram cwa' ta turuhu'. Tomi' ac i ma' tara, xi maqui' ara camain iri' pira pain ca taraju wet ton con Salomão co taxi' tamana pane. Je ca tomi' xuhu' quem: Je xi taraju wet qui' mahu' pain ca tomi' pan xuhu' pain xocori ca' quem? Xi taxi' tiquin' ca' ara ton Salomão cara pane. Taxi' tiquin' ca' ton ca' ira inuhu' ta na ca tomi' tococwa ma'. ³² Ac i ma' tuturu' oro wari' nein Nínive ma' quem. Main maqui' tara xec nein ca wap xim cuhu' pain ca wari' nuhu' ta napari' Iri' Jam pain oro xec nexi' ca'. Wap xim iri turuhu' pain oro ca caracat nuhu' ne, coco' ja' pan ac cucuhu' tara oro wari' nein Nínive cara pane. Tomi' em' ac cucuhu' tara: Em' nana caram cwa' ta tuturu'. Tomi' ac i ma' tatara, xi cwirin' pan ara caca pain ca hu qui' cocon Jonas pane. An to pin ac cacain na ca caracat nucucun pane. Je ca tomi' xuhu' quem: Je xi cwirin' qui' hwein ca hu pan xuhu' pain xocori ca' quem? Xi hwara' opa tiquin' ca' ara ton Jonas cara pane. Hwara' opa tiquin' ca' ton ca' ira inuhu' ta na ca tomi' tococwa ma'.

Ca pijim' joc mam' mi' cain naran Jeju

Mateus 5.15; Mateus 6.22-23

³³ Noro jun wari' co tom nain naran ma' ac tococwa na. Om ca joc xa cain, om ca narain ho' tococwa oro wari' pain ca querec cacain. Om ca tatep pa' ca pain tapaxi' quem, om na. Tom an hwet pe na pain maxinain, ma' ta toha mi' tococwa oro wari' co corom nanain xirim ta na. ³⁴ Ac naran

11.29 Noro xin Mateus 12.40. Tomi' mi' non Jonas cara pane, pain ca ma' 3 ne xec pain ca corom pe cain moji cote ne hwam pane. Ac i ma' ta' pain ca ma' 3 xim capa' xec pain ca corom pe tain manain pacun ta na Jeju quem. 11.31 Narima' na taramaxicon nein Sabá cara pane.

nein cwerexi' na tocoxi' quem ac tococwa na. Ac ca toha capari' na pain cwerexi', ac ca tom xuruxut iri' na pain ca toha capari' tocoxi'. Je ca tomi' xuhu' ca', tomi' inem pain ca toha xo' ne tucum ma'. Mo ta toha xo' quem tucum ma', toha toha pi' pin ac nein tara cwerem. Om iri na ca toha xo' quem ne, pe ac main na ca jitacat nein xim. ³⁵ Je ca tomi' xim ca': Ma' tara xumum me. Howa xo' iri main capijacon Iri' Jam ne, ac ca toha mi' quem na naran pain xumum. Mo ta howa xo' inain xi' ma paxi' ma pain ca om howa xo' main ma' quem, ac ca pe main xim na, ac ca om toha mi' quem na naran pain xumum. ³⁶ Je ca tomi' xim ca': Mo ta howa mapa' pain ca tomi' hwet xim pain capijacon Iri' Jam ca', mo ta om howa camain' main oro ca pijim' ximao wa ca an xiho' nain ca jitacat nein xim ma', ac ca pe main xec na, ac ca toha mi' quem na naran pain xumum ta na ca tomi' tococwa ma'.

Ca pan to' cain taraxicocon co ac ca iri'o' xi' ca' tara me nana

³⁷ Pi' pin iri na ca tomi' nucun Jeju ne, hap ra pan ac con na fariseu ma'. Hap ra, cao' pe ho' ne pain xuru ta non. Ma ac ca na, hwet ac con na, xao pe ho' ac con na pain pana ca mam' cao' to caca ma'. ³⁸ Querec non Jeju fariseu ma' quem, pain ca om hohoc xo' mam' cain micon pain ca cao' xi' caca ma'. He pan ac xucun na. Para om hohoc xo' mam' cain micon quem pan xucun.

³⁹ Tomi' ac con na Taramaxicon nexi': Wahu' ma', pain ca fariseu hwe ma', ac ca hohoc xo' paxi' hwein na too ca mam' cao' hwe ma', je ca mam' toc hwe ma' quem. Ac ca awi paxi' ne na xonein ma' pahu', ane mixem cara ne quimain ne. Ac i ma' pan hwe quem. Hohoc xo' paxi' hwein curuhu' ma', ane mixem cara ne xumuhu' ne. Param ximama' e' hwein oro caramaxicocon oro win ma' nuhu', pan teretem hwe quem. ⁴⁰ Om ca coromicat xo' hwe ta! Iri' Jam ma', co quep nain cwerexi' ca querec xine

11.34 Pain ca pijim' joc mam' mi' cain tocoxi' Jeju cwa', ac ca tomi' capari' na pain ca howa nexi' ca'. Mo ta xuruxut xo' iri' pain ca howa xun ca', ac ca querec pira iri' na, ac ca toha mi' capari' na naran pain ximixi'. Mo ta om xuruxut xo' iri', ac ca paxi' iri' na, ac ca om toha mi' capari' na naran pain ximixi', ac ca to xin xim na quem. **11.38** Je curucucun oro judeu pane. Ca' na ca coromicat nucucun: Mo ta quep xin carawa ca om hohot con Iri' Jam ma', em' pin ac iri' tara. Na e' na pain ca hohoc xo' xin mixi', ma' ta querec hohot mami' capari' Iri' Jam ta nana. Je ca hohoc xo' mam' taxipa' cacain micocon pain ca cao' xi' nucucun pane.

ca', om ca quep cain ximixi' pain ca coromicat nexi' ca om querec xine quem ra? Quep nain ta. ⁴¹ Je ca tomi' xuhu' ca': Param ximama' maho' jein oro caramaxicocon oro win ma' nuhu' ma', pan teretem maho' je quem. Xiram pa' pan jujun co ximin nana ma', xiram pa' jujun pain iri' xumuhu' ta. Querec hohot ac cuhu' tara Iri' Jam. Ac ca hohoc xo' xujuhu' tara con ta na ca tomi' con ma'.

⁴² Wa inuhu' me oro fariseu ac tococwa na. Ximin hwe ta. Wap tamana turuhu' Iri' Jam. Xi tomi' ha' hun ta. Mi' paxi' hun pain dízimo nuhu' ma', ane mi' e' hun pain dízimo nein oro wijimain carawa nuhu' ne, mi' e' hun pain dízimo nein oro wijimain mam' aramao mam' aramao hwein carawa ma', je hortelã pain arruda ma', je oro tan ca oin' ximama' hwe ma' quem. Mi' paxi' hun pain Iri' Jam ma', ane miri'om hwein iri' ca param nucun ne. Om ca xuruxut xo' hwe cocon oro win ma' nuhu'. Noc hun Iri' Jam quem. Awi paxi' na pain ca mi' hun pain iri' dízimo nuhu' ma', ane om na ne pain ca miri'om hwein oro wirain ca tomi' nucun pain ca tomi' ha' jein ca param ne ta cuhu', je pain ca xuruxut xo' je ta cuhu', je pain ca ta noc mahu' me ta cuhu' ne. Tomi' ha' xuhun quem.

⁴³ Wa inuhu' me oro fariseu ac tococwa na. Ximin hwe ta. Wap tamana turuhu' Iri' Jam. Xi param ara hwein ca xao to xo' wa cocon oro taramaxicon pain oro xirim ca cut in to xujuhu' ma'. Tomi' querec te xo' tatarapari' ta huhun oro wari' co xao to to nanain ximijain cidade quem.

⁴⁴ Wa inuhu' me. Ximin hwe ta. Wap tamana turuhu' Iri' Jam. Xi an xiho' ara hwein manain pacun ca om querec pin' xine pain ca cut corom to tococwa co cono' nana pain tequipain ta. Noro jujun wari' co xom mapi' nanain pacun ca corom pe ne cojicocon co cono' nana. Om ca taxi' xucucun pain ca to' em' pin xucucun pain na ca tomi' tococwa ma'.

⁴⁵ Cain' cain' xima quem Taramaxicon co ca' na taxipa' capijacon Iri' Jam ac con na wari' ma', co tomi' xo' taxi' nain oro ca xirao' nucun Moisés

11.42 Ac i ca' na wari' co mi' nain dízimo nein oro carawa ca cut ca ma'. Cut 100 iri nain oro carawa ne, mi' 10 ac con pain na Iri' Jam. Cut 10 iri nain oro carawa ne, mi' xica' pe ac con pain na quem. **11.44** Wari' co judeu pane, co xom nain pacun ca corom pe ne cojicon co mi' pin ma', em' pin ac ca na. Na e' na pain ca tacana pe ca. Om ca hwet ac tococwa oro win ma' ca, om ca corom mao ac cain xiricon Iri' Jam quem. Xijein semana pin iri na ne, hohot pin ac ne na pain ca hwet mami' xucucun, hohot pin ac ne na pain ca mao cain xiricon Iri' Jam. Pain Jerusalém pane, toto towo' taxipa' nanain xonein oro pacun ca cut corom to tococwa co cono' nana, ma' ta querec pin' pan cacain oro wari' pane, ma' ta om xom mapi' cacain quem nana.

ma'. Tomi' ac i ma' iri ma ne, om ca tomi' xirac e' momon oro fariseu ma'. Tomi' xirac maparut quem non.

⁴⁶Om na ta ac tococwa na. Wahu' pain ca tomi' xo' taxi' hwein oro ca xirao' nucun Moisés ma', wa inuhu' ta. Ximin hwe quem. Wap tamana turuhu' Iri' Jam ta. Xi om ne ca to' i'ina ara huhun oro wari' pain ca tama' tomi' ha' xut tomi' ha' xut paxi' huhun pain oro ca tomi' pan nuhu'. Ane om quep xiho' camain' huhun pain ca tomi' ha' wa ne na ca tomi' tococwa ma'.

⁴⁷Wa inuhu' me, ximin hwe ta. Wap tamana turuhu' Iri' Jam ta. Xi ara xo' taxipa' ara hwein oro manain pacun ca cut corom to tococwa oro profeta co to' parapa' caca oro hwanana nuhu' cara pane. ⁴⁸Je ca tomi' xuhu' ca' ac tococwa na. Ara xo' iri hwein ne, querec pin' ac xihwe na pain ca hohot napari' pain ca to' parapa' cocon oro profeta oro hwanana nexi' ta hwe ma'. Wiricoco oro hwanana nuhu' co to' parapa' nonon oro profeta pane, wahu' ac ne na co ara xo' nanain oro manain pacun ca corom to caca ma' quem. ⁴⁹Je ca tomi' ca Iri' Jam co taxi' tamana ma', tomi' pe ca' na pahu' pane: Mam' toton cocon oro profeta cocon oro apóstolo co tomi' hwet toton nonon pain capiija. Ma' ac caca tara co to' parapa' pin caca, ma' ac caca tara oro xucucun co ja' tequi' quep em' caca ma' quem, ac i ma' na ca tomi' pe ca Iri' Jam pahu' pane. ⁵⁰Je ca wap xim xihwe pain ca wari' nuhu' pain xocori ca' quem. Wahu' co em' nana ta turuhu' Iri' Jam, xi om ne ca an xiho' ara huhun oro hwanana nuhu' co to' parapa' pin nonon oro profeta pain cara pane, pain ca xo' quep qui' tain macan' pane turuhu'. ⁵¹Mija nana pane. Caim cara pane, to' pa' cain' non coxa' ca Abel cara pane, mao ac ne ma' na cocon oro hwanana nuhu', to' parapa' ho' to' parapa' ho' nonon co xuruxut xo' nana pane, aram aram to' pa' pin ac cocon na Zacarias cara pane, to' pa' pe nonon pain ca tao' caho' nein cote ne xiricon Iri' Jam pane. Pe in qui' na pana ca tom tain' pe xine carawa ma', pe in mao ac ne na xiricon Iri' Jam ma', ma' iri' ximijain, to' pa' pe ac cocon na Zacarias pane. Je ca tomi' xuhu' ca', tomi' iri'o' inuhu' ta ac tococwa na. Wap turuhu' Iri' Jam ta, wap turuhu' pain ca wari' nuhu' pain xocori ca'. Xi om ne ca pan teretem tamana ara caca oro hwanana nuhu' pane ta na ca tomi' tococwa pain ca pan to' cain taraxicocon.

⁵²Wa inuhu' me oro co tomi' xo' taxi' nanain oro ca xirao' nucun Moisés ac tococwa na. Ximin hwe ta. Wap tamana turuhu' Iri' Jam. Ma' paxi' nuhu' capiijacon Iri' Jam ca iri'o'. Ane om howa hwein ne. Narain ho' huhun

pain oro wari' quem. An xihó' hun wari' co pe ho' paxi' non mam' pa xine manain xirim ma', co om pa rain na ca ma' quem. Noc nain ca corom wa, narain ho' tata pain ca corom wa oro wari' co corom xi' nana ma' quem na ca tomi' tococwa ma'.

⁵³Hwet mao iri na Jeju ne, tomi' xirac tamana ac cocon na oro fariseu cocon oro co ca' na taxipa' nanain ca xirao' nucun Moisés. Mija na ca tomi' querec ho' tomi' querec ho' cocon quem. ⁵⁴Ja' noro nonon, tomi' querec ximama' ac cocon na quem. Mo ta tomi' pan tem ca, tomi' em' ac xun tara cocon oro taramaxicon ta nana, ac i ma' paxi' nonon pane.

Ca hu tococwa cocon oro fariseu co ac ca iri'o' xi' ca' tara me nana ma'

12 Ac i ma' ac i ma' nana, ma' mija ac caca na oro wari' co cut in nana ma'. Mija nana, om ca paric camain' caca. Pain ca wixicam xun Jeju ta caca ma', xao xao ac xucucun na, xom mapi' xucucun pain caximacocon quem. Tomi' ta' e' ac ca na Jeju, tomi' cain' tata co taxipa' ca ma': Ma' tara xumuhu' me ac tococwa na. Ta an xihó' huhun oro fariseu pain ca ac ca iri'o' xi' ca' tara me caca ma'. An xihó' ara xi' nanain ca to' memerem nein capam' ma', pain ca to' ara cocon oro wari' pain ca mixein nucun. ²Wari' co mixein ma', pain ca ac ca iri'o' ta' ca' tara me ca ma', joc xim paxi' nain ca mixein nucun pain xocori ca'. Ame hwe e', main maqui' tara xec nein ca querec pin' pin xun tocwa pain ca mixein nucun. Om ta joc xim mami' ac cain, querec pin' ac tocwa tara pain ca mixein nucun. ³Je ca tomi' xuhu' ca' quem: Oro ca tomi' noc xa hwe pain xuruhu' ma', pain ximijain xim ma', tomi' hwet tomi' hwet pi' pin ac tococwa tara oro wari' pain tocon xina. Taraju taraju pi' pin ac cacain tara quem tata.

⁴Je ca tomi' xuhu' ca' oro win ma' ne ac tococwa na. Ta jin' huhun oro wari' co to' parapa' taxi' nanain ca cwere wa me. Quep em' taxi' paxi' nanain ca cwere wa, ane om to' parapa' taxi' cacain ca tamatara wa ne. ⁵Taraju wet xine pain ca tomi' xuhu' ca': Jin' pan jun Iri' Jam co to' pa' taxi' nain ca cwere wa, xin pin taxi' ac cain na ca tamatara wa pain cote ne xe quem. Wirico pan tara co jin' je xuhu' ca' inuhu', tomi' iri'o' inuhu' ta.

⁶Noro jein wijimain me ma' ac tococwa na. Om ca hwara' ne dinheiro nein. Mo ta cut 5 xin irin, ma' 2 e' tara wijimain dinheiro nein ca pagar je capari' waximain. Xi iri' carawa ne ta. Ane om miri'om camain' cain Iri' Jam ne. Mam' pe wet cara nain. ⁷Ac i ma' nuhu' quem, mam' pe wet

cara nuhu', taxi' pi' pin nain oro coxumuhu', taxi' nain tununuhu' pain ca mija nein quem. Querec wet nuhu'. Win ne ca querec wet cain wijimain me ma'. Ane awi tiquin' ca' hwein ca mija nein wijimain me con ne. Je ca tomi' xuhu' ca': Ta jin' huhun oro wari' co quep em' xim nunuhu' ma' me ta na ca tomi' tococwa ma'.

⁸Tomi' xim inuhu' pain i ca' quem ac tococwa na. Wari' co tomi' hwet nonon oro win ma' ca pata' pain ca Taramaxicon ne inon Jeju ta cocon pata', ame hwe e'. Main tomi' toton oro jam co taramaja mi' nonon Iri' Jam cwain. Wata' pain ca Iri' Wari' ta' ca', tomi' ca' toton: Wari' ne inon co cwa' ta toton con. ⁹Wari' co tomi' ca' nonon oro win ma' ca ma' iri na ne, pain ca om ca querec pin' ton Jeju ta, om ca Taramaxicon ne ton ta cocon ma', ame hwe e'. Main tomi' ca' toton oro jam co taramaja mi' nonon Iri' Jam cwain: Om ca wari' ne ton co cwa' ta toton con. ¹⁰Wari' co tomi' napat napa' pain ca Iri' Wari' ta' ca' quem, xic am pin ac xine tara ca caracat nucun. Wari' co tomi' napat nain Tamataracon Iri' Jam ma' iri na ne, om ta xic am pin camain' xine ca caracat nucun ta ac tococwa na.

¹¹Tomi' xim inuhu' pain i ca' quem ac tococwa na. Ta toron ne xumuhu' pain ca aram aram o mi' xim cucuhu' pain oro xirim ca cut in to xucucun me, je pain ca o mi' xim cucuhu' cocon oro taramaxicon ma' quem. Ta cain' cain' xuxun ne hwe me. Ta cain' xi tomi' narain ho' ac xijexi' ne hwe quem me. ¹²Xi ma' ara ne Tamataracon Iri' Jam ca quep xiho' xim nuhu' ta. Coco' quima hwet xun iri jujun pain ca tomi' querec xim cucuhu' ne, mi' ac cuhu' tara pain ca tomi' wa. Ca' tara ca tomi' huhun ta turuhu' ta na ca tomi' tococwa ma'.

Ca pijim' joc mam' mi' tococwa con wari' co an to xo' mi' xucun pain caramaxicon

¹³Ma' ac ca na wari' co xat pe ho' nonon oro co taraju nonon ma'. Tomi' ac con na Jeju: Tomi' ron aji' ta Taramaxicon co ca' na taxipa' capijacon Iri' Jam ac con na. Mi' pin iri na coturut pane ne, an to mi' ac caparut na pain oro caramaxicon. Mi' xo' ron pain munucun coxa' ma pa'ao' paxi'

12.10 Pain ca tomi' ac i ma' ca Jeju ma', tomi' mi' non wari' co om cwirin' pin nain ca caracat nucun. Wari' co cwirin' pin nain iri na ne, xic am pin ac xine na ca caracat nucun ta.

non aji' pane. Ane om mi' capa' pain ne. Tomi' ron me, cut mi' ron pain munucun coxa' ma ta ron me na ca tomi' con ma'.

¹⁴ Ane tomi' ca' con Jeju ne: Cain' cain' xima quem xa'? Ma' tara wari' co tomi' xo' roron pain caramaxicon cote caca ta napa' pahu' ra na ca tomi' con ma'. ¹⁵ Tomi' ac tococwa na oro wari': Ma' tara xumuhu' me. Ta param ximama' hwein oro caramaxicocon oro win ma' nuhu' me ta. Ta caramaju xixi' na urut me camain' hwe me ta. Xi to' e' taxi' capari' ca ma' mija capari' oro carawa ta na ca tomi' tococwa ma'.

¹⁶ Pijim' joc mam' mi' ac tococwa na con wari' co an to xo' mi' xucun pain caramaxicon. Ca' na ca pijim' nucun: Ma' na wari' co caramaju ma'. Awi tamana na totacon, wina tamana na oro ca oin' nucun quem. ¹⁷ Coromicat ac xucun na: Cain' cain' xita' quem? Om ara xi' napa' xirim ca an to xo' tain oro caramaji tota ta na ca coromicat xucun. ¹⁸ Ca' ta' quem ac xucun na. Co pin tain oro wara xirim ca an to xo' tain oro caramaji tota pane. Quep mami' ac tain tara, quep hwara' ac tain tara quem. Hwara' ca' tarain wara xirinain ca'. An to xo' an to xo' pi' pin ac tain tara oro caramaji tota. Cut corom to cut corom to pi' pin ac tain tara oro caramaju ca' quem. ¹⁹ Tomi' ac xije tara: Mija na oro caramaju ca an to xo' ta' ca'. Om ta pi' pin ne. Oro xijein cawaxi' pa' tarapa' ta. Xao pe wa ho' tain xumu ta ac xije tara. Cao' ta'. Toc ta'. Tomi' querec te ximao ta' quem ac xije tara ta na ca coromicat nucun.

²⁰ Ac i ma' paxi' na ca coromicat nucun, ane tomi' ca' con Iri' Jam ne: Mi' pin ho' ra ta inem ta tamanain co om coromicat xo'. Mi' pin ho' ra pain xim ca'. Ma' xi wari' co cut tain nain oro caramajum ca an to xo' ta' ma ma' quem, ac i ma' na ca tomi' con ma'.

²¹ Je ca tomi' xuhu' ca' ac tococwa na. Ac i ma' na wari' co an to xo' hwara' mi' pan xucun pain oro carawa. Caramaju paxi' na pain ca cut mi' pan xucun pain oro carawa pain xocori ca'. Ane om caramaju ca con Iri' Jam ne na ca tomi' tococwa ma'.

Caramajixi' con Iri' Jam

Mateus 6.25-34

²² Tomi' ac tococwa na co taxipa' ca ma': Je ca tomi' xuhu' ca', ta toron ne xumuhu' pain ca ma' xirapa' na hwein oro caramaji macan' ca to' e' nuhu' me, je carawa ca cao' xi' hwe, wirico wom co to xi' hwe ma' quem,

ta toron ne xumuhu' pain me. ²³Hohot paxi' na pain ca ma' capari' carawa ca cao' wa, ane hohot tamana pan ne ca e' nexi' ne. Hohot paxi' na pain ca ma' capari' wom co to iri' quem. Ane hohot tamana pan ne cwerexi' ca' ne. ²⁴Noro jein oro me ma'. Om paxi' na ca tota ne. Om ca oin' nein oro tocwi pain xitot, om ca cut nein caramaji, om nain xirim ca cut to xo' nein quem. Ane pa' mi' pan cain Iri' Jam ne. Je ca tomi' xuhu' ca': Querec wet paxi' nain oro me Iri' Jam ma'. Ane querec wet tamana pan cuhu' ne. ²⁵Je ca tomi' xuhu' ca' ac tococwa na. Iri' Jam ma', wara an to xo' nain oro xec nein ca e' e' wet nexi'. Ha' turuhu' pain ca mam' e' e' tiquin' wijimain ca' hwein pain ca toron tamana ne xumuhu' quem ra? Om ca ha' cuhu' ta. ²⁶Om ca ha' camain' cuhu' pain ca mam' e' e' tiquin' wijimain ca' hwein pain ca toron tamana ne xumuhu' ma' ta. Je xi om toron ximama' ne xumuhu' pain oro carawa ma' quem na ca tomi' tococwa ma'.

²⁷Noro jein oro hwijein pana pain ca horon pin ne ma' quem ac tococwa na. Om paxi' na ca taramaja ne, om paxi' na ca tu mi' xijein con wom quem. Ane om ca wom co awi tiquin' ca' nain hwijein pana ca' ne, om om na. Caramaju tamana paxi' na Salomão cara pane, awi tamana paxi' na womicon pane. Ane awi tiquin' ca' con womicon Salomão oro hwijein pana ca' ne. Tomi' iri'o' inuhu' ta. ²⁸To' awi tamana paxi' nain hwijein pana Iri' Jam ma', ane om e' cara ne ne. Awi nain xec ca', xec cono' pin ac ne na, tom pin ac xine na quem. Ane querec wet cain Iri' Jam ne, to' awi tamana nain. Je ca tomi' xuhu' ca': Om ta querec wet mip cuhu' quem ra? Om ta mi' cuhu' con wom quem ra? Ac ca om howa mip hun a xira. ²⁹Je ca tomi' xuhu' ca': Ta jain jain ximama' hwe pain ca mapam' mapam' hwein oro carawa ca cao' wa je ca toc wa me. Ta toron ne xumuhu' pain me. ³⁰Xi ac i ma' ara caca oro wari' co om howa nonon Iri' Jam ta. Tama' win xumu e' nanain carawa ca cao' wa, je carawa ca toc wa, wirico wom co to wa quem. Ane taxi' pan cuhu' Cotere' ne, taxi' nuhu' pain ca om cuhu' carawa ca cao' wa. Taxi' nuhu' pain ca om cuhu' carawa ca toc wa. Taxi' nuhu' pain ca om cuhu' wom quem. Taxi' nuhu' pain ca ma' xirapari' na hwein quem. ³¹Win xumu jun Cotere' Iri' Jam ta. Tomi' ha' jun pain ca taramaxicon pe ho' cuhu' ma'. Cut mi' ac cuhu' tara pain oro carawa ca om nuhu' ta na ca tomi' tococwa ma'.

³²Wahu' pain ca taxipa' mahu' ca', om paxi' na ca mija hwe. Paric to hwe. Je ca tomi' xuhu' ca': Ta jin' hwe me, xi hohot tamana ara con Cotere' pain ca taramaxicon pe ho' cuhu' pain pawin cain ta. ³³Je ca tomi' xuhu'

ca': Vender jein caramajuhu' ma'. Cut iri jein dinheiro nein ne, mi' mi' ac huhun pain tara oro wari' co om nonon carawa. Ma' ac cuhu' tara oro carawa ca om pi' ra ha' ma'. Ac ca cut in xo' tamana hwein tara carawa pain pawin cain. To wet cara ac ne tara quem. Om ara xi' nain i cain wari' co cut noc xa tain nain oro caramajixi', om nain i cain oro caxicon tohoro' co cao' nain quem. ³⁴ Jain jain e' iri irin oro caramajixi' ca cut in xo' iri' pain macan' ca' ne, pain ca ara e' xin ca param nexi' ca', je i ma' tara ca win xumu iri'. Ane om ac i ma' ne pain oro caramajixi' ca cut in xo' iri' pain pawin cain ne. Jain jain e' iri irin ne, je i ma' tara ca win xumu mao iri' quem, je cwerein ta na ca tomi' tococwa ma'.

Ca pijim' joc mam' mi' tococwa cocon wari' co winim' xo' nonon taramaxicon nucucun

³⁵⁻³⁶ Tama' awori to je pain ca winim' mahu' pain ca in qui' ta' ne ac tococwa na. Win caca wari' co winim' xo' nonon taramaxicon nucucun co hwet non win ma' ca co an tam nam narima'. Wara hwet non, tomi' querec te wi ac caca na, aram aram in mao ta' ta ac ca na. Caram ma' co taramaja mi' e' nonon ma', awori to nana pain ca winim' cocon taramaxicon nucucun, tom xo' nanain oro naran nucucun, winim' xo' ac cocon na pain ca in qui' ta' nucun. Ma' ta pa mi' hap xun pain manain xirim pain ca xo' tataca ca ma' nana. ³⁷ Oro wari' co taramaja mi' e' nonon taramaxicon nucucun ma', mo ta ma' ne ximicocon pain ca winim' xo' cocon taramaxicon nucucun pain ca aram aram in qui' ta' nucun ma', param mi' ac tococwa tara pain ca awi wa. In qui' iri tara taramaxicon nucucun ne, pe pan ac con tara womicon wari' co taramaja e' ma', tomi' pan ac tococwa tara: Xao to jein pana ca mam' cao' to wa ca', maxiram' mi' ac xuhu' tara pain carawa ca cao' wa ta, ac i ma' tara ca tomi' tococwa, tomi' iri'o' inuhu'. ³⁸ Ximijain xim paxi' tara pain ca in qui' nucun, am pain iri' xo' xec paxi' tara quem, je i ma' ira. Mo ta ma' ne ximicocon pain ca winim' xo' cocon taramaxicon nucucun ma', param mi' ac tococwa tara pain ca awi wa ta na ca tomi' tococwa ma'.

³⁹ Ane tomi' xim xuhu' pain i ca' ne ac tococwa na. Mam' pe wet jein carawa ca ara non waximain xirim co wara cut noc xa ca' wa pain caramaxicon ma'. Mo xi taxi' tocwa caxicon wari' co cut noc xa ma', mo xi taxi' cain iri' hora nein ca maqui' ta' nucun quem, nain ho' ac cain xira

xiricon pain ca joc pa hot xine. ⁴⁰Je ca tomi' xuhu' ca' ac tococwa na. Awori xo' je pain ca winim' xim mahu' ma'. Xi in qui' ho' ta' ara ta' ta. Wata' pain ca Iri' Wari' ta' ca', in qui' ho' ta'. Om ca taxi' hwein hora nein ca in qui' ta' ne quem tata.

⁴¹Cain' cain' ma quem Taramaxicon ne ac con na Pedro. Tomi' e' maparut pain ca pijim' joc mam' mi' maparut cocon oro wari' co taramaja mi' nonon taramaxicon nucucun ra? Om ca tomi' tomi' pi' pin momon oro wari' cwa' quem na ca tomi' querec con ma'.

⁴²Na e' na pain ca an xiho' hun wari' co taramaja xo' ma', co coromicat xo' pain ca querec wet cain caramaxicon taramaxicon nucun ta ac tococwa na. Mao tain pira iri na taramaxicon nucun ne, tomi' mam' ac con na: Querec wet roron oro win ma' ma co taramaja mi' e' nanapa' cwa', querec wet xo' roron pa'ao'. Mi' xo' roron pain carawa ca cao' wa quem na ca tomi' mam' con ma'. ⁴³Mo ta in qui' ca taramaxicon nucun ma', mo ta querec pin' con pain ca querec wet xo' cocon oro win taramaja ca ma', tomi' querec te ac con tara, hohot tamana mapa' pain ca taramaja xo' mi' mapa' ca' ac con tara. ⁴⁴Tomi' ac con tara: Mi' xim inem pain ca querec wet querec wet pi' pin main oro caramaju ca', ac i ma' tara ca tomi' con taramaxicon nucun. Tomi' iri'o' inuhu' ta. ⁴⁵Ane om ac i ma' ne pain ca om tomi' ha' nucun ne. Am om taramaja xo' ca, am coromicat ca' ca: Om om na taramaxicon ne cara ne, om ta in hap ca ma' toron pain ca coromicat nucun. Am wap ximao cocon co taramaja nana ma', am wap ximao cacam ca narima' nequequem pain ca taramaja cacama ma' quem. Am miri'om cain ca taramaja nucun ma', am cao' e' ca, am toc e' cain ca mana' nein tocwa ma', je pain ca toc tamanain pe ca ma' quem. ⁴⁶Ame hwe e', main maqui' pa' toron taramaxicon nucun pain xec nein ca om winim' pan con ma'. Maqui' pa' toron pain iri' hora nein ca om winim' xo' camain' con ma'. Wap tamana ac tocwa tara, mao rain ca to pan caca oro wari' co om tomi' ha' ta ac tocwa tara ta na ca tomi' tococwa ma'.

⁴⁷Noro jun wari' co taramaja mi' e' non taramaxicon nucun ma' ac tococwa na. Taxi' paxi' nain ca ara ra con taramaxicon nucun, ane om tomi' ha' ca ne. Om ca ara tain ta cain ca param nucun, om ca tomi' ha' camain' con. Wap tamana ac tocwa tara ta. ⁴⁸Noro jun xucun ma' quem, co ara ni nain carawa ca om hohot non taramaxicon nucun ma', xi taxi' cain carawa ca ara ra con ma'. Wap ton paxi' toron taramaxicon nucun, ane om wap tamana ton con ne. Je ca tomi' xuhu' ca' ac tococwa na. Mo

ta mi' cuhu' pain oro ca taramaja wa Iri' Jam ma', na e' na pain ca tomi' ha' hun pain. Mo ta mi' tiquin' cuhu' pain oro wirain ca taramaja wa, na e' na pain ca tomi' ha' tiquin' hun pain quem na ca tomi' tococwa ma'.

Ca noc caracan xucucun oro wari' pata' ca Jeju

Mateus 10.34-36

⁴⁹Maqui' inain macan', ma' ta tom tain inain pain xe ta ac tococwa na. Wara tom pin xira na inain quem. ⁵⁰Ac i ma' paxi' ina, ane na e' ne pain ca jain jain tamana cain' ta' pain ca quep em' xim cacapa' oro wari' je pain ca to' pa' pin xim cacapa' ne. Toron tamana napa' xumu ta. Ximin ina. Toron toron maqui' pa' ac capa' tara xec nein ca to' pa' pin xim cacapa' ta. ⁵¹Cain' ca coromicat mao mahu' quem ac tococwa na. Ja' tomi' querec te toton nonon oro wari', je ca maqui' cain macan' ca', ac i ma' na ca coromicat nuhu' pata' ra? Om na ta, om ca maqui' ta' pain ca ja' tomi' querec te caracan toton toton oro wari', ta coromicat ac i ma' hwe me ta inuhu'. Maqui' iri inain macan' pane ne, mana' caracan ac xucucun na oro wari'. Xi to' i'ina ara toton pain ca pijim' mi' toton pain capiacaon Iri' Jam ta. Ma' nana co tomi' querec te nanain, ma' nana co noc nanain quem. Mana' ac xucucun na quem. ⁵²Ac i ma' tatara co nari xucucun ma'. Am ma' 5 caca co nari xucucun, mana' 2 ac cocon tara co ma' 3 nana. Mao ac ne ma' tara pain ca mana' caracan xucucun. ⁵³Wari' co wanxi' ma', mana' ac con tara panxica pata', mao ac ne ma' tara pain ca mana' caracan xucucun pata'. Ac i ma' tara narima' co wijima ma' quem, mana' taram cainacam, mao ac ne ma' tara pain ca mana' caracan xequequem pata'. Ac i ma' tara jicon wari' ma' quem, mana' ac cam tara manacon cawinacam pata'. Mao ac ne ma' tara pain ca mana' xequequem pata' na ca tomi' tococwa ma'.

12.49 Pain ca tom pin tain cain xe pain macan' ca Jeju ma', ac ca tomi' mi' cain na ca wap wap pi' pin xun tococwa oro caracat. Am tomi' mi' cain ca to' i'ina xun tococwa co howa nana quem. Ma' ta om pin ne ca em' nuhu' pain ca xuruxut nuhu' ta tata, ma' ta howa cara mahu' ta tata. Am tomi' mi' cain ca to' mana' caracan xun tococwa oro wari' quem.

Ca querec pin' xine carawa ca ara pan ca Iri' Jam pain oro xec nexi'

Mateus 16.1-4

⁵⁴ Tomi' ac tococwa na oro wari': Querec iri hwein ca mixem ne tajain nanawin ma' ne, pain ca maqui' ac nein ca corom mao ca xina ma', pain cote ne com ma', tomi' hap ac hwe na: Pan' ta' na xowi' ta hwe, pan' ac ne na quem. ⁵⁵ Ac i ma' na pain ca nuru qui' nein quiricon xina hotowa ma' quem. Nuru qui' iri nain mahweri pain quiricon xina ne, tomi' ac hwe na, xain tamana tara xina ta hwe, xain tamana ac ca na quem. ⁵⁶ Wa inuhu' pain ca ac ca iri'o' xi' ca' tara me hwe ma'! Noro iri hwein nanawin pain macan' ca' ne, querec pin' ac hwein na ca pan' ta' ne xowi' je pain ca xain tamana ta' ca xina ma' quem. Je xi querec pin' hwein carawa ca ara ta' pan ca Iri' Jam pain oro xec nexi' ca' quem?

⁵⁷ Je xi querec pin' hwein carawa ca hohot non Iri' Jam quem? Querec pin' xihwein carawa ca ara je cuhu' quem. ⁵⁸ Mo ta om querec pin' hwein, mo ta miri'om hun, wap ac cuhu' tara. Je ca tomi' xuhu' ca', tomi' inem pain ca dever mon pain dinheiro wari' ma'. Mo tomi' xun taramaxicon ta terem, taraju xo' tarapari' pain ca dever mapa' pain dinheiro ta ac quem tara. Na e' na pain ca wara tomi' xo' pan mon pain ca xuruxut xuruxut wet hwein wana ma', pain ca om hwet querec hun taramaxicon pain xiricon ma'. Ma' ta om coc ororo mi' quem con juiz ma'. Ma' ta om quep ron ta con guarda juiz pum, ma' ta om tao' pe quem, pain xirinain ca tao' to tao' to to wa guarda ma' quem. ⁵⁹ Mo ta om pagar pi' pin main dinheiro ca pagar ron quem juiz ma', om ac ne tara ca hwet ca' ac main xirinain ca tao' to tao' to to wa ma'. Tomi' iri'o' inuhu' ta na ca tomi' tococwa ma'.

Ca cwirin' jein ca caracat nuhu' ta cocon oro wari' Jeju

13 Pijim' pijim' wet iri na Jeju ne, ma' ac caca na co tomi' hwet nonon cocon wari' nein Galileia ma', co to' parapa' pin wawa pain ca mama' cacain cote ne xiricon Iri' Jam pain Jerusalém ma'. Tom tain'

12.59 Pain ca tomi' ac i ma' ca Jeju ma', con wari' co om pagar ac cain dinheiro ca pagar ra con juiz ma', ac i ma' iri' pain ca wari' nexi' quem. Om ca pagar ac xin ca caracat nexi' ca', xi mija ara ne ca caracat iri' ta. Dever tamana urun Iri' Jam. Na e' na pain ca tomi' hwet xun pain ca caracat nexi' ca', pain ca om wap xuhu' ta querec capari' ca', xic am pin ac cain na, om pin ac capari' na ca caracat wa ta.

tatarain carawa nexi' oro sacerdote ta paxi' nana. Ane to' parapa' pan tococwa ne. Wirico taramaxicon Pilatos co to' parapa' jujun ta nonon oro wari' nucun pane.

²Tomi' pan ac cocon na Jeju: Cain' cain' ne ca coromicat nuhu' cocon quem? Caracat tiquin' ca' totoron oro win ma' caca ma' huhun ra? Je ca to' parapa' ac i ma' tococwa ta, ac i ma' na ca coromicat mao huhun ra?

³Om na ta, tomi' iri'o' inuhu'. Mo ta om cwirin' pin hwein ca caracat nuhu' ma', cono' cono' pi' pin ac hwe tara quem. ⁴Cain' cain' ne ca coromicat nuhu' cocon wari' cara pane, co ma' 18 nana pane, co cono' nana pain ca pa caracat corom pin qui' cocon xirim ca mao pawin pane? Caracat tiquin' ca' totoron oro xucucun wari' co to nanain Jerusalém ma' huhun ra? ⁵Om na ta, tomi' iri'o' inuhu'. Mo ta om cwirin' pin hwein ca caracat nuhu' ma', cono' cono' pi' pin ac hwe tara quem na ca tomi' tococwa ma'.

⁶Tomi' joc mam' mi' ac tococwa na pain panajinain figo ca om ma' winain ma'. Ca' na ca pijim' nucun: Ma' na wari' co oin' pe nain totacon panaji figo. Cat ta' figo ta ac ca na, noro noro ac cain na quem. Noro paxi' nain, ane om mi ne ne. Om ca mam' camain' cain. ⁷Je ca tomi' con wari' nucun co querec wet nain totacon: Ma' 3 pin na cawaxi' pain ca noro noro tain panaji figo ca', pain ca cat ta' figo ta ta' ca'. Om ca mi ne, om ca mam' camain' tain figo pain. Ta' cat pin rain! Om ca na ne pain ca to' i'ina cara nein oro wirain panaji memem pain ca horon xo' ne ta na ca tomi' con ma'.

⁸Om na ta taramaxicon ne ac ca na wari' nucun. To wet iri ne ma' rain, xijein cawaxi' pa' tarain ta. Xe' morojam' tain caximain, aramao ac tain tara pain moji boi. ⁹Am mi ta' ne pain xijein cawaxi'. Mo ta om mi ne, ta' cat pin ac xin tara ta non. Ac i ma' na ca pijim' joc mam' mi' tococwa pain panaji figo ca om mi winain pane.

Ca quep xio pin tacama narima' pain sábado

¹⁰Maqui' iri na xec nein ca xao to wa taxipa' cacain ximicocon oro judeu ma' ne, pain sábado ma', ca' na toton pain capiiacon Iri' Jam oro

13.9 Pain ca pijim' ac i ma' ca Jeju ma', to' querec pin' tata oro judeu pain ca querec wet xo' taxipa' cocon Iri' Jam. Winim' paxi' tata pain ca cwirin' pin cacain ca caracat nucucun. Om paxi' na ca mana' hap tococwa. Mo ta om cwirin' je na cacain, wap pin ac tococwa tara ta.

wari' cwa' ta ac ca na Jeju ma', ca' na pe ac cocon na pain xirim ca cut in to xucucun ma'. ¹¹ Pe nain i ma' narima' co corom pe ho' nam caxicon jam ma'. To' caxi nam. Wara pain na ca caxi cama con, ma' 18 pin na cawaxi' pain ca to' caxi cam pane. Xone na, om ca xut tequi' pe ac cama. ¹² Querec iri nam Jeju ne, hap ra ac cam na, tomi' ac cam na: Om pin nem ca caxi nem ta. Xio pin ma ta nam. ¹³ Quep ac cam na pain micon, tequi' pe xo' hap ac cama na. Awi na Iri' Jam awi na Iri' Jam pan ac cama na quem.

¹⁴ Mana' ac ca na co querec wet nonon oro win judeu ca pain xirim ca cut in to xucucun ma'. Mana' non Jeju. Xi om ne ca quep xio pin ara cam narima' pain sábadó ta. Je ca tomi' tococwa oro wari': Ma' 6 napari' xec pain ca taramaja je capari' Iri' Jam. Je i ma' tara oro xec ca maqui' hwe pain ca quep xio taraparut ta hun Jeju cwa'. Ta quep xio taraparut ta hun pain sábadó me ta tata.

¹⁵ Tomi' ac ca na Taramaxicon nexi': Wa inuhu' pain ca ac ca iri'o' xi' ca' tara me hwe ma'! Win hwe pain ca wara pao' to hwein boi nuhu' je burro nuhu' pain ca cao' to ne ma'. Toc tara com iri hwein pain sábadó ne, om ca tacom' horohot hwein ra? Om ca o hwerehwet hwein, om ca o mi' hwein pain com ra? Ac i ma' ac i ma' xam' hwe ta. ¹⁶ Je ca tomi' xuhu' ca' ac tococwa na. Na e' na pain ca quep xio pin tacama narima' cwa', co hwanana ne non Abraão cara pane. Ac ca pao' pe cam na Caxicon Jam pane. Wara pain pin na cam, ma' 18 pin na cawaxi' pain ca pao' pe cam pane. Om ca na ne pain ca tacom' ca' tacama con Caxicon Jam pain sábadó ca' ra? Na ne ma' ira! Ac i ma' na ca tomi' tococwa ma'.

¹⁷ Tomi' ac i ma' iri na ne, wixipa' wixipa' pi' pin ac caca na co tomi' in pin nonon ma'. Oro wari' ma' iri nana ne, wa wa nanain oro ca ara ca ma'. Tomi' querec te nana pain.

Ca pijim' joc mam' mi' tococwa pain wijimain tocwi mostarda

Mateus 13.31-32; Marcos 4.30-32

¹⁸ Tomi' querec ac tococwa na: Ma' carawa ca ara ne pain ca taramaxicon pe ho' cocon oro wari' Iri' Jam quem? Ma' carawa ca an xiho' nain quem?

¹⁹ Carawa ca ara ne ma', pain ca taramaxicon pe ho' cocon oro wari' Iri' Jam ma', an xiho' nain carawa ca ara nain wijimain tocwi mostarda ma', ca oin' pe cain totacon wari' ma'. Ca hwara' hwara' ne ma', ca hwara'

hwara' ne ma', hwara' pin ac ne na, aram aram cote ne pana pin ac ne na. Quep pe ac nein na xirinain pain oro taparain me quem.

Ca pijim' joc mam' mi' tococwa pain ca to' memerem nein capam'

Mateus 13.33

²⁰Tomi' querec mami' ac tococwa na: Ma' carawa ca ara ne pain ca taramaxicon pe ho' cocon oro wari' Iri' Jam quem? ²¹An xiho' nain carawa ca ara ne pain ca an camain ca to' memerem nein capam' narima' ma'. Maxoc hwara' iri nain trigo ne, joc wanan ac camain na ca to' memerem nein capam'. Ara pi' pin iri nain oro ca ara nein ne, an pe ac camain na, memerem pin ac ne na quem na ca pijim' tococwa ma'.

Wijimain manain xirim

²²Tiquin' mao ac ca na Jeju ma'. Pain ca xut xumu cain Jerusalém ma', mao ac cain oro xijein cidade, hwet hwet ac tococwa na oro wari' co to nanain oro ca paric to ne xirim ma' quem. ²³Ma' ac ca na wari' co tomi' querec ca' non: Taramaxicon ac con na: Cain' xi ma' caca oro wari' co to witan xi' wawa quem? Paric to tatara ra na ca tomi' querec con ma'.

Tomi' ac tococwa na: ²⁴Ca taramaxicon pe ca Iri' Jam ma', an xiho' nain xirim ca corom ac xine pain wijimain man. Je ca tomi' xuhu' ca': Win xumu jein ca taramaxicon pe ca Iri' Jam. Jain jain je pain ca corom ac hwe pain wijimain manain xiricon. Xi iri'o' ara ne ca tomi' xim xuhu' ca': Main mija paxi' tatara oro wari' co corom xin nanain. Ane om ha' xun tococwa pain ca corom xi' wa ne. ²⁵An xiho' nain waximain xirim Iri' Jam quem. Tao' pa' tain iri tarain xiricon ne, hwet to ca' ac hwein tara, tataca ac hwein tara manain. Pa xut, corom xi' urut ta taramaxicon ac hun tara. Om na, om ca querec pin' camain' xuhu' ta ac cuhu' tara. ²⁶Cain' cain' xima quem ac hun tara. Cao' to ho' urut pum pane, toc to ho' urut pum pane quem, pijim' maparut pain cidade nuxut quem ac hun tara. ²⁷Om

13.19 Pain ca pijim' ac i ma' ca Jeju ma', tomi' mi' tata co taxipa' ca cocon oro wari' co howa nonon pane, pain ca paric to caca pane. Pijim' pijim' tiquin' ac tococwa na oro xucucun wari' ma', aram aram mija pin ac caca na oro wari' co howa nonon Jeju pain oro xijein macan'. **13.21** To' jimao pin nain trigo ca to' memerem nein capam'. Ac i ma' na ca to' jimama' tococwa oro wari' co taramaxicon pe ho' ca Iri' Jam quem.

na, om ca querec pin' camain' xuhu' ta ac cuhu' tara. In ca' in ca' pi' pin xine ta oro caracat co pan teretem nana ta, ac i ma' tara ca tomi' cuhu' ta.

²⁸ Tomi' ac tococwa tara: Querec pira iri jun Abraão con Isaque con Jacó cocon oro profeta cara pane ne, querec pira iri jujun pain ca corom to cacain ca taramaxicon pe ca Iri' Jam ne, awaran tamana ac hwe tara, cacacao' ac hwein tara xuhu' pain ca jain jain tamana nuhu' quem. Xi narain ho' xun ara xihwe pain ca corom to wa ta. Hwet to cara ac hwe ma' tara ta. ²⁹ Mija tatara oro xucucun wari' co maqui' nanain oro xijein macan' pain pira. Cao' querec te xi', xao to ho' ac xucucun tara pain pana ca mam' cao' to wa pain ca taramaxicon pe ca Iri' Jam. ³⁰ Je ca tomi' xuhu' ca', tomi' iri'o' inuhu' ta: Ma' mija nana co om hwara' opa nana pain xocori ca'. Ame hwe e', aram aram hwara' opa pan ac caca tara ta. Oro co hwara' opa nana pain xocori ca' iri nana ne, ame hwe e'. Aram aram hwara' opa hwara' opa om pin ac caca tara quem na ca tomi' tococwa ma'.

**Ca tomi' xaxa' ca Jeju pain ca xiram
pa' tococwa oro wari' co to nanain Jerusalém**

Mateus 23.37-39

³¹ Pi' pi' iri na ca tomi' ca Jeju na, ma' ac caca na oro fariseu co hwet nonon ma'. Mao ra ta. Xi to' pa' pin xim ara quem taramaxicon Herodes ma' ta nonon.

³² Om na, mo tomi' jun taramaxicon co an xiho' nain caji carawa nein mi ca mixein taxipa' cwain. Tomi' ca' jun: Ca' na ca tomi' quem Jeju ta jun: Tomi' jein pin inonon oro caxicon jam, quep xio pin inonon oro wari' quem, ac i ma' na ca taramaja ta' pain xocori ca'. Taramaja tiquin' ac i ma' ta' quem. Pi' pin iri tara ca taramaja ne ne, maho' ac tain tara ta, ac i ma' na ca tomi' quem Jeju ta jun ta tata. ³³ Ane na e' ne pain ca xut cara tain wanaji Jerusalém ne ta ac tococwa na. Om ta pain homa ne, wa' mao ac ta' tara. Xi hohot ne pain ca mi' pin pe cain oro xijein cidade profeta ta. Na e' na pain ca mi' pin pe ta' pain Jerusalém ta! Ac i ma' na ca tomi' tococwa ma'.

³⁴ Tomi' xaxa' ina pahu' ac tococwa na oro wari' nein Jerusalém. Wahu' paxi' nana co to' parapa' nonon oro profeta pane. Wahu' paxi' nana co to' to' cono' pin nonon pain pacun oro wari' co mam' cuhu' Iri' Jam pane quem. Ane xiram pa' xuhu' ne. Om ca noc camain' xuhu'. Tama' cut in

xuxuhu' na paxi' inuhu'. Tama' querec wet xuxuhu' na paxi' inuhu'. Win con jicon me pain ca cut corom to con oro wixicon pain tapaxicon ma', ac i ma' xuhu' paxi' inuhu' ta. Ane noc mahu' ne. ³⁵Paca' pin turuhu' Iri' Jam ta, paca' pin tarain cote ne xiricon ca' pahu'. Om ta pe mami' cain. Om ta querec mami' mahu' quem, tomi' iri'o' inuhu'. Ame hwe e', main maqui' tara xec nein ca tomi' ca' xim mahu': Tomi' querec te xun co ma' co mam' maqui' nain ca hwara' opa nucun Iri' Jam ta, ac i ma' tara ca tomi' xim mahu'. Je i ma' tara xec nein ca querec mami' xim mahu' ta na ca tomi' tococwa oro wari' nein Jerusalém pane.

Ca quep xio pin tocwa wari' pain sábado

14 Xijein sábado pin iri na ne, pain ca xao to wa taxipa' cacain ximicocon oro wari' ma', tomi' ac con na Jeju fariseu ma', co hwara' opa ma'. Hap ra, cao' pe ho' ne pain xuru ca' non, hwet ac con na. Oro win ma' ca fariseu ma', ja' noro nonon Jeju pain oro ca tomi' nucun je pain oro ca ara nucun quem. ²Pe ho' ja' pan ac con na Jeju wari' co caxi. Mom ximao na curucun. ³Jeju ma', tomi' querec ac cocon na oro fariseu cocon oro co ca' na taxipa' nanain ca xirao' nucun Moisés. Hohot tara pain ca quep xio wa pain sábado ra? Tomi' caho' napari' pain i ma' ca xirao' nucun Moisés ra? Ac i ma' paxi' na ca tomi' querec tococwa ma'. ⁴Ane tacana to caca ne. Om ca tomi' caca. Je ca quep con pain micon co ma' co caxi ma', quep xio pin ac con na, in mao rain xurum ta ac con na quem.

⁵Tomi' querec ac tococwa na: Mo ta ma' ca win ma' nuhu' co pan' mao nain manain com panxica pain sábado ma', am boi nucun ma', mo ta pan' mao nein manain com boi nucun pain sábado ma', om ta an piri' hap cain ra? Om ta an piri' hap ca' con pain manain com panxica co pan' mao nain ra? An piri' hap ca' toron pain ta na ca tomi' tococwa ma'. ⁶Hehe ac caca na. Om ca tomi' ac caca.

⁷Querec iri nonon oro co harahap je wawa Jeju ne, querec pin' tata pain ca param e' cacain ca xao to xo' wa pain pana ca mam' cao' to wa cocon oro taramaxicon pain ca cao' xi' caca ma', pijim' joc mam' mi' ac tococwa na con wari' co hap ra wa pain ca cao' querec te wa ma'. Pijim' ca' tata: ⁸Je ca tomi' xuhu' ca', tomi' inem pain ca tomi' quem wari' ma', pain ca hap ra, cao' querec te wi xijexi' con co ma' co an tam nam narima' ma'. Om ca na ne pain ca xao pe ho' hap momon oro wari' co hwara'

opa nana ma'. Am hap ra ta tocwa xucun wari' co hwara' opa tiquin' ca' nem quem. ⁹Mo ta xao pe ho' hap momon co hwara' opa nana ma', mo ta corom ca xucun co hwara' opa tiquin' ca' nem quem, mo ta tomi' ca' quem waximain ca cao' querec te wa ma': Om na, cam paca' ron co cwa' co hwara' opa tamana cwa', xao pe ho' pan roron caram ma' co om hwara' opa homa nana ma' quem, mo ta tomi' ac i ma' quem, wixipa' ac ma tara, xao pe ho' pin ac momon tara co om hwara' opa homa nana ma' quem. ¹⁰Je ca tomi' xim ca', hap ra, cao' querec te xi' iri xima ne, xao pe ho' pan ac momon tara co om hwara' opa homa nana ma'. Am tomi' ca' quem co hap ra nem ma', tomi' ac quem tara: Om na win ma' ne. Xao pe ho' roron caram cwa' co hwara' opa nana cwa' terem. Querec pin' ac quequem tara oro wari' co harahap je wawa ma', querec pin' teterec pain ca hwara' opa nem. ¹¹Je ca tomi' xuhu' ca' ac tococwa na. Oro wari' co xec xec nana ma', pain ca hwara' opa na xi' ma caca ma', to' wixipa' to' wixipa' pi' pin ac tococwa tara. Wari' co om xec xec ma' iri na ne, pain ca om ca hwara' opa ta' pan xucun ma', to' hwara' opa pin ac tocwa tara quem na ca tomi' tococwa ma'.

¹²Tomi' ac ca na Jeju, tomi' non waximain xirim ma', co hap ra, cao' pe ho' ne pain xuru ca' non ma', tomi' ca' non: Harahap je, cao' querec te wi xijexi' ta iri roron oro wari' ma' ne, ta harahap je momon iri' win ma' ma me. Ta harahap je momon oro xerem cocon oro ca nari nem me, ta harahap je momon oro win ma' ma co caramaju nana ma' me. Mo ta harahap je momon, win maparut pane ac quequem tara, hap ra, cao' querec te xi' ta ac quequem tara, ac ca pagar in hwet quequem tara pain ca dever quequem pain ca harahap je momon pain cara pane. ¹³Harahap je, cao' querec te wi xijexi' e' iri roron oro wari' ne, tomi' cain' roron co om nonon carawa ma', co caji at nana ma', co xuruxut xirac nana ma', co om tococon ma' quem. ¹⁴Param mi' ac quem tara pain ca awi wa Iri' Jam ma', xi ha' cocon pain ca pagar in hwet ac quequem co ximin nana ma'. Om ca win maparut pain ca harahap je maparut pane ac quequem. Pagar in hwet pan terem Iri' Jam ma', pagar in hwet pan terem pain xec nein ca to' e' mami' toton cocon oro wari' co hohot nonon ma' na ca tomi' con ma'.

**Ca pijim' joc mam' mi' tococwa con wari' co cao'
querec te wi xijexi' e' nonon oro wari'**

Mateus 22.1-14

¹⁵Wari' co cao' pe ho' nonon pain pana ca mam' cao' to caca ma', taraju iri non Jeju pain ca tomi' ac i ma' ca ma' ne, tomi' ac con na: Param mi' tata pain ca awi wa oro wari' co cao' to ho' xun nonon Iri' Jam pain pana ca mam' cao' pe nucun ma', co cao' querec te xi' e' ca pain ca taramaxicon pe nucun ta non.

¹⁶Tomi' ac ca na Jeju: Pijim' joc mam' mi' xuhu' con wari' co cao' querec te wi xijexi' nonon oro wari' ta non. Ca' na ca pijim' nucun: Ma' na wari' pane. Cao' querec te wi xijexi' cocon oro win ma' ne ta ac ca na, ara ac cacain na carawa ca cao' wa. Harahap je, cao' querec te wi xijexi' e' ac tococwa na oro wari'. Mija nana wari' co harahap je ca ma'. ¹⁷Awori pin iri na oro carawa nein ca tomi' querec te nucucun ne, tomi' ac con na wari' nucun ma', co taramaja mi' e' non ma': Mo tomi' roron oro wari' co wara tomi' ta' pane, pain ca cao' querec te wi xijexi' e' toton pane non. Harahap je, xi awori pin ara ne oro carawa ca cao' xi' iri' ta roron ta na ca tomi' con ma'.

¹⁸Mao ac ca na, tomi' hwet ac tococwa na pain ca tomi' nucun taramaxicon nucun. Tomi' hwet paxi' tata pain, ane hehe caca ne. Ma' na xijein carawa ca ara ta' ta' ca', to' i'ina napa', om ca ha' capa' pain ca cao' pe ho' ton ta nana, tomi' ac i ma' tomi' ac i ma' xam' nana. Tomi' ca' na xucun: Om ca ha' capa', xi xo' an ara tain xitot ta, na e' na pain ca mo querec tain. Tomi' ron me, ta mana' mapa' pain ca om cao' pe ho' ac xim me nem ta ron, tomi' toto ac i ma' non ma'.

¹⁹Ma' ac ca na xucun co tomi' ca' non quem: Om ca ha' capa', xi xo' cut 10 ara tain boi ta, am taramaja xo' ne, na e' napa' pain ca mo querec tain pain ca taramaja nein ta. Tomi' ron me, ta mana' mapa' pain ca om cao' pe ho' ac xim me nem ta ron, tomi' toto ac i ma' non quem.

²⁰Xucun ma' iri na ne, tomi' ac con na: Om ca ha' capa', xi xo' an ara tam narima' pain xocori ca'. Je ca om cao' pe ho' ac ton ta non.

²¹In hwet ac con na taramaxicon wari' nucun ma', co taramaja mi' e' non ma'. Tomi' hwet ac con na pain ca tomi' nucucun oro wari' ma', co wara tomi' paxi' wawa ma'. Mana' ac ca na waximain xirim ma', co taramaxicon ma'. Tomi' ac con na wari' nucun: Mao hap rain oro wana

pain cidade nexi' ca', mao rain oro wijimain wana ma', o qui' ac momon tara co ximin nana. O qui' roron co om nonon carawa ma', co caji at nana ma', co om tococon ma', co xuruxut xirac nana ma' quem na ca tomi' con ma'.

²² Mao ac ca na, o qui' ac tococwa na. Tomi' ac con na taramaxicon nucun: O qui' paxi' inonon ta. Win ne ca tomi' mapa' ne non. Ane ma' ma' wet ne ca xao pe ho' ac xine pana ca mam' cao' to wa ne non.

²³ Tomi' ac ca na taramaxicon, tomi' non wari' nucun: Paca' rain cidade nexi' ca', pirao' pirao' ac momon tara oro wari' pain oro wana ma', oro cote ne wana ca mao nain oro xijein cidade ma', je pain oro wijimain wana ma' quem, tomi' mip ac momon tara: Na e' na pain ca corom hwein xiricon taramaxicon ne ta ac momon tara. Ma' ta mija ca wari' pain xuru ta na. ²⁴ Je ca tomi' xuhu' ca' ac tococwa na co wara corom nana ma'. Oro wari' co wara tomi' ta' pane, pain ca harahap je, cao' querec te wi xijexi' ta ta' pane, om ta cao' camain' cacain carawa nein ca tomi' querec te nexi' ca'. Om ta ma' xica' pe camain' ca co cao' tain nain ta na taramaxicon na ca tomi' ca Jeju pain ca pijim' cocon oro wari' ma'.

Ca i'ina paxi' ne pain ca taxipa' xun Jeju

Mateus 10.37-39

²⁵ Mija nana wari' co ja' ja' nonon Jeju ma'. Om ca paric camain' caca. Tucu in hwet ac tococwa na, tomi' ac tococwa na: ²⁶ Mo ta ja' ja' xim capa' wari' ma', mo ta tomi' querec te tamana cocon oro ca nari nucun ma', mo ta om tomi' querec te tiqin' ca' capa' con cote ca cam jicon ma', cam manacon ma', cacam mana panxica cacam oro xurucun ma' quem. Mo ta om tomi' querec te tiqin' ca' capa' pain oro ca param pan nucun ma' quem, om ca taxipa' ac capa' ta. ²⁷ Mo ta ja' ja' xim capa' wari' ma', mo ta xiram pa' cain curucun pain ca jin' cain ca mi' pin wa pain ca taxipa' capa' ma', om ca taxipa' ac capa' na ca tomi' tococwa ma'.

²⁸ Am ma' ca win ma' nuhu' co quep tain nain cote ne xirim ca mao pawin ac tococwa na. Om ta noro cain' cain dinheiro nucun quem? Noro cain' tarain. Xao pe tara, noro noro ac cain tara dinheiro nucun. Am ha' capa' pain ca quep xam' pin tain xirim, am om ha' capa', ca' tara. ²⁹ Mo ta om noro cain' cain dinheiro nucun ma', mo ta cut in xo' e' cain oro pacun ca to' teren nain xiricon pain caximain ma', mo ta om ha' con pain ca

quep xam' pin cain quem, tatam' tatam' pi' pin ac cocon tara oro wari' co querec nanain xiricon pain ca om quep xam' pin ac cain ma'. ³⁰Tomi' ac cocon tara: Quep tain paxi' nain xirim ron wari' cwa'. Je xi quep xam' pin cain quem totoron.

³¹Am ma' ca taramaxicon co mixita ton non xucun taramaxicon co mana' non ac tococwa na. Om ta noro cain' tococwa oro soldado nucun pain ca mija nucucun quem? Noro cain' totoron. Xao pe tara, noro noro ac cocon tara, coromicat pan ac ca tara: Ma' 10.000 e' nanapa' oro soldado ne co quep xiho' xim nanapa' cwa'. Ha' tarapa' pain ca to' quiji' pin ton taramaxicon cwain, pain ca ma' 20.000 cocon oro soldado nucun co quep xiho' toton nonon quem? Ac i ma' tara ca coromicat nucun. ³²Mo ta querec pin' pan xucun pain ca om ha' con pain ca to' quiji' pin con xucun taramaxicon cwain, tomi' ac tococwa tara oro wari' nucun: Mo xuruxut cam' jun taramaxicon cwain, pain ca maqui' maqui' wet cacain pira cain, tomi' toto ac hun tara: Mana' mana' om xi' ta aji'. Maho' xin ca mixita wa ta jun ac tococwa tara. Ac i ma' tara ca tomi' xo' xucucun.

³³Je ca tomi' xuhu' ca', tomi' tomi' xam' inuhu' ta ac tococwa na. Mo ta taxipa' xim mahu', na e' na pain ca noro cain' hwein oro carawa ca to' i'ina xim nuhu' pain. Mo ta om an to pin hwein oro carawa ca win xumu hwe ma', om ca ha' ne pain ca taxipa' mahu' ta na ca tomi' tococwa ma'.

³⁴Noro jein sal ma' ac tococwa na. Awi na sal, to' wita awi nain oro carawa ca cao' wa. Mo ta wita wita om ne, mo ta camain' pin ne. Cain' xi wita mami' ac ne quem? ³⁵Sal ca camain' pin ma', om ca to' wita mami' nein carawa ca cao' iri', om ca to' awi nein macan' quem. Wixicao' pin e' xin ta na ca tomi' tococwa ma'.

Je ca tomi' xuhu' ca' ac tococwa na. Mo ta taraju pa' xixi' na hwe ma', je ta taraju wet qui' hwe ta na ca tococwa ma'.

Ca pijim' joc mam' mi' tococwa pain ovelha ca pan' am

Mateus 18.12-14

15 Wari' co cut in taxipa' nanain oro imposto ma', cocon oro xucucun wari' co caracat taxipa' nana ma' quem, cut in cut in pi' pin ac xucucun na pain ca taraju xun cocon Jeju ma', pain ca pijim' ta' ca ma'. ²Ane tomi' ximama' pan cocon Jeju oro fariseu cocon oro co ca' na taxipa' nanain ca xirao' nucun Moisés ne. Tomi' ximama' ca' nonon: Om xi tomi'

querec te cocon oro caracat Jeju cwa! Om xi cao' pe ho' cocon ta nana pain ca tomi' ximama' cocon ma'. ³ Je ca pijim' joc mam' mi' tococwa pain wijimain ovelha ca pan' am.

⁴ Ca' na ca pijim' tococwa ma': Am ma' ca win ma' nuhu' co wina ovelha, ma' 100 na ovelha ca wina ca. Pan' am xica' pe ac ne na. Cain' cain' ta' ca quem? Om ta pirao' tain ca ra? Pirao' tain tara. Paca' tarain oro wirain ma', ca 99 nein ma', pain ca cao' to ne ma'. Mo pirao' tain e' ac cain tara ca pan' am ma'. Pirao' pirao' mam' ac cain tara quem. ⁵ Mam' pin iri tarain ne, tomi' querec te tamana ac cain tara, an xin tapan ac cain tara pain tiquirimicon. ⁶ In mao ac cain tara xiricon. Harahap je ac tococwa tara oro win ma' ca cocon oro xucucun co to ho' ja' pan nonon pain cidade nucun ma', tomi' ac tococwa tara: Tomi' querec te wi xijexi' e', xi mam' pin ara tain ovelha ne ca pan' am pane ta na ca tomi' tococwa ma'.

⁷ Je ca tomi' xuhu' ca' ac tococwa na. Ac i ma' tara Iri' Jam cocon oro jam co taramaja mi' nonon pain pawin cain, tomi' querec te tamana tatara con wari' co cwirin' pin nain ca caracat nucun ta. Xica' pe paxi' tara, tomi' querec te tiquin' ca' totonon cocon ca 99 nucucun co wara xuruxut xo' nana ma', co wara cwirin' pin nanain ca caracat nucucun ta na ca tomi' tococwa ma'.

Ca pijim' joc mam' mi' tococwa pain wijimain moeda ca pan' am

⁸ Am ma' cama narima' ma', co ma' 10 nam moeda nein dracma ma' ac tococwa na. Pan' am xica' pe ac ne na cam. Cain' cain' xira quem? Om ta pirao' camain ra? Pirao' tain tara. Tom tarain naran, ton ho' ac camain tara xiricam, pirao' pirao' mam' ac camain tara quem. ⁹ Mam' pin iri tarain ne, tomi' ac tacacama tara oro win ma' cama cacam oro xequequem co to ho'

15.6 Wari' co wina nain ovelha ma', co pirao' nain wijimain ovelha ca pan' am ma', an xiho' non Jeju. Wijimain ovelha ma' iri na ne, an xiho' non wari' co caracat quem. Mam' iri non co caracat Jeju ne, tomi' querec te tamana ac con na quem. **15.8** Dracma ma', je i ma' dinheiro nucucun oro grego pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na dracma pain ca taramaja nucun.

ja' pan nanam pain cidade nequem. Harahap je, tomi' querec te wi xijexi' e', xi mam' pin ara tain moeda ne ca pan' am pane ta ac tacacama tara.

¹⁰ Je ca tomi' xuhu' ca' ac tococwa na. Tomi' querec te ac i ma' nana oro jam co taramaja mi' nonon Iri' Jam, tomi' querec te tamana nonon wari' co cwirin' pin nain ca caracat nucun. Xica' pe paxi' na, tomi' querec te tamana nonon ta na ca tomi' tococwa ma'.

**Ca pijim' joc mam' mi' tococwa con panxica wari' co pan' am ma',
con xucun panxica co pe ho' cara non cote ca quem**

¹¹ Pijim' pijim' tiquin' ac tococwa na: Ma' na wari' co wanxi' pane. Ma' 2 nana mana panxica. ¹² Tomi' pan ac ca na panxica co xo' hwara'. Tomi' xim inem ta te non. Cut mi' ne pain caramajum ca wara tomi' an to mi' mapa' pane, wara cut mi' ne pain, pain ca om mi' pin querec ma ca' na ca tomi' con ma'. Na ra ac ca na, cut mi' ac tococwa pain caramaxicon na mana panxica.

¹³ Om ca pain homa ne, mao tain xijein macan' pain pira ta ac ca na co xo' hwara' ma'. Vender pin iri nain oro caramaxicon ne, cut in cut in pi' pin ac cain na dinheiro nein, mao ac ca na quem. Wa' mao iri nain i cain ne, tamanain pe ac ca na, waraju pin ac cain na dinheiro nucun. ¹⁴ Waraju waraju pi' pin iri nain dinheiro nucun ne, pe' tamana ac caca na oro wari' co to nanain i cain. Ximin pan ac ca na quem. ¹⁵ Je ca hwet con wari' nein macan' ca pe pan ca ma'. Xiram pa' ne, pe ho' xim, taramaja mi' xim ta ac con na. Je i ma' ta ac ca na, mo hwet rain caji mijac ne cain, querec wet rain ta ac con na. ¹⁶ Ximin na, xi pe' tamana ara ca ta. Cao' xitain caramaji mijac na ina me na. Ane om xiram pa' camain' cocon oro wari' ne.

¹⁷ Aram aram coromicat xo' pin ac ca na. Querec pin' xucun pain ca tamanain nucun. Wa ina me ac xucun na. Ma' ma' pi' pin nonon carawa ca cao' wa oro wari' co taramaja mi' nonon te ta. Ma'am ca' nanain quem. Wata' iri na ne, mi' inain xocomu ta ac xucun na. ¹⁸ In hwet ton te ta ac

15.9 Narima' co pirao' nain moeda nein dracma ma', an xiho' non Jeju. Moeda nein dracma nequem ma' iri na ne, an xiho' non wari' co caracat quem. An xiho' nain ca pijim' nucun pain wijimain ovelha ma' quem. Pain ca tomi' querec te cama narima' co mam' nain moeda nequem ma', ac i ma' na ca tomi' querec te tamana ca Jeju pain ca mam' con co caracat ma' quem.

xucun na. Tomi' ton, caracat ina ta te, xi ari ara ton Iri' Jam pane ta, ari inem pane quem ac ton tara. ¹⁹Om ca hohot ne pain ca panxita' mami' mapa' ca'. Ac wari' co taramaja mi' mapa' pain xuru ta ne e', ac i ma' tara ca tomi' ton te ta ac xucun na. ²⁰Hwet ho' ton ta ac ca na, mao ac ca na quem.

Wa' mao ta' iri na ne, querec pira ac con na cote ca. Xiram pa' tamana non panxica. Mo hwet ac con na, pe horoman tapan' ac con na, xup ac con na pain orocoxicon quem.

²¹Caracat ina ta te ac con na panxica. Caracat ina, xi ari ara ton Iri' Jam pane ta. Ari inem quem. Om ca hohot ne pain ca panxita' mami' mapa' ta non.

²²Om na ta arain ac con na cote ca. Harahap je e' ac tococwa na co taramaja mi' e' nonon ma'. An qui' jun iri' wom ma', co awi tiquin' ca' non oro xucun wom pain xuru ca'. Pe jun con panxita' cwa' tata. Pe jun pain micon anel, pe jun pain caximacon caji caxim ma' quem ac tococwa na. ²³An qui' ac hwein tara wijimain boi ca towe awi ma'. To' pa' pin ac hwein tara, xain ac hwein tara. Cao' querec te xi'. ²⁴Xi in qui' ara ca panxita' cwa' ta. Ac ca mi' pin ca paxi' na ira, ac ca e' mami' ca na pain xocori ca'. Ac ca pan' am ca paxi' na, ane mam' ton ne na cote ca. Tomi' querec te xi', xi om ne ca in hwet ara capa' ta na.

²⁵Panxica co wara ma' ma' iri na ne, taramaja pe nain xitot. In mao tain xirim ta ac ca na. Hwet pin tain iri nain xirim ne, taraju ac cain na tamara', taraju nain ca tomi' querec te nequequem co pi' xirao' nana ma' quem. ²⁶Merem qui' ac con na wari' co taramaja mi' e' nonon ma': Ma' carawa ca ara cacama quem non.

²⁷Om na, in qui' na coxa' ma ta. To' pa' pin jein wijimain boi ca towe awi ma' naparut cote ma. Xi om ne ca in qui' xo' ara ca coxa' ma ta. Jain jain paxi' na pain i cain, ane awi pin ca pain xocori ca' ne na ca tomi' con ma'.

²⁸Mana' tamana ac ca na cwaji' ca ma'. Om ca corom ra ha' ca. Hwet qui' ac ca na cote ca, tomi' mip ac con na: Corom ra corom ra paxi' non. ²⁹Ane tomi' pan ca panxica ma' ne: Taraju wet ne e'! Mija na oro cawaxi' ca taramaja mi' xim ca'. Ac ca taramaja caca co taramaja mi' e' nenem cwa' ina pum. Om paxi' na ca ari camain' xim ta. Tama' tomi' ha' paxi' inem. Ane om mi' camain' mapa' pain carawa ca mam' cao' querec te wi ta' cocon oro win ma' ne ne. Mo xi mi' mapa' pain wijimain cabrito. Om

ca mi' camain' mapa' pain. ³⁰Panxima iri na ne, co mam' waraju nain dinheiro nein caramajum cacam oro caxicam narima' ma', in qui' iri na ne, to' pa' mi' ac mon na pain wijimain boi ca towe awi na ca tomi' con cote ca ma'.

³¹Om na ta arain ac con na cote ca. Wara pe ho' cara mapa', mene mene pi' pin main oro caramaju ca' quem. ³²Na e' na pain ca an hwet xin ca tomi' querec te nexi' pain ca cao' querec te nexi' ca'. Xi in qui' ara ca coxa' ma cwa'. Mi' pin tara paxi' urun pane. Ane in qui' ca ne. Ac ca e' mami' ca na. Pan' am tara paxi' urun pane quem. Ane in hwet capari' ne. Ac ca mam' xun na ta na ca tomi' con panxica ma'. Ac i ma' na ca pijim' tococwa pane.

**Ca pijim' joc mam' mi' tococwa con wari' co
querec wet mixein nain caramaxicon taramaxicon**

16 Tomi' pan ac cocon na co taxipa' ca Jeju: Ma' na wari' co querec wet nain caramaxicon taramaxicon co caramaju. Aram aram maqui' ac ne na xec nein ca tomi' em' tocwa pain ca om taramaja xo' ca. Waraju nain caramajum ta nonon taramaxicon oro wari'. ²Hap ra ta ac con na, tomi' querec ac con na: Cain' cain' xima quem? Tomi' hwet nanapa' pain ca waraju main caramaju ca! Cut qui' rain papel ca xirao' pe main oro ca taramaja nem pain dinheiro ne ma', pain ca waraju main oro caramaju ca'. Xi na ne pain ca querec wet mami' main caramaju ta non.

³Noc pin napa' pain ca taramaja mi' mami' ton taramaxicon ne cwa' ac xucun na co querec wet nain caramaxicon ma'. Cain' cain' xita' quem ac xucun na. Om ca taramaja ac ta' pain xitot, xi hwara' opa ta' ta. Wixipa' xita' pain ca tama' mi' xine toton pain dinheiro je oro carawa oro wari' ma' quem, ac i ma' na ca coromicat pan xucun. ⁴Coromicat xo' ac ca na. Na xin ne ac ca na, taxi' pin inain carawa ca ara ta' ta' ca', ma' ta mija pin cacapa' oro wari' co xiram pa' xim nanapa' pain ca ximin ta' ta' ca'. Maqui' pin iri tara xec nein ca om taramaja mi' mami' ac ton taramaxicon

15.32 Wari' co wanxi' ma', an xiho' non Jeju. Panxica co pan' am ma', an xiho' non wari' co caracat. Xucun panxica co mana' non cote ca ma' iri na ne, co om tomi' querec te non coxa' ca pain ca in qui' nucun ma', wirico co an xiho' nonon oro fariseu co tomi' ximama' nonon Jeju pain ca tomi' querec te cocon oro caracat ma' quem.

ne cwa' ne, tomi' querec te ac cacapa' tara, pe ho' xut pain xuruxut ca' ac cacapa' tara, quep xiho' ac cacapa' tara quem na ca tomi' xucun ma'.

⁵Tomi' tomi' xam' ac tococwa na oro wari' co dever nonon taramaxicon nucun. Harahap je tata, tomi' querec ac con na co hwet cain' non ma': Ma' carawa ca dever mon taramaxicon ne quem non. ⁶Om na, dever 100 inon pain cote ne too nein homain winain oliva ac ca na.

Hap ra, je i ca' ca xirao' nein ca dever mon ca'. Xirao' ni rain, dever 50 inon pain cote ne too nein homain oliva ta rain con na ca tomi' con ma'.

⁷Tomi' querec ac con na xucun ma' quem: Wum quem? Ma' carawa ca dever mon taramaxicon ne quem non. Om na, dever 100 inon pain cote ne cotain trigo ta ac ca na.

Om na, je i ca' ca xirao' nein ca dever mon ca' ac con na. Xirao' ni rain, dever 80 inon pain cote ne cotain trigo ta rain con na ca tomi' con ma'.

⁸Taramaxicon nucun ma', taxi' pin iri non pain ca mixein ca ne pain ca waraju cain caramaxicon ma', he ac con na. In ac non quem. Om ca in ac con pain ca mixein nucun. In ac non pain ca ma' ne ximicon ma', pain ca wara coromicat an pe xo' nucun pain ca main quep xiho' tatarapa' oro win ma' ne pain ca aram aram ximin ta' ca ma' na ca pijim' tococwa ma'.

Tomi' ac tococwa na: Ac i ma' taxipa' nana oro wari' co om howa nonon Iri' Jam. Coromicat xo' tiquin' ca' nonon oro wari' co howa nana cwa', ma' tiquin' ca' nonon pain ca xumu wa pain ca wara coromicat an pe xo' taxi' nucucun ma', pain ca to' querec pin' cocon oro win ma' caca co aram aram quep xiho' xun nonon pain ca ximin nucucun ma'.

⁹Je ca tomi' xuhu' ca' ac tococwa na. Xiram pa' jujun oro wari', mam' xiram pa' jujun pain oro carawa ca cut hwe pain macan' ca'. Om pin iri turuhu' oro carawa ne, pain ca cono' pin xi' hwe ma', tomi' querec te pan ac cucuhu' tara pain ca aram aram to pin xin hwein pawin cain ta na ca tomi' tococwa ma'.

¹⁰Wari' co taramaja xo' ma', co querec wet xo' nain wijimain carawa ma', taramaja xo' tara pain ca querec wet xo' cain cote ne carawa quem ac tococwa na. Wari' co om taramaja xo' ma' iri na ne, pain ca querec wet mixein cain wijimain carawa ma', om ta taramaja xo' ca pain ca querec wet mixein cain cote ne carawa ma' quem. ¹¹Je ca tomi' xuhu' ca' ac tococwa na. Mo ta om howa ac xihwe pain ca querec wet hwein oro caramaji macan' ca', om ta querec wet jein iri' caramaju ta cuhu' Iri' Jam quem. ¹²Mo ta om howa ac xihwe pain ca querec wet hwein

caramaxicocon oro win ma' nuhu' ma', om ta mi' xihwe pain carawa pain pawin cain quem. ¹³Wari' co taramaja ma', om ca taramaja mi' 2 ac cocon oro taramaxicon. Mo ta param con xucun, noc ac con tara xucun. Mo ta win xumu con xucun, tomi' napat ac con tara xucun. Je ca tomi' xuhu' ca': Om ca taramaja mi' ac hun Iri' Jam pain ca taramaja mi' taramaja mi' wet hwein dinheiro ta na ca tomi' tococwa ma'.

¹⁴Oro fariseu ma', co param nanain dinheiro ma', taraju nonon Jeju pain ca tomi' ac i ma' ca ma'. Tatam' ac cocon na, tomi' xirac nonon quem. ¹⁵Tomi' ac tococwa na: Ac ca iri'o' xi' ca' tara me paxi' hwe cocon oro wari' ta, ane querec pin' pan cuhu' Iri' Jam ne. Querec pin' nuhu' pain iri' xumuhu' ma'. Carawa ca in ac caca oro wari' ma', om ca hohot camain' con Iri' Jam. Noc pan nain ta na ca tomi' tococwa ma'.

¹⁶Tomi' ac tococwa na: Oro co pijim' hwet nanain ca xirao' nucun Moisés pain oro ca xirao' nucucun oro profeta pane, pijim' pijim' ca' nanain, aram aram maqui' ac ne na xec nein ca ja' taxipa' com João pane ta nonon. Mi' pin iri na João ne, pijim' hwet pan ac tain na capiiacon Iri' Jam pain ca taramaxicon pe ho' toton cocon oro wari' quem. Jain jain jain jain pi' pin nana oro wari' pain ca taramaxicon pe ho' xirapari' na cocon quem. ¹⁷Ma' ma' wet na ca xirao' pe ca Moisés je oro ca xirao' to caca oro profeta quem. Pan' am paxi' tara nanawin pain macan' ca'. Ane om pan' am camain' ne ca xirao' nucun Moisés cocon oro profeta ne. Om ta pan' am camain' ne wijimain ca xirao' nein cocon ta.

¹⁸Je ca om na ne pain ca an ca xequem narima' wari' co an pe pin nam manacon ma'. Mo ta an cam xequem narima' ma', caracat ac ca tara. Wari' co an nam narima' co an pe pin nam quem, caracat ac ca tara quem na ca tomi' tococwa ma'.

Ca pijim' joc mam' mi' tococwa con Lázaro con wari' co caramaju

¹⁹Ma' na wari' co caramaju pane ac tococwa na. Pe taxipa' non iri' wom co mija dinheiro nucun. Cao' e' nain oro carawa ca mija dinheiro nein pain oro xijein xec quem. ²⁰Ma' na xucun wari' co an pe wa pain cacarain manain xiricon co caramaju ma' quem. Om non carawa. Lázaro na wixicon. Mija non oro caji nan quem. ²¹Cao' xita' na nain pawirinain caramaxicon ca cao' ca co ma' co caramaju ma' quem. Ximin na, maqui' maqui' na oromijac ma', xicot xicot ac cain na nonacon ma' quem.

²² Aram aram maqui' ac ne na xec nein ca mi' pin nucun Lázaro ma'. An mao ac cocon na oro jam co taramaja mi' nonon Iri' Jam. O mi' nonon con Abraão cara pane. Aram aram mi' pin ac ca na co ma' co caramaju ma' quem. An corom pe ac xine na curucun pain manain pacun. ²³ Jain jain pe pan ac cain na cote ne xe quem. Mija na ca jain jain ca. Querec pira ac con na Abraão. Querec pira non Lázaro pain ca pe ho' con quem. ²⁴ Merem ac ca na: Xiram pa' ne ta jeo' Abraão. Tomi' mi' ne con Lázaro ma'. Xin cam rain tamain mum pain com ron ne con me, ara xio rain petehwet nucun ne con me. Xi jain jain tamana ara ta' pain xe ca' paxi' non.

²⁵ Ane tomi' in pin con Abraão ne: Om na ta arain. Mam' pe wet rain oro carawa ca hohot nem pain ca e' e' wet ma pain macan' pane. Tomi' querec te ma pain oro carawa ca awi ca param ma pane quem. Lázaro cwa' iri na ne, ximin na pane. Om ca ma' camain' con carawa ca awi. Ac i ma' paxi' hwe pain cara pane. Ane ja' tomi' querec te tocwa Lázaro pain i ca' ne. Wum iri na ne, jain jain tamana pan ma pain cote ne xe ma' ta. ²⁶ Om ca hwet ac quem Lázaro cwa', xi tac caho' ara capari' cote ne man ca om tawiri ma'. Wari' co hwet xim nuhu' pain i ma' parut, om ca hwet ac cuhu'. Wari' co hwet xim naparut pain i ca' pahu', om ca hwet ac caparut quem na ca tomi' con ma'.

²⁷ Jain jain ac ca na. Om na ta jeo' ac con na. Mao rain i cain ron pain xiricon te ta. ²⁸ Xi ma' ara caca xere ta. Ma' 5 nana. Wara tomi' xo' totoron, hu totoron, ma' ta om hwet cacapa' pain ca jain jain pe ta' ca', pain cote ne xe ca' na ca tomi' con ma'.

²⁹ Om na ta ac con na Abraão. Wara taraju nanain ca xirao' nucun Moisés pain ca xirao' nucucun oro profeta pane. Tomi' ha' ma' tatarain ca xirao' nucucun ne na.

³⁰ Om na ta jeo' Abraão ac ca na. Mo xi hwet cocon wari' co e' mami' ma', cwirin' pin ac caca xira ta na.

³¹ Om na ta ac con na Abraão. Mo xi tomi' ha' cocon Moisés cocon oro profeta pane, je i ma' xira ca tomi' ha' cocon wari' co e' mami' paxi' ma' quem. Ane om tomi' ha' cocon Moisés cocon oro profeta ne. Om ta tomi' ha' cocon Lázaro quem na ca tomi' con ma'. Ac i ma' na ca pijim' joc mam' mi' tococwa con Lázaro con wari' co caramaju pane ta.

**Ca caracat wa, je pain ca om mana' caracan
xijexi' pain ca ara cup xijexi' quem**

Mateus 18.6-7; Mateus 18.21-35; Marcos 9.42

17 Tomi' pan ac cocon na co taxipa' ca Jeju: Ma' paxi' na oro carawa ca to' caracat nain ca wari' wa ca', je cwerein mao na. Ane ximin tamana pan ta' ca wari' co to' caracat non win ma' ca ne. Wap tamana pan toron Iri' Jam ta. ²Mo xi tucu xine iri' cote ne pacun ca mam' ep xine trigo pain paramacon ma', mo xi xin pocom mi' tocwa pain cote ne com quem, jain jain pije' ac ca xira. Pain ca to' caracat con wari' co an xiho' non pije' co om hwara' opa ma' iri xira ne, mija tamana pan ac ne xira ca jain jain ca pain ca wap ton con Iri' Jam ta tata. ³Ma' tara xumuhu', xuruxut xo' je ta ac tococwa na quem.

Je ca tomi' xuhu' ca', tomi' inem con win howa ma co caracat ma' ac tococwa na. Mo ta caracat ca, mo ta ara cup quem, tomi' xo' ac mon tara. Mo ta cwirin' pin ca, je i ma' ta, mana' mana' om pin inem pain ca caracat nem ac mon tara. ⁴Mo ta ara cup quem, mo ta ara cup mami' quem quem, mo ta ma' 7 pin ne ca ara cup mami' quem, pain ca xica' pe nein xec quem. Mo ta ma' 7 pin ne ca in hwet quem, mo ta tomi' ca' quem: Caracat ina, cwirin' pin inain ca ara cup xim ca', mo ta tomi' ac i ma' quem. Je i ma ta, mana' mana' om pin inem pain ca caracat nem ta ac mon tara ta na ca tomi' tococwa na.

Ca howa xun Jeju

⁵Tomi' ac cocon na Jesus oro apóstolo ma': Howa paxi' urut pum Taramaxicon nuxut. To' hwara' pin rain ca howa nuxut quem me na ca tomi' cocon ma'.

⁶Je i ma' ira ac tococwa na. Noro jein wijimain tocwi mostarda ma'. Iri' wijimain na. Iri' wijimain ac i ma' paxi' tara ca howa nuhu' quem. Je i ma' ira, mo ta howa wijimain e' mahu', ha' ac cuhu' tara pain ca tomi' ca' hwein pana ma': Hot pin xijem, oin' pe xijem pain cote ne com ta, ac i ma' tara ca tomi' hwein. Tomi' ha' ac cuhu' tara quem na ca tomi' tococwa ma'.

Ca taramaja mi' e' xun Iri' Jam

⁷ Je ca tomi' xuhu' ca' ac tococwa na, tomi' inem pain ca ma' ca wari' co taramaja mi' e' nem ma'. Am taramaja pe cain totam, am querec wet cain ovelha nem. Pi' pin iri tara ca taramaja nucun ne, in qui' iri tarain xirim ne, tomi' ac i ca' ton ma ra: Hap ra, xao pe rain i ca', cao' ra, ac i ma' tara ca tomi' mon ra? ⁸ Om na, om ta tomi' ac i ma' mon ta. Ca' tara ca tomi' mon: Hoc mi' ne pain carawa ca cao' wa, pe xo' ac mon tara wom, xat pe ho' ac mapa' tara pain ca cao' ta' ta' ca', je pain ca toc ta' ta' ca' ac mon tara. Pi' pin iri tara ca cao' ne ca' ne, cao' pan ac ma tara, toc pan ac ma tara, ac i ma' tara ca tomi' mon ma'. ⁹ Cain' cain' ton ma pain ca ara ara pi' pin cain oro ca taramaja nucun ca ara ra mon quem? In ac inem pain ca taramaja nem ma', tomi' querec te inem pain, ac i ma' tara ca tomi' ton ma ra? Om na. Xi wara tomi' ha' ne ara mon ta, je ca na e' ne pain ca tomi' ha' quem ma'.

¹⁰ Je ca tomi' xuhu' ca', ac i ma' tara pain ca taramaja nuhu' ma' quem, pain ca taramaja mi' hun Iri' Jam ma' ac tococwa na. Ara ara pi' pin iri jein oro ca taramaja nuhu' ca ara je cuhu' ne, na e' na pain ca tomi' ca' xujuhu': Je i ma' ira, taramaja mi' e' urun Iri' Jam ma', na e' na pain ca tomi' ha' xun pain oro ca ara je capari' ca', ac i ma' tara ca tomi' xujuhu' ta na ca tomi' tococwa ma'.

Ca 10 caca co quep xio pin wawa pain caji nan

¹¹ Mama' xin Jerusalém ta ac ca na Jeju ma', mama' ac caca na. Xuruxut nanain wana ca ac mao nain cacarain Samaria je Galileia ma'. Pe nain quiricon xina Samaria ma', pe nain xijein quiricon Galileia ma', xuruxut mama' nanain wana ca ac nain ximijain. ¹² Tan' mama' iri nanain ca paric to ne xirim ma' ne, xuruxut qui' ac caca na co ma' nonon caji nan. Ma' 10 nana wari' co ma' nonon caji nan. Om ca wixicam cocon, mo mo to ca' nonon. ¹³ Merem mip ac caca na: Jeju. Taramaxicon co ca' na taxipa' capijacon Iri' Jam nana. Xiram pa' xut na ca merem mip caca ma'.

¹⁴ Querec iri tata ne, tomi' ac tococwa na: Jein hwet jujun oro sacerdote co taramaja to nanain cote ne xiricon Iri' Jam cain. Noro jein curuxut ca' ac huhun tara na ca tomi' tococwa ma'.

Mama' ac caca na. Pain ca xuruxut xuruxut wet nucucun ma', om pin nonon caji nan. To' xio pin tata.

¹⁵ Querec pin' querec pin' pi' pin paxi' xucucun pain ca xio pin caca ma', ane ma' xica' pe ca co in hwet non Jeju ne. Tomi' querec te tamana na, merem mip na pain ca awi na Iri' Jam awi na Iri' Jam ta ca ma'. ¹⁶ Pe torotop mi' ac con na pain caximacon. Tomi' querec te tamana inem pain ca to' xio mapa' ca' ac con na. Co ma' co to' xio wa ma', om ca judeu ca. Wari' nein Samaria na.

¹⁷ Cain' cain' xira quem ac ca na Jeju. Om ca ma' 10 caca co to' xio pin ta' quem? Main ca to caca oro xucucun ma' quem, co ma' 9 nana ma' quem? ¹⁸ Je xi in hwet cacapa' quem? Je xi an hwet cacain ca tomi' querec te nucucun pain ca awi na awi na cocon Iri' Jam quem? Xica' pe na co cwa', co tatirim cwa', xica' pe na co cwa' co in hwet napa' cwa'. Xica' pe na co cwa' co an hwet nain ca tomi' querec te nucun pain ca awi na Iri' Jam awi na Iri' Jam ta ca ca' na ca tomi' tococwa ma'.

¹⁹ Tomi' ac con na co xio pin ma': Tequi' pe ra e', mao ac ma tara. Xio pin ma, xi om ne ca howa ara mapa' pain ca to' xio taxi' ta' ca' na ca tomi' con ma'.

Ca taramaxicon pe ho' xim capari' Iri' Jam

Mateus 24.23-28; Mateus 24.37-41

²⁰ Maqui' ac ne na xec pain ca tomi' querec cocon Jeju oro fariseu ma'. Ma' xec ca taramaxicon pe ho' xim capari' Iri' Jam quem na ca tomi' querec cocon ma'.

Xi ma' ne ca querec pin' ac xine xec pain ca taramaxicon pe ho' xun tococwa oro wari' ta ac tococwa na. ²¹ Om ta querec pin' xine iri' maxinain ca taramaxicon pe ta' ca quem. Om ta tomi' ac caca wari': Co cwa' ta, pe

17.14 Je cwerein cocon oro judeu pain cara pane. Ma' na ca xirao' xo' nucun Moisés con wari' co ma' non caji nan. Aram aram om pin iri na oro nan nucun ne, na e' na pain ca hwet con sacerdote co taramaja pe nain cote ne xiricon Iri' Jam. Noro rain cwere ca' ac con na. Am xio pin ta' ca', noro xo' ne me. Mo ta querec pin' mapa' pain ca xio pin ne ca', tom tain' mi' ac mon pain tara carawa ne Iri' Jam me, querec pin' ac cacapa' tara oro wari' pain ca xio pin ne ca' quem, ac i ma' na ca tomi' con sacerdote pane.

nain i ca', om ta tomi' ac i ma' ac caca. Mon cwain, pe nain i cain, om ta tomi' ac i ma' ac caca quem. Xi wara taramaxicon pe ho' ara cuhu' ta na ca tomi' tococwa ma'.

²² Tomi' ac tococwa na co taxipa' ca ma': Main maqui' tara oro xec pain ca coromicat xim mahu' pain ca Iri' Wari' ta' ca'. Wara maqui' xira na urut pain xec nein ca querec xim urut pum pain ca Taramaxicon pin ta' ma ma', ac i ma' paxi' tara ca jain jain xim mahu'. Ane om maqui' hap ta' ne xec nein ca Taramaxicon pin ta' ta' ne. ²³ Tomi' ca' tuturuhu' oro wari': Mon cwain, pe nain i cain, ac i ma' tuturuhu'. Tomi' ca' tuturuhu' oro xucucun ma' quem: Mon cwa', pe nain i ca', ac i ma' tuturuhu'. Ta howa huhun me, ta ja' tequi' hap huhun pain ca querec xi' e' huhun me. ²⁴ Maqui' ta' iri tara xec nein ne, pain ca in qui' ta' ta' pain ca Iri' Wari' ta' ca', ane ane maqui' ac ta' tara, querec querec pi' pin tatarapa' oro wari' pain oro xijein macan'. Win ne ca ane ane coc wein ca comerem ma', pain ca coc wein qui' cain pira pain quirinain pawin cain, ca coc wein mao ac cain na xijein quirinain pawin cain quem, ac i ma' ta' pain ca maqui' hap ne ta. Querec querec pi' pin tatarapa' oro wari' ta. ²⁵ Ame hwe e' ac tococwa na. Na e' na pain ca jain jain cain' ta'. Jain jain tamana ta'. Oro wari' co e' e' wet nana pain xocori ca', noc tatarapa' quem.

²⁶ Ac pain oro xec nein ca e' e' wet ca Noé cara pane tara, ac i ma' tara pain oro xec nein ca in qui' ta' ne ca', pain ca Iri' Wari' ta' ca' ac tococwa na. ²⁷ Noro jujun oro win ma' ca Noé pane. Ara e' nanain oro ca ara taxipa' caca oro wari' pane. Co cao' nana, co toc nana, co cut nana narima', co cut nana tarama' pain ca narima' nequequem ma' quem. Ac i ma' ac i ma' nana, om om maqui' pa' ac cocon na xec nein ca corom cain mam' horoho wa Noé cacam oro ca nari nucun pane. Pan' tamana ac ne na cote ne xowi', to' om to' om pi' pin ac tococwa na oro wari' co om corom to nanain mam' horoho wa, je oro carawa ca om corom ma' quem.

²⁸ Ac i ma' na pain oro xec nein ca e' e' wet ca Ló cara pane quem. Oro win ma' ca pane, ara e' nanain ca ara taxipa' caca oro win ma' caca pane. Co cao' nana, co toc nana, co cut nanain carawa, co vender nanain quem, co oin' nanain xitot, co quep nanain xirim. ²⁹ Maqui' pin iri na xec nein ca paca' cain cidade ca to caca Ló pane ne, je Sodoma pane, camara' qui' ac nein na pawin xe je pacun ca weo pane. Ac xowi' na pain ca camara' qui' nein pawin. To' om to' om pi' pin ac tococwa na oro wari' co om paca' nanain Sodoma pane.

³⁰Ac i ma' tataro wari' pain xec nein ca in qui' ta' ne quem. Om ta maqui' ca ma' tatarapa'. Ara ara e' tatarain oro ca ara taxipa' caca ma', ane ane hwet pa' ac toton tara. Wata' pain ca Iri' Wari' ta' ca', ane ane hwet pa' ac toton tara ta. ³¹Maqui' iri tara xec nein ca maqui' ta' ta' ne, mo mao hap e' tara wari' co hwet pe ca' nain xiricon. Om ta na ne pain ca corom in mao cain xiricon pain ca cut tain cain caramaxicon ca corom to nain. Mo mao hap e' tara ta. Ac i ma' tara wari' co pe nain totacon ma' quem, om ta na ne pain ca in mao cain xiricon, mo mao hap e' tara ta. ³²Mam' pe wet jem manacon Ló cara pane. ³³Wari' co win xumu e' tain nain ca param pan nucun pain macan' ca', om ta e' cara pe cain pawin ta. Wari' co miri'om nain ca param pan nucun pain macan' ca' iri na ne, pain ca win xumu e' capa' ma', wirico tara co e' cara pe tain nain pawin ta. ³⁴Je ca tomi' xuhu' ca' ac tococwa na. Mo ta in qui' towa ta', am ma' 2 caca co pi'am to ho' xucucun ma'. An mao ac tocwa tara xucun, an pe pin ac tocwa tara xucun. ³⁵Am ma' 2 cacama oro narima' co ep wi nana. An mao ac tacama tara xequem, an pe pin ac tacama tara xequem quem. ³⁶Am ma' 2 caca co taramaja to nanain xitot. An mao ac tocwa tara xucun, an pe pin ac tocwa tara xucun ma' quem na ca tomi' tococwa ma'.

³⁷Tomi' querec ac cocon na co taxipa' ca ma': Main quem Taramaxicon nuxut? Ca tomi' nem ca' ne, main xi ara pe ne quem nonon.

Om na, win ne pain ca mi' pin pe nein mahweri carawa ma' ac tococwa na. Taxi' taxi' pi' pin nanain oro wari'. Xi om ne ca cut in to cut in to ara cain i ma' maho ta na ca tomi' tococwa ma'.

Ca na e' ne pain ca tomi' ho' tomi' ho' xun Iri' Jam

18 Pijim' ac tococwa na co taxipa' ca ma'. Pijim' joc mam' mi' tata cam narima' co tomi' ho' tomi' ho' non juiz pain carawa ca param cama ma'. Pijim' joc mam' mi' tata cam, ma' ta taraju pa' hwe pain ca na e' ne pain ca tomi' ho' tomi' ho' hun Iri' Jam ta tata. Ta naro camain' hwe pain ca tomi' ho' tomi' ho' hun me tata. ²Ca' na ca pijim' tococwa ma': Ma'

17.32 Pain ca tomi' ha' harahap xine me tococwa ma', tomi' mi' nonon con Ló cam manacon cacam mana panxica pane. Ta an xiho' hwem manacon pain ca om tomi' ha' cama pane tata. Ta in querec in hwe me ta paxi' tata pane, ane in querec in cama manacon ne. Mi' pin ac cama na. Mi' tequi' pe na, sal pin ac ne na cwerequem. Xat ac cama ma' na pane.

na wari' co juiz pe ho' nonon oro win ma' ca pain cidade nucucun. Om ca jin' camain' con Iri' Jam, om ca xiram pa' camain' tococwa oro wari' quem. ³Ma' na narima' co pe nain cidade nucucun ma'. Wara mi' pin ca' nam taxicam. Tama' hwet ho' hwet ho' non juiz ma'. Jain jain na pain ca tomi' con. Quep xiho' ne con wari' co mixein napa' ma' me. Tomi' xo' ron, nain ho' ne con me na ca tomi' con ma'.

⁴⁻⁵Tama' tomi' ho' tomi' ho' paxi' non, ane om ha' cam ne. Om ca quep xiho' ram ha' ca. Aram aram tomi' pan ac xucun na: Mija a xira narima' cwa'! Om paxi' na ca jin' ton Iri' Jam. Om paxi' na ca xiram pa' toton oro wari' ma' quem. Miri'om e' inonon co xiram pa' xut nanapa' ma' quem. Ane to' i'ina capa' pain ca tama' tomi' ho' tomi' ho' capa' cam cwa' ne. Quep xiho' tam ta. Tomi' querec xo' ton, am iri'o' ne pain ca mixein cam ma'. Mo ta querec pin' ton pain ca em' nucun pain ca mixein cam ma', tomi' mi' ac ton tara pain ca wap wa ta na, ac i ma' na ca pijim' tococwa cam narima' con juiz ma'.

⁶Tomi' tomi' tiquin' ac ca na Taramaxicon nexi': Noro jein ca tomi' nucun juiz co mixein ma'. ⁷Quep xiho' tam ta na. Om ta ac i ma' ca Iri' Jam quem ra? Om ta quep xiho' cocon oro wari' nucun co wara tora' ca ma', co tama' quep xiho' xut cocon oro wari' co mixein nanaparut cwa' nonon pain xec je pain xim quem ra? Miri'om cara totonon ra? Om ta miri'om cara cocon ta. ⁸Je ca tomi' xuhu' ca' ac tococwa na. Quep xiho' hap totonon oro wari' co wara tora' ca ma'. Tomi' mi' hap totonon pain ca wap wa oro wari' co mixein nonon quem. Ac i ma' ton paxi' nonon. Ane tomi' querec pan xije ca' ne. Wata' pain ca Iri' Wari' ta' ca', tomi' querec pan xije: Ma' ma' wet tatara oro wari' co howa nonon Iri' Jam pain ca aram aram in qui' tain macan' ra? Howa howa wet totonon pain ca quep xiho' taxipa' ton nonon ra na ca tomi' tococwa ma'.

Ca om na ne pain ca xec xec iri' pain ca tomi' xun Iri' Jam

⁹To nanain i ma' oro wari' co coromicat ca' xucucun: Awi urut, tama' ara xo' urut, hohot urut con Iri' Jam xi' ma nana, ac i ma' na ca coromicat nucucun. Tomi' napat nonon oro xucucun wari' ma' quem. Je ca pijim' cocon Jeju ma', pijim' joc mam' mi' tata con fariseu con wari' co taramaja mi' nonon oro taramaxicon pain ca cut in taxipa' cain oro imposto nucucun oro wari'. Ca' na ca pijim' nucun: ¹⁰Ma' 2 nana wari' co mama' nanain

cote ne xiricon Iri' Jam. Tomi' xun Iri' Jam ta nana. Fariseu na xucun. Xucun ma' iri na ne, cut in taxipa' nain oro imposto. ¹¹Corom mama' iri nanain ca tao' caho' nein cote ne xiricon Iri' Jam ne, xat pe ac cain i ma' na fariseu ma'. Tomi' ton Iri' Jam ta ac ca na. Om ca hwet ne ca tomi' nucun, tomi' pan xucun pain ca coromicat nucun. Ca' na ca tomi' con ma': Iri' Jam ac ca na. Tomi' querec te inem pain ca om an xiho' toton oro caracat ma': Co param ximama' nanain caramaxicocon oro win ma' caca ma', co om ximicocon ma', co quep nanam manacocon oro win ma' caca ma' quem, tomi' querec te inem pain ca om an xiho' toton ta. Tomi' querec te inem pain ca om an xiho' ton caxicon wari' cwa' quem, co cut in taxipa' nain imposto cwa'. ¹²An pe taxipa' inain ca cao' wa pain ca tomi' xim xim quem Iri' Jam. Ma' 2 taxipa' napa' xec pain oro semana pain ca an pe tain ca cao' wa pum. Mi' taxipa' inem pain dízimo nein oro carawa ca cut ta' quem, ac i ma' ina pain ca xut xo' ta' ca' na ca tomi' ca fariseu pain ca tomi' con Iri' Jam.

¹³Co ma' co cut in taxipa' imposto ma' iri na ne, mo mo pe na. Om ca noro piri' ca, noro qui'ji' nain macan', xi wixipa' ara ca ta. Wap nain quimacon pain ca querec pin' xucun pain ca pan tem nucun. Xiram pa' ne ta Iri' Jam. Caracat ara xi' ina ta na. Ac i ma' na ca pijim' nucun Jeju ma'.

¹⁴Je ca tomi' xuhu' ca' ac tococwa na. In mama' iri nanain xiricocon ne, querec hohot pan inem ta non Iri' Jam co ma' co cut in taxipa' imposto ma'. Fariseu ma' iri na ne, om ca querec hohot pan inem ta con Iri' Jam. Je ca tomi' xuhu' ca': Wari' co xec xec ma', pain ca hwara' opa ina xi' ma ca ma', to' wixipa' ac tocwa tara. Wari' co om xec xec ma' iri na ne, pain ca om ca hwara' opa ta' ta pan xucun ma', to' hwara' opa pin ac tocwa tara quem na ca tomi' tococwa ma'.

**Ca na e' ne pain ca an xiho' xuxun oro hwijima'
pain ca om xec xec querec nucucun**

Mateus 19.13-15; Marcos 10.13-16

¹⁵Ma' ac cacama na co o qui' nanam humaxicacam. O mi' nanam con Jeju. Ma' ta quep mamam pain winacacam pain ca tomi' mi' mamam con Iri' Jam ta nonon. Querec iri nanam co taxipa' ca ma' ne, pain ca o qui' cacam humaxicacam ma', tomi' in pin ac cacam na. Ta o mi' hun cacam humajuhu' me ta nanam.

¹⁶ Ane tomi' in pin cocon Jeju ne. Harahap je ta ac tacacama na hwijima' ma', tomi' ac tococwa na co taxipa' ca ma' quem: Ta narain ho' hwehwem pain ca hwet cacapa' hwijima' cwa' me ta. Ta tomi' in pin hwehwem me ta. Oro wari' co an xiho' nanam pain ca om xec xec nequequem ma', pain ca howa cacapa' ma', wiricoco tatara co taramaxicon pe ho' ca Iri' Jam ta. ¹⁷ Je ca tomi' xuhu' ca', tomi' iri'o' inuhu': Mo ta om an xiho' hwehwem hwijima' pain ca tomi' querec te cocon Iri' Jam pain ca taramaxicon pe ho' xuhu' ta cocon ma', om ta hwet camain' hun pain ca taramaxicon pe ca pain pawin cain ta na ca tomi' tococwa ma'.

**Ca to' i'ina capari' oro caramajixi' pain ca xin ne xun
Iri' Jam pain ca taramaxicon pe ho' xim capari'**

Mateus 19.16-30; Marcos 10.17-31

¹⁸ Ma' ac ca na wari' co hwara' opa ma'. Tomi' querec ac con na Jeju: Taramaxicon co awi, co ca' na taxipa' capijacon Iri' Jam ac con na. Cain' cain' xita' quem? Param inain ca e' cara pe ho' ton Iri' Jam ta non.

¹⁹ Para awi ma mapa' quem ac con na. Om na wari' co awi. Xica' pe na Iri' Jam co awi. ²⁰ Taxi' ara xi' main oro capijacon Iri' Jam ca tomi' ha' je capari' pane. Ca' na con: Ta quep mam manacon win ma' ma me ta. Ta to' pa' mon wari' me ta. Ta an noc xa ma me ta. Ta tomi' mixein mi' mon pain ca em' wa win ma' ma me ta. Tomi' ha' ron cote ma cam jim ta, ac i ma' na ca tomi' ha' je capari' ta na ca tomi' xo' con ma'.

²¹ Om na, tama' tomi' ha' tomi' ha' pi' pin inain i ma' ta. Tomi' ha' qui' inain pain ca pije' ne pane ac con na.

²² Taraju iri non Jeju ne, pain ca tomi' ac i ma' ca ma', tomi' ac con na: Ma' ma' wet na carawa ca om ara querec ma ma' non. Vender vender pi' pin rain oro caramajum. Cut iri rain dinheiro nein ne, cut mi' ac momon pain tara co om nonon carawa. Caramaju pe ac main tara pawin cain. Cut mi' cut mi' pi' pin iri roron pain dinheiro nem ne, in hwet ac mapa' tara, ja' ja' ac mapa' tara ta na ca tomi' con ma'.

²³ Taraju iri nain i ma' ne, tomi' xaxa' ac ca na, xi caramaju tamana ara ca ta. ²⁴ Querec iri non Jeju ne, pain ca tomi' xaxa' tamana nucun ma', tomi' ac ca na: Oro wari' co caramaju nana ma', i'ina tamana nonon pain ca xin ne cocon Iri' Jam pain ca taramaxicon pe ho' toton cocon ta. ²⁵ Win ne camelo ma'. Cote ne carawa na camelo. Ha' xirain pain ca corom nein

wijimain manain ca mam' oc tocwa wom ra? Om xi ha' nein. I'ina xirain, om xi corom ac nein. Ac i ma' na con wari' co caramaju ma' quem. I'ina tamana non pain ca xin ne con Iri' Jam pain ca taramaxicon pe ho' ton con ta. Tomi' iri'o' inuhu' ta na ca tomi' tococwa ma'.

²⁶ Oro wari' co taraju nonon pain ca tomi' ac i ma' ca ma', tomi' querec ac cocon na: Cain' cain' xira quem? Cain' xi witan ac wa quem nonon.

²⁷ Om na, oro wari' ma', om ca to' witan pan ac xucucun. Iri' Jam ma' iri na ne, ha' non pain ca to' witan cocon oro wari' na ca tomi' tococwa ma'.

²⁸ Tomi' ac con na Pedro. Win urut ca'. An to an to pi' pin urut pain oro caramajuxut ta. Ma' ta ja' ja' xim urut pum ta non.

²⁹ Om na, je ca tomi' xuhu' ca', tomi' iri'o' inuhu' ta ac tococwa na. Wari' co paca' nain xiricon cam manacon cocon xurucun con cote ca cocon mana panxica ma', wari' co ara ac i ma' ma', pain ca taramaja mi' xim capa' pain ca pijim' hwet cocon oro wari' pain ca to' witan ton cocon Iri' Jam ma', ³⁰ wara cut tamana tarain carawa ca awi pain xocori ca'. Mija tara carawa ca awi ca cut ta' ca ma', mija tiquin' ca' tarain carawa ca paca' ca. Aram aram mi' ac tocwa tara pain ca om pi' ra ha' ne ca e' wa quem na ca tomi' tococwa ma'.

**Ca tomi' pe mami' cain ca mi' pin
ta' nucun je pain ca e' mami' ta' nucun quem**

Mateus 20.17-19; Marcos 10.32-34

³¹ Harahap je, xuruxut ni ca' xuxun oro wari' cwa' ac tococwa na co taxipa' ca ma', co ma' 12 nana ma', tomi' ac tococwa na: Taraju wet xine e'. Mama' xin irin Jerusalém ta. Tan' mama' iri xi' ne, hwerehwet hwerehwet pi' pin ac ne tara oro ca xirao' nucucun oro profeta cara pane, pain ca xirao' to cacain oro carawa ca ara ton napa' pain ca Iri' Wari' ta' ca'. ³² Tan' mama' iri xi' ne, quep ac cacapa' tara co noc nanapa' ma'. O mi' ac cacapa' tara cocon oro taramaxicon nucucun co om judeu nana ma' quem. Tatam' tatarapa', tomi' xirac ac cacapa' tara. Tomi' napat tatarapa', cupa' mi' tatarapa', wap ac cacapa' tara, to' pa' pin ac cacapa' tara quem. ³³ Ma' 3 pin iri tara xec pain ca mi' pin ne ne, e' mami' ac ta' tara ta na ca tomi' tococwa ma'.

³⁴Co taxipa' ca ma', om ca taraju pa' camain' cacain ca tomi' nucun Jeju. Ac ca joc xim tococwa pain na ca tomi' mao nein con.

Ca quep ma' pin cain tocon wari' Jeju

Mateus 20.29-34; Marcos 10.46-52

³⁵Wixicam pin ac cain na Jericó Jeju cocon co taxipa' ca ma'. Xao pe pe nain cacarain wana wari' co om tocon ma' quem. Mi' ne taxipa' nonon pain dinheiro oro wari'. ³⁶Taraju iri tata oro wari' co xuruxut tiquin' ca' nonon ma', tomi' querec ac ca na: Ma' carawa pahu'? Para mija hwe pain ca xuruxut tiquin' ca' mahu' ma' na ca tomi' querec tococwa ma'.

³⁷Om na, maqui' na Jeju ma', co wari' nein Nazaré ma' ac cocon na.

³⁸Merem pan ac ca na: Jeju. Winacon Davi. Xiram pa' ne ta Jeju na ca merem nucun.

³⁹Oro wari' co o nana ma', tomi' in pin ac cocon na. Merem maho' ra ta paxi' nonon, ane om ha' ca ne. Merem merem tiquin' na, merem mip na: Winacon Davi. Xiram pa' ne ta Winacon Davi na ca merem nucun.

⁴⁰Xat ac ca na Jeju. O mi' xine con ta ac tococwa na. Wixicam pin iri non ne, tomi' querec pan ac con na Jeju: ⁴¹Ma' carawa ca ara mi' ne mapa' ma' quem non.

Om na, querec mami' xita' na ina ta Taramaxicon ac con na.

⁴²Tomi' ac con na Jeju: Querec mami' ra ta. Xio pin ma, xi om ne ca howa ara mapa' ta na ca tomi' con ma'. ⁴³Querec mami' hap ac ca na, ja' ja' ac con na Jeju. Awi na Iri' Jam awi na Iri' Jam ta na quem. Oro wari' ma' quem, querec iri nana pain ca quep ma' mami' xine tocon ne, awi na Iri' Jam awi na Iri' Jam ta nana quem.

Zaqueu co cut in taxipa' oro imposto

19 Jeju cocon oro wari' co ja' ja' nonon ma', tan' mama' ac cacain na cidade pain Jericó. Xuruxut tiquin' ca' ac cacain na oro xirinain.

18.38 Taraju pa' je e'. Ac i ma' na ca tomi' taxipa' caca oro judeu pane, pain ca tomi' mi' cocon Cristo co wara tomi' pe ca Iri' Jam pane, pain ca main maqui' tara wari' ne co to' witan toton nonon oro wari' ta tococwa pane. Cristo nonon, Winacon Davi nonon, je je ari na ca tomi' mao nein cocon. Pain ca Winacon Davi con Jeju wari' ma', querec pin' non pain ca Cristo ca ma', pain ca to' witan toton cocon oro wari' ma'.

²Pe nain Jericó wari' co caramaju. Zaqueu na wixicon. Zaqueu ma', taramaxicon pe ho' nonon co cut in taxipa' nanain oro imposto cocon oro wari'. ³Querec ton Jeju ta paxi' na, ane om querec ac con ne. Xi hwara' ca ta. Iri' wixicon wari' na. Oro wari' co querec xun Jeju nana ma', tac caho' nonon. ⁴Je ca mo tiquin' mao cain wana ca mao ta' ca Jeju ma', piri' pe ac cain na caji panaji figo ma'. Ma' ta ha' capa' pain ca querec ton ca', pain ca xut tiquin' ca' capa' pain wana ca' na ca coromicat nucun.

⁵Hwet pin iri non Jeju ne, noro piri' ac ca na, tomi' ac con na: Zaqueu. Quiji' hap ra e'. Xi na e' ara capa' pain ca pe ho' xim pain xurum pain xec ca' non. ⁶Quiji' hap ac ca na, maji ta ac con na. Tomi' querec te non quem.

⁷Oro wari' co querec nonon Jeju pain ca hwet con Zaqueu ma', tomi' ximama' tomi' ximama' pi' pin ac caca na. Cain' cain' xira quem? Pe ho' a xiron co caracat ta nana.

⁸Ane tequi' pe ca Zaqueu ne, tomi' ac con na Taramaxicon nexi': Taraju wet ne e' Taramaxicon ac con na. Oro caramaju ca', an to ni an to ni tain, 2 tara ca an to ni nein pata'. Wirain ca pe ho' xim napa', an xiho' tarain wirain ca mi' toton oro wari' co ximin nana ma', co om nonon carawa. Oro wari' co an noc xa ta' pane quem, pain ca cut noc xa 100 tain dinheiro nucun xucun pane, cut in mi' 400 ac ton pain tara. Pain ca cut noc xa 1.000 tain dinheiro nucun xucun pane quem, cut in mi' 4.000 ac ton pain tara quem na ca tomi' pe con ma'.

⁹Tomi' ac ca na Jeju: Zaqueu cocon oro ca nari nucun cwa', to' witan pin tata pain xec ca'. Howa an xiho' ara xi' non hwanana nexi' Abraão quem. ¹⁰Je ca maqui' ta' ca' ac ca na. Wata' pain ca Iri' Wari' ta' ca', hwet inonon oro wari' co an xiho' nonon Zaqueu cwa', co ac ca pan' ara'am caca na pain ca to ni ca' cocon Iri' Jam. Ma' ta pirao' toton, ma' ta to' witan toton ta inonon na ca tomi' tococwa ma'.

Ca pijim' joc mam' mi' tococwa con taramaxicon pain ca in qui' nucun

Mateus 25.14-30

¹¹Taraju nonon Jeju oro wari' ma', pain ca tomi' ac i ma' ca ma'. Coromicat ca' nana: Wa' mao iri tarain Jerusalém ne, taramaxicon hap pin ac ca tara ta nonon. Coromicat ac i ma' nana, xi om ne ca wixicam pin ara cacain Jerusalém ma'. Je ca pijim' joc mam' mi' tococwa con taramaxicon cocon co taramaja mi' nonon ma'. ¹²Ca' na ca pijim' nucun: Ma' na wari'

co hwara' opa ma'. Hwet ton iri' taramaxicon pain xijein macan' pain pira ta ac ca na. Ma' ta mi' capa' pain ca taramaxicon pe ho' toton oro win ma' ne cwa' ta na. Taramaxicon pin iri ta' ne, in qui' ac ta' tara ta na. ¹³ Mao ta' iri na ne, tomi' mam' ac tococwa na co taramaja mi' e' nonon ma'. Ma' 10 nana co harahap je ca ma'. Mi' ac tococwa na pain moeda nein ouro. Mi' xica' pe mi' xica' pe xam' tata pain. Tomi' ac tococwa na: Mam' taramaja xo' jein dinheiro ca mi' xuhu' ca'. Mam' taramaja mam' taramaja, aram aram in hwet ac xuhu' tara pain ca wara mam' taramaja hwara' pin hwein ta tata. Mao ac ca na.

¹⁴ Ane noc cocon oro win ma' ca ne. Noc nonon pain ca taramaxicon pin ta' ca ma'. Je ca tomi' xo' xucucun: Tora' paric xuxun oro win ma' nexi' cwa'. Hwet ac cocon tara iri' taramaxicon cwain, tomi' ac cocon tara: Noc urut con pain ca taramaxicon pe ho' caparut win ma' nuxut pum ta totoron, tomi' ac i ma' totoron iri' taramaxicon cwain ta nana.

¹⁵ Ane miri'om pan tococwa ne. Taramaxicon pe ho' roron ta ac con win ma' nucucun na iri' taramaxicon cwain. In mao ac cain na macaracon. Wa' mao iri na ne, harahap je ac tococwa na co taramaja mi' e' nonon ma', co wara mi' ca pain dinheiro cara pane. Ma' ta taxi' toton pain ca taramaja nucucun ta tata. Am mam' taramaja mam' taramaja hwara' pin cacain quem tata.

¹⁶ Co tomi' cain' ca ma', xut hwet ac con na. Taramaxicon ne ac con na. Moeda nein ouro ca mi' mapa' pane, mam' taramaja mam' taramaja hwara' pin inain. Ma' 10 pin ac capa' na quem na ca tomi' con ma'.

¹⁷ Awi na ta, awi na ca taramaja nem ta ac con na taramaxicon nucun. Mam' taramaja xo' main wijimain dinheiro ne cara pane. Mi' ac xim tara pain ca taramaxicon wa ta. Ma' 10 tara cidade ca taramaxicon pe ra xim ta non.

¹⁸ Xut hwet ac con na xucun ma'. Taramaxicon ne ac con na. Moeda nein ouro ca mi' mapa' pane, mam' taramaja mam' taramaja hwara' pin inain. Ma' 5 pin ac capa' na quem na ca tomi' con ma'.

¹⁹ Awi na ta ac con na taramaxicon nucun. Mi' xim pain ca taramaxicon wa quem. Ma' 5 tara cidade ca taramaxicon pe ra xim ta non.

19.13 Cote ne dinheiro na moeda nein ouro. Wari' co taramaja mi' non xucun wari' ma', mo xi ma' 100 ne xec pain ca momon taramaja mi' con ma', an xica' pe ac cain xira moeda nein ouro.

²⁰ Xut hwet ac con na xucun ma', co taramaja mi' e' non ma'. Taramaxicon ne ac con na. Main ca' moeda nein ouro ca mi' mapa' pane. An pe xo' inain, wiric pa' inain con pawiricon wom. ²¹ Xi jin' ara xim ta. Mo ta pan' am ca' capa' dinheiro nucun taramaxicon ne ca', mana' ac capa' tara, ac i ma' na ca coromicat ta' pum pane. Om ara xi' na ca xiram pa' taxi' ma ta. An xiho' mon wari' co mene taxipa' nain caramaxicon xucun wari'. An xiho' mon wari' co top nain caramaji totacon xucun wari' ma' quem na ca tomi' ximao ca ma'.

²² Taramaja mi' xo' ximapa' ta caxicon pije' ac con na taramaxicon nucun. Wap mip xim ta. Win ne ca tomi' mapa' ca', pain ca om ca xiram pa' taxi' ma ta mapa' ca', om ta xiram pa' xim pain ca wap mip xim quem. Taxi' mapa' pain ca om xiram pa' taxi' ta' ca'. Taxi' mapa' pain ca mene taxipa' tain caramaxicon xucun wari'. Taxi' mapa' pain ca an xiho' ton wari' co top nain caramaji totacon xucun wari' quem. ²³ Je xi an pe xo' main moeda ne pain banco quem? In qui' iri xita' ne, cut mi' ac cacapa' pain xira wara jaminain je xocori ca cut mami' caca pain ca mam' taramaja cacain quem na ca pan to' cain taraxicon.

²⁴ Tomi' ac tococwa na co coco' to nanain i ma': An ca' jun pain moeda nein ouro ca mi' ton pane, mi' ac hun pain tara co ma' 10 non ma' na ca tomi' tococwa ma'.

²⁵ Cain' cain' xima quem taramaxicon nuxut ac cocon na. Wara ma' 10 ara xi' non ta nonon.

²⁶ Om na, je ca tomi' xuhu' ca' ac tococwa na. Wari' co taramaja xo' ma', co win xumu nain ca taramaja nucun ca mi' ton ca', mi' tiquin' ac ton pain tara ca taramaja wa. Wari' co om taramaja xo' ma' iri na ne, co om win xumu nain ca taramaja nucun ca mi' ton ca', an ca' ac ton pain tara ca taramaja nucun ta. Tomi' iri'o' inuhu' ta na ca tomi' tococwa ma'. ²⁷ Tomi' ac tococwa na cocon co noc nonon pain ca taramaxicon pe ho' cocon ma': Cut qui' jujun ta. To' parapa' pin jujun. Coco' ja' pan xine cocon. Ma' ta querec xuhu' pain ca to' parapa' pin huhun ta tata. Ac i ma' na ca pijim' cocon Jeju ma'.

Ca wa' mao cain Jerusalém Jeju

Mateus 21.1-11; Marcos 11.1-11; João 12.12-19

²⁸Pi' pin iri na ca pijim' nucun Jeju ne, xuruxut xuruxut tiquin' ac caca na pain ca mama' xin cacain Jerusalém. O na Jeju, xuruxut nanain waracon co taxipa' ca ma' quem. ²⁹Wixicam pin iri nanain ca paric to ne xirim pain Betfagé ma' ne, je pain Betânia ma', ca to ja' pan nain pacun ma', ca Pacun Nein Oliveira caca oro wari' ma', tomi' ac tococwa na co taxipa' ca ma'. Ma' 2 nana co tomi' ca ma'. ³⁰Mama' jein ca paric to ne xirim ma', ca querec hwe ma'. Hwet pin iri jein ne, mam' ac hwein tara wijimain burro ca tucu pan wa ma', ca om xao pe querec camain' wa ma'. Tacom' hot jein, an qui' ac hwein tara ta. ³¹Mo ta ma' i ma' pahu' quem cuhu' wari' ma', mo ta para tacom' hot hwein quem cuhu', tomi' ac hun tara: Om na, param inain na Taramaxicon nuxut ta ac hun tara na ca tomi' tococwa ma'.

³²Mama' ac caca na, mam' ac cacain na wijimain burro ma'. Win ne ca wara tomi' ca Jeju ma'. ³³Tacom' hot iri nanain ne, tomi' querec ac cocon na oro waximain: Para tacom' hot hwein wijimain burro ca' quem nana.

³⁴Om na, param inain na Taramaxicon nuxut ta ac caca na. Ma, an mao jein ta ac caca na.

³⁵An mi' ac cocon pain na Jeju ma', cum xo' ac cacain na xonein con womicocon quem. Xao pe rain ta ac cocon na. ³⁶Xao pe nain wijimain burro Jeju ma', tiquin' mao ac ca na. Ca tiquin' mao ca ma', ca cum xo' cocon womicocon pain wana oro wari' ma' quem. ³⁷Wixicam pin iri nain wana ca quiji' mao nain Pacun Nein Oliveira ma' ne, tomi' querec te tomi' querec te pi' pin ac caca na oro wari' co taxipa' nonon Jeju ma'. Mija nana, om ca paric camain' caca. Merem ac caca na: Awi tamana na Iri' Jam ta nana. Xi mija ara ne oro ca ara ca Jeju ma', ca querec caca ma', pain ca ara cain oro ca om ara taxi' ne ca wari' wa ma'. ³⁸Merem ca' nana: Tomi' querec te xun taramaxicon cwa', co mam' maqui' nain ca hwara' opa nucun Iri' Jam cwa'. Mana' mana' om pin napari' Iri' Jam. Tomi' querec

19.35 Je ca xirao' pe ca profeta con Jeju pain cara pane. Ca' na ca xirao' pe nucun: Taraju wet je oro wari' nein Jerusalém! Hwet nuhu' taramaxicon nuhu' ta! Om ca xec xec ca, xao pe pe nain xonein wijimain burro, ac i ma' na ca xirao' pe ca profeta pane.
19.36 Cum xo' iri nonon womicocon pain wana oro wari' ne, ac i ma' na ca an hwet mi' cocon pain ca in ac cocon ma', je pain ca tomi' querec te tamana cocon ma'.

te tomi' querec te pi' pin nonon Iri' Jam oro co to nanain iri' pawin cain quem na ca merem caca oro wari' ma'.

³⁹Ma' nana oro fariseu co coco' to ho' nonon oro wari' ma' quem. Tomi' ac cocon na Jeju: Taramaxicon co ca' na taxipa' capijacon Iri' Jam. Tomi' in pin ximomon co taxipa' ma ta nonon. Om ara xi' na ca taraju hohot cocon ca taramaxicon ma ta cocon Jeju ta.

⁴⁰Om na ta ac tococwa na. Mo xi tacana to caca co taxipa' ta' cwa', pain ca tomi' querec te tamana cacapa' ca', merem pan ac ne xira oro pacun pain ca tomi' hwet nein ca tomi' querec te nein pata' ta na ca tomi' tococwa ma'.

Ca aca ca Jeju pain ca xiram pa' cocon oro wari' co to nanain Jerusalém

⁴¹Wixicam pin ac cacain na Jerusalém. Querec iri nain oro xirim Jeju ne, aca ac ca na, xi xiram pa' ara tococwa co to nanain ta. ⁴²Wa inuhu' me ac tococwa na. Mo xi ma' ne xumuhu' pain xec ca', mo xi querec pin' hwein carawa ca to' om pin tain nain ca toron ne xumuhu' ma'. Ane om na mami' cuhu' pain xocori ca' ne. Xi howa je na hwe ta. Ac ca om ne na tucuhu', ac ca joc xim xihwe na pain ca querec pin' hwein quem. ⁴³Ame hwe e', main maqui' tara oro xec pain ca hwet cucuhu' oro co noc nunuhu' ma'. Mam' tao' caho' ac cuhu' tara pain cote ne pana pain macan', coco' coco' mam' ac cucuhu' tara quem. Om ta jein mama' ac hwe cocon. ⁴⁴Corom hwet ac cucuhu' tara, om ta xiram pa' camain' cucuhu', to' parapa' pin tuturuhu'. Wahu', mana panxihwe ma' quem, to' parapa' to' parapa' pi' pin ac cucuhu' tara. Om ta to wet xica' pe camain' ne oro pacun nein oro xuruhu' ma' quem, to' pa horohot pi' pin tatarain ta. Xi querec pin' hun Iri' Jam pain ca to' witan xim paxi' cuhu' pata' ta na ca tomi' tococwa pain ca aca nucun.

Ca tomi' jein hwerehwet pin tococwa co vender to nanain carawa pain cote ne xiricon Iri' Jam

Mateus 21.12-17; Marcos 11.15-19

⁴⁵Corom mao ac cain na ca tao' caho' nein cote ne xiricon Iri' Jam Jeju ma'. Tomi' jein hwerehwet pin ac tococwa na co vender nanain carawa ca tom tain' xi' caca oro wari'. ⁴⁶Tomi' carapita ac tococwa na. Ca' na ca

xirao' pe xine ca tomi' nucun Iri' Jam pain capiiacon ta: Cote ne xuru ca', je tara ca tomi' to cacapa' oro wari' cwa' ta na ca xirao' pe nein con. Wahu' iri na ne, ara em' pin hwein. Ara xiricocon oro wari' co an noc xa taxipa' nanain carawa pin hwein ta na ca tomi' carapita tococwa ma'.

⁴⁷ Jeju ma', pijim' pe nain ca tao' caho' nein cote ne xiricon Iri' Jam pain oro xijein xec. Je ca ca' na to tococwa pain capiiacon Iri' Jam oro wari'. Oro taramaxicon ma' iri nana ne, to' pa' pin xun nonon. Oro taramaxicon nucucun oro sacerdote ma', cocon oro co ca' na taxipa' nanain ca xirao' nucun Moisés ma' quem, cocon oro xucucun taramaxicon nucucun oro judeu ma' quem, to' pa' pin xun paxi' nonon Jeju. ⁴⁸ Ane om ha' cocon ne. Xi om ne ca jain jain pan ara cocon oro wari' pain ca tama' taraju xixin na cocon pain ca pijim' nucun ta.

**Ca tomi' querec cocon Jeju pain ca ma' co mi' nem
pain ca ara main oro ca ara ma ma' quem cocon**

Mateus 21.23-27; Marcos 11.27-33

20 Maqui' ac ne na xec pain ca pe cain ca tao' caho' nein cote ne xiricon Iri' Jam Jeju. Ca' na nonon pain capiiacon Iri' Jam oro wari'. Pijim' mi' nonon pain capiiacon Iri' Jam ca tomi' hwet nonon pain ca to' witan toton cocon quem. Xuruxut hwet pan ac cocon na oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés cocon oro xucucun taramaxicon nucucun oro judeu ma' quem. ² Tomi' querec ac cocon na: Ma' co mi' nem pain ca ara main oro ca ara ma ma' quem? Ma' co ara rain nem pain quem na ca tomi' querec cocon ma'.

³ Om na, ma' na ca tomi' querec xim xuhu' ira. Tomi' xine ta ac tococwa na. ⁴ Tomi' querec xuhu' con João cara pane, co ja' taxipa' nonon pain com oro wari' pane. Ma' co ja' roron pain com oro wari' non quem? Mi' non pain Iri' Jam ra? Mi' non pain wari' ra na ca tomi' querec tococwa ma'.

⁵ Cain' xi tomi' xun quem ac xucucun na. Mo ta mi' non pain Iri' Jam xun, tomi' querec mami' ac capari' tara, para om howa hun quem tarapari'. ⁶ Mo ta mi' non pain wari' xun. Cain' cain' xixi' quem? To' to' cono' pi' pin tatarapari' pain pacun oro wari' cwa'. Xi om ne ca iri' profeta na João ta ara caca ta nana.

⁷ Je ca tomi' cocon Jeju: Om ca taxi' urut pain wixicon co mi' non pain ca ja' cocon pain com oro wari' pane ta nana.

⁸Je i ma' ira, om ta tomi' hwet tain wixicon co ara rain napa' pain ca ara ta' ca' quem na ca tomi' tococwa ma'.

Ca pijim' joc mam' mi' tococwa cocon co taramaja to nanain totain uva

Mateus 21.33-46; Marcos 12.1-12

⁹Pijim' joc mam' mi' ac tococwa na cocon oro co taramaja to nanain totain uva: Ma' na wari' pane. Oin' ac cain na totain uva. Tomi' xo' ac tococwa na co taramaja to taxipa' nanain xitot. Taramaja to jein totain uva ne ca' ac tococwa na. Paca' iri tara memem ne, mene ac hwein tara xijein cacarain ma', mene ac tain tara xijein cacarain ca' quem, ac i ma' tara ca pagar xuhu' pain ca taramaja nuhu' ta ac tococwa na. Mao tain pira ina ta ac tococwa na, mao ac ca na, mon to wet ac cain na i cain.

¹⁰Maqui' pin iri na oro xec nein ca pacu' pin ne memem ma' ne, tomi' ac ca na waximain xitot ma', tomi' non co taramaja mi' e' non pain ca pe pan ca ma'. Hwet roron co taramaja to nanain totain uva ne cain, cut ac main tara memem ne cocon ta na ca tomi' con ma'. Ma ac ca na, mao ac ca na quem. Ane om ha' cocon caram ma' co taramaja to nanain xitot ne. To' nonon, in mao ra ta ac cocon na quem. Om ca mi' cocon pain memem nucun waximain xitot.

¹¹Tomi' ac con na xucun co taramaja mi' e' non pain ca pe pan ca ma': Hwet roron co taramaja to nanain totain uva ne cain, cut ac main tara memem ne cocon ta non. Ma, mao ac ca na. Ane om ha' cocon co ma' quem ne. To' nonon, quep xirac tamana nonon. In mao ra ta ac cocon na quem. Om ca mi' cocon pain memem nucun waximain xitot ma'. ¹²Hwet roron ta ac con na xucun ma' quem. Je win 3 pin caca co hwet roron ta ca ma'. Ane om ha' cocon co ma' quem ne. To' tamana nonon, mija na nonacon cocon. Xin hwet ca' ac cocon na pain totain uva.

¹³Cain' cain' xita' ne ac xucun na waximain xitot ma'. Coromicat pan ac ca na, tomi' ton panxita' cwa', co om noc camain' ta' cwa'. Hwet roron quem arain, cut pan rain memem ne cocon ta ton. Am tomi' ha' cocon quem paxi' na ca coromicat nucun cote ca ira.

¹⁴Ane om tomi' ha' caca co taramaja to nanain xitot ma' ne. Querec iri nonon panxica ne, pain ca xut qui' nucun ma', tomi' xo' ac xucucun na: Wirico co ma' panxica waximain xitot ta xucucun. Mi' pin iri tara cote ca ne, mene pin ac cain tara totain uva ca' xucucun. To' pa' pin xun ta ac

xucucun na. Menexi' pin ac ne tara totain uva ca' xucucun. Ma ac xucucun na. ¹⁵ Xin hwet ca' ac cocon na pain xitot, to' pa' pin ac cocon na quem. Ac i ma' nana co taramaja to nanain totain uva pane na ca pijim' nucun Jeju.

Tomi' querec ac tococwa na: Cain' cain' ta' ca waximain xitot quem? ¹⁶ Taraju wet xine e': Hwet pan toton co taramaja to nanain totacon ma', to' parapa' pin ac cocon tara, noro ac cocon tara oro xucucun co taramaja to nanain totain uva nucun quem na ca tomi' tococwa ma'.

Oro wari' ma', co taraju nonon pain ca pijim' nucun ma', tomi' ac caca na: Cain' cain' xira waximain xitot ne? Om ca ha' camain' ne pain ca ara wa i ma' ta nana.

¹⁷ Noro pan ac cocon na Jeju. Om ca noro ni ca' tococwa, noro tata. Tomi' querec ac tococwa na: Cain' ca tomi' mao ne ca xirao' pe xine pain capiacaon Iri' Jam quem? Ca' na ca xirao' pe xine:

Pacun ca noc pin caca wari' co quep xin paxi' nanain xirim ma',
aram aram iri' pacun ca to' teren nain xirim pin na.

Ac i ma' na ca xirao' pe xine pain capiacaon Iri' Jam pane. ¹⁸ Je ca tomi' xuhu' ca' ac tococwa na. Oro wari' co noc pin nanain pacun ca aram aram to' teren nain xirim ca', ac ca camara' hwet cacain tara. To' caracat pin ac tococwa tara. Ac ca camara' hwet tococwa tara quem. Xao niri pin ac tococwa tara ta na ca tomi' tococwa ma'.

¹⁹ He, tomi' napari' ron ac caca na oro co ca' na taxipa' nanain ca xirao' nucun Moisés ma', cocon oro taramaxicon nucucun oro sacerdote ma' quem, pain ca taraju cocon pain ca pijim' joc mam' mi' cocon cocon co to' pa' pin nonon panxica waximain totain uva ma'. Je ca quep xun paxi' cocon ma', ane jin' cocon oro wari' ne.

²⁰ Ja' noro xun pain oro ca ara nucun ta ac caca na, pagar ac tococwa na wari' ma'. Mo hwet jun ta, ac ca iri'o' hwe tara pain ca tomi' querec hun me ac tococwa na. Mo ta tomi' pan tem ca, ha' ac capari' tara pain ca tomi' em' xun con taramaxicon co hwara' opa ta nonon.

²¹ Ma ac caca na, hwet ac cocon na Jeju. Tomi' ac cocon na: Tomi' xim urut pum taramaxicon co ca' na taxipa' capiacaon Iri' Jam. Taxi' urut pum pain ca tomi' xo' taxipa' ma ma'. Ca' na xo' taxipa' main capiacaon

20.17 Pain ca tomi' nucun Iri' Jam ca', tomi' mi' non Jeju. Wirico Jeju co an xiho' nain pacun ca noc pin xine ma'. Wiricoco oro taramaxicon co an xiho' nonon co quep xin paxi' nanain xirim ma' quem. Ca' na ca tomi' ta' ca Iri' Jam ma'. Main noc paxi' toton Jeju oro taramaxicon. Ame hwe e', main Taramaxicon pan tara ta, ac i ma' na ca tomi' ta' ca ma'.

Iri' Jam quem. Om ca tomi' querec te paxica' momon oro wari'. Ca' na xo' maparut pain capijacon Iri' Jam ca an hwet mi' napari' pain ca xuruxut xo' wa pain ca tomi' ha' je capari' quem. ²² Je ca tomi' querec xim urut pum ca' ac cocon na. Hohot na pain ca pagar tocwa pain imposto taramaxicon nucucun oro romano ra? Om ca hohot ne ra? Ac i ma' na ca tomi' querec ximama' cocon ma'.

²³ Querec pin' tata pain ca mixein nucucun quem. Tomi' ac tococwa na: ²⁴ Mi' xine pain denário ta tata, mi' ac cocon pain na. Tomi' querec ac tococwa na: Ma' jamicon co cwa', pain moeda ca'? Ma' wixicon co cwa' ca xirao' pe xine pain quem na ca tomi' querec tococwa ma'.

²⁵ Jamicon taramaxicon nucucun oro romano ta. Wixicon quem nonon.

Je ca tomi' xuhu' ca' ac tococwa na. Carawa ca mene ca taramaxicon nucucun oro romano ma', mi' ac hun pain tara. Carawa ca mene ca Iri' Jam ma' iri na ne, mi' ac hun pain tara quem na ca tomi' tococwa ma'.

²⁶ Tocojin' paxi' nonon. Am taraju caca oro wari' pain ca tomi' pan tem ca ma' paxi' nana. Ane om ha' cocon ne. Wa wa e' nonon pain ca tomi' xo' nucun. Tacana to ac caca na, om ca tomi' mami' caca quem.

Ca tomi' querec cocon pain ca e' mami' xi' caca co wara cono' nana ma'

Mateus 22.23-33; Marcos 12.18-27

²⁷ Ma' ac caca na oro saduceu co xuruxut hwet nonon Jeju. Howa ca' nana oro saduceu: Om ca e' mami' xi' caca oro wari' co wara cono' nana ta nana. Tomi' ac cocon na Jeju: ²⁸ Tomi' xim urut pum ta taramaxicon co ca' na taxipa' capijacon Iri' Jam ac cocon na. Ca' na ca xirao' mi' capari' Moisés cara pane: Mo ta mi' pin ca wari' ma', mo ta om wanxi' mi' cam manacon ma', na e' na pain ca an cam coxa' ca. Ma' ta wijima cama con ta taram. Pije' co aram aram wanxi' mi' cam ma', ac ca wanxi' con tara cwaji' ca co wara mi' pin ta, ac i ma' na ca xirao' mi' capari' Moisés pane. ²⁹ Je ca tomi' querec xim urut pum quem ac cocon na. Ma' na wari' co ma' 6 nana xurucun. Co pan' cain' pane, an ac cam na narima', aram aram mi' pin ac ca na. Om ca wanxi' ca. ³⁰ Co ja' corom mao non co pan' cain' ma', an ac cam na manacon cwaji' ca, aram aram mi' pin ac ca na. Om ca wanxi' ca quem. ³¹ Ac i ma' na co ja' corom mao non co ma' quem, ac i ma' ac i ma' pi' pin nana quem. An an xam' nanam manacon cwaji' caca co pan' cain' pane, aram aram cono' cono' pi' pin ac caca na. Om ca wanxi'

camain' caca. ³² Aram aram mi' pin ac cama na narima' ma' quem. ³³ Je ca tomi' querec xim urut pum ca' quem ac cocon na. Maqui' iri tara xec pain ca e' mami' xi' caca co wara cono' nana ma' ne. Mon xira co narima' ne tam nam quem? Ma' 7 ara xi' nana co an nanam pane na ca tomi' querec cocon ma'.

³⁴ Tomi' ac tococwa na: Oro wari' pain oro xec nein ca e' e' wet nexi' pain macan' ca', cut taxipa' nana narima'. Ca narima' nequequem ma' quem, cut taxipa' nana tarama' quem. ³⁵ Ane om ac i ma' ne pain ca aram aram e' mami' xi' caca co wara cono' nana ne. Oro wari' co querec hohot ca Iri' Jam ma', pain ca hohot na pain ca to ho' mahu' pain pawin ca' ca ma', om ta cut caca narima'. Ca narima' nequequem ma', om ta cut cacama tarama' quem. ³⁶ Om ta cono' mami' ac cacama quem, xi an xiho' ara cocon oro jam co taramaja mi' nonon Iri' Jam ta. Mana panxica Iri' Jam nana, xi om ne ca to' e' mami' ara tococwa ta. ³⁷ Taxi' irin i ca' quem, pain ca iri'o' ne ca e' mami' xi' caca co wara cono' nana ma' quem. Xi xirao' mi' ara capari' pain Moisés cara pane, pain ca pijim' qui' cain wijimain pana ca wiran ximao pane. Wara pain paxi' na ca cono' caca Abraão con Isaque con Jacó cara pane, ane xirao' mi' con Iri' Jam Moisés pane ne: Iri' Jam ne non Iri' Jam Abraão cwa', Iri' Jam ne non Iri' Jam Isaque cwa', Iri' Jam ne non Iri' Jam Jacó cwa' quem. Iri' Jam ne Iri' Jam ne wet nonon ta na ca xirao' mi' con Iri' Jam Moisés pane. ³⁸ Je ca taxi' xuxun pain ca e' e' wet nucucun quem. Xi Iri' Jam ne cocon Iri' Jam oro wari' co wara cono' nana ta. Iri' Jam ne e' nonon co e' nana ta. Ac i ma' na ca tomi' tococwa ma'.

³⁹ Ma' nana oro co ca' na taxipa' nanain ca xirao' nucun Moisés ma' quem. Tomi' ca' nonon: Awi na ca tomi' nem ta taramaxicon co ca' na taxipa' capijacon Iri' Jam nonon. ⁴⁰ Om pin ac caca na wari' co tomi' querec ximama' nonon ma', xi hehe ara cocon ta.

20.38 Oro saduceu pane, pain ca om ta e' mami' xi' caca co wara cono' nana ta caca ma', jain jain nonon oro wari' pain ca howa an xiho' cocon. Na e' na pain ca an xiho' cacapari' pain ca howa nexi' ca' nana. Je ca tomi' querec cocon Jeju cocon co cono' ca' nanam manacocon. Hehe tara Jeju, om ta tomi' xo' ac capari' xi' paxi' nonon. Ane tomi' xo' tococwa ne. Hehe pan ac caca na. To' quiiji' pan tata pain ca howa ximama' nucucun. **20.39** Om ta e' mami' caca co wara cono' nana ta nana oro saduceu. Caram ma' co ca' na taxipa' nanain ca xirao' nucun Moisés ma' iri nana ne, e' mami' tatara co wara cono' nana ta nana. Je ca awi na ca tomi' nem ta cocon Jeju ma' quem.

**Ca tomi' querec tococwa pain ca ma' co iri' hwanana ne ca
Cristo co wara tomi' pe ca Iri' Jam pane tococwa**

Mateus 22.41-46; Marcos 12.35-37

⁴¹ Jeju ma', tomi' ac cocon na co taraju nonon ma': Tomi' querec xuhu' con Cristo cwa'. Para winacon Davi cocon Cristo oro wari' quem? ⁴² Xi tomi' ac i ca' ara ca Davi pane ta, pain ca tomi' mi' con Cristo pane. Ca' na ca xirao' pe cain ca tomi' nucun pain Oro Tamara' pain capijacon Iri' Jam pane:

Tomi' non Taramaxicon ne Iri' Jam co iri' Taramaxicon ma':
Xao pe ho' ne pain iri' cwere ca'.

⁴³ Aram aram maqui' pa' ac quem tara xec nein ca to' quiji'
pin toton ta' co noc nenem ma'.

Taramaxicon pe ho' cara ac momon tara ta,
ac i ma' na ca tomi' xucucun Iri' Jam con Cristo pane ta na ca xirao' nucun Davi pane.

⁴⁴ Je ca tomi' xuhu' ca' ac tococwa na. Taramaxicon ne non Cristo Davi cara pane. Cain' cain' xira quem? Ma' tara ca wina ac con quem ra na ca tomi' tococwa ma'.

**Ca om na ne pain ca an xiho' tococwa co
ac ca iri'o' xi' ca' tara me nana ma'**

Mateus 23.1-36; Marcos 12.38-40

⁴⁵ Pain ca taraju taraju wet cocon Jeju oro wari' ma', tomi' ac tococwa na co taxipa' ca ma': ⁴⁶ Ma' tara xumuhu' me, ta an xiho' huhun oro co ca' na taxipa' nanain ca xirao' nucun Moisés ma'. In ac tatarapari' oro wari' ta nana. Je ca to taxipa' cocon wom co awi tamana, mam' xuruxut in mam' xuruxut in nonon quem. Tomi' querec te xo' tatarapari' oro wari' co xao to to nanain ximijain cidade ta nana. Param nanain ca xao to xo' wa

20.42 Taraju pa' jein ca tomi' mao ne ca xao pe ho' xine iri' curucun taramaxicon ma'. Xao pe ho' pin iri nain iri' curucun taramaxicon wari' ne, querec pin' ac tocwa na pain ca taramaxicon wi con. Ac i ma' na Jeju ma' quem. Xao pe ho' pin iri nain iri' curucun Iri' Jam ne, querec pin' ac tocwa na pain ca Taramaxicon wi pin con quem. **20.44** Cristo co to' witan roron oro wari' ta ca Iri' Jam pane, winacon Davi paxi' na pain ca wari' nucun pane. Ane Taramaxicon ne pan con Davi ne, xi om ne ca Taramaxicon pan ara ca Cristo pain ca Iri' Jam nucun ta.

cocon oro taramaxicon pain oro xirim ca cut in to xucucun ma', param nanain ca xao to xo' wa cocon oro taramaxicon pain ca cao' querec te wi nucucun quem. ⁴⁷Mixein nanam oro narima' co cono' ca' nanam waram taxicacam, cut noc xa ac cacain na oro caramaxicacam. Cote ne ac ne na ca tomi' nucucun pain ca tomi' cocon Iri' Jam ma' quem. Ma' ta awi nana ta cacapari' oro wari' ta nana. Ac ca iri'o' xi' ca' tara me nana. Wap tamana pan totoron Iri' Jam ta. Om ta wap homa tococwa oro xucucun co pan teretem nana ma'. Caram ma' iri nana ne, wap tamana pan ac tococwa tara ta na ca tomi' tococwa ma'.

**Narima' co mi' ca' nam taxicam ma', co mi' non
pain wijimain dinheiro nequem Iri' Jam pane**

Marcos 12.41-44

21 Noro xaxa' ac ca na Jeju ma', querec ac tococwa na co caramaju nana ma', pain ca cut ho' cacain dinheiro nucucun pain pana ca cut ho' to xine dinheiro ca mi' xin cacain cote ne xiricon Iri' Jam oro wari' ma'. ²Querec ac cam na narima' co mi' ca' nam taxicam ma' quem. Ximin na, om nam carawa. Cut ho' 2 ac camain na wijimain moeda pain panaji dinheiro ma'. ³Tomi' ac ca na Jeju: Noro jem narima' ma', co mi' ca' nam taxicam ma'. Wijimain paxi' na dinheiro ca cut ho' cama ma', ane querec hwara' con Iri' Jam ne. Ac ca hwara' tiquin' ca' nein na oro cote ne dinheiro ca cut ho' caca oro xucucun wari' ma'. Tomi' iri'o' inuhu' ta. ⁴Oro xucucun wari' ma', mi' hwara' paxi' nanain dinheiro nucucun, ane pe ho' cara cocon oro wirain ne. Narima' co mi' ca' nam taxicam ma' iri na ne, om paxi' nam carawa, ane mi' mi' pi' pin camain wijimain dinheiro ca pe ho' nam ne. Om pin nam dinheiro ca mam' cut cama carawa ca cao' cama na ca tomi' tococwa ma'.

Oro ca hwet pa' ton nonon oro wari' pain ca aram aram in qui' ta' ca Jeju

Mateus 24.1-51; Marcos 13.1-37

⁵Ma' ac caca na co taxipa' ca ma', co in ac nanain cote ne xiricon Iri' Jam ma'. Awi tamana na xin ne nana. Mam' quep awi nanain pain iri' cote ne pacun ca'. Oro too nein ca mi' cocon Iri' Jam ma' quem, awi tamana na ta paxi' nanain. Ane tomi' ca' pan cocon Jeju ne: ⁶Oro ca querec hwe

ca', ame hwe e', main maqui' tara oro xec pain ca to' pa horohot pi' pin xin xine oro xirim ca'. Om ta to wet xica' pe camain' ne oro pacun nein. To' pa horohot pi' pin ac xine tara ta na ca tomi' tococwa ma'.

⁷Taramaxicon co ca' na taxipa' capijacon Iri' Jam ac cocon na: Ma' xec ca hwet pin ta' ne oro ca tomi' ma ca' ne? Cain' xi querec pin' ac urut pain ca wixicam pin ne xec pain ca hwet pin ta' ne ca tomi' nem ma' quem na ca tomi' querec cocon ma'.

⁸Om na, ma' tara xumuhu' me ac tococwa na. Ta howa huhun oro wari' co mixein xim nunuhu' pain oro carawa ca maqui' ta' ma' me. Xi mija xi' ara caca oro wari' co wata' ta nana pain ca an hwet cacain wuxu ca'. Tomi' ca' tatara oro xucucun quem: Wixicam pin na oro xec pain ca pi' pin ta' ne macan' ta tatara. Ta howa huhun me ta ac tococwa na. ⁹Ta jin' hwe pain ca aram aram taraju huhun oro wari' pain ca to' parapa' caracan xucucun me, je pain ca mana' caracan xucucun ma' quem. Na e' na pain ca mana' ac i ma' cain' caca oro wari', je curucucun mao tara. Ane om pi' pin hap ta' ne macan' ne, ame hwe e'.

¹⁰Tomi' ac tococwa na: To' parapa' caracan ac xucucun tara oro wari', oro taramaxicon nucucun ma' quem, mana' caracan ac xucucun tara. ¹¹Jain jain tamana tatara oro wari' pain oro xijein macan'. Cocoroc tamana tara macan', om pin tara carawa ca cao' wa, mija tara ca caxi tamana wa quem. Hwrehwet qui' tara pain nanawin ca om awi camain' ca to' querec pin' ton nonon oro wari' pain ca maqui' ta' ne ca om awi camain' ne. To' jin' tamana totoron.

¹²Ac i ma' paxi' tara ca hwet pa' tococwa pain oro ca om awi wa oro wari' ma', ane om hwet pa' hap xun tococwa pain ne. Pain ca om hwet pa' querec tococwa pain, quep cain' ac cucuhu' tara, quep em' ac cucuhu' tara quem. Cut mama' ac cucuhu' tara pain oro xirim ca cut in to xucucun ma', tao' to ac cucuhu' tara pain xirinain ca tao' to tao' to to wa ma' quem. Cut mi' ac cucuhu' tara cocon oro xucucun taramaxicon, tomi' querec ac cucuhu' tara pain oro ca ara hwe quem. Ara ac i ma' tuturuhu', xi om ne ca howa ara mahu' ta. ¹³Je i ma' ira, na e' na pain ca tomi' hwet huhun pain capija ta. ¹⁴Je ca tomi' xuhu' ca' ac tococwa na. Hwara' opa je pain iri' xumuhu' ma', wara an to xo' jein ca coromicat nuhu'. Ta toron ne xumuhu' me. Ta cain' xi tomi' narain ho' xijexi' ne hwe me. ¹⁵Xi wata' pan ara ne co tomi' xim nuhu' pain ca tomi' xo' wa pain ca tomi' querec xim cucuhu' co noc nunuhu' ta. Om ta tomi' in pin ac cucuhu'. Hehe e' tatara

pahu'. ¹⁶Ma' tatara wari' co quep xiho' toton nonon oro taramaxicon pain ca quep xun cucuhu' ma'. Mana cote hwe cocon xuruhu' cocon oro ca nari nuhu' cocon oro win ma' nuhu' tatara quem, cut mi' tuturuhu' cocon oro taramaxicon. Ma' tatara oro win ma' nuhu' co to' parapa' xi' wawa quem. ¹⁷Noc noc pi' pin tuturuhu', xi om ne ca howa ara mahu' ta. ¹⁸Ac i ma' paxi' tuturuhu', ane om pan' ara'am camain' xi' hwe ne. ¹⁹Mo ta howa cara mahu', to' witan ac xihwe tara ta na ca tomi' tococwa ma'.

²⁰Querec iri jujun oro tatirim pain ca coco' coco' mam' pin cacain Jerusalém ne, taxi' pin ac hwe tara pain ca wixicam pin ne xec pain ca to' pa horohot to' pa horohot pi' pin xin xine oro xirinain ac tococwa na. ²¹Oro wari' co to nanain oro cidade pain Judeia ma', jein mama' ac cacain tara oro pacun. Co to nanain Jerusalém ma', paca' tatarain ta. Co hwet to ca' nanain pain ca to cacain xitot ma' quem, om ta corom mami' cacain quem. ²²Xi wap xun ara tococwa oro wari' nein Jerusalém ta. Je i ma' tara oro xec nein ta. Win ne ca xirao' to xine pain capijacon Iri' Jam pane, hwet pin ho' tara con ta. ²³Oro narima' co nam' nana pain oro xec pain ca jein mama' xi' cacama ma', wiricacam co ma' nanam wixicacam hwijima' ma' quem, jajain tamana tatara. I'ina tamana tataram pain ca jein mama' wa. Jajain jajain pi' pin tatara oro wari' co to nanain oro xijein cidade pain Judeia ma', pain ca wap toton cocon Iri' Jam. ²⁴Ma' tatara co to' parapa' pin xun wawa pain cote ne quit, ma' tatara oro xucucun co quep xun wawa, cut mama' ac tococwa tara pain oro xijein macan' ma' quem. To' quiji' pin ac tococwa tara oro wari' nein Jerusalém. Oro tatirim co om judeu nana ma', wiricoco pan tatara co to' quiji' pin nonon. To' quiji' to' quiji' maqui' pa' ac cocon tara xec ca wara coromicat an pe xo' mi' cocon pain Iri' Jam pane.

²⁵Hwrehwet qui' tara oro carawa ca to' querec pin' ton nonon oro wari' pain ca maqui' ta' ne ca om awi camain' wa ta ac tococwa na. Hwrehwet qui' tara con xina con panawo' con oro pijo' ma'. Oro wari' pain oro xijein macan' ma' quem, jain jain tamana tatara pain ca ximin nucucun. I'ina tamana tara ximicocon pain ca jein mama' xi' caca pain ca iriman mip ne hotowa pain cote ne com pain ca mana' nein ma', je pain ca wap tamana nein ma' quem. ²⁶Jin' tamana tatara oro wari', cocoroc cocoroc, ac ca cono' caca tara pain ca jin' nucucun. Mija tara ca toron ne ximicocon pain oro carawa ca om awi ca maqui' ta' ma' quem. Cocoroc cocoroc pi' pin tara oro coxminain pawin quem. ²⁷Querec ac cacapa' tara

oro wari' pain ca maqui' tain pawin. Wata' pain ca Iri' Wari' ta' ca', maqui' ta' pain tajain nanawin. Mam' maqui' tain ca hwara' opa ne pain ca toc meremem tamana ne. ²⁸ Je ca tomi' xuhu' ca' ac tococwa na. Hwet pin ta' iri tara oro i cara ca tomi' ta' ne, om ta na ne pain ca jin' hwe. Hwara' opa je. Tomi' querec te je quem. Xi om ne ca wixicam pin ta' ara ne xec pain ca to' witan pin xim xihwe ta na ca tomi' tococwa ma'.

²⁹ Pijim' joc mam' mi' ac tococwa na pain panaji figo: Noro jein panaji figo ma', noro jein oro xijein pana ma' quem ac tococwa na. ³⁰ Hwrehwet pin iri na xocori tarajain tenenein ne, taxi' pin ac hwein na ca wixicam pin ne oro xec pain ca xain toto ca xina. ³¹ Ac i ma' tara pain ca in qui' ta' ne quem. Querec iri jein ca hwet pin ne oro ca tomi' hwet xuhu' ca' ne, taxi' ac hwein tara ca wixicam pin ne xec pain ca taramaxicon pe ho' ton cocon oro wari' Iri' Jam. ³² Om ta cono' cono' pi' pin querec caca oro wari' co e' e' wet nana pain xocori ca', hwet pa' ac cocon tara oro ca tomi' hwet xuhu' ca'. Tomi' iri'o' inuhu' ta. ³³ Main om pin tara pawin pain macan' ca'. Oro ca tomi' ne ca' iri na ne, om ta pan' ara'am camain' ne ta. To wet cara tara ta na ca tomi' tococwa ma'.

³⁴ Ma' tara xumuhu' me ac tococwa na. Ta win xumu e' hwein oro ca tamanain to wa pain ca toc ximama' wa ca mana' nein tocwa me. Ta toron ximama' ne xumuhu' pain oro ca to' i'ina nuhu' quem me. Mo ta xuruxut ximama' ac i ma' hwe, mo ta om winim' xo' mahu', ane ane hwet pa' ac cuhu' tara xec nein ca in qui' ta' ne. ³⁵ Win ne ca maqui' pa' cain wijimain me wajo ma', ac i ma' tara ca maqui' pa' toton oro wari' pain oro xijein macan'. Om ta jein ca' ac cacapa' ta. Xi hwet pa' hwet pa' pi' pin ton ara toton oro wari' pain oro xijein macan' ta. ³⁶ Je ca tomi' xuhu' ca' ac tococwa na. Ma' tara xumuhu' me. Tama' tomi' jun Iri' Jam quem. Ma' ta na cuhu' pain ca witan ca' hwein oro ca om awi ca maqui' ta' ma' quem. Ma' ta om wixipa' hwe pain ca aram aram coco' quima hwet xim mahu' pain ca Iri' Wari' ta' ca' quem na ca tomi' tococwa ma'.

³⁷ Jeju ma', pijim' pe taxipa' nain ca tao' caho' nein cote ne xiricon Iri' Jam pain oro xijein xec pane. Je ca ca' na to taxipa' tococwa pain

21.32 Ca tomi' nucun Jeju ca', pain ca main hwet pa' toton oro ca tomi' hwet xuhu' ca' ca ma', tomi' mi' nain ca to' pa horohot pin xin xine cote ne xiricon Iri' Jam pain Jerusalém. Iri'o' na ca tomi' nucun quem. Oro wari' co e' e' wet nana pain ca xo' tomi' ac i ma' ca pane, ma' nana co e' e' wet nana pain ca pa horohot pin xin cote ne xiricon Iri' Jam pane. Om ca cono' querec caca pane.

capijacon Iri' Jam oro wari' pane. Irawin pin iri na ne, maji ta ac tococwa na co taxipa' ca ma', mama' ac cacain na pacun ma', Pacun Nein Oliveira ma'. Je ca pi'am to taxipa' caca ma'. ³⁸Xec pin iri na ne, pain iri' xo' xec ma', mama' mama' pi' pin ac cacain na ca tao' caho' nein cote ne xiricon Iri' Jam oro wari' ma'. Ma' ta taraju xun pain ca ca' na cain capijacon Iri' Jam ta nana.

Ca tomi' xo' xucucun pain ca to' pa' pin xun cocon Jeju

Mateus 26.1-5; Marcos 14.1-2; João 11.45-57

22 Wixicam pin ac ne na ca tomi' querec te xucucun oro judeu ma', pain ca cao' e' cacain capam' ca om joc wanan wa pain ca to' memerem nein ma'. Páscoa ta nanain oro ca tomi' querec te xucucun. ²Oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma', tomi' xo' ac xucucun na. Cain' cain' xuxun Jeju quem? Cain' xi to' pa' pin ac xun quem, ac i ma' paxi' xucucun. Ane jin' tococwa oro wari' ne.

Ca quep xihó' xuhu' pain ca quep xun hun Jeju ta cocon oro taramaxicon nucucun oro sacerdote Judas

³Corom hwet ac con na Judas Caxicon Jam. Iscariotes na xijein wixicon Judas. To' 12 nonon co taxipa' ca Jeju ma'. ⁴Hwet ac tococwa na oro taramaxicon nucucun oro sacerdote cocon oro taramaxicon nucucun oro guarda co querec wet nanain cote ne xiricon Iri' Jam, tomi' xo' ac tococwa na: Cain' cain' xita' con Jeju pahu' quem? Quep xihó' xuhu', tomi' mi' xuhu' con ta tata.

⁵Tomi' querec te tamana ac caca na pain ca quep xihó' xuhu' con tococwa ma'. Mi' xut pum pain dinheiro con ta ac cocon na.

⁶Awí na ta ac tococwa na, noro noro ac con na. Om iri totoron oro wari' ne, tomi' mi' ac toton con tara ta, ac i ma' na ca tomi' pan xucun.

22.1 Páscoa na wixinain xec nein ca tomi' querec te xucucun oro judeu pain ca mam' pe wet cocon oro hwanana nucucun pain ca to' witan ca' tococwa pain Egito pain cara pane.

Ca toc wi cacain comi memem con Jeju

Mateus 26.17-30; Marcos 14.12-26

⁷Maqui' pin ac ne na xec nein ca cao' e' cacain capam' ca om joc wanan wa pain ca to' memerem nein ma', pain ca na e' ne pain ca to' pa' pin xin cacain wijimain carneiro ca to' mam' pe wet nonon pain ca witan ca' cacain Egito oro hwanana pane. ⁸Tomi' xo' ac con na Pedro con João: Ara xo' jein carawa nein ca cao' querec te xi' iri' pain Páscoa ta tata.

⁹Main ca ara to jein maparut pain quem ac cocon na.

¹⁰Tomi' xo' ac tococwa na: Taraju wet je e'. Hwet iri jein cidade ne, mam' ac hun tara wari' co an nain caji tapaxi' pain com. Ja' ja' corom mao ac hun tara pain xirim. ¹¹Tomi' ac hun tara waximain xirim ma': Tomi' nem Taramaxicon nuxut co ca' na taxipa' capijacon Iri' Jam ta: Main man ca cao' querec te to xin urut pain carawa nein Páscoa quem nem. Cao' querec te ta' cocon co taxipa' ta' cwa' nem ta ac hun tara. ¹²Main i ca', piri' mama' xi' ta ac cuhu' tara. Querec jein ta ac cuhu' tara pain cote ne manain xiricon ma', ca wara awori to ne oro coximinain ma'. Wara ara an to xo' jein pain i cain ta ac tococwa na.

¹³Ma ac caca na, mama' ac cacain na cidade. Mam' ac cocon na wari' co tomi' ca Jeju, mam' nanain manain xirim ca tomi' ca quem. Ara an to xo' ac cacain na carawa ca cao' querec te xi' caca pain Páscoa quem.

¹⁴Xo' um pin iri na ne, pain iri' hora nein ca an pe xo' caca ma', cao' xi' ta ac caca na Jeju cocon oro apóstolo nucun ma', xao to ho' ac xucucun na pain pana ca mam' cao' to caca ma'. ¹⁵Tomi' ac tococwa na: Param tamana inain ca cao' to ho' xijexi' pain carawa nein Páscoa ca' inuhu' pane. Cao' wi xitoton na inuhu' pain ca om maqui' querec capa' ca jain jain wa pain ca quep em' xim cacapa' pain ca to' pa' pin xim cacapa' quem. ¹⁶Xi cao' mami' tain ta' pain xocori ca', tomi' iri'o' inuhu'. Cao' mami' e' tain pain pawin cain, pain ca taramaxicon pe ho' pin toton cocon oro wari' Iri' Jam cwain, pain ca aram aram hwet pin ta' ne iri' ca tomi' mao nein ca wara tomi' pe nucun pane, pain ca to' witan pin toton cocon oro wari' co howa nanapa' ta ca pane, je i ma' tara ca win cao' mami' tain ta' pain pawin cain na ca tomi' tococwa ma'.

¹⁷An iri nain ca mam' toc wa ca ji'ao pe xine comi memem ma' ne, tomi' ac con na Iri' Jam: Tomi' querec te urut pum pain ca mi' maparut pain comi memem ca' quem Te non, tomi' ac tococwa na: Ma' ta. Toc toc

xam' jein ta tata. ¹⁸Om ta toc mami' tain comi memem ta ac tococwa na. Tomi' iri'o' inuhu', om ta toc mami' tain comi memem. Om om, maqui' pa' ac capa' tara xec nein ca taramaxicon pe ho' toton cocon oro wari' Iri' Jam ta. Je tara ca win toc mami' tain ta' ta ac tococwa na.

¹⁹An iri nain capam' ne, tomi' ac con na Iri' Jam: Tomi' querec te urut pum pain ca mi' maparut pain capam' ca' quem Te non, jicat caracan ac cain na, mi' ac tococwa pain na. Capam' ca', an xiho' nain cwere ta ac tococwa na. Om ca narain ho' xuhu' pain. Cao' jein, tama' ara cara jein, ma' ta mam' pe wet mahu' pain ca mi' pin caho' xim xuhu' ca' inuhu' ta ac tococwa na.

²⁰Ac i ma' na pain comi memem quem. Cao' cao' pi' pin iri nana ne, an ac cain na ca mam' toc wa ca ji'ao pe xine comi memem, tomi' ac tococwa na: Comi memem ca ji'ao pe xine pain ca mam' toc wa ca', an xiho' nain cocu. Je ca to' querec pin' cuhu' pain xocori ca tomi' an pe xo' mi' cuhu' Iri' Jam cwa', pain ca to' witan xim cuhu' ca'. Ao mao iri tara cocu pain ca mi' pin caho' xim xuhu' ca' ne, je win ara pin tain cain ca tomi' pe nucun ta na ca tomi' tococwa ma'.

²¹Taraju wet je e' ac tococwa na. Ma' na win ma' nexi' co quep xiho' toton nonon co quep xim nanapa' ta. Cao' pe ho' napari' ta na ca tomi' tococwa. ²²Mi' pin ta' paxi' ina pain ca Iri' Wari' ta' ca'. Win ne ca wara coromicat an pe xo' cain Iri' Jam pata'. Mi' pin ta' paxi' ina. Ane ximin pan ta' ca co ma' co tomi' mi' xim napa' cocon co noc nanapa' ne, co quep xim nanapa' ma'. Ximin tara ta na ca tomi' tococwa ma'.

²³Cain' cain' xira con ne ac xucucun na. Ma' xira win ma' nexi' co quep xiho' toton nonon quem xucucun.

Wari' co hwara' opa tiquin' ca' nonon oro win ma' ca ma'

²⁴Tomi' caracan ac xucucun na co taxipa' ca Jeju: Cain' ca coromicat mi' cacapari' oro wari' ma' quem? Wata' co hwara' opa tiquin' ca' pahu', coromicat mi' nanapa' pain ca hwara' opa tiquin' ca' xuhu' ra xucucun. Om na, wata' ta, coromicat mi' nanapa' pain ca hwara' opa tiquin' ca' xuhu' ta ac ca na xucun. Wata' pan ta ac ca na xucun ma' quem.

²⁵Tomi' pan ac cocon na Jeju: Oro taramaxicon nucucun oro tatirim ma', tomi' ha' xut ximama' nonon oro wari' nucucun. Quep xiho' urut pahu' ta ximama' nonon pain ca taramaxicon to ho' cocon ma' quem. ²⁶Ane om

na ne pain ca an xiho' huhun ne. Jimama' je. Co hwara' opa ma', om ta xec xec ca. An xiho' toron co om hwara' opa camain' ma'. Co taramaxicon ta' ma' pahu', an xiho' toron co taramaja mi' e' non win ma' ca ma'. ²⁷ Je ca tomi' xuhu' ca' ac tococwa na. Ma' wari' co hwara' opa ma' quem? Hwara' opa na co xao pe pe nain pana ca mam' cao' pe wa ra? Hwara' opa na co mi' non pain carawa ca cao' wa ra? Om na, hwara' opa pan na co xao pe pe nain pana ca mam' cao' pe wa, wirico pan na co hwara' opa tiquin' pan. Ane om ac i ma' pan ta' ne. Hwara' opa tiquin' pan paxi' ina pahu', ane an xiho' ton wari' co taramaja mi' e' non xucun wari' ne. Win ca wari' co xat pe ho' non win ma' ca pain ca mi' con pain carawa ca cao' wa ta na ca tomi' tococwa ma'.

²⁸ Wahu' ma', pain ca tama' jao jao ma' mahu' pain oro ca to' i'ina napa' pane, om ca an pe camain' mahu'. ²⁹ Je ca mi' xim xuhu' pain ca taramaxicon wa. Win ne ca mi' capa' pain ca taramaxicon wa Te quem. ³⁰ Cao' querec te to ho' ac xijexi' tara pain ca taramaxicon pe ta' ta' cain. Xao to ac hwein tara ca mam' xao pe nucun taramaxicon, tomi' querec tomi' querec ac huhun tara pain oro ca ara nucucun waram winacocon mana panxica Israel cara pane, co ma' 12 nana cara pane na ca tomi' tococwa ma'.

³¹ Simão Simão, taraju wet ne e' ac ca na Jeju. Param nuhu' Caxicon Jam. To' i'ina xuhu', am ja' camara' xuhu' ta nuhu'. Tomi' non Te Iri' Jam quem, ta narain ho' mapa' cocon me ta non pahu'. ³² Ane tomi' mi' xim con Te quem ne Simão. Ma' ta om pan' ma con, ma' ta hwara' opa cara ma pain ca howa nem inon pum. Cwirin' pin iri rain ca caracat nem ne, to' hwara' opa ac momon tara pain ca howa nucucun xerem cwa' quem na ca tomi' con Simão Jeju ma'.

³³ Om na, om ta an pe camain' xim ta ac ca na Simão ma', co Pedro ma'. Mo ta quep wi xim cacapa' pum, mo ta to' pa' wi xim cacapa' pum quem, je i ma' tara, om ta an pe camain' xim ta non.

³⁴ Om na ta Pedro ac ca na Jeju. Taraju wet ne e': Tomi' toton momon oro wari' ta. Om ta aca querec ca me pain xec ca', wara tomi' ac momon tara: Om ca querec pin' ton ta ac momon tara pata', ma' 3 tara ca tomi' ac i ma' toton ma quem. Tomi' iri'o' inem ta Pedro na ca tomi' con ma'.

³⁵ Cain' cain' ne quem? Tomi' querec xuhu' ta ac tococwa na. Pijim' mama' jein pira iri inuhu' pane ne, tomi' ac xuhu' na: Ta cut hwein dinheiro me ta, ta cut hwein caji coco ca mam' cut wa carawa me ta, ta cut tocwan

hwein caji caxim quem me ta, ac i ma' na ca tomi' xuhu' pane. Je ca tomi' querec xuhu' ca': Ma' na xec pain ca ximin hwe pane quem? Om ca tama' ma' cuhu' ca param hwe quem ra tata.

Ma' naparut ta, om ca ximin camain' urut pane ac caca na.

³⁶ Ane tomi' ni xuhu' pain xocori ca' ne ac tococwa na. Mo ta ma' cuhu' dinheiro, cut ac hwein tara. Mo ta ma' cuhu' caji coco ca mam' cut wa carawa ma' quem, cut ac hwein tara. Mo ta om cuhu' cote ne quit, vender ac hun tara to' om capin' nuhu', mam' an ac hwein tara cote ne quit quem. ³⁷ Xi na ara ne pain ca hwet pin ne ca xirao' pe xine capijacon Iri' Jam ta. Ca' na ca xirao' pe nein: Ac ca caracat ca na cocon, xi to' pa' wi ara cocon cocon oro caracat ta na ca xirao' pe nein. Je ca tomi' xuhu' ca' ac tococwa na. Na e' na pain ca hwet pin ne ca xirao' pe nein pata'. Hwet pin ta' na ca xirao' pe nein pata' na ca tomi' tococwa ma'.

³⁸ Tomi' ac cocon na co taxipa' ca ma': Noro ra Taramaxicon nuxut. Ma' 2 naparut cote ne quit ca' nonon.

Je i ma' ira, tomi' ximama' maho' je ta ac tococwa na.

Ca pe cain Getsêmani Jeju

Mateus 26.36-46; Marcos 14.32-42

³⁹ Paca' ac cain na Jerusalém Jeju, mao ac cain na Pacun Nein Oliveira. Je curucun pane. Ja' ja' nonon co taxipa' ca quem. ⁴⁰ Hwet pin iri nanain ne, tomi' ac tococwa na. Momon tomi' jun Iri' Jam, ma' ta om ja' camara' xihwe pain ca tomi' querec cuhu' Caxicon Jam ta tata. ⁴¹ Xut wijimain ca' ac tococwa na, pe torotop pe ac ca na, tomi' ac con na Cote ca: ⁴² Te ac con na. Mo ta nain ho' xim mapa' pain ca jain jain ta' ne ca', pain ca mi' pin ta' ne ca' quem Te. Tara pum, nain ho' ne pain me paxi' inem. Ane param e' tain ca param nem ne. Noc inain ca param ne ca' na ca tomi' con Cote ca.

⁴³ Hwet pa' ac con na jam co taramaja mi' non Cote ca. Maqui' nain pawin. To' hwara' opa ac con na quem. ⁴⁴ Jain jain tamana na pain ca toron ne ximicon. Wara tomi' tamana non Cote ca. Je win tomi' mip con quem. Nahwere' tamana na pain ca tomi' con ma'. Ac wic na ca nahwere' nucun, ao mao nain macan'.

⁴⁵ Pi' pin iri na ca tomi' con Cote ca ne, tequi' pe ac ca na, in hwet ac cocon na co taxipa' ca ma'. Wara pi'am nana, xi jam' ca' ara cacain ca

tomi' xaxa' nucucun ta. ⁴⁶ Je xi om pi'am hwe quem ac tococwa na. Tequi' to je e'. Momon tomi' jun Iri' Jam, ma' ta om ja' camara' xihwe pain ca tomi' querec cuhu' Caxicon Jam ta tata.

Ca quep cocon Jeju

Mateus 26.47-56; Marcos 14.43-50; João 18.1-11

⁴⁷ Tomi' tomi' wet na Jeju, maqui' ac caca na oro wari'. Mija nana wari' co maqui' nana. Judas ma', co to' 12 nonon co taxipa' ca Jeju ma', wirico co o qui' nonon. Hwet pan ac con na Jeju Judas. Maqui' ina ta ac con na, xup ac con na.

⁴⁸ Cain' cain' xima quem Judas ac con na. Xup mapa' pain ca Iri' Wari' ta' ca' ra? Ac i ma' na ca tomi' mi' mapa' cocon co quep xim nanapa' cwa' ra na ca tomi' con ma'.

⁴⁹ Caram ma' co to to mam' nonon ma', querec pin' iri nonon oro wari' pain ca quep xun cocon ne, tomi' ac cocon na Jeju: Cain' cain' xut quem Taramaxicon nuxut? Mam' to' in pin xut cocon pain cote ne quit nuxut ca' quem na ca tomi' querec cocon ma'. ⁵⁰ Coc xicot ac cain na cote ne quit win ma' caca ma', wara ca' na co taramaja mi' e' non sacerdote co iri' taramaxicon ma', ton tapit pin ac cain na taraxicon ma', pain iri' curucun ma'.

⁵¹ Om na, maho' je ta ac ca na Jeju. Quep pan ac cain na taraxicon, to' xio pin ac con na quem.

⁵² Cain' cain' xihwe quem ac tococwa na co quep xun nonon ma', wiricoco oro taramaxicon nucucun oro sacerdote cocon oro taramaxicon nucucun oro guarda co querec wet nanain cote ne xiricon Iri' Jam ma', cocon oro xucucun taramaxicon nucucun oro judeu ma' quem. Tomi' ac tococwa na: Para cut hwein cote ne quit je pana mam' wap wa ma' quem? Ac ca an noc xa taxipa' ta' carawa na pahu' ra na ca tomi' tococwa ma'. ⁵³ Wara pe ho' paxi' inuhu' pain oro xijein xec pane, pain cote ne xiricon Iri' Jam pane. Je xi quep qui' mahu' pain i cain pane? Je i ma' pahu' ta ac tococwa na. Maqui' pin na iri' hora nuhu' ma', pain ca ara xim mahu' pain ca param nuhu' ma'. Maqui' pin na iri' hora nucun Caxicon Jam co taramaxicon pe ho' nonon oro caracat ta na ca tomi' tococwa ma'.

Ca tomi' ximao ca Pedro pain ca om ca querec pin' ton Jeju ta ca

Mateus 26.69-75; Marcos 14.66-72; João 18.15-18; João 18.25-27

⁵⁴Quep ac cocon na Jeju, an mao ac cocon na pain xiricon sacerdote co iri' taramaxicon. Pedro ma' iri na ne, ja' tequi' pira ca' nonon quem. ⁵⁵Hwet pin iri nanain xiricon taramaxicon ne, caraho' ac cacain na xe pain ca tao' caho' nein ma'. Xao to xao to mam' ac cacain na. Xao pe ho' nonon Pedro ma' quem. ⁵⁶Querec ac con na Pedro xojam' co taramaja pe nain i ma'. Querec non pain ca xao pe ho' cain xe. Noro tamana non. Pe ho' non Jeju co cwa' ta ac cama na.

⁵⁷Om na ta narima'! Om ca querec pin' ton ta ac ca na.

⁵⁸Om om, querec ac con na xucun ma'. Wari' nucun Jeju na co ma' ta ac con na.

Om na ta! Om ca wari' ne ton ta ac ca na Pedro.

⁵⁹Om ca pain homa ne, ac ca xica' pe ne na hora nein con, tomi' ac ca na xucun ma' quem. Pe ho' con Jeju co cwa' ira, xi wari' nein Galileia ara ca ta, ac i ma' na ca tomi' ca ma'.

⁶⁰Om na ta, om ca taxi' tain ca tomi' nem ta ac ca na Pedro. Tomi' tomi' wet na, aca ac ca na me quem. ⁶¹Tucu in hwet pan ac con na Taramaxicon nexi' ma'. Noro ac con na. Querec iri non Jeju Pedro ne, mam' pe wet ac cain na ca tomi' nucun pane: Om ta aca querec ca me pain xim ca', tomi' ac momon tara: Om ca querec pin' ton ta ac momon tara pata', 3 tara ca tomi' ac i ma' momon ma' quem non pane. ⁶²Hwet mao iri na ne, aca tamana ac ca na.

Ca o mi' cocon con oro taramaxicon co hwara' opa tamana nana

Mateus 26.57-68; Marcos 14.53-65; João 18.19-24

⁶³Oro guarda co querec wet xo' nonon Jeju ma', tatam' tatam' ac cocon na, tomi' xirac nonon, wap wap ac cocon na quem. ⁶⁴Tatep pa' nanain tocon, tomi' querec ac cocon na: Ma' co wap nem cwa' quem? Tomi' hwet rain wixicon co wap nem cwa' ta ac cocon na. ⁶⁵Mija na ca tomi' xirac cocon quem.

⁶⁶Xec pin iri na ne, cut in ac xucucun na oro taramaxicon ma', pain ca Sinédrio caca ma'. Ma' nana oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma' quem, cut in ac xucucun na. O mi' ac cocon na con Jeju. ⁶⁷Tomi' ac cocon na: Wum co Cristo cwa' ra? Tomi' xo' xut e' nonon.

Mo xi Cristo ina ta xuhu', om xi howa mahu' ta ac tococwa na. ⁶⁸Mo xi tomi' querec pan xuhu' quem, mo xi cain' ca coromicat mi' mahu' quem xuhu', hehe ac ximahu' xira quem. ⁶⁹Je i ma' ira ac tococwa na. Ane tomi' ca' xim xuhu' ne: Wata' pain ca Iri' Wari' ta' ca', wara xao pe ho' pin ton pain iri' curucun Iri' Jam co hwará' opa pan ta na ca tomi' tococwa ma'.

⁷⁰Je ca tomi' urut pum ca' ac cocon na, tomi' tomi' pi' pin nonon: Wum co Panxica Iri' Jam ra nonon.

Wata' cwa' ira. Win ne ca tomi' pan hwe ma' ac ca na Jeju.

⁷¹Je xi om tomi' hwet jein ca em' nucun co cwa' mami' xuxun oro wari' cwa' quem ac caca na. Taraju pin iri urun pain ca tomi' ximao nucun ma', pain ca wata' cwa' ira pan ca ma' na ca tomi' caca ma'.

23 Maji ta ac caca na oro taramaxicon co cut in to xucucun pain i ma', an mao ac cocon na Jeju. O mi' nonon con taramaxicon Pilatos. ²Tomi' em' ac cocon na: Tomi' querec urut con wari' cwa'. Taxi' pin urut con pain ca ja' teretem cocon oro win ma' nuxut cwa' quem. Ta tomi' ha' hun taramaxicon nucucun oro romano me, ta pagar hun pain oro imposto me ta nonon. Wata' co Cristo ta, iri' taramaxicon ina ta nonon, ac i ma' na ca tomi' em' cocon ma'.

³Tomi' querec ac con na Jeju Pilatos. Wum co iri' taramaxicon nucucun oro judeu cwa' ra non.

Wata' cwa' ira. Win ne ca tomi' ma ma' ta ac ca na.

⁴Om ca mam' tain ca pan tem wa con co cwa' ta ac tococwa na oro taramaxicon nucucun oro sacerdote cocon oro xucucun wari' ma' quem.

⁵Om na ta ac caca na, tomi' mip nonon: Pijim' iri tata oro win ma' nuxut co to nanain Judeia cwa' ne, ta tomi' ha' mami' hun taramaxicon nucucun oro romano me ta tata, ja' teretem ja' teretem ac tococwa na.

22.66 Ma' 70 nana oro taramaxicon co cut in nana. Sinédrio nonon oro wari' pain ca cut in xucucun. Ma' na iri' taramaxicon nucucun oro sacerdote, ma' nana oro xucucun taramaxicon nucucun oro sacerdote ma' quem, ma' nana oro fariseu cocon oro saduceu ma' quem. Ac juiz nana, taraju nonon oro wari' co tomi' em' nonon oro win ma' caca, tomi' mi' tomi' mi' ac tococwa na pain ca wap wa oro wari' co em' nana quem.

Pijim' pe cain' nain Galileia cain, mao ac ne ma' na con, aram aram pijim' pe ac cain i ca' na quem na ca tomi' cocon ma'.

⁶Taraju iri nain i ma' Pilatos ne, pain ca pijim' pe cain' nain Galileia cain caca ma', tomi' querec ac tococwa na: Wari' nein Galileia na ron nonon.

⁷E'e, wari' nein Galileia ta nonon.

Na ra ac ca na Pilatos.

Taramaxicon pe nain Galileia Herodes pane. Ane pe pan cain Jerusalém pain oro xec ca quep cocon Jeju ne. Taxi' pin iri non Jeju Pilatos ma' ne, pain ca maqui' cain Galileia ma', tomi' ac tococwa na caram ma' co tomi' em' nonon ma': An mi' jun con Herodes ta na ca tomi' tococwa ma'.

⁸Querec iri non Jeju Herodes ne, tomi' querec te tamana ac ca na. Xi om ne ca wara pain ara ne pain ca querec xiton Jeju na ca ma'. Wara taraju tata oro wari' pain ca tomi' hwet cacain oro ca ara nucun pane. Je ca coromicat ca' ca ma': Am querec ton pain ca ara cain ca om ara taxi' ne ca wari' wa ta na. ⁹Tomi' querec tamana paxi' non pain oro ca tomi' querec ximao wa ma', ane tacana pe pan ca Jeju ne. Om ca tomi' camain' ca. ¹⁰Oro taramaxicon nucucun oro sacerdote cocon oro co ca' na taxipa' nanain ca xirao' nucun Moisés ma', co coco' to nanain i ma', tomi' mana' nana pain ca tomi' em' cocon Jeju. ¹¹Tatam' ac con na Jeju Herodes cocon oro soldado nucun ma'. Tatam' tatam' nonon, tomi' xirac nonon quem. Mixein mixein nonon pain ca pe cocon con cote ca wom co awi tamana ma', co ac womicon taramaxicon ma'. O mi' mami' jun con Pilatos cwain ta ac tococwa na. ¹²Wara noc caracan paxi' xucucun Herodes con Pilatos pain cara pane. Pain xec nein ca o mi' mami' jun con xucucun ma', je win tomi' querec te pin xucucun. Noc noc om pin xucucun.

¹³Pilatos ma', tomi' cut in ac cocon na oro taramaxicon nucucun oro sacerdote cocon oro xucucun taramaxicon cocon oro wari' ma' quem, ¹⁴tomi' ac cocon na: O mi' iri mahu' con wari' cwa' ne, tomi' em' ac hun na. Ja' teretem nonon oro wari' ta hun. Ta tomi' ha' hun taramaxicon nucucun oro romano nonon ta hun. Ta pagar hun pain oro imposto me nonon ta hun. Taraju paxi' mahu' pain ca tomi' querec ton pain ca ara nucun quem, ane om mam' camain' tain ca pan tem wa con ne. Je xi om tomi' em' hun quem? ¹⁵Om ca mam' cain Herodes con quem, om ca mam' cain ca pan tem wa con. Xi o mi' mami' ara capa' con ta. Je ca tomi' xuhu' ca': Om ca pan tem ca, om ca na ne pain ca mi' pin ma' tara ne hun ta. ¹⁶Je ca tomi' ca' ton toton oro soldado ne cwa': Wap jun pain caji macon

ca ma' arain too pain tamain ta toton. Wap iri jun ne, pa hwet pin ac hun tara ta toton na ca tomi' tococwa ma'.

¹⁷ (Pilatos ma', pain oro xec nein ca tomi' querec te nucucun oro judeu pain Páscoa pane, pa hwet taxipa' non wari' co tao' pe wa. Na e' na pain ca pa hwet mi' tococwa con oro wari' pain xocori ca' quem.)

¹⁸ Pa hwet pin toton na ta iri tata oro soldado nucun ne, merem merem pi' pin ac caca na oro wari'. Om na ta! To' pa' pin toton oro soldado nem ta. Pa hwet mi' pan xut con Barrabás ta na ca merem caca ma'.

¹⁹ (Barrabás ma', wara tao' pe ta pain xirinain ca tao' to tao' to to wa pane, xi om ne ca quep xiho' ara tococwa co noc nonon oro romano. To' pa' pin non wari' pain ca mana' mana' mixita qui' tococwa soldado nucucun oro romano pane.)

²⁰ Pa hwet ton paxi' non Jeju Pilatos ma'. Je ca tomi' mami' tococwa oro wari' ma'. ²¹ Ane merem merem tiquin' caca ne. Om na, na e' na pain ca tatatain mi' tocwa pain pana ta, na e' na pain ca tatatain mi' tocwa pain pana ta nana.

²² Tomi' mami' ac tococwa na, je win 3 pin ne ca tomi' tococwa ma'. Cain' cain' xira pahu'? Para em' na hun quem? Om ca mam' tain ca pan tem wa con. Om ca na ne pain ca mi' pin ma' tara ne hun ta. Wap jun e' toton oro soldado ne cwa', pa hwet pin ac ton tara ta tata.

²³ Ane tomi' mip cocon ne, merem mip merem mip nonon. Tatatain mi' toton pain pana ta, mija na ca merem ac i ma' cocon ma'. Aram aram ha' ac tococwa na quem.

²⁴ Na ra, je i ma' pahu', win ne ca param hwe ma' ac tococwa na. ²⁵ Pa hwet pin ac con na co pa hwet mi' xut con caca ma', co wara tao' pe wa ma', pain ca quep xiho' cocon co noc nonon oro romano ma', je pain ca to' pa' pin con wari' pane quem. Pa hwet pin iri non co ma' ne, an mao jun Jeju ta ac tococwa na soldado nucun ma'. Ara mi' jun pain ca param nucucun oro wari' cwa' ac tococwa na.

Ca tatatain mi' cocon pain pana Jeju

Mateus 27.32-44; Marcos 15.21-32; João 19.16-27

²⁶ An mao ac cocon na Jeju oro soldado ma'. Pain ca xuruxut xuruxut wet nucucun ma', quep ac cocon na wari' ma'. Simão na wixicon. Wari' nein Cirene na Simão. Maqui' nain xitot. Quep iri nonon ne, an pe ac

cacain na panaxicon Jeju pain waracon. An tiquin' rain ta, ja' ja' ron Jeju cwa' nonon.

²⁷ Mija nana wari' co ja' ja' nonon ma'. Ma' nana oro narima' co ja' ja' nonon quem, awaran tamana nana con Jeju. ²⁸ Tucu in hwet ac tacacama na: Wa inuhu' me oro narima' nein Jerusalém ac tacacama na. Ta awaran mahu' me. Awaran pan e' xujuhu', awaran pan e' jejem humajuhu' quem. ²⁹ Xi maqui' ta' ara ne xec nein ca jain jain tamana xi' caca oro wari'. Tomi' ac xujuhu' tara: Tomi' querec te pan nana oro narima' co om nam' nana ma', co om wijima camain' nana ma', co om nanam pije' co xoc catat ma' quem, ac i ma' tara ca tomi' xujuhu'. ³⁰ Merem ac caca tara oro wari': Camara' hwet ma' tarapari' oro pacun je oro ca tamaja pan ne macan' ne. Xin xam' corom ma' tarapari' ne tatara. ³¹ Oro wari' cwa', quep em' nanapa' pain ca awi ta' ca', pain ca an xiho' tain pana ca tum toto tenenein ma'. Om ta quep em' mip tococwa oro wari' co pan teretem nana ma' quem, co an xiho' nanain pana ca wara mi' pin ma' quem? Quep em' xun tata. Je ta awaran e' pan xujuhu' ta xuhu' ca' na ca tomi' tacacama oro narima' co awaran nonon ma'.

³² O mama' 2 nonon co pan teretem nana ma'. Tatatain mi' xuxun pain pana nana quem. ³³ Xuruxut xuruxut hwet iri nanain ca tamaja pan ne macan' ma' ne, ca Maxinain Tacawaji' caca oro romano ma', je ca tatatain pe cocon pain pana Jeju. Wirico Jeju, wiricoco co pan teretem nana ma' quem, je ca tatatain to cocon pain pana. Tatatain pe nonon pain iri' curucun Jeju xucun, tatatain pe ac cocon na pain paraxicon xucun ma' quem. ³⁴ Tomi' ac con na Cote ca Jeju: Xic am pin rain ca caracat nucucun caram cwa' quem Te. Xi ma' ne ximicocon ta. Hohot tara ma' nana pain ca tatatain mi' cacapa' pain pana ca' non.

An an xam' xun womicon cwa' ta ac caca na oro soldado ma' quem. Ma' xi an non co cwa' ne, ma' xi an non co cwa' ne xucucun, ara ara ac cacain na ca ara taxipa' caca ma', taxi' ac xucucun na con wom co an xi' caca ma'.

³⁵ Noro nana oro wari' co coco' to nanain i ma' quem. Oro taramaxicon ma' quem, tatam' nonon Jeju, tomi' xirac ca' nonon: Quep xiho' nonon oro

23.34 Ara taxipa' ac i ca' nana pane: Xirao' xirao' xam' nanain wixicocon pain oro wijimain pacun ma', xin xin ac cacain na. Ma' ta taxi' xijexi' con wom co an xi' iri' cwa' nana. Xin iri nanain ne, noro ac cacain na, mam' ac cacain na oro wixicocon con womicon. Wum tara, an ron ta ac xucucun na con.

wari' pane. Mo xi Cristo ca, mo xi wara tora' iri'o' con Iri' Jam pane, je i ma' xira ca quep xiho' pan xucun quem na ca tomi' xirac cocon ma'.

³⁶Wixicam nonon oro soldado ma' quem. Tatam' tatam' nonon, tomi' xirac ac cocon na quem. Mam' pe mi' nonon pain caji comi uva ca tup, ³⁷tomi' ac cocon na: To' witan pan xijem. Win ne ca taramaxicon nucucun oro judeu ina ta ma ma' quem nonon.

³⁸Ma' na pana ca tatatain mi' caca pain tamain panaxicon pain tamacon ma'. Xirao' pe ta i ca', pain: Wirico co cwa' co taramaxicon nucucun oro judeu ta na ca xirao' nein.

³⁹Tomi' xirac non xucun co tatatain wi wa con Jeju ma' quem. Om ca Cristo ma ra? Je xi quep xiho' pan xijem quem? Je xi quep xiho' maparut ma' quem? Ac i ma' paxi' na ca tomi' xirac con ma'. ⁴⁰Ane tomi' in pin pan con win ma' ca co win pan tem ca ma' ne: Para tomi' xirac mon quem? Om ca jin' mon Iri' Jam ra? Win ne ca tatatain wi xima con. ⁴¹Hohot paxi' na pain ca tatatain mi' cacapari' pain pana ca', xi pan teretem tamana ara iri' ta. Ane om pan tem camain' ca co cwa' ne na ca tomi' con win ma' ca ma'. ⁴²Xiram pa' ne me Jeju ac ca na. Mam' pe wet ne pain ca aram aram taramaxicon pin ta' ma ma' non.

⁴³Wara pe ho' ne pain pawin cain, pain xec ca', tomi' iri'o' inem ta ac con na Jeju.

Ca mi' pin nucun Jeju

Mateus 27.45-56; Marcos 15.33-41; João 19.28-30

⁴⁴⁻⁴⁵Wara tocon xina pin ta' na, xim pin ac ne na quem. Iri' xim na, xim xim pi' pin na pain oro xijein macan'. Piquirim pin iri na xina ne, pain 3 hora ma', toha pin mami' ac ca na. Wein mao ac ca na cote ca wom co wa pe nain cote ne xiricon Iri' Jam ma', co tao' caho' nain iri' ca pe ne panaxicon pain iri' paxicom cain. Wein ac nain ximijacon. ⁴⁶Merem ac ca na Jeju, merem mip na: Mi' inem pain tamatara ca' Te. Querec wet rain ta non. Tomi' ac i ma' iri na ne, mi' pin ac ca na.

⁴⁷Taramaxicon nucucun oro soldado ma', querec iri nain oro ca ara ne con Jeju ma' ne, tomi' ac ca na: Wa inon co cwa' me. Iri' wari' ca ma' ira na ca tomi' ca pain ca tomi' querec te con Iri' Jam. ⁴⁸Oro wari' co cut in

23.46 Mi' pin iri na Jeju pane ne, om ca mi' pin e' ca. Mi' inem pain tamatara ta Te non Cote ca, mi' ac con pain na, mi' pin ac ca na quem.

nana ma', pain ca querec xuxun pain ca tatatain mi' tococwa pain pana caca ma', querec iri nanain carawa ca ara non Jeju ne, wap wap ac cacain na quimacocon pain ca tomi' xaxa' tamana nucucun. In mama' ac caca na. ⁴⁹Oro wari' co win ma' ne nonon Jeju ma' iri nana ne, oro narima' co wara ja' ja' qui' nonon pain Galileia ma' quem, coco' pira coco' pira pi' pin nana. Noro noro nanain oro carawa ca ara non ma'.

Ca an corom pe xine curucun Jeju pain manain pacun

Mateus 27.57-61; Marcos 15.42-47; João 19.38-42

⁵⁰⁻⁵¹Ma' na wari' ma'. José na wixicon. Wari' nein Arimateia na José ma'. Pe nain Judeia Arimateia ma' quem. Awi na José. Iri' wari' na. Wara taramaxicon pe ho' hap xirapari' Iri' Jam na na. Win ma' ne paxi' nonon oro taramaxicon co cut in taxipa' xucucun ma', ane om xin ne cocon pain ca tomi' xo' xucucun pain ca to' pa' pin totoron Jeju ta caca ne. ⁵²Mo hwet ac con na Pilatos, mi' ne pain curucun Jeju ta ac con na. Ma, an mao rain ta ac con na. ⁵³An qui' ca' ac cain na curucun pain pana, wiric pa' pin ac cain na con cote ca wom co awi. Wara ca' na man ca wara xe' wa pain pacun ma', an corom pe ac cain na. Iri' xocori na manain pacun ma', om ca an corom pe querec tocwa pain wari' co mi' pin. ⁵⁴Maqui' pin na xec nein ca ara xo' xine oro carawa nein ca tomi' querec te nucucun oro judeu ma'. Xo' um pin ta' na quem, wara sábadu pin ta' na.

⁵⁵Ja' ja' ac cocon na José oro narima' co wara ja' ja' qui' nonon Jeju pain Galileia pane. Querec nanain manain pacun ma'. Querec nonon José pain ca an corom pe cain curucun Jeju ma' quem. ⁵⁶In mama' ac cacamain na xirim ca to pan cacama pain Jerusalém ma', ara xo' ac cacamain na oro waraqui pana ca hu xain tamana ma' quem. Tacana to ac cacama na pain sábadu ma', pain ca xao to wa cacamain ximicacam ma'. Win ne ca tomi' capari' Iri' Jam pain ca xirao' nucun Moisés cara pane nana.

23.56 Je curucucun oro judeu pane. Mi' pin iri na win ma' caca ne, an corom pe xin iri nanain curucun pain manain pacun ne, ji'ao mi' ac xine na pain oro waraqui pana ca hu awi. Ma' ta om cunu hap ne nanain.

Ca e' mami' ca Jeju

Mateus 28.1-10; Marcos 16.1-8; João 20.1-9

24 Domingo pin iri na ne, pain iri' xo' xec ma', maji pain manain pacun ca an corom pe xine curucun Jeju pane ac cacama na oro narima'. Cut mama' ac cacamain na oro waraqui pana ca hu xain tamana ca wara ara xo' cacama ma'. ²Hwet iri nanain ne, querec ac cacamain na ca wara joc panajao' pin xine pacun ca tao' pa' nain ma'. ³Corom mama' ac cacama na. Wara om pin na curucun Taramaxicon nexi' Jeju. ⁴Cain' cain' xira ne ac xequequem na. I'ina na ximicacam. Ane ane coco' to ho' ac cacam na wari' ma'. Ma' 2 nana. Toc meremem tamana na womicocon, ac ca joc xec mip ca xina na cocon. ⁵Jin' tamana ac cacama na. Pe torotop to nana, noro quiji' mama' nanain macan' ma' quem. Tomi' ac cacam na wari' ma': Para pirao' pe hun pain manain pacun co e' mami' quem? Xi pe xica' pe ara cain i ca' wari' co mi' pin ta. Om ca pe cain i ca' wari' co e'. ⁶Om pin nain i ca! E' mami' na ta! Mam' pe wet jein ca tomi' cuhu' pane, pain ca pe ho' pe ho' wet cuhu' pain Galileia pane. ⁷Tomi' ca' nuhu' pane: Iri' Wari' paxi' ina, ane ma' caca wari' co noc nanapa' ne. Na e' na pain ca an mi' cacapa' cocon oro caracat. Na e' na pain ca tatatain mi' cacapa' pain pana quem. Ma' 3 pin iri tara xec nein ca mi' pin ne ne, na ac ne tara pain ca e' mami' ta' quem. Ac i ma' na ca tomi' cuhu' pane na ca tomi' cacam ma'. ⁸Mam' pe wet ac cacamain na ca tomi' nucun Jeju pane.

⁹In ca' iri nanain manain pacun ne, in hwet ac cocon na co taxipa' ca Jeju ma', co ma' 11 nana ma', tomi' hwet tomi' hwet pi' pin ac cocon na pain oro ca querec cacama pain oro ca taraju cacama ma' quem. Tomi' hwet tomi' hwet pi' pin nonon pain oro xucucun wari' co howa nonon Jeju ma' quem. ¹⁰Mo nana oro narima' co tomi' hwet nonon pain oro apóstolo ma': Ma' na Maria Madalena. Ma' na Joana. Ma' na Maria jicon Tiago. Ma' nana oro xequequem co ja' ja' nanam ma' quem. ¹¹Ane om howa tacacama ne. Ac ca tamanain cacama na ta nana pain ca taraju cacain ca tomi' nequequem. ¹²Pedro ma' iri na ne, tequi' pe ac ca na, mo hwet ac cain na manain pacun. Xujuxuc pe iri na ne, querec e' non wom co mam' wiric pa' tocwa ma'. In mao ac ca na, cain' cain' xira ne ac ca na pain carawa ca ara non Jeju.

**Ca hwet pa' tococwa co taxipa' ca co
xuruxut mama' nanain wanaji Emaús**

Marcos 16.12-13

¹³E' mami' iri na Jeju ne, pain iri' xec nein ma', paca' ac cacain na Jerusalém win ma' caca co taxipa' ca Jeju ma', co howa nonon ma'. Ma' 2 nana. Xuruxut mama' nanain wanaji ca paric to ne xirim ma', Emaús ma'. Om ca pira ca' nein Jerusalém Emaús. Ma' 11 e' na quilômetro nein pain ca pira ca' nein ma'. ¹⁴Pain ca xuruxut mama' caca ma', tomi' tomi' ac xucucun na pain oro carawa ca ara ne con Jeju. ¹⁵Pain ca tomi' tomi' wet xucucun ma', maqui' ac cain waracocon na Jeju. Wirico Jeju co wixicam nonon ma'. Xuruxut wi ac xucucun na. ¹⁶Wirico paxi' na, ane om querec pin' cocon ne. Ac ca narain ho' pan tococwa na pain ca querec pin' cocon ma'.

¹⁷Tomi' querec ac tococwa na: Ma' carawa ca tomi' xujuhu' pain ca xuruxut hwe ca' quem tata.

Coco' ac caca na. Naro na tococon. Querec pin' tata pain ca tomi' xaxa' tamana nucucun. ¹⁸Tomi' ac ca na xucun ma'. Cleopas na wixicon. Tomi' querec non Jeju: Mija nana oro xucucun wari' co maqui' nanain Jerusalém pain oro xijein xec ca' ne. Xica' pe ma pain ca om taxi' main carawa ca ara ne ra na ca tomi' querec con ma'.

¹⁹Ma' carawa ca ara ne quem ac con na.

Om na, tomi' xujuxut pain carawa ca ara non Jeju co maqui' nain Nazaré pane ac caca na. Profeta na Jeju pane, pijim' hwara' opa na pane. Ara nain carawa ca om ara taxi' ne ca wari' wa quem. Hohot non Iri' Jam, in ac in ac pi' pin nonon oro wari' quem. ²⁰Ane noc cocon oro taramaxicon nucucun oro sacerdote cocon oro xucucun oro taramaxicon nexi' ne. An mi' nonon con taramaxicon nucucun oro romano. Ma' ta to' pa' ma' totoron ne nonon. To' pa' pin nonon quem, tatatain mi' nonon pain pana. ²¹Coromicat ca' paxi' urut con pane: Wirico tara co to' witan ca' toton napari' cocon oro co noc nanapari' pain ca wari' nein Israel iri' ca', ac je paxi' na ca coromicat nuxut con pane. Ane ma' 3 pin ne xec pain ca to' pa' pin cocon ne. ²²Pain xec cara ne, jaxica' pin ac cacaparut na oro narima' co win ma' urut quem. Iri' xo' xec pin iri na ne, mama' nanain manain pacun ca an corom pe xine curucun Jeju. ²³Hwet iri nanain ne, wara om pin na curucun. In hwet ac cacaparut na, tomi' hwet ac cacaparut na pain ca querec cocon oro jam co taramaja mi' nonon Iri' Jam. Ac ca

tohwein' cacama na, ane om pi'am cacama ne. Querec nana. Tomi' ac cacam na, e' mami' na ta ac cacam na. ²⁴Mo querec xi' e' ac caca na oro win ma' nuxut quem, paric nana co mama' nanain manain pacun. Iri'o' na xin ca tomi' cacama ne nana. Hwet iri nanain ne, wara joc hwet pin na pacun ca tao' pa' nain, wara om pin na curucun quem. Noro xin paxi' nanain, ane om querec cacain ne na ca tomi' hwet cocon Jeju ma'.

²⁵Wa inuhu' me pan ac cocon na Jeju. I'ina a xihwe pain ca taraju pa' wa ta. Je xi howa hap hwein oro ca tomi' caca oro profeta cara pane? ²⁶Xi na e' ara ne pain ca jain jain ca Cristo pain ca mi' pin nucun ta. Aram aram mi' pan ac con tara pain ca momon taramaxicon cara wa Iri' Jam ta na ca tomi' tococwa ma'. ²⁷Tomi' xo' ac tococwa na pain capijacon Iri' Jam ca tomi' mi' pan non ma', je pain ca xirao' pe nucun Moisés, je pain oro ca xirao' to nucucun oro profeta cara pane, tomi' xo' tomi' xo' pi' pin ac tococwa na pain oro ca xirao' pe xine capijacon Iri' Jam ca tomi' mi' non quem.

²⁸Hwet pin iri nanain ca paric to ne xirim ca xuruxut xumu caca ma', pain Emaús ma', ac ca tiquin' mao ta' ca na Jeju ma'.

²⁹Om na, ta tiquin' mao ma me. Pe ho' xut, xi irawin pa' pin xim ara capari' ta. Xim pin ta' na ta nonon. Tomi' tamana nonon, tomi' mip nonon. Ma ac tococwa na, corom hwet ac tococwa na pain xiricocon.

³⁰Xao to ho' iri xucucun pain pana ca mam' cao' to wa ne, an ac cain na capam' Jeju, tomi' ac con na Cote ca: Tomi' querec te urut pum pain ca mi' maparut pain capam' ca' Te ac ca na, jicat ac cain na, mi' ac tococwa pain na quem. ³¹Ane ane ma' pin ac ne na ximicocon. Querec pin' nonon Jeju. Ane om pin hap pan ca ne. Querec querec om pin nonon. ³²Wirico ma' ira ac xucucun na. Om ca meo toto ne ximixi' pain ca tomi' tomi' capari' pain wana ra? Meo toto napari' ca' ira! Tomi' querec te tamana iri' pain iri' ximixi' pain ca tomi' xo' capari' pain ca xirao' pe xine capijacon Iri' Jam ne xucucun.

³³Maji ta ac xucucun na, in mama' hap ac cacain na Jerusalém. Hwet ac tococwa na co taxipa' ca Jeju ma', co ma' 11 nana ma'. Hwet tata pain ca cut in xucucun cocon oro xucucun co howa nonon Jeju ma' quem. ³⁴Tomi' pan ac caca na: Iri'o' na ca e' mami' ca Taramaxicon nexi' ta. Hwet pa' non Simão cwa' quem nana. ³⁵Caram ma' co xo' maqui' nanain Emaús ma' iri nana ne, tomi' hwet ac cocon na pain oro ca ara nonon pain ca

xuruxut cacain wana ne, je pain ca querec pin' cocon Jeju pain ca jicat pan cain capam' pain ca cao' nucucun quem.

Ca hwet pa' cocon co taxipa' ca Jeju

Mateus 28.16-20; Marcos 16.14-18; João 20.19-23; Atos 1.6-8

³⁶ Pain ca tomi' tomi' wet xucucun ma', hwet qui' ac ca na Jeju. Xat pe nain ximijacocon. Ta toron ne xumuhu' me ta ac tococwa na.

³⁷ Xat ac ne na ximicocon. Jin' nana quem. Jima tara ma' nonon.

³⁸ Tomi' ac tococwa na: Para toron ne xumuhu' ma'? Para tara con ta'a mahu' pain ca e' mami' ta' ca' quem tata. ³⁹ Noro jein jami manain prego pain mu je pain caxima ca' quem. Wata' cwa' ira. Quep xine, querec pin' xine. Xi ma' ne cwerein tamataracon wari' ta. Om nain arain quem. Ane ma' capa' ara je cwere ne na ca tomi' tococwa ma'.

⁴⁰ Tomi' iri nain i ma' ne, mam' pe mi' ac tococwa na pain jami manain prego pain micon pain caximacon. ⁴¹ Tomi' querec te tamana ac caca na. Wa wa paxi' nana, ane tara con ta'a tara con ta'a wet cocon ne.

Ma' nuhu' carawa ca cao' wa quem ac tococwa na. ⁴² Mi' ac cocon na con hwam co wara xain caca ma' ⁴³ Cao' ac con na. Querec nonon pain ca cao' con quem.

⁴⁴ Je ca tomi' xuhu' pain ca pe ho' pe ho' wet xuhu' pane ac tococwa na. Na e' na pain ca hwet pin ne oro capijacon Iri' Jam pata'. Oro ca xirao' nucun Moisés cocon oro profeta, je pain Oro Tamara' quem, na e' na pain ca hwet hwet pi' pin ne pata' ac tococwa na.

⁴⁵ Mi' ac tococwa na pain ca taraju pa' wa. Ma' ta taraju pa' hwein capijacon Iri' Jam ca xirao' pe xine pane tata. ⁴⁶ Tomi' ac tococwa na: Je i ca' ca xirao' to caca pata' pane: Cristo ma', na e' na pain ca jain jain ca pain ca to' pa' pin tocwa ta. 3 pin iri tara xec pain ca mi' pin nucun ne, e' mami' ac ca tara ta na ca xirao' to caca pata' pane. ⁴⁷ Xirao' to ca' nana pane quem: Oro wari' co howa nonon ma', na e' na pain ca pijim' hwet cocon oro wari' con Cristo ta nana pata'. Pijim' pijim' pi' pin totoron oro wari' pain oro xijein macan'. Pijim' ca' totoron: Cwirin' pin jein ca caracat nuhu', ma' ta xic am pin cain Iri' Jam ta totoron. Pijim' cain' to tatarain Jerusalém, mao ac ne ma' tara cocon, pijim' mama' ac cacain tara

24.43 Pain ca cao' con hwam Jeju ma', je ca to' querec pin' tococwa co taxipa' ca pain ca e' iri'o' ca ma'. Xi cao' taxi' ca jima ta.

oro xijein macan' ta na ca xirao' to caca pane. ⁴⁸Je ca tomi' xuhu' ca' ac tococwa na. Pijim' jujun oro wari'. Tomi' hwet jujun pain oro ca taraju nuhu' je pain oro ca querec nuhu' ca' quem. ⁴⁹Taraju wet xine e': Main mam' xuhu' pain Tamataracon Te ca wara tomi' pe mi' cuhu' pane. Ane na e' ne pain ca winim' cain' hwein ne. Winim' to cain' jein Jerusalém ca', aram aram hwet pa' ac cuhu' tara ca hwara' opa nucun Te co pe pawin cwain na ca tomi' tococwa ma'.

Ca in mao cain pawin Jeju

Marcos 16.19-20; Atos 1.9-11

⁵⁰Maji ta ac ca na Jeju, o mama' ac tococwa na co howa nonon ma'. Wixicam pin iri nanain ca paric to ne xirim pain Betânia ne, cut piri' ac cain na micon, tomi' ac tococwa na: Param mi' inuhu' pain ca ara mi' cuhu' pain oro ca awi wa Te Iri' Jam ta tata. ⁵¹Pain ca tomi' tomi' wet tococwa ma', piri' ca' ac tococwa na, an piri' mao ac tocwa na pain pawin. ⁵²Pe torotop mi' querec te ac cocon na, in mama' ac cacain na Jerusalém. Tomi' querec te tamana nana. ⁵³Mama' ho' mama' ho' ac cacain na ca tao' caho' nein cote ne xiricon Iri' Jam ma'. Awi na Iri' Jam awi na Iri' Jam ta nana quem.

Je i ma'.

João

Ca xirao' nucun João con Jeju Cristo

Ca wari' pin ca co ma' co ac capijacon Iri' Jam

1 Pain cara pane, pain ca om om wet ne macan' pane, wara ma' na co ma' co ac capijacon Iri' Jam, ac je na wixicon. Wara pe ho' non Iri' Jam. Iri' Jam na quem. ²Wara pe ho' non Iri' Jam pain cara pane, pain ca om om wet ne macan' pane. ³Wirico co quep quep pi' pin nain oro carawa pane quem. Om ca ma' camain' ne oro carawa ca om quep ca. ⁴Wirico co to' e' napari'. Mi' napari' pain ca e' cara wa. Ca e' nucun ca to' e' napari' ca', ac naran na, toha mi' napari' pain ximixi'. Ma' ta querec pin' hwein oro ca iri'o' wa con Iri' Jam ta napari'. ⁵Pain ca ac naran ca ma', toha mi' nonon oro wari' co ac ca to cacain ca jitacat nein xim pain ca om howa cocon Iri' Jam ma', co taramaxicon ne nonon Caxicon Jam. An hwet mi' nonon con Iri' Jam co iri'o'. Om ca to' quiji' pin ac con Iri' Jam Caxicon Jam ta.

⁶Ma' ac ca na wari' pane. João na wixicon. Ma' na ca taramaja wa ca mi' con Iri' Jam. Ca' na ca tomi' con Iri' Jam pain ca mi' con pain ca taramaja nucun pane: ⁷Tomi' hwet roron oro wari' ma', tomi' hwet mi' roron con co ma' co ac Iri' Naran cwa'. Ma' ta howa howa pi' pin cocon ta na ca tomi' con ma'. ⁸Om ca João ca co ac iri' naran. Maqui' e' na pain ca tomi' hwet mi' cocon con co ac iri' naran oro wari'. ⁹Co ac iri' naran ma', hwet hwet xam' napari' pain ca wari' nexi'. Toha mi' napari' pain ximixi' ca'.

¹⁰Co ac iri' naran ma', pe paxi' nain macan' pane. Wirico co win mu ca Iri' Jam pain ca quep qui' cain macan' cocon oro wari' pane, ane om querec pin' cocon oro wari' ne. ¹¹Pe paxi' nain macaracon, ane om tomi' querec te cocon oro win ma' ca ne. ¹²Oro wari' co tomi' querec te nonon ma' iri nana ne, co howa nonon ma', mi' tata pain ca mana panxica Iri' Jam pin caca. ¹³Om ca to' mana panxica Iri' Jam tococwa cocon oro hwanana

1.6 Xucun João na co cwa'. Wirico co cwa' João co ja' taxipa' nonon pain com oro wari' pane.

nucucun. Om ca to' mana panxica Iri' Jam tococwa cocon cote caca cacam jicocon pain ca ma' xirapari' pije' na cacama. Om ca to' mana panxica Iri' Jam tococwa cocon cote caca pain ca wanxi' tococwa quem. Wirico Iri' Jam pan na co mi' nonon pain ca mana panxica pin caca ma'.

¹⁴Wari' pin na co ma' co capijacon Iri' Jam na wixicon. Pe ho' napari' pane. Querec pin' urun pain ca awi tamana nucun pain ca hwara' opa nucun pain ca Iri' Jam nucun. Xi Iri' Panxica Iri' Jam ara ca ta. Om ca noc capari', xiram pa' tamana napari'. Tomi' iri'o' e' na.

¹⁵Tomi' hwet nonon oro wari' João pane, tomi' hwet mi' nonon con co ma' co capijacon Iri' Jam na wixicon. Ca' na ca tomi' cocon pane: Wirico co tomi' hwet xuhu' pane. Tomi' ca' inuhu' pane: Wara maqui' ina. Maqui' ta' pa'ao' na xucun co hwara' opa tiquin' ca' napa'. Xi om ne ca wara ma' ara ca pain ca om pan' querec ta' pane na ca tomi' tococwa ma'. ¹⁶Om ca noc camain' capari'. Xiram pa' xiram pa' pi' pin napari'. Xiram pa' ho' xiram pa' ho' napari'. ¹⁷Moisés cara pane, tomi' hwet napari' pain oro ca tomi' ha' je capari' Iri' Jam. Jeju Cristo ma' iri na ne, an hwet mi' napari' pain ca xiram pa' capari' Iri' Jam. Mi' napari' pain ca querec pin' xin oro ca iri'o' wa con Iri' Jam quem. ¹⁸Om na wari' co querec non Iri' Jam. Om ca querec camain' tocwa. Xica' pe na iri' Panxica co an hwet mi' napari' con Cote ca. Xi jao jao ma' ara con ta. Iri' Jam pan na ta.

Ca pijim' nucun João co ja' taxipa' com ma', pain ca om ca wata' ne co wara tomi' pe ca Iri' Jam pane ca

Mateus 3.1-12; Marcos 1.2-8; Lucas 3.1-18

¹⁹Oro taramaxicon nuxut pain ca judeu urut ca', co to nanain Jerusalém pane, tomi' ac cocon na oro sacerdote cocon oro levita ma'. Mo tomi' querec jun João ma': Cain' ca wari' ma quem jun ta nonon. Ma, mo hwet ac cocon na, tomi' querec ac cocon na: Cain' ca wari' ma quem ac cocon na.

1.14 Tomi' mi' tomi' mi' wet non Jeju. **1.19** Oro sacerdote ma', taramaja to nanain cote ne xiricon Iri' Jam. Tomi' mi' nonon con Iri' Jam oro wari', tom tain' mi' nonon pain carawa nucucun quem. **1.19** Taramaja to nanain cote ne xiricon Iri' Jam oro levita pane. Quep xihó' nonon oro sacerdote. Iri' hwanana ne nonon Levi panxica Jacó cara pane. Je ca oro levita tococwa ma'.

²⁰ Tomi' ac ca na, om ca hehe ca. Om ca wata' ne co Cristo co to' witan roron oro wari' ta ca Iri' Jam pane na.

²¹ Tomi' querec mami' ac cocon na: Cain' ca wari' ma quem? Wum tara co profeta Elias cara pane? Wum tara co wara tomi' pe caca oro profeta pain ca main in qui' tarain macan' ta caca pane ra?

Om na, om ca Elias ta' quem ac ca na.

Wum co profeta co wara tomi' pe ca Iri' Jam ra?

Om na quem ac ca na.

²² Tomi' xut ta! Cain' ca wari' ma quem ac cocon na. Ma' ta tomi' hwet xut cocon co tomi' querec jun ta nanaparut pum. Tomi' xut! Cain' ca wari' ma quem nonon.

²³ Wata' co xirao' pe ca profeta Isaías cara pane ac tococwa na. Ca' na ca tomi' ca pane:

Wata' co merem pe nain mahweri.

Quep tan pan mi' jun pain wana Taramaxicon nuhu'
inonon oro wari'.

Ac i ma' na ca tomi' tococwa ma'.

²⁴ Caram ma' co tomi' jun caca oro taramaxicon ma', ma' nana co fariseu nana. ²⁵ Tomi' querec ac cocon na João: Para ja' momon pain com oro wari' ma' quem? Win ne ca tomi' ma ma': Om ca wata' ne co Cristo ma', ac i ma' na ca tomi' ma ma'. Om ca Elias ta' ma, om ca profeta ta' ma quem, ac i ma' na ca tomi' nem ta nonon.

²⁶ Ja' paxi' inonon pain com oro wari' ta ac tococwa na. Ane ma' ca xucun co pe ho' nuhu' cwa' ne. Om ca querec pin' hun. ²⁷ Wirico co wara tomi' hwet xuhu' pane. Tomi' ca' inuhu': Wara maqui' ina. Maqui' ta' pa'ao' na xucun na ca tomi' xuhu' con pane. Iri' wari' na. Om ca hohot ne pain

1.20 Ca' na ca tomi' mao nein ca Cristo wa cocon oro judeu pane. Iri' wari' co wara tora' ca Iri' Jam pane ta nana. Iri' Taramaxicon tara, wirico tara co to' witan toton nonon oro wari' ta nana. **1.21** Wari' co profeta ma', tomi' hwet taxipa' nain capijacon Iri' Jam ca an hwet mi' non Tamataracon. **1.21** Ca' na ca wara tomi' pe nucun Iri' Jam pane: Main maqui' tara profeta co an xiho' non Moisés ta na. Wirico co tomi' mi' caca. **1.23** Ca na ca tomi' mao nein ca xirao' nucun Isaías: Wari' co quep tan pan mi' non pain wana Taramaxicon nexi' ma', ac ca winim' xo' con na, ac ca an pe xo' cain na ximicon con. Ac je na ca tomi' mao ne ca xirao' pe nucun profeta Isaías cara pane. **1.24** Judeu nana oro fariseu pane. Ac taramaxicon nana. Tomi' ca' nonon oro win judeu caca: Na e' na pain ca tomi' ha' xin oro ca xirao' nucun Moisés ca tomi' ha' je capari' Iri' Jam ta. Na e' na pain ca tomi' ha' xin oro ca xirao' nucun oro hwanana nexi' ca tomi' ha' je cacapari' quem. Ma' ta querec hohot capari' Iri' Jam ta nana pane.

ca tacom' mi' ton pain macorinain caji caximacon ma', xi iri' wari' ta' ta na ca tomi' tococwa ma'.

²⁸ Je pain Betânia ma', pain xijein cacarain Jordão ma', je ca tomi' querec pe cocon João pane. Je ca ja' to tococwa pain com oro wari' pane quem.

Ca pijim' nucun João co ja' taxipa' com ma', pain ca wijimain taramaji ovelha nucun Iri' Jam na Jeju ta ca

²⁹ Xec pin iri na ne, querec ac con na Jeju João ma', pain ca xut hwet ton con ma'. Tomi' ac ca na: Noro jun co ma' co ac Wijimain Taramaji Ovelha nucun Iri' Jam ma'. Mi' pin pe rain maxicocon oro wari' ta non Iri' Jam pari'. Win ne wijimain taramaji ovelha ca mi' pin pe nain maxixi'. Xic am pin tain nain ca caracat nexi' ta na ca tomi' ca ma'. ³⁰ Wirico co ma' co tomi' ta' ne ac ca na. Wara maqui' ina. Maqui' ta' pa'ao' na xucun co hwará' opa tiquin' ca' napa'. Xi om ne ca wara ma' ara ca pain ca om pan' querec ta' pane, ac i ma' na ca tomi' xuhu' ne. ³¹ Om paxi' na ca querec pin' ton pane. Ane maqui' pan ta' pain ca ja' xuhu' pain com ca' ne. Ma' ta querec pin' hun ta inuhu' oro win ma' ne pain ca wari' nein Israel iri' ca'. Je ca maqui' ta' ca' na ca tomi' tococwa ma'.

³² Tomi' ac tococwa na: Querec inain Tamataracon Iri' Jam pain ca quiiji' qui' nein pawin pane. Ac ca quiiji' ca xucu' cwa' na pain ca quiiji' qui' nein pawin. Quiiji' quiiji' xat ho' ac con na Jeju. ³³ Om paxi' na ca querec pin' ton ira ac ca na. Ane wara tomi' pe capa' Iri' Jam ne. Ja' roron pain com oro wari' ta napa' pahu' pane. Ca' napa' pane: Main querec ron wari' co quiiji' xat pe ne Tamatara ta. Wirico tara co mi' toton nonon pain Tamatara oro wari' ta napa' pane. Ma' ta to' xucun wari' pin tococwa ta napa' pane. ³⁴ Querec ara xi' inain con. Je ca tomi' hwet xuhu' ca': Panxica Iri' Jam na ta inuhu' con na ca tomi' cocon João pane.

Co taxipa' ca Jeju co ja' ja' cain' nonon pane

Mateus 4.18-22; Marcos 1.16-20; Lucas 5.1-11

³⁵ Xec pin iri na ne, pe mami' ac cain na i cain João. To ho' urut con quem. Ma' 2 urut pain ca taxipa' urut con ca'. ³⁶ João ma', querec iri non Jeju pain ca xut tiquin' ca ma' ne, tomi' ac caparut na: Noro jun co ma' co

wijimain taramaji ovelha nucun Iri' Jam ma'. Win ne wijimain taramaji ovelha ca mi' pin pe nain maxixi' ta naparut.

³⁷ Taraju iri urut con João ne, ja' ja' pin ac urut con na Jeju.

³⁸ Noro in ac caparut na Jeju. Querec ac caparut na pain ca ja' ja' urut con. Cain' cain' xihwe quem ac caparut na.

Om na, main ca pi'am pe ma quem Rabi ac urut con na. Pain ca Rabi urut con ma', je i ma' ca tomi' nuxut pain capijaxut pain ca judeu urut ca'. Co ca' na taxipa' capijacon Iri' Jam na ca tomi' mao nein quem.

³⁹ Harahap je. Querec ac hwein tara ta naparut.

Ja' ja' ac urut con na, querec ac urut pain na xirim ca pi'am pe ca ma'. Wara piquirim pin na xina. To ho' ac urut con na, xim pa' ac caparut na quem.

⁴⁰ André na wixicon win ma' ne pain ca taraju urut pain ca tomi' nucun João ma', pain ca ja' ja' pin urut con Jeju. Aji' non Simão Pedro André.

⁴¹ Pirao' hap ton aji' Simão ta ac ca na, mo hwet ac con na. Mam' urut con Messias ta aji' ac con na. Cristo na ca tomi' mao ne ca Messias wa pain capijaxut pain ca judeu urut ca'. ⁴² Maji con, hwet xun Jeju ta ac con na cwaji' ca, hwet ac cocon na.

Noro ac con na Simão Jeju. Tomi' ac con na: Simão na wuxum. Panxica João ma. O' ma' ni pin xim. Cefas pin ra ac con na. Pedro na ca tomi' mao nein ca Cefas wa pain capijaxut pain ca judeu urut ca', pain aramaico ca'.

Ca ja' ja' xine tococwa Filipe con Natanael

⁴³ Xec pin iri na ne, mao tain Galileia ta ac ca na Jeju. Mam' ac con na Filipe. Hap ra, ja' ja' ne ac con na.

⁴⁴ Wari' nein Betsaida na Filipe ma'. Je ca maqui' ca André con Pedro quem. ⁴⁵ Pirao' ac con na Natanael Filipe. Tomi' ac con na: Mam' urut con co xirao' pe ca Moisés pain ca xirao' pe cain oro capijacon Iri' Jam ca tomi' ha' je capari' pane, co xirao' pe caca oro profeta pane quem. Mam' urut

1.42 Om na João co ja' taxipa' com pane. Xucun João na. **1.42** Ca Cefas wa ma', je i ma' wixicon pain capijacocon oro grego. Pacun na ca tomi' mao nein pain capijacocon oro judeu ma', pain aramaico ma', je i ma' wixinain capijacocon oro judeu. Je ca Pedro cocon oro wari' ma' quem.

con. Jeju na wixicon. Panxica José na. Maqui' nain Nazaré ta na ca tomi' con ma'.

⁴⁶Ma' tara ca quep xiho' taxi' capari' wari' co maqui' nain Nazaré ra ac ca na Natanael.

Hap ra. Querec ra e' ac con na Filipe.

⁴⁷Querec iri non Natanael Jeju pain ca maqui' ca ne, tomi' ac ca na: Wirico co ma' wari' nein Israel co xut xo' ma'. Om ca mixein camain' ca na ca tomi' ca ma'.

⁴⁸Cain' ca querec pin' ac mapa' ma' quem ac con na Natanael.

Om na ta Natanael ac ca na Jeju. Pain ca om tomi' querec quem Filipe pane, wara querec inem pain ca xao pe pe main xiquijinain panajinain figo pane, ac i ma' na ca tomi' con ma'.

⁴⁹Taramaxicon co ca' na taxipa' capijacon Iri' Jam ac ca na. Panxica Iri' Jam ma ma' ira. Taramaxicon nucucun oro wari' nein Israel ma ma' ira na ca tomi' con ma'.

⁵⁰Tomi' ac con na Natanael Jeju: Howa mapa' Natanael, xi om ne ca tomi' hwet ara xim pain ca querec xim pain ca xao pe pe main xiquijinain panaji figo pane ac con na. In ac paxi' mapa'. Ame ma e', main querec rain ca ara ta' ta'. In ac tamana ac mapa' pain tara ta non. ⁵¹Ame hwe e' ac caparut na. Main querec jein ca pa ne nanawin. Querec ac huhun tara oro jam co taramaja mi' nonon Iri' Jam quem. Querec jujun pain ca piri' hwet cacain pawin je pain ca quiiji' hwet cacapa' pain ca Iri' Wari' ta' ca' quem. Tomi' iri'o' inuhu' ta ac caparut na.

Ca to' iri' comi uva pin cain com Jeju

2 3 pin iri na xec nein ne, ma' ac ca na wari' co an tam narima' ma', pain Caná ma', je i ma' wixinain cidade ma'. Pe nain Galileia Caná. Je ca pe cama jicon Jeju ma' quem. ²Harahap je nanaparut. Jeju, warut, ca' urut pain ca taxipa' urut con ca', mama' ac urut na.

1.45 Om ca wanxi' con Jeju José pane. Panxica Iri' Jam na Jeju. Pe horona e' non Jeju José. **1.51** Pain ca Iri' Wari' ina ta ca Jeju pane, ac ca tomi' ta' ca na ira: Maqui' paxi' inain pawin, ane ac wari' ta' ne. Wata' co iri' taramaxicon ta, co wara tomi' pe ca Iri' Jam pane. Ca' na ca wara tomi' pe ca Iri' Jam pata' pane: Main hwet turuhu' Iri' Wari' ne co to' witan xim nuhu' ta nuhu' pata' pane. To' witan ca' turuhu' pain ca caracat nuhu' ta nuhu' pata' pane, ac i ma' na ca tomi' ta' ca Jeju ira.

³Pi' pin iri na comi uva ne, tomi' ac cama na jicon Jeju, tomi' non cawinacam: Pi' pin na comi uva ta non.

⁴Para tomi' mapa' ma' quem na' ac cam na. Om ca maqui' querec capa' xec nein ca an hwet mi' toton pain ca hwara' opa ne oro wari' cwa', pain ca ara tain ta' carawa ca om ara taxi' ne ca wari' wa ca'. Ac i ma' na ca tomi' cam jicon.

⁵Tomi' ac cama na, tomi' pan tata co taramaja mi' e' nonon co an tam narima' ma': Tomi' ha' jun pain oro ca ara je cuhu' ma' tata.

⁶Pain ca judeu urut ca', hohoc mam' taxipa' urut pain muxut pain ca cao' xi' nuxut. Je ca an to xine pain i ma' ca cam pe wa com ma'. Ma' 6 na. Ac tapaxi' paxi' na, mam' quep tapaxi' nanain pain pacun. Iri' horonain. Ac ca ma' 100 litro ne na ca moin' xica' pe nein.

⁷Tomi' pan ac ca na Jeju ma', tomi' nonon co taramaja to nanain i ma': Cam moin' jein com pain oro tapaxi' ma' nonon.

Cam moin' xo' ac cacain na.

⁸Cam wijimain ho' jein. Mi' querec jun pain co ma' co querec wet nain carawa ca cao' querec te iri' ca' ac cocon na.

Cam mi' wijimain ac cocon pain na.

⁹Toc querec ac cain na. Comi uva pin na com ta. Co taramaja to nanain i ma', taxi' nanain ca maqui' ne comi uva ma'. Co ma' co querec wet nain carawa ca cao' querec te caca ma' iri na ne, om ca taxi' cain. Je ca hap ra con co an tam narima' ma'. ¹⁰Tomi' ac con na: Cain' cain' xima quem? Oro wari' ma', cam mi' cain' taxipa' nanain comi uva ca awi tamana. Toc toc ma'am pin iri nana co toc nanain ma' ne, cam mi' ac tococwa na pain comi uva ca om awi homa. Wum iri na ne, cam mi' cain' main ca om awi homa nein, aram aram cam mi' ac main na ca awi tamana nein ca' na ca tomi' ca ma'.

¹¹Je win an hwet pe cain ca hwara' opa nucun Jeju pane, pain ca ara cain ca om ara taxi' ne ca wari' wa pane. An hwet pe pe nain pain Caná pain Galileia pane. Ara iri nain ne, an hwet pe ac cain na ca awi tamana nucun pain ca Iri' Jam nucun. Howa ac urut con na pain ca taxipa' urut con ca'.

¹²Mama' ac urut pain na Cafarnaum ma'. Mo urut: Jeju ma'. Jicon ma'. Xurucun ma'. Warut pain ca taxipa' urut con ca' quem. Mama' mama' pi' pin urut pain Cafarnaum. Om ca tocwan ne xec nein ca to urut pain i cain.

**Ca tomi' jein hwerehwet pin tococwa co vender to
nanain carawa pain cote ne xiricon Iri' Jam**

Mateus 21.12-17; Marcos 11.15-19; Lucas 19.45-48

¹³Wixicam pin ac ne na xec nein Páscoa ma', je i ma' xec nein ca tomi' querec te wi urut pain ca judeu urut ca'. Je ca mama' xin Jerusalém ta caparut Jeju ma', mama' ac urut na. ¹⁴Corom mao iri nain ca tao' caho' nein cote ne xiricon Iri' Jam Jeju ma' ne, querec ac tococwa na oro wari' co vender nanain boi pain ovelha con xucu'. Querec ac tococwa na co xao to to nanain pana ca meo to cacain oro xijein dinheiro ma' quem. ¹⁵Querec iri tata ne, an ac cain na macon, tucu xo' ac cain na, mam' weo hwerehwet pin ac tococwa na, mam' weo hwerehwet pin ac cain na ovelha pain boi quem. Joc camara' pin ac cain na pana ca taramaja to caca caram ma' co meo taxipa' nanain dinheiro ma', camara' wawaran mama' ac ne na moeda nucucun pain macan' quem. ¹⁶Tomi' ac tococwa na co vender nonon xucu' ma': Cut hwerehwet pi' pin jun. Waraju maho' jein xiricon Te ta. Xi xirinain vender vender pe wa carawa ne ta tata.

¹⁷Warut pain ca taxipa' urut con ca', mam' pe wet ac urut pain na capijacon Iri' Jam ca xirao' pe ca taramaxicon Davi cara pane. Ca' na ca xirao' nein ca mam' pe wet urut ca':

Om ca noc camain' tain xurum ta Te Iri' Jam.

Jain jain tamana inain.

To' ara napa' ca jain jain tamana tain xurum ta.

Ac ca to' pa' xim capa' na.

Ac i ma' na ca xirao' nein.

2.13 Páscoa na wixinain xec nein ca tomi' querec te xucucun oro judeu pain ca mam' pe wet cocon oro hwanana nucucun pain ca to' witan ca' tococwa pain Egito pain cara pane.

2.14Oro sacerdote pain cote ne xiricon Iri' Jam pane, noc tamana nanain dinheiro nucucun oro romano pain dinheiro nucucun oro grego, xi xirao' pe ara cacain jamicon wari' pain ta nana. Noc nain i ma' Iri' Jam ta nana. Je ca taramaja to cacain ca tao' caho' nein cote ne xiricon Iri' Jam caram ma' co meo nanain oro xijein dinheiro ma' quem. Maqui' iri nana oro wari' co tom tain' mi' xun nonon pain carawa Iri' Jam ne, co cut xin nanain boi pain ovelha con xucu' ma', cut ca' ac tococwa na pain dinheiro nucucun tatirim, mi' in hwet ac tococwa pain na iri' dinheiro nein cote ne xiricon Iri' Jam. Ha' ac tococwa na pain ca mam' cut cacain carawa ca tom tain' xin caca pane. Oro co meo nanain dinheiro ma', mixein tamana nana quem. Horon iri na dinheiro nucucun tatirim ca cut caca ma' ne, mi' in hwet wijimain e' ac cacain na dinheiro nein cote ne xiricon Iri' Jam ma' quem.

¹⁸ Tomi' querec ac cocon na Jeju oro taramaxicon: Ma' co mi' nem pain ca weo hwerehwet pin momon oro wari' pain boi pain ovelha ca'? Am Iri' Jam ca co tomi' nem ma'. An hwet pe rain ca hwara' opa nem ma', pain ca ara main carawa ca om ara taxi' ne ca wari' wa ma'. Ma' ta querec pin' xut pum pain ca tomi' quem Iri' Jam ta na ca tomi' cocon ma'.

¹⁹ Om na, to' pa horohot pin jein cote ne xiricon Iri' Jam ca' ac tococwa na. 3 pin iri tara xec nein ne, quep mami' ac tain tara ta na ca tomi' tococwa ma'.

²⁰ Cain' cain' xima quem ac cocon na. Xi quep hap cacain co taramaja nanain pane ta. Ma' 46 na cawaxi' pain ca taramaja cacain pane. 3 e' tara xec pain ca quep mami' hap main ra na ca tomi' cocon ma'.

²¹ Ane om tomi' mi' cain cote ne xiricon Iri' Jam Jeju ne. Tomi' mi' xucun pain curucun. ²² E' mami' iri na ne, mam' pe wet ac urut na pain ca taxipa' urut con ca', mam' pe wet urut pain ca tomi' nucun pain ca tomi' mi' cain curucun pain cote ne xiricon Iri' Jam pane. Iri'o' na xin ca xirao' pe xine capiiacon Iri' Jam ma', pain ca e' mami' ta' ca Jeju ma', iri'o' na ca tomi' nucun Jeju pane quem urut, howa ac urut con na.

Ca taxi' cain ca coromicat nucucun oro wari' Jeju

²³ Pe pe wet nain Jerusalém Jeju pain oro xec nein Páscoa ma', pain ca tomi' querec te wi urut pain ca judeu urut ca'. Mija pin nana oro wari' co howa nonon quem. Howa nonon, xi om ne ca querec ara cacain oro ca ara ca pain ca an hwet pe cain ca hwara' opa nucun pain ca ara cain oro carawa ca om ara taxi' ne ca wari' wa ma'. ²⁴ Howa urut pum paxi' nonon, ane tara pahu' ta'a pan cocon Jeju ne. Xi querec pin' ara cain ca wari' wa ta. ²⁵ Om ca ma' xirapa' na con wari' co tomi' hwet non pain ca coromicat nucucun oro wari' quem, om na. Taxi' pan tata, taxi' ximao nain ca coromicat nucucun oro wari' ta.

Jeju con Nicodemos

3 Ma' na wari' co fariseu pane. Nicodemos na wixicon. Taramaxicon wi na cocon oro win ma' ca pain ca taramaxicon to ho' cacaparut pain ca judeu urut pane. ² Hwet ton Jeju ta ac ca na, xut hwet towa ac con na. Tomi' xim inem Taramaxicon co pijim' mi' taxipa' nonon pain capiiacon

Iri' Jam ac con na. Taxi' urut pum pain ca maqui' mon Iri' Jam. Taxi' urut pum pain ca ca' na roron pain capija oro wari' quem pane. Xi an hwet pe taxi' ara main ca hwara' opa wa pain ca ara main oro ca om ara taxi' ne ca wari' wa ta. Mo xi om pe ho' quem Iri' Jam ma', om xi ara ac main oro ca ara ma ma' na ca tomi' con ma'.

³Om na ta Nicodemos ac con na Jeju. Wari' co om pan' qui' mami' ma', om ta hwet ac con Iri' Jam pain ca taramaxicon pe ca pain pawin ta. Tomi' iri'o' inem ta na ca tomi' con ma'.

⁴Cain' cain' xira quem ac ca na. Ma' na ca pan' qui' mami' ac ca wari' pain ca horon pin nucun ra? In hwet xirain monocwam jicon ra? Ac i ma' xira ca pan' qui' mami' ca ra na ca tomi' con ma'.

⁵Om na ta Nicodemos ac con na. Wari' co om mam' pan' qui' nain com je Tamataracon Iri' Jam ma', om ta hwet ac con pain ca taramaxicon pe ca pain pawin. Tomi' iri'o' inem ta. ⁶Wari' co pan' qui' pain ca wanxi' con cote ca ma', panxica wari' e' na. Wari' co pan' qui' mami' pain ca meo cain ximicon Tamataracon Iri' Jam ma' iri na ne, panxica Iri' Jam na co ma'. ⁷Je ca tomi' xim ca' Nicodemos ac con na. Ta wa ina me mapa' pain ca tomi' xim ca' me: Na e' na pain ca camara' qui' mami' hwe ta. ⁸Win ne hotowa ma'. Pahop pahop xam' na. Taraju paxi' irin ca pahop nein ma', ane om taxi' xin ca maqui' nein pain ca mao nein ne. Ac i ma' na pain ca mam' camara' qui' mami' caca oro wari' pain Tamataracon Iri' Jam quem. Xi querec pin' xin ca taramaja nein pain ca meo nein ximicocon oro wari' co camara' qui' mami' nana ta. Ac i ma' na ca tomi' con Nicodemos Jeju ma'.

⁹Cain' cain' xira quem ac ca na Nicodemos.

¹⁰Om ca taraju pa' ma ra ac con na Jeju. Win ne ca ca' na taxipa' momon pain capijacon Iri' Jam oro win ma' ma pain Israel ma' non. ¹¹Warut pain ca pijim' urut pahu' ca', tomi' hwet paxi' urut pahu' pain ca taxi' nuxut. Tomi' hwet paxi' urut pahu' pain ca querec nuxut quem. Ane om howa jein na hwein ca tomi' nuxut ne. Tomi' iri'o' inem ta. ¹²Mo ta om howa mahu' pain ca tomi' hwet xuhu' pain oro carawa ca ara pe nain macan' ca', cain' xi howa ac mahu' pain ca tomi' hwet xuhu' pain oro carawa ca ara

3.5 Tomi' ac i ma' iri non Nicodemos Jeju ne, ac ca tomi' ca' con na: Mo ta om cwirin' pin cain ca caracat nucun wari' ma'. Mo ta om an hwet pin cain ca cwirin' nucun ma'. Win iri' pain ca cwirin' pin ina iri' pain ca caracat nexi' pain ca ja' iri' com ca'. Mo ta om corom pe ho' con Tamataracon Iri' Jam quem, om ta hwet ac con Iri' Jam pain ca taramaxicon pe ca pain pawin cain. Ac je na ca tomi' con Nicodemos Jeju pane.

pe nain pawin cain quem? ¹³Om ca ma' camain' ca xucun wari' co piri' mao nain pawin ta ac con na. Xica' pe ina pain ca Iri' Wari' ta' ca', xica' pe ina pain ca piri' mao tain pawin cain. Xi qui' qui' ara tain i cain ta non.

¹⁴Win ca Moisés cara pane, pain ca quio caxi cocon oro wari' oro caxicon em' pain mahweri pane ac con na. An wa nain arain too ca quep an xiho' con em', an piri' xat ac cain na pain pana quem. Ma' ta xio pin hwe pain ca noro hwein ta tata oro wari' co quio caxi wawa pane. Ac i ma' tatarapa' oro wari' co noc nanapa' pain ca Iri' Wari' ta' ca' quem, na e' na pain ca an piri' xat xim cacapa' pain pana. ¹⁵Ma' ta e' cara e' cara xam' caca oro wari' co howa nanapa'. E' cara to ho' totoron Iri' Jam ta na ca tomi' con ma'.

¹⁶Xi noc cuhu' Te Iri' Jam ta ac con na. Om ca noc camain' cuhu' pain ca wari' nuhu' ma'. Je ca tomi' ca' cuhu' pata': Mi' xuhu' con Panxita' co xica' xat cwa'. Ma' ta om mama' cacain cote ne xe oro wari' co howa nonon ta nuhu' pata'. Ma' ta e' cara caca nuhu', ma' ta to ho' to ho' xam' cacapa' ta nuhu'. ¹⁷Hwet roron oro wari' ta ara xi' napa' Te pahu' pane. Ma' ta to witan momon napa' pahu'. Om ca tomi' ca' capa': Hwet roron, ac juiz ra cocon, em' hwe, xi om ne ca caracat nuhu' ta roron, om ca tomi' ac i ma' capa' pahu', om na. To' witan roron ta napa' pahu'. Je ca hwet roron capa' pahu' pane. ¹⁸Oro wari' co howa nanapa' ma', om ca tomi' mi' tococwa pain wap wa pain ca caracat nucucun. Oro wari' co om howa nana ma' iri nana ne, wara tomi' mi' tata pain ca wap wa pain ca caracat nucucun. Xi howa cacapa' pain ca xica' xat ta' pain ca Panxica ta' ca'. ¹⁹Je ca tomi' mi' tococwa pain ca wap wa ma'. Hwet paxi' inonon pain ca ac naran ta' ca'. An hwet mi' paxi' inonon pain oro ca iri'o' wa con Te ma', pain ca noc cain ca caracat wa ma'. Ane noc cacapa' ne. Param e' nanain ca jitacat nein xim. Xi caracat ara caca ta. ²⁰Oro wari' co caracat taxipa' nana cwa', noc nanapa' pain ca ac naran ta' ca'. Om ca wixicam jun na cacapa'. Ma' ta om querec pin' cacaparut pain ca caracat nuxut oro wari' cwa' ta nana. ²¹Oro wari' co tomi' ha' taxipa' nonon Iri' Jam co iri'o' ma' iri nana ne, wixicam pin nanapa' pain ca ac naran ta' ca'. Ma' ta querec pin' cacaparut oro wari' pain ca quep xiho' caparut Iri' Jam pain ca tomi' ha' nuxut ta nana. Ac i ma' na ca tomi' con Nicodemos Jeju pane.

Ca tomi' hwet cain ca coromicat mi' con Jeju João co ja' taxipa' com

²² Maji ta ac caparut na, mama' ac urut pain na Judeia. Wirico Jeju, warut pain ca taxipa' urut con ca' quem, mon to wet ac urut pain na i cain. Ja' ac cocon na pain com oro wari' Jeju quem. ²³ Ja' nonon pain com oro wari' João ma' quem. Ja' pe nonon pain Enom cain, ca pe ja' pan nain Salim cain. Xi mija ara ne com pain i cain ta. Mija nana oro wari' co hwet nonon ma', ja' ac tococwa na quem. ²⁴ (Om ca tao' pe querec tocwa João ma', ame hwe e'.)

²⁵ Ma' ac caca na co taxipa' ca João ma', co tomi' in pin nonon win judeu caca ma'. Tomi' in pin xucucun pain ca hohoc xo' xucucun pain com ma', pain ca ma' ta hohot xun Iri' Jam ta caca ma'. ²⁶ Tomi' xun João ta ac caca na, xuruxut hwet ac cocon na. Tomi' xim urut pum taramaxicon co ca' na taxipa' capijacon Iri' Jam: Mam' pe wet mon win ma' ma cara pane, co pe ho' nem pain xijein cacarain Jordão pain cara pane quem? Tomi' hwet maparut con pane. Mija a xira wari' co hwet nonon pain xocori ca'. Ja' a xiroron pain com quem, ac i ma' na ca tomi' cocon ma'.

²⁷ Om na, mo xi om mi' con pain ca ara wa i ma' Iri' Jam ma', om xi ara ac cain ta ac ca na João. ²⁸ Taraju mahu' pain ca tomi' xuhu' pane: Om ca wata' ne co Cristo ta, ac i ma' na ca tomi' xuhu' pane. Tomi' e' napa' Iri' Jam pane: Wara o ron ta napa', ac i ma' na ca tomi' capa' Iri' Jam pane. ²⁹ Win ca wari' co an tam narima' ma'. Win ma' ca ma' iri na ne, quep xiho' e' non, tomi' querec te e' non. Taraju iri nain ca tomi' nucun ne, tomi' querec te ac ca na. Ac i ma' ina con Jeju quem. Tomi' querec te tamana ina pain ca tomi' hwet mahu' cocon oro wari' co hwet nonon ta. ³⁰ Je ca tomi' xuhu' ca' ac tococwa na. Na e' na pain ca hwara' opa tamana pin ca Jeju pain ca mija pin caca co taxipa' nonon ta. Na e' na pain ca wijimain pin ne ca hwara' opa ne ca' quem, pain ca paric to pin cacapa' co taxipa' nanapa' cwa' na ca tomi' tococwa ma'.

³¹ Jeju co maqui' pawin cain, hwara' opa tiquin' ca' nonon oro wari' pain macan' ca' ac tococwa na. Wata' pain ca wari' ta' ca' iri na ne, wari' nein macan' e' ina. Tomi' hwet e' inain oro carawa ca ara to nain macan'. Ane maqui' pan cain pawin Jeju ne. Hwara' opa tiquin' hwara' opa tiquin' xam' ca' napari' pain ca wari' nein macan' iri' ca'. ³² Tomi' hwet paxi' nain ca querec pe cain pawin cain. Tomi' hwet paxi' nain ca taraju pe cain i cain quem. Ane om caca wari' co howa nanain ca tomi' nucun ne. ³³ Wari'

co howa nain ca tomi' nucun ma' iri na ne, querec pin' nain ca iri'o' nucun Iri' Jam. Oro ca tomi' ca Iri' Jam ma', iri'o' na ta na. ³⁴ Jeju co mao rain macan' ca Iri' Jam pane, tomi' hwet nain iri' ca tomi' nucun Iri' Jam. Xi om ne ca mi' ara con pain oro ca hwará' opa nein Tamataracon. ³⁵ Iri' Jam ma', om ca noc con Panxica. Wum co iri' Taramaxicon ta non. Taramaxicon pe ho' rain oro carawa cocon oro wari' quem ta non. ³⁶ Om ta pi' ra ha' ne ca e' nucucun oro wari' co howa nonon Panxica. To ho' cara totoron Iri' Jam pain pawin. Oro wari' co om tomi' ha' nonon Panxica cwa' iri nana ne, om ta to ho' cocon Iri' Jam pain pawin. Mana' pan ac tococwa tara, wap tamana cara ac tococwa tara quem.

Jeju cam narima' nein Samaria

4 Mija nana wari' co ja' ja' nonon Jeju ma', mija nana co ja' ca pain com quem, ac i ma' na ca tomi' caca oro wari' pane. Taraju nana oro fariseu ma' quem. Mija tiquin' ca' nonon co ja' ja' nonon João ma', mija tiquin' ca' nonon co ja' pan ca pain com João ma' quem na ca taraju caca oro fariseu. ² Om paxi' na ca ja' pan cocon pain com oro wari' Jeju ma'. Warut pain ca taxipa' urut con ca', ja' pan urut cocon pain com. ³ Taramaxicon nexi' Jeju ma', taxi' pin iri nonon oro fariseu ne, pain ca taraju cacain ca tomi' nucucun oro wari' ma', pain ca ma' mija caca co taxipa' pin nonon ma', maji ta ac caparut na, paca' ac urut pain na Judeia, in mama' ac urut pain na Galileia.

⁴ Pain ca in mama' xin Galileia caparut Jeju ma', tomi' ca' naparut: Na e' na pain ca ac urut pain wana ca ac tiquin' nain Samaria ma' ta naparut. ⁵ Xuruxut tiquin' xuruxut tiquin' ca' urut pain oro xijein cidade ca to nain Samaria, aram aram hwet ac urut pain na Sicar, je i ma' cidade ca hwet urut ma'. Sicar ma', pe ja' pan nain macaracon Jacó cara pane, ca mi' con panxica José pane. ⁶⁻⁸ Je ca pe ne manain com ca xe' ca Jacó pane quem.

Cut xi' carawa ca cao' wa ta ac urut na pain ca taxipa' urut con Jeju ca', mama' ac urut pain na cidade. Jeju ma' iri na ne, xao pe ja' pan nain manain com ma'. Xi om ne ca jam' pin ara ca pain ca xut wa ta. Tocon xina pin na.

Maqui' ac cama na narima' nein Samaria. Cam ta' com na. Tomi' ac cam na Jeju: Xiram pa' ne, cam mi' wijimain ne pain com ma' nam.

⁹He ac cama na. Para cam mi' ne pain com mapa' ma', pain ca wari' nein Samaria ta' ca' ac cama na. Xi judeu ara ma ta na ca tomi' con ma'. Tomi' ac i ma' na, xi om ne ca noc ara xucucun oro judeu cocon oro wari' nein Samaria ta.

¹⁰Om na, mo xi querec pin' main carawa ca mi' xim quem Iri' Jam ca', mo xi querec pin' mapa' pain ca cam mi' ne pain com xim ca' quem, cam mi' ne pain com pan ac mapa' xira, mi' ac xim xira pain iri' com ca to' e' cara nain ca wari' wa ta ac cam na.

¹¹Cain' cain' xima quem ac con na. Xi xopain ara ne manain com ca'. Om nem too ca mam' cam main quem. Cain' xi cam ac main com ca to' e' cara nain ca wari' wa ma' quem? ¹²Manain com ca', mi' napari' pain hwanana nexi' Jacó cara pane. Wirico co toc nain cominain, toc nanain mana panxica, toc nain oro winacon pane quem. Hwara' opa tiquin' ca' inon xi' ma mon pain ca cam mi' xim mapa' pain com ca to' e' cara nain ca wari' wa ra na ca tomi' con ma'.

¹³Om na, wari' co toc nain com ca', pe' mami' tara, toc ta' com mami' tara ta ac cam na. ¹⁴Wari' co toc nain com ca mi' ta' ta' ca' iri na ne, om ta toc ta' com mami' ca. Com ca mi' ta' ta' ca', an xiho' nain ca hoi hoi ne com ca weweweo cara ma'. Weweweo pe tarain ximicon wari' co howa napa'. To' e' cara ac con tara, mi' ac tocwa tara pain ca pe ho' cara con Iri' Jam pain pawin quem na ca tomi' cam ma'.

¹⁵Xiram pa' ne e' ac cama na. Cam mi' ne pain com ca tomi' ma ma'. Om ac ne tara ca toc ta' com mami' ta'. Om ac ne tara ca cam mami' tain com pain i ca' quem na.

¹⁶Mo'o ron taxim, in qui' ac ma tara con ta ac cam na.

¹⁷Om napa' tarama' ta ac cama na.

Tomi' iri'o' ma pain ca om napa' tarama' ta ma ma' ac cam na. ¹⁸Xi wara ma' 5 ara quem tarama' pane ta ac cam na. Om ca an xo' mon tarama' co pe ho' nem pain xocori ca' quem. Tomi' iri'o' ma ma' ira nam.

¹⁹Querec pin' inem ta. Profeta ma ma' ira ac con na. ²⁰Oro hwanana nuxut cara pane, in ac to taxipa' nonon Iri' Jam pain pacun ca', pain ca pe

4.9 Oro wari' nein Samaria pane, judeu paxi' nana hwanana nucucun pain cara pane, ane cut cacam tatirim co om howa nonon Iri' Jam ne. Aram aram howa ni pin ac caca na. Camara' iri nana mana panxicaca cocon waram winacocon ne, howa ximama' ac caca na quem. Oro judeu co howa howa wet nonon Iri' Jam ma', noc nonon oro wari' nein Samaria. Caxicon wari' hwe ta nonon. Xi an xiho' maparut pain ca howa nuxut ca' nonon.

torotop mi' cocon ma' ac con na. Wahu' iri na ne, pain ca judeu hwe ma', tomi' ac hwe na: Na e' na pain ca in ac pe tocwa Iri' Jam pain Jerusalém ta, ac i ma' na ca tomi' hwe ma' non.

²¹Howa ne pain ca tomi' xim ca' narima' ac cam na. Wixicam pin ta' ara xi' na xec pain ca om in ac pe mami' tocwa Iri' Jam pain pacun ca'. Om ta in ac pe mami' tocwa pain Jerusalém quem. ²²Wahu' pain ca wari' nein Samaria hwe ma', om ca querec pin' hun co in ac hwe. Warut pain ca judeu urut ca' iri na ne, querec pin' urut con co in ac urut. Xi wara coromicat mi' pan ara caparut pain ca coromicat an pe xo' cain ca param nucun pane, pain ca to' witan toton oro wari' ta ca pain cara pane. Win ma' nuxut pan tara co to' witan ca' toton nonon pain ca caracat nucucun oro wari' ta. ²³Ame ma e', main maqui' tara xec nein ca in ac xo' cocon Cotere' Iri' Jam oro wari'. Je Tamataracon tara ca mi' nonon pain. Mi' totonon pain ca in ac xo' cocon pain ca querec pin' iri'o' cocon quem. Wara maqui' pin na xec nein ca in ac ac i ma' cocon quem. Oro wari' co in ac ac i ma' nonon ma', wiricoco co param pan ca Cotere' Iri' Jam pain ca in ac tatarapa' ta cocon ma'. ²⁴Om ca wari' ca Iri' Jam. Iri' Jam na. Je ca na e' ne pain ca mi' capari' pain ca in ac xo' xin Tamataracon. Na e' na pain ca mi' capari' pain ca in ac xo' xun pain ca querec pin' iri'o' xun quem na ca tomi' cam ma'.

²⁵Tomi' ac cama na: Maqui' ta' tara iri' taramaxicon co Messias urut, wirico Cristo ta. Main maqui' ta' tara, taxi' inon. Maqui' iri tara ne, tomi' xo' tomi' xo' pi' pin ac caparut tara pain oro ca param nucun Iri' Jam ac con na.

²⁶Je ca tomi' xim ca' ac cam na: Wata' ta, pain ca tomi' xim ca', wata' co Messias cwa' na ca tomi' cam ma'.

²⁷Pain ca tomi' tomi' wet cam narima' Jeju ma', maqui' ac urut na pain ca taxipa' urut con ca'. He! Pijim' nam narima' ra, ac i ma' na ca coromicat nuxut. Ane miri'om urut con cam ne. Om ca tomi' querec urut cam pain ca ma' carawa ca param ma ma' urut cam. Om ca tomi' querec urut con pain ca pijim' cam.

²⁸Narima' ma', an pe ac camain na ca mam' cam cama com ma', in mao ac camain na cidade. Tomi' tomi' xam' ac tococwa na oro wari': ²⁹Harahap je. Querec jun wari' co tomi' hwet tomi' hwet pi' pin napa' pain oro carawa ca ara ta' pane. Om ta wirico ca co Messias ra na ca tomi' tococwa oro wari' ma'.

³⁰ Jein hwerehwet ca' ac cacain na cidade, hwet ac cocon na Jeju pain ca xat pe ca ma'.

³¹ Pain ca in mao camain cidade nequem ma', tomi' ac urut con na Jeju. Cao' ra carawa ca' Taramaxicon co ca' na taxipa' capijacon Iri' Jam urut con.

³² Om na, ma' napa' xijein carawa ca cao' ta'. Om ca taxi' hwein, ac i ma' na ca tomi' caparut.

³³ Ma' tara wari' co mi' non pain carawa ca cao' wa ra ac xujuxut na.

³⁴ Tomi' ac caparut na: Ac carawa ca cao' wa napa' ca tomi' ha' ton Te co hwet roron oro wari' ta napa' pane. Ac carawa ca cao' wa napa' ca ara ara pi' pin tain ca taramaja ne ca ara ra capa' pane. ³⁵ Ca' na ca tomi' nuhu': 4 pin iri tara panawo' ne, cut ac xine tara caramaji xitot, ac i ma' paxi' na ca tomi' hwe ma'. Ane tomi' pan xuhu' pain i ca' ne: Noro jujun oro wari' co xuruxut hwet nanapari' ma'. An xiho' nanain xitot ca paca' pin oro memem nein ma'. Maqui' pin na xec nein ca na e' ne pain ca howa jun Iri' Jam ta huhun ma'. ³⁶ Mo ta quep xiho' huhun, mo ta to' taraju pa' huhun pain capija ca', mo ta howa pin cacapa' pahu', mi' ac xihwe tara pain carawa ca awi pain ca taramaja nuhu'. Win ca waximain xitot co cut jein nonon pain caramaji totacon oro wari' nucun co taramaja mi' nonon ma'. Mi' ac tococwa na pain carawa ca awi pain ca taramaja nucucun. Oro wari' co howa nanapa' pahu', e' cara tatara, to ho' cara totoron Iri' Jam pain pawin quem. Wari' co pijim' hwet nonon pain capija oro wari' ma', an xiho' non wari' co oin' nain xitot. Oro xucucun co maqui' nana pa'ao' iri nana ne, co to' taraju pa' nonon pain capija ma', an xiho' nonon wari' co cut nanain caramaji xitot. Howa pin iri tatara ne, tomi' querec te wi ac caca tara quem. ³⁷ Iri'o' na ca tomi' taxipa' caca oro wari' ma': Ma' na co oin' nain xitot ma', ma' na xucun co cut nain caramaji ma' quem, ac i ma' na ca tomi' taxipa' caca oro wari'. ³⁸ Je ca tomi' xuhu' ca' ac caparut na. To' taraju pa' jujun pain capija oro wari' ma' inuhu' ta. Om paxi' na ca wahu' ne co pijim' hwet cain' nonon pain capija. Ma' nana oro xucucun co taramaja tamana nana pain ca pijim' hwet cocon pain capija pane. Wahu' iri na ne, ac ca cut pan hwein tara caramaji ca taramaja nucucun. Ac i ma' na ca tomi' caparut pain ca taxipa' urut con ca'.

³⁹ Oro wari' nein Samaria co to nanain Sicar ma', mija nana co howa pin nonon Jeju. Xi om ne ca taraju ara cacam narima' ma', pain ca tomi' hwet tomi' hwet pi' pin napa' pain oro carawa ca ara ta' ta cocon ma'.

⁴⁰Hwet iri nonon Jeju ne, tomi' ac cocon na: Pe ho' xut ta nonon. Ma, pe ho' wijimain ac cocon na. Ma' 2 na xec nein ca pe ho' cocon ma'.

⁴¹Mija ac caca na oro xucucun wari' co taraju nonon pain ca pijim' nucun. Howa pin ac cocon na quem. ⁴²Tomi' ac cacam na narima': Howa pin urut con Jeju ta. Om ca howa e' urut con pain ca taraju urut pum pain ca tomi' hwet maparut con, om na. Howa urut con, xi om ne ca taraju pan ara urut pain ca tomi' nucun ta. Je ca howa urut con ca'. Querec pin' urut con. Wirico na co to' witan taxi' ca' nonon pain ca caracat nucucun oro wari' pain oro xijein macan' ca' na ca tomi' cacam ma'.

Ca quep xio pin tocwa panxica co taramaja mi' non taramaxicon

⁴³2 pin iri na xec pain ca to ho' urut cocon oro wari' nein Samaria ne, maji ta ac caparut na Jeju, mama' ac urut pain na Galileia. ⁴⁴Wara tomi' ca' ara xi' na Jeju pane: Om ca tomi' querec te tocwa profeta pain iri' macaracon, ac i ma' na ca wara tomi' ca pane. ⁴⁵Tan' mama' iri urut pain Galileia ne, tomi' querec te ac cocon na Jeju oro wari' co to nanain i cain. Wari' nein Galileia ma', mama' ara xi' nanain Jerusalém pane, pain ca tomi' querec te xin cacain xec nein Páscoa pane. Querec nanain oro ca ara ca Jeju pain i cain quem. Je ca tomi' querec te cocon pain ca wa' mao cain Galileia ma'.

⁴⁶In mao ac cain na Caná Jeju, Caná pain Galileia ma'. Je pain Caná ma', ca ara comi uva pin pe cain com pane. Pe nain i ma' taramaxicon co taramaja mi' non iri' taramaxicon. Maqui' nain Cafarnaum ma'. Caxi na panxica. ⁴⁷Tomi' ac caca na oro wari': Maqui' nain Judeia Jeju ta, wa' qui' nain Galileia ca' nana. Taraju iri na co ma' co caxi panxica ma' ne, mo hwet ac con na Jeju pain Caná. Jain jain na, mi' pin ta' na panxita' ta Jeju ac con na. Xiram pa' ne con. Mao rain xuru cain, pain Cafarnaum cain. Quep xio ron ta na ca tomi' con ma'.

⁴⁸Wa inuhu' me ac con na Jeju. Mo ta om querec mahu' pain ca an hwet mi' xuhu' pain ca hwara' opa ne ca', pain ca ara tain carawa ca om ara taxi' ne ca wari' wa ca', om ac ne na ca howa mahu' ta na ca tomi' con ma'.

⁴⁹Om na ta taramaxicon ac con na. Maqui' hap ra pain ca om mi' querec ca panxita' me. Mo ta om hap ma con, mi' pin ac ca tara ta non.

⁵⁰In mao rain xurum ta. Awi pin na panxima ta ac con na Jeju.

Howa ac cain na ca tomi' nucun. In mao ac ca na.

⁵¹ Xut xut wet nain wana, xuruxut cam' ac cocon na co taramaja mi' e' nonon ma'. Awi pin na panxima ta nonon.

⁵² Cain' cain' ne con? Main ca pe ca xina pain ca awi pin nucun quem ac tococwa na.

Pain xec pane, tocon xina pin iri na ne, nahwere' pin ac ca na ta nonon.

⁵³ Na ra ac ca na. Je i ma' jamicon xina ca tomi' capa' Jeju pain xec pane, pain ca awi pin na panxima ta capa' pane ac ca na. Howa pin ac con na Jeju. Howa pin nonon Jeju oro ca nari nucun co to ho' nonon pain xiricon ma' quem.

⁵⁴ Pain ca paca' cain Judeia Jeju ma', pain ca in mao cain Galileia pane, je win 2 pin ne ca an hwet pe cain ca hwara' opa nucun pain ca ara cain ca om ara taxi' ne ca wari' wa pane.

Ca quep xio pin con wari' co carama pe Jeju

5 Om ca pain homa ne, mao ac cain na Jerusalém Jeju. Xi ma' pe ara nein i cain ca tomi' querec te nuxut pain ca judeu urut ca'. ²Ma' pe nain Jerusalém ca ja' pe wa com. Ac wijimain xuterem' paxi' na. Pe ja' pan nain cote ne man ca corom hwet ac wa oro xirim pain cidade ma'. Manain ca Corom Corom ac ne Ovelha na wixinain. Ma' 5 na xirim ca to to mam' pin nain ca ja' pe wa com ma'. Om ca tao' caho' xine oro xirim. Betesda urut pain wixinain ca ja' pe wa com pain aramaico ma', je i ma' wixinain capijaxut pain ca judeu urut ca'. ³Je ca toco' to caca co caxi nana ma'. Mija nana. Ma' nana co om tococon. Ma' nana co caji at nana. Ma' nana co carama to nana. (Winim' nanain ca meo ne com ma'. ⁴Ma' ara xi' na xec nein ca aram aram quiji' qui' ca jam co taramaja mi' non Iri' Jam ma', meo meo ac cain na com, je curucun pane. Co corom cain' nain com pain ca xo' meo nein ma', xio pin ac ca na. Caxi tamana paxi' na, xio pin ac ca na ta.)

⁵Ma' na wari' co terem' pe nain i ma' quem. Carama pe na. Ma' 38 na cawaxi' pain ca carama pe ca. ⁶Querec pan ac con na Jeju. Querec non pain ca terem' pe cain i ma'. Pain cara pane ca caxi ca co ma' ta ac cocon na oro wari' ma'. Tomi' pan ac con na Jeju: Param main ca xio wa quem non.

⁷Xi ma' capa' wari' co quep xiho' napa' ta taramaxicon ac ca na. Meo iri xira com ca' ne, ma' ac ca xira co an quiji' mi' napa' pain. Ane om capa' wari' co quep xiho' napa' ne. Corom ta' paxi' ina, corom ca' corom ca' nanapa' xucucun co caxi nana ma' na ca tomi' ca ma'.

⁸Tequi' pe ra ta ac con na Jeju. An rain witam ca mam' terem' pe ma ma'. Xut ra ta ac con na.

⁹Xio hap pin ac ca na. An ac cain na witacon ca mam' terem' pe ca ma', xut ac ca na quem.

Sábado na xec nein ca quep xio pin con wari' Jeju ma'. Xao to wa taxipa' urut pain xumuxut pain sábado pain ca judeu urut ca'. ¹⁰Je ca tomi' cocon co ma' co quep xio wa oro taramaxicon ma': Sábado na xec ca'. Om ca na ne pain ca an main witam pain xec ca' nonon.

¹¹Ane tomi' pan cocon caram ma' ma' ne: Om na, tomi' napa' co quep xio pin napa' ne. An mao rain witam ca mam' terem' pe ma ma' napa'. Xut ra ta napa', ac i ma' na ca tomi' cocon ma'.

¹²Tomi' querec pan ac cocon na oro taramaxicon: Ma' co tomi' nem pain ca an rain witam ca mam' terem' pe ma ma' ta nem? Ma' co xut ra ta nem quem?

¹³Om ca taxi' ton ta ac ca na. Xi wara xut xut pan' am ara ca pain iri' tococon wari' Jeju ma' ta.

¹⁴Om om, mam' mami' ac con na Jeju. Mam' pe non pain ca tao' caho' nein xiricon Iri' Jam. Taraju wet ne e' ac con na. Xio pin ma. Ta caracat mami' ma me. Ma' ta om quep quem iri' ca om awi wa. Jain jain paxi' ma pain ca caxi nem cara ne. Mo ta quep quem iri' ca om awi wa, jain jain tamana ac ma tara na ca tomi' con ma'.

¹⁵Hwet mao ac ca na. Tomi' toton oro taramaxicon ma' e' ac ca na, hwet ac tococwa na, tomi' ac tococwa na: Wirico Jeju co quep xio pin napa' ta tata.

¹⁶Je ca quep em' xun Jeju ta cocon ma'. Xi om ne ca quep xio pin ara con wari' pain sábado ca', pain xec nein ca xao pe wa ne ca xumu wa ta nana.

¹⁷Ane tomi' pan cocon Jeju ne: Om ca taramaja maho' ca Te. Ac i ma' ina quem, om ca taramaja maho' ta' ta nonon. ¹⁸Mana' tamana pin ac cocon na. To' pa' pin xun ta nonon. Om ca mana' e' cocon pain ca om tomi' ha' nucun pain ca taramaja cain sábado ma'. Mana' nonon pain ca

Te inon Iri' Jam ta ca ma'. Iri' Jam ina xi' ma na ron, ac i ma' na ca tomi' nucucun pain ca mana' nucucun ma'.

**Ca wirico Te Iri' Jam na co mi' napa' pain ca hwara'
opa ne cocon oro taramaxicon Jeju**

¹⁹Tomi' ac cocon na oro taramaxicon Jeju: Wata' pain ca Panxica Iri' Jam ta' ca', om na carawa ca ara taxi' ta' pain ca param pan ne. Tomi' iri'o' inuhu' ta. Querec iri inon Te pain ca ara cain ma' ne, je ca ara ta' ca'. Oro carawa ca ara ca Te cwa', je ca ara ta' quem. ²⁰Xi noc camain' capa' Te pain ca Panxita' capa' ca'. An hwet mi' napa' pain carawa ca ara ca. Ame hwe e', main an hwet mi' tarapa' pain oro xijein carawa ca hwara' opa tiquin' ca' nain oro ca ara ne ca wara querec hwe cara ne. Wa wa ac hwein tara quem.

²¹Noro jun Te pain ca to' e' mami' cocon co cono' nana ma'. Ac i ma' ina quem. Oro wari' co param ta' ma', to' e' inonon ta. ²²Te ma', om ca an xiho' con juiz co tomi' querec non wari' pain carawa ca ara ca ma', je pain ca wum co em' ta con ma', om na. Tomi' pan napa' pain ca Panxita' capa' ca'. Wum tara co an xiho' non juiz ta napa'. Wum tara co tomi' querec non wari' pain carawa ca ara ca ma', wum tara co em' ma ta non ta napa'. ²³Ma' ta in ac in ac pi' pin quequem oro wari' ta arain napa'. Win ne ca in ac cacapa' ca' napa'. Oro wari' co om in ac nanapa' pain ca Panxica Iri' Jam ta' ca', om ca in ac cocon Te co hwet roron oro wari' ta napa' quem.

²⁴Je ca tomi' xuhu' ca', tomi' iri'o' inuhu' ta ac tococwa na. Oro wari' co taraju wet nanain capiija ca', oro wari' co howa nonon Te pain ca hwet roron oro wari' ta capa' ca', ma' ac cocon na ca om pi' ra ha' ne ca e' wa pain pawin cain. Om ta wap tococwa pain ca caracat nucucun. Wara witan ca' nanain ca cono' wa. Wara ma' nonon ca om pi' ra ha' ne ca e' wa pain pawin cain. ²⁵Maqui' pin na xec nein ca tomi' toton ta' oro wari' co om howa querec nanapa' ma', co ac ca cono' caca na pain ca om howa cacapa' ma'. Taraju iri tatarapa' pain ca tomi' toton ta' ne. Mo ta howa pin cacapa', e' cara ac caca tara. Tomi' iri'o' inuhu' ta. ²⁶Wirico Te co mi' nain ca e' wa. Ac i ma' ina quem, pain ca Panxita' capa' ca'. Mi' inain ca e' wa quem. Xi om ne ca mi' rain ca e' wa ta ara capa' ta. ²⁷Ac juiz ra cocon oro wari' ta napa', tomi' querec roron pain oro carawa ca ara caca napa'.

Am em' caca, am om em' caca, taxi' pin ac momon tara ta napa' quem. Xi wata' ara ne co Iri' Wari' cwa' ta na ca tomi' tococwa ma'.

²⁸Ta wa ina me mahu' pain ca tomi' ne ca' me ac tococwa na. Main maqui' ta' ara xi' na xec nein ca taraju taraju pi' pin xin cacain ca tomi' ne oro wari' co wara cono' nana ma'. ²⁹Hwrehwet ca' ac cacain tara oro manain pacun ca cut corom to tococwa ma'. Caram ma' co ara xo' nana pain ca e' e' wet caca pane, e' mami' ac caca tara, om ta pi' ra ha' ne ca e' nucucun quem. Caram ma' co pan teretem nana pain ca e' e' wet caca pane iri tatara ne, e' mami' ac caca tara, tomi' ac toton tara pain ca caracat nucucun: Em' hwe ta, mama' jein cote ne xe, mon to wet cara ac hwein tara i cain ta toton. ³⁰Om na carawa ca ara taxi' ta' pain ca param pan ne. Tomi' querec iri inonon oro wari' pain ca ac juiz ta' cocon ne, pain ca tomi' querec toton pain carawa ca ara caca ma', pain ca wum co em' ta toton ma', tomi' ha' e' inain ca tomi' nucun Te pain ca tomi' querec roron capa' ma'. Tomi' xo' e' inonon pain ca em' hwe, mama' jein cote ne xe ta toton. Xi win xumu tain ca param pan ne ta. Win xumu e' inain ca param pan nucun Te co hwet roron oro wari' ta napa' cwa' na ca tomi' cocon oro taramaxicon Jeju pane.

³¹Mo xi xica' pe ta' pain ca tomi' hwet xuhu' pain oro ca taramaja ne ca', om xi na ne pain ca howa ac mahu' ta ac tococwa na oro taramaxicon. ³²Ane ma' ca Te co tomi' hwet napa' pahu' ne. Taxi' inon pain ca om tomi' ximao ca, taxi' inon pain ca tomi' iri'o' ca quem tata.

³³Wahu' ma', tomi' huhun oro win ma' nuhu' pane, tomi' querec jun João ta huhun pane ac tococwa na. Tomi' hwet ac capa' na pahu'. Iri'o' na ca tomi' cuhu' quem. ³⁴Om paxi' na ca ma' xirapa' na ton wari' co tomi' hwet napa' pahu', om na. Ane tomi' e' xuhu' con João cara pane ne. Ma' ta to' witan cuhu' Te ta inuhu'. ³⁵João cara pane, ac naran na. Ac ca toha ca na pain ca pijim' ca pane. Win ne ca toha ne naran ca tom ma', ac i ma' na ca toha mi' cuhu' pain xumuhu' pane. Tomi' querec te paxi' hwein ca pijim' nucun pain ca an xiho' cain naran pane quem tata.

³⁶Ane ma' capa' xijein carawa ca to' querec pin' napa' pahu' ne, hwara' opa tiquin' ca' nain ca tomi' ca João pane, pain ca to' querec pin' capa' pahu' ac tococwa na. Oro carawa ca ara ta' ca', ca ara rain capa' Te cwa', je ca to' querec pin' napa' pahu'. Querec iri hwein oro carawa ca ara ta' ca' ne, querec pin' ac mahu' na pain ca hwet roron oro wari' ta capa' Te cwa' pahu'. ³⁷Te ma', co hwet roron oro wari' ta napa' pane, tomi' hwet

pan napa' pahu' quem. Om ca taraju camain' hwein iri' ca tomi' nucun, om ca querec pin' hun quem. ³⁸Om ca pe ho' cuhu' capijacon pain xumuhu' ma' quem. Xi howa mahu' pain ca hwet roron ta capa' pahu' ta. ³⁹Noro tamana paxi' hwein capijacon Iri' Jam ca xirao' pe xine ma'. Coromicat ac hwe na: Mo ta noro xin capijacon Iri' Jam ca', mam' ac xin tara ca om pi' ra ha' ne ca e' wa pain pawin ta paxi' na ca coromicat nuhu' ma'. Je capijacon Iri' Jam ca tomi' hwet pan napa' quem. ⁴⁰Ane om howa mahu' ne. Howa xine me paxi' inuhu'. Ma' ta mi' xuhu' pain ca e' wa ta inuhu'. Ane noc mahu' ne. Om ca howa je na hwe ta tata.

⁴¹Om ca ma' xirapa' na ton wari' co wa wa napa' quem ac tococwa na. ⁴²Xi querec pin' ara xuhu' ta. Taxi' inuhu' pain ca om noc urut pum ta hun Iri' Jam pain xumuhu'. Om ca tomi' iri'o' hwe pain ca om ca noc urut pum ta hun ma'. ⁴³Hwet paxi' inuhu', xi om ne ca hwet roron ta ara capa' Te pahu'. Ane noc mahu' ne. Hwet iri nuhu' wari' pain ca param pan nucun ne, tomi' querec te ac hun na. ⁴⁴Cain' cain' xihwe quem? Ma' na ca howa ac hwe ra? Xi param e' ara huhun oro wari' pain ca in ac cucuhu' ma'. Je xi in ac tarapari' ta hun Iri' Jam co xica' xat cwa' quem? ⁴⁵Wirico tara Jeju co tomi' hwet non pain ca pan teretem nexi' Iri' Jam ma' mahu' ra? Ta coromicat ac i ma' mahu' me ta. Xi wata' ne co tomi' hwet ton non pahu' ta. Moisés cara pane, co howa urut hwe ma', wirico tara co tomi' hwet ton non pain ca pan teretem nuhu'. ⁴⁶Mo xi howa iri'o' hwein ca xirao' nucun Moisés cara pane, howa ac mahu' xira pain ca tomi' xuhu' pain xocori ca' quem. Xi om ne ca xirao' pe ara capa' ta. ⁴⁷Ane om howa hwein ca xirao' nucun ne. Je ca om howa ac hwein ca tomi' ne ca' quem. Ac i ma' na ca tomi' cocon oro taramaxicon Jeju pane.

Ca tomi' hwara' pin cain capam' con hwam Jeju

Mateus 14.13-21; Marcos 6.30-44; Lucas 9.10-17

6 Om ca pain homa ne, maji ta ac caparut na Jeju, pan horoho mama' ac urut pain na xijein cacarain com ma', Galileia ma'. Ma' na xijein wixinain quem. Tiberiades nanain quem. ²Mija nana wari' co ja' ja' nanaparut. Om ca paric camain' caca. Xi om ne ca querec ara cocon Jeju pain ca an hwet pe cain ca hwara' opa nucun pain ca quep xio pin cocon oro wari' co caxi nana pane. ³Piri' xi' e' ac caparut na, piri' mama' ac urut pain na ca tamaja pan ne macan'. Xao to ac urut na. Wirico Jeju ma',

warut pain ca taxipa' urut con ca', xao to ac urut na. ⁴Wixicam pin na xec nein Páscoa ma', je i ma' xec nein ca tomi' querec te wi urut pain ca judeu urut ca'.

⁵Noro noro ac ca na Jeju. Querec ac tococwa na oro wari' co hwet xun nonon ma'. Mija nana wari' ta. Om ca paric camain' caca. Tomi' querec ac con na Filipe Jeju: Main xi cut to xin carawa ca cao' xi' caca oro wari' cwa' quem non. ⁶Tomi' querec e' non. Xi taxi' pan ara xucun pain ca ara ta' ca ma'.

⁷Mo xi ma' 200 capari' denário ca mam' cut xin capam' iri', iri' cote ne dinheiro paxi' xira, om xi xam' cocon. An an wijimain e' xirarain, om om xiroron. Om xi xam' cocon ta! Ac i ma' na ca tomi' ca Filipe.

⁸Tomi' ac ca na win ma' nuxut ma', André coxa' ca Pedro ma': ⁹Ma' paxi' na pije' cwa' Jeju. Ma' non wijimain carawa ca cao' wa. Ma' 5 non wijimain capam', ma' 2 non wixicon hwam quem. Om xi ma'am camain' caca pain wijimain caramaxicon ta. Xi mija ara caca ta na ca tomi' ca André ma'.

¹⁰Xao to je ta jujun oro wari' cwa' ta ac caparut na Jeju. Mija nain i ma' tononoin. Je ca xao to to caca ma', xao to xao to pi' pin nana. Mija nana wari'. Ac ca ma' 5.000 caca na ca tarama' nucucun co to nanain i ma'. ¹¹Cut ac cain na capam' Jeju. Tomi' ac con na Iri' Jam: Tomi' querec te urut pum pain ca mi' maparut pain capam' ca' quem Te non, maxiram' mi' ac tococwa pain na co xao to nanain i ma'. Ac i ma' na con hwam quem. Cao' cao' ma'am ac caca na.

¹²Ma'am pin iri nana ne, tomi' ac caparut na pain ca taxipa' urut con ca': Om ta waraju xin oro pawirinain ma'. Pan cut jein ta naparut.

¹³Pan cut ac urut pain na, cut ho' cut ho' ac urut pain na pain coco quem. Moin' 12 na cotain parut. Je i ma' pawirinain capam' ca ma' 5 ma' ira. Cao' cao' ma'am ca' ara xi' nanain.

¹⁴Querec iri nanain i ma' oro wari' ne, pain ca an hwet pe cain ca hwara' opa nucun ma', pain ca tomi' hwara' pin cain capam' con hwam

6.7 Denário na wixinain dinheiro nucucun oro romano pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na denário pain ca taramaja nucun. **6.10** Ma' paxi' nana oro narima' cacam oro hwijima' quem. Ane om tomi' tacacama ne.

ma', tomi' ac caca na: Wirico co cwa' xin profeta co xirao' pe caca pain cara pane, co main maqui' tarain macan' ca' caca pane. Wirico ma' ira nana.

¹⁵ Jeju ma', taxi' nonon oro wari' pain ca quep xat xun cocon pain ca taramaxicon pe ho' xut ta cocon ma' quem. Je ca paca' mami' cocon ma'. Piri' mao xica' pe ac cain na pacun.

Ca xut cain quimain com Jeju

Mateus 14.22-33; Marcos 6.45-56

¹⁶ Xo' um pin iri na ne, quiji' mama' ac urut pain na com. ¹⁷ Wara xim pin na, om ca hwet querec caparut Jeju. Piton to ac urut pain na mam' horoho wa ma'. Pan horoho mama' xin xijein cacarain cain ta ac urut na, pan horoho mama' ac urut na. Xumu urut pain Cafarnaum ma'. ¹⁸ Nuru mip ac ne na hotowa ma' quem. Nocom nocom ac ne na com. ¹⁹ Pan horoho pan horoho, to pira ca' ac urut pain na cacarain ma'. Am 5 ne tara quilômetro nein ca pan horoho urut ma', am 6 ne tara quilômetro ca pan horoho mama' urut ma'. Querec ac urut con na Jeju ma', pain ca xut cain quimain com ma'. Xut hwet naparut pain mam' horoho nuxut. Jin' tamana ac urut na.

²⁰ Om na, wata' ta. Ta jin' mahu' me ta ac caparut na.

²¹ Tomi' querec te urut con. Piri' pe rain mam' horoho wa ca' ac urut con na, ane ane hwet hap ac urut pain na wapit ca xumu urut ma'.

Jeju co Iri' Capam' ca mi' nain ca e' cara wa pain pawin

²² Xec pin iri na ne, i'ina ac ne na ximicocon oro wari' co to wet nana pa'ao' ma', pain cacarain com ma'. Mon Jeju quem nana. Taxi' paxi' nana pain ca ma' xica' pe ne wijimain mam' horoho wa cara ne. Taxi' nanaparut pain ca taxipa' urut con quem, taxi' nanaparut pain ca mama' xica' to urut pain ca mam' pan horoho mama' urut pain pain xijein cacarain cain. Taxi' nonon Jeju pain ca om hwet caparut quem. ²³ Ma' ac ne na oro wirain mam' horoho wa ca maqui' nain Tiberíades ma' quem. Piri' to xin i ma' ta ac caca na oro wari' nein, piri' to ja' pan ac cacain na ca cao' to cacain capam' oro wari' cara ne, ca tomi' pe qui' con Iri' Jam pain ca tomi' querec te urut pum pain capam' ca' quem Te qui' ca pane. ²⁴ Om ara xi' na Jeju cocon co taxipa' ca ma' ac caca na. Om caca ma' ira ac xucucun na. Maji

pain Cafarnaum cain e', piraó' xuxun pain i cain ta ac caca na, pan horoho mama' ac caca na.

²⁵ Mam' pe ac cocon na pain xijein cacarain cain. Main ca pe ca xina pain ca maqui' nem quem taramaxicon co ca' na taxipa' capiijacon Iri' Jam ac cocon na.

²⁶ Om na, piraó' paxi' mahu', xi cao' ara hwein capam' pata' ta ac tococwa na. Piraó' paxi' mahu', xi ma'am ara hwein ta. Om ca piraó' mahu' pain ca querec pin' hwein ca an hwet mi' xuhu' pain ca hwara' opa ne ca', pain ca mi' xim xuhu' pain ca e' cara wa pain pawin cain. Tomi' iri'o' inuhu' ta. ²⁷ Je ca tomi' xuhu' ca' ac tococwa na. Ta taramaja mi' hwein capam' ca om awi cara ma' me ta. Taramaja mi' jein capam' ca om pi' ra ha' ma', ca mi' nain ca e' cara wa pain pawin ma'. Mi' pan xuhu' pain, wata' pain ca Iri' Wari' ta' ca', mi' pan xuhu' pain. Tomi' ara xi' napa' pain Te Iri' Jam ta. Mi' roron pain ta napa' pahu' ta ac tococwa na.

²⁸ Tomi' querec ac cocon na: Cain' cain' xuxut quem? Ma' carawa ca ara je caparut Iri' Jam quem? Tomi' ha' xuxuxun na urut con ta na ca tomi' cocon ma'.

²⁹ Om na, howa xine pain ca hwet roron oro wari' ta capa' Te pahu'. Je ca ara je cuhu' ma' ac tococwa na.

³⁰ An hwet mi' xut pain ca hwara' opa nem ma' e' ac cocon na. Ara rain ca om ara taxi' ne ca wari' wa ta. Ma' carawa ca ara ta' ma ma' quem? Ara rain ta. Ma' ta querec xut pain pum, ma' ta howa xut pum pain ca maqui' mon Iri' Jam ta. ³¹ Xi cao' ara cacain capam' hwanana nexi' co ja' ja' nonon Moisés pain cara pane ta. Cao' to nanain mahweri pane. Win ne ca xirao' pe xine capiijacon Iri' Jam ca': Ara ma'am tata pain capam' ca camara' qui' nain pawin pane, ac i ma' na ca xirao' pe xine capiijacon Iri' Jam ca'. Na nem pain ca an hwet pe ac i ma' main ca hwara' opa nem quem na ca tomi' cocon ma'.

³² Om na, je ca tomi' xuhu' ca', tomi' iri'o' inuhu' ta ac tococwa na. Om ca Moisés ca co mi' nuhu' pain capam' ca camara' qui' nain pawin. Wirico Te co mi' nuhu' pain pane. Wirico Te co mi' nuhu' pain Iri' Capam' ca maqui' pawin pain xocori ca' quem. ³³ Je ca tomi' xuhu' ca' ac tococwa na. Iri' Capam' nucun Iri' Jam ma', ca mi' ca ma', maqui' nain pawin. Mi' nonon pain ca e' cara wa oro wari' pain macan' ca' ac tococwa na.

³⁴ Mi' cara xut pain capam' ca tomi' ma ma' taramaxicon ac cocon na.

³⁵ Om na, wata' co Iri' Capam' ca mi' nain ca e' cara wa ta. Win ne ca to' e' cuhu' capam' pain ca cao' hwein ma', ac i ma' ina pain ca to' e' cara xuhu' ca' quem ac tococwa na. Wari' co hwet napa' ma', wari' co howa napa' ma', om ta jain jain mami' cain oro caramaji macan' ca to' e' non ma'. Ac ca om cao' xita' na mami' ca tara, ac ca om toc xita' na mami' ca tara pain ca mi' pan ton pain carawa ca to' hohot non con Te ta. ³⁶ Wara tomi' inuhu' pane: Querec paxi' mahu' pain ca an hwet mi' xuhu' pain ca hwará' opa ne ca', pain ca ara tain ca om ara taxi' ne ca wari' wa ca'. Ane om howa mahu' ne, ac i ma' na ca wara tomi' xuhu' pane. ³⁷ Mi' xim iri tarapa' cocon oro wari' Te ne, howa howa pi' pin ac cacapa' tara. Om ta tomi' in pin camain' toton co howa xim nanapa' ma'. ³⁸ Pain ca quiiji' qui' tain pawin pane, om ca maqui' ta' pain ca ara tain ca param pan ne ta', om na. Ara tain ca param nucun Te co hwet roron oro wari' ta napa', je ca ara ta' ta' pain ca quiiji' qui' tain pawin pane. ³⁹ Ca' na ca param nucun Te co hwet roron oro wari' ta napa': Noc inonon pain ca mama' cacain cote ne xe oro wari' co mi' xim cwa' napa'. Param napa' pain ca to' e' mami' to' e' mami' xam' toton pain xec nein ca pi' pin ta' ne macan' ca' quem. ⁴⁰ Je ara xi' na ca param pan ca Te ma': Oro wari' co querec pin' nanapa' pain ca panxita' capa' ca', oro wari' co howa nanapa' cwa' quem, param tata pain ca e' cara caca pain pawin. Maqui' pin iri tara xec nein ca pi' pin ta' ne macan' ca' ne, to' e' mami' ac toton tara quem na ca tomi' tococwa ma'.

⁴¹ Tomi' em' ac cocon na oro taramaxicon nuxut pain ca judeu urut ca'. Xi om ne ca tomi' ara cain i ca' ta, pain ca Wata' co Iri' Capam' co quiiji' qui' nain pawin ta ca ma'.

⁴² Cain' cain' xira co cwa' ne ta ac caca na. Om ca Jeju panxica José ca ron? Querec pin' urut con cote ca cam jicon quem. Para tomi' cain i ma', pain ca quiiji' qui' inain pawin ta ca ma' ne? Om ca na ne pain ca tomi' ac i ma' ca ta! Ac i ma' na ca tomi' caca ma'.

⁴³ Tomi' ximama' maho' xine e' ac tococwa na. ⁴⁴ Te ma', co hwet roron oro wari' ta napa' pane, wirico co tomi' tomi' na nonon oro wari' pain ca howa jun Panxita' cocon ma'. Mo ta om tomi' tomi' na cocon pata', om ta howa cacapa'. Om om tatara oro wari' co howa nanapa' pain ca om howa jun Panxita' tococwa ma'. Co howa xim nanapa' ma', to' e' mami' ac toton tara pain xec nein ca pi' pin ta' ne macan' ta. ⁴⁵ Je ca xirao' pe ca profeta pane, pain ca wirico Iri' Jam co tomi' tomi' na nonon oro wari' pain ca howa jun Panxita' ca pata'. Ca' na ca xirao' pe ca pane: Tomi' xo' tomi' xo'

pi' pin totoron oro wari' Iri' Jam ta na ca xirao' pe ca profeta pane. Oro wari' co taraju nonon Te ma', co taraju pa' pin nanain ca tomi' xo' cocon ma', howa ac cacapa' tara. ⁴⁶Taraju pa' hwe? Wari' co taraju non Te ma', taraju e' non. Om ca querec con. Xi ma' ca wari' co querec non Te cwain. Xica' pe ina pain ca maqui' tain ca pe pan ca Te cwain, wara querec inon ta. ⁴⁷Je ca tomi' xuhu' ca', tomi' iri'o' inuhu' ta ac tococwa na. Oro wari' co howa nanapa' ma', ma' nonon ca e' cara wa pain pawin ta. ⁴⁸Wata' co Iri' Capam' ca mi' nain ca e' cara wa pain pawin ta. ⁴⁹Noro jujun oro hwanana pain mahweri pane. Cao' paxi' nanain capam' ca maná caca pane, je i ma' wixinain cocon pane. Cao' paxi' nanain pane, ane cono' pin caca ne. ⁵⁰Iri' Capam' ca quiji' qui' pawin ca' iri na ne, wari' co cao' nain, om ta mi' ra ha' ca. ⁵¹Wata' co Iri' Capam' ca mi' nain ca e' cara wa pain pawin. Quiji' qui' inain pawin ta. Wari' co cao' napa' pain ca Iri' Capam' ta' ca', e' cara ac ca tara pain pawin. Capam' ca mi' ta' ta' ca', je cwere ca'. Mi' tain cwere. Ma' ta e' caca oro wari' ta ina na ca tomi' tococwa ma'.

⁵²Teretem ac caca na oro taramaxicon nuxut pain ca judeu urut ca'. Teretem nana pain ca taraju cacain ca tomi' nucun. Mija na ca mana' caca. Ma' na ca cao' jein ta ac capari' pain curucun ra? Om ca na camain' ne ta! Ac i ma' na ca tomi' caca ma'.

⁵³Om na, je ca tomi' xuhu' ca', tomi' iri'o' inuhu' ta ac tococwa na. Mo ta om cao' hwein cwere ca', pain ca Iri' Wari' ta' ca'. Mo ta om toc hwein cocu ca' quem. Om ta e' cara hwe pain pawin ta. ⁵⁴Wari' co cao' nain cwere ca' iri tara ne, wari' co toc nain cocu ca' iri tara quem ne, pe ho' cara toron Te pain pawin, to' e' mami' ton pain xec nein ca to' e' mami' toton ta' oro wari' co wara cono' nana quem. ⁵⁵Xi iri' carawa ca cao' wa ara ne cwere ca'. Iri' ca toc wa na cocu ca' quem. ⁵⁶Wari' co cao' nain cwere ca', wari' co toc nain cocu ca' quem, win cwere ac capa' na, win cwere ac ton na quem. ⁵⁷Hwet roron oro wari' napa' Te co mi' nain ca e' cara wa pain pawin ma'. Je ca e' ta' ca' quem. To' e' cara napa'. Ac i ma' inonon oro wari' cwa' quem. Oro wari' co cao' nanapa', to' e' cara ac toton na. ⁵⁸Je ca tomi' xuhu' ca': Tomi' hwet inuhu' pain Iri' Capam' ca quiji' qui' nain

6.53 Om ca tomi' mi' cain ca cao' iri'o' xine curucun. Om ca tomi' mi' cain ca toc iri'o' xine quicon quem. Tomi' mi' nain ca howa tocwa. Pain ca howa xun ca', howa urun pain ca mi' pin caho' capari'. Howa urun pain ca om narain ho' capari' pain curucun je quicon pain ca mi' pin pe cain pana pane. Howa iri urun ne, ac ca cao' xin na curucun. Ac ca toc xin na quicon quem.

pawin. Om ca an xihó' nein capam' ca cao' caca hwanana nexi' pane. Cao' paxi' nanain pane, ane cono' pin caca ne. Wari' co cao' nain Iri' Capam' ma' iri na ne, e' cara ac ca tara pain pawin ta na ca tomi' tococwa pane.

⁵⁹Ac i ma' na ca ca' na cain capiçon Iri' Jam Jeju pane, pain ca ca' na pe cain xirim ca cut in to xucucun oro win judeu urut pain Cafarnaum pane.

Ca mija caca co an to pin nonon Jeju

⁶⁰Taraju iri nanain ca tomi' nucun Jeju oro wari' co ja' ja' paxi' nonon ma' ne, ma' mija ac caca na co noc nanain ma'. I'ina a xira ca tomi' nucun co cwa' ta. Ma' tara ca howa ac tocwa ra na ca tomi' ximama' caca ma'.

⁶¹Om paxi' na ca taraju tococwa pain ca tomi' caca ma', ane taxi' pan cocon Jeju ne. Taxi' nonon pain ca tomi' ximama' nucucun pain ca noc cacain ca tomi' nucun. Je ca tomi' querec cocon ma': I'ina na xumuhu' pain ca tomi' ne ca' ne ra? ⁶²Cain' cain' xi' hwe pain ca aram aram querec xim mahu' pain ca piri' in mao tain pawin quem? Wata' pain ca Iri' Wari' ta' ca', main in mao tain pawin ca wara pe ta' pane. Cain' cain' xim mahu' quem? ⁶³Je Tamataracon Iri' Jam ca mi' nain ca e' cara wa. Wari' ma' iri na ne, om ca e' pan ac ca. Je ca tomi' xuhu' ca': Oro ca tomi' ne ca tomi' xuhu' ca', maqui' nain Tamataracon Iri' Jam. To' e' cara nonon oro wari' ta ac tococwa na. ⁶⁴Je i ma' ira ac tococwa na. Taxi' inuhu' quem. Ma' nunuhu' co om howa nanapa' ma' na ca tomi' tococwa ma'.

Tomí' ac i ma' na Jeju, xi wara taxi' ara tococwa pain cara pane, pain ca om taxipa' querec xine qui' tococwa pane. Wara taxi' tata co om howa xun nonon, wara taxi' non co quep xihó' toton nonon oro taramaxicon pain ca quep xun cocon ma' quem.

⁶⁵Je ca tomi' xuhu' ne ac tococwa na. Oro wari' co howa xim nanapa' ma', mo ta om mi' cocon pain ca howa wa Te Iri' Jam ma', om ta howa ac cacapa' ta ac tococwa na.

⁶⁶Je ca ma' mija caca co noc pin nonon Jeju. Ja' ja' ja' ja' om pin nonon. ⁶⁷Tomí' querec ac caparut na pain ca taxipa' urut con ca', pain ca 12 urut ca'. Paca' xim mahu' quem ra naparut.

⁶⁸Om na ta Taramaxicon ne ac con na Simão Pedro. Ma' wari' xi ja' ja' urut quem? Wum co tomi' hwet naparut pain capijam ca mi' nain ca e' cara wa pain pawin ta. ⁶⁹Howa urut pum. Querec pin' urut pum quem.

Wum co Iri' Wari' co wara tora' ca Iri' Jam pane! Iri' Panxica ma ta! Ac i ma' na ca tomi' ca ma'.

⁷⁰Wata' paxi' na co tora' pi' pin nuhu' pain ca 12 hwe ma' ac caparut na. Ane ma' ca win ma' nuhu' co tomi' ha' non Caxicon Jam ma' ne na ca tomi' caparut ma'.

⁷¹Tomi' mi' non Judas, panxica Simão Iscariotes. To' 12 paxi' naparut Judas Iscariotes. Ane quep xihó' toton cocon oro taramaxicon co quep xun nonon Jeju ne. Ame hwe e'.

Ca om howa cocon Jeju xurucun

7 Pi' pin iri na ca pijim' nucun Jeju ne, pain Cafarnaum ma', xut mao ac cain na Galileia. Noc inain ca xut mao wa pain Judeia ta na. Xut mao ni ca' nain, xi to ara cacain i cain oro taramaxicon nuxut co to' pa' pin xun nonon ta. ²Wixicam pin ac ne na oro xec nein ca mam' pe wet urut cocon hwanana nuxut pain ca judeu urut ca', pain ca pi'am to qui' cacain tahot pane. ³Tomi' ac cocon na Jeju xurucun ma': Om xi mon to wet main i ca' ta, mao ximain Judeia cain. Ma' ta querec quequem oro wari' co ja' ja' nenem ma', tomi' querec teterem pain ca an hwet pe main ca hwara' opa nem pain ca ara main ca om ara taxi' ne ca wari' wa ma'. ⁴Mo ta param momon oro wari' pain ca querec pin' quequem ma', om ca na ne pain ca ara noc xa ac main ca ara ma ma'. ⁵Ac i ma' na ca tomi' ximama' cocon xurucun ma'. Xi howa cocon ta.

⁶Tomi' ac tococwa na: Om ca maqui' querec capa' xec nein ca mao tain cain ta'. Wahu' iri na ne, hohot nuhu' oro xec pain ca mama' xin cain hwe. ⁷Om paxi' na ca noc cucuhu' oro wari' co om tomi' ha' nonon Iri' Jam. Ane noc cacapa' ne. Xi om ne ca pan to' ara tain taraxicocon pain ca pan teretem nucucun ta. ⁸Wara mama' jein ca tomi' querec te xi' hwe ma' ac tococwa na. Om ta hwet xuhu' ta. Xi maqui' querec capa' xec nein ca mao tain cain ta'. ⁹Ac i ma' na ca tomi' tococwa ma'. Mon to wet ac cain na Galileia.

7.2 Para pi'am to cacain tahot oro hwanana nucucun oro judeu pane? Om na, taraju pa' je e'. Paca' iri nanain Egito oro hwanana pain cara pane ne, pain ca to e' qui' cacain mahweri pane, om ca to xo' caca. Om nonon iri' xirim. Quep hap e' nanain tahot, pi'am to ximama' ac cacain na quem. Mam' pe wet taxipa' ac cacain na i ma' oro waram winacocon quem. Maqui' iri na oro xec nein ne, pain oro cawaxi' ma', quep ac cacain na tahot, pi'am to ac cacain na quem. Ma' 7 na xec pain oro cawaxi' ca ara cacain quem.

Ca mao cain Jerusalém Jeju

¹⁰ Mama' iri nanain Jerusalém xurucun ne, pain ca tomi' querec te wi xijexi' cocon oro win ma' iri' cwain caca ma', mama' xi' quem ac caparut na Jeju. Om ca taxi' cacaparut oro wari' pain ca mama' nuxut. Mama' xica' to urut.

¹¹ Pirao' nonon Jeju oro taramaxicon nuxut pain ca judeu urut ca', co tomi' querec te wi nana cocon oro win ma' caca ma'. Mon wari' cara pane quem nonon oro wari'.

¹² Mija nana wari' co tomi' hohomu xucucun con. Ma' nana co awi na ta nonon, ma' nana oro xucucun co om ca awi ca ta nonon ma' quem. Mixein nonon oro wari' ta nonon. ¹³ Om ca hwet tomi' xucucun. Tomi' hohomu e' xucucun. Xi jin' ara tococwa oro taramaxicon ta.

¹⁴ Ximijain oro xec nein ca tomi' querec te nuxut ma' iri na ne, mao ac cain na cote ne xiricon Iri' Jam Jeju. Ca' na toton pain capijacon Te oro wari' ta na. ¹⁵ In ac tamana ac cocon na oro taramaxicon nuxut pain ca judeu urut ca'. Para taxi' tamana ca ma' ne? Xi ca' na xo' camain' tocwa pain capijacon Iri' Jam ira nana pain ca in ac cocon ma'.

¹⁶ Tomi' ac tococwa na: Oro ca pijim' ne ca', pain ca ca' na toton pain capijacon Iri' Jam oro wari' cwa', om ca maqui' pan capa'. Maqui' non Iri' Jam co hwet roron oro wari' ta napa' pane. ¹⁷ Wari' co ara tain nain ca param nucun Iri' Jam ma', querec pin' ac cain tara ca pijim' ne pain ca ca' na tain capijacon ca'. Querec pin' tarain pain ca om maqui' capa' ca'. Querec pin' tarain pain ca maqui' con Iri' Jam. ¹⁸ Wari' co pijim' e' nain ca coromicat pan nucun ma', param e' tata oro win ma' ca pain ca in ac pan cocon ma'. Wata' iri na ne, param inonon oro win ma' ne pain ca in ac pan cocon Iri' Jam co pijim' ra napa'. Iri'o' na oro ca tomi' ne quem. Om ca mixein camain' ta'. ¹⁹ Om ca Moisés ca co tomi' hwet nuhu' pain oro ca tomi' nucun Iri' Jam ca tomi' ha' je cuhu' ra? Wirico paxi' na, ane om tomi' ha' iri'o' camain' hwein ca xirao' nucun ne. Para to' pa' pin xim mahu' quem? Tomi' napat a ximahu' pain ca taramaja tain xec nein ca xao to wa e' tara xumuhu' ta capari' Moisés. Xi tomi' ha' iri'o' hun quem ta na ca tomi' tococwa ma'.

²⁰ Tamanain ma ta ac cocon na oro wari'. Corom pe ho' nem Caxicon Jam. Ma' co to' pa' pin xim nem quem nonon.

²¹ Tomi' ac tococwa na: An hwet mi' inuhu' pain ca hwara' opa ne pain ca ara tain ca om ara taxi' ne ca wari' wa pain xec nein sábadó pane, joc herehe pin ac ne na tucuhu' pane. ²² Cain' cain' xihwe quem? Tomi' xin ca wac xirac xine taparinain ca xirac nucun pije' ma'. Ma' 8 pin iri na xec nucun pije' pain ca pan' qui' nucun ma' ne, na e' na pain ca wac xirac xine taparinain ca xirac nucun ta na ca xirao' nucun Moisés cara pane. Om paxi' na ca maqui' con Moisés pane. Wirico Abraão con Isaque con Jacó cara pane, wiricoco co tomi' mi' cain' nanapari' pain ca wac xirac xine taparinain ca xirac nucucun oro hwijima' pane. Je ca wac xirac hwein quem. Xec nein sábadó paxi' na. Je i ma' ira, wac xirac ac hwein na taparinain ca xirac nucucun. ²³ Taramaja paxi' hwe pain ca wac xirac hwein taparinain ca xirac nucucun hwijima' pain xec nein sábadó ma'. Om na, ane xirao' mi' capari' Moisés pain ca ma' 8 pin ne xec nucucun pane ne, na e' na pain ca wac xirac xin, ma' ta om ari xin ca xirao' nucun Moisés ta ac hwe na. Je xi om mana' mahu' pain ca quep xio pin ton wari' pain xec nein sábadó ca' quem? ²⁴ Je ca tomi' xuhu' ca' ac tococwa na. Om ca na ne pain ca coromicat mi' hun pain ca caracat wa wari' ma', pain ca om tomi' querec cain' hun pain carawa ca ara ca ma'. Na e' na pain ca tomi' querec cain' hun, coromicat xo' cain' je, tomi' xo' ac hun tara quem na ca tomi' tococwa ma'.

Ca wum co Cristo ra cocon Jeju oro wari'

²⁵ Ma' ac caca na wari' nein Jerusalém co tomi' querec ca' xucucun: Om ca wirico ca co to' pa' xi' caca ra? ²⁶ Je xi jin' cain ca hwet tomi' wa quem? Noro jun. Je xi tomi' in pin cocon oro taramaxicon quem? Coromicat ni nana ra? Am wirico tara co Cristo ta caca, ac i ma' tara ca coromicat nucucun ra? ²⁷ Tara con, xi taxi' ara xin ca maqui' ca co cwa' ta. Maqui' iri tara Cristo ne, om ta taxi' xin ca maqui' ca. Ac i ma' na ca tomi' xucucun oro wari' pain ca i'ina ne ximicocon ma'.

7.22 Tomi' ac i ma' tata pane. Wirico hwanana Abraão cara pane co tomi' cain' ca Iri' Jam pane, pain ca wac xirac rain taparinain ca xirac nuhu' pain ca tarama' nuhu' ta qui' con pane, mao ac ne ma' na cocon waram winacon con panxica pane. Ma' ta querec pin' xihwe pain ca iri' wari' ne xuhu' ca', je pain ca Iri' Jam ne mahu' ma' quem, ac i ma' na ca tomi' xo' con Abraão Iri' Jam pane. Je ca wac xirac cacain taparinain ca xirac nucucun pain ca tarama' nucucun oro judeu pain xocori ca' quem.

²⁸ Pijim' pe iri nain ca tao' caho' nein xiricon Iri' Jam Jeju ne, tomi' mip ac ca na: Iri'o' tara ca querec pin' mahu' ra? Iri'o' tara ca taxi' mahu' pain ca maqui' ne ra? Tara pahu'. Om ca maqui' ta' pain ca param pan ne ca'. Wirico Iri' Jam na co hwet roron ta napa' pahu'. Tomi' iri'o' na quem. Om paxi' na ca querec pin' hun. ²⁹ Ane querec pin' pan ton ne. Xi maqui' ara ton ta. Wirico co hwet roron ta napa' pahu' na ca tomi' tococwa ma'.

³⁰ Quep xun paxi' nonon Jeju quem, ane om quep ac cocon ne. Xi maqui' querec ne xec nein ca wara coromicat an pe xo' ca Iri' Jam pain ca quep toton ta con ma'. ³¹ Mija paxi' nana oro wari' co om howa nonon ma'. Ane mija caca co howa pin nonon quem ne. Tomi' ca' nana: Wirico co Cristo ta, xi ma' ca xucun co maqui' ta' ma', co hwara' opa tiquin' ca' non pain ca an hwet pe cain ca hwara' opa nucun pain ca ara taxi' cain ca om ara taxi' ne ca wari' wa ta na ca tomi' xucucun.

³² Oro fariseu ma', taraju nonon oro wari' pain ca tomi' hohomu xucucun con Jeju. Tomi' xuxun oro guarda ma' ac cocon na oro taramaxicon nucucun oro sacerdote ma'. Quep toton Jeju ta nana.

³³ Tomi' ac ca na Jeju: Pe ho' wijimain ca' xuhu', in hwet ac ton tara Iri' Jam co hwet roron oro wari' ta napa' pane. ³⁴ Pirao' xun paxi' mahu', ane om mam' xim mahu' ne. Om ta hwet ac mahu' pain ca pe ta' ta' quem na ca tomi' tococwa ma'.

³⁵ Tomi' ac xucucun na oro taramaxicon nuxut pain ca judeu urut ca': Main xi mao ta' ca quem, pain ca om ta mam' ac mahu' ta capari' ma' quem? Hwet toton nonon oro win ma' nexi' co to ho' nonon oro tatirim ra? Ca' na toton pain capijacon Iri' Jam na ra? ³⁶ Cain' cain' xira con quem? Tomi' ca' napari': Pirao' xim paxi' mahu', ane om mam' xim mahu' quem napari'. Om ta hwet ac mahu' pain ca pe ta' ta' quem napari'. Para tomi' ac i ma' capari' quem? Ac i ma' na ca tomi' xucucun.

³⁷ Xec nein ca pi' pin ta' ne ca tomi' querec te nuxut ma', awi tamana na, awi tiquin' ca' nain oro xijein xec nein ca tomi' querec te nuxut. Maqui' iri na iri' xec nein ne, tequi' pe ac ca na Jeju. Tomi' ac ca na, tomi' mip na: Wari' co jain jain nain com ca mi' nain ca e' wa pain pawin cain, hwet ac capa' tara, mi' ac ton pain tara ta. ³⁸ Win ne ca xirao' pe xine capijacon Iri' Jam ca': Wari' co howa napa', weweweo qui' ac nein ximicon tara ca hoi hoi ne com ca mi' nain ca e' cara wa ta na ca xirao' pe nein na ca tomi' tococwa ma'.

³⁹Tomi' mi' nain Tamataracon Iri' Jam ca mi' xun tococwa co howa nonon ma'. Om ca mi' querec tococwa pain, xi mi' pin querec ca Jeju ta. Om ca e' mami' querec ca, om ca in hwet querec con Cote ca, om ca taramaxicon wi querec con pain pawin quem.

⁴⁰Oro wari' co taraju nonon Jeju pain ca tomi' ca ma', ma' nana co tomi' ca' nana: Wirico co cwa' profeta co winim' iri' cwa' ira nana.

⁴¹Ma' ac caca na oro xucucun co tomi' ca' nana quem: Wirico co Cristo ta nana. Ane tomi' in pin cocon oro xucucun ma' ne. Ma' tara ca maqui' ac cain Galileia Cristo ra? ⁴²Xi xirao' pe ara ne capijacon Iri' Jam ta. Tomi' pe ca' na: Winacon Davi tara Cristo. Pan' pe tarain Belém ta, je iri' macaracon Davi ca pe pan ca pane na ca xirao' pe xine capijacon Iri' Jam ta nana.

⁴³Ac i ma' na ca coromicat ni ca' xucucun oro wari' con Jeju pane. ⁴⁴Ma' paxi' nana co quep xun nonon ma' quem, ane om ca wari' co quep non ne.

Ca om howa cocon Jeju oro taramaxicon nuxut pain ca judeu urut ca'

⁴⁵Oro guarda cara ne, in mama' ac cacain na ca to pan caca oro taramaxicon nucucun oro sacerdote cocon oro fariseu ma'. Tomi' querec pan ac caca na oro taramaxicon: Je xi an qui' hun Jeju quem nonon.

⁴⁶Xi ma' camain' ca wari' co an xiho' non pain ca pijim' nucun ta nana.

⁴⁷Cain' cain' xihwe quem ac tococwa na. Mixein turuhu' quem ra na ca tomi' caca oro fariseu ma'. ⁴⁸Ma' tara win taramaxicon urut co howa non ra? Ma' tara win fariseu urut co howa non quem ra? Om na ta! ⁴⁹Oro caxicon wari' ma', co om taraju pa' camain' nanain ca xirao' nucun Moisés ma', xica' to nana caram ma' co howa nonon ta. Wixicaracao' mi' ma' totoron pain cote ne xe Iri' Jam ne na ca tomi' noro caca ma'.

⁵⁰Tomi' ac ca na Nicodemos ma', co win ma' ne nonon oro fariseu ma', co tomi' towa non Jeju pain cara pane. Tomi' tata oro win ma' ca: ⁵¹Om ca em' ma ta ac xun wari' pain carawa ca ara ca pain ca om taraju cain' xun pain ca tomi' nain ho' xucun ta. Win ne ca tomi' capari' ca xirao' nucun Moisés ta na ca tomi' tococwa ma'.

⁵²Cain' cain' ma quem? Ac ca maqui' main Galileia na ta! Mo xi noro tamana main capijacon Iri' Jam ma', taxi' ac ma xira pain ca om ma'

7.42 Oro wari' co tomi' ac i ma' nana con Jeju pane, taxi' paxi' nonon pain ca hwara' pe cain Nazaré pain Galileia, ane om taxi' cocon pain ca pan' pe cain Belém ne.

camain' ca profeta co maqui' nain Galileia ta! Ac i ma' na ca tomi' in pin cocon ma'.

⁵³ Pi' pin iri na ca tomi' nucucun ne, in mama' in mama' xam' ac cacain na xiricocon.

Ca xic am pin cain ca caracat nequem caxicam narima' Jeju

8 Jeju ma' iri na ne, maji ta ac caparut na, mama' ac urut pain na Pacun Nein Oliveira ma'. ²Iri' xo' xec pin iri na ne, in mama' ac urut pain na cote ne xiricon Iri' Jam ma', pain ca tao' caho' nein ma'. Mija ac caca na oro wari' co to to mam' pin nonon Jeju ma' quem. Xao pe ho' ac tococwa na, ca' na ac tococwa na pain capijacon Iri' Jam. ³Maqui' ac caca na oro fariseu cocon oro co ca' na taxipa' nanain ca xirao' nucun Moisés ma'. An qui' nanam caxicam narima'. Wara querec nanam pain ca quep cam xucun tarama' ira. An mi' iri nonon cam Jeju ne, xat pe rain ximijacocon oro wari' cwa' ta ac cacam na. ⁴Tomi' ac cocon na Jeju: Querec urut cam narima' cwa', pain ca quep cam xucun tarama' ta taramaxicon co ca' na taxipa' capijacon Iri' Jam. ⁵Xirao' mi' ca' napari' Moisés pane: Na e' na pain ca to' pa' pin hwehwem oro caxicam narima' co quep caca xucun tarama' ta. To' to' cono' pin jejem pain pacun ta napari'. Wum quem? Ma' carawa ca ara jem maparut cam quem na ca tomi' cocon ma'.

⁶Wara tomi' xo' ca' xucucun con: Tomi' querec xun e'. Mo ta tomi' pan tem ca, na ac capari' tara pain ca em' na ta xun ta nana.

Ac i ma' paxi' na ca wara tomi' xo' xucucun, ane miri'om tococwa ne. Wina quiji' na, xirao' ac cain na macan' pain micon.

⁷Tomi' querec mami' ac cocon na, ac ca wara tomi' querec cocon na. In piri' ac ne na winacon. Tomi' ac tococwa na: Mo ta ma' pan cuhu' co om caracat camain' ma', wirico tara co to' cain' nam pain pacun ta tata.

⁸Wina quiji' mami' ac ca na, xirao' xirao' tiquin' ac cain na macan' pain micon ma'.

⁹Taraju iri nanain ca tomi' nucun ne, xica' mama' xica' mama' pi' pin ac caca na. Hwrehwet cain' nana co hwanana nana ma', mama' mama' pi' pin ac caca na co om hwanana querec nana quem. Xica' pe na narima' co to wet con Jeju. Tequi' xat cara ac cama na.

¹⁰Tequi' pe ac ca na Jeju. Momon caram pacara ne quem xa' ac cam na. Om pin nana co tomi' mi' nenem pain ca mi' pin ra quequem ra?

¹¹ Om na ta Taramaxicon ne ac cama na.

Om ca tomi' mi' xim pain ca mi' pin ra xim ca' quem ac cam na. Mao ra. Ta caracat mami' ma me ta ac cam na.

Ca wata' co Iri' Naran ta ca Jeju

¹² Tomi' mami' ac cocon na oro wari' Jeju: Wata' co Iri' Naran cwa' ta ac ca na. Toha mi' inonon oro wari' pain ximicocon ma', pain ca mi' toton pain ca taraju pa' wa oro caramaxicon Iri' Jam. Wari' co ja' ja' napa' ma', om pin na ca jitacat nein pain ximicon. Xi toha mi' ara ton pain naran ne ca mi' non pain ca e' cara wa ta na ca tomi' tococwa ma'.

¹³ Wum pan na co tomi' hwet pan xijem parut ta ac cocon na oro fariseu. Om ca na ne pain ca howa ac xima ta na ca tomi' cocon ma'.

¹⁴ Wata' paxi' na co tomi' hwet nuhu' pata' ac tococwa na. Ane iri'o' ne ca tomi' hwet xuhu' ne. Xi taxi' pan ara xije pain ca maqui' tain pawin ta. Taxi' xije pain ca in mao tain ta' quem. Wahu' iri na ne, om ca taxi' mahu' pain ca maqui' ne. Om ca taxi' mahu' pain ca mao ta' ta' quem. ¹⁵ Wahu' pain ca juiz hwe ma', pain ca tomi' xo' hun wari' pain carawa ca ara ca ma', je pain ca wum co em' ta hun ma', an xiho' e' hwein ca coromicat nein ca wari' wa ta. Wata' iri na ne, om ca em' hwe ta camain' toton oro wari' ta. ¹⁶ Mo xi ac juiz ton wari' pain ca tomi' xo' ton pain carawa ca ara ca ma', tomi' xo' ac ton xira. Xi tomi' xica' pe ta' pain ca tomi' xo' ton ta. Tomi' xiho' ara xi' napa' Te co hwet roron oro wari' ta napa' ma'. ¹⁷ Je ca xirao' pe ca hwanana nexi' Moisés cara pane, pain ca tomi' ha' jein ta capari' pane. Je ca tomi' ha' urut hwe ma' quem. Ca' na ca xirao' pe ca Moisés pane: Mo ta ma' 2 caca wari' co tomi' hwet xin nanain carawa ca querec caca ma', mo ta an an ari ne ca tomi' nucucun ma', hohot ac ne na pain ca howa tococwa. Iri'o' na ca tomi' nucucun ta na ca xirao' pe nucun Moisés pane. ¹⁸ Je ca tomi' xuhu' ca' ac tococwa na. Tomi' hwet xije pahu'. Tomi' hwet ac capa' na Te co hwet roron oro wari' ta napa' pahu' quem na ca tomi' tococwa ma'.

¹⁹ Main ca pe ca cote ma quem ac cocon na.

Om ca querec pin' mahu' ta ac tococwa na. Om ca querec pin' hun Te quem. Mo xi querec pin' mahu', querec pin' ac hun xira Te quem.

²⁰ Je ca tomi' ca Jeju pain ca pijim' pe cain ca tao' caho' nein cote ne xiricon Iri' Jam pane. Pijim' pe ja' pan nain pana ca to ne dinheiro ca

mi' cocon Iri' Jam oro wari' ma'. Na paxi' xiroron pain ca quep pe cocon pain i ma', ane om quep cocon ne. Xi maqui' querec ne xec nein ca wara coromicat an pe xo' ca Iri' Jam pain ca quep totoron ta con ta.

Ca tomi' xo' tococwa oro taramaxicon pain ca maqui' nucun

²¹ Tomi' mami' ac tococwa na: Mao ta' ina ta ac tococwa na. Pirao' xun paxi' mahu'. Om ta mam' mahu'. Cono' pa' e' ac hwein tara ca caracat nuhu'. Om ta hwet ac mahu' pain ca pe ta' ta' quem na ca tomi' tococwa ma'.

²² Cain' cain' xira quem ac caca na oro taramaxicon nuxut pain ca judeu urut ca'. To' pa' pin xije tara ron? Je ca tomi' ac i ma' capari' pain ca om ta na cuhu' pain ca hwet xun mahu' pain ca pe ta' ta' ca' napari' ron na ca tomi' querec xucucun ma'.

²³ Om na, wari' nein macan' hwe ta ac tococwa na. Wata' iri na ne, wari' nein pawin ina. Coromicat an xiho' huhun oro wari' nein macan' ca'. Wata' iri na ne, om ca coromicat an xiho' toton wari' nein macan'. ²⁴ Je ca tomi' xuhu' ne, pain ca cono' pa' e' jein ca caracat nuhu' xuhu' ne. Iri'o' na ca tomi' xuhu' ca': Mo ta om howa mahu' pain ca tomi' hwet xije pahu' ca', cono' pa' e' ac hwein tara ca caracat nuhu' ta na ca tomi' tococwa ma'.

²⁵ Cain' ca wari' ma quem ac cocon na.

Wara tomi' hwet xije pahu' pain cara pane, pain ca xo' pijim' qui' xuhu' pane, tomi' hwet taxipa' xije pahu' ac tococwa na. ²⁶ Mija mija wet paxi' napa' oro ca tomi' xim xuhu' ca'. Mija mija wet paxi' napa' oro ca tomi' xo' xim xuhu' pain oro carawa ca ara pan teretem hwe ma' quem, pain ca em' hwe ta xim xuhu' ca' quem. Ane noc tain ne. Xi tomi' hwet e' ara xuhu' pain ca taraju ta' con Te co hwet roron oro wari' ta napa' ta. Iri'o' na ca tomi' nucun quem. Ac i ma' na ca tomi' tococwa ma'.

²⁷ Om ca taraju pa' cacain ca tomi' nucun. Om tara Iri' Jam co tomi' ca pain ca Te inon ta ca ma' nonon.

²⁸ Je ca tomi' ca' tococwa ma': An piri' xat iri xine pain ca Iri' Wari' ta' ca' ne. An piri' xat iri xine pain pana ne, pain ca to' pa' pin xim mahu' ma', querec pin' ac mahu' tara pain ca tomi' iri'o' ta' ca', pain ca tomi' hwet xije pahu' ca'. Querec pin' ac mahu' tara pain ca om ara camain' tain ca param pan ne. Querec pin' ac mahu' tara pain ca tomi' hwet e' tain ca tomi' xo' capa' Te. ²⁹ Pe ho' napa' Te co hwet roron oro wari' ta napa'. Om ca an pe

pin capa'. Xi om ne ca ara taxipa' ara tain oro carawa ca hohot non ta na ca tomi' tococwa ma'.

³⁰ Tomi' iri nain i ma' ne, ma' mija ac caca na oro wari' co howa nonon ma'.

Ca tomi' xo' tococwa pain ca witan iri'o' wa

³¹ Tomi' ac tococwa na oro win judeu urut ma', co howa nonon ma': Mo ta tomi' ha' cara mahu' pain ca tomi' xuhu' ca', taxipa' iri'o' ac mahu' tara. ³² Querec pin' ac hwein tara oro ca iri'o' wa con Iri' Jam. Howa iri jun ne, witan ca' ac hwein tara carawa ca quep xat nuhu' ta.

³³ Cain' cain' xira quem ac cocon na. Xi iri' hwanana ne ara urut con Abraão cara pane ta. Wirico co wanxi' non hwanana nuxut pane. Om ca quep xat camain' caparut carawa. Para witan ca' jein carawa ca quep xat nuhu' ma' maparut quem nonon.

³⁴ Om na, je ca tomi' xuhu' ca', tomi' iri'o' inuhu' ta ac tococwa na. Wari' co caracat ma', ac ca quep con na ca caracat nucun. Ac ca taramaja mi' e' ne con na. ³⁵ Wari' co taramaja mi' e' non xucun wari' pain xiricon ma', om ca pe ho' cara con taramaxicon nucun. Om ca iri' te con. Panxica ma' iri na ne, pe ho' cara non cote ca. ³⁶ Mo ta to' witan xuhu' pain ca Panxica Iri' Jam ta' ca', witan iri'o' ac hwe tara. ³⁷ Iri' hwanana ne paxi' hun Abraão cara pane, taxi' inuhu' pain ca iri' hwanana ne hun ma'. Ane to' pa' pin xim mahu' ne. Xi howa hwein ca pijim' xuhu' ta. ³⁸ Tomi' hwet inuhu' pain oro carawa ca querec ta' pain ca pe ho' pe ho' wet ton Te pane. Wahu' iri na ne, ara hwein ca ca' na cuhu' cote hwe ma' na ca tomi' tococwa ma'.

³⁹ Om na, wirico Abraão cara pane co te urut ca', ac ca te urut con na pain ca wanxi' cocon hwanana nuxut cocon mana coturut pane ac caca na.

Mo xi wanxi' con hwanana nuhu' Abraão pane, mo xi te iri'o' hun, an xiho' ac hun xira pain ca xut xo' nucun ta ac tococwa na. ⁴⁰ Ane to' pa' pin xim mahu' ne, xi om ne ca tomi' hwet ara xuhu' pain capijacon Te ca iri'o' ca', ca taraju ta' ca'. Om ca ac i ma' camain' ca Abraão pane ta. ⁴¹ Je ca tomi' xuhu' ca': An xiho' hun iri' cote hwe ma' ira na ca tomi' tococwa ma'.

Cain' cain' xima quem? Ma' na coturut ta, wirico Iri' Jam. Om ca te urut con xucun na ca tomi' cocon ma'.

⁴² Mo xi te iri'o' hun Iri' Jam ma', om ac ne xira ca noc mahu' ta ac tococwa na. Xi maqui' ara ton Iri' Jam ta. Je ca pe ho' xuhu' ca'. Om ca

maqui' ta' pain ca param pan ne. Wirico Te co hwet roron ta napa' pahu'.
⁴³ Je xi taraju pa' mahu' pain ca tomi' xuhu' ca' quem? Ane noc hwein
 ca taraju wet wa ne. ⁴⁴ Te hun Caxicon Jam ma' ira. An xiho' hun quem.
 Wara to' pa' taxipa' non wari' pain ca xo' quep qui' xine macan' pane, mao
 ac ne ma' na con, je curucun mao na. Noc nain ca tomi' iri'o' wa. Om ca
 tomi' iri'o' taxi' ca. Tomi' mixein iri na ne, ara e' nain carawa ca maqui'
 nain ximicon. Xi tomi' mixein taxipa' ara ca ta. Wirico co ja' tomi' mixein
 nonon oro wari' co tomi' mixein nana ma' quem. ⁴⁵ Je ca om howa mahu'
 pain ca tomi' iri'o' xuhu' ca'. ⁴⁶ Om ca ma' camain' ca wari' co querec inon
 pain ca caracat ca pane ac napa' ma' pahu'. Tomi' iri'o' e' ina. Je xi howa
 mahu' quem? ⁴⁷ Wari' co te non Iri' Jam ma', tomi' ha' nain capijacon.
 Wahu' iri na ne, om ca tomi' ha' hwein capijacon Iri' Jam. Xi te hun ta na
 ca tomi' tococwa ma'.

Ca tomi' xo' tococwa pain ca wara ma' ca' con Abraão cara pane

⁴⁸ Tomi' ac cocon na Jeju oro taramaxicon ma'. Iri'o' na ca tomi' urut
 pum pane ac cocon na. Caxicon wari' ma. Ac wari' nein Samaria ma.
 Corom pe ho' quem Caxicon Jam ma' ira nonon.

⁴⁹ Om na, om ca corom pe ho' capa' Caxicon Jam ta. Tomi' ha' e' inon
 Te ta. Wahu' iri na ne, tomi' napat e' mahu'. ⁵⁰ Om paxi' na ca jain jain
 toton oro wari' pain ca awi na ta cacapa' ca'. Ane ma' ca xucun co jain jain
 nonon oro wari' pain ca awi na ta cacapa' ma' ne. Wirico Te na co awi na
 jun ta nonon pata'. Wirico co Juiz. Wirico co querec pin' napari' pain ca
 tomi' nexi'. ⁵¹ Je ca tomi' xuhu' ca', tomi' iri'o' inuhu': Wari' co tomi' ha'
 nain ca pijim' ne ca', om ta mi' pin camain' ca ta na ca tomi' tococwa ma'.

⁵² Taxi' pin urut pum pain ca corom pe ho' quem Caxicon Jam ma' ta ac
 cocon na. Pain cara pane ca mi' pin ca hwanana nuxut Abraão pane. Pain
 cara pane ca cono' caca oro profeta pane quem. Je xi om tomi' ac i ma'
 ma pain ca wari' co tomi' ha' nain ca pijim' ne ca', om ta mi' pin camain'
 ca ta ma ma' quem? Cain' cain' xima quem? ⁵³ Hwara' opa tiquin' ca' inon
 xi' ma mon hwanana nuxut Abraão co mi' pin cara pane ra? Hwara' opa
 tiquin' ca' inonon xi' ma momon oro profeta co cono' nana pane quem
 ra? Cain' cain' xima quem? Tomi' xec xec a xima ta! Ac i ma' na ca tomi'
 cocon ma'.

⁵⁴Om na, mo xi awi ina pan ta', tomi' ximao e' xita'. Ane awi ma ta pan capa' Te co Iri' Jam ne hwe ne. ⁵⁵Om ca querec pin' camain' hun ta. Wata' iri na ne, querec pin' inon. Mo xi tomi' ca' ta': Om ca querec pin' ton, mo xi tomi' ac i ma' ta', tomi' mixein ac ta' xira. Win hwe ma', pain ca tomi' mixein hwe ma'. Ane querec pin' ton ne. Tomi' ha' inon quem. ⁵⁶Hwanana nuhu' Abraão cara pane, tomi' querec te tamana napa' pain ca maqui' tain macan' ca'. Querec napa' pain ca maqui' ne. Tomi' querec te ac capa' na quem na ca tomi' tococwa ma'.

⁵⁷Cain' cain' xima quem? Om ca hwet querec main ca 50 ne cawaxi' nem ta. Ma' na ca querec ac mon Abraão cara pane na ca tomi' cocon ma'.

⁵⁸Je ca tomi' xuhu' ca', tomi' iri'o' inuhu' ta ac tococwa na. Wata' co wara ma' pane. Wara ma' ca' inon Abraão pain ca om pan' querec ne ca pije' nucun pane ta na ca tomi' tococwa ma'.

⁵⁹Cut ac cacain na pacun, to' to' mi' pin xun pain pacun ta ac caca na quem. Ane xa mao ca Jeju ne. Hwet ca' ac cain na ca tao' caho' nein xiricon Iri' Jam.

Ca quep xio pin con co wara om tocon pain ca xo' pan' nucun

9 Maji ta ac caparut na Jeju ma', xuruxut mama' ac urut na. Querec ac con na wari' Jeju. Wara om na tocon pain ca xo' pan' nucun pane. ²Tomi' querec ac urut con na pain ca taxipa' urut con ca': Cain' cain' ne con wari' cwa' quem Taramaxicon co ca' na taxipa' capijacon Iri' Jam ac urut con. Para wara om ne tocon pain ca xo' pan' nucun quem? Ca caracat nucun tara ron? Ca caracat nequem jicon con cote ca tara ra na ca tomi' querec urut con ma'.

³Om na ac caparut na. Om na ca caracat nucun ca to' om nain tocon. Om na ca caracat nequem jicon con cote ca ca to' om nain tocon quem. Om pan na tocon, ma' ta querec pin' cacapa' oro wari' pain ca hwara' opa ne pain ca quep xio pin ton ta na Iri' Jam. ⁴Pain ca toha toha wet ca xina cwa', na e' na pain ca ara xin ca ara je capari' Iri' Jam co hwet roron oro wari' ta napa' ma'. Xim pin ta' iri na quem. Xim pin iri na ne, om ta taramaja mami' ac iri'. ⁵Pain ca pe pe wet tain macan' ca', ac naran ina pain ca toha mi' toton pain ximicocon oro wari' ta na ca tomi' caparut ma'.

9.4 Pain ca tomi' mi' con xina Jeju ma', pain ca toha toha wet nucun ma', tomi' mi' nain ca e' e' wet nexi'. Pain ca tomi' mi' cain xim ma' iri na ne, tomi' mi' nain ca cono' nexi' quem.

⁶Tomi' iri nain i ma' Jeju ne, cupa' ac cain na morocacon pain macan'. Meo maram ac cain na, wara ca' na co om tocon ma', toto ac cain na pain tocon. ⁷Tomi' ac con na: Mao rain wijimain xuterem' ma', ca Siloé caca oro wari' ma'. Hohoc ac main tara tucum na ca tomi' con ma'. Mam' napari' pain cominain Siloé Iri' Jam ta nanain wijimain xuterem' oro wari' ma'. Je ca o' ma' mi' cacain quem, je ca tomi' mao ne ca Siloé wa ma'.

Ma ac ca na, mao ac cain na wijimain xuterem' ma', hohoc ac cain na tocon. Querec pin' ac ca na. In mao ac cain na xiricon quem.

⁸Querec nonon oro win ma' ca cocon oro xucucun wari' co querec taxipa' nonon pain ca xiram pa' xine, mi' xine pain oro carawa cocon oro wari' ma'. He ac caca na. Ac wari' co xao pe taxipa' nain i cain pane napa' me, co mi' xine taxipa' oro carawa pane, ac wirico ne ma' ira ac caca na.

⁹E'e', wirico ma' ira ac caca na oro xucucun.

Om na, xucun wari' ta, ac wirico e' na ta ac caca na oro xucucun ma' quem.

Wata' cwa' ira pan ac ca na.

¹⁰Cain' cain' ma quem? Para querec pin' ma ma' quem ac cocon na.

¹¹Om na, co cwain ta, co Jeju na wixicon cwain, wirico co meo maram nain macan' pain morocacon, toto ac cain na pain tucu. Tomi' ac capa' na: Mao rain Siloé ma', hohoc ac main tara tucum ta napa'. Hwet ac tain na, hohoc ac tain na tucu, querec pin' ac ta' na quem na.

¹²Main ca pe ca quem ac cocon na.

Om ca taxi' ton ta ac ca na.

¹³Oro wari' ma', o mao ac cocon na co quep xio pin wa ma', o mi' nonon cocon oro fariseu. ¹⁴Xec nein ca xao to wa ne ca xumu wa na pain ca meo maram cain macan' pain morocacon Jeju ma', pain ca quep xio pin con ma'.

¹⁵Tomi' querec pan nonon oro fariseu ma' quem: Para querec pin' ma ma' quem nonon.

Om na, meo maram nain macan' pain morocacon, toto ac cain na pain tucu. Hohoc ac tain na tucu, querec pin' ac ta' na quem tata.

¹⁶Ma' ac caca na oro fariseu co tomi' ca' nana quem: Om ca maqui' con Iri' Jam co ara nain i ma'. Xi taramaja ara ca pain xec nein ca xao to wa ne ca xumu wa ca', pain ca ta taramaja hwein me ta capari' ca' na ca tomi' caca ma'.

Tara con ac caca na oro xucucun ma' quem. Mo xi caracat ca, om xi ara taxi' ac i ma' cain carawa ca om ara taxi' ne ca wari' wa ta. Ac i ma' na ca coromicat ni ca' xucucun.

¹⁷ Tomi' querec mami' ac cocon na: To' querec pin' napa' pain tucu ta mon. Cain' ca coromicat mi' mon quem nonon.

Profeta na ta ac ca na.

¹⁸ Oro taramaxicon nuxut pain ca judeu urut ca', om ca howa cocon pain ca om ne tocon pane. Om ca howa caca pain ca quep xio pin napa' pain tucu ca ma' quem. Je ca harahap je cocon cote ca cam jicon ma'.

¹⁹ Tomi' querec ac cacam na: Pije' nuhu' na co cwa' ra? Wara om na tocon pain ca xo' pan' nucun ta hun. Cain' cain' xira quem? Para querec pin' ca pain xocori ca' quem nanam.

²⁰ Pije' nuxut ta ac cacama na cote ca cam jicon. Taxi' paxi' urut con pain ca wara om ne tocon pain ca xo' pan' nucun pane. ²¹ Ane om taxi' urut con pain ca querec pin' ca pain xocori ca' ne. Om ca taxi' urut con co quep xio pin non quem. Ho' tarama' pin na, taxi' pan xucun. Je xi tomi' querec pan hun quem? Tomi' xo' pan turuhu' pain ac cocon na.

²² Tomi' ac i ma' na cote ca cam jicon ma', xi om ne ca jin' ara cocon oro taramaxicon ta. Wara tomi' ara xi' nana: Wari' co Cristo na ta non Jeju ma', xin hwet pin ac xut con tara, om ta corom mami' cain xirim ca cut in to xijexi' pain ca judeu iri' ca' nana. ²³ Je ca tomi' ac i ma' ca cote ca cam jicon ma', pain ca ho' tarama' pin na, taxi' pan xucun, je xi tomi' querec pan hun quem cacama ma'.

²⁴ Hap ra mami' ac cocon na co quep xio pin wa ma' quem. Tomi' iri'o' ra ta, taraju nem Iri' Jam ta. Taxi' urut con wari' ma', taxi' urut con pain ca caracat ca ma' na ca tomi' cocon ma'.

²⁵ Tara con ta'a ac ca na. Am caracat ca, om ca taxi' ton. Ma' xica' pe e' na carawa ca taxi' ta' ca'. Taxi' xije pain ca om capa' tucu ira, taxi' xije pain ca querec pin' ta' pain xocori ca' quem na ca tomi' ca ma'.

²⁶ Cain' cain' quem quem? Cain' ca to' querec pin' cain tucum ma' quem ac cocon na.

²⁷ Wara tomi' paxi' inuhu', ane om howa mahu' pain ca tomi' ta' ca' ne. Para param mami' hwein ca taraju wa ma' quem? Ja' ja' xuxun na hwe quem ra na ca tomi' cocon ma'.

²⁸ Tomi' xirac ac cocon na: Wum co ja' ja' pan non ta. Warut iri na ne, ja' ja' urut con Moisés ta. ²⁹ Taxi' urut con Moisés cara pane, wirico Iri'

Jam na co mi' non pain ca hwara' opa tamana nucun. Co ma' iri na ne, om ca taxi' camain' urut con. Om ca taxi' urut con co mi' non pain ca hwara' opa nucun quem. Am wari' con, am Iri' Jam con, om ca taxi' urut con ta ac cocon na.

³⁰Wa inuhu' me! Xi quep xio pin ara capa' ta! Je xi taxi' hun co mi' non pain ca hwara' opa wa ma' quem? ³¹Taxi' urun Iri' Jam pain ca miri'om cocon oro caracat pain ca quep xiho' xut me cocon ma'. Ane xiram pa' cocon co tomi' ha' nonon ma' ne, co ara nanain ca param nucun ma'. ³²Pain ca xo' ma' ten qui' ne macan' pane, om ca querec camain' tocwa wari' co to' querec pin' wa tocon co wara om tocon pain ca xo' pan' nucun ta. ³³Mo xi om maqui' con Iri' Jam ca hwara' opa nucun co ma', om xi quep xio pin ac capa' ta na ca tomi' tococwa ma'.

³⁴He ac cocon na. Wara caracat qui' main ca pan' qui' nem ma' ira. Cain' xi tomi' xo' ac maparut con Iri' Jam quem nonon, xin hwet ca' ac cocon na pain xirim ca cut in to xucucun ma'.

Ca ac ca om ne ne tococon oro wari' co om howa je na nana ma'

³⁵Taxi' ac con na Jeju pain ca xin hwet ca' cocon pain xirim ca cut in to xucucun ma' quem. Pirao' ac con na. Mam' iri non ne, tomi' querec ac con na: Howa mon co Iri' Wari' ma' quem na ca tomi' querec con ma'.

³⁶Ma' wari' co Iri' Wari' ma' quem ac ca na. Tomi' hwet ne con, ma' ta howa ton ta ac ca na.

³⁷Querec mon ma' ira. Wata' ta, co tomi' nem cwa' ta ac con na Jeju.

³⁸Howa inem ta Taramaxicon ne ac ca na, pe torotop mi' querec te ac con na.

³⁹Tomi' ac ca na Jeju: Maqui' inain macan' ca', ma' ta querec pin' tococwa oro wari' pain ca taraju pa' nucucun. Oro wari' co querec pin' paxi' xucucun pain ca om taraju pa' cacain capijacon Iri' Jam ma', an xiho' nonon wari' co om tococon. Ac ca to' querec pin' xine na tococon pain ca mi' tococwa pain ca taraju pa' wa quem. Oro wari' co taraju pa' urut xi' ma nanain capijacon Iri' Jam ma' iri na ne, ac ca querec caca paxi' na, ane om querec caca ne. Om ca taraju pa' caca. Om cara na tococon pain ca om taraju pa' nucucun ta na ca tomi' ca ma'.

⁴⁰Ma' ac caca na oro fariseu co taraju nonon pain ca tomi' ac i ma' ca ma'. Cain' cain' xima quem ac cocon na. Ac ca tomi' maparut na, ac ca

om ne na tucuhu' pain ca om taraju pa' hwein capijacon Iri' Jam maparut ron ac cocon na.

⁴¹ Tomi' ac tococwa na: Mo xi querec pin' xujuhu' pain ca om taraju pa' hwein capijacon Iri' Jam ma', an xiho' ac huhun xira wari' co om tococon ma', co jain jain nana pain ca querec xixi' na caca ma'. Om ac ne xira ca tomi' em' xihwe pain ca caracat nuhu'. Ane taraju pa' urut xi' ma hwe ne. Je ca an xiho' huhun wari' co querec urut xi' ma paxi' nana ma', ane om ne tococon ne. Om ca xic am ac xihwe pain ca caracat nuhu' ta na ca tomi' tococwa ma'.

Jeju co Iri' Pastor

10 Tomi' ac tococwa na: Wari' co om corom ac nain manain ca tao' caho' nein ovelha ma', wari' co corom xirac ma', wirico co an noc xa ovelha ma'. Quep em' tain ta na. Tomi' iri'o' inuhu' ta. ²Wari' co corom xo' nain manain ma' iri na ne, wirico co pastor ma', co querec wet taxipa' nain ovelha ma'. ³Corom ta' e' iri non wari' co querec wet nain manain ca corom ac wa ma' ne, pa mi' ac tocwa na pain. Tomi' tomi' xam' ac cain na wixinain ovelha nucun, taraju pa' ac nein na ca tomi' nucun, o hwerehwet mama' ac cain na quem. ⁴An hwet to pi' pin iri nain winacon ne, o mama' ac cain na, ja' ja' pan ac con na quem. Xi om ne ca taraju pa' ara nein ca tomi' nucun. ⁵Ja' ja' paxi' non waximain ma', ane om ja' ja' camain' con xucun wari' ne. Jein ca' non, xi taraju pa' nein ca tomi' nucun ta. Ac i ma' na ca pijim' tococwa con pastor pain ovelha nucun pane.

⁶Ac i ma' paxi' na ca pijim' cocon oro fariseu Jeju ma', pain ca pijim' joc mam' mi' tococwa con pastor pain ovelha nucun ma', ane om taraju pa' cacain ca tomi' mao nein ne.

⁷Tomi' mami' ac tococwa na: Je ca tomi' xuhu' ca', tomi' iri'o' inuhu' ta. Wata' co iri' man ca corom ac ne ovelha ma', pain ca corom ac nein ca tao' caho' nein ma'. Xi wata' ara ne co mi' nonon pain ca corom hwet wa Iri' Jam oro wari' ne ta. ⁸Oro xucucun ma', co wara maqui' ca' nanapa' ma', co pijim' ni ca' nanain capijacon Iri' Jam ma', ac caxicon wari' nana. Ac ca cut noc xa xin cacain na ovelha. Ac ca quep em' xin cacain na. Howa xut me paxi' nonon oro wari' ne ma'. Ane om ha' tococwa ne. ⁹Wata' co iri' man ca corom ac wa ca'. Oro wari' co corom ac nanapa' pain ca howa cacapa' ma', witan ac caca tara. Win ne ovelha ma'. Corom na, hwet mao

ac ne na, mam' ac nein na tononoin. Ac i ma' tara ca querec wet toton co howa nanapa' ta. ¹⁰Caxicon wari' ma', om ca maqui' ximao ca. Maqui' e' na pain ca an noc xa tain cain oro ovelha. Maqui' e' na pain ca to' pa' pin tain cain. Maqui' e' na pain ca to' om pin tain cain quem. Ac i ma' nana co pijim' ni ca' nonon pain capiacaon Iri' Jam oro wari' ne quem. Wata' iri na ne, maqui' ina, ma' ta e' cara caca oro wari' ne pain pawin ta inonon. Maqui' ina, ma' ta ma' ma' xam' cocon oro carawa ca mi' toton ta' pain ca to' e' cara toton quem inonon.

¹¹Wata' co iri' pastor co querec wet xo' nain ovelha. Iri' pastor ma', om ca nain ho' xucun pain ca querec wet xo' cain ovelha nucun. Mi' pin caho' tain ovelha ne ta na. Ac i ma' ina quem. Om ca nain ho' xije cocon oro wari' co howa nanapa' ma'. Mi' pin caho' toton inonon. ¹²Om ca ac i ma' ca wari' co taramaja mi' e' nain dinheiro pain ca querec wet taxipa' cain ovelha ma'. Xi iri' pastor ca ta. Om ca mene cain ovelha quem. Querec iri non copacao' pain ca mo hwet tain cain ne, an to pin ac cain na oro ovelha, mo mao ac ca na quem. Mo hwet ac cain ovelha na copacao' ma', quep ac cain na wirain, ja' wawaran ac cain na oro wirain ma' quem. ¹³Mo mao na co ma' co taramaja mi' e' nain dinheiro. Xi win xumu cain ovelha ta. Ac i ma' nana co pijim' ni ca' nanain capiacaon Iri' Jam quem. Om ca win xumu cocon oro wari' nucun Iri' Jam. ¹⁴Wata' co iri' pastor. Querec pin' inonon oro wari' ne, querec pin' nanapa' quem. ¹⁵Win ne ca querec pin' capa' Te cwa', querec pin' inon quem. Om ca nain ho' xije pain ca querec wet toton oro wari' ne quem. Mi' pin caho' toton ta inonon. ¹⁶Ma' nanapa' oro xucucun wari' co om howa querec nanapa' quem. Wari' ne toton inonon. An xiho' nanain oro ovelha ca corom to nain xijein ca tao' caho' nein ma'. Na e' na pain ca cut qui' toton quem. Taraju wet tatarain ca tomi' ne. Jao jao ma' ac cocon tara co wara howa nanapa', querec wet querec wet pi' pin ac toton tara quem. Xica' pe ta' pain ca querec wet toton ta.

¹⁷Om ca noc capa' Te. Xi nain ho' xije ta. Mi' pin caho' toton oro wari' ne ina. Ma' ta e' mami' ta' ina. ¹⁸Om na wari' co ha' non pain ca to' pa' pin ton pan capa' ta. Mi' pin ta' pan ina, maqui' nain ca param ne. Na napa' pain ca mi' pin ta', na napa' pain ca e' mami' ta' quem. Je ara xi' na ca ara ra capa' Te ta na ca tomi' tococwa ma'.

10.16 Pain ca tomi' ac i ma' ca Jeju ma', tomi' mi' nonon oro wari' co om judeu nana. Tomi' napari' pain ca om judeu iri' ca' quem. Main howa tatarapa' ta napari'.

¹⁹Oro wari' ma', taraju iri nanain ca tomi' nucun ne, coromicat ni ca' mami' ac xucucun na. Mija nana co tomi' ca' nana: ²⁰Corom pe ho' con caxicon jam ma' ira! Tamanain pin na! Para taraju wet hwein ca tomi' nucun ma' nana.

²¹Ma' ac caca na oro xucucun co tomi' ca' nana quem: Om ca corom pe ho' con caxicon jam wari' co tomi' ac i ma' ta. Ma' tara caxicon jam co quep xio taxi' non wari' co om tocon ra na ca tomi' caca ma'.

Ca om howa jun na cocon Jeju oro taramaxicon nuxut pain ca judeu urut

²²Maqui' pin ac ne na xec nein ca tomi' querec te wi urut pain ca judeu urut ca', pain ca mam' pe wet urut pain ca ara xo' mami' xine cote ne xiricon Iri' Jam pain Jerusalém pane. Wara maqui' na ca xio tamana ne oro xec quem. ²³Je ca xut in pe cain ca tao' caho' nein xiricon Iri' Jam Jeju ma'. Xut in pe nain ca tacan tiquin' ne xirim pain cacarain ma', pain Maxicon Salomão ma', je i ma' wixinain. ²⁴To to mam' pin ac cocon na oro taramaxicon nuxut pain ca judeu urut ca'. Tomi' querec ac cocon na: Para joc xim cara xijem ma' quem nonon. Mo ta Cristo iri'o' ma, tomi' xo' ac maparut tara ta na ca tomi' querec cocon ma'.

²⁵Wara tomi' xo' xuhu' ne ira, ane om howa mahu' ne ac tococwa na. Noro jein oro ca ara ta' ca', ca ara ra capa' Te ca'. Mo xi querec pin' hwein con, querec pin' ac mahu' xira quem. ²⁶Ane om howa mahu' ne. Xi wari' ne hwe ta. ²⁷Win ne oro ovelha ca taraju wet nain ca tomi' nucun co querec wet nain ma', ac i ma' na ca taraju wet cacain ca tomi' ne oro wari' ne ma' quem. Querec pin' inonon, ja' ja' ac cacapa' na quem. ²⁸Mi' inonon pain ca e' cara wa. Om ta pan' ara'am camain' caca. Quep xat cara inonon, om na wari' co coc xicot ca' ac napa' cocon. ²⁹Te ma', co mi' napa' cocon, hwara' opa na. Om na win hwara' opa ca. Om na wari' co coc xicot ca' ac nonon pain micon. ³⁰Wata', Te, ca' urut, win cwere xujuxut. Ac ca xica' pe ne na xumuxut ta na ca tomi' tococwa ma'.

³¹Cut mami' ac cacain na pacun oro taramaxicon ma', to' to' mi' pin xun pain pacun ta ac cocon na.

³²Tomi' ac tococwa na: Querec mahu' pain oro carawa ca awi ca ara ra capa' Te pane. Ma' carawa ca ara ta' pahu' pain ca to' to' mi' pin xim mahu' pain pacun ma' quem tata.

³³Om ca to' pa' xim urut pum pain carawa ca awi ca ara ma ma' ac cocon na. To' pa' pin xim urut pum, xi tomi' ximao ara mon Iri' Jam ta. Iri' Jam ina ta a xima ma ron? Wari' ma ma' ira ac cocon na.

³⁴⁻³⁶Para tomi' ximao ma mahu' pain ca Panxica Iri' Jam ina ta' ca' quem? Win ne ca xirao' pe xine ca tomi' nucun Iri' Jam pain capijacon ca howa hwe ma', pain ca tomi' cocon oro taramaxicon co juiz nana pane: Ac wata' hwe, iri' jam hwe pain ca taramaxicon hwe ta nonon pane. Taxi' urun Iri' Jam pain ca iri' jam hwe cocon caram pacara pane co tomi' hwet ca pain capijacon pane. Taxi' urun pain ca om xin in taxi' ne capijacon quem. Je ca tomi' xuhu' ca' quem: Om ca na ne pain ca tomi' ximao ma mahu' pain ca Panxica Iri' Jam ina ta' ca'. Tora' pan napa' Te pain ca mi' capa' pain ca taramaja ne ca', pain ca hwet roron pain macan' ta capa' pahu'. ³⁷Mo xi om ara tain ca ara ra capa' Te cwa', hohot ac ne xira pain ca om howa mahu' ta. ³⁸Om paxi' na ca howa mahu' pain ca tomi' ne ca', ane ara e' tain ca ara ra capa' Te ne. Je xi howa mahu' pain ca querec pin' hwein oro ca ara ta' ca' quem, pain ca ara tain ca om ara taxi' ne ca wari' wa ca'? Querec pin' ac mahu' xira pain ca win cwere capa' Te. Querec pin' ac mahu' xira pain ca win cwere ton ca' quem na ca tomi' tococwa ma'.

³⁹Quec xun ta mami' ac cocon na. Ane witan ca' tococwa ne.

⁴⁰Maji ta ac caparut na Jeju, in mama' ac urut pain na xijein cacarain Jordão cain. Mama' ac urut pain na ca ja' to cocon pain com oro wari' João cara pane, pain ca xo' ja' ten qui' ca com pain cara pane. Mon to wet ac urut pain na i cain. ⁴¹Mija ac caca na oro wari' co hwet nonon pain i cain quem. Tomi' ca' nana: João cara pane, om paxi' na ca an hwet cain ca hwara' opa wa pane, om paxi' na ca ara cain ca om ara taxi' ne ca wari' wa pane. Ane iri'o' ne oro ca tomi' hwet nucun con Jeju ne. Iri'o' iri'o' pi' pin na con ta na ca tomi' caca ma'. ⁴²Mija pin ac caca na oro wari' co howa pin nonon Jeju pain i cain. Howa nonon pain ca maqui' iri'o' con Iri' Jam.

10.34-36 Je ca xirao' pe xine pain capijacon Iri' Jam pain Salmo 82 ma': Ac wata' hwe, iri' jam hwe ta nonon oro taramaxicon co juiz nana pane. An xiho' mahu' pain ca hwara' opa ne ca'. Wahu' co tomi' xo' nonon pain capija oro wari', an xiho' mahu' pain ca taramaxicon nuhu' ma' quem na ca tomi' tococwa oro taramaxicon co juiz nana pane.

Ca mi' pin nucun Lázaro

11 Caxi ac ca na wari' pane. Lázaro na wixicon. Wari' nein Betânia na, je i ma' wixinain ca paric to ne xirim ca pe ca cacam mana cowe ca ma', Maria cam Marta ma'. ²Wiricam Maria co cam ja' nain caximacon Taramaxicon nexi' Jeju pain caji towaxi' ca hu xain pane, co xic nain caximacon pain tenenequem pane. Wirico coxa' cama Lázaro co caxi ma'. ³Mo'o jun Jeju ta ac cacama na mana cowe ca ma'. Caxi na iri' win ma' nem co om noc ma cwa' Taramaxicon nuxut ca' jun ta nana. Mo'o xun ta ac caca na, mama' ac caca na.

⁴Taraju iri nain i ma' Jeju ne, tomi' ac ca na: Caxi paxi' na Lázaro, ane om mi' pin ta' ca pain ne. Caxi e' na. Ma' ta querec pin' cacapa' pain ca hwara' opa ne oro wari' ta na Te Iri' Jam. Ma' ta querec pin' quequem pain ca hwara' opa nem quem napa' pain ca Panxita' capa' ta na.

⁵Jeju ma', om paxi' na ca noc cacam Marta cam Maria con Lázaro ma' quem. Tomi' querec te tamana paxi' nanam. ⁶Ane mon to wet ca ne. Taxi' iri non pain ca caxi nucun ne, mon to wet ac ca na. Ma' 2 na xec nein ca mon to wet cain xirim ca pe ca ma'. ⁷To to. Maji ta, in mama' xin Judeia ta ac caparut na pain ca taxipa' urut con ca'.

⁸Taramaxicon co ca' na taxipa' capijacon Iri' Jam ac urut con na. Om ca pain homa ne pain ca to' to' mi' pin xim pain pacun quequem oro taramaxicon pain Judeia cain. Para in mao tain i cain ma ma' quem urut con.

⁹Om na ta ac caparut na. Ma' 12 na hora nein xec. Mo ta xut cain xec wari' ma', om ca xut macoru ca. Xi querec pa' ara ca pain ca toha nein xec ta. ¹⁰Mo ta xut cain xim quem, xut macoru ac ca na. Xi querec pin' ca pain ca om con naran ta naparut.

¹¹Tomi' iri naparut pain i ma' ne, tomi' tomi' tiquin' ac caparut na: Pi'am na win ma' nexi' Lázaro. Hwet ton ina. Ma' ta ho' querec ton ta naparut.

¹²Taramaxicon nuxut ac urut con na. Mo ta pi'am ca, xio pin ac ca tara ta na ca tomi' urut con ma'.

11.7 Je ca to cacama Lázaro cacam mana cowe ca quem, to nanain Judeia. **11.10** Ca' na ca tomi' ta' ca Jeju ira: Te Iri' Jam ma', wara coromicat an pe xo' nain xec nein ca mi' pin ta' ne. Pain ca om maqui' querec capa' xec nein ma', ac ca xut tain xec na. Taxi' inon Te pain ca narain ho' capa' cocon oro wari' co noc nanapa' cwa' ta na ira.

¹³ Tomi' mi' paxi' nain ca mi' pin nucun Lázaro Jeju ma'. Ane om taraju pa' urut con ne. Tomi' tarain ca pi'am nucun ma' urut con. ¹⁴ Tomi' xo' ac caparut na: Mi' pin na Lázaro ta. ¹⁵ Tomi' querec te paxi' ina pain ca om pe ho' ton pain ca mi' pin nucun quem. Xi param ara xuhu' pain ca howa mip mahu' pain ca maqui' ton Te Iri' Jam ta ac caparut na. Ame hwe e', querec iri xine pain ca ara ta' ta' con ne, howa mip ac mahu' tara ta naparut. Maji hwet xun ta ac caparut na.

¹⁶ Tomi' ac caparut na win ma' nuxut Tomé ma', Tomé co Horoman Pe na xijein wixicon ma', tomi' naparut pain ca taxipa' urut con Jeju: Maji con, ma' ta cono' wi xun ta naparut.

¹⁷ Tan' mama' ac urut na. Mon quem ac ca na Jeju.

Om na, ma' 4 pin na xec pain ca an corom pe pin cacain curucun pain manain pacun ta ac cocon na.

¹⁸ Om ca pira ca' nein Jerusalém Betânia ma'. Om ca hwet ne ca 3 ne quilômetro nein pain ca pira ca' nein ma'. ¹⁹ Je ca ma' mija caca oro win judeu urut co hwet nanam Marta cam Maria ma' quem. Quep xiho' xixim pain ca tomi' xaxa' tamana nequequem con coxa' cacama ta nanam. ²⁰ Taraju iri na Marta ne, pain ca maqui' na Jeju ta caca ma', hwet ac con na. To wet na pa'ao' coxa' cama Maria ma'. Pe cara nain xiricacam. Xut hwet ac con na Marta.

²¹ Tomi' ac con na: Taramaxicon ne. Mo xi pe main i ca' pane, om xi mi' pin ca xa' ta. ²² Mi' pin paxi' na. Ane taxi' xim pain ca ha' quem Iri' Jam pain oro carawa ca mi' ne mon con xa' ne. Mi' terem pain na ca tomi' cama ma'.

²³ E' mami' tara coxa' ma ta ac cam na.

²⁴ Taxi' ina, taxi' inon pain ca aram aram e' mami' ta' ca pain ca win pi' pin ta' ne macan' ca' ac con na.

²⁵ Om na ta Marta ac cam na. Wata' co mi' nain ca e' mami' wa. Wata' co mi' nain ca e' cara wa. Wari' co howa napa', e' ac ca tara. Mi' pin paxi' tara, e' cara tara pain pawin ta. ²⁶ Wari' co howa napa' pain ca e' e' wet nucun ma', om ta pi' ra ha' ne ca e' nucun. Howa main ca tomi' xim ca' quem Marta na ca tomi' querec cam ma'.

²⁷ Howa ina ta Taramaxicon ne ac cama na. Howa inem pain ca Cristo ma ma', pain ca Panxica Iri' Jam ma ma', pain ca mao rain macan' ta qui' quem Cote ma pane na ca tomi' con ma'.

²⁸ Tomi' iri nain i ma' ne, in ca' ac con na, mo tomi' tam xa' ta ac cama na. Mo hwet ac cam na, tomi' hohomu ac cam na: Maqui' na Taramaxicon nexi' co ca' na taxipa' capijacon Iri' Jam ta Maria ac cam na. Hap ra nem ta ac cam na.

²⁹ Taraju iri nain i ma' Maria ne, tequi' pe hap ac cama na, hwet ac con na. ³⁰ Jeju ma', om ca hwet querec cain oro xirim ca to cacama ma'. Pe pe wet nain ca mam' pe con Marta. ³¹ Oro win judeu urut co to ho' nanam Maria pain xiricam ma', co quep xiho' nanam pain ca tomi' xaxa' tamana nequem ma', querec iri nanam pain ca tequi' pe hap nequem ma' ne, pain ca hwet mao hap cama ma', ja' ja' ac cacam na. Mao tarain manain pacun ca an terem' pe cocon coxa' cama cwain nanam. Aca pe tarain i cain nanam.

³² Hwet iri non Jeju Maria ne, querec iri non ne, pe torotop mi' ac con na pain caximacon. Taramaxicon ne ac con na. Mo xi pe main i ca' pane, om xi mi' pin ca xa' ta non.

³³ Querec iri nam Maria pain ca aca cama ne. Querec iri nonon pain ca awaran caca oro wari' co ja' ja' nanam ma' ne. Xiram pa' tamana ac cacam na. Mija na ca jain jain ca cacam. ³⁴ Main ca an corom pe pe hwein curucun quem ac cacam na.

Hap ra ta Taramaxicon. Querec ra e' ac cocon na.

³⁵ Aca xoc ac ca na Jeju.

³⁶ Noro jun ta ac caca na oro wari' ma'. Om ca noc con ra nana.

³⁷ Je xi nain ho' qui' con pain ca mi' pin wa quem? Je xi quep xio qui' con quem ca' nana oro xucucun ma' quem. Win ne ca quep ma' pin cain tocon co om tocon pane nana.

³⁸ Xiram pa' mami' ac tococwa na. Mija na ca jain jain ca cocon. Xut hwet ac cain na ca an corom pe pe cacain curucun ma', pain manain pacun ma'. Ma' na wirain pacun ca mam' tao' pa' caho' cacain quem.

³⁹ Joc hwet pin jein pacun ma' ta ac ca na.

Om na ta Taramaxicon ne, cunu pin na ta ac cama na cowe ca ma', wiricam Marta ma'. Ma' 4 pin ara xi' na xec pain ca mi' pin nucun ta non.

⁴⁰ Tomi' ac cam na: Cain' cain' xima quem? Tomi' xim ne ira. Mo ta howa mapa', querec ac main tara ca hwara' opa nucun Te Iri' Jam xim ne ira nam.

⁴¹ Joc hwet pin ac cacain na pacun ma'. Noro pawin ac ca na, tomi' ac con na Cote ca: Tomi' querec te inem pain ca ha' mapa' pain ca tomi' xim

ca' Te. ⁴²Taxi' paxi' inem pain ca tama' ha' mapa' pain ca tomi' xim ca'. Ane tomi' ac i ma' xim ca' ne. Ma' ta taraju cacapa' oro wari' cwa'. Ma' ta howa cacapa' pain ca hwet roron pain macan' mapa' ca' quem na ca tomi' con Iri' Jam.

⁴³Tomi' iri non ne, merem ac ca na, merem mip na: Hwet qui' ra ta Lázaro na ca merem mip ca ma'.

⁴⁴Hwet qui' ac ca na. Wara wiric pa' nonon con wom pain caximacon pain micon pain tocon. Hot ca' jun con wom ma' ta. Xut tara e' jun ta ac tococwa na.

Ca tomi' xo' xucucun pain ca to' pa' pin xun cocon Jeju

Mateus 26.1-5; Marcos 14.1-2; Lucas 22.1-2

⁴⁵Oro wari' co hwet xim nanam Maria ma', querec iri nonon Jeju ma' ne pain ca to' e' mami' con Lázaro ma', ma' mija ac caca na co howa nonon pain ca maqui' con Iri' Jam. ⁴⁶Ma' mija paxi' nana co howa nonon ma', ane ma' caca oro xucucun co hwet nonon oro fariseu ma' ne. Tomi' hwet nonon pain ca to' e' mami' con Lázaro Jeju.

⁴⁷Cut in xijexi' ta ac xucucun na oro taramaxicon nucucun oro sacerdote cocon oro fariseu ma', tomi' cut in ac cocon na oro win taramaxicon caca ma', pain ca Sinédrio caca ma'. Cain' cain' xuxun Jeju quem ac caca na. An hwet pe tamana ara xi' nain ca hwara' opa nucun pain ca ara cain ca om ara taxi' ne ca wari' wa ta nana. ⁴⁸Mo ta miri'om xun, howa howa xam' ac cocon tara oro wari', wum co taramaxicon ta ac cocon tara. Maqui' ac caca tara oro romano, to' pa horohot pin ac cacain tara cote ne xirim ca in ac to xun Iri' Jam. To' quiji' pin ac cacapari' tara, to' em' pin ac cacain tara macaraxi' ca' quem, ac i ma' xucucun.

⁴⁹Tomi' ac ca na Caifás. Sacerdote co iri' taramaxicon na Caifás pain cara pane, pain cawaxi' nein ca om mi' pin querec ca Jeju pane. Tomi' ac ca na: Om ca taxi' camain' hwein carawa ca ara xim napari' con Jeju ta. ⁵⁰Ac ca om taraju pa' hwe a xira. Hohot napari' pain ca mi' pin xica' pe

11.47 Ma' 70 nana oro taramaxicon co cut in nana. Sinédrio nonon oro wari' pain ca cut in xucucun. Ma' na iri' taramaxicon nucucun oro sacerdote, ma' nana oro xucucun taramaxicon nucucun oro sacerdote ma' quem, ma' nana oro fariseu cocon oro saduceu ma' quem. Ac juiz nana, taraju nonon oro wari' co tomi' em' nonon oro win ma' caca, tomi' mi' tomi' mi' ac tococwa na pain ca wap wa oro wari' co em' nana quem.

ca wari' ta. Mi' pin caho' tarapari'. Ma' ta om cono' cono' pi' pin iri' pain ca judeu iri' ca', ac i ma' na ca tomi' cocon oro win ma' ca ma'.

⁵¹ Ca tomi' nucun Caifás ma', pain ca mi' pin caho' totoron oro win ma' ca Jeju ta ca ma', om ca maqui' nein ca coromicat pan nucun, om na. Wirico Iri' Jam co mi' non pain. Xi om ne ca sacerdote co iri' taramaxicon ara ca pain cawaxi' ca om mi' pin querec ca Jeju pane. ⁵² Pain ca mi' pin caho' totoron oro win ma' caca ma', om ca tomi' e' tococwa oro win judeu urut. Tomi' tata oro wari' nucun Iri' Jam co cut in toton ca ma' quem, co wawaran to nanain oro xijein macan' ma' quem. Ma' ta win ma' ne xucucun ta na. Ac ca nari xucucun tara ta na.

⁵³ Je i ma' xec nein ca tomi' an pe xo' cacain ca to' pa' pin xun cocon Jeju ma'. ⁵⁴ Je ca mo mo pe ca' cocon oro wari' Jeju ma' quem. Om ca xut mao pe mami' cain Judeia. Maji pain oro xijein cidade ca to ja' pan nain mahweri cain ac caparut na pain ca taxipa' urut con ca', hwet ac urut cocon na oro wari' co to nanain ca paric to ne xirim pain Efraim. Mon to wet ac urut pain na i cain con.

⁵⁵ Om ca pira mami' ne xec nein Páscoa, je i ma' xec nein ca tomi' querec te wi urut pain ca judeu urut ca'. Mija nana oro win judeu urut co wara mama' nanain Jerusalém. Ma' ta hohoc xo' mam' xijexi' ta nana. ^{56–57} Oro taramaxicon nucucun oro sacerdote cocon oro fariseu ma', wara tomi' nonon oro wari': Mo ta taxi' hun Jeju pain ca pe pan ca ma', na e' na pain ca tomi' hwet mi' maparut con. Ma' ta quep xut con na ca tomi' cocon ma'. Je ca pira' cocon Jeju quem. Tomi' querec ac xucucun na co to nanain ca tao' caho' nein cote ne xiricon Iri' Jam. Cain' ca coromicat hwe quem xucucun. Om ta maqui' cain ca tomi' querec te nexi' ron na ca tomi' querec xucucun ma'.

Ca ji'ao mi' camain caji towaxi' pain caximacon Jeju cowe ca Lázaro

Mateus 26.6-13; Marcos 14.3-9

12 Wixicam pin ac ne na xec nein Páscoa. Om ca pira homa ne, ma' ⁶ e' na xec nein ca hwet nein ma'. Maji ta ac caparut na Jeju ma', mama' ac urut pain na Betânia. Pe nain Betânia Lázaro ma', co to' e' mami' ca pane. ² Cao' querec te xi' con Jeju ta ac cacama na, ara ac cacamain na

11.55 Pain cara pane, pain ca tomi' querec te caca oro judeu pain xec nein Páscoa pane, na e' na pain ca hohoc xo' mam' xucucun pain com, ma' ta hohot xun Iri' Jam ta nana.

carawa ca cao' wa. Maxiram' mi' ac caparut pain na Marta. Cao' pe ho' naparut coxa' cama Lázaro ma' quem. Wirico, ma' nana xucucun wari' co cao' to ho' nanaparut pain pana ca mam' cao' to wa ma' quem. ³Maria ma' iri na ne, an ac camain na too ca ji'ao pe xine caji towaxi' ca hu xain ma'. Homain nardo na wixinain caji towaxi'. Mija na dinheiro nein quem. Ji'ao mi' ac camain na pain caximacon Jeju, xic cawain' ac camain na pain tenenequem quem. Hu xain pi' pin ac ne na tequipain xirim pain.

⁴Waraju a xirain caji towaxi' ta ac ca na win ma' nuxut Judas Iscariotes ma', co quep xiho' ton nonon oro taramaxicon pain ca quep xun cocon Jeju ma'. ⁵Je xi vender xine caji towaxi' ca' ac ca na. Cut 300 ac xine xira denário nein, mi' tiquin' ac tococwa xira pain oro wari' co om nonon carawa na ca tomi' nucun.

⁶Om paxi' na ca xiram pa' cocon co om nonon carawa Judas ma'. Tomi' ac i ma' e' na, xi om ne ca an noc xa taxipa' ara ca ta. Wirico ara xi' na co querec wet nain dinheiro nuxut, an noc xa wijimain an noc xa wijimain ac cain na quem.

⁷Ane tomi' ca Jeju ne: Je i ma' ira, to wet iri cama ma'. Miri'om ram. Wara an pe xo' ara xi' nain. Ma' ta ji'ao mi' xim capa' pain cwere pain xec nein ca aram aram an corom pe xim cacapa' pain manain pacun ta. ⁸Tama' ma' ara xi' nunuhu' oro wari' co om nonon carawa quem. To ho' cara tuturuhu' pa'ao'. Wata' iri na ne, om ta pe ho' cara xuhu' ta na ca tomi' ca ma'.

⁹Mija ac caca na oro wari' co taxi' nonon Jeju pain ca pe cain Betânia. Om ca paric camain' caca. Mo querec xun e' ac caca na, mama' ac cacain na i cain. Om ca xica' pe ca Jeju co querec xi' caca ma'. Querec xun Lázaro co to' e' mami' ca Jeju nana quem. ¹⁰Je ca to' pa' pin xun Lázaro ta caca oro taramaxicon nucucun oro sacerdote ma' quem. ¹¹Xi mija ara caca oro win judeu iri' co tomi' ha' tomi' ha' om pin nanapari' ta nana. Howa pin nonon Jeju. Xi om ne ca to' e' mami' ara con Lázaro ta nana.

Ca wa' mao cain Jerusalém Jeju

Mateus 21.1-11; Marcos 11.1-11; Lucas 19.28-40

¹²Xec pin iri na ne, taraju ac caca na oro wari' co wara mama' nanain Jerusalém ma', pain ca tomi' querec te wi xin xec nein Páscoa caca ma'.

12.3 Caji towaxi' ma', maqui' nain caximain pana. Nardo na wixinain cocon oro wari'.

Mija nana wari' ta. Om ca paric camain' caca. Taraju ac caca na pain ca wa' qui' nain Jerusalém Jeju ta caca oro xucucun wari' ma'. ¹³Ton cut qui' ac cacain na tahot, xuruxut cam' ac cocon na, merem ac caca na: In ac xun Iri' Jam ta. Tomi' querec te xun co cwa' co mam' maqui' nain ca hwara' opa nucun Iri' Jam cwa' nana. Tomi' querec te xun co cwa' co taramaxicon pe ho' napari' pain ca wari' nein Israel iri' cwa' na ca merem nucucun.

¹⁴Wara mam' nanain wijimain burro co taxipa' ca ma'. An mi' ac cocon pain na, xao pe ac cain na. Win ne ca xirao' pe xine pain capijacon Iri' Jam ma'. Ca' na ca xirao' pe nein con:

¹⁵Ta jin' hwe me ta oro wari' co to nanain Jerusalém ma'.

Taraju wet je e'!

Maqui' na Taramaxicon nuhu' ta.

Xao pe pe nain xonein wijimain burro.

Ac i ma' na ca xirao' pe xine pain capijacon Iri' Jam pane.

¹⁶Pain ca wa' mao ac i ma' cain Jerusalém Jeju ma', om ca taraju pa' hap urut pain ca taxipa' urut con ca'. Mi' pin iri na ne, e' mami' iri na ne, in hwet pin iri non Cote ca pain pawin ne, taraju pa' pin ac urut na pain oro carawa ca ara non Jeju pane. Wara xirao' pe ne con pain capijacon Iri' Jam pane ira ac urut na. Ara ara pi' pin ne con pane ira, ac i ma' na pain ca aram aram taraju pa' pin nuxut.

¹⁷Oro wari' ma', co querec nonon Jeju pain ca hwet ca' rain manain pacun ta qui' con Lázaro pane, pain ca to' e' mami' con pane, tomi' hwet tomi' hwet tiquin' ac cocon pain na oro xucucun wari'. ¹⁸Co taraju nana ma', pain ca an hwet pe ac i ma' cain ca hwara' opa nucun ma', ma' mija nana co xuruxut cam' nonon ma'. ¹⁹Wa wa ac xucucun na oro fariseu ma'. Om ca na capari' pain ca joc in pin xun Jeju cwa'. Tomi' paxi' ururun oro wari' cwa'. Ta ja' ja' hun me ta paxi' ururun. Ane om tomi' tomi' na ac xuxun ne. Noro jujun! Ja' ja' ja' ja' pi' pin nonon ta na ca tomi' nucucun.

Ca tomi' pe cain ca mi' pin ta' nucun Jeju

²⁰Mija nana wari' co wara mama' nanain Jerusalém pain ca pe torotop mi' querec te xun cocon Iri' Jam ma', je pain ca tomi' querec te wi xin

12.13 Je curucucun oro judeu pane. Ton cut iri nanain tahot ne, an hwet pe ac cacain na ca tomi' querec te nucucun pain ca to' qui' pin tococwa oro wari' co noc nonon ma', je pain ca na cocon pain ca witan ca' cocon quem.

cacain xec nein Páscoa ma' quem. Ma' nana co om judeu nana co ja' ja' nonon quem. Ma' ta pe torotop mi' querec te xun Iri' Jam pain oro xec nein ca tomi' querec te nucucun oro judeu cwa' nana. ²¹ Mo hwet ac cocon na Filipe ma', co wari' nein Betsaida pain Galileia ma'. Querec xuxun Jeju na urut ta ac cocon na.

²² Na ra ac ca na Filipe, mo hwet ac con na André ma'. Querec xuxun Jeju na urut ta nana caram cwa' ta ac con na. Tomi' hwet xun cocon e' ac caca na, mo hwet ac cocon na quem.

²³ Tomi' xo' ac tococwa na: Maqui' pin ta' iri napa' xec nein ca mi' pin ta' ne ca'. An hwet mi' ac cuhu' tara pain ca hwara' opa ne Te Iri' Jam. An hwet mi' turuhu' pain ca hwara' opa ne ca', pain ca Iri' Wari' ta' ca'. ²⁴ Je ca tomi' xuhu' ca', tomi' iri'o' inuhu' ta ac tococwa na. Noro jein tocwi trigo ma'. Mo ta oin' xine, memerem ac ne na, ac ca mi' pin ne na quem. Mo ta om oin' xine pain macan' ma', mo ta om memerem maram mao ne taparinain ma', to wet xica' pe cara ac ne tara tocwi. Mo ta memerem maram mao ne taparinain, mi tamana ac ne tara tocwi. ²⁵ Win ca wari' co win xumu e' nain ca param pan nucun pain macan' ca'. Om ta e' cara pe cain pawin ta. Wari' co om win xumu nain ca param pan nucun pain macan' ca' iri na ne, aram aram maqui' pa' ac con tara xec nein ca om pi' ra ha' ne ca e' nucun pain pawin. ²⁶ Wari' co taramaja mi' xim napa' ma', na e' na pain ca ja' ja' cara capa'. Oro ca mao ne ca', je tara ca mao ca quem, pe ho' tarapa' quem. Wari' co taramaja mi' napa' ma', tomi' querec te ac tocwa tara, hohot ma ta ac tocwa tara. Wirico Te tara co hohot ma pan ton non ta na ca tomi' tococwa ma'.

²⁷ Toron tamana napa' xumu pain xocori ca' ac tococwa na. Cain' cain' xiton Te quem? Tomi' ca' xiton ra? Nain ho' ne pain ca jain jain ta' ne ca', pain ca to' i'ina xim capa' carawa ca maqui' pa' xim napa' ca' Te, ca' xiton ra? Om ca na ne pain ca tomi' ac i ma' ton ta. Xi jain jain ta' ara ta' pane ta. To' i'ina tarapa' carawa ca maqui' pa' xim napa'. Je ca maqui' tain macan' ca' na ca tomi' tococwa ma'. ²⁸ An hwet pe rain ca hwara' opa nem pain ca awi tamana nem ta Te ac ca na quem.

Taraju ac urut pain na ca tomi' wa ma'. Maqui' nain pawin. Wara an hwet pe inain ca hwara' opa ne pain ca awi tamana ne ca' na. An hwet pe mami' ac tain tara quem. Ac i ma' na ca tomi' wa ca maqui' nain pawin.

²⁹ Taraju nanain oro wari' co to nanain i ma' quem. Comerem ta nanain.

Om na, wirico jam co taramaja mi' non Iri' Jam ma', wirico co tomi' non ta ac caca na oro xucucun ma'.

³⁰ Ane tomi' pan ca Jeju ne: Co tomi' ma' ne, om paxi' na ca tomi' capa'. Tomi' pan nuhu'. Ma' ta howa hwe nuhu'. ³¹ Maqui' pin na xec pain ca tomi' xun tococwa oro wari' co om howa nana ma', pain ca em' hwe, mama' jein cote ne xe ta xun tococwa ma'. Xin hwet pin ac tocwa tara Caxicon Jam co taramaxicon pe ho' nonon quem. ³² An piri' ca' iri tatarapa' pain macan' ne, pain ca an piri' xat xim cacapa' pain pana ma', howa xine howa xine xam' ac toton tara oro wari' ta na ca tomi' ca ma'.

³³ Pain ca tomi' ac i ma' ca ma', pain ca an piri' xat tatarapa' pain pana ca ma', tomi' mi' nain ca mi' pin ta' nucun pain ca tatatain mi' xun cocon pain pana.

³⁴ Tomi' ac caca na oro wari': Ca' na ca tomi' capari' ca xirao' nucun Moisés: Om ta pi' ra ha' ne ca e' nucun Cristo ta na. Je ca tomi' querec urut pum ca': Para tomi' ac i ma' ma ma', pain ca na e' na pain ca an piri' xat tocwa pain pana co ma' co Iri' Wari' ma' quem? Ma' tara ca mi' pin ac ca co Iri' Wari' ma' quem? Cain' ca wari' ca co Iri' Wari' ma ma' quem na ca tomi' querec cocon ma'.

³⁵ Tomi' ac tococwa na: Pe ho' pe ho' wet paxi' inuhu' pain ca ac iri' naran ta' ca'. Ane om pe ho' cara xim xuhu' ne. Toha mi' xut pain xumuxut ta xine pain ca pe ho' pe ho' wet xuhu' ca'. Ma' ta taraju pa' hwe inuhu'. Ma' ta om ane ane hwet pa' cuhu' ca jitacat nein ta inuhu'. Wari' co xut nain ca jitacat nein ma', om ca taxi' cain ca mao ta' nucun. ³⁶ Howa xine pain ca ac iri' naran ta' ca', pain ca pe ho' pe ho' wet xuhu' ca'. Ma' ta an xiho' mahu' pain ca ac iri' naran ta' ca' quem inuhu' ta na ca tomi' tococwa ma'.

Ca om howa caca oro win judeu urut

Tomi' iri nain i ma' Jeju ne, mao ac ca na, pe ni ca' ac tococwa na oro wari'. ³⁷ Querec paxi' nonon pain ca an hwet pe tamana cain ca hwara' opa nucun pain ca ara tamana cain ca om ara taxi' ne ca wari' wa ma'. Ane ma' mija caca co om howa nonon ne. ³⁸ Om ca howa cocon Jeju. Ma' ta hwet pin ne ca wara tomi' pe ca profeta Isaías cara pane. Ca' na con pane:

Om nana wari' co howa nanaparut pain ca pijim'
nuxut ca' Taramaxicon ne.

Om nana wari' co querec pin' nenem pain ca hwara' opa nem quem. Ac i ma' na ca xirao' pe ca Isafás cara pane. ³⁹Xi na cocon pain ca howa wa ta. Ma' ara xi' na wirain ca xirao' pe nucun Isafás quem. Ca' na con:

⁴⁰To' om pin nain tococon Iri' Jam.

To' opain pin nain ximicocon quem.

Ma' ta om querec pin' cacapa' na.

Ma' ta om taraju pa' cacapa' na.

Ma' ta om in hwet cacapa' na.

Je ca om na capa' pain ca quep xiho' toton ca' na ta.

Ac i ma' na ca xirao' pe xine capijacon Iri' Jam pane.

⁴¹Xirao' ac i ma' na Isafás pane. Xi om ne ca wara querec ara cain ca hwara' opa nucun Jeju pain ca awi tamana nucun ta. Tomi' hwet ac cain na quem.

⁴²Oro taramaxicon nuxut pain ca judeu urut ca', om paxi' na ca howa howa pi' pin cocon Jeju pain ca maqui' con Iri' Jam. Ane ma' mija caca co howa pin nonon ne. Howa paxi' nonon. Ane om tomi' hwet pin cacain ca howa nucucun ne. Xi jin' ara cocon oro fariseu ta. Mo ta taxi' cacapari' pain ca howa pin xun Jeju cwa', mana' hwerehwet pin ac cacapari' tara, om ac ne tara ca corom mami' xin xirim ca cut in to xijexi' ca' nana.

⁴³Coromicat ac i ma' nana. Om ca param homa cacain ca tomi' querec te nucun Iri' Jam. Param tamana pan nanain ca tomi' querec te nucucun oro wari' ta.

Ca wap xun tococwa co om howa nanain ca tomi' nucun Jeju

⁴⁴Merem ac ca na Jeju, merem mip na: Wari' co howa napa' ma', om ca howa e' capa'. Howa non Te co hwet roron oro wari' ta napa' quem.

⁴⁵Wari' co querec napa' ma', querec ac con na Te co hwet roron oro wari' ta napa' quem. ⁴⁶Ac naran ina pain ca maqui' tain macan' ca', toha mi' inonon pain ximicocon oro wari'. Ma' ta om to cara cacain ca jitacat nein oro wari' co howa nanapa' ta ina. ⁴⁷Mo ta om tomi' ha' capa' wari' co taraju napa' pain ca tomi' hwet tain capijacon Te ca'. Om paxi' na ca wata' ne co tomi' em' non pain ca caracat nucun. Xi maqui' ta' pain ca tomi' em' toton ta' oro wari' ta. Maqui' ina, ma' ta to' witan toton oro wari' ta ina.

⁴⁸Wari' co tomi' in pin napa' ma', co om howa nain oro ca tomi' ne ca', ame hwe e'. Aram aram mam' pe wet tarain oro ca tomi' ne pain xec nein

ca pi' pin ta' ne macan' ta. Tomi' ac xucun tara: Je xi howa tain oro ca tomi' nucun pane ac xucun tara, querec pin' ac xucun tara pain ca na e' ne pain ca mao cain cote ne xe. Ac i ma' tara ca ac juiz ne oro ca tomi' ne ca', pain ca to' querec pin' ton con pain ca caracat nucun ta. ⁴⁹Xi maqui' nein ca coromicat ne oro ca tomi' ne ta. Maqui' non Te co hwet roron oro wari' ta napa'. Wirico co tomi' mi' napa' pain oro ca tomi' ne. Wirico co mi' napa' pain ca pijim' ne. ⁵⁰Pijim' e' inain ca pijim' ra capa' Te. Xi taxi' ara tain i ca' ta: Oro ca tomi' ne ca pijim' ra capa' ca', mi' nain ca e' cara wa pain pawin ta na ca tomi' ca ma'.

Ca hohoc cain caximaxut Jeju

13 Wixicam pin ac ne na xec nein Páscoa ma', je i ma' xec nein ca tomi' querec te wi urut pain ca judeu urut ca'. Taxi' pin xucun Jeju pain ca maqui' pin ne xec nein ca paca' pin tain cain macan' ca', pain ca in hwet ton con Cote ca. Jeju ma', om ca noc camain' caparut pain ca wari' ne caparut pain macan' ca', je curucun mao na. Je ca an hwet mi' ho' xuhu' pain ca om noc camain' xuhu' ca' naparut.

²Irawin cao' ac urut na. Judas ma', panxica Simão Iscariotes ma', wara coromicat ca' na quem: Quep xiho' toton oro taramaxicon pain ca quep xun cocon Jeju ta na. Tomi' mi' toton con ta na. Wirico Caxicon Jam co mi' non pain ca coromicat ac i ma' nucun. ³Ane wara tomi' con Jeju Cote ca ne: Wum co iri' Taramaxicon. Taramaxicon pe ho' rain oro carawa cocon oro wari' quem ta non. Taxi' nain i ma' Jeju quem. Taxi' xucun pain ca maqui' con Iri' Jam, taxi' xucun pain ca in hwet ton con quem. ⁴Je ca tequi' pe ca ma'. Hot ac con na iri' curucun womicon, an ac con na toalha, tucu pan ac xucun na pain ximijacon. ⁵Hohoc tain caximahu' ta ac caparut na pain ca taxipa' urut con ca'. Ji'ao mi' nain com pain bacia, hohoc ac cain na caximaxut, xic pin ac cocon na con toalha co tucu pan xucun pain ximijacon.

⁶Wara ca' na Simão Pedro ma', tomi' querec pan ac con na Simão Pedro: Hohoc tain caximam mapa' ra Taramaxicon ne non.

13.5 Hohoc tain caximahu' ta iri nonon co taxipa' ca Jeju ne, he pan ac caca na. Xi ma' ca taramaxicon co hohoc nain caximacocon oro win ma' ca pane ta. Ane taramaja mi' pan xuhu' ta tococwa co taxipa' ca ne. Ac i ma' na ca an hwet pe mi' tococwa pain ca om xec xec nucun.

⁷Om paxi' na ca taraju pa' ma pain carawa ca ara ta' pain xocori ca' Simão Pedro ac con na. Ame ma e', main taraju pa' ra ta non.

⁸Om na ta, om ca na camain' ne pain ca hohoc main caxima ta ac ca na Pedro.

Om na ta Pedro ac con na. Mo ta om hohoc tain pum, om ca taxipa' ac mapa' ta non.

⁹Na ra ac ca na. Ta hohoc e' main caxima me ta Taramaxicon ne. Hohoc rain mu je wina ca' quem ac con na.

¹⁰Om na, wari' co wara ja' com ma', om pin na homiricon. Na e' na pain ca hohoc e' xine caximacon ta ac con na. Awi paxi' hwe, om pin paxi' na homuruhu' pain xumuhu' ma'. Ane ma' xica' pe cuhu' co homuru cara pain ximicon ma' ne ac caparut na.

¹¹Ma' xica' pe nuhu' co homuru cara ta naparut Jeju. Xi om ne ca taxi' ara con win ma' nuxut co quep xiho' toton nonon oro taramaxicon pain ca quep xun cocon ma'.

¹²Hohoc pin iri nain caximaxut ne, pe mami' ac con na iri' curucun womicon, xao pe mami' ac cain na maxicon pain pana ca mam' cao' to urut ma'. Tomi' querec ac caparut na: Taraju pa' mahu' pain carawa ca ara mi' xuhu' ca' ne? ¹³Tomi' iri mahu' ne, Taramaxicon co ca' na taxipa' naparut pain capijacon Iri' Jam ta ac mahu' na. Taramaxicon ne ac mahu' na quem. Hohot na, tomi' xo' mahu', xi wata' ara ne co ca' na taxipa' nuhu' pain capijacon Iri' Jam. Wata' co taramaxicon pe ho' nuhu' ca' quem. ¹⁴Je ca tomi' xuhu' ca' ac caparut na. Noro xine. Taramaxicon pe ho' paxi' inuhu'. Ca' na paxi' inuhu' pain capijacon Te quem. Ane om xec xec ta' ne. Xiram pa' inuhu'. Quep xiho' inuhu'. An hwet mi' inuhu' pain ca om noc xuhu' pain ca hohoc tain caximahu' ca' ne. Je ca na e' ne pain ca an xiho' mahu' pain ca om xec xec ne ca' quem. Quep xiho' xujuhu', am hohoc mi' xujuhu' pain caximahu' ma' quem. ¹⁵Win ta' ca', ac i ma' tara ca ara mi' xujuhu' quem. ¹⁶Je ca tomi' xuhu' ca', tomi' iri'o' inuhu': Om ca hwara' opa tiquin' ca' mahu' pain ca taramaja mi' mahu' ma'. Win ca wari' co taramaja mi' e' non taramaxicon nucun ma', om ca hwara' opa tiquin' ca' con taramaxicon nucun. Win ca wari' co an xin tiquin' nain ca tomi' nucun wari' co tomi' hwet rain ta non ma' quem, om ca hwara' opa tiquin' ca' con co tomi' hwet rain ta non quem. ¹⁷Je ca tomi' xuhu' ca', taraju pa' pin hwein ca tomi' xuhu' ca': Mo ta tomi' ha' mahu', param mi' ac cuhu' tara pain ca awi wa Te Iri' Jam ta na ca tomi' caparut.

¹⁸Pain ca tomi' xuhu' ne, pain ca param mi' turuhu' pain ca awi wa Iri' Jam ta xuhu' ca', om ca tomi' tomi' xam' xuhu' ta ac caparut na. Xi querec pin' ara xuhu' pain ca xo' tora' qui' xuhu' pane. Querec pin' inain ca coromicat nuhu'. Ane tora' pan xuhu' pane ne. Ma' ta hwet pin ne capijacon Iri' Jam ca xirao' pe ca taramaxicon Davi cara pane, pain ca xirao' pe cain ca tomi' pan ne pane. Ca' na ca xirao' pe nucun pata': Noc pin napa' win ma' ne co cao' pe ho' napa' ma', ac i ma' na ca xirao' nucun pata' pane. ¹⁹Wara tomi' hwet inuhu' pain ca noc pin xim capa' ma', pain ca om noc querec capa' ma'. Ma' ta howa mahu' inuhu'. Noc pin iri tarapa' ne, howa ac mahu' tara pain ca wara tomi' hwet xuhu' ca', pain ca wata' ne co taramaxicon co wara tomi' pe ca Te Iri' Jam xuhu' ca'. ²⁰Je ca tomi' xuhu' ca', tomi' iri'o' inuhu' ta ac caparut na. Wari' co tomi' querec te non co hwet roron oro wari' ta ta' cwa', tomi' querec te napa' quem. Wari' co tomi' querec te napa' ma', tomi' querec te non co cwain co hwet roron oro wari' pain macan' ta napa' quem na ca tomi' caparut pane.

Ca tomi' hwet cain wixicon co taxipa' ca co noc pin ton non ma'

²¹Tomi' iri nain i ma' Jeju ne, toron tamana ac ne na ximicon. Tomi' ac caparut na pain ca taxipa' urut con ca': Ma' napari' co quep xiho' toton nonon co noc nanapa' ma', co quep xim nanapa' ma' naparut. Win ma' nuhu' ta naparut. Tomi' iri'o' inuhu', tomi' mi' tarapa' cocon co noc nanapa' ta naparut.

²²Noro ac xujuxut na. He! Ma' co tomi' ca ne ta ac urut na.

²³Iri' win ma' ne napa' Jeju. Xao pe ja' pan inon. ²⁴Xiximi' ac capa' na Pedro ma'. Ma' co tomi' ma quem ron ta napa'.

²⁵Joc tomi' ac ton na Jeju. Taramaxicon ne, ma' co tomi' ma ma' quem inon.

²⁶Om na, xin cam tain wijimain capam' pain too ca mam' cao' wa ca'. Wari' co mi' ta' ta' pain, wirico co tomi' ta' ne ac capa' na. An ac cain na wijimain capam', xin cam ac cain na, mi' ac con na pain Judas ma', panxica Simão Iscariotes ma'. ²⁷Cao' pin iri nain Judas ne, corom hwet pin ac con na Caxicon Jam quem. Tomi' ac con na Jeju: Ara hap rain ca ara ta' ma ma' na ca tomi' con ma'.

²⁸Warut pain xao to urut pain pana ca mam' cao' to wa ma', om ca taraju pa' urut pain ca tomi' nucun Jeju. Para tomi' ac i ma' con Judas

cara ne urut. ²⁹Ma' nana oro win ma' nuxut co coromicat ca' nana: Om na, mo cut rain carawa nein ca tomi' querec te nexi' ta non. Tara, am mi' roron pain carawa co om nonon carawa con, je tara con, ac i ma' na ca coromicat nucucun. Xi wirico ara ca Judas co querec wet nain dinheiro nuxut ca mi' urut cocon oro wari' co xiram pa' urut ta.

³⁰Cao' pin iri nain capam' Judas ma' ne, hwet mao hap ac ca na. Wara xim pin na quem.

Ca tomi' nucun Jeju ca tomi' ha' je capari' ca'

³¹Hwet mao iri na Judas ne, tomi' ac caparut na Jeju: Maqui' pin napa' xec nein ca an hwet pe pin tain cain ca awi ne Te ta. Querec pin' tatarapa' oro wari' quem. Querec pin' tatarapa' pain ca hwara' opa ne pain ca awi tamana ne ca', pain ca Iri' Wari' ta' ca'. Querec pin' totoron Te Iri' Jam pata' quem. Querec pin' totoron pain ca hwara' opa nucun pain ca awi tamana nucun quem. ³²Querec pin' iri totoron pain ca hwara' opa nucun pain ca awi nucun pata' ne, an hwet pe pan ac cain tara ca hwara' opa ne pain ca awi tamana ne ca' quem, pain ca Panxita' capa' ca' quem. Om ta om om ne, an hwet pe ho' tarain pata' ta na.

³³Pe ho' wijimain ca' e' xuhu' ta hwijima' ac caparut na. Pirao' xun paxi' mahu'. Om ta hwet ac mahu' pain ca mao ta' ta' quem. Win ne ca wara tomi' xo' toton oro taramaxicon nexi' pain ca judeu iri' pane. Tomi' ac i ma' inuhu' pain xocori ca' quem.

³⁴Je i ca' xocori ca tomi' ne ca tomi' ha' je xuhu' ca' ac caparut na. Ta noc camain' xujuhu' me ta. Win ne ca om noc camain' xuhu' ca', ac i ma' tara ca om noc camain' xujuhu' quem. ³⁵Mo ta om noc camain' xujuhu', querec pin' querec pin' pi' pin ac cucuhu' tara oro wari' pain ca taxipa' mahu' ma' na ca tomi' caparut ma'.

³⁶Tomi' querec ac con na Pedro: Main ca mao ta' ma ma' quem Taramaxicon ne ac con na.

Om na ta Pedro ac ca na. Ca mao ta' ta' ca', om ca mao ac ma pain xocori ca'. Ame ma e', main maqui' tara xec nein ca hwet xim mapa'. Hwet ac mapa' tara ta non.

³⁷Tomi' querec mami' ac con na Pedro: Para om hwet ac xim pain xocori ca' quem Taramaxicon ne? Mo ta to' pa' pin xun cacapa' pain ca hwet xim ta' ca'. Je i ma' ira, to' pa' ma' tatarapa' pum ne ac con na.

³⁸Iri'o' tara pum ra ac con na Jeju. Ame ma e' Pedro. Om ta aca querec ca me pain ca xec pin ta' ne ca', wara tomi' ac momon tara oro wari': Om ca querec pin' ton ta ac momon tara pata', ma' 3 tara ca tomi' ac i ma' toton ma quem. Tomi' iri'o' inem ta Pedro na ca tomi' con ma'.

Jeju co Iri' Wanaxicon Iri' Jam

14 Ta toron ne xumuhu' me ac caparut na. Howa jun Iri' Jam, howa xine quem. ²Pain xiricon Te pain pawin cain, ma' mija na oro ca to pan xi' hwe cain. Mo xi om iri'o' ne, om xi tomi' hwet xuhu' pain. Wara ara xo' tain ca to pan xi' hwe ta. ³Mao iri ta' ne, ara xo' ac tain tara ca to xi' nuhu', in qui' ac ta' tara, cut mama' ac xuhu' tara pain i cain quem. Ma' ta to ho' cara mahu' pain ca pe pan ta' pain i cain inuhu' ta. ⁴Querec pin' hwein wana ca ac ta' ta' pain ca mao ta' ta' ca' quem ac caparut na.

⁵Tamaxicon ne ac con na Tomé. Om ca taxi' urut pum pain ca mao ta' ma ma' quem. Cain' xi querec pin' ac urut pain wana ca ac ta' ma ma' quem na ca tomi' con ma'.

⁶Om na, wata' co Iri' Wanaxicon Te Iri' Jam pan cwa' ta ac ca na Jeju. Wata' co an hwet mi' nuhu' pain ca iri'o' wa con. Wata' co mi' nuhu' pain ca e' cara wa quem. Xica' pe ina pain ca mi' taxi' xuhu' pain ca hwet hun Te ta. Om na xucun. ⁷Mo xi querec pin' iri'o' mahu', querec pin' ac hun xira Te quem. Ane querec pin' pin hun pain xocori ca' ne. Querec hun quem, ac i ma' na ca tomi' caparut ma'.

⁸Tamaxicon ne ac ca na Filipe. An hwet mi' xut con Cote ma quem. Je ca param urut ca', om na xijein carawa ca param urut ca' na ca tomi' con ma'.

⁹Cain' cain' xima quem Filipe ac ca na Jeju. Pain cara pane ca pe ho' xuhu' ca'. Om ca querec pin' querec mapa' ra? Wari' co querec napa', querec ac con na Te. Para an hwet mi' xut con Cote ma mapa' ma' quem? ¹⁰Om ca howa mapa' pain ca win cwere ton Te ra? Om ca howa mon pain ca win cwere pan capa' quem ra? Oro ca tomi' ne ca tomi' xuhu' ca', om ca maqui' nein ca coromicat ne. Maqui' non Te co pe ho' napa'. Oro ca tomi' ne ca', oro ca ara ne ca' quem, wirico Te na co tomi' pan nain. Wirico co ara pan nain quem. ¹¹Howa xine pain ca tomi' xuhu' ca': Win cwere inon Te. Win cwere napa' quem. Mo ta om howa mahu' pain ca taraju hwein ca tomi' ne ca', je xi howa mahu' pain ca querec hwein oro

ca ara ne ca' quem? ¹²Je ca tomi' xuhu' ca', tomi' iri'o' inuhu': Mo ta howa mahu', ara ac hwein tara oro carawa ca an xiho' nain ca ara ta' ca'. Hwara' opa tiquin' tamana tara oro ca ara xi' hwe quem. Xi om ne ca hwet ton ara ton Te ta. ¹³Oro carawa ca mi' xut pain hun Te ma', pain ca an hwet mi' hun pain wuxu pain ca mi' naparut pain ca tomi' urut pum ca' hun pata', ara mi' ac xuhu' pain tara. Ma' ta an hwet mi' xuhu' pain ca hwara' opa nucun Te pain ca awi tamana nucun ta inuhu'. ¹⁴Ara mi' xuhu' pain oro ca mi' xut pain hun ma', pain ca an hwet mi' hun pain wuxu pain ca mi' naparut pain ca tomi' urut pum ca' hun pata' na ca tomi' caparut ma'.

Ca mi' xuhu' pain Tamataracon Te ta caparut Jeju

¹⁵Mo ta om noc mahu', tomi' ha' ac mahu' tara pain oro ca ara je xuhu' ca' ac caparut na. ¹⁶Tomi' ac ton tara Te pahu': Mam' roron con xucun co quep xiho' toton nonon, ac i ma' tara ca tomi' ton pahu'. Mam' ac cuhu' con tara. Pe ho' cara ac cuhu' tara quem. ¹⁷Mam' turuhu' pain Tamataracon. Je tara Tamataracon ca an hwet mi' nuhu' pain oro ca iri'o' wa con Te Iri' Jam. Om ca mi' ac tococwa pain Tamataracon Te oro wari' co om howa nanapa' ma'. Xi querec cacain ta. Om ca querec pin' camain' cacain. Wahu' iri na ne, querec pin' hwein. Xi om ne ca pe ho' ara cuhu' ta. Win cwere turuhu' quem.

¹⁸Paca' xuhu' paxi' inuhu', ane om ximin xi' hwe ne. Ame hwe e', in hwet ac xuhu' tara ta. ¹⁹Om ta pain homa ne, om ac ne tara ca querec mami' cacapa' co om howa nanapa' ma'. Wahu' iri na ne, querec mami' ac mahu' tara. Om ta pi' ra ha' ne ca e' nuhu' ta. Xi pi' ra ha' ne ca e' ne ca' quem. ²⁰Maqui' iri tara xec nein ne, pain ca querec mami' xim mahu' ma', taxi' pin ac mahu' tara pain ca win cwere ton Te cwa', je pain ca win cwere mahu' quem, je pain ca win cwere xuhu' ca' quem.

²¹Mo ta taraju pa' hwein capiija ca tomi' ha' je xuhu' ca'. Mo ta tomi' ha' mahu' quem. Querec pin' ac xihwe tara pain ca om noc mahu' ma'. Mo ta om noc mahu', om ta noc cuhu' Te. Wata' quem, om ta noc xuhu',

14.12 Hwara' opa tiquin' tamana tara oro ca ara xi' hwe quem iri na Jeju ne, tomi' napari' pain ca tomi' xo' xuxun oro wari' pain ca howa tocwa quem. Na napari' pain ca tomi' xo' xuxun pain capiijacon Iri' Jam. Xi om ne ca in hwet ara con Cote ca pain pawin pane. Xi om ne ca mam' ara capari' pain Tamataracon quem. Je Tamataracon ca mi' napari' pain ca hwara' opa wa. **14.19** Jeju ma', tomi' mi' nain Tamataracon Cote ca. Ac ca querec xun Jeju tara pain ca ma' capari' Tamataracon Cote ca.

an hwet pe ac xije tara pahu', mi' ac xuhu' tara pain ca querec pin' mahu' pain iri' xumuhu' ma' quem na ca tomi' caparut ma'.

²² Tomi' querec ac con na Judas ma', xucun Judas, om na Judas Iscariotes: Cain' cain' xima quem Taramaxicon ne? Para mi' e' xim maparut pain ca querec pin' urut pum pain iri' xumuxut quem? Je xi mi' momon pain ca querec pin' quequem oro xucucun wari' co om howa nenem quem na ca tomi' querec con ma'.

²³ Om na ta Judas ac con na. Wari' co om noc napa' ma', tomi' ha' ac cain tara ca tomi' ne. Te ma', om ta noc con quem. Wata', Te quem, hwet ac xut con tara, to ho' ac xut con tara quem. ²⁴ Wari' co noc napa' ma', om ca tomi' ha' cain ca tomi' ne. Oro capija ca tomi' xuhu' ca', om ca maqui' nein ca coromicat ne. Maqui' pan non Te co hwet roron oro wari' napa' ta naparut.

²⁵ Tomi' hwet inuhu' pain capija ca', pain ca pe ho' pe ho' wet xuhu' ca' ac caparut na. ²⁶ Ane maqui' ta' ne Tamataracon Te ca quep xiho' xim nuhu' ne, ame hwe e'. Wirico Te tara co mam' xim nuhu' pain. Pe rain maxicon Panxita' ta tarain. Ma, maqui' ac ne tara, tomi' xo' tomi' xo' pi' pin ac cuhu' tara pain oro ca iri'o' wa con Te Iri' Jam. Mam' pe wet ac cuhu' tara pain oro ca tomi' xuhu' ca' quem. ²⁷ Pain ca paca' xim xuhu' ca', to' om pin tain ca toron ne xumuhu' pa'ao'. Wata' tara co mi' nuhu' pain. Om ta ac pain ca om toron ne ximicocon oro wari' co om howa nanapa' ma', om tara. To' om iri'o' tain ca toron ne xumuhu'. Je ca tomi' xuhu' ca': Ta toron ne xumuhu' me. Ta jin' hwe me ta. ²⁸ Wara taraju mahu' pain ca tomi' ca' xuhu' pane: Mao ta' paxi' ina, ane in hwet xim xuhu' ne, pe ho' ac xuhu' tara, ac i ma' na ca tomi' xuhu' pane. Mo xi om noc iri'o' mahu', tomi' querec te ac mahu' xira pain ca hwet ton ta' Te co taramaxicon hwara' opa tiquin' ca' napa'. ²⁹ Wara tomi' hwet inuhu' pain ca om mao querec ta' ca'. Ma' ta howa mahu' ta inuhu'. Mao iri ta' ne, howa ac mahu' tara pain ca tomi' iri'o' ta' ca'. ³⁰ Om ta momon tomi' tomi' tiquin' xuhu' pain xocori ca' quem, xi ma' ara ne carawa ca ara xim napa' ca'. To' quiiji' pin xim paxi' napa' Caxicon Jam co taramaxicon pe ho' nonon oro wari' pain macan' ca', ane om na con pain ca to' quiiji' pin capa' ne, xi taramaxicon pe ho' capa' ta. ³¹ Ane na e' ne pain ca tomi' ha' tomi' ha' pi' pin tain oro ca ara ra capa' Te ne, pain ca mi' pin ra capa' ca'. Mi' pin ta' pan ina pain ca tomi' ha' ton ca'. Om ca nain ho' xije. Ma' ta taxi' cacapa' oro wari' pain ca om noc ton ca' naparut.

Tequi' to je e'. Maji mama' xi' ta ac caparut na.

Jeju co Iri' Panaji Uva

15 Wata' co Iri' Panaji Uva ta ac caparut na. Te iri na ne, wirico co querec wet nain panaji uva. ²Wari' co querec wet nain panaji uva ma', ton tapiripit taxipa' nain taparain ca om wina. Taparain ca wina ma', wawac wijimain pin ac cain na. Ma' ta wina tamana ne nain. ³Wara an xiho' hwein oro taparain panaji uva ca wina ma'. Xi howa ara hwein capija ca pijim' mi' xuhu' ca'. ⁴Win cwere cara xine, win cwere cara ac xuhu' tara quem. Win ne ca wina e' ne taparain pana pain ca win cwere cara nein panaji ma'. Ac i ma' hwe quem. Mo ta om win cwere mahu', om ac ne tara ca xuruxut xo' hwe pain ca om an hwet pe hwein ca howa nuhu' quem.

⁵Wata' co Iri' Panaji Uva. Wahu' co taparain nana ma' quem. Wari' co win cwere napa' ma', wari' co win cwere ta' ma' quem, ac ca wina tamana ca tara pain ca xut xo' ca pain ca an hwet pe cain ca howa nucun. Je ca tomi' xuhu' ca': Mo ta om xuhu', om ca ara ac hwein ca awi wa ta. ⁶Wari' co om win cwere napa' ma', ac taparain panaji uva ca om wina ma', ca xin pin wa ma', ca mi' pin ma'. Oro taparain panaji uva ca cono' ac i ma' ma', cut in ac xine na, wixicaracao' mi' ac xine na pain xe ma', wiran mao ac ne na quem. ⁷Mo ta win cwere cara mahu', mo ta to ho' cara cuhu' oro ca tomi' ne quem, na ac cuhu' tara pain ca tomi' hun Te ma', pain ca mi' xut hun pain oro carawa ca param hwe ma'. Mi' mi' pi' pin ac cuhu' pain tara quem. ⁸Mo ta ara hwein oro ca hohot non Te ma', querec pin' ac cocon tara oro wari' pain ca hwarar' opa nucun pain ca awi tamana nucun. Ac i ma' tara ca an hwet pe hwein ca taxipa' mahu' ma' quem na ca tomi' caparut.

15.2 Tomi' mi' tata oro wari' co howa paxi' nonon Jeju ma', co om xuruxut xo' nana pain ca om an hwet pe cacain ca howa nucucun. Ac ca ton tapiripit tococwa na. Pain ca horohot ca' tococwa pain oro carawa ca to' i'ina nonon oro co xuruxut xo' nana pain ca an hwet pe cacain ca howa nucucun ma' iri na ne, ac ca an xiho' capari' na pain ca wawac wijimain pin xin oro taparain panaji laranja ca', ac je na ca tomi' ca ma'. Wawac wijimain pin irin taparain panaji laranja, ma' ta mi tamana ne winain ta iri'. Ac i ma' napari' Iri' Jam pain ca xuruxut xo' iri' pain ca an hwet pe xin ca howa nexi' quem. Ac ca wawac wijimain capari' na, ac ca horohot ca' capari' pain na oro carawa ca to' i'ina napari'.

⁹Om ca noc camain' xuhu' ta ac caparut na. Win ne ca om noc camain' capa' Te ma'. Je ca tomi' xuhu' ca': Win cwere cara xine. Ma' ta querec pin' mahu' pain ca om noc camain' xuhu' ca'. ¹⁰Mo ta tomi' ha' mahu' pain oro ca ara je xuhu' ca', om ac ne tara ca noc xuhu' ta. Win ta' con Te cwa', tomi' ha' inon pain oro ca ara ra capa', om ac ne na ca noc capa' quem. ¹¹Tomi' ac i ma' inuhu', ma' ta tomi' querec te hwe inuhu'. Win ne ca tomi' querec te ta' ca', ac i ma' tara ca tomi' querec te nuhu' quem. Tomi' querec te tamana ac hwe tara ta. ¹²Tomi' ha' xine pain ca tomi' ca' xuhu' ca': Ta noc camain' xujuhu' me. Win ne ca om noc camain' xuhu' ca', ac i ma' tara ca om noc camain' xujuhu' ta. ¹³Wari' co mi' pin caho' nonon oro win ma' ca ma', querec pin' ac tocwa na pain ca om noc camain' cocon. Om na xucun wari' co an xiho' non pain ca om noc cocon ma'. ¹⁴Mo ta tomi' ha' mahu' pain oro ca ara je xuhu' ca', querec pin' ac xihwe tara pain ca win ma' ne mahu' ma'. ¹⁵Om ca querec querec ac wari' co taramaja mi' e' nonon taramaxicon nucucun mami' mahu', om na. Querec querec ac oro win ma' ne pin mahu'. Oro win ma' ne pin xuhu' ca' ira. Wari' co taramaja mi' e' non taramaxicon nucun ma', om ca taxi' cain ca ara ta' nucun taramaxicon nucun. Wahu' iri na ne, oro win ma' ne pin inuhu', xi tomi' hwet tomi' hwet pi' pin ara xuhu' pain oro ca tomi' capa' Te ta. ¹⁶Om ca wahu' ne co tora' pan napa' pain ca taxipa' xun mahu' ma', om na. Wata' pan co tora' nuhu'. Mi' inuhu' pain ca taramaja wa quem. Wawaran mama' je, pijim' mi' jujun pain capiija oro wari' ta inuhu'. Howa cara ac caca tara co howa nanapa' pahu' inuhu' quem. Mo ta tomi' ha' mahu' pain ca mi' xuhu' pain ca taramaja wa ca'. Mo ta tomi' ca' hun Te ma': Mi' naparut pain ca tomi' urut pum Panxima Jeju ta, mo ta tomi' ac i ma' hun pata', ha' ac cuhu' tara pain carawa ca mi' xut pain hun ma'. Mi' mi' pi' pin turuhu' pain. ¹⁷Tomi' ha' xine pain ca tomi' ca' xuhu' ca' quem: Ta noc camain' xujuhu' me. Ac i ma' na ca tomi' caparut ma'.

Ca quep em' xun tococwa co howa nonon Jeju

¹⁸Ta wa ina me hwe pain ca noc cucuhu' oro wari' co om howa nanapa' me. Xi noc cain' ara cacapa' ta, mam' pe wet jein ta. Noc cain' cacapa' ca' ira ac caparut na. ¹⁹Mo xi win ma' ne huhun oro wari' co om howa nanapa' ma', om ac ne xira ca noc cucuhu' pain ca win ma' ne cucuhu' ma'. Ane tora' ca' xuhu' cocon ne. Om ca win ma' ne mami' huhun. Je ca

noc cucuhu' ma' quem. ²⁰ Mam' pe wet jein ca tomi' xuhu' pane: Wari' co taramaja mi' e' non taramaxicon nucun ma', om ca hwara' opa tiquin' ca' con taramaxicon nucun, ac i ma' na ca tomi' xuhu' pane. Je ca tomi' xuhu' ca': Carawa ca ara mi' cacapa' oro wari' ma', je ta ara mi' cucuhu' quem. Ja' tequi' quep em' nanapa' oro wari' co noc nanapa' ma', ja' tequi' quep em' ac cucuhu' tara quem. Ma' nana co tomi' ha' nanapa' pain ca tomi' xo' toton pain capija ca', ma' ac caca tara co tomi' ha' nunuhu' pain ca tomi' xo' huhun pain quem. ²¹ Oro wari' co noc nanapa' ma', om ca querec pin' cocon Te co hwet roron oro wari' ta napa'. Je ca noc xuxun cucuhu' ma'. Je ca quep em' xuxun cucuhu' ma' quem. Xi taxipa' ara mahu' ta. ²² Mo xi om maqui' tain macan' ca', mo xi om tomi' toton oro wari' co noc nanapa' ma', om xi tomi' em' cocon pain ca caracat wa Te Iri' Jam. Ane tomi' toton ne. Om ca tomi' narain ho' ac xucucun pain ca caracat nucucun. ²³ Oro wari' co noc nanapa' ma', om ca xica' pe ta' pain ca noc cacapa'. Noc nonon Te quem. ²⁴ Mo xi om querec cacapa' pain ca an hwet pe tain ca hwara' opa ne pane, pain ca ara tain ca om ara taxi' ne ca wari' wa pane, om xi tomi' em' cocon pain ca caracat wa Te. Ane querec cacain ne. Noc cara nanapa', noc cara nonon Te quem. ²⁵ Je i ma' ira, na e' na pain ca noc cacapa' ta. Ma' ta hwet pin ne ca xirao' pe xine capijacon Te ca howa paxi' caca ca'. Noc ximama' nanapa', ac i ma' na ca xirao' pe nein pata' ta naparut.

²⁶ Hwet iri turuhu' co quep xiho' xim nuhu' ne, tomi' xo' ac cuhu' tara pain oro ca iri'o' wa con Te Iri' Jam ta ac caparut na. Tomi' inain Tamataracon Te ta, taraju pa' hwe? Maqui' toron Te. Wata' tara co mam' nuhu' pain. Tomi' hwet ac cocon tara oro wari' pata'. ²⁷ Tomi' hwet pan ac mahu' tara cocon oro wari' quem. Xi wara to ho' ara mahu' pain cara pane, pain ca xo' pijim' qui' xuhu' pain cara pane na ca tomi' caparut ma'.

16 Wara tomi' hwet inuhu' pain oro ca tomi' ne ca' ac caparut na. Ma' ta om aram aram i'ina ne xumuhu' pain ca quep em' xim cucuhu' oro win judeu hwe ma' inuhu'. ² Mana' hwerehwet ca' tuturuhu' pain oro xirim ca cut in to xujuhu' ma'. Om ta corom mami' ac hwein. Om ta xica' pe ne ca mana' hwerehwet cucuhu' quem, main ma' tatara co to' parapa' pin xim nunuhu'. Coromicat ximama' tatara quem: Ara urut pain ca param nucun Iri' Jam pain ca to' parapa' pin urut cocon caram cwa' ta tatara pain ca coromicat pan teretem nucucun pahu'. ³ Ara ac i ma' tuturuhu', xi querec pin' cocon Te Iri' Jam ta. Om ca querec pin' cacapa' quem. ⁴ Tomi' hwet inuhu' pain ca quep xim cucuhu' ma'. Ame hwe e', aram aram maqui'

iri tara xec nein ca quep em' xim cucuhu' ne, mam' pe wet ac hwein tara ca tomi' ne ca', pain ca quep em' xim nunuhu' ta xuhu' ca'. Om ca wara tomi' hwet xuhu' pain cara pane, pain ca xo' taxipa' qui' mahu' pane. Xi om ne ca pe ho' pe ho' wet ara xuhu' pane ta na ca tomi' caparut ma'.

Ca taramaja nein Tamataracon Iri' Jam

⁵In hwet ton paxi' inon Te co hwet roron oro wari' ta napa' pane ac caparut na. Je xi tomi' querec mahu' pain ca main ca mao ta' ma ma' quem mahu'? Om ca tomi' querec camain' mahu' pain. ⁶Tomi' xaxa' tamana e' hwe, xi om ne ca mao ta' ina ta ara xuhu' ta. ⁷Tomi' xaxa' paxi' hwe pain ca paca' xim xuhu' ca'. Ane awi tamana cuhu' ca mao ta' ne ca' ne, tomi' iri'o' inuhu'. Mo ta om mao ta', om ta maqui' ne Tamataracon Te ca quep xiho' xim nuhu'. Mo ta mao ta', mam' ac xuhu' pain tara. ⁸Maqui' iri tara ne, ca' ac ne tara ca taramaja nein: Meo tarain ximicocon oro wari' co om howa nanapa'. To' querec pin' totoron pain ca caracat nucucun. To' querec pin' totoron pain ca xut xo' ne ca'. To' querec pin' totoron pain ca wap toton cocon Te Iri' Jam quem. ⁹To' querec pin' totoron pain ca caracat nucucun ma', pain ca om howa cacapa' ma'. ¹⁰To' querec pin' totoron pain ca xut xo' ne ca', xi om ne ca in hwet ara ton Te ta. In hwet iri ton ne, om iri tara ca querec mami' mahu' ne, je tara ca to' querec pin' cocon pain ca xut xo' ne ca'. ¹¹To' querec pin' totoron pain ca wap toton cocon Te ma' quem, xi om ne ca wara wap ton ara con Caxicon Jam co taramaxicon pe ho' nonon ma'. Taxi' pin ac cocon tara Te pain ca wap toton pan cocon pain ca caracat nucucun.

¹²Mija mija wet paxi' na oro ca tomi' xim xuhu' pain xocori ca'. Mo xi tomi' ho' xuhu' pain, om xi taraju pa' ac hwein. I'ina xira xumuhu' pain ta. ¹³Ane maqui' ta' ne Tamataracon Te ca an hwet pe taxipa' nain oro capijacon Te ca iri'o' ne. Maqui' iri tara ne, tomi' xo' ac cuhu' tara pain oro capijacon Te ca iri'o'. Om ta tomi' hwet cuhu' pain ca coromicat pan nein, om na. Tomi' hwet e' turuhu' pain oro ca taraju ne con Te. Tomi' hwet turuhu' pain oro carawa ca ara ta' ma' quem. ¹⁴Oro ca tomi' ne pain ca coromicat ne ca', an hwet mi' ac cuhu' pain tara. Ac i ma' tara ca an hwet mi' cuhu' pain ca hwara' opa ne ca', je pain ca awi tamana ne ca' quem. ¹⁵Oro ca coromicat nucun Te cwa', an xiho' nain ca coromicat ne ca'. Je ca tomi' ac i ma' xuhu' pain Tamataracon ca' ne, pain ca an hwet

mi' xim cuhu' pain oro ca tomi' ne, je pain oro ca coromicat ne ca' quem na ca tomi' caparut ma'.

Ca tomi' xaxa' nuxut pain ca mao ta' nucun, je pain ca tomi' querec te nuxut pain ca querec mami' xun urut con quem

¹⁶Maqui' ho' tara xec nein ca querec querec om mahu' ta ac caparut na. Ame hwe e', om ta pain homa ne, querec mami' ac mahu' tara quem naparut.

¹⁷Tomi' ca' ac xujuxut na: Cain' cain' ta' ca pain ca maqui' ho' tara xec nein ca querec querec om mahu' capari' quem ne? Cain' cain' ta' ca pain ca om ta pain homa ne, querec mami' ac mahu' tara ta capari' quem? Cain' cain' ta' ca pain ca xi hwet ton ara ton Te ta ara ca quem? ¹⁸Cain' cain' ta' ca pain ca om ta pain homa ne capari' quem? Om ca taraju pa' xin ca tomi' nucun ta xujuxut.

¹⁹Taxi' naparut Jeju pain ca tomi' querec xun urut con quem. Je ca tomi' caparut ma': Tomi' querec xujuhu' pain ca tomi' xuhu' ne ra, pain ca maqui' ho' tara xec nein ca querec querec om mahu', om ta pain homa ne, querec mami' ac mahu' tara xuhu' ne ra? Je ca tomi' querec xujuhu' ma' ra? ²⁰Je ca tomi' xuhu' ca', tomi' iri'o' inuhu' ta ac caparut na. To pa' pin iri tatarapa' ne, awaran tamana ac hwe tara pain ca tomi' xaxa' nuhu'. Oro wari' co om howa nanapa' ma' iri tatara ne, tomi' querec te pan tatara. Jain jain paxi' pan je pain ca tomi' xaxa' nuhu'. Ame hwe e', main tomi' xaxa' tomi' xaxa' om je, tomi' querec te ac hwe tara ta. ²¹Win cama narima' co caxi nam cawinacam pain ca pan' ta' nucun ma'. Tomi' xaxa' paxi' na, xi maqui' ara ne xec nein ca jain jain ta' cama pain ca pan' ta' ca cawinacam ta. Ame hwe e', pan' qui' iri na cawinacam ne, j'am pin ac camain na ca jain jain nequem, xi tomi' querec te tamana ara cama pain ca pan' qui' nucun cawinacam. ²²Ac i ma' xi' hwe quem. Tomi' xaxa' paxi' hwe pain xocori ca'. Ame hwe e', main querec mami' xijexi'. Tomi' querec te tamana ac hwe tara. Om tara wari' co to' om pin ac nain ca tomi' querec te nuhu' quem.

²³Maqui' iri tara xec nein ca querec mami' xijexi' ne, om ta mi' xut pain mami' mahu' pain ca param nuhu'. Je ca tomi' xuhu' ca', tomi' iri'o' inuhu': Mo ta tomi' xun hun Te ma', mo ta an hwet mi' hun pain wuxu pain ca mi' naparut pain ca tomi' urut pum ca' hun pata', mi' ac cuhu' pain

tara ca mi' xut pain hun ma'. ²⁴Om ca an hwet mi' querec hun pain wuxu pain ca mi' xut hun pain ca param nuhu' ma'. Pain xocori ca' iri na ne, tomi' jun. Mi' xut pain ca param nuxut ca' jun. Mi' ac cuhu' pain tara. Ma' ta tomi' querec te tamana hwe ta turuhu' ta na ca tomi' caparut ma'.

Ca pi' pin ne ca tomi' caparut Jeju

²⁵Pain ca tomi' hwet xuhu' pain oro ca tomi' ne ca', pijim' joc mam' mi' inuhu' pain oro carawa pain ca ca' na xuhu' pain capijacon Te ac caparut na. Ame hwe e', main maqui' tara xec nein ca pijim' joc mam' mi' pijim' joc mam' mi' om pin xuhu'. Tomi' xo' e' xuhu' con Te. Ma' ta taraju pa' hwe con ta inuhu'. ²⁶Maqui' iri tara xec nein ca tomi' xo' xim xuhu' con Te ne, tomi' ac hun tara, an hwet mi' ac hun tara pain wuxu pain ca mi' xut hun pain ca param nuhu'. Om ta wata' ne co tomi' mi' nuhu' con. Tomi' mi' pan jun pain. ²⁷Xi noc cuhu' Te ta. Om ca noc cuhu', xi noc pan mahu' ta. Howa mahu' pain ca maqui' ton Te quem. ²⁸Maqui' inon Te pain ca maqui' tain macan' pane. Paca' ho' tain ina quem. In hwet ac ton tara Te na ca tomi' caparut ma'.

²⁹Tomi' ac urut con na: Aram aram taraju pa' pin urut pum. Xi tomi' xo' ara maparut ta. Om ca pijim' joc mam' mi' mami' e' maparut pain oro carawa ta. ³⁰Taxi' urut pum pain ca taxi' taxi' pi' pin main oro carawa. Oro ca tomi' querec xim urut pum quem, om ca param maparut pain ca tomi' querec urut pum pain, xi wara taxi' ximao ara main oro ca param nuxut ta. Je ca howa urut pum pain ca maqui' mon Iri' Jam ta urut con.

³¹Aram aram howa pin mahu' ra ac caparut na. ³²Tara pahu' ac caparut na. Wixicam pin na xec nein ca wawaran mama' xi' hwe ta. Maqui' pin iri na ta. Wawaran pi' pin ac hwe tara, mama' mama' pi' pin ac hwein tara xuruhu'. An pe pin xim mahu', xica' pe ac ta' tara pa'ao'. Om paxi' tara ca xica' pe ta' quem, xi pe ho' taxipa' ara capa' Te ta. ³³Tomi' hwet inuhu' pain oro ca tomi' ne ca', ma' ta om toron ne xumuhu' pata' inuhu'. Ma' paxi' turuhu' oro ca to' i'ina nuhu' pain macan' ca'. Na e' nuhu' pain ca hwara' opa hwe. To' quiji' pin ara xi' inon co ma' co taramaxicon pe ho' nonon oro wari' co om howa nonon Te ta na ca tomi' caparut ca'.

Ca tomi' mi' caparut con Cote ca

17 Tomi' tomi' pi' pin iri naparut pain ca tomi' nucun ma' ne, noro pawin ac ca na, tomi' ac con na Cote ca. Te ac con na. Maqui' pin napa' xec nein ca mi' pin ta' ne ta. An hwet pe rain ca hwara' opa ne pain ca awi tamana ne pain ca Panxita' mapa' ca'. Ma' ta an hwet pe tain ca hwara' opa nem pain ca awi tamana nem quem. ²Xi mi' ara mapa' pain ca taramaxicon pe ho' toton oro wari' ta. Ma' ta mi' momon pain ca e' cara to ho' quequem oro wari' co mi' xim cwa' mapa' pane. ³Oro wari' co e' cara xi' nana ma', na e' na pain ca querec pin' quequem pain ca Iri' Jam iri'o' ma ma'. Om na win Iri' Jam ma ta teterem. Xica' pe ma ta teterem. Na e' na pain ca querec pin' cacapa' pain ca Jeju Cristo ta' ca' quem, pain ca hwet roron oro wari' pain macan' ta mapa' quem. ⁴An hwet mi' inonon pain ca hwara' opa nem pain ca awi tamana nem pain macan' ca'. Xi om ne ca ara ara pi' pin ara tain ca taramaja ne ca ara ra mapa' ta. ⁵In hwet ho' xim inem ta Te ac con na. In hwet iri xim ne, an hwet pe mami' ac main tara ca awi tamana ne pain ca Iri' Jam ne ca wara ma' napa' pain ca pe ho' pe ho' wet xim pain cara pane, pain ca om ma' querec ne macan' pane non.

⁶Oro wari' co tora' ma pain macan' ca', co mi' mapa' cwa', an hwet mi' inonon pain ca hwara' opa nem pain ca Iri' Jam nem ta ac con na. Wara wari' ne momon, mi' ac mapa' cocon na. Tomi' ha' nanain capijam quem. ⁷Aram aram taxi' pin nenem pain ca mi' pan mapa' pain oro ca ara ne, je pain oro ca tomi' ne ca'. ⁸Xi tomi' hwet ara toton pain ca tomi' hwet roron mapa' ta. Howa nanapa' quem. Taxi' pin nanapa' pain ca maqui' xim pane. Howa nenem pain ca hwet roron oro wari' ta pan mapa' quem. ⁹Tomi' mi' inem cocon. Om ca tomi' mi' xim cocon oro wari' co om howa nanapa' ma'. Tomi' mi' inem cocon co mi' mapa' cwa', xi wari' ne ara momon ta. ¹⁰Oro wari' co wari' ne ma ma', wari' ne inonon quem. Oro wari' co wari' ne ta' cwa', wari' ne momon quem. Oro wari' co mi' mapa' cwa', an hwet pe nanain ca hwara' opa ne pain ca awi tamana ne quem. ¹¹Om ta pe mami' tain macan' ca' quem. In hwet ho' xim inem. Co taxipa' nanapa' cwa' iri nana ne, to wet pan tatarain macan' pa'ao' non.

Awi tamana ma ta Te ac con na. Narain ho' roron pain ca om awi wa, mam' narain ho' roron pain ca hwara' opa nem ma', je ca hwara' opa nem ca mi' mapa' ca'. Narain ho' roron pain oro ca to' i'ina nonon, ma' ta

xica' pe ne ximicocon. Win ne ca xica' pe ne ximixi' ca' quem. ¹²Pe ho' pe ho' wet iri inonon ne, narain ho' ac toton na pain oro ca om awi wa pane, mam' narain ho' inonon pain ca hwara' opa nem ca mi' mapa' pane. Querec wet xo' inonon. Om ca pan' ara'am camain' caca. Ma' xica' pe e' na co ma' co mao tarain cote ne xe ta ma pain cara pane, pan' am na co ma'. Ma' ta hwet pin ne ca xirao' pe xine pain capijam con pane ta non.

¹³Hwet ho' xim inem quem ac con na. Tomi' mi' inem cocon pain ca pe pe wet tain macan' ca'. Ma' ta tomi' querec te tamana caca inonon. Win ne ca tomi' querec te tamana ta' ca'. ¹⁴Tomi' hwet inonon pain capijam. Je ca noc cocon oro wari' co om howa nanapa' ma'. Xi win ma' ne pan tococwa pain ca wari' nein macan' caca ta. Win ta' ca', pain ca om win ma' ne toton ca' quem. ¹⁵Om ca tomi' xim pain ca cut ca' roron pain macan' ca' xim. Tomi' e' inem pain ca narain ho' roron con Caxicon Jam co caracat ta xim. ¹⁶Om ca win ma' ne cocon oro wari' co om howa nanapa'. Win ta' ca', pain ca om win ma' ne toton ca' quem. ¹⁷Capijam ca iri'o' ca', je tara ca mam' mi' momon pain ca win xumu quequem pain ca taramaja mi' quequem ma'. ¹⁸Hwet jujun oro wari' pain oro xijein macan' ca' inonon. Win mapa' pane, pain ca hwet roron oro wari' pain macan' ta mapa' pane. ¹⁹Win xumu inem pain ca taramaja mi' xim pane. Ma' ta quep xiho' toton pain ca win xumu quequem pain ca taramaja mi' quequem inonon. To' win xumu toton ca hwara' opa nein capijam ca iri'o' ta non.

²⁰Om ca tomi' mi' e' xim cocon co taxipa' ta' cwa' ac con na. Tomi' mi' inem cocon oro wari' co aram aram howa xim nanapa' pain ca taraju xin cacain ca pijim' nucucun quem. ²¹Mi' roron pain ca xica' pe ne ximicocon quem. Win ne ca xica' pe ne ximixi' pain ca win cwere xim ca', je pain ca win cwere mapa' quem. Mi' roron pain ca win cwere cacapari' quem. Ma' ta howa pin quequem oro wari' co om querec pin' nenem pain macan' ca'. Howa teterem pain ca tomi' mapa' pane, pain ca hwet roron oro wari' pain macan' ta mapa' pane quem. ²²Mi' mapa' pain ca hwara' opa ne pain ca awi tamana ne pane, mi' tiquin' ac toton pain na quem. Ma' ta xica' pe ne ximicocon inonon. Win ne ca xica' pe ne ximixi' ca' quem. ²³Win cwere inonon. Win cwere mapa' quem. Ma' ta xica' pe pin ne ximicocon. Ma' ta querec pin' quequem oro wari' co noc nenem ma', ma' ta querec pin' quequem pain ca hwet roron oro wari' pain macan' ta mapa' pane. Ma' ta querec pin' quequem pain ca om noc momon ma' quem. Win ne ca om noc mapa' quem non.

²⁴ Tomi' mi' inem cocon caram cwa' co mi' mapa' cwa' Te ac con na. Param inonon pain ca to ho' cacapa' pain ca pe ne quem. Ma' ta querec cacain ca hwara' opa ne pain ca awi tamana ne ca mi' mapa' ca'. Xi wara tomi' querec te ara mapa' pain ca om tomi' ma' pin querec xine macan' pane ta non.

²⁵ Wum co tama' ara xo' ta Te ac con na. Om ca querec pin' camain' quequem oro wari' co noc nenem. Ane querec pin' xim ne. Querec pin' nenem caram cwa' co mi' mapa' cwa' quem. Querec pin' nenem pain ca hwet roron oro wari' ta mapa' pane. ²⁶ Wara to' querec pin' inonon pain ca hwara' opa nem pain ca Iri' Jam nem. To' querec pin' cara toton pum quem. Ma' ta win cwere toton. Ma' ta om noc xucucun. Win ne ca om noc mapa' ma' quem. Ac i ma' na ca tomi' con Cote ca pain ca tomi' mi' caparut con pane.

Ca quep cocon Jeju

Mateus 26.47-56; Marcos 14.43-52; Lucas 22.47-53

18 Pi' pin iri na ca tomi' con Cote ca ne, maji ta ac caparut na, hwerehwet mama' ac urut na. Wirico Jeju ma', warut pain ca taxipa' urut con quem, xom tacaracam' mama' ac urut pain na taparain com ma', ca Cedrom caca oro wari' ma'. Je ca pe ne totain oliva ma', pain xijein cacarain ma'. Xuruxut xuruxut hwet ac urut pain na. ² Judas ma', co quep xiho' ton nonon oro taramaxicon pain ca quep xun cocon ma', wara querec pin' nain totain oliva ca to urut ma'. Xi om ne ca wara cut in to taxipa' ara xujuxut pain i ma' con Jeju pane. ³ Je ca mao cain totain oliva Judas. O qui' nonon oro soldado cocon oro guarda ma', wiricoco oro taramaxicon nucucun oro sacerdote cocon oro fariseu co hwet jun nonon ma'. Cut nanain naran nucucun je mam' mixita xi' caca quem.

⁴ Jeju ma', taxi' nain oro carawa ca ara ton non. Je ca xut hwet tococwa ma'. Tomi' querec ac tococwa na: Ma' co pirao' hwe quem tata.

⁵ Jeju co maqui' nain Nazaré ta ac caca na.

Wata' cwa' ira ac ca na.

Jao jao ma' nonon Judas ma', co quep xiho' ton nonon oro taramaxicon pain ca quep xun cocon ma'. ⁶ Wata' ta iri na Jeju ne, camara' in mama' ac cacain na macan' pain waracocon.

⁷ Tomi' querec mami' ac tococwa na: Ma' co pirao' hwe ma' quem?

Jeju co maqui' nain Nazaré ta ac caca na quem.

⁸Wata' ta xuhu' ne ira ac tococwa na. Mo ta wata' ne co pirao' hwe ma', miri'om ac huhun tara co taxipa' nanapa' cwa', ta quep huhun me ta ac tococwa na.

⁹Tomi' nain i ma' Jeju, ma' ta hwet pin ne i cara ca tomi' ta' pain ca tomi' ton Te ne na pain ca om ca pan' ara'am camain' caca co mi' mapa' pane ta Te con Cote ca ne.

¹⁰An nain cote ne quit Simão Pedro. Coc xicot ac cain na, wara ca' na co taramaja mi' e' non sacerdote co iri' taramaxicon ma', Malco na wixicon. Ton tapit pin ac cain na taraxicon ma', pain iri' curucun ma'.

¹¹Om na, joc corom pin rain cote ne quit nem pain jainain ma' ta Pedro ac con na Jeju. Cain' cain' xima quem ac con na. Noc inain xiton Te pain ca jain jain ra capa' pain ca mi' pin ra capa' ra? Om ca noc inain ton ta. Na e' na pain ca tomi' ha' ton, na e' na pain ca jain jain ta' pain ca mi' pin ta' ta' ca', xi wirico ara ca co jain jain ra napa' ta na ca tomi' con ma'.

Ca o mi' cocon con Anás Jeju

¹²Quep ac cocon na Jeju. Mo nana: Oro soldado con taramaxicon nucucun ma', oro guarda co querec wet nanain cote ne xiricon Iri' Jam ma' quem. Quep nonon, pao' pe ac cocon na quem. ¹³An mi' cain' ac cocon na con Anás. Taxicam panxita' non Caifás Anás. Wirico Caifás co sacerdote co iri' taramaxicon pain cara pane, pain cawaxi' ca mi' pin qui' ca Jeju pane. ¹⁴Wirico co wara tomi' ca' nonon oro taramaxicon nuxut pain ca judeu urut pane: Hohot napari' pain ca mi' pin xica' pe ca wari' ta. Mi' pin caho' tarapari', mi' pin caho' totonon oro win ma' nexi' cwa' quem, ac i ma' na ca tomi' cocon pane.

Ca tomi' ximao ca Pedro pain ca om ca querec pin' ton Jeju ta ca

Mateus 26.69-70; Marcos 14.66-68; Lucas 22.54-57

¹⁵Ja' ja' ac urut con na Jeju. Wata', Pedro, ca' urut, ja' ja' ac urut con na. Wara querec pin' inon sacerdote co iri' taramaxicon ma'. Je ca na capa' pain ca corom wi ta' con Jeju. Corom mao ac tain na ca tao' caho' nein xiricon taramaxicon. ¹⁶Pedro ma' iri na ne, om ca corom ca. Hwet pe na, xat pe ho' nain man ca corom ac wa ma'. Wata' iri na pain ca querec pin'

ton sacerdote co iri' taramaxicon ma' ne, in hwet ac tain na manain xirim ma', tomi' ac tam na xojam' co querec wet nain ma'. Hohot na pain ca corom ca co cwa' quem ac tam na con Pedro, ma'e ac cama na, corom ra ac con na quem. ¹⁷Tomi' querec ac con na: Om ca taxipa' mon co ma' co quep wa ma' ra non.

Om na, om ca taxipa' ton ta ac cam na.

¹⁸Oro guarda cocon co taramaja mi' nonon taramaxicon ma', wara caraho' nanain xe, xi capin' ara caca ta. Coco' coco' mam' pin nanain, nonoc ac cacain na. Xat pe ho' nonon Pedro ma'. Nonoc ac cain na quem.

Ca tomi' querec con Jeju sacerdote co iri' taramaxicon

¹⁹Tomi' querec ac con na Jeju co ma' co sacerdote co iri' taramaxicon ma': Ma' wari' co taxipa' nenem? Ma' carawa ca pijim' momon quem non.

²⁰Tomi' ac con na: Tama' pijim' pijim' xam' inonon oro wari' pane. Taraju taraju pi' pin nanapa'. Tama' pijim' pe inain oro ca cut in to taxipa' caca ma', je pain oro xirim ca cut in to taxipa' xijexi' pain ca judeu iri' ca', je pain cote ne xiricon Iri' Jam ma' quem. Om ca pijim' noc xa camain' ta' quem ac ca na. ²¹Para tomi' querec mapa' ma' quem ac con na. Tomi' querec ximomon oro wari' co taraju nanapa' ma'. Xi taxi' ara cacain ca pijim' ne ta na ca tomi' con ma'.

²²Tomi' iri nain i ma' ne, wap ac cain tocon na guarda co xat pe nain i ma'. Tomi' xo' ximon sacerdote co iri' taramaxicon ta non.

²³Cain' ca om tomi' xo' ta' quem ac con na. Mo ta tomi' pan tem ta', tomi' hwet rain ca em' ne ta. Mo xi om tomi' iri'o' ta', je i ma' xira ca wap qui' mapa'. Ane tomi' iri'o' ta' ne na ca tomi' con ma'.

²⁴O mi' jun con Caifás ma', co sacerdote co iri' taramaxicon ma' ac ca na Anás, an mao ac cocon na oro guarda. Pao' pe cara nonon.

Ca tomi' ximao mami' ca Pedro pain ca om ca querec pin' ton Jeju ta ca

Mateus 26.71-75; Marcos 14.69-72; Lucas 22.58-62

²⁵Nonoc nonoc wet nain xe Pedro ma'. Tomi' querec ac cocon na: Om ca taxipa' mon Jeju quem ra nonon.

Om na, om ca taxipa' ton ta ac ca na.

²⁶ Pe nain i ma' co nari non co wac tapit ca taraxicon Pedro ma' quem. Taramaja mi' e' non sacerdote co iri' taramaxicon ma'. Tomi' ac con na Pedro: Ac ca querec xim na pain ca quep urut con Jeju pain totain oliva ma'. Ac ca pe ho' mon na quem na ca tomi' con ma'.

²⁷ Om na ta mami' ac ca na Pedro quem.

Aca ac ca na me.

Ca tomi' querec con Jeju Pilatos

²⁸ Iri' xo' xec pin na. Oro taramaxicon nuxut pain ca judeu urut ma', maji ta, paca' ac cacain na xiricon Caifás ma', an mao ac cocon na Jeju pain xiricon taramaxicon nucucun oro romano. Ane om corom caca ne. Tomi' ca' xucucun: Mo ta corom mama' xin xiricon tatirim cwa', em' pin ac iri' tara, om ac ne tara ca na capari' pain ca cao' xin carawa nein ca tomi' querec te nexi' pain xec nein Páscoa ca' nana. Je ca hwerehwet to ca' cacain xiricon taramaxicon.

²⁹ Hwet qui' ac ca na Pilatos. Xut hwet ac tococwa na, tomi' querec ac tococwa na: Pan tem na hun co cwa' ra? Ma' carawa ca ara ca quem na ca tomi' querec tococwa ma'.

³⁰ Mo xi om pan tem ca, om xi o mi' urut pum con ta ac cocon na.

³¹ An mao pan jun ta ac tococwa na. Tomi' querec pan jun, am mam' hwein ca pan tem wa con. Win ne ca ara taxipa' hwe pain ca tomi' xo' xujuhu' pain ca taramaxicon nuhu' ma', pain ca judeu hwe ma' ac tococwa na.

Om na, to' pa' pan jun ta ac cocon na. Om ca to' pa' pin ac urut con. Xi tomi' narain ho' ara cacaparut pain ca to' pa' wa wari' oro win taramaxicon hwe pain ca romano hwe ma' nonon.

³² Tomi' nanain i ma', ma' ta hwet pin ne ca wara tomi' pe nucun Jeju pane, pain ca tomi' mi' cain ca mi' pin ta' nucun pain ca tatatain mi' xun cocon pain pana.

18.32 Pain cara pane, cocon oro judeu pane, ma' iri nana oro wari' co cono' pin tatara caca oro win ma' caca pain ca caracat tamana nucucun ne, to' taxipa' tata pain pacun, to' to' cono' taxipa' ac tococwa na, je curucucun pane. Oro romano ma' iri nana ne, tatatain mi' taxipa' nonon oro caracat pain pana, je curucucun pane quem.

³³Corom mami' ac cain xiricon na Pilatos. Harahap je con Jeju ta ac tococwa na oro wari' nucun. Tomi' querec ac con na: Wum co iri' taramaxicon nucucun oro judeu cwa' ra non.

³⁴Tara pum ac con na Jeju. Ca tomi' querec mapa' ma', maqui' nain ca coromicat nem ra? Maqui' non xucun wari' ra na ca tomi' con ma'.

³⁵Xi judeu ta' ta ac ca na Pilatos. Wiricoco ara xi' nana oro win ma' nem cocon oro taramaxicon nucucun oro sacerdote co o mi' nanapa' pum ta ac con na. Ma' carawa ca ara ma quem ac con na.

³⁶Om na, pain ca taramaxicon ta' ca', om ca an xiho' toton oro taramaxicon pain macan' ca' ac con na. Mo xi an xiho' toton oro taramaxicon pain macan' ca', quep xiho' ac cacapa' xira co taxipa' ta'. Narain ho' xirarapa' cocon oro taramaxicon nucucun oro judeu pain ca quep xim cacapa'. Ane om an xiho' toton oro taramaxicon pain macan' ca' ne na ca tomi' con ma'.

³⁷Je ca tomi' xim ca', taramaxicon ma ma' ira ac con na.

Wum co tomi' pan nain i ma' ira, pain ca taramaxicon ma mapa' ma' ac con na. Je ca pan' ne ca pije' ne pane, je ca maqui' tain macan' pane. Tomi' hwet toton pain oro ca iri'o' wa oro wari' ta ina pane. Taraju wet nanapa' oro wari' co param nanain ca iri'o' wa quem na ca tomi' ca Jeju.

³⁸Ma' tara wari' co taxi' nain ca iri'o' wa ra na ca tomi' querec ca Pilatos.

Ca mi' pin tara cocon Jeju

Tomi' iri nain i ma' Pilatos ne, hwet mao mami' ac ca na, tomi' ac cocon na oro taramaxicon nuxut pain ca judeu urut ca'. Om ca mam' camain' tain ca pan tem wa con ta nonon. ³⁹Taraju wet xine e' ac cocon na. Pain oro cawaxi' pain xec nein Páscoa pane, param taxipa' mahu' pain ca pa hwet mi' xuhu' con wari' co tao' pe wa pain xirinain ca tao' to tao' to to wa ca'. Je ca tomi' xuhu' pain xocori ca' quem. Param mahu' pain ca pa hwet mi' xuhu' con co cwa' co taramaxicon ne hwe pain ca judeu hwe ma' ra na ca tomi' querec tococwa ma'.

⁴⁰Merem ac caca na: Om na, noc urut con co ma' ta! Param urut con Barrabás ma'. Pa hwet mi' xut con Barrabás ta, ac i ma' na ca merem nucucun.

Barrabás ma', iri' caxicon pije' na, om ca tomi' ha' camain' cocon oro taramaxicon.

19 Wap jun Jeju cwa' ta ac cocon na oro soldado Pilatos ma'. ²Ton nanain caji macon ca puxu ma', mo' ac cacain na, mo' mo' an xiho nanain caji waji' ca to taxipa' caca oro taramaxicon pain winacocon ma', pe ac cocon na pain winacon. Pe nonon con cote ca wom co ac womicon taramaxicon co paca' awi ma' quem. ³Wixicam wixicam ac cocon na, tomi' ximama' ac cocon na. Awi na taramaxicon nucucun oro judeu cwa' nana pain ca tomi' ximama' cocon ma', wap wap ac cocon na pain tocon quem.

⁴Hwet mao mami' ac ca na Pilatos, tomi' ac tococwa na oro taramaxicon nucucun oro sacerdote ma'. Taraju wet xine e'. An hwet mi' ho' xuhu' con. Ma' ta taxi' mahu' pain ca om mam' camain' tain ca pan tem wa con ta tata.

⁵Hwet qui' ac ca na Jeju. Pe cara nain caji macon ca puxu pain winacon. Pe cara non cote ca wom co ac womicon taramaxicon co paca' awi ma' quem. Noro jun wari' cwa' ta ac ca na Pilatos.

⁶Querec iri nonon Jeju oro taramaxicon nucucun oro sacerdote cocon oro guarda co querec wet nanain cote ne xiricon Iri' Jam ma' ne, merem ac caca na: Na e' na pain ca tatatain mi' tocwa pain pana ta. Na e' na pain ca tatatain mi' tocwa pain pana ta na ca merem nucucun.

Wahu' pan tatara co tatatain mi' nonon pain pana ta ac ca na Pilatos. Om ca mam' tain ca pan tem wa con ta na ca tomi' tococwa ma'.

⁷Je i ma' ira ac caca na oro taramaxicon nuxut pain ca judeu urut ca'. Na e' na pain ca mi' pin ca, xi Panxica Iri' Jam ina ta ara ca ta. Wari' co tomi' ximao ac i ma' ma', mi' pin tara ta na ca xirao' nucun Moisés ta nana pain ca merem cocon Pilatos.

⁸Taraju iri nain i ma' Pilatos ne, jin' tamana ac ca na. Wara jin' paxi' na, jin' tamana pin ac ca na. ⁹Corom mao mami' ac cain na xiricon, tomi' querec ac con na Jeju. Main ca maqui' ma quem ac con na.

Ane tacana pe pan ca Jeju ne. Om ca tomi' camain' ca.

¹⁰Je xi tomi' mapa' quem ac con na Pilatos. Om ca querec pin' mapa' pain ca taramaxicon ta' ca' ra? Na napa' pain ca om pin jun toton oro soldado ne pum, na napa' pain ca tatatain mi' jun pain pana toton pum quem non.

¹¹Mo xi om mi' quem pain ca taramaxicon wa Te Iri' Jam ma', om xi na camain' quem pain ca ara mi' mapa' pain ca param nem ta ac con na. Je ca tomi' xim ca' taramaxicon ac con na. Co ma' co o mi' jun con Pilatos napa' pum, wirico co caracat tamana pan. Caracat tiquin' ca' nem ta non.

¹²Taraju iri nain i ma' Pilatos ma' ne, jain jain ac ca na, om pin xiton Jeju na paxi' na ira. Ane merem cara caca oro taramaxicon nuxut pain ca judeu urut ma' ne. Mo ta om pin mon co ma ma', om ca win ma' ne mami' mon taramaxicon nexi' co pe nain Roma ta. Xi ari ara con taramaxicon wari' co tomi' ximao ac i ma' ta, pain ca taramaxicon ina ta ca ma' na ca tomi' cocon ma'.

¹³Taraju iri nain ca tomi' nucucun oro wari' Pilatos ma' ne, o hwet qui' ac con na Jeju, xao pe ac cain na ca mam' xao pe nucun ma', ca tomi' querec pe cocon wari' co pan teretem nana ma'. Gabatá urut pain ca xao pe pe ca ma', je i ma' wixinain pain capijaxut pain ca judeu urut ca', pain aramaico ca'. Wana ca xao taparapa' xine pacun nein na ca tomi' mao ne wixinain quem.

¹⁴Wixicam pin na xec nein Páscoa. Om ca pira camain' ne, wara ara xo' xin nanain oro carawa nein oro win ma' nuxut. Pawin pin na xina quem.

Noro jun taramaxicon nuhu' cwa' ta ac cocon na oro win judeu urut Pilatos ma'.

¹⁵Ane merem caca ne: To' pa' pin ron. To' pa' pin ron. Tatatain mi' ron pain pana ta na ca merem nucucun.

Cain' cain' xihwe quem? Taramaxicon ne hun ma' ira! Param mahu' pain ca tatatain mi' jun pain pana toton oro soldado ne cwa' ra?

Om na, om ca taramaxicon ne urut con ta. Ma' xica' pe na taramaxicon pain Roma ta. Wirico co taramaxicon ne urut ta nonon Pilatos oro taramaxicon nucucun oro sacerdote.

¹⁶Ma ac tococwa na. An mao jun ta, tatatain mi' jun pain pana ta ac tococwa na oro soldado nucun.

Ca tatatain mi' cocon pain pana Jeju

Mateus 27.32-44; Marcos 15.21-32; Lucas 23.26-43

An mao ac cocon na oro soldado nucun Pilatos. ¹⁷Hwrehwet ca' ac cacain na cidade. Wirico pan na Jeju co an tiquin' nain panaxicon. Xuruxut xuruxut hwet ac cacain na ca tamaja pan ne macan' ma', ca Maxinain Tacawaji' caca oro romano ma'. Gólgota urut pain wixinain pain aramaico.

¹⁸Je ca tatatain pe cocon pain pana. Ma' 2 ac caca na co tatatain mi' wawa pain pana quem. Pe nain iri' curucun xucun ma', pe ac cain na paraxicon xucun ma', ximija pe ac ca na Jeju ma' quem.

¹⁹ Pilatos ma', wara tomi' xo' nonon oro soldado nucun ira: Xirao' pe jein wixicon pain pana ma', tatatain mi' ac hwein tara pain tamain panaxicon pain winacon quem. Ca' tara ca xirao' nein pahu': Jeju co maqui' nain Nazaré. Taramaxicon nucucun oro judeu ta tara ca xirao' nein pahu' ta nonon. Ara ac cacain na. ²⁰ Mija nana wari' co noro nanain ma', xi pira ca' nein cidade ca tatatain pe tocwa Jeju ta. Pe xipana na. Ca xirao' nucucun pain wijimain pana ma', xirao' nanain pain capijaxut pain ca judeu urut ca', je pain capijacocon oro romano, je pain capijacocon oro grego quem.

²¹ Mo hwet ac cocon na Pilatos oro taramaxicon nucucun oro sacerdote. Tomi' ac cocon na: Om xi taramaxicon nucucun oro judeu ne ca xirao' nein cocon ta. Ca' xirarain con: Taramaxicon nucucun oro judeu ina ta na, ac i ma' xirarain con ta nonon.

²² Je i ma' ta ac ca na Pilatos. Je ca xirao' je toton ca'. Om ta an in tain ta na.

²³ Tatatain mi' iri nonon pain pana oro soldado ne, cut in ac cocon na womicon. An an xam' xun ta ac caca na, an xica' an xica' xam' ac cocon na. Ma' 4 nana oro soldado co an nonon ma'. Ma' na iri' curucun womicon ma' quem. Om ca oc tocwa, ten cote ca e' nonon con. ²⁴ Om ta i' xun iri' curucun cwa' ac caca na. Ara e' xin ca ara taxipa' iri', ma' ta taxi' xun co an ton non ma' nana, ara ac cacain na.

Ac i ma' na ca hwet pin ne ca xirao' pe xine capijacon Iri' Jam pane. Ca' na ca xirao' nein con:

An an xam' nonon womu.

Ara ac cacain na ca ara taxipa' caca ma'.

Ma' ta taxi' xun wari' co an ton non ta ac caca na con

iri' curucun womu quem,

ac i ma' na ca xirao' pe xine pain capijacon Iri' Jam pane. Je ca ara caca oro soldado ma'.

²⁵ Coco' ja' pan nanain panaxicon Jeju oro narima' ma'. Mo nana: Jicon ma'. Xequem jicon, coxa' cama jicon ma'. Maria manacon Clopas ma'. Maria Madalena ma' quem. ²⁶ Querec nam jicon Jeju ma'. Querec napa' pain ca pe ja' pan tam quem. Iri' win ma' ne napa' Jeju. Querec iri naparut

19.24 Ara taxipa' ac i ca' nana pane: Xirao' xirao' xam' nanain wixicocon pain oro wijimain pacun ma', xin xin ac cacain na. Ma' ta taxi' xun win ma' nexi' co an ton non iri' curucun cwa' nana. Xin iri nanain ne, noro ac cacain na, mam' ac cacain na wixicon. Wum tara, an ron ta ac xucucun na con.

ne, tomi' ac cam na jicon: Cawiji ron ta nam pata'. ²⁷Na' ram quem ac capa' na quem. Ma ac ton na, an mao ac tam na pain xuru. Pe ho' ne pain xuru ca' ac tam na, pe ho' ac capa' na quem.

Ca mi' pin nucun Jeju

Mateus 27.45-56; Marcos 15.33-41; Lucas 23.44-49

²⁸Taxi' pin ac xucun na Jeju pain ca ara awori pi' pin cain ca ara ra con Cote ca pane. Ma' xica' pe na ca xirao' pe xine capijacon Iri' Jam ca om hwet querec con. Je ca tomi' ca' ca: Toc xita' com na ina me na. ²⁹Pe nain i ma' too ca ji'ao pe xine caji comi uva ca tup ma' quem. Moin' na. An ac cacain na caji hoho hoho ma', xin cam ac cacain na pain caji comi uva ma', moin' pe ac ne na. An pe ac cacain na pain tamain taparain pana ma', ca hissopo urut ma'. An piri' mi' ac cocon na pain capijacon. ³⁰Toc pin iri nain ne, tomi' ac ca na: Ara awori pi' pin inain ca taramaja ne ta Te ac ca na. Maram quiiji' mao ac ne na winacon. Mi' inem pain tamatara ca' Te. Querec wet rain ta non, mi' ac con pain na.

Ca xucun' tape cain quiricon Jeju soldado

³¹Mi' pin iri na Jeju ne, wara wixicam pin nain xec nein ca wara ara xo' xin urut pain carawa nein Páscoa. Xec sábado ta' na quem. Tomi' querec te paxi' urut pain oro xec nein sábado ma', ane tomi' querec te tamana urut pain xec nein sábado ca jao jao ma' nain xec nein Páscoa ne. Oro taramaxicon nuxut pain ca judeu urut ma', noc nanain ca warawa cara nein pana curucucun orojima' pain sábado ma'. Je ca tomi' cocon Pilatos ma': Tomi' roron oro soldado nem ta. To' caracat pin jein aracocon co tatatain mi' wawa pain pana, ma' ta cono' hap caca ta roron. Cut quiiji' ca' ac huhun tara pain pana ta roron. Ac i ma' na ca tomi' cocon ma'.

19.28 Je ca tomi' ne capijacon Iri' Jam pain Salmo 69.21 ma': Mi' nanapa' pain caji comi uva ca tup ma', ma' ta cawain' cawain' om pin ne capijam ta nanapa' pain ca mixein cacapa' ma'. **19.30** Mi' pin iri na Jeju pane ne, om ca mi' pin e' ca. Mi' inem pain tamatara ta Te non Cote ca, mi' ac con pain na, mi' pin ac ca na quem. **19.31** Tatatain iri tata pain pana wari' ne, na e' nonon pain ca an piri' cacain curucucun pain aracocon ma', pain ca wereme xi' caca ma'. Pain ca to' caracat pin xine aracocon ma' iri na ne, om ca ha' mami' cocon pain ca wereme wa. Cono' hap ac caca na quem.

³²Mo hwet cain' ac tococwa na co tatatain wi wawa con Jeju ma', to' caracat pin ac cacain na aracon xucun ma', to' caracat pin ac cacain na aracon xucun ma' quem. ³³Hwet iri nonon Jeju ne, querec pin' ac cocon na pain ca wara mi' pin nucun. Je ca om to' caracat pin cacain aracon ma'. ³⁴Soldado ma', win ma' caca oro xucucun soldado ma', xucun' tape e' nain quiricon Jeju. Ao hap ac ne na wic je com quem.

³⁵Querec inain ca mi' pin nucun quem. Iri'o' na ca xirao' ne ca'. Om ca mixein ta', iri'o' na ca xirao' ne ca'. Je ca xirao' mi' xuhu' ca' pain. Ma' ta howa cara hun quem inuhu'. ³⁶Om ca to' caracat xine aracon Jeju. Xica' pe na ca xucun' tape e' tocwa pain quiricon. Ma' ta hwet pin ne ca xirao' pe xine capiiacon Iri' Jam pane. Ca' na ca xirao' pe nein con:

Om ca to' caracat camain' xine aracon.

Ac i ma' na ca xirao' pe nein con. ³⁷Ma' na wirain ca xirao' pe nein capiiacon Iri' Jam ca tomi' ca' quem:

Noro totoron co xucun' tape pin caca pain quit.

Ac i ma' na wirain ca xirao' pe xine capiiacon Iri' Jam con Jeju.

Ca an corom pe xine curucun Jeju pain manain pacun

Mateus 27.57-61; Marcos 15.42-47; Lucas 23.50-56

³⁸Tomi' ac con na Pilatos José. Wari' nein Arimateia na José ma'. Howa paxi' non Jeju José pane, ane om tomi' hwet cain ca howa nucun ne, xi jin' ara cocon oro taramaxicon nuxut pain ca judeu urut ta. Tomi' ac con na Pilatos José: Mi' ne pain curucun Jeju ta non. Ma, an mao rain ta ac con na. Mo hwet ac cain na, an quiji' ca' ac cain na pain pana. ³⁹Nicodemos ma', co hwet towa non Jeju pain cara pane, ja' ja' non José. Cut nain waraqui pana ca hu xain tamana ma', je aloés pain mirra ma'. Mija na con. Xite na. Ac ca 34 ne na quilo nein. ⁴⁰An mao ac cacain na curucun Jeju. An ac cocon na wom co awi. I' xi' ac cocon na, cam ja' ac cocon na pain waraqui pana ma', wiric pa' ac cacain na curucun Jeju con. Je curuxut pain ca judeu urut ca', pain ca an corom to xun pain manain pacun urut cocon wari' co cono' nana ma'.

⁴¹To nain i ma' oro panaji memem. Pe ja' pan nain ca tatatain pe tocwa Jeju. Je ca pe ne manain pacun ca an corom pe xun tocwa wari' co mi'

19.34 Ao mao iri na wic je com pain ca mi' pin ca Jeju ne, je ca to' querec pin' napari' pain ca mi' pin iri'o' ca.

pin quem. Iri' xocori, om ca an corom pe querec tocwa pain wari' co mi' pin. ⁴²Iri' xec nein ca ara xo' xine oro carawa nein ca tomi' querec te nuxut ma'. Xec sábado ta' na. Je ca an corom pe hap cacain curucun pain manain pacun ca to ne oro panaji memem ma'. Xi pe xipana ara ne ta.

Ca e' mami' ca Jeju

Mateus 28.1-10; Marcos 16.1-8; Lucas 24.1-12

20 Domingo pin iri na ne, pain iri' xo' xec ma', mao ac camain na manain pacun Maria Madalena. Om ca hwet querec ca xina, xim xim wet na, mao ac camain na manain pacun. Querec ac camain na ca wara joc panajao' pin xine pacun ca tao' pa' nain manain ma'. ²Mo hwet ac caparut na Maria Madalena. Simão Pedro, wata' pain ca iri' win ma' ne capa' Jeju ca', mo hwet naparut Maria. An hwet ca' nonon pain manain pacun Taramaxicon nexi' ta naparut. Om ca taxi' urut pain ca an terem' pe cocon quem naparut.

³Na ra ac urut na, mama' ac urut pain na manain pacun. ⁴Jein mama' pi' pin paxi' urut, ane mo hap ca' ton Pedro ne. Hwet cain' inain manain pacun. ⁵Xujuxuc pe ac ta' na, querec ac ton na wom co mam' wiric pa' cocon ma'. Xujuxuc pe e' ina, om ca corom mao ta'. ⁶Maqui' ac ca na Pedro co ja' ja' napa' ma'. Corom ac ca na, querec ac con na wom co mam' wiric pa' tocwa ma'. To nain i ma'. ⁷Querec ac con na wom co mam' tucu cacain winacon ma' quem. Om ca terem' pe ho' con xucun wom. Pe ni na, wara witop xo' na, an terem' xo' ac tocwa na pain cacarain. ⁸Corom ac ta' na quem. Querec iri inain ne, howa ac ta' na. Iri'o' na xin ca e' mami' nucun ta ac ta' na. ⁹(Pain ca om e' mami' querec nucun ma', om ca taraju pa' querec urut pain ca xirao' pe xine capijacon Iri' Jam ira, pain ca na e' na pain ca e' mami' ta' na ta ne ma'.)

Ca hwet pa' cam Maria Madalena Jeju

¹⁰In mama' ac urut pain na xuruxut. ¹¹Maria Madalena ma' iri na ne, pe pe wet nain manain pacun. Hwet pe ca' nain manain ca corom ac xine ma'. Aca na. Aca aca, xuruxuc pe ac cama na. ¹²Querec ac cocon na jam co taramaja mi' nonon Iri' Jam ma'. Ma' 2 nana. To nonon wom co towo'. Xao to nanain i ma', pain ca an pe pe xine curucun Jeju ira. Xao pe pe

nain ca wina mao ca xucun, xao pe pe ac cain na ca caxima mao ca xucun ma' quem.

¹³ Para aca ma ma' quem narima' ac cacam na.

Om na, an mao nonon Taramaxicon ne. Om ca taxi' tain ca an terem' pe cocon ta ac cama na.

¹⁴ Tomi' iri nain i ma' ne, noro in ac cama na, querec ac con na Jeju pain ca xat pe cain i ma'. Querec paxi' non, ane om querec pin' con ne.

¹⁵ Tomi' querec ac cam na: Para aca ma ma' quem narima'? Ma' co pirao' ma ma' quem nam.

Wari' co querec wet nain oro panaji memem tara ma' non Jeju ira, ac i ma' na ca coromicat nequem Maria Magdalena ma'. Je ca tomi' ca' con quem: Wum tara co an hwet ca' non pain manain pacun ca' quem? Main ca an terem' pe pin mon quem? Tomi' hwet ne pain, ma' ta an mao ton ta na ca tomi' con ma'.

¹⁶ Maria ac cam na.

Noro in ac cama na, Rabôni ac con na. Ac i ma' na ca tomi' cama pain capijaxut pain ca judeu urut ca', pain aramaico. Taramaxicon co ca' na taxipa' capijacon Iri' Jam ta na ca tomi' mao nein.

¹⁷ Ta quep mapa' me ta Maria ac cam na. Xi hwet querec ton Te ta. Mo hwet roron xere ma', co taxipa' ta' ma'. Tomi' ca' roron: Piri' hwet ton Te co Iri' Jam ne ta' ca', co Iri' Jam ne hwe ma' quem nuhu'. Wirico co Te ta' ca' quem, co Te hwe ma' quem nuhu', ac i ma' na ca tomi' cuhu' ta roron na ca tomi' cam ma'.

¹⁸ Ma'e ac cama na, mo hwet ac caparut na pain ca taxipa' urut con Jeju. Querec inon Taramaxicon nexi' ta ac caparut na, tomi' hwet ac caparut na pain ca tomi' cam ma'.

Ca hwet pa' caparut pain ca taxipa' urut con Jeju

Lucas 24.36-49

¹⁹ Wara irawin pin na pain iri' domingo nein ca e' mami' ca Jeju ma'. Cut in ac xujuxut na pain ca taxipa' urut con ca'. Corom to urut pain xirim, tao' pa' ac urut pain na oro man ca corom ac wa ma'. Xi jin' ara urut cocon oro taramaxicon nuxut pain ca judeu urut ta.

Corom ac ca na Jeju. Xat pe nain ximijaxut. Ta toron ne xumuhu' me ta ac caparut na. ²⁰ Tomi' iri nain i ma' ne, mam' pe mi' ac caparut na pain

manain prego pain micon je manain quit pain quiricon ma' quem. Querec iri urut pain con ne, tomi' querec te tamana ac urut con na.

²¹ Tomi' mami' ac caparut na: Ta toron ne xumuhu' me ta naparut. Pijim' hwet jujun pain capiija oro wari' ta inuhu'. Win ne ca pijim' hwet roron pain capiija oro wari' ta capa' Te pane naparut. ²² Huco' mi' ac caparut na. Corom hwet turuhu' Tamataracon Te Iri' Jam ta ac caparut na. ²³ Mo ta tomi' ca' hun wari' ma': Xic am pin nain ca caracat nem Iri' Jam ta, mo ta tomi' ac i ma' hun. Wara xic am pin nain Cotere' Iri' Jam quem. Mo ta tomi' ca' hun quem: Om ca xic am pin cain ca caracat nem Iri' Jam ta, mo ta tomi' ac i ma' hun. Om ca xic am pin cain quem na ca tomi' caparut ma'.

Ca tomi' xo' con Tomé Jeju

²⁴ Hwet pa' iri naparut ne, wara om na Tomé co win ma' urut pain ca taxipa' urut con Jeju ca'. Om ca pe ho' caparut. (Tocwan na wixicon Tomé quem. Tomé co Horoman Pe na xijein wixicon.) ²⁵ Je ca tomi' hwet urut con ca': Querec urut con Taramaxicon nexi' ta Tomé na ca tomi' urut con ma'.

Tomi' ac caparut na: Mo ta om querec tain jami prego pain micon. Mo ta om quep tain pain mu ca'. Mo ta om quep ta' pain quiricon pain ca xucun' tape ac tocwa ma'. Om ta howa tain ca tomi' nuhu' ta na ca tomi' caparut ma'.

²⁶ Xijein domingo pin iri na ne, cut in mami' ac xujuxut na pain ca taxipa' urut con Jeju ca'. Pe ho' naparut Tomé quem. Tao' pa' paxi' urut pain oro manain ca corom ac wa ma', ane hwet pa' caparut Jeju ne. Xat pe ac cain na ximijaxut. Ta toron ne xumuhu' me ta ac caparut na.

²⁷ Tomi' pan ac con na Tomé Jeju: Noro rain mu ca' Tomé. Quep rain manain jami prego pain mu ca'. Quep rain curu pain ca xucun' tape ac cacapa' ca' quem. Tara pum ta'a maho' ra e'. Howa ra ta na ca tomi' con ma'.

²⁸ Taramaxicon ne! Iri' Jam ne! Ac i ma' na ca tomi' con ma'.

²⁹ Cain' cain' xima quem Tomé ac con na Jeju. Howa e' mapa' pain ca querec mapa' pain ca e' mami' ne ra? Oro wari' co howa nanapa' pain ca om querec cacapa' ma', om paxi' na ca querec cacapa' pain ca e' mami' ne

ca'. Je i ma' ira nana, howa urut pum pain ca e' mami' nem ta nanapa'. Wiricoco nana co param mi' wawa pain ca awi wa ta na ca tomi' con ma'.

Para xirao' mi' xuhu' con Jeju quem

³⁰ Mija na oro xijein ca ara ca Jeju pane, ca in ac caca oro wari' pane. Warut pain ca taxipa' urut con ca', querec urut con pain ca ara cain quem. Mija paxi' na con, ane om xirao' to tain pain ca xirao' ne ca' ne. ³¹ Oro ca xirao' mi' xuhu' ca', xirao' mi' e' inuhu' pain, ma' ta howa hun Jeju pain ca Cristo ca ma', pain ca Panxica Iri' Jam ca ma' quem inuhu'. Mo ta howa hun, om ta pi' ra ha' ne ca e' nuhu' ta.

Ca hwet pa' caparut Jeju, je pain ca mi' caparut pain ca pa' tamana urut con hwam ma' quem

21 Hwet pa' mami' ac caparut na Jeju pain cacarain cote ne com pain Tiberiades ma'. Ac i ca' na pain ca hwet pa' caparut pane. ² Ca' urut pain ca jao jao ma' xujuxut: Simão Pedro ma'. Tomé ma', co Dídimó na xijein wixicon ma'. Natanael co maqui' nain Caná ca pe ne Galileia ma'. Aji', wata' quem, ca' urut. Ma' 2 nana xucucun win ma' nuxut pain ca taxipa' urut con Jeju ca' quem.

³ Pa' ta' hwam ina ta ac caparut na Simão Pedro.

Warut quem, hwet xut pum ta ac urut con na, mama' mama' pi' pin ac urut na, piri' to ac urut pain na mam' horoho wa ma'. Pa' towa xi' paxi' urut, ane om pa' camain' urut ne.

⁴ Xec pin ta' iri na ne, om ca xec homa ne, xat pe ac cain na cacarain com Jeju. Wirico paxi' na. Ane om querec pin' urut con ne.

⁵ Tomi' querec ac caparut na: Hwijima'. Pa' hwe quem ac caparut na.

Om na, om ca pa' camain' urut ta ac urut na.

⁶ Xin mao jein pain xijein caxi ma', pain iri' cwerein mam' horoho nuhu' ma'. Cut ac hun tara ta ac caparut na.

Xin ac urut pain na. Mija na hwam ta. Om ca cuc na caparut pain ca cut piri' xut con pain mam' horoho nuxut.

⁷ Wata' pain ca iri' win ma' ne capa' Jeju ca', querec pin' inon. Tomi' ac ton na Pedro: Taramaxicon nexi' na co ma' ta inon.

Taraju iri napa' Pedro ne, pe hap ac con na womicon co an pe ca ma', pocom hwet ac con na. ⁸Warut iri na ne, horoho hwet ac urut pain na cacarain. Cuc in qui' ac urut pain na caji wi con hwam pain com ma' quem. Xi to xipana ara urut ta. Ac ca 100 e' ne na metro nein ca to pira ca' urut pain cacarain. ⁹Hwrehwet ca' iri urut pain mam' horoho nuxut ma' ne, querec ac urut pain na wijimain xe ma'. Wara ma' na hwam co xain wa pain. Ma' na capam' quem.

¹⁰Cut paric e' jun hwam co pa' hwe ma' ac caparut na.

¹¹Ma ac ca na Pedro, corom in hwet ac cain na mam' horoho nuxut ma', coc ororo ac cain na caji wi ca mam' pa' urut ma'. Coc ororo coc ororo hwet ac cain na cacarain com. Mija tamana na hwam ta. Ma' 153 na cote ca hwam. Mija paxi' na, ane om wein mao ne mam' pa' urut ne.

¹²Harahap je, cao' xi' e' ac caparut na Jeju. Hehe urut con Jeju quem. Om ca tomi' querec urut con pain ca cain' ca wari' ma quem urut con, om na. Xi querec pin' ara urut con ta. Taramaxicon nexi' cwa' ira urut, ac i ma' na ca coromicat nuxut.

¹³An ac cain na capam' Jeju, maxiram' mi' ac caparut pain na. Ac i ma' non hwam quem, maxiram' mi' ac caparut con na quem.

¹⁴Je win 3 pin ne ca hwet pa' caparut Jeju pain ca taxipa' urut con ca', pain ca e' mami' nuncun pane.

Ca tomi' xo' con Pedro Jeju

¹⁵Pi' pin iri na ca cao' nuxut ne, tomi' querec ac con na Simão Pedro Jeju: Simão, panxica João. Om ca noc mapa'? Tomi' querec te tiquin' ca' mapa' cocon caram cwa' ra non.

E'e', taxi' mapa' pain ca om noc xim ca' Taramaxicon ne ac ca na.

Je ca tomi' xim ca': Querec wet roron oro wari' ne co an xiho' nanain wijimain ovelha ta ac con na.

¹⁶Tomi' querec mami' ac con na: Simão, panxica João. Om ca noc mapa' na ca tomi' querec mami' con ma'.

E'e', taxi' mapa' pain ca om noc xim ca' Taramaxicon ne ac ca na.

Je ca tomi' xim ca': Querec wet roron oro wari' ne co an xiho' nanain ovelha ta na pain ca tomi' mami' con ma'.

¹⁷ Tomi' querec mami' ac con na quem. Je win 3 pin ne ca tomi' querec con ma': Simão, panxica João. Om ca noc mapa' na ca tomi' querec mami' con ma'.

Tomi' xaxa' ac ca na Pedro. Para tama' tomi' querec capa' pain ca om ca noc mapa' capa' ca' ne? 3 pin na ca tomi' querec capa' ma' na ca coromicat nucun. Tomi' ac con na: Taxi' taxi' pi' pin main oro carawa ta Taramaxicon ne. Taxi' mapa' pain ca om noc xim ca' non.

Je ca tomi' xim ca' ac con na Jeju. Querec wet roron oro wari' ne co an xiho' nanain ovelha ta non. ¹⁸ Tomi' tomi' tiquin' ac con na: Pain ca xo' hwara' nem pane Pedro, ara xo' xijem, to pan mon womum, mao main ca mao ta' pan ma. Ane tomi' xim pain i ca' ne, tomi' iri'o' inem: Mara' pin iri ra ne, cut piri' ac main tara mum, pe pan ac quem con womum tara xucun wari', an mao ac quem tara quem. Noc inain ca mao wa paxi' ron, an mao ac quem tara ta na ca tomi' con ma'.

¹⁹ Tomi' iri nain i ma' Jeju ne, tomi' mi' nain ca mi' pin ta' nucun Pedro. Ac i ma' tara ca mi' pin ta' nem ta non. Mi' pin iri ra ne, an hwet ac main tara ca awi tamana nucun Te Iri' Jam ta non quem.

Tomi' ac con na: Hap ra, ja' ja' cara ne ta ac con na.

²⁰ Noro in ac ca na Pedro. Querec ac capa' na pain ca ja' ja' toton ma'. Wata' co iri' win ma' ne ca Jeju quem. Wata' co xao pe ho' non Jeju pain ca cao' querec te nuxut pane, co joc tomi' non Jeju pain ca ma' co tomi' mi' xim nem cocon oro taramaxicon quem ton pane. ²¹ Querec iri napa' Pedro ne, tomi' querec ac con na Jeju pata': Co ma' quem Taramaxicon ne? Ma' carawa ca ara ton non quem non pata'.

²² Para tomi' querec mapa' con quem ac con na. Mo ta param ton pain ca wara mi' pin ca' capa' pain ca in qui' ta' ne ca'. Mo ta param ton pain ca in pa' ton pain ca e' e' wet nucun quem, je i ma' ira. Wum iri na ne, ja' ja' cara pan ne ta non.

²³ Tomi' hwet tomi' hwet xam' ac tococwa na oro wari' co ja' ja' nonon Jeju quem: Om ta mi' pin ca co ma' co iri' win ma' ne ca Jeju ta ca' nanapa'. Ane om tomi' ac i ma' ca Jeju pata' ne. Tomi' ca' e' na pain ca tomi' con Pedro: Para tomi' querec mapa' con quem non. Mo ta param ton pain ca wara mi' pin ca' capa' pain ca in qui' ta' ne ca'. Mo ta param ton pain ca in pa' ton quem, je i ma' ira ta non pata'.

Ca pi' pin ne ca xirao' ne

²⁴ Wata' pain ca taxipa' ton Jeju ca', tomi' hwet pan inuhu' pain oro ca ara ca Jeju pane. Xirao' pe mi' inuhu' pain quem. Taxi' urut pain ca tomi' iri'o' ta' ca' quem.

²⁵ Ma' ma' wet paxi' na oro xijein ca ara ca Jeju pane ira. Mo xi xirao' to xirao' to xam' xine pain oro livro ma', om xi na camain' ne pain ca an to mami' ac xine pain oro xijein cidade pain oro xijein macan'. Ac i ma' na ca coromicat ne ca' quem.

Je i ma'.

21.25 Oro livro cocon hwanana pain cara pane, om ca an xiho' nein oro livro nexi' pain xocori ca'. An e' nanain tapari carawa, xirao' xirao' ac cacain na, joc top ac cacain na quem. Ac i ma' na livro nucucun hwanana pane.

Atos

Oro ca ara nucucun oro apóstolo co pijim' nanain capijacon Iri' Jam

Ca xirao' mi' con Teófilo Lucas

1 Wara xirao' mi' inem con Jeju pain cara pane Teófilo. Xirao' mi' inem pain oro carawa ca ara ca pane, pain ca xo' taramaja ten qui' ca pain ca ca' na cocon pain capijacon Iri' Jam oro wari' pane quem. ²Ca taramaja nucun pane, taramaja taramaja maqui' pa' ac con na xec nein ca an piri' mao con pain pawin Iri' Jam. Xirao' mi' inem pain i ma' con quem. Om om wet iri na ca an piri' mao con pain pawin Iri' Jam ne, tomi' xo' ac tococwa na oro apóstolo co wara tora' ca pane, wiricoco co taxipa' ca ma', co an xin tiquin' mi' jujun pain capija oro wari' ta ca ma'. Je Tamataracon Iri' Jam ca mi' non pain ca tomi' nucun pain ca tomi' xo' tococwa pane. ³Mi' pin iri na ne, e' mami' iri na ne, hwet pa' ac cocon na oro apóstolo nucun. Ma' 40 na xec pain ca hwet pa' ho' hwet pa' ho' cocon pane. Ma' ta querec pin' mahu' pain ca e' mami' ne ca' tata. Wata' ta wata' ta tata. Xin ne, wum ma' ira ac cocon na. Om ca tara pum camain' cocon. Querec pin' nonon pain ca e' mami' nucun pane. Tomi' xo' ac tococwa na con Iri' Jam quem, pain ca taramaxicon pe ho' toton cocon pane.

⁴Maqui' ac ne na xec nein ca cao' pe ho' tococwa pane. Tomi' xo' ac tococwa na: Ta paca' hwein Jerusalém ca' me. Winim' cain' jein Tamataracon Te ca wara tomi' pe mi' cuhu' pane, ca wara tomi' hwet xuhu' pain pane. ⁵João cara pane, ja' nonon pain com oro wari'. Wahu' iri tara ne, om ta pain homa ne, mi' ac xihwe tara pain Tamataracon Te. Ac i ma' na ca tomi' tococwa.

Ca in mao cain pawin Jeju

⁶Aram aram maqui' ac ne na xec nein ca cut in mami' xucucun quem. Tomi' querec ac cocon na Jeju co taxipa' ca ma': Taramaxicon nuxut. Je i

ca' tara oro xec ca to' quiji' pin toton momon oro romano co taramaxicon to ho' nanaparut pain xocori ca' ra? Om ta mi' maparut pain ca taramaxicon pan ta' ca win ma' nuxut pain ca wari' nein Israel urut ca' ra? Ac i ma' na ca tomi' querec cocon ma'.

⁷Om na ta ac tococwa na. Wirico pan na Te co taxi' nain oro xec pain ca ara tain cain oro ca coromicat an pe xo' nucun. Om ca na ne pain ca taxi' pan hwein quem ac tococwa na. ⁸Na e' na pain ca taxi' hwein i ca' ta ac tococwa na. Maqui' pa' iri turuhu' Tamataracon Te ne, mi' ac cuhu' tara pain ca hwara' opa wa. Tomi' hwet ac mahu' tara cocon oro wari' ma', co to nanain Jerusalém ca', co to nanain oro xijein cidade pain Judeia ma', co to nanain oro xijein cidade pain Samaria ma', co to nanain oro xijein macan' pain pira ma' quem, tomi' hwet ac mahu' tara cocon ta. Ac i ma' na ca tomi' tococwa ma'.

⁹Tomi' pin iri nain i ma' ne, an piri' mao ac tocwa na. Querec nana co taxipa' ca pain ca an piri' mao tocwa ma'. Piri' piri' tatep pa' ac con na tajain nanawin. Querec querec om pin ac cocon na. ¹⁰Ca noro pawin caca ma', ca piri' piri' ca ma', ca noro pawin caca ma', ca piri' piri' ca ma', ane ane hwerehwet qui' ac caca na wari' co ma' 2 nana ma'. Towo' na womicocon. ¹¹Tomi' ac cocon na: Para noro pawin hwe ma' quem wari' nein Galileia? Jezu ma', co an piri' mao wa pain pawin ma', main in qui' tarain macan' ta. Querec hun pain ca piri' mao nucun. Ac i ma' tara ca in qui' nucun quem ta nonon.

Ca tora' tocwa Matias ma', pain ca pe rain maxicon Judas Iscariotes tocwa ma'

¹²Quiji' ca' ac cacain na Pacun Nein Oliveira ma'. In mama' xin Jerusalém ta ac caca na, xuruxut mama' ac caca na. Om ca pira ne Jerusalém ma'. Ac ca xica' pe ne na quilômetro nein. ¹³Tan' mama' iri nana ne, corom mama' ac cacain na xirim ca to pan caca ma'. Piri' mama' xi' e', wara ca' na manain xirim pain pawin ma', corom mama' ac caca na. Mo nana: Pedro, João, Tiago, André ma'. Filipe con Tomé ma'. Bartolomeu con Mateus ma'. Tiago panxica Alfeu ma'. Simão co jain jain tamana nonon oro win ma' ca pain ca witan ca' xun cocon oro romano ma'. Judas panxica Tiago ma' quem. ¹⁴Tama' cut in taxipa' xucucun. Tomi' tomi' nonon Iri' Jam quem. Ac ca xica' pe ne na ximicocon pain ca tomi' cocon Iri' Jam. Om ca an to

camain' cacain. Cut in wi xucucun cacam oro narima' ma', wiricam Maria jicon Jeju ma', wiricoco xurucun ma' quem.

¹⁵ Maqui' ac ne na xec nein ca cut in mami' xucucun ma'. Ac ca ma' 120 caca na co cut in nana ma'. Tequi' pe xat ac cain ximijacocon na Pedro ma'. ¹⁶⁻¹⁷ Tomi' ac tococwa na: Tomi' xim inuhu' ta xere. Wara xirao' pe nain capijacon Iri' Jam taramaxicon Davi cara pane. Je Tamataracon Iri' Jam ca mi' non pain ca xirao' pe cain carawa ca ara ta' ca Judas cara pane. Na e' na pain ca hwet pin ne ca xirao' pe nucun con quem. Taxipa' paxi' naparut Judas pain ca taramaja wi caparut pane. Ane o mi' cocon con Jeju oro taramaxicon co quep xun nonon pane ne. Ac i ma' na ca tomi' tococwa ma'.

¹⁸ (Caracat iri na Judas pain ca o mi' cocon con Jeju oro taramaxicon ne, cut mi' ac tocwa na pain dinheiro. Wara ca' na xitot ma', mi' ne pain ac con na waximain, cut mi' ac xucucun na pain dinheiro nein. Je ca mi' pin pe ca quem. Pan' wina quiji' mao na, top ta mao ac ne na curucun, top ta mao ac ne na monocon pain tarawanacon ma' quem. ¹⁹ Taxi' taxi' pi' pin ac cocon na oro wari' co to nanain Jerusalém quem. Je ca o' ma' cacain xitot ca mi' pin pe ca ma'. Aceldama nanain pain capijacon. Totain Wic na ca tomi' mao nein.)

²⁰ Tomi' tomi' tiquin' ac na Pedro ma': Je i ca' ca xirao' pe ca taramaxicon Davi cara pane, pain ca xirao' pe cain Oro Tamara' pain capijacon Iri' Jam pane. Ca' na con:

Mahwerin' tara xiricon ta.

Om om tatara wari' co to nanain ta.

Ac i ma' na ca xirao' pe ca pane. Ma' na wirain con quem. Ca' na con:

Ma' tara xucun wari' co pe tain nain maxicon pain ca
taramaja nucun ma' quem.

Ac i ma' na ca xirao' pe nucun pane.

²¹⁻²² Je ca na e' ne pain ca tora' urut con win ma' nuxut co pe tain nain maxicon Judas cara pane, ma' ta taramaja wi caparut pain ca tomi' hwet urut cocon pain ca e' mami' nucun Jeju oro wari' ta ac tococwa na. Na e' na pain ca tora' e' urut con wari' co wara pe ho' naparut pain cara pane,

1.18 Om paxi' na ca mi' pan con pain dinheiro waximain xitot Judas pane. Wiricoco oro taramaxicon nucucun oro sacerdote co mi' nonon pain. Ane mi' cocon pain dinheiro nucun Judas ne. Je ca mi' non pain Judas ta pan ca Lucas pain ca xirao' nucun ca'. Xi dinheiro nucun ara ne ta.

pain oro xec nein ca pe ho' pe ho' wet caparut Taramaxicon nexi' Jeju pane, je pain ca xo' ja' ten qui' cocon pain com oro wari' João cara pane, je pain ca aram aram maqui' pa' con xec nein ca paca' caparut pane, pain ca an piri' mao tocwa pain pawin pane quem. Ac i ma' na ca tomi' cocon caram ma' Pedro ma'.

²³Xin ne ac cocon na, tomi' ac tococwa na wari' ma'. Ma' 2 nana co tomi' caca ma'. José na wixicon xucun. Ma' 2 na wixicon José ma'. Barsabás, je Justo na xijein wixicon José ma'. Matias na wixicon xucun ma' quem. ^{24–25}Tomi' ac cocon na Iri' Jam: Taramaxicon nuxut ac cocon na. Taramaja wi naparut Judas cara pane, pain ca apóstolo urut ca', pain ca an xin tiquin' mi' jujun pain capija oro wari' maparut pane. Mi' pin iri na ne, mao ac cain na maxicon ca wara coromicat an pe xo' ma con. Je ca tomi' urut pum ca' quem Taramaxicon nuxut ac cocon na. Querec pin' querec pin' xam' main ximicocon oro wari'. Querec momon win ma' nuxut cwa', José con Matias cwa'. An hwet mi' xut con co wara tora' pan ma ma'. Ma' ta taramaja wi caparut pain ca apóstolo urut ca', pain ca an xin tiquin' mi' urut pain capijam ta. Ac i ma' na ca tomi' cocon ma'. ²⁶Ma' xi taramaja wi capari' cwa' ne ac caca na, ara ac cacain na ca ara taxipa' caca ma', mam' ac cacain na wixicon Matias ma' quem. Wum ta ac cocon na, jao jao ma' pan ac cocon na oro xucucun apóstolo co 11 nana ira.

Ca maqui' pin ne Tamataracon Iri' Jam

2 Maqui' iri na xec nein ca tomi' querec te xucucun oro judeu ne, pain Pentecostes pane, cut in ac caca na oro wari' co howa nana ma'. Cut in to xucucun pain xirim ca to pan caca ma'. ²Ane ane taraju ac cacain na ca nuru mip ne ma'. Maqui' nain pawin. Ac iri' cote ne camana' na. Nuru nuru hwet pa' hwet pa' xam' ac tococwa na pain xirim ca xao to to caca ma'. ³Querec ac cacain na carawa ca ac xe ma'. Ac ca tom ne wijimain xe na. Wawaran pi' pin ac ne na, pe ho' pe ho' xam' ac cocon na pain

1.26 Ara taxipa' ac i ca' nana pane: Xirao' xirao' xam' nanain wixicocon pain oro wijimain pacun ma', xin xin ac cacain na. Ma' ta taxi' xun win ma' nexi' co taramaja wi xim napari' ta nana. Xin iri nanain ne, noro ac cacain na, mam' ac cacain na wixicon Matias ma'. Wum tara ta ac cocon na, apóstolo pin ac ca na Matias pane. **2.1** Pain xec nein Pentecostes pane, tomi' querec te nana oro judeu. Ma' mija nana co maqui' nanain Jerusalém, je curucucun pane. Tomi' querec te tamana nana, xi om ne ca paca' pin ara ne oro caramaji totacocon.

winacocon. ⁴Corom hwet corom hwet xam' ac cocon na Tamataracon Iri' Jam. Tomi' ac cacain na oro xijein ca capija wa ca om wara tomi' taxi' caca ma' quem. Je Tamataracon Iri Jam ca mi' nonon pain ca tomi' wa ma'.

⁵Ma' mija nana oro judeu co to nanain Jerusalém pane. Win xumu nanain oro ca param nucun Iri' Jam. Maqui' nanain oro xijein macan' pain pira. ⁶Taraju iri nanain ca nuru mip ne ma' ne, cut in ac xucucun na oro wari'. He ac caca na. Cain' cain' xira cocon quem ac caca na, xi om ne ca taraju taraju xam' ara cocon co howa nana pain ca tomi' cacain iri' capijacocon ta. ⁷Wa wa tamana nonon. Om ca wari' nein Galileia caca co tomi' nanain oro capijaxi' ca' ra ac xucucun na. ⁸Cain' cain' xira cocon quem? Ma' ca para taraju taraju xam' xin iri' capijaxi' ca' cocon ne? ⁹Maqui' maqui' xam' irin oro xijein macan' ta ac xucucun na. Mo iri' pain ca maqui' iri' ca', Pártia, je pain Média, je pain Elão. Ma' nana oro xucucun co maqui' nanain Mesopotâmia, je Judeia, je Capadócia. Ma' nana co maqui' nanain Ponto, ma' nana oro xucucun co maqui' nanain macarain Ásia, ¹⁰je Frígia, je Panfflia quem. Ma' nana co maqui' nanain Egito. Ma' nana co maqui' nanain oro xijein cidade pain Líbia ca pe ja' pan nain Cirene ma' quem, ac i ma' na oro macaraxi'. Ma' nana co maqui' nanain Roma quem. ¹¹Ma' nana co iri' judeu nana cwa', ma' nana co an xiho' e' nanapari' pain ca tomi' ha' xun Iri' Jam cwa' quem. Ma' nana oro xucucun co maqui' nanain Creta je Arábia quem. Taraju taraju xam' ururun pain ca tomi' cacain iri' capijaxi' ca', pain ca tomi' hwet cacain ca hwara' opa nucun Iri' Jam ma'. Ac i ma' na ca tomi' xucucun ma'.

¹²Wa wa wa wa xam' nana oro wari' ma'. Cain' cain' xira cocon ne? Para tomi' cacain oro capijaxi' ca' quem nana. ¹³Ane ma' caca oro xucucun co tatam' e' nonon ne. Tomi' xirac nonon. Toc tamanain to ara xi' nanain ca mana' nein comi uva ta nonon.

Ca pijim' cocon oro wari' Pedro

¹⁴Tequi' pe ac ca na Pedro. Wirico, wiricoco oro win ma' ca co 11 nana ma' quem. Tomi' ac cocon na oro wari', tomi' mip nonon: Tomi' xo' xuhu' pain carawa ca hwet pa' naparut ta oro win judeu ta'. Wahu' quem, pain ca to hwein Jerusalém ca', tomi' xo' xuhu' pain ta. Taraju wet xine ta. ¹⁵Toc tamanain to nana ta paxi' maparut, ane om toc tamanain to urut ne ac tococwa na. Xi pawin querec ca xina ta. Om ca toc tamanain to wa

ca mana' nein comi uva pain xo' xec ta. ¹⁶Je ca tomi' xuhu' ca' ac tococwa na. Pain ca tomi' urut pain oro xijein ca capija wa ca om wara tomi' taxi' urut ca', je i ca' ca xirao' pe ca profeta Joel cara pane. ¹⁷Ca' na ca xirao' pe cain ca tomi' nucun Iri' Jam pane:

Maqui' iri tara oro xec nein ca mao rain macan' ta ton Iri'
 Wari' ne co wara tomi' pe ta' ne,
 mi' mi' xam' ac toton tara pain Tamatara oro wari'
 pain oro xijein macan'.

Tomi' hwet ac cacain tara capija mana panxicaca.
 Co xo' horon nana ma', an hwet mi' ac toton tara pain oro carawa
 ca querec je toton pain ca ac ca tohwein' caca ne ma'.
 Co mara' pin nana ma' quem, mi' ac toton tara pain
 iri' ca tohwein' wa quem.

¹⁸Maqui' iri tara oro xec nein ca mao rain macan'
 ta ton Iri' Wari' ne ne,
 mi' ac toton tara pain Tamatara oro wari' co taramaja mi' nanapa'.
 Ca tarama' nucucun, ca narima' nequequem quem, mi' ac
 tatam tara pain Tamatara.

Tomi' hwet ac cacamain tara capija.
¹⁹Ara an hwet pe tain pain nanawin oro carawa jimao
 ca om ara taxi' ne ca wari' wa.

Wa wa ac cacapa' tara oro wari'.
 Ac i ma' ta' pain macan' ma' quem.
 Querec pin' ac cacapa' tara pain ca hwara' opa ne.
 Mija tara wic, mija tara xe,
 ac tajain nanawin tara ca mixem ne tain' ma' quem.

²⁰Om ta maqui' querec ne iri' xec nein ca ac juiz ta' ca',
 pain ca iri' Taramaxicon ta' ca',
 mixem pin ac ca tara xina,
 paca' pin ac ca tara panawo' quem.

Mam' maqui' ac tain tara ca hwara' opa tamana ne.
 Wa wa tamana tatarapa' oro wari'.

²¹Oro wari' co wara xiram pa' xut nanapa' pain ca
 Taramaxicon ta' ca',
 co wara to' witan xut ta nanapa' pain ca om maqui' querec ne ma',
 witan witan pi' pin ac caca tara ta.

Ac i ma' na ca xirao' pe cain ca tomi' nucun Iri' Jam profeta Joel cara pane.

²²Taraju wet xine me oro win ma' ne pain ca wari' nein Israel iri' ca' ac cocon na oro wari' Pedro. Tomi' hwet xuhu' con Jeju cara pane, co maqui' nain Nazaré pane. Taxi' hun pain ca tora' iri'o' con Iri' Jam pane, xi mi' ara con pain ca ara cain carawa ca om ara taxi' ne ca wari' wa pane. Wa wa tamana hun quem. Xi querec ara hun pain ca ara cain ta. Querec pin' hun pain ca hwara' opa nucun quem. ²³Iri' Jam ma', wara an pe xo' nain ca coromicat nucun pane, pain ca main quep totoron ta cuhu' con. Je ca om narain ho' cuhu' con. Quep hun, to' pa' pin jun ta ac huhun na oro caracat co om tomi' ha' camain' nonon Iri' Jam. Tatatain mi' ac cocon na pain pana. ²⁴Ane to' witan ca' con pain ca mi' pin cara wa Iri' Jam ne. To' e' mami' non. Xi ha' con pain ca mi' pin cara wa ta. ²⁵Noro jein ca xirao' pe nucun taramaxicon Davi cara pane, pain ca xirao' pe ca con Iri' Wari' nucun Iri' Jam co wara tomi' pe pan ca pane. Ca' na con pane:

Tama' querec inem pain ca pe ho' mapa' Taramaxicon ne.

Om ta ja' naro cacapa' oro wari' cwa',

xi pe ja' pan ara mapa' ta.

²⁶Je ca tomi' querec te tamana ta' ca'.

Tomi' hwet inain ca tomi' querec te tamana ne.

Mi' pin paxi' ta'.

Ane taxi' xim pain ca to' e' mami' xim mapa' ne.

Winim' inem pain.

²⁷Om ta an pe mapa' pain ca to pan caca co wara cono' nana.

Om ta miri'om mapa' pain ca Iri' Wari' ta' ca', pain ca win

xumu xim pain ca tama' tomi' ha' xim ca'.

Nain ho' xim mapa' pain ca cunu mao ne cwere.

²⁸Wara tomi' pe mi' mapa' pain ca e' mami' ta' ne.

Ja' tomi' querec te tamana xim mapa' pain ca pe ho' cara xim ta.

Ac i ma' na ca xirao' pe ca Davi pane, pain ca xirao' pe ca con Iri' Wari' nucun Iri' Jam co wara tomi' pe pan ca pane.

²⁹Je ca tomi' xuhu' ca' xere ac tococwa na. Mi' pin na hwanana nexi' Davi cara pane. Taxi' urun pain ca mi' pin nucun. Taxi' urun pain ca an corom pe xine curucun pain manain pacun quem. Pe pe wet nain i ma' manain pacun ca an corom pe xine curucun. ³⁰Ane xirao' pe ac i ma' ca pane ne, xi profeta pan ara ca ta. Taxi' nain carawa ca maqui' ta' ma', taxi' non Iri' Jam pain ca wara tomi' pe nucun pane, pain ca main ma'

tara winam co taramaxicon pe tain nain maxum ta qui' con pane. Om ca mixein ca Iri' Jam quem. Iri'o' ta, main ma' tara winam co taramaxicon pe tain nain maxum ta non pane. ³¹ Wara taxi' nain carawa ca ara ton non Cristo co wara tomi' pe ca Iri' Jam pane. Je ca na con pain ca xirao' pe cain ca e' mami' nucun. Wara taxi' non pain ca om an pe pin xun tocwa pain manain pacun. Wara taxi' non pain ca om cunu mao ta' ne curucun quem. ³² To' e' mami' con Jeju Iri' Jam ma' ira, iri'o' ta. Xi querec ara urut con pain ca e' mami' nucun ta. Querec querec xam' urut con pain ca taxipa' urut con ca'. ³³ An piri' mao non pain pawin Iri' Jam quem. Xao pe ho' ne pain iri' cwere ca', xi querec awi tamana ara mapa' ta arain ac con na. Mi' ac con na pain Tamataracon ca wara tomi' pe ca pane. Je ca maqui' ne pain xocori ca' quem. Mam' naparut pain Tamataracon Cote ca. Je ca querec hwe ca', je ca taraju hwe ca' quem. ³⁴ Taxi' urun hwanana nexi' Davi pain ca om xirao' pe pan xucun pain ca xirao' pe ca con Jeju ma', xi piri' mao pan cain pawin ta. Jeju pan co piri' mao nain pawin. Wara xirao' pe ac i ca' na Davi pane, pain ca tomi' mi' con Cristo pane. Ca' na ca xirao' pe ca pane:

Tomi' non Taramaxicon ne Iri' Jam co iri' Taramaxicon ma':
Xao pe ho' ne pain iri' cwere ca'.

³⁵ Aram aram maqui' pa' ac quem tara xec nein ca to' quiiji'
pin toton ta' co noc nenem ma'.

Mi' ac xim tara pain ca taramaxicon pe ho' cara momon ta, ac i ma' na ca xirao' nucun Davi pane.

³⁶ Je ca tomi' xuhu' ca' oro win ma' ne ac tococwa na. Wahu', oro win ma' iri' pain ca wari' nein Israel iri' ma' quem, taraju pa' jein i ca' con Jeju cara pane, co tatatain mi' hwe pain pana pane: To' taramaxicon pin non Jeju Iri' Jam ta. Wum co Cristo ma', co wara tomi' pe ta' pane. Taramaxicon pe ho' roron oro wari' ta non pari'. Ac i ma' na ca tomi' cocon oro wari' Pedro ma'.

2.31 Ca' na ca tomi' mao nein ca Cristo wa cocon oro judeu pane. Iri' wari' co wara tora' ca Iri' Jam pane ta nana. Iri' Taramaxicon tara, wirico tara co to' witan toton nonon oro wari' ta nana. **2.33** Taraju pa' jein ca tomi' mao ne ca xao pe ho' xine iri' curucun taramaxicon ma'. Xao pe ho' pin iri' nain iri' curucun taramaxicon wari' ne, querec pin' ac tocwa na pain ca taramaxicon wi pin con quem. Ac i ma' na Jeju ma' quem. Xao pe ho' pin iri' nain iri' curucun Iri' Jam ne, querec pin' ac tocwa na pain ca Taramaxicon wi pin ca con quem

³⁷Taraju pin iri nonon pain ca pijim' nucun ne, jain jain ac caca na, toron tamana na ximicocon. Cain' cain' xuxut quem xere ac cocon na Pedro cocon oro win apóstolo ca ma'.

³⁸Cwirin' pin jein ca caracat nuhu' ta ac cocon na Pedro. Ja' ja' pi' pin ac xihwe tara pain com quem. Ma' ta querec pin' xihwe pain ca howa pin hun Jeju Cristo. Ma' ta xic am pin cain ca caracat nuhu' Iri' Jam ma' quem. Mi' ac cuhu' tara pain Tamataracon. ³⁹Je ara xi' na ca wara tomi' pe cuhu' ta. Wahu', mana panxihwe cocon waram winahu', oro wari' pain oro xijein macan' quem, wara tomi' pe mi' nuhu' pain Tamataracon. Wara tomi' pe wara tomi' pe pi' pin tata pain Tamataracon oro wari' co howa xine pan ca Taramaxicon Iri' Jam ta. Ac i ma' na ca tomi' cocon oro wari' Pedro ma'.

⁴⁰Mija na ca tomi' mip cocon ma'. Hu tamana nonon. Howa jun Jeju, ma' ta witan hwe, ma' ta om win wap cuhu' cocon oro caracat co em' tamana nana pain oro xec nexi' ca' na pain ca hu cocon ma'. ⁴¹Mija nana wari' co howa nanain ca pijim' nucun Pedro. Ja' ac tococwa na pain com. Mija nana. Ac ca 3.000 caca na. Je i ma' xec nein ca jao jao ma' pin cocon oro wari' co howa nonon Jeju pane.

Ca tomi' querec te xucucun co howa nana pane

⁴²Co howa nana pane, win xumu tamana nanain ca pijim' nucucun oro apóstolo co tomi' hwet nonon pain oro ca tomi' nucun Jeju. Tama' ca' na xut pain nonon. Tomi' querec te tamana xucucun pain ca cut in xucucun, je pain ca cao' wi taxipa' caca, je pain ca tama' tomi' cocon Iri' Jam quem, je curucucun pane. ⁴³Mi' tata pain ca hwara' opa wa oro apóstolo pain ca ara cacain oro ca om ara taxi' ne ca wari' wa quem. Je ca jin' tamana caca oro wari' ma', pain ca in ac tamana cocon Iri' Jam ma', pain ca querec pin' cocon pain ca hwara' opa nucun ma'. ⁴⁴Jao jao ma' xucucun oro wari' co howa nonon Jeju. Ac ca xica' pe ne na ximicocon. Cut mi' caracan xucucun pain oro caramaxicocon quem. ⁴⁵Ma' iri nana oro win ma' caca co ximin nana ma' ne, vender vender ac cacain na macaracocon je oro caramaxicocon. Ma' ta xiram pa' xiram pa' xam' xuxun co ximin nana

2.42 Cao' wi taxipa' nana pane. Pi' pin iri na ca cao' nucucun ne, toc ac cacain na comi memem pain ca mam' pe wet cacain ca mi' pin nucun Jeju, je pain ca e' mami' nucun quem.

cwa' nana. ⁴⁶Pain oro xijein xec ma', cut in to taxipa' xucucun pain ca tao' caho' nein cote ne xiricon Iri' Jam. Tomi' querec te tamana xucucun pain ca toc wi cacain comi memem, je pain ca cao' wi caca pain xiricocon quem. Ac ca xica' pe ne na ximicocon pain ca tomi' querec te xucucun ma'. ⁴⁷Tama' in ac nonon Iri' Jam pain ca an hwet mi' cocon pain ca tomi' querec te nucucun ma', pain ca awi ma ta cocon ma'. Oro xucucun wari' co to nanain Jerusalém ma', tomi' querec te nonon quem. Pain oro xijein xec ma', ma' ac caca na co xo' howa pin nana ma', co to' witan ca' wawa pain ca caracat nucucun ma'. To ho' pin ac tococwa na co wara howa nana ma' quem. Wirico Taramaxicon nexi' co to' mija nonon ta.

Ca quep xio pin tocwa wari' co carama pe

3 Maqui' ac ne na xec pain ca mama' cacain cote ne xiricon Iri' Jam Pedro con João. Piquirim pin na xina, pain 3 hora ma', mama' ac caca na. Wirico co ma' xina nucucun oro wari' pain ca tomi' taxipa' cocon Iri' Jam pain xiricon pane, je curucucun pane. ²Hwet xin iri nanain ne, wara an mamam' nonon wari' co carama pe ma'. Wara carama pe qui' nain ca xo' pan' qui' nucun pain ca pije' nucun. An mamam' an mamam', wara ca' na cote ne capijain manain xirim ca corom ac caca oro wari' ma', an terem' ac cocon na. Capijain Man Ca Awi ta na wixinain cote ne manain xirim ma'. Je curucucun pane, an mamam' an terem' taxipa' nonon pain i ma', pain oro xijein xec. Ma' ta xiram pa' xine, mi' xine pain dinheiro ta cocon oro wari' co corom xi' nana ma' nonon.

³Corom xin ca tao' caho' nein xiricon Iri' Jam ca' iri nana Pedro con João ne, querec pan ac cocon na co ma' co terem' pe nain i ma'. Xiram pa' xine, mi' xine pain dinheiro ta ac tococwa na.

⁴Noro tamana pan ac cocon na Pedro con João ma'. Noro xut ta ac con na Pedro.

⁵Noro ac tococwa na. Mi' tatarapa' xi' pain carawa ma tata.

⁶Tomi' ac con na Pedro: Om paxi' napa' dinheiro ta, ane na capa' pain ca ara mi' xim pain xijein carawa ne. Ara mi' xim pain, xi om ne ca ara mi' ron pain ara capa' Jeju co maqui' nain Nazaré pane ta. Tequi' pe ra e'. Xut ra ta. Ac i ma' na ca tomi' con ma'. ⁷Quep ac con na pain micon ma', pain iri' curucun ma'. An tequi' pe ac con na. Ane ane hwara' opa hap pin ac ne na caximacon pain caramacon quem. ⁸Tequi' pe hap ac ca na,

xut pin ac ca na quem. Ja' ja' ac tococwa na pain ca corom mama' cacain xiricon Iri' Jam ma'. Xut in na, to' jao cun na pain ca tomi' querec te nucun quem. Awi tamana na Iri' Jam, awi tamana na Iri' Jam ta na ca tomi' nucun. ⁹Querec querec xam' nonon oro wari' ma', pain ca xut nucun ma'. Taraju nonon pain ca awi tamana na Iri' Jam ta ca ma' quem. ¹⁰Querec pin' nonon quem. Wirico xin co ma' co xao pe ho' e' nain Capijain Man Ca Awi pain xiricon Iri' Jam cara ne? Wirico xin co tama' xiram pa' xine, mi' xine pain dinheiro cara ne, ac i ma' na ca tomi' xucucun ma'. Cain' cain' xira ne ac xucucun na, wa wa ac caca na pain ca querec cacain carawa ca ara non co ma' co carama pe ira.

Ca pijim' cocon oro wari' Pedro

¹¹Quep quep wet non Pedro con João co ma' co quep xio pin wa ma'. Wa wa xam' nonon oro wari' quem. Jein hwet ac tococwa na pain ca tacan tiquin' ne xiricon Iri' Jam pain cacarain ma', ca Maxicon Salomão caca oro wari' ma', je i ma' wixinain cocon. Jein jein hwet tata pain i ma'. ¹²Querec iri nonon oro wari' Pedro ma' ne, pain ca jein hwet cocon ma', tomi' ac cocon na: Para joc herehe ne tucuhu' pain ca querec hun co cwa', pain ca xut pin ca ca' oro win ma' ne pain ca wari' nein Israel iri' ca? Para noro tamana maparut quem? To' xut totoron pain ca hwara' opa pan nucucun ma' maparut ra? To' xut totoron pain ca xuruxut xo' pan nucucun pain ca win xumu e' cacain ca param nucun Iri' Jam ma' maparut ra? ¹³Om na ta! Ca hwara' opa pan nucun Iri' Jam ta, co Iri' Jam ne caca hwanana nexi' cara pane, Abraão con Isaque con Jacó cara pane, wirico pan na co quep xio pin non wari' cwa', wirico co an hwet mi' nuhu' pain ca hwara' opa tamana nucun Jeju cara pane, co taramaja mi' taxipa' non pane. Quep jun Jeju ta huhun oro taramaxicon nuhu' pane, o mi' ac cocon na con taramaxicon Pilatos quem. Ma' ta to' pa' pin cocon oro soldado nem ta nonon pane. Om pin ton paxi' non Jeju Pilatos pane. Ane tomi' napat pan hun ne. Noc urut con ta hun. ¹⁴Iri' Wari' co wara tora' ca Iri' Jam paxi' na Jeju pane, pain ca to' witan roron oro wari' ta con pane. Tama' xut xo' paxi' na pane quem. Ane noc urut con ta hun Pilatos ne. Ta om pin mon me ta hun. Param urut con co ma' co to' pa' wari' ma', wirico tara co om pin ma ta hun. ¹⁵To' pa' pin iri nonon Jeju oro soldado ne, ac ca to' pa' pan hun na. To' pa' pin hun ma' ira! To' pa' pin hun co ma' co to'

e' napari' cwa', co mi' xim napari' pain ca e' cara wa pain pawin ta. Ac i ma' paxi' hwe, ane to' e' mami' con Iri' Jam ne. Querec urut con pain ca e' mami' nucun quem. ¹⁶Wirico Jeju co to' xio pin non wari' cwa'. Querec hun. Querec pin' hun quem. Awi pin na, xut pin na, xi om ne ca howa ara urut con Jeju ta. Querec querec xam' hun ma' ira tata.

¹⁷Taxi' paxi' inuhu' ta xere ac tococwa na. Taxi' inonon oro taramaxicon nexi' pain ca judeu iri' ca' quem. Wirico paxi' na Jeju co wara tomi' pe pin ca Iri' Jam pane, ane om querec pin' hun ne. Je ca noc urut con ta hun pane. Je ca to' pa' pin hun quem. ¹⁸Wahu' paxi' na co to' pa' non pane. Ane ara pan cain ca wara tomi' pe nucun Iri' Jam ne. Ac i ma' na ca hwet pin ne capijacon ca xirao' to caca oro profeta pane. Jain jain tamana tara pain ca to' pa' pin tocwa Cristo ta na ca xirao' to cacain ca tomi' pe nucun Iri' Jam pane. ¹⁹Je ca tomi' xuhu' ca' ac tococwa na. Cwirin' pin je. Coromicat ni pin je. Howa jun Iri' Jam, ma' ta xic am pin cain ca caracat nuhu'. ²⁰Ma' ta maqui' pa' cuhu' oro xec nein ca xao to wa ne xumuhu' con Taramaxicon nexi'. Ma' ta mam' mami' capari' con Jeju ma', co Cristo ma', co wara tora' ca pain ca taramaxicon pe ho' roron ta con pari'. ²¹Na e' na pain ca mon to wet cain pawin pain xocori ca'. Mon to wet mon to wet ca' tara, maqui' pa' ac con tara oro xec nein ca quep xocori pin tain cain oro carawa Iri' Jam. Win ne ca wara tomi' pe ca pain cara pane, pain ca tomi' hwet jujun pain ca tomi' ne oro wari' ta tococwa oro profeta nucun pane. ²²Je ca wara tomi' pe ca Moisés cara pane. Ca' na con pane:

Main mi' turuhu' con profeta Taramaxicon Iri' Jam ma'.

An xiho' tarapa' pain ca profeta ta' ca'.

Iri' win ma' nuhu' tara.

Na e' na pain ca taraju wet hun.

Tomi' ha' jein oro ca tomi' nucun quem.

²³Wari' co om tomi' ha' non ma', om ta wari' ne mami' cocon oro wari' nucun Iri' Jam.

Ac i ma' na ca wara tomi' pe ca Moisés pane.

²⁴Tomi' ac i ma' tomi' ac i ma' xam' nana oro profeta pane. Samuel, oro xucucun profeta co maqui' nana pa'ao' quem, wara tomi' pe nanain oro carawa ca ara napari' pain oro xec nexi' ca'. ²⁵Oro ca tomi' pe nucun Iri' Jam ca an xin tiquin' mi' caca oro profeta pane, je ca tomi' pe pan capari' Iri' Jam quem. Wahu', warut, ca' iri', tomi' pan napari' cocon. Capijacon ca tomi' an pe xo' mi' cocon hwanana nexi' pain ca tomi' qui' con Abraão

cara pane, wari' pan co tomi' ca quem. Ca' na ca tomi' con pane: Aram aram ma' pin iri tara winam cocon waram winam con panxima ne, mi' ac ton tara pain ca ara mi' cocon pain ca awi tamana wa oro wari' pain oro xijein macan'. Ac i ma' na ca wara tomi' pe con Abraão Iri' Jam pane.

²⁶ Je ca tomi' xuhu' ca' ac tococwa na. Iri' Jam ma', mam' napari' con Jeju co tama' taramaja mi' non pane. Mam' cain' napari' con pain ca judeu iri' ca'. Ma' ta ara mi' momon pain oro ca awi wa ta non pari'. Ma' ta cwirin' cwirin' pi' pin cacain oro ca caracat nucucun pum ta non pari'. Ac i ma' na ca pijim' cocon oro wari' Pedro pane.

Ca quep cocon Pedro con João oro taramaxicon

4 Pijim' pijim' wet nonon oro wari' Pedro con João ma', maqui' ac caca na oro sacerdote cocon taramaxicon nucucun oro guarda co querec wet nanain cote ne xiricon Iri' Jam ma', cocon oro saduceu ma' quem, hwet ac cocon na Pedro con João. ² Mana' tamana nana. Om ca hohot camain' cocon ca pijim' nucun Pedro con João ma'. Xi pijim' ca' ara caca: Main e' mami' tatara oro wari' co wara cono' nana ta. Win ne ca e' mami' ca Jeju cara pane, ac i ma' paxi' na ca pijim' nucucun. Ane om hohot pan cocon oro sacerdote cocon oro win ma' caca ma' ne. ³ Je ca quep tococwa ma'. Tao' to ac tococwa na pain xirinain ca tao' to tao' to to wa ma'. Xec pa' totoron e' ac tococwa na. Xi xo' um pin ara ne cocon ta nana. ⁴ Ane howa mija caca co taraju nanain ca pijim' nucun Pedro con João ne. Mija pin nana co howa nonon Jeju. Ac ca hwet pin nein na ca 5.000 nucucun pain ca tarama' nucucun.

⁵ Xec pin iri na ne, cut in ac xucucun na oro taramaxicon. Oro taramaxicon nucucun oro judeu ma', cocon oro co ca' na taxipa' nanain ca xirao' nucun Moisés ma' quem, cut in to ac xucucun na pain Jerusalém. ⁶ Ma' na sacerdote co iri' taramaxicon ma' quem, wirico Anás ma'. Ma' na Caifás con João con Alexandre, ma' nana oro xucucun co nari nonon Anás ma' quem. Cut in ac xucucun na. ⁷ O corom qui' jujun ta ac tococwa na oro guarda ma', o corom qui' ac tococwa na Pedro con João. Coco' to jein i ma' ta ac tococwa na, tomi' querec ac tococwa na: Cain' cain' hun

4.1 Oro sacerdote ma', taramaja to nanain cote ne xiricon Iri' Jam. Tomi' mi' nonon con Iri' Jam oro wari', tom tain' mi' nonon pain carawa nucucun quem. 4.1 Oro saduceu ma', om ca howa xo' caca. Om ca e' mami' xi' caca oro wari' co cono' nana ta nana.

ne? Ma' co mi' nuhu' pain ca hwara' opa nuhu' pain ca quep xio pin hun quem? Ma' wixi ca an hwet hwe pain ca quep xio pin hun ma' quem? Ac i ma' na ca tomi' querec tococwa ma'.

⁸Tomi' ac ca na Pedro. Pe ho' mip non Tamataracon Iri' Jam, tomi' ac tococwa na: Tomi' xim inuhu' ta oro taramaxicon. Tomi' xim inuhu' pain ca taramaxicon to ho' maparut pain ca judeu iri' ca' quem. ⁹Tomi' querec maparut pain ca quep xiho' urut con co cwa' co carama pe ira. Cain' ca quep xio pin ac hun ma' quem maparut. ¹⁰Je ca tomi' urut pahu' ca', taraju pa' jein ca tomi' urut pahu' ca'. Taraju pa' taraju pa' pi' pin tatara oro win ma' nexi' pain ca wari' nein Israel iri' quem. Xio pin na wari' cwa', co xat ja' pan nuhu' cwa'. Ca hwara' opa nucun Jeju Cristo co maqui' nain Nazaré pane, je i ma' pan na ca to' xio pin non ma'. Tatatain mi' paxi' hun pain pana pane, ane to' e' mami' con Iri' Jam ne. ¹¹Wirico Jeju co tomi' mi' ne capiiacon Iri' Jam pane:

Pacun ca noc hwe pane, pain ca quep xin paxi' hwein xirim pane,
aram aram iri' pacun nein xirim pin na ta.

Ac i ma' na ca tomi' ne capiiacon Iri' Jam con Jeju pane. ¹²Je ca tomi' xuhu' ca' ac tococwa na. Xica' pe na Jeju co to' witan taxi' napari'. Om na xucun co to' witan roron oro wari' ta ca Iri' Jam pari', om om na pain oro xijein macan' pain pira quem. Xica' pe na Jeju co to' witan taxi' napari'. Ac i ma' na ca pijim' cocon oro taramaxicon Pedro ma'.

¹³In ac nonon Pedro con João oro taramaxicon ma'. Xi querec pin' ara cocon pain ca om tomi' jin' nucucun ta. Querec pin' nonon pain ca om taraju pa' homa caca, querec pin' nonon pain ca om ca' na xo' tococwa pain oro ca ca' na wa. Querec pin' nonon pain ca taxipa' cocon Jeju quem. ¹⁴Hehe e' nana. Tomi' in pin xun paxi' nonon, ane om tomi' in pin ac cocon ne. Xi querec ara cocon co to' xio pin wa ma'. Xat pe nain i ma', xat pe ho' non Pedro con João. ¹⁵Je ca cut hwerehwet to ca' jujun pain ca cut in to nuxut pain ca Sinédrio urut ca' tococwa oro guarda. Cut hwerehwet

4.11 Je ca tomi' ne capiiacon Iri' Jam pain Salmo 118.22. Tomi' mi' tata oro taramaxicon cocon oro co ca' na taxipa' nanain ca xirao' nucun Moisés. Wiricoco nana co an xiho' nonon co quep xin paxi' nanain xirim. Jeju ma' iri na ne, wirico co an xiho' nain pacun ca mam' quep xine xirim. **4.15** Ma' 70 nana oro taramaxicon co cut in nana. Sinédrio nonon oro wari' pain ca cut in xucucun. Ma' na iri' taramaxicon nucucun oro sacerdote, ma' nana oro xucucun taramaxicon nucucun oro sacerdote ma' quem, ma' nana oro fariseu cocon oro saduceu ma' quem. Ac juiz nana, taraju nonon oro wari' co tomi' em' nonon oro win ma' caca, tomi' mi' tomi' mi' ac tococwa na pain ca wap wa oro wari' co em' nana quem.

mama' iri tata ne, tomi' xo' ac xucucun na oro taramaxicon. ¹⁶Cain' cain' xuxun quem? Xi taxi' ara tococwa pain ca ara cacain carawa ca om ara taxi' ne ca wari' wa ta. In ac in ac xam' nonon pain oro wari' co to nanain Jerusalém ca'. Om ca mixein nana ta ac xuxun ta. ¹⁷Na e' na pain ca tomi' jin' xuxun. Tomi' mip ca' xuxun: Ta pijim' hwet mami' huhun con Jeju oro wari' me ta xuxun. Ma' ta om wawaran mama' ne ca pijim' nucucun, ma' ta om taraju taraju tiquin' caca oro wari' ta xuxun ta. Ac i ma' na ca tomi' xo' nucucun oro taramaxicon ma'.

¹⁸Cut corom qui' jujun ta ac tococwa na oro guarda, corom qui' ac ca na Pedro con João. Tomi' mip ac tococwa na: Ta an hwet camain' hwein wixicon Jeju pain ca pijim' huhun oro wari' me. Ta ca' na camain' huhun pain ca tomi' nucun quem me tata.

¹⁹Ane tomi' pan caca ne: Cain' cain' xuxut quem? Tomi' in pin xut con Iri' Jam pain ca tomi' ha' xut pahu' ra? Hohot toron Iri' Jam pain ca tomi' in pin xut con ra? Cain' cain' xuxut quem? Tomi' xut e'. ²⁰Xi tacana to taxi' urut ta. Om ca tacana to ac urut. Om ca pijim' hwet maho' ac urut pain oro ca querec urut pane, om ca pijim' hwet maho' ac urut pain oro ca taraju urut pane. Ac i ma' na ca tomi' tococwa ma'.

²¹Tomi' mip mami' pan ac cocon na oro taramaxicon. Ma' ta jin' cacapari' ta nana. Pa hwerehwet ac cocon na, mama' je ta ac cocon na. Om ca wap ac tococwa, xi jin' ara tococwa oro wari' ta. In ac tamana nonon Iri' Jam oro wari' pain ca querec cacain ca ara nucun Pedro con João ma'. ²²Xi wara hwana ara ca wari' co quep xio pin wa pain ca ara an hwet mi' tocwa pain ca hwara' opa nucun Jeju ta. Wara tiquin' ca' nain ca 40 ne cawaxi' nucun quem.

Ca tomi' cocon Iri' Jam co howa nonon Jeju

²³Pa hwerehwet iri tata Pedro con João ne, maji in hwet xuxun oro win ma' nexi' ta ac caca na, in hwet ac cocon na. Tomi' hwet tomi' hwet pi' pin ac cocon na pain oro ca tomi' nucucun oro taramaxicon nucucun oro sacerdote cocon oro taramaxicon nucucun oro judeu. ²⁴Taraju iri tata ne, tomi' xun Cotere' Iri' Jam ta ac caca na, tomi' ac cocon na. Ac ca xica' pe ne na ximicocon pain ca tomi' cocon ma'. Tomi' ca' nonon: Taramaxicon nuxut ac cocon na. Wum co quep nain pawin je macan' je oro com ca'. Quep quep pi' pin main oro carawa ca to nain quem. ²⁵Wum co mi' non

pain ca tomi' wa hwanana nuxut Davi cara pane, co taramaja mi' nem pane. Je Tamataram ca mi' non pain. Tomi' ca' ron ta non pane:

Para mana' caca oro wari' co om judeu nana quem?

Para coromicat an to xo' ximama' caca oro wari' nein Israel ma' quem, pain ca ari xun cocon Taramaxicon ne quem?

²⁶Mixita xi' nana oro taramaxicon nucucun oro wari' cwa'.

Wara cut in xucucun.

Maji mixita xun Taramaxicon Iri' Jam.

Maji mixita xun Cristo ta xucucun.

Ac i ma' na ca tomi' ca hwanana nuxut Davi cara pane ta Coturut Iri' Jam.

²⁷Iri'o' na quem Taramaxicon nuxut ac cocon na. Cut in xucucun oro taramaxicon pain Jerusalém pane. Wirico Herodes con Pôncio Pilatos cocon oro win ma' nuxut pain ca judeu urut ca', cocon oro wari' co om judeu nana ma' quem, cut in xucucun pane. Tomi' xo' ac xucucun na con Panxima Jeju co tora' ma pane, co win xumu nem pain ca tama' tomi' ha' quem pane. To' pa' pin xun ta ac xucucun na. ²⁸Pain ca tomi' xo' xucucun pain ca to' pa' pin xun cocon pane, ara e' nanain ca wara coromicat an pe xo' pan nem pane. Xi om ne ca hwara' opa pan ara ma ta. Wum co param mi' nonon pain, om ca tomi' caho' momon pain ca to' pa' pin cocon Panxima pane.

²⁹Je ca tomi' urut pum ca' Taramaxicon nuxut ac cocon na. Taraju wet roron pain ca tomi' mip cacaparut pain ca tomi' jin' xuxun paxi' cacaparut ca'. Mi' xut pain ca om pijim' jin' wa pain ca taramaja mi' urut pum ca'. Mi' xut pain ca pijim' hwara' opa urut pain capijam. ³⁰An hwet rain ca hwara' opa nem quem. Ma' ta quep xio pin tococwa wari' co caxi nana. An hwet iri xut pain wixicon Jeju co win xumu nem pain ca tama' tomi' ha' quem ne, ara an hwet pe ac main tara oro ca hwara' opa nem quem. In ac ac quequem tara oro wari' quem, ac i ma' na ca tomi' cocon Iri' Jam pane.

³¹Pi' pin iri na ca tomi' cocon Iri' Jam ne, cocoroc ac ne na xirim ca cut in to xucucun ma'. Pe ho' mip pe ho' mip xam' ac cocon na Tamataracon Iri' Jam. Pijim' hwet ac cacain na capijacon quem. Om ca pijim' jin' camain' cacain.

Ca cut mi' caracan xucucun pain oro caramaxicocon

³²Oro wari' co howa nonon Jeju ma', an xiho' xucucun pain ca coromicat nucucun. Ac ca xica' pe ne na oro ximicocon quem. Om ca narain ho' xucucun pain caramaxicocon. Om ca ma' camain' caca co xica' pe pan ta' pain caramaju ca' caca ma', om na. Mi' caracan mi' caracan xam' xucucun pain oro caramaxicocon. ³³Pijim' hwara' opa tamana nana oro apóstolo pain ca pijim' pijim' tiquin' cacain ca e' mami' nucun Taramaxicon nexi' Jeju. Iri' Jam ma', quep xiho' tamana nonon co howa nonon Jeju ma' quem. Quep xiho' quep xiho' pi' pin nonon. ³⁴Om ca ma' xica' pe camain' ca win ma' caca co ximin ma', co om non carawa ma'. Xi ma' ara caca oro win howa caca co ma' nonon xirim je macan' ta. Vender ho' vender ho' ac cacain na, cut cut ac cacain na dinheiro nein ma', ³⁵wara ca' nana oro apóstolo ma', cut mi' ac tococwa pain na. Ma' ma' iri nana co om nonon carawa ne, cut mi' cut mi' xam' ac tococwa pain na quem.

³⁶Ac i ma' na José ma', co maqui' nain xixi pan nein macan' Chipre ma'. Levita na José, xi iri' hwanana ne ara con Levi cara pane. O' ma' ni nonon oro apóstolo ma' quem. Barnabé nonon pain capijacocon. Wari' co ja' tomi' querec taxi' ta na ca tomi' mao ne xijein wixicon ca' quem. ³⁷Barnabé ma', ma' non cote ne xitot. Vender ac cain na, cut ac cain na dinheiro nein. Cut mi' ac tococwa na pain oro apóstolo ma'. Cut mi' jujun pain oro xerexi' co om nonon carawa ta tata quem.

Ananias cam Safira

5 Ane ma' ca co ma' ne, Ananias ma', je i ma' wixicon. Safira na wixicam manacon. Ma' nanam macan' quem. Vender ac cacamain na. ²Pe ho' cara tarapa' tamain dinheiro nein ca', cut mi' e' toton pain pawirinain ca' quem ac xucun na, mo hwet ac tococwa na oro apóstolo ma', cut mi' ac tococwa pain na. Taxi' non manacon pain ca pe ho' cara con tamain dinheiro nein quem.

³Tomi' querec pan ac con na Pedro: Para om ari mon Caxicon Jam pain ca quep mip xim quem ma', pain ca mixein rain Tamataracon Iri'

4.36 Taramaja to nanain cote ne xiricon Iri' Jam oro levita pane. Quep xiho' nonon oro sacerdote. Iri' hwanana ne nonon Levi panxica Jacó cara pane. Je ca oro levita tococwa ma'.

Jam quem ma' Ananias? Xi pe ho' cara ara quem tamain dinheiro ca cut ma pain macaram ta. ⁴Om ca mene main pain ca om vender querec main ra? Mene main ma' ira. Vender pin iri main ne, om ca mene main dinheiro nein quem ra? Mene main quem. Mo xi pe ho' pi' pin tarapa' ta main, je xi om mi' qui' maparut pain? Cain' cain' xima quem? Para wara coromicat an pe xo' main ca mixein wa ma', pain ca mixein toton maparut ma' quem? Om ca warut ne co mixein ma ma'. Mixein mon Iri' Jam ta. Ac i ma' na ca tomi' con ma'.

⁵Taraju iri nain i ma' Ananias ma' ne, ane ane mi' pin ac ca na. Mi' pin na, jao hot mao ac ca na. Oro wari' ma', taxi' iri nonon pain ca mi' pin nucun ma' ne, jin' tamana ac caca na. ⁶Maqui' ac caca na co xo' hwara' nana, wiric pa' ac cacain na curucun, an mamam' hwet mao ac cacain na, an corom pe pin ac cacain na pain manain pacun quem.

⁷Amon pawin iri na xina ne, ac ca 3 pin ne na hora nein ca mi' pin nucun Ananias ma', corom qui' ac cama na manacon. Om ca taxi' con taxicam pain ca mi' pin nucun. ⁸Tomi' querec ac cam na Pedro: Cain' ca ma' ne dinheiro ca cut hwe pain macarahu' ma' quem? Ac i ca' mao na cwerein? Tomi' ho' ne ta, ac i ma' na ca tomi' querec cam ma'.

E'e', ac i ma' mao na parut ta ac con na.

⁹Para tomi' xo' xujuhu' pain ca mixein querec xin hwein Tamataracon Taramaxicon nexi' quem ac cam na. Taraju ra e'. Maqui' pin nana co an corom pe nanain pain manain pacun curucun taxim cara ne. Wiricoco paca' ira. Hwet pin nanain manain xirim ca'. An mamam' mao teterem quem ac cam na.

¹⁰Ane ane mi' pin ac cama na cam ma' quem. Mi' pin na, jao hot hwet ac con na pain caximacon Pedro ma'. Corom qui' iri nana co xo' ho' tarama' nana cara ne ne, querec iri nanam pain ca mi' pin cama ma' ne, an mamam' hwet mao ac cacain na cwerequem. An corom pe ac cacain na pain manain pacun pain xijein cacaracon taxicam quem. ¹¹Jin' jin' pi' pin ac caca na co howa nonon Jeju ma'. Oro wari' co taraju nanam pain ca cono' pin nequequem ma', jin' jin' pi' pin ac caca na quem.

Ca quep xio pin tococwa oro wari' co caxi nana

¹²Oro apóstolo ma', an hwet tamana nanain ca hwara' opa nucun Iri' Jam pain ca ara cacain oro ca om ara taxi' ne ca wari' wa pane. Wa wa

tamana nonon oro wari' co to nanain Jerusalém ma'. Co howa nana ma', cut in to cut in to pi' pin xucucun pain ca tacan tiquin' ne xiricon Iri' Jam pain cacarain ma', ca Maxicon Salomão caca oro wari' ma', je i ma' wixinain cocon. Ac ca xica' pe ne na ximicocon pain ca cut in xucucun ma'. ¹³Oro xucucun wari' co om howa nana ma', tomi' querec te paxi' nonon co howa nana ma' quem. Awi tamana nana ta paxi' nonon, ane jin' pan caca ne. Jin' nana pain ca jao jao ma' xuxun cocon ma'. ¹⁴Ane ma' caca co howa pin nana ne. Mija nana, ca tarama' nucucun, ca narima' nequequem ma' quem, aram aram mija pin ac cacama na pain ca howa pin cocon Taramaxicon nexi'. Win ma' ne pin xut pahu' pain ca howa hwe ma' ac tococwa na oro xucucun co wara howa nana ma'. ¹⁵Oro apóstolo ma', an hwet tamana nanain ca hwara' opa nucun Iri' Jam pain ca ara cacain oro ca om ara taxi' ne ca wari' wa pane. Maji cut mama' xuxun co caxi nana cwa' ac caca na oro wari' ma', an mamam' an to ac tococwa na pain wana. An toco' to tata pain caji tapit je wi. Ma' ta quep xio cocon Pedro ta na ca coromicat nucucun. Am om na con pain ca quep cocon ma', am na e' con pain ca to' xio qui' cocon jamicon pain ca aram aram xut tiquin' ca' cocon ca', ac i ma' na ca coromicat nucucun. ¹⁶Mija nana wari' co maqui' nanain oro xijein cidade ca to ja' pan nain Jerusalém ma' quem. O qui' tata oro win ma' caca co caxi nana ma'. Cut qui' tata co jain jain nana pain ca corom to ho' cocon caxicon jam quem. Quep xio quep xio pi' pin ac tococwa na.

Ca quep em' tococwa oro apóstolo

¹⁷Mana' ac ca na sacerdote co iri' taramaxicon, cocon oro win ma' ca ma', co saduceu nana ma'. Noc tamana tata oro apóstolo, xi om caca oro wari' co tomi' querec te pan nonon ta. ¹⁸Je ca quep jujun ta tococwa oro guarda. Quep ac tococwa na, tao' to pin ac tococwa na pain xirinain ca tao' to tao' to to wa ma'. ¹⁹Tao' to paxi' tata. Ane maqui' cain xim jam co taramaja mi' non Taramaxicon nexi' ne. Pa pin nain oro manain xirinain ca tao' to tao' to to wa ma', o hwerehwet qui' ac tococwa na quem. Tomi' ac tococwa na: ²⁰Mama' jein ca tao' caho' nein cote ne xiricon Iri' Jam ta. Pijim' jujun oro wari' ma', tomi' hwet jujun pain ca mi' toton cocon pain ca om pi' ra ha' ne ca e' wa Iri' Jam ta. Ac i ma' na ca tomi' cocon jam co taramaja mi' non Taramaxicon nexi'.

²¹ Xec pin iri na ne, corom mama' ac cacain na ca tao' caho' nein cote ne xiricon Iri' Jam. Pijim' ac cocon na oro wari'. Win ne ca tomi' capari' jam co taramaja mi' non Taramaxicon nexi' ne nana.

Sacerdote co iri' taramaxicon ma', cocon oro win ma' ca ma' quem, wara tomi' cut in nonon oro win taramaxicon caca pain ca Sinédrio caca ma'. Tomi' ac tococwa na oro guarda co taramaja to nanain cote ne xiricon Iri' Jam: Mama' jein xirinain ca tao' to tao' to to wa ma'. O qui' ac huhun tara oro apóstolo ta, ac i ma' na ca tomi' tococwa ma'. ²² O qui' xuxun ta paxi' nana quem, ane om mam' tococwa ne. In hwet ac cocon na taramaxicon nucucun ma', tomi' hwet ac cocon na: ²³ Tao' pa' tao' pa' pi' pin paxi' nanain oro manain xirinain ca tao' to tao' to to wa ma'. Coco' to ho' paxi' nanain oro manain oro guarda co querec wet nanain quem. Ane om mam' urut cocon oro apóstolo ne. Pa pin iri urut pain manain ne, wara om nana, ac i ma' na ca tomi' cocon taramaxicon nucucun oro guarda ma'.

²⁴ Taraju iri nain i ma' taramaxicon nucucun ne, i'ina ac ne na ximicon. I'ina na ximicocon oro taramaxicon nucucun oro sacerdote ma' quem. Cain' cain' xira cocon ne? Main ca mama' caca quem? Ac i ma' na ca tomi' caca ma'.

²⁵ Pain ca hehe hehe wet xucucun ma', maqui' ac ca na wari', tomi' ac ca na: Caram cara ne, co tao' to hwe cara ne, to nanain ca tao' caho' nein cote ne xiricon Iri' Jam ta. Pijim' nonon oro wari' ta. Ac i ma' na ca tomi' ca ma'.

²⁶ Maji cocon ta ac ca na taramaxicon ma', ja' ja' ac cocon na oro guarda. Cut qui' ac tococwa na oro apóstolo quem. Tomi' toto tata, om ca quep em' tococwa. Xi jin' ara tococwa oro wari' ta. To' to' cono' pin tatarapari' xi' pain pacun ma nana.

²⁷ O corom qui' ac tococwa na, momon cwa' ta ac tococwa na oro taramaxicon ma' quem. Tomi' querec pan ac cocon na sacerdote co iri' taramaxicon ma': ²⁸ Tomi' mip urut pahu' ma' ira! Ta an hwet camain' hwein wixicon Jeju pain ca pijim' huhun oro wari' me ta paxi' urut pahu'. Ane om tomi' ha' maparut ne. Pijim' mi' pijim' mi' tiquin' huhun pain ca howa nuhu' oro wari' co to nanain Jerusalém ca'. Ac ca coromicat mi' maparut na pain ca to' pa' pin urut con Jeju ta nonon pain ca tomi' mana' tococwa ma'.

²⁹ Cain' cain' xuxut quem ac ca na Pedro cocon oro win apóstolo ca ma'. Hohot xiraparut pain ca tomi' in pin urut con Iri' Jam pain ca tomi'

ha' pan urut pahu' pain ca wari' nuhu' ra? Om na ta! Na e' na pain ca tomi' ha' pan urut con Iri' Jam ta. ³⁰To' pa' pin paxi' hun Jeju pain ca tatatain mi' hun pain pana pane. Ane to' e' mami' pan con Iri' Jam co howa caca hwanana nexi' ne. ³¹Mi' ac con na pain ca xao pe ho' ne pain iri' cwere ca' con. Mi' non pain ca to' witan xim capari' ca' quem. Ma' ta cwirin' pin hwe pain ca wari' nein Israel hwe ma' napari', ma' ta xic am pin tain ca caracat nuhu' ta napari' quem. ³²Je ca tomi' hwet taxipa' urut ca'. Tomi' hwet urut cocon oro wari' pain oro carawa ca ara non Jeju pane. An hwet mi' nonon pain Tamataracon Iri' Jam quem. Iri' Jam ma', wirico co mi' nonon pain Tamataracon oro wari' co tomi' ha' nonon ta. Ac i ma' na ca tomi' cocon oro taramaxicon Pedro con João ma'.

³³Taraju iri nonon oro taramaxicon ne, mana' tamana ac cocon na. To' pa' pin xuxun na nonon. ³⁴Ane ma' ca co ma' ne, co win taramaxicon caca ma'. Gamaliel na wixicon. Fariseu na Gamaliel. Ca' na taxipa' nain ca xirao' nucun Moisés pane. In ac in ac pi' pin nonon oro wari' ma' quem. Xi om ne ca querec pin' ara cocon pain ca hwara' opa nucun. Tequi' pe ac ca na pain ca cut in to xucucun ma'. Cut hwerehwet mama' camain' jujun e' ac tococwa na oro guarda. Cut hwerehwet mama' ac tococwa na.

³⁵Tomi' ac tococwa na oro win taramaxicon ca ma'. Ma' tara ximixi' cocon caram cwa' ta oro win ma' ne pain ca wari' nein Israel iri' ca'. Coromicat xo' xi' e', om ta quep em' ximama' xuxun me. ³⁶Om ca mam' pe wet hun Teudas cara pane? Taramaxicon ina ma' na pain ca xin to nucun pain ca tomi' in pin cocon oro taramaxicon pane. Ac ca ma' 400 caca na co taxipa' nonon pane. Aram aram to' pa' pin ac tocwa na, wawaran wawaran pi' pin ac caca na co taxipa' ca quem. Om om pin ac caca na pane. ³⁷Pain pije' iri na ne, pain ca xirao' qui' cacain wixicocon oro wari' oro taramaxicon pane, ma' ac ca na Judas co maqui' nain Galileia pane. Tomi' in pin xuxun oro taramaxicon e' ac ca na, mija ac caca na oro win ma' ca co taxipa' nonon quem. Aram aram to' pa' pin ac tocwa na co ma'

5.31 Taraju pa' jein ca tomi' mao ne ca xao to ho' xine iri' curucun je paraxicon taramaxicon ma'. Xao to ho' pin iri nanain iri' curucun je paraxicon taramaxicon wari' ne, querec pin' ac tococwa na pain ca taramaxicon wi xucucun. Ac i ma' na Jeju ma' quem. Xao pe ho' pin iri nain iri' curucun Iri' Jam ne, querec pin' ac tocwa na pain ca Taramaxicon wi pin con quem. **5.34** Judeu nana oro fariseu pane. Ac taramaxicon nana. Tomi' ca' nonon oro win judeu caca: Na e' na pain ca tomi' ha' xin oro ca xirao' nucun Moisés ca tomi' ha' je capari' Iri' Jam ta. Na e' na pain ca tomi' ha' xin oro ca xirao' nucun oro hwanana nexi' ca tomi' ha' je cacapari' quem. Ma' ta querec hohot capari' Iri' Jam ta nana pane.

quem. Ja' wawaran ja' wawaran pi' pin ac tococwa na oro co taxipa' ca pane. ³⁸Je ca tomi' xuhu' ca' ac tococwa na. Om ta quep em' ximama' xuxun wari' cwa'. Pa hwerehwet e' xuxun ta. Mo ta wari' e' ca co pijim' je nonon ma', om ta na cocon pain ca pijim' cara caca ma'. Aram aram om pin ac caca tara ta. Win ca Teudas con Judas cara pane. ³⁹Tara cocon, mo ta Iri' Jam ca co pijim' je nonon ma', om ta na cuhu' pain ca tomi' in pin huhun pain. Mo xi tomi' in pin huhun pain, ari pan ac hun xira Iri' Jam quem. Ac i ma' na ca tomi' tococwa ma'.

⁴⁰Na ra ac caca na. Wirico Gamaliel co tomi' na pin nonon ma'.

Cut corom qui' jujun ta ac tococwa na oro guarda ma', cut corom ac tococwa na. Wap jujun ta ac tococwa na, wap wap ac tococwa na. Ta tomi' hwet mami' huhun cocon oro wari' Jeju ta ac tococwa na. Mama' je ta ac tococwa na.

⁴¹Hwerehwet ca' iri tata pain ca cut in to nucucun ne, tomi' querec te tamana ac caca na. Ca' xucucun pain ca tomi' querec te nucucun: Ac ca hohot xun Iri' Jam na, xi om ne ca mi' ara capari' pain ca jain jain wa pain ca pijim' hwet xuxun con Jeju oro wari' ta xucucun. ⁴²Pijim' tiquin' pijim' tiquin' nana pain oro xijein xec quem. Pijim' to nanain cote ne xiricon Iri' Jam ma', pijim' to nanain xiricocon oro wari' ma' quem. Om ca an to cacain. Wirico Jeju na co Cristo ta nana pain ca pijim' caca ma'.

Ca tora' tococwa wari' co quep xiho' nonon co howa nonon Jeju

6 Ac i ma' ac i ma' nana. Ca mija mija tiquin' caca co howa nonon Jeju ma', ca mija mija tiquin' caca ma', aram aram mija pin ac caca na quem. Tomi' xirac ac xucucun na. Co tomi' nanain capijacocon oro grego ma', tomi' xirac ca' nonon co tomi' nanain capijacocon oro judeu ma', hebraico ma': Maxiram' mi' iri tata pain carawa ca cao' wa oro narima' co cono' ca' nanam waram taxicacam cwa' ne, maxiram' mi' hwara' ac tacacama na co tomi' nanain capijacocon oro judeu. Oro ca nari nuxut pain ca tomi' urut pain capijacocon oro grego cwa' iri nana ne, ji'am pin tata. Om ca maxiram' mi' tacacama pain carawa ca cao' wa ta nana pain ca tomi' xirac caca ma'.

²Na ra ac caca na oro apóstolo ma', co ma' 12 nana ma'. Tomi' cut in tomi' cut in pi' pin ac tococwa na oro co howa nonon Jeju. Tomi' xo'

ac tococwa na: Warut pain ca apóstolo urut ca', mo xi maxiram' mi' pan urut cacam pain carawa ca cao' wa, om xi win xumu ac urut pain ca taramaja nuxut pain ca pijim' urut pain capijacon Iri' Jam. Om xi hohot ne. ³Je ca tomi' urut pahu' ca' xere ac tococwa na. Tora' 7 jujun co querec pin' wawa pain ca xuruxut xo' nucucun ma', je pain ca pe ho' mip cocon Tamataracon Iri' Jam ma', je pain ca xumu xo' caca ma' quem. Wahu' pan tatara co maxiram' mi' nanam pain carawa ca cao' wa ta ac urut cocon tara. ⁴Win xumu pan ac urut pain tara ca taramaja nuxut pain ca momon tomi' urut con Iri' Jam cwa', je pain ca momon pijim' urut pain capijacon ca', ac i ma' na ca tomi' tococwa ma'.

⁵Awi na ca tomi' nuhu' ta ac caca na co howa nonon Jeju. Xin ne xin ne pi' pin nana. Tora' ac tococwa na. Mo nana: Ma' na Estêvão ma'. Howa mip na Estêvão. Pe ho' mip non Tamataracon Iri' Jam quem. Ma' ac ca na Filipe con Prócoro con Nicanor con Timon con Pármenas con Nicolau ma' quem. Wari' nein Antioquia na Nicolau pane. Om paxi' na ca judeu ca pain cara pane, ane tomi' ha' taxipa' cain ca xirao' nucun Moisés ne. Win caca oro judeu ma'. ⁶Tora' iri tata ne, momon cwa' ta ac tococwa na oro apóstolo. Tomi' mi' ac tococwa na con Iri' Jam, quep quep ac tococwa na pain winacocon quem.

⁷Pijim' pijim' tiquin' ac cacain na capijacon Iri' Jam pane. Ca pijim' pijim' tiquin' caca ma', ca pijim' pijim' tiquin' caca ma', aram aram mija pin ac caca na oro wari' co taraju nanain capijacon Iri' Jam. Ma' mija hap nana co howa pin nonon Jeju pain Jerusalém ma'. Oro sacerdote ma' quem, ma' mija nana co howa pin nana quem.

Ca quep cocon Estêvão

⁸Quep xiho' tamana non Estêvão Iri' Jam pane. To' hwara' opa non, mi' non pain ca ara tamana wa carawa ca om ara taxi' ne ca wari' wa quem. Wa wa nonon oro wari' ma' quem. ⁹Ane ma' caca oro judeu co noc nonon ne. Taramaja mi' e' nonon oro tatirim pain cara pane. Aram aram to' witan ac tococwa na quem. Xirim ca cut in to xucucun ma', Xiricocon co Witan Nana ta na wixinain cocon oro wari'. Maqui' nanain oro xijein cidade ma', maqui' nanain Cirene je Alexandria, maqui' nanain oro xijein macarain Cilícia je pain Ásia quem. Noc nonon Estêvão. Tomi' xun e' ac caca na, tomi' in pin tomi' in pin ac cocon na quem. ¹⁰Ane quep xiho' con

Estêvão Tamataracon Iri' Jam ne. Mi' hwara' non pain ca tomi' taxi' wa. Tomi' in pin xun paxi' nonon caram ma' co noc nonon ma'. Ane om ha' cocon ne. Hehe e' nana con.

¹¹ Je ca hwet tococwa oro xucucun ma' quem. Tomi' ac tococwa na: Pagar xut pahu', ma' ta tomi' mixein hwe con Estêvão ta xucucun. Tomi' ca' je con: Tomi' napat non Moisés Estêvão cwa', tomi' napat non Iri' Jam quem, taraju urut con pain ca tomi' napat nucun ta, ac i ma' jujun oro wari' con, ac i ma' na ca tomi' noc xa tococwa ma'. Ma ac caca na.

¹² Ac i ma' na ca ja' teretem tococwa oro wari' cocon oro taramaxicon nucucun oro judeu cocon oro co ca' na taxipa' nanain ca xirao' nucun Moisés ma'. Maji quep xun Estêvão ta ac caca na, mo hwet ac cocon na, quep ac cocon na, an mi' ac cocon na con oro taramaxicon pain ca cut in to nucucun pain ca Sinédrio caca ma'. ¹³ Cut corom qui' ac tococwa co xina ximama' xi' nana cara ne. Tomi' ximama' ac caca na: Tama' tomi' napat a xira co cwa' ne ta. Tomi' napat nain cote ne xiricon Iri' Jam nexi' ca', tomi' napat nain ca xirao' nucun Moisés ma' quem. ¹⁴ Taraju urut con pain ca tomi' napat ca quem. To' pa horohot pin tarain cote ne xiricon Iri' Jam Jeju cara pane, co maqui' nain Nazaré pane. Tomi' ni ca' tarain ca xirao' nucun Moisés ca tomi' ha' taxipa' iri' ca' quem, ac i ma' na ca tomi' napat ca co cwa' ta. Ac i ma' na ca tomi' mixein ximama' nucucun ma'.

¹⁵ Noro noro pi' pin ac cocon Estêvão na oro wari' co xao to nanain i ma', pain ca cut in to xucucun oro taramaxicon ma'. Noro tamana nonon. Querec querec ac tocon jam co taramaja mi' non Iri' Jam ma' nonon tocon ma'.

Ca pijim' cocon oro taramaxicon Estêvão

7 Tomi' querec ac con Estêvão na sacerdote co iri' taramaxicon: Iri'o' na ca tomi' nucucun pain ca tomi' em' quequem ca'? Ac i ma' na ca tomi' querec con ma'.

² Tomi' ac ca na Estêvão: Taraju wet xine me xere cocon oro taramaxicon ma'. Iri' Jam co howa iri' cwa', co in ac iri' pain ca hwara' opa tamana nucun ma', hwet pa' non hwanana nexi' Abraão cara pane, pain ca pe pe wet cain macaracon pain Mesopotâmia pane, pain ca om mao querec cain xijein cidade pain Harã pane. Tomi' ac con na: ³ Paca' rain macaram ca'.

Paca' roron oro ca nari nem cwa'. Mao rain xijein macan' ca tomi' mi' xim xim ca' ac con na.

⁴Paca' ac cain na macaracocon oro wari' nein Caldeia pane, wara ca' na xijein cidade pain Harã ma', mon to wet ac cain na i cain. Mi' pin iri na cote ca ne, o qui' ac con na Iri' Jam. O qui' non pain macaraxi' ca to iri' ca'. ⁵Om paxi' na ca mi' con pain macan' pane. Om ca mi' wijimain camain' con pain, om om na. Ane tomi' pe con pain capijacon ne. Tomi' ca' non: Main mi' xim pain macan', main mene rain. Mi' pin iri ra ne, mene ac cacain tara waram winam quem, ac i ma' na ca wara tomi' pe con Iri' Jam pane. Pain ca wara tomi' pe con pain capijacon Iri' Jam pane, om om wet na ca wanxi' ca Abraão. ⁶Ca' na ca wara tomi' pe con pane: Tatirim to tatarain xijein macan' oro waram winam co wanxi' tiquin' xi' nana pa'ao'. Quep em' ac tococwa tara pain ca taramaja je taramaja je xun tococwa pain macaracocon oro tatirim. Om ta cut mi' tococwa pain dinheiro pain ca taramaja e' caca quem. Ma' 400 tara cawaxi' pain ca quep em' xun tococwa. ⁷Aram aram wap ac toton tara oro tatirim co taramaja mi' e' xi' caca quem. Paca' ac cacain tara macaracocon, tan' qui' ac cacain i ca' tara, pe torotop mi' querec te to ac cacapa' tara pain i ca' quem. Ac i ma' na ca tomi' con Abraão Iri' Jam pane. ⁸Tomi' xo' ac con na: Wac xirac jein taparinain ca xirac nuhu' pain ca tarama' nuhu' ta. Ma' ta querec pin' xihwe pain ca na ra mahu' pain ca tomi' xo' xuhu' ca', pain ca wara tomi' an pe xo' mi' xuhu' pain capija ca' inuhu' ta non.

Aram aram wanxi' ac ca na Abraão, pan' qui' ac ca na panxica, wirico Isaque cara pane. Ma' 8 pin iri na xec nein ca pan' qui' nucun ne, wac xirac pan ac cain na taparinain ca xirac nucun. Ac i ma' na Isaque pain ca wanxi' pin con panxica Jacó pane quem, wac xirac ac cain na taparinain ca xirac nucun. Ac i ma' na Jacó pane quem. Wanxi' iri tata mana panxica co iri' hwanana nexi' ne, co ma' 12 nana pane, wac xirac ac cain na taparinain ca xirac nucun quem, ac i ma' na ca tomi' cocon oro taramaxicon Estêvão ma'.

⁹Oro hwanana nexi' cara pane, noc nonon coxa' caca José cara pane, noc mi' nonon con cote caca co tomi' querec te tamana pan non pane ac tococwa na. Vender mi' ac cocon na cocon tatirim co an mao nonon pain Egito. Taramaja mi' e' totoron oro wari' nein Egito pain i cain ta paxi' nonon pane. Ane pe ho' pan con Iri' Jam ne. ¹⁰To' witan ca' non pain oro carawa ca to' jain jain non, oro wari' co to' jain jain nonon quem, to'

witan ca' ac cocon con na. Mi' ac con na pain ca taxi' tamana wa quem. Je ca tomi' querec te pan con taramaxicon nucucun oro wari' nein Egitto, wirico Faraó cara pane. Hohot mapa', xi om ne ca taxi' tamana ara ma ma' non. Mi' ac con na pain ca taramaxicon pe cain Egitto quem. Wum tara co querec wet querec wet pi' pin nain oro carawa nein Egitto, querec wet querec wet pi' pin rain oro caramajinain xuru ca' quem non.

¹¹Pe' tamana ac caca na oro wari' co to nanain Egitto, je pain Canaã ca to caca ca nari nucun José pane quem. Jain jain tamana nana pain ca pe' wa, ximin nana. Om ca mam' cacain carawa ca cao' wa oro hwanana nexi' quem. ¹²Ma' ma' wet na tocwi trigo pain Egitto ta ac tocwa na Jacó quem. Mama' jein i cain ta ac tococwa na mana panxica pane, wiricoco hwanana nexi' cara pane. Mama' jein Egitto ta, cut jein tocwi trigo ta ac tococwa na. Je ca xo' mama' qui' cacain Egitto pane, in qui' ac caca na quem. ¹³Ac i ma' ac i ma' nana. Aram aram cut mami' xin trigo ta ac caca na, in mama' ac caca na. Tan' mama' iri nanain i cain ne, tomi' xo' pan ac cocon na José: Wata' ta xere. Xa' mahu' ta ac cocon na. Tomi' hwet ac con na Faraó ma' quem. Caram cwa' xere ta ac con na.

¹⁴Tomi' pan ac cocon xurucun na José: O qui' jun cotere' Jacó me. O qui' o qui' pi' pin jujun oro ca nari nexi' quem ta nonon. Mija nana oro ca nari nucucun pane. Ma' 75 nana pane. ¹⁵Mama' ac cacain na Egitto Jacó cocon oro hwanana nexi' pane. Je ca mi' pin pe ca ma' quem, je ca cono' to caca oro hwanana nexi' pane quem. ¹⁶Cono' pin iri nana ne, pain pin iri na cocon ne, cut in ac xine na aracocon Jacó con José. Xuruxut xuruxut, wara ca' na cidade pain Siquém ma', pain manain pacun ca wara an ca Abraão cara pane, pain ca mi' cocon pain dinheiro mana panxica Hamor pane, cut corom to ac xine na aracocon.

¹⁷Mon to wet ac cacain na Egitto pane. Mon to wet mon to wet, pain pin iri na ne, wixicam pin ac ne na xec nein ca wara tomi' pe con Abraão Iri' Jam pane, pain ca main to' witan toton waram winam ta qui' con pane. Ca mija tiquin' mija tiquin' caca oro hwanana nexi' pain Egitto pane, ca wixicam wixicam pin ne xec nein ca wara tomi' pe ca Iri' Jam pane, ca mija mija tiquin' caca pane, ca wixicam wixicam pin ne xec nein pane. Ma' mija tamana pin ac caca na oro hwanana nexi' pane. ¹⁸Aram aram

7.16 An corom pe nanain aracon Jacó pain manain pacun ca wara an ca Abraão pane, pain ca mi' cocon pain dinheiro mana panxica Hamor pane. Je ca an corom pe xine aracon José pane quem.

corom pin ac ca na xucun taramaxicon co om taxi' camain' non José cara pane. Om ca taxi' con pain ca quep xiho' tamana cocon oro wari' nein Egito pane. ¹⁹Xucun taramaxicon ma', co xo' corom ma', mixein ac cocon na hwanana nexi' pane. Quep em' nonon, xin hwerehwet pin jujun mana panxihwe co xo' camara' nana ma', ma' ta cono' pin caca ta nonon pane.

²⁰Je i ma' oro xec pain ca pan' qui' ca Moisés pane. Om ca xaxa' ca, tucu awi tamana na ca pije' nucun Moisés. Hohot napa' ta non Iri' Jam quem. Ma' 3 na panawo' pain ca querec wet noc xa tocwa pain xiricon cote ca pane. ²¹Aram aram maqui' ac ne na xec nein ca om querec wet noc xa mami' ac tocwa pane. An terem' hwet pe ac tocwa na, mam' pan ac con na panxica taramaxicon. Pe horona ac con na, iri' cawiji na co cwa' ta ac con na quem. ²²Aram aram ca' na ac tocwa na pain oro ca taxi' nucucun oro wari' nein Egito, aram aram hwara' opa pin ac ca na pain oro ca tomi' nucun je pain oro ca ara nucun quem.

²³Ma' 40 pin iri non cawaxi' ne, mo querec toton oro win ma' ne pain ca wari' nein Israel ta' ca' ac xucun na, mo hwet ac tococwa na. ²⁴Querec ac con na win ma' ca ma', co quep em' wa ma'. Wari' nein Egito na co quep em' pan non ma'. Mo nain ho' ton ta ac xucun na, mo hwet ac con na, win mon win ma' ne cwa' ac con na, to' pa' pin ac con na quem. ²⁵Querec pin' tatarapa' xi' ma tata oro win ma' ca pane. Mam' tarapari' con co cwa' Iri' Jam ta, mam' to' witan tarapari' con ta, ac i ma' tatarapa' ta, ac i ma' paxi' na ca coromicat nucun Moisés pane ira. Ane om ac i ma' ne ca coromicat pan nucucun ne. Om ta mam' capari' con Iri' Jam ta nonon pane.

²⁶Xec pin iri na ne, in hwet ac tococwa na. Wara to' caracan xucucun oro win ma' ca ma'. Ma' 2 nana co to' caracan xucucun. Querec iri tata ne, mo hwet ac tococwa na. Cain' cain' xihwe quem ac tococwa na. Win ma' ne xujuhu' ma' ira. Para to' xujuhu' ma' quem ac tococwa na. Tomi' xo' toton paxi' pan nonon Moisés. ²⁷Ane joc in pin tocwa ne. Joc in pin pan na co to' ma'. Ma' co taramaxicon pe ho' roron ta nem parut quem? Ma' co juiz pe ho' roron ta nem parut quem? ²⁸To' pa' pin ton mapa' ra? Win ta' pain xec pane, pain ca to' pa' pin ton wari' nein Egito pain xec pane mapa' ra? Ac i ma' na ca tomi' ximao con Moisés co to' ma'.

²⁹Taraju iri nain ca tomi' ximao nucun ne, jin' pin ac ca na Moisés. Mo mao ac ca na, mao ac cain na macarain Midiã, tatirim pe ac cain na i cain. Aram aram an ac cam na narima', wanxi' pin ac ca na quem. Ma' 2 nana mana panxica pane.

³⁰ Mon to wet ac ca na, mon to wet mon to wet. Pain pin iri na ne, ma' 40 pin iri na cawaxi' pain ca mon to wet cain i cain ne, hwet pa' ac con na Iri' Jam. Ac jam co taramaja mi' non na pain ca hwet pa' con ma'. Hwet pa' pe non pain wijimain pana ca wiran pe nain mahweri pane, ca pe ja' pan nain cote ne pacun pain Sinai pane. ³¹ Querec iri nain ca om wiran mao ne wijimain pana ne. He! Cain' cain' ne ne ac xucun na. In ac nain. Mo querec ta' e' ac xucun na. Xut xut wixicam pin iri nain ne, taraju ho' nain ca tomi' nucun Taramaxicon Iri' Jam. ³² Wata' ta, co Iri' Jam ne caca oro hwanana nem Abraão con Isaque con Jacó pane ta na ca tomi' tocwa ma'. Cocoroc ac ca na pain ca jin' nucun. Om ca noro ac cain xe pain ca jin' nucun.

³³ Tomi' ac con na Taramaxicon Iri' Jam: Hot rain caji caximam ma', xi awi tamana ara ne macan' ca xat pe ma ca'. Iri' macara ca'. Xi pe ara tain i ca' ta non. ³⁴ Querec inonon oro wari' ne pain Egito ac con na. Querec inonon pain ca jain jain caca pain ca quep em' tococwa. Taraju inain ca toron nucucun quem. Je ca quiji' qui' ta' ca'. To' witan pin toton ta ina. Hap ra, in mao rain Egito ta inem. Ac i ma' na ca tomi' con Moisés Iri' Jam pane.

³⁵ Moisés cara pane, wirico co noc caca oro win ma' ca pane, pain ca tomi' ximama' ca' cocon pane: Ma' co taramaxicon pe ho' roron nem ta naparut? Ma' co juiz pe ho' roron nem ta naparut, tomi' ximama' ac i ma' nonon pane. Ane tomi' pan con Iri' Jam ne. Hwet roron, taramaxicon pe ho' roron, to' witan pin roron pain ca taramaja mi' e' cocon oro wari' nein Egito ta non pane. Mam' tomi' non con jam co taramaja mi' non pane, pain ca hwet pa' con pain wijimain pana pane. ³⁶ Wirico Moisés co o qui' nonon oro hwanana nexi' pain ca cut ca' cocon pain Egito pane. An hwet pe tamana nain ca hwara' opa nucun Iri' Jam pain ca ara cain carawa ca om ara taxi' ne ca wari' wa pane. Ara an hwet pe nain pain Egito pain Cote ne Com Paca' Paca' pane. Ma' 40 na cawaxi' pain ca ara an hwet pe cain pain mahweri pane quem.

³⁷ Wirico Moisés co tomi' nonon oro hwanana nexi' pain ca wari' nein Israel iri' quem. Tomi' ca' nonon pane: Main mi' turuhu' con profeta Iri' Jam ma'. An xiho' tarapa' pain ca profeta ta' ca'. Iri' win ma' nuhu' tara ta nonon. ³⁸ Wirico Moisés co pe ho' nonon oro hwanana nexi' pain ca cut in xucucun pain xiquijinain pacun pain Sinai pain mahweri pane. Wirico co taraju nain ca tomi' nucun jam co taramaja mi' non Iri' Jam pane, an

xin tiquin' mi' pan ac tococwa pain na oro hwanana nexi'. Taraju nain ca tomi' nucun pain ca tomi' hwet con pain capijacon Iri' Jam ca e' cara ma', an xin tiquin' mi' ac capari' pain na quem.

³⁹Taraju paxi' nanain ca tomi' nucun Moisés hwanana nexi' pane. Ane om tomi' ha' je na cocon ne. Noc urut pum ta nonon, in mama' xixin Egito na urut ta ac cocon na quem. ⁴⁰Je ca tomi' cocon Arão ma', cwaji' ca Moisés ma': Quep mi' xut pain caji pacun ta, ma' ta Iri' Jam ne xin, ma' ta o mama' capari' ta. Xi taxi' xun co om in cara ne, co cut in ca' napari' pain Egito pane. Ac ca pan' am ca a xira ta nana pain ca tomi' xirac cocon Moisés. ⁴¹Quep ac cacain na caji pacun. Quep quep ac wijimain boi nanain. Iri' Jam nexi' ac cacain na quem. To' pa' mi' ac cacain na pain carawa ca wina caca, tom tain' mi' ac cacain pain na quem. Tomi' querec te ac xucucun na pain jami wijimain boi ca quep pan caca ma' quem pane.

⁴²Je ca xin in ca' tococwa pane. Xin in pan nonon Iri' Jam. To wet iri caca ma'. Howa ximama' ma' tatara ne tata. Mo ta pe torotop mi' querec te xun cocon panawo' con pijo' ma', je i ma' cocon, to wet iri caca ma'. Param ma' totonon ne tata. Win ne ca xirao' pe ca profeta pain cara pane. Ca' na con pane:

Tomi' querec xuhu' oro wari' nein Israel:

Wata' tara co to' pa' mi' hwe pain carawa pane ra?

Wata' tara co tom tain' mi' hwe pane ra, pain ca ma' ⁴⁰ ne
cawaxi' pain ca to hwein mahweri pane?

⁴³Om na ta! Oro pacun ca to' pa' mi' hwe pane, ca
tom tain' mi' hwe pane.

Oro xirinain jaminain ca corom to ne ma', je ca an
mamam' hwe pane.

Moloque na wixinain wirain ma' pahu', an mamam' hwein xirinain.

Renfã na wixinain wirain ma' pahu', an mamam' hwein
xirinain jamicon pijo' nein pane.

Je i ma' oro caji pacun ca quep hwe pane, ma' ta pe torotop
mi' querec te xin hwein pane.

Je ca cut mama' jujun totonon tatirim co noc nunuhu' ma'.

Cut mama' tuturuhu' pain pira ta, pain xijein cacarain
macaracocon oro wari' nein Babilônia ta.

Ac i ma' na ca xirao' pe ca profeta pane, pain ca xirao' pe cain ca tomi' nucun Iri' Jam ca tomi' cocon oro hwanana nexi' pane.

⁴⁴ Pain cara pane, pain ca to cacain mahweri oro hwanana nexi' pane, ma' nonon xiricon Iri' Jam. Je ca to' querec pin' cocon pain ca pe ho' cara cocon Iri' Jam. Ac xirim paxi' na, tapari carawa na. Quep pan nanain. Quep an xiho' nanain jaminain ca an hwet mi' tocwa Moisés pain ca ac i ca' ra pain ca quep main xuru ta qui' tocwa pane. ⁴⁵ Mi' mi' tiquin' ac tococwa pain na waram winacocon cocon mana panxicaca. An tiquin' ac cacain na pain ca ja' ja' qui' cocon Josué pane quem, pain ca to pin cacain macaraxi' ca', pain ca ja' tequi' hwerehwet pin cocon oro tatirim pain macaraxi' Iri' Jam pane. Mon to wet ac nein i ca' na xiricon Iri' Jam pane. Mon to wet mon to wet taramaxicon pa' ma' ac cain na Davi cara pane. ⁴⁶ Hohot non Iri' Jam Davi pane. Tomi' ac con na: Ta nain ho' mapa' pain ca quep mi' xim pain iri' xirim me. Iri' xurum tara, je tara ca in ac to urut pum pain ca Iri' Jam nem ma', pain ca hwanana ne urut con hwanana nuxut Jacó cara pane ta non. ⁴⁷ Davi paxi' na co quep mi' xim pain non pane. Ane panxica pan ca co quep mi' non pain ne, wirico Salomão cara pane.

⁴⁸ Iri' Jam ma', co Iri' Taramaxicon pan ma', quep mi' paxi' ta pain iri' xirim pane. Ane om pe pan cain xirim ca quep pan ca wari' ne. Win ne ca xirao' pe ca profeta pane. Ca' na ca xirao' nucun pane:

⁴⁹ Tomi' ca' na Iri' Jam:

Ac pana ca mam' xao pe xao pe ca taramaxicon napa'
pawin ca xao pe pe ta' ca'.

Ac pana mam' ton pe ton pe tain caxima napa' macan' ca' quem.

Ma' tara ca quep mi' ac mahu' pain xirim ra?

Cain' xi cwere ne xirim ca quep mi' xim mahu' ma' quem?

Main xi xao pe wa pe capa' xumu pahu' quem?

⁵⁰ Om ca wata' ne co quep quep pi' pin nain oro carawa
pain pawin je pain macan' ca' quem?

Wata' cwa' ira.

Ac i ma' na ca xirao' pe cain ca tomi' nucun Iri' Jam profeta pane.

⁵¹ Mija hwe xin ta ac cocon na oro taramaxicon Estêvão ma'. Wijimi tamana hwe. Om ca howa je na hun Iri' Jam. Om ca taraju wet je na hun quem. An an ari huhun oro hwanana nexi' cara pane. Tama' tomi' in pin hwein Tamataracon Iri' Jam. ⁵² Tomi' hwet paxi' nanain capijacon Iri' Jam oro profeta pain cara pane. Ma' xica' pe tara profeta co om ja' tequi' quep em' caca oro hwanana nexi' pane ra? Om na ta, om ca ma' xica' pe camain' ca cocon. Quep em' quep em' xam' tata pane. To' parapa' tata co

wara tomi' pe nanain ca maqui' nucun co ma' co tama' ara xo' quem, co tomi' mi' pan hwe cocon co noc nonon pane, co to' pa' pin hwe pain xocori ca' quem. ⁵³ Wahu' paxi' na co mi' wawa pain ca xirao' nucun Moisés ca'. Wirico jam co taramaja mi' non Iri' Jam na co mi' nuhu' pain. Ane om tomi' ha' hwein ne. Ac i ma' na ca tomi' carapita cocon oro taramaxicon Estêvão ma'.

⁵⁴ Taraju iri nonon Estêvão oro taramaxicon ma' ne, mana' tamana ac cocon na, mija na ca hwerehwet pin ne mixitacocon con. Cacacao' nanain xicocon pain ca mana' tamana nucucun quem. ⁵⁵ Ane noro pawin ca Estêvão ma' ne. Pe ho' mip iri non Tamataracon Iri' Jam ne, noro pawin ac ca na. Querec ac cain na ca toc meremem nucun Iri' Jam. Querec non Jeju quem, pain ca xat pe ho' cain iri' curucun Iri' Jam ma'. ⁵⁶ Tomi' ac ca na: Noro je! Querec inain ca pa xat ne pawin ma'. Querec inon Jeju co Iri' Wari' cwain, pain ca xat pe ho' cain iri' curucun Iri' Jam ma'.

⁵⁷ Merem ac caca na: Noc urut pain ca taraju wa, tatep pa' ac cacain na taraxicocon. Jein hwet jein hwet pi' pin ac cocon na. ⁵⁸ Coc ororo coc ororo ac cocon na, wara ca' na cacarain cidade ma', xin pin ac cocon na. Cut ac cacain na pacun, to' to' mi' pin xun e' ac caca na, to' to' ac cocon pain na. Caram ma' co wara tomi' em' nonon Estêvão cocon oro taramaxicon ma', horohot pin nonon to' om capin' nucucun, cut mi' ac cocon na con co xo' hwara' ma', Saulo ma'. Cut ron womuxut cwa' nonon, to' to' ac cocon pain na pacun Estêvão. ⁵⁹ Ca to' to' cocon pain pacun Estêvão ma', ca tomi' pan ac con na Jeju: Taramaxicon ne Jeju. An mao rain tamatara ca' na pain ca tomi' con ma'. ⁶⁰ Pe torotop pe ac ca na, merem mip ac ca na: Taramaxicon ne. Ta mana' momon pain ca caracat nucucun me ta non. Merem ac i ma' iri na ne, mi' pin ac ca na.

8 Saulo ma', hohot non pain ca to' pa' pin tocwa Estêvão ma'. Awi na ca to' pa' pin tocwa ta na.

Ca quep em' tamana tococwa co howa nonon Jeju

Je i ma' xec nein ca ja' tequi' quep em' tamana tococwa co howa nonon Jeju pain Jerusalém pane. Quep em' xuxun, quep em' tamana ac tococwa na, mao ac ne ma' na ca mana' tococwa. Jain jain tamana nana. Ja' wawaran ja' wawaran pi' pin ac tococwa na, wawaran mama' ac cacain na

oro xijein cidade pain Judeia je pain Samaria. Xica' to nana oro apóstolo co to wet nana pa'ao' pain Jerusalém. ² An corom pe xin curucun Estêvão pain manain pacun ta ac caca na caram ma' co win xumu nanain ca param nucun Iri' Jam ma'. Awaran tamana nonon quem.

³ Saulo ma' iri na ne, to' parapa' to' parapa' pi' pin xitoton na nonon oro wari' co howa nonon Jeju. Quep em' tamana tata. Corom corom nain xiricocon, coc ororo hwerehwet qui' ac tococwa na ca tarama' nucucun, wiricacam ca narima' nequequem ma' quem, wara ca' na xirinain ca tao' to tao' to to wa ma', tao' to ac tacacama na pane.

Ca pijim' mao cain Samaria Filipe

⁴ Co howa nonon Jeju ma', co ja' wawaran wawa ma', pijim' pijim' ac cacain na capijacon Iri' Jam pain oro xijein cidade ca mama' caca ma'. ⁵ Ac i ma' na Filipe quem, mao ac cain na cidade ca pe nain Samaria, pijim' mi' ac tococwa na oro wari' co to nanain i cain. Pijim' hwet tata con Cristo. ⁶ Taraju iri nonon pain ca pijim' nucun ne, querec iri nonon pain ca an hwet pe cain ca hwara' opa nucun Iri' Jam ma' ne, pain ca ara cain carawa ca om ara taxi' ne ca wari' wa ma', xin ne xin ne pi' pin ac caca na pain ca taraju wet cocon ma'. ⁷ Mija nana wari' co quep xio pin wawa pain ca tomi' jein pin tococwa oro caxicon jam co corom to ho' nonon ma'. Tomi' jein pin iri tata ne, u mip ac caca na, hwerehwet ca' ac tococwa na. Co carama to nana ma', co xuruxut xirac nana ma' quem, ma' mija nana co quep xio pin wawa. ⁸ Je ca tomi' querec te tamana caca oro wari' co to nanain Samaria pane.

Simão co ara xirac nonon oro wari'

⁹ Ma' na xucun wari' co pe nain cidade ca to caca ma'. Ara xirac nonon oro wari'. Simão na wixicon. Pain cara pane ca ara xirac cocon oro wari'. Jaxicao' jaxicao' xam' tata oro wari' co to nanain oro xijein cidade pain Samaria. Xin to na. Hwara' opa tamana ina ta na pain ca xec xec nucun. ¹⁰ Taraju wet taraju wet pi' pin nonon oro wari' co to nanain i ma'. Co om caramaju homa nana ma', wiricoco co caramaju tamana nana ma' quem, xin ne xin ne pi' pin nonon. Hwara' opa na co cwa' ta! To' hwara' opa non Iri' Jam co hwara' opa pan ta nonon. ¹¹ Pain cara pane ca xin ne cocon

pain ca taraju wet cocon ma', xi om ne ca jaxicao' pan ara tococwa pain ca ara xirac nucun. ¹²Ane howa pin cocon Filipe ne. Pijim' pan iri nonon con Iri' Jam Filipe ne, pain ca taramaxicon pe ho' xitoton na nuhu' ta cocon ma', je pain ca to' witan xitoton na nuhu' Jeju co wara tomi' pe ca Iri' Jam pane cocon ma', howa pin ac cacain na ca pijim' nucun. Ja' ac tococwa na pain com quem. Ca tarama' nucucun, ca narima' nequequem quem, ja' ac tococwa na pain com. ¹³Howa pin ac ca na Simão ma' quem. Ja' iri ta pain com ne, ja' ja' ac con na Filipe pain oro ca mao nucun. Querec iri non Filipe pain ca an hwet cain ca hwara' opa nucun Iri' Jam ne, pain ca ara cain carawa ca om ara taxi' ne ca wari' wa ma', wa wa ac con na quem.

¹⁴Tomi' hwet ac tococwa na oro apóstolo co to nanain Jerusalém ma' quem. Howa pin nana oro wari' co to nanain oro xijein cidade pain Samaria cain, howa pin nanain capijacon Iri' Jam con Jeju ta tata. Taraju iri nana ne, hwet jujun ta ac tococwa na Pedro con João ma'. ¹⁵Tan' mama' iri nanain i cain ne, tomi' mi' pan ac cocon na con Iri' Jam oro co xo' howa nana ma'. Mi' roron pain Tamataram caram cwa' ta nana pain ca tomi' mi' cocon con Iri' Jam. ¹⁶Xi corom hwet querec cocon ta. Om ca corom hwet querec cocon Tamataracon Iri' Jam, om om nonon. Ja' e' tata pain com pane. Ma' ta querec pin' xihwe pain ca howa pin hun Taramaxicon nexi' Jeju ta tata pane. ¹⁷Pedro con João ma', quep ac cocon na pain winacocon, corom hwet ac cocon na Tamataracon Iri' Jam.

¹⁸Querec nain i ma' Simão ma' quem. Querec tata co xo' howa nana ma', pain ca mam' mi' tococwa pain Tamataracon Iri' Jam pain ca quep pan cocon pain winacocon oro apóstolo ma', Pedro con João ma'. Je ca tomi' con Pedro con João ma': Mi' xuhu' pain dinheiro ca'. ¹⁹Mi' ac mahu' tara pain ca hwara' opa nuhu' ma' quem. Wari' co quep ta' pain winacon ma', corom hwet ac con tara Tamataracon Iri' Jam. Ac i ma' na ca tomi' con Pedro con João Simão ma'.

²⁰Ane tomi' in pin pan con Pedro ne: Jao jao mao ra pain dinheiro nem pain cote ne xe cain ta non. Cain' cain' xima quem? Na tarapa' pain ca mam' an ta' pain dinheiro main carawa ca mi' e' ca Iri' Jam ra? ²¹Om ca na camain' ne pain ca taramaja wi maparut ta, xi taramaja wi roron ta quem Iri' Jam parut ta. Querec pin' nem pain ca om xumu xo' ma ma'. ²²Cwirin' rain ca coromicat pan tem nem ta. Tomi' ron Taramaxicon nexi'. Am xic am pin cain ca caracat nem pain ca param ximao nem ma', pain ca coromicat pan tem nem ma'. ²³Cwirin' ra ta, xi querec pin' ara xim pain

ca juhumi' tamana ne xumum parut, pain ca ma' xirapa' na main ca hwara' opa nucun Iri' Jam ca mi' pan caparut ca'. Ac ca quep mip quem na ca caracat wa ta. Pao' pe quem ma' ira. Ac i ma' na ca tomi' in pin con ma'.

²⁴ Om na, tomi' mi' xine con Taramaxicon nexi' me ac ca na Simão ma'. Tomi' mi' xine con, ma' ta om ara capa' ca tomi' noro mahu' ma' na.

²⁵ Pijim' pijim' tiquin' ac cocon oro wari' na Pedro con João ma'. Tomi' hwet nonon con Jeju, pijim' pijim' ac cocon na pain capiacaon Iri' Jam quem. Pi' pin iri na cocon ne, in mama' xin Jerusalém ta ac caca na. Pain ca xuruxut xuruxut caca ma', pijim' to ac cacain na oro ca paric to ne xirim pain Samaria ma'. Pijim' mi' pijim' mi' tata con Jeju oro wari' ma', pain ca to' witan xim cuhu' Jeju ta tococwa ma'.

Filipe con taramaxicon co maqui' nain Etiópia

²⁶ Hwet ac con na Filipe jam co taramaja mi' non Taramaxicon nexi'. Hap ra, xut mao rain wanaji Gaza pain quiricon xina cain, ca ac nein mahweri cain. Je i cain wana ca maqui' nain Jerusalém cain, ca mao nein cidade pain Gaza cain, ac i ma' na ca tomi' con ma'.

²⁷ Mao ta' ta ac ca na, mao ac ca na. Xut xut xut, querec pira ac con na wari' ma', co maqui' nain Etiópia, je i ma' wixinain macan' ca maqui' ca. Taramaja mi' nam Candace co taramaxicon pe ho' nonon oro wari' nein Etiópia. Hwara' opa na pain ca taramaja mi' cam ma', xi om ne ca querec wet ara cain dinheiro nequem ta. Wara mao nain Jerusalém. Ma' ta pe torotop mi' querec te ton Iri' Jam ta na ira. ²⁸ Je ca win in mao tain cain macaracon ma' quem. Xao pe nain carroça nucun, noro noro ac cain na ca xirao' nucun profeta Isaías cara pane.

²⁹ Tomi' ac con na Filipe Tamataracon Iri' Jam: Mo hwet ron wari' co xao pe pe nain carroça cain, ja' ja' ron ta non.

³⁰ Mo hwet ac con na, taraju ac con na pain ca noro cain ca xirao' nucun profeta Isaías cara pane. Tomi' ac con na: Taraju pa' main ca noro ma ma' non.

³¹ Cain' xi taraju pa' ac tain quem ac ca na ma'. Xi ma' capa' wari' co tomi' xo' napa' pain ta na. Piri' pe ra e'. Xao pe ho' ne e' ac con na.

³² Je i ca' ca xirao' nein capiacaon Iri' Jam ca noro ca ma':

Win ne ovelha pain ca an mao xine pain ca to' pa' pe xine ma',

ac i ma' na pain ca an mao cocon co ma', pain ca to'
pa' pin xun cocon ma'.

Win ne ca tacana pe ne wijimain ovelha pain ca wijac
pin xine tenenein ma' quem,

ac i ma' na ca tacana pe ca co ma', je pain ca om
tomi' camain' ca quem.

³³ Tomi' xirac nonon, tatam' tatam' ac cocon na.

Nain ho' nonon pain ca tomi' querec xo' tocwa pain
carawa ca ara ca ma',

pain ca tomi' mi' tocwa pain ca wap wa pain ca wum
co em' ta tocwa ma'.

Om nana mana panxica cocon waram winacon quem,
xi om ne ca to' pa' pin ara tocwa ta.

Ac i ma' na ca xirao' nein capiiacon Iri' Jam ca noro ca wari' ma'.

³⁴ Ma' co tomi' ca profeta quem ac con na Filipe wari' ma'. Tomi' pan
xucun ra? Tomi' non xucun wari' ra? Tomi' xo' ne con ac con na.

³⁵ Tomi' xo' ac con pain na Filipe ma'. Tomi' xo' non pain capiiacon Iri'
Jam ca xirao' pe ca profeta Isaías cara pane, tomi' xo' tomi' xo' ac con na
pain oro wirain ca xirao' pe nein capiiacon Iri' Jam quem. Tomi' hwet
tomi' hwet ac con na con Jeju pain ca to' witan xim capari' quem.

³⁶ Ca tiquin' mama' caca pain wana ma', aram aram hwet ac cacain na
com ma', xuterem' ma'. Tomi' ac ca na wari': Noro ra, main ma' com ma'.
Hohot na pain ca ja' mapa' pain com quem? Ac i ma' na ca tomi' con ma'.

³⁷ Hohot na. Mo ta howa mon Jeju Cristo pain iri' xumum ma', hohot
ac ne na pain ca ja' xim pain com ta ac con na Filipe.

Howa ina ta ac ca na. Howa inon Jeju Cristo pain ca Panxica Iri' Jam
ca ma' ac ca na quem.

³⁸ Je ca tomi' con wari' co cuc in cuc in nain cavalo nein carroça. Quep
xat rain ta, quep xat ac cain na. Xat iri na ne, quiji' ca' ac cacain na. Wirico
Filipe ma', wirico wari' ma' quem, quiji' hwet ac cacain na com ma', ja'
pan ac con pain na Filipe. ³⁹ Hwrehwet ca' iri nanain com ne, ane ane
om pin ac ca na Filipe ma'. Tamataracon Iri' Jam na ca an mao non. Wari'
ma' iri na ne, om ca querec mami' con Filipe. Xut tiquin' mao ac ca na.
Tomi' querec te tamana na quem.

⁴⁰ Filipe ma' iri na ne, ane ane pe pin ac cain na Azoto, je i ma' wixinain
cidade ca pe pin ca ma'. Pe pin iri nain i cain ne, pijim' ac tococwa na

oro wari'. Pijim' mi' tata con Jeju pain ca to' witan toton cocon ma'. Pijim' tiquin' pijim' tiquin' mao ac cain na oro xijein cidade pain wanaji Cesareia ma'.

Ca howa pin con Jeju Saulo

9 Saulo ma' iri na ne, mana' mana' tiquin' na. To' parapa' xitoton na nonon oro wari' co howa nonon Taramaxicon nexi'. Je ca hwet con sacerdote co iri' taramaxicon ma'. ²Tomi' ac con na: Xirao' mi' roron pain carta co querec wet nonon oro win judeu iri' cwain, pain oro xirim ca cut in to xucucun pain Damasco cain. Ma' ta taxi' cacapa' pain ca tomi' mapa' ca'. Mam' iri toton co howa nanain oro ca pijim' nucun Jeju pain i cain ne, quep ac toton tara, pao' to cut in qui' ac toton tara pain Jerusalém ca'. Ca tarama' nucucun, ca narima' nequequem quem, pao' to cut in qui' tatam ta, ac i ma' na ca tomi' con taramaxicon nucucun oro sacerdote Saulo ma'.

³Mao ac ca na, wirico Saulo, wiricoco co ja' ja' nonon quem, mama' ac caca na. Jein jein, wixicam pin iri nanain Damasco ne, ane ane joc xec qui' ac nein pawin na naran. Joc xec joc xec mam' pin non Saulo. ⁴Pan' mao ac cain na macan'. Taraju ac cain na ca tomi' wa: Saulo. Saulo. Para quep em' mapa' ma' quem Saulo, ac i ma' na ca tomi' con ma'.

⁵Cain' ca wari' ma quem Taramaxicon ne ac ca na.

Wata' ta, co quep em' ma cwa'. Jeju ina ta ac con na. ⁶Tequi' pe ra ta ac con na. Mo hwet rain cidade ma'. Tomi' xo' ac quem tara wari' pain carawa ca ara ra xim ca'. Ac i ma' na ca tomi' con Saulo ca tomi' wa ca taraju ca ma'.

⁷Coco' e' nana co ja' ja' nonon Saulo ma'. Om ca tomi' ac caca, xi jaxicao' tamana ara tococwa ta. Taraju paxi' nanain ca tomi' wa ma'. Ane om querec tocwa co tomi' ma' ne. ⁸Tequi' pe ca' ac cain macan' na Saulo ma'. Pa paxi' na tocon, ane om querec mami' ca ne. Paxi' pe na, om na tocon. Je ca coc papan mi' tocwa ma'. Oro win ma' ca co ja' ja' nonon ma', coc papan wa' mao ac cocon na pain Damasco. ⁹Pe e' ac ca na Saulo. Om na tocon. Om ca cao' ca, om ca toc ca. Pe e' na. Ma' 3 na xec pain ca pe e' ca ma'.

¹⁰Pe nain Damasco wari' co howa non Jeju quem. Ananias na wixicon. Tohwein' ac ca na. Querec paxi' na, om ca pi'am ca pain ca tohwein' nucun. Tomi' ac con na Taramaxicon nexi': Ananias ac con na.

Ha' Wata' ta Taramaxicon ne ac con na.

¹¹ Hap ra ta Ananias ac con na. Mao rain wana ca Direita ne wixinain ma'. Parac iri rain ne, hwet ac main tara xiricon Judas. Pe ho' nem wari' co maqui' nain Tarso ra? Saulo na wixicon ac mon tara. Tomi' non Iri' Jam quem. ¹² Tohwein' na Saulo. Querec paxi' na, om ca pi'am ca pain ca tohwein' nucun. Ac ca querec quem na Ananias. Ac ca querec quem na pain ca corom hwet mon pain xirim ca pe pan ca ma'. Ac ca quep mon na pain mum quem. Ma' ta ma' mami' ne tucum mon, ac ca tomi' ac i ma' mon na pain ca tohwein' nucun na ca tomi' con Ananias Taramaxicon nexi'.

¹³ Mija nana wari' co tomi' hwet nanapa' con co ma' ta Taramaxicon ne ac ca na Ananias. Tomi' hwet nanapa' pain oro ca ara ca quem, pain ca quep em' cocon oro wari' nem pain Jerusalém ta. ¹⁴ Je ca maqui' cain Damasco ca' quem. Quep quep pi' pin toton oro wari' co howa nonon Jeju ta na. Wiricoco oro taramaxicon nucucun oro sacerdote co quep roron nonon ta na ca tomi' con Taramaxicon nexi' Ananias ma'.

¹⁵ Om na ta Ananias ac con na Taramaxicon nexi'. Mo hwet ron Saulo cwain. Wara tora' inon. Mi' ton inon pain ca taramaja mi' capa'. Tomi' hwet tarapa' cocon oro wari' co om judeu nana, wiricoco oro taramaxicon nucucun quem. Tomi' hwet tarapa' cocon oro wari' nein Israel ma' quem. ¹⁶ Pijim' hwet iri tarapa' cocon oro wari' ne, mija ac ne tara ca jain jain ca pain oro carawa ca ara ton non. Tomi' hwet pan ton pain. Ac i ma' na ca tomi' xo' con Ananias Taramaxicon nexi'.

¹⁷ Ma ac ca na, mao ac cain na xirim ca pe pan ca Saulo ma', corom mao ac ca na, quep ac con na pain winacon. Xa' Saulo ac con na. Tomi' napa' Taramaxicon nexi' Jeju pum, co hwet pa' nem pain wana pain ca maqui' nem ne. Hwet ron ta napa' pum. Ma' ta querec mami' ca, ma' ta corom hwet con Tamataracon Te ta napa' pum, ac i ma' na ca tomi' con ma'.

¹⁸ Ane ane camara' ca' ac cain na tocon ca ac tocwixicon hwam ma', ca tatep pa' nain tocon ira. Querec mami' ac ca na. Tequi' pe ac ca na, ja' ac tocwa na pain com quem. Xi om ne ca howa pin ara con Jeju ta. ¹⁹ Cao' ac ca na, wa pin ac ne na ximicon.

Ca pe cain Damasco Saulo, je pain ca in mao cain Jerusalém quem

Saulo ma', pe ho' ac cocon na co howa nana ma', pain Damasco ma'. Om ca tocwan homa ne xec pain ca pe ho' cocon ma'. ²⁰ Pijim' hwet ho'

toton con Jeju ta ac ca na, pijim' pe ac cain na oro xirim ca cut in to xucucun oro judeu. Panxica Iri' Jam na Jeju ta nonon pain ca pijim' cocon ma'. ²¹ Wa wa wa wa xam' ac cocon na oro wari' co taraju nonon quem. He! Om ca wirico ca co to' om pin toton nonon co howa nonon Jeju pain Jerusalém ra? Om ca quep toton cocon pain i ca' quem ra? Je ca maqui' ca ca' ira! Quep toton, pao' to cut mi' toton cocon oro taramaxicon nucucun oro sacerdote ta ca ma' ira. Ac i ma' paxi' na ca tomi' caca ma'. ²² Ane pijim' hwara' opa tiquin' pijim' hwara' opa tiquin' ca Saulo ma' ne. Jeju pan na co winim' hwe ma', wirico co Cristo ta tata oro win judeu ca co to nanain Damasco ma'. Hehe ac cocon na quem. Om ca tomi' in pin ac cocon. Xi querec pin' ara cocon pain ca pijim' iri'o' nucun ta.

²³ Ac i ma' ac i ma' nana. Pain pin iri na ne, cut in ac xucucun na oro taramaxicon nucucun oro judeu. To' pa' pin xun Saulo ta ac xucucun na. ²⁴ Ane ma' ca wari' co tomi' hwet non pain ne. To' pa' pin xim nenem ta Saulo. Coco' ho' nanain oro manain cote ne pacun ca tao' caho' nain oro xirim ca', ca corom ac caca oro wari' ma'. Winim' nenem. Hwet mao ta' iri ra ne, quep ac quequem tara, to' pa' pin ac quequem tara ta non. ²⁵ Tomi' hwet ac tococwa na co taxipa' ca ma'. Xim pin iri na ne, o mao pan ac cocon na pain cote ne pacun ca tao' caho' nain cidade ma'. An ho' pe ac cocon na pain cote ne coco, wara ca' na man pain pacun ca tao' caho' nain cidade ma', an quiji' pe ac cocon na pain xijein cacarain quem.

²⁶ Mao iri nain Jerusalém Saulo ma' ne, jao jao ma' toton co howa nonon Jeju cwa' paxi' na. Ane jin' cocon ne. Jin' jin' pi' pin nonon. Om ta howa iri'o' ca ma' nonon. Howa mixein tara ma' nonon. ²⁷ Quep xiho' pan ac con na Barnabé ma'. Maji tomi' xuxun oro apóstolo ma', o mi' ac tococwa con na. Tomi' xo' ac tococwa na: Querec non Taramaxicon nexi' Saulo cwa'. Querec pe non pain wanaji Damasco. Tomi' napa' quem non. Pijim' pe ac cain na Damasco. Om ca pijim' jin' ca pain ca pijim' hwet cocon con Jeju oro wari' ta, ac i ma' na ca tomi' xo' cocon oro apóstolo Barnabé ma'. Na ra ac caca na. ²⁸ Ac i ma' na ca pe ho' pin cocon ma'. Jao jao ma' nonon pain oro ca mama' nucucun pain Jerusalém ma'. Pijim' na quem. Om ca pijim' jin' ca pain ca pijim' hwet tococwa con Taramaxicon nexi' oro wari' ma'. ²⁹ Tomi' tomi' paxi' tata oro judeu co tomi' e' nanain capijacocon oro grego. Pijim' xo' paxi' tata, ane tama' to' pa' pin xun cocon ne. ³⁰ Co howa nonon Jeju ma', taxi' pin iri nonon pain ca to' pa' pin xun

cocon ne, o mao pan ac cocon na pain xijein cidade pain Cesareia cain. In mao rain macaram pain Tarso ta ac cocon na, mao ac ca na.

³¹ Pain oro xijein cidade pain Judeia, je pain Galileia, je pain Samaria ma', om pin na wari' co mana' nonon oro co howa nonon Jeju, om pin na wari' co quep em' nonon quem. Mija pin ac caca na co howa nana ma', xi om ne ca quep xiho' pan ara cocon Tamataracon Iri' Jam ta. To' hwara' opa tata pain ca howa nucucun. Win xumu e' nanain ca param pan nucun Taramaxicon nexi' quem.

Ca taramaja pe cain Lida je Jope Pedro

³² Pedro ma' iri na ne, xut mao nain oro xijein cidade ma'. Xut xut xut, tomi' ac xucun na: Mo querec toton oro wari' nucun Iri' Jam co to nanain Lida ta ac ca na, hwet ac tococwa na. ³³ Wa' mao iri nain i cain ne, querec ac con na wari' co carama pe. Eneas na wixicon. Ma' 8 na cawaxi' pain ca terem' e' cain wi ma'. ³⁴ Tomi' pan ac con na Pedro: Quep xio pin nem Jeju Cristo ta Eneas. Tequi' pe ra ta. An pe xo' rain witam ma' na ca tomi' con ma'. Tequi' pe hap pin ac ca na. ³⁵ Querec querec pi' pin nonon oro wari' co to nanain Lida je pain Sarena ma'. An to pin nanain ca wara howa ximama' nucucun, howa pin ac cocon na Taramaxicon nexi'.

³⁶ Pe nain xijein cidade narima' co howa non Jeju quem. Tabita na wixicam pain capijacocon oro judeu. Pain capijacocon oro grego ma' iri na ne, Dorcas na wixicam. Jope na wixinain cidade ca pe cama ma'. Tama' ara nain ca awi wa Dorcas ma', xiram pa' nonon oro wari' co om nonon carawa quem. Mi' taxipa' nonon pain oro carawa ca wajim' caca ma', je cwerequem pane. ³⁷ Pain ca pe pe wet cain Jope Pedro ma', caxi ac cama na Dorcas, mi' pin ac cama na quem. Hohoc ac cacamain na cwerequem, an piri' mao xim e', wara ca' na manain xirim pain pawin ma', an terem' pe ac cacam na.

³⁸ Om ca pira ca' xijein Jope pain Lida ma'. Co howa nonon Jeju pain Lida ma', taxi' pin iri nonon Pedro pain ca pe cain Lida ne, mo'o jun ta ac tococwa na wari' ma'. Ma' 2 nana co mo'o jun wawa ma'. Maqui' hap ra me jun ta tata. Mama' ac caca na.

³⁹ Maji ta ac cocon na Pedro ma'. Ma, ja' ja' ac tococwa na. Xuruxut xuruxut, hwet iri nanain Jope ne, o piri' mao ac cocon na pain manain xirim pain pawin ma', ca terem' pe cama ma'. Coco' coco' mam' pin nonon

oro narima' co wara cono' ca' nanam waram taxicacam ma'. Awaran nanam, mam' pe mi' nonon con oro wom co oc cama Dorcas pain ca e' e' wet nequem ma'. Oro wom cam, iri' curucun wom, oro to' om capin' ma' quem. Mon cwa' wom co oc mi' caparut pane nana.

⁴⁰Hwrehwet ca' jein man ca' ac cacam na Pedro. Hwrehwet mama' hwrehwet mama' pi' pin iri nana ne, pe torotop pe ac ca na. Tomi' ac con na Iri' Jam. Xin in hwet ac cam na, tomi' ac cam na: Tequi' pe ra e' ta Tabita nam. Querec ac cama na. Querec iri non Pedro ne, xao pe ac cama na. ⁴¹Quep ac cam na pain micam, an tequi' pe xat ac cam na. Corom qui' je ta ac tococwa na oro wari' nucun Iri' Jam ma', wiricacam oro narima' co wara cono' ca' nanam waram taxicacam ma' quem. Mam cwa' ta. E' mami' na ta, ac i ma' na ca tomi' tacacama ma'. ⁴²Oro wari' co to nanain Jope ma', taraju taraju pi' pin ac caca na pain ca e' mami' cama Dorcas ma'. Mija ac caca na co howa pin nonon Taramaxicon nexi'. ⁴³Mon to wet ac cain Jope na Pedro ma' quem. Pe ho' non Simão co xu taxipa' tapari carawa ma'.

Taramaxicon Cornélio

10 Pe nain xijein cidade wari' co taramaxicon nucucun oro soldado. Cornélio na wixicon. Cesareia na wixinain cidade ca pe pan ca ma'. Ma' 100 nana oro soldado co taramaxicon ne nonon ma'. Maqui' nanain Itália. Soldado wi nana cocon oro xucucun soldado co maqui' nanain Itália quem. Je ca Oro Italiano tococwa ma'. ²Om paxi' na ca judeu ca Cornélio ma', ane xut xo' ca con Iri' Jam ne. Wirico, oro ca nari nucun cocon oro wari' co to ho' nonon pain xiricon ma' quem, xuruxut xo' nana pain ca win xumu taxipa' cacain ca param nucun Iri' Jam. Tomi' ha' nonon quem. Cornélio ma', xiram pa' tamana nonon oro wari' co om nonon carawa ma'. Tomi' taxipa' non Iri' Jam quem.

³Maqui' ac ne na xec pain ca querec ca carawa Cornélio ma'. Piquirim pin na xina ma', pain 3 hora ma', ac ca tohwein' ca na. Querec paxi' na, om ca pi'am ca. Ac ca querec con na jam co taramaja mi' non Iri' Jam. Om ca querec tocohon ne tocon, querec iri'o' non. Ac ca xut hwet con na, Cornélio ac con na.

⁴Jin' tamana ac ca na Cornélio. Noro tamana non. Ma' carawa quem taramaxicon ac con na.

Om na, taraju nem Iri' Jam pain ca tomi' mon ma'. Hohot mon pain ca xiram pa' momon oro wari' co om nonon carawa quem. ⁵Je ca tomi' xim ca' ac con na: Tomi' ho' roron oro wari' nem ma'. Mo'o totoron Simão pain Jope cain. Pedro na xijein wixicon quem ac con na. ⁶Pe ho' non Simão co xu taxipa' tapari carawa cwain. Pe ja' pan nain cote ne com xiricon quem, ac ca tomi' ac i ma' con na.

⁷Mao iri na jam co tomi' non ma' ne, harahap je ac tococwa na wari' nucun co taramaja mi' nonon ma'. Ma' 2 nana. Tomi' ac tocwa na soldado co quep xiho' non ma' quem, co xut xo' pain ca win xumu e' cain ca param nucun Iri' Jam ma' quem. ⁸Tomi' hwet ac tococwa na pain ca tomi' nucun jam co taramaja mi' non Iri' Jam cara ne. Mama' jein Jope cain, mo'o jun Pedro cwain ac tococwa na, mama' ac caca na.

⁹Xec pin iri na ne, xuruxut xuruxut tiquin' ac caca na oro wari' nucun Cornélio ma'. Tocon xina pin iri na ne, pain ca xuruxut xuruxut wet cacain wana ma', wixicam pin ac cacain na Jope. Pedro ma' iri na ne, piri' pe tain xonein xirim ta ac ca na. Piri' pe ta', tomi' ton Iri' Jam ta pan xucun. ¹⁰Aram aram pe' pin ac ca na, cao' ta' carawa ta ac ca na quem. Hoc xin iri nanain con ne, ac ca tohwein' ca na. Querec paxi' na, om ca pi'am ca pain ca tohwein' nucun. ¹¹Ac ca querec cain na ca wein mao nein nanawin ma'. Ac ca quiji' qui' cain na pawin carawa ca ac cote ca wom ma'. Tucu tucu xam' na tamacon. Ac i ma' na ca quiji' hwet cain macan'. ¹²To non oro carawa ca ein caca oro judeu ma'. Ma' na oro caji carawa, ma' na oro caji em', ma' na oro caji me quem. ¹³Tomi' ac con na ca tomi' wa ma': Tequi' pe ra ta Pedro. To' pa' ra carawa ma', cao' ra ta napa' ca tomi' wa ma'.

¹⁴He! Om na ta Taramaxicon ne ac ca na Pedro. Xi wara cao' tain caji carawa pane ta. Om ca cao' camain' tain caji carawa ca tomi' caho' caparut Moisés pane ta na pain ca tomi' in pin ca ma'.

¹⁵Ta caji carawa main carawa ca to' hohot pin ca Iri' Jam me, ac i ma' na ca tomi' con ma'.

¹⁶Tomi' cain' non co tomi' non ma', tomi' mami' ac con na, tomi' mami' ac con na quem. Ma' 3 pin iri na ca tomi' con ne, cuc in mao ac tocwa na cote ca wom ma'. In mao ac cain na pawin.

¹⁷Cain' cain' xira ne ac xucun na Pedro ma'. Cain' ca tomi' xim capa' Iri' Jam pain ca tohwein' ne cara ne xicun pain ca coromicat nucun.

10.5 Pedro na xijein wixicon Simão con Jeju. Ma' nana wari' co Simão Simão wet nonon, ma' nana co Simão Pedro nonon, ma' nana co Pedro e' nonon quem.

Coromicat ac i ma' coromicat ac i ma' wet iri na ne, tan' mama' ac cacain na Jope wari' co tomi' ca Cornélio cara ne. Main ca pe ne xiricon Simão ma' quem? Om na, pe nain i ma' ta ac tococwa na. Je win cain' cain' xira ne ca Pedro ma', hwet ac cacain na manain xiricon Simão. ¹⁸Merem ac caca na: Je i ca' ca pe ca Simão ma', co Pedro na xijein wixicon cocon oro wari' ma'? Ac i ma' na ca merem caca ma'.

¹⁹Cain' cain' xira ne cain' cain' xira ne wet na Pedro pain xonein xirim ma' quem. Tomi' ho' non Tamataracon Iri' Jam: Ma' 3 nana co pirao' nenem ma' Simão. ²⁰Je ca tomi' xim ca': Tequi' pe ra ta. Quiji' hwet roron. Ja' ja' roron quem. Ta hehe momon me. Xi wata' ara ne co tomi' nonon ta. Mo'o jun ta pan inonon, ac i ma' na ca tomi' con Pedro Tamataracon Iri' Jam.

²¹Quiji' hwet ac tococwa na. Maqui' hwe? Wata' co pirao' hwe ma'. Para maqui' hwe ma' quem ac tococwa na.

²²Om na, mo'o jun Pedro ta naparut taramaxicon nuxut Cornélio pum. Xut xo' taxipa' na Cornélio. Tomi' ha' taxipa' non Iri' Jam. Querec pin' querec pin' pi' pin nonon oro judeu pain ca xut xo' nucun. Tomi' ca' non jam co taramaja mi' non Iri' Jam quem: Tomi' roron oro wari' nem ma'. O qui' totoron Pedro pain xurum ca'. Ma' ta taraju mon pain ca tomi' xim ta, ac i ma' na ca tomi' con taramaxicon nuxut jam co taramaja mi' non Iri' Jam pum ta nonon.

²³Na ra ac ca na Pedro ma'. Corom qui' je ta. Pi'am to ho' xine ta ac tococwa na.

Xec pin iri na ne, maji ta ac xucucun na, mama' ac caca na. Ma' nana wari' nein Jope co ja' ja' nonon, co win howa ca ma' quem. ²⁴Xuruxut xuruxut xuruxut. Toco' toco' xec pa' ac cocon na. Xec pin mami' iri na ne, tan' mama' ac cacain na Cesareia. Wara winim' nonon Cornélio. Wara tomi' cut in tata oro ca nari nucun cocon oro win ma' ca co taxipa' ca ma' quem. Winim' xun Pedro ta xucucun. ²⁵Hwet ac cain na xiricon Cornélio Pedro ma'. Corom mao ta' iri na ne, hwet qui' ac ca na Cornélio. Maqui' ma? Maqui' ina ta ac xucucun na. Pe torotop mi' querec te pan ac con na Cornélio. ²⁶Ane tomi' in pin con Pedro ne. Om na, tequi' pe ra ta. Wari' ta' ca' ira. Win ma ma', ac i ma' na ca tomi' con ma'.

²⁷Ca corom cain xiricon ma', pijim' xuruxut ac xucucun na. Querec ac tococwa na oro wari' co wara cut in nana ma'. Mija nana wari' ta. ²⁸Tomi' pan ac cocon na Pedro: Taxi' maparut pain ca judeu urut ca'. Moji'ac urut cocon oro wari' co om judeu nana. Om ca hwet urut cocon pain xiricocon

quem, je curuxut. Taxi' maparut ma' ira. Ane tomi' pan capa' Iri' Jam ne: Ta moji'ac momon me ta. Ta caxicon wari' nana momon me ta napa'. ²⁹ Je ca om ari toton co mo'o nanapa' cwa'. Om ca tomi' in pin toton. Maqui' ac ta' na quem. Je ca tomi' xuhu' ca': Para maqui' ra mahu' quem? Tomi' xine e' ac tococwa na.

³⁰ Tomi' hwet xim pain ac con na Cornélio ma'. Ma' 4 pin napa' xec pain ca tomi' ton Iri' Jam pane. Tomi' pe inon pain xuru ca'. Ac co cwa' na xina pata', pain 3 hora pane, tomi' ac ton na Iri' Jam. Ane ane xat quima hwet ac capa' na wari'. Toc meremem tamana na womicon. ³¹ Tomi' ac capa' na: Taraju nem Iri' Jam pain ca tomi' mon ta Cornélio. Mam' pe wet nem pain ca xiram pa' momon oro wari' co om nonon carawa quem. ³² Tomi' ho' roron oro wari' nem ac capa' na. Mo'o toton Simão cwain, co Pedro na xijein wixicon cwain. Pe nain Jope cain. Pe ho' non Simão co xu taxipa' tapari carawa. Pe ja' pan nain cote ne com xiricon ma', ac i ma' na ca tomi' capa' pane. ³³ Je ca tomi' hap toton oro wari' ne cwa'. Mo'o jun ta inonon pum. Tomi' querec te inem pain ca maqui' nem ca'. Wara cut in xujuxut con Iri' Jam quem. Winim' urut pum pain ca pijim' ta' ma ma'. Taraju xixin na urut pain ca pijim' ra quem Taramaxicon nexi' ta. Ac i ma' na ca tomi' con Pedro Cornélio ma'.

³⁴ Pijim' ac cocon na Pedro: Taxi' pin inon Iri' Jam pain ca om tomi' querec te paxica' cocon oro wari' ta. ³⁵ Oro wari' co maqui' nanain oro xijein macan' ma', mo ta xuruxut xo' caca, mo ta tomi' ha' taxipa' cocon Iri' Jam quem, tomi' querec te tomi' querec te xam' pan nonon Iri' Jam. ³⁶ Taxi' hun Iri' Jam pain ca wara tomi' hwet caparut pain ca wari' nein Israel urut ca', pain ca ha' pin cuhu' pain ca toron toron om pin ne xumuhu' pain ca caracat nuhu', xi om ca Jeju Cristo co taramaxicon pe ho' taramaxicon pe ho' pi' pin nonon oro wari' ta caparut pane. ³⁷ Taxi' hwein oro carawa ca ara to nain oro xijein cidade pain Judeia pane quem. Ara pe cain' na pain Galileia, mao ac ne ma' na pain oro xijein cidade pain Judeia. Pijim' iri na João cara pane ne, pain ca ja' je com, ma' ta querec pin' xihwe pain ca cwirin' pin hwein ca caracat nuhu' ta tococwa oro wari' pane, mao ac ne ma' na ca ara ne oro ca awi wa pane, taxi' hwein i ma' quem. ³⁸ Taxi' hun Jeju co maqui' nain Nazaré, taxi' hun pain ca mi' con pain Tamataracon Iri' Jam, je pain ca mi' con pain ca hwara' opa nucun quem. Taxi' hun pain ca xut mao cain oro xijein cidade pane, pain ca tama' xiram pa' cocon oro wari', je pain ca tama' quep xio cocon oro wari' co ximin nana con

Caxicon Jam quem. Ha' non Jeju pain ca ara ac i ma' ca pane, xi om ne ca pe ho' pan ara con Iri' Jam ta.

³⁹ Querec querec pi' pin urut pain oro ca ara ca Jeju pane. Oro ca ara pe cain macaraxut pain ca judeu urut ca', je pain Jerusalém ma' quem, tomi' hwet mi' urut cocon pain oro wari'. Je ca to' pa' pe tocwa quem. Tatatain mi' ta pain pana pane. ⁴⁰ Ane to' e' mami' con Iri' Jam ne. Ma' 3 pin iri na xec pain ca mi' pin nucun ne, to' e' mami' ac con na Iri' Jam. Querec urut con quem, xi an hwet mi' ara caparut con ta. ⁴¹ Om ca querec querec pi' pin cocon oro wari', om na. Xica' to urut pain ca querec urut con pain ca e' mami' nucun. Xica' to urut pain ca querec urut con pain ca cao' to ho' urut con quem. Xi om ne ca wara tora' ara caparut Iri' Jam pain ca tomi' hwet jujun oro wari' pain ca querec hun ta caparut pane ta. ⁴² Tomi' ca' naparut Jeju quem: Tomi' hwet xine cocon oro wari' ta, tomi' hwet jujun pain ca tomi' pan capa' Iri' Jam cwa', pain ca mi' pan capa' pain ca juiz ta' ca', pain ca main tomi' xo' ton toton oro wari' co wara cono' nana, wiricoco co e' e' wet nana quem, pain ca main tomi' xo' ton toton pain oro carawa ca ara caca pain ca e' e' wet nucucun ma'. Wirico Iri' Jam co tomi' napa' pain ta, tomi' hwet jujun pain oro wari' ta, ac i ma' na ca tomi' caparut pane. ⁴³ Wara tomi' nonon oro wari' oro profeta pane quem, pain ca tomi' hwet tomi' hwet xam' tococwa con wari' nucun Iri' Jam co wara tomi' pe ca pane. Ca' na ca tomi' hwet tococwa pane: Oro wari' co howa xun nonon ma', xic am pin ac xine tara pain ca caracat nucucun ta, xi om ca wari' nucun Iri' Jam co wara tomi' pe ca pane nana oro profeta pane. Ac i ma' na ca pijim' cocon Pedro ma'.

⁴⁴ Pijim' pijim' wet na Pedro ma', ane ane hwet pa' ac cocon na Tamataracon Iri' Jam. Pe ho' mip pe ho' mip xam' tata oro wari' co taraju nonon ma'. ⁴⁵ Wa wa ac caca na oro judeu co wara howa pin nonon Jeju ma', co ja' ja' nonon Pedro pain ca maqui' nucun ma'. Mi' nonon pain Tamataracon Iri' Jam caram cwa' co om judeu nana cwa' ra nana. ⁴⁶ Xi taraju ara tococwa pain ca tomi' cacain oro xijein ca capiija wa ca om wara tomi' taxi' caca ta. Taraju tata pain ca awi na Iri' Jam awi na Iri' Jam ta caca pain ca tomi' nucucun quem.

Tomi' ac cocon na oro win ma' ca Pedro ma': ⁴⁷ Mi' cocon pain Tamataracon Iri' Jam ca' ira! Win capari' pane. Cain' cain' xuxun quem? Narain ho' xuxun pain ca ja' wa com ra? Om ca narain ho' ac xuxun pain! Ac i ma' na ca tomi' tococwa ma'. ⁴⁸ Na e' na pain ca ja' tococwa pain com

ta. Ma' ta querec pin' tococwa pain ca howa cocon Jeju ta ac tococwa na. Ja' ac tococwa na pain com quem.

Ja' pin iri tata pain com ne, tomi' ac xucucun na: Pe ho' wijimain xut e' ta Pedro ac xucucun na, pe ho' wijimain ac tococwa na.

Ca tomi' xo' cocon co howa nonon Jeju Pedro

11 Oro apóstolo cocon co howa nonon Jeju ma', co to nanain oro xijein cidade pain Judeia ma', tomi' hwet ac tococwa na cocon oro wari' co om judeu nana ma', co howa pin nanain capijacon Iri' Jam ma'. ²Je ca tomi' napat pan cocon Pedro oro judeu co howa nonon Jeju ma'. In mao iri nain Jerusalém Pedro cocon oro win ma' ca ne, tomi' napat ac tococwa na: ³Cain' cain' xima quem? Corom mao a ximain xiricocon tatirim co om wac xirac nanain taparinain ca xirac nucucun ta. Cao' pe ho' momon quem, ac i ma' na ca tomi' napat cocon ma'.

⁴Tomi' hwet xuhu' pain oro ca ara napa' pane ac cocon na Pedro. Pain ca xo' ara ten qui' capa' pain cara pane, tomi' xo' xuhu' pain ac tococwa na. ⁵Ca' ina pane, pain ca pe qui' tain Jope pane, tomi' ac ton na Iri' Jam. Tohwein' ac ta' na quem. Querec paxi' ina, om ca pi'am ta' pain ca tohwein' ne. Ac ca querec tain na carawa ca quiji' qui' nain pawin ma'. Ac cote ca wom na. Tucu tucu xam' na tamacon. Ac ca quiji' hwet capa' na, xat pe ho' ac capa' na quem. ⁶Noro ac tain na tequipacon. Querec inain oro carawa. Oro caji carawa ca mana', oro caji em', oro caji me, je ca querec ta' pane. ⁷Ac ca taraju tain na ca tomi' wa quem. Tomi' ac capa' na: Tequi' pe ra ta Pedro. To' pa' ra carawa ma', cao' ra ta ac capa' na. ⁸Om na ta Taramaxicon ne ac ta' na. Xi wara cao' tain caji carawa pane ta. Om ca cao' camain' tain caji carawa ca tomi' caho' caparut Moisés pane ta ina pain ca tomi' in pin ton pane. ⁹Tomi' mami' ac capa' na ca tomi' wa ca tomi' qui' nain pawin: Ta caji carawa main carawa ca to' hohot pin ca Iri' Jam me ac capa' na pane. ¹⁰Tomi' cain' napa' co tomi' napa' ma', tomi' mami' ac capa' na, tomi' mami' ac capa' na quem. Ma' 3 pin iri na ca tomi' capa' ne, cuc in mao ac tocwa na cote ca wom pain oro carawa. In mao ac cain na pawin.

¹¹In mao pin iri nain pawin cote ca wom pain oro carawa ca to nain tequipacon ne, maqui' ac caca na wari' nein Cesareia. Ma' 3 nana. Hwet nanapa' pain xirim ca pe pan ta' pane. Mo'o jun ta nonon taramaxicon

nucucun pata'. ¹²Tomi' ac capa' na Tamataracon Iri' Jam: Ta hehe momon me ta, ja' ja' roron ta napa'. Mama' ac urut na quem. Ja' ja' nanapa' xerexi' cwa', co 6 nana cwa'. Corom mama' ac urut pain na xiricon wari' ma', Cornélio ma', co om judeu. ¹³Tomi' hwet ac caparut na con jam co taramaja mi' non Iri' Jam quem. Ca' na ca tomi' caparut: Querec inon jam co taramaja mi' non Iri' Jam pane, pain ca xat pe cain xuru ca'. Tomi' ho' roron oro wari' nem ta ac capa' na. Mo'o totoron Simão cwain, co Pedro na xijein wixicon cwain. Pe nain Jope cain ac capa' na quem, ac i ma' na ca tomi' caparut Cornélio. ¹⁴Tomi' hwet terem con Iri' Jam ma', pain ca mi' xim quem pain ca witan ca' main ca caracat nem ma'. Wum, oro ca nari nem cocon oro wari' co to ho' nenem pain xurum ma' quem, mi' xim nuhu' pain ca witan ca' hwein ca caracat nuhu' ta napa' jam co taramaja mi' non ma'. Ac i ma' na ca tomi' caparut Cornélio pane.

¹⁵Pijim' toton ta ac ta' na. Om ca pijim' homa ta', hwet pa' ac cocon na Tamataracon Iri' Jam. Pe ho' mip nonon. Win capari' pain cara pane, pain ca xo' pe ho' mip ten qui' capari' pane. ¹⁶Mam' pe wet ac tain na ca tomi' capari' Taramaxicon nexi' pane: João cara pane, ja' nonon pain com oro wari'. Wahu' iri tara ne, mi' ac xihwe tara pain Tamataracon Iri' Jam ta napari' pane.

¹⁷Je ca tomi' xuhu' ca' ac cocon na Pedro. Mi' nonon pain Tamataracon Iri' Jam ta. Iri'o' ta, mi' nonon pain. Win capari' pain ca howa xun Taramaxicon nexi' Jeju Cristo pane. Cain' cain' xita' cocon quem? Om ca ari ac ton Iri' Jam ta. Ac i ma' na ca tomi' cocon co howa nana Pedro ma'.

¹⁸Taraju iri nanain ca pijim' nucun ne, tomi' napat tomi' napat om pin ac cocon na Pedro. Tomi' querec te pin nonon Iri' Jam quem. Awi na Iri' Jam ta nana. Wa wa urut con pain ca xiram pa' cocon oro wari' co om judeu nana ta. Xiram pa' inuhu', ma' ta cwirin' pin hwein ca caracat nuhu', ma' ta e' cara hwe pain pawin ta cocon ma' ira, ac i ma' na ca tomi' caca pain ca tomi' querec te nucucun ma'.

Oro co howa nana co to nanain Antioquia

¹⁹To' pa' pin iri ta Estêvão cara pane ne, ja' tequi' quep em' ac tococwa na co howa nonon Jeju. Wawaran mama' ac caca na pain oro xijein macan'. Ma' nana co mama' nanain macarain Fenícia, ma' nana co mama' nanain xixi pan nein macan' Chipre. Ma' nana co mama' nanain xijein cidade

pain Antioquia quem. Pijim' paxi' nanain capijacon Iri' Jam, ane pijim' hwet e' cocon pain ca win judeu caca ne. ²⁰ Co to' wawaran ca' wawa pain Jerusalém ma', ma' nana co to pin nanain Chipre je xijein cidade pain Cirene ma'. Tan' mama' iri nanain Antioquia ne, pijim' pijim' ac tococwa na co om judeu nana ma' quem. Tomi' hwet tata pain capijacon Iri' Jam ca tomi' hwet napari' pain ca to' witan xim capari' Taramaxicon nexi' Jeju. ²¹ Quep xiho' tamana pan nonon Taramaxicon nexi' quem, pain ca mi' cocon pain ca pijim' hwara' opa wa ma'. Howa mija ac caca na oro wari' co om judeu nana quem. An to pin nanain ca wara howa ximama' nucucun, howa pin ac cocon na Taramaxicon nexi'.

²² Tomi' hwet ac tococwa na co howa nana pain Jerusalém ma'. Howa pin nana wari' co om judeu nana ma', co to nanain Antioquia ma' tata. Je ca mo hwet roron pain Antioquia ta cocon Barnabé ma'. ²³ Wa' mao iri nain i cain ne, querec pin' ac tococwa na pain ca xiram pa' cocon Iri' Jam, je pain ca quep xiho' cocon quem. Hu ac tococwa na: Win xumu jun Taramaxicon nexi' ma'. Hwara' opa cara je pain ca howa hun quem tata. ²⁴ Barnabé ma', awi na, xut xo' taxipa' na. Pe ho' mip non Tamataracon Iri' Jam, howa mip na quem. Ma' mija pin ac caca na oro wari' co howa nonon Taramaxicon nexi' con.

²⁵ Pirao' ton Saulo ta ac ca na Barnabé ma', mao ac cain na Tarso. Je i ma' cidade nucun Saulo cara pane. ²⁶ Mam' iri non ne, o mao ac con na pain Antioquia. Mon to wet ac cacain na i cain. Cut in cut in ac xucucun na cocon co howa nonon Jeju ma' quem. Ma' mija nana co ca' na caca pain capijacon Iri' Jam. Ca' na ca' na cawaxi' pa' ac cocon na. Co howa to nanain Antioquia pane, je win o' ma' pin tococwa pain ca howa cocon Cristo. Oro wari' nucun Cristo ta tata pane.

²⁷ Pain ca to to wet cacain Antioquia Barnabé con Saulo ma', maqui' ac cacain Jerusalém na oro win howa caca co profeta nana ma'. Tomi' hwet taxipa' nanain xocori ca tomi' nucun Iri' Jam. ²⁸ Tomi' hwet xuhu' pain ca xo' tomi' capa' Tamataracon Iri' Jam ta ac ca na xucun ma', Ágabo na wixicon. Pe' tamana tatara oro wari' co to nanain oro xijein macan' ta na. (Iri'o' na ca tomi' nucun Ágabo quem, xi pe' tamana ara caca oro wari' pain ca taramaxicon taramaxicon wet ca Cláudio cara pane ta.) ²⁹ Tomi' xo' ac xucucun na co howa nonon Jeju ma': Cut mi' xuxun pain dinheiro oro xerexi' co to nanain Judeia ta ac xucucun na. Co ma' tamana nonon dinheiro ma', cut hwara' ac caca tara. Co om hwara' nonon ma' iri tatara

ne, cut pije' ac caca tara quem. Ac i ma' na ca tomi' xo' tomi' xo' xam' xucucun ma'. ³⁰Ara ac cacain na. Cut nanain dinheiro nucucun, cut mi' ac tocwa na pain Barnabé con Saulo ma'. Cut mi' jujun pain dinheiro nexi' oro xerexi' co querec wet nonon co howa nonon Jeju pain Jerusalém ta ac tococwa na, cut mama' ac cacain na.

Ca pa hwet tocwa pain xirinain ca tao' to tao' to to wa Pedro

12 Pain ca mama' cacain Jerusalém Barnabé con Saulo ma', je i ma' oro xec pain ca quep em' toton cocon co howa nonon Jeju taramaxicon Herodes ma'. Je ca quep jujun ta mi' tococwa oro soldado nucun. Ma' ac caca na co tao' to wawa pain xirinain ca tao' to tao' to to wa ma'. ²Ton tapit pin jein winacon Tiago ma' quem ac tococwa na. Aji' non Tiago João ma'. Apóstolo nucun Jeju nana pane.

³Querec pin' iri nonon oro taramaxicon nucucun oro judeu Herodes ma' ne, pain ca hohot cocon pain ca to' pa' pin tocwa Tiago ma', ac i ma' ton Pedro quem ac ca na, quep jun ta ac tococwa na oro soldado nucun. Je i ma' oro xec nein Páscoa ma', pain ca cao' querec te e' cacain capam' ca om joc wanan wa pain ca to' memerem nein pane. ⁴Quep iri ta Pedro ne, tao' pe ac tocwa na pain xirinain ca tao' to tao' to to wa ma'. Querec wet xo' jun ta ac tococwa na oro soldado. Ma' 16 nana oro soldado co querec wet nonon ma'. Ma' 4 nana co querec wet cain' nonon, corom corom ac caca na xucucun co 4 nana ma', xin hwet xin hwet ac xucucun na quem. Wara an pe xo' nain ca coromicat nucun Herodes ma': Pi' pin iri tara ca tomi' querec te nucucun oro wari' pain xec nein Páscoa ca' ne, an hwet mi' ac toton tara con Pedro cwa'. Ma' ta querec cocon pain ca tomi' querec ton ta' ca', pain ca em' ma, na e' na pain ca to' pa' pin xima ta ton ta' ca', ac i ma' na ca wara coromicat pe nucun Herodes.

⁵Tao' pe ac tocwa na Pedro pain xirinain ca tao' to tao' to to wa ma'. Ane tomi' mi' tamana cocon con Iri' Jam oro co cut in xucucun pain ca howa cocon Jeju ma' ne. Tomi' mip nonon Iri' Jam pain iri' ximicocon.

⁶Pi' pin iri na oro xec nein Páscoa ne, pain iri' xim nein ca xec an hwet mi' toton con oro wari' Pedro ta ca Herodes ma', pe pe wet nain xirinain ca tao' to tao' to to wa Pedro ma' quem. Joc ximija pe nonon soldado

12.3 Páscoa na wixinain xec nein ca tomi' querec te xucucun oro judeu pain ca mam' pe wet cocon oro hwanana nucucun pain ca to' witan ca' tococwa pain Egito pain cara pane.

co querec wet nonon ma'. Mam' tucu nonon pain arain too ma', pain iri' curucun ma', pain paraxicon ma' quem. Ma' 2 ac caca na xucucun soldado co coco' caho' nanain manain xirim ma' quem. Pi'am na Pedro ma'. ⁷ Ane ane hwet qui' ac ca na jam co taramaja mi' non Taramaxicon nexi'. Toha pin ac ne na naran pain man ca tao' pe pe tocwa ma'. Meo non pain quiricon, ho' querec ac con na quem. Hap ra, tequi' pe ra ta ac con na. Camara' ca' ac nein micon na arain too ma' quem. ⁸ Tucu rain macoricon womum ma'. Pe ra caji caximam ma' quem ac con na. Tucu ac cain na, pe ac cain na caji caximacon. Pe ron to' om capin' nem ma', ja' ja' ne ta ac con na. ⁹ Hwrehwet mama' ac caca na. Ja' ja' paxi' non jam Pedro ma', ane om querec pin' ca ne. Om ta pa hwet capa' jam co taramaja mi' non Taramaxicon ne cwa' ma' na. Tohwein' ina xi' ma na. ¹⁰ Xuruxut xuruxut tiquin' ca' ac tococwa na oro soldado co coco' caho' nanain manain xirim ma'. Xuruxut xuruxut tiquin' ca' ac tococwa na oro wiracocon ma'. Xuruxut xuruxut, wara ca' na iri' cote ne manain xirinain ca tao' to tao' to to wa ma', ca hwet ac hwet ac wa pain oro xirim ma'. Iri' cote ne arain too na ca tao' pa' nain. Pa ximao pan ac ne na. Hwrehwet mama' ac caca na. Xuruxut xuruxut ca' nana, hwet iri nanain tamain wana ne, ane ane om pin ac ca na jam co taramaja mi' non Taramaxicon nexi'.

¹¹ In pin ac ne na ximicon Pedro ma'. Taxi' pin inon Taramaxicon ne pain ca mam' capa' con jam co taramaja mi' non ta. To' witan ca' napa' con Herodes ma'. To' witan ca' napa' cocon oro win judeu ta' cwa', pain ca winim' cocon oro soldado pain ca to' pa' pin xim cacapa' ma' quem, ac i ma' xucun.

¹² In pin iri na ximicon ne, pain ca to' witan pin con Taramaxicon nexi' ma', mao ac cain na xiricam Maria ma', jicon João Marcos ma'. Wara cut in to xucucun pain xiricam Maria co howa nonon Jeju ma'. Mija nana. Tomi' nonon Iri' Jam. ¹³ Tataca ac cain na panaji cote ne manain xirim, tataca tataca. Maqui' ac cama na xojam' ma', co taramaja pe nain xirim ma'. Rode na wixicam. Maqui' ac cama na. Ha'? Ma' wari' ma' quem ac cama na.

¹⁴ Wata' ta ac ca na Pedro.

Taraju pa' iri nain ca tomi' nucun Pedro ne, tomi' querec te tamana ac cama na. Pa xiron pain man xi tomi' querec te nene cama ta. Mo in mao e' ac cama na. Hwet pe na Pedro, xat pe ho' nain manain xirim ca' ac tococwa na.

¹⁵He, tamanain ma ra ac cacam na.

Om na, hwet pe na, iri'o' ta ac cama na.

Tara. Jam co querec wet non tara ta ac caca na.

¹⁶Ca tomi' tomi' xucucun ma', ca tataca tataca tiquin' ca Pedro ma' quem. Pa ac cacain na manain xirim. Querec iri nonon ne, i'ina ac ne na ximicocon. Wum ra Pedro? Cain' cain' xira quem ac cocon na.

¹⁷An piri' ac cain na micon. Tacana to je ta ac tococwa na, tomi' hwet ac tococwa na pain ca pa hwet tocwa ma'. Pa hwet napa' Taramaxicon nexi' ta. Tomi' hwet jun pain Tiago cocon oro xerexi' me ac tococwa na. In ca' ac tococwa na, mao ac cain na xijein xirim.

¹⁸Xec pin iri na ne, teretem ac caca na oro soldado co querec wet nonon ira. I'ina tamana na ximicocon. Cain' cain' xira ne ta? Ma' carawa ca ara non Pedro cara ne? Main xi mao ca quem, ac i ma' na ca tomi' xucucun pain ca teretem tamana nucucun.

¹⁹Pirao' jun ta ac cocon oro soldado na Herodes ma'. Pirao' pirao' paxi' nonon, ane om mam' cocon ne. Je ca tomi' querec pan tococwa oro soldado co querec wet nonon ira. Cain' cain' hun quem? Main ca mao ca pahu' ac tococwa na. To' parapa' pin jujun ta ac tococwa na oro win ma' caca ma', to' parapa' pin ac tococwa na.

Ca mi' pin nucun Herodes

To' parapa' pin iri tata oro soldado co querec wet nonon Pedro ma' ne, mao ac ca na Herodes. Paca' nain Judeia, mao ac cain na Cesareia, je i ma' wixinain cidade ca mao ca ma'. Mon to wet ac cain na i cain. ²⁰Ac i ma' ac i ma' nana, mana' tamana ac tococwa na oro wari' nein Tiro je Sidom ma'. Cain' cain' xira con ne ac caca na. Na e' na pain ca tomi' xo' xun ta, xi maqui' pan ara nein macaracon oro carawa ca cao' iri' ca' ac caca na. Mo hwet xun ta ac caca na. Tomi' toto cain' nonon Blasto ma', co hwara' opa ma', pain ca taramaja mi' con Herodes ma', pain ca querec wet cain xiricon ma'. Quep xiho' xut me ac cocon na. Tomi' xo' ron Herodes ma', pain ca mana' caparut ca'. Mana' maho' xijexi' quem ca' xun urut quem, tomi' toto ac i ma' nonon Blasto ma'. Ma ac ca na.

²¹Maqui' pin iri na xec nein ca wara coromicat an pe xo' ca Herodes ne, pain ca taraju toton pain ca tomi' xim cacapa' ta ca ma', pe ac con na iri' womicon co awi tamana, iri' womicon taramaxicon ma' con. Xao

pe ac cain na ca mam' xao pe nucun pain ca taramaxicon ca ma' quem. Pijim' toton caram cwa' co maqui' nanain Tiro je Sidom ma' ta ac ca na. ²²Ca pijim' pijim' tococwa ma', merem merem ac caca na: Om ca wari' ca co pijim' ma'. Iri' Jam na co pijim' ma' ta nana pain ca merem nucucun. ²³Wap hap ac con na Herodes jam co taramaja mi' non Taramaxicon nexi' ma'. To' caxi pin non. Xi tomi' in pin tococwa oro wari' pain ca Iri' Jam na co pijim' ma' ta cocon ta. Tomi' in pin xiroron. Om na, wata' cwa' ira, om ca Iri' Jam ta', awi tamana pan na Iri' Jam ta, tomi' in pin ac i ma' xiroron. Je ca wap con jam co taramaja mi' non Taramaxicon nexi' ma'. Cao' pin non caxicon cwam, mi' pin ac ca na.

²⁴Pijim' pijim' tiquin' ac cacain capiiacon Iri' Jam na co howa nonon Jeju ma'. Ca pijim' pijim' caca ma', ca howa howa caca oro xucucun wari' ma', mija pin ac caca na co howa nana ma'.

²⁵Barnabé con Saulo ma', ara ara pi' pin iri nanain oro ca taramaja nucucun pain Jerusalém ne, in mama' ac cacain na Antioquia. O mao nonon João ma' quem, co Marcos na xijein wixicon ma'.

Ca pijim' mama' tatarain pira tococwa Barnabé con Saulo

13 Ma' nana wari' co cut in to xucucun pain Antioquia ma', pain ca howa cocon Jeju pane. Ma' nonon co tomi' hwet nanain xocori capiiacon Iri' Jam ma', ma' nonon co ca' na nonon con Jeju quem. Mo nana: Barnabé ma'. Simeão co Níger na xijein wixicon ma'. Lúcio co maqui' nain Cirene ma'. Manaém co win ma' ne non taramaxicon Herodes pain ca hwijima' nucucun pane. Ma' na Saulo ma' quem. ²Ac i ma' ac i ma' nana, cut in ac xucucun na pain ca tomi' xun cocon Iri' Jam. An to xin ca cao' wa, ma' ta momon tomi' e' xun Iri' Jam ta nana, ara ac cacain na. Pain ca tomi' cocon ma', tomi' ho' pan ac cocon na Tamataracon Iri' Jam: An to ni mi' xine con Barnabé con Saulo ma'. Ma' na ca taramaja wa ca ara je toton ta. Ac i ma' na ca tomi' cocon Tamataracon Iri' Jam. ³An to an to tiquin' ac cacain na ca cao' wa pain ca momon tomi' tomi' cocon Iri' Jam ma'. Quep ac tococwa na pain winacocon Barnabé con Saulo. Mama' je, ara jein ca taramaja wa ca ara je cuhu' Iri' Jam ta ac tococwa na.

Ca mama' cacain Chipre Barnabé con Saulo

⁴Mama' ac caca na Barnabé con Saulo. Xi om ne ca mama' je pan ara cocon Tamataracon Iri' Jam ta. Xuruxut xuruxut hwet ac cacain na cacarain com pain Selêucia, je i ma' wixinain cidade pain cacarain com. Corom mama' ac cacain na mam' horoho wa, horoho mama' ac caca na. Horoho horoho hwet ac cacain na xixi pan nein macan' Chipre. ⁵Piri' mama' ac cacain na wapit pain Salamina ma', je i ma' wixinain cidade ca pe nain cacarain com pain Chipre. Tan' mama' iri nanain i cain ne, pijim' xin capijacon Iri' Jam ta ac caca na, corom mama' ac cacain na oro xirim ca cut in to xucucun oro judeu. João Marcos ma', co ja' ja' nonon ma', quep xiho' nonon quem.

⁶Xuruxut mama' ac cacain na oro xijein cidade pain Chipre ma'. Aram aram tan' mama' ac cacain na xijein cidade. Pafos na wixinain. Mam' pe nonon pain i cain wari' co judeu. Barjesus na wixicon. Ara xirac nonon oro wari'. Tomi' ximao na quem. Tomi' hwet inain capijacon Iri' Jam ta paxi' na ira. Ane mixein ca ne, om ca capijacon Iri' Jam ne ca tomi' hwet ca pane. ⁷Barjesus ma', taxipa' non Sérgio Paulo ma', co taramaxicon pe ho' nonon oro wari' nein Chipre ma'. Taxi' tamana na Sérgio Paulo ma', taraju pa' nain oro carawa. Taraju xitain capijacon Iri' Jam na na quem. Je ca harahap je ta tococwa Barnabé con Saulo ma'.

⁸Ane ari con Barnabé con Saulo co ma' co ara xirac ma' ne, Elimas ma'. Je i ma' xijein wixicon Barjesus pain capijacocon oro grego ma'. Ari non Barnabé con Saulo. Noc tata pain ca pijim' mi' cocon pain capijacon Iri' Jam taramaxicon ma'. Ta howa mon Jeju me ta pan non taramaxicon ma' quem. ⁹Tamataracon Iri' Jam ma', pe ho' mip pan ac con na Saulo ma', co Paulo na xijein wixicon. Pe ho' mip iri ta Paulo ne, noro mip ac con na co ara xirac ma'. Tomi' ac con na: ¹⁰An xiho' a ximon Caxicon Jam ta! Ari ari pi' pin main oro ca awi wa ta. Iri' waximain ca mixein wa pain ca pan tem wa a xima. Je xi tomi' napat maho' qui' mon Iri' Jam pain ca iri'o' nucun quem? Mixein taxipa' a xima, tomi' ni ca' a ximain capijacon ca iri'o' ta na ca tomi' carapita con ma'. ¹¹Tomi' noro ac con na quem: Wap ho' terem Iri' Jam ta. Om pin tara tucum. Om ta ha' quem pain ca querec hap mami' ma quem, om om tara. Ac xim tara xec ma' pum, om ta ha' quem pain ca querec mami' main ca toha ca xina ma' quem. Maqui' pa'

13.9 Je win hwet pin ne xijein wixicon Paulo pain ca xirao' nucun Lucas pain Atos ca'.

iri terem xec nein ca querec mami' ra ta nem Iri' Jam ne, querec mami' ac ma tara ta. Ac i ma' na ca tomi' noro con ma'.

Om pin hap ac ne na tocon. Ac ca tatep pa' con na ca mixem ne tain'. Xom mapam' xut ximao ac ca na, ma' xirapa' wari' co coc papan napa' na na. ¹²Taramaxicon ma', querec iri nain i ma' ca ara non co ara xirac ma' ne, howa pin ac con na Jeju. Wa wa tamana nain capijacon Iri' Jam con Taramaxicon nexi' ma', ca pijim' hwet ca Barnabé con Paulo ma'.

Ca mama' cacain xijein Antioquia ca pe nain Pisídia

¹³Paca' ac cacain na Pafos. Wirico Paulo, wiricoco oro win ma' ca ma' quem, horoho mama' ac cacain na Perge, je i ma' wixinain cidade ca mama' caca ma'. Pe nain xijein macan' Perge ma', pain Panfília. Tan' mama' iri nanain Perge ne, paca' xuhu' ta ac cocon na João Marcos, in mao ac cain na Jerusalém. ¹⁴Xuruxut tiquin' ac caca na Paulo cocon oro win ma' ca quem. Paca' nanain Perge, xuruxut mama' ac cacain na xijein cidade ma', Antioquia na wixinain. Xijein Antioquia ta. Om na Antioquia ca wara to caca pane, xijein Antioquia ca xo' hwet caca ma'. Pisídia na wixinain macan' ca pe ne. Sábado pin iri na ne, pain ca xao to wa taxipa' cacain ximicocon oro judeu ma', corom mama' ac cacain na xirim ca cut in to xucucun ma'. Xao to ac caca na. ¹⁵Pe nain i ma' wari' co noro mi' nonon pain ca xirao' nucun Moisés oro wari' co xao to nana ma'. Noro mi' nonon pain ca xirao' nucucun oro profeta ma' quem. Pi' pin iri na ca noro nucun ne, tomi' ac caca na co querec wet taxipa' nonon pain ca cut in xucucun ma', tomi' ac cocon na wari' ma': Mo tomi' ron Paulo cocon oro win ma' ca ma': Mo ta ma' cuhu' ca pijim' wa ma' oro win ma' nuxut, mo ta hu xim maparut ma', pijim' mi' xut pain me roron ta nonon. Tomi' ac tococwa na.

¹⁶Pijim' ta' e' ac ca na Paulo. Tequi' pe na, an piri' ac cain na micon. Tacana to je ta tata. Pijim' xim inuhu' ta oro win judeu ta'. Wahu' quem, pain ca om judeu hwe ma', pain ca tomi' ha' taxipa' hun Iri' Jam ma' quem. Taraju wet xine me ac tococwa na. ¹⁷Iri' Jam ma', co howa iri' pain ca wari' nein Israel iri' ca', wirico co tora' nonon oro hwanana nexi' pain cara pane. To' mija pin ac tococwa na pain ca tatirim to cacain Egito pane. Pain pin iri na cocon ne, mam' quep xiho' ac tococwa na pain ca hwara' opa tamana nucun, o in ca' ac tococwa na pain i cain pane. ¹⁸Tan'

mama' iri nanain mahweri ne, xuruxut ximama' ac caca na. Ac ca ma' 40 ne na cawaxi' pain ca xuruxut ximama' cacain mahweri pane. Wijimi paxi' nonon Iri' Jam quem, ane om an to pan tococwa pane ne. Querec wet querec wet tata pane. ¹⁹Aram aram mi' ac tococwa na pain macan' pain Canaã quem, je i ma' wixinain macan' ca mi' tococwa pane. Ma' mija paxi' nana oro waximain macan' pain Canaã. Ma' 7 na ca xucun wari' nucucun pane. Ane quep xiho' pan cocon hwanana nexi' Iri' Jam ne. Mi' ac tococwa na pain ca to' quiji' pin cocon oro wari' nein Canaã. To' om pin ac cocon na, mene pin ac cacain na macaracocon. Iri' macaraxi' ac cacain na. ²⁰Pain ca xo' mama' ten qui' cacain Egito pain cara pane, pain ca aram aram in ca' cacain Egito je pain ca to' quiji' pin cocon oro wari' nein Canaã quem, ac ca ma' 450 pin ne na cawaxi' pain ca aram aram macaraxi' pin cacain Canaã.

To pin iri nanain macaracocon pain Canaã ne, mi' pan ac cocon na cocon oro juiz Iri' Jam. Juiz pin na xucun, mi' pin ac ca na. Ja' corom mao ac ca na xucun, mi' pin ac ca na co ma' quem. Ja' corom mao ac ca na xucun, mi' pin ac ca na quem. Cono' cono' iri nana ne, ma' pin ac ca na profeta Samuel pane. ²¹Tomi' ac cocon na Iri' Jam oro hwanana nexi': Ma' xiraparut na urut con iri' taramaxicon co rei ta nonon. Na ra ac ca na, mi' ac tococwa na con panxica Quis pane, Saul na wixicon panxica Quis. Hwanana ne non Benjamim Saul. Taramaxicon pin ac ca na. Ma' 40 na cawaxi' pain ca taramaxicon ca Saul pane. ²²Aram aram tomi' pan ac con na Saul Iri' Jam: Noc pin inem pain ca taramaxicon mami' wa ta non. Taramaxicon pan tara Davi ta non. Tomi' ac con na: Querec pin' inon Davi panxica Jessé cwa'. Hohot tamana napa'. Taxi' inon pain ca ara cara tain cain oro ca param ne ta, ac i ma' na ca tomi' ca Iri' Jam con Davi pane.

²³Wanxi' tiquin' wanxi' tiquin' iri nana waram winacon Davi co wanxi' tiquin' nana pa'ao' ne, aram aram pan' qui' ac ca na Jeju. Wirico Iri' Jam co mi' napari' con. Mi' napari' con Jeju pain ca wari' nein Israel iri' ca'. Ma' ta to' witan ca' xim cuhu' pain ca caracat nuhu' ta napari'. Win ne ca wara tomi' pe mi' ton con Davi cara pane ta na. ²⁴Om om wet iri na ca pijim' ca Jeju ne, wara pijim' na João pane. Mija nana wari' nein Israel co taraju nonon João pain ca pijim' nucun pane. Pijim' ca' tata: Na e' na pain ca cwirin' cwirin' pi' pin hwein ca caracat nuhu' ta. Ja' ac hwe com tara ta tata pane. ²⁵Maqui' pin ta' iri na xec nein ca taramaja taramaja om pin ca João ne, tomi' ac tococwa na oro wari': Cain' ca coromicat mi' mahu'

quem? Wirico tara co winim' iri' cwa', co wara tomi' pe mi' capari' Iri' Jam pane mahu' ra? Ac i ma' na ca coromicat mi' mahu' ra? Om ca wirico ta' ta. Wara maqui' paxi' ina, ane maqui' ta' pa'ao' ca xucun co hwara' opa tamana ma'. Iri' wari' na. Om ca hohot ne pain ca tacom' mi' ton pain macorinain caji caximacon ma', xi iri' wari' ta' ta na ca tomi' ca João pane.

²⁶ Taraju wet je me xere ac tococwa na. Wahu' pain ca waram winacon Abraão hwe ma', wahu' pain ca tomi' ha' taxipa' hun Iri' Jam pain ca om judeu hwe ma' quem, taraju wet je me. Iri' Jam ma', mi' pan napari' pain ca taraju wa capiijacon con Jeju. To' witan ca' xim nuhu' pain ca caracat nuhu' Jeju ta napari'. ²⁷ Om ca querec pin' cocon Jeju oro wari' nein Jerusalém pane. Om ca querec pin' cocon oro taramaxicon nucucun quem. Om tara wirico co to' witan ca' xim napari' pain ca caracat nexi' ta nonon pane. Noro taxipa' paxi' nanain oro ca xirao' to nucucun oro profeta pain oro sábadu pain ca xao to wa cacain ximicocon, ane om taraju pa' cacain ne. Mi' pin ma' tara ne iri nonon Jeju ne, ara pin ac cacain na ca xirao' to caca oro profeta con pane. ²⁸ Om paxi' na ca mam' cacain ca pan tem wa con, ane tomi' tomi' na cocon Pilatos ne. Na e' na pain ca to' pa' pin jun ta momon oro soldado nem ta nonon. ²⁹ Ara mi' ara mi' pi' pin iri nonon pain oro ca xirao' to nucucun oro profeta ne, pain ca tatatain mi' jun pain pana tococwa oro soldado nucun Pilatos pane, an quiji' ca' ac cacain na curucun pain pana, an corom pe ac cacain na pain manain pacun quem. ³⁰ Ane to' e' mami' con Iri' Jam ne. ³¹ Querec ac tocwa na quem. Mija na xec pain ca hwet pa' ho' hwet pa' ho' tococwa co taxipa' ca pane, co ja' ja' nonon pain ca maqui' wi cocon pain Galileia pane, pain ca tan' mama' cacain Jerusalém pane quem. Wiricoco co tomi' hwet nonon con oro wari' cwa'.

³² Je ca pijim' urut pahu' ca' ac tococwa na. Pijim' mi' urut pahu' pain capiijacon Iri' Jam ca tomi' hwet napari' con Jeju ca', pain ca to' witan xim capari' ca'. Capiijacon Iri' Jam ca wara tomi' pe mi' tococwa oro hwanana nexi' pane, ³³ je ca win hwet pin ne con. To' e' mami' non Jeju Iri' Jam. Ac i ma' na ca ara pin cain oro ca wara tomi' pe nucun pane. Ara mi' pan napari' pain, pain ca waram wina cacapari' oro hwanana nexi' ca' quem. Win ne ca xirao' pe xine pain capiijacon ma', pain Salmo capítulo 2 ma'. Ca' na con:

Panxita' inem.

Je ca an hwet mi' toton oro wari' pain xec ca'.

An hwet mi' inonon pain ca iri' Te mapa' ca'.

Ac i ma' na ca xirao' pe xine ca tomi' nucun pain capijacon Iri' Jam.

³⁴Iri'o' na ca to' e' mami' con Jeju Iri' Jam pane. Iri'o' na ca nain ho' con pain ca cunu mao ne curucun pain manain pacun pane quem. Je ca tomi' mao ne ca xirao' pe nucun profeta pane, pain ca xirao' mi' cocon oro hwanana nexi' pane. Ca' na cocon:

Quep xiho' cara xuhu', om ca mixein ta'.

Win ne ca wara tomi' pe mi' ton Davi cara pane,
pain ca quep xiho' cara xim, om ca mixein ta' ta ton pane.

Ac i ma' na ca wara tomi' pe mi' tococwa pane.

³⁵Ma' na wirain ca xirao' pe wa pain capijacon Iri' Jam quem:

Nain ho' xim mapa' pain ca cunu mao ne cwere.

Xi miri'om xim mapa' pain ca Iri' Wari' ta' ca', pain ca win
xumu xim pain ca tama' tomi' ha' xim ca'.

Ac i ma' na ca tomi' con Iri' Jam Davi pane.

³⁶Pain ca xirao' pe cain i ma' Davi pane, pain ca nain ho' xim mapa' pain ca cunu mao ne cwere ta ca pain ca xirao' pe nucun pane, taxi' urun pain ca om tomi' mi' pan xucun. Xi om ne ca mi' pin pan ara ca pane ta. Ara ara pi' pin iri nain oro ca taramaja nucun ca ara ra con Iri' Jam pane, mi' pin ac ca na, an corom pe ac xine na curucun pain manain pacun ca cut corom to xine curucucun oro hwanana nucun pane. Cunu mao ac ne na curucun quem. ³⁷Jeju ma' iri na ne, om ca cunu mao ne curucun. Mi' pin iri na ne, to' e' mami' ac con na Iri' Jam.

³⁸Je ca tomi' xuhu' ca' xere ac tococwa na. Na e' na pain ca taraju pa' hwein ca pijim' hwet urut pahu' ca'. Mo ta howa hun Jeju ma', pain ca mi' pin caho' cuhu' ma', xic am pin ac cain tara ca caracat nuhu' Iri' Jam.

³⁹Taraju pa' jein i ca' quem: Wari' co howa non Jeju ma', to' hohot pin ac tocwa na. Ac ca tomi' pan con na Iri' Jam: Hohot pin mapa'. Querec querec ac wari' co om caracat ta mapa', xi om ne ca howa ara mon Jeju ta non. Oro ca xirao' nucun Moisés cara pane, tomi' ha' cara paxi' xixin. Ane om to' hohot taxi' capari' ne. To ho' cara napari' ca caracat nexi' ta.

⁴⁰Je ca tomi' xuhu' ca': Ma' tara xumuhu' me, ma' ta om hwet cuhu' ca xirao' to cacain ca tomi' nucun Iri' Jam oro profeta pain cara pane. ⁴¹Ca' na cocon pane:

Wahu' pain ca tomi' napat mahu' ma', taraju wet xine ta.

Querec iri jein carawa ca ara ta' ta' pain oro xec nein
 ca e' e' wet nuhu' ne,
 joc herehe ac ne tara tucuhu'.
 Ma' paxi' tara wari' co tomi' hwet xim nuhu' pain,
 ane om howa xin hwein ca tomi' nucun ne.
 Joc herehe e' tara tucuhu',
 cono' pin ac hwe tara ta.

Ac i ma' na ca xirao' to cacain ca tomi' nucun Iri' Jam oro profeta pane ta nonon Paulo pain ca pijim' mi' cocon pain capijacon Iri' Jam pane.

⁴²Hwerekwet ca' iri nanain xirim Paulo con Barnabé ne, pain ca hwerekwet ca' cacain xirim ca cut in to xucucun ma', tomi' ac caca na oro wari' co taraju nanain ca pijim' nucun Paulo: In qui' je pain xijein sábadó me. Pijim' mami' xut pain oro ca pijim' maparut ca' ne nonon. ⁴³Hwerekwet hwerekwet pi' pin ac caca na co cut in nana ma'. Ma' mija ac caca na co ja' ja' nonon Paulo con Barnabé quem. Co judeu nana ma', co om judeu nana co an xiho' e' nonon oro judeu pain ca howa nucucun ma' quem, ja' ja' ac cocon na Paulo con Barnabé. Tomi' pan nonon Paulo con Barnabé ma' quem: Howa howa tiquin' jein capijacon Iri' Jam ca tomi' hwet napari' pain ca xiram pa' capari' ca' nonon.

⁴⁴Sábado pa' mami' ac cocon na. Mija nana wari' co cut in xucucun ma'. Ac ca maqui' maqui' pi' pin caca na oro wari' co to nanain cidade ma'. Taraju xin capijacon Taramaxicon nexi' ta nana. ⁴⁵Querec iri nana oro taramaxicon nucucun oro judeu ma' ne, pain ca maqui' mija caca oro wari' ma', mana' tamana ac caca na. Noc mi' nonon Paulo con Barnabé pain ca hwet mija pan cocon oro wari' ma'. Tomi' napat nonon, tomi' in pin nonon Paulo pain ca pijim' nucun ma' quem.

⁴⁶Tomi' mip pan ac cocon na Paulo con Barnabé ma'. Om ca tomi' jin' camain' caca, tomi' ca' tata: Na e' na pain ca pijim' cain' xihwe pain ca judeu hwe ma'. Je ca pijim' urut pahu' ca', pijim' urut pahu' pain capijacon Iri' Jam con Jeju. Ane noc hwein ne. Je ca querec pin' xihwe pain ca om na ne pain ca mi' xihwe pain ca e' cara wa ta. Je ca in ca' xim urut pahu' ca'. An to pin xut pahu'. Pijim' e' xut cocon co om judeu nana cwa'. ⁴⁷Je ca tomi' mip caparut Iri' Jam cwa', pain ca xirao' pe cain capijacon profeta Isaías cara pane. Tomi' ca' napat:

Ac naran ma pata'.

Toha mi' roron co om judeu nana.

Ma' ta taraju pa' taraju pa' pi' pin caca oro wari' pain
oro xijein macan' pum.

Taraju pa' tatarain capija pain ca to' witan toton ta' ca'.

Ac i ma' na ca tomi' caparut ca'. Ac i ma' na ca tomi' cocon Paulo ma'.

⁴⁸Taraju iri nanain i ma' co om judeu nana ma' ne, tomi' querec te tamana ac caca na. Awi tamana na capijacon Taramaxicon nexi' ta ac caca na, howa howa pi' pin ac caca na co wara tora' ca Iri' Jam ma', co ma' totonon ca om pi' ra ha' ne ca e' wa ca' ca ma'.

⁴⁹Pijim' pijim' tiquin' ac xine na capijacon Iri' Jam pain oro xijein cidade ma'. ⁵⁰Ane noc cacain i ma' oro taramaxicon nucucun oro judeu ma' ne. Ja' teretem ac tacacama na oro narima' co hwara' opa nana ca nari nequequem, co an xiho' nonon oro judeu pain ca howa nucucun ma'. Ja' teretem tata co hwara' opa nana ma' quem. Mana' hwerehwet pin xun Paulo con Barnabé ta ac tococwa na. Paca' jein cidade nuxut ca' ac tococwa na, mana' mana' hwerehwet pin ac tococwa na. ⁵¹Paulo con Barnabé ma', wap camara' ac cacain na ximirinain macaracocon pain caximacocon ma' quem. Ma' ta querec pin' xujuhu' pain ca pan teretem nuhu' pain ca noc hwein ca taraju wa capijacon Iri' Jam ta tata. Paca' ac cacain na cidade nucucun pain Antioquia ma', mama' ac cacain na xijein cidade cain, Icônio cain. ⁵²Caram ma' co howa pin nonon Jeju pain Antioquia ma', tomi' querec te tomi' querec te tiquin' nana pa'ao'. Pe ho' mip nonon Tamataracon Iri' Jam quem.

Ca pijim' to cacain Icônio Paulo con Barnabé

14 Tan' mama' iri nanain Icônio Paulo con Barnabé ne, corom mama' ac cacain na xirim ca cut in to xucucun oro judeu. Je curucucun mao na pain ca mama' cacain oro xijein cidade, corom mama' taxipa' nanain xirim ca cut in to xucucun oro judeu. Pijim' hwara' opa ac cacain na capijacon Iri' Jam quem. Ca pijim' hwara' opa caca ma', je ca howa mija caca wari' ma' quem. Co judeu nana ma', co om judeu nana ma' quem, mija nana co howa pin nonon Jeju. Om ca paric camain' caca. ²Ane ma' caca oro judeu co om howa je na nana ne. Ja' teretem ac tococwa na co om judeu nana co om howa nana ma'. Mana' in pin jujun co howa nana ta ac tococwa na. ³Mon to wet ac cacain i cain na Paulo con Barnabé ma'. Mija na xec nein ca mon to wet cacain i cain. Pijim' mi' tata con

Taramaxicon nexi' oro wari' ma'. Om ca pijim' jin' caca, pijim' hwara' opa nana. An hwet nanain ca hwara' opa nucun Iri' Jam pain ca ara cacain oro ca om ara taxi' ne ca wari' wa ma'. Wirico Taramaxicon nexi' na co mi' nonon pain. Ma' ta querec pin' tococwa pain ca pijim' iri'o' nucucun pain ca xiram pa' e' toton ta na.

⁴Oro wari' co to nanain Icônio ma', coromicat ni ca' xucucun. Ma' nana co na ra nonon oro taramaxicon nucucun oro judeu ma', ma' nana co na ra nonon oro apóstolo ma', Paulo con Barnabé ma'. ⁵Tomi' xo' ac xucucun na oro wari' ma', wiricoco co om judeu nana ma', wiricoco oro taramaxicon nucucun oro judeu ma' quem, tomi' xo' ac xucucun na: Quep em' xun Paulo con Barnabé ta ac xucucun na. Quep em' xuxun, to' to' cono' pin xuxun pain pacun ta, ac i ma' na ca tomi' xucucun. ⁶Ane taxi' pin tococwa ne. Taxi' pin iri nonon Paulo con Barnabé ne, jein mama' pan ac cacain na Listra je Derbe, je i ma' wixinain oro cidade ca jein mama' caca ma'. Jein mama' nanain oro xijein cidade ca to ja' pan nain quem. ⁷Pijim' pijim' tiquin' ac cacain na capijacon Iri' Jam con Jeju pain i cain.

Ca mama' cacain Listra je Derbe

⁸Pe nain Listra wari' co carama pe. Wara carama pe qui' nain ca xo' pan' qui' nucun pain ca pije' nucun pane. Om ca xut camain' ca. ⁹Taraju wet non Paulo pain ca pijim' ca quem. Noro pan ac con na Paulo ma' quem. Howa non xin Jeju co ma' ne, ha' non Jeju pain ca quep xio capa' ta na ca coromicat nucun co ma' ne na ca coromicat nucun Paulo. ¹⁰Tomi' ac con na, tomi' mip non: Tequi' pe ra e', ac i ma' na ca tomi' mip con ma'. Tequi' pe hap ac ca na, xut pin ac ca na quem.

¹¹Querec iri nanain ca ara ca Paulo oro wari' ma' ne, merem ac caca na pain iri' capijacocon ca tomi' pan caca pain ca wari' nein Listra ma'. Merem ca' nana: Wari' pin nana oro iri' jam nexi' co howa iri' cwa' nana. Quiji' hwet nanapari' ta na ca merem nucucun. ¹²O' ma' ni ac cocon na. Barnabé ma', o' ma' mi' nonon con Zeus ma', co taramaxicon nucucun oro jam co Iri' Jam xi' ma caca ma'. Paulo ma' iri na ne, o' ma' mi' ac cocon

14.11 Tomi' mi' nonon Paulo con Barnabé ma'. Oro jam co howa iri' cwa' tatara ma' nonon. **14.12** Zeus ma', je i ma' wixicon pain capijacocon oro grego. Júpter na wixicon Zeus pain capijacocon oro romano quem.

na con Hermes ma' quem, co an xin tiquin' taxipa' nain ca tomi' nucucun oro jam co Iri' Jam xi' ma caca ma' quem. Xi wirico ara ca Paulo co pijim' ta nana. ¹³Pe nain i ma' xirim ca tomi' querec te to cocon Zeus ma', co taramaxicon nucucun oro jam co Iri' Jam xi' ma caca ma'. Pe ja' pan nain cote ne man ca corom mao ac xine cidade nucucun. Maqui' ac ca na wari' co taramaja pe nain. Cut qui' nain boi, wara an warawa na pain hwijein pana pain paramain. To' parapa' mi' xuxun pain Paulo con Barnabé ta na. Oro wari' ma' quem, to' parapa' mi' xuxun pain, ma' ta querec pin' cacapari' pain ca in ac xuxun ca' nana.

¹⁴Oro apóstolo ma', Barnabé con Paulo ma', taxi' pin iri nonon pain ca to' parapa' mi' xuxun pain boi ta caca ma' ne, i' pin ac cocon na womicocon. Ma' ta querec pin' cacapari' pain ca noc xin i ma' ta nana. Jein hwet ac cacain na ximijacocon ma', merem ac caca na: ¹⁵Para to' parapa' mi' xim maparut pain boi ca' quem caram ma'? Xi Iri' Jam urut ta. Wari' urut ca' ira. Win hwe ma'. Pijim' urut pahu' pain capijacon Iri' Jam ca awi ca' ira, je ca hwet urut pahu' ca'. Howa maho' jujun oro jam co Iri' Jam xi' ma hwe ma', co om quep xihó' taxi' nunuhu' ma'. Howa pin jun Iri' Jam co e' cara cwa', co quep nain pawin je macan' je oro com ca', co quep quep pi' pin nain oro carawa ca to nain ca' quem. ¹⁶Om paxi' na ca tomi' in pin cocon oro wari' pain oro xijein macan' Iri' Jam pain cara pane. Om ca narain ho' tococwa pain ca howa ximama' nucucun pane. Xi querec pin' pan cocon pane ta. ¹⁷Ane mi' tococwa pain ca querec pin' cocon pain ca xiram pa' nucun pane ne. Mi' tata pain xowi', mi' tata pain ca tarama' xo' ne oro caramaji xitot, mi' tata pain carawa ca cao' wa, mi' tata pain ca tomi' querec te tamana wa quem. Ac i ma' na ca tomi' cocon Paulo ma'.

¹⁸Tomi' ac i ma' paxi' tata, ane om ha' pan caca ne. I'ina tamana tata Paulo con Barnabé pain ca tomi' tomi' na pin xun cocon ma', pain ca maho' jein ta cocon ma'. Aram aram tomi' tomi' na pin ac cocon na.

¹⁹Ma' ac caca na oro judeu co maqui' nanain xijein cidade ma', maqui' nanain Antioquia ca pe nain Pisídia ma', maqui' nanain Icônio ma' quem. Ja' teretem ac tococwa na oro wari' ma'. Om na, ta howa huhun me ta tata, tomi' tomi' na pin ac tococwa na, to' to' ac cocon na pain pacun Paulo ma'. Coc ororo coc ororo, wara ca' na cacarain cidade ma', xin pin ac cocon na. Mi' pin tara ma' nonon. ²⁰Ane coco' coco' mam' pin cocon

14.12 Hermes ma', je i ma' wixicon pain capijacon oro grego. Mercúrio na wixicon Hermes pain capijacon oro romano quem.

co howa nonon Jeju ma' ne. Tequi' pe pin ac ca na, in mao ac cain na cidade. Xec pin iri na ne, maji ta ac con na Barnabé ma', mama' ac cacain na Derbe, je i ma' wixinain cidade ca mama' caca ma'.

Ca in mama' cacain Antioquia ca pe nain Síria

²¹Tan' mama' iri nanain Derbe Paulo con Barnabé ne, pijim' pijim' ac cacain na capijacon Iri' Jam ca tomi' hwet napari' con Jeju. Mija ac caca na oro wari' co howa pin nana ma'. Ac i ma' ac i ma' nana, in mama' xi' ta ac caca na, in mama' ac cacain na Listra, je Icônio, je Antioquia ca pe nain Síria ma' quem. ²²Hwet iri tata co howa nonon Jeju pain oro cidade ma' ne, quep xiho' ac tococwa na pain ca howa nucucun. Hu ca' tata: Ta an to hwein ca howa wa me, howa cara jun Jeju ta ac tococwa na. To' i'ina tatarapari' oro wari' co om howa nonon Jeju ma' ac tococwa na. Quep em' xim paxi' tatarapari'. Je i ma' ira, na e' na pain ca jain jain iri' pain ca to' i'ina to' i'ina cacapari' ma', aram aram to ho' pin ac xun tara Iri' Jam ma', pain ca aram aram taramaxicon pe ho' toton cocon oro wari' nucun ta, ac i ma' na ca quep xiho' tococwa pain ca to' hwara' opa tococwa ma'. ²³Ma' iri nana co howa nonon Jeju pain oro xijein cidade ca mama' caca ne, tora' mi' ac tococwa na cocon co querec wet nonon pain ca cut in xucucun ma'. Xuruxut tiquin' xi' urut iri nana ne, tomi' mam' xun Iri' Jam ta ac tococwa na. An to nanain ca cao' wa pain, tomi' mi' ac tococwa na con Taramaxicon nexi'. Querec wet roron caram cwa' co howa nenem cwa' nana.

²⁴Xuruxut tiquin' ac caca na quem. Xuruxut tiquin' iri nanain Pisídia ne, hwet ac cacain na Panfília ma'. ²⁵Tan' mama' iri nanain Perge ne, pijim' to ac cacain i cain na capijacon Iri' Jam ca tomi' hwet napari' con Jeju. Tiquin' mama' ac caca na quem. Xuruxut xuruxut hwet ac cacain na Atália ma', ca pe cacarain cote ne com ma'.

²⁶Corom mama' iri nanain mam' horoho wa pain Atália ma' ne, horoho in mama' ac cacain na Antioquia. Je i cain ca to pan caca oro win howa caca co tomi' mi' nonon con Iri' Jam pain ca xo' pijim' xi' caca pain cara pane, pain ca momon cwa' Paulo con Barnabé cwa' Coturut Iri' Jam, quep xiho' roron pain ca pijim' mama' cacain oro xijein cidade ta cocon pain cara pane. Je win in qui' ca Paulo con Barnabé ma'. Xi om ne ca pi' pin ara ne ca taramaja nucucun ta. ²⁷Tan' mama' iri nanain Antioquia ne, tomi'

cut in ac tococwa na co howa nonon Jeju ma'. Tomi' hwet ac tococwa na pain oro ca ara pan ca Iri' Jam ma', pain ca quep xiho' cocon pain ca pijim' cacain capijacon ma', je pain ca mi' pan tococwa pain ca howa wa oro wari' co om judeu nana ma' quem. ²⁸Mon to wet ac caca na. Mija na xec nein ca momon to ho' cocon oro win howa caca pain Antioquia pane.

**Ca to' i'ina tococwa co om judeu nana ma', pain ca na
e' na pain ca wac xirac xihwe ta tococwa ma'**

15 Ma' ac caca na wari' co maqui' nanain Judeia. Xuruxut xuruxut tan' mama' iri nanain Antioquia ne, tomi' ac tococwa na co om judeu nana ma', co howa nonon Jeju ma': Xirao' mi' ca' napari' Moisés pane: Na e' na pain ca wac xirac hwein taparinain ca xirac nuhu' pain ca tarama' nuhu' ta napari' pane. Je ca tomi' urut pahu' ca'. Mo ta om wac xirac hwein taparinain ca xirac nuhu' ma', om ta witan ac hwe ta ac tococwa na co om judeu nana ma'. ²Tomi' in pin ac xucucun na. Mija na ca tomi' caracan xucucun. Om na ta, om ca hohot camain' ne ca tomi' nuhu' ta ac ca na Paulo con Barnabé. Je i ma' ira, hohot na ta ac caca na co tomi' nanain ma', co maqui' nanain Judeia ma'.

Je ca tomi' xo' pan xucucun co howa nonon Jeju ma'. Tomi' ac tococwa na Paulo con Barnabé cocon oro xucucun win ma' caca ma'. Mama' jein Jerusalém ta. Tomi' querec jujun oro apóstolo cocon oro xucucun co querec wet nonon co howa nonon Jeju pain i cain ta ac tococwa na. Mo ta hohot ne pain ca wac xirac xine taparinain ca xirac nucucun co om judeu nana. Mo ta om hohot ne cocon. Tomi' querec jujun ta ac tococwa na.

³Mama' je ta pan ac cocon na co howa nonon Jeju pain Antioquia ma', mama' ac caca na. Xuruxut tiquin' ac cacain na Fenícia je Samaria ma', je i ma' wixinain oro xijein macan' ca xuruxut tiquin' caca ma'. Ca querec querec tococwa co howa pin nonon Jeju ma', pain ca mama' cacain oro xijein cidade ma', ca tomi' hwet tomi' hwet ac tococwa na cocon co om judeu nana co howa pin nonon Jeju ma' quem. Taraju iri nanain i ma' ne, tomi' querec te tomi' querec te pi' pin ac caca na. Mija na ca tomi' querec te caca, xi om ne ca howa pin ara cocon Jeju caram ma' co om judeu nana ma'. ⁴Aram aram tan' mama' ac cacain na Jerusalém. Maqui' hwe? Maqui' urut ta ac caca na. Co howa nonon Jeju pain Jerusalém ma', cocon oro apóstolo ma', cocon co querec wet nonon co howa nana ma' quem, tomi'

querec te nonon Paulo cocon oro win ma' caca pain ca maqui' nucucun. Tomi' hwet ac tococwa na pain oro ca ara pan ca Iri' Jam ma', pain ca quep xiho' cocon pain ca pijim' cacain capijacon ma' quem.

⁵Ane ma' caca caram ma' co fariseu nana ne. Howa nonon Jeju quem. Taraju iri nanain i ma' ne, pain ca howa pin cocon Jeju oro wari' co om judeu nana ma', tequi' to ac caca na, tomi' ac caca na: Co om judeu nana ma', mo ta howa xun Jeju caca, na e' na pain ca wac xirac cacain taparinain ca xirac nucucun ta. Na e' na pain ca tomi' ha' cacain oro ca xirao' nucun Moisés ma' quem, ac i ma' na ca tomi' caca ma'.

⁶Cut in xi', tomi' xo' xijexi' ta ac xucucun na oro apóstolo cocon co querec wet nonon co howa nonon Jeju ma'. ⁷Momon tomi' ac xucucun na, momon tomi', momon tomi'. Momon tomi' caracan iri xucucun ne, tequi' pe ac ca na Pedro. Tomi' ac tococwa na: Taxi' mahu' pain ca tora' capa' Iri' Jam pain cara pane ta xere. Tora' ca' napa' pahu', pain ca wum tara co pijim' mi' nonon pain capiija oro wari' co om judeu nana ta capa' pane. Pijim' mi' roron pain capiija ca tomi' hwet nuhu' con Panxita' ta napa' pane, ma' ta taraju cacain pum, ma' ta howa cacain pum quem napa' pane. ⁸Iri' Jam ma', co querec pin' nain ximicocon oro wari' ma', an hwet mi' napari' pain ca hohot cocon oro wari' co om judeu nana ma'. Hohot nonon pain ca howa pin cacain capiijacon. Xi om ne ca mi' ara tococwa pain Tamataracon ta. Win capari' pain ca mi' capari' pain Tamataracon pane quem. ⁹Querec querec ac wiricoco pi' pin mahu' ta napari' pain ca judeu iri' ca', je pain ca om judeu caca ma' quem. Om ca querec jimama' mahu' cocon ta napari'. To' hohot pin nonon co om judeu nana ma', xi om ne ca howa ara cocon Jeju ta. Win ne ca to' hohot capari' pain ca judeu iri' ca' quem, pain ca howa xun Jeju ca' quem. ¹⁰Je ca tomi' xuhu' ca' ac tococwa na. Ac ca tomi' in pin xun Iri' Jam hwe na pain ca to' i'ina xuxun huhun oro xerexi' co om judeu nana ma', pain ca na e' na pain ca tomi' ha' cacain oro ca xirao' nucun Moisés ta huhun ma'. Am mana' capari' Iri' Jam pain ca to' i'ina xuxun ca', am om mana' capari' pain, tomi' in pin querec xun e', ac i ma' na ca mixein querec hun Iri' Jam ta. Cain' cain' xihwe quem? Mixein maho' jun ta. Xi ha' pan capari' pain ca tomi' ha' wa oro ca xirao' nucun Moisés ta. Om ca ha' cocon pain ca tomi' ha' wa oro hwanana nexi' cara pane quem. ¹¹Om ca to' witan camain' capari' ca tomi' ha' wa oro ca xirao' nucun Moisés ta. Ca' na ca howa iri' ca': To' witan pan napari' Taramaxicon nexi' Jeju ma', xi om ne ca xiram pa' pan

ara capari' ta. Om xi to' witan capari', xi iri' wari' iri' ta. Ane xiram pa' e' capari' ne. Je ca witan iri' ca'. Je ca witan caca oro xerexi' co om judeu nana ma' quem. Ac i ma' na ca tomi' cocon Pedro ma'.

¹²Tacana to tacana to xam' ac caca na co cut in xucucun ma'. Taraju wet ac cocon na Barnabé con Paulo ma', pain ca pijim' hwet tococwa pain oro ca ara pan ca Iri' Jam ma'. Tomi' ca' tata: Quep xiho' naparut Iri' Jam pain ca pijim' mi' urut cocon pain capijacon oro wari' co om judeu nana ma', je pain ca an hwet mi' urut cocon pain oro ca hwara' opa wa ca om ara taxi' ne ca wari' wa ta tata.

¹³Pi' pin iri na ca pijim' nucucun ne, tomi' ac ca na Tiago. Taraju wet xine ta xere ac ca na. ¹⁴Je ca tomi' capari' Simão cwa'. Tomi' hwet napari' con Iri' Jam ma', pain ca xo' xiram pa' ten qui' cocon oro wari' co om judeu nana pain cara pane. Ma' tatara co tora' ta', co wari' ne ta' ta na Iri' Jam ta napari'. ¹⁵Je ca xirao' to caca oro profeta pane quem, an an ari nain ca tomi' nucun Simão cwa'. Ca' na ca xirao' pe cacain ca tomi' nucun Iri' Jam pane:

¹⁶Ac ca jao hot ne tara xiricon Davi ma', pain ca hwara' opa hwara' opa om pin xi' caca waram winacon cwa'.

Ame hwe e', aram aram in qui' ta',

ac ca quep mami' tain tara xiricon pain ca to' hwara' opa mami' toton waram winacon.

Mi' mami' toton con winacon Davi co taramaxicon.

¹⁷Ma' ta param param xam' cacapa' oro xucucun wari' pain oro xijein macan' ma'.

Oro wari' co om judeu nana ma' quem, co howa xine ta ta' quem, mi' toton con taramaxicon,

ma' ta jain jain jain jain xam' cacapa' ta inonon.

Je ca tomi' ta' ca', pain ca Iri' Taramaxicon ta' ca'.

¹⁸Wara an hwet pe inain ca coromicat an pe xo' ta' pain cara pane, pain ca xo' ma' ten qui' ne oro carawa pane.

Ac i ma' na ca xirao' pe cacain ca tomi' nucun Iri' Jam oro profeta pane.

¹⁹Je i ca' ca coromicat ne ca' xere ac ca na Tiago. Om ca na ne pain ca to' i'ina xuxun co om judeu nana co an to pin nanain oro ca howa ximama' nucucun ma', co howa pin nonon Iri' Jam ma'. Om ca na ne pain ca to' i'ina xuxun pain ca tomi' ha' e' jein oro ca xirao' nucun Moisés ta xuxun ca'. ²⁰Ara ca' xi', na e' na pain ca xirao' mi' xuxun pain carta. Ca' tara ca

xirao' mi' xuxun: Wahu' pain ca tarama' nuhu' ma', ta quep hwem xequem narima' me. Wahu' quem oro narima', quep e' turuhu' waram taxuhu' quem, ac i ma' tara ca xirao' mi' xuxun ta. Xirao' mi' ca' xuxun quem: Ein jein carawa ca mi' querec te xine pain oro caji pacun ca Iri' Jam xi' ma caca oro wari'. Xi to' em' pan ara nein oro caji pacun ta. Ein jein carawa ca juhumi' pa' xine quem, pain ca pe ho' nein quinain pain cwerein ma' quem. Ein jein quinain carawa ma' quem, ac i ma' tara ca xirao' mi' xuxun ta. ²¹ Xi pain xocori ara ne ca pijim' hwet xine oro ca xirao' nucun Moisés pain oro xijein cidade ta. Noro noro wet irin pain oro xijein sábado pain oro xirim ca cut in to xijexi' quem. Ac i ma' na ca tomi' cocon oro win ma' ca Tiago ma'.

**Carta nucucun ca xirao' mi' cocon co om judeu nana
ma', co howa pin nonon Jeju ma'**

²² Tomi' xo' ac xucucun na oro apóstolo cocon co querec wet nonon co howa nonon Jeju ma', wiricoco oro wari' co cut in xucucun pain ca howa nucucun ma' quem, tomi' ac xucucun na: Awi na pain ca tomi' xo' xuxun win ma' nexi' cwa'. Ja' ja' jujun Paulo con Barnabé pain ca in mama' xin cacain Antioquia ta xuxun ta xucucun. Ma ac xucucun na, tomi' ac cocon na Judas ma', co Barsabás na xijein wixicon ma'. Tomi' nonon Silas ma' quem. Oro co howa nonon Jeju pain Jerusalém ma', in ac tamana nonon Judas con Silas ma'. Xi om ne ca querec pin' ara tococwa pain ca xuruxut xo' nucucun pain ca howa cocon Jeju ta. ²³ An mi' jujun pain ca xirao' nexi' ca' ac tococwa na. Ca' na ca xirao' nucucun:

Warut pain ca apóstolo urut ca', cocon co querec wet nonon oro co howa nana cwa', xirao' mi' urut pahu' pain ca xere xijexi' con Jeju. Tomi' querec te urut pahu' pain ca howa hun Jeju Cristo pain ca om judeu hwe ma', pain ca to hwein Antioquia, je pain Síria, je pain Cilícia ma'.

²⁴ Ma' nana wari' co tomi' hwet nanaparut cocon oro win ma' nuxut co hwet nunuhu' pane, co to' i'ina nunuhu' pain ca tomi' ca' cucuhu' pane: Mo ta om tomi' ha' tomi' ha' pi' pin hwein oro ca xirao' nucun Moisés ma', mo ta om wac xirac hwein taparinain ca xirac nuhu' ma', om ta witan ac hwe ta nunuhu' pane.

Om ca pijim' ac i ma' je ta urut cocon pane ta. ²⁵ Je ca tomi' xo' xujuxut ca'. Tora' urut cocon win ma' nuxut cwa'. Hwet jujun oro xerexi' pain i cain ta urut cocon. Ja' ja' jujun Barnabé con Paulo co tomi' querec te tamana urut cwa' urut cocon quem. ²⁶ Barnabé con Paulo cwa', om ca xiram pa' camain' cacain curucucun pain ca taramaja mi' cocon Taramaxicon nexi' Jeju Cristo. Mo ta to' parapa' pin xim cacapari' pain ca pijim' xin capijacon Iri' Jam ca', to' parapa' pin ma' tatarapari' ne nana, je curucucun mao na. ²⁷ Je ca mam' xim urut pahu' con Judas con Silas cwa'. Tomi' hwet tuturuhu' pain ca coromicat nuxut pain ca xirao' mi' urut pahu' ca'. Ca tomi' hwet xim cucuhu' ma', ac ca xirao' nuxut ca' tara ta, an an ari tara.

²⁸ Je ca tomi' urut pahu' ca'. Tomi' xo' naparut Tamataracon Iri' Jam. Hohot naparut ca tomi' nein quem. Om ta tomi' mip ximama' urut pahu' pain ca tomi' ha' tomi' ha' pi' pin jein oro ca xirao' nucun Moisés ta urut pahu' ca'. Ma' e' na wijimain ca tomi' mip wa ca'. Hohot na pain ca tomi' ha' hwein ta. ²⁹ Tomi' ca' urut pahu': Ein jein carawa ca mi' querec te xine pain oro caji pacun ca Iri' Jam xi' ma caca oro wari' ma'. Ein jein quinain carawa ma' quem. Ein jein carawa ca juhum' pa' xine quem, pain ca pe ho' nein quinain pain cwerein ma' quem. Tomi' ca' urut pahu' pain ca tarama' nuhu' ma' quem: Ta quep hwem xequem narima' me. Wahu' quem oro narima', quep e' e' jujun taxuhu' quem.

Mo ta tomi' ha' hwein ca xirao' mi' urut pahu' ca', hohot ac hwe tara ta. Je i ca' ca xirao' nuxut ca'.

Ac i ma' na ca xirao' mi' tococwa co howa nonon Jeju pain Antioquia pane.

³⁰ Mama' je ta iri tata ne, mama' ac caca na. Xuruxut xuruxut tan' mama' ac cacain na Antioquia. Harahap je ta ac caca na, cut in ac xucucun na co howa nonon Jeju ma'. Mi' ac tococwa na pain carta ca xirao' mi' tococwa ma'. ³¹ Noro ac cacain na co howa nonon Jeju ma'. Noro iri nanain ne, tomi' querec te tamana ac caca na. Xi om ne ca quep xiho' ara tococwa pain ca hu xo' cocon ca xirao' nein ta. ³² Momon pijim' pijim' pan ac cocon na Judas con Silas ma', co pijim' hwet taxipa' nanain capijacon Iri' Jam ma'. Hu tamana tata, to' hwara' opa tata pain ca pijim' nucucun.

³³ Mon to wet ac caca na. Ac i ma' ac i ma' nana, in mama' xut ta iri nana caram ma' co maqui' nanain Jerusalém ma' ne, in mama' je ta ac tococwa na. Tomi' mi' urut pahu' con Iri' Jam cwa', pain ca querec wet roron pain ca mama' nucucun urut con pahu' ta ac tococwa na. Mama' ac caca na, in hwet ac tococwa na caram pacara pane co wara mama' jein Antioquia nonon pane. ³⁴ (Ane to wet ta' pa'ao' ca Silas ma' ne. Hohot napa' pain ca mon to wet tain i ca' ta na.)

³⁵ Mon to wet ac cacain na Antioquia Paulo con Barnabé ma'. Ca' na ca' na nonon pain capijacon Iri' Jam oro wari' ma', pijim' mi' pijim' mi' nonon pain capijacon ca tomi' hwet napari' con Taramaxicon nexi' ma' quem. Ma' mija nana oro win ma' caca co quep xiho' nonon pain ca taramaja nucucun ma' quem.

Ca mama' ni ca' xucucun Paulo con Barnabé

³⁶ Om ca pain homa ne, tomi' ac con Barnabé na Paulo ma'. In hwet xuxun oro xerexi' pain oro xijein cidade ca pijim' to xin capijacon Iri' Jam con Taramaxicon nexi' pane ta non. Am hwara' opa cara caca pain ca howa nucucun, am caracat caca, am hohot caca con Iri' Jam, mo querec xuxun ta, ac i ma' na ca tomi' con ma'. Ma ac xucucun na. ³⁷ O mao xun João cwa', co Marcos na xijein wixicon cwa' paxi' na Barnabé ma'. ³⁸ Ane hehe ca Paulo ne. Om ca hohot ne pain ca o mao xun ta, xi ja' ja' cara capari' pane ta na. In ca' ara xi' napari' pain Panfília pane ta na. ³⁹ Tomi' caracan ac xucucun na. Mija na ca tomi' in pin xucucun. Mama' ni ca' ac xucucun na quem. Barnabé ma', maji ta ac con na João co Marcos na xijein wixicon ma', horoho mama' ac cacain na xixi pan nein macan' Chipre ma'. ⁴⁰ Paulo ma' iri na ne, maji ta ac con na Silas ma'. Oro win howa caca pain Antioquia ma', tomi' mi' ac cocon na con Iri' Jam. Taramaxicon nuxut. Quep xiho' ron Paulo con Silas cwa' nana, xuruxut mama' ac caca na. ⁴¹ Xuruxut mama' ac cacain na oro xijein cidade pain Síria je Cilícia ma'. To' hwara' opa ac tococwa na co cut in xucucun pain ca howa cocon Jeju ma' quem.

Ca ja' ja' pin con Paulo Timóteo

16 Xuruxut mama' ac cacain na Derbe ma'. Paca' ac cacain na, aram aram tan' mama' ac cacain na Listra ma' quem. Pe nain Listra wari' co howa non Jeju. Timóteo na wixicon. Judeu na jicon ma'. Howa non Jeju quem. Cote ca ma' iri na ne, om ca judeu ca. Grego na. ² Awi na ta nonon Timóteo oro wari' co howa nonon Jeju pain Listra je pain Icônio ma'. Xut xo' na, om ca hwet camain' ne wixicon ta nonon. ³ Maji ta, ja' ja' ne pain ca mao tain oro xijein cidade ta ac con na Timóteo Paulo ma'. Je ca wac xirac cain taparinain ca xirac nucun. Xi taxi' pan ara cocon oro judeu co to nanain oro cidade ca mama' xi' caca ma', taxi' nonon pain ca om judeu ca cote ca pane.

⁴ Xuruxut mama' ac caca na Paulo con Silas con Timóteo ma'. Ca hwet hwet tococwa oro wari' co howa pin nonon Jeju pain oro cidade ma', ca tomi' hwet tomi' hwet ac tococwa na pain ca xirao' to nucucun oro apóstolo cocon co querec wet nonon co howa nana pain Jerusalém ma'. Tomi' ha' jein ca xirao' nucucun ta ac tococwa na quem. ⁵ Ac i ma' na ca to' hwará' opa tococwa oro wari' co cut in xucucun pain ca howa cocon Jeju ma'. Ca mija mija tiquin' caca ma', ca mija mija tiquin' caca ma', aram aram mija pin ac caca na co howa nonon Jeju.

Ca ac ca tohwein' ca ne Paulo pain Trôade

⁶ Pijim' mama' xin oro xijein cidade pain Ásia ta paxi' na Paulo cocon oro win ma' ca ma', ane tomi' caho' pan cocon Tamataracon Iri' Jam ne. Om ta pijim' mama' hwein Ásia me nonon, na ra ac xucucun na, xuruxut mama' ac cacain na oro cidade pain Frígia je pain Galácia ma'. ⁷ Mama' xin xijein macan' ma', Mísia ma' ac caca na quem. Wixicam pin iri nanain cacarain Mísia ne, mama' xin paxi' nanain xijein macan' pain i cain, pain Bitínia cain, ane tomi' caho' mami' tococwa ne. Je Tamataracon Jeju ca tomi' caho' nonon ma'. Ta mama' hwein Bitínia me nonon, na ra ac caca

16.3 Om ca wac xirac xine taparinain ca xirac nucun Timóteo pain ca xo' pan' qui' nucun pane, xi grego ara ca cote ca ta. Oro judeu pane, tomi' xirac taxipa' nonon oro win ma' caca co jao jao ma' nonon xucun wari' co om wac xirac taparinain ca xirac nucun. To ni ca' taxipa' nonon. Taxi' iri xiroron Paulo pain ca jao jao ma' con Timóteo ne, tomi' xirac tamana xiroron. Je ca wac xirac con Timóteo ma'. Ma' ta om tomi' xirac cacapari' oro win ma' nexi' ta non.

na. ⁸Xuruxut tiquin' ac cacain na xijein cidade pain cacarain cote ne com ma'. Trôade na wixinain cidade. ⁹Xim pin iri na ne, ac ca tohwein' ca na Paulo. Om paxi' na ca pi'am ca. Querec na. Ac ca querec con na wari' nein Macedônia. Xijein macan' na Macedônia, je i ma' wixinain. Ac ca xat ho' con na, ac ca tomi' con na: Hap ra, hwet xut pain Macedônia ca'. Quep xihó' xut ta, ac i ma' na ca tomi' con ma'. ¹⁰Mamiram pin iri na Paulo ne, tomi' hwet ac caparut na pain ca querec nucun. Je ca param mi' capari' Iri' Jam ta ac xujuxut na. Hwet jujun oro wari' nein Macedônia cwain, pijim' mi' jujun pain capi'a con Jeju ta napari' ta xujuxut. Noro ho' xin mam' horoho wa ta, horoho mama' xin Macedônia cain ac xujuxut na.

Ca howa pin cama Lídia

¹¹Paca' iri urut pain Trôade ne, horoho mama' ac urut pain na xixi pan nein macan' Samotrácia ma'. Xec pin iri na ne, horoho tiquin' mama' ac urut na. Horoho horoho hwet ac urut pain na xijein cidade ma', Neápolis na wixinain. ¹²Macedônia na wixinain macan' ca pe ne Neápolis ma'. Hwet pin iri urut pain Neápolis ne, xuruxut mama' ac urut na, xuruxut xuruxut tan' mama' ac urut pain na Filipos ma'. Iri' cote ne cidade na Filipos. Mija nana oro romano co to nanain Filipos. Om ca tocwan homa ne xec pain ca mon to wet urut pain i cain.

¹³Sábado pin iri na ne, tomi' ac xujuxut na: Maji pain cacarain com ta. Am ma' pe nein i cain ca cut in to xucucun oro judeu co tomi' xun nonon Iri' Jam ma' ac xujuxut na. Hwerekhwet ca' urut pain cidade, xuruxut hwet ac urut pain na cacarain com ma'. Xao to ac urut na. Wara ma' nana oro narima' co cut in xequequem ma'. Tomi' ac urut cacam na. ¹⁴Pe nain i ma' narima' co taraju wet naparut quem. Lídia na wixicam. Maqui' nain Tiatira, je i ma' wixinain cidade nequem. Vender taxipa' non wom co awi tamana. Iri' wom cam, ca paca' nucun womicocon co caramaju nana ma', wirico co vender taxipa' cama ma'. Wara tomi' ha' paxi' non Iri' Jam Lídia ma'. Taraju iri nain ca tomi' nucun Paulo ne, mi' pan ac cam na pain ca taraju pa' wa Taramaxicon nexi', howa pin ac cama na. ¹⁵Ja' ac tacama na pain com. Wiricam, wiricoco oro win ma' cama co to ho' nanam pain xiricam ma' quem, ja' ac tacacama na pain com. Ja' iri tata ne, tomi' mip ac caparut na: Mo ta querec pin' mahu' pain ca howa ton Taramaxicon

nexi' cwa', je ta to ho' qui' mahu' pain xuru ta naparut, tomi' tomi' na ac caparut na. Ma ac urut cam na, to ho' ac urut cam na.

**Ca tao' to pin tococwa Paulo con Silas pain
xirinain ca tao' to tao' to to wa ma'**

¹⁶Maqui' ac ne na xec pain ca in mama' xin urut pain ca tomi' to cocon Iri' Jam ma'. Xuruxut xuruxut, win quima ac caparut na xojam' ma', co taramaja mi' e' nonon oro taramaxicon nequem. Corom pe ho' nam caxicon jam. Caxicon jam co corom pe ho' nam ma', tomi' hwet taxi' nain oro carawa ca ara ton nonon oro wari'. Wari' co taramaja mi' cama ma', cut tamana nana dinheiro pain ca tomi' hwet ximao nequem ma'. ¹⁷Win quima iri naparut ne, ja' ja' ac caparut na. Ca ja' ja' caparut ma', ca merem merem cama ma' quem. Ca' na ca merem cama parut: Mon tarama' cwa', taramaja mi' nonon Iri' Jam co Iri' Taramaxicon pan ta. Pijim' hwet nunuhu' pain ca to' witan pin xim cuhu' ta na ca merem nequem. ¹⁸Ca merem merem cama ma', ca merem merem cama ma', je cwerequem pain oro xijein xec. Mija na xec pain ca merem ac i ma' e' cama parut. Aram aram tomi' xiram ac con na Paulo. Tucu in hwet pan ac cam na, tomi' mip ac con na caxicon jam nequem: Hwet ca' ram cam cwa' ta. Wirico Jeju Cristo co mi' napa' pain ca tomi' mip xim ca' non. Mam' hwet ca' ac cam na quem.

¹⁹Wari' co taramaja mi' cama ma', querec pin' ac cacam na pain ca pe ho' pe ho' om pin cam caxicon jam nequem. He! Cut cut om pin xin dinheiro cam cam cwa' ra ac xucucun na. Quep ac tococwa na Paulo con Silas ma', coc ororo mi' ac tococwa na cocon oro taramaxicon pain ximijain cidade ma', pain ca xao to to caca oro wari' ma'. ²⁰Coc ororo coc ororo mi' ac tococwa na cocon iri' taramaxicon ma', co iri' juiz nana cocon oro romano ma'. Judeu nana caram cwa' ta ac tococwa na. Ja' teretem nonon oro wari' pain cidade nexi' ca' quem ac tococwa na ²¹Ca' je ca' je nanapari' pain oro ca ara pan caca ma', pain ca judeu nucucun ma'. Om ca an xiho' ac tococwa, xi romano ara iri' ta. Ta tomi' ha' huhun me ta nanapari' oro taramaxicon nexi' quem, ac i ma' na ca tomi' tococwa ma'.

16.16 Xojam' ma', co taramaja mi' e' nonon oro taramaxicon nequem ma', om ca cut pan cama dinheiro pain ca taramaja nequem. Cut pan nanain oro taramaxicon nequem. Pe ho' nonon dinheiro ca taramaja mi' pan cama ma'.

²²Oro wari' co taraju nonon pain ca tomi' nucucun ma', mana' tamana ac caca na, quep xuxun ta ac caca na. Tomi' pan ac caca na oro juiz ma': Horohot ca' jujun con womicocon ta, wap jujun ta ac caca na, to' to' ac tococwa na pain pana. ²³Wap tamana iri tata ne, wixicao' mi' ac tococwa na pain xirinain ca tao' to tao' to to wa ma'. Querec wet xo' roron ta ac tocwa na co tao' to nonon ma'. ²⁴Wixicao' mi' ac tococwa na pain man pain iri' tequipain xirim ma'. Pao' to ac tococwa na pain caximacocon pain cote ne pana. Win ne ca querec wet xo' roron ta cacapa' oro juiz ma' na.

²⁵Xim pa' ac cocon na. Ximijain xim pin iri na cocon ne, tomi' tomi' ac con Iri' Jam na Paulo con Silas ma'. Com querec te mi' nonon pain tamara' quem. Taraju wet nonon co win tao' to caca ma' quem. ²⁶Ane ane cocoroc ac ne na macan'. Cocoroc mip na. Cocoroc na oro cote ne pacun ca xat pe ne xirinain ca tao' to tao' to to wa ma' quem. Pa pa pi' pin hap ac ne na oro manain xirim. Oro wari' co tao' to wawa ma', camara' pi' ca' tata oro arain too ca mam' pao' to tococwa ma' quem. ²⁷Querec ac ca na wari' co tao' to nonon ma', co querec wet nonon ma'. Querec iri nain ca pa pa pi' pin ne oro manain xirim ma' ne, jain jain ac ca na. Jein mama' nana xi' ma nonon. Hot ac cain na cote ne quit nucun ma'. To' pa' pin xije ta paxi' na ira. ²⁸Ane merem mip con Paulo ne: Om na ta! Ta to' pa' pin xijem me. To wet to wet pi' pin urut ca' ira na ca merem nucun.

²⁹Tom mi' xine pain naran me ac ca na co tao' to nonon ma', corom hwet hap ac tococwa na. Pe torotop mi' ac con na Paulo con Silas ma'. Cocoroc na pain ca jin' nucun. ³⁰O qui' ac tococwa na, tomi' ac tococwa na: Cain' cain' xita' quem ta caram ma'? Param inon Iri' Jam pain ca to' witan ca' capa' pain ca caracat ne ca' na.

³¹Om na, howa ron Taramaxicon nexi' Jeju ta. Witan ac ma tara ta ac cocon na. Ac i ma' tatara oro win ma' ma co to ho' nenem pain xurum ma' quem, mo ta howa cocon Taramaxicon nexi' ma', witan ac caca tara quem nonon. ³²Tomi' xo' ac cocon na pain capijacon Iri' Jam con Jeju.

16.28 Pain cara pane, pain oro xec nucucun oro romano pane, tomi' ca' tata co querec wet nonon oro wari' co tao' to wawa pain xirinain ca tao' to tao' to to wa pane: Mo ta jein mama' caca oro wari' co querec wet hwe cwa', wap mip pan ac xihwe tara. Am wap e' xihwe, am to' pa' pin xihwe quem, ac i ma' na ca tomi' mip tococwa pane. Je ca jin' tamana ca co ma' co querec wet paxi' non Paulo con Silas cocon oro win tao' to caca pane. Pi'am ca' nain ca taramaja nucun ira. Cocoroc iri na macan' ne, querec ac ca na, jein mama' nana xi' ma nonon co tao' to wawa ma'. Wara to' pa' pin xije ta ac xucun na. Ma' ta om quep em' tamana cacapa' oro taramaxicon ta na ca coromicat nucun.

Wirico, wiricoco oro win ma' ca co to ho' nonon pain xiricon ma' quem, tomi' xo' tata pain capijacon Iri' Jam con Jeju. ³³ Tomi' pan ac cocon na co tao' to nonon ma': Harahap je, hohoc tain nonahu' ca wap ac xihwe ma' ac tococwa na. Om ca xec tara e' ca, hohoc towa tata. Ja' ac tococwa na pain com pain ca howa cocon Iri' Jam quem, wirico, wiricoco oro win ma' ca co to ho' nonon ma' quem. ³⁴ Maji pain xuru ta ac tocwa na Paulo con Silas ma', mi' ac tococwa na pain carawa ca cao' wa. Tomi' querec te tamana na co ma'. Oro win ma' ca co to ho' nonon pain xiricon ma' quem, tomi' querec te tamana nana quem. Xi om ne ca howa pin ara cocon Iri' Jam ta.

³⁵ Xec pin iri na ne, tomi' pan ac caca na oro juiz ma', tomi' tata oro soldado nucucun. Mo tomi' jun co tao' to nonon wari' ma' ac tococwa na. Pa hwerehwet pin roron Paulo con Silas ta jun ca' tata. Hwet ac cocon na co tao' to nonon wari' ma', tomi' ac cocon na. ³⁶ Ma ac ca na, tomi' hwet ac con na Paulo: Pa hwerehwet pin roron ta nanapa' pahu' ac con na. Je ca tomi' xuhu' ca' ac tococwa na: Mama' ho' je. Param inuhu' pain ca querec wet cara cuhu' Iri' Jam pain ca mama' nuhu' ta, ac i ma' na ca tomi' tococwa ma'.

³⁷ Ane tomi' in pin pan cocon oro soldado Paulo ma' ne: Cain' cain' xirara quem? Mo xi om romano urut ta. Romano urut ca' ira! Je xi om wap qui' cacaparut quem? Wap e' nanaparut. Querec querec xam' nanaparut oro wari' quem. Wixicao' mi' ma' ac cacaparut na pain xirinain ca tao' to tao' to to wa ca' quem. Je xi tomi' querec xo' cain' cacaparut quem? Xi pan teretem urut ta. Cain' cain' xirara quem? Mama' noc xa je nanaparut ra? Om ta mama' hohomu urut ta. Hwet pan tataraparut oro juiz ta! Mama' je ta xo' pan tataraparut ta, ac i ma' na ca tomi' in pin nucun Paulo ma'.

³⁸ In hwet ac cocon oro juiz na oro soldado ma', tomi' hwet ac cocon na pain ca tomi' nucun Paulo. Taraju iri nanain ca tomi' nucucun ma' ne, pain ca romano urut ca' ira na Paulo ne caca ma', jin' pin ac caca na quem. ³⁹ Hwet ac cocon na, tomi' toto ac cocon na. Mana' mana' om pin xut pain ca quep em' urut pahu' ne ac cocon na, cut hwerehwet qui' ac cocon na, paca' jein cidade nuxut ta ac cocon na quem. ⁴⁰ Hwerekhwet ca' iri nanain xirinain ca tao' to tao' to to wa ma' ne, mama' ac cacain na xiricam Lídia ma'. Je ca cut in to xucucun cocon oro win howa caca ma'. Tomi' tomi' ac

16.37 Judeu paxi' na Paulo con Silas ma', ane camara' to cacain macaracocon oro romano ne. Je ca romano caca quem.

cocon na, hwara' opa je pain ca howa nuhu' pa'ao' ac cocon na, mama' ac caca na.

Ca mama' cacain Tessalônica Paulo con Silas

17 Xuruxut mama' ac cacain na oro cidade Paulo con Silas. Xuruxut tiquin' nanain Anfópolis ma', xuruxut tiquin' ac cacain na Apolônia ma', aram aram tan' mama' ac cacain na Tessalônica ma', je i ma' wixinain cidade. Ma' pe nain Tessalônica xirim ca cut in to xucucun oro judeu ma'. ²Sábado pin iri na ne, pain ca xao to wa taxipa' cacain ximicocon oro judeu ma', corom ac cain na Paulo. Je curucun, corom taxipa' nain oro xirim ca cut to xucucun oro judeu pain oro sábado pane. Corom hwet ac tococwa na co wara cut in xucucun pain i ma', tomi' xo' tomi' xo' ac xucucun na pain capijacon Iri' Jam ca xirao' to caca oro profeta cara pane. Ma' 3 na sábado pain ca tomi' xo' xucucun pane. ³Ca' na ca tomi' xo' pan cocon Paulo ma': Wari' nucun Iri' Jam co Cristo ma', na e' na pain ca jain jain ca pain ca to' pa' pin tocwa. Na e' na pain ca e' mami' ca. Win ne ca xirao' to caca oro profeta cara pane ta tata. Je ca tomi' xuhu' ca' ac tococwa na. Jeju cwa', co pijim' hwet xuhu' cwa', wirico co Cristo ta. Ac i ma' na ca tomi' tococwa ma'.

⁴Ma' nana oro judeu co howa pin nana, taxipa' pin ac cocon na Paulo con Silas. Ma' mija nana oro grego co xuruxut xo' nana pain ca win xumu taxipa' cacain ca param nucun Iri' Jam ma'. Ma' mija nana oro narima' co hwara' opa nana ma' quem. Howa pin nana caram ma' quem. Taxipa' pin ac cocon na Paulo con Silas.

⁵Ane mana' pan caca oro taramaxicon nucucun oro judeu ma' ne. Noc mi' nonon Paulo con Silas pain ca howa mija caca oro wari' ma'. Maji tomi' cut in xuxun oro caxicon wari' co to ximama' e' nana ma' ac xucucun na, mija ac caca na wari' co cut in nana ma'. Ja' teretem ac tococwa na oro wari' pain Tessalônica. Jein hwet nanain xiricon Jasom ma', to' pa hot pin ac cacain na manain ca corom ac xine ma' quem. Mon Paulo con Silas ma' quem? An hwet mi' xuxun cocon oro wari' cwa' urut cocon ta paxi' nana. ⁶Ane om mam' tococwa ne. Je ca quep tocwa Jasom ma'. Ma' nana co win howa ca co quep wawa ma' quem, coc ororo mi' ac tococwa na cocon oro taramaxicon nein Tessalônica. Merem ac caca na: Mija a xirara caram cwa' co ja' teretem nonon oro wari' pain oro xijein cidade ca mama' caca ne.

Je win hwet cacapari' pain cidade nexi' ca' quem. ⁷ Pi'am to ho' xine pain xuru ca' me ac cocon na Jasom cwa'. Om ca tomi' ha' cacain oro ca tomi' capari' taramaxicon nexi' César co pe nain Roma quem. Taramaxicon na xucun wari' ta nana, wirico Jeju co iri' taramaxicon ta nana, ac i ma' na ca merem caca caram ma' co coc ororo mi' nonon cocon oro taramaxicon nein Tessalônica ma'. ⁸ Ja' teretem ac tococwa na oro taramaxicon cocon oro wari' co taraju nanain ca merem nucucun ma'. ⁹ Tomi' ac caca na oro taramaxicon ma', tomi' tata Jasom cocon oro win ma' ca ma'. Om na, mi' xut pain cote ne dinheiro mam' querec pin' xun urut pahu' pain ca om pan teretem mami' nuhu' ma' ac tococwa na. Na ra ac caca na, mi' ac cocon pain na, om pin ac tococwa na, in mama' ac cacain na xiricocon.

Ca mama' cacain Bereia Paulo con Silas

¹⁰ Xim pin iri na cocon ne, tomi' ac caca na co howa nonon Jeju. Tomi' nonon Paulo con Silas ma': Mama' jein xijein cidade cain, pain Bereia cain ac cocon na, mama' towa ac caca na. Xuruxut xuruxut tan' mama' iri nanain Bereia ne, corom mama' ac cacain na xirim ca cut in to xucucun oro judeu ma'. ¹¹ Oro judeu co to nanain Bereia ma', jimama' ca' nonon oro judeu co to nanain Tessalônica. Xumu xo' nana, tomi' querec te tamana nana pain ca taraju cacain ca pijim' nucun Paulo con Silas ma', pain ca pijim' cacain capiijacon Iri' Jam con Jeju. Tama' noro nanain capiijacon Iri' Jam ca xirao' to caca oro profeta pane, tama' noro noro nanain pain oro xijein xec. Am iri'o' ne cocon, am om iri'o' ne cocon, noro xin quem, ma' ta querec pin' xin cocon ta pan nana. ¹² Ma' mija ac caca na oro judeu co howa pin nonon Jeju. Co om judeu nana ma' quem, ma' mija nana oro narima' co hwara' opa nana ma', ma' mija na ca tarama' nucucun ma' quem, mija nana co howa pin nonon Jeju ma' quem.

¹³ Oro judeu co to nanain Tessalônica ma', taxi' pin iri nonon Paulo pain ca pijim' pe cain Bereia capiijacon Iri' Jam con Jeju ma' ne, maji pain Bereia ta ac caca na, ja' teretem ac tococwa na oro wari' pain Bereia.

17.9 Mi' xut pain cote ne dinheiro ta nonon oro taramaxicon ma'. Mo ta om pijim' mami' caca Paulo con Silas ma', mo ta om teretem mami' caca oro wari' pain ca pijim' nucucun ma', aram aram mi' in pin ac xut pahu' tara pain dinheiro nuhu' ca' nonon. Mo ta pijim' mami' caca quem, mo ta teretem mami' caca oro wari' pain ca pijim' nucucun ma', tao' to mami' ac xut pahu' tara ta nonon.

Teretem tamana nana quem. ¹⁴Tomi' hap ac cocon Paulo na co howa pin nonon Jeju ma': Mao ra, mao rain oro xijein cidade pain cacarain cote ne com cain ac cocon na, mao ac ca na. Silas con Timóteo ma' iri nana ne, to wet nanain Bereia pa'ao'. ¹⁵Oro win ma' nucun co o mao nonon Paulo ma', joc wa' pin ac cocon na pain xijein cidade cain, Atenas na wixinain. In mama' xin Bereia ta iri nana ne, tomi' pan ac cocon na Paulo: Tomi' ca' jun Silas con Timóteo ta ac tococwa na. Ha' iri turuhu' pain ca hwet mahu' pain Atenas ca' ne, hwet hap ac mahu' tara ta nuhu' ta jujun me tata. Ma, in mama' ac caca na. Tomi' hwet ac tococwa na pain ca tomi' nucun Paulo ma' quem.

Ca pijim' pe cain Atenas Paulo

¹⁶Winim' pe ac cocon na pain Atenas Paulo ma'. Winim' nonon Silas con Timóteo. Ca winim' winim' cocon ma', ca toron toron ne ximicon pain ca querec cain oro caji pacun ca Iri' Jam xi' ma caca oro wari' nein Atenas ma'. Toron tamana na ximicon, xi mija ara ne oro caji pacun ca Iri' Jam xi' ma caca pain Atenas. ¹⁷Je ca tomi' xo' tococwa oro wari' pain oro xijein xec ma. Tomi' xo' tata oro judeu pain xirim ca cut in to xucucun ma', tomi' xo' tomi' xo' ac tococwa na co om judeu nana co xuruxut xo' nana pain ca win xumu cacain ca param nucun Iri' Jam ma' quem. Mao nain ca xao to to caca oro wari' pain ximijain cidade ma', tomi' xo' tomi' xo' ac tococwa na co xuruxut in nana ma' quem. ¹⁸Ma' nana co ca' na taxipa' nanain oro xijein ca howa ximama' wa ma', co howa nanain ca coromicat nucun Epicuro, ma' nana co howa nanain ca coromicat nucucun oro estoico ma' quem. Taraju iri nonon Paulo pain ca pijim' ca con Jeju ne, ma' ac caca na co tomi' ximama' ca' nana: Cain' cain' ca co cwa' ne ta? Ma' carawa ca tomi' ca quem? Para tomi' ximao ca ne nana. Oro win ma' caca ma' iri nana ne, tomi' ac caca na: Om na, ac ca pijim' hwet cocon na oro xucucun

17.18 Coromicat ca' na Epicuro cara pane: Na e' na pain ca win xumu e' xine oro carawa ca ja' tomi' querec te napari' ta na ca coromicat nucun. Oro wari' co taxipa' nonon pane, win xumu e' nanain oro caramaji macan'. Coromicat ca' nana quem: Ma' paxi' na oro caji pacun ca Iri' Jam xi' ma iri' ca', ane miri'om capari' ne. Hohot na pain ca ara hwein oro ca param nuhu' ta ca' napari' ta nana. Oro estoico cara pane iri nana ne, coromicat ca' nana quem: Na e' na pain ca miri'om xin oro ca param ne ca cwere wa ca' na ca coromicat nucucun. Mo ta miri'om xin oro carawa ca hohot napari' pain macan' ca', je i ma' tara ca tomi' querec te iri' ta na ca coromicat nucucun.

jam ma' quem nana, xi pijim' hwet pan ara cocon pain capijacon Iri' Jam con Jeju Paulo ta. Mi' pin iri na Jeju ne, e' mami' ac ca na quem na ca pijim' cocon con Jeju.

¹⁹Hap ra ta ac cocon na Paulo ma', o mao ac cocon na pain ca cut in to xucucun oro taramaxicon nucucun ma'. Areópago na wixinain ca cut in to nucucun. Tomi' ac cocon na: Tomi' xo' xut pain ca pijim' nem cara ne. Je win taraju urut pain. ²⁰Jimao naparut ca pijim' nem. Om ca taraju pa' camain' urut pain. Taraju pa' xixin na urut pain ta nonon.

²¹Je curucucun oro wari' nein Atenas cocon oro tatirim co to ho' nonon pane. Taraju pin iri nanain oro xocori ca pijim' wa ne, tomi' hwet ac xucucun pain na. Taraju toto nonon oro xocori ca pijim' wa, tomi' hwet toto nonon quem, je curucucun pane.

²²Xat pe ac cain i ma' na Paulo. Ximija pe tata oro taramaxicon pain Areópago ma'. Pijim' ac tococwa na: Tomi' xim inuhu' oro wari' nein Atenas. Querec pin' inuhu' pain ca win xumu tamana hwein oro ca howa nuhu'. ²³Xut in iri inain cidade nuhu' ca' ne, noro ac tain na oro pacun ca pe torotop mi' querec te hwe ma'. Mam' ac tain na pacun ca xirao' pe hwein i ca' quem: Je i ca' pacun ca to' coromicat napari' con jam co om querec iri' cwa' na ca xirao' nein pahu'. Je ca tomi' xuhu' ca': Jam co in ac paxi' hwe ma', co om querec hwe ma', wirico co pijim' hwet xuhu' ca', ac i ma' na ca pijim' tococwa ma'.

²⁴Jam co pijim' hwet xuhu' ca', wirico co Iri' Jam ta ac tococwa na. Wirico co quep nain macan' pane. Quep quep pi' pin nain oro carawa ca to nain quem. Je ca om pe ho' e' cain oro ca in ac in ac pe tocwa ma', ca quep pan ca wari' ma'. Xi wirico ara ca co taramaxicon pe ho' nain oro pawin, wirico co taramaxicon pe ho' nonon oro wari' je oro carawa pain macan' ca' quem. ²⁵Om ca mi' xirarapa' pain carawa na capari' pain ca wari' nexi' ca' quem. Xi ma' ne carawa ca om non ta. Wirico co mene mene pi' pin nain oro carawa. Wirico co mi' pan napari' pain ca e' nexi' ca', mi' napari' pain ca wereme nexi' ca' quem. Wirico co mi' mi' pi' pin napari' pain oro carawa ca ma' napari' ca'. ²⁶Ma' xica' pe na wari' co quep ca Iri' Jam pain cara pane, pain ca xo' quep ten qui' tocwa wari' pane, aram aram camara' qui' ac caca na oro waram winacon co hwanana ne iri' quem. Xucun wari' xucun wari' pi' pin ac caca na oro hwanana nexi' pane, wawaran mama' ac cacain na oro xijein macan' pain pira. Wirico Iri' Jam co wara coromicat an to mi' nonon pain oro xec nein ca e' nucucun, je pain ca cono' nucucun,

wara coromicat an to mi' tata pain oro macaracocon quem. ²⁷Ma' ta querec pin' xuxun na cacapa' ta tata. Momon pira' tatarapa', am mam' cacapa', ac i ma' na ca coromicat nucun cocon oro hwanana nexi' pane. Ac i ma' napari' pain xocori ca' quem. Na napari' pain ca mam' xun Iri' Jam. Xi pe pira ca' capari' ta. Pe ho' pe ho' xam' capari' ca' ira. ²⁸Ma' na wari' co tomi' ac i ca' pane quem: Wirico Iri' Jam co to' e' napari'. Wirico co to' meo napari'. Wirico co to' ma' pin napari' quem na ca tomi' nucun pane. Ma' nana oro win ma' nuhu' co xirao' taxi' nana ma' quem, mana panxica iri' ca' quem, ac i ma' na ca xirao' nucucun.

²⁹Je ca tomi' xuhu' ca' ac tococwa na. Cain' xi coromicat mi' xun Iri' Jam pain ca mana panxica iri' ca' quem? An xiho' nain ouro je prata ra? An xiho' nain pacun quem ra? Quep toto paxi' nanain wari' quem. Iri' Jam na rain? Om na ta. Om ca na ne pain ca coromicat mi' ac i ma' xun Iri' Jam ta. ³⁰Iri' Jam ma', om ca wap hap cocon oro hwanana pain cara pane, om ca wap hap cocon pain oro ca coromicat ximama' nucucun pain ca om taxi' querec cocon pane. Ane cwirin' pin jein ca caracat nuhu' pain xocori ca' capari' ne, tomi' tomi' xam' napari' pain oro xijein macan' ca to iri'. ³¹Cwirin' je napari', xi wara an pe xo' ara cain xec pain ca tomi' querec xim capari' pain oro carawa ca ara iri' pain ca e' e' wet nexi' ca'. Tomi' xo' roron, querec pin' roron co em' nana ta, wara tomi' ac i ma' non wari' co wara tora' ca ma'. Wari' co wara tora' ca ma', mi' pin na pane, to' e' mami' ac con na quem. Ma' ta querec pin' hun pain ca wara tora' pan ton ca' napari'. Ac i ma' na ca pijim' cocon oro taramaxicon Paulo pane.

³²Oro taramaxicon ma', taraju iri nonon Paulo pain ca to' e' mami' non Jeju Iri' Jam ta ca ma' ne, ma' ac caca na co tatam' e' nonon. Tomi' xirac nonon quem. Ma' ac caca na oro xucucun co taraju wet nonon quem. Taraju mami' xixin na urut pain ca pijim' mi' maparut ca' nonon. ³³Pi' pin iri na ca tomi' xucucun ne, hwet mao ac ca na Paulo, paca' ac tococwa na. ³⁴Ane ma' caca co ja' ja' nonon ne. Howa pin ac cocon na Jeju. Ma' na taramaxicon co howa ma'. Dionísio na wixicon. Ma' na narima' co howa ma' quem. Dâmaris na wixicam. Ma' nana xucucun co howa pin nonon Jeju ma' quem.

Ca mao cain Corinto Paulo

18 Pi' pin iri na ca pijim' cocon oro taramaxicon Paulo ma' ne, pain Atenas ma', mao ac ca na. Paca' nain Atenas, mao ac cain na Corinto. Je i ma' wixinain cidade ca mao ca ma'. ²Mam' pe non wari' pain i cain. Áquila na wixicon. Judeu na. Pan' pe paxi' nain Ponto, je i ma' wixinain macaracon Áquila. Ane xo' maqui' cain Itália ne, je i ma' wixinain macan' ca xo' maqui' ca. Wirico, wiricam manacon Priscila ma' quem, xo' maqui' nanain Itália. Xi om ne ca tomi' nucun taramaxicon Cláudio ma', cocon oro judeu pane. Paca' pacá pi' pin jein Roma ta tata oro judeu pane. Mam' iri nanam pain Corinto Paulo ne, hwet ac cacam na pain xiricacam. ³Oc taxipa' nain caji xirim Paulo pane, je i ma' ca taramaja nucun. Oc taxipa' nain caji xirim Áquila cam Priscila ma' quem. Je ca pe ho' cacam Paulo ma'. Taramaja to ho' ac xequequem na. ⁴Maqui' iri na oro sábado ne, pain xec nein ca xao to wa taxipa' cacain ximicocon oro judeu ma', mao taxipa' nain xirim ca cut in to xucucun Paulo ma'. Pijim' pijim' ac tococwa na oro judeu cocon oro wari' co om judeu nana ma' quem. Howa xiroron Jeju na tata.

⁵Maqui' pin iri nain Macedônia Silas con Timóteo ne, an pe pin ac cain na ca taramaja nucun Paulo ma'. Oc oc om pin nain caji xirim. Pijim' e' ac cain na capijacon Iri' Jam. Tomi' hwet tomi' hwet tata con Jeju oro judeu ma'. Wirico Jeju co Cristo ta tata. ⁶Ane tomi' in pin pan cocon ne. Tomi' napat nonon quem. Je ca wap camara' cain ximirinain macaracocon con womicon Paulo ma' quem. Ma' ta querec pin' xujuhu' pain ca pan teretem nuhu' pain ca noc hwein ca taraju wa capijacon Iri' Jam con Jeju ta tata. Tomi' ca' tata: Mo ta wap cuhu' Iri' Jam ma', pain ca noc hun Jeju ma', om ca wata' ne co em' ma' pahu'. Wahu' co em' pan nana ta. Maho' pin inuhu' pain ca judeu hwe ma'. Pijim' pijim' om xuhu'. Pijim' mi' ho' toton pain capijacon Iri' Jam con Jeju oro wari' co om judeu nana ta na ca tomi' tococwa ma'.

⁷Hwet mao ac ca na Paulo ma', hwet ca' nain xirim ca cut in to xucucun oro judeu ma', mao ac cain na xiricon Tício Justo ma', co om judeu ma'.

18.5 Xiram pa' nonon Paulo oro wari' co howa nonon Jeju pain Macedônia ma'. Mi' xun pain dinheiro ta nana, cut mi' ac cocon pain na Silas con Timóteo ma'. Mi' jun pain Paulo ta nonon. Hwet pan iri nonon pain Corinto ne, mi' ac cocon pain na quem. Je ca na con pain ca an pe pin cain ca taramaja nucun Paulo ma', pain ca oc taxipa' cain caji xirim ma'.

Xut xo' na Tício Justo pain ca win xumu taxipa' cain oro ca param nucun Iri' Jam. Pe ja' pan nain xirim ca cut in to xucucun oro judeu ma' quem. ⁸Ma' na wari' co querec wet taxipa' nonon oro win judeu ca pain ca cut in xucucun ma' quem. Crispo na wixicon. Howa pin non Taramaxicon nexi' Jeju quem. Oro win ma' ca co to ho' nonon pain xiricon ma' quem, howa howa pi' pin nonon Jeju. Ma' mija nana oro wari' nein Corinto co taraju nonon Paulo pain ca pijim' mi' cocon con Jeju ma' quem. Ja' ac tococwa na pain com quem.

⁹Maqui' ac ne na xim nein ca tomi' con Paulo Taramaxicon nexi'. Ac ca tohwein' ca paxi' na, om ca pi'am ca, querec na. Ac ca querec con na Taramaxicon nexi', ac ca tomi' con na: Ta jin' momon co noc nenem pain ca pijim' nem ma' me ta. Pijim' cara ra. Ta an pe pin main ca pijim' wa me. ¹⁰Xi pe ho' ara xim ta. Om ta na cocon pain ca quep em' quequem oro wari' co quep em' xim nenem ma'. Xi ma' mija ara cacapa' oro wari' ne pain Corinto ta. Ac i ma' na ca tomi' con Paulo Taramaxicon nexi' pain ca ac ca tohwein' ca ne ma'. ¹¹Je ca mon pe ho' tococwa pain Corinto ma'. Momon ca' na tata pain capijacon Iri' Jam oro wari'. Om ca paca' hap tococwa. Maqui' pa' non xijein cawaxi', maqui' pa' ac con na ximijain xijein ma' quem.

¹²Taramaxicon pin ac ca na Gálio ma'. Taramaxicon pe ho' pin nonon oro wari' nein Acaia ma', je i ma' wixinain macan' ca taramaxicon pe ca ma'. Taramaxicon pin iri na Gálio ne, tomi' xo' ac xucucun na oro judeu: Maji quep xun Paulo ta xucucun, o mi' ac cocon na con taramaxicon Gálio ma', co hwara' opa tamana ma', pain ca iri' juiz ca ma'. Tomi' hwet ac cocon na con Paulo: ¹³Pan tem na co cwa' ta! Pijim' iri nonon oro wari' ne, pijim' ni ca' nain oro ca howa nuxut pain ca in ac urut con Iri' Jam pain ca pe torotop mi' querec te urut con ca'. Om ca tomi' ha' ac tocwa, xi tomi' in pin ara cain ca xirao' nucun Moisés ta nana pain ca tomi' em' cocon ma'.

¹⁴Tomi' caho' xije ta iri na Paulo ma' ne, tomi' pan ac ca na taramaxicon Gálio. Tomi' ca' nonon oro judeu co tomi' em' nonon Paulo ma': Tomi' pan inuhu' pain ca judeu hwe ma'. Taraju wet xine ta. Mo xi caracat pan ca co cwa', mo xi tomi' in pin cain ca tomi' nucun oro taramaxicon nuxut pain ca romano urut ca'. Hohot ac ne xira pain ca taraju wet xuhu' pain ca tomi' em' hun ca'. ¹⁵Ane tomi' caracan pan xujuhu' ne. Tomi' caracan e'

xujuhu' pain oro xijein ca pijim' wa ma', je pain oro ca wuxu wa, je pain oro ca xirao' pe wa ca tomi' ha' taxipa' hwe pain ca judeu hwe ma'. Je xi tomi' xo' pan xujuhu' pain ta! Noc inain ca taraju wa. Om ca juiz ta' pahu', om ta tomi' xo' xuhu' pain ta na ca tomi' in pin tococwa ma'. ¹⁶Tomi' hwerehwet pin jujun ta ac tococwa na oro guarda ma', tomi' hwerehwet pin ac tococwa na pain xirim ca taramaja pe ca taramaxicon Gálio ma'. ¹⁷Oro wari' co mana' nonon Paulo ma', hwet hwet pi' pin ac cocon na Sóstenes co querec wet nonon oro win judeu ca ma', pain xirim ca cut in xucucun ma'. Quep ac cocon na, to' to' ac cocon na. Querec paxi' pan na taramaxicon Gálio ma', querec paxi' tata pain ca to' cocon ma'. Ane miri'om tococwa ne. Om ca tomi' in pin tococwa pain ca to' cocon ma'.

Ca in mao cain Antioquia ca pe nain Síria Paulo

¹⁸Mon to wet ac cain na Corinto Paulo ma'. Pain pin iri na ne, in mao ta' ina ta ac tococwa na oro xerexi' ma', paca' ac tococwa na. Ja' ja' nonon Priscila con Áquila ma'. Xuruxut mama' ac cacama na. Xuruxut xuruxut hwet ac cacamain na cacarain cote ne com pain Cencreia ma', je i ma' wixinain cidade pain cacarain com ma'. Tan' mama' iri nanain Cencreia ne, wijac pin ac cain tununucun na Paulo. Ma' ta querec pin' cacapa' oro wari' pain ca ara pin tain carawa ca wara tomi' pe mi' ton Iri' Jam pane ta na. Wijac pin iri nain tununucun ne, corom mama' ac cacamain na mam' horoho wa, horoho mama' ac cacama na.

¹⁹Horoho horoho tan' mama' iri nanain Éfeso ne, quiiji' ca' ac cacamain na mam' horoho wa. Main tiqin' mao ta' na Paulo quem, mon to wet jein Éfeso pa'ao' tata Priscila con Áquila ma', ame hwe e'. Pain ca pe pe wet cain Éfeso Paulo ma', corom mao nain xirim ca cut in to xucucun oro judeu ma'. Tomi' xo' tomi' xo' ac xucucun na pain capijacon Iri' Jam. ²⁰Amon pe ho' xut me paxi' nonon quem. Om na, om ca pe ho' ac xuhu', wara mao ta' ina ta ac tococwa na. ²¹Mo ta param capa' pain ca in qui' wa Iri' Jam, in hwet ac xuhu' tara ta ac tococwa na, corom mao ac cain na mam' horoho wa, mao ac ca na. ²²Horoho horoho wa' mao iri nain Cesareia ne, quiiji' ca' ac cain na mam' horoho wa, xut mao ac cain na Jerusalém ma' quem. Querec hap toton co howa nonon Jeju ta ac ca na, hwet ac tococwa na. Mao tain Antioquia ta ac tococwa na, xut mao ac ca na. Xut xut wa' mao ac cain na Antioquia ca pe nain Síria.

²³ Pain pin iri na pain ca mon to wet cain i cain ne, mao ta' ina ta ac ca na. Xut mao ac cain na oro xijein cidade pain Galácia je Frígia ma'. To hwara' opa ac tococwa na co howa nonon Jeju.

²⁴ Ac i ma' ac i ma' na. Wa' mao ac cain na Éfeso wari' co judeu. Apolo na wixicon. Maqui' nain Alexandria, je i ma' wixinain macaracon. Pijim' taxi' tamana na Apolo ma'. Taxi' tamana nain capiiacon Iri' Jam ca xirao' to caca oro hwanana pane. ²⁵ Wara pijim' mi' paxi' ta con Taramaxicon nexi' Jeju pane. Jain jain paxi' nain ca tomi' hwet wa oro ca taxi' nucun con Jeju. Pijim' xo' taxi' nain quem. Ane taxi' e' cain oro ca pijim' nucun João co ja' taxipa' com cara pane ne. ²⁶ Pijim' ta' ta ac ca na, corom mao ac cain na xirim ca cut in to xucucun oro judeu ma', pijim' ac ca na. Om ca pijim' jin' ca. Taraju iri nonon Priscila con Áquila ma' ne, hap ra pain xuruxut ta ac cocon na, hwet ac cacam na. Tomi' xo' ac cocon na pain capiiacon Iri' Jam ca om taxi' querec ca ma', ca an hwet mi' napari' pain ca to' witan xim capari' ca'.

²⁷ Mao tain xijein macan' pain Acaia ta iri na Apolo ne, quep xiho' ac cocon na oro xerexi' co howa nonon Jeju pain Éfeso ma'. Xirao' mi' ac tococwa na oro wari' co howa nonon Jeju pain Acaia quem. Hwet xim nuhu' Apolo cwa'. Tomi' querec te jun me na ca xirao' mi' tococwa. Mao ac ca na. Wa' mao iri nain i cain ne, quep xiho' tamana ac tococwa na co howa nonon Jeju ma', co wara xiram pa' pan ca Iri' Jam pain ca mi' tococwa pain ca howa wa ma'. ²⁸ Quep xiho' tamana tata, xi hwara' opa ara ca pain ca pijim' cocon oro win judeu ca co tomi' in pin nonon ma'. Pijim' pijim' ca' tata: Je ca tomi' ne capiiacon Iri' Jam ca xirao' to caca oro profeta cara pane. Wirico Jeju na co winim' iri' cwa'. Wirico co Cristo ta, ac i ma' na ca tomi' in pin tococwa oro win judeu ca co tomi' in pin nonon ma'. Taraju nonon oro wari' pain ca pijim' ac i ma' cocon ma' quem. Hehe ac caca na, to' quiiji' pin ac tococwa na pain ca tomi' in pin nucucun ma' quem.

Ca mao cain Éfeso Paulo

19 Pe pe wet iri nain Corinto Apolo ma' ne, xut mao ac cain na xijein macan' Paulo ma'. Mao nain oro xijein cidade pain oro pacun pain Galácia je Frígia ma', aram aram wa' mao ac cain na Éfeso. Je ca mam' to tococwa co howa nonon Jeju. ² Tomi' querec ac tococwa na: Corom

hwet nuhu' Tamataracon Iri' Jam pain ca xo' howa qui' hun Jeju quem ac tococwa na.

Ma' na Tamataracon Iri' Jam ra ac caca na. Om ca ma' na Tamataracon Iri' Jam camain' cacaparut wari' pane. Om ca tomi' hwet cacaparut pain ta nana.

³Cain' cain' xihwe quem? Ma' ca pijim' nein ca howa hwe pain ca ja' xihwe pain com pane quem ac tococwa na.

Om na, howa urut pain ca pijim' nucun João co ja' taxipa' com cara pane. Je ca ja' urut com pane, ac i ma' na ca tomi' cocon ma'.

⁴Tomi' xo' ac tococwa na: João cara pane, ja' nonon pain com oro wari' co cwirin' pin nanain ca caracat nucucun pane, co an to pin nanain ca caracat nucucun pane. Tomi' ca' nonon quem: Main maqui' tara pa'ao' xucun ma', Jeju ma'. Wirico tara co howa hwe ta nonon oro wari' João pane, tomi' xo' ac i ma' nonon Paulo ma'.

⁵Taraju iri nanain ca tomi' nucun Paulo ne, ja' ac tococwa na pain com. Ma' ta querec pin' xihwe pain ca howa pin hun Taramaxicon nexi' Jeju ta tata. ⁶Quep iri nonon pain winacocon Paulo ne, corom hwet pan ac cocon na Tamataracon Iri' Jam, tomi' ac cacain na oro xijein ca capiija wa ca om wara tomi' taxi' caca ma', pijim' hwet pijim' hwet ac cacain na capiijacon Iri' Jam quem. ⁷Oro co ja' wawa pain com ma', co corom hwet ne Tamataracon Iri' Jam ma', ac ca ma' 12 caca na.

⁸Paulo ma', corom taxipa' nain oro xirim ca cut in to xucucun oro judeu ma' quem. Ma' 3 na panawo' pain ca pijim' tococwa ma'. Pijim' hwara' opa tata, om ca pijim' jin' tococwa. Tomi' xo' tata con Iri' Jam quem, pain ca taramaxicon pe ho' xuhu' ta nuhu' Iri' Jam ta tococwa ma'. Tomi' tomi' na xitoton na tata pain ca pijim' tococwa ma' quem. ⁹Ane ma' caca co ari nana ne. Om ca howa je na caca. Tomi' napat ac cacain na oro ca pijim' wa con Taramaxicon nexi' Jeju. Taraju taraju xam' nonon oro wari' pain ca tomi' napat cacain ma'. Je ca in ca' pan cocon Paulo ma'. Maji ta ac tococwa na co howa nana ma', o mama' ac tococwa na pain xirim ca ca' na pe ca Tirano ma', je i ma' ca ca' na to tococwa pain capiijacon Iri' Jam pain oro xec quem. ¹⁰Om ca an pe cain ca ca' na pe wa pain i ma' quem. Maqui' pa' non xijein cawaxi', maqui' pa' ac con na xijein ma' quem. Aram aram taraju ac cacain na capiijacon Iri' Jam con Jeju oro wari' co to nanain oro xijein cidade pain Ásia ma'. Ca judeu nucucun ma', ca om judeu nucucun ma' quem, taraju taraju pi' pin ac cacain na capiijacon Iri' Jam con Jeju.

¹¹ Quep xiho' tamana non Paulo Iri' Jam ma', pain ca mi' con pain ca ara tamana cain ca om ara taxi' ne ca wari' wa ma'. Wa wa tamana nonon oro wari' ma' quem, xi wara querec xine oro ca ara ca pain cara pane ta.

¹² Om ca cut qui' e' tococwa co caxi nana ma'. Cut mi' tata con womicon Paulo ma' quem, wirico wom co mam' xic ca pain ca nahwere' nucun, wirico wom co pe ca pain ca taramaja nucun ma' quem, cut mi' tata con. Mam' tatep pa' iri tata con ne, xio pin ac caca na. Oro caxicon jam co corom to ho' nonon ma', hwerehwet ca' ac cocon na quem.

¹³ Ma' nana oro judeu co xuruxut mama' nanain oro xijein cidade pane. Mam' iri tata oro wari' co corom to ho' nonon oro caxicon jam ne, tomi' jein tomi' jein pin ac tococwa na oro caxicon jam nucucun. An hwet querec xin wixicon Jeju cocon ta ac caca na, tomi' ac tococwa na: Hwerehwet ca' jujun. Win ne ca an hwet urut pain wixicon Jeju co pijim' hwet ca Paulo pane tata. ¹⁴ Mana panxica Ceva nana co ara ac i ma' nana pane. Ma' 7 nana. Win ma' caca oro taramaxicon nucucun oro sacerdote na cote caca. ¹⁵ Ac i ma' ac i ma' nana, maqui' ac ne na xec nein ca hwet ca' ron wari' cwa' paxi' cocon caxicon jam ma'. Ane tomi' in pin pan cocon caxicon jam ma' ne. Querec pin' inon Jeju. Querec pin' inon Paulo quem. Wahu' iri na ne, om ca querec pin' xuhu'. Cain' ca wari' hwe quem tata. ¹⁶ Wari' co corom pe ho' non caxicon jam ma', taqui' hwet ac cocon na, joc camara' ac tococwa na. To' to' ac tococwa na, to' wein ca' ac tococwa na con womicocon ma'. Mija na ca to' ao pin tococwa. Jein ca' ac cacain na xirim ma', jein mama' ac caca na quem.

¹⁷ Taxi' ac cocon na oro wari' co to nanain Éfeso ma'. Ca judeu nucucun, ca om judeu nucucun quem, taxi' taxi' pi' pin ac cocon na. Jin' jin' pi' pin nana. In ac tamana nanain wixicon Taramaxicon nexi' Jeju quem. Hwara' opa tamana na xin ne nanain. ¹⁸ Maqui' mija ac caca na co howa pin nana ma' quem, tomi' hwet tomi' hwet ac cacain na oro ca ara nucucun ca om awi camain'. Taraju taraju pi' pin nonon oro wari' ma'. ¹⁹ Ma' mija nana co ara xirac nonon oro wari' ira. Cut in qui' ac cacain na oro tapari carawa ca xirao' to xine oro ca ara ximama' nucucun ma', ca ca' rain mao cocon co ara xirac nana ma'. Cut in qui' ac cacain na, tom pin ac cacain na quem. Querec querec pi' pin nonon oro wari' pain ca tom pin cacain. Mija na oro

19.19 Oro livro cocon hwanana pain cara pane, om ca an xiho' nein oro livro nexi' pain xocori ca'. An e' nanain tapari carawa, xirao' xirao' ac cacain na, joc top ac cacain na quem. Ac i ma' na livro nucucun hwanana pane.

tapari carawa ca xirao' to caca ma'. Mija tamana na dinheiro nein quem. Ac ca ma' 50.000 ne na dracma nein cocon. ²⁰Je ca pijim' pijim' tiquin' xine capijacon Iri' Jam con Taramaxicon nexi' Jeju. Ca pijim' pijim' xine ma', ca taraju taraju tiquin' caca oro wari' ma' quem. Aram aram mija pin ac caca na oro wari' co howa nonon Jeju ma'.

²¹Mao tain Jerusalém ta ac ca na Paulo. Ac tain wana ca mao nain Macedônia je Acaia ma', xut tiquin' mao ac tain tara Jerusalém ta na. Ca' na ca tomi' nucun: Mon to wet wijimain e' tain Jerusalém ma', xi na e' ara capa' pain ca mao tain Roma ta na ca tomi' nucun. ²²Wara mama' jein Macedônia ta ac tococwa na co quep xihó' nonon ma'. Ma' 2 nana co tomi' ca ma', Timóteo con Erasto ma'. Wara mama' je, mon to wet wijimain ca' tain Ásia ca' quem tata.

Ca teretem to cacain Éfeso

²³Mama' iri nanain Macedônia Timóteo con Erasto ne, teretem tamana ac caca na oro wari' nein Éfeso. Xi om ne ca mana' ara caca pain ca pijim' hwet xine capijacon Iri' Jam con Jeju ta. ²⁴Pe nain Éfeso wari' co mam' taramaja taxi' nain prata. Demétrio na wixicon. Quep taxi' nain wijimain jami xirim ca in ac pe tacama Ártemis ma', co Iri' Jam xi' ma caca oro wari' nein Éfeso ma'. Quep taxipa' nain, vender vender ac cain na quem. Cut tamana nanain dinheiro oro wari' co win taramaja nonon ma' quem. ²⁵Harahap je ta ac tococwa na co win taramaja ca ma', wiricoco oro xucucun wari' co quep nanain wijimain jaminain xirim ca in ac pe tacama Ártemis ma' quem, cut in ac xucucun na. Tomi' xim inuhu' ta oro win ma' ne ac tococwa na. Taxi' hwein i ca', pain ca mam' cut tamana xin dinheiro pain ca taramaja nexi' ca', pain ca quep xin wijimain jaminain xiricam Ártemis ca'. ²⁶Taxi' hun co ma' quem, Paulo ma' quem. Querec hwein ca taramaja nucun, taraju hwein ca pijim' nucun quem. Om ca Iri' Jam ne oro too ca quep pan ca wari' ta na. Mija nana wari' co howa pin nanain ca pijim' nucun ma'. Om ca xica' to caca oro win ma' nexi' pain Éfeso

19.19 Dracma ma', je i ma' dinheiro nucucun oro grego pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na dracma pain ca taramaja nucun. **19.24** Pain ca Ártemis cama ma', je i ma' wixicam pain capijacocon oro grego. Diana na xijein wixicam pain capijacocon oro romano.

ca', ac ca howa howa pi' pin xi' caca na oro wari' pain oro xijein cidade pain macaraxi' pain Ásia ca' quem. ²⁷ Cain' cain' xixi' quem ac tococwa na. Mo ta taraju taraju tiquin' cacain ca pijim' nucun Paulo oro wari' ma'. Tara cocon, am tomi' napat tamana pin cacain ca taramaja nexi' pain ca quep taxipa' xin wijimain jaminain xiricam Ártemis ca'. Om ta xica' pe ne ca tomi' napat cacain ca taramaja nexi' ca' quem, am in ac in ac om pin cacain xiricam iri' jam nexi' Ártemis cwa', co hwara' opa tamana cwa', co pe torotop mi' querec te pi' pin caca oro wari' nein Ásia ca', je pain oro xijein macan' pain pira quem. Am querec pin' querec pin' om pin xim cacam oro wari' ma', am querec pin' querec pin' om pin xim cacam pain ca hwara' opa nequem pain ca iri' jam nequem quem, ac i ma' na ca tomi' cocon oro win ma' ca Demétrio ma'.

²⁸Taraju iri nonon Demétrio oro wari' ma' ne, mana' tamana ac caca na. Mija na ca mana' caca. Merem ac caca na: Hwara' opa tamana na iri' jam nexi' Ártemis cwa', co howa iri' pain ca wari' nein Éfeso iri' ca'. Ac i ma' na ca merem nucucun. ²⁹Mija nana wari' co taraju nonon pain ca merem nucucun ma' quem. Ca merem merem caca ma', ca merem merem caca ma', mija ac caca na co jein hwet nonon ma'. Teretem teretem pi' pin ac caca na oro wari' nein Éfeso ma'. Quep ac tococwa na oro win ma' ca Paulo ma', wirico Gaio con Aristarco ma', co wari' nein Macedônia nana ma'. Quep iri tata ne, coc ororo mama' ac tococwa na pain cote ne ca tao' caho' nein ca cut in to taxipa' xucucun ma'. ³⁰Hwet toton paxi' na Paulo ma', pijim' xo' toton oro wari' ta paxi' na. Ane quep xat pan cocon oro win howa ca ne. Om na, ta hwet momon me ta nonon. ³¹Ma' nana oro taramaxicon nein Ásia co tomi' querec te nonon Paulo ma'. Tan' hwet ac cocon na. Mo tomi' ron Paulo ta nonon wari' nucucun ma'. Tomi' ca' ron: Mo ta mao main ca cut in to xucucun oro wari' ma', am quep em' quequem, am to' pa' pin quequem. Ta mao main i cain me ta ron, ac i ma' na ca tomi' cocon wari' nucucun. Mo tomi' hwet ac tocwa na pain ca tomi' nucucun quem.

³²Mija na ca teretem caca oro wari' co cut in nana ma'. I'ina na ximicocon quem. Para cut in tamana iri' ca' ne xucucun. Ma' paric ca' e' nana co taxi' nanain i ma'. Merem ximama' e' nana, merem ni merem ni ca' xucucun quem. ³³Querec ac tococwa na oro judeu ma', pain ca joc hwet mi' cocon pain tamain Alexandre ma'. Coromicat ac caca na: Wirico tara co em' ma', co ja' teretem napari' ma', ac i ma' na ca coromicat nucucun

con Alexandre. An piri' pan ac cain na micon Alexandre ma'. Tacana to je, tomi' xuhu' ta paxi' na. Tomi' narain ho' xije cocon oro wari' cwa' paxi' na. ³⁴ Ane querec pin' pan cocon oro wari' ne, querec pin' nonon pain ca judeu ca ma'. Merem mip ac caca na. Ac ca xica' pe ne na capijacocon pain ca merem caca ma'. Hwara' opa tamana na iri' jam nexi' Ártemis co howa iri' pain ca wari' nein Éfeso iri' ca' nana. Ca merem merem caca ma', ca merem merem caca ma', momon merem momon merem nana. Ac ca 2 ne na hora pain ca momon merem momon merem caca ma'.

³⁵ Om na, tacana to je ta pan ac cocon na oro wari' taramaxicon nucucun ma'. Xirao' pe taxipa' nain oro ca tomi' nucucun iri' taramaxicon nucucun oro romano ma', je i ma' ca taramaja nucun. Tacana to pin iri nana oro wari' ma' ne, tomi' pan ac cocon na taramaxicon nucucun: Taraju wet xine me oro win ma' ta' pain ca wari' nein Éfeso iri' ca'. Taxi' taxi' xam' nanapari' oro wari' pain oro xijein macan' ma'. Taxi' nanapari' pain ca querec wet pan xin xirim ca in ac pe tacama Ártemis nexi' co hwara' opa tamana cwa'. Taxi' nanapari' pain ca querec wet pan xin jamicam ca pan' qui' nain pawin pane quem. ³⁶ Iri'o' na, taxi' taxi' xam' nanapari' oro wari' ta. Je ca tomi' xuhu' ca' ac tococwa na: Tacana to je. Coromicat xo' je, ta tamanain to hwe me. ³⁷ Para cut qui' huhun caram cwa' quem? Xi cut noc xa cacain caramaji xiricam iri' jam nexi' cwa' ta. Om ca tomi' napat cacam quem. ³⁸ Mo ta tomi' em' xun cocon wari' Demétrio cocon oro co win taramaja ca ma', na e' na pain ca hwet xo' tococwa oro taramaxicon ta. Ma' nana oro taramaxicon co taraju wet nanain oro ca tomi' em' wa, ma' na xirim ca taraju wet to caca ma' quem. Je tara i cain ca tomi' hwet to tococwa pain ca tomi' em' nucucun ta. ³⁹ Mo ta ma' ma' wet ne carawa ca tomi' xo' xi' hwe ma' quem, na e' na pain ca tomi' xo' xijexi' pain ca aram aram cut in xo' je cacapari' oro taramaxicon nexi' ta. ⁴⁰ Om xi cut in xijexi' pain xocori ca' quem, xi cut in xo' xujuhu' ta cacapari' oro taramaxicon ta. Am tomi' em' cacapari' pain ca ari xuxun pain ca tomi' caho' cacapari' pain ca teretem wa quem. Mo ta para teretem hwe pain xec ca' ne cacapari', hehe ac iri' tara, om ta na capari' pain ca tomi' narain ho' xijexi' pain ca teretem nexi' ca', xi teretem ximama' ara iri' ta. Ac i ma' na ca tomi' cocon taramaxicon nucucun co xirao' pe taxipa' nain oro ca tomi' nucucun oro romano ma'. ⁴¹ Pi' pin iri na ca tomi' nucun ne, je i ma' ta, in mama' jein xuruhu' ta ac tococwa na oro wari' ma'.

Ca mao cain Macedônia je Grécia Paulo

20 Teretem teretem om pin iri nana oro wari' pain Éfeso ne, tomi' pan ac ca na Paulo. Harahap je tata co howa nonon Jeju ma', cut in ac xucucun na. Tomi' ac tococwa na, quep xiho' tata pain ca to' hwara' opa tococwa pain ca hu tococwa ma' quem. Mao ina ta ac tococwa na, na ra, mao ra e', mao ac ca na, xut mao ac cain na xijein macan' ma', Macedônia na wixinain. ²Ca hwet cain oro xijein macan' pain Macedônia ma', ca pijim' ac tococwa na oro wari' co howa nonon Jeju. Quep xiho' tamana tata pain ca to' hwara' opa tococwa pain ca hu tococwa ma' quem. Aram aram wa' mao ac cain na xijein macan' ma'. Grécia na wixinain. ³Mon to wet ac cain na Grécia ma'. Ma' 3 na panawo' pain ca mon to wet cain i ma'. Maqui' pin iri na xec nein ca corom mao tain cain mam' horoho wa pain ca mao tain cain xijein macan' pain Síria ma' ne, taxi' ac tococwa na oro judeu co to' pa' pin xun nonon ma'. Maho' inain ca mao wa pain Síria ta ac ca na, in mama' xin waraxi' ta, in mama' xin Macedônia ta ac ca na. ⁴Maji ta ac tococwa na oro win ma' ca ma'. Mo nana: Sópatro ma', co wari' nein Bereia ma', co te non Pirro ma'. Aristarco con Secundo ma', co wari' nein Tessalônica nana ma'. Gaio ma', co wari' nein Derbe ma'. Timóteo ma'. Ma' na Tíquico con Trófimo ma' quem, co wari' nein Ásia nana ma' quem. ⁵Oro win ma' nuxut cwa', wara mama' ca' nanaparut pain Trôade ma', je i ma' wixinain cidade ca wara mama' caca ma'. Winim' to ac cacaparut na pain Trôade. ⁶Pi' pin iri na oro xec nein Páscoa ne, je pain ca cao' querec te e' xine capam' ca om joc wanan wa pain ca to' memerem nein ma', corom mama' ac urut pain na mam' horoho wa, paca' ac urut pain na Filipos. Horoho mama' ac urut na. Ma' 5 na xec pain ca horoho mama' urut ma'. Aram aram tan' mama' ac urut pain na Trôade. Wara tan' mama' nana oro win ma' nuxut quem. Hwet ac urut cocon na, mon to wet ac urut na. Ma' 7 na xec nein ca mon to wet urut pain Trôade ma'.

20.5 Lucas ma', co xirao' nain Atos ma', wara ja' ja' paxi' non Paulo pane. Je win in hwet xucucun pain Macedônia ca'.

Ca to' e' mami' tocwa Êutico pain Trôade

⁷Domingo pin iri na ne, cut in ac xujuxut na pain ca howa urut con Jeju. Cao' wi xi' urut quem. Pijim' pan ac cocon na Paulo ma' quem. Xec mama' xi' urut quem, je ca pijim' mam' xuhu' cocon ma'. Pijim' ac cocon na, mon pijim' mon pijim', cote ne con. Mon pijim' mon pijim' ximijain xim pa' ac caparut na. ⁸Cut in to xujuxut pain manain xirim ca pe pawin ma'. Mija na naran. ⁹Xao pe nain manain janela co xo' hwara' ma'. Êutico na wixicon. Xao pe nain i ma'. Ca pijim' pijim' ca Paulo ma', ca in in ac ne na matacon Êutico ma'. Ca pijim' pijim' ca ma', ca in in ac ne na matacon ma'. In tamana na matacon, pi'am mip ac ca na. Pan' mao ac ca na, pan' mao nain macan'. Pan' qui' nain pawin, je ca pan' qui' ca. Awin ac cocon na quem. Wara mi' pin na. ¹⁰Quiji' hwet ac con na Paulo ma' quem. Wina quiji' hwet ac con na, pe horoman tapan' ac con na quem. Ta toron ne xumuhu' me, e' na ta ac tococwa na oro wari' ma'. ¹¹Piri' mama' mami' ac urut na, cao' ac urut na. Cao' cao' pi' pin iri urut ne, pijim' pijim' tiquin' ac cocon na quem. Momon pijim' momon pijim', xec pa' ac caparut na. Mama' xi' urut ta ac urut na, mama' ac urut na. ¹²Co xo' hwara' ma', co mi' pin ma' ira, o mao ac tocwa na pain xiricon. Tomi' querec te tamana nana pain ca e' mami' nucun ma'.

Ca tomi' xo' mam' tococwa co querec wet nonon co howa nonon Jeju pain Êfeso

¹³Tomi' ac caparut na Paulo: Wara horoho mama' jein xijein cidade cain, pain Assôs cain. Wata' iri na ne, ac tain wana pain mi ta. Winim' pe xine pain Assôs cain, ac i ma' na ca tomi' xo' caparut. Ma ac urut na, xuruxut xuruxut hwet ac urut pain na mam' horoho wa, corom mama' ac urut pain na, horoho mama' ac urut na quem. ¹⁴Mam' to iri naparut pain Assôs Paulo ne, corom hwet ac caparut na pain mam' horoho nuxut, tiquin' mama' ac urut na. Horoho horoho hwet ac urut pain na xijein cidade ma'. Mitilene na wixinain. ¹⁵Xec pin iri na ne, maji ta ac urut na, horoho mama' ac urut na. Horoho horoho tiquin' ca' ac urut pain na xixi

20.7 Je curucucun oro wari' co howa nonon Jeju pane. Cao' wi taxipa' xucucun. Pi' pin iri na ca cao' nucun ne, toc ac cacain na comi memem pain ca mam' pe wet cacain ca mi' pin nucun Jeju pane.

pan nein macan' Quio ma'. Xijein xec pin iri na ne, horoho horoho tiquin' ac urut na, hwet ac urut pain na xijein xixi pan nein macan' Samos ma'. Xec pa' ac caparut na, horoho horoho tiquin' ac urut na, tan' mama' ac urut pain na xijein cidade ma'. Mileto na wixinain. ¹⁶Om ca mama' urut pain Éfeso, xi om ne ca noc inain ca momon to to xin Ásia ca' ara caparut Paulo ma'. Coromicat ca' na: Mo ta mama' xin Éfeso ma', om ta na capari' pain ca tan' mama' hap xin Jerusalém quem, ac i ma' na ca coromicat nucun. Wara tan' mama' xi'. Am na capari' pain ca tan' ca' xin oro ca tomi' querec te wa pain xec nein Pentecostes ta na ca coromicat nucun.

¹⁷Tan' mama' iri urut pain Mileto ne, tomi' ac con na wari' Paulo. Mao rain Éfeso cain, mo'o roron co querec wet nonon co cut in xucucun pain ca howa cocon Jeju cwain ta non. Mao ac ca na, mo'o ac tococwa na. ¹⁸Maqui' iri nana ne, tomi' ac tococwa na: Taxi' mahu' pain ca xut xo' ne pain ca pe ho' qui' xuhu' pane. Querec mahu' pain oro carawa ca ara ta' pain oro xijein xec pahu' pain ca xo' wa' qui' tain Ásia pain cara pane. ¹⁹Tama' to' i'ina paxi' nanapa' oro taramaxicon nucucun oro win ma' ta' pain ca judeu ta' ca', pain ca tama' to' pa' xim cacapa' pane. Ane momon taramaja mi' ton Taramaxicon nexi' ne. Om ca taramaja xec xec ta'. Aca ho' aca ho' ina pain ca xiram pa' xuhu' pane. ²⁰Taxi' mahu' pain ca pijim' hwet xuhu' pain capijacon Iri' Jam pane. Om ca joc xim camain' xuhu' pain oro capijacon ca quep xiho' nuhu'. Ca' na pe inuhu' pain ca cut in to nuhu', ca' na pe inuhu' pain oro xuruhu' ma' quem. ²¹Hu hu pi' pin inonon oro wari' quem, co judeu nana ma', co om judeu nana ma' quem. Na e' na pain ca coromicat ni hwe, an to pin jein ca caracat nuhu', tomi' hwet jun pain Iri' Jam quem inonon. Howa jun Taramaxicon nexi' Jeju ta inonon quem.

²²Mao ho' tain Jerusalém ta, xi om ne ca mao rain i cain ara capa' Tamataracon Iri' Jam ta ac tococwa na. Om ca taxi' tain carawa ca ara ton napa' pain i cain quem. ²³Taxi' e' inain Tamataracon Iri' Jam pain ca tama' tomi' xo' capa' pain oro xijein cidade ma'. Tao' pe teterec, to' i'ina teterec, mija tara ca jain jain ma ta napa'. ²⁴Je i ma' ira ina ta. To' pa' ma' tatarapa' ne ina. Om ca xiram pa' xije. Ma' xica' pe na carawa ca param ta' ca', param e' inain ca ara ara pi' pin wa ca taramaja ne ca ara ra capa' Taramaxicon nexi' Jeju cwa', pain ca pijim' mi' roron pain capijacon Iri' Jam oro wari' ta capa' pane. Je ca tomi' xuhu' ca', tomi' hwet toton pain capijacon Iri' Jam oro wari' ta. Tomi' hwet toton pain ca xiram pa' capari'

Iri' Jam ta. Om xi xiram pa' capari', xi awi iri' ta. Ane xiram pa' e' capari' ne.

²⁵ Taraju wet ho' xine ta ac tococwa na. Wahu' ma', pain ca taraju mahu' pain ca pijim' hwet xuhu' pane, pain ca pijim' hwet xuhu' con Iri' Jam pain ca taramaxicon pe ho' xim capari' ca', om ta querec mami' mahu' ta. Taxi' ina, om ta querec mami' mahu'. ²⁶ Je ca tomi' xuhu' ca', tomi' iri'o' inuhu'. Wari' co taraju paxi' napa' pain ca pijim' tain capijacon Iri' Jam ma', mo ta om howa ca, mo ta mam' mi' pin cain ca caracat nucun ma', om ca wata' ne co em' con, xi param mi' ton pain ca mam' mi' pin wa pain ca caracat nucun ta. Wirico pan co param nain ta. ²⁷ Xi joc xim xuhu' pain oro ca param nucun Iri' Jam ta.

²⁸ Ma' tara xumuhu' me, ara xite xujuhu' pain ca xuruxut xo' hwe ma' ac tococwa na. Querec wet jujun oro wari' co howa nonon Jeju pain Éfeso ma'. Win ne ca querec wet jujun ta cuhu' Tamataracon Iri' Jam ca'. Ac oro ovelha nuhu' ara xi' nana. Ac pastor co querec wet taxipa' nain winacon je, querec wet jujun, pa' mi' jujun pain ca cut in xucucun pain ca wari' nucun Iri' Jam caca ma'. Mam' to' witan ara xi' tata pain quicon Panxica pane ta.

²⁹ Taxi' inuhu' pain i ca' quem ac tococwa na. Paca' iri xuhu' ne, corom hwet ac cucuhu' tara oro wari' co pijim' pan teretem xim nunuhu'. Ac orotapan tatara. Quep em' tuturuhu', om ta xiram pa' camain' cucuhu'. Win ne ca om quep em' xiram pa' xine ovelha ma', ac i ma' tatara co aram aram corom hwet xim nunuhu' ta. ³⁰ Ac i ma' tatara iri' win ma' nuhu' pain ca howa hun Jeju ma'. Main maqui' tara xec nein ca pijim' mixein xim cucuhu' ma'. Mixein tuturuhu', howa jein ca tomi' urut pahu' ca', ja' ja' xut ta tuturuhu', ja' ja' ac cocon tara co howa nonon Jeju. ³¹ Je ca ma' tara xumuhu' me xuhu' ca'. Mam' pe wet xine pain ca hu tamana qui' xuhu' pane, ma' 3 na cawaxi' pain ca hu hu xam' xuhu' pane, pain xec je pain xim quem. Xiram pa' inuhu' pane, aca ma' ina pahu' pane.

³² Je ca tomi' xuhu' ca' ac tococwa na. Tomi' mi' inuhu' con Iri' Jam. Querec wet roron me inon pahu'. Mi' roron pain ca howa cara cacain capijam ca tomi' hwet naparut pain ca xiram pa' pan maparut ta inon pahu'. Mo ta howa cara hwein capijacon Iri' Jam ca pijim' hwet xuhu' pane, to' hwara' opa ac cuhu' tara, aram aram mi' ac cuhu' tara pain oro ca param nucun ca an to xo' mi' cuhu' ma', ca mi' xun tococwa oro wari' nucun co to' hohot ca cwa'.

³³Om ca querec param camain' tain dinheiro nuhu' pane, womuhu' ma' quem, om ca querec param camain' ton pane ac tococwa na. ³⁴Taxi' mahu' pain ca taramaja pan ta' pane. Cut pan inain dinheiro ne, ma' ta cut tain carawa ca cao' wa je oro carawa ca param ta' ca' ina pane. Cut mi' inonon pain oro win ma' ta' quem. ³⁵An hwet mi' inuhu' pain oro ca taramaja tamana ne pane, ma' ta win ca ne mahu' ta inuhu' pane. Na e' na pain ca taramaja tamana iri' ta, ma' ta ma' capari' oro carawa ca mam' quep xihó' xuxun oro wari' co ximin nana ma'. Mam' pe wet xin ca tomi' nucun Taramaxicon nexi' Jeju pane quem. Tomi' ca' na pane: Tomi' querec te paxi' iri' pain ca cut xin carawa. Ane tomi' querec te tamana pan iri' pain ca cut mi' tiquin' xin ne, ac i ma' na ca tomi' ca pane. Je i ca' ca tomi' xuhu' ca'. Ac i ma' na ca tomi' cocon Paulo pane.

³⁶Pi' pin iri na ca tomi' nucun ne, pi'am to xi', tomi' xun Iri' Jam ac ca na, torotop pe ac ca na, torotop to torotop to pi' pin nana. Tomi' ac con Iri' Jam na. ³⁷Awaran tamana nana quem, awaran awaran pi' pin nana. Pe horoman tapan' nonon, xup xup ac cocon na pain orocoxicon quem. ³⁸Tomi' xaxa' tamana nana. Xi om ne ca tomi' ara tococwa pain ca om ta querec mami' mahu' ta tococwa ma'. Ja' ja' mao ac cocon na pain mam' horoho wa ma'.

Ca mama' xin Jerusalém urut

21 Mama' urut ta iri urut cocon caram ma' ne, co querec wet nonon co howa nonon Jeju pain Éfeso ma', corom mama' ac urut pain na mam' horoho wa ma'. Horoho mama' ac urut pain na xixi pan nein macan' Cós ma'. Xec pin iri na ne, horoho tiquin' mama' ac urut na. Horoho horoho hwet ac urut pain na xijein xixi pan nein macan' ma', Rodes ma'. Paca' ac urut pain na Rodes ma', horoho horoho hwet ac urut pain na Pátara ma', je i ma' wixinain cidade ca hwet urut. ²Je ca mam' pe urut pain wirain mam' horoho wa ca mao tain nain xijein macan' ma', pain Fenícia ma'. Corom mama' ac urut pain na, horoho mama' ac urut na. ³Horoho horoho querec pira ac urut pain na xixi pan nein macan' ma', Chipre ma'. Tiquin' ca' ac urut pain na, horoho horoho hwet ac urut pain na Tiro ma', je i ma' wixinain cidade ca pe nain xijein macan' ma', Síria ma'. Piri' mama' ac urut na. Waximain mam' horoho wa ca to urut ma', cut piri' to tain na pain Tiro oro caramaji mam' horoho nucun. ⁴Pirao' xuxun xerexi' co to nanain Tiro

ca' ac urut na, pira'o' pira'o' mam' ac urut cocon na, to ho' ac urut cocon na. Ma' 7 na xec pain ca to ho' urut cocon. Xerexi' co to nanain Tiro ma', an hwet mi' tata pain carawa ca ara ton non Paulo pain Jerusalém ma'. Je Tamataracon Iri' Jam ca an hwet mi' nonon pain. Je ca hu cocon quem. Ta mao main Jerusalém me ta paxi' nonon. ⁵ Ane om ha' cocon Paulo ne. Maqui' iri na xec nein ca tiquin' mama' xi' urut ne, mama' xi' urut ta ac urut na, ja' mama' ac cacaparut na pain wanaji cacarain com quem. Ja' ja' ja' ja' pi' pin nanaparut, wiricoco pain ca tarama' nucucun ma', jicocon mana panxicaca cacam mana panxicaca ma' quem, ja' ja' ac cacaparut na quem. Torotop to ac urut na pain caramaxut ma', pain cacarain com ma', tomi' ac urut con na Iri' Jam. ⁶ Mama' urut ta ac urut cacam na, je i ma', mama' je e' ac cacaparut na. Corom mama' ac urut pain na mam' horoho wa ma', in mama' ac cacamain na xiricacam.

⁷ Paca' iri urut pain Tiro ne, horoho tiquin' mama' ac urut na. Horoho horoho hwet ac urut pain na xijein cidade ma', Ptolemaida na wixinain. Piri' mama' iri urut ne, hwet ac urut cocon na oro xerexi'. Maqui' urut, maqui' hwe ra ac cacaparut na. Xica' pe na xec pain ca to ho' urut cocon. ⁸ Xec pin iri na ne, paca' ac urut cocon na, xuruxut xuruxut tan' mama' ac urut pain na xijein xirim ma', Cesareia ma'. Hwet ac urut con na Filipe ma', to ho' ac urut con na pain xiricon. Filipe ma', pijim' hwet taxipa' nain capijacon Iri' Jam con Jeju. Wirico Filipe co to' 7 nonon oro win ma' ca co cut mi' taxipa' nonon pain carawa ca cao' wa oro xerexi' pain Jerusalém pane quem. ⁹ Ma' 4 nana mana panxica ma'. Om om wet nanam tarama'. Tomi' hwet taxipa' nanain capijacon Iri' Jam ca an hwet mi' cacam Tamataracon ma'.

¹⁰ Om ca tocwan homa ne xec pain ca to ho' urut con Filipe ma', maqui' ac cain Judeia na wari' co tomi' hwet taxipa' nain capijacon Iri' Jam ca an hwet mi' con Tamataracon Iri' Jam. Ágabo na wixicon. ¹¹ Hwet ac caparut na, an ca' ac con na pain cinturão nucun Paulo. Mam' pao' pe pan ac xucun na pain caximacon pain micon. Tomi' ca' na Tamataracon Iri' Jam ta ac ca na. Ac i ma' tara ca pao' pe tocwa waximain cinturão ca'. Pao' pe totoron oro taramaxicon nucucun oro judeu pain Jerusalém. An mi' ac tococwa con tara co om judeu nana ta. Ma' ta tao' pe cocon ta totoron na ca tomi' ca Ágabo ma'.

¹² Taraju iri urut pain ca tomi' nucun ne, tomi' ac urut con na Paulo, tomi' mip urut con. Ta mao main Jerusalém me urut con. Warut cocon

oro xerexi' co to nanain Cesareia ma', tomi' tomi' pi' pin paxi' urut con. ¹³Ane tomi' in pin caparut ne. Para tomi' ac i ma' mahu' quem? Para ja' naro xim mahu' pain ca awaran nuhu' ma' quem? Je i ma' ira ina ta. Hohot napa' pain ca pao' pe xim cacapa' pain Jerusalém ma', hohot napa' pain ca to' pa' pin xim cacapa' pain ca taramaja mi' ton Taramaxicon nexi' Jeju ma' quem, ac i ma' na ca tomi' in pin caparut. ¹⁴Querec pin' iri urut con pain ca om ha' caparut pain ca tomi' mip urut con ne, tomi' tomi' om ac urut con na. Je i ma' ta, param e' urut pain ca param pan nucun Iri' Jam ta ac urut na.

¹⁵Cut xo' ac urut pain na caramajuxut, maji pain Jerusalém ta ac urut na. ¹⁶Ma' nana xerexi' co wari' nein Cesareia ma', co joc tan' pin nanaparut pain Jerusalém ma' quem. Joc tan' nanaparut pain xiricon Mnasom. Je tara ca pi'am to hwe ma', pain xiricon Mnasom cwa' nanaparut. Wari' nein xixi pan nein Chipre na Mnasom ma'. Wara howa non Jeju pane. Pain cara pane, pain ca xo' howa ten qui' tocwa Jeju pane, je ca howa pin ca Mnasom pane.

Ca tomi' xo' xucucun Paulo con Tiago

¹⁷Tan' mama' iri urut pain Jerusalém ne, tomi' querec te ac cacaparut na oro xerexi'. ¹⁸Xec pin iri na ne, maji tomi' xun Tiago ta ac caparut na Paulo, ja' ja' ac urut con na. Wara cut in cut in pi' pin xucucun oro xerexi' co querec wet nonon co howa nonon Jeju ma'. ¹⁹Maqui' ma, maqui' ina ta ac xucucun na, tomi' hwet tomi' hwet pi' pin ac tococwa na pain oro ca ara pan ca Iri' Jam pane, pain ca quep xiho' con pain ca taramaja nucun pain ca pijim' hwet tococwa pain capijacon oro wari' co om judeu nana pane.

²⁰Taraju iri nanain ca tomi' nucun ne, tomi' querec te ac caca na. Awi tamana na Iri' Jam ta nana. Tomi' ac cocon na Paulo: Taxi' momon oro win ma' nexi' pain ca judeu iri' ca', taxi' momon pain ca howa cocon Jeju quem. Mija nana, om ca paric camain' caca. Tomi' ha' tomi' ha' pi' pin nanain ca xirao' nucun Moisés quem. Om ca an to camain' cacain. ²¹Taraju nanain xaji' pum quem. Ca' nana co xina nana pum: Pijim' pan tem na Paulo ta nenem. Pijim' pan tem tata oro win ma' nexi' pain ca judeu iri' ca' nenem. An pe pin jein ca xirao' nucun Moisés ta. Ta wac xirac hwein taparinain ca xirac nucucun mana panxihwe me, ta an xiho' mami' huhun oro hwanana nexi' me ta, pijim' ac i ma' pijim' ac i ma' pi' pin tata oro win ma' nexi' co

to ho' nonon co om judeu nana ma', ac i ma' na ca xina caca pum. ²² Cain' cain' xixi' cocon quem ac cocon na. Taxi' ho' tetere pain ca maqui' nem ca' quem. ²³ Je ca tomi' urut pum ca', tomi' ha' xut pain ca tomi' xim urut pum ca' ac cocon na. Ma' 4 nana xerexi' cwa', co ara ho' xin nanain ca wara tomi' pe pin cocon Iri' Jam pane. ²⁴ Ja' ja' roron pain ca mama' xin cacain cote ne xiricon Iri' Jam ma', pain ca hohoc xo' xi' xucucun pain com. Ara wi ra cocon, cut mi' pan ac momon pain tara carawa ca tom tain' mi' querec te xi' caca ma' quem. Ma' ta na cocon pain ca wijac pin cacain tununucucun. Mo ta ara wi ac i ma' ma cocon, querec pin' ac quequem tara oro win judeu iri' ma'. Querec pin' tetere pain ca om iri'o' ne oro xaji' ca taraju caca pum. Querec pin' tetere pain ca xut xo' ma ma', je pain ca tomi' ha' pan main ca xirao' nucun Moisés ma' quem. ²⁵ Je ca tomi' urut pum pain ca win judeu iri' ca'. Ane tomi' ni urut cocon co howa pin nana pain ca om judeu caca ma' quem. Wara xirao' mi' urut cocon pain carta pane, xirao' mi' urut cocon pain ca tomi' xo' xujuxut pane. Na e' na pain ca ein hwein carawa ca mi' querec te xine pain oro caji pacun ca Iri' Jam xi' ma wa, na e' na pain ca ein hwein quinain carawa, je pain ca ein hwein cwerein carawa ca juhumi' pa' xine quem urut cocon. Ta quep hwem xequem narima' me, oro narima' ma' quem, quep e' tataram waram taxicacam quem, ac i ma' na ca xirao' mi' urut cocon pane. Ac i ma' na ca tomi' xo' cocon Paulo oro xerexi' co querec wet nonon co howa nonon Jeju ma'.

²⁶ Ma ac ca na Paulo. Xec pin iri na ne, maji ta ac tococwa na caram ma' co ara xin nanain ca wara tomi' pe pin cocon Iri' Jam ma', hohoc xo' xixixi' pain com ta ac xucucun na. Mama' ac cacain na cote ne xiricon Iri' Jam ma', tomi' xo' ac tococwa na oro sacerdote. Pi' pin iri tara oro xec pain ca hohoc xo' xujuxut ca' ne, in qui' ac urut tara, an an xam' ac urut pain tara carawa ca mi' querec te tocwa Iri' Jam parut ta, ac i ma' na ca tomi' xo' xucucun ma'.

21.24 Je curucucun oro judeu pane, pain ca tomi' ha' cacain ca xirao' nucun Moisés, je pain ca tomi' pe mi' cocon pain oro carawa Iri' Jam pane. Tomi' pe mi' iri nonon pain capijacocon ne, ara xin ta ac caca na. Maqui' pa' iri nonon xec nein ca wara ara pin cacain ne, mama' ac cacain na cote ne xiricon Iri' Jam, hohoc xo' ac xucucun na pain com. Ma' ta querec hohot capari' Iri' Jam ta nana. Tom tain' querec te mi' iri nonon pain carawa Iri' Jam ne, wijac pin ac cacain na tununucucun, querec pin' ac tococwa na pain ca ara ara pi' pin cacain ca wara tomi' pe cocon Iri' Jam quem.

Ca quep cocon Paulo

²⁷ Pi' pin ta' iri na oro xec pain ca hohoc xo' xucucun pain com pane ne, querec ac cocon na Paulo oro judeu co maqui' nanain Ásia. Querec pe nonon pain ca tao' caho' nein cote ne xiricon Iri' Jam. Ja' teretem ac tococwa na oro wari' co to nanain i ma' quem. Mija nana wari' co ja' teretem wawa ma'. Quep ac cocon na Paulo. ²⁸ Merem ac caca na: Quep xiho' xut ta oro ca nari nuxut pain ca wari' nein Israel hwe ma'! Quep xiho' xut con co cwa', co pijim' pan tem nonon oro wari' pain oro xijein macan'. Tomi' napat napari' pain ca judeu iri' ca', tomi' napat nain ca xirao' nucun Moisés, tomi' napat nain cote ne xiricon Iri' Jam ca' quem. Om ca xica' pe ne ca tomi' napat ca ma', o corom qui' tata pain ca tao' caho' nein cote ne xiricon Iri' Jam oro wari' co om judeu nana ma' quem. To' em' pin ac cain na iri' ca pe pan ca Iri' Jam ca' quem, ac i ma' na ca merem caca ma'. ²⁹ Merem ac i ma' nana, xi om ne ca wara querec ara cocon Trófimo ma', co wari' nein Éfeso ma'. Querec nonon pain ca xut wi ca con Paulo pain ca xuruxut in to cacain oro wanaji Jerusalém ma'. Querec iri nonon Paulo pain ca pe cain ca tao' caho' nein cote ne xiricon Iri' Jam ne, coromicat ximama' ac caca na: He! O corom qui' toron tatirim pain cote ne xiricon Iri' Jam ta nana, o corom qui' toron pain ca tao' caho' nein ta nonon.

³⁰ Ca merem merem caca ma', ca ja' teretem ja' teretem pi' pin ac tococwa na oro wari' pain Jerusalém ma'. Mija nana wari' ta. Jein hwet ac cocon na Paulo ma', quep ac cocon na. Coc ororo coc ororo an hwet ca' ac cocon na pain ca tao' caho' nein xiricon Iri' Jam ma', tao' pa' hap ac cacain na cote ne manain quem. ³¹ To' pa' pin xun ta nonon. Taraju ac ca na comandante nucucun oro soldado co romano nana ma'. Teretem teretem pi' pin nana oro wari' pain Jerusalém ta non wari'. ³² Maji cocon ta ac tococwa na oro taramaxicon cocon oro soldado nucucun ma', jein hwet hap ac tococwa na oro wari' ma'. Jein hwet tata pain ximijacocon. Querec iri nonon comandante cocon oro soldado nucun ma' ne, to' to' om pin ac cocon na Paulo.

21.27 Hohoc xo' cain' xucucun, mon to wet ac caca na. Ca' na ca tomi' tococwa: Na e' na pain ca winim' cain' hwein ca pi' pin nein oro xec pain ca hohoc xo' xujuhu' pain com pane. Ma' 7 tara oro xec ca winim' hwe ta tata. Pi' pin iri tara oro xec nein ne, hohot ac ne tara pain ca caraho' querec te mi' hun pain carawa Iri' Jam ta tata.

³³ Mo hwet ac con Paulo na comandante ma', quep ac con na. Pao' pe jun pain arain too, ma' 2 tara arain too ta ac tococwa na oro soldado nucun, pao' pe ac cocon na. Tomi' querec ac tococwa na oro wari' ma': Cain' ca wari' ca co cwa' co to' hwe cwa'? Ma' carawa ca ara ca quem ac tococwa na. ³⁴ Mija na ca teretem caca oro wari' ma'. Merem ximama' e' nana, merem ni merem ni ca' xucucun. Taxi' xitoton pain ca mana' nucucun na paxi' na comandante ira. Ane om taraju pa' ac tococwa ne, xi teretem ara caca ta. Je ca tomi' tococwa oro soldado nucun ma': An corom mao jun pain xirim ca to iri' ca' tata. ³⁵ O corom mao ac cocon na. Hwet iri nanain ca piri' piri' ac wa ma' ne, na e' na pain ca an mamam' piri' mao cocon Paulo pain xirim ma'. Xi xao xao ara cocon oro wari' pain ca to' to' cocon ma', pain ca to' pa' pin xun paxi' cocon ma'. Mija ara xi' na ca mana' caca oro wari' ta. ³⁶ Merem merem tiquin' nana oro wari' co ja' ja' nonon ma' quem. To' pa' pin jun, to' pa' pin jun ta nana pain ca merem nucucun.

Ca tomi' pan ton cocon oro wari' Paulo

³⁷ An mamam' corom mao xun iri nonon Paulo pain xirim ca to caca ma' ne, tomi' pan ac ca na, tomi' non comandante ma', tomi' non pain capijacocon oro grego. Tomi' xim inem quem non.

He! Tomi' taxi' main capijacocon oro grego ra ac con na. ³⁸ Om ca wum ne co wari' nein Egipto co ja' teretem nonon oro wari' pane, co o mama' 4.000 nonon oro win ma' ca co to' parapa' taxipa' nana wari' pain cara pane ra? Wirico xi' ma inem ta non.

³⁹ Om na, judeu ina ta ac ca na Paulo. Maqui' inain Tarso, je ca pan' pe ta' pane. Cote ne cidade na Tarso, hwara' opa nana oro wari' nein. Ta nain ho' mapa' pain ca tomi' xo' toton oro wari' co mana' nanapa' cwa' na ca tomi' con comandante Paulo ma'.

⁴⁰ Ma ac ca na comandante ma'. Xat pe ac cain tamain piri' piri' ac wa na Paulo ma' quem. An piri' ac cain na micon. Tacana to je, tomi' xuhu' ta tata oro wari' ma'. Tacana to iri nana ne, tomi' pan ac cocon na pain hebraico, je i ma' wixinain capijacocon oro judeu.

Ca tomi' xo' cocon oro wari' Paulo

22 Taraju wet xine me xere cocon waram te ac ca na Paulo. Taraju wet jein ca tomi' xo' xuhu' ca', pain ca tomi' caho' xije pain ca tomi' em' mahu' ca' tata.

²Wara tacana to paxi' nana. Tacana to mip nana pain ca taraju cocon pain ca tomi' cain iri' capijacocon ma', pain hebraico ma'.

Tomi' ac ca na Paulo: ³Judeu ina ta. Pan' pe inain Tarso ca pe nain Cilícia ma', je i ma' wixinain macan' ca pan' pe ta' pane. Pan' pe paxi' inain Tarso pane, ane hwara' pe tain Jerusalém ca' ne. Wirico Gamaliel na co ca' na napa' pain capijacon Iri' Jam pane. Ca' na ca' na xam' napa' pain oro ca xirao' nucun Moisés ca tomi' ha' caca oro hwanana nexi' pane. Win xumu taxipa' inon Iri' Jam quem, tomi' ha' taxipa' inon. Win hwe ma', pain ca win xumu taxipa' hun ma'. ⁴Je ca ja' tequi' quep em' toton oro wari' co howa nanain ca pijim' wa con Jeju pane. Tama' to' parapa' xitoton na ina pane. Ca tarama' nucucun, ca narima' nequequem ma' quem. Pao' to iri' inanam ne, wara ca' na xirinain ca tao' to tao' to to wa ma', tao' to ac tacacama na. ⁵Taxi' napa' sacerdote co iri' taramaxicon ma', cocon oro taramaxicon nexi' co cut in taxipa' xucucun pain ca Sinédrio caca ma'. Iri'o' na con ta tuturuhu' pata'. Mi' nanapa' pain oro carta ca xirao' mi' cocon oro win judeu iri' co to nanain Damasco pane quem. Ma' ta taxi' quequem pain ca quep roron co howa nonon Jeju ta pan urut pum ca', ac i ma' nanapa' pain ca mi' cacapa' pain carta nucucun. Je ca mao tain Damasco pane. Quep toton, pao' to toton, cut in qui' ac toton tara pain Jerusalém ca' ina pane. Ma' ta wap tococwa ta ina pane.

Mao ac ta' na pane. ⁶Mo mo mo, wixicam pin iri' inain Damasco ne, pain iri' tocon xina ma', ane ane joc xec pa' ac capa' na naran. Joc xec qui' nain pawin. Joc xec joc xec mam' pin napa' quem. ⁷Pan' mao ac tain na macan'. Taraju ac tain na ca tomi' wa. Tomi' ac capa' na: Saulo. Saulo. Para quep em' mapa' ma' Saulo napa'.

⁸Cain' ca wari' ma' quem Taramaxicon ne ac ta' na.

Jeju ina, co maqui' nain Nazaré pane napa'. Wata' co quep em' ma ma' ac capa' na quem.

⁹Querec paxi' nanain naran oro win ma' ne co ja' ja' nanapa' ma', ane om taraju pa' cacain capijacon co tomi' napa' ne.

¹⁰Cain' cain' xita' quem Taramaxicon ne ac ta' na.

Tequi' pe ra ta, mao rain Damasco ma'. Ma' pe nain i cain wari' co tomi' xo' xim nem pain oro ca ara ra quem Iri' Jam ma'. Ac i ma' na ca tomi' capa' pane.

¹¹ Om pin napa' tucu, xi joc xec mi' ara capa' naran ta. Je ca coc papan cacapa' oro win ma' ne co ja' ja' nanapa' ma'. Coc papan wa' mao nanapa' pain Damasco.

¹² Pe nain Damasco wari' co win xumu nain ca param nucun Iri' Jam ma'. Tomi' ha' taxipa' nain ca xirao' nucun Moisés. Querec pin' querec pin' pi' pin nonon oro win judeu iri' co to nanain Damasco pane. Xut xo' nana ta nonon, xi om ne ca querec pin' ara cocon pain ca xut xo' nucun ta. Ananias na wixicon. ¹³ Hwet ac capa' na Ananias, xat pe ho' ac capa' na. Querec mami' ra ta xa' Saulo, ac i ma' na ca tomi' capa' ma'. Ane ane querec pin' ac ta' na, ha' napa' pain ca querec ton quem.

¹⁴ Tomi' ac capa' na: Tora' nem Iri' Jam co howa caca hwanana nexi' cara pane. Mi' ton pain ca taxi' cain oro ca param ne nem, mi' ton pain ca querec con Panxita' co tama' ara xo', mi' ton pain ca taraju cain iri' ca tomi' nucun ta nem quem. ¹⁵ Tomi' hwet ne cocon oro wari' ta ara xi' nem. Tomi' hwet tomi' hwet xam' roron pain oro ca querec ma pata', je pain oro ca taraju ma pata' quem nem. ¹⁶ Je ca tomi' xim ca' ac capa' na: Para hehe ma ma'? Hap ra, tequi' pe ra, an hwet rain ca howa nem pain ca ja' ma com ta. Hohoc pin ne pain ca caracat ne ta ron Jeju quem. Ac i ma' na ca tomi' capa' Ananias pane.

¹⁷ Aram aram in qui' ac tain na Jerusalém pane. Mo tomi' pe ton Iri' Jam pain cote ne xiricon ta ac ta' na. Tomi' tomi' ca' inon, tohwein' ac ta' na quem. Ac ca tohwein' ta' na, om paxi' na ca pi'am ta', querec ina. ¹⁸ Ac ca querec ton na Taramaxicon ne Jeju. Hap ra ac capa' na. Paca' hap rain Jerusalém ca', xi howa je na caca oro wari' cwa'. Om ta howa quequem pain ca tomi' hwet mapa' cocon ta napa'.

¹⁹ Cain' cain' xirara ne ac ton na. Taxi' paxi' nanapa' pain ca corom corom tain oro xirim ca cut in to xujuxut pain ca judeu urut pane. Taxi' paxi' nanapa' pain ca quep toton co howa nenem, taxi' nanapa' pain ca wap wap toton quem. ²⁰ Taxi' paxi' nanapa' pain ca xat pe ho' toton co to' pa' pin nonon Estêvão cara pane, co tomi' hwet taxipa' nem pane. Taxi' paxi' nanapa' pain ca hohot capa' ca mi' pin nucun, taxi' paxi' nanapa' pain ca cut in xo' ton womicocon co to' pa' pin nonon quem. Je xi howa cacapa' pain ca tomi' hwet toton pum quem? Ac i ma' na ca tomi' ton Jeju pane.

²¹ Om na ta ac capa' na. Mao ra, mao rain pira inem. Tomi' hwet ne cocon oro wari' co om judeu nana inem ta napa'. Ac i ma' na ca tomi' cocon oro wari' Paulo ma'.

²² Taraju wet taraju wet ca' nonon oro wari' ma'. Taraju iri nonon pain ca tomi' hwet ne cocon oro wari' co om judeu nana inem ta capa' Jeju ta ca ne, merem tamana ac caca na. Merem merem pi' pin nana: To' pa' pin xun, to' pa' pin xun. Om ca na camain' ne pain ca e' ca co cwa' ta na ca merem nucucun.

²³ Ca merem merem caca ma', ca horohot joc xococo cocon iri' curucun womicocon ma', ca wixicaracao' piri' cacain tajain macan' ma' quem. ²⁴ Tomi' ac ca na comandante: O corom mao jun pain xirim ca to iri' ca' ac tococwa na oro soldado nucun. Wap jun ta, ma' ta tomi' hwet capari' pain ca ara ca ma', ca para merem merem caca oro wari' cwa' quem ac tococwa na. O corom mao ac cocon na. ²⁵ Pao' pe ac cocon na pain macon, ma' ta wap xun ta nonon. Tomi' pan ac ca na Paulo, tomi' non taramaxicon nucucun oro soldado co xat pe nain i ma'. Hohot na pain ca wap mahu' pain ca romano ta' ca' ra? Xi wap jun wari' co romano ta xihwe ta non.

²⁶ Taraju iri nain i ma' taramaxicon ma' ne, pain ca romano ina ta ca Paulo ma', mo hwet ac con na comandante. Cain' cain' ton ma quem? Xi romano ina ta ara ca ta na ca tomi' con ma'.

²⁷ Mo hwet pan ac con Paulo na comandante ma' quem. Iri'o' na ca romano ma ma' non.

E'e'. Romano ina ta ac ca na Paulo.

²⁸ Na ra ac ca na. Pagar inonon pain cote ne dinheiro oro taramaxicon pane, romano pin ac ta' na quem na comandante ma'.

Ane wara romano capa' te pane ne. Je ca romano mi' ta' pain ca xo' pan' qui' ne pane na Paulo.

²⁹ Taraju iri nanain i ma' oro soldado co wap xun nonon Paulo ma' ne, coco' hap ca' ac cocon na. Jin' pin na comandante ma' quem, xi om ne ca taxi' pin ara con Paulo pain ca romano ca ma'. Om xi pao' pe jun toton, xi romano ara ca ta xucun.

22.26 Tomi' ca' nana oro taramaxicon nucucun oro romano pane: Pan teretem iri nana oro tatirim ne, hohot na pain ca wap tococwa, ma' ta tomi' hwet cacapari' pain carawa ca ara caca ma' nana. Ane om na ne pain ca wap hap tococwa co romano nana ne, pain ca om querec pin' xo' tococwa pain ca em' nucucun ma'. Querec pin' iri tata pain ca em' nucucun ne, hohot ac ne na pain ca wap tococwa, ac i ma' nana oro taramaxicon nucucun oro romano pane.

Ca tomi' xo' cocon oro taramaxicon Paulo

³⁰ Para mana' cocon Paulo oro judeu cwa' ne na comandante ma' quem. Para tomi' em' cocon ne, ac i ma' na ca coromicat nucun. Xec pin iri na ne, tomi' ac tococwa na oro soldado nucun: Tacom' pin jun Paulo ta tata. Cut in xujuhu' quem ac tococwa na oro taramaxicon nucucun oro sacerdote cocon oro taramaxicon co cut in xucucun pain ca Sinédrio caca ma' quem. Cut in iri xucucun ne, o qui' jun Paulo ma' quem ac tococwa na. Mon cwa' ta ac tococwa na oro taramaxicon.

23 Paulo ma', noro tamana ac cocon na oro taramaxicon nucucun oro judeu ma', co cut in xucucun pain ca Sinédrio caca ma'. Tomi' xim inuhu' ta xere ac cocon na. Tama' tomi' ha' iri'o' inon Iri' Jam pain iri' xumu pain ca taramaja mi' ton ca' na ca tomi' tococwa ma'.

²Wap jein capijacon ta ac ca na sacerdote co iri' taramaxicon ma', Ananias ma'. Tomi' tata co coco' ho' nonon Paulo ma' quem, wap ac cacain na.

³Tomi' in pin pan ac con iri' taramaxicon na Paulo ma' quem: Ac ca iri'o' ta' ca' tara me ma ra? Wap pan terem Iri' Jam ta. Tomi' ha' inain xi' ma main ca xirao' nucun Moisés pain ca tomi' querec xim mapa' ra? Je xi om wap jun momon pata' quem? Xi wap hap ron wari' pain ca om querec pin' cain' tocwa pain ca pan tem wa ta quem ca xirao' nucun Moisés ta non.

⁴He! Om ca tomi' xirac jin' mon sacerdote co iri' taramaxicon ma ra ac cocon na co coco' to ho' nonon ma'.

⁵Na ra ac ca na Paulo. Om ta sacerdote co iri' taramaxicon ca ma' inon ira xere. Mo xi querec pin' ton, om xi tomi' ac i ma' ton ta. Xi xirao' pe ara xine pain capijacon Iri' Jam: Ta tomi' napat mon wari' co taramaxicon pe ho' nem me ta napari'. Ac i ma' na ca tomi' ca ma'.

⁶Paulo ma', querec pin' nonon caram ma' co cut in xucucun pain ca Sinédrio caca ma'. Ma' nana co saduceu nana ma', ma' nana co fariseu nana ma' quem. Je ca merem mip ca ma': Fariseu ina ta xere. Fariseu na te cocon waram jeo' pane quem. Howa inon Iri' Jam pain ca main to' e' mami' toton cocon oro wari' co wara cono' nana pane. Je ca tomi' querec xim mahu' ca' na pain ca merem mip tococwa ma'.

⁷Tomi' iri nain i ma' Paulo ne, tomi' caracan ac xucucun na oro fariseu cocon oro saduceu ma'. Mija na ca mana' xucucun pain ca tomi' caracan xucucun ma'. Xi coromicat ni ca' ara xucucun pain ca to' e' mami' tococwa

co wara cono' nana ta. ⁸Coromicat ca' nana oro saduceu ma': Om ta e' mami' caca co wara cono' nana ta nana. Om nana oro jam co taramaja mi' nonon Iri' Jam, om na tamataraxi' quem ta nana. Oro fariseu ma' iri nana ne, coromicat ni nana quem. E' mami' tatara co wara cono' nana ta nana, ma' nana oro jam co taramaja mi' nonon Iri' Jam, ma' na tamataraxi' quem nana.

⁹Mija na ca teretem caca pain ca tomi' caracan xucucun. Ca teretem caca ma', ca teretem caca ma', tequi' to ac caca na co ca' na taxipa' nanain ca xirao' nucun Moisés. Fariseu nana. Tomi' mip ac caca na: Om ca mam' camain' urut pain ca pan tem wa con co cwa' ta! Am iri'o' ne ca tomi' nucun, am tomi' con jam, am jam co taramaja mi' non Iri' Jam ca con, am wirico co tomi' non pane, ac i ma' na ca tomi' caca ma'.

¹⁰Ca tomi' in pin xucucun ma', ca tomi' in pin xucucun ma'. Mija na ca tomi' caracan xucucun pain ca mana' caracan xucucun ma'. Cuc tapiripit pin totoron Paulo xi' na comandante ma' quem. Je ca tomi' tococwa oro soldado nucun ma': Quiji' hwet jun, cuc ca' jujun con, o in qui' ac hun tara pain xirim ca to iri' ca' tata.

¹¹Xim pin iri na ne, ane ane xat pe ho' ac con Paulo na Taramaxicon nexi'. Tomi' ac con na: Quereme ra, ta jin' ma me ta. Win ne ca tomi' hwet mapa' cocon oro wari' co to nanain Jerusalém ca', na e' na pain ca tomi' hwet mapa' cocon oro wari' co to nanain Roma quem na ca tomi' con ma'.

Ca tomi' xo' xucucun oro judeu pain ca to' pa' pin xun Paulo ta xucucun

¹²Xec pin iri na ne, tomi' xo' ac xucucun na oro judeu. Tomi' an pe xin ca tomi' nexi' ta. To' pa' pin xun Paulo. An to pin xin ca cao' wa je ca toc wa quem. Om ta cao' iri', om ta toc iri' pain ca om to' pa' querec xun ta. To' pa' pin iri xun ne, cao' mami' ac iri' tara, toc mami' ac iri' tara quem, ac i ma' xucucun. ¹³Om ca paric caca co to' pa' pin xun nonon ma' quem. Ma' mija nana, tiquin' ca' nanain ca 40 nucucun. ¹⁴Hwet xuxun oro taramaxicon nucucun oro sacerdote cocon oro xucucun taramaxicon nexi' ta ac xucucun na, tomi' ac tococwa na: To' pa' pin xun urut con Paulo ta. Tomi' an pe pin urut pain ca tomi' nuxut quem. Pain ca om to' pa' pin querec urut con, om ta cao' camain' urut. To' pa' pin iri xut con ne, cao' mami' ac urut tara. Mo ta om to' pa' pin urut con, quep xirac ma' tarapari' Iri' Jam ne urut ta na ca tomi' tococwa ma'. ¹⁵Je i ca' ca coromicat nuxut

ac tococwa na. Wahu' cocon oro win taramaxicon hwe pain ca Sinédrio hwe ca', tomi' jun comandante ma'. O in qui' mi' xut con Paulo me jun. Tomi' querec mami' xun pain ca pan tem nucun ta urut tara pain ca tomi' mixein hun ma'. Wara coco' ho' pan xut con pain wana pain ca o in qui' xun cocon quem. Om ta hwet querec cuhu' pain ca to hwe ca', wara to' pa' pin ac xut con tara pain wana ta na ca tomi' tococwa ma'.

¹⁶ Ane taxi' pin tococwa pain ca to' pa' pin xun cocon Paulo ne. Wirico xinacon Paulo na co taxi' pin nonon. Taxi' pin iri tata ne, mo tomi' hwet ton pain aji' e' ac ca na, mao ac cain na xirim ca to caca oro soldado ma', tomi' hwet ac con pain na cwaji' ca. To' pa' pin xim nenem ta aji' non.

¹⁷ Na ra ac ca na, hap ra ac con na taramaxicon nucucun oro soldado ma'. O mi' ron con comandante co cwa' co xo' hwara' cwa'. Ma' na carawa ca tomi' hwet ton ca ca' non. ¹⁸ Ma, hap ra ta arain ac ca na, o mi' ac con na con comandante. Tomi' napa' Paulo ma' ne, co tao' pe ma ma' ne ac con na. O mi' ron con co cwa' co xo' hwara' cwa' e' napa' pum. Ma' na carawa ca tomi' hwet xim quem ta ac con na.

¹⁹ Iri'o' ac ca na comandante ma', coc papan ac con na pain micon ma', xut to ac caca na. Ma' carawa ca tomi' xim mapa' quem arain ac con na.

²⁰ Om na, tomi' xo' xucucun oro judeu pum ne ac con na. Tomi' ca' teterem: Xec o in qui' mi' xut con Paulo me teterem. Xat pe ho' taraparut pain ca cut in to xujuxut ca', pain ca Sinédrio urut ca' teterem. Tomi' querec mami' xut con pain ca pan tem nucun ta teterem. Tomi' ac i ma' paxi' teterem, ane mixein caca ne. ²¹ Ta ha' momon me ta. Xi mija ara caca co coco' ho' nonon Paulo pain wana ta. Tiquin' ca' nanain ca 40 nucucun. To' pa' pin xun nonon quem. Tomi' ca' xucucun: An to pin xin ca cao' wa je ca toc wa ta. Pain ca om to' pa' pin querec xun ca', om ta cao' mami' xi', om ta toc mami' xi' quem. To' pa' pin iri xun ne, cao' mami' ac iri' tara, toc mami' ac iri' tara quem, ac i ma' na ca tomi' xucucun. Wara awori xo' nana quem, winim' e' nenem pain ca ha' momon ma'. Ha' xirapari' na nenem quem, ac i ma' na ca tomi' con comandante xinacon Paulo ma'.

²² Na ra ac ca na comandante ma'. In mao ra ta arain ac con na. Ca tomi' hwet mapa' ca', ta tomi' hwet camain' momon pain oro wari' me ta ac con na quem.

²³ Harahap je e' ac tococwa na taramaxicon nucucun oro soldado ma', co taramaja mi' nonon ma'. Ma' 2 nana co tomi' ca ma'. Wara awori xo' je jujun oro win soldado hwe ma'. Ma' 200 tatara co xuruxut e' nanain

macan', ma' 70 tatara co to nanain cavalo, ma' 200 tatara co cut nanain cote ne quit ca mam' xucun' tape wa quem, ca' tatara pahu'. Xim pin iri tara ne, pain 9 hora ma', mama' ac hwein tara Cesareia. ²⁴Tucu an to mi' jun pain cavalo Paulo ma' quem. Querec wet xo' jun, o mi' jun con taramaxicon Félix pain Cesareia cain ac tococwa na.

²⁵Comandante ma', co Cláudio Lísias na wixicon ma', xirao' ac cain na carta ca', xirao' mi' non pain Governador Félix. Ca' na ca xirao' nucun:

²⁶Cláudio Lísias ina pain ca xirao' mi' xim ca'. Xirao' mi' inem pain ca iri' taramaxicon ma ma' Governador Félix.

²⁷Mam' inem con wari' cwa', co quep caca oro judeu cwa'. To' pa' pin xun nonon ira. Taxi' pin iri inon pain ca romano ca ne, mo hwet ac ton na. Wata', wiricoco oro soldado ne cwa', jein hwet ac urut con na, narain ho' ac urut con na cocon oro judeu. ²⁸Para tomi' em' cocon ma' ne ac xije na. Je ca o mi' toton con oro taramaxicon nucucun oro judeu cwa', pain ca cut in xucucun pain ca Sinédrio caca ca'. ²⁹Taraju iri inonon pain ca tomi' querec cocon ne, taxi' pin ac toton na pain ca tomi' caracan e' xucucun pain ca tomi' ha' xo' xine oro ca xirao' nucun Moisés nucucun ca tomi' ha' je tococwa pane.

Om paxi' na ca pan tem ca. Om xi to' pa' pin tocwa, om xi tao' pe tocwa quem. ³⁰Tomi' hwet iri napa' wari' ne, pain ca coco' ho' xun cocon pain wana pain ca to' pa' pin xun ta cocon ma', tomi' ac xije na: O mi' hap ton con Governador Félix cwain ac ta' na pum. Tomi' ac toton na oro judeu co tomi' em' nonon cwa' quem: Oro ca tomi' em' nuhu' pain ca pan tem na Paulo ta hun ma', na e' na pain ca tomi' hwet hun pain iri' taramaxicon Governador Félix cwain ta inonon pum.

Ac i ma' na carta nucun comandante Cláudio Lísias ca xirao' mi' con Governador Félix pane.

³¹Tomi' ha' nonon comandante oro soldado ma'. O mao towa nonon Paulo. Xuruxut xuruxut hwet ac cacain na xijein cidade ma', Antipátride na wixinain. ³²Xec pin iri na ne, in mama' ac cacain na xirim ca to caca pain Jerusalém oro soldado co xuruxut nanain macan' ma'. Joc wa' pan xun Paulo ta ac caca na co to nanain cavalo ma', tiquin' mama' ac caca na. ³³Tan' mama' iri nanain Cesareia ne, mi' ac cocon na pain carta taramaxicon Félix. Mon cwa' Paulo cwa' ac cocon na.

³⁴Noro pan ac cain na carta taramaxicon ma', noro noro. Tomi' querec ac con na Paulo: Main ca maqui' ma quem? Cain' cain' ne wixinain macaram quem?

Om na, maqui' inain Cilícia ta ac ca na.

Taraju iri nain ca tomi' nucun ne, ³⁵tomi' ac ca na: Je i ma'. Maqui' iri tatara co tomi' em' nenem ne, taraju wet ac toton tara pum ta na. Tomi' ac tococwa na oro soldado nucun ma' quem: Querec wet pe jun pain cote ne xirixi' ma', ca quep ca taramaxicon Herodes cara pane, ac i ma' na ca tomi' tococwa ma'.

**Ca taraju wet con Paulo Félix ma', pain ca tomi'
caho' pan xucun cocon co tomi' em' nonon ma'**

24 Ma' 5 pin iri na xec pain ca querec wet cocon Paulo oro soldado ne, pain ca querec wet pe cocon pain cote ne xirim ca to pan caca ma', maqui' ac cain Jerusalém na Ananias ma', co sacerdote co iri' taramaxicon ma'. Ma' nana oro xucucun taramaxicon nucucun oro judeu co maqui' wi nana con ma', ma' na xucun ma' quem, co tomi' hwet xo' taxi' nain oro ca tomi' nucucun oro taramaxicon ma'. Tértulo na wixicon. Tan' mama' iri nanain Cesareia ne, hwet ac cocon na taramaxicon Félix ma', tomi' hwet ac cocon na pain oro ca coromicat nucucun pain ca tomi' em' cocon Paulo.

²O corom qui' jun Paulo ta ac cocon oro soldado nucun na Félix. O corom qui' iri nonon ne, tomi' ac ca na Tértulo ma'. Ca' na ca tomi' con taramaxicon pain ca tomi' em' con Paulo:

Tomi' xim urut pum pain ca iri' taramaxicon ma ma' Félix. Pain ca xo' taramaxicon pe ho' qui' maparut pain cara pane, je ca hohot tamana caparut oro carawa. Om om na carawa ca to' i'ina naparut. Xi om ne ca taramaxicon awi ara ma ta. Quep xiho' tamana maparut pain ca ara xo' main oro carawa ca pan tem pain macaraxut ca'. An to xo' main quem.

³Tomi' querec te tamana urut pum pain. Oro win ma' nuxut pain oro xijein cidade pain macaraxut quem, tomi' querec te tomi' querec pi' pin nenem pain oro ca ara ma pain ca quep xiho' maparut quem. ⁴Om ca hwara' ne ca tomi' xim urut pum ca' taramaxicon, xi noc ara urut pain ca to' i'ina urut pum pain ca taramaja nem ta. Je ca xiram pa' xut urut pum pain ca taraju wet xut urut pum ca'. Wijimain e' tara ca tomi' ne ca'. ⁵Querec pin'

urut con wari' cwa', Paulo cwa', querec pin' urut con pain ca iri' caxicon wari' ca ca'. Ja' teretem taxipa' nonon oro win judeu urut pain oro xijein macan'. Wirico co taramaxicon pe ho' nonon oro wari' co howa nonon co pacara pane, co maqui' nain Nazaré pane. Howa pan teretem ara xi' nana ta. ⁶To' em' pin tain paxi' nain cote ne xiricon Iri' Jam nuxut pain ca judeu urut pane. Ane quep urut con ne. Tomi' mi' xun pain ca wap wa pain ca pan tem nucun paxi' urut ira. Win ne ca xirao' mi' capari' Moisés pain ca xirao' nucun ca' paxi' urut ira. ⁷Ane hwet pa' caparut comandante Lísias ne. To' i'ina naparut. Joc in pin iri' naparut ne, quep ca' ac caparut con na, tomi' ac caparut na: Mo ta tomi' em' xun hun pain ca pan tem wa Paulo cwa', na e' na pain ca tomi' hwet hun pain taramaxicon cwain ta naparut pum. ⁸Mo ta tomi' querec pan mon, taxi' ac maparut tara pain ca iri'o' ne ca tomi' nuxut ca', pain ca pan tem na ta urut con ca'. Ac i ma' na ca tomi' con taramaxicon Tértulo ma'.

⁹Iri'o' na ca tomi' nucun Tértulo cwa' ac caca na oro taramaxicon nucucun oro judeu co coco' to ho' nonon ma' quem. Oro ca tomi' nucun pain ca tomi' hwet quem, pain ca pan tem nucun Paulo cwa', iri'o' na ta nonon taramaxicon.

¹⁰An piri' ac cain na micon taramaxicon ma', tomi' ra ta ac con na Paulo. Tomi' xo' ac ca na: Tomi' xim inem pain ca iri' taramaxicon ma ma' taramaxicon. Mija na cawaxi' pain ca juiz pe ho' maparut pain macaraxut ca'. Je ca hohot tamana capa' pain ca tomi' xo' xim ca', pain ca tomi' caho' xije pain ca tomi' em' cacapa' ca'. ¹¹Om ca pain homa ne pain ca mao tain Jerusalém pane. Hwet tain na ca ¹²nein xec pain ca mao tain ta' pane. Pe torotop mi' querec te ton Iri' Jam ina ira. Mo ta tomi' querec momon caram cwa' co tomi' em' nanapa' cwa', om ta i'ina taxi' mapa' pain ca tomi' iri'o' ta' ca'. ¹²Tomi' em' ca' paxi' nanapa': Tomi' caracan pe nonon oro wari' pain ca tao' caho' nein cote ne xiricon Iri' Jam ta nanapa'. Ja' teretem nonon oro wari' ta nanapa' quem. Xi querec cacapa' pain ca tomi' caracan toton je pain ca ja' teretem toton ta! Ac i ma' paxi' nanapa' pain ca tomi' em' cacapa' ca'. Ane om tomi' caracan pe camain' toton oro wari' pain ca tao' caho' nein cote ne xiricon Iri' Jam ta. Om ca ja' teretem toton oro wari' pain oro xirim ca cut in to xujuxut pain ca judeu urut ca', om ca ja' teretem toton oro wari' pain oro xiricocon pain Jerusalém ma' quem. ¹³Pain ca tomi' caracan nonon oro wari' ta cacapa' ca', je pain ca ja' teretem nonon oro wari' ta cacapa' ca' quem, om ca iri'o' na ta ac

quequem ta taramaxicon. Xi ma' ca wari' co iri'o' na ta wi nonon ta. ¹⁴Om paxi' na ca iri'o' na ta ac quequem pain ca pan tem na ta quequem pata'. Ane iri'o' ne i ca' pata' ne: Howa inain oro ca pijim' wa con Jeju ta. Howa pan tem na ta ara xi' nanapa' oro taramaxicon nucucun oro win judeu ta' cwa'. Je i ma' ira inonon. Howa inain oro ca pijim' nucun Jeju cara pane, howa inain oro ca pijim' nucun pain ca pe torotop mi' querec te ton Iri' Jam co howa caca oro hwanana nuxut pain ca judeu urut ca'. Howa inain oro ca xirao' nucun Moisés cara pane, howa inain oro ca xirao' nucucun oro profeta cara pane. ¹⁵Howa inon Iri' Jam pain ca main to' e' mami' toton cocon oro wari' co wara cono' nana quem. Ac i ma' nana caram cwa' quem. Howa howa pi' pin urut con Iri' Jam pain ca main to' e' mami' toton cocon oro wari' co wara cono' nana ma'. Je je ari na ca howa nuxut cocon pain ca main to' e' mami' xun tococwa quem. Co tomi' ha' nonon pain ca e' e' wet nucucun, co om tomi' ha' nonon pain ca e' e' wet nucucun ma' quem, main to' e' mami' toton nonon oro wari' Iri' Jam ta urut. ¹⁶Je ca win xumu tain oro ca xut xo' wa ca'. Oro ca awi wa ca taxi' ta' pain ca hohot con Iri' Jam cocon oro wari' ma' quem, je ca ara ta' ca'.

¹⁷Je ca tomi' xim ca' ac con na taramaxicon Paulo. Mija na cawaxi' pain ca om in mao tain Jerusalém pane. Je win in mao ta' pain xocori ca'. Cut mi' toton pain dinheiro oro win judeu ta' co om nonon carawa ta ina ira. Mi' querec te ton pain carawa Iri' Jam quem ina ira. Je ca mao tain Jerusalém pane. ¹⁸Wara hohoc xo' pin xije, wara mi' querec te ton pain carawa Iri' Jam ina quem. Querec ac cacapa' na oro win judeu ta' co maqui' nanain Ásia. Querec pe nanapa' pain ca tao' caho' nein cote ne xiricon Iri' Jam nuxut. Xica' pe ina, om om napa' win ma' ne. Om ca teretem caca oro wari' pata'. ¹⁹Oro win judeu ta' co maqui' nanain Ásia ma', wiricoco pan xirara co tomi' hwet nenem pain carawa ca ara ta' pane, xi iri'o' ne ca tomi' nucucun pain ca pan tem na ta cacapa' ta. ²⁰Tara cocon caram cwa' quem. Am tomi' em' cacapa' pain ca pan tem wa pain ca tomi' querec qui' cacapa' pain ca cut in to nucucun pain ca Sinédrio caca ma'. Wiricoco xirara co tomi' hwet nenem pain. ²¹Am tomi' em' e' cacapa' pain ca merem mip ca' toton: Howa inon Iri' Jam pain ca main to' e' mami' toton nonon oro wari' co wara cono' nana ta ta' pane. Je ca tomi' querec xim mahu' ca' inonon pane. Ac i ma' na ca tomi' con Félix Paulo ma'.

²²Félix ma', taxi' tamana paxi' nain oro ca pijim' wa con Jeju. Je ca je i ma' ta tococwa ma'. Je i ma' ta, maho' xi'. Maqui' iri tara comandante

Lísias ne, tomi' mami' ac xijexi' tara, tomi' xo' ac xuhu' tara. Am em' na ta ton Paulo cwa', am om em' na ta ton, tomi' xo' ac xuhu' tara pain ca coromicat ne ta na ca tomi' tococwa ma'.

²³Tao' pe ron ta ac con na taramaxicon nucucun oro soldado ma' quem. Hohot na pain ca om pao' pe mon, tao' pe e' ron pain xirinain ca tao' to tao' to to wa ca'. Ta nain ho' mon pain ca xut in wa pain tequipain xirim quem. Mo ta quep xiho' xun cocon oro win ma' ca ma', mo ta mi' xun pain carawa ca cao' wa caca ma', ta narain ho' momon con me ta non.

²⁴Mon to wet ac caca na. Om ca tocwan homa ne xec pain ca mon to wet caca ma', in qui' ac ca na Félix. Maqui' wi na cam manacon ma', Drusila ma'. Judeu na Drusila. Hap ra jun Paulo, taraju xin ca pijim' nucun urut ta ac tococwa na oro guarda ma'. Maqui' iri na ne, taraju wet ac cacamain na ca pijim' nucun ma', pain ca tomi' hwet pan tacacama pain ca howa tocwa Cristo Jeju ma'. ²⁵Ca pijim' tacacama ma', ca pijim' tacacama ma', tomi' xo' ac tacacama na pain ca xut xo' wa pain ca ara xine oro ca param nucun Iri' Jam. Tomi' xo' tata pain ca om ara e' xine ca param pan nexi', tomi' xo' tata pain ca main tomi' querec xun tococwa oro wari' pain oro carawa ca ara caca pain ca e' e' wet nucucun quem.

Pijim' ac i ma' iri nanam Paulo ma' ne, jin' pin ac ca na Félix ma'. Je i ma' ta, in mao cain' ra ta ac con na. Mo ta na capa', mo ta om to' i'ina capa' ca taramaja ne ca', hap ra jun ta mami' toton pum ta non. ²⁶Jin' paxi' nain ca taraju wa ca pijim' nucun Paulo Félix ma'. Ane param cain dinheiro nucun ne. Je ca tama' hap ra, tomi' xi' quem con ma'.

²⁷Ac i ma' ac i ma' nana. Ma' 2 pin iri na cawaxi' cocon ne, hwet mao ac ca na Félix. Taramaxicon taramaxicon om pin na, corom ac ca na xucun taramaxicon. Pórcio Festo na wixicon xocoricon taramaxicon. Pain ca om hwet mao querec ca Félix ma', om ca pa hwet mam' con Paulo ma' quem. Ma' ta tomi' querec te cara cacapa' oro judeu cwa' na.

24.26 Am coromicat ca' ca Félix ma': Mo ta mi' capa' pain dinheiro Paulo ma', pa hwet pin ac ton tara ta non, ac je na. Je ca param cain dinheiro nucun. Ma' ta pa hwet pin ton pain xirinain ca tao' to tao' to to wa ca' na.

**Ca taraju wet con Paulo Festo ma', pain ca tomi'
caho' pan xucun cocon co tomi' em' nonon ma'**

25 Festo ma', co taramaxicon pe pin nain Judeia ma', wa' mao ac cain na Cesareia. Ma' 3 pin iri na xec pain ca pe cain Cesareia ne, mao tain Jerusalém ta ac ca na. ²Wa' mao iri nain Jerusalém ne, hwet pan ac cocon na oro taramaxicon nucucun oro sacerdote. Oro taramaxicon co hwara' opa nana ma' quem, hwet ac cocon na Festo. Tomi' hwet ac cocon na pain oro ca coromicat nucucun pain ca tomi' em' cocon Paulo. ³Xiram pa' xut pain ca tomi' xim urut pum ca' taramaxicon Festo ac cocon na. Tomi' roron oro soldado nem ma', o qui' totoron pain Jerusalém Paulo ta na ca tomi' cocon ma'. Om ca xiram pa' camain' cocon Paulo. Param mi' e' nonon pain ca o qui' tocwa pain Jerusalém ma', ma' ta to' pa' pin xun nonon ma'. Wara tomi' xo' xucucun: Ma' tatara wari' co coco' ho' nonon pain wana ma', to' pa' pin ac cocon tara ta nana.

⁴Om na, tao' pe pe nonon pain Cesareia Paulo ma' ac ca na Festo. In mao ho' ta' ina. ⁵Awi na pain ca tomi' xo' xujuhu' ma'. Tora' ac huhun tara oro win ma' nuhu' co hwara' opa nana ma'. Ja' ja' ac cacapa' tara pain ca in mao tain Cesareia. Je i cain tara ca tomi' hwet to cacapa' pain ca coromicat nuhu' pain ca tomi' em' hun Paulo. Tara pahu' ta, am iri'o' ne ca pan tem ca ma'. Ac i ma' na ca tomi' tococwa ma'.

⁶Mon pe ho' ac tococwa na pain Jerusalém. Ac ca ma' 8 ne na xec, ac ca ma' 10 ne na xec pain ca pe ho' tococwa ma'. In mao ta' ta ac ca na, in mao ac cain na Cesareia. Xec pin iri na ne, mao ac cain na xirim ca taraju pe toton ca ma', xao pe ac cain na ca mam' xao pe nucun pain ca taramaxicon ca ma'. Tomi' cut in ac tococwa na oro wari' nucun. O corom mi' xine con Paulo ta ac tococwa na oro soldado nucun ma' quem.

⁷Corom iri na Paulo ne, coco' coco' mam' pin ac cocon na oro taramaxicon nucucun oro judeu ma', co maqui' nanain Jerusalém ma'. Mija na ca tomi' em' cocon ta. Mija na ca pan tem ca co cwa' ta, caracat tamana na, om ca awi camain' ca, ac i ma' na ca tomi' em' cocon. Ane tomi' ximama' e' caca ne. Om ca iri'o' na ta ac cocon taramaxicon. Xi ma' caca wari' co an an ari ne ca tomi' nucucun pain ca iri'o' na ta cocon ta.

⁸Tomi' caho' pan ac xucun na Paulo ma' quem. Om ca pan tem camain' ta' ta. Om ca tomi' in pin tain capijacocon oro taramaxicon nuxut pain ca judeu urut ca', om ca to' em' tain cote ne xiricon Iri' Jam nuxut, om ca

tomi' in pin tain capijacon iri' taramaxicon César cwain, co taramaxicon pe nain Roma cain, ac i ma' na ca tomi' ca pain ca tomi' caho' pan xucun.

⁹Coromicat ca' xucun Festo ma': Mo ta xin ne toton oro taramaxicon nucucun oro judeu cwa', tomi' querec te ac cacapa' tara ta, ac i ma' na ca coromicat nucun. Je ca tomi' con Paulo ma': Noc main xin ca mao wa Jerusalém ne? Je i cain tara ca tomi' querec pe xima. Je i cain tara ca taraju wet pe toton pain oro ca tomi' em' nucucun pum quem. Noc main ra? Ac i ma' na ca tomi' con Paulo Festo ma'.

¹⁰Noc inain ta ac ca na Paulo. Xi wara tomi' querec xim ara mapa' pain xirim ca juiz pe ma ca'. Wirico iri' taramaxicon César cwain, co pe nain Roma cain, wirico co mi' nem pain ca juiz pe main i ca'. Na e' na pain ca tomi' querec pe pan mapa' pain i ca' quem. Xi ara cup toton oro win judeu ta' ta. Taxi' pan mapa' pain ca om ara cup toton ca' quem. ¹¹Mo xi pan tem ta', mo xi mi' pin ma' tara ne capa' Iri' Jam ma', je i ma' xira, om xi nain ho' xije pain ca mi' pin wa. Ane om iri'o' ne ca tomi' nucucun pain ca tomi' em' cacapa' ca' ne. Om na wari' co hwara' opa ma', pain ca an mao jun ta ac cocon caram cwa' pata' ta. Je ca tomi' xim ca' taramaxicon. Tomi' querec pan xirapa' iri' taramaxicon César na ina ta na ca tomi' con ma'.

¹²Tomi' xo' ac xucucun na Festo cocon wari' co quep xiho' nonon pain ca win tomi' xo' xucucun pain oro carawa ma'. Tomi' xo' tomi' xo' ca' xucucun, tomi' pan ac con Paulo na Festo ma': Tomi' querec pan xirapa' iri' taramaxicon César na ina ta ma ra? Je i ma' ta, tomi' querec pan terem ta na ca tomi' con ma'.

Ca tomi' hwet con con Paulo Rei Agripa Festo

¹³Ac i ma' ac i ma' nana. Om ca pain homa ne, tan' mama' ac cacamain na Cesareia taramaxicon Rei Agripa cam coxa' ca ma', Berenice ma'. An hwet mi' xut pum pain ca tomi' querec te nuxut pain ca taramaxicon pe pin main Judeia ca' nonon Festo ira. ¹⁴Tocwan na xec pain ca to cacamain Cesareia ma'. Aram aram tomi' xo' ac con na Agripa Festo ma', tomi' hwet non pain ca tomi' em' cocon Paulo oro taramaxicon nucucun oro judeu. Tomi' ca' non: Ma' pe nain i ca' wari' co tao' pe wa. Paulo na wixicon. Hwet mao ta' iri na Félix cara pane ne, pain ca taramaxicon taramaxicon om pin ca pane, om ca pa hwet pin con quem. Tao' pe cara ac tocwa na. ¹⁵Mao iri inain Jerusalém pane ne, hwet ac cacapa' na oro taramaxicon nucucun

oro sacerdote cocon oro xucucun taramaxicon nucucun oro judeu ma'. Tomi' hwet ac cacapa' na pain oro ca coromicat nucucun pain ca tomi' em' cocon Paulo ma' quem. Mija na ca pan tem ca. Awi na pain ca tomi' mi' mon pain ca wap wa, ma' ta to' pa' pin tocwa ta nanapa'. ¹⁶Ac i ma' paxi' na ca tomi' cacapa' pane, ane tomi' in pin toton ne. Om ca ac i ma' urut pain ca romano urut ca' ac toton na. Om ca to' pa' pin ximao urut con wari'. Na e' na pain ca tomi' querec cain' tocwa ta. Wirico, wiricoco co tomi' em' nonon, tomi' querec xo' pan ac tococwa tara. Om ca na ne pain ca em' ma ta tocwa pain ca om tomi' caho' cain' pan xucun pain ca tomi' em' tocwa ta inonon pane. ¹⁷Ja' ja' ac cacapa' na pain ca in qui' tain Cesareia ca' quem. Om ca oro xijein xec tara e' toton, xec cut in xi' ta ac toton na. Xec pin iri na ne, mao ac tain na xirim ca taraju pe toton ta' ma', xao pe ac tain na ca mam' xao pe ne pain ca taramaxicon ta' ca'. Tomi' cut in ac toton na oro wari' ne. O corom mi' xine con Paulo ta ac toton na oro soldado ne quem. ¹⁸Tequi' to ac caca na co tomi' em' nonon ma', tomi' hwet ac cacapa' na pain oro ca coromicat nucucun pain ca tomi' em' cocon ma'. Iri' caxicon wari' tara ma' inon pain ca om tomi' hwet querec cacapa' con. Taraju iri inonon ne, querec pin' ac toton na pain ca tomi' em' ximama' e' cocon ta. ¹⁹Tomi' caracan ximama' e' xucucun pain ca howa tocwa Iri' Jam nucucun je pain ca tomi' ha' tocwa quem. Tomi' caracan ximama' e' xucucun con wari' co Jeju na wixicon. Mi' pin na Jeju pane. Ane e' mami' na ta ca Paulo cwa' ne. ²⁰I'ina ac capa' na xumu cocon. Xi taraju pa' tain oro ca howa nucucun ta. Cain' xi tomi' querec xo' toton ca' ne ac xije na. Je ca tomi' ton Paulo ma': Noc main xin ca mao wa Jerusalém ne? Je i cain tara ca tomi' querec pe xima. Je i cain tara ca taraju wet pe xima pain oro ca tomi' em' nucucun pum quem. Noc main ra inon pane. ²¹Ane noc inain ta ca ne. Tao' pe cara ximapa' pain i ca' ta ac capa' na. Maqui' iri tarapa' xec nein ca tomi' querec pan ton capa' iri' taramaxicon César ne, tomi' querec pan ac capa' tara ta na ca tomi' capa'. Na ra ac ton na, tomi' ac toton na oro soldado ne cwa': Querec wet xo' jun pain xirinain ca tao' to tao' to to wa ca'. Maqui' iri tara xec nein ca na capa' pain ca o mi' jun con César xuhu' ne, o mi' ac hun con tara ta inonon, ac i ma' na ca tomi' con Agripa Festo ma'.

²²Taraju xiton na inon ta ac ca na Agripa ma'.

Je i ma' ta. Xec taraju ron ta ac con na.

Ca taraju wet con Paulo taramaxicon Agripa

²³Xec pin iri na ne, corom qui' ac ca na Agripa cam Berenice. Corom nanain cote ne manain xirim ca cut in to xucucun oro wari'. Xec xec tamana nana. To nonon iri' ca awi nucun wom. Mija na ca tomi' querec te tacacama quem. Corom wi nonon oro comandante nucucun oro soldado, corom wi nonon co hwara' opa nana pain cidade ma' quem. O corom qui' jun Paulo ta ac ca na Festo ma', o corom qui' ac cocon na. ²⁴Tomi' ac ca na Festo: Tomi' xim inem taramaxicon Rei Agripa. Tomi' tomi' xam' inuhu' pain ca cut in xijexi' ca'. Querec jun wari' cwa'. Wirico co cwa' co tomi' em' caca oro judeu. Pe iri inain Jerusalém pane ne, tomi' hwet ac cacapa' con na, je pain Cesareia ca' quem, iri' caxicon wari' na ta nanapa' con. Merem nanapa' con quem, na e' na pain ca to' pa' pin tocwa ta nanapa' con. ²⁵Taraju iri inonon pain ca tomi' querec toton ne, taxi' pin ac toton na pain ca tomi' em' ximama' e' cocon ma'. Om paxi' na ca pan tem ca, om xi to' pa' pin xun cocon ta. Tomi' pan ac capa' na: Tomi' querec pan xirapa' iri' taramaxicon César na ina ta ac capa' na. Je i ma' ta, o mi' jun con César pain Roma ta toton oro soldado ne pum ta ac ton na. ²⁶Xirao' mi' ton pain carta paxi' inon taramaxicon César cwain. Cain' xi xirao' mi' ton quem? Ac ca om pan tem ca a xira ta. Je ca hap ra ton pahu'. Taraju wet jun pain ca tomi' nucun inuhu'. Taraju wet pan ron quem taramaxicon Rei Agripa. Tomi' querec iri xun ne, taxi' ac ton tara, na ac capa' tara pain ca xirao' mi' ton pain carta taramaxicon César cwain. ²⁷Xi na ne pain ca mam' ximao e' ton con pain ca om xirao' xo' mi' ton pain oro ca pan tem nucun pain carta ta. Ac i ma' na ca tomi' xo' con taramaxicon Agripa cocon oro wari' co cut in to xucucun pain i ma'.

26 Hohot na pain ca tomi' hwet maparut pain oro ca ara nem pane ac con Paulo na Agripa.

Ma, tomi' ta' e' ac ca na, an piri' ac cain na micon, tomi' ac con na pain ca tomi' caho' pan xucun ma': ²Tomi' querec te ina pain ca taraju xim mapa' pain xec ca' taramaxicon Rei Agripa. Tomi' querec te ina pain ca taraju xim mapa' pain ca tomi' caho' xije cocon oro taramaxicon nucucun oro win judeu iri' cwa', pain ca tomi' em' cacapa' ca'. ³Tomi' querec te tamana ina pain ca taraju pan mapa' quem. Xi om ne ca taxi' taxi' pi' pin ara main oro ca ara taxipa' iri' pain ca judeu iri' ta. Taraju pa' taraju pa' pi' pin main oro ca tomi' caracan xijexi' pain ca howa nexi' con Iri' Jam

quem. Je ca tomi' querec te tamana ta' pum. Je ca taraju wet hot ne xim ca' taramaxicon Rei Agripa ac con na.

⁴Taxi' taxi' xam' nanapa' oro win judeu iri' cwa', taxi' nanapa' pain ca xut xo' ne ca' ac con na. Pain ca pe pe wet qui' tain iri' macara ca pan' pe ta' pane, je pain ca pe pin tain Jerusalém ma' quem, taxi' nanapa' pain ca xut xo' ta' ca'. ⁵Wara taxi' nanapa' pain cara pane, taxi' nanapa' pain ca wara fariseu ta' pane quem. An xiho' inonon oro xucucun oro fariseu pain ca tomi' ha' tomi' ha' pi' pin cacain oro ca xirao' nucun Moisés ma', pain ca joc in pin cocon oro xucucun win judeu iri' pain ca howa xun Iri' Jam. Mo xi ma' ne ximicocon ma', na ac cocon xira pain ca iri'o' na ca tomi' nucun ta pan quequem pata'. ⁶Je ca tomi' xim ca' taramaxicon ac con na. Tomi' querec mahu' pain oro ca ara ne ca', xi om ne ca howa ara tain ca wara tomi' pe mi' cocon oro hwanana nexi' Iri' Jam pane ta, pain ca main e' mami' tatara co wara cono' nana ta cocon pane. ⁷Howa howa pi' pin nanain ca wara tomi' pe nucun oro win judeu iri' cwa', pain ca ma' 12 ne ca xucun wari' iri' pain ca iri' hwanana ne xun Israel cara pane. Winim' winim' xam' irin ca hwet pin ta' ne ca wara tomi' pe nucun ca'. Je ca pe torotop mi' taxipa' xun ca'. Maqui' nain iri' ximixi' pain ca tomi' ho' tomi' ho' xun pain ca in ac xun ca'. Ac i ma' ina quem, howa inon Iri' Jam pain ca ara tain cain ca wara tomi' pe nucun ta taramaxicon Rei Agripa. Ane tomi' em' pan cacapa' oro taramaxicon nucucun oro win judeu iri' cwa' ne. Tomi' em' pan nanapa', xi om ne ca howa ara tain ca wara tomi' pe nucun Iri' Jam ta, ac i ma' na ca tomi' con taramaxicon Agripa Paulo ma'. ⁸Tomi' querec ac tococwa na oro wari' co cut in to xucucun pain i ma: Para om howa hun Iri' Jam pain ca ha' con pain ca to' e' mami' cocon co wara cono' nana quem? Ac i ma' na ca tomi' querec tococwa ma'.

⁹Pain cara pane, hohot tara ma' inain ca tomi' in pin tococwa oro wari' co howa nonon Jeju co maqui' nain Nazaré pane ac tococwa na. Na e' na pain ca to' quiji' pin tococwa ta ina pane ira. ¹⁰Je ca ara ta' pain Jerusalém pane quem, to' quiji' pin toton inonon pane. Co howa nonon Jeju pane, ma' mija nana co tao' to ta' pain xirinain ca tao' to tao' to to wa ma'. Xi om ne ca tao' to roron ta ara cacapa' oro taramaxicon nucucun oro sacerdote pane. Tomi' mi' iri tata pain ca wap wa pain ca cono' tatara ne tococwa ne, je i ma' ira, cono' tatara ne ac ta' na quem. ¹¹Mao ho' mao ho' inain oro xirim ca cut in to xijexi' pain ca judeu iri' pane. Mam' iri inonon co howa nonon Jeju ne, quep em' ac toton na, tomi' napat jun Jeju ta paxi'

inonon quem. Mija na ca mana' toton pane. Pirao' pirao' inonon pain oro xijein cidade pain oro xijein macan' ma' quem, ma' ta quep em' to toton pain i cain ta inonon.

¹²Ac i ma' ac i ma' ina, maqui' ac ne na xec nein ca mao qui' tain Damasco pane. Wara mi' nanapa' pain carta ca xirao' pe cacain ca tomi' nucucun oro taramaxicon nucucun oro sacerdote ma', pain ca quep roron co howa nonon Jeju pain Damasco cain cacapa' pane. ¹³Mao ac ta' na pane. Mo mo mo, tocon xina pin iri na ne, querec ac tain na naran ta taramaxicon. Joc xec qui' nain pawin. Toha mip na, amon toha pije' na xina ma', toha tamana napa' naran ca querec ta' pane. Joc xec joc xec mam' pin napa', joc xec joc xec mam' pin tata oro win ma' ta' co ja' ja' nanapa' quem. ¹⁴Camara' mama' camara' mama' pi' pin ac urut na pain macan'. Taraju ac tain na ca tomi' wa. Tomi' napa' pain capijaxi' pain ca judeu iri' ca', pain hebraico ca': Saulo. Saulo. Para quep em' mapa' quem Saulo? To' ara pan xijem pain ca ari mapa' ta na ca tomi' capa' pane.

¹⁵Cain' ca wari' ma quem Taramaxicon ne ac ton na.

Wata' ta, co quep em' ma cwa'. Jeju ina ta. Ac i ma' na ca tomi' capa'. ¹⁶Je i ma' ta ac capa' na. Tequi' pe ho' ra ta. Tora' inem, taramaja mi' ne ta inem. Je ca hwet pa' xim ca'. Tomi' hwet roron oro wari' pain ca querec mapa' ca', main tomi' hwet ac momon tara pain oro carawa ca an hwet mi' xim xim quem. ¹⁷Narain ho' xim cocon oro win ma' ma pain ca judeu ma ma', pain ca quep em' xim quequem ma', narain ho' xim cocon co om judeu nana ma' quem. Hwet roron inem quem. ¹⁸Ac ca to' querec pin momon tara pain tococon ma', ma' ta querec pin' cacapa'. Ac ca to' xuruxut ni ca' momon tara pain ca jitacat nein ma', pain ca xuruxut pin xin cacain naran ne ca', pain ca an to pin xin cacain ca caracat nucucun ma' quem. Taramaxicon pe ho' taramaxicon pe ho' om pin ac cocon tara Caxicon Jam, taramaxicon pe ho' pin ac cocon tara Iri' Jam ma' quem. Howa iri tatarapa' ne, xic am pin ac tococwa tara pain ca caracat nucucun, aram aram mi' mi' ac tococwa tara pain oro ca param nucun Iri' Jam ca cut to xo' mi' xun tococwa pain oro wari' nucun co to' hohot pin ca ma'. Ac i ma' na ca tomi' capa' Jeju pane.

¹⁹Je ca tomi' xim ca' taramaxicon Rei Agripa ac ca na. Om ca tomi' in pin ton Jeju pain ca taraju tain ca tomi' nucun ca maqui' nain pawin pane.

26.14 Win ne boi ca mana' in pin nain pana mam' xucun' xine ma', ac i ma' ma quem na ca tomi' capa' pane.

Tomí ha' inon. ²⁰ Pijim' cain' inonon co to nanain Damasco, pijim' ac toton na co to nanain Jerusalém, wiricoco co to nanain oro xijein cidade pain Judeia ma' quem. Pijim' inonon co om judeu nana quem. Cwirin' jein ca caracat nuhu', howa jun Iri' Jam quem inonon. Ara jein ca awi wa, ma' ta querec pin' xihwe pain ca cwirin' pin hwein ca caracat nuhu' ta inonon pain ca pijim' toton pane. ²¹ Je ca quep cacapa' oro win judeu iri' pane. Quep pe nanapa' pain ca tao' caho' nein cote ne xiricon Iri' Jam. To' pa' pin xim paxi' nanapa' pane. ²² Ane quep xiho' tamana capa' Iri' Jam ne. Wara quep xiho' napa' pain ca xo' pijim' ten qui' ta' pane, quep xiho' quep xiho' wet napa' pain xocori ca' quem. Je ca ha' capa' pain ca pijim' pijim' wet ta' ca'. Pijim' inonon oro wari' ma', co om hwara' opa nana' ma', co hwara' opa tamana nana ma' quem, pijim' mi' e' inonon pain oro ca xirao' to caca oro profeta con Moisés pain cara pane, pain ca xirao' to cacain oro carawa ca ara ton non Cristo Jeju pane. ²³ Wara xirao' to ca' nonon pane: Jain jain tara co ma' co wara tomi' pe ca Iri' Jam pane nonon, jain jain tara pain ca to' pa' pin tocwa, e' mami' ac ca tara ta nonon. Wirico tara co e' mami' cain' ta nonon. Pijim' ac tococwa tara pain capijacon oro wari' ta nonon quem. Pijim' hwet xun tata oro win judeu iri', pijim' hwet xun tata co om judeu nana ma' quem, pain ca pijim' hwet xun tococwa pain capijacon ca an xiho' nain naran ma', pain ca to' taraju pa' tococwa pain ca to' witan xun tococwa ta nonon quem. Ac i ma' na ca tomi' con taramaxicon Agripa Paulo ma'.

²⁴ Ca tomi' tomi' wet ca Paulo pain ca tomi' caho' pan xucun ma', merem ac ca na Festo ma', merem mip na. Merem am pin non Paulo. Tamanain ma ta Paulo. To' tamanain pin nem ca tama' noro noro main oro ca xirao' wa ta non.

²⁵ Om ca tamanain ta' ta taramaxicon Festo ac ca na. Ma' napa' xumu pain ca tomi' ta' ca'. Iri'o' na ca tomi' ne ca'. ²⁶ Taxi' inon taramaxicon Rei Agripa cwa', pain ca wara taraju cain oro ca tomi' hwet ta' con Jeju ca'. Je ca om hehe ta' pain ca tomi' ton ca'. Hohot na pain ca tomi' xo' ton ca', xi taxi' ara ton pain ca taxi' taxi' pi' pin cain oro ca ara non Jeju pane ta. Xi ara taparu xine con ta na. ²⁷ Je ca tomi' querec xim ca' taramaxicon Rei Agripa ac ca na. Om ca howa main oro ca xirao' to caca oro profeta cara pane ra? Taxi' inem pain ca howa main ta na ca tomi' con ma'.

²⁸ He! Ha' tarapa' pain ca to' xin ne hap ton pain ca howa wa Jeju ma' mapa' ra? Ac i ma' na ca tomi' con ma'.

²⁹Tara pum quem taramaxicon ac ca na Paulo. Mo ta howa hap ma. Mo ta ame mapa' e' ma. Howa xira na inem ta. Howa howa xam' xirara na inuhu' pain ca taraju wet mahu' ca' quem. Je ca tomi' mi' xuhu' con Iri' Jam quem. An xiho' xirarapa' na inuhu' pain ca howa ta' ca'. Noc e' inuhu' pain ca an xiho' mahu' pain ca tao' pe cacapa' pain xirinain ca tao' to tao' to to wa ca'. Ac i ma' na ca tomi' cacam Agripa cam Berenice Paulo pane.

³⁰Tequi' pe ac ca na taramaxicon Agripa ma'. Governador Festo, wiricam Berenice, wiricoco oro xucucun co xao to ho' nanam ma' quem, tequi' to ac cacama na. ³¹Hwrehwet mama' iri nana ne, tomi' tomi' ac xucucun na. Om paxi' na ca pan tem ca Paulo ma'. Je xi om to' pa' pin xun tocwa. Je xi om tao' pe tocwa quem xucucun.

³²Tomi' ac con Festo na Agripa ma': Mo xi om tomi' querec pan xirapa' iri' taramaxicon César na ina ta ca pane, na ac ne xira pain ca pa hwet pin tocwa ta xucucun.

Ca o mao tocwa Paulo pain Roma

27 Tomi' ac ca na Festo: Na e' na pain ca horoho mama' ho' hwein Itália ta naparut. Tomi' xo' ac con na taramaxicon nucucun oro soldado ma'. Júlio na wixicon. Oro soldado nucun iri' taramaxicon César nana co taramaxicon ne nonon ma'. Tomi' xo' non Júlio Festo ma'. Querec wet xo' ron Paulo cocon oro win pao' to ca cwa'. Joc tan' xo' pin roron pain Roma ta non. ²Wara pe nain wapit mam' horoho wa ma', ca maqui' nain Adramítio, je i ma' wixinain cidade ca maqui' ne. Wara maji ta na waximain quem. Corom mama' ac urut pain na. Ja' ja' naparut Aristarco ma', co maqui' nain Tessalônica pain Macedônia ma'. Corom mama' iri urut ne, horoho mama' ac urut pain na cote ne com.

³Xec pin iri na ne, piri' to ac urut pain na xijein cidade ma', Sidom na wixinain. Xiram pa' ac con Paulo na Júlio ma' quem. Hohot na pain ca mo hwet momon oro win ma' ma co to nanain Sidom ca' ac con na. Ma' ta quep xiho' quequem, ma' ta mi' quequem pain oro ca param ma ma' non.

⁴Paca' iri urut pain Sidom ma' ne, nuru cam' ac caparut na hotowa. Je ca ac tiquin' ca' urut pain xijein cacarain xixi pan nein macan' Chipre ma'. Xi om ne ca pe caho' ara caparut pain hotowa xijein cacarain ma' ta. ⁵Horoho mama' ac urut pain na cote ne com ma', ac tiquin' ac tiquin' ca'

ac urut pain na oro xijein macan' ma' quem, je pain Cilícia pain Panfília ma', piri' to ac urut pain na xijein cidade ma', pain Mirra ca pe nain xijein macan' pain Lícia ma' quem. ⁶ Je ca mam' pe cain wirain mam' horoho wa taramaxicon nucucun oro soldado Júlio ma'. Maqui' nain Alexandria mam' horoho wa ca mam' ca ma'. Mama' xin Itália na waximain. Wara maji ta na quem. Je ca corom mama' jein ta caparut taramaxicon nucucun oro soldado Júlio ma', corom mama' ac urut pain na.

⁷ Horoho mama' ac urut na. Mija na xec pain ca momon horoho e' urut pane. I'ina urut pain ca aram aram wixicam pin urut pain xijein cidade ma', pain Cnido ma'. Horoho tiquin' xi' paxi' urut, ane nuru cam' caparut hotowa ne. Je ca ac ni ca' urut pain ma', horoho mama' ac urut pain na xijein cacarain xixi pan nein macan' ma', Creta ma'. Ac tiquin' ca' ac urut pain na cacarain ca om nuru mip ne hotowa ma', tiquin' ca' ac urut na pain xijein cidade ma', Salmona ma'. ⁸ I'ina urut pain ca ac tiquin' ca' urut pain cacarain Creta ma'. Aram aram tan' mama' ac urut pain na wapit ma'. Wapit Ca Awi ta nanain oro wari' ma', je i ma' wixinain cocon. Pe ja' pan nain cidade pain Laseia ma' quem.

⁹ Wara mija pin na xec pain ca horoho mama' urut pane. Cono' pin xuxut xi horoho horoho tiquin' mama' urut quem. Xi wara maqui' pin ara ne oro xec ca xio tamana ma', pain ca nuru tamana ne hotowa ma', wara om pin na oro xec pain ca tomi' querec te xucucun oro judeu pain ca an to pin cacain ca cao' wa quem. Je ca tequi' pe ca Paulo ma'. Hu ac i ma' paxi' tata co taramaja to nanain mam' horoho wa. ¹⁰ Je ca tomi' xuhu' ca' oro win ma' ne ac tococwa na. Mo ta horoho tiquin' mama' xi', to' i'ina tamana ac capari' tara hotowa. Ximin xi'. Am pan corom mao ne mam' horoho nexi' ca'. Am pan corom mama' ne carawa ca cut ho' iri' ca'. Am cono' pan xi' quem, je i ca' ca coromicat ne ca'. Hu mip ac i ma' paxi' tata.

¹¹ Ane om tomi' na ca taramaxicon nucucun oro soldado Júlio ma' ne. Om ca taraju wet con Paulo. Taraju wet pan non co joc wat nain mam' horoho wa ma', taraju wet pan non waximain ma' quem. ¹² Pain wapit ca to pan urut pane, om ca hohot ne pain ca nuru pa' pe caparut towapiji pain i cain. Om ca hohot ne pain ca cawaxi' pa' pe caparut pain i cain quem. Xi nuru taxipa' ara ne camana' pain oro xec ca xio tamana ta. Je ca ma' mija caca oro win ma' nuxut co awi na pain ca tiquin' mama' xi' ta nana ma'. Mama' querec xin wirain wapit pain Creta ca', pain xijein cidade pain Fenice cain nana. Am ha' capari' pain ca hwet xin. Mon to

wet ac xin tara i cain. Pi' pin iri tara towapiji ne, tiquin' mama' ac xi' tara ta nana. Wapit pain Fenice cain, pe nain xijein cacarain Creta cain. Om ca nuru mip ne hotowa pain i cain.

Camana' pain cote ne com

¹³ Pahop toto ac ne na hotowa ca maqui' ac nain quiricon xina ma', pain ca nuru qui' nein cote ne com ma'. Om ca nuru xio ne, pahop toto na. Awi na, hohot tarapari' pain ca mama' ho' xi' ta ac caca na, cut piri' ca' ac cacain pain com na arain too ca xite tamana ma', ca to' om ho mao nain mam' horoho wa ma'. Horoho mama' ac urut na. Ac tiquin' ac urut pain na cacarain com ma', pain Creta ma'. ¹⁴ Om om ca' na, xin jami in ac ne na hotowa. Iri' cote ne camana' ta. Nuru mip na, nuru qui' nain xijein quiricon xina, nuru qui' nain xixi pan nein macan' Creta ma'. Camana' Maqui' Maqui' Quiricon Xina ta nanain oro wari' ma', je i ma' wixinain cocon. ¹⁵ Nuru cam' nain mam' horoho wa hotowa ma'. Om ca ha' mami' caparut pain ca joc wat xo' urut pain mam' horoho wa, xi om ne ca nuru mip ara ne hotowa ta. Pin ne ma', an mao pan tarapari' ne ac urut na. ¹⁶ Horoho ximama' ac urut na. Horoho ximama' horoho ximama', horoho ca' urut pain wijimain xixi pan nein macan' Cauda ma'. Ac urut pain cacarain ca om nuru mip ne hotowa. An xin wijimain mam' horoho wa ca tucu tapan' iri' ca' ac urut na quem. Om ca tetere ne! Cuc piri' ca' ac urut pain na pain com. ¹⁷ Cuc piri' iri urut pain ne, cut ac cacain na cote ne macon co taramaja to nanain mam' horoho wa ma'. Ma' ta tucu pa' xin nanain mam' horoho wa ma', ma' ta om pa caracat mao ne ta nanain. Jin' nana quem. Am joc mi' capari' hotowa pain namaji pain cacarain com cain, pain Sirte cain, am xoto xi' pain i cain ta nana. Je ca tacom' quiji' cocon cote ca wom nein mam' horoho wa ma', ma' ta om joc mami' ne hotowa nana. An mao ximao pan tarapari' hotowa ne ac caca na quem.

¹⁸ Mija na ca wap tamana caparut com pain camana'! Xec pin iri na ne, wixicaracao' pocorocom ac cacain na oro carawa ca cut ho' urut ira. ¹⁹ Xijein xec iri na ne, cut ac cacain na coximi mam' taramaja caca pain mam' horoho wa ma', wixicaracao' pocorocom ac cacain na quem. ²⁰ Ca horoho ximama' ac urut na, ca nuru nuru mip ac caparut na camana' ma' quem. Mija pin na xec pain ca om hwet camain' ca xina con pijo'. Cote ne

camana! Jain jain tamana urut. Ximin tamana ac urut na quem. Om ta witan ca' xin camana' ca' ma' urut pane.

²¹ Mija pin na oro xec pain ca om cao' urut quem. Tequi' pe ac ca na Paulo pain ximijacocon co taramaja to nanain mam' horoho wa ma'. Tomi' ac tococwa na: Je ca tomi' xuhu' pane ta oro win ma' ne. Tomi' ha' ximahu' pain ca hu xuhu' pane. Om xi paca' xin Creta pane. Mo xi mon to wet xin Creta pane, je xi om ximin iri' pain xocori ca'. Om xi waraju xine oro carawa ca cut ho' iri' pane, om xi waraju xine oro coximi mam' taramaja hwe quem ac tococwa na. ²² Je i ma' ira inuhu' ta ac tococwa na. Ta jin' hwe me, quereme je. Om ta pan corom mama' xi', witan witan pi' pin xi'. Pan corom mao e' tara mam' horoho wa ta. Pa caracat pa caracat pi' pin ac xine tara ta. ²³ Taxi' ina, xi hwet pa' ara capa' jam co taramaja mi' non Iri' Jam ta. Hwet pa' napa' pain xim cara ne. Wirico Iri' Jam co wari' ne napa' cwa', co pe torotop mi' querec te ta' cwa', wirico co mam' napa' con jam co taramaja mi' non. Tomi' ac capa' na: ²⁴ Ta jin' main camana' me ta Paulo ac capa' na. Wa' mao ra, xi om ne ca na e' ara ne pain ca xat quima hwet mon iri' taramaxicon César pain Roma ta. Taraju wet ne quem ac capa' na. Ha' nem Iri' Jam pain ca tomi' mon ma'. Xiram pa' nonon oro wari' co win horoho ma cwa'. Om ta pan corom mama' caca, witan witan pi' pin tatara ta napa' pahu'. ²⁵ Je ca tomi' xuhu' ca' oro win ma' ne ac tococwa na. Ta jin' hwein camana' me, quereme je. Howa inon Iri' Jam pain ca ara tain cain ca tomi' pe nucun ta. Ac capijacon ma' quem tara. Win ne ca tomi' capa' ne. ²⁶ Witan xi' paxi' iri'. Ane na e' ne pain ca joc ximao joc ximao tiquin' capari' hotowa ne. Joc joc piri' mao tarapari' pain xixi pan nein macan' pain ximijain cote ne com ca'. Ac i ma' na ca tomi' tococwa ma'.

Ca pan corom mao ne mam' horoho nuxut

²⁷ Juc in ximao ac caparut na hotowa pain cote ne com ma', pain Adriático ma', je i ma' wixinain cote ne com. Ca juc in ximao caparut ma', ca joc in ximao caparut ma', ma' 14 pin ac ne na xec pain ca joc in ximao caparut hotowa ma'. Xim pin iri na ne, pain iri' ximijain xim ma', toron ac ne na ximicocon co taramaja to nanain mam' horoho wa ma'. Ac ca wixicam pin xin na macan' ta nana. Taraju pin' nanain. ²⁸ Xopain tara com ca' ra ac caca na. Tacan querec xin ta ac caca na, tucu pe ac cacain na

arain too pain tamain macon, xin pocom ac cacain na, an piri' ac cacain na quem. Ma' 37 na metro nein ca xopain nein ta nana. Om om, ara mami' xin ta ac caca na, xin pocom mami' ac cacain na quem. Ma' 27 pin na metro nein ca xopain nein ta ac caca na. ²⁹Jin' pin ac caca na quem. Joc mi' tarapari' pain pacun hotowa ma' nana. Je ca xin caracam mi' cacain arain too ca xite tamana ma', ca to' om ho mao nain mam' horoho wa ma'. Ma' 4 na arain too cocon. Xin caracam to nanain pain nomoji mam' horoho wa ma'. Jain jain nana. Xec pa' hap xirapari' na nana quem.

³⁰Ma' ac caca na co taramaja to nanain mam' horoho wa ma', co tomi' xo' xucucun ma'. Jein noc xa ca' xuxun pain mam' horoho wa ca' nana, jein hwet ac cacain na tamain ma'. Ac ca xin caracam xin cote ne arain too pain tamain ca' tara me nana quem. Je ca an quiji' xin cacain wijimain mam' horoho wa pain com ma'. ³¹Ane querec pan cocon Paulo pain ca paca' xin cacain mam' horoho wa ne. Tomi' ac con na taramaxicon nucucun oro soldado Júlio cocon oro soldado nucun. Mo ta om to ho' cacapari' pain mam' horoho wa wari' ma', om ta witan ac iri' ta nonon. ³²Na ra ac caca na oro soldado ma'. Je ca wac piri' pin cacain macon ca mam' tucu xine wijimain mam' horoho wa ma'. Pan' mao ac nein na com, ho mao ac ne na quem.

³³Xec pin ta' iri na ne, tomi' mip ac caparut na Paulo. Na e' na pain ca cao' cao' xam' xi' ta. Ma' 14 pin ara xi' na xec pain ca toron ne ximixi' ca'. Om ca cao' xo' camain' iri' quem. ³⁴Je ca tomi' xuhu' ca' ac tococwa na. Cao' xi'. Na e' na pain ca cao' iri', ma' ta hwara' opa iri', ma' ta om cono' iri'. Om ta xica' pan' am iri' ta, taxi' ina, ac i ma' na ca tomi' caparut ma'. ³⁵Tomi' ac i ma' iri naporut ne, an ac cain na capam', tomi' ac con na Iri' Jam. Tomi' querec te inem pain ca mi' maparut pain capam' ca' Te Iri' Jam ac con na. Taraju taraju xam' urut con pain ca tomi' con Iri' Jam quem. Jicaracat pin iri nain ne, cao' ac ca na. ³⁶In ac ne na xumuxut. Cao' ac urut na quem. ³⁷Ma' mija urut pain ca to urut pain mam' horoho wa pane. Ma' 276 urut pane. ³⁸Ma'am ma'am pi' pin iri urut ne, wixicaracao' pocorocom wixicaracao' pocorocom pi' pin ac urut pain na oro tocwi trigo ca cut ho' urut ira. Ma' ta xite xite om pin ne mam' horoho wa ca' urut.

³⁹Xec pin iri na ne, querec paxi' urut pain macan' ma'. Ane om querec pin' cacain co taramaja to nanain mam' horoho wa ne. Querec e' nanain ca we' xuc mao ne com ca ma' namaji ma'. Tomi' xo' ac xucucun na: Ha' tarapari' pain ca joc piri' an tac xin mam' horoho wa pain namaji cain

ra? Ara querec xi' e' ac xucucun na. ⁴⁰Wac piripit ac cacain na macon ca mam' tucu cacain oro arain too ca xite ma', ca to' om ho mao mami' nain mam' horoho wa ma'. Ca wac piripit pocorocom cacain macori arain too oro xucucun ma', ca tacom' tacom' ac cacain na macon ca wara pao' to caca pain arain xinain pain nomoji oro xucucun ma' quem. Ma' ta na capari' pain ca joc wat xin ta nana. Cuc piri' ac cocon na cote ca wom nein mam' horoho wa quem. Ma' ta joc nein hotowa ta nana. Joc mi' xin paxi' nanain mam' horoho wa pain namaji pain cacarain com ma'. ⁴¹Ane tac mip nein namaji tamain mam' horoho wa ne. Om ca meo ac ne. Nomoji ma' iri na ne, caracat pin ac ne na pain ca wap tamana nein com.

⁴²To' parapa' pi' pin xuxun co pao' to iri' cwa' ac caca na oro soldado ma' quem. Mo ta na cocon pain ca pan caracam pan caracam hwet cacain cacarain com cain, jein mama' ac caca tara ta, tomi' ac i ma' paxi' nana. ⁴³Ane nain ho' con Paulo taramaxicon nucucun oro soldado ma' ne. Om na ta, ta to' parapa' pin huhun me ta tata. Tomi' ac caparut na: Wahu' pain ca pan caracam taxi' hwe ma', pocorocom cain' jein com ta. Wara pan caracam hwet jein cacarain cain. ⁴⁴Wahu' pain ca om pan caracam taxi' hwe ma' iri na ne, quep e' jein oro pana ma', je oro panaji mam' horoho wa ca caracat ma', mam' horoho hwet ac hwein tara cacarain ma' naparut pane. Ac i ma' urut quem, tomi' ha' urut con taramaxicon nucucun oro soldado. Ac i ma' na ca hwet hwet pi' pin urut pain macan'. Witan witan pi' pin ac urut na quem.

Ca to urut pain xixi pan nein macan' Malta ma'

28 Hwet pin iri urut pain cacarain com ne, tomi' querec ac urut cocon na oro wari' co to nanain i ma'. Cain' cain' ne wixinain xixi pan nein macan' ca' urut cocon. Malta na wixinain ta ac cacaparut na. ²Xiram pa' tamana nanaparut oro wari' nein Malta. Caraho' mi' nanaparut pain xe, xi capin' ara urut ta. Pan' na xowi' quem. Harahap je, nonoc jein xe ta ac cacaparut na. ³Cut moin' nain oro wijimain taparain pana Paulo ma' quem. Caraho' tain ta na. Caraho' tain iri na ne, hwet qui' ac ca na iri' caxicon em' ma'. Taqui' hwet ca' nain ca xain nein xe. Quio xat ac cain na micon. ⁴Querec iri nonon em' oro wari' ma' ne, pain ca quio xat cain micon ma', tomi' ac xucucun na: Ac ca iri' caracat ca na co ma' ta, iri' caracat ca ma' ira. Am to' pa' pin con wari' pane. Witan ca' paxi' nain cote

ne com ca', ane nain ho' pan con pain ca e' wa iri' jam nexi' co ara xo' taxipa' ma' ne, ac i ma' na ca tomi' xucucun. ⁵Ane xin wirao' xin wirao' pan' mi' con em' pain xe Paulo ma' ne. Om ca quio caxi camain' con. ⁶Ja' noro ac cocon na oro wari' ma' quem. Mom ho' tara con ra? Ane ane mi' pin tara, pan' mao ac ca tara ra? Ac i ma' na ca tomi' xucucun. Momon winim' momon winim' paxi' nonon pain ca to' ara con em' ma'. Ane om quio xirac camain' con ne. He ac caca na. Xucun iri' jam paxi' tara co cwa' ta na ca tomi' nucucun.

⁷Pe nain Malta taramaxicon ma'. Taramaxicon pe ho' nonon oro wari' ma' quem. Públio na wixicon. Ma' non oro macan'. Oro macaracon, totacon, xiricon ma' quem, om ca pira ca' nein ca nonoc to urut pain xe ma'. Harahap je, to ho' xine pain xuru ca' ac caparut na Públio. Hwet ac urut con na. Tomi' querec te tamana naparut. Ma' 3 na xec pain ca to ho' urut con pane. ⁸Caxi na cote ca quem. Terem' e' na. Xain na, conco' na quem. Mo querec ta' e' ac ca na Paulo ma', corom hwet ac con na. Tomi' mi' iri non con Iri' Jam ne, quep ac con na pain micon, quep xio pin ac con na quem. ⁹Quep xio pin iri non ne, maqui' maqui' pi' pin ac caca na oro wari' co caxi nana ma', co to nanain xixi pan nein macan' Malta ma'. Quep xio quep xio pi' pin ac tococwa na. ¹⁰Tomi' querec te tamana nanaparut pain ca quep xiho' cacaparut quem. Je ca cut mi' tamana cacaparut pain oro carawa. Je pain ca aram aram horoho mama' xi' urut ma' quem, cut ho' mi' nanaparut pain oro carawa pain mam' horoho wa. Ma' ta cao' hwe pain wanaji com ta nanaparut.

Ca paca' urut pain Malta ma', ca tan' mama' ac urut pain na Roma

¹¹Ac i ma' ac i ma' urut, aram aram ma' 3 pin ac ca na panawo' pain ca mon to wet urut pain Malta. Maji ta ac urut na, corom mama' ac urut pain na mam' horoho wa ma', ca maqui' nain Alexandria pane, ca wara piri' pe nain wapit pain Malta pane. Wara piri' pe nain Malta pain ca om nuru querec ne hotowa ira. Cawaxi' pa' pe tarapa' pain i ca' ta na waximain ira. Pain tamain mam' horoho nucun ma', wara ara an xiho' nanain jamicocon oro iri' jam nucucun co horoman toco' nana pain ca howa nucucun. Cástor na wixicon xucun, Pólux na wixicon xucun ma' quem. Corom mama' iri urut pain ne, horoho mama' ac urut na. ¹²Horoho horoho piri' to ac urut pain na wapit pain xijein cidade ma', Siracusa na wixinain. Ma' 3 na xec

pain ca mon to wet urut pain Siracusa. ¹³Horoho tiquin' mama' ac urut na, tan' mama' ac urut pain na xijein cidade ma'. Régio na wixinain. Xec pin iri na ne, pahop qui' ac nein quiricon xina na hotowa ma', pahop qui' nain waraxut. Horoho horoho tiquin' ac urut na. Xec pa' ac caparut na pain ximijain com. Xec pa' mami' iri naparut ne, tan' mama' ac urut pain na wapit pain xijein cidade ma'. Potéoli na wixinain. ¹⁴Je ca mam' to urut cocon xerexi' co howa nonon Jeju quem. To ho' xut pain xuruxut me ac cacaparut na, ma ac urut cocon na. Ma' 7 na xec pain ca to ho' urut cocon. Maqui' pin iri na xec nein ca xuruxut mama' xin Roma urut ne, paca' ac urut cocon na, xuruxut mama' ac urut na. ¹⁵Oro xerexi' co to nanain Roma cain, wara taraju nanaparut pain ca maqui' xi' urut quem. Maji xuruxut cam' xuxun e' ac caca na, winim' to ac cacaparut na pain ximijain wana. Ma' nana co winim' to nanaparut pain Ápio, ma' nana co winim' to nanaparut pain 3 Vendas ma', je i ma' oro wixinain xirim ca winim' to cacaparut pain ximijain wana. Querec iri nonon xerexi' Paulo ne, tomi' querec te ac ca na, tomi' ac con na Iri' Jam. Tomi' querec te inem pain ca xuruxut cam' cacaparut xuruxut cwa' ta Te non pain ca tomi' con ma'. Wa pin ac ne na ximicon.

Ca pijim' pe cain Roma Paulo

¹⁶Tan' mama' iri urut pain Roma ne, tomi' ac con Paulo na taramaxicon ma'. Noro rain xirim ca pe pan ta' ma ma'. Ma' xica' pe tara soldado co querec wet nem. Pe ho' terem pain xurum ta non.

¹⁷Ma' 3 pin iri na xec pain ca tan' mama' urut ne, mo tomi' cut in jujun oro taramaxicon nexi' pain ca judeu iri' ca', co to nanain Roma ca' ac ca na Paulo, maqui' ac caca na. Cut in iri xucucun ne, tomi' ac tococwa na. Pijim' xim inuhu' ta oro win ma' ne. Om paxi' na ca ara cup toton oro win ma' nexi' pane. Om paxi' na ca ari tain oro ca ara je cacapari' oro hwanana nexi' pane quem. Ane quep cacapa' pain Jerusalém oro win ma' nexi' ne. Tao' pe jun ta ac cocon na oro romano, tao' pe ac cacapa' na. ¹⁸Tomi' querec ac cacapa' na oro romano. Ma' carawa ca ara ma? Para quep quequem ma' quem ac cacapa' na. Taxi' pin ac cacapa' na, om ca pan tem ma, om xi to' pa' pin xima, xi pan tem ma ta ac cacapa' na quem. Pa hwet xim paxi' nanapa' pane ira. ¹⁹Ane tomi' in pin pan cocon oro romano oro taramaxicon nexi' pain ca judeu iri' ne. Ta pa hwet hun me ta nonon

oro romano pata'. Je ca na e' capa' pain ca tomi' toton oro romano pane, tomi' querec pan xirapa' iri' taramaxicon César na ina ta inonon pane. Je ca maqui' ta' ca' quem. Om paxi' na ca tomi' em' pan toton oro win judeu iri' ca'. ²⁰Je ca maqui' ca' je e' xuhu' ca' quem. Querec xuhu' inuhu'. Tomi' xo' xuhu' inuhu'. Pao' pe nanapa' pain arain too ca', xi om ne ca howa ara ton Cristo co winim' iri' pain ca wari' nein Israel iri' ca'. Ac i ma' na ca tomi' cocon oro taramaxicon nucucun oro judeu Paulo ma'.

²¹Tara pum ta ac caca na. Oro win ma' nuxut co to nanain Judeia cain, om ca xirao' mi' cacaparut pum. Co maqui' nanain i cain quem, om ca tomi' hwet cacaparut pum, om om nana. Om paxi' na ca tomi' napat quequem quem. ²²Ane taxi' urut cocon oro wari' pain oro xijein macan' ne, taxi' urut cocon pain ca tomi' napat tomi' napat xam' cocon oro win ma' nem co howa nonon Jeju ma'. Je ca taraju xim urut pum pain ca tomi' hwet maparut pain ca coromicat nem ma', pain ca howa nem con Jeju ma' na ca tomi' cocon ma'.

²³Je i ma' ta ac ca na Paulo ma', an pe xo' ac cacain na xec nein ca cut in mami' xi' caca ma'. Maqui' iri' na xec nein ne, in hwet ac cocon na Paulo pain xiricon. Ma' mija nana oro win ma' caca co o qui' caca ma' quem. Hwet nonon Paulo pain xo' xec, pijim' pijim' ac tococwa na. Pijim' xo' tata con Iri' Jam ma', pain ca taramaxicon pe ho' xim capari' con Jeju. Noro mi' tata pain oro ca xirao' nucun Moisés je oro ca xirao' nucucun oro profeta ma' quem. Momon pijim' pijim' mi' ac tococwa pain na. Ma' ta taraju pa' hwe ta tata. Howa xiroron Jeju na paxi' tata pain ca pijim' nucun. Momon pijim' momon pijim' irawin pa' ac tococwa na. ²⁴Ma' paxi' nana co xin ne nana ma', ane om howa caca oro xucucun ne. ²⁵Tomi' caracan pan ac xucucun na, in mama' xi' ta ac xucucun na quem. Mama' xi' iri' nana ne, tomi' mam' pan ac cocon na Paulo. Tomi' iri'o' nonon hwanana nexi' Tamataracon Iri' Jam pane, pain ca an xin tiquin' mi' roron pain ca tomi' ne ta con profeta Isaías pane. Ca' na ca tomi' tococwa pane:

²⁶Mo hwet roron oro wari' ne ma'.

Ca' na ca tomi' cuhu' Iri' Jam ta roron:

Taraju wet ho' taraju wet ho' paxi' hwein capija ca',
ane om taraju pa' hwein ne.

Om ta taraju pa' camain' hwein quem.

Querec ho' querec ho' paxi' hwein oro ca ara ta' quem,
ane om querec pin' hwein ne.

Om ta querec pin' camain' hwein quem.

²⁷ Xi coromicat xo' je na hwe ta.

Ac ca tatep pa' hwein na tarajuhu'.

Ac ca pi'am to hwe na quem.

Xi miri'om ara mahu' ta.

Mo xi om ac i ma' hwe,

na ac cuhu' xira pain ca querec pin' mahu'.

Na ac cuhu' xira pain ca taraju wet mahu'.

Na ac cuhu' xira pain ca taraju pa' hwe pain iri' xumuhu'.

In hwet ac mahu' xira,

to' witan ac xuhu' xira quem.

Ac i ma' na ca tomi' cocon hwanana nexi' Tamataracon Iri' Jam pane ta tata.

²⁸ Je ca tomi' xuhu' ca', taraju pa' jein ca tomi' xuhu' ca' ac tococwa na. Noc paxi' hwein ca howa wa capiiacon Iri' Jam ca tomi' hwet napari' pain ca to' witan xim ta capari' ca'. Ane pijim' mi' xun tococwa pain oro wari' co om judeu nana ne. Howa tatarain ta na ca tomi' tococwa ma'. ²⁹ Tomi' ac i ma' iri tata ne, hwerehwet mama' ac caca na. Ca hwerehwet mama' caca ma', ca mana' mana' caracan xucucun ma'. Mija na ca tomi' caracan xucucun.

³⁰ Mon to wet ac cain xiricon na Paulo ma'. Xiricon paxi' na, mi' mi' non pain dinheiro waximain xirim, pe pan ac cain na. Ma' 2 na cawaxi' pain ca pe cain pane. Oro wari' co tomi' xun nonon ma', co hwet xun nonon pain xiricon ma', hwet ac cocon na. Maqui' hwe, maqui' urut ta ac xucucun na, tomi' querec te tomi' querec te ac xucucun na. ³¹ Pijim' mi' ac tococwa na pain ca taramaxicon pe ho' capari' Iri' Jam ca'. Ca' na tata con Taramaxicon nexi' Jeju Cristo quem. Om ca pijim' jin' tococwa, pijim' hwara' opa tata. Om ca nain ho' tocwa pain ca pijim' wa quem.

Je i ma'.

Romanos

Ca xirao' mi' tococwa co howa nonon Jeju pain Roma

1 Paulo ina pain ca xirao' mi' xuhu' ca'. Wari' nucun Jeju Cristo ina pain ca taramaja mi' e' ton ca' quem. Tora' napa' Iri' Jam pain ca apóstolo ra capa' pane, pain ca tomi' hwet rain capija ca tomi' xim ca', tomi' hwet rain capija ca tomi' hwet nuhu' pain ca to' witan xim cuhu' Jeju ta capa' pane quem. ²Main taraju jein capija con Jeju ta napari' Iri' Jam pain cara pane. Wiricoco oro profeta nucun co xirao' pe nanain pain capijacon pane quem.

³Pain ca tomi' capari' pain capijacon ca tomi' hwet napari' pain ca to' witan xim capari' ca', tomi' hwet napari' con Panxica. Pain ca wari' nucun Panxica pane, hwanana ne non taramaxicon Davi cara pane. ⁴Pain ca Iri' Jam nucun pain ca om caracat nucun quem, Panxica Iri' Jam na quem. Wirico Iri' Jam co an hwet pe non pane, pain ca an hwet pe cain ca hwara' opa nucun pain ca to' e' mami' con pane. Taramaxicon nexi' Jeju Cristo cwa' ira! ⁵Tomi' hwet jein capija naparut Iri' Jam pane, pain ca taramaja mi' jun Jeju ta caparut pane. Awi tamana na ca taramaja mi' tocwa quem, pain ca tomi' hwet xine capijacon ca'! Wirico Jeju co mi' naparut pain ca taramaja mi' urut con ca'. Ma' ta howa cacapa' oro wari' pain oro xijein macan' ta naparut. Ma' ta tomi' ha' cacapa' quem naparut. ⁶Tomi' nuhu' quem, howa je nuhu', tomi' ha' je nuhu' quem. Wari' nucun Jeju Cristo je ta nuhu' quem.

⁷Je ca xirao' mi' xirao' mi' pi' pin xuhu' ca', pain ca to hwein Roma ma'. Xirao' mi' inuhu' pain ca om noc cuhu' Iri' Jam pain ca oro wari' ne pin cuhu' ma'. Param inon Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param inonon pain ca mi' cucuhu' pain ca om toron ne xumuhu' quem.

1.2 Wari' co profeta ma', tomi' hwet taxipa' nain capijacon Iri' Jam ca an hwet mi' non Tamataracon.

Ca tomi' querec te inon Iri' Jam pahu' ta ca Paulo

⁸Tomi' cain' xuhu' pain i ca' quem: Tomi' querec te inon Iri' Jam ne cwa' pahu'. Wirico Jeju Cristo co mi' napa' pain ca tomi' querec te ton pahu'. Xi om ne ca taraju taraju xam' ara cucuhu' oro wari' pain oro xijein macan'. Howa nonon Jeju ta nunuhu' oro wari' pain oro xijein macan'. ⁹Taxi' napa' Iri' Jam co taramaja mi' tamana ta' cwa', pain ca tomi' hwet tain capijacon ca tomi' hwet napari' con Panxica cwa'. Taxi' napa' pain ca tama' mam' pe wet xuhu' ¹⁰pain ca tama' tomi' mi' xuhu' con. Ca' inon pain ca tomi' ton pahu': Mo ta param mapa' pain ca aram aram mo querec toton, mi' ne pain ca mo hwet toton quem inon. Am xiram pa' mapa', mi' ne pain ca aram aram mo querec toton quem inon pahu'. ¹¹Querec xitoton na inuhu'. Ma' ta quep xiho' xuhu' pain ca tomi' hwet xuhu' pain oro ca awi nucun Iri' Jam ca mi' xim capari' Tamataracon ca' inuhu'. Ma' ta to' hwara' opa xuhu' pain xumuhu' ta inuhu'. ¹²Je ca tomi' xuhu' ca': Querec iri xijexi' ne, tomi' querec te caracan ac xijexi' tara. Mo ta querec pin' mahu' pain ca howa cara ton Jeju cwa', to' hwara' opa ac xuhu' tara. Mo ta querec pin' xuhu' pain ca howa cara hun quem, to' hwara' opa ac mahu' tara quem.

¹³Je ca tomi' xuhu' ca' xere: Taraju pa' jein i ca': Mija paxi' na ca mo querec xim paxi' xuhu' pane. Ane om ha' capa' pane ne. Tama' mo querec xim paxi' inuhu'. Ma' ta quep xiho' xuhu' inuhu'. Ma' ta horon horon tiquin' hwe con Iri' Jam ta inuhu'. Win ne ca quep xiho' toton oro co om judeu nana cwa', ac i ma' xuhu' quem inuhu'. ¹⁴Ac ca dever toton ara xi' na oro wari'. Dever dever xam' inonon. Dever inonon co to nanain oro cote ne cidade. Dever inonon co to nanain mi. Dever inonon co xirao' taxi' nana, dever inonon co om xirao' taxi' nana quem. ¹⁵Je ca pijim' xim xuhu' pain ca to hwein Roma ma'. Param tamana inain. Tomi' hwet xuhu' pain capijacon Iri' Jam ca tomi' hwet nuhu' pain ca to' witan xim cuhu' Jeju ta inuhu'.

Ca hwara' opa nucun Iri' Jam ca tomi' hwet napari' pain ca to' witan xim capari' Jeju

¹⁶Xi wixipa' ta' pain capijacon Iri' Jam ca tomi' hwet napari' pain ca to' witan xim capari' Jeju ta. Om ca wixipa' ta' pain. Howa inain. Hwara' opa

ara xi' na. Iri' ca hwara' opa nucun Iri' Jam ta. Je ca mam' to' witan pin tococwa oro wari' co howa nana. To' witan xuhu' cain' tata oro win judeu ta' cwa', to' witan xuhu' quem ac tococwa na oro win ma' hwe pain ca om judeu hwe ma' quem. To' witan to' witan xam' napari' pain ca howa iri' ca'. Mam' to' witan pin napari' pain capiijacon ca tomi' hwet napari' con Jeju cwa'.

¹⁷ Pain ca tomi' xo' capari' pain capiijacon con Jeju cwa', je ca an hwet mi' capari' pain ca to' hohot pin capari' Iri' Jam. To' hohot pin napari', xi om ne ca howa ara xun ca'. Xica' pe na ca howa nexi', je ca to' hohot pin capari' ca'. Je ca xirao' pe xine pain capiijacon Iri' Jam ca'. Ca' na con:

E' cara tara wari' co to' hohot ta' cwa',

xi om ne ca howa ara capa' ta,

ac i ma' na ca xirao' pe xine pain capiijacon Iri' Jam pane.

Ca wap toton cocon oro wari' Iri' Jam pain ca caracat nucucun

¹⁸ Je ca tomi' xo' capari' Iri' Jam cwa': Mana' inonon oro caracat, wap inonon ta na. Wap inonon oro caracat co miri'om nanapa' ma', co pan teretem nana ma' quem na. Wap wap xam' inonon oro wari' co pan teretem nana, co to' i'ina nonon oro win ma' caca pain ca taraju xin paxi' cacain capiija ca iri'o' ca' na quem. ¹⁹ Hohot na pain ca wap cocon oro wari' Iri' Jam. Xi querec pin' ara cacain oro ca ara ca ma', ca querec pin' je capari' pain ca wari' nexi' ca'. Wirico ara xi' na co an hwet pe mi' pan xucun ma' cocon. ²⁰ Pain cara pane, pain ca xo' ma' ten qui' xine macan' pane, querec pin' ac tocwa na. Om paxi' na ca querec pan xun. Ane querec pin' xin ca hwara' opa nucun ca om pi' ra ha' ma' ne. Querec pin' irin ca Iri' Jam nucun quem. Ha' napari' pain ca querec pin' xun. Xi om ne oro carawa ca tomi' ma' pin ca ca'. Je ca om tomi' narain ho' ac xucucun oro wari' cwa'. ²¹ Om paxi' na ca pijim' querec tococwa pain capiijacon Iri' Jam pane, ane taxi' cocon ne. Taxi' paxi' nonon, ane om in ac jun na caca ne. Om ca Iri' Jam ma ta nonon. Miri'om nonon, om ca tomi' querec te urut pum pain oro carawa ca mi' maparut ca' cocon, om na. Coromicat ximama' e' nana. Om ca coromicat xo' ac caca. Ac ca jitacat ne xim na pain ca coromicat nucucun pain ximicocon. ²² Coromicat xo' urut ta paxi' nana, ane om coromicat xo' caca ne. Tamanain pin nana. ²³ In ac xiroron Iri' Jam co om mi' pin ra ha' ma', tomi' querec te xiroron. Ane noc cocon ne.

In ac e' nanain oro caji pacun ca an xiho' non wari' co mi' pin ma'. Tomi' querec te e' nanain oro caji pacun ca an xiho' non me je carawa je oro caji carawa ca ju macan' ma' quem.

²⁴ Je ca pin caca ma' ne cocon Iri' Jam ma'. Mo ta param ximama' hwein oro ca om awi wa ma', je i ma' pahu' ta nonon, quep ximama' ac caca na, mija nana. Wixipa' ara xi' wa pain ca ara caracan xucucun. ²⁵ Howa howa om pin nonon Iri' Jam co iri'o'. Howa e' nanain ca om iri'o' wa. In ac e' nanain oro carawa ca tomi' ma' pin ca Iri' Jam, tomi' querec te nanain, pe torotop mi' nanain quem. In ac pan xiroron Iri' Jam, tomi' querec te pan xiroron, pe torotop mi' pan xiroron Iri' Jam co tomi' ma' pin nain oro carawa. Tomi' hwet cara xirarain ca awi tamana nucun. Amém, iri'o' na ca tomi' ne ta.

²⁶ Pan teretem pin ara xi' nana. Je ca pin caca ma' ne cocon Iri' Jam pane. Ca narima' nequequem ma' quem, pin cacama ne nanam quem. Je i ma' pahu' nanam, ara cara jein oro ca param ximama' nuhu' ta nanam. Wixipa' ara xi' wa pain ca ara nequequem ta. Param param om pin nonon tarama', param caracan ac xequequem na, quep caracan ac xequequem na. Om xi ac i ma' cacama ta! ²⁷ Ac i ma' na ca tarama' nucucun ma' quem. Quep quep om pin nanam narima', param ximama' ac xucucun na pain ca tarama' nucucun, quep caracan ac xucucun na. Wixipa' ara xi' wa. Je ca wap tococwa pane. Xi caracat tamana ara hwe ta tata. Hohot na ca wap tococwa ta.

²⁸ An to pin xun Iri' Jam, om ta mam' pe wet mami' xun ta nana. Je ca pin caca ma' ne tococwa pane. Wirico Iri' Jam pan na co pin caca ma' ne nonon pane. Coromicat pan teretem cara je ta ac tococwa na. Ara cara jein oro ca om awi wa ta ac tococwa na quem. ²⁹ Mija na ca caracat nucucun. Pan teretem tamana nana. Querec param ximama' nanain caramaxicocon oro win ma' caca. Om ca xumu xo' camain' caca. Mija na ca noc mi' xucucun pain oro carawa. To' parapa' caracan xucucun. Tama' mana' caracan xucucun. Mixein xucucun. Tama' coromicat mi' xucucun pain ca pan teretem wa. Tama' tomi' nanain waracocon oro win ma' caca. ³⁰ Tomi' xirac nonon oro win ma' caca. Noc nonon Iri' Jam. Tomi' ximama' nonon oro wari' pain ca tomi' xec xec caca pain ca tama' xin to caca quem. Coromicat nanain oro ca pan teretem wa pain ca ara xin i ca' caca. Om ca tomi' ha' cocon mana cote caca cacam waram jicocon. ³¹ Om ca coromicat xo' caca. Om ca ara cacain ca wara tomi' pe nucucun. Om ca xiram pa'

xucucun pain ca nari xucucun. Om ca xiram pa' camain' cocon oro win ma' caca quem. ³²Taxi' paxi' nonon Iri' Jam pain ca tomi' in pin cain ca ara caca ma', pain ca cono' ma' tatara ne tococwa oro wari' co ac i ma' nana ma'. Ane ara ara tiquin' cacain ne. Ara ara tiquin' pan nanain, tomi' querec te tata oro xucucun wari' co ara nanain ma' quem.

Ca na e' ne pain ca wap tococwa oro wari' pain ca caracat nucucun

2 Je ca tomi' xuhu' ca'. Taxi' urun Iri' Jam pain ca wap mip cocon oro wari' co pan teretem ac i ma' nana ma'. Na e' na pain ca wap cocon quem. Je ca tomi' xuhu' ca', tomi' inem pain ca tomi' em' momon oro xucucun wari' co pan teretem nana ma'. Tomi' em' iri momon pain ca pan teretem nucucun ne, tomi' em' pan ac xijem na quem, xi an xiho' ara momon pain ca pan teretem nucucun ta. Om ca nain ho' ac xijem pain ca pan tem nem ta. ³Wum pain ca tomi' em' momon ma', tomi' em' paxi' momon oro wari' co pan teretem nana ma'. Ane pan tem pan ma quem ne. An xiho' momon. Cain' cain' xima quem? Cain' cain' ne ca coromicat nem ma' quem? Om ta wap capa' pain ca pan tem ne ca' ma' mon Iri' Jam ra? ⁴Wa inem me. Ac ca coromicat ca' ma na: Xiram pa' tamana napa' Iri' Jam ta. Winim' cara napa'. Om ta wap hap capa', ac i ma' tara ca coromicat pan tem nem ra? Cain' cain' xima quem? Winim' cara paxi' nem. Je xi querec pin' mon pain ca awi nucun pain ca om wap hap quem ma' quem? Xiram pa' e' nem. Ma' ta cwirin' pin ma ta nem.

⁵Ane opain ne xumum ne. Om ca cwirin' ra na ma. To' hwara' pin main ca mana' nucun Iri' Jam pain ca wap xim quem ma'. Ame ma e', maqui' iri tara xec nein ca an hwet pin tain cain ca mana' nucun ma' ne, wap ac cocon tara oro wari' co pan teretem nana ma'. Tomi' an hwet xo' ac cain tara oro ca pan teretem nucucun. ⁶Tomi' tomi' xam' ac cocon tara oro wari': Win hwe pane, win ne ca ara ara hwe pane ac cocon tara, mi' ac cocon tara pain ca taramaja mi' caca ma'. ⁷Oro wari' co tama' ara nanain oro ca awi wa pain ca win xumu cacain ca tomi' querec te nucun Iri' Jam ma', coromicat ca' ac caca na: Tomi' querec te tarapari' Iri' Jam ta. Hohot hwe tarapari', to' e' cara xuhu' tarapari' ta nana. Wiricoco tatara co mi' wawa pain ca e' cara wa. ⁸Co tama' win xumu e' nanain ca param pan nucucun ma' iri nana ne, pain ca om tomi' ha' cacain capiacaon Iri' Jam ca iri'o' ma', je pain ca param e' cacain ca pan teretem wa ma', wiricoco

tatara co mana' tamana ca Iri' Jam. Wiricoco tatara co wap tamana ca quem. ⁹To' jain jain totoron Iri' Jam. To' i'ina to' i'ina xam' totoron oro wari' co pan teretem nana. Wap cain' totoron oro judeu cwa', wap ac cocon tara oro co om judeu nana ma' quem. ¹⁰Ane tomi' querec te toton cocon oro wari' co tama' ara nanain ca awi wa ne. Hohot hwe ta totoron. Tomi' querec te inuhu' ta totoron. Mi' xuhu' pain ca om toron ne xumuhu' ta totoron. Tomi' cain' ac i ma' totoron oro win judeu ta', tomi' ac i ma' ac cuhu' tara pain ca om judeu hwe ma' quem. ¹¹Om ara xi' na ca tomi' querec te paxica' ca Iri' Jam ta. Ac wiricoco ac wiricoco pi' pin nonon oro wari' ta.

Ca wap xun tococwa oro wari' co caracat nana ma', oro co om judeu nana ma', wiricoco oro judeu ma' quem

¹²Je ca tomi' xuhu' cocon oro wari' co caracat nana ma'. Oro co om judeu nana ma', om ca taxi' cacain ca xirao' nucun Moisés. Caracat iri nana ne, pan' ara'am ac caca na. Om paxi' na ca taxi' cacain ca xirao' nucun Moisés. Je i ma' ira, wap ac tococwa tara. Co judeu nana ma' iri nana ne, co ma' nonon ca xirao' nucun Moisés ma', caracat iri nana ne, em' hwe ta ac tococwa na. Xi tomi' ha' hwein ca xirao' nucun Moisés ta tata. ¹³Xi hohot caca oro wari' co taraju e' nanain ca xirao' nucun Moisés ta. Om ca hohot cocon Iri' Jam. Hohot e' nonon oro wari' co tomi' ha' nanain ca xirao' nucun Moisés. ¹⁴Ma' na xijein quem, cocon oro co om judeu nana ma'. Om paxi' na ca taxi' cacain ca xirao' nucun Moisés. Tomi' ha' ximama' iri nanain ne, pain ca taxi' ximama' ne ximicocon pain ca coromicat nucucun ma', tomi' ha' ximama' iri nanain ne, je ximicocon pain ca coromicat nucucun ca tomi' ha' je nonon ma'. Om paxi' nonon ca xirao' nucun Moisés, ane maqui' nein ximicocon ca tomi' ha' nucucun ne. ¹⁵Ac ca ma' cocon na ca xirao' nucun Moisés pain ximicocon, ac ca wara taxi' ximama' cacain na oro ca tomi' nein. Xi om ne ca tomi' ha' ximama' ara cacain ta. Coromicat pan ne ximicocon ma' ira. Tomi' ca' xucucun pain ximicocon pain ca coromicat nucucun: Pan tem ina ta xucucun pain ca querec pin' cacain ca pan teretem nucucun. Om ca pan tem ta', ara xo' ina, ac i ma' xucucun pain ca tomi' caho' pan xucucun quem. ¹⁶Ac i ma' tara pain xec nein ca tomi' ton con Jeju Cristo Iri' Jam quem. Tomi' an hwet to rain oro ca pan teretem nucucun oro wari' ma', pain ca coromicat

nucucun ca joc xim caca ma', ac i ma' tara ca tomi' ton con Jeju Cristo Iri' Jam. Je ca tomi' ne capijacon Iri' Jam ca tomi' hwet napari' con Jeju ca'. Je ca pijim' ta' ca' quem.

**Ca na e' ne pain ca wap tococwa oro judeu co om tomi'
ha' nanain ca xirao' nucun Moisés**

¹⁷ Je ca tomi' xuhu' ca', tomi' inem pain ca judeu ma ma'. Cain' cain' xima quem? Hohot ina, xi judeu ara ta' ta ma. To' witan pin napa' ca xirao' nucun Moisés ta ma. Wari' ne napa' Iri' Jam quem ma, ac i ma' na ca tomi' xec xec nem pain ca coromicat pan tem nem ma'. ¹⁸ Taxi' inain ca param nucun Iri' Jam ta ma. Querec pin' inain oro ca awi wa, querec pin' inain oro ca om awi wa quem, xi om ne ca ca' na ara cacapa' pain ca xirao' nucun Moisés ta ma. ¹⁹ Ca' na taxi' inonon xi' ma momon oro wari' co om taxi' nanain ca xirao' nucun Moisés quem. Cain' cain' xima quem? Ac ca coc papan o mama' toton momon na oro wari' co om tococon. Ac ca joc xec mi' toton pain naran ta momon na oro wari' co to nanain ca jitacat nein quem, ac i ma' na ca coromicat pan tem nem. ²⁰ Hu taxi' inonon xi' ma momon oro wari' co om coromicat xo' nana ma'. Ca' na taxi' inonon xi' ma momon oro wari' co ac hwijima' nana pain ca om ac ximicon hwanana caca ma' quem. Taraju pa' taraju pa' pi' pin ina xi' ma ma, iri'o' iri'o' pi' pin na xi' ma main oro ca tomi' nem. Xi taxi' ara tain ca xirao' nucun Moisés ta na ca coromicat pan tem nem ta.

²¹ Je ca tomi' xim ca': Hu paxi' momon oro wari'. Je xi hu qui' xijem quem? Ta an noc xa ma me ta paxi' momon. Je xi om an noc xa qui' ma quem? ²² Ta quep hwem xequem narima' me ta paxi' momon. Je xi om quep qui' mam xequem narima' ma' quem? Noc paxi' main oro caji pacun ca Iri' Jam xi' ma caca oro co om judeu nana ma'. Je xi om jain jain qui' main quem, pain ca an noc xa main coximinain oro xirinain ca tomi' querec te to cacain quem? ²³ Ma' napa' ca xirao' nucun Moisés ta paxi' ma pain ca tomi' xec xec nem ma'. Je xi tomi' ha' qui' main quem? Cain' cain' xima? To' ara pin momon oro wari', tomi' xirac ac cocon na Iri' Jam pum. ²⁴ Je ca xirao' pe xine pain capijacon Iri' Jam pum:

Tomi' xirac nanain wixicon Iri' Jam oro co om judeu nana ma' pum, ac i ma' na ca xirao' pe nein.

²⁵Ac i ca' na ca coromicat nem ma' quem: Quep xiho' napa' ca wac xirac cacain taparinain ca xirac nucucun, je ca tomi' querec te capa' Iri' Jam ta ma, ac i ma' na ca coromicat pan tem nem ma' quem. Cain' cain' xima quem? Mo ta tomi' ha' main ca xirao' nucun Moisés ma', je i ma' tara ca quep xiho' qui' quem ca wac xirac xima ma'. Mo ta om tomi' ha' main quem, om ca quep xiho' quem ca wac xirac xima ma'. Ac ca om wac xirac xima na. ²⁶Mo ta tomi' ha' cacain ca xirao' nucun Moisés oro co om judeu nana ma' quem, co om wac xirac wawa pain taparinain ca xirac nucucun ma' quem, hohot totoron Iri' Jam ta. Tomi' ca' totoron Iri' Jam, ac ca wac xirac xihwe na, xi om ne ca tomi' ha' ara hwein ca xirao' nucun Moisés ma', ac i ma' tara ca tomi' cocon. ²⁷Noro ron wari' co om judeu ma', co om wac xirac wa pain taparinain ca xirac nucun ma'. Mo ta tomi' ha' cain ca xirao' nucun Moisés ma', to' querec pin' ac quem tara pain ca pan tem nem ma'. Xi tomi' ha' ma ta. Taxi' paxi' main ca xirao' nucun Moisés ma'. Wac xirac paxi' main taparinain ca xirac nem ma'. Ane om tomi' ha' ma ne.

²⁸Je ca tomi' xim ca': Om ca judeu ca wari' co judeu e' na pain curucun ma', co wac xirac e' wa pain taparinain ca xirac nucun ma'. ²⁹Om ca judeu ca wari' co tomi' ha' e' nain ca xirao' nucun Moisés ta. Judeu na wari' co iri' judeu pain iri' ximicon ma', co ac ca wac xirac xine na pain iri' ca coromicat nucun. Je Tamataracon Iri' Jam ca wac xirac non ma'. Wari' co wac xirac ac i ma' wa, wirico co hohot napa' ta ca Iri' Jam. Om na wari' co hohot na ta non.

Ca ja' tomi' querec te toton cocon oro judeu Iri' Jam. Ane hohot cara ara ne ca wap toton cocon pain ca caracat nucucun ne

3 Je ca tomi' xuhu' ca'. Om ca quep xiho' caparut ca judeu nuxut ra? Om ca quep xiho' caparut ca wac xirac xine taparinain ca xirac nuxut quem ra? ²Quep xiho' naparut ta! Quep xiho' tamana naparut ca judeu nuxut ca', xi wiricoco hwanana nuxut ara caca co tomi' ca Iri' Jam pane, pain ca querec wet jein capija ta tococwa pane.

³Ma' paxi' nana oro judeu co om howa nana cwa'. Cain' cain' xirara quem? Pain ca om howa nucucun ma', an in tarain capijacon ca wara tomi' pe pan caparut Iri' Jam pain ca ja' tomi' querec te xuhu' ta caparut pane ra? ⁴Om na ta, om ca an in camain' cain capijacon. Ara cara nain, iri'o' cara na Iri' Jam quem. Wiricoco oro wari' pan nana co tama' mixein

nana ma'. Win ne ca tomi' ca Davi cara pane, pain ca tomi' con Iri' Jam pane. Ca' non pane:

Querec pin' teterem oro wari' pain ca tomi' iri'o' nem ma'.

Tomi' em' paxi' teterem.

Ame ma e', main na ra teterem pain ca tomi' nem ta, ac i ma' na ca tomi' con Iri' Jam Davi pane.

⁵Mo xi tomi' ca' xixi': Om na, mam' querec pin' ta ca tama' ara xo' nucun Iri' Jam pain ca pan teretem nexi' ta, mo xi tomi' ac i ma' caca. Cain' cain' xira quem? Mo xi ac i ma' ne, hohot ac ne xira pain ca tomi' ximama' xin i ca' quem, pain ca pan tem a xira Iri' Jam pain ca wap capari' ca' xi'. Cain' cain' xita' quem? An xiho' a xitain ca wari' wa pain ca tomi' ximao ne ta! ⁶Om na, om ca tomi' ac xin i ma' ta. Mo xi ac i ma' ne con, om xi wap ac tococwa oro wari' ma' quem.

⁷Mo xi tomi' ca' ca wari' ma' quem: Om na, mixein iri ina ne, je ca an hwet pe tain ca iri'o' nucun Iri' Jam ta. Querec pin' ac tocwa na pain ca awi nucun pain ca hwara' opa nucun pata'. Je xi om wap cara qui' capa' quem, am ac i ma' ne ca tomi' ximao nucun ma'. ⁸Cain' cain' xira quem? Mo xi iri'o' ne ca tomi' ximao ac i ma' ca ma', je xi tomi' ximama' ca' xi' quem: Pan teretem xi', ma' ta awi na ta tocwa Iri' Jam ta, ac i ma' xixi'. Ma' ara xi' nana wari' co tomi' ac i ma' na ta nanapa' pain ca tomi' ximama' nucucun ma'. Na e' na pain ca wap tococwa pain ca pan teretem nucucun Iri' Jam ta.

Ca caracat caracat pi' pin iri'

⁹Cain' cain' urut quem, pain ca judeu urut ca'? Awi tiquin' ca' urut pahu' pain ca om judeu hwe ma' ra? Om na ta. Hwara' opa pe ho' hwara' opa pe ho' xam' ara xi' napari' ca caracat nexi' ta. Ca judeu urut ca', ca om judeu hwe ma' quem, hwara' opa pe ho' hwara' opa pe ho' xam' napari' ca caracat wa, wara tomi' xo' ac i ma' inuhu' ta. ¹⁰Win ne ca xirao' pe xine pain capiacaon Iri' Jam quem. Ca' na:

Om na wari' co hohot non Iri' Jam.

Om ca ma' camain' ca wari' co hohot non.

¹¹Om na wari' co taraju pa'.

Om na wari' co win xumu non Iri' Jam.

¹²Xuruxut ni xuruxut ni pi' pin ca' nanain wanaxicon
Iri' Jam oro wari'.

Pan teretem pan teretem pi' pin nana.

Om na wari' co ara xo',

om ca ma' xica' pe camain' ca wari' co ara xo'.

¹³Om ca awi camain' ne capijacocon.

Tomi' xirac tamana nana.

Ac ca cunu cunu qui' ne curucun jima na pain ca pa xat ne

manain pacun ca an corom pe tocwa ma',

ac i ma' na ca cunu ne ca tomi' xirac nucucun.

Tama' tomi' mixein nana.

Oro ca tomi' xirac nucucun ma', ac ca huru huru qui' ca caxicon

em' co huru cono' napari' ma' na.

¹⁴Tama' tomi' noro nana pain ca mana' tamana nucucun.

¹⁵To' parapa' hap nonon oro win ma' caca ma' quem.

¹⁶Ja' em' pin nonon oro win ma' caca,

ja' ximin nonon quem.

¹⁷Om ca tomi' querec te taxi' cocon oro win ma' caca.

Mana' cara xucucun, toron cara na ximicocon quem.

¹⁸Om ca in ac taxi' cocon Iri' Jam,

om ca tomi' ha' taxi' cocon quem.

Ac i ma' na ca xirao' pe xine pain capijacon Iri' Jam pain ca caracat caracat
pi' pin caca oro wari' ta capari' ca'.

¹⁹Je ca tomi' xuhu' ca'. Oro ca tomi' nucun Iri' Jam cwa', pain ca xirao'
nucun Moisés ma', tomi' tata oro judeu, tomi' tomi' pi' pin napari' quem.

Ma' ta tomi' narain ho' tomi' narain ho' om pin xujuhu' pain ca pan teretem
nuhu' ta napari', ma' ta hehe pin hwe ta napari'. Ma' ta querec pin' xujuhu'
pain ca om hohot mahu' ma', pain ca wap xim xuhu' ca' napari' quem.

²⁰Je ca tomi' xuhu' ca': Om ca ma' camain' ca wari' co tomi' ca' ca Iri'
Jam cwa': To' hohot pin inem, xi om ne ca tomi' ha' ara main ca xirao'
nucun Moisés ca', om ca ma' camain' ca wari' co tomi' ac i ma' wa. Mam'
to' querec pin' e' napari' pain ca caracat nexi' ca xirao' nucun Moisés ta.

Ca to' hohot pin capari' Iri' Jam pain ca howa xun Jeju

²¹ Ane om ac i ma' ne pain xocori ca' ne. An hwet mi' ho' napari' pain ca coromicat nucun Iri' Jam ca', pain ca to' hohot pin xuhu' ta capari' ca'. Om ca tomi' mami' capari' pain ca tomi' ha' jein ca xirao' nucun Moisés ma', ma' ta to' hohot pin xuhu' ta capari', om ca tomi' ac i ma' mami' capari'. Ca coromicat nucun ca an hwet mi' capari' pain xocori ca', xirao' pe nain Moisés cocon oro profeta cara pane quem. Ca' na ca coromicat nucun: ²² Wata' tara co to' hohot pin nuhu' ta napari' Iri' Jam. Xi om ne ca howa ara hun Jeju Cristo ta napari'. Tomi' ca' napari': Wari' co howa non panxita' Jeju Cristo cwa', to' hohot pin ton ta napari'. Oro wari' co howa nonon Jeju Cristo cwa', to' hohot to' hohot pi' pin toton ta napari'. Xi jimama' ca' xujuhu' ta napari'. Ac wiricoco pi' pin mahu' ta napari' Iri' Jam. ²³ Caracat caracat pi' pin ara xi' iri'. Om ca an xiho' camain' xun Iri' Jam pain ca awi nucun ma', pain ca hwara' opa nucun pain ca om caracat nucun ma'. ²⁴ To' hohot e' napari'. Om ca pagar xine pain capari'. Xi xiram pa' ara capari' pain ca quep xiho' capari' ta. To' hohot pin e' napari', xi om ne ca to' witan pin ara capari' Cristo Jeju ta.

²⁵⁻²⁶ Pain cara pane, om ca wap hap cocon oro hwanana Iri' Jam pane. Mana' paxi' nain ca caracat nucucun pane, ane winim' cocon ne. Om ca wap hap cocon. Xiram pa' e' nonon pain ca miri'om paxi' cain ca caracat nucucun pane. Pain xocori ca' iri na ne, an hwet mi' ac capari' na pain ca ara xo' nucun pain ca mam' capari' con Jeju Cristo co mi' pin caho' napari' cwa'. Tomi' ca' non: Mi' pin pe rain maxicocon oro wari' ta non. Mo ta howa quequem pain ca mi' pin pe main maxicocon ma', pain ca ao mao ne cocum ma', to' hohot pin ac toton tara, xic am pin ac tain tara ca caracat nucucun ta non pari'. Ac i ma' na ca querec pin' xun pain ca om miri'om mami' cain ca caracat wa pain ca ara xo' ca pain ca wap capari' pain ca caracat nexi' ca'.

²⁷ Cain' cain' xixi' quem? Ma' na ca tomi' xec xec ac iri' pain ca to' hohot pin capari' Iri' Jam cwa' ra? Om na ta, om ca tomi' xec xec ac iri'. Tomi' xec xec xixin ca tomi' ha' xin ca xirao' nucun Moisés ca' ra? Om na quem, xi to' hohot pin capari' ca tomi' ha' nexi' ta. To' hohot pin e' napari' ca howa nexi'. ²⁸ Je ca tomi' xuhu' ca': To' hohot pin napari' Iri' Jam, xi om ne ca howa ara xun Jeju ta. Om ca tomi' ca' capari' quem: To' hohot pin

inuhu', xi tomi' ha' ara hwein ca xirao' nucun Moisés ta, om ca tomi' ac i ma' capari'. To' hohot pin inuhu', xi howa ara hwe ta napari'.

²⁹ Cain' cain' xira quem? Xica' to urut pain ca judeu urut ca', pain ca Iri' Jam ne urut con Iri' Jam ra? Om ca Iri' Jam ne hun pain ca om judeu hwe ma' quem? Iri' Jam ne hun ma' ira! ³⁰ Xi xica' pe ara ca Iri' Jam co tomi' napari' ca', pain ca to' hohot pin inuhu', xi howa ara hun panxita' Jeju ta capari' ca'. Tomi' ac i ma' napanart pain ca judeu urut ca', tomi' ac i ma' nuhu' pain ca om judeu hwe ma' quem. ³¹ Tomi' querec xuhu' pain i ca' quem: Howa iri urun Jeju ne, je ca joc in pin xin ca xirao' nucun Moisés ra? Om na, om ca joc in pin camain' xin ta. Howa iri urun Jeju ne, querec pin' ac irin na ca hwet hwet pi' pin ne oro ca xirao' nucun Moisés ca xirao' pe ca pane.

Ca to' hohot con Abraão Iri' Jam, xi om ne ca howa ara mapa' ta non

4 Je ca tomi' xuhu' ca'. Noro jun hwanana nuxut Abraão cara pane, co hwanana ne urut pain ca judeu urut ca'. Ma' carawa ca ara non quem? ² Om na, taraju pa' je e'. Mo xi tomi' ca' con Abraão Iri' Jam: To' hohot pin inem, xi om ne oro ca ara ara ma ma', pain ca tomi' ha' mapa' ma', mo xi tomi' ac i ma' con, hohot ac ne xira ca xin to pan nucun. Ane om na ne pain xin to ac i ma' con Iri' Jam ne, xi hohot con ta. ³ Cain' ca tomi' ne ca xirao' nucun capiacaon Iri' Jam ca' con? Taraju pa' je e'. Howa non Iri' Jam Abraão. Je ca tomi' tocwa ma', tomi' pan non Iri' Jam: To' hohot pin inem, xi om ne ca howa ara mapa' ta non.

⁴ Noro jun wari' co taramaja ma'. Mo ta taramaja ca, cut ac cain na dinheiro. Dinheiro ca cut ca ma', om ca mi' e' tocwa pain, xi taramaja mi' ara cain ta. Dever non pain wari' co taramaja mi' ca ma'. ⁵ Ane om ac i ma' ne con wari' co howa e' non Iri' Jam ne, co om howa nain ca ara ara pan nucun ma'. Tomi' ca' na: Howa inon Iri' Jam. Wirico co to' hohot pin non wari' co caracat pain ca miri'om con ma', ac i ma' na ca tomi' nucun. Tomi' ac tocwa na quem, tomi' non Iri' Jam: To' hohot pin inem, xi om ne ca howa ara mapa' ta non.

⁶ Je ca tomi' ca Davi cara pane quem, tomi' ca' na pane: Param mi' ta pain ca awi wa wari' co tomi' ca' ca Iri' Jam: Om na carawa ca ara ma ca mam' to' hohot quem. To' hohot pan inem, xi om ne ca howa ara mapa' ta, ac i ma' na ca tomi' ca Davi cara pane. ⁷ Je i ca' ca ca tomi' nucun pane:

Param mi' tata pain ca awi wa oro wari' pain ca xic am
pin xine ca caracat nucucun.

Param mi' tata pain ca awi wa oro wari' pain ca ji'am
pin xine ca caracat nucucun ma'.

⁸Param mi' ta pain ca awi wa wari' pain ca om mam' pe wet mami'
cain ca caracat nucun wari' Taramaxicon nexi' ta.

Ac i ma' na ca tomi' ca Davi cara pane.

⁹Cain' cain' xira cocon oro wari' co param mi' wawa pain ca awi wa
ta ca Davi ma' quem? Xica' to nana co wac xirac xine taparinain ca xirac
nucucun co param mi' wawa pain ca awi wa ra? Om ca param mi' tococwa
pain ca awi wa co om wac xirac xine taparinain ca xirac nucucun quem
ra? Param mi' wawa pain ca awi wa ma' ira! Je ca wara tomi' urut pahu'
con Abraão cwa'. Howa non Iri' Jam. Je ca to' hohot tocwa ta. ¹⁰Cain' cain'
ne con Abraão pane quem? Ma' xec ca to' hohot pin tocwa pane quem?
To' hohot pin ta pain xec nein ca wac xirac tocwa ra? Om ta to' hohot pin
tocwa pain ca om wac xirac querec tocwa ra? Je ca tomi' xuhu' ca', to'
hohot pin ta pain ca om wac xirac querec tocwa. ¹¹Wara howa pin non
Iri' Jam pain ca om wac xirac querec tocwa pane. Howa iri non ne, om
om, wac xirac pin rain taparinain ca xirac nem ta ac con na Iri' Jam. Ma'
ta querec pin' xima pain ca wara to' hohot pin xim ca', pain ca wara howa
mapa' ca', pain ca om wac xirac querec xima ma' non. Ma' ta aram aram
hwanana ne quequem oro wari' co howa xim nanapa' pa'ao' ta non. Je ca
ac ca hwanana ne urun na Abraão. Xi om ne ca howa ara xun Iri' Jam ta.
Om paxi' na ca wac xirac xijexi', ane howa xun Iri' Jam ne. Je ca to' hohot
pin capari' ca'. ¹²Je ca tomi' xuhu' ca'. Hwanana ne urut con Abraão pain
ca judeu urut ca', pain ca wac xirac xujuxut ca', hwanana ne paxi' urut con
hwanana nuxut Abraão. Ane om to' hwanana nucun caparut ca wac xirac
xujuxut ca' ne, om na. To' hwanana nucun naparut ca an xiho' urut con
pain ca wara howa nucun pain ca om wac xirac querec tocwa pane ta.

Ca mi' xun tococwa pain oro ca awi wa oro wari' co howa nonon Iri' Jam

¹³Wara tomi' pe non Abraão Iri' Jam pane. Main mi' xim pain ca
taramaxicon pe ho' momon oro wari' pain oro xijein macan' ca', main mi'
toton pain waram winam quem ta non. Xi om ne ca howa ara mapa' ta
non. Om ca tomi' ca' con: Mi' xim pain ca taramaxicon pe ho' momon

oro wari' pain oro xijein macan' ca', xi tomi' ha' ara main ca xirao' nucun Moisés ta, om ca tomi' ac i ma' camain' con pane. Mi' xim pain, xi om ne ca howa ara mapa' ta non. Xi om ne ca to' hohot pin ara xim, ac i ma' na ca tomi' con pane. ¹⁴Mo xi ara mi' e' capari' pain ca wara tomi' pe nucun pain ca tomi' ha' e' xin ca xirao' nucun Moisés ma', ac ca om quep xiho' capari' xira ca howa nexi'. Ac ca tomi' pe ximao ca xira Iri' Jam quem. ¹⁵Xi quep xiho' capari' ca xirao' nucun Moisés pain ca tomi' ha' xin ta. Noro jun wari' co tomi' ha' tain paxi' nain. Ane om tama' tomi' ha' cain ne. Mana' ac tocwa na, mana' pan non Iri' Jam. Wap ac con na quem. Om iri xira ca tomi' caho' tocwa ne, om ac ne xira ca tomi' in pin ca, xi tomi' caho' tocwa pain ta.

¹⁶Je ca wara tomi' pe con Abraão Iri' Jam pane. Howa iri non ne, wara tomi' pe ac con na. Ma' ta querec pin' mapa' pain ca tomi' iri'o' xim ca', pain ca ara mi' e' xim pain ca wara tomi' pe ne ca' non pane. Ara mi' e' xim pain, xi om ne ca param ara tain pum, ac i ma' na ca wara tomi' pe con pane. Ara mi' e' toton pain waram winam ma' quem, ac i ma' non pane. Je ca tomi' xuhu' ca'. Om ca tomi' e' tococwa waram winacon co judeu nana ma', co tomi' ha' nanain ca xirao' nucun Moisés ma'. Tomi' napari' pain ca an xiho' xun Abraão pain ca howa nucun ma' quem. Hwanana ne hwanana ne pi' pin ara xi' urun Abraão ta. ¹⁷Win ne ca xirao' pe xine pain capijacon Iri' Jam con Abraão pane. Ca' na con pane:

Hwanana ne hwanana ne pi' pin teterem oro xucucun
wari' pain oro xijein macan' ta,

ac i ma' non pane. Je ca tomi' xuhu' ca'. Hwanana ne hun Abraão ma' ira napari' Iri' Jam co howa ca Abraão cara pane, co to' e' taxi' nonon co cono' nana ma' quem, xi wirico ara ne co tomi' ma' pin taxi' nain oro carawa ca om wara ma' ma'.

¹⁸Howa cara non Iri' Jam Abraão pane. Winim' non pain ca mi' con pain ca wanxi' wa. Om xi wanxi' ca, ane winim' cara con ne. Howa non. Mi' tarapa' con pije' Iri' Jam ta na. Aram aram hwanana ne ac cacapa' tara oro xucucun wari' pain oro xijein macan'. Win ne ca wara tomi' pe capa' ca' na. Tamana tatara waram winam ta napa' pane na. ¹⁹Wixicam pin nain ca 100 ne cawaxi' nucun quem. Coromicat paxi' xucun: Mara' pin ina. Om ca wanxi' ac ta'. Mara' pin na narima' ne Sara quem. Om ca wijima ac cama, ac i ma' paxi' na ca coromicat nucun pane. Ane om howa naro ca ne. Howa cara na. ²⁰Howa cara non Iri' Jam. Om ca tara ta'a camain'

con. Howa howa, hwara' opa pin ac ca na. In ac tamana non quem. Awi tamana ma ta Iri' Jam, om ca an in taxi' main capijam, hwara' opa tamana ma, ac i ma' non pain ca tomi' querec te nucun pane. ²¹ Querec pin' non Iri' Jam pain ca om tomi' mixein taxi' nucun quem. Om ca mixein capa' Iri' Jam ta na. Hwara' opa na. Ha' non pain ca ara mi' capa' pain ca tomi' pe capa' ca', ac i ma' non. ²² Je ca tomi' tocwa ma', tomi' pan non Iri' Jam: To' hohot pin inem, xi om ne ca howa ara mapa' ta non pane.

²³ Om ca xica' pe ca Abraão co tomi' wa pain ca xirao' pe xine pain capijacon Iri' Jam ma', pain ca to' hohot pin inem ta tocwa ma'. ²⁴ Om ca xica' pe ca Abraão co tomi' wa ma'. Tomi' napari' quem. To' hohot pin xuhu' ta napari' pain ca howa xun ca'. Tomi' ac i ma' napari' Iri' Jam co to' e' mami' non Taramaxicon nexi' Jeju ta. ²⁵ Je ca tomi' xuhu' ca'. Om ca nain ho' con Jeju Iri' Jam pane. To' pa' pin jun tata co to' pa' pin xun nonon pane. Xi om ne ca caracat nexi' ta. To' e' mami' ac con na quem. Ma' ta to' hohot pin xuhu' ta napari' ta.

Ca to' hohot pin capari' Iri' Jam

5 Je ca tomi' xuhu' ca': To' hohot pin napari' Iri' Jam. Xi om ne ca howa ara xun ta. Je ca win ma' ne pin xun ca'. Je ca om toron ne ximixi' ca' quem. Wirico Taramaxicon nexi' Jeju Cristo co mi' napari' pain ca om toron ne ximixi'. ² Wirico Jeju Cristo co o mi' napari' con Iri' Jam ma', xi om ne ca howa ara xun ta. Wirico co mi' napari' pain ca querec pin' xun pain ca tama' xiram pa' e' capari' pain ca tama' quep xiho' e' capari' ca'. Taxi' urun pain ca tama' xiram pa' e' capari' pain ca tama' quep xiho' e' capari' ca'. Tomi' querec te urun pain ca winim' cara xun pain ca aram aram mi' xim capari' pain ca jao jao ma' xun pain ca awi nucun pain ca hwara' opa nucun ta. ³ Cain' cain' iri' quem? Winim' cara e' urun pain ca aram aram mi' xim capari' pain ca jao jao ma' xun pain ca awi nucun pain ca hwara' opa nucun ra? Om na ta. Tomi' querec te urun pain ca to' i'ina capari' oro carawa, je pain ca to' jain jain cacapari' oro wari' cwa' quem. To' i'ina iri napari' oro carawa ca' ne, to' jain jain iri nanapari' oro wari' ma' ne, hwara' opa cara ac iri' na quem, wara taxi' irin i ma' ta. ⁴ Hwara' opa cara iri iri' ne, tomi' querec te ac capari' na Iri' Jam pain ca hwara' opa nexi'. Taxi' iri urun pain ca tomi' querec te capari' pain ca hwara' opa nexi' ne, winim' cara ac xun na. ⁵ Winim' cara urun. Taxi' urun pain ca om

mixein capari' quem. Main mi' xim napari' pain ca wara tomi' pe nucun, xi noc camain' capari' ta. Taxi' urun pain iri' ximixi' ca', pain ca om noc capari' ca'. Tamataracon ca mi' capari' ca', je ca to' taxi' napari' pain ca om noc capari' ca'.

⁶Je ca tomi' xuhu' ca'. Pain ca ximin ximin wet nexi' pain ca om quep xiho' taxi' xijexi' pane, maqui' ac ne na xec nein ca wara an pe xo' ca Iri' Jam pane. Mi' pin caho' ac capari' na Cristo. Ma' ta quep xiho' xuhu' pain ca caracat nuhu' ma', pain ca miri'om hun Iri' Jam ta napari'. ⁷Om ca querec tocwa wari' co mi' pin caho' non xucun wari' co tama' xut xo' ma'. Tara, am ma' paxi' ca wari' co querec ma', co mi' pin caho' non xucun wari' co awi tamana. ⁸Ane jimao ca Iri' Jam ne. An hwet mi' ara xi' napari' pain ca om noc capari' ca', xi om ne ca mi' pin caho' ara capari' Cristo ta. Mi' pin caho' napari' pain ca caracat caracat wet nexi' pane.

⁹Je ca tomi' xuhu' ca'. Tomi' ca' napari' Cristo: To' hohot pin nuhu' Te, xi om ne cocu ca ao mao ca' pahu' napari'. Ac i ma' napari' pain ca to' hohot pin capari' ca'. Je ca taxi' xun pain ca narain ho' xim capari' pain ca mana' nucun Cote ca pain ca aram aram mana' toton cocon oro caracat ma'. ¹⁰Noc paxi' urun Iri' Jam pane ira, ane cut in pan capari' ne. Taxipa' pin ac urun na. Xi mi' pin ara ca Panxica ta. Wirico Panxica co to' taxipa' pin napari' con, taxi' urun. Je ca taxi' mip xun pain i ca' quem, pain ca main to' witan pin xim capari' ca', xi e' ara ca ta. ¹¹Om ca xica' pe ne i ma' con, pain ca to' witan pin capari' ca'. Tomi' querec te iri' quem, xi ma' ara ca Iri' Jam ta. Wirico Taramaxicon nexi' Jeju Cristo co mi' napari' pain ca tomi' querec te nexi' ca'. Wirico co to' taxipa' pin napari' con Iri' Jam.

Ca to' cono' capari' Adão, je pain ca to' e' capari' Cristo quem

¹²Je ca tomi' xuhu' ca': Pain ca xo' caracat qui' ca wari' co xica' xat cara pane, wirico Adão cara pane, je ca xo' ma' qui' ne ca caracat wa pain macan' ca'. Caracat iri na pane ne, je ca maqui' ne ca cono' pin wa ca'. Je ca cono' ne ca wari' wa ca'. Xi caracat caracat xam' ara iri' ta. ¹³Pain cara pane, pain ca om ma' querec ne ca xirao' nucun Moisés pane, wara caracat paxi' nana oro hwanana. Ane om tomi' em' tococwa pain ca om tomi' ha' cacain ca xirao' nucun Moisés ne. Xi ma' ne pane ta. Om ca ma' querec ne ca xirao' nucun Moisés pane. Om iri na ca xirao' caho' xine oro ca ara caca ne, om ca tomi' em' ac tococwa. ¹⁴Ane cono' cono' pi' pin

caca oro hwanana pane ne. Pain ca xo' ma' qui' ca Adão cara pane, cono' cono' ac caca na oro hwanana. Om paxi' na ca an xiho' cocon Adão pain ca caracat nucun pane, pain ca xo' tomi' in pin qui' con Iri' Jam pane, ane caracat pan caca ne. Ca cono' ac caca na, ca cono' ac caca na, aram aram ma' pin ac ca na Moisés. Je ca tomi' xuhu' ca': Adão cara pane, ac ca an xiho' con na co ma' co maqui' pa'ao' quem, wirico Jeju ma' quem. An xiho' paxi' non, ane jimao ca ne.

¹⁵Ca caracat nucun Adão cara pane, jimao ca' nain carawa ca awi ca mi' e' capari' Iri' Jam ca'. Caracat iri na wari' co xica' xat pane ne, wirico Adão cara pane, cono' mija ac caca na oro wari'. Ane tiquin' mao ne ca xiram pa' e' nucun Iri' Jam ma' ne. Xiram pa' e' iri na xucun wari' co xica' xat ma' ne, wirico Jeju Cristo ma', pain ca mi' e' capari' pain carawa ca awi ma', ma' mija ac iri' na pain ca xiram pa' e' capari' ca'. ¹⁶Carawa ca awi ca mi' e' capari' Iri' Jam ma', jimao ca' nain ca caracat nucun co ma' co xica' xat pane. Om ca an xiho' xijein. Caracat pin iri na co ma' pane ne, pain ca xica' pe ne ca caracat nucun pane ne, em' pin hwe ta, na e' na pain ca cono' pin hwe ta ac capari' na Iri' Jam. Tomi' ac i ma' paxi' napari', ane xiram pa' capari' ne. Om xi xiram pa' capari', xi awi iri' ta. Ane xiram pa' pan capari' ne. To' hohot pin ac capari' na quem. ¹⁷Caracat iri na wari' co xica' xat pane ne, cono' pin ac caca na oro wari'. Je cwerein, cono' pin iri' pain ca wari' nexi' ca'. Xi om ca wari' co xica' xat cara pane. Ane om ac i ma' ne ca ara ca xucun wari' co xica' xat cwa' quem, wirico Jeju cwa'. Tiquin' mao pan na ca ara ca ma'. Oro wari' co xiram pa' e' ca Iri' Jam ma', pain ca xiram pa' tamana ca ma', oro wari' co to' hohot pin ca ma', e' ac caca tara, e' hwara' opa ac caca tara quem. Xi om ca xucun wari' co xica' xat cwa', wirico Jeju Cristo cwa'.

¹⁸Je ca tomi' xuhu' ca': Win ne ca xica' pe ca wari' co caracat pane. Xica' pe paxi' na ca caracat nucun. Ane wap wap xam' tococwa oro wari' ne. Ac je na con xucun wari' ma' quem, wirico Jeju ma'. Xica' pe paxi' na ca ara ca pane, pain ca ara xo' ca pane, ane to' hohot to' hohot xam' tococwa oro wari' ne. To' e' to' e' xam' tata. ¹⁹Win ca wari' co xica' xat cara pane. Tomi' in pin iri non Iri' Jam pane ne, to' caracat mija ac cocon na oro wari'. Ac je na con xucun wari' co xica' xat ma' quem. Tomi' ha' pin iri non Iri' Jam pane ne, to' hohot mija ac cocon na oro wari' quem.

²⁰An hwet pe pin paxi' nain ca xirao' nucun Moisés Iri' Jam pane. Ma' ta querec pin' cacain ca pan teretem tamana nucucun oro wari' ta na. Ane

tiquin' mao ne ca xiram pa' e' nucun Iri' Jam ne. Pan teretem tamana iri nana oro wari' ma' ne, je i ma' ca tiquin' mao ne ca xiram pa' e' nucun Iri' Jam ta. ²¹ Je ca tomi' xuhu' ca': Win ne ca hwara' opa ne ca caracat wa pane. To' cono' napari'. Ac je na ca xiram pa' e' nucun Iri' Jam quem. Hwara' opa na ca xiram pa' e' nucun. To' hohot pin napari'. Je ca e' cara je ta capari' ca'. Wirico Taramaxicon nexi' Jeju Cristo co ara mi' napari' pain i ma' ta.

**Ca cono' ca' xin ca caracat wa, ca e' pin ac iri' ne
pain ca win cwere xun Cristo quem**

6 Cain' cain' xixi' quem? Caracat cara xixi', ma' ta hwara' tiquin' ne xixin ca xiram pa' capari' Iri' Jam ra? ² Om na, om ca na camain' ne pain ca caracat cara iri' ta. Ma' tara ca caracat cara ac iri' ra? Om na ta. Cono' ca' ara xi' irin ca caracat wa ta. ³ Om ca taraju pa' hwe pain ca cut corom to capari' con Cristo Iri' Jam ra? Taraju wet je e'. Pain ca cut corom to capari' con Cristo cwa', pain ca win cwere pin xun ca', cono' wi urun. ⁴ Je ca ac i ma' cacapari' con pain ca ja' cacapari' pain com pane. Ma' ta ma' cuhu' xocori ca e' wa ta napari'. Win ne ca to' e' mami' con Cristo Cotere' pane, pain ca to' e' mami' con pain ca hwara' opa tamana nucun pane.

⁵ Je ca tomi' xuhu' ca': Win cwere urun, xi om ne ca jao jao ma' ara xun pain ca mi' pin nucun ta. Je ca taxi' xin i ca' quem, pain ca win cwere xun pain ca e' mami' nucun quem. Main an xiho' xun pain ca aram aram e' mami' nexi' ta. ⁶ Taxi' ara xi' irin i ca' quem: Pain ca tatatain mi' tocwa pain pana Cristo pane, tatatain wi ac xine na wara cwerexi' con. Ma' ta to' om pin xine ca hwara' opa nein wara curuhu' ca caracat taxipa' ma' napari' Iri' Jam. Ma' ta tomi' ha' tomi' ha' om pin hwein ca param ximama' nuhu' pain ca caracat nuhu' ta napari'. ⁷ Xi witan ca' ara cain ca caracat wa wari' co mi' pin ta. Om ca hwara' opa mami' con ca caracat wa.

⁸ Je ca tomi' xuhu' ca': Wara cono' wi urun Cristo. Je ca howa xin ca e' wi xun quem. ⁹ Taxi' ara xi' urun pain ca e' mami' nucun pane. Om ta mi' pin mami' ca quem. Om ca hwara' opa mami' con ca mi' pin wa. ¹⁰ Pain ca mi' pin nucun pane, mi' pin na. Om ta mi' pin mami' ca, xi to' quiji' pin ara cain ca caracat wa ta. Pain ca e' nucun ma', win xumu non Iri' Jam quem. ¹¹ Coromicat mi' xijexi' pain ca cono' ca' xin ca caracat wa ca'.

Coromicat mi' xijexi' pain ca e' mami' iri' quem, pain ca win xumu pin xun Iri' Jam quem. Xi om ne ca win cwere pin ara xun Cristo Jeju ta.

¹²Je ca tomi' xuhu' ca': Ta hwara' opa pe ho' cuhu' ca caracat wa pain curuhu' me ta. Ta hwara' opa hwara' opa to' i'ina pin cuhu' pain ca tomi' ha' pin hwein oro ca param ximama' nuhu' me ta. ¹³Narain ho' jein oro coximinain curuhu', ta mi' hwein pain ca caracat wa me, ta mam' pan teretem hwein me. Mi' pan xujuhu' con Iri' Jam ta. Ac wari' co witan ca' nanain ca cono' wa ta ara xi' hwe. To' e' mami' nuhu' Iri' Jam quem. Mi' jun pain oro coximinain curuhu', mam' ara xo' jein. ¹⁴Om ta hwara' opa mami' cuhu' ca caracat wa. Xi tomi' mami' cuhu' Iri' Jam pain ca tomi' ha' jein ca xirao' nucun Moisés, ma' ta hohot mahu' ma' cuhu' ta. Tomi' ca' pin nuhu': Howa e' xine pain ca quep xiho' xuhu' ca', pain ca xiram pa' e' xuhu' pain ca to' hohot pin xuhu' ca' nuhu'.

Ca wari' nucun Iri' Jam pin iri' pain ca taramaja mi' e' xun ca'

¹⁵Cain' cain' xixi' quem? Hohot na pain ca tomi' ximama' xin i ca' ra? Tomi' ca' xixi' ra? Momon caracat xixi', xi tomi' mami' capari' Iri' Jam pain ca tomi' ha' jein ca xirao' nucun Moisés, ma' ta hohot mahu' ma' capari'. Tomi' ca' pin ara xi' napari': Howa e' xine pain ca quep xiho' xuhu' ca', pain ca xiram pa' e' xuhu' pain ca to' hohot pin xuhu' ca' napari', ac i ma' xira ca tomi' xixi' ra? Om na ta, om ca na camain' ne ca tomi' ac i ma' iri' ta. ¹⁶Taxi' ara xi' hwein i ca' quem, pain ca taramaja mi' e' hun wari' ma'. Mo ta tomi' ca' hun wari': Taramaja mi' e' xim, om ta pagar mapa' pain ca taramaja ne ca', wari' ne e' ne, tomi' ha' cara xim ta, mo ta tomi' ac i ma' hun wari' ma', taramaxicon ne ac hun na, wari' ne pin ac cuhu' na, xi tomi' ha' ara hun ta. Je ca tomi' xuhu' ca': Mo ta taramaja mi' e' hwein ca caracat wa, mo ta tomi' ha' e' hwein, wari' ne pin ac cuhu' na, cono' pin ac hwe na quem. Mo ta taramaja mi' e' hwein ca tomi' ha' wa, mo ta tomi' ha' hun Iri' Jam quem, wari' ne pin ac cuhu' na, xuruxut xo' ac hwe na quem. ¹⁷Je ca tomi' xuhu' ca', tomi' querec te tamana urut con Iri' Jam cwa' pahu', xi tomi' ha' pin ara hun pain xocori ca' ta. Taramaja mi' e' paxi' hwein ca caracat wa pain ca tama' tomi' ha' hwein pain cara pane. Ane tomi' ha' pin hwein capijacon Iri' Jam ca iri'o' pain xocori ca' ne. Tomi' ha' na iri' xumuhu' quem, tomi' ha' pin hun Iri' Jam pain oro caramaxicon ca ca' na xihwe ma'. ¹⁸Witan ca' hwein ca caracat wa, xi om

ne ca to' witan ara cuhu' Iri' Jam ta. Wari' ne pin nuhu'. Ma' ta taramaja mi' e' hwein ca awi wa pain ca tama' tomi' ha' mahu', je pain ca tama' ara xo' hwe nuhu' ma'. ¹⁹Tomi' joc mam' mi' e' inuhu' con wari' co taramaja mi' e' non taramaxicon nucun ma'. Xi taraju pa' ho' taraju pa' ho' hwe ta inuhu'. Taraju wet je e'. Pain ca quep ximama' nuhu' pane, pain oro ca pan teretem nuhu' pane, ac ca taramaja mi' e' hwein na oro ca pan teretem wa, tomi' ha' e' hwein oro ca caracat wa pane. Je ca tomi' xuhu' ca': Win ne ca tomi' ha' hwein oro ca pan teretem wa pane, tomi' ha' ho' jun Iri' Jam pain xocori ca' quem. Taramaja mi' e' jein ca awi wa. Wari' nucun Iri' Jam je.

²⁰Pain ca taramaja mi' e' hwein ca caracat wa pane, om ca taramaja mi' ac hwein ca awi wa. Om ca tomi' ha' ac hun Iri' Jam pane. ²¹Cain' ca quep xiho' cuhu' oro ca pan teretem nuhu' pane quem? Xi quep xiho' cuhu' pane ta. Wixipa' pin hwein pain xocori ca'. Je ca tomi' xuhu' ca'. Oro ca pan teretem wa ca', to' cono' e' nain ca wari' wa ta. ²²Ane to' witan pin cuhu' Iri' Jam pain xocori ca' ne. Witan ca' hwein ca caracat wa. Wari' nucun Iri' Jam pin hwe, taramaja mi' e' hun Iri' Jam. Mi' ac cuhu' na pain ca awi wa pain ca iri' wari' ne pin cuhu' ca', ac i ma' na ca quep xiho' cuhu'. Aram aram mi' ac cuhu' tara pain ca om pi' ra ha' ne ca e' wa quem. ²³Je ca tomi' xuhu' ca': Wari' co taramaja mi' nain ca caracat wa ma', aram aram mi' pin ac ca tara, ac i ma' tara ca pagar tocwa pain ca caracat wa. Ane jimao ca Iri' Jam ne. Mi' e' napari' pain ca om pi' ra ha' ne ca e' wa. Om ca pagar xine pain capari'. Mi' e' napari' pain. Xi om ne ca win cwere ara xun Taramaxicon nexi' Cristo Jeju ta.

Ca tomi' mi' cain ca an tacama narima'

7 Tomi' ca' inuhu' ta xere, xi om ne ca taraju pa' ara hwein ca xirao' nucun Moisés ta. Tomi' ha' je napari' ca xirao' nucun Moisés pain ca e' e' wet nexi' ca'. Mo ta cono' pin xi', om ca tomi' ha' je mami' capari'. ²Win cama narima' co ma' nam tarama'. Pe ho' cara ron taxim ta ac cam na ca xirao' nucun Moisés. Pain ca e' e' wet nucun taxicam ma', om ca an pe ac con. Win cwere nam, ac ca tucu pan cam na. Mo ta mi' pin ca taxicam, ac ca tacom' hot pin tacama na. Xi pe ho' cara ron mami' cam ca xirao' nucun Moisés ta. ³Mo ta quep ne con xucun tarama' pain ca e' e' wet nucun taxicam ma', hwet ac ne na wixicam, om na ximicam ta ac

tacama na. Mo ta mi' pin ca taxicam ma', ac ca tacom' hot pin tacama na, om ca pe ho' cara ron mami' cam ca xirao' nucun Moisés. Xi om pin ara cam tarama' ta. Mo ta an cama xucun tarama, om ca hwet ne wixicam, om ca om na ximicam ta tacama.

⁴Ac i ma' iri' quem xere: Ac ca cono' pin iri' na. Cono' ca' irin ca xirao' nucun Moisés, xi om ne ca cono' wi ara xun Cristo ta. Ac i ma' napari', win cwere pin urun xucun tarama' ma', wirico co e' mami' pane. Ma' ta ara hwein ca awi wa pain ca taramaja mi' mahu' ta napari' Iri' Jam. ⁵Pain ca tama' tomi' ha' xin ca param nexi' pane, param ximao na cwerexi'. Taraju paxi' irin ca xirao' nucun Moisés pain ca tomi' caho' capari' pain ca caracat wa ma', ane caracat caracat tiquin' iri' ne. Cote ne pin ac ne na ca caracat nexi'. To' i'ina pin napari' oro ca param ximama' nexi', to' cono' ac capari' na quem. ⁶Ane witan ca' xin ca xirao' nucun Moisés pain xocori ca' ne. Cono' ca' irin pain ca quep xat capari' pane, cono' ca' irin pain ca tucu pan capari' pane. Taramaja mi' urun Iri' Jam quem. Om ca ac pain cara pane iri' pain ca tomi' ha' e' irin ca xirao' nucun Moisés pane, pain ca tama' tomi' ha' ximama' irin pane, om na. Mam' taramaja mi' irin xocori ca ara je capari' Tamataracon Iri' Jam ca'. Ac i ma' iri' pain ca taramaja mi' xun Iri' Jam ta.

Ca to' querec pin' capari' pain ca caracat nexi' ca xirao' nucun Moisés

⁷Cain' cain' xixi' quem? Tomi' ximama' ca' xixi' ra? Em' pan na ca xirao' nucun Moisés ta, ac i ma' xixi' ra? Om na, om ca na camain' ne pain ca tomi' ximama' ac i ma' iri' ta. Taraju pa' je e', tomi' pan xije. Mo xi om ne ca xirao' nucun Moisés ma', om xi querec pin' tain ca caracat wa. Mo xi om xirao' caho' capa' pain ca param ximao wa caramaxicon win ma' ta' cwa', mo xi om tomi' ca' capa': Ta param ximao main caramaxicon win ma' ma me ta, mo xi om tomi' ac i ma' capa' ca', om xi querec pin' tain ca param ximao wa ta. ⁸Hu paxi' napa' ca xirao' nucun Moisés ma', xirao' caho' paxi' napa' pain ca param ximao tain caramaxicon win ma' ta' ma'. Tomi' ac capa' na ca caracat wa ca': Ta param ximao main me ta paxi' nem ca xirao' nucun Moisés ma'. Je i ma' ira, param ximao rain e', ac i ma' na ca tomi' capa' ca caracat wa ca'. To' param ximao ac capa' na pain oro carawa ca om awi quem. Mo xi om ne ca xirao' nucun Moisés ma', mo xi om xirao' caho' capa' pain ca param ximao wa ca', om xi hwara' opa capa'

ca caracat wa ca'. Om xi querec pin' tain. Ac ca om ne xira. ⁹E' paxi' ina pain cara pane, pain ca om taxi' querec tain ca xirao' nucun Moisés pane. Taxi' pin iri inain ne, hu iri napa' ne. Xirao' caho' iri napa' pain ca param ximao wa ne, hwara' opa pin ac capa' na ca caracat wa, ac ca mi' pin ta' na quem. ¹⁰To' e' xirapa' ca xirao' nucun Moisés ta. Hu iri xirapa' ne, to' e' ac capa' xira. Ane om to' e' capa' ne. To' mi' pin napa', ac je na. ¹¹Hu paxi' napa' ca xirao' nucun Moisés ma', xirao' caho' paxi' napa' pain ca param ximao wa. Tomi' ac capa' na ca caracat wa ca': Ta param ximao ma me ta paxi' nem ca xirao' nucun Moisés. Je i ma' ira, param ximao ra e', ac i ma' na ca tomi' capa'. Mixein ac capa' na, to' pa' pin ac capa' na quem, ac je na. Ac ca to' pa' pin capa' na ca caracat wa ca'.

¹²Je ca tomi' xuhu' ca': Awi pan na ca xirao' nucun Moisés. Maqui' non Iri' Jam. Awi na oro ca hu capari' ca', maqui' non Iri' Jam. Hu xo' napari', awi na con. ¹³Cain' cain' xira quem? To' pa' pin napa' carawa ca awi ra? To' pa' pin napa' ca xirao' nucun Moisés ca awi ra? Om na, om ca to' pa' pin camain' capa' ta! To' pa' pan napa' ca caracat wa ta. Mam' to' pa' pin napa' pain carawa ca awi, mam' to' pa' pin napa' pain ca xirao' nucun Moisés ca awi. Ma' ta querec pin' main ca om awi nein ca caracat wa ta napa' Iri' Jam. Je ca hu capari' ca'. Ma' ta querec pin' hwein ca pan tem tamana nein ca caracat wa ta napari'.

Ca noc caracan xijein ca awi wa pain ca caracat wa pain ximixi'

¹⁴Taxi' irin i ca' quem: Maqui' nain Tamataracon Iri' Jam ca xirao' nucun Moisés. An xiho' non Iri' Jam. Ane om an xiho' ton ne. Wari' ina, ma' napa' cwere. Ac ca quep xat capa' na ca caracat wa. Tomi' ha' inain quem. ¹⁵Om paxi' na ca hohot capa' ca ara ta' ca'. Ara xo' ta' paxi' ina. Ane om ara xo' ta' ne. Ara e' inain ca noc paxi' ta' ca'. ¹⁶Je ca tomi' xuhu' ca'. Ara iri inain ca noc ta' ca' ne, ac ca xin ne tain na ca xirao' nucun Moisés ma'. Awi na ta inain, xi noc ara tain ca ara ta' ca'. ¹⁷Ara iri inain ca noc ta' ca' ne, om ca wata' pan ne co ara nain. Je ca caracat wa pata'. Pe ho' pan napa' ca caracat wa pain xumu ca', ara mi' ac capa' na pain carawa ca noc paxi' ta' ca'. ¹⁸Taxi' pan xije. Om ca pe ho' camain' capa' ca awi wa, om ca pe ho' camain' capa' ca awi wa pain cwere pain xumu ca'. Ara xo' ta' paxi' ina, ane om ara xo' ta' ne. Om ca ara xo' ac ta'. ¹⁹Xi ara tain carawa ca awi ca ara ta' paxi' ta' ca'. Ara e' inain ca pan tem wa. Je i ma'

ca ara cara ta' ca'. ²⁰ Ara iri inain carawa ca noc ta' ca' ne, om ca wata' pan ne co ara nain. Je ca caracat wa pata'. Pe ho' ara xi' napa' ca caracat wa pain xumu ca'. Ara mi' ac capa' na pain carawa ca noc paxi' ta' ca' quem.

²¹ Je ca tomi' xuhu' ca': Ara xo' ta' paxi' ina, ane querec pin' xije pain ca pe ho' capa' ca param pan tem wa ne. Ac ca pe ho' capa' na xijein topac, ac ca tomi' capa' na: Pan tem ra pan tem ra napa'. ²² Xi om ne ca tomi' querec te ara tain oro capijacon Iri' Jam ca tomi' ha' ra capa' ta. Tomi' querec te paxi' inain pain ca coromicat ne ca'. ²³ Ane querec pin' xije pain ca pe ho' capa' xijein topac pain cwere pain xumu ca' ne. Noc nain capijacon Iri' Jam ca caracat wa ca pe ho' nain ca coromicat ne ca'. Noc xijein, ac ca mixita xijein na. Tao' xat pin napa', ac ca pao' pe capa' na xijein topac ca', ca pe ho' napa' ca', ca caracat ra caracat ra napa' ca'. ²⁴ Ximin ina ta! Ma' co to' witan pin xim napa' cwa' ne ma' ina. Ma' co mi' xim napa' pain ca witan ca' tain cwere ca taramaja mi' nain ca mi' pin wa ca' ne ma' ina. ²⁵ Tomi' querec te tamana inon Iri' Jam ta. Wirico co to' witan pin napa', xi ma' ara ca Taramaxicon nexi' Jeju Cristo ta.

Je ca tomi' xuhu' ca': Je cwere ta, ac i ma' ina. Pain ca coromicat ne ca', tomi' ha' inain capijacon Iri' Jam. Pain cwere ca' iri na ne, tomi' ha' ma' inain xijein topac ca caracat ra napa' ca'.

Ca quep xihó' capari' pain ca xuruxut xo' wa Tamataracon Iri' Jam

8 Je ca tomi' xuhu' ca': Pain xocori ca' iri na ne, pain ca win cwere pin xun Cristo Jeju cwa', om ca em' hwe ta mami' capari' Iri' Jam. Om ca wap xim mami' capari'. ² Tamataracon Iri' Jam ma', ca hwara' opa ma', to' e' napari'. To' witan napari'. Xi om ne ca win cwere ara xun Cristo Jeju ta. To' witan ca' napari' pain ca hwara' opa nein ca caracat wa. To' witan ca' napari' pain ca hwara' opa nein ca cono' wa quem. ³ Ca xirao' nucun Moisés ma', om ca hwara' opa ne, om ca to' om pin ac nein ca hwara' opa nein ca caracat nexi'. Xi tomi' ha' pan xin ta. Ane hwara' opa pan ca Iri' Jam ne. To' om pin nain ca hwara' opa nein ca caracat nexi', xi om ne ca mam' ara capari' con iri' Panxica cwa' ta. An tan pan rain curucucun oro wari' co caracat nana ma', mi' pin caho' roron pain ca caracat nucucun ta non, to' om pin ac cain na ca hwara' opa nein ca caracat nexi' ca pe ho' napari' pain cwerexi' ca'. ⁴ Ma' ta tomi' ha' iri'o' hwein ca xirao' nucun

Moisés ta napari'. Om paxi' na ca tomi' ha' taxipa' xin oro ca param nexi'. Tomi' ha' taxipa' irin Tamataracon Iri' Jam.

⁵Win xumu ara xi' nanain oro ca param ne ca cwere wa oro wari' co tomi' ha' taxipa' nanain oro ca param nucucun ma'. Ane win xumu pan cacain oro ca param ne Tamataracon Iri' Jam oro wari' co tomi' ha' taxipa' nanain Tamataracon Iri' Jam ne. ⁶Oro wari' co win xumu nanain oro ca param nucucun ma', cono' ac caca tara. Oro wari' co win xumu nanain oro ca param ne Tamataracon Iri' Jam ma' iri nana ne, ma' ac cocon tara ca om pi' ra ha' ne ca e' wa, om ac ne tara ca toron ne ximicocon quem. ⁷Je ca noc cocon Iri' Jam oro wari' co win xumu nanain oro ca param nucucun ma'. Xi tomi' ha' cacain capijacon ta. Om ca tomi' ha' taxi' cacain quem. ⁸Oro wari' co win xumu nanain oro ca param nucucun ma', om ca hohot ac cocon Iri' Jam.

⁹Ane om win xumu xin oro ca param nexi' ne. Win xumu irin oro ca param ne Tamataracon Iri' Jam. Mo ta pe ho' capari' pain ximixi' Tamataracon Iri' Jam ma', win xumu ac irin na oro ca param nein. Wari' co om non Tamataracon Cristo ma', om ca wari' nucun Cristo ca. ¹⁰Mo ta pe ho' capari' pain ximixi' Cristo ma', e' na tamataraxi'. Cono' pin paxi' na cwerexi' ca', xi ma' ara ne ca caracat wa ta. Ane e' ne tamataraxi' ne. Xi om ne ca to' hohot pin ara capari' Iri' Jam ta. ¹¹Mo ta pe ho' capari' pain ximixi' Tamataracon Iri' Jam ca to' e' mami' non Jeju pane, main to' e' mami' ac capari' tara quem. Main to' e' mami' tarapari' Iri' Jam co to' e' mami' non Cristo Jeju pane. Pain ca aram aram mi' pin ta' ne cwerexi' ca', to' e' mami' ac capari' tara. Tamataracon ca pe ho' napari' ca', je tara ca mam' to' e' mami' capari' quem.

Ca mana panxica Iri' Jam pin iri'

¹²Je ca tomi' xuhu' ca' xere: Na e' na pain ca tama' tomi' ha' xin Tamataracon Iri' Jam. Om ca na ne pain ca tama' tomi' ha' xin cwerexi' pain oro ca param nexi'. ¹³Mo ta tama' tomi' ha' xin oro ca param nexi' ca', xuruxut xumu ac xin tara ca cono' wa. Pain ca an to pin xin oro caracat nexi' ma' iri na ne, ac ca to' parapa' pin xin tara, ac ca mam' to' parapa' pin xin tara pain Tamataracon Iri' Jam ma'. E' ac xi' tara ta.

¹⁴Wari' pain ca o mama' capari' Tamataracon Iri' Jam ca', mana panxica Iri' Jam mana panxica Iri' Jam pi' pin iri' quem. ¹⁵Xi mi' ara capari' pain

Tamataracon ta. Tamataracon ca mi' capari' ca', om ca mi' capari' pain ca in hwet xin ca tama' jin' nexi' pain ca an xiho' mami' xun wari' co jin' non taramaxicon nucun ma', om na. Mi' iri napari' pain Tamataracon ne, je ca to' mana panxica Iri' Jam pin capari'. Je ca ha' capari' pain ca Te pin xun Iri' Jam cwa'. ¹⁶ Pain ca Te pin xun Iri' Jam cwa', je Tamataracon ca tomi' xo' nain ximixi'. To' taxi' napari' pain ca mana panxica Iri' Jam pin iri' ca'. ¹⁷ Je ca mi' xim capari' pain oro ca awi wa ca wara tomi' pe mi' capari' pane, xi om ne ca mana panxica ara iri' ta. Main cut xin con, cut wi xin con Cristo. Mo ta an xiho' xun Cristo pain ca jain jain nucun pain macan' ca', mo ta jain jain wi xun, tomi' querec te ac capari' tara Iri' Jam. Tomi' querec te wi ac capari' tara con Cristo, mi' wi ac capari' tara pain ca jao jao ma' xun pain ca awi nucun pain ca hwara' opa nucun quem.

Oro ca awi wa ca mi' xim capari' Iri' Jam

¹⁸ Ca' na ca coromicat ne ca'. Oro ca jain jain nexi' ca', pain ca to' i'ina capari' oro carawa pain xocori ca', om ca an xiho' camain' nein ca awi wa ca mi' xim capari' Iri' Jam ta. Tiquin' mao pan na ca awi nein oro ca mi' xim capari' ma', pain ca mi' xim capari' pain ca jao jao ma' xun pain ca awi nucun pain ca hwara' opa nucun ma'. ¹⁹ Winim' non Iri' Jam oro carawa ca tomi' ma' pin ca ca'. Winim' non pain ca aram aram cut hwerehwet to xim capari' pain ca aram aram momon cwa' mana panxita' cwa' xim capari' ca'. Mija na ca winim' con, winim' cara non, jain jain na, param tamana non pain ca cut hwerehwet to xim capari' ca'. ²⁰ Em' pin ma' tara ne ara xi' nain oro carawa Iri' Jam pain cara pane, em' pin ma' tara ne nain oro carawa ca tomi' ma' pin ca pane. Om paxi' na ca em' ne pane, ane em' pin ma' tara ne pan cain pane ne. ²¹ Oro carawa ca tomi' ma' pin ca ma', winim' nain xec nein ca aram aram awi pin ta' ne. Witan ca' ac nein tara ca em' wa ca'. Witan wi ac capari' tara quem. Witan pan xi' pain ca mana panxica Iri' Jam iri' ca', jao jao ma' ac xun tara Iri' Jam pain ca awi nucun pain ca hwara' opa nucun. Witan wi tarapari' oro carawa ca tomi' ma' pin ca quem. Jao jao ma' toron Iri' Jam pain ca awi nucun pain ca hwara' opa nucun quem.

²² Taxi' ara xi' irin i ca': Ac ca jain jain pi' pin ne na oro carawa ca tomi' ma' pin ca Iri' Jam. Ac ca toron ne na ximi, win cama narima' pain ca caxi cama pain ca pan ta' ca cawinacam cwa', ac i ma' na ca toron ne

ximi oro carawa ca'. Pain ca xo' em' qui' ne pane, pain ca xo' caracat qui' ca Adão pain cara pane, mao ac ne ma' na, ca toron ac ne na, ca toron ac ne na, ca toron pa' ac capari' na pain xocori ca' quem. ²³ Om ca toron xica' to ne ximi oro carawa ma'. Toron iri' quem. Wara mi' paxi' napari' pain Tamataracon Iri' Jam pane, pain ca xo' mi' xim pain oro ca param ne qui' capari' pane. Ane toron ne iri' ximixi' ca' ne. Winim' irin xec nein ca aram aram iri' mana panxita' pin xim capari' pain ca aram aram to' e' mami' xim capari' ca'. ²⁴ Je ca winim' iri' ca', pain ca xo' to' witan qui' capari' Iri' Jam pane, winim' cara ac irin na oro ca mi' xim capari'. Mo xi wara ma' capari' oro ca mi' xim capari' ca', je i ma' xira ca om winim' winim' wet qui' xin quem. Je ca tomi' xuhu' ca': Pain ca wara ma' con carawa wari' ma', om ca winim' winim' wet cain. ²⁵ Ane winim' winim' wet xin oro ca om mi' querec capari' Iri' Jam ne. Winim' cara irin.

Ca tomi' mi' capari' con Iri' Jam Tamataracon

²⁶ Om ca xica' pe ne ca winim' cara nexi' ca quep xiho' napari'. Quep xiho' napari' Tamataracon Iri' Jam quem. Xi hwara' opa iri' ta. Xi tomi' xo' taxi' xun Iri' Jam quem. Ane tomi' mi' capari' con Tamataracon ne. Tomi' mip non, tomi' non iri' ximinain. Om ca hwet ne capijain pain ca tomi' mi' capari' con, xi tomi' ne iri' ximinain pain ca tomi' mi' capari' con Iri' Jam ta. ²⁷ Querec pin' nain ximixi' pain ca coromicat nexi' Iri' Jam. Je ca taxi' cain ca coromicat nein Tamataracon pain ca tomi' ne iri' ximinain ma', pain ca tomi' mi' capari' con. Tomi' nain ca param pan nucun Iri' Jam. Pain ca tomi' mi' capari' con, pain ca wari' nucun Iri' Jam iri' ca', tomi' nain ca param pan nucun Iri' Jam.

²⁸ Taxi' irin i ca' quem: Oro carawa ca ara napari' ca', je ca mam' quep xiho' capari' Iri' Jam ta. Mam' quep xiho' quep xiho' pi' pin napari' pain oro carawa ca ara napari'. Pain ca om noc xun Iri' Jam cwa', mam' quep xiho' pan napari' pain oro carawa ca ara napari'. Wara tomi' ca' napari' Iri' Jam: Wari' ne inuhu' ta napari'. Ma' ta aram aram ara tain ca param ne pahu' ta napari'. ²⁹ Xi wara querec pin' ara capari' pain ca om ma' querec ne macan' pain cara pane, wara tora' napari' pane. Ma' ta main an tan pan hun Panxita' ta napari'. Ma' ta aji' hun pain ca xere xujuhu' ma' napari'. ³⁰ Pain ca wara tora' capari' ca', wari' ne napari'. Pain ca wari' ne capari'

ca', to' hohot pin napari'. Pain ca to' hohot pin capari' ca', mi' napari' pain ca jao jao ma' xun pain ca awi nucun pain ca hwara' opa nucun ta.

Ca om noc capari' Iri' Jam

³¹ Ac i ma' napari' Iri' Jam quem. Tama' quep xiho' napari'. Je ca taxi' xin ca om ma' camain' ca wari' co to' quiji' pin taxi' napari' ta. ³² Win ne ca om narain ho' capari' con Panxica pane, pain ca mi' pin caho' pin roron ta con pari' pane. Mi' napari' con, mi' mi' xam' napari' pain oro carawa con quem. Je ca tomi' xuhu' ca': Om ta mi' e' capari' pain oro carawa quem ra? Mi' e' tarapari' pain, xi wara mi' ara capari' con Panxica ta.

³³ Tora' napari' Iri' Jam. Ma' tara wari' co tomi' em' napari' con Iri' Jam ra? Om na ta. Wirico Iri' Jam ara xi' na co wara to' hohot pin napari' ta.

³⁴ Ma' tara wari' co em' pin hwe ta napari' ra? Om na ta. Mi' pin caho' ara xi' napari' Cristo Jeju. Mi' pin na, e' mami' ac ca na quem. Xao pe ho' pin nain iri' curucun Iri' Jam. Tomi' mi' napari' con quem.

³⁵ Ma' tara wari' co to' om pin taxi' nain ca om noc capari' Cristo ra? Om na ta. Om na wari', om na carawa ca to' om pin taxi' nain ca om noc capari' Cristo. Mo ta to' i'ina capari' oro carawa ma', je tara i ma' ca to' om pin taxi' nain ca om noc capari' Cristo ra? Mo ta jain jain iri' pain oro carawa ca ara napari' ca', mo ta ja' tequi' quep em' cacapari' oro wari' pain ca howa xun Iri' Jam cwa' quem, je tara i ma' ca to' om pin taxi' nain ca om noc capari' Cristo ra? Mo ta om capari' carawa ca cao' wa ca', mo ta om capari' wom cwa' quem, je tara i ma' ca to' om pin taxi' nain ca om noc capari' Cristo ra? Mo ta ma' capari' carawa ca to' cono' pin xim napari' ca', mo ta to' parapa' pin xim cacapari' quem, je tara i ma' ca to' om pin taxi' nain ca om noc capari' Cristo ra? ³⁶ Win ne ca xirao' pe xine pain capijacon Iri' Jam ca':

Tama' ma' naparut wari' co tama' to' parapa' pin xim
naparut pain oro xijein xec.

Xi om ne ca howa ara urut pum ta.

Quep em' nanaparut oro wari',

8.34 Taraju pa' jein ca tomi' mao ne ca xao pe ho' xine iri' curucun taramaxicon ma'. Xao pe ho' pin iri' nain iri' curucun taramaxicon wari' ne, querec pin' ac tocwa na pain ca taramaxicon wi pin con quem. Ac i ma' na Jeju ma' quem. Xao pe ho' pin iri' nain iri' curucun Iri' Jam ne, querec pin' ac tocwa na pain ca Taramaxicon wi pin con quem.

ac ovelha urut cocon.

Win ne ovelha pain ca to' parapa' pin xi' wa ma',
ac i ma' urut cocon.

Ac i ma' na ca xirao' pe xine pain capijacon Iri' Jam pane.

³⁷Ac je paxi' napari' oro carawa ca to' ara pin napari' ca', ane om to' quiji' pin capari' ne. Hwara' opa cara iri'. Wirico Cristo ma', co om noc napari' ma', wirico co to' hwara' opa napari'. ³⁸Om na carawa ca to' om pin taxi' nain ca om noc capari' Iri' Jam ta, taxi' ina ta. Mo ta cono' pin iri', mo ta e' iri' quem, je tara i ma' ca to' om pin nain ca noc capari' ra? Om na ta. Oro jam co taramaja mi' nonon Iri' Jam ma', oro caxicon jam co taramaja mi' nonon Caxicon Jam ma' quem, om ca to' om pin taxi' cacain ca om noc capari' Iri' Jam. Oro carawa ca ara napari' pain xocori ca', oro carawa ca om ara querec napari' quem, oro taramaxicon co hwara' opa nana ma' quem, om ca to' om pin taxi' ac cacain ca om noc capari' Iri' Jam. ³⁹Oro carawa ca to nain pawin cain, oro carawa ca to nain macan' ca' quem, om ca to' om pin taxi' nein ca om noc capari' Iri' Jam. Om na carawa ca to' om pin taxi' nein ca om noc capari' Iri' Jam ta. Pain ca om noc capari' Iri' Jam cwa', wirico Taramaxicon nexi' Cristo Jeju co an hwet mi' napari' pain ca om noc capari' ta.

Ca tora' paxi' cocon waram winacon Israel Iri' Jam pane

9Iri'o' na ca tomi' xim xuhu' ca', xi win cwere ara ton Cristo ta. Om ca tomi' mixein ta'. Tomi' napa' pain xumu Tamataracon Iri' Jam. Om ca tomi' mixein ma ta napa'. ²Tomi' xaxa' tamana ina, toron tamana napa' xumu, om ca pi' ra ha' ne ca toron capa' xumu. ³Xi xiram pa' ara toton oro ca nari ne cwa', xiram pa' inonon oro win judeu ta' cwa'. Mo xi ha' capa' pain ca pe tain maxicocon ma', wap pan ac capa' xira Iri' Jam, an pe ni ca' ac capa' xira con Cristo quem. Om ac ne xira ca wap tococwa oro ca nari ne cwa' quem. ⁴Waram winacon Israel nana oro win ma' ne cwa'. Tora' nonon Iri' Jam pain ca mana panxita' pan xuhu' ta cocon pane. An hwet mi' tata pain ca awi nucun pain ca hwara' opa nucun. Tomi' xo' tata pain ca an pe xo' mi' qui' tococwa pain capijacon pane. Mi' tata pain ca xirao' nucun Moisés. Tomi' xo' tata pain ca in ac pe tocwa pain cote ne xiricon pain ca tom tain' mi' xine pain winahu' qui' tococwa pane. Wara tomi' pe tata pain capijacon pane quem. ⁵Hwanana ne nonon Abraão con Isaque

con Jacó cara pane. Wiricoco oro win ma' ne nana co nari paxi' nonon Cristo quem. Pain ca wari' nucun Cristo pane, win ma' ne nonon. Ane Iri' Jam pan ca ne. Taramaxicon pe ho' taramaxicon pe ho' pi' pin nonon oro wari'. Taramaxicon pe ho' taramaxicon pe ho' pi' pin nain oro carawa ma' quem. Tomi' an hwet cara xin ca awi nucun ta. Amém, iri'o' na ca tomi' ne ta.

⁶Je ca tomi' xuhu' ca'. An in nain capijacon Iri' Jam ca tomi' pe mi' qui' tococwa waram winacon Israel ra? Om na ta, om ta coromicat mi' ac i ma' xun Iri' Jam ta. Xi iri' waram winacon Israel waram winacon Israel pi' pin caca oro waram winacon Israel ta. ⁷Hwanana ne paxi' nonon Abraão waram winacon pane, ane om iri' waram winacon iri' waram winacocon pi' pin caca ne. Xi wara tomi' pe ca' ara con Abraão Iri' Jam pane ta:

Wiricoco waram winacon Isaque pan tatara

co iri' waram winam pan xi' nana ta.

Ac i ma' na ca wara tomi' pe con pane. ⁸Pain ca tomi' ac i ma' con Iri' Jam pane, tomi' ca' ton na ira: Om ca mana panxita' mana panxita' pi' pin toton oro mana panxima ta non ira. Xica' to nana co an xiho' nenem pain ca howa mapa' pain ca wara tomi' pe xim ca', wiricoco nana co mana panxita' ta' ma'. Wiricoco nana co iri' waram winam nana ta na ca tomi' con ira. ⁹Wara tomi' pe ara xi' non Abraão Iri' Jam pane. Ca' non pane:

Xijein cawaxi' in qui' ta'.

Pan' qui' ac ca tara cawinacam Sara.

Ac i ma' na ca tomi' pe con pane.

¹⁰Om ca tomi' xica' pe cam Sara quem. Tomi' nam Rebeca co wanxi' mi' ca hwanana nuxut Isaque pane quem. Nam' pin iri nonon humaxicam co horoman toco' nana ne, xica' pe na Isaque co wanxi' mi' nam pane. Om na xucun tarama' co wanxi' mi' nam. ¹¹⁻¹²Tomi' ac cam na Iri' Jam pain ca om camara' querec caca humaxicam pane. Ca' nam pane:

Pije' co pan' cain' ma' pum,

taramaja mi' toron coxa' ca co pan' qui' pa'ao',

ac i ma' nam pane. Om ca camara' querec caca humaxicam, om ca ara querec cacain ca awi wa, om ca ara querec cacain ca pan tem wa quem. Tomi' ac i ma' e' nam Iri' Jam, ma' ta tora' ton co wara coromicat xo' ta' cwa', co wara tora' pe ta' cwa', ac i ma' nam. Je ca tora' con co pan' qui' pa'ao' pane. Param pan inon ta non Iri' Jam. Om ca param ton pain ca

ara pan ca ma' non. Param pan inon ta na, je ca tora' ton ca' nam pane.

¹³Win ne ca xirao' pe xine pain capijacon pane. Ca' na con pane:

Om ca noc ton Jacó cwa'.

Noc inon Esaú cwa',

ac i ma' na ca xirao' pe xine capijacon Iri' Jam pane.

Ca tora' xo' nucun Iri' Jam pain ca tora' cocon waram winacon Jacó

¹⁴Cain' cain' xixi' quem? Tomi' ximama' ca' xixi' ra? Om ca tora' xo' ca Iri' Jam, ac i ma' xixi' ra? Om na, om ca na camain' ne pain ca tomi' ac i ma' iri' ta. Tora' xo' ca Iri' Jam ca' ira! ¹⁵Wara tomi' ara xi' non Moisés pane. Ca' non pane:

Oro wari' co quep xiho' ta' ta' cwa',

quep xiho' ac toton tara.

Oro wari' co xiram pa' ta' ta' cwa',

xiram pa' ac toton tara quem.

Ac i ma' na ca tomi' con Moisés Iri' Jam pane. ¹⁶Je ca tomi' xuhu' ca': Mo ta tora' ton wari' ca Iri' Jam, tora' ac con na co param pan ca. Wari' co tora' wa ma', om ca tora' tocwa pain ca param pan nucun. Om ca tora' tocwa pain ca ara pan nucun quem. Wirico Iri' Jam co tora' pan non, maqui' pan nain ximicon, xi om ne ca quep xiho' pan ton ta ara ca ta. ¹⁷Je ca xirao' pe xine capijacon Iri' Jam pain ca tomi' con Faraó cara pane. Ca' na ca xirao' pe xine con pane:

Je ca mi' xim pain ca taramaxicon wa ca'.

Ma' ta an hwet pe tain ca hwara' opa ne pum ta inem.

Ma' ta tomi' hwet tomi' hwet pi' pin cacain wuxu oro wari'
pain oro xijein macan' ta ina quem,

ac i ma' na ca tomi' con Faraó Iri' Jam pane. ¹⁸Je ca tomi' xuhu' ca': Oro wari' co xiram pa' ta' ca Iri' Jam ma', xiram pa' ac tococwa na. Oro wari' co to' ari ta' ca ma' iri nana ne, to' ari ac tococwa na quem.

Ca wap xun tococwa oro caracat, je pain ca xiram pa' xun tococwa quem

¹⁹Am ma' ca wari' co tomi' xim napa' pahu'. Tomi' ca' tarapa': Je xi om em' ma qui' capa' Iri' Jam pain ca pan tem ne ca', xi ma' ca wari' co

ari taxi' non pain ca wara coromicat an pe xo' cain ca param nucun ta, am tomi' ximao ac i ma' ca ma'. ²⁰Cain' cain' xima quem? Wari' co tomi' ximao ac i ma' ma', tomi' ca' ac ton tara: Wari' e' ma ta. Je xi om tomi' carapita mon Iri' Jam quem, ac i ma' ton. Noro rain tapaxi' ca quep ca wari' ma' ac ton tara quem. Tapaxi' ma', ma' tara ca tomi' carapita pan ac con wari' co quep pan nain ra? Para quep ac i ca' mapa' ne ta, ac i ma' toron wari' co quep pan nain ra? Om na ta, ac i ma' tara ca tomi' ton ta. ²¹Je ca tomi' xuhu' ca'. Mo ta quep tain tapaxi' ca wari' ma', wirico co quep pan nain ca param nucun. Maxoc moin' iri nain toxam ne, quep 2 ac cain na tapaxi'. Quep nain wirain, quep awi nain. An pe xo' ac cain na, ara xite nain quem. Quep ac cain na wirain, om ca quep awi homa cain. An pe xo' paxi' nain, om ca ara xite cain. Om ca hohot ne pain ca quep ac i ma' cain ra? Hohot ne ma' ira.

²²Je ca ara ca Iri' Jam quem. An hwet pe tain ca mana' ne pain ca wap toton oro caracat ta paxi' na. Querec tatarapa' pain ca hwara' opa ne oro wari' ta paxi' na quem. Ane winim' cara tococwa oro wari' co wara mana' ta' ca cwa' ne, co wara to' om pin ta' ca cwa' ne. Om ca wap hap tococwa. ²³Winim' cara napari', ma' ta an hwet mi' xuhu' pain ca awi tamana ne pain ca hwara' opa tamana ne ca' napari'. Xiram pa' xim napari' pane. Wara an to xo' xim napari' pane. Main mi' xuhu' pain ca awi ne pain ca hwara' opa ne ta napari' pane. ²⁴Wari' pan co tora' ca cwa'. Tora' napari'. Tora' naparut pain ca judeu urut ca', tora' nuhu' pain ca om judeu hwe ma' quem. ²⁵Win ne ca xirao' pe cain ca tomi' nucun Iri' Jam Oseias cara pane. Ca' na con pane:

Oro co om wari' ne ta' pane,
wari' ne pin ac toton tara ta.
Oro co noc ta' pane,
om ca noc xuhu' ta ac toton tara quem.

²⁶Tomi' paxi' inonon pain cara pane,
om ca wari' ne xuhu' paxi' inonon pain cara pane.
Main tomi' ac toton tara,
mana panxita' inuhu' ta ac toton tara.
Wata', co Iri' Jam cwa', co e' cara cwa',
mana panxita' inuhu' ta toton ta.

Ac i ma' na ca xirao' pe cain ca tomi' nucun Iri' Jam Oseias pane.

²⁷ Pijim' nonon oro waram winacon Israel Isaías cara pane quem. Ca' na ca pijim' cocon pane:

Mija paxi' nana waram winacon Israel.

Ac namaji pain cacarain cote ne com paxi' nana pain
ca tamana nucucun.

Ane to' witan paric e' xun tococwa ne.

²⁸ Ara tain capija ca wara tomi' pe ta' pane ara xi'
na Taramaxicon nexi'.

Ara hap tain ta na.

Wap toton oro wari' ta,
om ta winim' mami' toton,
wap toton ta na.

Ac i ma' na ca pijim' ca Isaías pane. ²⁹ Je ca xirao' pe ca Isaías pain cara pane quem. Ca' na con pane:

Taramaxicon nexi' co hwara' opa tiquin' ca' nonon
oro taramaxicon cwa',

mo xi om narain ho' paric tococwa waram winaxi'
cocon mana pantiri' cwa',

om om pi' pin ac iri' xira.

Win ne ca om om pi' pin caca oro wari' nein Sodoma cocon
oro wari' nein Gomorra cara pane.

Ac i ma' na ca xirao' pe ca Isaías pane.

Ca om howa cocon Jeju oro judeu

³⁰ Je ca tomi' xuhu' ca': Oro win ma' nuhu' pain ca om judeu hwe ma', om paxi' na ca win xumu cacain ca awi wa pain ca to' hohot pin tococwa ma'. Ane to' hohot pin pan cocon Iri' Jam ne, xi om ne ca howa ara cocon Jeju ta. ³¹ Oro win judeu ta' cwa' iri nana ne, win xumu xin paxi' nanain ca tomi' ha' wa capijacon Iri' Jam. Tomi' ha' xin e', ma' ta hohot xun Iri' Jam paxi' nana, ane om tomi' ha' cacain ne. Om ca hohot cocon quem. ³² Para om hohot cocon quem? Xi howa cocon Jeju ta. Tomi' querec te tarapari' Iri' Jam ta, xi om ne ca tomi' ha' ara xun ca', ac i ma' na ca coromicat nucucun. Coromicat ca' xirara quem, tomi' querec te tarapari' Iri' Jam ta, xi om ne ca howa ara xun Jeju ta, ac i ma' xira ca coromicat nucucun. Ane om howa cocon Jeju Cristo co an xiho' nain pacun ca xut

tao' pan' non wari' ma'. Ac ca xut tao' camara' tococwa na. ³³Win ne ca xirao' pe xine pain capijacon Iri' Jam pane. Ca' na con pane:

Taraju wet je e'.

An pe inain pacun pain Sião.

Xut tao' pan' non wari' ma'.

Wari' co howa nain,

om ta xat ne ximicon,

ac i ma' na ca xirao' pe nein.

10 Je ca tomi' xuhu' ca' xere: Param tamana inon Iri' Jam pain ca to' witan pin cocon oro win ma' ne pain ca waram winacon Israel urut ca'. Je ca tomi' ton pain ca tomi' mi' toton con. ²Taxi' paxi' inonon pain ca win xumu tamana cacain oro caramaxicon Iri' Jam. Ara xin paxi' nanain ca param pan nucun quem. Ane om taraju pa' xo' caca ne. ³Xi querec pin' cacain ca ara pan ca Iri' Jam ma', pain ca to' hohot pin e' capari' pain ca howa xun Jeju cwa'. Howa e' nanain ca ara pan caca ma', pain ca tama' ara xo' xi', ma' ta hohot iri' paxi' caca ma', pain ca to' hohot pan xijexi' con Iri' Jam ta paxi' caca ma'. Om ca howa je na cocon Iri' Jam pain ca to' hohot pan xuhu' ta tococwa ma. ⁴Xi wirico Cristo ara ca co tomi' ha' tomi' ha' pi' pin nain oro ca xirao' nucun Moisés cara pane ta. Ma' ta to' hohot pin toton oro wari' co howa nanapa' ta na.

Ca to' witan pin toton paxi' cocon oro wari' Iri' Jam

⁵Je i ca' ca xirao' nucun Moisés pain ca to' hohot pin e' tocwa wari' pain ca tomi' ha' nucun: Wari' co tomi' ha' tomi' ha' pi' pin nain ca xirao' ne ca', e' ac ca tara, to' e' toron ca xirao' ne ta na ca xirao' nucun Moisés pane. ⁶Ane xirao' pe ca' xine capijacon Iri' Jam ne, pain ca tomi' capari' pain ca to' hohot pin e' tocwa wari' pain ca howa nucun ca'. Ca' na ca tomi' capari':

Om ca na ne pain ca coromicat ximama' ca' hwe:

Piri' mama' xin pawin cain,

o in qui' ac xun tara Cristo.

Ma' ta to' hohot capari' Iri' Jam ta,

om ca na ne pain coromicat ac i ma' hwe ma',

ac i ma' na ca xirao' pe xine pain capijacon Iri' Jam pane. ⁷Xirao' pe ca' na quem. Ca' napari':

Om ca na ne pain ca coromicat ximama' ca' hwe quem:
 Quiji' mama' xin cote ne man ca om tawiri cain, ca to
 pan caca orojima' cwain,
 ma' ta to' e' mami' xun Cristo ta,
 om ca na ne pain coromicat ac i ma' hwe ma' quem,
 ac i ma' na ca xirao' pe xine ma'. ⁸Xi xirao' pe ca' ara xine ta. Ca' napari':
 Wara ma' nuhu' capiiacon Iri' Jam ma'.
 Ha' pin nuhu' pain ca tomi' hwet hwein,
 ha' pin nuhu' pain ca coromicat hwein quem,
 ac i ma' na ca xirao' pe nein. Je ca pijim' hwet urut pahu' ca'. Pijim' hwet
 urut pahu' pain capiiacon Iri' Jam pain ca howa jein urut pahu' ca'. ⁹Je i
 ca' ca tomi' capari' capiiacon Iri' Jam: Mo ta tomi' hwet huhun oro wari'
 pain ca howa inon Jeju pain ca iri' Taramaxicon ca cwa' huhun ma'. Mo
 ta howa hun pain iri' xumuhu' ma', pain ca to' e' mami' con Jeju Iri' Jam
 ma'. To' witan pin ac cuhu' tara. ¹⁰Howa iri'o' iri iri' pain iri' ximixi' ne,
 hohot pin ac xun na Iri' Jam. Tomi' hwet iri irin ca howa nexi' ne, witan
 pin ac iri' na quem. ¹¹Je ca xirao' pe xine pain capiiacon Iri' Jam ca'. Ca'
 na con:

Oro wari' co howa nonon ma',
 om ta xat camain' ne ximicocon ta,
 ac i ma' na ca xirao' pe xine ma'. ¹²⁻¹³Pain ca xirao' pe nein ma', tomi'
 tomi' pi' pin napari'. Tomi' naparut pain ca judeu urut ca', tomi' nuhu' pain
 ca om judeu hwe ma' quem. Om ca jimama' ca' xijexi'. Xi xica' pe ara ca
 Cristo co Taramaxicon ne iri' cwa' ta. Ara mi' ara mi' pi' pin napari' pain
 oro ca awi wa pain ca quep xiho' xut ta xun ca'. Mija na ca ara mi' capari'
 pain oro ca awi wa ta. Ca' na con:

Wari' co quep xiho' ne ta non Taramaxicon nexi' cwa',
 to' witan pin ac tocwa tara,
 ac i ma' na ca xirao' pe xine pain capiiacon Iri' Jam pane.
¹⁴Je ca tomi' xuhu' ca': Ma' tara wari' co quep xiho' ne ta ac non pain
 ca om howa querec con ra? Ma' tara wari' co howa ac non pain ca om
 taraju querec con ra? Ma' tara wari' co taraju ac na pain ca om pijim'
 tocwa ra? ¹⁵Ma' tara ca pijim' ac tocwa wari' pain ca om mo pijim' je e'
 tococwa co pijim' xi' nana ra? Win ne ca xirao' pe xine pain capiiacon Iri'
 Jam ca'. Ca' na con:

Querec awi tamana na caximacocon oro wari'

co mo pin nanain capija con Jeju ta,
ac i ma' na ca xirao' pe nein.

Ca om howa jein capijacon Iri' Jam con Jeju ha' caca oro judeu

¹⁶Ane om howa howa pi' pin caca ne. Oro win judeu ta' co taraju nanain capijacon Iri' Jam con Jeju ma', ma' paric ca' e' nana co howa nanain. Om ca howa howa pi' pin cacain. Je ca xirao' pe ca Isaías cara pane. Ca' na ca tomi' nucun pane:

Ma' co howa nain ca pijim' nuxut ca' Taramaxicon ne?

Ac i ma' na ca xirao' pe ca Isaías cara pane. ¹⁷Je ca tomi' xuhu' ca': Howa urun Cristo, xi om ne ca ma' ara ca wari' co pijim' mi' napari' con. Oro wari' co taraju nanain ca pijim' tocwa Cristo ma', taraju e' nana pain ca pijim' mi' tococwa pain capijacon Iri' Jam ta.

¹⁸Ane tomi' querec xim xuhu' pain i ca' ne: Om ca taraju caca oro win judeu ta' ra? Om ca taraju cacain capijacon Iri' Jam con Cristo ra? Taraju caca ca' ira. Je ca xirao' pe xine pain capijacon Iri' Jam ca'. Ca' na con:

Ca pijim' nucucun oro wari' ne co pijim' nanain capija ca',
taraju taraju pi' pin ta pain oro xijein macan'.

Pijim' mama' pi' pin nanain oro xijein macan',
ac i ma' na ca xirao' pe xine pain capijacon Iri' Jam pane. ¹⁹Tomi' querec mami' xuhu' quem: Om ta taraju pa' caca oro win judeu ta' ra? Taraju pa' caca ma' ira. Wara tomi' nonon Moisés cara pane, pain ca xirao' pe qui' cain ca tomi' nucun Iri' Jam pane. Ca' na cocon pane:

Mi' xuhu' pain ca noc huhun oro co om wari' ne ta' cwa'.

Mi' xuhu' pain ca noc huhun oro co om querec pin' nanapa' cwa',
ac i ma' na ca tomi' nucun pane. ²⁰Xirao' pe ac cain na ca tomi' nucun Iri' Jam Isaías quem. Om ca jin' ca, om ca joc xim cain. Ca' na ca tomi' nucun pane:

Mam' nanapa' oro co om pirao' nanapa'.

An hwet mi' xije cocon oro co om tomi' querec nanapa' quem,
ac i ma' na ca xirao' pe cain pane. ²¹Xirao' pe ac cain na ca tomi' nucun Iri' Jam cocon oro win judeu ta' ma' quem. Ca' na ca tomi' nucun Iri' Jam:

Tama' harahap je, howa xine me paxi' inonon oro wari'
ne pain oro xijein xec.

Harahap je, howa xine me paxi' inonon.

Ane om ha' cacapa' ne.
 Ari nanapa' quem,
 ac i ma' na ca tomi' nucun pane.

Ca ma' paric ca' e' caca oro judeu co tora' ca Iri' Jam

11 Je ca tomi' xuhu' ca'. Tomi' querec xuhu': Joc in pin nonon oro win judeu ta' Iri' Jam pain ca wari' ne pan cocon ra? Om na, om ca joc in pin camain' cocon ta, xi joc in pin capa' ta. Hwanana ne pan ara xi' inon Israel cara pane, hwanana ne inon Abraão cara pane quem. Oro win ma' ne inonon oro waram winacon Benjamim cwa' quem. ²Iri' Jam ma', om ca noc caparut pain ca wari' nucun urut ca', xi wara tora' qui' ara tococwa oro hwanana nuxut pane ta. Taxi' ara xi' hwein ca xirao' pe xine capijacon Iri' Jam con Elias cara pane, pain ca tomi' mip qui' con Iri' Jam pain ca tomi' em' qui' cocon oro wari' nein Israel pane. Ca' na ca tomi' mip qui' con pane:

³To' parapa' pin nonon oro profeta nem ta Taramaxicon ne.

To' pa horohot pin nanain oro pana ca tom tain' pe xine
 carawa ca mi' xima quem.

Witan xica' pe ina.

Witan paxi' ina, pirao' nanapa' quem.

To' pa' pin xim nanapa'.

Ac i ma' na ca tomi' con Iri' Jam Elias pane. ⁴Cain' ca tomi' con Iri' Jam quem? Ca' na ca tomi' con pane:

An to xo' mi' xije cocon ca 7 mil nucucun oro co om pe
 torotop mi' nanain caji pacun Baal ma',

ca Iri' jam xi' ma caca oro wari' cwa',

ac i ma' non. ⁵Ac i ma' na pain xocori ca' quem. Ma' paric ca' e' nana oro win ma' ta' co tora' ca Iri' Jam ma', xi om ne ca xiram pa' taxipa' ara ca ta.

⁶Xiram pa' e' tata oro win judeu ta' cwa', mi' e' tata pain ca awi wa pain ca tora' tococwa ma'. Om ca taramaja mi' cacain. Mo xi tomi' ca' tococwa: Querec inain ca ara xo' tamana nuhu' ma', hohot hwe, je i ma' tara ca tora' qui' xuhu' ca', om ca tomi' ac i ma' tococwa. Mo xi om xiram pa' e' tococwa, mo xi mi' e' tococwa pain ca taramaja nucucun ma', om xi mi' e' tococwa pain ca awi wa pain ca tora' tococwa ta.

⁷ Je ca tomi' xuhu' ca': Param paxi' nanain ca hohot wa oro win judeu ta' cwa'. Tomi' ca' xucucun: To' hohot pin xijexi', ma' ta hohot pin xun Iri' Jam cwa', ac i ma' paxi' xucucun. Ane om hohot caca ne, ma' paric ca' e' nana oro win judeu ta' co wara tora' ca ma', co hohot nonon ma'. Oro xucucun ma' iri nana ne, to' ari tata. ⁸ Win ne ca xirao' pe xine pain capijacon Iri' Jam ca'. Ca' na con:

To' ara pin nonon Iri' Jam,
om ca coromicat ac caca con.
Ac ca to' pi'am pin tococwa na.
To' om pin nain tococon,
ma' ta om querec pin' hwe ma' tata.
To' om pin nain taraxicocon,
ma' ta om taraju pa' hwe ma' tata quem.
Wara ac i ma' tata pain cara pane,
ac i ma' ac i ma' wet tata pain xocori ca' quem.

Ac i ma' na ca xirao' pe xine pain capijacon Iri' Jam. ⁹ Xirao' pe nain Davi cara pane quem. Ca' na con pane:

Tomi' querec te iri nana pain ca hohot urut xi' ma caca ne,
awi na pain ca ane ane quep xat tococwa.
Awi na pain ca ac ca camara' caca ne pain man ma',
je pain ca om witan ca' ac cacain ma'.
Awi na pain ca wap tococwa quem.

¹⁰ Awi na pain ca to' om pin xine tococon,
ma' ta om querec pin' caca.
Awi na pain ca to' xone pin tococwa,
mao ac ne ma' tara cocon.

Ac i ma' na ca xirao' pe ca Davi cara pane.

Ca cut in toton oro judeu ta ca Iri' Jam

¹¹ Je ca tomi' xuhu' ca'. Tomi' querec xuhu': Pain ca camara' caca oro win judeu ta' cwa', camara' to wet cara ac caca ma' tara ra? Om na, om ca camara' to wet cara camain' caca ta! Noro jujun pain ca caracat nucucun ma'. Caracat pin iri nana ne, tomi' ac tococwa na oro co om judeu nana ma', to' witan pin xuhu' ta pan ac cocon na Iri' Jam. Hehe tatara oro judeu pahu', mana' ac caca tara, jain jain ac cacain tara ca witan pin wa quem

na ca tomi' tococwa co om judeu nana ma'. ¹²Caracat pin iri nana oro win judeu ta' cwa' ne, quep xiho' tamana ac tococwa na oro co om judeu nana pain oro xijein macan'. Paric ca' e' pin iri nana oro win judeu ta' cwa' ne, quep xiho' tamana ac tococwa na co om judeu nana ma' quem. Howa howa pi' pin iri tatara oro win judeu ta' cwa' ne, xam' pin iri tatara ne, quep xiho' cara ac tococwa tara co om judeu nana ma' quem. Tiquin' ca' tarain ca quep xiho' tococwa pain xocori ca' quem.

¹³Tomi' ho' xuhu' pain ca om judeu hwe ma' quem: Apóstolo ra napa' Iri' Jam pane, tomi' hwet rain ca tomi' ta' ta' ca' napa', pijim' hwet roron pain oro co om judeu nana ta napa' pane. Tomi' querec te tamana inon pain ca mi' capa' pain ca taramaja ne ca'. Tama' tomi' ca' inonon oro win ma' ta' cwa' quem: Tomi' napa' Iri' Jam pane, pijim' roron oro co om judeu nana ta napa' pane inonon oro win judeu ta' cwa'. ¹⁴Am to' hehe pin toton, am to' jain jain pin toton, ac i ma' na ca param ne cocon oro win judeu ta' cwa'. Jain jain xirarain ca witan wa na inonon. Tomi' ca' xirara na inonon quem: Win caca oro co om judeu nana ma', witan pin xi' quem, ac i ma' xirara na inonon. Coromicat ca' inonon: Ma' xirara na inonon oro xucucun co to' witan pin ca Iri' Jam pata' na ca coromicat ne cocon oro win judeu ta' cwa'. ¹⁵Joc in pin iri nonon oro win judeu ta' Iri' Jam pane ne, taxpia' pin xine ta ac tococwa na oro wari' pain oro xijein macan'. Je ca tomi' xuhu' ca': Om ta awi tamana ne ca tomi' querec te xun pin tococwa oro win judeu ta' cwa' ra? Ac ca to' e' pin tococwa tara co cono' nana ta.

¹⁶Tomi' xin capam' ca'. Mo ta maxiram' mi' cain capam' wari' ma', mo ta mi' cain' tocwa pain Iri' Jam ma', ac ca mene mene pi' pin cain na quem. Tomi' xin caximain pana ma' quem. Mo ta mene cain caximain pana Iri' Jam ma', mene mene pi' pin nain oro taparain quem. ¹⁷Panaji oliva ma', an xiho' naparut pain ca judeu urut ca', ac iri' panaji oliva urut. Ac ca jicaracat paric xine na taparaxut, maqui' ac hwe na pain ca om judeu hwe ma', pain ca an xiho' hwein taparain panaji caji oliva ma', an tan pan mi' ac xihwe na pain panaji iri' oliva ma', ca an xiho' naparut ma', jao jao ma'

11.16 Tomi' mi' iri non Iri' Jam Paulo ma' ne, pain ca mene mene pi' pin cain capam' je oro taparain pana ma', tomi' joc mam' mi' tata oro judeu. Win ne ca mene mene pi' pin cain capam' Iri' Jam ma', ac i ma' na pain ca wari' ne wari' ne pi' pin tococwa oro judeu pain xocori ca' quem, xi om ne ca wari' ne ara tococwa oro hwanana nucucun pane. Win ne ca mene mene pi' pin cain oro taparain pana ma' quem. Wari' ne tata oro hwanana nucucun oro judeu cara pane, wari' ne wari' ne pi' pin ac tococwa na waram winacocon ma' quem.

pin ac maparut na quem. Je ca tomi' xuhu' ca': Wahu' pain ca om judeu hwe ma', pain ca an xiho' hwein taparain caji oliva ma', jao jao ma' pin hwein oro iri' taparain panaji oliva. Jao jao ma' pin ac maparut na pain ca judeu urut ca'. Quep xiho' pin nuhu' Iri' Jam quem, xi om ne ca xiram pa' ara cuhu' ta. Win ne ca quep xiho' caparut pain ca judeu urut ca'. Ac ca e' wi maparut na, ac ca toc wi maparut na pain waraqui pana ca maqui' nein caximain ma'. ¹⁸ Je ca tomi' xuhu' ca': Ta xin to hwe me ta, ta tomi' ximama' huhun oro win judeu urut ma', pain ca an xiho' cacain taparain ca jicaracat ma'. Ta awi tiquin' ca' urut pahu' camain' huhun me ta. Om ca xin to ac hwe. Ac taparain pana e' hwe. Om ca wahu' ne co to' e' nain caximain. Caximain pan na ca to' e' nuhu' ta.

¹⁹ Am tomi' in pin ca' xi' hwe ma', pain ca jicaracat pin xine oro wirain iri' taparain ma'. Am tomi' ca' xi' hwe: Wac pit pin nonon oro judeu Iri' Jam, ma' ta an tan pan mi' xim caparut ta, am tomi' ac i ma' xi' hwe ma'. ²⁰ Je paxi' na, ane hohot ne pain ca mam' pe wet hwein i ca' ne: Jicaracat pin tata, wac pit pin tata. Xi howa caca ta. Wahu' iri na ne, hwara' opa hwe, to pin hwein pana, xi om ne ca howa ara hwe ta. Ta xin to hwe me ta. Jin' je, ma' tara xumuhu' me. ²¹ Xi narain ho' cocon oro win judeu ta' Iri' Jam pane ta. Om ca narain ho' cocon oro win judeu ta' co an xiho' nanain iri' taparain pana. Om ta narain ho' cuhu' quem.

²² Je ca tomi' xuhu' ca'. Querec pin' xun Iri' Jam ta. Awi tamana na, quep xiho' taxipa' na, je curucun mao na. Ane wap mip cocon oro caracat ne. Noro jun pain ca wap mip cocon co camara' nana pain ca caracat nucucun ma'. Je ca tomi' xuhu' ca'. Mo ta howa cara hun pain ca awi nucun ma', quep xiho' cara ac cuhu' tara. Mo ta om howa cara hun pain ca awi nucun, wac pit pin ac cuhu' tara quem. ²³ Oro win judeu ta' cwa' iri nana ne, mo ta howa mami' caca ma', cut in mami' ac tococwa tara, ac ca an tan pan mi' mami' tococwa tara pain pana, ac je tara pain ca an to mami' tococwa pain maxicocon. Xi om ne ca hwara' opa pan ara ca ta. Ha' non pain ca an tan pan mi' mami' cocon. ²⁴ Wahu' pain ca om judeu hwe ma', an xiho' hwein taparain panaji caji oliva ma'. Ac ca wac tapiripit pin cuhu' na pain wara panajuhu', wara ca' na panaji iri' oliva ma', an tan pan mi' ac cuhu' na, ac ca an tan mi' cuhu' pain na. Om paxi' na ca an tan pan mi' taxipa' xine caji oliva pain iri' oliva ma', ane an tan pan mi' cuhu' pain ne. Oro win judeu ta' cwa' iri nana ne, an xiho' nanain panaji iri' oliva ma'. Je ca tomi' xuhu' ca': Ha' non Iri' Jam pain ca an tan pan mi'

cocon pain iri' panaxicocon, om ca i'ina con. Ha' non pain ca an tan pan mi' mami' cain taparain ca jicaracat ca pane.

Ca xiram pa' xiram pa' pi' pin cocon oro wari' Iri' Jam

²⁵ Je ca tomi' xuhu' ca' xere: Ma' na ca coromicat nucun Iri' Jam ca om taraju pa' wa ira. Taraju pa' ho' jein inuhu'. Ma' ta om coromicat ximama' hwe pain ca awi tamana urut ximama' hwe ma'. Ca' na ca coromicat nucun Iri' Jam ca om an hwet querec ca ira: Oro judeu cwa', co waram winacon Israel nana cwa', om ta ari cara cacapa'. Ari ari ca' tatarapa'. Xam' iri tataro oro co om judeu nana ne, co howa xim nanapa' ma', ari ari om ac cacapa' tara oro judeu cwa', ac i ma' na ca coromicat nucun Iri' Jam. ²⁶ Ac i ma' tara ca to' witan to' witan pi' pin toton oro judeu cwa', co waram winacon Israel nana cwa' na ca coromicat nucun ca joc xim ca ira. Win ne ca xirao' pe xine pain capijacon ca'. Ca' na con:

Maqui' tarain Sião iri' wari' ne co to' witan pin ton nonon oro wari'.

To' om pin tarain ca pan teretem nucucun waram winacon Jacó.

²⁷ To' om pin tarain ca caracat nucucun.

Ac i ma' tara ca ara tain ca wara tomi' an pe xo' toton pane.

Ac i ma' na ca xirao' pe xine pain capijacon Iri' Jam pane.

²⁸ Noc nonon Iri' Jam oro win judeu ta' cwa', xi howa je na cacain capijacon ca tomi' hwet napari' con Jeju. Je ca xiram pa' pan xihwe pain ca om judeu hwe ma' quem. Ane param param wet tococwa oro win judeu ta' cwa' ne. Wara tora' to tata, param tata, xi om ne ca tora' to ara tococwa oro hwanana nuxut pane, Abraão con Isaque con Jacó cara pane. ²⁹ Xi coromicat ni ra na ca Iri' Jam ta. Om ca coromicat ni ca' cain ca wara coromicat nucun cocon oro wari' co tora' to ca pane, om ca cut in ra na cain oro caramaxicon ca awi ca wara mi' cocon pain pane. ³⁰ Wahu' pain ca om judeu hwe ma' quem, om ca tomi' ha' hun Iri' Jam pain cara pane, ari hun pane. Ane xiram pa' pin cuhu' pain xocori ca' ne, xi om ne ca ari pan ara caca oro win judeu ta' cwa'. ³¹ Ac i ma' na cocon oro win judeu ta' cwa' quem. Om ca tomi' ha' cocon Iri' Jam pain xocori ca', ari nonon. Ma' ta xiram pa' pin xihwe pain xocori ca' quem nuhu' Iri' Jam. Win ne ca xiram pa' toton oro judeu pain cara pane nuhu'. Ame hwe e', main xiram pa' mami' toton quem na ca tomi' ca ma'. ³² Tomi' ac i ma' tomi' ac i ma' pi' pin napari' Iri' Jam pain ca om tomi' ha' iri' pane, pin hwe ma'

pain napari' pane. Ari cara je e', querec pin' jein ca om tomi' ha' nuhu' e' napari', tomi' tomi' pi' pin napari' pane. Ma' ta xiram pa' xiram pa' pi' pin xuhu' ta napari'.

Ca an hwet pe xin ca tomi' querec te nexi' con Iri' Jam

³³ Awi tamana na Iri' Jam ta! Coromicat xo' na pain ca taxi' tamana nucun je pain ca querec pin' tamana nucun quem. Om na wari' co tomi' hwet taxi' nain ca coromicat nucun. Om na wari' co taraju pa' nain ca ara nucun. ³⁴ Ma' tara wari' co taxi' nain ca coromicat nucun Taramaxicon nexi' ra? Om na. Ma' tara wari' co hu taxi' non ra? Om na quem. ³⁵ Ma' tara wari' co mi' cain' non pain carawa, ma' ta pagar mapa' pain ra? Om na quem. ³⁶ Xi wirico ara ca co tomi' ma' tomi' ma' pi' pin nain oro carawa ta. Mam' to' e' nain pain ca hwara' opa nucun. Ma' ta querec pin' mahu' ta napari'. Ma' ta awi tamana na Iri' Jam ta mahu' ta napari'.

Amém, iri'o' na ca tomi' ne ta.

Ca xuruxut nexi' pain ca win xumu xun Iri' Jam

12 Je ca tomi' xuhu' ca' xere, tomi' ca' inuhu' pain ca hu xim xuhu' ca'. Xi om ne ca xiram pa' ara capari' Iri' Jam ta. Win xumu jun, ac ca mi' hun tara pain curuhu' ma'. Win ne ca tom tain' mi' tocwa pain cwerein carawa ma', ac je paxi' tara pain ca mi' hun pain curuhu'. Om e' tara pain ca mi' hun pain ca cono' nein. Mi' jun pain ca e' nein, mene rain curuxut jun. Ara xite jein quem, ma' ta hohot hun. Mi' iri jun pain curuhu' ma' ne, in ac xo' ac hun tara pain ca coromicat nuhu' pain xumuhu' ma'. ² Ta an xiho' huhun oro wari' co pan teretem nana ma' me ta. To' jimama' xut pain iri' xumuxut ca' me jun Iri' Jam. To' xocori pin rain iri' ca coromicat nuxut ca' me jun. Ma' ta ha' cuhu' pain ca querec pin' hwein oro ca param nucun ca an pe mi' capari' ca', ma' ta ara hwein quem. Param ara xi' nain oro ca awi wa Iri' Jam ta. Param nain carawa ca hohot non. Om ca param ni ca' cain oro ca param nucun.

Ca mi' capari' pain ca ara taxi' xin oro ca param nucun Iri' Jam

³ Je ca tomi' xuhu' ca': Hu xim inuhu', hu hu pi' pin xim inuhu', xi om ne ca hu roron ara capa' Iri' Jam pahu'. Ta coromicat mi' xujuhu' pain ca awi ina, taxi' tamana ina wa me. Coromicat xo' je, querec pin' jein ca taramaja taxi' wa ca mi' cuhu' Iri' Jam ma', pain ca taramaja mi' taxi' hun ma'. Win ne ca mi' pan cuhu' pain ca howa hun ma' quem. ⁴ Tomi' xin cwerexi' ca'. Ma' xica' pe paxi' na cwerexi'. Ane mija ne oro coximixi' ne. Om ca an an ari xijein ca taramaja nein oro wirain coximixi'. Ni na oro ca taramaja nein. ⁵ Ac i ma' iri' pain ca win cwere xun Cristo quem. Mija paxi' iri', ane xica' pe ne cwerexi' con Cristo ne. Xi om ne ca win cwere ara xun ta. Jao jao ma' pin xijexi' pain ca coximain curucun Cristo iri' ca'. ⁶ Pain ca ara taxi' ni ara taxi' ni pi' pin xin oro xijein ca taramaja wa ca', wirico Iri' Jam co mi' napari' pain ca ara taxi' xin. Mo ta mi' capari' pain ca tomi' hwet taxi' xin oro xocori capijacon ca', na e' na pain ca tomi' hwet xo' xin. Na e' na pain ca an an ari nein ca howa nexi' quem. ⁷ Mo ta mi' capari' pain ca quep xiho' taxi' xuxun oro win ma' nexi' cwa', na e' na pain ca quep xiho' xo' xuxun quem. Mo ta mi' capari' pain ca ca' na taxi' xin capijacon ca', na e' na pain ca ca' na xo' xin. ⁸ Mo ta mi' capari' pain ca hu taxi' xuxun oro win ma' nexi' pain ca hwara' opa je xuxun ca', na e' na pain ca hu xo' xuxun. Mo ta mi' capari' pain ca cut mi' taxi' xuxun pain caramajixi' oro win ma' nexi' cwa', na e' na pain ca mi' querec te xuxun pain. Mo ta mi' capari' pain ca taramaxicon taxi' wa, na e' na pain ca taramaxicon xo' xi'. Mo ta mi' capari' pain ca xiram pa' taxi' xuxun oro win ma' nexi' cwa', na e' na pain ca xiram pa' xuxun pain ca tomi' querec te nexi' quem.

⁹ Ta noc camain' huhun oro win ma' nuhu' me ta. Tomi' querec te iri jujun ne, tomi' querec te iri'o' ac huhun tara. Ta tomi' querec te e' ne capijahu' me ta. Noc jein oro ca pan teretem wa quem. Win xumu jein oro ca awi wa. ¹⁰ Tomi' querec te xujuhu'. Win ne ca xere xujuhu' tara pain ca howa hun Iri' Jam ma'. Awi tiquin' ca' napa' co cwa' ta, ac i ma' tara ca coromicat nuhu'. ¹¹ Win xumu jein ca taramaja nuhu' ma', jain jain jein. Om ta jam' camain' ne curuhu'. Taramaja mi' jun Taramaxicon nexi', tomi' querec te je pain ca taramaja mi' hun ma'.

¹² Tomi' querec te je. Xi ma' ara ne carawa ca awi ca mi' xim capari' Iri' Jam ta. Jain jain iri hwe pain ca to' i'ina cuhu' carawa ma' ne, ta naro hwe me ta. Hwara' opa cara je. Tama' tomi' jun Iri' Jam quem. ¹³ Mo ta om

cocon carawa oro win howa hwe ma', xiram pa' jujun, quep xiho' jujun pain caramajuhu'. Tomi' querec te jujun co maqui' nanain xijein xirim. Cao' to ho' xine, pi'am to jein xuru ta jujun.

¹⁴Mo ta quep em' cucuhu' oro wari' pain ca howa hun Iri' Jam ma', tomi' mi' jujun con. Ara mi' roron pain ca awi wa quem Te Iri' Jam, ac i ma' tara ca tomi' mi' huhun con. Ta tomi' noro huhun me ta. Tomi' mi' e' jujun con Iri' Jam. Ara mi' jujun pain ca awi wa me roron. ¹⁵Tomi' querec te wi jujun oro wari' co tomi' querec te nana ma'. Awaran wi jujun co awaran nana ma' quem. ¹⁶Ta tomi' querec te paxica' camain' xujuhu' me, je je ari tara ca coromicat nuhu' pain ca tomi' querec te xujuhu' ta. Ta tomi' xec xec hwe me ta. Quep xiho' xujuhu', ac ca taramaja mi' e' xujuhu' tara pain ca quep xiho' xujuhu' ma'. Ta tomi' ximama' hwe pain ca taxi' tamana ina ta hwe me.

¹⁷Mo ta quep em' cuhu' wari' ma', ta win mapa' ne hun me. Xuruxut xo' je, ara e' jein ca awi na ta caca oro wari' ma'. ¹⁸Tomi' querec te jujun oro wari'. Mo ta mana' in pin cucuhu', je i ma' ira, tomi' querec te pan jujun. Tomi' querec te tomi' querec te xam' jujun. ¹⁹Je ca tomi' xuhu' pain ca tomi' querec te xuhu' ca'. Ta win caca ne camain' huhun oro wari' me ta. Win caca ne pan totoron Iri' Jam ta je, coromicat ac i ma' je. Xi xirao' pe ara xine pain capiiacon Iri' Jam ta. Ca' na con:

Wata' tara co win caca ne pan nonon co pan teretem nana ma'.

Main cut in mi' pan toton pain ca ara pan teretem caca ta, ac i ma' na ca tomi' nucun.

²⁰Je ca tomi' xuhu' ca': Ta win caca ne huhun me ta. Ara jein ca xirao' pe xine capiiacon Iri' Jam. Ca' je:

Mo ta ma' ca wari' co noc nuhu' ma'.

Mo ta pe' ca, mo ta cao' ta' ca quem, mi' jun pain carawa ca cao' wa.

Mo ta toc ta' ca, mi' jun pain ca toc wa quem.

Mo ta ac i ma' hun, wixipa' ac cuhu' tara.

Ac i ma' na ca xirao' pe xine pain capiiacon Iri' Jam.

²¹Je ca tomi' xuhu' ca': Ta to' quiji' pin cuhu' ca pan tem wa me ta. Mam' to' quiji' pin pan jein pain ca awi wa ta.

Ca tomi' ha' xuxun oro taramaxicon ca Paulo

13 Tomi' ha' tomi' ha' pi' pin xuxun oro taramaxicon. Xi ma' camain' ca taramaxicon co om taramaxicon ra ta pan ca Iri' Jam ta. Oro taramaxicon ma', wirico Iri' Jam co mi' pan nonon pain ca taramaxicon wa. Wirico co taramaxicon je nonon. ²Je ca tomi' xuhu' ca': Mo ta ari con taramaxicon wari' ma', wirico Iri' Jam co ari ca. Xi wirico Iri' Jam ara ca co taramaxicon je nonon ta. Oro wari' co ari nana ma', ara cup ac cocon na taramaxicon, wap ac tococwa tara quem. ³Ane om na ne pain ca jin' tococwa oro taramaxicon ne. Wari' co xut xo' ma', om ca jin' cocon oro taramaxicon. Jin' xica' pe na wari' co pan tem ma'. Je ca tomi' xuhu' ca'. Mo ta xuruxut xo' hwe, om ac ne tara ca jin' huhun oro taramaxicon. Awi hwe ta ac cucuhu' tara quem. ⁴Taramaja mi' ara xi' nonon Iri' Jam oro taramaxicon. Quep xiho' xim nanapari'. Je ca tomi' xuhu' ca': Mo ta pan teretem hwe, na e' na pain ca jin' huhun oro taramaxicon. Om ca tomi' ximama' e' cacapari' pain ca wap xim cacapari'. Taramaja mi' ara xi' nonon Iri' Jam ta. Wirico Iri' Jam co win mu nonon pain ca wap ton cocon oro wari' co pan teretem nana ma'. ⁵Je ca tomi' xuhu' ca': Na e' na pain ca tomi' ha' huhun oro taramaxicon. Ta jin' e' hwein ca wap wa me. Ta coromicat ximama' hwe me, pain ca tomi' ha' xuxun, ma' ta om wap cacapari' ta hwe ma'. Mam' tomi' ha' pan jujun pain ca coromicat xo' ne xumuhu' ma'.

⁶Je ca pagar xuxun pain oro imposto ca pagar je cacapari' oro taramaxicon ma'. Xi taramaja mi' ara cocon Iri' Jam ta. Win xumu nanain ca taramaja nucucun quem. ⁷Je ca tomi' xuhu' ca': Mi' mi' pi' pin jujun pain ca dever huhun ma'. Pagar jujun pain oro imposto ca pagar je cucuhu' ma'. Ara xite ara xite xam' jujun ta. Tomi' xo' tomi' xo' xam' jujun quem.

Ca om noc tococwa oro wari'

⁸Ta dever camain' huhun oro wari' me ta. Ma' xica' pe tara ca dever xi' hwe ma', dever jujun pain ca tomi' querec te nuhu'. Ta noc camain' xujuhu' me ta. Wari' co om noc non win ma' ca ma', wirico co tomi' ha' tomi' ha' pi' pin nain oro ca xirao' nucun Moisés. ⁹Mo na oro ca xirao' nucun Moisés ca hu capari' ca':

Wum pain ca tarama' nem ma', ta quep mam manacon
win tarama' ma me.

Wum pain ca narima' ma ma' quem, ta quep ne mon
taxicam win narima' ma quem me.

Ta to' pa' mon wari' me ta.

Ta an noc xa ma me ta.

Ta querec param main caramaxicon win ma' ma me ta.

Ma' na oro xijein ca hu nucun quem. Mo ta tomi' ha' tomi' ha' pi' pin xin
hwein oro ca xirao' nucun ca', wara tomi' ha' ac hwein tara i ca' con quem.

Ta noc mon win ma' ma me ta.

Win ne ca om noc pan xijem ma' quem napari',
ac i ma' na ca hu nucun. Mo ta tomi' ha' hwein ca hu nucun ca', ac ca
wara tomi' ha' hwein na oro xijein ca hu nucun ta. ¹⁰Mo ta om noc xun
win ma' nexi' cwa', om ta quep em' xun. Om ta ara cup camain' xun. Je
ca tomi' xuhu' ca': Mo ta om noc xun win ma' nexi' cwa', ac ca wara tomi'
ha' tomi' ha' pi' pin xin ne oro ca xirao' nucun Moisés ta.

Ca wixicam pin ne xec nein ca in qui' ta' ca Jeju

¹¹Na e' na pain ca ara hwein ca tomi' xuhu' ca' ne, xi querec pin' ara
hwein oro xec nexi' ta. Querec ho' xi', pi'am maho' xi', naro maho' xi'. Xi
om ne ca wixicam pin ara ne xec nein ca to' witan pin xim capari' ta. Om
ca wixicam querec ne pain cara pane, pain ca xo' howa qui' xun Cristo
pane. Ane wixicam pin ne pain xocori ca' ne. ¹²Ac ca xim pin ne na pain
macan' ca', xi om ne ca pan teretem ara caca oro wari' ta. Ane wara pi'
pin ta' ne xim ne. Ac ca wara xec pin ta' ne na quem, xi in qui' ta' ara ca
Cristo ta. Je ta maho' qui' xin oro ca pan teretem wa ca ara towa taxipa'
caca oro caracat ma'. Noro jujun oro soldado co to nonon womicocon ma',
pain ca mixita xi' caca pain oro xec. Mam' mixita xin oro ca pan teretem
wa pain naran nucun Iri' Jam quem. ¹³Xuruxut xo' xi'. Wari' nein xec xi'.
Om ta tamanain to xi'. Om ta toc tamanain to xi'. Om ta quep ximama'
xi'. Om ta noc ximama' xijexi'. Om ta noc mi' xijexi' pain oro caramajixi'.
¹⁴An xiho' xun Taramaxicon nexi' Jeju Cristo. Win cwere xun, ac ca to
xun tara. Win ne ca to xun wom cwa', ac ca to xun tara pain ca an xiho'
xun pain oro ca ara nucun, je pain oro ca coromicat nucun. Maho' xin ca
coromicat an to xo' wa oro ca param ximao wa ta.

**Co hwara' opa nana pain ca howa nucucun, cocon co om
hwara' opa nana pain ca howa nucucun quem**

14 Tomi' querec te jujun oro win howa hwe co i'ina ximicocon ma', pain ca ein cacain oro carawa jima'o ma'. Howa paxi' nana. Om e' na ca taraju pa' homa caca. Om ca hwara' opa caca. Je i ma' ira, tomi' querec te e' jujun ta. Ta tomi' mana' huhun pain ca om taraju pa' nucucun me ta. ²Noro jujun co howa ni ca' xucucun ma'. Ma' nana co hohot na pain ca cao' cao' pi' pin xin oro carawa ta nana. Oro xucucun ma' iri nana ne, co om hwara' opa nana pain ca howa nucucun ma', co om taraju pa' homa nana ma', om ca hohot ne pain ca cao' cao' pi' pin xin oro carawa, hohot e' na pain ca cao' e' xin oro caji tan ta, ac i ma' na ca howa nucucun. ³Wahu' pain ca cao' cao' pi' pin hwein oro carawa ma', ta noc huhun co om cao' nanain me ta. Wahu' pain ca om cao' hwein oro carawa ma' iri na ne, ta tomi' ximama' huhun co cao' nanain me ta. Xi hohot mahu' ara cocon Iri' Jam ta. ⁴Cain' cain' xihwe quem? Tomi' xin ca ara pan ca wari' cwa', pain ca taramaja mi' con xucun wari' ma'. Om ca na ne pain ca tomi' ximama' xun co taramaja mi' non xucun wari'. Taxi' pan toron taramaxicon nucun co taramaja mi' ca ma'. Am hohot con, am om hohot con, taxi' pan toron. Hohot ma ta toron Taramaxicon nexi' quem, xi om ne ca ha' ara con pain ca mam' quep xih'o con pain ca hwara' opa nucun ta.

⁵Noro jun wari' co coromicat ca' nain xec nein ca xao to wa ne ca xumu wa ca' quem. Ma' na xec ca awi tiquin' ca' nain oro xijein xec, ac i ma' na ca coromicat nucun. Xucun ma' iri na ne, coromicat ni ac ca na quem. Om na, an an ari xijein oro xec ta, ac i ma' na ca coromicat nucun quem. Je i ma' ira. Je ca tomi' xuhu' ca': Na e' na pain ca coromicat xo' xi' pain ca hohot na ca coromicat ne pi' pin xi' pain iri' ximixi' ta. Taxi' taxi' xam' xin ca howa iri' ca'. ⁶Wari' co coromicat ni ma', pain ca ma' na xec ca awi tiquin' ca' nain oro xijein xec ta ca ma', mam' pe wet non Taramaxicon nexi' pain ca coromicat nucun. Wari' co cao' nain cwerein carawa ma' quem, mam' pe wet non Taramaxicon nexi' pain ca cao' nucun quem, xi om ne ca tomi' querec te ara con pain. Wari' co om cao' nain cwerein carawa ma' quem, mam' pe wet non Taramaxicon nexi' pain ca om cao' nucun, tomi' querec te ac con pain na quem. ⁷Xi tama' ara e' xin ca param nexi' ta. Om ca ara xin ca param nexi' pain ca e' e' wet nexi', om ca ara xin ca param nexi' pain ca cono' nexi' quem. ⁸Pain ca e' e' wet

nexi' ca', wari' ne napari' Taramaxicon nexi', ara ac xin na ca param pan nucun. Cono' pin xi' iri iri' ne, wari' ne napari' quem, je ca param nucun ca ara napari' quem. Je ca tomi' xuhu' ca': Mo ta e' iri', mo ta cono' iri', wari' ne napari' Taramaxicon nexi' ta. ⁹Je ca mi' pin ca Cristo pane. Je ca e' mami' ca quem. Ma' ta Taramaxicon ne cacapa' co wara cono' nana, ma' ta Taramaxicon ne cacapa' co e' e' wet nana ta napari'.

¹⁰Je ca tomi' xuhu' ca': Wum pain ca om cao' main cwerein carawa ma', para tomi' ximao momon xerem co cao' nanain quem? Wum pain ca cao' main oro cwerein carawa ma' quem, para tomi' ximao momon xerem co om cao' nanain quem? Cain' cain' xihwe quem? Main maqui' ta' ara xi' na xec nein ca coco' quima hwet coco' quima hwet pi' pin xun Iri' Jam ta. Tomi' xo' ac capari' tara pain oro carawa ca ara iri' pain ca to to wet xin macan' ca'. ¹¹Je ca xirao' pe xine pain capijacon Iri' Jam cwa', pain ca xirao' xine ca tomi' nucun Taramaxicon nexi'. Ca' na con:

Pe torotop mi' tatarapa' oro wari' ta.

Om ca mixein ta', pe torotop mi' pe torotop mi' pi' pin tatarapa' ta.

Awi na Iri' Jam awi na Iri' Jam pi' pin tatarapa' ta.

Ac i ma' na ca xirao' pe xine ca tomi' nucun Taramaxicon nexi'.

¹²Je ca tomi' xuhu' ca': Tomi' xo' iri tarapari' Iri' Jam pain oro carawa ca ara iri' pain macan' ca' ne. Tomi' tomi' pi' pin ac xun tara pain iri' menexi'. Ca' na ca ara ta' pane, ca' na ca pan tem ta' pane, xic xic pi' pin xin con, ac i ma' tara pain ca tomi' hwet tomi' hwet pi' pin xun pain iri' menexi' ca ara pan iri' pain ca e' e' wet nexi'.

Ca om ha' ne pain ca to' caracat xijexi'

¹³Je ca tomi' xuhu' ca'. Om ta tomi' ximama' mami' xijexi'. Coromicat xo' xi', na e' na pain ca om ara cup xuxun xerexi' cwa', om ta ja' camara' pin xuxun. ¹⁴Tomi' ca' inuhu' pain ca win cwere ton Taramaxicon nexi' Jeju cwa'. Om na carawa ca cao' wa ca om awi cwerein, taxi' ina ta. Om ca tara ta'a camain' ta' pain. Tara con wari' co coromicat ni ma'. Mo ta coromicat ni ca' ca: Om ca hohot ne carawa ma', om ca awi ne ma' tara ca coromicat ni nucun ma'. Je i ma' ira, om pan na ca hohot con pain ca cao' cain ma', xi awi na ta cain ta. ¹⁵Mo ta cao' irin oro carawa ma', mo ta ja' tomi' xaxa' xuxun xerexi' pain carawa ca cao' iri', ac ca om ara xite xuxun na, ac ca noc xuxun na quem. Noc xuxun ma' ira. Om ta ja' em' xuxun oro

wari' co mi' pin caho' ca Cristo ta. Om ta mam' to' em' xuxun pain carawa ca cao' iri' ta. ¹⁶Om ta mam' ara cup xuxun oro wari' pain carawa ca ara iri'. Hohot paxi' tara ca ara iri'. Mo ta om ca awi ne ta cacain oro wari' ma', om ac ne tara ca ara xin. Ma' ta om tomi' napat cacapari' pain ca ara xin carawa ca awi paxi' ta. ¹⁷Xi tomi' xeo pa' capari' Iri' Jam pain carawa ca cao' wa pain ca taramaxicon pe ho' capari' ta. Om ca tomi' xeo pa' capari' pain carawa ca toc iri' quem, om na. Ma' na xijein carawa ca tomi' capari': To' hohot pin nuhu' Tamatara ta napari'. Mi' nuhu' pain ca om toron ne xumuhu' Tamatara ta napari'. Ja' tomi' querec te nuhu' Tamatara ta napari' quem, je i ma' ca tomi' capari' Iri' Jam. ¹⁸Mo ta tomi' ha' ac i ma' xun Cristo, hohot ac xun tara Iri' Jam. Hohot hwe ta ac cacapari' tara oro wari' quem.

¹⁹Je ca tomi' ca' xuhu' ca': Win xumu xin oro carawa ca mi' napari' pain ca om toron ne ximixi'. Win xumu xin oro carawa ca to' hwara' opa napari' pain ca howa xun Iri' Jam quem. ²⁰Om ta ara em' pin xin ca taramaja nucun Iri' Jam pain ximixi', om ta mam' ara em' pin xin pain carawa ca cao' iri' ta. Hohot paxi' na oro carawa. Om e' na ca hohot ne pain ca mam' ja' camara' pin xuxun oro win ma' nexi' pain carawa ca cao' iri'. ²¹Mo ta mam' ja' camara' pin xuxun xerexi' pain carawa ca cao' iri' ca', awi na pain ca om cao' xin. Mo ta mam' ja' camara' pin xuxun pain comi uva ca mana' ca toc iri' quem, awi na pain ca om toc xin. Mo ta mam' ja' camara' pin xuxun pain oro carawa ca ara xi' iri' ma' quem, awi na pain ca om ara xin. ²²Na e' na pain ca coromicat ca' xi': Mo ta hohot na pain ca cao' xin i ca', hohot na pain ca toc xin i ca' quem iri', mo ta coromicat ac i ma' iri', joc xim xin ta. Mo ta coromicat ni iri' quem, mo ta om ca hohot ne pain ca cao' xin i ca', om ca hohot ne pain ca toc xin i ca' quem iri', joc xim xin quem. Om ta tomi' hwet xin ca coromicat nexi'. Xica' pe tara Iri' Jam co taxi' nain pari'. Mo ta hohot na pain ca ara xin i ca' ma' tara ca coromicat nexi' ca'. Mo ta ara xin, mo ta om em' ma' ta capari' ca coromicat nexi' ca', param mi' ac capari' tara pain ca awi wa Iri' Jam ta. ²³Mo ta i'ina ne ximixi' ca', mo ta coromicat ca' iri', om paxi' na ca hohot ne pain ca cao' xin, ac i ca' paxi' tara ca coromicat nexi'. Mo ta cao' ma' xin ne iri', em' pin ac iri' tara. Xi wara hohot na ta iri' pain ca coromicat nexi' ta. Mo ta ara ma' xin ne irin carawa ca om hohot na ta iri' ma', caracat ac iri' tara quem.

Ca quep xiho' xijexi' ca', pain ca om ara pan xin ca param nexi'

15 Wari' pain ca hwara' opa iri' ca', pain ca howa xun Iri' Jam cwa', na e' na pain ca quep xiho' xuxun oro co om hwara' opa nana pain ca howa nucucun ma'. Xiram pa' xuxun. Om ta ara e' xin ca param nexi'. ²Ara xica' pe ara xica' pe xam' xin ca param pan caca xerexi', ma' ta quep xiho' xuxun, ma' ta to' hwara' opa xuxun pain ca howa nucucun quem. ³Xi ara pan cain ca param nucun Cristo pane ta. Ara nain ca param nucun Cote ca. Tomi' xirac paxi' ta. Je i ma' ira, ara ara ac cain na ca param nucun Cote ca. Win ne ca xirao' pe xine pain capiijacon Iri' Jam ca', pain ca tomi' con Iri' Jam Jeju pane. Ca' na con pane:

Tomi' xirac iri nenem oro wari' ma' ne,

wata' ac ne na co tomi' xirac pan caca ma',

ac i ma' na ca tomi' nucun pane. ⁴Je ca xirao' pe xine oro capiijacon Iri' Jam pain cara pane, ma' ta ca' na xuhu' ta napari'. Je capiijacon ca mi' napari' pain ca hwara' opa cara wa pain ca to' i'ina capari' oro carawa. To' quereme napari', ma' ta winim' cara mahu' pain ca mi' xim xuhu' pain carawa ca awi ta napari'. ⁵Wirico Iri' Jam co mi' napari' pain ca hwara' opa wa pain ca to' i'ina capari' oro carawa. Wirico co to' quereme napari' quem. Param inon pain ca mi' cuhu' pain ca an xiho' xujuhu' pain ca coromicat nuhu'. Param inon pain ca mi' cuhu' pain ca an xiho' hun Cristo Jeju quem. ⁶Ma' ta awi na Iri' Jam awi na Iri' Jam pi' pin hwe ta inuhu'. Ac ca xica' pe ne tara capiijahu' pain ca tomi' hwet hwein ca awi nucun. Awi na Iri' Jam ta, awi na Cote ca Taramaxicon nexi' Jeju Cristo ta, ac i ma' tara ca tomi' nuhu' ta.

⁷Je ca tomi' xuhu' ca': Tomi' querec te xujuhu' me. Win ne ca tomi' querec te capari' Cristo cwa'. Ma' ta awi na Iri' Jam ta caca oro wari' pahu'. ⁸Mam' pe wet jein i ca': Quiji' hwet roron oro judeu, quep xiho' roron ta non Cristo Iri' Jam pane. Ma' ta querec pin' cacapa' pain ca om mixein ne non. Ma' ta ara tain oro capiija ca wara tomi' pe toton oro hwanana nucucun pane non. ⁹Ma' ta tomi' hwet cacapa' oro co om judeu nana ta non. Awi na Iri' Jam awi na Iri' Jam, xi om ne ca xiram pa' ara capari' ta, ac i ma' tatarapa' ta non. Win ne ca xirao' pe xine ca tomi' nucun Cristo pane, pain ca tomi' con Cote ca pane. Ca' na con pane:

Je ta tomi' hwet qui' tain ca awi nem pain ca aram aram

pe ho' toton oro co om judeu nana ta.

Awi na Iri' Jam awi na Iri' Jam ta ta' pum.

Com an hwet pe tain wuxum quem.

Ac i ma' na ca tomi' con pane. ¹⁰Ma' na xijein ca xirao' pe nein ca tomi' nucun ca' quem. Ca' na con:

Tomi' inuhu' pain ca om judeu hwe ma'.

Tomi' querec te je.

Tomi' querec te wi je cocon oro wari' nucun Iri' Jam cwa'.

Ac i ma' na ca xirao' pe xine ca tomi' nucun. ¹¹Ma' na xijein ca' quem. Ca' na ca xirao' pe nein:

Tomi' inuhu' pain ca om judeu hwe ma'.

Awi na Taramaxicon Iri' Jam, awi na Taramaxicon Iri' Jam pi' pin je.

Awi na awi na pi' pin totoron oro xucucun wari' ma' quem.

Ac i ma' na ca xirao' pe nein. ¹²Xirao' pe na Isaías pane quem. Ca' na con pane:

Main maqui' tara winacon Jessé.

Taramaxicon pe ho' totoron oro co om judeu nana ma'.

Mi' totoron pain ca howa cocon pain ca winim' cara cocon ta.

Ac i ma' na ca xirao' pe ca Isaías pane.

¹³Wirico Iri' Jam co mi' napari' pain ca howa xun pain ca winim' cara xin oro carawa ca awi ca mi' xim capari' ca'. Param inon pain ca mi' cuhu' pain ca tomi' querec te wa, param inon pain ca mi' cuhu' pain ca om toron ne xumuhu' quem. Xi howa ara hun ta. Param inain Tamataracon pain ca mi' mi' tiquin' cuhu' pain ca winim' cara hun ma'. Mam' mi' turuhu' pain ca winim' cara wa pain ca hwara' opa nein quem.

Ca tomi' xo' tococwa pain ca taramaja mi' tocwa Iri' Jam

¹⁴Taxi' inuhu' pain ca xuruxut xo' tamana hwe quem xere. Taraju pa' tamana hwe, hu taxi' xujuhu' quem. ¹⁵Ane ma' ma' wet paxi' ne ca om taraju pa' querec hwein ca ca' na xuhu' pain capiacaon Iri' Jam ne. Je ca xirao' mi' xuhu' ca'. Om ca hehe ta' pain ca xirao' mi' xuhu' pain, tomi' mip inuhu' pain. Ma' ta mam' pe wet mami' hwein ca wara ca' na xuhu' pain capiacaon Iri' Jam ta inuhu'. Wirico Iri' Jam ara xi' na co mi' e' napa' pain ca taramaja ne ca' pahu', ¹⁶pain ca taramaja mi' ron Cristo Jeju pain ca pijim' mi' momon con oro co om judeu nana ta capa' pahu' pane. Ara inain ca taramaja nucun wari' co tom tain' mi' taxipa' non pain carawa Iri'

Jam ma', pain ca pijim' mi' xuhu' pain capijacon Iri' Jam ca tomi' hwet napari' con Jeju. Pijim' mi' inuhu' pain capijacon Iri' Jam, ma' ta tomi' querec te cuhu' pain ca o mi' xuhu' con inuhu'. Ac carawa ca mi' querec te wa hwe pata', ac ca cut mi' e' xuhu' con tara pain ca o mi' xuhu' con. Mam' to' hohot ara xi' nuhu' pain Tamataracon ta.

¹⁷ Je ca tomi' hwet xuhu' pain ca taramaja ne ca', pain ca taramaja mi' ton Iri' Jam cwa'. Ja' tomi' querec te napa' ca taramaja ne pain ca win cwere ton Cristo Jeju cwa'. ¹⁸ Om ca tomi' hwet xitoton pain ca ara pan ta' na xuhu' ca'. Tomi' hwet e' inuhu' pain ca tomi' wi pan capa' Cristo cwa', tomi' hwet e' inuhu' pain ca ara wi pan capa' quem. Wirico co mi' napa' pain ca pijim' toton oro co om judeu nana ma', ma' ta tomi' ha' pin hun Iri' Jam ta inonon. ¹⁹ An hwet mi' tata pain ca hwara' opa nucun Iri' Jam Cristo pata' quem. Wa wa ac caca na, querec pin' ac cocon na Iri' Jam, xi hwara' opa ara ne Tamataracon ta. Pijim' inain capijacon Iri' Jam ca tomi' hwet napari' con Cristo pain ca to' witan xim cuhu' Cristo ta capari' ca'. Pijim' pe cain' inain Jerusalém pain oro cidade ca to ja' pan nain pane, pijim' mao ac tain na oro xijein macan', pijim' pijim' hwet ac tain na Ilírico pane. ²⁰ Je cwere pane. Hwet toton iri inonon oro wari' pain ca pijim' mi' toton pain capijacon Iri' Jam con Jeju ne, hwet e' inonon oro wari' co om taraju querec nonon, pijim' ac toton na quem. Noc ara xi' inain ca joc in pin toton oro win ma' ne co wara pijim' nana ma', xi wara ma' ara ne ca taramaja nucucun pain ca pijim' nucucun ta. Win caca wari' co quep nanain xirim ma', co wara cut in xo' nanain pacun pain caximain xirim ma'. Mo ta pijim' pe tain ca wara pijim' to caca ma', ac ca quep caho' toton na pain xirim ca wara quep xi' caca ma', pain ca cut toco' xo' cacain caji macan' pain pacun pain caximain ma'. ²¹ Win ne ca xirao' pe xine pain capijacon Iri' Jam ca'. Ca' na con:

Oro wari' co om taraju camain' nanain wixicon ma',
querec pin' ac cocon tara.

Oro wari' co om tomi' hwet wawa con,
querec pin' ac cocon tara quem.

Ac i ma' na ca xirao' pe xine con.

Ca mo querec xuhu' pain Roma ta ca Paulo

²² Je ca om hwet ac xuhu' pain xocori ca'. Mija paxi' na ca querec xim paxi' xuhu' pane, ane om na capa' pane ne. ²³ Pain xocori ca' iri na ne, ara ara pi' pin inain oro ca taramaja ne pain i ca'. Je ca querec ho' xim xuhu' ca', xi pain ara ne ca querec xim xuhu' ta. ²⁴ Mao tain iri tain Espanha ne, hwet ac xuhu' tara, pe ho' wijimain ac xuhu' tara quem. Tomi' querec te tomi' querec te noc pin iri xijexi' ne, quep xiho' ac mahu' tara pain ca xut tiquin' mao tain ta' Espanha cain. ²⁵ Je paxi' na ca coromicat ne ca', ane mao cain' tain ta' Jerusalém ne. Quep xiho' cain' toton oro wari' nucun Iri' Jam pain Jerusalém cain, pain ca cut mi' toton ta' pain dinheiro inonon. ²⁶ Xi xiram pa' ara tococwa oro wari' nucun Iri' Jam co ximin nana pain Jerusalém cain. Wiricoco oro xerexi' co to nanain Macedônia pain Acaia co xiram pa' nonon. Cut mi' xuxun pain dinheiro e' nana, cut in querec te ac cacain na. Mi' roron pain ta ac cacapa' na quem. ²⁷ Wiricoco pan nana co cut mi' xuxun pain nana, maqui' nain ximicocon. Hohot na quem. Ac ca dever tococwa ara xi' na oro win howa caca co judeu nana ma'. Xi wiricoco ara caca oro judeu co wara quep xiho' pan nonon oro co om judeu nana ma', pain ca mi' tiquin' pan cocon pain oro ca awi wa ca tomi' pe qui' cocon Iri' Jam pane, pain ca to' hwara' opa pin tococwa pain ximicocon ta. Je ca na e' ne pain ca quep xiho' tococwa pain ca ximin nucucun pain ca mi' tococwa pain dinheiro pain xocori ca'. ²⁸ Mi' mi' pi' pin iri toton pain dinheiro ca mi' roron cacapa' ca' ne, hwet ac xuhu' tara. Hwet cain' xuhu', paca' ac xuhu' tara, mao ac tain tara Espanha. ²⁹ Querec iri xuhu' ne, ja' tomi' querec te ac xuhu' tara con Cristo. Ara mi' tamana ac capari' tara pain oro ca awi wa, taxi' inon ta.

Ca tomi' mi' xine con Iri' Jam ca Paulo

³⁰ Je ca tomi' xuhu' ca' xere. Wirico Taramaxicon nexi' co mi' napa' pain ca tomi' xuhu' ca'. Je Tamataracon Iri' Jam ca mi' napari' pain ca om noc xijexi' quem. Hu ca' xim inuhu': Quep xiho' xine pain ca tomi' mi' mahu' con Iri' Jam me. Tomi' tara iri' xumuhu' pain ca tomi' mi' mahu' con. ³¹ Ma' ta narain ho' capa' cocon oro wari' co to nanain Judeia ma', co om howa je na nana ma'. Ma' ta tomi' querec te cacapa' oro wari' nucun Iri' Jam co to nanain Jerusalém quem, pain ca mi' toton ta' pain dinheiro nucucun

xerexi' cwa'. ³²Ma' ta ha' capa' pain ca aram aram hwet xuhu' quem. Mo ta param capa' Iri' Jam pain ca querec xim xuhu' ca', aram aram hwet ac xuhu' tara. Tomi' querec te caracan ac xijexi' tara quem. ³³Tomi' mi' inuhu' con Iri' Jam co mi' napari' pain ca om toron ne ximixi' ca' quem. Param inon pain ca pe ho' pe ho' pi' pin cuhu' quem. Amém, iri'o' na ca tomi' ne ta.

Ca tomi' querec te jem Febe cwa' tococwa

16 Tomi' xim inuhu' cam cowere' Febe cwa'. Quep xiho' nonon oro xerexi' co cut in xucucun pain Cencreia. ²Tomi' querec te jem. Wari' nucun Taramaxicon nexi' ara xi' na. Ac ca tomi' querec te xujuhu' pain ca xere xujuhu' ma' tara pain ca tomi' querec te hwem me. Quep xiho' jem quem. Mo ta ma' ne carawa ca om nam, mi' ac hwem pain tara. Mija ara xi' na oro wari' co quep xiho' cama pane, quep xiho' napa' pane quem.

Ca mam' pe wet nuhu' Paulo ta jejem co xirao' ta' wixicacam cwa' ca Paulo

³Tomi' jem Priscila con Áquila pata' pain ca mam' pe wet tatam ca'. Taramaja wi nanapa' pain ca taramaja mi' urut con Cristo Jeju. ⁴Narain ho' nanapa' pane quem. Om ca narain ho' pan xequequem, to' parapa' ma' tatarapari' ne nana pain ca quep xiho' cacapa' pane. Je ca tomi' querec te tamana tatam ca'. Om ca xica' pe ta' co tomi' querec te nanam quem, tomi' querec te tomi' querec te pi' pin nanam oro xerexi' co om judeu nana cwa', co cut in xucucun pain ca howa cocon Jeju cwa' quem.

⁵Tomi' jujun oro xerexi' ma'. Mam' pe wet nuhu' Paulo ta jujun pain ca cut in to xucucun pain xiricacam pain ca howa cocon Jeju ma' quem.

Tomi' jun Epêneto ma', co tomi' querec te ta' ma'. Mam' pe wet nem Paulo ta jun. Wirico Epêneto co howa cain' non Cristo pain macarain Ásia pain cara pane.

⁶Tomi' jem Maria ma', co quep xiho' tamana nuhu' ma'. Mam' pe wet nem Paulo ta jem.

⁷Tomi' jujun Andrônico con Júnias ma', co nari ta' ma'. Mam' pe wet nuhu' Paulo ta jujun. Tao' to wi nanapa' pain xirinain ca tao' to tao' to to wa

pane. Querec pin' tata, awi tamana nana ta tata pain ca taramaja nucucun pain ca oro apóstolo caca ma'. Wara howa ca' nanapa' con Cristo quem.

⁸Tomi' jun Ampliato ma', co tomi' querec te tamana ta' pain ca win cwere wi urut con Taramaxicon nexi' quem. Mam' pe wet nem Paulo ta jun.

⁹Tomi' jun Urbano ma' quem, co taramaja wi naparut pain ca taramaja mi' urut con Cristo ca'. Mam' pe wet nem Paulo ta jun.

Estáquis ma' quem, co tomi' querec te ta' ma' quem, mam' pe wet nem Paulo ta jun quem.

¹⁰Tomi' jun Apeles ma' quem, co querec pin' wa pain ca howa iri'o' con Cristo ma'. Mam' pe wet nem Paulo ta jun.

Oro wari' co to ho' nonon Aristóbulo ma', pain xiricon ma' quem, mam' pe wet nuhu' Paulo ta jujun.

¹¹Tomi' jun Herodião ma', co nari ta' ma' quem. Mam' pe wet nem Paulo ta jun.

Tomi' jujun oro wari' co to ho' nonon Narciso pain xiricon ma', co howa nonon Taramaxicon nexi' ma' quem. Mam' pe wet nuhu' Paulo ta jujun.

¹²Tomi' jejem Trifena cam Trifosa ma', co taramaja mi' tamana nonon Taramaxicon nexi' ma' quem. Mam' pe wet nuhu' Paulo ta jejem.

Wiricam Pérside ma' quem, co tomi' querec te iri' ma', co taramaja mi' tamana non Taramaxicon nexi' ma', mam' pe wet nem Paulo ta jem quem.

¹³Tomi' jun Rufo ma', co tora' ca Taramaxicon nexi' ma' quem. Mam' pe wet nem Paulo ta jun.

Jicon ma' quem, co ac ca na' ta' ma' quem, mam' pe wet nem Paulo ta jem quem.

¹⁴Tomi' jujun caram ma' quem, Asíncrito, Flegonte, Hermes, Pátrobas, Hermas, cocon oro xerexi' co cut in wi nana ma' cocon. Mam' pe wet nuhu' Paulo ta jujun.

¹⁵Tomi' jejem caram ma' quem, Filólogo cam Júlia, wirico Nereu cam coxa' ca ma' quem, tomi' jem Olimpás ma' quem, tomi' jujun oro wari' nucun Iri' Jam co cut in wi nana cacam. Mam' pe wet nuhu' Paulo ta jejem quem.

¹⁶An hwet mi' xujuhu' pain ca tomi' querec te xujuhu' ma'.

Mam' pe wet urut pahu' mam' pe wet urut pahu' pi' pin nunuhu' oro xerexi' co cut in xucucun pain ca howa cocon Cristo cwa'.

Ca hu mam' tococwa cocon oro co ja' teretem nonon

¹⁷ Tomi' ca' inuhu' pain ca hu xim xuhu' ca' xere. Ma' tara xumuhu' cocon oro wari' co ja' teretem nunuhu' pain ca ja' coromicat ni xujuhu' ma'. Querec jujun oro wari' co ja' caracat nunuhu' pain ca ja' howa pan teretem pin xim cucuhu' ma' quem. Ma' tara xumuhu' cocon oro wari' co tomi' in pin nanain capijacon Iri' Jam ca ca' na xihwe pane quem. Mo mo to ca' jujun ta. ¹⁸ Xi taramaja mi' cocon Taramaxicon nexi' Cristo oro wari' co ac i ma' nana ta. Taramaja mi' e' nanain carawa ca cao' wa, taramaja mi' e' nanain pemehecucun, taramaja mi' e' nanain ca param pan teretem caca ma'. Tomi' awi paxi' nonon oro wari', ane tomi' xin to e' cocon ne. Ac i ma' na ca mixein cocon oro wari' co om querec pin' nanain ca pan tem wa ma'. ¹⁹ Taxi' ara xi' nunuhu' oro xerexi' pain oro xijein cidade, taxi' taxi' pi' pin nunuhu' pain ca tomi' ha' taxipa' hwe ma' quem. Je ca tomi' querec te xuhu' ca'. Param inuhu' pain ca coromicat xo' hwe pain ca ara taxi' hwein ca awi wa. Noc inuhu' pain ca coromicat pan teretem hwe pain ca ara taxi' hwein ca om awi wa quem. ²⁰ Iri' Jam co mi' napari' pain ca om toron ne ximixi' ca', to' quiji' pin ho' toron Caxicon Jam. Om ta om om ca, to' quiji' pin ho' toron quem. Mi' turuhu' pain ca hwara' opa tiquin' ca' hun quem. Ac ca xom hun tara pain ca hwara' opa tiquin' ca' xun hwe ma'.

Param inon Taramaxicon nexi' Jeju pain ca xiram pa' cuhu' ma', pain ca mi' e' cuhu' pain ca param pan nucun ta.

Ca mam' pe wet urut pahu' ta caca oro win ma' ca Paulo

²¹ Mam' pe wet inonon ta nuhu' Timóteo cwa', co taramaja wi napa' cwa'.

Ac i ma' nana oro ca nari ne cwa' quem, Lúcio cwa', Jasom cwa', Sosípatro cwa'. Mam' pe wet urut cocon ta nunuhu' quem.

²² Mam' pe wet inuhu' quem, pain ca Tércio ta' ca'. Wata' co xirao' nain ca tomi' nucun Paulo pain ca xirao' mi' xuhu' ca'. Mam' pe wet inuhu' pain ca howa wi xun Taramaxicon nexi' quem.

²³ Mam' pe wet inonon ta nuhu' Gaio cwa'. Pi'am pe inain xiricon Gaio cwa'. Cut in to xucucun pain xiricon oro xerexi' co howa nonon Jeju quem.

Mam' pe wet inonon ta nuhu' Erasto cwa', co querec wet nain dinheiro nein cidade ca' quem.

Mam' pe wet inonon ta nuhu' coxari' Quarto cwa' quem.

²⁴ (Param inon Taramaxicon nexi' Jeju Cristo pain ca xiram pa' xiram pa' pi' pin cuhu' ma', pain ca mi' e' cuhu' pain ca param pan nucun ta. Amém, iri'o' na ca tomi' ne ta.)

Ca pi' pin ne ca xirao' nucun Paulo

²⁵ Tomi' querec te xun Iri' Jam co hwara' opa tamana ta. Ha' non pain ca to' hwara' opa cuhu' quem. Je ca xirao' pe xine pain capiacaon ca tomi' hwet napari' con Jeju pain ca to' witan xim capari' ca'. Je ca pijim' taxipa' ta' ca', pain ca pijim' hwet xuhu' con Jeju Cristo. Om paxi' na ca taraju pa' xine ca coromicat xo' nucun con Jeju pane, om ca taraju pa' xine pain ca xo' ma' qui' ne oro carawa cara pane. ²⁶ Ane an hwet pe pin cain ca coromicat nucun con Jeju Cristo pain xocori ca' ne. Wara xirao' pe nanain oro profeta cara pane. Iri' Jam co e' cara ma', co om mi' pin ra na ma', wirico co tomi' naporut quem, pain ca pijim' mi' pijim' mi' pi' pin jujun pain capiaca oro wari' pain oro xijein macan' ta caparut. Ma' ta howa cacain, ma' ta tomi' ha' cacain capiaca quem naporut. ²⁷ Na e' na pain ca tomi' querec te xun Iri' Jam ta. Xica' pe na Iri' Jam co Iri' Jam cwa', co coromicat xo' cwa'. Na e' na pain ca tomi' querec te cara xun pain ca awi nucun ta. Xi ma' ara capari' Jeju Cristo ta.

Amém, iri'o' na ca tomi' ne ta.

Je i ca' ca xirao' ne ca'.

1 Coríntios

Ca xirao' mi' cain' tococwa oro co howa nonon Jeju pain Corinto

1 Paulo ina pain ca xirao' mi' xuhu' ca'. Tora' napa' Iri' Jam pain ca apóstolo ra capa' pane, pain ca tomi' hwet rain capija ca tomi' xim ta capa' pane. Xi om ne ca param mi' ara capa' pain pane. Wata', wirico coxari' Sóstenes, ca' urut pain ca xirao' mi' urut pahu' ca'. ²Xirao' mi' urut pahu' pain ca cut in xujuhu' pain Corinto ma', pain ca howa hun Iri' Jam ma'. To' hohot pin nuhu', xi om ne ca win cwere ara hun Cristo Jeju ta. To ni ca' jein ca caracat wa pain ca tora' qui' cuhu' pane quem. Ac i ma' wi nuhu' cocon oro wari' co howa nonon Taramaxicon nexi' Jeju Cristo quem, cocon oro wari' pain oro xijein macan' ma', co an hwet nanain wixicon pain ca tomi' cocon ma'. Taramaxicon ne urun Jeju, Taramaxicon ne nonon oro wari' co howa nonon quem.

³Param urut con Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param urut cocon pain ca mi' cucuhu' pain ca om toron ne xumuhu' quem.

Ca tomi' querec te ton Iri' Jam pahu' ca Paulo

⁴Tama' tomi' querec te inon Iri' Jam ne pahu'. Xi xiram pa' ara cuhu' pain ca mi' cuhu' pain ca win cwere hun Cristo Jeju ta. ⁵Mi' nuhu' pain oro caramaxicon, xi win cwere ara hun Jeju ta. Mi' nuhu' pain ca pijim' taxi' wa capijacon, mi' nuhu' pain ca taraju pa' wa oro ca coromicat nucun quem. ⁶Pe pin ara xi' nuhu' capijacon ca tomi' hwet urut pahu' con Cristo cwa'. ⁷Je ca mi' cuhu' pain ca taramaja taxi' wa pain oro caramaxicon ma'. Om ca om camain' cuhu' pain. Ha' nuhu' pain ca taramaja taxi' wa pain oro caramaxicon ma', pain ca winim' cara hun Taramaxicon nexi' Jeju Cristo pain ca in qui' ta' nucun. ⁸Wirico Iri' Jam co to' hwara' opa cara nuhu' pain ca howa nuhu' ma'. Wara to' hwara' opa nuhu' pane, mao ac ne ma' tara pahu'. To' hwara' opa to' hwara' opa maqui' pa' ac cuhu' tara Taramaxicon nexi' Jeju Cristo pain xec nein ca in qui' ta' nucun. Ma'

ta om coromicat mi' xihwe pain ca pan teretem wa ta nuhu'. ⁹To' hwara' opa turuhu' Iri' Jam, xi mixein capari' ta. Ara taxipa' nain oro ca wara tomi' pe nucun. Tomi' nuhu' quem: Jao jao ma' jun Panxita' Jeju Cristo co Taramaxicon ne hwe cwa' nuhu', taxipa' jun ta nuhu'.

Ca coromicat ni ca' xucucun oro co howa to nanain Corinto

¹⁰Tomi' mip inuhu' pain i ca' quem xere. Wirico Taramaxicon nexi' Jeju Cristo co mi' napa' pain ca tomi' mip xuhu' ca'. Tomi' tomi' pi' pin inuhu': Ac je ac je ari tara ca tomi' nuhu' me. Jao jao ma' xujuhu', ta coromicat ni ca' xujuhu' me, ac je ac je ari tara ca coromicat nuhu'. ¹¹Tomi' hwet ara xi' nanapa' wari' nequem Cloe pahu' xere. Tomi' mana' caracan xucucun ta nanapa' pahu'. ¹²Ca' na ca tomi' hwet cacapa' pahu': Coromicat ni ca' xucucun ta nunuhu'. Param urut con Paulo ta nana xucucun, param urut con Apolo ta nana xucucun, param urut con Pedro ta nana xucucun, param urut con Cristo ta nana xucucun ma' quem, ac i ma' na ca tomi' hwet cacapa' pahu' ta. ¹³Wa inuhu' me. Ac ca nacaracam' mi' xujuhu' pain na curucun Cristo! Cain' cain' xihwe quem? Wata' co tatatain mi' wa pain pana pane ra? Wata' co mi' pin caho' nuhu' pane ra? Wuxu ca an hwet caca pain ca ja' cucuhu' pain com ra? Om na ta.

¹⁴Tomi' querec te inon Iri' Jam pain ca om wata' pan ne co ja' nuhu' pain com ta. Ja' e' inonon pain com Crispo con Gaio ma' pahu', om ca wata' ne co ja' nonon pain com oro xucucun ma' pahu'. ¹⁵Om xi tomi' ximama' mahu' pain ca howa urut con Paulo, je ca ja' urut com ca' mahu', xi ja' xuhu' pain com ta. ¹⁶He, xin ne, ma' paxi' na Estéfnas cocon oro ca nari nucun pane, ja' inonon pain com pane quem. Ac ca om ma' ca na xucun wari' co ja' ta' pain com pane, om ca mam' pe wet toton quem. ¹⁷Xi ja' roron pain com oro wari' capa' Cristo pane ta. Tomi' e' napa' pain ca pijim' hwet rain capija ca to' taxi' nonon oro wari' pain ca to' witan ton toton ta capa' pane. Tomi' ca' napa' quem: Tomi' hwet iri roron pain capija ne, om ca na ne pain ca an xiho' momon oro wari' co tomi' taxi' tamana e' nanain ca coromicat pan nucucun ta napa' quem. Ma' ta om to' om pin main ca hwara' opa nein capija pain ca tomi' hwet mapa' pain ca mi' pin pe tain pana pane napa'.

Ca an hwet pe mi' capari' pain ca hwara' opa nucun Iri' Jam Cristo

¹⁸ Om ara xi' na ca taraju pa' caca oro wari' co pan' ara'am xi' nana ma'. Tomi' hwet iri tata pain capiiacon Iri' Jam pain ca mi' pin pe nain pana Cristo ta tococwa ne, pijim' ximama' hwe ta ac cocon na co pijim' nonon ma'. Wari' iri na ne, pain ca to' witan capari' Iri' Jam ca', taraju iri irin capiiacon con Cristo ne, querec pin' ac xin na ca hwara' opa nein con. Iri' ca hwara' opa nucun Iri' Jam na ta. ¹⁹ Xi xirao' pe ara xine capiiacon Iri' Jam ta. Ca' na con:

To' om pin tain ca coromicat nucucun co taraju pa'
tamana urut xi' ma nana ma'.

To' om pin tain ca taraju pa' nucucun co xirao' taxi' tamana
urut xi' ma nana ma' quem.

Ac i ma' na ca xirao' pe xine pain capiiacon Iri' Jam pane.

²⁰ Je ca tomi' xuhu' ca': Cain' cain' caca oro wari' co taraju pa' tamana urut xi' ma nana ma'? Cain' cain' caca oro wari' co xirao' taxi' tamana urut xi' ma nana ma' quem? Cain' cain' caca oro wari' co tomi' taxi' tamana urut xi' ma nana pain macan' ca' quem? Taraju pa' tamana urut pain ca coromicat xo' nuxut ta iri nana oro co om howa nana ma' ne, om ca an hwet pe pin cain ca tamanain nucucun pain ca om coromicat xo' nucucun Iri' Jam ra? An hwet pe pin cain ma' ira. Querec pin' tata pain ca om coromicat xo' nucucun ta.

²¹ Om ca querec pin' pan ac cocon Iri' Jam oro wari', om ca mam' querec pin' ac cocon pain ca coromicat pan nucucun. Wirico Iri' Jam co narain ho' nonon pain, maqui' nain ximicon pain ca coromicat xo' nucun. Ca' na con: Pijim' ximama' hwe ta paxi' tata co pijim' nanain capiia ca'. Je i ma' ira, hohot napa' pain ca pijim' mi' tococwa pain capiia oro wari' ta, ma' ta to' witan toton co howa nanapa' ta na. ²² Ac i ma' na ca coromicat nucucun. Oro judeu ma', param e' nonon Iri' Jam pain ca an hwet cain ca hwara' opa nucun. Ma' ta howa urut ta nana. Oro wari' co om judeu nana ma' iri nana ne, win xumu e' nanain oro ca coromicat pan nucucun. ²³ Warut iri na ne, pijim' hwet urut cocon oro wari' con Cristo co tatatain mi' wa pain pana pane. Pain ca pijim' mi' urut cocon oro judeu ma', noc nanain ca pijim' nuxut. Pain ca pijim' mi' urut cocon oro wari' co om judeu nana ma', pijim' ximama' hwe ta ac ca cacaparut na quem. ²⁴ Wari' pain ca howa xine ta capari' Iri' Jam ca' iri na ne, querec pin' irin ca hwara' opa

nucun pain ca to' witan capari' con Cristo. Querec pin' irin ca coromicat xo' nucun pain ca mam' capari' con. Oro wari', warut pain ca judeu urut ca', wahu' pain ca om judeu hwe ma' quem, querec pin' querec pin' pi' pin urun. ²⁵Ma' ara xi' nana wari' co tamanain na ta nonon Iri' Jam pain ca mam' capari' con Cristo. Ma' nana oro xucucun co om ca hwara' opa ca Iri' Jam ta nana, xi nain ho' con Cristo pain ca mi' pin wa ta cocon ma' quem. Ane hwara' opa pan ca ne. Taxi' tiquin' ca' nonon oro wari' co taraju pa' urut xi' ma nana ma'. Hwara' opa tiquin' ca' nonon co hwara' opa urut xi' ma nana ma' quem.

Ca tora' capari' Iri' Jam

²⁶Mam' pe wet jein i ca' quem xere, pain ca xo' tora' qui' cuhu' Iri' Jam pane. Ma' paric ca' e' nana co querec pin' caca oro co om howa nana pain ca taraju pa' nucucun pahu'. Ma' paric ca' e' nana co taramaxicon hwara' opa nana pahu'. Ma' paric ca' e' nana co hwara' opa nana ca nari nucucun pahu' quem. ²⁷Ane tora' pan cuhu' Iri' Jam ne. Oro wari' co om coromicat xo' nana ta caca co om howa nana cwa', je i ma' ira, tora' pan nonon Iri' Jam. Ma' ta wixipa' caca nonon co taraju pa' urut xi' ma nana ma'. Tora' pan tata co om hwara' opa nana. Ma' ta wixipa' caca tata co hwara' opa urut xi' ma nana ma'. ²⁸Tora' pan tata co om hwara' opa nana ca nari nucucun. Tora' pan tata co noc wawa. Tora' pan tata co om hwara' opa camain' nana. Ma' ta to' om pin toton ta tata co hwara' opa urut xi' ma nana ta na. ²⁹Ma' ta om tomi' xec xec cacapa' pain ca awi tiquin' ca' inonon oro win ma' ne cwa' caca ta nonon oro wari'.

³⁰Ane mi' cuhu' pain ca win cwere pin hun Cristo Jeju Iri' Jam ne. Wirico Cristo Jeju co to' taxi' napari' pain ca coromicat xo' nucun Iri' Jam ma', pain ca to' hohot capari' ca', je pain ca wari' ne capari' ca', je pain ca to' witan capari' ca' quem. ³¹Ma' ta tomi' hwet e' hwein ca tomi' querec te nuhu' pain ca to' witan pin cuhu' Taramaxicon Iri' Jam ta napari'. Win ne ca xirao' pe xine pain capijacon pane. Ca' na con pane:

Mo ta tomi' hwet tain cain ca awi wa wari' ma',

tomi' hwet e' tarain ca awi nucun Taramaxicon Iri' Jam ta.

Ac i ma' na ca xirao' pe xine pain capijacon Iri' Jam.

Ca pijim' e' tocwa Cristo co mi' pin pe nain pana

2 Je ca tomi' xuhu' ca' xere: Hwet iri inuhu' pane ne, pain ca pijim' hwet xim xuhu' pain capijacon Iri' Jam ca om taraju pa' querec wa con Jeju ira, om ca pijim' xuhu' pain ca taxi' tamana ne pain ca coromicat ne pane, om na. ²Xi noc ara tain ca pijim' hwet xuhu' pain oro xijein ca pijim' wa pain ca pe ho' qui' xuhu' pane ta, ac i ma' na ca wara an pe xo' tain ca coromicat ne pahu' pane. Param e' inain ca pijim' hwet xuhu' con Jeju Cristo co tatatain pe wa pain pana pane. ³Om ca hwara' opa ta' pain ca pe ho' qui' xuhu' pane. Jin' inain ca pijim' ximao wa pane. Ac ca pijim' cocoroc tamana ta' na pahu' pane. ⁴Noc inain ca mam' pijim' pijim' na xuhu' pain ca pijim' taxi' tamana wa pane. Om ca tomi' ca' xuhu': Pijim' aramao xuhu' pain ca coromicat ne, ma' ta querec pin' hwein ca iri'o' nein ca pijim' ne xuhu' ca', om ca pijim' ac i ma' xuhu' pane. Pijim' aramao iri inuhu' pane ne, an hwet mi' ac xuhu' na pain ca hwara' opa nein Tamataracon Iri' Jam. Querec pin' ac hwein na ca iri'o' nein ca pijim' ne quem. ⁵Pijim' ac i ma' inuhu' pane. Ma' ta om howa hwein ca coromicat pan nucucun oro wari' ta inuhu'. Ma' ta howa hwein ca hwara' opa nucun Iri' Jam ta inuhu', je ca pijim' ac i ma' xuhu' pane.

Ca coromicat nucun Iri' Jam

⁶Ane pijim' hwet urut cocon pain ca coromicat nucun Iri' Jam oro wari' co hwara' opa nana pain ca howa cocon ma' ne, co ac ximicon hwanana nana pain ca howa nucucun ma', pijim' aramao ac urut cocon na pain iri' ca coromicat nucun Iri' Jam. Om ca pijim' aramao urut cocon pain ca coromicat pan nucucun oro wari'. Om ca pijim' aramao urut cocon pain ca coromicat pan nucucun oro taramaxicon co om howa nana cwa' quem, xi om pin ta' ara ne ca hwara' opa nucucun ta. ⁷Je ca tomi' xuhu' ca': Tomi' hwet jein ca coromicat ne naparut Iri' Jam ma', pain ca param mi' capari' pain carawa ca awi tamana ca quep xiho' xim napari'. Om ca an hwet querec cain ira. Wara coromicat xo' qui' nain pain cara pane, pain ca om ma' querec ne macan' pane. ⁸Om ca taraju pa' caca oro taramaxicon co om howa nana cwa', om ca ma' camain' ca taramaxicon co taraju pa' nain ca coromicat nucun Iri' Jam. Mo xi taraju pa' cacain, om xi tatatain mi' qui' cocon pain pana Taramaxicon nexi' co awi tamana pain ca om

caracat nucun pain ca hwara' opa tamana nucun. ⁹Win ne ca xirao' pe xine pain capiiacon pane. Ca' na con pane:

Oro carawa ca awi ca an to xo' mi' capari' Iri' Jam
 ma', pain ca om noc xun ca',
 om na wari' co querec nain.
 Om na wari' co taraju nain.
 Om na wari' co coromicat nain quem.

Ac i ma' na ca xirao' pe xine pain capiiacon Iri' Jam ca'. ¹⁰Ane an hwet mi' capari' pain ca wara coromicat xo' nucun Iri' Jam ne. Je Tamataracon ca an hwet mi' napari' pain.

Xi taxi' taxi' xam' pan ara cain oro ca coromicat nucun ta. Taxi' taxi' xam' pan nain oro ca wara coromicat nucun ca joc xim ca pane quem. ¹¹Win ca wari' pain ca coromicat nucun ma'. Taxi' nain xucun wari' ra? Taxi' nain ca coromicat nucun ra? Om na ta. Xica' pe na wari' co coromicat ma', wirico pan na co taxi' nain ca coromicat pan nucun, je tamataracon pan ca pe ho' non ma', je ca taxi' nein ca coromicat nucun. Ac i ma' na con Iri' Jam quem. Om na wari' co taxi' nain ca coromicat nucun. Xica' pe pan na Tamataracon ca taxi' nain. ¹²Om ca mi' capari' pain ca an xiho' xuxun oro wari' pain ca coromicat nucun co om howa nonon Iri' Jam cwa'. Mi' napari' pain Tamataracon quem. Ma' ta querec pin' hwein oro caramaju ca mi' xuhu' ca' napari'.

¹³Pain ca tomi' hwet urut pain carawa ca mi' capari' Iri' Jam ca', je Tamataracon ca mi' naparut pain ca pijim' taxi' urut pain. Om ca maqui' nein ca coromicat pan nuxut. An hwet mi' naparut pain, tomi' xo' ac urut pain na ca tomi' nein pain ca tomi' xut cocon oro wari' co ma' nonon Tamataracon Iri' Jam. ¹⁴Om ca howa je na caca oro wari' co om nonon Tamataracon Iri' Jam. Om ca howa je na cacain ca tomi' nein. Xi tomi' ximao na ta ara cacain ta. Om ca taraju pa' ac cacain quem, xi ma' cocon Tamataracon Iri' Jam ca to' taraju pa' nonon ta. ¹⁵Wari' pain ca ma' capari' Tamataracon Iri' Jam ca' iri na ne, taraju pa' taraju pa' pi' pin irin oro ca querec pin' ca Iri' Jam ma'. Querec pin' irin oro ca awi wa, querec pin' irin oro ca om awi wa quem. Oro xucucun co om howa nana ma' iri na ne, om ca taraju pa' cacapari'. Om ca querec pin' cacapari' pain ca xuruxut xo' nexi' pain Tamataracon Iri' Jam. ¹⁶Je ca xirao' pe xine pain capiiacon Iri' Jam ca'. Ca' na con pane:

Ma' tara wari' co querec pin' nain ca coromicat nucun
Taramaxicon Iri' Jam ra?

Ma' tara wari' co hu taxi' non ra?

Om na ta.

Ac i ma' na ca xirao' pe xine con pane. Wari' iri na ne, pain ca ma' capari' Tamataracon Iri' Jam ca', an xiho' pan urun Cristo pain ca coromicat nucun ta.

Ca ac ximicocon hwijima' caca co howa to nanain Corinto

3 Je ca tomi' xuhu' ca' xere: Pijim' paxi' inuhu' pane. Ane om ha' capa' pain ca pijim' hwet xuhu' pain capijacon Iri' Jam ne, xi ac ximicon hwanana hwe pain ca om tomi' ha' hwein Tamataracon Iri' Jam ta. Ac ximicocon wari' co ara e' nanain ca param pan nucucun hwe, ac ximicocon hwijima' e' hwe pain ca howa hun Cristo ta. ²Pain ca pijim' xuhu' pane, pijim' wixite inuhu', ac ca mi' e' xuhu' na pain leite, ac je na. Win cama jicon pije' ma', pain ca mi' e' con pain catat cawinacam ma'. Om ca mi' con pain iri' cwerein carawa. Ac i ma' inuhu' quem, om ca pijim' mi' ac xuhu' pain oro capijacon Iri' Jam ca om taraju pa' ac hwe ma', ca an xiho' nain cwerein carawa ma'. Xi horon querec hwe pain ca howa hun Cristo pane ta. Ac i ma' ac i ma' wet ara xi' hwe pain xocori ca' quem, om ca horon querec hwe pain xocori ca' quem. ³Xi an xiho' ara huhun oro wari' co ara e' nanain ca param pan nucucun ta. Noc mi' xujuhu' pain oro ca ara hwe ma', mana' caracan xujuhu' quem. Je ca querec pin' xihwe pain ca an xiho' huhun oro wari' co ara e' nanain ca param pan nucucun ma'. An xiho' e' huhun oro wari' co om howa nonon Iri' Jam ma'. ⁴Ma' ara xi' nana oro win ma' nuhu' co tomi' ca' nana: Param urut con Paulo ta nana. Om na, wirico Apolo co param urut ta ac caca na oro xucucun ma' pahu'. Je ca tomi' xuhu' ca': An xiho' huhun oro wari' co om howa nonon Iri' Jam ta.

⁵Cain' cain' xihwe quem? Cain' ca wari' ca Apolo ma'? Cain' ca wari' ta' pain ca Paulo ta' ca' quem? Om ca taramaja mi' e' urut con Iri' Jam ra? Taramaja mi' e' urut con ca' ira. Pijim' urut pahu' pane, howa pin ac hun na Taramaxicon nexi'. Je ca taramaja nuxut. Ara urut pain ca taramaja nuxut ca ara je ara je xam' caparut Taramaxicon nexi' ta. ⁶An xiho' urut cocon oro wari' co taramaja nanain xitot ma'. Wata' co oin' nain tocwi pain xumuhu'. Apolo ma' iri na ne, wirico co cam xo' nain. Ane Iri' Jam

pan ca co to' tarama' nain ne. ⁷ Je ca tomi' xuhu' ca': Wari' co oin' nain tocwi ma', om xi in ac tocwa. Wari' co cam xo' nain ma' quem, om xi in ac tocwa quem. Iri' Jam pan xira co in ac wa pain ca to' tarama' cain ta. ⁸ Pain ca oin' tain tocwi pain xumuhu' ma', pain ca cam xo' cain Apolo ma' quem, quep xiho' xujuxut. An an ari xijein ca param nuxut pain ca taramaja nuxut ca' pahu'. Mi' mi' xam' taraparut pain oro ca awi wa Iri' Jam ta. Mi' taraparut pain carawa pain ca taramaja mi' urut con ca'. ⁹ Je ca tomi' xuhu' ca': Taramaja wi urut con Iri' Jam cwa'. Wahu' iri na ne, ac totacon hwe pain ca taramaja mi' urut pahu'.

Ac xiricon hwe quem. ¹⁰ Ac ca quep tain xiricon ta' na pahu' pain ca xo' pijim' ten qui' xuhu' pain capiacaon Iri' Jam pane. Wirico Iri' Jam co quep xiho' napa' pain ca ca' rain capa' pain ca taramaja ne pane. An xiho' inon wari' co tara quep nain xirim ma', pain ca cut in xo' cain pacun pain caximain xirim ma', ma' ta teren ne nain. Ac i ma' na ca pijim' mi' xo' xuhu' pain capiacaon Iri' Jam pane quem. Oro xerexi' co pijim' nunuhu' pa'ao' ma' iri na ne, an xiho' nonon oro wari' co quep xam' pin nanain xirim pa'ao' quem. Na e' na pain ca taramaja xo' taramaja xo' xam' caca pain ca pijim' mi' xo' cucuhu' con Jeju Cristo quem. ¹¹ Xi ma' ca xucun co pijim' wa ta, ma' xica' pe na Jeju Cristo co an xiho' nain iri' pacun pain caximain xirim ma', wirico co to' teren napari' pain ca howa nexi' quem. Om ca na ne pain ca pijim' xun xucun wari'. ¹² Wari' co pijim' ma', pain ca ac ca quep pe cain ne xirim pain iri' pacun pain caximain ma', mo ta mam' quep xam' cain carawa ca awi tamana ma', ca om tom ra ha' ma', am mam' quep cain pain ouro je prata je oro pacun ca awi tamana ma'. Mo ta mam' quep xam' cain pain carawa ca om awi ma', ca tom hap ma' quem, am mam' quep cain pain caji pana je tahot quem. ¹³ Aram aram querec pin' ac xine tara oro ca taramaja nucun pain ca quep xam' pin cain xirim ma'. Ac i ma' tara pain xec nein ca aram aram maqui' ta' ca Cristo quem. Maqui' iri tara ne, ac ca tom tain cain ne oro ca taramaja nucucun co pijim' nanain capiacaon Iri' Jam, querec pin' ac xine tara quem. Am awi ne ca taramaja nucucun, am om awi ne cocon, querec pin' querec pin' xam' ac xine tara oro ca taramaja nucucun. ¹⁴ Tom querec tarain ca taramaja nucucun Iri' Jam, ac je tara. Mo ta hohot ne ca taramaja nucucun pain ca pijim' nucucun ma', mo ta om tom pin ne, mi' ac tococwa tara pain oro ca awi wa. ¹⁵ Mo ta om hohot ne, mo ta tom pi' pin ne oro ca taramaja nucucun ma', om ta mi' tococwa pain carawa ca awi. Witan paxi' tatara,

ane tom tom pi' pin ta' ne oro ca taramaja nucucun ne. An xiho' ac cocon tara wari' co tom pa' non xiricon ma', co wiran mao paxi' ma' quem.

¹⁶ Om ca xiricon Iri' Jam hwe ra? Om ca corom pe ho' cuhu' Tamataracon ra? Xiricon Iri' Jam hwe ma' ira. Corom pe ho' nuhu' Tamataracon ma' quem, wara taxi' ara xi' hwein i ma' ta. ¹⁷ Mo ta to' em' pin cain xiricon Iri' Jam wari' ma', wap pan ac con tara Iri' Jam. Xi iri' xuru ara cain xiricon ta. Wahu' pan co xuru ta cuhu' ma' ira.

¹⁸ Ma' tara xumuhu' me, coromicat xo' je. Howa maho' jein oro ca coromicat ximama' nuhu' ma'. Mo ta ma' ca win ma' nuhu' co taraju pa' ina xi' ma ma', pain ca an xiho' cain ca coromicat nucucun oro wari' co om howa nonon Iri' Jam ma', na e' na pain ca an pe pin cain ca coromicat ximao nucun. Ac ca an xiho' pin tococwa tara co tamanain nana ta caca oro wari' co om howa nonon Iri' Jam ma'. Taraju pa' iri'o' pin ac ca tara quem. ¹⁹ Xi taraju pa' caca oro wari' co taraju pa' urut xi' ma nana pain macan' ca' ta na Iri' Jam. Taraju pa' urut xi' ma paxi' nana, ane tamanain hwe ta pan cocon Iri' Jam ne. Xi xirao' pe ara xine pain capiijacon Iri' Jam ta. Ca' na con pane:

Taraju pa' urut xi' ma nana pain ca coromicat ximama'
nucucun pain ca mixein nucucun.

Ane to' i'ina pan cocon Iri' Jam ne.

Mam' to' i'ina pan nonon pain ca mixein pan nucucun.

Hehe pin ac cocon na ta.

Ac i ma' na ca xirao' pe xine pain capiijacon Iri' Jam.

²⁰ Ma' na xijein ca xirao' pe xine pain capiijacon quem. Ca' na con:

Querec pin' nonon oro wari' Iri' Jam ma', pain ca taraju
pa' urut xi' ma caca ma'.

Querec pin' nain oro ca coromicat nucucun.

Coromicat ximama' nana ta.

Ac i ma' na ca xirao' pe xine ca tomi' nucun Iri' Jam pain capiijacon.

²¹ Je ca tomi' xuhu' ca': Ta tomi' xec xec hwe me, pain ca coromicat ni ca' xujuhu' pain ca param paxica' huhun oro wari' ma'. Xi xiram pa' pan ara cuhu' Iri' Jam ta. Mi' mi' pi' pin nuhu' pain oro carawa quem, mi' mi' pi' pin nuhu' cocon oro co ca' na nunuhu' pain capiijacon quem. Ma' ta quep xiho' xihwe nuhu'. ²² Wata', Apolo, Pedro, wari' ne maparut con, taramaja mi' jujun ta naparut Iri' Jam pahu'. Oro carawa pain macan' ca' quem, mi' nuhu' pain, mene hwein, ma' ta quep xiho' xuhu' ta nuhu'. Ca e' wa ca', ca

cono' wa ca', oro carawa ca ara nuhu' pain xocori ca', oro carawa ca om ara querec nuhu' ma' quem, mi' nuhu' pain, mene hwein. Ma' ta quep xiho' xuhu' ta nuhu'. ²³ Mene pan nuhu' Cristo. Mene non Cristo Iri' Jam quem.

Ca taramaja mi' cocon Cristo oro apóstolo

4 Je ca tomi' xuhu' ca'. Na e' na pain ca querec pin' querec pin' pi' pin maparut pain ca taramaja mi' urut con Cristo ta. Querec pin' xut pain ca mi' pan caparut pain ca taramaja nuxut pain ca tomi' hwet jein ca coromicat xo' nucun Iri' Jam ca om an hwet querec ca pane caparut quem. ² Wari' co taramaja mi' non taramaxicon ma', na e' na pain ca taramaja xo' ca. Na e' na pain ca tomi' ha' cara con ta. ³ Am tomi' em' mahu' pain ca taramaja ne ca', am om tomi' ximama' mahu' pain, om ca toron capa' xumu pahu'. Am tomi' em' cacapa' oro taramaxicon cwa' quem, am om tomi' em' cacapa' pain, je i ma' ira, om ca toron capa' xumu. Om ca tomi' em' pan xije quem, om na. ⁴ Tara, ac ca om em' ta' na, tara pata' ta'a, om ca toron capa' xumu. Om paxi' na ca toron capa' xumu ca', ane om to' awi capa' ca om toron capa' xumu ca' ne. Wirico Taramaxicon nexi' pan co taxi' napa', wirico tara co tomi' napa' pain ca taramaja ne ca'. Mo ta taramaja xo' ta', mo ta om taramaja xo' ta', tomi' pan ac capa' tara pain. ⁵ Je ca tomi' xuhu' ca': Ta tomi' em' hap huhun pain ca taramaja nucucun oro wari' me ta. Winim' jein xec nein ca in qui' ta ca Taramaxicon nexi'. Wirico tara co an hwet pin tain nain oro ca coromicat nucucun oro wari' ca joc xim caca ira. Para taramaja mi' cocon Cristo quem? Om na, wirico tara co to' querec pin' napari' pain oro ca coromicat nucucun pain ca taramaja mi' cocon ma'. Wirico tara co tomi' nonon oro wari' co taramaja xo' nana. Mo ta taramaja xo' caca pain ca e' e' wet nucucun pane, hohot ma ta ac cocon tara, taramaja xo' ma ma' ira ac cocon tara, tomi' tomi' xam' ac cocon tara ta.

⁶ Pain ca tomi' joc mam' mi' xuhu' ne, pain ca tomi' mi' tain ca oin' xine tocwi ma', je pain ca tomi' mi' tain ca quep xine xirim ma', je pain ca tomi' mi' ton wari' co taramaja mi' non taramaxicon nucun ma' quem, tomi' mi' e' inain ta xere. Ma' ta quep xiho' xuhu' inuhu'. An hwet inain wuxu, an hwet inain wixicon Apolo quem. Ma' ta taraju pa' hwein ca tomi' ca Iri' Jam ta inuhu'. Xin to maho' je pain ca tomi' querec te paxica' huhun wari' co pijim' nunuhu' ma' ta napari'. ⁷ Xi awi tiquin' ca' xujuhu' ta. Oro

caramaxicon Iri' Jam ca', wirico co mi' nuhu' pain. Je xi om tomi' xec xec qui' hwe quem? Ac ca om querec pin' hun a xira pain ca mi' cuhu' pain ta.

⁸Wara ma' naparut xi' ma hwein oro carawa ca param pan hwe ma'. Wara caramaju pin urut xi' ma hwe ma' quem. Om ca taramaxicon hwe ta maparut. Taramaxicon pan urut, xi taxi' tiquin' ca' urut pahu' ta maparut. Ac i ma' na ca coromicat ximama' nuhu' ma'. Wa urut pahu' ta! Taramaxicon iri'o' xirara na urut pahu'. Taramaxicon wi ac urut pahu' xira. ⁹Xi taramaxicon urut pain ca apóstolo urut ta. Om ca taramaxicon je caparut Iri' Jam, ac ca narain ho' caparut na pain ca taramaxicon wa. Ac ca mi' e' caparut na pain ca om hwara' opa camain' urut, ac ca an xiho' urut cocon na oro wari' co to' parapa' pin xi' wawa ma'. Ac ca querec querec cono' pin xut pahu' ta cacaparut na oro wari' cocon oro jam co taramaja mi' nonon Iri' Jam ma' quem. ¹⁰Ac ca tomi' em' ca' maparut na: Tamanain pan hwe pain ca pijim' hwet hwein capijacon Cristo ma'. Warut cwa' iri na ne, taraju pa' pan urut, xi om ne ca win cwere ara urut con Cristo ta, ac i ma' na ca tomi' em' maparut ma'. Tomi' em' ca' maparut quem: Om ca hwara' opa hwe. Warut iri na ne, hwara' opa tamana urut, ac i ma' maparut. Tomi' em' ca' maparut quem: Tomi' querec te pan nanaparut oro wari', noc pan nunuhu' quem, ac i ma' na tomi' em' maparut ta. ¹¹Qui' urut pain oro carawa ca ara naparut ca' ira. Wara ximin urut pain cara pane, ximin ximin wet urut pain xocori ca' quem. Tama' pe' urut. Werewein taxipa' na womuxut. Quep em' nanaparut pain ca to' cacaparut pain micocon. Om taxipa' naparut xirim ca to xo' urut. ¹²Tama' jam' urut pain ca taramaja tamana nuxut pain ca cut xin carawa ca cao' wa ta urut. Tomi' noro iri nanaparut oro wari' ne, tomi' querec te ac urut cocon na, ara mi' turuhu' pain ca awi wa Iri' Jam ta ac urut cocon na. Quep em' iri nanaparut ne, quereme ac urut cocon na quem. ¹³Tomi' em' iri nanaparut ne, tomi' taxi' tamana ac urut cocon na. Ac carawa ca om awi ta hwe, ca wixicao' caca oro wari' ma' nanaparut, ac wari' co cunu homiricocon hwe ta nanaparut. Wara ac i ma' nanaparut pane, mao ac ne ma' na parut, ac i ma' ac i ma' wet nanaparut pain xocori ca' quem.

¹⁴Om ca xirao' mi' ac i ma' xuhu', ma' ta wixipa' hwe ta xuhu', om ca coromicat ac i ma' ta' pain ca xirao' mi' xuhu' ca'. Hu e' inuhu'. Ac ca mana panxita' xuhu' na pain ca hu xuhu' ca'. Om ca noc xuhu'. ¹⁵Mija paxi' tatara oro co ca' na nunuhu' ma', pain ca howa hun Cristo ma'. Ma' 10.000 paxi' tatara, ane om mija caca co te hwe ma' ne. Xica' pe ina. Ac

ca te mahu' na, xi wata' ara ne co pijim' mi' cain' nuhu' pain capijacon Iri' Jam con Jeju pain ca to' witan xim cuhu' pane. Howa ac hun na Cristo Jeju. ¹⁶ Je ca tomi' mip xuhu' ca': An xiho' xine pain ca xut xo' ne pain ca howa ton Cristo ca' me inuhu'. ¹⁷ Je ca mam' xuhu' con Timóteo cwa', co tomi' querec te tamana ta' cwa'. Ac ca panxita' ton na. Taramaja xo' na, tomi' ha' taxipa' non Taramaxicon nexi' quem. To' mam' pe wet turuhu' pain ca xut xo' ne ca', pain ca win cwere ton Cristo Jeju. Je ca ca' na toton pain oro xijein macan' ma' quem, pain ca hwet toton pain ca cut in to xucucun pain ca howa cocon Jeju ma'.

¹⁸ Ma' nana oro win ma' nuhu' co xin to nana ma'. Coromicat ca' nana: Om ta hwet mami' capari' Paulo, xi jin' ara capari' ta nana pain ca coromicat nucucun. ¹⁹ Ane hwet xim xuhu' ne. Mo ta param mi' capa' pain ca hwet xuhu' Taramaxicon nexi', hwet ac xuhu' tara. Om ta om om ta', hwet ho' xuhu'. Querec pin' ac toton tara co xin to nana ma' pahu'. Am tomi' capijacocon e' caca, am an hwet iri'o' cacain ca hwara' opa nein Tamataracon Iri' Jam, querec pin' ac toton tara. ²⁰ Mo ta tomi' capijacocon e' caca pain ca taramaxicon pe ho' naparut Iri' Jam ta caca ma', mo ta om querec pin' tococwa pain ca pe ho' cocon ca hwara' opa nein Tamataracon ma', taxi' ac tococwa na pain ca om iri'o' nucucun. ²¹ Je ca tomi' xuhu' ca': Cain' cain' xita' pain ca aram aram hwet xuhu' ma' quem? Ma' carawa ca param hwe pata'? Param mahu' pain ca wap xuhu' ra? Param mahu' pain ca tomi' querec te xuhu' pain ca tomi' wixite xuhu' ra? Taxi' pan je ta.

Ca pan to' cain taraxicocon con wari' co an nam manacon cote ca

5 Tomi' xim inuhu' pain i ca' quem: Taraju inonon oro wari' co tomi' hwet nanapa' con win ma' nuhu' ma'. Tomi' ca' nanapa' con: Ma' na win ma' caca co quep ximao ta na ca tomi' hwet cacapa' con. Iri' caracat na ta nonon. Om ca awi camain' ne ca caracat nucun ta nonon. An pin nam manacon cote ca na ca tomi' hwet cacapa' con. Xi hohot na ta cacain i ma' co om howa nonon Iri' Jam ta. Noc nanain ta. ² Xin to xin to wet hwe pain ca ara cain i ma' ta! Je xi tomi' xaxa' qui' hwe con? Ac ca mi' pin mi' pin qui' ca ca nari nuhu' cwa' xira pain ca tomi' xaxa' hwe con ta. Wara xin hwet pin xuhun co ara nain i ma' ta. Om xi jao jao ma' cuhu' pain ca cut in xujuhu' ta. ³ Wara tomi' mi' inon pain ca wap wa ta. Om paxi' na ca pe ho' xuhu' pain cwere ca', ane pe ho' xuhu' pain tamatara

ne. Ac ca pe ho' xuhu' na pain iri' cwere ca', pain ca tomi' mi' ton pain ca wap wa ca'. Tomi' ha' xine quem. ⁴Cut in xi' iri xujuhu' pain ca an hwet hwein wixicon Taramaxicon nexi' Jeju ne, ac ca pe ho' xuhu' tara, pe ho' ac capari' tara ca hwara' opa nucun Taramaxicon nexi' Jeju Cristo quem. ⁵Ca' ac hun tara, mi' ac hun tara con Caxicon Jam, quep xirac ac con tara, quep xirac ac cain tara curucun. Ma' ta witan ne tamataracon pain xec nein ca in qui' ta' nucun Taramaxicon nexi'.

⁶Om xi xin to hwe pain ca hohot urut ca' ira hwe ma'. Mo ta caracat ca wari' ma' pahu', mo ta miri'om hun pain ca caracat nucun ma', quep quep pi' pin ac cuhu' tara ca caracat nucun. Wara taxi' ara xi' hwein i ma' ta. Win ne ca to' memerem nein capam' ma'. Maxoc wijimain iri xine ne, to' memerem to' memerem pi' pin ac nein na. Ac i ma' napari' ca caracat nucun win ma' nexi' quem. To' ara napari'. ⁷Je ca tomi' xuhu' ca': Xin hwet pin jun co caracat ma'. Win urut pain ca judeu urut ca', pain ca xin hwet pin urut pain wara ca to' memerem nein capam' pain ca to' pa' pin xin urut pain wijimain taramaji ovelha ca to' mam' pe wet naparut pain ca to' witan qui' tococwa oro hwanana nuxut co to nanain Egito pane. Xin hwet pin jun, ma' ta hohot pin hwe. Wari' nucun Iri' Jam hwe ma' ira. Xi mi' pin caho' ara capari' Cristo pane ta. Win ne wijimain taramaji ovelha cocon oro hwanana pane, ma' ta witan ca' hwein ca wap wa pain ca caracat nuhu' ta nonon Iri' Jam pane. Ac i ma' napari' con Cristo pain ca mi' pin caho' capari' quem. ⁸Je ca tomi' xuhu' ca': Tomi' querec te xun Cristo, mam' pe wet xun pain ca to' witan ca' capari' pain ca caracat nexi' ta. Ara iri xin ne, na e' na pain ca wara om cacapari' oro wari' co caracat nana ma', co pan teretem nana ma' quem. Tomi' querec te wi e' xuxun oro xerexi' co om mixein nana ma', co tomi' iri'o' nana ma' quem. Win caca oro hwanana co mam' tomi' querec te nanain capam' ca om joc wanan wa pain ca to' memerem nein ca an xiho' nain ca caracat wa pane.

⁹Wara xirao' mi' ca' inuhu' pane: Moji'ac ca' jujun co quep nanam xequem narima' ma', wiricacam co quep ne nonon xucun tarama' ma' quem ta inuhu' pane. Ta jao jao ma' huhun me ta inuhu'. ¹⁰Om paxi' na ca tomi' caho' xuhu' cocon oro wari' co om howa nonon Iri' Jam ma'. Co quep ximama' nana ma', co narain ho' xucucun pain carawa pain ca param ximama' nucucun ma', co cut noc xa nana carawa ma', co pe torotop mi' querec te nanain oro caji pacun ca Iri' Jam xi' ma caca ma' quem, om ca moji'ac ca' jujun caram ma' ta xuhu'. Mo xi moji'ac ca' xuxun huhun, na

e' xira pain ca paca' hwein macan' ca', xi to to xam' ara cacain macan' oro wari' ta. ¹¹ Ane xirao' mi' ca' xuhu' cocon oro win howa hwe co caracat ca' nana pain xocori ca' ne. Moji'ac ca' jujun win ma' nuhu' co howa ina mixein nana pain ca caracat nucucun pain ca quep ximama' nucucun, ta jao jao ma' huhun me ta. Moji'ac ca' jujun co narain ho' xucucun pain carawa pain ca param ximama' nucucun ma'. Moji'ac ca' jujun co pe torotop mi' querec te nanain oro caji pacun ca Iri' Jam xi' ma caca ma'. Moji'ac ca' jujun co tomi' ximama' nonon oro win ma' caca ma', co tama' toc tamanain to nanain caji tocwa ca mana' ma', co cut noc xa nanain carawa ma' quem. Oro co ac i ma' nana pain ca howa ina mixein caca ma', moji'ac ca' ac huhun tara ta. Ta jao jao ma' huhun me ta. Om ta cao' to ho' huhun quem.

¹²⁻¹³ Cain' cain' xita' quem? Tomi' mi' xitoton pain ca wap wa pain ca caracat nucucun oro wari' co om howa nonon Iri' Jam ra? Om na ta. Tomi' mi' pan totoron pain ca wap wa Iri' Jam ta. Wahu' iri na ne, na e' na pain ca tomi' mi' pan huhun pain ca wap wa oro win howa hwe co caracat nana ma'. Je ca xirao' pe xine pain capijacon Iri' Jam pane. Ca' na con pane:

Xin hwet pin jun win ma' nuhu' co caracat ma' ta.

Ac i ma' na ca xirao' pe xine pane.

Ca tomi' xo' cocon pain ca ara cup xucucun pain ca xere xucucun

6 Ara cup pin iri xujuhu' pain ca xere xujuhu' ma' ne, pain ca howa hun Jeju ma', tomi' hwet ac huhun pain na oro juiz co om howa nana ma'. Cain' cain' xihwe quem? Para tomi' xo' xut pain ca ara cup xujuxut ca' huhun ma'? Om ca wixipa' hwe ra? Je xi tomi' xo' pan xujuhu' pain ca wari' nucun Iri' Jam hwe ma' quem? ² Cain' cain' xihwe quem? Om ca taxi' hwein i ca' ra, pain ca main tomi' xo' xuxun ururun pain ca ara cup xucucun oro wari' pain oro xijein macan' ca'? Je ca tomi' xuhu' ca', win ne ca main tomi' xo' xuxun ururun pain ca wari' nucun Iri' Jam iri' ca', je ca ha' cuhu' pain ca tomi' xo' taxi' xujuhu' pain ca ara cup wijimain xujuhu' pain xocori ca' quem. ³ Taxi' hwein i ca' quem, pain ca main tomi' xo' xuxun oro jam ma' quem. Je ca tomi' xuhu' ca': Om ta tomi' xo' taxi' xijexi' pain oro ca ara cup xijexi' pain macan' ca' ra? Tomi' xo' taxi' xijexi' ta. ⁴ Je ca tomi' xuhu' ca': Ma' iri nuhu' oro ca to' ara cup xujuhu' pain i ma' ne, wijimain paxi' na ca to' i'ina nuhu' ma', om xi tomi' xo' xut pain

me huhun oro juiz co om howa nonon Jeju ta. ⁵Tomi' ac i ma' inuhu', ma' ta wixipa' hwe inuhu'. Om nuhu' wari' co coromicat xo' taxi' ma', co tomi' xo' taxi' nonon oro win howa hwe pain ca ara cup pin xucucun ma' ra? ⁶Ma' cuhu' ma' ira! Ane om ha' hwe ne. Ara cup pin iri xujuhu' pain ca xere xujuhu' ma' ne, pain ca howa hun Jeju ma', tomi' hwet ac huhun pain na oro juiz co om howa nana ma'.

⁷Pain ca tomi' hwet huhun pain ca ara cup pin xujuhu' oro juiz ma', je i ma' ca an hwet pe hwein ca pan teretem tamana nuhu' ta. Je xi pin ca ma' pain ne xujuhu' quem? Je xi mixein ma' tarapa' ne xujuhu' quem? ⁸Ane om ac i ma' hwe ne. Ara cup pan xujuhu'. Mixein pan xujuhu'. Para ac i ma' hwe pain ca xere xujuhu' ma' quem?

⁹Cain' cain' xihwe quem? Om ca taxi' huhun oro caracat ma', pain ca om to' ho' xun cocon Iri' Jam pain ca taramaxicon pe nucun ra? Taxi' huhun ma' ira! Ma' tara xumuhu' me. Oro iri' caxicocon hwijima' co caracat nana pain ca quep ximama' caca ma', oro wari' co pe torotop mi' querec te nanain oro caji pacun ca Iri' Jam xi' ma caca ma', oro co quep nanam xequem narima' ma', oro narima' co quep ne nonon xucun tarama' ma', oro co quep caracan xucucun ma' quem, ¹⁰oro wari' co cut noc xa nanain carawa ma', oro wari' co narain ho' xucucun pain carawa pain ca param ximama' nucucun ma', oro wari' co tama' toc tamanain to nanain caji tocwa ca mana' ma', oro wari' co tomi' ximama' nonon oro win ma' caca ma', oro wari' co quep em' nonon waximain carawa pain ca cut noc xa ca' cocon pain, om ta to ho' cocon Iri' Jam pain ca taramaxicon pe nucun ta. ¹¹Ma' paxi' nana win ma' nuhu' co ac i ma' nana pain cara pane. Ane hohoc pin cuhu' pain ca caracat nuhu' Iri' Jam ne. Iri' wari' ne pin inuhu' ta nuhu'. To' hohot pin nuhu'. Xi om ca Taramaxicon nexi' Jeju Cristo pain Tamataracon pahu'.

Ca mene cain cwerexi' Iri' Jam

¹²Ma' nana win ma' nuhu' co tomi' ca' nana quem: Hohot na pain ca ara xin oro carawa ca param iri' na ca tomi' nucucun. Je i ma' ira, hohot paxi' na. Ane om quep xiho' quep xiho' pi' pin capari' oro carawa ca param iri' ne. Hohot paxi' na pain ca ara tain oro carawa ca param ta' ca'. Ane noc pan tain ne. Mo ta ara tain ta', ara ara. Mo ta om ha' capa' pain ca maho' tain quem, ac ca quep xat capa' tara. Noc inain ca quep xat capa'

oro carawa ca ara ta' ta' ca'. ¹³Ma' ac caca na xucucun co tomi' ca' nana quem: Mi' napari' pain carawa Iri' Jam, ma' ta ma'am hwe ta napari'. Je ca mi' capari' pain pemenexi' ca' quem, ma' ta ma'am hwein carawa ca cao' hwe ta napari' na ca tomi' caca quem. Je i ma' ira, iri'o' paxi' na ca tomi' nucucun ma'. Ane ara om pin tain cain carawa je pemenexi' Iri' Jam ne. Cwerexi' ma' iri na ne, om ca mi' capari' pain, ma' ta mam' quep ximama' hwein ta capari', om na. Xi wirico Taramaxicon nexi' ara ca co mene nain cwerexi'. Mam' taramaja mi' xine pain curuhu' ta napari'. Wirico co querec wet nain cwerexi' quem. ¹⁴Main to' e' mami' tarapari' Iri' Jam quem. Win ne ca to' e' mami' con Taramaxicon nexi' Jeju Cristo pane. Je ca taxi' xun pain ca querec wet cain cwerexi' ca'.

¹⁵Om ta coximinain curucun Cristo ne ma' hwein cwerexi' ca' ra? Coximinain curucun Cristo ne cwerexi' ca' ira, wara taxi' hwein i ma' ta. Hohot tara pain ca quep xim caxicam narima' pain ca coximinain curucun Cristo iri' ca' ra? Hohot tara pain ca an tapan' mi' xim pain coximinain curucun Cristo ra? Om na, om ca hohot camain' ne ta! ¹⁶Mo ta quep xim caxicam narima' ma', ac ca xica' pe pin ne na cwerexi' pain cwerequem, wara taxi' hwein i ma' quem. Win ne ca xirao' pe xine pain capijacon Iri' Jam pane. Ca' na con pane.

Co ma' 2 nana ma',

quep iri xeququem ne,

ac ca xica' pe pin ne na cwerequem ta.

Ac i ma' na ca xirao' pe xine pane. ¹⁷Je ca tomi' xuhu' ca': Mo ta jao jao ma' xun Taramaxicon nexi' cwa', xica' pe pin ac ne na tamataraxi' pain Tamataracon quem.

¹⁸Ta quep hwem xeququem narima' me ta. Wahu' pain ca narima' hwe ma' quem, ta quep ne hun xucun tarama' me ta. Mo ta caracat iri', pain oro xijein ca caracat wa ma', om ca to' em' pin xin cwerexi'. Ane om ac i ma' ne pain ca quep ximama' iri' ca'. Mo ta quep ximama' iri', to' em' pan irin cwerexi' ta. ¹⁹Cain' cain' xihwe quem? Om ca taxi' hwein i ca' ra, pain ca ac xirinain Tamataracon Iri' Jam ne curuhu' ma'? Ac xuru mahu' ta cuhu' Tamataracon Iri' Jam ma' ira. Corom pe ho' nuhu'. Mi' nuhu' pain Iri' Jam. Om ca mene pan hwein curuhu'. ²⁰Wirico Iri' Jam ara xi' na co mene pan nain curuhu'. Xi om ne ca mam' to' witan ara cuhu' pain quicon Panxica ta. Je ta mam' tomi' ha' qui' hun pain curuhu' ma' quem. Ma' ta awi na Iri' Jam ta caca oro wari' pahu'.

Ca an tacama narima', ca an tocwa tarama' quem

7 Ma' na oro ca tomi' querec mahu' pain ca xirao' mi' mahu' pane. Tomi' xo' ho' xuhu' pain.

Awi paxi' na ca om an tacama narima'. ²Ane mija ne ca quep ximama' caca oro wari' ne. Je ca na e' ne pain ca ma' ma' xam' cocon narima' oro tarama'. Na e' na pain ca ma' ma' xam' cacam tarama' oro narima' ma' quem. ³Tarama' ma', om ca na ne pain ca nain ho' cam pain curucun manacon. Mi' taram pain, quep taram. Ac i ma' tara narima' ma' quem, om ca na ne pain ca nain ho' con pain cwerequem taxicam. Mi' toron pain. ⁴Narima' ma', om ca mene camain cwerequem. Mene nain taxicam. Ac i ma' na tarama' ma' quem. Om ca mene cain curucun. Mene nain manacon. ⁵Je ca tomi' xuhu' ca': Ta narain ho' xujuhu' pain me ta. Miri'om e' xujuhu' pain ca tomi' xo' cain' xujuhu' pain ca momon tomi' e' xun Iri' Jam ta hwe ma', mo ta tomi' ca' xujuhu': Om ta quep mami' xijexi' pain xocori ca'. Paric ca' e' tara xec nein ca om quep xijexi', ma' ta momon tomi' e' xun Iri' Jam ta je. Pi' pin iri tara oro xec nein ca tomi' hun Iri' Jam ne, in hwet ac xujuhu' tara, quep mami' ac xujuhu' tara quem. Ma' ta om tomi' querec cuhu' Caxicon Jam pain ca to' i'ina xujuhu' pain ca param nuhu' ma'.

⁶Om paxi' na ca hu xuhu' pain ca cut jem narima' xuhu' ca', om na. Tomi' e' inuhu' pain ca hohot na pain ca cut hwem narima' ta xuhu' ca'. ⁷Ane param xuhu' pain ca an xiho' mahu' pain ca xat e' ta' ca' ne. Tara pahu', mi' pan ara xi' napari' pain ca param nucun Iri' Jam ta. Co mi' wa pain ca xat e' wa ma', co mi' wa pain ca an wa narima' ma' quem, wirico Iri' Jam co mi' nain i ma' ta.

⁸Tomi' ho' xuhu' pain ca coco' e' hwe ma' quem, wahu' pain ca cono' ca' cucuhu' oro manahu' ma' quem. Wahu' pain ca narima' hwe ma' quem, pain ca cono' ca' cucuhu' waram taxuhu' ma' quem, tomi' xim inuhu'. Awi paxi' na ca coco' e' cara hwe. Win ta' ca' paxi' inuhu'. ⁹Ane tomi' ca' xim xuhu' ne: Mo ta om miri'om taxi' hwein ca toron ne xumuhu' pain ca param hwein ma', hohot ac ne na pain ca cut hwe narima'. Hohot na pain ca cut hwe tarama' pain ca narima' nuhu' ma' quem. Xi na ne pain ca toron ximama' ne xumuhu' pain ca param tamana hwein ta.

¹⁰Tomi' ho' inuhu' pain ca wara cut hwe narima' ma' quem, wahu' quem oro narima', tomi' inuhu' pain ca wara cut hwe tarama' ma' quem. Om paxi' na ca tomi' pan xuhu'. Wirico Taramaxicon nexi' co tomi' nuhu'.

Tomi' ca' nuhu' pain ca narima' nuhu' ma': Ta an to pin huhun waram taxuhu' me ta nuhu'. ¹¹ Ane tomi' xim xuhu' pain i ca' ne: Mo ta ma' cama narima' co wara an pe pin non taxicam ma', xat e' cara ac cama tara, om ca na ne pain ca an cama xucun tarama'. Mo ta in hwet ton wara taxi cama, in hwet ac con tara. Tomi' ca' nuhu' pain ca tarama' nuhu' ma' quem: Ta an to pin hwehwem oro manahu' me ta nuhu' quem.

¹² Tomi' ca' inonon oro xucucun ma' pahu', tomi' inon wari' co howa ma', co om howa manacon ma' quem. Wata' co tomi' non, xi wara tomi' xo' capari' pain Taramaxicon nexi' ta. Ca' inon wari' co howa non Jeju: Mo ta om howa cama manacon ma'. Om paxi' tara ca howa cama, ane hohot cam pain ca pe ho' cara con taxicam ne. Je i ma' ira tara taxicam, om ca na ne pain ca an pe pin cam. ¹³ Ac i ma' tara narima' co howa ma', co om howa taxicam ma' quem. Om paxi' tara ca howa ca, ane hohot con pain ca pe ho' cara cam manacon ne. Je i ma' ira tara manacon ma' quem, om ca na ne pain ca an pe pin con. ¹⁴ Xi quep xiho' ara con taxicam Iri' Jam ta, xi om ne ca howa pan ara cama manacon ta. Om paxi' na ca howa pan ca, ane jao jao ma' cam manacon co howa ma' ne. Ac i ma' nam narima' co om howa ma' quem. Quep xiho' nam Iri' Jam, xi om ne ca howa pan ara ca taxicam ta. Om paxi' na ca howa pan cama, ane jao jao ma' con taxicam co howa ma' ne. Mo xi om quep xiho' cacam, je i ma' xira ca om quep xiho' cacam mana panxicaca quem. Ane quep xiho' cocon pain ca jao jao ma' xeququem cote cacama cacam jicacam ne.

¹⁵ Mo ta an pe pin tam narima' ne ca tarama' co om howa ma', je i ma' ira ac con tara manacon. Om ca na ne pain ca cuc cuc con pain ca to wet ra to wet ra con ma'. An pe pin ac cam tara. Mo ta an pe pin ton taxi cama narima' co om howa ma' quem, je i ma' ira ac cam tara taxicam. Om ca na ne pain ca cuc cuc cam pain ca to wet ra to wet ra cam quem. An pe pin ac con tara quem. Param ara xi' napari' Iri' Jam pain ca xin ne xijexi', je pain ca om mana' xijexi' ta. ¹⁶ Wum quem narima' pain ca howa ma ma', om ca taxi' mon taxim ma' quem. Mo ta aram aram howa pin ca pum, mo ta om howa pin ca pum. Wum quem, pain ca tarama' ma ma', pain ca howa ma ma' quem, om ca taxi' mam narima' nem quem. Mo ta aram aram howa pin cama pum, mo ta om howa pin cama pum.

¹⁷ Je ca tomi' xuhu' ca', mo ta om cut querec hwem narima' pain ca xo' howa xine qui' cuhu' Iri' Jam pane, coco' e' cara ac hwe ma' tara. Mo ta wara ma' cuhu' narima', pe ho' cara ac hwem ma' tara. Ac i ma' tara pain

oro ca ara je cuhu' pain ca xo' howa xine qui' cuhu' pane quem. Ara cara ac hwein ma' tara. Je ca tomi' toton oro co cut in xucucun pain ca howa cocon Jeju. ¹⁸Wari' co wara wac xirac wa taparinain ca xirac nucun pain ca xo' howa ne qui' con Iri' Jam pane, je i ma' ira tara, om ta joc xim cain. Wari' co om wara wac xirac wa taparinain ca xirac nucun pain ca xo' howa ne qui' tocwa pane, je i ma' ira tara, hohot na pain ca om wac xirac tocwa quem. ¹⁹Mo ta wac xirac tocwa, mo ta om wac xirac tocwa quem, je i ma' ira pan na Iri' Jam. Cain' cain' capari' quem? Taraju wet je e', na e' na pain ca tomi' ha' xin oro ca ara je capari' ca'.

²⁰Je ca tomi' xuhu' ca': Oro ca ara nuhu' pain ca xo' howa xine qui' cuhu' Iri' Jam pane, na e' na pain ca ara cara ara cara xam' hwein ta. ²¹Mo ta wara ma' cuhu' taramaxicon co taramaja mi' e' hwe ma', pain ca xo' howa xine qui' cuhu' Iri' Jam pane, om ac ne tara ca toron ne xumuhu', ta jein ca' xuxuxun na hwe me ta. Tara, mo ta aram aram tomi' cuhu' taramaxicon nuhu' ma', om pin xuhu', maho' jein ca taramaja mi' e' mahu' ta iri turuhu' ne, hohot ac ne tara pain ca maho' hwein quem. ²²Ta toron ne xumuhu' pain ca wara taramaja mi' e' hun taramaxicon nuhu' pain ca xo' howa xine qui' cuhu' Taramaxicon nexi' me. Taramaja mi' paxi' hun taramaxicon nuhu' ma', ane wara to' witan ca' cuhu' con Caxicon Jam Taramaxicon nexi' ne. Taramaxicon ne pin hun quem. Ac i ma' hwe pain ca om cuhu' taramaxicon co taramaja mi' e' hwe ma' quem. Om paxi' turuhu' taramaxicon, ane taramaja mi' e' hun Cristo ne. ²³Wirico Cristo ara xi' na co mene nuhu' ma', xi om ne ca mam' to' witan ara cuhu' pain quicon ta. Je ta taramaja mi' e' hun ta. Om ta taramaja mi' e' huhun oro wari' ta. ²⁴Je ca tomi' xuhu' ca' xere: Oro ca ara nuhu' pain ca xo' howa xine qui' cuhu' Iri' Jam pane, ara cara ac hwein ma' tara pain ca jao jao ma' hun ma'.

**Ca tomi' tococwa co coco' e' nana ma',
wiricacam oromon xojam' ma' quem**

²⁵Pain ca xirao' mi' mahu' pane, tomi' querec mahu' cocon oro wari' co om cut querec nana narima' ma', cacam oromon xojam' co om cut querec nana tarama' ma' quem. Tomi' xo' ho' xim inuhu' pain quem. Tomi' hwet pan xuhu' pain ca coromicat ne ca' pahu', xi wara tomi' xo' capa' pain Taramaxicon nexi' ta. Taraju wet xine, xi om ne ca xiram pa' ara capa'

pain ca mi' capa' pain ca tomi' xo' wa ta. ²⁶Je i ca' ca coromicat ne ca': Maqui' pin na oro xec nein ca to' i'ina xim capari' oro carawa. Je ca awi ne pain ca om cut xujuhu' pain xocori ca'. Coco' e' cara iri xi' ca' je. ²⁷Mo ta ma' pin cuhu' narima', om ta an to pin hwehwem. Mo ta om cuhu' narima' ma', ta toron ne xumuhu' me. ²⁸Wahu' pain ca cut xi' narima' hwe ma', om paxi' na ca caracat hwe pain. Wahu' quem oromon xojam' pain ca cut xi' tarama' hwe ma' quem, om paxi' na ca caracat hwe pain. Ane xiram pa' xuhu' pain ca ximin xi' hwe pain oro carawa ca to' i'ina xim nuhu' pain ca cut xujuhu' ma' ne. Narain ho' xim paxi' inuhu' pain.

²⁹Je ca tomi' xuhu' ca' xere: In qui' ta' tara Cristo. Om ta pain homa ne ca in qui' ta' nucun. Je ca na e' ne pain ca win xumu xin ca taramaja nexi' pain ca taramaja mi' xun ca'. Win xumu jein, mao ac ne ma' tara pahu'. Tarama' co ma' non narima' ma', ac ca om con tara, win xumu e' tarain ca taramaja nucun pain ca taramaja mi' con Cristo. Ac i ma' tara narima' co ma' nam tarama' ma' quem, ac ca om cam tara, win xumu e' tarain ca taramaja nequem pain ca taramaja mi' con Cristo. ³⁰Ac i ma' tara wari' co tomi' xaxa' ma' quem, om ta tama' coromicat e' cain ca tomi' xaxa' nucun. Ac i ma' tara wari' co tomi' querec te ma' quem, om ta tama' coromicat e' cain ca tomi' querec te nucun quem. Co cut carawa ma' quem, om ta win xumu cain carawa ca cut ca, win xumu e' tarain ca taramaja nucun pain ca taramaja mi' con Cristo. ³¹Oro caramaji macan' ca ma' napari' ca', om ca na ne pain ca win xumu xin. Pi' pin ta' ara xi' na macan' ta.

³²Noc inuhu' pain ca toron ximama' ne xumuhu' ma'. Je ca tomi' xuhu' ca'. Wari' co om non narima' ma', coromicat nain caramaxicon Taramaxicon nexi' pain ca taramaja mi' con ma'. Ma' ta tomi' querec te capa' ta non. ³³Wari' co ma' non narima' ma' iri na ne, coromicat nain caramaji macan'. Ma' ta tomi' querec te capa' narima' ne ta na. ³⁴Tocwan ac ne na ca coromicat nucun. Ac i ma' na narima' co om nam tarama' ma' quem, narima' co wara mi' ca' nam taxicam ma', xojam' co om an querec tarama' ma' quem, coromicat nanain caramaxicon Taramaxicon nexi'. Ma' ta taramaja mi' xun ta nonon. Ma' ta hohot con oro ca ara nexi', ma' ta hohot con oro ca coromicat nexi' ta nonon. Narima' co ma' nam tarama' ma' iri na ne, coromicat nain caramaji macan'. Ma' ta tomi' querec te capa' tarama' ne ta na. ³⁵Quep xiho' xim inuhu'. Je ca tomi' ac i ma' xuhu'. Om paxi' na ca narain ho' xuhu' pain ca cut wa narima'. Om paxi' na ca narain ho' xuhu' pain ca cut wa tarama' pain ca narima' nuhu' ma' quem.

Param e' inuhu' pain ca xuruxut xo' wa. Param e' inuhu' pain ca om toron ximama' ne xumuhu' pain ca win xumu hun Taramaxicon nexi' ta.

³⁶ Tomi' ho' xim inuhu' con tarama' co wara tomi' xo' nam xojam' co an ta' ca ma', pain ca main an xim ta cam ma'. Mo ta querec pin' xucun pain ca om ara xo' nucun pain ca om an hap cam ma', pain ca mija pin ne cawaxi' nequem ma'. Mo ta jain jain cam pain ca param cam ma' quem, ara ac cain tara ca param nucun, an ac cam tara ta. Om ca caracat ca. Hohot na pain ca an xequequem. ³⁷ Mo ta wara an pe xo' cain ca coromicat nucun pain ca maho' tain ca an tam ta ca ma', mo ta maqui' nein iri' ximicon. Mo ta hwara' opa ca pain ca miri'om taxi' cain ca toron ne ximicon pain ca param cam ma', hohot na pain ca om an cam quem. ³⁸ Je ca tomi' xuhu' ca': Hohot paxi' na pain ca an cam. Ane hohot tamana ne pain ca om an cam ne.

³⁹ Narima' co ma' nam tarama' ma', pe ho' cara toron pain ca e' e' wet nucun. Mo ta mi' ca' cam taxicam ma', hohot na pain ca an cama xucun tarama' co param cama ma', co howa non Taramaxicon nexi'. An e' toron wari' co howa non Taramaxicon nexi' ta. ⁴⁰ Mo ta om an cama xucun tarama' ma', tomi' querec te tamana ac cama tara. Tomi' querec te pije' ca' tara pain ca an cama xucun tarama', tomi' querec te tamana tara pain ca om an cama xucun tarama'. Je i ma' ca coromicat ne cam. Ac ca maqui' nein Tamataracon Iri' Jam na ca coromicat ne ca' quem.

Cwerein carawa ca mi' xine oro caji pacun ca Iri' Jam xi' ma caca oro wari'

8 Pain ca xirao' mi' mahu' pane, tomi' querec mahu' pain cwerein carawa ca mi' xine oro caji pacun ca Iri' Jam xi' ma caca oro wari' ma'. Tomi' xo' ho' xim inuhu' pain quem. Taxi' taxi' pi' pin paxi' irin oro caji pacun ca Iri' Jam xi' ma caca oro wari' ma', taxi' irin pain ca om hwara' opa nein. Taraju pa' je e': To' xec xec napari' ca taraju pa' nexi' ca'. Ane to' hwara' opa xijexi' pain ca om noc xijexi' ne. ² Wari' co coromicat ca' cwa': Wata' co taraju pa', wata' co taxi' ta tara, wirico co om taraju pa' querec nain ca taraju pa' ra con Iri' Jam. Wirico co om taxi' querec nain ca taxi' ra con quem. ³ Ane om ac i ma' ne con wari' co om noc non Iri' Jam ne. Om iri na ca noc con ne, querec pin' ac tocwa na, querec pin' pan non Iri' Jam. Taxi' na ta non.

⁴Cain' cain' xixi' quem? In hwet xin ca tomi' querec nuhu' pane, pain ca cao' xixin ra qui' hwein cwerein carawa ca mi' xine oro caji pacun ma'. Taxi' irin oro caji pacun ca Iri' Jam xi' ma caca oro wari' ma'. Om ca e' ne, om ca Iri' Jam ne. Ma' xica' pe ara xi' na Iri' Jam. ⁵Ma' nana oro wari' co tomi' ca' nana quem: Ma' nana oro xucucun iri' jam, to nanain pawin, to nanain macan' ta nana. Mija paxi' nana oro ca howa ximama' caca ma', ca Iri' Jam xi' ma caca ma', ca Taramaxicon nexi' xi' ma caca ma'. ⁶Ane ma' xica' pe pan capari' Iri' Jam co Te iri' cwa' ne. Wirico co tomi' ma' tomi' ma' pi' pin nain oro carawa. Wirico co in ac iri', co win xumu iri'. Ma' xica' pe na Taramaxicon quem, wirico Jeju Cristo. Wirico co win tomi' ca Iri' Jam pain ca tomi' ma' tomi' ma' pi' pin cain oro carawa pain ca quep capari' ca' quem. Wirico co to' e' napari' quem.

⁷Taraju pa' ac i ma' paxi' iri', ane om taraju pa' ac i ma' pi' pin caca oro wari' ne. Ma' nana co om coromicat xo' querec nana ma'. Wara howa nanain oro caji pacun ca Iri' Jam xi' ma caca pane, wara howa qui' nanain pain ca hwijima' nucucun pane. Pe pin nonon, e' tara ma' nanain pane. Pain xocori ca' iri na ne, pain ca cao' xin cacain cwerein carawa ca mi' xine caji pacun ma', i'ina pin ac ne na ximicocon. Quep naparut ca caracat wa, xi om ne ca cao' ara urut pain cwerein carawa ca mi' xine caji pacun ta nana pain ca coromicat pan teretem nucucun pain ca om taraju pa' querec nucucun. ⁸Ane om to' hohot capari' con Iri' Jam carawa ca cao' iri' ne. Mo ta cao' irin carawa, mo ta om cao' irin, je i ma' ira, je je ari na con Iri' Jam ta.

⁹Je je ari paxi' na con Iri' Jam, ane tomi' xuhu' pain i ca' ne. Ma' tara xumuhu' me. Hohot paxi' na pain ca cao' hwein cwerein carawa ca mi' xine caji pacun. Ane om na ne pain ca ja' camara' huhun oro xerexi' co om hwara' opa nana pain ca howa nucucun ne. Am i'ina ne ximicocon pain ca cao' hwein cwerein carawa ca mi' xine caji pacun ma'. ¹⁰Om paxi' na ca i'ina ne xumuhu' pain. Tara cocon co win howa hwe co i'ina ne ximicocon ma' pain. Mo ta querec cucuhu' pain ca corom mama' hwein xirim ca pe torotop mi' querec te pe xine caji pacun ca Iri' Jam xi' ma caca ma', mo ta querec cucuhu' pain ca cao' to hwein ma'. Om ta win caca ne cucuhu' ra? Am cao' xin cacain carawa ca mi' xine oro caji pacun ma', caracat urut xi' ma ac caca tara pahu'. ¹¹Ja' camara' pin ac huhun tara co win howa hwe co om taraju pa' nana ma', co mi' pin caho' ca Cristo ma'. Xi taraju pa' urut xi ma' ara hwe ta. ¹²Mo ta caracat ac i ma' hwe pain ca ara cup

pin huhun co win howa hwe ma', co om hwara' opa nana pain ca howa nucucun ma', mo ta to' i'ina ac i ma' huhun pain ca coromicat nucucun ma' quem, to' ara pin ac hun na Cristo pain ca ari hun quem. ¹³ Je ca tomi' xuhu' ca': Mo ta cao' pan ta' carawa ma', mo ta mam' ja' caracat pin ton co win howa ta' pain ca cao' ne ca', om ta cao' camain' tain cwerein carawa. Ma' ta om ja' pan' pin ton ta inon.

Ca hohot ne pain ca pagar tocwa apóstolo pain ca taramaja nucun

9 Om ca hohot ne pain ca ara tain oro ca om tomi' caho' capa' Iri' Jam ra? Hohot ne ca' ira. Om ca apóstolo ta' pain ca tomi' hwet roron pain capija oro wari' ta capa' Taramaxicon nexi' Jeju ra? Apóstolo ta' ca' ira. Om ca querec ton ra? Querec ton ca' ira. Om ca howa pin hwe pain ca pijim' hwet qui' xuhu' con Taramaxicon nexi' pane quem ra? Howa pin hwe ma' ira. ² Ma' paxi' tatara oro xucucun wari' co om howa nanapa' pain ca apóstolo ina ta toton ca'. Wahu' iri na ne, querec pin' pan mahu' pain ca apóstolo ta' ca', xi om ne ca howa pin ara hun Taramaxicon nexi' pata' ta.

³ Tomi' ximama' iri nanapa' oro wari' pain ca taramaja ne ca' ne, tomi' in pin ca' ac toton na: ⁴ Om ca hohot ne pain ca mi' maparut pain carawa ca cao' wa pain ca taramaja nuxut pain ca pijim' hwet urut pahu' pain capijacon Iri' Jam ra? Hohot ne ma' ira. ⁵ Cain' cain' ne cacam narima' nuxut co howa nana quem? Om ca hohot ne pain ca maji urut cacam pain ca pijim' mama' urut pain oro xijein xirim ra? Hohot ne ma' ira. Win caca oro xucucun apóstolo ma', win caca mana coxa' ca Taramaxicon nexi' Jeju ma' quem. Win ca Pedro ma' quem. Maji nanam manacocon, mi' ac tacacama na pain carawa ca cao' wa quem. ⁶ Cain' cain' ne ca coromicat nuhu' pata'? Cain' cain' ne ca coromicat nuhu' con Barnabé ma' quem? Om ca hohot ne pain ca mi' cacaparut pain dinheiro mam' cut urut pain carawa ca cao' wa pain ca taramaja mi' urut con Taramaxicon nexi' ra? Hohot ne ma' ira. ⁷ Je ca tomi' xuhu' ca'. Noro jujun oro soldado pain ca taramaja nucucun ma'. Pagar jein tata pain carawa ca cao' wa ra? Pagar jun tata con womicocon quem ra? Om na. Noro jun wari' co oin' nain xitot ma' quem. Paca' pin iri na caramajinain ne, om ca hohot ne pain ca cao'

9.5 Om paxi' non narima' Paulo pane. Tomi' mi' e' tata oro manacocon win apóstolo ca ma'.

pan cain ra? Hohot na quem. Noro jun wari' co querec wet nain carawa nucun ma' quem. Om ca toc cain comi caraxi quem ra? Toc nain quem.

⁸Om ca tomi' hwet tain capijacon wari' pain ca tomi' xuhu' ca'. Tomi' ac i ma' na capijacon Iri' Jam quem. ⁹Xi xirao' pe ara ca Moisés pane. Ca' na con pane:

Ta tucu pan hwein capijain boi pain ca xom nein tocwixi trigo
pain ca horohot nein tocwi trigo me ta,
ta narain ho' hwein pain ca cao' nein me ta.

Ac i ma' na ca xirao' pe nucun Moisés pane. Cain' cain' xira quem? Je boi ca xiram pa' pan ca Iri' Jam ra? Om na, om paxi' na ca xiram pa' cain boi. Tomi' joc mam' mi' e' nain. ¹⁰Para tomi' joc mam' mi' cain boi quem? Om ca tomi' mi' pan capari' pain ra? Tomi' mi' capari' pain ca wari' nexi' ca' ira. Win ca wari' co taramaja pe nain xitot ma'. Taramaja na, coromicat ac ca na: Om ta narain ho' cacapa' pain oro winain caramaji xitot ca', cao' tain quem na. Ac i ma' na boi pain ca xom nein tocwi trigo ma' quem. Xom tain, cao' ac tain tara ta na quem. ¹¹Je ca tomi' xuhu' ca': Ac i ma' urut quem. Ac ca oin' urut pain xitot na pain xumuhu' pane, pain ca pijim' hwet urut pahu' pain capijacon Iri' Jam pane. Om ca hohot ne pain ca mi' maparut pain carawa ca cao' wa je oro carawa ca om naparut ca' quem ra? Hohot ne ma' ira. ¹²Om ca narain ho' huhun pain carawa oro xucucun apóstolo. Je xi om narain ho' qui' maparut pain quem?

Ane om xiram pa' xut ta urut pahu' pane ne. Om ca tomi' camain' urut pahu', om ca param camain' urut pain caramajuhu' pane. Quereme urut pain oro ca ximin wa pane. Ma' ta om to' i'ina urut cocon oro wari' co howa xin nanain capijacon Iri' Jam con Cristo ta urut pane. ¹³Om ca taxi' huhun oro sacerdote co taramaja to nanain xiricon Iri' Jam ra? Taxi' huhun ma' ira! Mi' ara xi' tata pain cwerein carawa ca cut qui' caca oro wari' ma', pain ca cut mi' xun cocon pain Iri' Jam. Ac i ma' nana oro sacerdote co taramaja to ho' nanain pana ca tom tain' pe xine carawa ma' quem. Mi' tata pain cwerein carawa ca cut qui' caca oro wari' ma' quem. ¹⁴Tomi' ac i ma' na Taramaxicon nexi' pane: Oro wari' co taramaja nana pain ca pijim' hwet cacain capija pain ca to' witan toton ta' oro wari' ca', na e' na pain ca mi' tococwa pain carawa pain ca taramaja nucucun pain ca pijim' nucucun ta na pane.

9.13 Oro sacerdote ma', taramaja to nanain cote ne xiricon Iri' Jam. Tomi' mi' nonon con Iri' Jam oro wari', tom tain' mi' nonon pain oro carawa nucucun quem.

¹⁵Hohot paxi' xira pain ca quep xiho' pan mahu', ane om quep xiho' xine ta xuhu' pain cara pane ne. Om ca quep xiho' xine xuhu' pain ca xirao' mi' xuhu' pain xocori ca' quem, om na. Taramaja mi' e' inuhu', tomi' querec te tamana ina pain ca pijim' hwet e' xuhu' pain capijacon Iri' Jam ca'. Mo ta to' i'ina pin mahu' pain ca ac ca xin to ta' ne pain ca tomi' querec te ne ca', hohot ac capa' tara pain ca mi' pin wa ta. ¹⁶Ane om na ne pain ca xin to ta' pain ca pijim' hwet tain capijacon Iri' Jam con Jeju ne. Na e' na pain ca pijim' hwet tain. Om ca miri'om ac tain, xi om ne ca pijim' rain ara capa' Cristo ta. ¹⁷Mo xi pijim' pan ta' ta', mo xi maqui' nein xumu pain ca pijim' ta' ne ca', je i ma' xira ca cut qui' ta' carawa pain ca taramaja ne ta. Ane pijim' ra pan capa' Iri' Jam ne. Tora' napa', pijim' ra ta napa'. Na e' na pain ca pijim' tain capijacon Iri' Jam con Jeju ta. ¹⁸Je ca tomi' xuhu' ca': Ma' paxi' na carawa ca awi ca mi' capa' Iri' Jam. Ma' carawa ca mi' capa' quem? Taraju wet je e', mi' napa' pain ca tomi' querec te wa pain ca pijim' mi' e' xuhu' pain capijacon con Jeju. Pijim' mi' e' inuhu' pain, om ca pagar xine pain xuhu'. Hohot paxi' xira pain ca pagar mahu', xi taramaja ara ta' pain ca pijim' xuhu' ta. Ane om tomi' xuhu' pain ca pagar xine ta xuhu' ne.

¹⁹Om paxi' na xucun wari' co quep xat napa' pain ca taramaja mi' ne ta capa'. Ane taramaja mi' e' toton oro wari' ne, maqui' nain xumu ca', taramaja mi' e' toton ta ina. Ma' ta mija caca co howa nonon Cristo pata' ina. ²⁰Je ca an xiho' toton oro win judeu ta' pain ca pe ho' toton ca', an xiho' inonon pain oro ca ara caca. Ma' ta howa cocon Cristo pata' inonon. Tomi' ha' taxipa' nanain ca xirao' nucun Moisés. Ac i ma' ina quem, pe ho' iri inonon ne, tomi' ha' ac tain na ca xirao' nucun Moisés. Om paxi' na ca tomi' ha' rain ta capa' Iri' Jam, ane tomi' ha' pan tain ne. Ma' ta howa cocon Cristo pata' inonon ta. ²¹Ac i ma' ina pain ca pe ho' toton oro co om judeu nana pain ca om tomi' ha' cacain ca xirao' nucun Moisés quem. Pe ho' iri inonon ne, an xiho' ac toton na, miri'om ac tain na ca xirao' nucun Moisés. Ma' ta howa cocon Cristo pata' inonon. Taraju pa' jein i ca' quem: Pain ca miri'om tain ca xirao' nucun Moisés ma', om paxi' na ca miri'om pan ton Iri' Jam. Tomi' ha' cara ara xi' inain capijacon Cristo. ²²Pe ho' iri inonon co om hwara' opa nana pain ca howa nucucun ma' ne, pain ca om taraju pa' caca pain ca ein cacain carawa ma', om ca tomi' mana' toton pain ca om hwara' opa nucucun pain ca om taraju pa' nucucun. An xiho' e' inonon pain ca ein cacain carawa. Ma' ta hwara' opa pin caca pain ca

howa nucucun ta inonon. Je cwere mao na cocon oro wari'. An xiho' an xiho' pi' pin inonon. Ma' ta ma' caca oro wari' co witan nana pata' ta ina. ²³ Je ca tomi' xuhu' ca': Ac i ma' ina pain ca pe ho' toton oro wari'. Ma' ta howa cacain capijacon Iri' Jam con Jeju ta ina. Ma' ta tomi' querec te wi xijexi' pain oro ca awi ca mi' xim capari' Iri' Jam ta inonon.

²⁴ Om ca taxi' huhun oro wari' co jein nana ma', pain ca jein hwet cacain tawiri wana ca coco' to xi' caca ra? Taxi' huhun ma' ira. Jein jein xam' paxi' nana, ane xica' pe ca co an nain carawa ca awi ne. Je ca tomi' xuhu' ca': An xiho' jun co hwet cain' nain tawiri wana pain ca mo mip nucun ma', ac ca jein mip hwe ma' tara pain ca win xumu hwein ca ara je cuhu' Iri' Jam. Ma' ta cut hwein carawa ca awi ca mi' xim cuhu' quem.

²⁵ Win caca oro wari' co jein xi' nana ma', tama' jein querec jein querec nana. Jein in ximama' nana, toin piri' nana, meo meo nanain taparacocon pain aracocon. Miri'om nanain ca param pan ne curucucun, ma' ta an xin carawa ca awi ta nana. Carawa ca an xi' caca ma', main pi' pin tara, main om pin tara. Ane to wet cara ne carawa ca an xi' iri' pain ca howa xun Jeju ne. Win xumu urun Iri' Jam, ma' ta an xin carawa ca awi ca om pi' ra ha' ta iri'. ²⁶ Je ca tomi' xuhu' ca': Win xumu inon Iri' Jam pain ca taramaja mi' ton ca'. Win ca wari' co mo xo' ma', co om mo ximao ma'. Om ca tomi' ximao ta' pain ca pijim' tain capijacon Iri' Jam ca'. An xiho' inonon oro wari' co to' xo' nana pain ca to' caracan xucucun pain caji pic pain micocon, co om to' nenene nana ma'. Ac ca to' iri'o' ta' na pain ca pijim' ne ca'. ²⁷ Ac ca to' xije na, miri'om inain ca param pan ne cwere ca'. Ma' ta mi' capa' pain carawa ca awi Iri' Jam ta ina. Cain' cain' xirapa' Iri' Jam quem? Wara pijim' paxi' inonon oro wari' cwa'. Nain ho' xirapa' pain carawa ca mi' xim capa' Iri' Jam ra? Noc inain i ma' ta. Je ca miri'om tain ca param pan ne cwere ca'.

**Ca hu tococwa pain ca pe torotop mi' xine caji pacun
ca Iri' Jam xi' ma caca oro wari' ma'**

10 Mam' pe wet jujun oro hwanana nexi' co ja' ja' nonon Moisés pane ta xere. Taraju pa' jein ca ara nonon pane. O o pi' pin nonon tajain nanawin nucun Iri' Jam. Witan witan pi' pin nana pain ca xuruxut xom tacaracam' mama' cacain Cote ne Com Ca Paca' ma', je i ma' wixinain com cocon. ² Tatep pa' iri nonon tajain nanawin ne, xuruxut xom tacaracam'

mama' iri nanain cote ne com ne, ac ca ja' ja' pi' pin tococwa na pain com. Xi om ne ca taxipa' pin ara cocon Moisés pane. ³Cao' cao' pi' pin nanain capam' ca mi' cocon Iri' Jam, om na xijein capam' ca cao' caca, cao' e' nanain capam' ca mi' cocon Iri' Jam. ⁴Ac i ma' nanain com quem, toc toc pi' pin nanain com ca mi' cocon Iri' Jam quem. Om na xijein com ca toc caca, toc e' nanain com ca mi' cocon Iri' Jam pane, ca weweweo qui' nein pacun con Iri' Jam pane. Taraju wet je e', pacun ca weweweo qui' ne com pane, an xiho' non Cristo co tama' ja' ja' nonon pane. Wirico co querec wet nonon pane. ⁵Ac i ma' paxi' nana pane, ane om hohot cocon Iri' Jam ne. Mija nana co om hohot nonon, ma' paric ca' e' nana co hohot nonon pane. Je ca to' parapa' pin tococwa pane, cono' to ac cacain na mahweri pane quem.

⁶Tomi' xin oro carawa ca ara nonon hwanana pane. Para ara cocon quem? Om na, ma' ta ma' ne xumuhu' pain xocori ca' napari' Iri' Jam. Ma' ta om an xiho' huhun pain ca param ximama' cacain carawa ca om awi ta napari'. ⁷Ma' nana co pe torotop mi' querec te nanain oro caji pacun ca Iri' Jam xi' ma caca pane. Win ne ca xirao' pe xine pain capiacaon Iri' Jam pane. Ca' na con:

Cao' xi' nana,
 toc xi' nana,
 xao to ac caca na,
 cao' ac caca na,
 toc ac caca na quem.
 Maji waraju xi' nana,
 waraju waraju ac caca na,
 pi' ximama' ac caca na quem.

Ac i ma' na ca xirao' pe xine pain capiacaon Iri' Jam pain ca pe torotop mi' querec te cacain oro caji pacun pane. Om ca na ne pain ca an xiho' xuxun ta. ⁸Ma' nana co quep ximama' nana pane, cono' 23.000 ac caca na quem. Xica' pe na xec nein ca cono' nucucun pane. Om ca na ne pain ca an xiho' xuxun pain ca quep ximama' caca quem. ⁹Ma' nana co tomi' taparam' nonon Taramaxicon nexi' pane quem. Xiram pa' paxi' tata, tomi' taparam' ho' tomi' taparam' ho' ac cocon na, quio cono' pin ac cocon na caxicon em'. Om ca na ne pain ca an xiho' xuxun pain ca tomi' taparam'

10.2 Win iri' pain ca ja' iri' com pain xocori ca' quem. An hwet pe irin ca taxipa' pin xun Jeju quem.

cocon Taramaxicon nexi' quem. ¹⁰Ma' nana co tomi' wijimi nana pane quem. To' parapa' ac cocon na jam co taramaja mi' non Iri' Jam. Om ca na ne pain ca an xiho' xuxun pain ca tomi' wijimi caca quem.

¹¹Je ca tomi' xuhu' pain oro ca ara nonon hwanana pane. Para ara cocon quem? Om na, ma' ta ma' ne xumuhu' ta napari' Iri' Jam. Wap ac i ma' inonon oro wari' co om tomi' ha' nanapa' ta napari'. Xirao' jein ta ac tococwa na oro co xirao' pe nanain capiijacon quem. Hu napari' pain. Wixicam pin ara xi' na ca pi' pin ta' ne macan' pain oro xec nexi' ca'.

¹²Je ca tomi' xuhu' ca': Mo ta coromicat ca' hwe: Om ta caracat ta', om ta pan' mao ta', xi hwara' opa ara ta' ta, am coromicat ac i ma' hwe ma'. Ma' tara xumuhu' me. Ma' ta om caracat hwe, ma' ta om camara' hwe. ¹³Taraju wet je e': Pain ca to' i'ina cuhu' oro carawa ma', je cwerein mao na. To' i'ina taxpata' tata oro wari' ma' quem. Ane om an in pan cain capiijacon ca wara tomi' pe capari' Iri' Jam ne. Om ca mixein cuhu' Iri' Jam. Narain ho' nuhu' con Caxicon Jam ma', pain ca caracat je caracat je ja' camara' xim cuhu' ma'. Quep xiho' nuhu', to' quereme nuhu' quem. Tomi' querec iri turuhu' Caxicon Jam ma' ne, pain ca caracat je cuhu' ma', quep xiho' pan ac cuhu' tara Iri' Jam. Mi' pan ac cuhu' tara pain ca witan ca' hun Caxicon Jam, ma' ta quereme hwe ma', ma' ta hwara' opa cara hwe ma' quem.

Ca om na ne pain ca toc wa comi memem nucun Taramaxicon nexi' pain ca howa xine oro caji pacun

¹⁴Je ca tomi' xuhu' pain ca tomi' querec te xuhu' ca' xere. Ta pe torotop pe mi' querec te camain' hwein oro caji pacun ca Iri' Jam xi' ma caca oro wari' ma' me ta. Win ne ca jein ca' hwein oro ca to' jin' nuhu' ma', ac i ma' tara pain ca jein ca' hwein oro caji pacun. ¹⁵Win ne ca coromicat xo' urut ta hwe ma'. Je ca tomi' ac i ma' xuhu' ca'. Cain' ca coromicat mi' mahu' pain ca tomi' xuhu' ca'? Am iri'o' na ta mahu' pain ca xirao' ne ca', am om iri'o' na ta mahu' pain. ¹⁶Toc xin comi memem iri iri' ne. Tomi' querec te urut pum pain ca mi' maparut pain iri urun Iri' Jam ne. Querec pin' wi

10.11 Taraju pa' je e'. Om ca tomi' mi' xine oro xec nein ca e' e' wet iri' pain xocori ca', om na. Tomi' mi' ta oro xec pain ca e' e' wet ca Paulo cocon oro wari' nein Corinto pane. Ac i ma' ara xi' na ca coromicat nucucun oro hwanana cara pane. Pi' pin ta' ho' tara macan' ta nana pane.

ac irin na quicon Cristo pain ca hohoc pin capari' pain ca caracat nexi'. Jicaracat cao' pin iri irin capam' ma' ne, querec pin' wi ac irin na curucun pain ca mi' pin caho' capari' quem. ¹⁷ Mija paxi' iri', ane xica' pe pin ne cwerexi' ne, ac je na. Win ne ca xica' pe ne capam' ca cao' iri' quem. Cao' wi pin irin ca xica' pe nein capam'.

¹⁸ Noro jujun oro win judeu ta' cwa'. Cao' pin iri nanain cwerein carawa ca mi' tocwa Iri' Jam ne, ac ca mi' wi cocon pain na oro sacerdote quem. ¹⁹ Taraju pa' hwein ca tomi' xuhu' ca' quem? Hwara' opa na carawa ca mi' xine caji pacun ca Iri' Jam xi' ma caca oro wari' ra? Caji pacun ca Iri' Jam xi' ma caca ma' quem? E' na rain? ²⁰ Om na ta. Carawa e' na. Caji pacun e' na. Taraju pa' je e'. Carawa ca mi' cacain oro caji pacun ma', mi' pan nonon pain oro caxicon jam. Om ca mi' cocon pain Iri' Jam, mi' nonon pain oro caxicon jam. Mo ta cao' hwein carawa ca mi' cocon pain oro caxicon jam ma', ac ca tomi' querec te wi huhun na pain ca in ac cocon oro caxicon jam ma' quem. Noc inuhu' pain ca in ac huhun oro caxicon jam quem. ²¹ Om ca na ne pain ca toc hwein comi memem nucun Taramaxicon nexi' pain ca toc hwein comi memem nucucun oro caxicon jam. Om ca na ne pain ca cao' hwein carawa nucun Taramaxicon nexi' pain ca cao' hwein carawa nucucun oro caxicon jam quem. ²² Cain' cain' xihwe quem? Tomi' taparam' pin xun hun Taramaxicon nexi' ra? Hwara' opa tiquin' ca' urun xi' ma hwe ra? Om na ta.

Ca hohot ne pain ca om to' i'ina xijexi'

²³ Ma' nana co tomi' ca' nana ma': Hohot paxi' na pain ca ara xin oro ca param iri' ca' na ca tomi' nucucun. Ane om quep xiho' quep xiho' pi' pin capari' oro carawa ca param iri' ne. Hohot paxi' na cocon, ane om to' hwara' opa to' hwara' opa pi' pin capari' oro carawa ca param iri' ne. ²⁴ Om ca na ne pain ca win xumu xin ca param pan nexi'. Na e' na pain ca win xumu xin ca param nucucun oro win ma' nexi', na e' na pain ca quep xiho' xuxun ta.

10.18 Tomi' mi' iri nonon cocon oro sacerdote Paulo ne, ac ca tomi' xo' ca' tococwa na: Ac i ma' hwe pain ca cao' hwein cwerein carawa ca mi' cacain caji pacun oro wari' co om howa nonon Iri' Jam quem. Ac ca mi' wi huhun pain na quem, ac i ma' na ca tomi' xo' cocon pane.

²⁵ Je ca tomi' xuhu' ca': Hohot na pain ca cao' cao' pi' pin hwein oro cwerein carawa ca vender wa ma'. Mo ta mi' xine pain oro caji pacun ca Iri' Jam xi' ma caca oro wari' ma', mo ta om mi' xine pain, ta tomi' querec hwe pain me. Ma' ta om i'ina ne xumuhu' pain. ²⁶ Xi xirao' pe ca' ara xine capijacon Iri' Jam pane:

Wirico Iri' Jam co mene nain macan',

wirico co mene mene pi' pin nain oro carawa ca to nain quem.

Ac i ma' na ca xirao' pe xine pain capijacon Iri' Jam pane.

²⁷ Mo ta tomi' cuhu' wari' co om howa ma', tomi' ca' turuhu': Harahap je, cao' to ho' xine pain xuru ta tara pain ca tomi' cuhu' ma'. Mo ta param hwein, ma ac hun tara, hwet ac hun tara, cao' cao' pi' pin ac hwein tara carawa ca mi' cuhu' ma'. Cao' e' jein, ta tomi' querec hun pain ca main ca maqui' ne carawa ca' hun me. Ma' ta om i'ina ximama' ne xumuhu' pain. ²⁸⁻²⁹ Ane om ac i ma' ne pain ca tomi' ca' cuhu' ne, mo ta tomi' ca' cuhu': Cwerein carawa ca cao' xi' iri' ca', mi' nanain pain caji pacun ca Iri' Jam xi' ma caca oro wari' ma', mo ta tomi' ac i ma' cuhu'. Om ac ne tara ca cao' hwein, xi om ne ca tomi' hwet ara cuhu' pain ta. Ta cao' hwein me, ma' ta om i'ina pan ne ximicon co tomi' hwet nuhu' ma'. Om ca tomi' xuhu' pain ca i'ina tara xumuhu' pan xuhu', taxi' inuhu' pain ca om i'ina ne xumuhu' pain ca cao' hwein ma'. Tomi' mi' e' inuhu' con co ma' co tomi' hwet nuhu' ma'. Ta cao' hwein me ta, ma' ta om i'ina pan ne ximicon pain ca cao' hwein ma'.

Am ma' ca oro win ma' nuhu' co tomi' querec ca' ma' quem: Cain' cain' xita' ne? Cao' xitain na ina, xi tomi' caho' capa' pain Iri' Jam ta. Om ca na ne pain ca tac caho' capa' xucun wari' co i'ina pan ximicon ta, ac i ma' paxi' tara ca tomi' nucun. ³⁰ Tomi' ca' ac ca tara quem: Je xi om tomi' em' capa' quem? Xi tomi' querec te pan ara ton Iri' Jam pain ca mi' capa' pain carawa ca cao' ta' ta' ca', ac i ma' paxi' tara ca tomi' nucun.

³¹ Je i ma' ira inuhu'. Oro carawa ca ara xi' hwe ma', pain ca cao' xi' hwe ma', pain ca toc xi' hwe ma' quem, pain ca ara xin hwein oro carawa ma', ara xin iri jein ne, ara ac hwein tara. Ma' ta in ac cocon Iri' Jam oro wari' co querec nanapari' pain ca ara xin ca', ac i ma' tara ca coromicat nuhu' ta. ³² Ta to' i'ina huhun oro wari' me ta. Ta to' i'ina huhun oro judeu me, ta to' i'ina huhun oro co om judeu nana me, ta to' i'ina huhun co win howa hwe pain ca howa hun Iri' Jam me ta. ³³ An xiho' xine quem. Querec wet taxipa' inain ca param pan caca oro wari', ma' ta tomi' querec

te cacapa' ta inonon. Quep xihu' toton ina pain oro ca ara pan ta' ca'. Om ca win xumu tain ca param pan ne, miri'om inain cocon. Ma' ta witan pin caca oro wari' ta ina.

11 Je ca tomi' xuhu' ca': An xihu' xine me. Win ne ca an xihu' ton Cristo ca'.

Ca hu tococwa pain ca in ac cocon Iri' Jam

²Tomi' querec te inuhu' pain ca tama' mam' pe wet hwein ca tomi' xuhu' pane, tomi' querec te inuhu' pain ca tama' tomi' ha' mahu' pain ca tomi' hwet xuhu' pain ca ara je capari' Iri' Jam quem. ³Tomi' querec te paxi' inuhu' pain, ane ma' ma' wet ne i ca' ca taraju pa' je xuhu' ca' ne. Ca' na: Wirico Cristo co taramaxicon pe ho' non tarama' ma', taramaxicon pe ho' taramaxicon pe ho' xam' tata pain ca tarama' nucucun. Wirico tarama' co taramaxicon pe ho' nam narima' ma'. Wirico Iri' Jam co taramaxicon pe ho' non Cristo ma' quem. ⁴Tarama' co mam' tatep pa' nain winacon con wom ma', mo ta tomi' ton con Iri' Jam, mo ta pijim' hwet tain cain capijacon ca' quem, pain ca tatep pa' cain winacon ma', ac ca om tomi' ha' con na Cristo co taramaxicon ne ca ma', ac ca om querec pin' con na pain ca hwara' opa nucun. ⁵Narima' co om tatep pa' nain winacam ma' iri na ne, mo ta tomi' ton con Iri' Jam ma', mo ta pijim' hwet tain camain capijacon quem, pain ca om tatep pa' camain winacam ma', ac ca om tomi' ha' con na taxicam co taramaxicon ne cama, om ca querec pin' con pain ca hwara' opa nucun quem. An xihu' nam caxicam narima' co wijac pi' pin wa tenenequem ma'. ⁶Mo ta om tatep pa' ra na camain winacam ma', pain ca tomi' ton con Iri' Jam ma', je pain ca pijim' hwet tain camain capijacon quem, na e' na pain ca wijac pin camain tenenequem quem. Wijac wijac pi' pin tarain, wixipa' ac cama tara. Mo ta noc camain ca wixipa' wa, tatep pa' ac camain tara winacam ta.

⁷Tarama' ma', om ca na ne pain ca tatep pa' cain winacon pain ca tomi' ton con Iri' Jam, je pain ca tomi' hwet tain cain capijacon quem. Xi an xihu' ara con Iri' Jam co taramaxicon. An hwet nain ca hwara' opa nucun Iri' Jam. Narima' ma' iri na ne, an hwet nain ca hwara' opa nucun taxicam quem. ⁸Xi quep tarama' xine tocoxicam narima' ta. Quep narima' pan ta tococicon tarama', maqui' non tarama' narima'. ⁹Om ca quep mi' cam con tarama' narima' Iri' Jam pane quem. Quep mi' pan non cam narima'

tarama', ma' ta quep xihó' mon tarama' nem ta nam. ¹⁰ Je ca na e' ne pain ca tatep pa' camain winacam narima' ma'. Xi querec ara cacam oro jam co taramaja mi' nonon Iri' Jam ta. Tatep pa' iri tarain winacam ne, querec pin' ac tacama tara pain ca tomi' ha' con taxicam.

¹¹ Ane na e' ne pain ca quep xihó' xijexi' pain ca howa xun Taramaxicon nexi' ne. Ca tarama' nexi' ca', ma' xira na irim narima' co quep xihó' napari'. Ca narima' nequequem ma' quem, ma' xira na napari' pain ca tarama' nexi' ca' quem, pain ca quep xihó' xixim quem. ¹² Quep narima' paxi' ta tocoxicon tarama' pain ca xo' quep qui' tacama pain cara pane. Ane wijima con tarama' narima' ma' ne. Wirico Iri' Jam co ara nain i ma' pari', quep non tarama', quep nam narima' quem.

¹³ Cain' cain' ne ca coromicat nuhu' ma' quem? Mo ta tomi' ton con Iri' Jam narima' ma', hohot na pain ca om mam' tatep pa' camain winacam ra? ¹⁴ Je ca tomi' xuhu' ca'. Mo ta quiji' ne tenenexi' pain ca tarama' nexi' ca', wixipa' ac iri' na, je cwerein pari'. ¹⁵ Ane querec awi ne ca quiji' ne tenenequequem oro narima' ma' ne. Je ca mi' tacacama pain ca quiji' ne tenenequequem. Mam' tatep pa' ara xi' nanain winacacam.

¹⁶ Je i ma'. Je ca pijim' taxipa' urut ca'. Ac i ma' taxipa' nana co win howa iri' pain ca cut in xucucun pain ca howa cocon Iri' Jam ma', pain ca tatep pa' cacamain winacacam oro narima'. Mo ta ma' caca wari' co noc nanain ca tomi' ne ca', om ca na ne pain ca tomi' ximama' caca.

Ca to' i'ina xucucun pain ca toc xin comi memem caca

¹⁷ Hu xim inuhu' pain i ca' quem. Om ca tomi' querec te xuhu' pain, xi quep xihó' xujuhu' pain ca cut in xujuhu' ta. To' i'ina e' xujuhu'. ¹⁸ Je i ca' ca tomi' xim xuhu' ca': Ma' nana co tomi' hwet nanapa' pahu', pain ca coromicat ni ca' xujuhu' pain ca cut in xujuhu' ma'. Tomi' caracan xucucun ta nanapa' pahu'. Ac ca iri'o' ne cocon na quem. Iri'o' paxi' tara pahu'. ¹⁹ Taxi' ara xi' irin i ca' quem, pain ca na e' ne pain ca coromicat ni ca' xujuhu' pain ca tomi' caracan xujuhu' ma'. Ma' ta querec pin' tococwa oro co win howa hwe pain ca hohot cocon Iri' Jam ta. ²⁰ Cut in iri xujuhu' ne, pain ca mam' pe wet xin hwein ca mi' pin nucun Taramaxicon nexi' hwe ma', om na capam' nucun Taramaxicon nexi' ca cao' xi' hwe ma'. Om na comi memem nucun ca toc xi' hwe ma' quem. ²¹ Capam' nuhu' pan ca cao' xi' hwe ma'. Comi memem nuhu' pan ca toc xi' hwe ma' quem. Xi wara

cao' harahap ara hwein carawa ca cut qui' pan hwe ma'. Om ca winim' xujuhu' pain. Ma' ac caca na co pe' pe' wet nana, ma' ac caca na co toc tamanain to nana quem. ²² Cain' cain' xihwe quem? Om nuhu' xirim ca cao' to hwe ra? Om nuhu' xirim ca toc to hwe ra? Ac ca noc xujuhu' a xira pain ca howa hun Iri' Jam ma', ara wixipa' pin ac hwehwem na co om nanam carawa. Cain' cain' xuhu' quem? Tomi' querec te xuxuhu' pain ra? Om ca tomi' querec te xuhu' pain ta.

Ca toc xine comi memem

²³ Wara tomi' hwet ara xi' inuhu' pain ca tomi' xo' capa' Taramaxicon nexi' pane, pain ca toc xine comi memem ca'. Ca' inuhu' pane: Xim pin iri na con ne, pain ca quep xiho' toton cocon oro taramaxicon Judas pain ca quep xun cocon pane, an pan ac cain na capam' Taramaxicon nexi' Jeju. ²⁴ Tomi' ac con na Cote ca: Tomi' querec te urut pum pain ca mi' maparut pain capam' ca' quem Te iri non ne, jicat caracan ac cain na, tomi' ac cocon na quem: Capam' ca', an xiho' nain cwere ca'. Om ca narain ho' xuhu' pain. Cao' jein, tama' ara cara jein. Ma' ta mam' pe wet mahu' pain ca mi' pin caho' xim xuhu' ca' inuhu' ta na ca tomi' cocon pane. ²⁵ Ac i ma' nain comi memem quem. Cao' cao' pi' pin iri nana ne, an ac cain na ca mam' toc wa. Tomi' ac cocon na: Comi memem ca ji'ao pe xine pain ca mam' toc wa ca', an xiho' nain cocu ca' quem. Ao mao ho' tara cocu. Ac i ma' tara ca hwet pin ne xocori ca tomi' an pe xo' mi' cuhu' Te cwa', pain ca to' witan pin xim cuhu' ca'. Toc xin iri jein ne, toc ac hwein tara. Ma' ta mam' pe wet mahu' pain ca ji'ao mi' xim xuhu' pain cocu ca' inuhu' ta na ca tomi' cocon pane. ²⁶ Je ca tomi' xuhu' ca': Cao' xin iri hwein capam' ca an xiho' nain curucun Jeju ca' ne. Toc xin iri hwein comi memem ca an xiho' nain quicon ma' quem ne. Ac ca pijim' hwet huhun na oro wari' pain ca mi' pin caho' cuhu' Taramaxicon nexi' quem. Xi om ne ca an hwet mi' ara huhun pain capam' je comi memem ca tomi' mi' nain ca mi' pin nucun ta. Ara cara jein quem. Ara ara maqui' pa' ac cuhu' ma' tara ta.

²⁷ Je ca tomi' xuhu' ca': Oro wari' co cao' ximama' nanain capam' nucun Taramaxicon nexi' ma', oro wari' co toc ximama' nanain comi memem nucun ma' quem, caracat ac caca na. Xi waraju ara cacain curucun pain quicon ta. ²⁸ Cao' xin iri nanain ne. Toc xin iri nanain ne. Noro noro xam' ac cacain tara ximicocon. Am coromicat xo' cocon Taramaxicon nexi'

pain. Am om coromicat xo' cocon pain. Mo ta hohot ne ximicocon pain ca coromicat xo' cocon ma', cao' ac cacain tara, toc ac cacain tara quem. ²⁹Mo ta cao' waraju hwein. Mo ta toc waraju hwein quem. Ac ca wap xut me ac hun na Iri' Jam. Xi querec pin' hwein curucun Taramaxicon nexi' ta. ³⁰Je ca mija caca oro win ma' nuhu' co om hwara' opa nana ma', co caxi nana pahu' quem. Je ca ma' caca co cono' nana pahu' quem.

³¹Je ca tomi' xuhu' ca'. Mo xi noro pan xin ximixi' ca', mo xi querec pin' xin ca coromicat nexi' pain ca toc xin comi memem ca', om xi wap capari' Iri' Jam. ³²Ane wap capari' Taramaxicon nexi' ne. Wap iri napari' ne, hu ac capari' na. Ma' ta om wap wi xihwe cocon oro caracat co om howa nanapa' ta napari'.

³³Je ca tomi' xuhu' ca' xere: Cut in xijexi' iri je ne, cao' xin iri jein capam' nucun Taramaxicon nexi' ne, toc xin iri jein comi memem nucun ma' ne, winim' ac xujuhu' tara. ³⁴Mo ta ma' ca win ma' nuhu' co pe' ma', cao' cain' tara pain xiricon. Ma' ta om wap xihwe pain ca cut in xujuhu' ma'.

Ma' ma' wet paxi' na oro ca tomi' xo' xim xuhu' ca'. Winim' cain' xine e'. Main tomi' xo' xuhu' pain ca aram aram hwet xuhu' ta.

Ca mi' capari' pain ca taramaja taxi' wa Tamataracon Iri' Jam

12 Tomi' xo' ho' xuhu' pain carawa ca mi' capari' Tamataracon Iri' Jam ta xere, pain ca mi' capari' pain ca taramaja mi' taxi' xun Taramaxicon nexi' ca'. Taraju pa' je e'. ²Pain ca om howa querec nuhu' pane, ha' ximama' hun Caxicon Jam, ac ca joc wat cuhu' na pane, wara taxi' ara xi' hwein i ma' ta. Howa jein oro caji pacun ca Iri' Jam xi' ma hwe ma' iri nuhu' ne, howa ximama' ac hwein na oro caji pacun ca om e' ma', ca om capijain ma' quem. ³Je ca tomi' xuhu' ca', taraju pa' jein i ca': Wari' co tomi' noro non Jeju ma', om na Tamataracon Iri' Jam ca tomi' wi non ma', om na. Wari' co tomi' hwet nain ca Iri' Jam nucun Jeju ma' quem, pain ca Iri' Taramaxicon na Jeju ta ca ma', xica' pe na Tamataracon Iri' Jam ca tomi' wi non ma' quem.

⁴Ni paxi' na oro ca taramaja taxi' wa ca mi' capari' Tamataracon Iri' Jam, ane xica' pe pan ne Tamataracon ca mi' napari' pain ne. ⁵Ni paxi' na oro ca taramaja taxi' wa pain ca taramaja mi' xun Taramaxicon nexi' ca', ane xica' pe ca Taramaxicon nexi' co taramaja mi' iri' ne. ⁶Ni paxi' na oro

ca taramaja nexi' ca' quem, ane xica' pe ca Iri' Jam co quep xihó' napari' pain ne. Mi' mi' xam' napari' pain ca hwara' opa wa pain ca taramaja mi' xun ca'.

⁷Mi' mi' xam' napari' pain ca taramaja taxi' wa Iri' Jam. Mi' napari' pain ca hwara' opa nein Tamataracon quem, ma' ta quep xihó' xujuhu' ta napari'. ⁸Ma' nana co mi' wawa pain ca tomi' hwet taxi' cacain xocori ca coromicat nucun Iri' Jam ma'. Je Tamataracon ca mi' pan nain i ma'. Ma' nana xucucun co mi' wawa pain ca tomi' xo' taxi' cacain xocori capiñacon ca taraju pa' je capari' ma' quem. Je Tamataracon ca mi' nain i ma' quem, om na xijein ca mi' nain. ⁹Ma' nana xucucun co mi' wawa pain ca howa tamana wa pain ca querec pin' cacain ca hwara' opa nucun Iri' Jam ma'. Je Tamataracon ca mi' nain i ma', om na xijein. Ma' nana xucucun co mi' wawa pain ca quep xio taxi' cocon co caxi nana ma'. Je Tamataracon Iri' Jam ca mi' nain i ma' quem, om na xijein. ¹⁰Ma' nana xucucun co mi' wawa pain ca an hwet taxi' cacain ca hwara' opa nucun Iri' Jam ma', pain ca ara taxi' cacain oro ca om ara taxi' ne ca wari' wa ma'. Ma' nana xucucun co mi' wawa pain ca pijim' hwet taxi' cacain xocori capiñacon Iri' Jam ma' quem. Ma' nana xucucun co mi' wawa pain ca querec pin' taxi' cocon co pijim' xo' nana ma'. Am Tamataracon Iri' Jam ne ca tomi' wi nonon ma', am Caxicon Jam ca co tomi' wi nonon ma', querec pin' ac tococwa na pain. Ma' nana xucucun co mi' wawa pain ca tomi' taxi' cacain xijein ca capiña wa ca om wara taxi' caca ma'. Ma' nana xucucun co mi' wawa pain ca taraju pa' wa quem, pain ca tomi' xo' taxi' cacain ca tomi' nucun ma' quem. ¹¹Je Tamataracon Iri' Jam ca ara nain i ma' pari', ara ara pi' pin nain. Je Tamataracon Iri' Jam ma', om na xijein. Mi' napari' pain ca ara taxi' xin ca param nein. Mi' ni mi' ni xam' napari' pain oro ca taramaja taxi' wa pain ca taramaja mi' xun Iri' Jam.

Ca mija ne coximinain cwerexi'

¹²Ma' xica' pe paxi' na cwerexi' ca', ane mija ne oro coximinain ne. Ma' na araxi', ma' na taparaxi', ma' na caximaxi', mija paxi' na oro xijein coximinain cwerexi'. Ane xica' pe ne cwerexi' ne. Ac i ma' na curucun Cristo quem. Mija na oro xijein coximinain curucun. ¹³Ac i ma' iri' pain ca

12.12 Tomi' iri nain curucun Cristo Paulo ne, tomi' joc mam' mi' napari' pain ca howa xun Cristo cwa'. Ac curucun Cristo iri' pain ca howa xun ca'.

curucun Cristo iri' quem. Mija paxi' iri'. Ma' nana co judeu nana. Ma' nana co om judeu nana. Ma' nana co taramaja mi' e' nonon oro xucucun wari'. Ma' nana co om taramaja mi' nonon oro xucucun wari'. Mija paxi' iri', ane cut corom to cut corom to xam' capari' pain curucun Cristo Tamataracon Iri' Jam ne. An xiho' nain ca ja' iri' com pane, pain ca cut corom to mi' capari' pain curucun Cristo. Ma' xica' pe na Tamataracon Iri' Jam ca cut corom to mi' napari' pain curucun Cristo, om na xijein. Pe ho' pe ho' xam' napari' quem.

¹⁴Win ne cwerexi' ca', pain ca mija ne oro coximinain cwerexi' ca'. Om ca ma' xica' pe ne coximinain. Ma' mija na. ¹⁵Mo xi tomi' ca' capari' caximaxi': Om xi pe tain cwerem, xi quep taxi' ta' ta, taxi' e' inain ca xut wa, om ca quep taxi' ta', je xi om pe qui' tain cwerem ca', am tomi' ac i ma' paxi' capari' caximaxi'. Ane pe cara nein cwerexi' ne. ¹⁶Tomi' xin tarajixi' quem, mo xi tomi' ca' capari' tarajixi': Om xi pe tain cwerem, xi querec taxi' ta' ta, taxi' e' inain ca taraju wa, om ca querec taxi' ta', je xi om pe qui' tain cwerem ca', am tomi' ac i ma' paxi' capari' tarajixi'. Ane pe cara nein cwerexi' ne. ¹⁷Mo xi om ne oro xijein coximinain cwerexi' ca', mo xi ma' e' ne tocoxi' ca', om xi taraju ac iri'. Mo xi om ne werexi' ca', mo xi ma' e' ne tarajixi' ca', om xi nac ac iri' quem. ¹⁸Je ca tomi' xuhu' ca': Wirico Iri' Jam co mi' napari' pain oro coximinain cwerexi', an to xo' an to xo' xam' nain pain cwerexi'. Maqui' nain ximicon quem, wirico pan co an to xo' mi' napari' pain, ara nain ca param pan nucun. ¹⁹Cain' cain' xira quem? Mo xi om mija ne oro coximinain cwerexi' ca', mo xi xica' pe e' ne coximinain ca', om xi ma' ac ne cwerexi' ta. ²⁰Je ca tomi' xuhu' ca': Xica' pe paxi' na cwerexi', ane mija ne oro coximinain ne.

²¹Je ca tomi' xuhu' ca': Om ca na ne pain ca tomi' ca' nein mixi' tocoxi' ca': Noc inem pain ca quep xiho' mapa', xica' ara pan tain ta, om ca tomi' ac i ma' ac ne ta. Om ca na ne pain ca tomi' ca' nein winaxi' caximaxi' ca' quem: Noc inem pain ca quep xiho' mapa', xica' xut pan ta' ta, om ca na ne pain ca tomi' ac i ma' ne quem. ²²Oro coximinain cwerexi' ca om hwara' opa homa ma', je ca quep xiho' tamana capari' ca'. Ma' xirapari' na irin. ²³Ma' na oro coximinain cwerexi' ca pe caho' iri' con wom. Om ca querec ac cacain oro xucucun wari'. Oro xijein ca to' wixipa' napari' ca' iri na ne, ara xite irin, narain ho' irin. Ma' ta om to' wixipa' capari' ta iri'. ²⁴Oro xijein coximinain cwerexi' ca om to' wixipa' napari' ca' iri na ne, om ca ara xite xin, om ca narain ho' xin quem.

Wirico Iri' Jam co quep ac i ma' nain cwerexi', ma' ta ara xite hwein oro coximinain curuhu' ca om querec awi homa ta napari'. ²⁵Ma' ta om ari xijein oro coximinain curuhu' ta napari'. Ma' ta tomi' querec te xijein, ma' ta quep xiho' quep xiho' pi' pin xijein ta napari'. ²⁶Ma' xica' pe iri na coximinain cwerexi' ca caxi ca' ne, caxi caxi pi' pin ac ne na oro xijein. Ma' xica' pe iri na coximinain cwerexi' ca ara xite iri' ca' ne, hohot hohot pi' pin ac ne na oro xijein quem.

²⁷Je ca tomi' xuhu' ca': Curucun Cristo iri' pain ca jao jao ma' xijexi'. Coximinain curucun Cristo coximinain Cristo xam' iri'. ²⁸Wirico Iri' Jam co an to xo' napari' pain ca coximinain curucun Cristo iri' ca', pain ca cut in xijexi' pain ca howa xun ca'. An to xo' an to xo' pi' pin napari' pain curucun Cristo. Mo nana: Mi' cain' napari' cocon oro apóstolo co tomi' hwet nanapari' pain capijacon con Jeju. Ma' ac caca na co pijim' hwet nanain capijacon Iri' Jam. Ma' ac caca na co tomi' xo' nanain quem. Ma' ac caca na oro xucucun quem, co an hwet taxi' nanain ca hwara' opa nucun Iri' Jam pain ca ara taxi' cacain oro ca om ara taxi' ne ca wari' wa ma'. Ma' ac caca na co to' xio taxi' nonon co caxi nana, co quep xiho' taxi' nana quem, co taramaxicon taxi' nana, co tomi' taxi' nanain xijein ca capija wa ca om wara tomi' taxi' caca, ac i ma' iri' pain ca coximinain curucun Cristo iri' ca'.

²⁹Apóstolo apóstolo pi' pin iri' ra? Om na. Pijim' hwet pijim' hwet pi' pin irin capijacon Iri' Jam ra? Ca' na ca' na pi' pin irin quem ra? Om na quem. An hwet taxi' an hwet taxi' pi' pin irin ca hwara' opa nucun Iri' Jam pain ca ara taxi' xin oro ca om ara taxi' ne ca wari' wa quem ra? Om na quem. ³⁰To' xio taxi' to' xio taxi' pi' pin ururun co caxi nana ra? Tomi' taxi' tomi' taxi' pi' pin irin oro xijein ca capija wa ca om wara tomi' taxi' iri' ra? Tomi' xo' taxi' tomi' xo' taxi' pi' pin irin ca tomi' mao nein oro xijein ca capija wa ca tomi' hwet caca oro win ma' nexi' quem ra? Om na quem. ³¹Je ca tomi' xuhu' ca': Na e' na pain ca jain jain hwein ca taramaja taxi' wa ca quep xiho' tamana nonon co win howa hwe ma'. Win xumu jein ta.

An hwet mi' ho' xuhu' pain ca taramaja taxi' wa ca awi tamana, awi tamana tiquin' ca' nain oro xijein ca taramaja taxi' wa ca mi' xim capari' Tamataracon Iri' Jam. Mo ta an xiho' hwein ca tomi' xuhu' ca', ara xo' ac hwein tara ca taramaja nuhu' ca mi' xim cuhu' Tamataracon Iri' Jam. Taraju wet je e'.

Ca om noc xijexi'

13 Je ca tomi' xuhu' ca', tomi' pan xije pain ca mi' capa' pain ca taramaja taxi' wa Tamataracon Iri' Jam ca'. Mi' paxi' tarapa' pain ca tomi' taxi' tain oro capijacocon oro wari' Tamataracon Iri' Jam ma'. Mi' paxi' tarapa' pain ca tomi' taxi' tain capijacocon oro jam co taramaja mi' nonon Iri' Jam ma' quem. Mo ta om an xiho' ton Iri' Jam pain ca om noc capari' ca', je pain ca om noc cocon oro wari' ma' quem, tomi' ximao e' ac ta' tara, an xiho' e' ac tain tara arain too pain ca tao' xine ta. ² Mi' paxi' tarapa' pain ca pijim' hwet taxi' tain capijacon Iri' Jam ma'. Mi' paxi' tarapa' pain ca taraju pa' taraju pa' pi' pin tain oro capijacon ca om an hwet querec ca ma'. Mi' paxi' tarapa' pain ca taraju pa' taraju pa' pi' pin tain oro ca coromicat nucun quem. Howa tamana paxi' ton pain ca ha' capa' cote ne pacun pain ca tomi' pe ni pin tain ta' ca'. Mo ta om an xiho' ton Iri' Jam pain ca om noc capari' ca', je pain ca om noc cocon oro wari' ma' quem, ac caxicon pije' ma ta ac capa' tara quem. ³ Cut mi' cut mi' pi' pin paxi' toton pain caramaju oro wari' co om nonon carawa ma'. Om paxi' tara ca nain ho' tain cwere ca', tom pin ma' tatarapa' ne paxi' toton oro wari' co noc mi' nanapa' pain ca howa ton Iri' Jam cwa' quem. Mo ta om an xiho' ton Iri' Jam pain ca om noc capari' ca', je pain ca om noc cocon oro wari' ma' quem, om ta quep xiho' capa' ca cut mi' tain caramaju, om ta quep xiho' capa' ca om nain ho' xije quem. Om ca hohot ma ta ac capa' tara Iri' Jam.

⁴ Je ca tomi' xuhu' ca'. An xiho' iri urun Iri' Jam pain ca om noc capari' ne, je pain ca om noc cocon oro wari' ma' quem, tomi' pan hot ac xijexi' na. Xiram pa' ac xijexi' na. Om ac ne na ca noc mi' xijexi' pain oro carawa ma'. Om ac ne na ca xin to iri', je pain ca tomi' xec xec iri' quem. ⁵ Ara xo' ac iri' na, om ac ne na ca win xumu e' xin ca param pan nexi'. Om ac ne na ca mana' hap iri' pain ca tomi' taparam' cacapari' oro wari', om ac ne na ca tama' mam' pe wet xin ca wara ara cup xijexi'. ⁶ An xiho' iri urun Iri' Jam pain ca om noc capari' ne, je pain ca om noc cocon oro wari' ma' quem, om ac ne na ca tomi' querec te xin ca pan teretem caca oro wari'. Tomi' querec te e' ac xin na ca ara xo' caca. ⁷ An xiho' iri urun pain ca om noc capari' ne, je pain ca om noc cocon oro wari' ma' quem, tacana to ca' ac xuxun na oro win ma' nexi' pain ca quep em' cacapari', om ca mana' in pin camain' xuxun. Tama' coromicat mi' ururun pain ca awi wa oro win

ma' nexi'. Tama' winim' ac xuxun na pain ca ara xo' caca quem. Hwara' opa cara irin oro carawa ca to' i'ina napari' quem.

⁸Iri' Jam ma', mi' cara tarapari' pain ca an xiho' xun pain ca om noc capari' ca'. Mi' cara tarapari' pain ca an xiho' xun pain ca om noc cocon oro wari' ma' quem. Oro ca taramaja wa ca mi' capari' Tamataracon ca' iri na ne, main maqui' tara xec nein ca ara ara om pin xin. Main mi' mi' om pin tarapari' pain ca pijim' hwet taxi' xin xocori capijacon Iri' Jam. Main mi' mi' om pin tarapari' pain ca tomi' taxi' xin xijein ca capiija wa ca om wara tomi' taxi' iri' quem. Main mi' mi' om pin tarapari' pain ca tomi' xo' taxi' xin xocori capijacon ca taraju pa' je capari' quem. Mi' mi' ca' tarapari' pain, mi' mi' om pin ac capari' pain tara quem. ⁹Xi taraju pa' wijimain e' ara xin oro ca coromicat nucun Iri' Jam pain xocori ca' ta. Taxi' wijimain e' irin ca pijim' hwet wa oro capijacon quem. ¹⁰Ane maqui' ta' ne xec nein ca taxi' xin xin ne. Taxi' taxi' pi' pin ac xin tara oro capijacon Iri' Jam. Je ca om mi' mami' xim capari' pain ca pijim' hwet mi' xijexi' pain xocori capijacon.

¹¹Win iri' pain ca hwijima' hwijima' wet nexi' pane. Ara e' irin ca ara caca hwijima' pane. An xiho' ururun pain ca tomi' nucucun, an xiho' ururun pain ca coromicat nucucun quem. Hwanana pin iri iri' ne, maho' ac xin na oro ca ara taxipa' caca hwijima'. ¹²Ac i ma' iri' con Iri' Jam quem. Om om wet na ca querec pin' xo' xun pain xocori ca'. Ac ca querec e' xin na jamicon pain ca mam' querec ca jamu wa ca om awi ca', querec tocohon na jamicon, ac je paxi' na pain ca om querec xo' xun Iri' Jam pain xocori ca' quem. Ame hwe e', main maqui' tara xec nein ca querec xo' xun quem. Win quima xun, querec xin iri' tocon. Querec pin' wijimain e' urun pain xocori ca'. Ame hwe e', main maqui' tara xec nein ca querec pin' xo' xun. Win ne ca querec pin' pan capari' pain xocori ca', main querec pin' ac i ma' xun quem.

¹³Je ca tomi' xuhu' ca': Ma' 3 na ca ara cara je capari' Iri' Jam. Mo na: Na e' na pain ca howa cara xun. Na e' na pain ca winim' cara xun pain ca mi' xim capari' pain carawa ca wara tomi' pe mi' capari'. Na e' na pain ca an xiho' cara xun pain ca om noc capari' ca', je pain ca om noc cocon oro wari' ma' quem. Awi paxi' na ca howa tocwa Iri' Jam. Awi paxi' na ca winim' tocwa quem. Ca an xiho' tocwa pain ca om noc capari' ca', je pain ca om noc cocon oro wari' ma' iri na ne, awi tamana pan na ta.

Ca tomi' xo' tococwa pain ca pijim' hwet taxi' wa capijacon Iri' Jam, je pain ca tomi' taxi' xine xijein ca capiija wa ca om wara taxi' xine ma'

14 Je ca tomi' xuhu' ca': Ta noc huhun oro win ma' nuhu' me. Jain jain jujun, tomi' querec te jujun. Param jein oro ca taramaja taxi' wa ca mi' ne Tamataracon Iri' Jam ma' quem, jain jain jein quem. Hohot paxi' na pain ca param hwein oro xijein ca taramaja taxi' wa ca mi' ne Tamataracon Iri' Jam ma', ane hohot tamana pan ne ca param hwein ca pijim' hwet taxi' wa xocori capijacon Iri' Jam ne. Je tara ca win xumu tamana pan hwe ta. Jain jain tamana pan jein ca pijim' hwet taxi' wa xocori capijacon Iri' Jam ta. ²Tomi' pan ara xi' non Iri' Jam wari' co tomi' nain xijein ca capiija wa ca om wara tomi' taxi' ca ma'. Om ca tomi' tococwa oro wari', xi ha' cocon pain ca taraju pa' wa ta. Tamataracon Iri' Jam paxi' na ca mi' non pain ca tomi' nucun ma', ane om taraju pa' caca co taraju nonon ne, xi an hwet cain ca tomi' mao nein Iri' Jam ta. ³Ane om ac i ma' ne con wari' co pijim' hwet nain xocori capijacon Iri' Jam ne. Tomi' nonon oro wari'. Quep xiho' nonon, to' hwara' opa nonon, ja' tomi' querec te nonon quem. ⁴Wari' co tomi' nain xijein ca capiija wa ca om wara tomi' taxi' ca ma', quep xiho' e' pan xucun. Wari' co pijim' hwet nain xocori capijacon Iri' Jam ma' iri na ne, quep xiho' nonon oro co cut in xucucun pain ca howa cocon Iri' Jam ma'. ⁵Param paxi' inuhu' pain ca tomi' tomi' pi' pin hwein oro xijein ca capiija wa ca om wara tomi' taxi' hwe ma'. Ane param tamana xuhu' pain ca pijim' hwet hwein xocori capijacon Iri' Jam ne. Wari' co pijim' hwet nain xocori capijacon Iri' Jam ma', wirico co quep xiho' tamana nonon co howa nonon Iri' Jam. Wari' co tomi' nain xijein ca capiija wa ca om wara tomi' taxi' ca ma' iri na ne, quep xiho' wijimain e' na co ma'. Mo ta ma' ca xucun wari' co tomi' xo' taxi' nain ca tomi' nucun ma', quep xiho' ac tococwa na co howa nonon Iri' Jam.

⁶Je ca tomi' xuhu' ca' xere: Mo ta hwet xuhu', mo ta tomi' e' xuhu' pain xijein ca capiija wa ca om taraju pa' hwe ma', ha' tarapa' pain ca quep xiho' xuhu' ra? Om na, om ca quep xiho' xuhu'. Quep xiho' e' xuxuhu' pain ca tomi' hwet xo' xuhu' pain ca tomi' capa' Iri' Jam. Quep xiho' e' xuxuhu' pain ca tomi' hwet xo' xuhu' pain ca taraju pa' ne ca'. Quep xiho' e' xuxuhu' pain ca pijim' hwet xo' xuhu' pain ca ca' na xuhu' pain capijacon quem. ⁷Win ne pain ca on xine caji xuwiwio' ma', je pain ca tao' xine caji violão ma' quem. Mo ta om on xo' cain ca ac xuwiwio' wari' ma', om ca taraju pa'

xin tamara' ca on ca. Mo ta om tao' xo' cain caji violão ma' quem, om ca taraju pa' xin tamara' ca tao' ca quem. ⁸Win caca oro soldado ma' quem, mo ta on tain cain caji taracom soldado ma', pain ca on cut in cocon oro win soldado ca pain ca maji mixita xi' caca ma'. Mo ta om on xo' cain, mo ta om taraju pa' cacain oro win soldado ca ma', om ta cut cacain oro too nucucun, om ta maji mixita xi' caca quem.

⁹Ac i ma' na pain ca tomi' nuhu' ma' quem. Mo ta tomi' hwein xijein ca capija wa ca om taraju pa' caca oro wari' ma', mo ta om cuhu' xucun wari' co tomi' an hwet taxi' nain ca tomi' nuhu' ma'. Ma' tara ca taraju pa' ac cucuhu' oro wari' ra? Om na, om ta taraju pa' ac cucuhu'. Ac ca tomi' ximama' e' hwe tara ta. ¹⁰Ma' mija na oro xijein ca capija wa pain oro xijein macan'. Oro wari' co tomi' nanain ma', taraju pa' taraju pa' pi' pin nanain. ¹¹Mo ta om taraju pa' xin capijacon wari' co tomi' napari' ma', tatirim na ta urun. Ac i ma' napari' quem, tatirim hwe ta napari' quem. ¹²Je ca tomi' xuhu' ca': Win ne ca param hwein oro ca taramaja taxi' wa ca mi' ne Tamataracon Iri' Jam ma'. Na e' na pain ca param hwein ca taramaja taxi' wa ca to' hwara' opa nonon oro co win howa hwe ma' quem.

¹³Je ca tomi' ca' xuhu' ca': Wari' co tomi' nain xijein ca capija wa ca om wara tomi' taxi' ca ma', na e' na pain ca tomi' ca' con Iri' Jam: Mi' ne pain ca tomi' xo' taxi' tain ca tomi' ne ca', tomi' hwet ac toton tara pain oro win howa ta' cwa' toron. ¹⁴Taraju wet je e'. Mo ta tomi' xun Iri' Jam cwa', mo ta tomi' xun pain xijein ca capija wa ca om wara tomi' taxi' iri' ca'. Je paxi' na Tamataracon ca mi' napari' pain ca tomi' wa ca'. Ane om taraju pa' pan iri' ne. Om ca mam' tomi' irin ca coromicat nexi'. ¹⁵Cain' cain' xixi' quem? Mo ta tomi' xun Iri' Jam iri', na e' na pain ca mi' pan capari' pain ca tomi' wa Tamataracon ma'. Na e' na pain ca taraju pa' cacain ca tomi' nexi' oro win ma' nexi' quem. Mo ta com mi' xun pain tamara' Iri' Jam iri' quem, na e' na pain ca mi' pan capari' pain ca com wa Tamataracon ma'. Na e' na pain ca taraju pa' cacain ca com nexi' oro win ma' nexi' quem. ¹⁶Mo ta tomi' xun Iri' Jam pain ca in ac xun quem, mo ta tomi' e' xun pain xijein ca capija wa ca om wara tomi' taxi' iri' ca'. Mo ta pe ho' capari' wari' co om taraju pa' ma'. Ha' tara ca amém ac ca pain ca tomi' nexi' ra? Xi taraju pa' capari' pain ca tomi' nexi' ta. ¹⁷Hohot paxi' tara ca tomi' nexi' pain ca tomi' xun Iri' Jam pain ca in ac xun ca', pain ca tomi' xun pain xijein ca capija wa ca om wara tomi' taxi' iri' ca'. Ane om quep xihó' xun wari' co om taraju pa' napari' ne.

¹⁸ Tomi' querec te inon Iri' Jam pain ca tomi' taxi' tain oro xijein ca capija wa ca om wara tomi' taxi' ta' ca'. Tomi' taxi' tiquin' tomi' taxi' tiquin' pi' pin ca' paxi' inuhu' pain. ¹⁹ Ane om hohot capa' ca tomi' wa xijein ca capija wa ca om wara tomi' taxi' ta' pain ca cut in xijexi' ne. Hohot napa' pain ca tomi' wijimain e' tain ca capija wa ca taraju pa' pan caca oro wari'. Ma' ta quep xiho' toton ina. Noc inain ca tomi' tamana e' wa xijein ca capija wa ca om taraju pa' caca ma'.

²⁰ Taraju pa' je ta xere. Ta ximicon pije' mami' hwe pain ca om taraju pa' nuhu' pain ca mi' capari' pain oro ca taramaja taxi' wa Tamataracon Iri' Jam ta. Ximicon hwanana je pain ca coromicat xo' nuhu'. An xiho' e' jujun oro pije' pain ca om coromicat pan teretem nucucun. ²¹ Je ca xirao' pe xine pain capijacon Iri' Jam pane.

Tomi' ca' na Taramaxicon Iri' Jam.

Tomi' toton oro wari' ne co judeu nana cwa',

mam' tomi' toton pain xijein ca capija wa,

mam' tomi' toton pain capijacon oro co om judeu nana ma'.

Tomi' ac i ma' paxi' toton,

ane ari cara xim cacapa' ne.

Om ta taraju wet camain' cacapa' ta.

Ac i ma' na ca xirao' pe xine ca tomi' nucun Taramaxicon Iri' Jam pane.

²² Je ca tomi' xuhu' ca': Tomi' iri xin xijein ca capija wa ca om wara tomi' taxi' iri' ca' ne, wirico Iri' Jam co mi' napari' pain. Ma' ta querec pin' cacapa' pain ca hwara' opa ne oro wari' co om howa nanapa' ma' pahu' napari'. Ma' ta querec pin' xucucun pain ca na e' ne pain ca tomi' ha' cacapa' ta nonon. Om ca tomi' capari' pain ca howa iri' ca', tomi' e' tata co om howa nonon. Ca pijim' hwet taxi' wa xocori capijacon ca' iri na ne, je ca mam' tomi' capari' pain ca howa iri' ca' quem. Ma' ta querec pin' mahu' pain ca hwara' opa ne napari'. Om ca tomi' tococwa co om howa nonon ma'.

²³ Je ca tomi' xuhu' ca': Mo ta cut in xujuhu', mo ta tomi' tomi' pi' pin hwein xijein ca capija wa ca om wara tomi' taxi' hwe ma'. Mo ta corom caca co om taraju pa' nana ma', co om howa nana ma', tamanain hwe ta ac cucuhu' tara. ²⁴ Ane om ac i ma' ne pain ca pijim' hwet hwein capijacon Iri' Jam ma' ne. Mo ta pijim' hwet pijim' hwet pi' pin hwein capijacon Iri' Jam ma', mo ta corom ca wari' co om howa ma', co om taraju pa' ma'. Corom ac ca tara, taraju ac cuhu' tara, querec pin' ac cain tara ca caracat

nucun. Wap xim napa' xin Iri' Jam ne ac ca tara pahu'. ²⁵ Coromicat ac ca tara: Om paxi' na ca querec pin' cacapa' pain ca pan tem ne oro win ma' ne cwa', ane taxi' pan capa' pain Iri' Jam ne, ac i ma' tara ca tomi' ca ma'. Pe torotop tucu hwet mi' tarain macan', tomi' querec te ac con tara Iri' Jam pain ca in ac con ma'. Pe ho' momon caram cwa' co howa nenem cwa' ira ac con tara quem.

Ca om na ne pain ca ja' teretem xijexi' pain ca cut in xijexi'

²⁶ Je ca tomi' xuhu' ca' xere: Ara ac i ca' ara ac i ca' xam' je pain ca cut in xujuhu' ma'. Com tara tamara' xucun. Pijim' ac cain tara capiiacon Iri' Jam xucun. Tomi' hwet ac cain tara xocori ca tomi' nucun Iri' Jam xucun. Tomi' ac cain tara xijein ca capiia wa ca om wara tomi' taxi' ca xucun. Tomi' xo' ac cain tara xucun quem. Na e' na pain ca quep xiho' xujuhu' pain oro ca ara nuhu' pain ca cut in xujuhu' ma'. Ma' ta to' hwara' opa xujuhu' con Taramaxicon nexi' ta. ²⁷ Mo ta ma' caca co tomi' xin nanain xijein ca capiia wa ca om wara tomi' taxi' caca ma', om ta tamana caca. Mo ta tomi' 2 xi' caca, mo ta tomi' 3 xi' caca, om ta tiquin' ca' cacain ca 3 nucucun. Tomi' cain' tara xucun, maqui' ho' ac caca pa'ao' tara oro xucucun, ac i ma' tara ca ja' corom mao xucucun. Ma' ac ca tara xucun co tomi' xo' nain ca tomi' nucucun quem. ²⁸ Mo ta om ca wari' co tomi' xo' taxi' nain ca tomi' nucucun ma', tacana to ac caca tara. Om ta tomi' hwet cacain ca coromicat nucucun pain ca cut in xujuhu' ma'. Na e' na pain ca tomi' pan cocon Iri' Jam pain ca coromicat pan nucucun ta.

²⁹ Co pijim' hwet xin nanain ca tomi' nucun Iri' Jam ma', mo ta tomi' 2 xi' caca, mo ta tomi' 3 xi' caca, tomi' ac caca tara. Taraju wet ac caca tara oro xucucun. Am hohot ne ca tomi' nucucun, am om hohot ne, ac i ma' tatara co taraju wet nonon ma'. ³⁰ Mo ta tomi' con xucun wari' Iri' Jam ma', pain ca xao pe xao pe wet nucun ma', mo ta tomi' hwet rain ca tomi' xim ca' con, tacana pe pin ac ca tara co wara tomi' ma' quem. Na ra, tomi' hwet rain ta toron, xao pe pin ac ca tara quem. ³¹ Ac i ma' tara ca pijim' hwet pijim' hwet xam' hwein capiiacon Iri' Jam. Pijim' cain' tara xucun, pijim' ac ca tara xucun, pijim' ac ca tara xucun quem. Ma' ta taxi' taxi' pi' pin hwe, ma' ta hwara' opa hwara' opa pi' pin hwe ta inuhu'. ³² Wari' co pijim' hwet tain nain capiiacon Iri' Jam ma', na e' na pain ca winim' con win ma' ca co wara pijim' ma'. Om ta tomi' am pin con. ³³ Xi ja'

teretem xujuhu' ta capari' Iri' Jam ta. Noc napari' pain ca teretem caracan xijexi' pain ca pijim' xijexi'. Tomi' querec te xujuhu', ta to' i'ina xujuhu' me ta napari'.

An xiho' jujun oro wari' nucun Iri' Jam co cut in xucucun pain ca howa caca ma', ³⁴ cacam oro narima' ma'. Tacana to tatara oro narima' pain ca cut in xujuhu' ma'. Tomi' caho' tata pain ca tomi' am pin cocon co pijim' nana ma', pain ca tomi' querec cocon pain ca om taraju pa' nequequem. Tomi' ha' e' totoron waram taxicacam. Win ne ca xirao' pe ca Moisés cara pane. ³⁵ Mo ta om taraju pa' cacama, mo ta taraju pa' xi' cacama quem, tomi' querec ac cocon tara waram taxicacam pain ca aram aram in mama' cacamain xiricacam. Xi hohot ne pain ca tomi' cacama pain ca cut in to xujuhu' ta.

³⁶ Cain' cain' xihwe quem? Wahu' tara co pijim' hwet cain' nanain capiiacon Iri' Jam ra, coromicat ac i ma' hwe ra? Xica' to urut co taraju nanain capiiacon Iri' Jam ta, ac i ma' na ca coromicat nuhu' ra? ³⁷ Mo ta ma' cuhu' co pijim' hwet taxi' inain xi' ma nain capiiacon Iri' Jam ma', mo ta ma' cuhu' co mi' napa' pain oro xijein ca taramaja wa xi' ma hwein Tamataracon Iri' Jam ma' quem. Na e' na pain ca querec pin' cain oro ca xirao' mi' xuhu' ca'. Wirico Taramaxicon nexi' co xirao' rain napa'. Tomi' ha' jein ta napari'. ³⁸ Mo ta om tomi' ha' cain, mo ta miri'om cain ca xirao' ne, om ta ha' hun quem. Miri'om jun.

³⁹ Je ca tomi' xuhu' ca' xere: Win xumu jein ca pijim' hwet wa capiiacon Iri' Jam. Param tamana jein. Hohot paxi' na pain ca om narain ho' xujuhu' pain ca tomi' wa xijein ca capiia wa ca om wara tomi' taxi' hwe ma'. ⁴⁰ Ane tomi' xuhu' pain i ca' ne: Om ca ha' ne pain ca teretem caracan xujuhu' pain ca cut in xujuhu' ta. Oro ca ara hwe pain ca cut in xujuhu' ma', na e' na pain ca ara awi hwein. Na e' na pain ca ara xo' hwein quem.

Ca e' mami' nucun Cristo

15 Xirao' mi' ho' xuhu' pain i ca' quem xere: Mam' pe wet jein capiiacon Iri' Jam ca pijim' xuhu' pane, pain ca pijim' hwet xuhu' pain ca to' witan pin xim cuhu' Jeju pane. Je ca howa hwe pane, howa cara hwein quem. ² Capiiacon Iri' Jam con Jeju ca', je ca mam' to' witan xihwe quem. Howa cara iri hwein ne, witan ac hwe na. Tara pahu', mo ta om howa cara hwein, howa ximama' ac hwe na quem.

³Pijim' hwet inuhu' pain capijacon Iri' Jam ca wara tomi' hwet capa' pane. Awi tiquin' ca' nain oro xijein capijacon ta. Ca' na con: Mi' pin caho' napari' Cristo, ma' ta om wap xihwe pain ca caracat nuhu' ta napari'. Win ne ca xirao' pe xine pain capijacon pane. ⁴An corom pe pin ac cacain na curucun pain manain pacun. Ma' 3 pin iri na xec pain ca an corom pe xine curucun ne, to' e' mami' ac con na Iri' Jam. Win ne ca xirao' pe xine pain capijacon pane. ⁵Hwet pa' ac con na Pedro, aram aram hwet pa' ac tococwa na oro xucucun apóstolo ma', pain ca ma' 12 nucucun ma' quem. ⁶Aram aram hwet pa' ac tococwa na oro co howa nonon ma', pain ca cut in to nucucun ma' quem. Mija nana, tiquin' ca' nanain ca 500 nucucun pane. To wet nana quem, mija nana co e' e' wet nana pain xocori ca'. Ma' paric ca' e' paxi' nana co cono' pin nana, to wet nana oro xucucun. ⁷Aram aram hwet pa' ac tocwa na Tiago, aram aram hwet pa' hwet pa' pi' pin ac tococwa na oro xucucun apóstolo.

⁸Ja' tawuru ac toton na pain ca querec ton pain ca hwet pa' capa' pane, pain ca ac caxicon pije' co pan' orowaxicon ca' nam jicon ta' na pane. ⁹Xi awi ta' pane ta. Awi tiquin' ca' nanapa' oro xucucun apóstolo. Om xi apóstolo ra capa' Iri' Jam pane, om xi pijim' hwet rain capija camain' capa' pane. Xi quep em' taxipa' ara toton oro co howa nonon Iri' Jam con Jeju pane ta. ¹⁰Ane xiram pa' e' capa' Iri' Jam ne. Wirico co mi' napa' pain ca pijim' wa capijacon. Xiram pa' napa'. Je ca ha' capa' pain ca pijim' tamana tain capijacon ca'. Taramaja tiquin' ca' inonon oro xucucun apóstolo. Om paxi' na ca wata' ne co taramaja cwa'. Wirico Iri' Jam co xiram pa' napa' pain ca taramaja wi capa' ca'. ¹¹Je ca tomi' xuhu' ca': Am ca pijim' ne pahu', am ca pijim' nucucun oro xucucun apóstolo pahu', an an ari xijein ca pijim' nuxut pain ca pijim' mi' urut pahu' pain capijacon Iri' Jam con Jeju. Howa hwein ca pijim' nuxut quem.

Ca e' mami' xi' iri' pain ca howa xun Jeju

¹²Je ca tomi' xuhu' ca': Ma' nana oro win ma' nuhu' co tomi' ca' nana: Om ta e' mami' caca co wara cono' nana ta nana. Cain' cain' xirara quem?

15.8 Pain ca tomi' mi' xucun Paulo ma', pain ca ac caxicon pije' co pan' orowaxicon ca' nam jicam ta' pane ca ma', tomi' mi' nain ca ane ane apóstolo hap nucun pane. Quep em' quep em' wet ara xi' tata oro co howa nonon Jeju pane, ane ane hwet pa' ac con na Jeju pain wanaji Damasco, howa hap ac ca na, apóstolo hap ac ca na quem.

Para tomi' ac i ma' caca quem? Win ne ca pijim' hwet urut pahu' pain ca to' e' mami' con Cristo Iri' Jam pane. ¹³ Mo xi om iri'o' ne ca to' e' mami' toton cocon oro wari' Iri' Jam ma', om xi to' e' mami' con Cristo quem. ¹⁴ Mo xi om iri'o' ne ca to' e' mami' con Cristo ma', pijim' ximama' ac urut xira, howa ximama' ac hwe xira quem. ¹⁵ Mixein hwe ta ac cacaparut xira oro wari' quem, xi pijim' taxipa' ara urut pain ca to' e' mami' non Cristo Iri' Jam ta urut ca'. Mo xi om iri'o' ne ca to' e' mami' toton cocon oro wari' Iri' Jam, om xi to' e' mami' con Cristo quem. ¹⁶ Mo xi om iri'o' ne ca to' e' mami' toton cocon oro wari' Iri' Jam ma', om xi e' mami' ca Cristo quem. ¹⁷ Mo xi om iri'o' ne ca to' e' mami' con Cristo Iri' Jam pane, howa ximama' ac hwe xira, om om wet ac ne xira ca witan ca' hwein ca caracat nuhu' quem. ¹⁸ Mo xi ac i ma' ne, mo xi om to' e' mami' toton cocon oro wari' co wara cono' nana ma', co wara howa nonon Cristo pane, pan' ara'am ac caca xira quem. ¹⁹ Mo xi howa paxi' xun Cristo, mo xi winim' e' xun pain ca xiram pa' capari' pain ca e' e' wet nexi' pain macan' ca'. Ximin ac iri' xira, ximin tiquin' ca' ac xuxun xira oro xucucun wari' pain oro xijein macan' ca'.

²⁰ Ane to' e' mami' con Cristo Iri' Jam ne. Iri'o' na, wirico co to' e' mami' cain' wa pane. Je ca taxi' xuxun oro wari' co howa nonon ma' quem. Cono' paxi' nana, ane to' e' mami' xun tococwa ne. ²¹ To' cono' ara xi' napari' wari' co xica' xat pane, wirico Adão cara pane. Je ca to' e' mami' capari' xucun wari' co xica' xat pane quem, wirico Cristo. ²² Wari' pain ca hwanana ne xun Adão cara pane, cono' cono' pi' pin xi' iri', xi om ne ca caracat pan ara ca pane ta. Wari' pain ca win cwere xun Cristo cwa' iri na ne, to' e' mami' to' e' mami' pi' pin ac capari' tara Iri' Jam ta. ²³ Om ca maqui' querec ne xec nein ca to' e' mami' xim capari', ame hwe e'. To' e' mami' cain' non Cristo pane, maqui' ac ne tara xec nein ca in qui' ta' nucun, to' e' mami' ac capari' tara pain ca wari' ne capari' ca' quem. ²⁴ Aram aram maqui' ac ne tara oro xec nein ca to' om pin tain cain ca hwara' opa nucucun oro jam cocon oro taramaxicon co taramaxicon to nanain oro xijein macan' ma' quem. To' om to' om pi' pin tarain ca hwara' opa nucucun. Pi' pin ac ne tara macan' quem. Je i ma' tara xec nein ca tomi' ton con Cote ca quem. Tomi' ca' toron: Taramaxicon pe rain maxu ta Te ac con tara, mi' ac con pain tara ca taramaxicon pe cain maxicon. ²⁵ Xi na e' ara ne pain ca taramaxicon taramaxicon cara cain' ca ta, aram aram maqui' pa' ac con tara xec nein ca to' quiji' pin toton cocon oro taramaxicon co noc nonon ma', wiricoco

oro jam, wiricoco oro wari' quem, wiricoco oro co noc nonon ma' quem, to' quiji' pin ac tococwa tara. ²⁶To' quiji' pin to' quiji' pin, wara ca' tara ca cono' wa ma', to' quiji' pin ac cain tara quem. Om pin ac ne tara ta.

²⁷Je ca xirao' pe xine pain capijacon Iri' Jam ca': Wirico Iri' Jam co mi' non pain ca taramaxicon wa Cristo, mi' non pain ca taramaxicon pe ho' taramaxicon pe ho' pi' pin cocon oro wari', wiricoco oro jam, wiricoco oro taramaxicon, je oro carawa jimao ta na ca xirao' pe xine con. Pain ca tomi' cain i ma' Iri' Jam ma', om ca tomi' pan xucun, om na. Xi taramaxicon pe ho' con Iri' Jam Cristo ta. Wirico Iri' Jam pan ara xi' na co mi' nain ca taramaxicon wa. Mi' non pain Panxica ta. ²⁸Taramaxicon pe ho' iri totoron oro wari' cocon oro taramaxicon cocon oro jam je oro carawa jimao ne, tomi' ac con tara Cote ca co mi' non pain ca taramaxicon wa. Maho' tain ca taramaxicon wa ta Te, wum tara co taramaxicon pe ho' napa' ta toron, taramaxicon cara ac ca tara Iri' Jam. Taramaxicon pe ho' taramaxicon pe ho' pi' pin totoron oro wari' cocon oro taramaxicon cocon oro jam je oro carawa jimao. Iri' taramaxicon pin ac ca tara ta.

Ca om na ne pain ca tomi' ximama' iri' pain ca om ta e' mami' xi' iri' ca'

²⁹Cain' cain' xira cocon oro wari' co ja' wawa pain com pain maxicocon co wara cono' nana ma' quem? Mo xi om e' mami' xi' caca co wara cono' nana ma', je xi om ja' qui' tococwa cocon quem? ³⁰Noro xut pain ca to' i'ina caparut oro carawa ca' quem. Mo xi iri'o' ne ca om e' mami' xi' caca co wara cono' nana ma', je xi narain ho' qui' urut pain curuxut ca' quem? Mija ara xi' na oro carawa ca to' cono' pin xim naparut, pain xim, pain xec quem. ³¹Mi' pin ta' mi' pin ta' ma' ina pain oro xijein xec ira. Tomi' iri'o' inuhu' ta xere. Win ne ca tomi' querec te iri'o' xuhu' pain ca howa hun Taramaxicon nexi' Cristo Jeju cwa'. ³²To' i'ina tamana nanapa' oro wari' pain Éfeso pane quem. Ximin ina cocon. Ac oro caxicon copacao' nana pain ca mana' cacapa' pane. Mo xi an xiho' toton oro wari' pain ca om howa cacain ca e' mami' xi' caca ma', je i ma' xira ca om quereme qui' tain ca mana' cacapa' pain ca noc cacapa' quem? Mo xi om e' mami' xi' caca co wara cono' nana ma', na ac ne xira pain ca tomi' ximama' xijexi'. Ca' xixi': Cao' cao' ma'am xi', toc tamanain to xi', xi om ne ca xec cono' pin ara xi' iri' ta, pan' ara'am ac xi' tara ta, ac i ma' xira ca tomi' ximama' nexi' ta.

³³Ma' tara xumuhu' me, coromicat xo' je cocon oro wari' co tomi' ximama' ac i ma' nana. Mo ta taxipa' huhun, ja' em' pin ac hwein tara ca xuruxut xo' nuhu'. ³⁴Ma' tara xumuhu' me. Caracat maho' je. Ma' nana oro win ma' nuhu' co om coromicat xo' camain' nonon Iri' Jam. Om ca querec pin' cocon. Wixipa' xihwe pain ca om coromicat xo' nucucun pain ca om querec pin' cocon Iri' Jam ta.

Cwerexi' pain ca e' mami' xi' iri'

³⁵Am ma' caca oro win ma' nuhu' co tomi' querec ca' nana quem: Cain' ca e' mami' xi' caca co cono' nana quem? Cain' xi querec ne curucucun quem? Am ac i ma' ne ca tomi' querec nucucun ma'. ³⁶Xi coromicat xo' caca co tomi' querec ac i ma' nana ta. Taraju pa' je e'. Win ne tocwi trigo ca oin' wa ma'. Oin' ta, memerem mao ac ne na, ac ca mi' pin ne na quem. Mo ta om memerem ne, om ac ne tara ca orot ne. Memerem iri na ne, orot ac ne na quem. ³⁷Tocwi e' na ca oin' iri' ca'. Am tocwi trigo, am xijein tocwi. Tocwi e' na, om ca an xiho' nein arain pain ca orot nein quem. ³⁸Wirico Iri' Jam pan na co mi' nain tocwi pain ca orot nein. Mi' nain ca param nucun. Orot ni orot ni xam' na. ³⁹Jimama' na oro ca cwere wa quem. Cwere jimao na wari', cwere jimao na carawa, cwere jimao na me, cwere jimao na hwam. ⁴⁰Ac i ma' na oro carawa ca to nain pawin quem, wirico xina con panawo' con oro pijo' ma' quem. Ane om an xiho' nein oro carawa ca to nain macan' ca' ne. Jimao na ca awi nein pawin cain, jimao na ca awi nein macan' ca' quem. ⁴¹Jimao na ca toha nucun xina, jimao na ca toha nucun panawo', jimao na ca toha nucun pijo' quem. Om ca an xiho' xucun oro pijo' ma' quem. Jimama' na oro ca toha nucun.

⁴²Ac i ma' tara cwerexi' pain ca to' e' mami' xim capari' Iri' Jam quem. An xiho' tarain tocwi trigo ca oin' xine ma'. Maram mao ac ne tara, cunu pin ac iri' tara quem. E' mami' iri xi' ne, om ta cunu mami' iri', om ta cono' mami' iri'. ⁴³Om ta awi ne cwerexi' pain ca cunu pin nein ma'. E' mami' xi' iri iri' ne, awi pin ac ne tara. Om ta hwara' opa ne cwerexi' pain ca cunu nein ma'. E' mami' xi' iri iri' ne, hwara' opa ac ne tara quem. ⁴⁴Cwerexi' ca e' pe nain macan' ca', main cunu pin tara. Xocori cwerexi' ca e' mami' ta' ma' iri na ne, e' pe tarain pawin cain quem, xi om ne Tamataracon Iri' Jam ta.

Je ca tomi' xuhu' ca'. Ma' ara xi' na xocori cwerexi' ca e' pe nain pawin cain, ma' na wara cwerexi' ca e' pe nain macan' ca' quem. ⁴⁵Je ca xirao' pe xine pain capijacon Iri' Jam ca'. Ca' na con: Adão cara pane, co quep cain' ca Iri' Jam pane, quep wari' ac tocwa na, to' e' ac tocwa na quem. Ma' ta ha' quem pain ca e' pe main macan' ta non. Xucun wari' co maqui' pa'ao' ma' iri na ne, wirico Cristo ma', jimao na co ma'. Jam na. Wirico co mi' napari' pain ca om pi' ra ha' ne ca e' wa ca'. Ma' ta ha' cuhu' pain ca e' to hwein pawin ta napari' quem. ⁴⁶Om ca mi' cain' capari' pain cwerexi' ca e' pe tain nain pawin cain, om na. Mi' cain' napari' pain cwerexi' ca e' pe nain macan' ca'. Aram aram mi' ac capari' tara pain cwerexi' ca e' pe tain nain pawin cain. ⁴⁷Wari' co ma' cain' pane, wirico Adão cara pane, maqui' nain macan'. Xucun wari' co maqui' pa'ao' ma' iri na ne, wirico Cristo ma', maqui' nain pawin. ⁴⁸Oro wari' co to nanain macan' ca', cwere an xiho' nonon wari' co macan' curucun cara pane. Oro wari' co to nanain pawin ma' iri nana ne, cwere an xiho' nonon wari' co maqui' nain pawin pane quem. ⁴⁹Main cwere an xiho' pin xun wari' co maqui' nain pawin pane. Win ne ca cwere an xiho' xun wari' co macan' curucun pane quem.

⁵⁰Je ca tomi' xuhu' ca' xere: Oro cwerexi' ca', pain ca ma' ne cwerexi' pain quixi' ca', om ta mama' ac nein ca taramaxicon pe ca Iri' Jam pain pawin cain. Oro cwerexi' ca cono' taxipa' ca', om ta mama' ac nein i cain. Xi cono' ra ha' wa pain i cain ta. ⁵¹Taraju wet jein ca tomi' xuhu' ca'. Tomi' hwet xuhu' pain ca coromicat nucun Iri' Jam ca om an hwet querec ca pane ira. Om paxi' tara ca cono' cono' pi' pin xi'. Ane to' jimama' to' jimama' pi' pin toton capari' Iri' Jam ne. ⁵²To' jimama' hap tarapari'. Ac ca hap ne ca xopin' xopin' ne ca tucu wa ma' tara pain ca to' jimama' hap xim capari'. On iri tara caji taracom ne, pain ca win pi' pin ne ca on nein ma', e' mami' ac caca tara co wara cono' nana ma'. Om ta cono' mami' caca. To' jimama' ac capari' tara quem. ⁵³Xi cono' taxipa' ara ne cwerexi' ca mam' quep xine pain macan' ta. Cono' taxipa' iri', cunu taxipa' iri' quem. Je ca na e' ne pain ca to' jimama' pin capari' ta. Om ac ne tara ca cono' iri', om ac ne tara ca cunu iri' quem. Ac ca horohot xun xoworicon wom cwa' tara pain ca to' jimama' toton capari', ac ca to xun xocoricon wom tara quem, ac i ma' tara pain ca to' jimama' toton capari' ca'. ⁵⁴To' jimama' iri tarain cwerexi' ca cono' taxipa' ca' ne, e' cara ac iri' tara. Om ta cono' mami' iri'. Je tara ca win hwet pin tain cain capijacon Iri' Jam ca xirao' pe xine pane. Ca' na con:

To' quiji' pin inain ca cono' wa, om ta cono' mami' wa ta.

⁵⁵Ma' tara ca to' quiji' pin mami' ac capari' ca cono' wa ra? Om na. Ma' tara ca to' em' mami' ac capari' ca hwara' opa nein ra? Om na quem.

Ac i ma' na ca xirao' pe xine con pane. ⁵⁶Cono' taxipa' iri', xi om ne ca caracat ara iri' ta. Caracat taxipa' iri' quem, xi tomi' ha' xin capiiacon Iri' Jam ca an hwet mi' capari' pain ca caracat nexi' ta. ⁵⁷Ane xiram pa' pan capari' Iri' Jam ne. Tomi' querec te xun ta. Mi' ara xi' napari' pain ca to' quiji' pin xin ca cono' wa ta. Om ta jin' mami' xin. To' witan ca' napari' pain. Xi om ca Taramaxicon nexi' Jeju Cristo co xic am pin nain ca caracat nexi' ta.

⁵⁸Je ca tomi' xuhu' pain ca tomi' querec te xuhu' ca' xere: Hwara' opa cara je. Howa cara jun Taramaxicon nexi', ta an to camain' hwein ca howa wa me. Tama' taramaja mi' jun quem, win xumu jein ca taramaja nuhu' con. Xi taxi' ara hwein i ca' ta: Taramaja mi' xun iri hun Taramaxicon nexi' ne, om ta taramaja ximama' hwe ta.

Ca mi' xuxun pain dinheiro tococwa oro co howa to nanain Jerusalém

16 Tomi' ho' xuhu' pain dinheiro ca cut mi' xun huhun oro wari' nucun Iri' Jam co to nanain Jerusalém. Ara jein ca ara je toton oro xerexi' co howa to nanain Galácia ma'. ²Je ca tomi' xuhu' ca': Pain oro xijein domingo ma', an to xo' jein dinheiro ca mi' xi' hwe. Ara ara xam' jein. Mo ta hwara' ne dinheiro ca cut hwe pain ca taramaja nuhu' ma', an to hwara' ac hwein tara. Mo ta om hwara' ne dinheiro ca cut hwe pain ca taramaja nuhu' ma', an to wijimain ac hwein tara quem. An to xo' ac hwein tara. Mo ta ara ac i ma' hwe, wara ma' turuhu' dinheiro ca mi' xi' hwe ma'. Om ac ne tara ca i'ina ne xumuhu' pain ca wajim' hap xujuhu' pain ca aram aram hwet xuhu' ta. ³Hwet iri xuhu' ne, tomi' xo' ac toton tara co tora' pan hwe ma'. Cut mi' jujun pain dinheiro oro xerexi' co to nanain Jerusalém ta toton, main ca' oro ca xirao' ne ca' quem ac toton tara. Cut mi' jujun pain, ma' ta querec pin' cucuhu' pain ca cut mi' huhun pain dinheiro ca' ac toton tara, mama' je e' ac toton tara, mama' ac caca tara quem. ⁴Mo ta param mahu' pain ca mao ta' quem, ja' ja' ac cacapa' tara.

Ca coromicat xo' nucun Paulo

⁵Mao iri tain oro xijein cidade pain macarain Macedônia ne, mo querec ac xuhu' tara pain ca aram aram mao tain cidade nuhu' ta. ⁶Am pe ho' wijimain xuhu', am pi' pin pa' capa' xowi' pahu'. Ma' ta quep xiho' mahu' pain ca mao tain ta' oro xijein cidade ca mao ta' ta' quem. ⁷Je ca om hwet ho' xuhu' ca'. Mo xi hwet ho' xuhu' pain xocori ca', na e' xirapa' pain ca pe ho' wijimain e' xuhu', tiquin' ca' hap ac xuhu' xira. Noc inain i ma' ta. Mo ta param capa' pain Taramaxicon nexi', mon to wet ho' ac xuhu' tara ta.

⁸Ac i ma' paxi' na ca wara coromicat an pe xo' ne ca'. Ane mon to wet cain' tain Éfeso ca' ne. Maqui' pa' ac capa' tara xec nein ca tomi' querec te nucucun oro wari' pain Pentecostes. ⁹Mija ara xi' nana oro wari' co param nanapa' pain ca pijim' wa pain i ca' quem. Ac ca howa xi' caca na. Mija paxi' nana co noc nanapa' pain ca pijim' wa quem, ane jain jain tamana pan cacain capijacon Iri' Jam co howa xin nana ne.

Ca tomi' xo' tococwa con Timóteo con Apolo

¹⁰Mo ta hwet cuhu' Timóteo, querec wet xo' jun pain ca pe ho' cuhu', ma' ta wa pin ne ximicon pain ca querec pin' cuhu' pain ca tomi' querec te hun ma'. Xi om ne ca taramaja mi' ara con Taramaxicon nexi' ta. Win ta' ca'. ¹¹Taraju wet jun, ta miri'om hun me ta. Paca' xim iri turuhu' ne, quep xiho' ac hun tara. Ma' ta tomi' querec te ca pain ca in hwet xim capa'. Winim' ton quem. Maqui' wi tara cocon oro xerexi' co in hwet xim nanapa' ma' quem.

¹²Tomi' hwet ho' xuhu' con coxari' Apolo cwa' quem. Mo querec roron pain Corinto ta paxi' inon pahu', ja' ja' roron oro xerexi' co mama' xin nanain Corinto paxi' inon. Tomi' mip paxi' inon pahu'. Ane noc inain capa' pain xocori ca' ne. Ha' iri tarapa' ne, hwet ac toton tara ta napa' pahu'.

Ca pi' pin ta' ne ca xirao' nucun Paulo

¹³Ma' tara xumuhu' me, hwara' opa cara je pain ca howa hun Jeju Cristo. Ac ximicon hwanana je. Hwara' opa cara je con Iri' Jam. ¹⁴Oro carawa ca ara xi' hwe ma', an hwet pe ac hwein tara ca om noc caracan xujuhu' pain ca ara hwein quem.

¹⁵ Taxi' huhun Estéfanos cocon oro ca nari nucun ma'. Wiricoco co howa cain' nana pain Acaia pane. Quep xiho' tamana nonon oro wari' nucun Iri' Jam pain xocori ca', win xumu tamana nonon. Je ca tomi' mip xuhu' ca' xere: ¹⁶ Tomi' ha' jujun oro wari' co an xiho' nonon pain ca taramaja nucucun me. Tomi' ha' jujun oro xucucun co taramaja wi nonon quem.

¹⁷ Tomi' querec te inonon Estéfanos con Fortunato con Acaico cwa', tomi' querec te inonon pain ca maqui' nucucun. Pain ca om na cuhu' pain ca mo querec xut pum mahu' ma', mo querec xut pum pan ac cacapa' na pahu'. ¹⁸ Wa pin ac ne na xumu pain ca ja' tomi' querec te cacapa' quem. Win ne ca ja' tomi' querec te cucuhu' ma' quem. Querec pin' jujun oro wari' co an xiho' nonon pain ca taramaja nucucun ta.

¹⁹ Tomi' nunuhu' oro xerexi' co cut in xucucun pain macarain Ásia ca'. Mam' pe wet urut pahu' ta nunuhu'.

Tomi' nuhu' Áquila cam Priscila cwa', wiricoco oro xerexi' co cut in to xucucun pain xiricacam cwa' quem. Mam' pe wet urut pahu' ta nunuhu'. Tomi' querec te tamana urut pahu' pain ca win cwere wi xun Taramaxicon nexi' ta nunuhu'.

²⁰ Tomi' tomi' pi' pin nunuhu' oro xerexi' pain i ca' quem: Mam' pe wet urut pahu' ta nunuhu'. An hwet mi' xujuhu' pain ca tomi' querec te xujuhu' ma'.

²¹ Wata' pain ca Paulo ta' ca', xirao' pan inain wuxu pain tawirinain ca xirao' ne ca', pain ca mam' pe wet inuhu' ta xuhu' ca'. ²² Oro wari' co noc nonon Taramaxicon nexi' ma', na e' na pain ca tomi' noro tococwa, to ni ca' xine ta pan totonon Iri' Jam. Param inon Taramaxicon nexi' pain ca maqui' hap ca quem!

²³ Param inon Taramaxicon nexi' Jeju pain ca xiram pa' cuhu' ma', pain ca mi' e' cuhu' pain ca param pan nucun.

²⁴ Om ca noc camain' xuhu', xi win cwere ara xijexi' con Cristo Jeju ta. Amém, iri'o' na ca xirao' ne ta.

Je i ca' ca xirao' ne ca'.

2 Coríntios

*Ca xirao' mi' mami' tococwa co
howa nonon Jeju pain Corinto*

1 Paulo ina pain ca xirao' mi' xuhu' ca'. Apóstolo ra napa' Cristo Jeju pane, pain ca tomi' hwet roron pain capiija oro wari' capa' pane. Xi om ne ca wirico ara ca Iri' Jam co param mi' napa' pain ta. Wata', wirico coxari' Timóteo cwa', ac i ca' urut pain ca xirao' mi' urut pahu' ca'.

Xirao' mi' urut pahu' pain ca cut in xujuhu' pain Corinto ma', pain ca howa hun Iri' Jam ma'. Xirao' mi' xirao' mi' pi' pin urut cocon oro wari' nucun Iri' Jam co to nanain oro xijein macan' pain Acaia ma' quem.

²Param urut con Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param urut cocon pain ca mi' cucuhu' pain ca om toron ne xumuhu' quem.

Ca wirico Iri' Jam co to' hwara' opa napari' pain ximixi' ta tococwa

³Tomi' hwet xin ca awi tamana nucun Iri' Jam co Te ca Taramaxicon nexi' Jeju Cristo ta. Xiram pa' tamana napari', to' hwara' opa napari' pain ximixi' quem. ⁴To' i'ina iri napari' oro carawa ne, to' hwara' opa ac capari' na pain ximixi'. Ma' ta to' hwara' opa to' hwara' opa tiquin' huhun oro xucucun wari' co ma' nonon oro ca to' i'ina nonon quem napari'. Win ne ca to' hwara' opa pan xuhu' ca' napari' quem. ⁵Je ca tomi' urut pahu' ca'. Jain jain tamana ara xi' urut pain oro ca to' i'ina caparut ca', ac ca jain jain wi urut con na Cristo ma', xi om ne ca win cwere ara urut con ta. To' hwara' opa tamana naparut pain xumuxut ca' quem, mam' to' hwara' opa naparut con Cristo. ⁶Jain jain iri urut ne, to' hwara' opa pan ac xihwe na pain xumuhu' ma', witan ac hwe na, e' cara ac hwe tara quem. Ac i ma' na pain ca to' hwara' opa caparut pain xumuxut Iri' Jam quem. To' hwara' opa iri naparut ne, to' hwara' opa ac cuhu' na quem, mi' ac cuhu' na pain ca quereme hwein oro ca to' i'ina nuhu' ma' quem. Oro ca jain jain nuhu' ma', an xiho' ara xi' nain oro ca jain jain nuxut ca' quem. ⁷Taxi' urut pahu' pain ca quereme cara xin hwein oro ca to' i'ina nuhu' quem, xi taxi' ara

urut pain i ca' quem: Jain jain iri hwe ne, to' hwara' opa ac cuhu' na pain xumuhu' Iri' Jam. Win urut pain ca jain jain urut ca'. To' hwara' opa ac caparut na pain xumuxut ca' quem.

⁸Tomi' hwet xim urut pahu' pain i ca' quem xere. To' i'ina tamana nanaparut oro co to nanain macarain Ásia pane. Jain jain tamana urut cocon, ximin tamana urut cocon pane. Om ta witan ca' ac xuxun ta urut cocon ira, to' parapa' pin xim nanaparut ira. ⁹Ac i ma' ara xi' na ca coromicat nuxut cocon, to' parapa' pin xim tatarapari' xi' ma urut cocon. Ane ximin e' urut cocon ne, ma' ta om howa pan xujuhu' pain ca witan ca' xuxun ta hwe ma' naparut Iri' Jam, ma' ta howa pan mahu' ta naparut quem. Xi wirico ara ca co to' e' mami' nonon oro co cono' nana ta. ¹⁰To' witan ca' naparut cocon quem. To' witan cara ca' taraparut cocon oro co to' parapa' pin xim nanaparut. Howa pan urut con Iri' Jam ta, taxi' urut con pain ca to' witan cara xim caparut ca'. ¹¹Na e' na pain ca quep xiho' maparut quem. Tomi' mi' xut con Iri' Jam me. Mija ac caca tara co tomi' querec te nonon Iri' Jam parut, tomi' querec te totoron pain ca quep xiho' caparut ca', je pain ca ha' cocon pain ca tomi' mi' caparut con quem.

Ca tomi' xo' cocon Paulo pain ca om hwet ho' xuhu' ta cocon pane

¹²Tomi' querec te urut, xi om ne ca taxi' ara xujuxut pain ca tomi' iri'o' urut ta. Xuruxut xo' urut cocon oro wari'. Xuruxut xo' pan urut pahu' quem, om ca tomi' mixein camain' urut pahu'. Wirico Iri' Jam co mi' naparut pain ca xuruxut xo' nuxut, wirico co mi' naparut pain ca tomi' iri'o' nuxut quem. Om ca maqui' nein ca coromicat nein ca wari' wa, om na. Wirico Iri' Jam pan na co mi' naparut pain ca xuruxut xo' nuxut, xi xiram pa' ara caparut ta. ¹³Je ca tomi' xuhu' ca'. Oro ca xirao' mi' urut pahu', om ca i'ina noro hwein, om ca i'ina taraju pa' hwein quem. Param inuhu' ¹⁴pain ca querec pin' maparut pain ca xuruxut xo' nuxut ca'. Taxi' paxi' inuhu' pain ca querec pin' wijimain e' maparut pain ca xuruxut xo' nuxut pane. Ame hwe e', main maqui' tara xec nein ca ha' pin xim cuhu' pain ca querec pin' iri'o' maparut pain ca xuruxut xo' nuxut ca'. Win ne ca tomi' querec te tamana xim urut pahu' pain xec nein ca in qui' ta' nucun Taramaxicon nexi' Jeju quem.

¹⁵⁻¹⁶Taxi' inuhu' pain ca tomi' querec te maparut ma'. Je ca mo querec xim xuhu' pane. Ca' paxi' na ca coromicat ne ira: Mao tain macarain

Macedônia iri ta' ne, hwet ac xuhu' tara, quep xiho' ac xuhu' tara pain ca pe ho' wijimain xuhu'. Paca' ac xuhu' tara, mao ac tain tara Macedônia cain. In ca' iri tain ne, in hwet iri xuhu' ne, quep xiho' mami' ac xuhu' tara. In hwet iri xuhu' ne, quep xiho' ac mahu' tara pain ca mao tain ta' pain Judeia quem. Ac i ma' paxi' na ca coromicat ne ira. ¹⁷ Ane om hwet xuhu' ne. Cain' ca coromicat mi' mahu' quem? Tomi' ximao na pain ca hwet xim capari', ac i ma' tara ca coromicat mi' mahu' ra? Am coromicat mi' ca' mahu' quem, an xiho' nain ca wari' wa ca coromicat ximao ma', pain ca tomi' pe cain capijacon ma', pain ca an in an in cain ca coromicat pe nucun, ac i ma' tara ca coromicat mi' mahu' ra?

¹⁸ Ane om tomi' ximao xuhu' ne. Tomi' iri'o' urut pahu'. Win ne ca tomi' iri'o' taxipa' ca Iri' Jam cwa'. Om ca an in an in urut pain ca tomi' urut pahu' quem. ¹⁹ Tomi' iri'o' taxipa' na Panxica Iri' Jam ma', wirico Jeju Cristo co pijim' hwet mi' xuhu' cwa', co pijim' hwet mi' cuhu' Silvano con Timóteo cwa' quem. Om ca an in camain' cain ca tomi' pe nucun Jeju Cristo pane. Ara taxipa' nain oro ca tomi' pe nucun, ac i ma' taxipa' urut quem. ²⁰ Xi wirico Jeju Cristo ara ca co ara nain oro ca wara tomi' pe nucun Iri' Jam ta. Je ca tomi' ca' urut pahu' ca': Amém, iri'o' na ca tomi' nuxut ta urut pahu' pain ca an hwet pe urut pain ca awi tamana nucun Iri' Jam. ²¹ Je ca tomi' xuhu' ca'. Wirico Iri' Jam co to' hwara' opa naparut pain ca win cwere urut con Cristo. Wirico co to' hwara' opa nuhu' con quem, to' hwara' opa to' hwara' opa pi' pin napari' pain ca win cwere xun Cristo. Wirico co tora' napari'. ²² Wari' ne napari' quem, ac ca xirao' capari' na pain wixicon ca', pain ca wari' ne xuhu' ta capari'. An pe mi' napari' pain Tamataracon pain ximixi' ca' quem. Je ca to' taxi' napari' pain ca aram aram mi' xim capari' pain oro ca wara tomi' pe mi' capari' quem.

²³ Je ca tomi' xuhu' ca'. Om ca in hwet querec xuhu' pain Corinto ma'. Xi noc ara xuhu' pain ca tomi' xaxa' tamana wa pain ca pan to' mami' tain tarajuhu' ta. Tomi' iri'o' ina, taxi' napa' Iri' Jam pain ca xiram pa' xuhu' pain ca tomi' xaxa' tamana nuhu' pane. ²⁴ Om ca cuc cuc urut pahu' pain ca howa xo' howa xo' je urut pahu'. Quep xiho' e' xim urut pahu'. Ma' ta tomi' querec te hwe urut pahu'. Xi wara hwara' opa ara hwe pain ca howa nuhu' ta.

2 Je ca an pe xo' ac i ca' tain ca coromicat ne pahu' pane. Om ta in hwet toton pain xocori ca', ma' ta om ja' tomi' xaxa' mami' toton ta inuhu'. ² Mo xi ja' tomi' xaxa' pan xuhu', ma' xira wari' co ja' tomi' querec te pin

napa' quem? Ha' xuru' pain ca ja' tomi' querec te pin mahu' quem? Xi wata' pan ara ne co ja' tomi' xaxa' nuhu' ta, ac i ma' na ca coromicat ne pahu' pane. ³ Je ca xirao' mi' e' xuhu' pane. Ca' na ca coromicat ne pane: Mo ta in hwet ho' toton, am ja' tomi' xaxa' cacapa' ma', ac i ma' na ca tomi' xuhu'. Ja' tomi' querec te xirarapa' na inonon ta ac xuhu' na quem. Taxi' inuhu' quem, mo ta tomi' querec te xuhu' pain ca aram aram in hwet xuhu' ma', tomi' querec te ac hwe tara quem. ⁴ Tomi' xaxa' tamana ina pain ca xirao' mi' xuhu' pane. Mija na ca toron capa' xumu, aca tamana ina pahu'. Om paxi' na ca ja' tomi' xaxa' xim xuhu' pain ca xirao' ne pane ira. Param e' inuhu' pain ca querec pin' mahu' pain ca om noc camain' xuhu' ta.

Ca mana' mana' om pin jun pain ca caracat nucun co tomi' taparam' nuhu' ta tococwa

⁵ Win ma' nuhu' co caracat ma' iri na ne, om ca ja' tomi' xaxa' e' capa', om na. Ja' tomi' xaxa' ja' tomi' xaxa' pi' pin nuhu' quem. Ac je paxi' na, ac ca ja' tomi' xaxa' ja' tomi' xaxa' pi' pin cuhu' na. ⁶ Xam' paxi' hwe pain ca tomi' mi' hun pain ca wap wa pane, pain ca xin hwet pin hun pane. Awi na, an hwet mi' ho' jun pain ca om noc hun ma'. ⁷ Je ca tomi' xuhu' ca'. Na e' na pain ca mana' mana' om pin hun pain ca caracat nucun pain xocori ca'. To' hwara' opa pin jun pain ximicon. Ma' ta om naro pin ca pain ca tomi' xaxa' tamana nucun. Ma' ta om tomi' xaxa' tomi' xaxa' an pe pin ton Iri' Jam ta ca ma' quem. ⁸ Je ca tomi' mip xuhu' ca'. Tomi' xo' jun, an hwet pe mi' jun pain ca om noc hun ma'. ⁹ Je ca xirao' mi' xuhu' pain cara pane, pain ca xo' hu qui' xuhu' con pane. Ma' ta querec pin' xuhu' ta inuhu'. Am tomi' ha' hwein oro ca hu qui' xuhu' pane inuhu' ira. ¹⁰ Je ca tomi' xuhu' ca'. Mana' mana' om pin iri hun pain ca caracat nucun win ma' nuhu' ma' ne, mana' mana' om pin ac ton na quem. Ara cup iri napa' ne, mana' mana' om pin ac ton na pain carawa ca ara mi' capa' quem. Tomi' iri'o' ina, taxi' napa' Cristo, mana' mana' om pin inon pain, xi param ara xuhu' pain ca tomi' querec te caracan xujuhu' ta inuhu'. ¹¹ Je ca na e' ne pain ca mana' mana' om pin xun pain ca caracat nucun ma', ma' ta om mixein capari' Satanás. Querec pin' ara xi' urun pain oro ca param ximao nucun pari'.

2.9 Tomi' mi' nain ca xirao' mi' tococwa pain 1 Coríntios pain cara pane. **2.11** Satanás na xijein wixicon Caxicon Jam. **2.11** Cain' ca param ximao ca Caxicon Jam pari' quem? Joc camara' pin xim napari', tama' caracat je caracat je napari' ta.

Ca toron ne ximicon Paulo pain ca winim' pe con Tito pain Trôade

¹² Wa' mao iri inain macarain Trôade ne, pijim' tain capijacon Iri' Jam con Cristo ta ac ta' na. Wara meo nain ximicocon oro wari' Taramaxicon nexi' quem. Param tamana nanain ca taraju wa capijacon Iri' Jam. ¹³ Param paxi' nanain ca taraju wa, ane toron capa' xumu con coxari' Tito ne. Xi mam' ton pain i cain ta. Je ca mao ta' ina ta toton pane, maqui' ac tain na macarain Macedônia ca'.

¹⁴ Ane tomi' querec te ton Iri' Jam ne. Ac ca tama' o mama' caparut na pain ca ja' ja' urut con ca', pain ca win cwere urut con Cristo cwa'. Wirico co mi' naparut pain ca an hwet pe urut pain ca hwara' opa nucun ma', pain ca pijim' hwet urut cocon oro wari' con Cristo cwa'. Ac ca hu xain ne na ca pijim' nuxut quem, hu xain hu xain pi' pin tata oro wari' pain ca to' querec pin' tococwa con Cristo. ¹⁵ Xi an xiho' ara urut pain caji towaxi' ca hu xain tamana con Cristo ta, ac i ma' na ca coromicat mi' capari' Iri' Jam. Pijim' iri irin capijacon con Cristo ma' ne, ac ca nac cacain na oro wari'. Nac nanain co witan pin nana, nac nanain co pan' ara'am xi' nana quem. ¹⁶ Nac iri nanain ca pijim' nuxut oro co pan' ara'am xi' nana ne, ac ca cunu ne na ca pijim' nuxut cocon, ac ca to' parapa' pin urut cocon na quem. Ane om ac i ma' ne cocon co witan xi' nana ma' quem. Ac ca hu xain urut cocon na, ac ca to' e' urut cocon na quem. Wa ina me. I'ina tamana na ca taramaja nuxut pain ca pijim' urut pain capijacon Iri' Jam con Cristo ta. Ma' na ca ara ac urut pain ca taramaja nuxut ra? ¹⁷ Ane om an xiho' urut cocon oro co om pijim' xo' nana ma' ne. Mija ara xi' nana co pijim' pan teretem nana ma', ac ca vender xin cacain na capijacon Iri' Jam pain ca caramaju xixi' na caca ma'. Om ca an xiho' urut cocon quem. Xi pijim' jein capija ta ara caparut Iri' Jam ta. Taxi' naparut pain ca pijim' xo' nuxut quem. Wirico Cristo co mi' naparut pain ca pijim' nuxut ta.

3 Tomi' querec xim urut pahu' pain i ca' quem: Cain' ca coromicat mi' maparut pain ca pijim' xo' urut ta urut pahu' quem? Tomi' xec xec mami' nanapari' xi' ma maparut ra, ac i ma' na ca coromicat mi' maparut ra? Cain' cain' xira quem? Na e' na pain ca an hwet pe mi' urut pahu' pain ca xirao' nucucun oro win ma' nuxut ca to' querec pin' nuhu' pain ca pijim' xo' nuxut ra? Na e' na pain ca an hwet pe mi' urut cocon pain ca xirao' nuhu' ca to' querec pin' nonon oro xucucun wari' pain ca pijim' xo' nuxut ra? Win caca oro xucucun co pijim' mama' nanain oro xijein macan' ma',

ac i ma' na ca coromicat mi' maparut ra? Om na ta! ²Xi wahu' pan ara ne co to' querec pin' nonon oro wari' pain ca pijim' xo' nuxut ta. Ac ca xirao' to xihwe na pain xumuxut ca' quem. Querec iri nunuhu' oro wari' ne, querec pin' ac cucuhu' na pain ca xuruxut xo' nuhu' ma', querec pin' ac cacaparut na pain ca pijim' xo' nuxut ca' quem. ³Howa pin iri hwein capijacon Iri' Jam ca pijim' hwet urut pahu' pane ne, ac ca xirao' nucun Cristo hwe na pain ca howa pin hwein capijacon Iri' Jam ca pijim' hwet urut pahu' pane. Wirico pan co xirao' nain pahu', ac je na. Ane om mam' xirao' cain pain iri' ca mam' xirao' wa ne, om na. Mam' xirao' nain pain Tamataracon ca e' cara ma'. Om ca xirao' pe ca pain pacun quem. Xirao' pe na pain iri' xumuhu' ma' ta.

⁴Coromicat mi' ac i ma' urut pahu', xi om ne ca taxi' ara urut con Iri' Jam pain ca querec hohot caparut pain ca pijim' urut pain capijacon. Wirico Cristo co to' taxi' naparut con. ⁵Warut pain ca apóstolo urut ca', om ca meo taxi' urut pain ximicon wari'. Ca taramaja nuxut ca', om ca maqui' pan nein ca coromicat nuxut. Wirico pan na Iri' Jam co mi' naparut pain. ⁶Wirico co mi' naparut pain ca taramaja mi' taxi' urut con ca', pain ca pijim' hwet taxi' urut pain xocori ca tomi' an pe xo' nucun. Xocori ca tomi' an pe xo' nucun ca', om ca maqui' nein ca xirao' nucun Moisés cara pane, om na. Maqui' nain Tamataracon Iri' Jam. Mo xi win xumu e' xin ca xirao' nucun Moisés ma', mama' ac xin xira cote ne xe, xi tomi' ha' taxi' iri' ta. Ane to' e' capari' Tamataracon Iri' Jam ne.

Ca hwara' opa tamana pan ne xocori ca tomi' an pe xo' nucun Iri' Jam

⁷Tomi' xin ca wara tomi' xo' nucun Iri' Jam pane, ca xirao' pe xine pain pacun pane. Om ca to' witan ac tococwa oro wari' co tomi' ha' xin paxi' nanain ma', xi tomi' ha' taxi' cacain ta. To' cono' pin tata. Ac i ma' paxi' na cocon, ane awi pan ne ca wara tomi' xo' nucun pane ne. Hwara' opa na quem. Tomi' xo' mi' iri non pain Moisés Iri' Jam pane ne, toc meremem pan ac ca na pain ca hwara' opa nucun. Toha mi' non Moisés, toc meremem pan ac ne na tocon quem. Om paxi' na ca toc meremem cara ne con Iri' Jam pane. Ane om ha' cocon ca noro cacain tocon oro wari' nein Israel quem ne. ⁸Je ca tomi' xuhu' ca', pain xocori ca tomi' xo' nucun Iri' Jam ma', pain ca taramaja pe ho' pin cain ximixi' Tamataracon ca'. Om ca hwara' opa tiquin' ca' nein ca wara tomi' xo' nucun ra? Hwara'

opa tiquin' ca' nein ma' ira! ⁹Hwara' opa paxi' na ca wara tomi' xo' nucun Iri' Jam ca tomi' em' nonon co om tomi' ha' nanain ma'. Awi paxi' na. Ane hwara' opa tamana pan ne xocori ca tomi' xo' nucun ca to' hohot pin napari' ca' ne. ¹⁰Hwara' opa paxi' na ca wara tomi' xo' nucun Iri' Jam pane, ane tiquin' mao ne ca hwara' opa nein xocori ca tomi' xo' nucun ne. Ac ca om hwara' opa mami' ne na ca wara tomi' xo' nucun ca'. ¹¹Je ca tomi' xuhu' ca'. Hwara' opa paxi' na ca wara tomi' xo' nucun Iri' Jam pane, aram aram om pin ac ne na ca hwara' opa nein. Ane hwara' opa tiquin' mao ne xocori ca tomi' xo' nucun ne. Om ta pi' ra ha' ne quem.

¹²Je ca tomi' xuhu' ca'. Taxi' urut pain ca om pi' ra ha' ne xocori ca tomi' xo' nucun Iri' Jam pain ca to' witan pin xim capari' ca'. Je ca om pijim' jin' urut pain. Om ca joc xim urut pain, pijim' hwara' opa urut pain. ¹³Om ca an xiho' urut con Moisés cara pane, pain ca mam' tatep pa' cain tocon con wom pane. Ma' ta om querec cacain ca toc meremem toc meremem om pin ne tucu ca' na ca coromicat nucun cocon oro wari' nein Israel pane. ¹⁴Ane ari caca ne. Om ca taraju pa' je ha' caca. Ac i ma' ac i ma' wet nana pain xocori ca' quem. Noro iri nanain capijacon Iri' Jam ca wara tomi' an pe xo' mi' tococwa ne, om ca taraju pa' cacain. Ac ca tatep pa' xine na ca coromicat nucucun. Xi taraju pa' xica' to ara caca co win cwere pin nonon Cristo ta. ¹⁵Ac i ma' ac i ma' wet ara xi' nana pain xocori ca' quem. Noro iri nanain ca xirao' nucun Moisés ne, om om wet na ca taraju pa' caca ma'. Xi howa cocon Taramaxicon nexi' ta. ¹⁶Je ca tomi' xuhu' ca'. Wari' co howa pin non Taramaxicon nexi' ma', taraju pa' pin ac ca na quem. ¹⁷Je ca tomi' xuhu' ca'. Taramaxicon nexi' cwa', wirico co Tamataracon Iri' Jam ma'. Pe ho' iri napari' Tamataracon Taramaxicon nexi' cwa' ne, ha' ac capari' na pain ca witan ca' xin ca xirao' nucun Moisés. ¹⁸Taraju pa' taraju pa' pi' pin irin xocori ca tomi' xo' nucun Iri' Jam quem. Ac ca hot ca' capari' na con wom co tatep pa' nain tocoxi' Taramaxicon nexi' cwa', ac ca toha pan iri' na pain ca toha mi' capari' pain ca awi tamana nucun quem. Je ca ha' capari' pain ca taraju pa' wa. Ca to' jimama' ac capari' na, ca to' jimama' ac capari' na, aram aram an xiho' pin ac xun tara quem. Wirico Taramaxicon nexi' ma', co iri' Tamataracon Iri' Jam ma', wirico co ara mi' napari' pain.

Ca quereme cacain oro ca to' i'ina wa pain ca taramaja mi' cocon Iri' Jam

4 Wirico Iri' Jam co xiram pa' naparut pain ca mi' caparut pain ca taramaja mi' urut con ca'. Je ca om naro urut ca'. ²Pain ca taramaja mi' urut con ca', noc urut pain oro ca ara joc xim xine ca pan teretem wa ma', ca to' wixipa' ma'. Om ca pijim' mixein urut pain capiiacon Iri' Jam, om ca tomi' ni ca' urut pain ca tomi' mao nein quem, om na. Pijim' iri'o' e' urut pain, ma' ta taraju pa' caca oro wari' ta urut. Querec pin' xut pain ca pijim' iri'o' nuxut ca' urut cocon. Taxi' naparut Iri' Jam pain ca taramaja ac i ma' urut quem. ³Ma' paxi' nana oro wari' co om taraju pa' nanain capiiacon Iri' Jam ca pijim' urut ca'. Co pan' ara'am xi' nana ma', wiricoco nana co om taraju pa' nanain. ⁴Wirico Caxicon Jam co ac Iri' Jam nonon oro co om howa nonon Cristo ma', wirico co to' i'ina nonon pain ca coromicat xo' nucucun. Ac ca to' om pin cain na tococon pain ca om coromicat nucucun. Ma' ta om taraju pa' hwe ta nonon. Ma' ta om querec pin' hwein naran nein capiiacon Iri' Jam ca an hwet pe nain ca toc meremem nucun Cristo pain ca hwara' opa tamana nucun ma' nonon. Wirico Cristo ara xi' na co an tan pan non Iri' Jam ma', iri' wirico na. ⁵Om ca pijim' urut pahu', ma' ta tomi' ha' maparut ta urut pahu', om na. Pijim' urut pahu', ma' ta tomi' ha' hun Jeju Cristo co Taramaxicon ne iri' cwa' urut pahu'. Warut iri na ne, taramaja mi' e' urut pahu' pain ca pijim' urut pahu' ca', xi ma' ara caparut Jeju co tomi' ha' urut ta. ⁶Xi toha mi' ara caparut pain iri' xumuxut Iri' Jam ta. Win ca pain ca xo' tomi' qui' cain ca jitacat nein xim pain ca toha pin ra ta qui' cain xec pain cara pane. Ac i ma' naparut quem, ac ca toha mi' caparut na pain ca toc meremem nucun pain xumuxut pain ca coromicat nuxut. Ma' ta querec pin' hwein ca hwara' opa ne ca toc meremem pe nain tocon Cristo ta naparut.

⁷Je ca tomi' xuhu' ca'. Querec pin' paxi' urut pain ca hwara' opa nucun Iri' Jam cwa', ane om hwara' opa pan urut ne. Ac tapaxi' e' urut. Ac ca an ho' pe mi' caparut na pain carawa ca awi tamana ca', pain ca mi' caparut pain ca querec pin' urut con pain ca hwara' opa nucun. Ma' ta querec pin' xihwe pain ca om maqui' pan cuhu' ca hwara' opa tamana ne ta naparut.

4.6 Tomi' ac i ma' na Iri' Jam pain cara pane, pain ca xo' tomi' ma' ten qui' cain oro carawa pain cara pane. **4.7** Tomi' mi' iri nanain tapaxi' ma' ne, tomi' joc mam' mi' ac cacain ca om hwara' opa pan nucucun. Win ne tapaxi' ca pa hot hap ma', ac i ma' urut pain ca om hwara' opa pan urut ca' nana.

Ma' ta querec pin' cacapa' oro wari' pain ca maqui' pan capa' ca hwara' opa tamana ne pain ca taramaja mi' mahu' ta naparut quem. ⁸ Jain jain paxi' urut pain oro ca to' i'ina naparut ca', ane om to' quiiji' pin caparut ne. I'ina paxi' na xumuxut pain ca cain' cain' xixi' ne urut ca', ane om naro urut ne. ⁹ Ma' paxi' nana oro wari' co quep em' nanaparut, ane om ximin urut ne. To' quiiji' paxi' nanaparut, ane om to' parapa' pin cacaparut ne. ¹⁰ Tama' jain jain urut pain ca to' parapa' pin xim cacaparut oro wari' co noc nanaparut ma'. Win ca Jeju pain ca jain jain ca pain ca to' pa' pin tocwa pane, ac i ma' na ca tama' jain jain urut quem. Ma' ta querec pin' tocwa Jeju pain ca e' pe ho' caparut pain curuxut ta. ¹¹ Je ca tomi' xuhu' ca'. E' paxi' urut, ane tama' jain jain urut pain ca to' parapa' pin xim cacaparut ne. Xi om ne ca taramaja mi' ara urut con Jeju cwa'. Ma' ta querec pin' tocwa pain ca e' pe ho' caparut pain curuxut pain ca aram aram cono' xi' urut ta. ¹² Je ca cono' xi' paxi' urut pain ca to' i'ina cacaparut oro wari' pain ca taramaja mi' xun Iri' Jam pahu' ta. Je i ma' ira urut, xi om ne ca e' cara pan ara hwe ta urut pahu' pain ca pijim' mi' xuhu' pain.

¹³ Ma' na ca xirao' pe xine pain capijacon Iri' Jam: Howa inon Iri' Jam, je ca tomi' ta' ca', ac i ma' na ca xirao' pe nein. Ac i ma' urut quem, howa ac i ma' urut con Iri' Jam, je ca tomi' urut quem. ¹⁴ Xi taxi' ara urut con Iri' Jam pain ca to' e' mami' con Taramaxicon nexi' Jeju pane. To' e' mami' taraparut quem, xi om ne ca win cwere ara urut con Jeju ta. Cut mama' ac caparut tara. Warut, wahu' tara quem, cut mama' ac capari' tara, to ho' xine pain ca pe pan ta' ca' ac capari' tara quem. ¹⁵ Quereme urut pain oro ca jain jain wa pain ca pijim' urut pain capijacon Iri' Jam cwa'. Ma' ta quep xiho' xim urut pahu', ma' ta querec pin' tocwa Iri' Jam pain ca awi tamana nucun urut quem. Mija mija tiquin' iri tatara oro wari' co howa pin nonon ne, pain ca xiram pa' e' tococwa pain ca to' witan pin xun tococwa ma', tomi' querec te tamana ac cocon tara, an hwet pe ac cacain tara ca awi tamana nucun quem.

¹⁶ Je ca om naro urut ca'. Om paxi' na ca hwara' opa mami' ne curuxut ca', ane to' hwara' opa pan caparut pain xumuxut Iri' Jam ne. To' hwara' opa to' hwara' opa tiquin' naparut pain oro xijein xec quem. ¹⁷ Jain jain paxi' urut, ane to' hwara' opa caparut oro ca jain jain nuxut ne, xi winim' ara urut pain ca awi tamana wa ca mi' xim caparut Iri' Jam ta. Awi tamana tara, om ta pi' ra ha' ne quem. Awi tiquin' ca' tarain oro ca jain jain wijimain nuxut pain macan' ca'. ¹⁸ Je ca tomi' xuhu' ca'. Om ca win

xumu urut pain oro ca querec urut ca'. Win xumu e' urut pain oro ca om querec urut. Xi pi' pin hap ne oro ca querec urut ta. Oro ca om querec urut ca' iri na ne, to wet cara na ta.

5 Taxi' ara xi' irin i ca' quem: Em' pin iri tara cwerexi' ca an xiho' nain caji xirim ca to ximama' e' iri' pain ca e' e' wet nexi' ca' ne, cono' pin iri xi' ne, mi' ac capari' tara pain xocori cwerexi' Iri' Jam quem. Ac iri' xirim tara xocori cwerexi' pain pawin cain. Om ta quep cain wari', wirico Iri' Jam tara co quep pan tain nain. To wet cara tara quem, om ta pi' ra ha' ne ta. ²Pain ca e' e' wet iri' pain macan' ca', wa ina me ac iri' na pain ca jain jain ne ximixi' pain ca param xin xocori cwerexi' ca mi' xim capari' pain pawin cain. ³Mi' iri tarapari' pain xocori cwerexi' ne, om ta hwet pe e' ne tamataraxi'. ⁴Xi jain jain tamana ara ne ximixi' pain ca e' e' wet iri' pain macan' ta. Jain jain iri', wa ina me iri' pain ca to' i'ina capari' oro carawa ca'. Om paxi' na ca mi' pin ne cwerexi', ane jain jain e' irin xocori cwerexi' ca mi' xim capari' Iri' jam pain pawin cain. Ma' ta e' cara xi' iri' ta. ⁵Wirico Iri' Jam co coromicat an to xo' napari' pain ca mi' xim capari' pain xocori cwerexi' ca'. Mi' napari' pain Tamataracon quem. Ma' ta taxi' pin mahu' pain ca ara tain ta' oro ca wara tomi' pe mi' xuhu' ta napari'.

⁶Je ca tama' hwara' opa urut pain ca howa nuxut ca'. Om ca hehe camain' urut. Taxi' ara xi' urut pain i ca' quem, pain ca e' e' wet urut pain macan' ca' quem. Om ca to ho' querec urut con Taramaxicon nexi'. ⁷Ane om tara con ta'a camain' urut con pain ca e' nexi' ne. Om paxi' na ca querec urut con, ane howa urut con ne. Main mi' tarapari' pain oro ca tomi' pe mi' capari'. ⁸Je ca tomi' xuhu' ca'. Hwara' opa urut pain ca howa xin ca mi' xim capari' xocori cwerexi' ca om pi' ra ha' ne ta. Hohot paxi' xira pain ca paca' urut pain cwerexi' pain macan' ca', ma' ta to ho' cara pin xun Taramaxicon nexi' ta urut. ⁹Je ca win xumu e' urut con pain ca hohot xuxun na urut con ca'. Mo ta e' e' wet urut, mo ta cono' pin urut, win xumu e' urut con pain ca hohot xuxun na urut con quem. ¹⁰Xi na e' ara ne pain ca main coco' quima hwet xun Cristo ta. Coco' quima hwet coco' quima hwet pi' pin xun, tomi' xo' ac capari' tara pain oro ca ara iri' pain ca e' e' wet nexi' ca'. Mi' mi' xam' ac capari' tara pain oro carawa ca taramaja mi' iri' ca'. Wari' co ara nain oro ca awi wa, mi' ac tocwa tara pain ca awi wa. Wari' co ara nain oro ca om awi wa ma' iri tara ne, mi' ac tocwa tara pain ca om awi wa quem.

Ca taxipa' pin xun Iri' Jam, taxipa' pin ac capari' na quem

¹¹ Je ca tomi' xuhu' ca'. Taxi' urut con Taramaxicon nexi' pain ca na e' ne pain ca in ac tocwa pain ca tomi' ha' tocwa ca'. Xi om ne ca tomi' querec xim capari' pain oro ca wara ara nexi'. Je ca tomi' mip urut cocon oro wari' cwa', pain ca howa jun Cristo taxipa' urut cocon ca'. Querec pin' naparut Iri' Jam, querec pin' naparut pain ca coromicat xo' nuxut pain ca howa xirara na urut cocon oro wari' cwa'. Param urut pahu' pain ca querec pin' maparut pain iri' xumuhu' ma' quem, querec pin' xiraparut pain ca coromicat xo' nuxut na urut pahu'. ¹² Om ca tomi' xec xec urut pahu' pain ca warut co pijim' xo' nana cwa' urut pahu', om na. Tomi' hwet e' urut pahu' pain ca coromicat nuxut ca', ma' ta ha' cuhu' pain ca tomi' querec te maparut pain ca coromicat xo' nuxut ca'. Ma' ta tomi' in pin taxi' huhun oro wari' co xin to e' nana pain oro ca ara nucucun ma', co om coromicat xo' nana pain iri' ximicocon ma' quem. ¹³ Am coromicat mi' ca' cacaparut wari' ma', pain ca tamanain nana ta cacaparut ma'. Je i ma' ira, xi param ara urut con Iri' Jam pain ca in ac tocwa ta. Mo ta om tamanain hwe ta maparut, je i ma' ira, xi param ara urut pahu' pain ca quep xiho' xihwe quem. ¹⁴ Ac ca cuc cuc caparut na Cristo cwa', pain ca pijim' xixi' na urut ca', xi querec pin' ara urut con pain ca om noc tamana capari' ta. Taxi' urut con pain ca mi' pin caho' capari'. Xica' pe xat paxi' na, ane mi' pin caho' mi' pin caho' xam' capari' ne. Je ca ac ca cono' cono' pi' pin iri' ne quem. ¹⁵ Mi' pin caho' mi' pin caho' xam' napari', ma' ta om mam' ara e' hwein ca param pan nuhu' pain xocori ca e' nuhu' ma' napari'. Ma' ta ara e' hwein ca param pan nucun co ma' co mi' pin caho' nuhu' ma', co e' mami' ma' quem napari'.

¹⁶ Je ca coromicat jimama' pin urut ca'. Om ca noro mami' urut pain oro ca ara caca oro wari' pain xocori ca', om ca an xiho' urut cocon wari' co tocojin' e' nonon oro win ma' caca pain xocori ca', om na. Xi coromicat ac i ma' ara ne ca wari' wa ta. Coromicat mi' ac i ma' paxi' urut con Cristo pane, wari' tara ma' urut con pain cara pane, an xiho' tarapari' xi' ma urut con pain cara pane. Ane om coromicat mi' ac i ma' mami' urut con pain xocori ca' ne. ¹⁷ Je ca tomi' xuhu' ca'. Pain ca win cwere pin xun Cristo cwa', xocoricon wari' pin iri'. Om pin na wara cwerexi' ca xuruxut pan teretem pain cara pane. Ma' pin na xocori cwerexi' ca xuruxut xo' pin pain xocori ca' quem. ¹⁸ Wirico Iri' Jam co to' xocoricon wari' pin napari' cwa'.

Wirico co taxipa' pin xijexi' ta napari', xi om ne ca mi' pin caho' ara capari' Cristo ta. Mi' naparut pain ca taramaja nuxut ca' quem, pain ca tomi' xo' jujun oro wari', ma' ta wari' ne toton, je pain ca taxipa' pin cacapa' ta naparut. ¹⁹Je ca pijim' urut ca'. Wirico Iri' Jam pan co taxipa' pin xijexi' ta napari', xi om ca Cristo co mi' pin caho' napari' ta. Om ca mam' pe wet mami' cain ca caracat nexi'. Je ca pijim' je caparut quem. Ma' ta wari' ne pin toton oro wari' ta naparut. ²⁰Je ca tomi' hwet jujun pain capija oro wari' ta caparut Cristo cwa'. Ac ca mam' tomi' caparut na Iri' Jam cwa', pain ca tomi' mip urut pahu' ca'. Ac ca tomi' mip pan cuhu' na Cristo pain ca tomi' urut pahu' ca'. Ha' jun Iri' Jam pain ca taxipa' xijexi' ta cuhu' ta. ²¹Om paxi' na ca caracat ca Cristo pane, ane cut mi' pan con pain ca caracat nexi' Iri' Jam ne. Ac wari' co caracat pin ma ta non pari'. Ma' ta to' hohot pin xuhu' ta napari'. Win cwere iri jun Cristo ne, querec hohot ac xuhu' tara, ac ca om caracat camain' hwe tara con ta napari' quem.

6 Je ca tomi' mip urut pahu' pain ca taramaja wi urut con Iri' Jam cwa'. Xin ne cara jun pain ca xiram pa' xuhu' ta cuhu' ma'. Ma' ta om werem pa' ne capijacon pahu' ta urut pahu'. ²Xi ma' ara ne ca xirao' pe xine ca tomi' nucun Iri' Jam ta. Ca' na con:

Maqui' iri napa' xec nein ca xiram pa' xim xim ne,
ha' ac xim na pain ca tomi' mapa' ma'.

Maqui' iri napa' xec nein ca to' witan xim xim ne,
quep xiho' ac xim na quem,

ac i ma' na ca xirao' pe xine ca tomi' nucun Iri' Jam pane. Je ca tomi' xuhu' ca'. Taraju wet je e'. Maqui' pin na xec nein ca xiram pa' pin xim capari' Iri' Jam ca'. Maqui' pin na xec nein ca to' witan pin xim capari' quem.

³Ara xite xujuxut pain oro ca xuruxut nuxut ca', ma' ta om tomi' em' cacain capijacon Iri' Jam ca pijim' hwet urut cocon. Ma' ta om tomi' in pin cacaparut pain ca pijim' hwet urut pain capijacon Iri' Jam ta urut quem. ⁴Je ca an hwet pe urut pain ca xuruxut xo' nuxut pain oro ca ara naparut pain ca taramaja mi' urut con Iri' Jam cwa'. Ca' na: Howa cara urut pain oro ca to' i'ina naparut ca'. Jain jain urut, ximin urut pain ca to' i'ina caparut oro carawa, tomi' xaxa' urut quem. ⁵Ma' nana co to' nanaparut ma', ma' nana co tao' to nanaparut, ma' nana co teretem nana, quep em' quep em' ac cacaparut na quem. Taramaja tamana urut, ma' na xim ca om pi'am xo' urut, pe' tamana urut quem. ⁶Ca' ac urut na pain ca an hwet pe urut pain ca xuruxut xo' nuxut ca' quem: Om ca quep urut cacam xequem

narima'. Taraju pa' urut pain capijacon Iri' Jam. Tomi' pan hot urut cocon oro wari'. Xiram pa' urut cocon quem. Pe ho' naparut Tamataracon Iri' Jam pain xumuxut. Tomi' querec te iri'o' urut cocon oro wari' quem. ⁷ An hwet pe urut pain ca xuruxut xo' nuxut pain ca pijim' hwet urut pain capijacon Iri' Jam ca iri'o'. Mam' taramaja urut pain ca hwara' opa nucun Iri' Jam quem. Xuruxut xo' iri urut ne, ac soldado co cut nain ca mam' mixita nucun urut, ha' ac caparut na pain ca mixita xo' urut pain oro ca om awi wa, ha' ac caparut na pain ca narain ho' xujuxut cocon oro co to' quiji' pin xun nanaparut ma'. ⁸ Ma' nana wari' co tomi' querec te nanaparut, awi hwe awi hwe ta nanaparut. Ma' ac caca na oro xucucun co noc nanaparut, tomi' napat nanaparut. Ma' nana co mixein hwe ta nanaparut quem. Ane tomi' iri'o' urut ne. ⁹ Ma' paxi' nana co om querec pin' nanaparut, ane ma' caca oro xucucun co querec pin' nanaparut ne. Ac ca cono' xi' urut na, ane e' e' wet urut ne. To' paxi' nanaparut, ane om to' parapa' pin cacaparut ne. ¹⁰ Ja' tomi' xaxa' paxi' nanaparut, ane tama' tomi' querec te urut ne. Ximin paxi' urut pain ca om caparut carawa ca', ac ca to' caramaju pin urut cocon na pain ca howa nucucun. Om paxi' naparut carawa ca', ane mene mene pi' pin urut pain oro carawa ne.

¹¹ Je ca tomi' xuhu' ca', pain ca to hwein Corinto ma'. Om ca tomi' capijacon e' urut pahu' pain ca tomi' hwet urut pahu' pain ca coromicat nuxut ca', pain ca om noc camain' urut pahu' ca'. ¹² Om ca hehe camain' urut pain ca tomi' querec te urut pahu' ca'. Tomi' querec te iri'o' urut pahu'. Wahu' ma' iri na ne, hehe pan hwe, om ca tomi' querec te homa maparut. ¹³ Win urut pahu', tomi' inuhu' pain ca ac ca mana panxita' xuhu' ne ca'. Tomi' querec te tamana xut me inuhu'.

Ca om na ne pain ca taxipa' tococwa co om howa nonon Iri' Jam

¹⁴ Ta taxipa' huhun oro wari' co om howa nonon Jeju me, xi jimama' ca' ara huhun ta. Je ca tomi' xuhu' ca'. Ma' tara ca wanan ac xine ca awi wa pain ca pan tem wa ra? Ma' tara ca wanan ac xine xec pain xim ra?

6.10 Ma' na ca to' caramaju ac tococwa oro wari' pain ca ximin pan caca ra? Ma' na ca mene mene pi' pin ac cacain oro carawa pain ca om cocon carawa quem ra? Om na, taraju pa' je e'. To' caramaju tata oro wari' pain iri' ximicocon, xi om ne ca pijim' mi' ara tococwa pain capijacon Iri' Jam ta. Pain ca mene mene pi' pin cacain oro carawa ma' iri na ne, tomi' mi' nanain pain oro carawa ca mi' xun tococwa pain pawin cain quem.

Om na ta! ¹⁵Ma' tara ca xin ne ac xucucun Cristo con Belial ra? Ma' tara ca coromicat an xiho' ac xucucun wari' co howa non Cristo con wari' co om howa non quem ra? Om na quem. ¹⁶Tomi' xin xiricon Iri' Jam ma' quem. Ma' tara ca an an ari ac xijein xiricon Iri' Jam pain caji pacun ca Iri' Jam xi' ma caca oro wari' ra? Om na ta! Je ca tomi' xuhu' ca'. Xiricon Iri' Jam co e' cara cwa' iri'. Win ne ca tomi' pan ca pain cara pane:

Pe ho' toton oro wari' ne cwa'.

Pe ho' cara toton.

Iri' Jam ne tatarapa',

oro wari' ne ac toton tara quem.

Ac i ma' na ca tomi' ca Iri' Jam pain cara pane. ¹⁷Je ca xirao' pe xine i ca', pain capiiacon quem:

Tomi' ca' inuhu' pain ca Taramaxicon Iri' Jam ta' ca'.

Paca' jujun oro co om howa nanapa'.

In ca' jujun.

Ein jein oro ca em' wa,

ta wixicam camain' hwein me.

Mo ta tomi' ha' mahu' pain ca tomi' xuhu' ca',

tomi' querec te ac xuhu' tara ta.

Ac i ma' na ca xirao' pe xine pain capiiacon. ¹⁸Xirao' pe ca' na quem:

Te ac mahu' tara,

mana panxita' ac xuhu' tara pain ca tarama' nuhu' ma',

je pain ca narima' hwe ma' quem.

Je ca tomi' xuhu' pain ca Taramaxicon Iri' Jam ta' ca',

pain ca hwara' opa pan ta' ca'.

Ac i ma' na ca xirao' pe xine pain capiiacon.

7 Je ca tomi' urut pahu' pain ca tomi' querec te urut pahu' ca'. Tomi' ac i ma' napari' Iri' Jam pain ca tomi' an pe mi' capari' pain ca tomi' nucun ca'. Na e' na pain ca an to pin xin oro ca to' pan teretem napari' pain cwerexi', je pain ca coromicat nexi' ca'. Na e' na pain ca tomi' ha' xun pain ca in ac xun quem. Win xumu xun pain ca to' hohot pin xim capari' ca'. Ca win xumu ac xun tara, ca win xumu ac xun tara, to' hohot mip ac capari' tara quem.

Ca tomi' querec te tococwa pain ca cwirin' pin nucucun pane

²Ta hehe maparut me, tomi' querec te tamana xut me, xi ara cup urut pahu' ta. Om ca to' em' urut pahu', om ca mixein camain' urut pahu'. ³Om ca tomi' em' xuhu' pain ca pan to' tain tarajuhu' ca', om na. Wara tomi' hwet ara xi' inuhu' pain ca tomi' querec te tamana urut pahu' ca'. Pain ca e' e' wet nexi' ca', pain ca aram aram cono' xi' iri' quem, om ta pi' ra ha' ne ca om noc urut pahu' ta. ⁴Om ca hehe camain' xuhu' pain ca tomi' xim xuhu' ca'. Tomi' querec te tamana inuhu' quem. To' hwara' opa tamana mahu' pain xumu quem. To' i'ina paxi' napa' oro carawa ca', ane tomi' querec te tamana ta' ne.

⁵Tan' qui' iri urut pain macarain Macedônia ca' ne, om ca xao to wa camain' urut pain xumuxut. Jam' tamana urut pane. Mija ara xi' na oro carawa ca to' i'ina naparut pane. Jain jain urut cocon oro co noc naparut pain ca tomi' in pin tamana cacaparut. Toron tamana na xumuxut pahu' quem. ⁶Ane to' hwara' opa taxipa' con wari' co tomi' xaxa' Iri' Jam ne. To' hwara' opa naparut pain ca wa' qui' ca Tito cwa' quem. ⁷Om ca to' hwara' opa e' caparut pain ca wa' qui' nucun ca', to' hwara' opa naparut pain ca tomi' hwet caparut pain ca to' hwara' opa pan hun quem. To' hwara' opa napa' pain ca tomi' ca' capa' quem: Coromicat nenem, tomi' xaxa' nana pain ca pan teretem nucucun, xiram pa' nenem pain ca quep xiho' xim quequem ta napa' pahu'. Je ca tomi' querec te tamana ta' ca'.

⁸Ja' tomi' xaxa' paxi' inuhu' pain ca xirao' mi' qui' xuhu' pane, ane hohot ne pain ca xirao' mi' xuhu' ne. Om ca tomi' xaxa' ta' pain ca xirao' mi' xuhu' pane. Iri'o' paxi' na pain ca tomi' xaxa' ta' pain ca xo' xirao' mi' qui' xuhu' pane, om xi xirao' mi' toton ta paxi' inuhu' ira, xi querec pin' ara xuhu' pain ca ja' tomi' xaxa' xuhu' ta. Ane taxi' xuhu' pain ca om tomi' xaxa' cara hwe pain ne. ⁹Je ca tomi' xuhu' ca', tomi' querec te pin ina pain xocori ca' pahu'. Om ca tomi' querec te ta' pain ca ja' tomi' xaxa' xuhu' pain ca xirao' ne pane, om na. Tomi' querec te pin ina, xi om ne ca tomi' xaxa' tomi' xaxa' cwirin' pin ara hwe ta. Je ca param mi' cuhu' Iri' Jam quem, wirico co mi' nuhu' pain ca tomi' xaxa' nuhu'. Om ca to' ara urut pahu' pain ca xirao' mi' qui' urut pahu' pane quem. ¹⁰Je ca tomi' xuhu' ca'. Ja' tomi' xaxa' iri napani' pain ca caracat nexi' Iri' Jam ne, cwirin' pin ac iri' na, coromicat ni pin ac iri' na, witan pin ac iri' na, e' pin ac iri' na quem. Hohot hohot pi' pin napani' ca ja' tomi' xaxa' ac i ma' capari' Iri' Jam ta.

Ane om ac i ma' ne cocon oro wari' co om howa nonon ne. Tomi' xaxa' iri nana pain ca caracat nucucun ne, om ca cwirin' cacain. Aram aram cono' pin e' ac caca na quem. ¹¹ Je ca tomi' xuhu' ca', taraju wet je e'. Ja' tomi' xaxa' iri nuhu' Iri' Jam pane ne, meo ac cuhu' na pain xumuhu'. Jain jain ac hwe na pain ca win xumu pin hwein ca ara xo' wa. An hwet pe mi' ac maparut na pain ca om quep xiho' hun co caracat ma', om ca miri'om urut con pain ca caracat nucucun ta ac hwe na quem. Jin' pin ac hwe na pain ca wap wi tarapari' xi' ma hun Iri' Jam pain ca aram aram wap ton con quem. Xiram pa' tamana ac maparut na pain ca coromicat maparut, toron ac ne na xumuhu', pan to' mip ac hwein na taraxicon quem. Querec pin' ac xihwe na pain ca om caracat wi hwe con. ¹² Je ca tomi' xuhu' ca'. Xirao' mi' iri inuhu' pane ne, om paxi' na ca pan to' tain ta' taraxicon co caracat ma' pahu'. Om paxi' na ca quep xiho' ton ta' co ara cup ca ma' quem. Xirao' mi' inuhu', ma' ta querec pin' xujuhu' pain ca om noc maparut ta. Je ca xirao' mi' xuhu' pane. Taxi' napa' Iri' Jam pain ca tomi' iri'o' xuhu' ca' quem. ¹³ Je ca to' hwara' opa maparut ma'.

Om ca xica' to' hwara' opa maparut quem. To' hwara' opa naparut Tito quem. Ja' tomi' querec te tamana naparut pain ca querec pin' urut con pain ca tomi' querec te nucun pahu'. Xi om ne ca to' hwara' opa to' hwara' opa pi' pin ara hun ta, toron toron om pin ac ne na ximicon pahu'. ¹⁴ Wara tomi' hwet inon Tito pahu' pain ca om hwet querec cuhu' pane. Awi nana, ma' pin na ximicocon ta, ac i ma' na ca tomi' hwet xuhu' con. Iri'o' na ca tomi' ton quem. Om ca to' wixipa' mahu', xi querec pin' ara cuhu' pain ca ma' pin ne xumuhu' ta. Win ne ca iri'o' iri'o' pi' pin ne oro ca tomi' xuhu' pane, ac i ma' na ca iri'o' ne oro ca tomi' hwet ton pahu' quem. ¹⁵ Tomi' querec te tamana nuhu' Tito cwa' quem. Mam' pe wet iri nuhu' pain ca taraju wet taraju wet pi' pin hun pane ne, je pain ca tomi' querec te hun pain ca tomi' ha' hap hun pata', tomi' querec te mip ac cuhu' na quem. ¹⁶ Tomi' querec te inuhu' quem, xi om ne ca taxi' ara xuhu' pain ca ara e' hwein ca param nucun Iri' Jam ta.

7.14 Quep xiho' non pain oro ca taramaja nucun Paulo Tito ma'. Je ca in mao rain Corinto ta tocwa pane.

Ca xiram pa' tococwa co howa to nanain Jerusalém

8 Tomi' hwet xim urut pahu' pain carawa ca ara nonon oro xerexi' co howa to nanain macarain Macedônia ca' xere, pain ca xiram pa' pan cocon Iri' Jam ma'. ²Mija paxi' na oro carawa ca to' i'ina nonon ma', ane tomi' querec te tamana pan caca ne. Ximin nana, om paxi' nonon carawa, ane xiram pa' tamana tococwa oro xucucun co iri' co om nonon carawa quem. Ac ca caramaju caca na pain ca mi' querec te tococwa pain wijimain dinheiro nucucun. ³Dinheiro ca mi' caca ma', om ca mi' wijimain e' cacain, om na. Mi' hwara' tiquin' ca' nanain dinheiro ca pe ho' nonon quem. Taxi' inonon, je ca tomi' xuhu' ca'. Maqui' nain ximicocon ca mi' xi' caca ma'. ⁴Tomi' mip ca' nanaparut pane: Ta tomi' in pin maparut pain ca mi' urut cocon pain dinheiro oro xerexi' co to nanain Jerusalém me ta nanaparut. Param tamana urut pain, win ne ca quep xiho' huhun ma', param urut pain quem, quep xiho' xuxun urut cocon ta nanaparut. ⁵Quep xiho' tamana nana quem. Mi' wijimain e' tatarain xi' ma urut cocon pain dinheiro pane. Ane om mi' e' cocon pain dinheiro ne. Mi' cain' pan xucucun con Taramaxicon nexi' ma', pain ca tomi' ha' cara xut pum ta cocon ma', tomi' ac cacaparut na quem, tomi' ha' xut pahu' pain oro ca tomi' mi' maparut ma', je ca param mi' caparut Iri' Jam ta nanaparut. ⁶Je ca tomi' ca' urut con Tito cwa' pahu'. In hwet roron oro xerexi' pain Corinto ta urut con pahu'. Quep xiho' roron pain ca cut in xo' cacain dinheiro ca mi' xuxun cocon oro xerexi' pain Jerusalém ta urut con. Win ne ca wara quep xiho' momon pane, pain ca xo' xiram pa' xuxun cocon pain cara pane, quep xiho' mami' roron pain ca cut in awori pin xin cacain dinheiro ca mi' xuxun cocon ta urut con pahu'. ⁷Je ca tomi' urut pahu'. Win ne ca tama' ara xo' hwein oro ca ara hwe ma': Howa mip hun Cristo. Pijim' taxi' hwein capijacon Iri' Jam. Taraju pa' hwein quem. Jain jain hwe pain ca win xumu hwein oro ca ara xo' wa. Win hwe ma' maparut pain ca om noc camain' urut pahu' quem. Je ta ara xo' ac i ma' qui' hwe pain ca quep xiho' huhun oro xerexi' co om nonon carawa pain Jerusalém quem. Xiram pa' jujun pain ca cut mi' huhun pain dinheiro quem.

⁸Om paxi' na ca tomi' mi' xuhu' pain ca cut mi' jujun pain dinheiro ta xuhu' ca', om na. Tomi' hwet e' inuhu' cocon oro xerexi' co jain jain nana pain ca win xumu cacain oro ca ara xo' wa ma'. Am an xiho' huhun. Mo ta an xiho' huhun ma', querec pin' ac xihwe tara pain ca tomi' querec te iri'o'

huhun oro wari'. ⁹Win ca Taramaxicon nexi' Jeju Cristo cwa'. Taxi' ara xi' hun pain ca xiram pa' tamana capari'. Caramaju tamana paxi' na pain ca hwara' opa tamana nucun pain ca taramaxicon nucun pane, je pain ca Iri' Jam nucun pane. Ane an pe pin tain pahu' ta capari' ne. An pe pin iri nain ne, wari' pin ac ca na, ximin pin ac ca na quem. Ma' ta to' caramaju pin xuhu' pain ca mi' xim xuhu' pain oro ca awi wa con Te ta napari'.

¹⁰Ca' na ca coromicat ne ca', pain ca mi' xun huhun pain dinheiro: Awi na pain ca mi' hwein, xi wahu' ara ne co wara coromicat an pe xo' cain' nanain ca cut mi' wa, wahu' co cut in cain' nanain quem. ¹¹Je ta ara ara awori pin qui' hwein ca wara ara xixi' na hwe pane ta. Cut in xo' jein dinheiro ca mi' xi' hwe ma'. Cut in querec te jein, win ne ca tomi' querec te hwe pain ca xo' coromicat an pe xo' qui' hwein pain cara pane. Cut in xo' ho' jein dinheiro ca ma' nuhu' pain xocori ca'. Co ma' mija non, mija ac ne tara ca cut in xo' ca. Co ma' wijimain non ma' iri na ne, wijimain ac ne tara ca cut in xo' ca quem. ¹²Je ca tomi' xuhu' ca'. Mo ta mi' hwara' xin dinheiro pain ca ma' mija capari' ca', mo ta mi' wijimain xin pain ca ma' wijimain capari' ca', je je ari na con Iri' Jam. Mo ta mi' querec te xin, mo ta om mi' xiram pa' xin, hohot ac con na Iri' Jam. Xi mi' hwara' jein capari' pain ca ma' wijimain e' capari' ta.

¹³Pain ca quep xiho' xun huhun oro xucucun wari' co om nonon carawa ma', om ca na ne pain ca mi' mi' pi' pin hwein oro caramajuhu' pain ca ximin pin hwe ma'. Noc urut pain i ma' pahu'. Awi na pain ca an an ari xujuhu' pain ca ma' ma' xam' cuhu' carawa. ¹⁴Ane mija cuhu' carawa pain xocori ca' ne. Awi na pain ca quep xiho' huhun pain ca ximin nucucun. Maqui' iri tara xec nein ca ximin pin hwe ne, mo ta mija cocon carawa, quep xiho' ac cucuhu' tara, an an ari ac xujuhu' tara pain ca ma' ma' xam' cuhu' carawa quem. ¹⁵Win ne ca xirao' pe xine pain capijacon Iri' Jam quem, pain ca cut qui' cacain capam' ca camara' qui' nain pawin pane. Ca' na con: Co cut in tamana ma', hohot non. Co cut in wijimain ma', hohot non quem, om ca ximin ca, ac i ma' na ca xirao' pe xine pain capijacon Iri' Jam pane.

**Tito cocon oro win ma' ca co quep xiho'
xuxun nonon oro wari' nein Corinto**

¹⁶ Tomi' querec te tamana inon Iri' Jam pain ca meo cain ximicon Tito cwa', pain ca to' jain jain con pain ca xiram pa' xim cuhu' ca'. An xiho' napa' pain ca jain jain xuhu' pain ca xiram pa' xuhu' ca' quem. ¹⁷ Xi xin ne hap ara caparut pain ca in hwet roron, quep xiho' roron ta urut con pahu' ta. Om ca hehe ca pahu', wara in hwet toton ta nuhu'. Wara jain jain nuhu', quep xiho' xim nuhu', maqui' nain ximicon ca hwet xim cuhu' ca'. ¹⁸ Ja' ja' ron urut con coxari' cwa' quem, co querec pin' caca oro co cut in xucucun pain ca howa cocon Jeju ma' quem. Querec pin' ta pain ca taramaja nucun ma', pain ca pijim' cain capijacon Iri' Jam con Jeju ma'. ¹⁹ Wirico co tora' wa pain ca ja' ja' xim caparut pain Jerusalém quem, pain ca aram aram cut mi' xuxun urut pain dinheiro ca cut in xo' pan hwe cocon oro co ximin nana pain i cain. Cut mi' xuxun pain urut quem, ma' ta querec pin' cacain ca awi nucun Taramaxicon Iri' Jam, je pain ca querec pin' cacaparut pain ca quep xiho' xuxun urut cocon. ²⁰ Ara xite xin urut pain dinheiro ca mi' querec te hwe pain ca xiram pa' tamana nuhu' ma' quem, pain ca cut to xo' xin urut pain, je pain ca mi' xo' xuxun urut cocon pain. Ma' ta om tomi' ximama' cacaparut oro wari' cwa' urut. ²¹ Ma' na xumuxut pain oro ca ara urut con, ara xo' xixin na urut pain. Ma' ta querec hohot capari' Taramaxicon Iri' Jam pain oro ca ara iri' ca', ma' ta querec hohot cacapari' oro wari' pain oro ca ara iri' ca' quem, ac i ma' na ca coromicat nuxut.

²² Ma' na xucun coxari' cwa' quem, co ja' ja' ron Tito con win ma' ca cwa' urut. Querec ho' querec ho' urut con pain oro ca taramaja nucun. Wara jain jain paxi' na pain ca win xumu cain oro ca ara xo' wa pane, jain jain tamana pin ac ca na pain ca quep xiho' xim cuhu' pain xocori ca' quem. Xi querec pin' ara cuhu' pain ca xiram pa' xuxun huhun oro xerexi' co ximin nana ta. Om ca tara cocon ta'a camain' cuhu'. ²³ Win ma' ne inon Tito cwa' quem, taramaja wi urut pain ca quep xiho' xim urut pahu'. Xerexi' co ja' ja' xun nonon cwa' quem, wiricoco nana co tora' caca oro co cut in xucucun pain ca howa cocon Jeju ma' quem. Ja' ja' jun Tito ta tata, ac ca ja' ja' pan urut con tara pain ca ja' ja' hun ma' tata. An hwet pe nanain ca awi nucun Cristo pain ca xuruxut xo' nucucun quem. ²⁴ Je ca tomi' xuhu' ca'. Tomi' querec te jujun xerexi' cwa' inuhu'. Ma' ta querec

pin' cucuhu' oro co howa nonon Cristo pain ca tomi' querec te iri'o' huhun ma'. Querec pin' tataraparut pain ca tomi' iri'o' urut pain ca awi nana, tomi' querec te iri'o' xucucun ta urut cocon pahu' quem.

9 Hohot paxi' na pain ca om xirao' mi' xuhu' ca', pain ca quep xiho' xun tococwa oro wari' nucun Iri' Jam pain Jerusalém ma'. ² Querec pin' inuhu' pain ca quep xiho' xuxun huhun ma'. Je ca tomi' hwet toton oro xerexi' co to nanain Macedônia cwa' pahu', tomi' ca' inonon pahu': Tomi' querec te tamana inonon oro xerexi' co to nanain macarain Acaia ma', wara awori to nana pain xijein cawaxi' pane, pain ca quep xiho' xuxun cocon oro xerexi' co to nanain Jerusalém, ac i ma' na ca tomi' hwet toton pahu'. Taxi' pin iri nunuhu' pain ca jain jain hwein ca quep xiho' wa ne, mija pin ac caca na co win caca ne nunuhu'. Ac i ma' xixi', quep xiho' xuxun oro xerexi' co to nanain Jerusalém ta pin ac caca na pahu'. ³ Querec pin' ac i ma' paxi' inuhu' pain ca quep xiho' xi' hwe ma', ane hohot ne pain ca mam' xuhu' cocon xerexi' cwa' ne. Hwet jujun, quep xiho' jujun pain ca cut in xo' cacain dinheiro ca mi' xi' caca ma' inonon pahu'. Ma' ta om werem pa' ne capiija pain ca win ne ca tomi' xuhu' pain ca wara awori to nana pain ca quep xiho' xi' caca ta toton pahu'. ⁴ Je ca tomi' xuhu' ca'. Mo ta hwet xuhu' pain Corinto ma', mo ta ja' ja' xim cacapa' win ma' nexi' co to nanain Macedônia ca', mo ta maqui' pa' urut pahu' pain ca om wara cut in xo' hwein dinheiro ca mi' xi' hwe ma', wixipa' ac ta' tara, wixipa' ac hwe tara quem. Xi tomi' hwet ara toton pahu' pain ca wara cut in xo' tatarain ta toton pahu' ta. ⁵ Je ca hohot capa' pain ca tomi' toton xerexi' cwa', pain ca wara hwet jujun ta toton pahu'. Quep xiho' jujun pain ca wara cut in xo' xin cacain dinheiro ca mi' xi' caca ta inonon pahu'. Querec pin' ac xihwe tara pain ca mi' querec te hwein ma', je pain ca om tomi' ha' e' maparut pain ca tomi' tomi' na urut pahu' pain quem.

⁶ Mam' pe wet jein i ca' quem: Mo ta oin' xin tocwi trigo pain totaxi' ma', mo ta oin' wijimain e' xin, caracat wijimain ac xin tara. Mo ta oin' tamana xin, caracat tamana ac xin tara quem. ⁷ Je ca na e' ne pain ca mi' mi' xam' hwein dinheiro ca wara coromicat an to xo' hwe pain xumuhu' ma'. Ta mi' xiram pa' hwein me. Om ca na ne pain ca mi' e' hwein pain ca tomi' tomi' na pin xujuhu' ma'. Wari' co mi' querec te ma', wirico ara xi' na co tomi' querec te pan ca Iri' Jam ma'. ⁸ Hwara' opa na Iri' Jam. Ha' non pain ca mi' cuhu' pain oro ca param hwe pain oro ca ximin hwe ma'. Mi' hwara' tiqin' ca' tarain ca param nuhu' pain ca ximin nuhu' quem.

Ma' ta tama' ma' cuhu' ta nuhu', ma' ta hwara' tiquin' ca' nein ca param nuhu', ma' ta ha' cuhu' pain ca mi' mi' tiquin' hwein pain ca quep xiho' xujuhu' ta nuhu' quem. ⁹ Je ca xirao' pe xine pain capijacon Iri' Jam ma':

Mi' hwara' taxipa' nonon pain carawa oro wari' co ximin nana ma'.

Om ta pi' ra ha' camain' ne ca ara xo' nucun pain
ca xiram pa' cocon ta.

Ac i ma' na ca xirao' pe xine ma'.

¹⁰ Noro jun co ma', pain ca mi' cain oro tocwi ca oin' wa ma', je pain ca mi' cain carawa ca cao' wa ma' quem. Ac i ma' na pain ca mi' hwara' mi' hwara' tiquin' cuhu' pain oro carawa ma' quem. Ha' ac cuhu' tara pain ca xiram pa' xiram pa' tiquin' huhun oro co ximin nana pain ca om cocon carawa ma' quem. ¹¹ Mi' tamana ac xihwe tara pain oro carawa, ma' ta ha' cuhu' pain ca xiram pa' xiram pa' tiquin' huhun oro co ximin nana ma', pain ca mi' querec te huhun pain dinheiro ma' quem. Aram aram mi' xuxun iri urut cocon pain dinheiro nuhu' xerexi' co to nanain Jerusalém ne, tomi' querec te ac cocon Iri' Jam tara pain ta.

¹² Pain ca quep xiho' xuxun huhun oro wari' nucun Iri' Jam co to nanain Jerusalém ma', pain ca mi' xuxun huhun pain dinheiro ma', om ca xica' quep xiho' e' huhun pain ca ximin nucucun pain ca om cocon carawa ma'. Ja' tomi' querec te tamana xuxun huhun quem, tomi' querec te tamana ac cocon tara Iri' Jam pahu'. ¹³ Quep xiho' iri jujun ne, querec pin' ac cucuhu' tara pain ca tomi' ha' hun Iri' Jam ma', je pain ca an hwet pe hwein ca howa nuhu' pain ca tomi' ha' hwein capijacon con Cristo. Tomi' querec te totoron pain ca quep xiho' xuxun huhun cocon oro xucucun co ximin nana ma' quem. ¹⁴ Tomi' mi' iri tuturuhu' con Iri' Jam ne, tomi' querec te tamana ac cucuhu' tara pain ca om noc tamana cucuhu' ma'. Xi wirico ara ca Iri' Jam co mi' nuhu' pain ca xiram pa' tamana huhun oro co ximin nana ta. ¹⁵ Je ca tomi' xuhu' ca'. Tomi' querec te xun Iri' Jam pain ca xiram pa' e' capari' ca', pain ca mi' e' capari' pain ca param nucun. Awi tamana na, om ca tomi' ac xine ca awi tamana nein ta.

9.9 Tomi' mi' ta wari' co xiram pa' taxipa' nonon oro win ma' ca ma'. Om ta ximin camain' ca, ma' cara toron carawa. **9.10** Pain ca tomi' mi' tococwa pain oro tocwi ca oin' wa ma', je pain ca mi' tococwa pain carawa ca cao' wa ma' quem, tomi' joc mam' mi' ta pain oro carawa ca mam' xiram pa' xun tococwa oro co ximin nana ma'.

**Ca tomi' nain ho' xucun Paulo pain ca tomi' xo'
cocon oro co tomi' ximama' nonon**

10 Wata' pain ca Paulo ta' ca', tomi' ca' inuhu' pain ca an xiho' ton Cristo pain ca tomi' wixite nucun, je pain ca tomi' pan hot nucun ma' quem. Tomi' mip ca' inuhu' cocon oro win ma' nuhu' co tomi' ximama' ca' nana pata': Tomi' iri napari' pain ca pe ho' capari' ca' ne, tomi' pan hot e' napari'. Pe ni ca' iri napari' ne, pan to' ac cain na tarajixi', ac i ma' na ca tomi' ximama' caca pata'. ²Tomi' mip ca' inuhu': Ma' tara xumuhu' me, ta cuc cuc mahu' pain ca pan to' tain taraxicocon pain ca aram aram hwet xim xuhu' ma'. Om ta hehe ta' pain ca pan to' tain ta' taraxicocon co tomi' ximama' nanaparut pain ca an xiho' e' cocon wari' co om xuruxut xo' nana ma', co ara e' nanain ca param pan nucucun ta nanaparut ma'. ³Wari' paxi' urut pain ca to urut pain macan' ca', ane om an xiho' urut cocon oro wari' co om howa nonon Iri' Jam ne. Om ca an xiho' urut pain ca coromicat nein ca wari' wa pain ca ari urut cocon oro co ari nanaparut cwa'. ⁴Ane om mam' ari urut pain ca mam' ari nucucun oro wari' pain macan' ca' ne, om na. Mam' ari urut pain ca hwara' opa nucun Iri' Jam ta. Je ca mam' to' quiji' pin urut pain oro ca hwara' opa nucun Caxicon Jam ma'. Je ca mam' to' quiji' pin urut con quem. ⁵Je ca mam' to' quiji' pin urut pain oro ca tomi' in pin caracan nucucun oro wari' ma', pain oro ca xin to nucucun pain ca to' i'ina cocon oro xucucun co querec pin' xun paxi' nonon Iri' Jam ma'. Je ca mam' to' quiji' pin urut pain oro ca coromicat pan teretem nucucun, ma' ta aram aram tomi' ha' pin cocon Cristo ta urut cocon. ⁶Mo ta aram aram tomi' ha' iri'o' pin hun Cristo ma', mo ta ma' ma' wet caca co om tomi' ha' querec nana pahu', om ta hehe urut cocon, pan to' pan to' pi' pin ac urut cocon tara pain taraxicocon ta.

⁷Noro e' hwein ca cwere wa, om ca noro hwein ca xumu wa. Wari' co wari' nucun Cristo ma', na e' na pain ca coromicat xo' ca. Xi xica' pe ca pain ca wari' nucun Cristo ca ma'. Wari' nucun Cristo urut quem. Win ca ma'. ⁸Tomi' xec xec paxi' inuhu' pain ca tomi' hwet ho' tomi' hwet ho' xuhu' pain ca mi' caparut pain ca hwara' opa wa Taramaxicon nexi' cwa'. Ane om wixipa' ta' pain ca tomi' ac i ma' xuhu' ca' ne. Mi' capa' pain ca hwara' opa wa ca' ira. Ma' ta quep xiho' momon ta napa' pahu'. Om ca to' quiji' pin roron ta capa' pahu'. ⁹Noc inain ca coromicat mi' ca' mahu' ma': Ac ca to' jin' e' capari' na pain ca xirao' mi' capari' ca' mahu', ta coromicat mi' ac

i ma' mahu' me ta. ¹⁰Ma' ara xi' nana oro win ma' nuhu' co coromicat mi' ac i ma' nanapa' ma'. Pan to' e' nain ca taraju wa pain oro ca xirao' nucun, tomi' carapita e' na pain ca hu capari' ta. Hwet iri napari' ne, hehe ac ca na, xi pijim' xo' taxi' capari' ta, ac i ma' na ca tomi' caca ma'. ¹¹Ma' tara ximicocon ta! Oro ca xirao' nuxut pain ca om to ho' urut pahu' ca', je ta ara xin urut pain ca to ho' xim urut pahu' quem.

¹²Om ca an xiho' urut cocon oro co tomi' xec xec ca' nana pain ca warut co awi, awi tiquin' ca' urut cocon oro win ma' nuxut cwa' nana ma'. Om ara xi' na ca coromicat xo' caca pain ca an hwet pe ac i ma' cacain ca pan teretem nucucun ta. ¹³Warut iri na ne, pain ca tomi' hwet urut pahu' pain ca taramaja nuxut ca', om ca tomi' xec xec ximama' urut pahu', om ca tomi' hwet urut pahu' pain ca taramaja wa ca om mi' caparut Iri' Jam, om na. Tomi' hwet cain' urut cocon oro wari' nein xijein macan', aram aram hwet ac cuhu' na. ¹⁴Pain ca tomi' ac i ma' urut pahu', om ca tomi' hwet ximama' urut pahu' pain ca taramaja nuxut pahu' quem. Mo xi om wara hwet urut pahu' pane, je xi om hohot qui' ne pain ca tomi' hwet urut pahu' pain ca taramaja nuxut ca' pahu'. Ane hwet pan urut pahu' pane ne. Pijim' hwet mi' ac urut pahu' na pain capiiacon Iri' Jam con Cristo. ¹⁵Je ca om tomi' xec xec ximama' urut ca', pain ca warut co ara nanain ta urut pain ca taramaja nucucun oro xucucun wari' ma' quem. Xi param ara urut pahu' pain ca horon horon tiquin' hwe pain ca howa hun ta. Ma' ta mija mija tiquin' ne ca taramaja nuxut pahu' ta urut pahu'. ¹⁶Ma' ta ha' caparut pain ca pijim' mama' urut pain oro xijein macan' ca to in mama' pain i cain pahu', pijim' mi' ac urut cocon tara pain capiiacon Iri' Jam con Cristo. Om ta tomi' xec xec ximama' urut pain ca warut co taramaja to nanain macan' ca taramaja pe ca xucun wari' urut, om na. ¹⁷Ma' ara xi' na ca xirao' pe xine capiiacon Iri' Jam con wari' co tomi' xec xec ma':

Mo ta tomi' hwet tain cain ca awi wa wari' ma',

tomi' hwet e' tarain ca awi nucun Taramaxicon Iri' Jam ta.

Ac i ma' na ca xirao' pe xine capiiacon Iri' Jam. ¹⁸Xi hohot con Taramaxicon Iri' Jam wari' co tomi' xec xec ximama' ma', pain ca awi ina ta ca ma'. Hohot e' non wari' co awi na ta pan ca ma'. Wirico co querec pin' wa pain ca awi nucun ta.

Ca toron ne ximicon Paulo cocon oro co howa to nanain Corinto

11 Momon taraju wet ximahu' na inuhu' pain ca tomi' ho' xim xuhu' ca', pain ca ac ca om coromicat xo' ta' ne ca'. Momon taraju wet xine me. ² Xi jain jain ara xuhu' pain ca querec wet xo' xuhu' ta. Wirico Iri' Jam co mi' napa' pain, jain jain pan nuhu' pain ca querec wet xo' xim cuhu' quem. Querec querec ac xojam' co om quep xirac cwa' mahu', wara tomi' an pe mi' inuhu' con Cristo, co ac iri' tarama' nuhu' ma' quem. Xica' pe tara Cristo co tarama' ne hwe ta inuhu' quem. ³ Je ca toron capa' xumu pahu'. Am mixein xim cucuhu' oro co pijim' ximama' nunuhu' ma', am to' em' xin cacain ca coromicat nuhu', am param param om pin hun Cristo, am win xumu win xumu om pin hun quem. Win cama Eva cara pane, pain ca ha' con em' pain ca tomi' mixein cam pane. Noc inuhu' pain ca an xiho' hwem ta. ⁴ Toron napa' xumu pahu', xi i'ina taraju wet huhun oro co pijim' ni ca' nanain ca pijim' nuxut pain ca pijim' hwet urut pahu' con Jeju pane. Xin ne huhun pain ca pijim' ni ca' cacain Tamataracon Iri' Jam ca howa hwe pane, xin ne huhun pain ca pijim' ni ca' cacain capiacaon Iri' Jam ca wara howa hwe con Jeju pane quem. ⁵ Cain' cain' xirara quem? Taxi' tiquin' ca' nanapa' ra? Om ca taxi' tiquin' ca' cacapa' ta, ac i ma' na ca coromicat ne ca'. ⁶ Am i'ina ta' pain ca tomi' ta' ca', pain ca pijim' tain capiacaon Iri' Jam ca'. Ane taxi' tain ne. Taraju pa' inain quem. Wara querec pin' ara xi' maparut pain oro ca taraju pa' nuxut ca', je pain oro ca ara nuxut pain oro xijein xec pane.

⁷ Pijim' hwet mi' iri inuhu' pain capiacaon Iri' Jam con Jeju pane ne, ac wari' co taramaja mi' non xucun wari' pan ina pain ca taramaja mi' e' xuhu' pane. Ma' ta to' witan pin xihwe ta inuhu'. Cain' ca coromicat mi' mahu' pain quem? Caracat ina pain ca om mi' xine pain dinheiro ta xuhu' pain ca taramaja mi' e' xuhu' ra? Om na ta! ⁸ Ane xiram pa' pan cacapa' oro xucucun co cut in xucucun pain ca howa cocon Jeju pain oro wirain cidade ne, mi' ac cacapa' na pain dinheiro. Ac ca an noc xa toton a xira ta, ma' ta ha' capa' pain ca quep xiho' xuhu' ca'. ⁹ Pe ho' iri inuhu' pane

11.2 Taraju pa' je e'. Pain ca querec querec ac xojam' co om quep xirac cwa' mahu' ta ca Paulo ma', tomi' joc mam' mi' napari' pain ca howa xun Jeju Cristo cwa'. Ac xojam' co om quep xirac cwa' iri' pain ca om howa ni ca' xun Jeju. Pain ca tomi' mi' con iri' tarama' nexi' ma' iri na ne, tomi' joc mam' mi' non Cristo quem. Je ca tomi' capari' ca'. Ac narima' nucun Cristo iri' pain ca howa xun ca'. Ac ca tarama' ne xun na pain ca cut xim capari' quem.

ne, maqui' pa' ac capa' na xec pain ca ximin ta' pain ca om capa' carawa pane. Ane om to' i'ina xuhu' pain ca mi' xine pain dinheiro xuhu' pane ne. Xi xiram pa' ara cacapa' oro xerexi' co maqui' nanain Macedônia ta, mi' ac cacapa' na pain oro carawa ca om napa' pain ca ximin ne pane. Om ca mi' xine pain dinheiro camain' xuhu' pane, om ta mi' xine pain xuhu' pain oro xec ca maqui' ta' ma' quem. ¹⁰Iri'o' na ca tomi' ta' ca', win ne ca pe ho' capa' ca iri'o' nucun Cristo. Hwet iri' toton oro wari' co to nanain oro macarain Acaia ma', om ta mi' xine pain dinheiro pain ca pijim' hwet mi' xuhu' pain capijacon Iri' Jam ta toton. Om ta narain ho' ac cacapa' pain ca miri'om ac i ma' tain dinheiro nucun ta. ¹¹Para om mi' xine pain dinheiro nuhu' xuhu' quem? Noc pan inuhu' ra? Om na ta. Taxi' napa' Iri' Jam pain ca om noc xuhu' ca'.

¹²Je ca tomi' xuhu' ca', om ta mi' xine pain dinheiro camain' xuhu' pain ca taramaja mi' xuhu' ta. Wara taramaja ac i ma' ina, mao ac ne ma' tara pata'. Ma' ta om ha' cocon oro co tomi' xec xec nana pain ca taramaja an xiho' urut con Paulo cocon oro win ma' ca cwa' ta caca ma'. ¹³Xi iri' apóstolo caca ta. Mixein e' nana pain ca taramaja nucucun. Iri'o' xi' ca' tara me e' nana pain ca apóstolo nucun Cristo urut ta caca ma'. ¹⁴Je i ma' ira, om ca na ne pain ca wa wa xuxun pain, xi ac i ma' pan ara ca Satanás ta. Ha' ara xi' non pain ca to' jimao pan xucun ma', pain ca mixein capari' pain ca querec querec ac jam co toc meremem cwa', co taramaja mi' non Iri' Jam ma' quem. ¹⁵Je ca tomi' xuhu' ca'. Je xi om wa wa qui' xuxun caram ma' co taramaja mi' nonon Caxicon Jam ma', co an xiho' nonon pain ca iri'o' xi' ca' tara me caca pain ca ac ca ara xo' taxipa' caca ne ma'. Ame hwe e', main maqui' tara xec nein ca cut xin cacain carawa ca taramaja mi' caca ma', wap ac tococwa tara ta.

¹⁶Je ca tomi' xuhu' ca', tomi' mami' xim inuhu': Ta coromicat mi' camain' mahu' pain ca coromicat pan tem ma ta mahu' me inuhu'. Mo ta coromicat pan tem ma ta mahu', je i ma' ira, je xi tomi' querec te qui' mahu' quem? Win ne ca tomi' querec te taxipa' hun wari' co om coromicat xo' ma' quem. Ac i ma' xine, ma' ta tomi' xec xec wijimain ta' ca' inuhu'. ¹⁷Om paxi' na ca tomi' an xiho' ton Taramaxicon nexi' pain ca tomi' xec xec ta' ca'. Tomi' an xiho' e' inon wari' co om coromicat xo'. ¹⁸Mija ara xi' nana co tomi' xec xec an xiho' nanain ca coromicat nein ca wari' wa ma'.

Ac i ma' ta' quem, tomi' xec xec ac i ma' ta' quem. ¹⁹Coromicat xo' urut xi' ma paxi' a xihwe ta, je ca tomi' querec te huhun oro co tomi' xec xec nana pain ca om coromicat xo' nucucun ma'. Momon taraju wet huhun quem. ²⁰Xi tomi' pan hot ara huhun oro co quep xirac nunuhu' ta. Mo nana: Co taramaja mi' e' xut nunuhu' pain ca tomi' ha' xut ta cucuhu' ma'. Co mixein nunuhu' pain ca cut noc xa cacain caramajuhu' ma'. Co tomi' xec xec nunuhu' pain ca xin to nucucun. Co tomi' xirac nunuhu', to' to' ac cucuhu' na pain tucuhu' ma' quem. ²¹Warut iri na ne, om ca quep xirac ac i ma' camain' urut pahu'. Mo xi an xiho' urut cocon pain ca quep xirac cucuhu' ma', wixipa' ac urut xira pain ca ara an xiho' toton.

Mija ara xi' nana caram ma' co om hehe nana pain ca tomi' xec xec caca ma'. Je i ma' ira, tomi' xec xec an xiho' toton quem. Ac ca om coromicat xo' ta' a xira ta! ²²Cain' cain' caca quem? Om ca hebreu urut caca ra? Wata' quem, hebreu ina quem. Om ca waram winacon Israel urut caca ra? Wata' quem, winacon Israel ina quem. Om ca hwanana ne cocon Abraão caca ra? Wata' quem, hwanana ne inon Abraão ina quem. ²³Om ca taramaja mi' urut con Cristo ta caca ra? Wata' co taramaja mi' pan non Cristo ta. Ac ca tamanain ta' a xira pain ca tomi' ac i ma' ta' ta. Taramaja tamana nana ra? Taramaja tiquin' ca' inonon quem. Tao' to tata pain xirinain ca tao' to tao' to to wa ra? Wata' pan co tao' pe ho' tao' pe ho' wa pain xirinain ca tao' to tao' to to wa ta. Wap tata ra? Wata' pan co wap mip ho' wap mip ho' wa ta. Mija na ca mi' pin ho' mi' pin ho' ta' quem. ²⁴Ma' 5 na oro xijein xec ca wap mip cacapa' oro win judeu ta' pane quem. Wap iri nanapa' ne, ma' 39 ac ne na ca wap in hwet cacapa'. ²⁵Ma' 3 na oro xijein xec pain ca mam' wap cacapa' pain pana quem. Ma' xica' pe ac ne na ca to' pa' pin xim cacapa' pain pacun quem. Ma' 3 ac ne na oro xijein xec pain ca pe tain cote ne mam' horoho wa pane quem, caracat pin ac ne na pain ca wap nein com pain camana'. Ma' xica' pe na ca ho mao e' ta' pain cote ne com pane quem. Xim pa' ac capa' na, xec pa' ac capa' na pain ca ho mao e' ta' pane. ²⁶Pain ca xut mao ho' xut mao ho' tain oro xijein macan' pane, mija na oro ca to' mi' pin xim paxi' napa'. We' pa' napa' com. Cut noc xa ca' nanapa' pain caramaju oro wari' co cut noc xa nana ma'. Quep xirac nanapa' oro win judeu ta', quep xirac nanapa' co om judeu

11.18 Pain ca tomi' xec xec ac i ma' ta' quem ca Paulo ma', om paxi' na ca tomi' xec xec pan ca, om na. An xiho' e' nonon, ma' ta querec pin' hwein ca tomi' mixein nucucun oro co pijim' ximama' nana ma'.

nana quem. Mao iri inain oro xijein macan' ma', je pain mahweri ma', je pain cote ne com ma' quem, mija ara xi' na oro ca to' mi' pin xim paxi' napa' ma'. To' mi' pin xim paxi' nanapa' oro co howa urut con Jeju mixein nana ma' quem. ²⁷Taramaja tamana ina pane, jam' ina pain. Mija na xim ca om pi'am ta' quem. Pe' ina pain ca om capa' ca cao' wa, je pain ca om capa' ca toc wa quem. Ma' ho' ma' ho' napa' oro xec ca om cao' camain' ta' quem. Capin' ho' capin' ho' ina, xi ma' e' ara capa' caxicon wom ta. ²⁸Mija na oro xijein carawa ca to' i'ina napa' pain xocori ca' quem. Ma' na oro ca to' toron nain xumu cocon oro co cut in xucucun pain ca howa cocon Jeju ma' quem. Toron ho' toron ho' napa' xumu cocon, pain oro xijein xec quem. ²⁹Ma' iri na co om hwara' opa ma', xiram pa' ac ton na, ac ca om hwara' opa wi ta' con na. Ma' iri na co ja' camara' wa ne, jain jain ac ta' na, toron tamana napa' xumu con quem.

³⁰Ac ca na e' ne na pain ca tomi' xec xec ta' ca'. Je i ma' ira, tomi' hwet xica' pe e' xuhu' pain oro ca mam' to' querec pin' mahu' pain ca om hwara' opa ne ta. ³¹Taxi' napa' Iri' Jam co Te ca Taramaxicon nexi' ma', co awi cara tamana ma'. Taxi' napa' pain ca om tomi' mixein ne ca'. ³²Je ca ara capa' pain ca pe qui' tain Damasco pane quem. Pe iri inain i cain ne, quep xim ac capa' na co ma' co governador ra ca Rei Aretas pane. Coco' cahoj ein oro manain cote ne pacun ca tao' cahoj nein oro xirixi' ca', pain ca hwerehwet hwerehwet ac wa oro xirixi' ma' ac tococwa na oro soldado. Mo ta hwet mao ta' ca Paulo ma', quep ac hun tara ta, ac i ma' na ca tomi' tococwa pata'. ³³Ane quep xiho' cacapa' oro win ma' ne ne. An ho' pe nanapa' pain cote ne coco, wara ca' na man pain pacun ca tao' cahoj nein oro xirim ma', an quiji' pe ac cacapa' na pain xijein cacarain. Witan ca' ac ton na governador pane.

Ca tohwein' nucun Paulo, je carawa ca to' caxi non quem

12 Na e' na pain ca tomi' cara xuhu' pain ca ac ca tomi' xec xec xuhu' ne pain carawa ca ara napa' pane. Om paxi' na ca quep xiho' pan xuhu' pain, ane tomi' hwet xim xuhu' con wari' co tohwein' pane ne. Wirico Taramaxicon nexi' co ara mi' non pain, an hwet mi' ac con na pain carawa ca querec pin' ra con pane. Ac ca tohwein' ca na pain ca tomi' tocwa pane. ²Wari' co tomi' xim xuhu' cwa', querec pin' inon. Win cwere

non Cristo. Ma' 14 pin na cawaxi' pain ca an mao tocwa pain iri' pawin ca pe pan ca Iri' Jam. Tara, am an mao iri'o' tocwa pain iri' curucun, am an mao e' tocwa pain tamataracon, om ca taxi' ta'. Taxi' pan na Iri' Jam. ³⁻⁴Taxi' pan inon pain ca an mao tocwa pain iri' pawin cain. Am an mao iri'o' tocwa pain iri' curucun, am an mao e' tocwa pain tamataracon, om ca taxi' ta'. Taxi' pan na Iri' Jam. Taraju ac cain na ca tomi' wa. Nain ho' ta pain ca tomi' hwet wa pain ca taraju ca ma', om om na wari' co tomi' hwet wawa pain. ⁵Hohot paxi' na pain ca tomi' hwet xuhu' pain ca an mao tocwa pain iri' pawin pane, ane om hohot ne pain ca tomi' xec xec ta' pain ca tomi' hwet pan xije pahu'. Tomi' hwet e' xuhu' pain ca om hwara' opa ne ca'. ⁶Mo xi tomi' xec xec ta' pain ca tomi' hwet xuhu' pain carawa ca ara napa' pane, om xi coromicat pan tem ma ta ac cacapa' oro wari', xi tomi' iri'o' ara ta' ta. Ane om tomi' hwet xuhu' pain ne. Noc inuhu' pain ca awi ma awi ma ximama' mahu', param e' inuhu' pain ca querec pin' hwein ca taramaja ne ca', je pain ca pijim' xuhu' pain capijacon Iri' Jam ta.

⁷Awi tamana na oro ca an hwet mi' capa' Iri' Jam pane. Je ca mi' capa' pain ca caxi wa ca'. Ma' ta om tomi' xec xec ma pain napa'. Jain jain ina pain ca caxi ne, ac jam co taramaja mi' non Caxicon Jam na pain ca to' jain jain capa'. Ac ca mam' xucun' capa' na pain pi pain cwere ca'. ⁸Tomi' paxi' inon Taramaxicon nexi' pain ca an ca' ne pain ca caxi ne quem ton ca'. Ma' 3 na ca tomi' mip ton ca'. ⁹Ane tomi' ca' capa' ne: Om na, hohot nem pain ca quep xiho' pan xim ca' napa'. Xi querec pin' pan ara xine ca hwara' opa ne pain ca quep xiho' ton wari' co om hwara' opa ta, ac i ma' na ca tomi' capa'. Je ca tomi' querec te ta' ca'. Tomi' xec xec ta' paxi' inain ca om hwara' opa ne ca', xi hwara' opa pe ho' ara capa' Cristo ta. ¹⁰Je ca tomi' querec te ta' pain ca om hwara' opa ne ca'. Tomi' querec te ina pain ca tomi' xirac cacapa' ca', je pain ca ximin ta' pain ca om capa' carawa ca', je pain ca quep em' cacapa' ca', je pain ca jain jain ta' pain oro ca to' i'ina napa' ca' quem. Ximin ac i ma' paxi' ina pain ca taramaja mi' ton Cristo cwa', ane tomi' querec te ta' ne. Om iri na ca hwara' opa pan ta' ne, je win hwara' opa ta' ta.

12.2 Taraju pa' je e'. Tomi' hwet iri nonon con wari' co an mao wa pain iri' pawin Paulo ne, tomi' mi' pan xucun. Wirico pan co an mao wa pain iri' pawin. Ac xucun wari' e' na co tomi' mi' ca, xi noc ara cain ca tomi' xec xec pan wa pain ca tomi' hwet cocon pain carawa ca ara non pain ca an mao tocwa pain pawin pane ta.

Ca toron ne ximicon Paulo cocon oro co howa to nanain Corinto

¹¹ Ac ca om coromicat xo' ta' paxi' a xira pain ca tomi' xec xec ne ca', ane wahu' pan co cuc cuc nanapa' pain ne. Wahu' pan xirara co taramaja xo' ma ta nanapa' ma'. Om paxi' na ca taxi' pan ta' ca', ane om taxi' tiquin' ca' cacapa' oro co iri' apóstolo urut xi' ma nana pahu' ne. Om ca taxi' tiquin' camain' ca' cacapa' ta. ¹² Pe ho' iri inuhu' pane ne, an hwet mi' ac xuhu' na pain oro ca to' querec pin' mahu' pain ca iri' apóstolo ne ca'. To' i'ina paxi' napa' oro carawa jimao pane, ane querec tain ne. An hwet mi' ac xuhu' na pain ca hwara' opa nucun Iri' Jam quem, pain ca ara tain ca om ara taxi' ne ca wari' wa, wa wa ac hwein na quem. ¹³ Cain' ca coromicat mi' mahu' quem? Quep xiho' inuhu' pane, quep xiho' ac toton na oro xucucun co cut in xucucun pain ca howa cocon Jeju quem. Ac wiricoco pi' pin mahu' pain ca quep xiho' xuhu' pane, jimama' e' pan hwe pain ca om mi' xine pain dinheiro ta xuhu' pane. Am mana' mahu' pain, am caracat ma mahu' pain ca om xiram pa' xine xuhu' pane ra? Tara pahu', mo ta coromicat mi' ac i ma' mahu' ma', mana' mana' om pin xine pain ca caracat ne me.

¹⁴ Je ca tomi' xuhu' ca'. Je win 3 pin ta' ne ca hwet xim xuhu' pain xocori ca', wara awori ina quem. Om ta mi' xine xuhu' pain caramajuhu' quem, xi param tain ta. Param e' inuhu' pain ca tomi' querec te pan mahu'. Xi na ne pain ca cut mi' cocon pain carawa mana cote caca oro hwijima' ta. Wiricoco pan xirara mana cote caca co cut mi' nonon pain carawa mana panxicaca ta. ¹⁵ Je ca tomi' xuhu' ca'. Tomi' querec te ina pain ca quep xiho' e' xuhu' ca'. Mi' mi' pi' pin xuxuhu' pain oro caramaju na inuhu', tomi' querec te ina pain ca mi' pan xije pain cwere pahu', pain ca quep xiho' xim xuhu' ca' quem, xi noc camain' xuhu' ta. Cain' cain' xihwe quem? Ac ca tomi' querec te wijimain e' mahu' a xira ta. ¹⁶ Je i ma' ira, taxi' paxi' mahu' pain ca om winim' e' xuhu' pain caramajuhu' pane. Ane ma' ma' wet caca oro win ma' nuhu' co mixein na xi' ma nanapa' pahu' ne. Cut noc xa nain dinheiro nexi' pane, mixein taxipa' na ta nanapa'. ¹⁷ Cain' cain' xihwe quem? Ma' na ca mixein ac xuhu' pane ra? Ma' na ca param ac tain caramajuhu' ca cut caca xerexi' co hwet nunuhu' pane pata' ra? ¹⁸ Mam' iri inuhu' con Tito cwa' pane ne, pain ca ja' ja' ron ton coxari' co win howa iri' cwa' quem, hwet ac cucuhu' na. Cain' cain' ca Tito quem? Mixein nuhu' ra? Ma' na ca param ac cain caramajuhu' ra? Om na ta. Xi ac

wirico ac wirico ara urut pain ca coromicat xo' nuxut, je pain ca xuruxut xo' nuxut ta.

¹⁹Am coromicat mi' ca' maparut: Tomi' narain ho' taxipa' e' xucucun pain ca xirao' nucucun ta, am ac i ma' ne ca coromicat mi' maparut ma'. Om na ta, ta coromicat mi' ac i ma' maparut me. Taxi' naparut Iri' Jam pain ca tomi' iri'o' urut ca', xi om ne ca mi' pan ara caparut pain ca tomi' iri'o' nuxut Cristo ta. Je ca tomi' xuhu' pain ca tomi' querec te xuhu' ca' xere. To' hwara' opa e' xim urut pahu'. Je ca taramaja mi' urut pahu' pain oro ca ara nuxut ta. ²⁰Toron napa' xumu pahu'. Mo ta aram aram hwet pa' xuhu', am om hohot mahu' pain oro ca ara nuhu' ma', am om hohot pan xuhu' pain oro ca ara ne quem. Tara pahu'. Am tomi' mana' caracan xujuhu'. Am noc mi' xujuhu' pain oro ca ara hwe ma'. Am hwerehwet ne mixitahu' pain ca mana' xujuhu'. Am joc in pin xujuhu' pain ca ara e' hwein ca param pan nuhu' ma'. Am tomi' xina hwein waracocon oro win ma' hwe ma'. Am tomi' xec xec hwe pain ca xin to hwe ma'. Am ja' teretem xujuhu' ma' quem. ²¹Toron napa' xumu pahu'. Mo ta aram aram in hwet xuhu', am to' wixipa' capa' Iri' Jam pahu'. Am tomi' xaxa' ta', am aca ta' cocon oro win ma' nuhu' co caracat nana pane, co om cwirin' querec nanain oro ca quep ximama' nucucun, je pain ca tamanain to nucucun pain ca win xumu cacain oro ca om awi wa ma' quem.

Ca hu mam' tococwa oro co to nanain Corinto

13 Hwet xim inuhu', je win 3 pin ta' ne ca hwet xim xuhu' ca'. Je i ca' ca xirao' pe xine pain capiacaon Iri' Jam:

Mo ta coromicat mi' tocwa pain ca caracat wa wari' ma',
mo ta caracat na co ma' ta tocwa ma'.

Na e' na pain ca tocwan caca co querec urut con pain
ca caracat nucun ta nana ma'.

Am ma' 2 caca, am ma' 3 caca,
taxi' urut con pain ca caracat ca ma' tatara.

²Wara hu inuhu' pain ca pe ho' qui' xuhu' pain cara pane, pain ca ma' 2 pin ne ca hwet qui' xuhu' pane. Pe ni ca' paxi' inuhu' pain xocori ca', ane xirao' mi' ho' toton oro co wara caracat nana pahu' pane ne, xirao' mi' inonon oro xucucun co caracat nana ma' quem: In hwet iri xuhu' ne, om ta xiram pa' toton ta. ³Tomi' mip ca' ara xi' mahu': To' querec pin' xut

pain ca tomi' wi quem Cristo pain oro ca tomi' nem ta mahu'. Je i ma' ira, querec pin' pan jun pata' ta, xi hehe xim cuhu' pain ca pan to' cain tarajuhu' pata'. An hwet mi' ac cuhu' tara pain ca hwara' opa nucun quem. ⁴Iri'o' paxi' na ca om an hwet pe cain ca hwara' opa nucun Cristo pain ca tatatain mi' qui' tocwa pain pana pane, ane mam' e' mami' ca pain ca hwara' opa pan nucun Iri' Jam ne. Ac i ma' urut quem. Om paxi' na ca hwara' opa pan urut pain ca win cwere urut con Cristo cwa', ane mam' e' wi urut con pain ca hwara' opa nucun Iri' Jam ne. Mi' ac caparut tara pain ca hwara' opa nucun pain ca quep xiho' xim urut pahu' quem.

⁵Noro pan jein xumuhu' ta. Am howa iri'o' hun Jeju, querec pin' pan ac xujuhu' tara. Am xuruxut xo' hwe, am tomi' ha' hun. Om ca querec pin' hun Cristo Jeju pain ca pe ho' cuhu' pain xumuhu' ra? Tara pahu', am om howa iri'o' hun, am om hohot hun quem. ⁶Param urut pahu' pain ca querec pin' maparut pain ca hohot urut con quem. ⁷Je ca tomi' mi' urut pahu' con Iri' Jam quem. Mi' roron pain ca om pan teretem camain' caca ta urut con pahu'. Om paxi' na ca param urut cocon oro wari' pain ca querec pin' cacaparut pain ca hohot urut con Iri' Jam pain ca taramaja nuxut ca', om na. Param e' urut pahu' pain ca xuruxut xo' hwe ma'. Hohot paxi' naparut pain ca tomi' ximama' cacaparut oro wari' pain ca om ca taramaja xo' hwe ta cacaparut pahu'. Je i ma' ira urut ta. ⁸Xi ha' caparut pain ca ari urut pain capijacon Iri' Jam ca iri'o' ta. Ha' e' na pain ca pijim' hwet xo' urut pahu' pain ta. ⁹Je ca tomi' xuhu' ca'. Om paxi' tara ca hwara' opa pan urut. Je i ma' ira, tomi' querec te cara urut pain ca xuruxut xo' pan nuhu' ma'. Je ca tomi' mi' urut pahu' con Iri' Jam quem. Mi' roron pain ca horon horon tiquin' wa pain ca xuruxut xo' nucucun ta urut con pahu'. ¹⁰Je ca xirao' mi' xuhu' pain ca pe ni ca' xuhu' ca'. Ma' ta wara xuruxut xo' hwe pain ca aram aram hwet xim xuhu' ca'. Ma' ta om na e' ne pain ca an hwet mi' xuhu' pain ca hwara' opa ne pain ca pan to' tain tarajuhu' ta inuhu'. Wirico Taramaxicon nexi' ara xi' na co mi' napa' pain ca hwara' opa ne ca'. Ma' ta quep xiho' momon, ma' ta om quep em' momon ta napa' pahu'.

Ca pi' pin ne ca xirao' nucucun

¹¹Je i ca' ca xirao' ne ca' xere. Tomi' querec te je me. Win xumu jein ca xuruxut xo' hwe. Tomi' ha' xine pain ca hu xuhu' ca'. Ac je ac je ari tara ca coromicat nuhu'. Tomi' querec te xujuhu' pain ca to ho' xujuhu' ma'

quem. Pe ho' ac cuhu' tara Iri' Jam. Wirico co mi' napari' pain ca om noc xijexi' ca', wirico co mi' napari' pain ca om toron ne ximixi' ca' quem.

¹² An hwet mi' xujuhu' pain ca tomi' querec te xujuhu' ma'.

Tomi' tomi' xam' nunuhu' oro wari' nucun Iri' Jam cwa', pain ca mam' pe wet urut pahu' ta cucuhu' ca'.

¹³ Param inon Taramaxicon nexi' Jeju Cristo pain ca xiram pa' cuhu' ma', pain ca mi' e' cuhu' pain ca param nucun. Param inon Iri' Jam pain ca to' querec pin' cuhu' pain ca om noc camain' cuhu' ma'. Param inain Tamataracon pain ca mi' cuhu' pain ca jao jao ma' xujuhu' pain ca to ho' cuhu' ma' quem. Je ca param mi' param mi' xam' xuhu' ma'.

Je i ca' ca xirao' ne ca'.

Gálatas

Ca xirao' mi' tococwa co howa nonon Jeju pain Galácia

1 Paulo ina pain ca xirao' mi' xuhu' ca'. Apóstolo ina, xi om ne ca tomi' hwet rain capija ara capa' Jeju Cristo ta. Om ca wari' caca co apóstolo ra nanapa', om ca wari' ca co mi' napa' pain ca taramaja ne pain ca apóstolo ta' ca' quem, om na. Wirico Jeju Cristo co apóstolo ra napa'. Wirico Cotere' Iri' Jam ma', co to' e' mami' non Jeju pane, wirico co apóstolo ra napa' ta. ²Xirao' mi' inuhu' pain ca howa hun Jeju ma', pain ca cut in xujuhu' pain Galácia ma'. Mam' pe wet urut cocon ta nunuhu' oro xerexi' co to ho' nanapa' cwa' quem.

³Param inon Cotere' Iri' Jam con Taramaxicon nexi' Jeju Cristo pain ca quep xihó' cucuhu' pain ca mi' cucuhu' pain ca param nucucun. Param inonon pain ca mi' cucuhu' pain ca om toron ne xumuhu' quem. ⁴Taramaxicon nexi' Jeju Cristo ma', om ca narain ho' xucun pari'. Mi' pin cahó' napari', xic am ca' napari' pain ca caracat nexi'. To' witan napari', ma' ta ha' cuhu' pain ca om an xihó' mami' huhun pain oro ca pan teretem nucucun oro wari' co om howa nanapa' ta napari'. Je ca param mi' capari' Cotere' Iri' Jam. ⁵Hohot na pain ca tomi' querec te cara xun Iri' Jam co awi tamana ta! Amém, iri'o' na ca tomi' ne ta.

Ca ma' xica' pe ne capijacon Iri' Jam ca tomi' hwet napari' con Jeju

⁶Wa inuhu' pain ca an pe hap pin hun Iri' Jam ma', co tora' nuhu' pane. Om xi tora' cuhu', ane xiram pa' e' cuhu' Cristo ne. Je xi om howa ni ca' hwein capijacon Iri' Jam ca tomi' hwet napari' con Cristo quem? Ac ca howa hwein na xijein topac ca tomi' hwet napari' con Cristo ta! ⁷Xi ma' ne xijein capijacon Iri' Jam ca tomi' hwet napari' con Cristo ta. Tomi' e' inain i ma' pahu', pain ca xijein capijacon Iri' Jam con Cristo ta xuhu' ca', xi om ne ca ma' ara caca wari' co to' i'ina nunuhu' ma', co pijim' jimama'

nunuhu' pain ca an in xin paxi' cacain capiijacon Iri' Jam con Cristo ma'.
⁸Taraju wet xine e'. Oro wari' co pijim' ni ca' nanain capiijacon Iri' Jam ca pijim' urut pahu' pane, tomi' noro ac tococwa tara ta. Am warut xira, mo xi pijim' ni ca' urut pain capiijacon Iri' Jam ca wara pijim' urut pahu' pane, tomi' noro ac caparut xira Iri' Jam. Am jam co taramaja mi' non Iri' Jam ma', co maqui' nain pawin cain xira, mo xi pijim' ni ca' cain capiijacon Iri' Jam ca wara pijim' urut pahu' pane, tomi' noro ac tocwa xira quem. ⁹Je ca tomi' urut pahu' pain cara pane. Tomi' mami' inuhu' pain xocori ca' quem. Wari' co pijim' ni ca' nuhu' pain capiijacon Iri' Jam con Cristo ma', pain ca pijim' ni ca' cain capiijacon Iri' Jam ca wara howa hwe pane, na e' na pain ca tomi' noro tocwa ta!

¹⁰Cain' ca coromicat mi' mahu' pain ca xirao' mi' ac i ca' xuhu' ca' quem? Tomi' querec te xirarapa' na nonon oro wari' ta mahu' ra, ac i ma' na ca coromicat mi' mahu' quem? Om na ta! Tomi' querec te pan xirapa' Iri' Jam na ina. Mo xi win xumu toton oro wari' pain ca tomi' querec te pan tatarapa' ta toton ca', mo xi coromicat ac i ma' ta', om xi ha' capa' pain ca taramaja mi' ton Cristo. Taramaja mi' e' xitoton oro wari'.

¹¹Je ca tomi' xuhu' ca' xere, taraju pa' jein ca tomi' xuhu' ca'. Capiijacon Iri' Jam ca pijim' xuhu' con Jeju Cristo cwa', om ca maqui' nein ca coromicat nucun wari'. ¹²Om ca wari' ca co tomi' hwet napa' pain. Om ca wari' ca co tomi' xo' napa' pain. Wirico Jeju Cristo co an hwet mi' napa' pain ta.

¹³Wara taraju mahu' pain oro ca ara ta' pain cara pane, pain ca tomi' ha' taxipa' tain oro ca tomi' ha' caca oro win judeu ta' pane. Taxi' mahu' pain ca ja' tequi' ja' tequi' quep em' toton oro wari' nucun Iri' Jam co cut in xucucun pain ca howa cocon Jeju pane. Om ca xiram pa' camain' toton, howa maho' jun Jeju ta inonon, to' om to' om pi' pin toton ta inonon ira. ¹⁴Tomi' ha' taxipa' inain oro ca xirao' nucucun oro hwanana ne pane. Ma' nana oro win judeu ta' co win camara' nanapa' pain ca pije' nuxut pane quem, ma' paxi' nana co tomi' ha' taxipa' nanain quem. Ane tomi' ha' tiqin' ca' toton pain oro xucucun win judeu ta' ne. Jain jain tamana

1.7 Howa ca' nana oro co to' i'ina nonon pain ca pijim' jimama' cocon pain capiijacon Iri' Jam con Cristo: Hohot paxi' na pain ca howa tocwa Cristo, ane hohot tamana pan ne pain ca tomi' ha' cara xine oro ca xirao' nucun Moisés ta nana. Oro wari' co howa e' nonon Cristo ma', mo ta om tomi' ha' tomi' ha' cara cacain oro ca xirao' nucun Moisés ma', om ta witan camain' caca ta nana, ac i ma' na ca howa nucucun.

ina pain ca tomi' ha' tomi' ha' pi' pin tain oro ca xirao' nucucun hwanana nuxut pane.

¹⁵Ane xiram pa' pan capa' Iri' Jam ne. Wara tora' napa' pain ca pe pe wet tain monocwam na' pane, pain ca om pan' querec ta' pane. Wara taramaja mi' ne ta napa' pane. Om xi tora' capa', xi iri' wari' ta' ta. Ane xiram pa' pan capa' ne. Maqui' pin iri na xec nein ¹⁶ca an hwet mi' xim capa' con Panxica ne, mi' ac capa' na pain ca querec pin' ton pain iri' xumu ca'. Ma' ta pijim' hwet momon con oro wari' co om judeu nana ta napa'. Tomi' ac i ma' iri napa' ne, om ca pirao' camain' ton wari' pain ca cain' cain' xita' ne ton, om na. ¹⁷Om ca mao hap tain Jerusalém, om ca hwet toton co wara apóstolo ca' nanapa' quem, om na. Mao e' inain macarain Arábia cain. Aram aram in mao ac tain na Damasco ma', je i ma' wixinain cidade ca mao ta' pane.

¹⁸Ma' 3 pin iri napa' cawaxi' pain ca howa ton Jeju ne, mao ac tain na Jerusalém. Querec ton Pedro ta ina, hwet ac ton na, ma' 15 ac ne na xec pain ca pe ho' ton pane. ¹⁹Querec inon Tiago coxa' ca Taramaxicon nexi' quem. Om ca querec toton oro xucucun apóstolo, xica' to ac caca na caram ma' Pedro con Tiago co querec ta' pain ca xo' mao tain Jerusalém pane. ²⁰Iri'o' na ca xirao' mi' xuhu' ca', taxi' napa' Iri' Jam pain ca om mixein xuhu' ca'.

²¹In ca' iri inain Jerusalém ne, mao ac tain na macarain Síria je macarain Cilícia ma'. ²²Om ca querec pin' querec cacapa' oro co howa nonon Cristo pain oro xijein cidade pain Judeia pane, om om wet na ca querec cacapa' pain tucu pane. ²³Taraju e' nanain ca tomi' nucucun oro co howa nana pane, pain ca tomi' hwet xucucun pata'. Wirico co ma' wari' co ja' tequi' quep em' napari' pain ca howa xun Jeju pane, howa maho' jun Jeju ta paxi' napari' pane, ane pijim' pin cain capijacon Iri' Jam con Jeju pain xocori ca' ne na ca tomi' hwet xucucun pata' pane. ²⁴Tomi' querec te tamana ac cocon na Iri' Jam pata'. Awi na Iri' Jam, to' howa pin non Paulo ta nana pata'.

Ca tomi' querec te cocon Paulo oro xucucun apóstolo

2 Cawaxi' pa' ac capa' na, cawaxi' pa' mami' ac capa' na, ma' 14 pin iri na cawaxi' pain ca querec qui' toton pain Jerusalém pane ne, in mao ac tain na Jerusalém. Ja' ja' napa' Barnabé. An mao inon Tito quem. ²Mao

inain Jerusalém, xi om ne ca mao rain i cain ara capa' Iri' Jam ta. Tan' mama' iri urut ne, cut in ac xujuxut na cocon oro co querec wet nonon co howa nana ma', co ac ca taramaxicon caca na ma'. Xica' to urut pain ca cut in xujuxut. Tomi' xo' ac toton na pain ca taramaja ne ca', pain ca pijim' toton co om judeu nana ma', pain ca pijim' hwet toton pain capijacon Iri' Jam ca tomi' hwet napari' con Jeju. Ma' ta taxi' mahu' pain ca pijim' ta' ca' inonon, ma' ta hohot na ca pijim' nem mahu' quem inonon. Mo xi om hohot cocon ca pijim' ne ca', taramaja ximao ac ta' xira pain ca pijim' toton oro co om judeu nana ta. ³Om paxi' na ca judeu ca Tito ma', co ja' ja' napa' pain ca hwet toton pane, ane om cuc cuc cocon pain ca wac xirac tatarain taparinain ca xirac nem ta cocon ne. ⁴Ma' paxi' nana oro xucucun co wac xirac teterem ta nonon Tito. Corom hwet taparu nanaparut pain ca cut in nuxut, mixein nana, ac ca howa iri'o' ta' ca' tara me nana. Tocojin' nanaparut pain ca om tomi' ha' mami' urut pain oro ca xirao' nucun Moisés pane, je pain ca to' witan pin caparut Cristo Jeju pain ca win cwere pin urut con quem. Je xi tomi' ha' cara hwein oro ca xirao' nucun Moisés pane quem nanaparut. ⁵Om ca ha' camain' urut cocon. Ma' ta om wanan xine ca pijim' mixein wa pain ca pijim' iri'o' wa ta urut cocon. Ma' ta howa cara hwein capijacon Iri' Jam ca iri'o' con Jeju ta urut pahu' quem.

⁶Hohot na ca pijim' nem, pijim' pijim' tiquin' rain ta nanapa' co querec wet nonon co howa nana pain Jerusalém ma', co ac ca taramaxicon caca ne ma'. Tara cocon, am taramaxicon caca, am om taramaxicon caca. Je i ma' ira ina, xi ac wirico ac wirico pi' pin ara iri' con Iri' Jam ta. ⁷Je i ma' ta, je ca tomi' xuhu' cocon, tomi' ca' nanapa' co querec wet nonon co howa nana: Hohot na ta nanapa', xi om ne ca querec pin' ara cacapa' pain ca tomi' capa' Iri' Jam ta. Pijim' roron co om judeu nana ta nem Iri' Jam, pijim' roron pain capija con Panxita' ta nem ta nanapa'. Win ne ca pijim' roron oro judeu ta con Pedro cwa' quem nana. ⁸Iri' Jam ma', co quep xiho' non Pedro pain ca pijim' cocon co judeu nana ma', wirico co quep xiho' napa' pain ca pijim' toton co om judeu nana ma' quem. ⁹Je ca tomi' cacapa' Tiago con Pedro con João ma', co querec pin' wawa pain ca to' hwarar' opa cocon co howa nana ma', querec pin' ac cacapa' na pain ca mi' pan capa' pain ca taramaja wa Iri' Jam cwa'. Tomi' querec te ac cacaparut na, tomi' querec te nanapa', tomi' querec te nonon Barnabé cwa' quem. Taramaja wi iri' ca' ira nanaparut. Wahu', hwet jujun co om judeu nana ma'. Warut iri na ne, hwet ac urut cocon tara co judeu nana cwa'.

Ac i ma' tara ca taramaja wi xi' ca' nanaparut. Ma ac urut cocon na quem.
¹⁰Xica' pe na i ca', pain ca hu cacaparut: Ta ji'am pin huhun co om nonon carawa me ta nanaparut. Wara coromicat ac i ma' ina quem, wara quep xiho' tamana inonon co om nonon carawa.

Ca pan to' cain taraxicon Pedro Paulo

¹¹Ane ma' pin ne carawa ca to' i'ina naparut pain Antioquia ne. Maqui' iri nain Antioquia Pedro ne, tomi' in pin ac ton na pain iri' tocon. Om ca ara xo' ma ta inon. Em' ma ta inon. ¹²Xi om ne ca pan tem ac i ca' ara ca pane ta: Pain ca xo' hwet caparut pain Antioquia pane, cao' pe ho' taxipa' nonon oro xerexi' co om judeu nana. Maqui' pin iri nanain Jerusalém oro win ma' ca Tiago ne, co cuc cuc nonon co om judeu nana pain ca wac xirac tatarain taparinain ca xirac nucucun ta cocon ma', cao' pe ho' cao' pe ho' om pin ac cocon na co om judeu nana Pedro. Xi jin' ara tococwa co xo' maqui' nana ta. ¹³Oro xucucun xerexi' co judeu nana ma', an xiho' pin nonon Pedro pain ca ac ca iri'o' ta' ca' tara me ca ma' quem. Querec pin' paxi' nonon pain ca om ara xo' ca ma', ane an xiho' cocon ne. Wirico Barnabé ma' quem, an xiho' pin nonon pain ca mixein nucucun.

¹⁴Querec pin' iri inonon pain ca om xuruxut xo' nucucun ne, pain ca om tomi' ha' cacain oro ca hu nucun Jeju ca iri'o' ma', ca ara je capari' ma', tomi' in pin ac ton na Pedro. Taraju taraju pi' pin nanapa' pain ca tomi' in pin ton quem. Tomi' ca' inon: Cain' cain' xima quem Pedro, ac i ma' na ca tomi' ton ca'. Judeu paxi' ma, ane om an xiho' mami' momon oro hwanana nexi' co tomi' ha' taxipa' nanain oro ca xirao' nucun Moisés ne. An xiho' pin momon co om judeu nana cwa'. Cain' cain' xima quem? Ac ca cuc cuc momon a xira co om judeu nana ma', ac ca an xiho' jujun oro judeu pain ca tomi' ha' cacain oro ca xirao' nucun Moisés ta momon na. Ac i ma' na ca tomi' in pin ton ma'.

¹⁵Tomi' tomi' tiquin' ac ton na: Judeu pan iri' pain ca wari' iri' ca', xi om ne ca judeu ara caca mana cotere' cacam waram xi' ta. Om ca an xiho' xuxun oro co om judeu nana ma', co om querec pin' nonon Iri' Jam ma'.
¹⁶Ac i ma' paxi' iri' pain ca judeu iri' ca'. Ane taxi' xin i ca' ne: Om ca to' hohot capari' Iri' Jam pain ca tomi' ha' taxipa' xin oro ca ara je capari' pain ca xirao' nucun Moisés ma', om na. To' hohot napari' pain ca howa xun Jeju Cristo. Je ca howa iri' con Cristo Jeju pain ca judeu iri' ca' quem.

Ma' ta to' hohot capari' Iri' Jam pain ca howa xun Cristo ta iri'. Om ca to' hohot capari' pain ca tomi' ha' xin oro ca ara je capari' pain ca xirao' nucun Moisés ta iri'. Xi to' hohot ac tocwa wari' pain ca tomi' ha' e' cain oro ca ara ra con Iri' Jam pain ca xirao' nucun Moisés ta iri', ac i ma' na ca coromicat nexi' pain ca howa pin xun Cristo Jeju ta. ¹⁷ Jain jain tamana urun Iri' Jam pain ca to' hohot capari' pane, xi om ne ca win cwere ara xun Cristo pain ca howa xun ta urun. Caracat hwe ta ac cacapari' na oro win judeu iri' quem. Win caca oro co om judeu nana ma', co om tomi' ha' nanain oro ca ara je cocon Iri' Jam pain ca xirao' nucun Moisés ta nanapari'. Cain' cain' xirara quem? Wirico Cristo xira co to' caracat napari' ra? Om na ta!

¹⁸ Taraju wet ne e', tomi' pan xije pain ca tomi' ha' tain ca xirao' nucun Moisés pain cara pane. Tomi' ha' inain ira. Querec pin' iri inon Cristo ne, querec pin' iri inain oro ca xirao' nucun Moisés pain ca om to' witan ac capa' ne, an pe pin ac tain na. Mo xi in hwet tain, mo xi tomi' ha' mami' tain, ma' ta witan ta', mo xi coromicat ac i ma' ta', je i ma' xira ca caracat pan ta'. ¹⁹ Tomi' ha' tain paxi' inain oro ca xirao' nucun Moisés pane, ma' ta hohot ton Iri' Jam ta ina pane. Ane om to' hohot pin capa' con ne. Je ca ma' pin capa' xumu ca'. Ac ca mi' pin ca' tain na pain ca an pe pin tain quem, ma' ta tomi' ha' e' ton Iri' Jam pain ca win xumu ton ta ina. ²⁰ Ac ca mi' pin wi ta' na con Cristo quem, pain ca mi' pin pe cain panaxicon pane. E' e' wet paxi' ina, ane om e' pan ta' ne. Wirico Cristo co e' pe ho' napa' pain cwere. Tomi' ha' e' inain ca param nucun. Pain ca e' e' wet ta' pain macan' ca', howa cara inon Panxica Iri' Jam co om noc napa' cwa', co om nain ho' xucun pata' pain ca mi' pin caho' xim ta capa' ca'. ²¹ Om ca miri'om ton Iri' Jam pain ca xiram pa' e' capa' quem, om na. Mo xi to' hohot capari' ca tomi' ha' xin ca xirao' nucun Moisés ma', je i ma' xira ca mi' pin ximao ca Cristo ta.

**Ca om to' hohot capari' ca tomi' ha' xin ca xirao' nucun
Moisés. Ca to' hohot e' capari' ca howa xun Cristo**

3 Je ca tomi' xuhu' ca' oro win howa ta' pain Galácia. Wa inuhu' me, xi coromicat xo' hwe ta. Ma' co mixein nuhu' ma' quem? Om ca pijim' hwet xo' xuhu' pain ca mi' pin nucun Jeju Cristo pain ca mi' pin pe cain pana pane ra? ² Ma' xica' pe e' na ca tomi' querec xim xuhu' ca', tomi' xo'

xine e': Para mi' cuhu' pain Tamataracon Iri' Jam quem? Mam' mi' nuhu' pain Tamataracon pain ca tama' tomi' ha' hwein ca xirao' nucun Moisés ra? Om ca mam' mi' cuhu' pain Tamataracon pain ca howa hwein oro ca pijim' urut pahu' ra? Je ca tomi' xuhu' ca', mi' nuhu' pain Tamataracon, xi om ne ca howa ara hwein oro ca pijim' urut pahu' pane ta. ³Cain' cain' xihwe quem? Para om coromicat xo' hwe ma' quem? Pain ca xo' howa ten qui' hun Cristo pane, je Tamataracon Iri' Jam ca meo nuhu' pain ca taramaja nein xumuhu'. Ma' tara ca ara pan ac hwein ca taramaja nein Tamataracon Iri' Jam pain ca to' hohot pan xijexi' ta hwe pain xocori ca' ra? ⁴To' i'ina pin iri nuhu' oro carawa pain ca xo' howa ten qui' hwe pane ne, jain jain tamana ac hwe na pain ca quep em' wa. Cain' cain' hwe quem? Jain jain ximama' hwe ra? Tara pahu' ta, am jain jain ximama' hwe. ⁵Para mi' cuhu' pain Tamataracon Iri' Jam quem? Para ara mi' cuhu' pain oro ca om ara taxi' ne ca wari' wa quem? Ara ac i ma' nuhu' pain ca tomi' ha' hwein oro ca ara je cuhu' pain ca xirao' nucun Moisés ra? Om na ta! Howa ara xi' hwein oro ca pijim' xihwe con Cristo ta. Je ca mi' cuhu' pain Tamataracon. Je ca ara mi' cuhu' pain oro ca om ara taxi' ne ca wari' wa quem.

⁶Je ca xirao' an pe xine pain capijacon Iri' Jam con Abraão pane: Howa non Iri' Jam Abraão. Je ca tomi' tocwa ma', tomi' pan non Iri' Jam. To' hohot pin inem, xi om ne ca howa ara mapa' ta non. ⁷Je ca tomi' xuhu' ca', taraju wet je e'. Oro wari' co an xiho' nonon Abraão ma', pain ca howa cocon Iri' Jam ma', wiricoco co iri' hwanana ne nonon Abraão. ⁸Je ca xirao' pe xine ca wara coromicat an pe xo' nucun Iri' Jam pane: Mo ta howa cacapa' oro wari' co om judeu nana ma', to' hohot pin ac toton tara ta. Je ca tomi' con Abraão ma' quem: Param mi' toton pain ca awi wa oro wari' pain oro xijein macan' pum ta non. ⁹Je ca taxi' xin i ca' quem: Oro wari' co howa nonon Iri' Jam ma', param mi' ac tococwa na pain ca awi wa. Win ca Abraão pane. Howa non Iri' Jam, param mi' ac tocwa na pain ca awi wa quem.

3.4 Mo xi to' witan tococwa pain ca tomi' ha' e' cacain ca xirao' nucun Moisés ma', je i ma' xira ca jain jain ximama' caca. Ane to' witan tococwa pain ca howa e' cocon Cristo ne. Je ca om jain jain ximama' caca ma'. **3.7** Hwanana ne nonon Abraão oro judeu, xi om ne ca wanxi' tiquin' wanxi' tiquin' ara caca waram winacon con panxica pane ta. Je ca wari' nucun Iri' Jam caca quem. Ane om an xiho' an xiho' pi' pin cocon Abraão pain ca howa nucun ne. Oro co an xiho' nonon Abraão pain ca howa nucun pain xocori ca' iri nana ne, wiricoco co iri' hwanana ne nonon ma'. Wiricoco co iri' wari' nucun Iri' Jam nana ta.

¹⁰Ane om ac i ma' ne cocon oro wari' co howa e' nanain ca tomi' ha' pan nucucun ne. Main tomi' noro toton pan nonon Iri' Jam, wap xuhu' ta nonon. Xi xirao' pe ara xine pain capiijacon Iri' Jam ta: Oro wari' co om tomi' ha' cara pi' pin nanain oro ca ara je toton pain ca xirao' nucun Moisés ca', tomi' noro toton, main wap toton ta, ac i ma' na ca xirao' pe xine pain capiijacon Iri' Jam ta. ¹¹Tomi' iri'o' ina, wara taxi' irin i ca': Om ca to' hohot xuhu' camain' capari' Iri' Jam pain ca tomi' ha' xin paxi' xin oro ca ara je capari' pain ca xirao' nucun Moisés. Je ca xirao' pe ne pain capiijacon, xirao' pe ca' na:

To' hohot ton inon wari' co howa napa'.

E' cara tara quem.

Ac i ma' na ca xirao' pe xine pain capiijacon Iri' Jam. ¹²Pain ca tomi' cocon oro hwanana Iri' Jam pane, tomi' ca' tata: Mo ta tomi' ha' cara hwein oro ca ara je xuhu' pain ca xirao' nucun Moisés ca', e' cara ac hwe tara ta tata pane. Om ca howa xine pain ca xiram pa' e' xuhu' ca' tococwa pain, tomi' ha' cara e' jein ta tata.

¹³Tomi' noro napari' Iri' Jam, xi tomi' ha' xo' ac xin ca xirao' nucun Moisés ta. Ane to' witan pan capari' Cristo ne, to' witan ca' napari' pain ca tomi' noro nucun Iri' Jam. Pe pan tain maxuhu', tomi' noro e' tarapa' pahu' ta napari'. Xi xirao' pe ara xine pain capiijacon Iri' Jam ta: Oro wari' co to' pa' pin wawa pain ca tatatain mi' wawa pain pana ma', wiricoco co tomi' noro ca Iri' Jam ta na capiijacon Iri' Jam. ¹⁴To' witan ca' napari' pain ca tomi' noro nucun Iri' Jam Jeju Cristo, ma' ta hwet cocon ca wara param mi' tocwa Abraão oro wari' co om judeu nana ta na pain ca param mi' toton pain ca awi wa oro co howa nanapa' ta tococwa. Ma' ta mi' xuhu' pain ca wara tomi' pe ne ca', pain ca mam' mi' xuhu' pain Tamatara pain ca howa hun Cristo ta napari' Iri' Jam quem.

Ca om an in ac xine ca wara tomi' pe nucun Iri' Jam

¹⁵Tomi' xin i ca' quem xere, pain ca tomi' xo' xijexi' pain ca wari' nexi' ca'. Am ma' 2 caca wari' co tomi' xo' xucucun ma', wara tomi' pe mi' xucucun pain ca tomi' nucucun. Xirao' an pe iri nanain ca tomi' xo' nucucun ne, xirao' xo' ac cacain na wixicocon. Om ca ma' camain' ca wari' co ha' non pain ca xic am cain ca tomi' xo' nucucun, om ca ma' camain' ca wari' co ha' non pain ca an in cain quem. Xirao' an to iri nanain wixicocon

pain ne, maxinain cara ac ne na. ¹⁶Ac i ma' na ca tomi' pe nucun Iri' Jam con Abraão pane quem. Wum, winam co main pan' ta' ma', tomi' pe mi' inuhu' pain ca param mi' xuhu' pain ca awi wa ta non pane. Om ca tomi' ac i ca' con: Tomi' pe inem cocon waram winam co main camara' xi' nana ma', om ca xirao' pe ac i ma' ne pain capiijacon pane. Xi mija caca waram winacon co tomi' mi' ca pane ta. Tomi' ca' e' non: Tomi' pe inem con winam co main pan' ta' ma' ta non. Xica' pe na winacon co tomi' mi' ca, wirico Cristo ta. ¹⁷Je ca tomi' xuhu' ca', taraju pa' je e': Win ne ca om xic am ac xine ca tomi' xo' xucucun wari' ma', om ca xic am ac xine ca tomi' an pe xo' nucun Iri' Jam con Abraão quem. Tomi' xo' iri non pane ne, om ca tomi' xo' querec con Moisés pane, ame hwe e'. Pi' pin iri na ca 430 ne cawaxi' pain ca tomi' xo' qui' con Abraão pane ne, ma' ac ca na Moisés. Xirao' pe rain ca tomi' ne ca', tomi' ha' tatarain oro wari' ne ta ac con na Iri' Jam. Ca xirao' nucun Moisés ma', om ca to' om pin ac nein ca wara tomi' an pe xo' nucun Iri' Jam con Abraão. ¹⁸Mo xi tomi' ca' capari' Iri' Jam: Mo ta tomi' ha' cara hwein oro ca ara je xuhu' pain ca xirao' nucun Moisés ma', ara mi' ac xuhu' tara pain ca wara tomi' pe xuhu' ca', pain ca to' witan e' xuhu' ta, mo xi tomi' ac i ma' capari', om xi tomi' pe e' capari' pain. Ane tomi' pe e' con pain Abraão Iri' Jam ne, ara mi' e' xim pain ca wara tomi' pe xim ca', om ta pagar mapa' pain, ara mi' e' xim pain ta na ca tomi' pe con pane.

¹⁹Para mi' cain ca xirao' nucun Moisés Iri' Jam quem? Om na, tomi' pe cain' non pain ca tomi' nucun Abraão pane, aram aram mi' ac cain na ca xirao' nucun Moisés. Ma' ta querec pin' xujuhu' pain ca caracat nuhu' ta nonon oro wari' nucun. Mao ac ne ma' tara pahu', maqui' pa' ac cain tara winacon Abraão co wara tomi' pe ta' pane nonon. Oro jam co taramaja mi' nonon Iri' Jam pane, wiricoco nana co tomi' hwet nonon pain Moisés pane, tomi' hwet tiqin' mi' ac tococwa na pain ca tomi' nucucun oro wari' nucun quem. ²⁰Ane om ca wari' co tomi' hwet tiqin' mi' non pain Abraão ca tomi' pe nucun Iri' Jam ne. Wirico pan Iri' Jam co tomi' hwet non pain Abraão.

²¹Cain' ca coromicat mi' hwein ca xirao' nucun Moisés quem? Tomi' in pin nain oro ca tomi' pe nucun Iri' Jam pain ca tomi' xo' con Abraão pane ra? Om na, om ca tomi' in pin camain' xijein ta! Mo xi to' e' cara capari' ca tomi' ha' nexi' ca', je i ma' xira ca to' hohot nuhu' ca xirao' nucun Moisés ta qui' capari' quem. ²²Ane xirao' pe ca' xine capiijacon Iri' Jam ne:

Caracat caracat pi' pin nana oro wari' ta napari'. Ac ca quep xat capari' na ca hwara' opa nein ca caracat wa. Ma' ta ara mi' xuhu' pain ca wara tomi' pe mi' xuhu' ca' napari' Iri' Jam. Mo ta howa hun Jeju Cristo, ara mi' ac xuhu' tara pain ca wara tomi' pe mi' xuhu' ca' napari'.

²³Warut pain ca judeu urut ca', pain ca om maqui' querec ne xec nein ca howa pin tocwa Cristo pane, ac ca quep xat cara caparut na ca xirao' nucun Moisés. Ac ca tao' to caparut na pain xirinain ca tao' to tao' to to wa. Pain pain, aram aram an hwet mi' ac caparut na pain ca tomi' pe nucun Iri' Jam ma', pain ca to' witan xim caparut pain ca howa xut con Cristo. ²⁴Ac i ma' na ca querec wet caparut ca xirao' nucun Moisés pain ca om maqui' querec ca Cristo pane. Hu naparut, tomi' xo' naparut, xuruxut xo' je ta naparut. Pain xocori ca' iri na ne, pain ca maqui' pin ca Cristo cwa', to' hohot pin ac caparut na, xi om ne ca howa pan ara xut con ta. ²⁵Je ca tomi' xuhu' ca', maqui' pin na Cristo pain xocori ca'. Howa pin ac urut con na. Je ca om hwara' opa mami' caparut ca xirao' nucun Moisés pain ca tama' querec wet caparut quem.

²⁶Je ca tomi' xuhu' ca'. Wahu' pain ca judeu hwe ma', wahu' pain ca om judeu hwe ma' quem, mana panxica Iri' Jam mana panxica Iri' Jam pi' pin hwe, xi om ne ca howa ara hun Cristo Jeju ta. ²⁷Xi win cwere pin ara hun Cristo pain ca an hwet hwein ca howa nuhu' pain ca ja' xihwe pain com pane ta. Ac ca to hun na, win ne ca to xun xocoricon wom cwa', ac i ma' hun Cristo pain ca win cwere pin hun. ²⁸Pain ca win cwere pin xun ca', an xiho' pin xijexi', om ca querec jimama' ca' xijexi' con Iri' Jam. Warut pain ca judeu urut ca', wahu' pain ca om judeu hwe ma' quem, an an ari xijexi'. Co taramaja mi' e' nonon xucun wari' ma', co om taramaja mi' nonon xucun wari' ma' quem, an an ari xucucun. Ca tarama' nexi' ca', ca narima' nequequem oro narima' ma' quem, an an ari xijexi'. Ac ca xica' pe ne na ximixi' pain ca wari' nexi'. Xi om ne ca win cwere ara xun Cristo Jeju ta. ²⁹Je ca tomi' xuhu' ca'. Pain ca mene pin cuhu' Cristo ma', iri' hwanana ne pin ac hun na Abraão cara pane. Wara ara mi' xihwe pain oro ca wara tomi' pe nucun Iri' Jam. Win ne ca wara tomi' pe con pain Abraão pane ta.

Ca mana panxica Iri' Jam pin iri'

4 Je ca tomi' xuhu' ca', pain ca mana panxica Iri' Jam iri' ca'. Noro jun panxica wari' co caramaju ma'. Main cut tarain oro caramaxicon cote ca. Pain ca pije' pije' wet nucun ma', main cut tain paxi' nain oro caramaxicon cote ca. Ane om cut querec cain ne. An xiho' e' nonon oro wari' co taramaja mi' e' nonon cote ca. ²Ma' nana wari' co querec wet nonon pain ca pije' pije' wet ca ma', ma' nana co querec wet nanain caramaxicon cote ca quem. Querec wet querec wet ca' nonon, maqui' pa' ac con na xec nein ca wara coromicat an pe xo' ca cote ca pane, pain ca hwará' pin iri tara panxita' cwa' ne, cut pan ac cain tara caramaju, mene ac cain tara quem ca pane. ³Ac i ma' paxi' iri' pain ca om witan querec iri' pane. Ac hwijima' iri', tomi' ha' ximama' e' irin oro ca howa ximama' iri' pain macan' ca'. Om ca tomi' in pin ac xin. ⁴Ane maqui' pa' capari' iri' xec nein ca coromicat an pe xo' ca Iri' Jam ne, pain ca mam' xim xuhu' con Panxita' cwa' capari' pane. Hwet roron oro wari' pain macan' ta non pari'. Wari' pin na, wari' na jicon co wijima non. Judeu na quem, tomi' ha' taxipa' nain ca xirao' nucun Moisés pane. ⁵Mam' napari' con, ma' ta to' witan ca' cuhu' pain ca wap wa pain ca om tama' tomi' ha' ac hwein ca xirao' nucun Moisés ta napari'. Ma' ta mana panxita' pin xuhu' ta napari' quem. ⁶Mana panxica Iri' Jam iri' ca' ira. Je ca mam' capari' pain Tamataracon Panxica. Corom pe rain ximicocon ta nain pari'. Je Tamataracon Panxica ca tomi' wi napari' pain ca Te Iri' Jam xun Cotere' cwa' quem. ⁷Je ca tomi' xuhu' ca'. Om ca an xiho' mami' xuxun oro wari' co taramaja mi' e' nonon xucun wari', co tama' tomi' ha' tomi' ha' je wawa ma'. Mana panxica Iri' Jam pin iri'. Wara mi' napari' pain oro caramaxicon. Xi mana panxita' pin ara capari' ta.

Ca toron ne ximicon Paulo cocon oro wari' nein Galácia

⁸Pain cara pane, pain ca om taxi' querec hun Iri' Jam pane, taramaja mi' e' hwein oro ca Iri' Jam xi' ma hwe pane. Tomi' ha' ximama' hwein. Xi Iri' Jam ne ta! ⁹Ane querec pin' hun Iri' Jam pain xocori ca' ne. Xirao' ca' e' xita', wirico Iri' Jam pan na co querec pin' nuhu' ta, ac i ma' xira ca xirao' ta' ca'. Je ca tomi' querec xuhu' ca': Para in hwet xin hwein warahu' quem? Ma' na ca in hwet ac hwein warahu' pain ca tomi' ha'

ximama' mami' hwein oro ca howa ximama' hwe pain macan' ca'? Xi quep xiho' taxi' cucuhu' ta. Om ca hwara' opa ne quem. Para tomi' ha' ximama' mami' xixin na hwein oro ca howa ximama' nuhu' ma' quem? ¹⁰Wahu' pain ca om judeu hwe ma', ara ximama' hwein oro ca ara caca oro judeu ma' quem. Mam' pe wet ximama' hwein oro xec ca mam' pe wet taxipa' caca ma', mam' pe wet ximama' taxipa' hun oro panawo' ca mam' pe wet taxipa' caca ma' quem, je oro ca tomi' querec te taxipa' xucucun, je pain oro cawaxi' ca tomi' querec te ximama' caca ma' quem. Cain' cain' xihwe quem? Para ac i ma' hwe quem? ¹¹Toron tamana napa' xumu pahu' ta. Am taramaja ximao ta' pain ca pijim' xuhu' ca'.

¹²Je ca tomi' xuhu' ca' xere, jain jain ina pain ca tomi' mip xuhu' ca'. An xiho' xine pain ca om jain jain mami' tain oro ca tomi' ha' xine ca xirao' nucun Moisés ca'. Win ne ca an xiho' xuhu' pain ca om judeu nuhu' pane, pain ca om jain jain hwein ca tomi' ha' xine ca xirao' nucun Moisés pane.

Tomi' querec te tamana paxi' mahu' pain cara pane. ¹³Mam' pe wet mahu' pain ca xo' pijim' mi' ten qui' xuhu' pain capijacon Iri' Jam ca tomi' hwet napari' con Jeju quem? Caxi ina pane. Je ca mon pe ho' xuhu', pijim' ac xuhu' na pane. ¹⁴To' i'ina tamana paxi' inuhu' pain ca caxi ne pane. Ane om tomi' napat mahu' ne, om ca noc camain' mahu' pane. Tomi' querec te e' mahu'. Ac ca tomi' querec te hun jam co taramaja mi' non Iri' Jam na pain ca tomi' querec te mahu' pane. Ac ca tomi' querec te hun Cristo Jeju na, ac i ma' na ca tomi' querec te mahu' pane. ¹⁵Tomi' querec te tamana mahu' pain ca pe ho' xuhu' pane. Xiram pa' tamana mahu', taxi' inuhu' pane. Mo xi ha' cuhu', horohot mi' ximahu' pain tucuhu' pane, ac i ma' na ca tomi' querec te mahu' pane. Ma' carawa ca ara nuhu' pain xocori ca' quem? Para tomi' querec te tomi' querec te om pin mahu' quem? ¹⁶Cain' cain' xihwe quem? Tomi' xo' inuhu' pain capijacon Iri' Jam ca iri'o' ca', pain ca hu xuhu' ca'. Je ca noc pin mahu' pain xocori ca' ra?

¹⁷Om ca ara xo' caca caram ma' co jain jain nunuhu' ma', pain ca tomi' ha' jein oro ca xirao' nucun Moisés ta cucuhu' ma'. Quep xiho' xim paxi' nunuhu', ane om quep xiho' iri'o' cucuhu' ne. Param e' nunuhu' pain ca noc pin mahu', param nunuhu' pain ca to ni ca' mahu'. Ma' ta tomi' querec te e' maparut ta nunuhu'. ¹⁸Awi paxi' na pain ca tomi' querec te huhun oro wari' co quep xiho' iri'o' xim nunuhu'. Win ne ca tomi' querec te mahu' pain ca pe ho' pe ho' wet xuhu' pane. Param inuhu' pain ca tomi' querec te ac i ma' mahu' pain ca om pe ho' xuhu' ca' quem. ¹⁹Jain jain inuhu' ta

hwijima', ac ca mana panxita' xuhu' ara xi' na. Wara jain jain inuhu' pain ca xo' pijim' ten qui' xuhu' pane. Jain jain mami' inuhu' pain xocori ca' quem. An xiho' inam narima' co jain jain pain ca pan' ta' ca cawinacam ma', ac i ma' na ca jain jain mami' ta' pahu'. Jain jain tamana inuhu', an xiho' pin xiroron Cristo pain iri' ximicocon ta inuhu'. ²⁰Pe ho' xuxuhu' na inuhu' pain xocori ca'. Tomi' toto ac xijexi' xira. Toron tamana napa' xumu pahu'.

Sara cam Agar

²¹Wahu' pain ca tomi' ha' xin ca xirao' nucun Moisés hwe ma', tomi' querec xim inuhu'. Taraju pa' hwein ca pijim' capari' Moisés pain ca xirao' nucun ra? ²²Xi xirao' pe ara xine pain capijacon Iri' Jam ta: Ma' 2 nana mana panxica Abraão pane. Xucun panxica ma', wijima non Agar co taramaja mi' e' nam manacon. Xucun ma' iri na ne, wijima non iri' manacon ma', Sara ma', co om taramaja mi' non xucun wari'. ²³Panxica co wijima cama Agar co taramaja mi' e' nam Sara ma', pan' qui' ac ca na, xi om ne ca coromicat an pe xo' ara ne ca wari' wa ta. Xucun co wijima cama Sara co om taramaja e' ma' iri na ne, pan' qui' ac ca na, xi om ne ca wara tomi' pe nucun Iri' Jam ta.

²⁴Carawa ca ara nanam Agar cam Sara pane, tomi' joc mam' mi' ta pain ca tomi' nucun Iri' Jam pane, pain ca tomi' an pe xo' qui' con Moisés con Abraão pain cara pane. Pain ca tomi' an pe xo' qui' tocwa Moisés pain cote ne pacun pain Sinai pane, tomi' joc mam' mi' ta cam Agar. Oro wari' co taramaja mi' e' nanain ca xirao' nucun Moisés ma', tomi' joc mam' mi' tata cam Agar con cawinacam ma'. ²⁵Cote ne pacun Sinai ma', ca pe nain Arábia ma', tomi' joc mam' mi' ta cam Agar ma'. Ac i ma' na Jerusalém ca pe nain macan' pain xocori ca' quem, tomi' joc mam' mi' ta cam Agar. Oro wari' nein Jerusalém ma', ac ca taramaja mi' e' cocon na xucun wari' pain ca taramaja mi' e' cacain ca xirao' nucun Moisés. Win cama Agar con cawinacam pane, pain ca taramaja mi' e' cocon xucun wari' pane. ²⁶Jerusalém ca pe pawin cain iri na ne, tomi' joc mam' mi' ta cam Sara ma'. Xi ma' ca wari' co taramaja mi' e' cama ta. Wiricam na co na' iri', ac

ca wijima capari' na. ²⁷ Je ca wara xirao' an pe xine pain capiijacon Iri' Jam ca':

Wum pain ca om wijima camain' ma ma',
querec te ra.

Wum pain ca om panim' camain' mon pije' ma',
merem querec te ra.

An pe paxi' nem taxim,
ane mija caca humajum ne.

Mija tiquin' ca' nonon humaxicam cam ma' co ma' nam tarama' ma'.

Ac i ma' na ca xirao' an pe xine pain capiijacon Iri' Jam pane.

²⁸ Je ca tomi' xuhu' ca' xere. An xiho' hun Isaque cara pane, co wara tomi' pe wa con Abraão cam Sara pane. Mana panxita' pin nuhu' Iri' Jam quem. Xi om ne ca wara tomi' pe ara cuhu' con Abraão pane ta. ²⁹ An xiho' hun Isaque pain ca to' i'ina tocwa pane quem. Noro jun cwaji' ca pane, co wijima cama Agar pain ca coromicat an pe xo' nein ca wari' wa ta. To' i'ina non coxa' ca co wijima cama Sara pain ca coromicat an pe xo' nein Tamataracon Iri' Jam. Je ca ara ne pain xocori ca' quem. ³⁰ Ane ma' ne ca xirao' pe xine pain capiijacon Iri' Jam cocon ne. Cain' ca tomi' capari' cocon quem? Tomi' ca' napari': Tomi' mo pin ram cam ma' co taramaja mi' e' non xucun wari' ma'. Tomi' mo pin ron cawinacam quem. Xi om ne ca ma' ara ca cawinacam co om taramaja mi' e' non xucun wari' ta. Om ta

4.26 Pain ca tomi' joc mam' mi' cocon oro wari' nein Jerusalém ca pe macan' Agar ma', tomi' mi' tata oro co tomi' ha' e' nanain ca xirao' nucun Moisés ma', ma' ta hohot pin xun Iri' Jam ta nana ma'. Pain ca tomi' joc mam' mi' camain' Jerusalém ca pe pawin Sara ma' iri na ne, tomi' mi' napari' pain ca howa xun Jeju Cristo cwa', pain ca witan pin iri' ca'. Pain ca tomi' mi' tacama Sara pain ca na' xim ca', je pain ca ac ca wijima capari' ne ca', tomi' joc mam' mi' napari' pain ca iri' wari' ne pin capari' Iri' Jam quem.

4.27 Capiijacon Iri' Jam ca xirao' an pe xine ma', om paxi' na ca tomi' mi' tacama narima' co om wijima camain' ma', cam narima' co mija nana humaxicam ma'. Tomi' mi' tata oro co howa nonon Jeju cocon oro co tomi' ha' e' nanain ca xirao' nucun Moisés. Co howa nonon Jeju ma', ac wiricoco nana co om wijima camain' cama jicocon. Co tomi' ha' e' nanain ca xirao' nucun Moisés ma' iri nana ne, mija paxi' nana, ane maqui' ta' ne xec nucucun oro co howa nonon Jeju ne, pain ca mija tiquin' ca' xun cocon oro co tomi' ha' e' nanain ca xirao' nucun Moisés ma'. **4.29** Ma' carawa ca ara nonon quem? Tomi' mi' tata oro co to' i'ina nonon ma', co jain jain e' nonon pain ca tama' tomi' ha' e' jein ca xirao' nucun Moisés ta cocon ma'. **4.30** Pain ca tomi' mo pin ron cawinacam quem ne capiijacon Iri' Jam ca', tomi' ac i ca' paxi' na Paulo: Tomi' jein pin jujun caram ma' co jain jain e' nuhu' pain ca tama' tomi' ha' e' jein ca xirao' nucun Moisés ta cuhu' ma'.

cut wi camain' cacain caramaxicon cote caca, ac i ma' na ca xirao' an pe xine pain capijacon Iri' Jam. ³¹ Je ca tomi' xuhu' ca' xere. Om ca wijima capari' narima' co taramaja e' ma'. Wijima napari' narima' co om taramaja e' ta.

Ca to' witan capari' Cristo

5 To' witan napari' Cristo, to' witan ca' napari' pain ca ac ca quep xat capari' ne ca xirao' nucun Moisés ma', pain ca tomi' ha' cara jein ta capari' ca'. To' witan iri'o' ca' napari' pain. Je ta hwara' opa cara qui' hwe pain ca howa nuhu' ta. Ari jujun oro wari' co mixein nunuhu' ma', pain ca tomi' ha' mami' jein oro ca xirao' nucun Moisés ca to' hohot nuhu' con Iri' Jam ta cucuhu' ma'.

²Taraju wet xine e'. Wata' pain ca Paulo ta' ca', tomi' inuhu'. Mo ta coromicat ca' hwe: Wac xirac xin taparinain ca xirac nexi' ca', ma' ta hohot xun Iri' Jam ta, mo ta coromicat ac i ma' hwe, om ta quep xiho' camain' cuhu' Cristo pain ca mi' pin caho' cuhu' ta. ³Tomi' mami' inonon co wac xirac xin nanain taparinain ca xirac nucucun ma': Mo ta wac xirac xihwe, na e' na pain ca tomi' ha' xo' tomi' ha' xo' pi' pin hwein oro ca xirao' nucun Moisés ta. ⁴Wahu' pain ca to' hohot xijexi' pain ca tomi' ha' xin ca xirao' nucun Moisés hwe ma', to ni ca' hun Cristo. To' hohot xijexi' pain ca tomi' ha' xin ca xirao' nucun Moisés ta iri hwe ne, noc pin ac hun na Iri' Jam pain ca xiram pa' e' cuhu' ma'. ⁵Ane taxi' xun Iri' Jam pain ca to' hohot capari' pain ca howa xun Cristo ne. Je Tamataracon ca to' taxi' napari' pain. Je ca winim' iri' pain ca howa xun quem. ⁶Xi quep xiho' capari' ca wac xirac xine taparinain ca xirac nexi' ta. Pain ca howa xun Cristo Jeju pain ca to' hohot pan capari' ca', mo ta wac xirac cacapari', mo ta om wac xirac cacapari', an an ari na con Iri' Jam. Om ca tocojin' capari' pain i ma'. Noro e' nain ca howa nexi' pain ca howa xun Cristo. Om iri na ca noc caracan xijexi' ne, querec pin' ac capari' na pain ca howa xun quem.

⁷Hohot paxi' hwe pain ca ja' ja' hun Cristo pain cara pane. Ma' co to' i'ina nuhu' pain xocori ca' quem? Ma' co tomi' tomi' na pin nuhu' pain ca

4.31 Om ca tomi' mi' cam waram xi' Paulo cwa'. Wari' co wijima cama narima' co taramaja e' ma', an xiho' non wari' co tomi' ha' e' tain nain ca xirao' nucun Moisés, ma' ta hohot ton Iri' Jam ta na. Wari' co wijima cama narima' co om taramaja e' ma' iri na ne, an xiho' non wari' co howa e' ton non Jeju, ma' ta hohot ton Iri' Jam ta na quem.

tomi' ha' tomi' ha' om pin hwein capijacon Iri' Jam con Jeju ca iri'o' ma' quem? ⁸Om ca Iri' Jam ca co ara nain i ma' pahu', xi om ne ca wirico ara ca co howa xine ta nuhu' ma'. ⁹Mam' pe wet jein ca tomi' taxipa' iri' ca', pain ca to' memerem nein capam' ma': Maxoc wijimain iri xin ne, to' memerem to' memerem pi' pin ac nein na capam'. ¹⁰Ane taxi' xuhu' ne, xi om ne ca win cwere pi' pin ara xun Taramaxicon nexi' ta. Taxi' inuhu' pain ca coromicat xo' mami' xi' hwe. Wari' co to' i'ina nuhu' pain ca pijim' nucun ma' iri na ne, am wirico ca co hwara' opa ma', am xucun ca co hwara' opa ma' quem, tara con. Main wap ac tocwa tara ta.

¹¹Tomi' xo' xim inuhu' pain i ca' quem xere: Ma' nana co tomi' em' nanapa'. Tomi' ca' nana: Wac xirac tatarain taparinain ca xirac nucucun oro wari' ta na Paulo ta nanapa' ma'. Cain' cain' xirara quem? Mo xi pijim' pijim' wet ac i ma' ta', je xi om quep em' quep em' tiquin' cacapa' oro win judeu ta' cwa'? Mo xi pijim' ac i ma' ta', om xi mana' cacapa' pain ca pijim' hwet toton con Jeju oro wari' ma', pain ca mi' pin caho' napari' pain pana Cristo ta toton ca'. ¹²Wa inonon co to' i'ina nunuhu' pain ca ja' teretem cucuhu' ma', pain ca wac xirac xirarain ca xirac nucucun oro wari' ta caca ma'. Wac pit pan xirarain ca xirac nucucun na inonon ta!

¹³Je ca tomi' xuhu' ca' xere. Howa xine nuhu' Iri' Jam. Ma' ta witan ca' hwein ca tomi' ha' cara wa ca xirao' nucun Moisés pain ca witan xi' wa ta nuhu'. Ane om ha' ne pain ca coromicat ca' hwe ne: Ara ximama' xin oro ca param nexi' ca', xi om ne ca witan ca' ara xin ca tomi' ha' cara wa ca xirao' nucun Moisés ma', ta coromicat ac i ma' camain' hwe me ta. Quep xiho' caracan e' xujuhu' pain ca om noc cara xujuhu' ta. ¹⁴Je ca hu capari' ca xirao' nucun Moisés quem: Ta noc momon oro win ma' ma me ta. Win ne ca om noc pan xijem ma' quem napari'. Mo ta tomi' ha' hwein i ma' con, ac ca wara tomi' ha' tomi' ha' pi' pin hwein na oro ca xirao' nucun ta. ¹⁵Ma' tara xumuhu' me. Mo ta om tomi' querec te caracan xujuhu' ma', mo ta an xiho' hun oro caxicon oromijac co quio quio cono' pin xucun pain ca mana' nucun ma', to' qui' pin ac xujuhu' tara ta.

5.9 Tomi' joc mam' mi' e' nain ca to' memerem nein capam'. Win ne ca to' xin in nein capam' ca to' memerem nein ma', ac i ma' na ca to' xin in capari' ca pijim' nucucun co pijim' mixein nanapari' ma' quem. To' ara pin napari'.

Ca xuruxut nexi' pain ca tomi' ha' xin Tamataracon Iri' Jam

¹⁶ Je ca tomi' xuhu' ca': Tomi' ha' e' jein Tamataracon Iri' Jam. Om ac ne tara ca tomi' ha' hwein oro ca param ximama' ne curuhu' ta. ¹⁷ Oro ca param ximama' nexi' ca', noc taxipa' nain Tamataracon Iri' Jam. Ca param pan ne Tamataracon Iri' Jam ma' iri na ne, noc taxipa' nain ca param ximama' nexi' quem. Mixita xijein. Je ca om ara ac xin ca param pan nexi'. ¹⁸ Je ca tomi' xuhu' ca', tomi' inuhu' pain ca tomi' ha' xin hwein Tamataracon Iri' Jam ca o mama' nuhu' ma'. Mo ta tomi' ha' hwein, witan ca' ac hwein tara ca xirao' nucun Moisés ca ac ca quep xat cuhu' ne ma', pain ca tomi' ha' cara jein, ma' ta hohot hun Iri' Jam ta cuhu' ma'.

¹⁹ Querec pin' irin oro ca ara nucucun wari' co tomi' ha' e' nanain ca param nucucun. Mo na ca ara nucucun: Quep nanam oro xequem narima', quep xut nonon oro xucun tarama' pain ca narima' nequequem quem. Mam' pe wet e' nanain oro ca quep ximama' wa, jain jain ximama' nanain. Tamanain to nana pain ca win xumu cacain oro ca om awi wa. ²⁰ Pe torotop mi' querec te nanain oro caji pacun ca Iri' Jam xi' ma caca ma'. Ara xirac nonon oro wari'. Noc nonon oro win ma' caca, mana' ximama' nonon. Narain ho' xucucun pain oro caramaxicocon. Hwerehwet na mixitacocon. Joc in pin nonon oro win ma' caca pain ca wata' co taramaxicon ta caca. Ja' teretem nonon oro win ma' caca pain ca to' coromicat ni cocon. Tomi' querec te e' nonon oro win ma' caca co xin ne nonon. ²¹ Noc mi' xucucun pain oro carawa. Toc tamanain to nanain oro comi uva ca mana'. Tamanain to nana pain ca waraju ximama' nucucun. Ma' nonon oro xijein ca pan teretem wa ca an xiho' nain ca xirao' ne ca' quem. Je ca tomi' xuhu' ca', wara hu inuhu' pain cara pane, hu mami' inuhu' pain xocori ca' quem. Oro wari' co ara taxipa' nanain oro ca pan teretem wa ca xirao' ta' ca', om ta mi' tococwa pain ca to ho' cocon Iri' Jam ma', pain ca taramaxicon pe ho' toton cocon oro wari' nucun ta.

²² Ane to' jimama' capari' Tamataracon Iri' Jam ne. Mo na oro ca ara mi' capari': Mi' napari' pain ca om noc xijexi'. Ja' tomi' querec te napari'. Mi' napari' pain ca om toron ne ximixi'. Mi' napari' pain ca tomi' pan hot xijexi', je pain ca xiram pa' xijexi' quem. Mi' napari' pain ca awi wa pain ca xuruxut xo' wa. Mi' napari' pain ca om tomi' capijacocon e' iri' pain ca ara taxipa' xin oro ca tomi' pe iri' quem. ²³ Mi' napari' pain ca tomi' wixite xijexi'. Mi' napari' pain ca om ara e' xin ca param pan nexi' quem. Ara iri

xin oro ca mi' capari' Tamataracon Iri' Jam ca' ne, om ca tomi' em' capari' ca xirao' nucun Moisés ta. ²⁴Wari' cwa', pain ca wari' ne pin capari' Cristo Jeju cwa', om ca ara mami' xin ca param pan nexi'. Ac ca to' pa' pin xin na ca param pan nexi'. Oro ca param ximama' nexi' ca', je oro ca win xumu ximama' xin ca om awi wa ca', ac ca tatatain mi' xin na pain panaxicon Cristo. ²⁵Mi' napari' pain xocori ca e' nexi' Tamataracon Iri' Jam. Je ca tomi' ha' cara xin quem. ²⁶Om ca ha' ne pain ca xec xec iri'. Om ca ha' ne pain ca tomi' taparam' xijexi'. Om ca ha' ne pain ca noc mi' xijexi' pain oro carawa quem.

**Ca quep xiho' xujuhu' pain ca ma' cuhu'
carawa ca to' i'ina nuhu' ta tococwa**

6 Tomi' xim inuhu' pain ca tomi' ha' taxipa' hwein Tamataracon Iri' Jam ma' xere. Mo ta ma' ca win ma' nuhu' co pan' mao pain ca caracat nucun ma', quep xiho' jun. An in jun, ma' ta xut xo' mami' ca. Tomi' xun iri jun ne, tomi' wixite e' jun. Ma' tara xumuhu' quem. Ma' ta om an xiho' hun pain ca caracat nucun. ²Ma' iri tara carawa ca to' i'ina nuhu' ne, quep xiho' caracan ac xujuhu' tara. Quep xiho' ac i ma' iri xujuhu' ne, tomi' ha' hwein ca tomi' nucun Cristo. ³Tomi' xun wari' co xec xec ma', co coromicat ca' ma': Awi tiquin' ca' inonon oro win ma' ne cwa', ac i ma' na ca coromicat nucun. Cain' cain' xira quem? Om na ximicon, xi awi tiquin' ca' cocon oro win ma' ca ta. ⁴Je ca tomi' xuhu' ca'. Noro xo' noro xo' xam' xin ximixi' pain ca xuruxut nexi'. Xuruxut xo' iri iri' ne, je i ma' tara ca ja' tomi' querec te napari'. Om ta tomi' querec te e' iri' pain ca awi tiquin' ca' xuxun xi' ma ururun oro win ma' nexi' ta. ⁵Ma' ma' xam' ara xi' napari' carawa ca to' i'ina napari'. Ma' tara ximixi' pain ta.

⁶Ca' na iri tata pain capiacaon Iri' Jam oro wari' ne, xiram pa' ac cocon tara co ca' na nonon ma'. Mi' totoron pain oro carawa ca awi.

⁷Ma' tara xumuhu' me, coromicat xo' je. Om ca tatam' tatam' tomi' xirac ac tocwa Iri' Jam ta. Tocwi ca oin' ca wari' pain totacon ma', je tara tocwi ca cut ta' ca quem, om ta cut cain xijein tocwi. ⁸Ac i ma' iri' pain ca wari' nexi' pain ca xuruxut nexi' quem. Mo ta oin' e' xin ca pan teretem wa pain ca ara e' xin ca param ximama' pan nexi' ca', cut ac xin tara ca cono' wa pain ca wap capari' Iri' Jam. Mo ta oin' xin ca xuruxut xo' wa pain ca tomi' ha' e' xin Tamataracon Iri' Jam ma', cut ac xin tara ca e' cara wa.

Je Tamataracon Iri' Jam tara ca mi' xim napari' pain ta. ⁹Om ta horoman capari' ca quep xiho' caracan xijexi' pain ca ara mi' xijexi' pain ca awi wa ta. Mo ta om naro iri' pain, mo ta ara mi' ara mi' tiquin' xijexi' pain, main cut ac xin tara carawa ca mi' xim capari' Iri' Jam. ¹⁰Je ca tomi' xuhu' ca'. Ma' iri nana wari' co ximin nana ma' ne, quep xiho' ac xuxun tara, je cwerexi' mao tara. Oro win ma' nexi' co nari iri' cwa', pain ca howa wi xun Cristo cwa', wiricoco tatara co quep xiho' tamana iri' quem.

Ca hu mam' tococwa pain ca win pi' pin ne ca xirao' nucun Paulo

¹¹Xirao' pan inain tawirinain ca xirao' ne ca'. Querec pin' jein ca horonain ne ca xirao' ne ca'.

¹²Oro wari' co wac xirac jein taparinain ca xirac nuhu' ta nunuhu' ma', xec xec e' nana. Querec pin' tataraparut oro win judeu urut pain ca tomi' ha' taxipa' urut pain oro ca xirao' nucun Moisés ta nana. Jin' nonon oro win ma' caca. Tomi' ca' nana: Mo ta pijim' e' xut pain ca mi' pin nucun Cristo ma', pain ca to' witan e' napari' ca mi' pin nucun ta urut ca', mo ta pijim' ac i ma' urut, quep em' ac cacaparut tara ta na ca coromicat pan teretem nucucun. Je ca wac xirac jein ta cucuhu'. ¹³Caram ma' co coromicat pan teretem ac i ma' nunuhu' ma', wac xirac paxi' xucucun, ane om tomi' ha' tomi' ha' pi' pin cacain ca xirao' nucun Moisés ta. Xec xec e' nana pahu', param e' nunuhu' pain ca wac xirac xihwe ma', ma' ta querec pin' cacaparut oro wari' pain ca tomi' tomi' na pin urut pahu' ta nunuhu'. ¹⁴Wata' iri na ne, noc inain ca xec xec wa. Ac ca xec xec e' ta' na pain ca tomi' querec te ton Taramaxicon nexi' Jeju Cristo pain ca mi' pin caho' capari' pain pana pane. Ac ca xec xec e' tain na panaxicon ta. Horoman pin napa' oro caramaji macan' ca', horoman pin napa' oro ca param ximama' wa ca' quem. Ac ca cono' ca' capa' na, xi win xumu mami' tain ta. ¹⁵Mo ta wac xirac cacapari', mo ta om wac xirac cacapari', an an ari na con Iri' Jam. Om ca noro capari' pain i ma'. Noro e' nain ximixi' pain ca to' xocoricon wari' pin capari' ca'. ¹⁶Tomi' mi' tomi' mi' pi' pin inonon con Iri' Jam oro wari' co xuruxut xo' nana pain ca tomi' ha' cacain ca xirao' ne ca'. Mi' roron pain ca om toron ne ximicocon, xiram pa' roron quem inon cocon. Oro co xuruxut xo' nana pain ca tomi' ha' cacain ca xirao' ne ma', wiricoco nana co iri' wari' nucun Iri' Jam nana ta. Win caca oro wari' nein Israel co iri' wari' ne ca pane quem.

¹⁷ Tomi' xim inuhu' pain i ca' quem: Ta to' i'ina mami' cacapa' oro wari' me. Ha' ara xi' na pain ca querec pin' mahu' pain ca taramaja mi' ton Jeju cwa', xi ma' ara capa' oro jaminain ca quep em' cacapa' pain cwere pain ca taramaja mi' ton ca'.

¹⁸ Param inon Taramaxicon nexi' Jeju Cristo pain ca quep xiho' cuhu' ma' xere, pain ca mi' e' cuhu' pain ca param nucun pain iri' xumuhu' ta.

Amém, iri'o' na ca tomi' ne ta.

Je i ca' ca xirao' ne ca'.

6.17 Win caca oro co wac xirac wawa ma'. Tomi' ca' nana: Pain ca wac xirac cacapari', je ca to' querec pin' cocon oro wari' pain ca querec hohot pan capari' Iri' Jam ta nana. Paulo ma' iri na ne, ma' non oro jaminain ca quep em' tocwa pain curucun. Je ca to' querec pin' cocon oro wari' pain ca quep em' tocwa pain ca taramaja mi' con Jeju quem.

Efésios

Ca xirao' mi' tococwa co howa nonon Jeju pain Éfeso

1 Paulo ina pain ca xirao' mi' xuhu' ca'. Apóstolo ra napa' Cristo Jeju pane, pain ca tomi' hwet roron pain capija oro wari' capa' pane. Wirico Iri' Jam co param mi' napa' pain. Xirao' mi' inuhu' pain ca to hwein Éfeso ma', pain ca wari' nucun Iri' Jam hwe ma', je pain ca tomi' ha' hun Cristo Jeju pain ca howa hun ma'. ²Param inon Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param inonon pain ca mi' cucuhu' pain ca om toron ne xumuhu' quem.

Ca ja' tomi' querec te capari' Iri' Jam con Cristo

³Tomi' querec te xun Iri' Jam co Te ca Taramaxicon nexi' Jeju Cristo. Ja' tomi' querec te napari' pain iri' ximixi' ca' quem. Xi mi' mi' pi' pin ara capari' pain oro caramaxicon ca awi ca to pawin cain. Win cwere ara xi' urun Cristo. ⁴Wara tora' napari' Iri' Jam pain cara pane, pain ca om tomi' ma' querec qui' cain macan' je oro carawa pane. Xi om ne ca win cwere ara xun Cristo ta. Tomi' ca' napari' pane: Iri' wari' ne inuhu'. Om ca ma' camain' cuhu' ca caracat wa pain ca querec joc mam' mi' xuhu' con Panxita' cwa' ta napari' pane.

Om ca noc capari'. ⁵Je ca an pe xo' mi' capari' pain ca coromicat nucun pane. Wara tora' napari'. Mana panxita' xuhu', xi win cwere pin ara hun Jeju Cristo ta napari'. Je ca param mi' xuhu' ca' napari' pane. ⁶Je ta tomi' querec te xun pain ca quep xiho' tamana capari' ta. Xi xiram pa' pan ara capari' pain ca mi' e' capari' pain ca win cwere pin xun Cristo co om noc ca ma'. ⁷To' witan ca' napari' pain ca caracat nexi' Cristo. Xi ao mao ara ne quicon pain ca mi' pin caho' capari' pane. Je ca xic am pin cain ca caracat nexi' Iri' Jam quem. Xiram pa' tamana e' napari' ta. ⁸Mija na ca xiram pa' e' capari'. Taxi' tamana na. Ma' na ximicon.

⁹Je ca ara pin cain ca wara coromicat an pe xo' ca pane. An hwet mi' ac capari' na pain ca param nucun ca om an hwet querec ca ira. Wirico

Cristo tara co ara mi' nuhu' pain napari'. ¹⁰Ca' na ca param nucun ca om an hwet querec ca ira: Maqui' iri tara xec nein ca wara an pe xo' ta' ne, cut in xo' cut in xo' pi' pin ac toton tara oro wari' co to nanain pawin je macan' ma', querec joc mam' mi' ac toton tara con Cristo, taramaxicon pe ho' pan ac cocon tara quem. Ac i ma' tain oro carawa quem, cut in xo' pi' pin tain, querec joc mam' mi' ac tain tara con Cristo, taramaxicon pe ho' pan ac cain tara quem.

¹¹Oro ca ara ca Iri' Jam cwa', ara nain ca wara coromicat an pe xo' nucun. Win ne ca param ta' ca' na, ara ara ac cain na. Je ca wara tora' caparut pain ca judeu urut ca'. Wari' ne naparut. Xi om ne ca ma' ara cuhu' Cristo ta naparut. ¹²Ma' ta tomi' hwet hwein ca awi tamana ne ta naparut pain ca howa cain' urut con Cristo pain ca winim' urut con ca'.

¹³Ac i ma' nuhu' pain ca wari' ne pin cuhu' pain ca om judeu hwe pane quem. Taraju iri hwein capijacon ca iri'o' ca' ne. Taraju iri hwein capijacon ca tomi' hwet nuhu' pain ca to' witan xim cuhu' ne. Howa pin iri hwein ne. Mi' ac cuhu' na pain Tamataracon ca wara tomi' pe mi' cuhu' ma', ca to' querec pin' nuhu' pain ca wari' nucun hwe ma'. ¹⁴Tamataracon ca pe ho' napari' pain ximixi' ca', je ca to' taxi' napari' pain ca aram aram mi' toton capari' pain ca tomi' pe mi' capari' Iri' Jam pain ca wari' ne capari' ca'. Je ca taxi' xun pain ca aram aram to' witan pin toton capari' ca' quem. Je ca na e' ne pain ca tomi' hwet xin ca awi tamana nucun ta.

Ca tomi' cocon co howa nonon Jeju Paulo

¹⁵Je ca tomi' xuhu' ca'. Taraju iri inuhu' pain ca howa hun Taramaxicon nexi' Jeju ne. Taraju iri inuhu' pain ca tomi' querec te tomi' querec te pi' pin huhun oro wari' nucun Iri' Jam ne. ¹⁶Om ca pi' ra ha' ne ca tomi' querec te xuhu' ca'. Tama' an hwet mi' inon pain ca tomi' querec te ne Iri' Jam pahu'. Tama' tomi' mi' inuhu' con quem. ¹⁷Tomi' inon Cotere' co awi tamana ma', pain ca om caracat nucun pain ca hwara' opa tamana nucun ma', co Iri' Jam ne ca Taramaxicon nexi' Jeju Cristo. Tomi' mi' ac i ca' inuhu' con: Mi' roron pain ca taxi' wa, mi' roron pain ca taraju pa' wa quem, mam' mi' roron pain Tamataram, ma' ta querec pin' quequem pain iri' xumum, ac i ma' na ca tomi' mi' xuhu' con. ¹⁸Tomi' mi' inuhu' con. Ma' ta mi' cuhu' pain ca taraju pa' wa pain iri' xumuhu' ma'. Ac ca toha mi' cuhu' tara pain ca coromicat nuhu'. Ma' ta querec pin' hwein oro

ca howa iri' ca', ca mi' toton capari' pain ca xo' howa xine qui' capari' pain ca wari' ne capari' pane. ^{19–20}Ma' ta querec pin' hwein ca hwara' opa tamana nucun ca taramaja pe ho' napari' pain ca howa xun ca' quem. Ca hwara' opa nucun ca', ca pe ho' napari' ca', je ca mam' to' e' pin con Cristo pane. Je ca mam' mi' con pain ca xao pe ho' pin con pain iri' curucun pain pawin cain. ²¹Iri' taramaxicon pin na Cristo. Taramaxicon hwara' opa tiquin' ca' nonon oro jam co taramaxicon paxi' nana cwa', co hwara' opa to paxi' nanain macan' je nanawin quem, hwara' opa tiquin' hwara' opa tiquin' pi' pin ca' tata. Hwara' opa tiquin' ca' tata pain oro xec nexi' pain xocori ca', hwara' opa tiquin' ca' ac tococwa tara pain ca aram aram in qui' nucun quem. ²²Wirico Iri' Jam co taramaxicon pe ho' roron oro wari' ta non Cristo. Oro wari', pi' pin nana, oro carawa quem, taramaxicon pe ho' taramaxicon pe ho' pi' pin roron ta non quem. Taramaxicon pe ho' roron co howa nenem quem non pari'. Ac winacocon ra ta non Cristo pari' pain ca howa xun ca'. ²³Curucun iri' pain ca howa xun ca'. Wirico co win cwere napari' pain ca mi' capari' pain ca hwara' opa tamana nucun, wirico co mi' napari' pain ca taxi' tamana nucun quem. Pe ho' pe ho' pi' pin nain oro carawa quem.

Ca to' witan pin capari' Iri' Jam pain ca xiram pa' e' capari' ca'

2 Pain cara pane, pain ca om howa querec hun Cristo pane, ac ca cono' pin hwe na. Xi caracat taxipa' ara hwe pane ta. Om ca tomi' ha' jun Iri' Jam na hwe. ²Pan teretem taxipa' hwe, je curuhu' pane. An xiho' e' huhun oro wari' co om howa nonon Iri' Jam. Tomi' ha' taxipa' hun Caxicon Jam co taramaxicon pe ho' nonon oro caxicon jam co taramaja mi' nonon pain nanawin ma'. Wirico Caxicon Jam co taramaja pe ho' nain ximicocon oro wari' co om tomi' ha' camain' nana cwa', wirico co tomi' ha' hwe pane. ³Je cwerexi' pane quem. Ac i ma' ac i ma' pi' pin iri' pane ira. Ara e' irin ca param ne cwerexi'. Tomi' ha' e' irin ca param pan teretem ne cwerexi' pain ca coromicat pan teretem nexi'. Wap xim napari' Iri' Jam pane quem. Win ne ca wap wap pi' pin tococwa oro wari' co pan teretem nana ma'.

1.19-20 Taraju pa' jein ca tomi' mao ne ca xao pe ho' xine iri' curucun taramaxicon ma'. Xao pe ho' pin iri nain iri' curucun taramaxicon wari' ne, querec pin' ac tocwa na pain ca taramaxicon wi pin con quem. Ac i ma' na Jeju ma' quem. Xao pe ho' pin iri nain iri' curucun Iri' Jam ne, querec pin' ac tocwa na pain ca Taramaxicon wi pin con quem.

⁴ Ane xiram pa' tamana capari' Iri' Jam ne. Om ca noc camain' capari'.
⁵ Cono' pin paxi' iri' pane, xi tomi' ha' xun ta. Ane to' win cwere pin capari' con Cristo ne. Mi' ac capari' na pain xocori ca e' wa. Om xi to' witan cuhu', ane xiram pa' e' cuhu' ne. To' witan e' nuhu' pain ca xiram pa' cuhu' Iri' Jam ta. ⁶ To' e' mami' wi napari' con Cristo Jeju Iri' Jam pane. Mi' ac capari' na pain ca xao to ho' xun pain pawin quem. Xi om ne ca win cwere ara hun Cristo Jeju napari'. ⁷ Ac i ma' napari' Iri' Jam pane. Ma' ta querec pin' cara mahu' pain ca xiram pa' tamana xuhu' ca', pain ca mi' xuhu' pain ca win cwere pin hun Cristo Jeju ta napari'.

⁸ Je ca tomi' xuhu' ca': To' witan e' nuhu' Iri' Jam pain ca xiram pa' nucun pahu'. Xi om ne ca howa ara hun ta. Om ca mam' to' witan cuhu' pain carawa ca awi ca ara xi' paxi' hwe ma', om na. To' witan e' pan nuhu' ta. ⁹ Om ca tomi' ca' ac hwe: To' witan napa', xi om ne ca xut xo' ara ta' ca', om ca tomi' xec xec ac i ma' ac hwe ta. ¹⁰ Wirico ara xi' na Iri' Jam co to' xocoricon wari' pin napari' pain ca win cwere pin xun Cristo Jeju. Ma' ta ara hwein ca awi wa ca wara coromicat an pe mi' xuhu' pane napari' pain ca ara tatarain ta capari' pain cara pane.

Ca win ma' ne pin xijexi' con Jeju

¹¹ Mam' pe wet jein i ca': Om paxi' na ca judeu hwe ma'. Om ca wari' nucun Iri' Jam hwe nunuhu' oro judeu ma'. Xi wac xirac hwein taparinain ca xirac nuhu' ta nunuhu'. Tomi' ca' nunuhu' quem: Warut pain ca judeu urut ca', wari' nucun Iri' Jam urut, xi om ne ca wac xirac ara urut pain taparixut ca' nunuhu'. ¹² Mam' pe wet jein i ca': Om ca querec pin' hun Cristo pane. Om ca win ma' ne huhun oro wari' nein Israel co tora' ca Iri' Jam pane quem. Om ca taxi' hwein oro ca tomi' an pe xo' tococwa pain ca tomi' pe pin qui' cocon pain ca tomi' nucun Iri' Jam pane. Ximin hwe pain ca to ho' huhun oro caracat pain macan' ca' pane. Om ca main witan xi' camain' hwe pane ira. Om ca querec pin' camain' hun Iri' Jam pane. ¹³ To pira ca' paxi' hun Iri' Jam pane. Ane cut in pan cuhu' pain xocori ca' ne. Xi om ne ca win cwere ara hun Cristo Jeju ta. To' wixicam pin nuhu' con. Xi om ne ca ao mao ara ne quicon Cristo pain ca mi' pin caho' capari' pane ta.

¹⁴ Wirico ara xi' na Cristo co mi' napari' pain ca noc noc om pin xijexi'. Warut pain ca judeu urut ca', wahu' pain ca om judeu hwe ma' quem,

om ca tatirim hwe mami' xijexi'. Win ma' ne pin xijexi' con. To' om pin nain oro carawa ca to' noc pin xijexi' pane. ¹⁵Mi' pin iri na Cristo ne, to' om pin ac cain na ca hwara' opa nein ca xirao' nucun Moisés pain oro ca tomi' ha' je nucun. Ma' ta xucun wari' xucun wari' om pin hwe ta napari'. Win ma' ne pin xijexi' con. Mi' napari' pain ca nari pin xijexi' pain ca win cwere pin xun quem. Ac i ma' na ca to' om pin cain ca noc xijexi' pane. ¹⁶Xucun wari' xucun wari' om pin xijexi'. Taxipa' pin xijexi'. Ac ca xica' pe pin ne na ximixi' con. Mi' napari' pain ca in hwet xun Iri' Jam. Xi om ne ca mi' pin pe ara cain pana pane ta. ¹⁷Maqui' nain macan' Cristo pane. Pijim' ac tococwa na oro wari'. Pijim' nuhu' pain ca to pira ca' hun Iri' Jam pain ca om judeu hwe ma', pijim' naparut pain ca wara to ja' pan urut con pain ca judeu urut ca' quem. Na pin nuhu' pain ca tomi' querec te pin xujuhu' pain ca win ma' ne pin xujuhu' ta, ac i ma' na ca pijim' capari' pane. ¹⁸Wirico Cristo co mi' napari' pain ca corom hwet xun Cotere' pain ca tomi' xun ca'. Warut pain ca judeu urut ca', wahu' pain ca om judeu hwe ma' quem, mi' mi' xam' napari' pain ca corom hwet xun. Xi xica' pe ara ne Tamataracon ca pe ho' pe ho' pi' pin napari' ta.

¹⁹Je ca tomi' xuhu' ca': Wahu' pain ca howa pin hun Cristo pain ca om judeu hwe ma', warut pain ca howa pin urut con Cristo pain ca judeu urut ca' quem, tatirim tatirim om pin xijexi'. Win ma' ne pin xijexi' pain ca iri' wari' nucun Iri' Jam iri' ca'. Te pin urun, xere pin xijexi' pain ca mana panxica Iri' Jam iri' ca' quem. ²⁰Ac ca quep cain xirim ara xi' na Iri' Jam. Oro apóstolo cocon oro profeta ma', ac oro pacun pain caximain xirim nana. Wari' pain ca howa xun Jeju cwa', ac oro pacun ca mam' quep cain Iri' Jam iri'. Jeju Cristo iri na ne, wirico co ac iri' cote ne pacun ca to' teren nain xirim pain caximain ma' quem. ²¹Wirico Cristo co to' teren napari', horon horon tiquin' ac iri' na, ac iri' xiricon Iri' Jam pin ac iri' na quem. ²²Wahu' pain ca om judeu hwe ma', win cwere pin hun Cristo. Quep wi nuhu' Iri' Jam cocon oro xucucun wari' co howa nonon quem. Ma' ta xuru hwe ta nuhu'. Xi om ne ca pe ho' ara cuhu' Tamataracon ta.

Ca pijim' mi' cocon pain capijacon Iri' Jam co om judeu nana Paulo

3 Je ca tomi' mi' xuhu' con Iri' Jam ca'. Wata' pain ca Paulo ta' ca', pe inain xirinain ca tao' to tao' to to wa ca'. Xi om ne ca taramaja mi' ara ton Cristo Jeju pain ca quep xiho' xuhu' pain ca om judeu hwe ma' quem.

²Om ca taxi' mahu' pain ca mi' capa' pain ca taramaja wa Iri' Jam cwa' ra, pain ca pijim' hwet roron pain ca xiram pa' tamana toton oro wari' co om judeu nana ta napa' pahu' ra? Taxi' mahu' pain ca tomi' ac i ma' capa' ca' ira. ³Mi' napa' pain ca taraju pa' tain ca coromicat xo' nucun ca om an hwet querec ca pane. Wirico co tomi' xo' pan napa' pain pane. Je ca xirao' mi' xuhu' pain carta ne ca', xirao' mi' pije' ca' inuhu' pain. ⁴Mo ta noro hwein ca xirao' ne ca', taxi' ac mahu' tara pain ca taraju pa' tain ca coromicat xo' nucun ca om an hwet querec ca con Cristo pane. ⁵Om ca mi' tococwa pain ca taraju pa' wa oro hwanana cara pane. Pain xocori ca' iri na ne, mi' ac tococwa na pain ca taraju pa' wa oro apóstolo nucun cocon oro profeta nucun cwa'. Je Tamataracon Iri' Jam ca mi' nonon pain. ⁶Je i ca' ca coromicat xo' nucun ca joc xim ca ira: Oro carawa ca awi ca mi' toton caparut Iri' Jam pain ca judeu urut ca', cut pin xin hwein pain ca om judeu hwe ma' quem. Xi om ne ca howa howa pi' pin ara xin capijacon ca tomi' hwet napari' con Cristo Jeju. Win ma' ne pin xijexi' quem. Mi' mi' pi' pin napari' pain oro ca param nucun ca wara tomi' pe pin capari' con Cristo Jeju.

⁷Hwara' opa pe ho' napa' Iri' Jam pane, xi xiram pa' ara capa' pain ca mi' capa' pain ca taramaja ne ca', pain ca pijim' hwet roron pain capiija con Panxita' oro wari' ta capa' pane. ⁸Om paxi' na ca awi ta' pane. Awi tiquin' ca' paxi' nanapa' oro xucucun wari' nucun Iri' Jam cwa'. Ane mi' pan capa' pain ca pijim' mi' wa capiijacon ne. Xiram pa' napa' pain ca pijim' mi' roron pain capiija oro wari' co om judeu nana ta capa' pane. Pijim' hwet roron pain carawa ca awi tamana ca mi' toton capari' Cristo ta napa'. Xi na capari' pain ca querec pin' pi' pin xin ta. ⁹Tomi' napa' Iri' Jam co tomi' ma' tomi' ma' pi' pin nain oro carawa jimao pane: Om paxi' na ca an hwet mi' toton cocon oro hwanana ca coromicat an pe xo' ne con Cristo pain cara pane napa'. Ane tomi' ac i ca' capa' pain xocori ca' ne: Tomi' xo' ho' roron oro wari' pain ca ara pin tain ca coromicat xo' ne con ne napa'. Ma' ta taraju pa' taraju pa' pi' pin cacain ta napa'. ¹⁰Ca' na ca coromicat nucun cocon oro jam cocon oro taramaxicon nucucun co hwara' opa to nanain pawin ma': Mo ta querec cocon co howa nonon Panxita' cwa', pain ca win ma' ne pin xucucun ca', querec pin' ac cacapa' tara pain oro ca taxi' tamana ne ca' na ca coromicat nucun. ¹¹Wara coromicat xo' ac i ma' na Iri' Jam pain cara pane, pain ca om quep querec cain macan' pane. Ara nain quem, ara pin nain ca coromicat nucun pain ca mam' capari'

con Taramaxicon nexi' Jeju Cristo. ¹²Win cwere pin urun Cristo. Xi om ne ca howa ara xun ta. Je ca om hehe xun Iri' Jam quem. Taxi' urun pain ca om miri'om capari' pain ca tomi' xun xi' ca'. ¹³Je ca tomi' xuhu' ca': Jain jain paxi' ina pain ca quep em' cacapa' pain ca pijim' mi' xuhu' pain capijacon Iri' Jam ca'. Je i ma' ira, ta tomi' xaxa' tomi' xaxa' naro pin hwe me ta. Tomi' querec te pan e' je, xi quep xiho' ara cuhu' oro carawa ca ara napa' ta.

Ca tomi' mi' inuhu' con Iri' Jam cocon Paulo

¹⁴Je ca tomi' mi' xuhu' con Cotere' cwa'. Pe torotop mi' inon. ¹⁵Te Te pi' pin urun pain ca to to wet xin macan' ca', te te pi' pin nonon oro co to pin nanain pawin ma' quem. ¹⁶Ca' na ca tomi' mi' xuhu' con: Mi' roron pain ca hwara' opa caca pain iri' ximicocon, mam' to' hwara' opa roron pain Tamataram inon pahu'. Win ne ca hwara' opa tamana ma pain ca awi tamana ma ma' inon. ¹⁷E' pe ho' tarain ximicocon Cristo ta inon pahu' quem. Win ne ca howa cocon ma' inon pahu'. Mi' roron pain ca om noc camain' quequem je pain ca om noc camain' xucucun quem. Hwara' opa tatara, om ta camara' caca pain ca caracat wa ta inon pahu'. ¹⁸Mi' roron pain ca querec pin' cocon Cristo pain ca om noc camain' caparut ma' inon pahu'. Oro wari' nem quem, mi' mi' xam' roron pain inon pahu'. Querec pin' wi totoron Cristo pain ca om noc camain' caparut ma', pain ca tomi' querec te tomi' querec te xam' caparut ma' inon pahu'. Querec pin' totoron pain ca wara om noc caparut pain cara pane, pain ca tomi' querec te cara toton caparut quem, pain ca om tomi' querec te paxica' camain' caparut quem inon pahu'. ¹⁹Om paxi' na ca querec pin' ac urut con Cristo pain ca om noc camain' caparut. Xi noc camain' caparut ta inon pahu'. Ane tomi' cara xim cocon ne, mi' roron pain ca querec pin' cocon Cristo pain ca om noc caparut. Ma' ta an xiho' quequem pain iri' xumum ta, ac i ma' na ca tomi' ton Iri' Jam pahu'.

²⁰Tomi' querec te xun Iri' Jam co hwara' opa tamana ta. Ha' ha' pi' pin non oro carawa. Ha' ha' tiquin' ca' nain ca param iri' ca' con. Ha' ha' tiquin' ca' cain ca coromicat iri' ca' quem. Win ne ca hwara' opa pe ho' capari' pain ximixi' ca'. ²¹Tomi' querec te xun ta. Tomi' querec te xun pain

3.14 Oro judeu pane, pe torotop mi' taxipa' nonon Iri' Jam pain ca tomi' cocon pane. Ac i ma' na ca an hwet mi' cocon pain ca in ac tamana cocon pain ca howa cocon pane.

ca howa xun ca'. Tomi' querec te xun pain ca win cwere xun Cristo Jeju quem. Tama' tomi' querec te cara xun ta. Amém, iri'o' na ca tomi' ne ta.

Ca curucun Cristo pin iri' pain ca howa xun ca'

4 Je ca tomi' xuhu' ca'. Wata' pain ca tao' pe pin cacapa' pain ca taramaja mi' ton Taramaxicon nexi' ca', hu ca' inuhu': Xuruxut xo' je ta inuhu'. Win ne ca xuruxut xo' je cuhu' Iri' Jam pain ca xo' howa xine qui' cuhu' pane. ²Ta xec xec hwe me. Tomi' wixite xujuhu'. An hwet pe jein ca om noc xujuhu' pain ca tomi' pan hot xujuhu' ma'. ³Je Tamataracon Iri' Jam na ca mi' nuhu' pain ca win ma' ne xujuhu' ma'. Je ca tomi' xuhu' ca': Param jein ca xica' pe ne xumuhu' pain ca tomi' querec te xujuhu' ma'. Jain jain jein. Ma' ta win ma' ne cara xujuhu' ma'. ⁴Je ca xica' pe tara xumuhu' me xuhu' ca'. Xi om ne ca ac ca ma' xica' pe ne ara ne cwerexi' con Cristo pain ca howa xun ca'. Ma' xica' pe na Tamataracon Iri' Jam ca pe ho' napari' pain ximixi' quem. Ac i ma' na ca ma' xica' pe ne carawa ca winim' iri' ca', ca tomi' pe mi' capari' pain ca xo' howa xine qui' capari' Iri' Jam pane. ⁵Ma' xica' pe na Taramaxicon nexi'. Ma' xica' pe na co howa iri'. Ma' xica' pe na co tomi' hwet iri' pain ca ja' iri' com quem, pain ca howa inon Jeju Cristo ta iri' pane. ⁶Ma' xica' pe na Iri' Jam co Te Te xam' iri'. Taramaxicon ne Taramaxicon ne pi' pin urun. Hu hu pi' pin napari' pain ca ara jein ca param pan ne capari'. Win cwere win cwere xam' napari' quem.

⁷Ane om xica' pe ne ca taramaja nexi' ca mi' capari' Cristo ne. Mi' mi' xam' napari' pain oro xijein ca taramaja taxi' wa. Mi' pan napari' pain ca param nucun. Om xi mi' capari' pain, xi iri' wari' iri' ta. Ane xiram pa' pan e' capari' ne. Mi' pan xuhu' pain napari'. ⁸Je ca tomi' ne capiiacon Iri' Jam ca'. Tomi' ca' na:

Piri' mao iri na ne,
cut mama' mija ac tococwa na oro wari' co pao' to ca ma'.
Xiran xo' ac caca na,
o mama' ac tococwa na.

Mi' e' ac tococwa na pain carawa ca awi oro wari' nucun ma' quem, ac i ma' na ca tomi' ne capiiacon Iri' Jam ca'.

⁹Cain' ca tomi' mao ne capiiacon Iri' Jam pain ca piri' mao na ta ne ma' quem? Om na, tomi' ca' ta' na ira: Wara quiji' qui' cain' na pain macan'

ca'. ¹⁰ Cristo co wara qui' qui' nain macan' pane, wirico co piri' mao nain pawin cain. Tiquin' mao na pain iri' pawin cain. Ma' ta taramaxicon pe ho' taramaxicon pe ho' pi' pin toton oro wari' pain oro carawa pain oro xijein macan' je oro pawin ta na pane.

¹¹ Wirico Cristo co mi' nain oro ca taramaja taxi' wa. Ma' nana co mi' wawa pain ca apóstolo wa pain ca tomi' hwet cacain capijacon Jeju. Ma' nana xucucun co mi' wawa pain ca profeta wa pain ca tomi' hwet cacain capijacon Iri' Jam quem. Ma' nana xucucun co mi' wawa pain ca evangelista wa, ma' ta tomi' hwet huhun oro wari' pain ca mi' pin caho' toton ta tata. Ma' nana xucucun co mi' wawa pain ca pastor wa pain ca ca' na wa capijacon Iri' Jam quem. ¹² Ma' ta ca' na tococwa oro wari' nucun Iri' Jam pain ca taramaja taxi' wa pain ca taramaja mi' cocon ta tata oro wari' nucun. Ma' ta horon horon tiquin' hwe pain ca howa nuhu' ma', pain ca ac cwere hwe ne pain ca win cwere xijexi' ca' napari'. ¹³ Mo ta pijim' ac i ma' cacapari', horon horon tiquin' pi' pin ac iri' tara, horon horon tiquin' pi' pin ac iri' tara, win ma' ne pin ac xijexi' tara pain ca howa wi xun Panxica Iri' Jam pain ca querec pin' wi pin xun quem. Ximicon hwanana ac iri' tara, an xiho' pin ac xun tara Cristo pain ca awi tamana nucun quem. ¹⁴ Ma' ta an xiho' an xiho' om xuxun hwijima' pain ca param ximama' nucun ta. Om ta xin ne ximama' xuxun oro wari' co pijim' camara' pin toton nanapari' pain ca ac ca iri'o' ta' ca' tara me cacapari' pain ca pijim' pan teretem nucun. Om ta an xiho' mami' xin mam' horoho wa ca ho in ho in pain com ca nocom nocom pain hotowa ma'. Mixein e' nanapari', param e' nanapari' pain ca pan teretem wa oro wari' co pijim' ac i ma' nanapari' ma'. ¹⁵ Om ta pijim' pan teretem ac i ma' xijexi'. Pijim' hwet e' xijexi' pain oro ca iri'o' wa con Iri' Jam. An hwet pe xin ca om noc xijexi' pain ca pijim' nexi' quem. Ca horon horon ac iri' tara, ca horon horon ac iri' tara, horon pin ac iri' tara con Cristo co ac winaxi' pain ca curucun pin iri' ca'. ¹⁶ Ac curucun pan iri' quem. Noro jein iri' cwerexi' ca'. Je winaxi' ca taramaxicon pe ho' nain oro coximixi' ca'. Ac taramaxicon na winaxi'. Je oro carapitaxi' pain oro caramaxi' ca to' wi nain oro araxi' pain coximixi' ca' quem. Mo ta taramaja xo' ne oro coximixi' ca', horon xo' ac iri' na, hwara' opa pin ac iri' na quem. Ac i ma' na pain ca curucun Cristo iri' quem. Mo ta om noc xijexi', mo ta ara xo' xin ca taramaja nexi' ca ara je capari' quem, horon tiquin' ac iri' tara pain ca hwara' opa nucun Cristo.

Xocori ca e' nexi' con Cristo

¹⁷ Je ca tomi' xuhu' ca'. Ac ca tomi' mip cuhu' na Taramaxicon nexi' pata'. Ta an xiho' mami' huhun oro wari' co om howa nonon Cristo me. Coromicat ximama' ara xi' nana. ¹⁸ Om ca taraju pa' caca. Ac ca pe ho' cocon na ca jitacat nein xim. Om nonon ca e' nucun Iri' Jam. Xi querec pin' camain' cocon ta. Noc nanain ca querec pin' wa quem. ¹⁹ Om ca wixipa' mami' caca pain ca pan teretem nucucun. Ara e' nanain oro ca om awi wa, je oro ca quep ximama' wa quem. Win xumu e' nanain.

²⁰ Ane om ac i ma' je urut pahu' pain ca pijim' mi' urut pahu' con Cristo ne. ²¹ Tomi' hwet ara xi' urut pahu' con, hu xo' ara xi' urut pahu' pain ca pijim' nucun Jeju ca iri'o' quem. ²² Ca' na ca tomi' urut pahu' pane: An to pin jein wara curuhu' ca ara taxipa' hwe pain ca om howa querec hun Iri' Jam pane. Oro ca param ne wara curuhu' ma', mixein nuhu'. To' em' nuhu'. ²³ Tomi' ca' jun Iri' Jam urut pahu' pane: Mi' xut pain ca xocori mami' ne xumuxut pain ca coromicat nuxut ca' jun. ²⁴ Tomi' ca' urut pahu' pane quem: Param jein ca xocoricon wari' wa. Ac ca to hun xocoricon wom ma' tara pain ca param hwein ma'. Wirico Iri' Jam na co ara mi' nuhu' pain. An xiho' xun pain ca om caracat camain' nucun pain ca iri'o' nucun ma' quem.

²⁵ Je ta tomi' mixein maho' qui' xujuhu' quem. Tomi' iri'o' tomi' iri'o' xam' xujuhu' pain ca win ma' ne xujuhu' ma'. Xi om ne ca xica' pe pin ara ne ximixi' pain ca curucun Cristo iri' ca'. ²⁶ Mo ta mana' xujuhu', ta caracat hwe pain me. An to pin jein. Om ta irawin pa' cuhu' pain ca mana' nuhu'. ²⁷ Ta ha' camain' hun Caxicon Jam pain ca mana' cara xujuhu' cuhu' me. ²⁸ Wari' co wara an noc xa pane, om ta an noc xa mami' ca quem. Taramaja xo' tara. Ma' ta cut ca dinheiro pain ca taramaja nucun. Ma' ta ma' con carawa ca mam' quep xiho' cocon co ximin nana pain ca om cocon carawa ta. ²⁹ Ta tomi' xirac camain' hwe me. Tomi' xo' e' je. Ma' ta to' hwara' opa huhun oro win ma' nuhu' pain carawa ca to' i'ina nonon ma'. Ma' ta quep xiho' huhun oro wari' co taraju nunuhu' ma' quem.

³⁰ Ta ja' tomi' xaxa' hwein Tamataracon Iri' Jam me. Mi' iri nuhu' pain ne, ac ca xirao' cuhu' pain na wixicon. Ac i ma' na ca mene inuhu' ta cuhu' ma'. Pe ho' cara turuhu'. To' taxi' pin nuhu' pain ca main maqui' ta' ne xec nein ca to' witan pin xihwe pain oro ca caracat wa. ³¹ An to pin jein oro ca juhumi' ne xumuhu'. Oro ca hwerehwet ne mixitahu' ma', oro ca mana'

wa ma' quem, an to pi' pin jein. Ta tomi' merem xujuhu' me. Ta tomi' napat xujuhu' me. Ta noc xujuhu' me. ³²Ca' je, xiram pa' xujuhu'. Quep xiho' xujuhu'. Mo ta ara cup xujuhu', ta mana' xujuhu' pain me. Mana' mana' om pin xujuhu' pain ca caracat nuhu' pain ca ara cup xujuhu' ma'. Win cuhu' Iri' Jam ma', pain ca ji'am pin cain ca caracat nuhu' con Cristo.

Ca xuruxut nexi' pain ca mana panxica Iri' Jam iri' ca'

5 Mana panxita' pin nuhu' Iri' Jam. Om ca noc cuhu'. Je ta an xiho' hun quem. ²Ta noc camain' xujuhu' me. Win ca Cristo pain ca om noc qui' capari' pain ca om narain ho' qui' xucun pari' pane, ac i ma' je pain ca om noc xujuhu' me. Mi' pan xucun con Iri' Jam Cristo. Ma' ta mi' pin caho' toton ta non pari' pane. Hohot tamana non Iri' Jam quem, hohot tamana non pain ca mi' pin caho' capari'.

³Tomi' inuhu' pain ca tarama' hwe ma': Om ca na ne pain ca quep hwem xequem narima'. Wahu' quem oro narima', quep e' turuhu' waram taxuhu' ma'. Ta coromicat camain' hwein ca quep ximama' wa me. Ta tomi' camain' hwein me. Ta param ximama' hwein oro carawa quem me. Xi hohot cuhu' pain ca wari' nucun Iri' Jam hwe ta. ⁴Ta tomi' hwein caji topac me. Ta tomi' ximama' hwe me. Ta tomi' ximama' tatam' pin huhun oro wari' pain carawa ca om awi hwe ta. Om ca hohot ne i ma' pahu'. Ta ac i ma' hwe me. Tomi' querec te pan e' jun Iri' Jam pain oro carawa ca mi' cuhu' ma'. ⁵Taxi' jein i ca' quem: Ximin tara wari' co quep nam xequem narima', ximin tara narima' co quep ne non xucun tarama' ma' quem. Ximin tara co coromicat ximao nain quem. Ximin tara wari' co param ximao nain oro carawa ca om awi ma'. Param ximao iri nain oro caramaji macan' wari' ma' ne, ac ca howa cain na, ac Iri' Jam non carawa ca param ximao ca ma'. Wari' co ac i ma' ma', om ta mao camain' cain ca taramaxicon pe ca Cristo con Iri' Jam ta.

⁶Ta tomi' mixein cuhu' wari' co tomi' ximao nuhu' ma' me, pain ca hohot na pain ca ara hwein i ma' ta cuhu' ma'. Oro wari' co om tomi' ha' nonon Iri' Jam ma', co ara ximama' nanain oro ca om awi wa ma', wap totoron Iri' Jam ta. ⁷Je ta om taxipa' camain' huhun oro wari' co ara ac i ma' nana ta. ⁸To paxi' hwein ca jitacat nein pane, pain ca om querec pin' querec hun Iri' Jam pane. Ane to pin hwein xec pain xocori ca' ne. Xi om ne ca win cwere pin ara hun Taramaxicon nexi' ta. Je ca tomi' xuhu'

ca': Xuruxut xo' je. Win caca oro wari' co to nanain xec ma'. ⁹To pin iri irin xec ne, awi ac iri' na. Iri' wari' ac iri' na. Iri'o' ac iri' na quem. ¹⁰Je ca tomi' xuhu' ca': Ara xi' iri jein carawa ma' ne, tomi' querec mam' ac xujuhu' tara: Hohot toron Taramaxicon nexi' pain ca ara xin i ca' ra, ac i ma' xujuhu' me. Ma' ta taxi' hwein carawa ca hohot non Taramaxicon nexi' ta. ¹¹Ta caracat wi hwe cocon oro wari' co to nanain ca jitacat nein ma', co pan teretem ximama' nana ma'. Pan to' jein taraxicocon pain ca pan teretem nucucun. Querec pin' ac tococwa tara. ¹²Xi awi camain' ne ca pan teretem nucucun ca ara noc xa caca ta. Om ca tomi' ac xine. Wixipa' xixi'. ¹³Mo ta pan to' xine ca taraju wa pain ca pan teretem wa ma', ac ca toha mi' xine na pain naran. Querec pin' ac xine na pain ca pan teretem wa. ¹⁴Je cwerein pain ca toha mi' xin capari' naran ma'. Querec pin' xin. Je ca xirao' pe xine pain capijacon Iri' Jam.

Wum ma', co ac ca pi'am ma na, querec ra e'!

Wum ma', co ac ca mi' pin ma na, e' pin ra e'!

Toha mi' ac quem tara naran nucun Cristo ta.

Ac i ma' na ca xirao' pe nein.

¹⁵Ma' tara xumuhu' me. Am xuruxut xo' hwe, querec querec je me. Ta an xiho' huhun co om coromicat xo' nana me. An xiho' e' jujun co coromicat xo' nana ma'. ¹⁶Ta om camain' hwe pain ca ara hwein ca awi wa me. Mija ara xi' na ca caracat wa pain oro xec nexi' ta. ¹⁷Je ca tomi' xuhu' ca': Ta an xiho' huhun oro wari' co om coromicat xo' nana me. Taxi' xixin na jein oro ca param mi' cuhu' Taramaxicon nexi'.

¹⁸Ta quep cuhu' comi uva ca mana' me. To' em' pin ara xi' napari' comi uva ca mana' ta. Param pan jein Tamataracon Iri' Jam. Pe ho' mip turuhu' ca hwara' opa nein ta. ¹⁹To' hwara' opa xujuhu' pain ca com hwein oro xijein tamara', oro salmo pain capijacon Iri' Jam ma', je oro xijein tamara' ca in ac non Iri' Jam, je oro xijein tamara' ca mi' cuhu' Tamataracon Iri' Jam quem. Com tara iri' xumuhu' pain ca com mi' hun pain Taramaxicon nexi'. ²⁰Tama' tomi' querec te jun Cotere' Iri' Jam pain oro ca ara mi' cuhu'

5.14 Oro wari' co ac ca to cacain xim ma', co pan teretem ximama' nana ma', ac ca pi'am caca na, ac ca cono' caca na quem. Xi querec pin' cocon Iri' Jam ta. Oro wari' co howa pin nonon Cristo ma' iri nana ne, ac ca pi'am pi'am om caca na, ac ca querec caca na. Ac ca cono' caca paxi' na pain ca pan teretem pan teretem wet nucucun pane ira. Howa pin iri nana ne, ac ca e' pin caca na quem.

ma'. An hwet jein wixicon Taramaxicon nexi' Jeju Cristo pain ca tomi' querec te hun quem.

Ca hu tococwa tarama' cacam manacocon

²¹ Tomi' ha' caracan xujuhu', xi om ne ca in ac ara hun Cristo ta.

²² Tomi' inuhu' pain ca narima' hwe ma', pain ca ma' cuhu' tarama' ma'. Tomi' ha' tomi' ha' xam' jujun waram taxuhu'. Ac ca tomi' ha' hun Taramaxicon nexi' ma' tara pain ca tomi' ha' hun ma'. ²³ Tarama' ma', taramaxicon pe ho' ara xi' nam manacon. Ac winacam na. An xiho' non Cristo co taramaxicon pe ho' napari' pain ca howa xun ca'. Ac winaxi' na, ac curucun ac iri' na quem. Wirico Cristo co to' witan napari' pain ca howa xun ca'. ²⁴ Je ca tomi' xuhu' quem oro narima': Tomi' ha' jujun waram taxuhu', tomi' ha' jujun pain iri' xumuhu'. Win ne ca tomi' ha' xun Cristo pain ca howa xun ca'.

²⁵ Wahu' quem, pain ca tarama' nuhu', tomi' inuhu' quem. Ta noc hwem manahu' me. Win ca Cristo pain ca om noc capari' pain ca howa xun ca', pain ca om narain ho' xucun pari' pane. Mi' pin caho' ara xi' napari' pane. ²⁶ Ma' ta to' hohot cuhu' Iri' Jam xuhu' ta napari'. Ac ca hohoc pin capari' na pain com ma'. Mam' to' om pin napari' pain ca em' nexi' pain capijacon quem. ²⁷ Ac i ma' napari', ma' ta querec hohot mahu' ta napari'. To' wari' ne xuhu', to' awi xuhu'. To' om pin tain ca caracat nuhu', to' om pin tain oro ca xirac nuhu' ta napari' pain ca howa xun ca'. ²⁸ Je ca tomi' xuhu' pain ca tarama' nuhu' ca': Ta noc hwehwem oro manahu' ta. Ac ca om noc hwein curuhu' ma' tara pain ca om noc hwehwem ma'. Wari' co om noc nam manacon ma', om ca noc pan xucun. ²⁹ Xi ma' ca wari' co noc nain curucun ta. Om ca noc camain' xucun. Pa' mi' pan xucun, ara xite xucun quem. Win capari' Cristo pain ca howa xun ca' quem. ³⁰ Ac oro coximinain curucun Cristo pan ara xi' iri'. ³¹ Ma' na ca xirao' pe xine pain capijacon Iri' Jam ca'. Ca' na con:

An ta' iri tara narima' tarama' ne,
pe ho' pe ho' om pin ac con tara cote ca cam jicon.
Pe ho' pin ac cam tara manacon.

Ac ca xica' pe pin ne tara cwerequequem.

Ac i ma' na ca tomi' nucun. ³² Pain capijacon Iri' Jam ca tomi' ta' ca', con tarama' co pe ho' pin nam manacon ma', awi tamana na ca coromicat

nucun ca an hwet mi' capari' ca', ca om taraju pa' iri' ira. Ca' na ca taraju pa' ne quem: Tomi' non Cristo pain ca om noc capari' pain ca howa xun ca', ac i ma' na ca taraju pa' ne. ³³Tomi' paxi' ta Cristo pain ca om noc capari' pain ca howa xun ca'. Ane tomi' tomi' xam' cuhu' pain ca tarama' nuhu' pain ca ma' cuhu' narima' quem ne. Ta noc hwehwem manahu' ta. Win ne ca om noc pan xujuhu' ma'. Wahu' quem oro narima', na e' na pain ca tomi' ha' huhun waram taxuhu' ma' quem.

Ca hu tococwa hwijima' cocon mana cote caca cacam waram jicocon

6 Tomi' inuhu' pain ca hwijima' hwe ma': Tomi' ha' jujun mana cote hwe cacam waram juhu'. Je ca param mi' cuhu' Taramaxicon nexi'. Tomi' ha' jejem ta nuhu'. ²⁻³Win ne ca tomi' ne capijacon Iri' Jam pane. Tomi' ca' na:

Tomi' ha' ron cote ma cam jim ta.

Ma' ta hohot quem oro ca ara ma ma',

ma' ta e' cara pe main macan' ca'.

Ac i ma' na ca tomi' nein. Pain ca tomi' ha' je tococwa oro hwanana pane, je ca win tomi' pe mi' tococwa pain carawa ca awi co tomi' ha' nana pane.

⁴Wahu' quem, pain ca wanxi' hwe ma'. Wahu' quem oro narima' pain ca wijima hwe ma' quem, tomi' inuhu' quem: Ta tomi' taparam' mana' hwehwem mana panxihwe me. To' horon xo' jejem. Hu xo' jejem pain oro ca param nucun Taramaxicon nexi' ca', je oro ca param nucun ca ara je capari' pain ca howa xun ca'.

Ca hu tococwa oro taramaxicon cocon oro wari' co taramaja mi' e' nonon

⁵Tomi' inuhu' pain ca taramaja mi' e' huhun oro taramaxicon nuhu' ma' quem. Tomi' ha' jujun co taramaja mi' e' hwe pain macan' ca'. Ac ca tomi' ha' hun Cristo ma' tara pain ca tomi' ha' huhun. Ta tomi' ha' inon mixein hwe me. Tomi' ha' iri'o' jujun. Tomi' ha' querec te tara iri' xumuhu' ta. ⁶Ta tomi' ha' e' huhun pain ca ja' noro cucuhu' me. Ma' nana co taramaja ac i ma' nana, ma' ta in ac cacapa' pain ca taramaja xo' ne ca' nana. Ta taramaja ac i ma' hwe me. Na e' na pain ca taramaja querec te hwe pain iri' xumuhu' ta. Ac ca taramaja mi' e' hun Cristo ma' tara pain

ca taramaja mi' huhun ma'. Param nuhu' pain ca taramaja xo' wa Iri' Jam quem. ⁷Taramaja querec te je me. Ac ca taramaja mi' e' hun Taramaxicon nexi' ma' tara. Ac ca om taramaja mi' e' hun wari' tara. ⁸Xi taxi' ara hun Taramaxicon nexi' pain ca mi' mi' xam' ton cocon pain carawa ca awi oro wari' co taramaja xo' nana ma'. Co taramaja mi' e' nonon taramaxicon nucucun ma', co taramaja mi' pan xucucun ma' quem, mi' ac tococwa tara pain oro ca awi wa pain ca taramaja xo' nucucun.

⁹Wahu' quem, pain ca taramaxicon nuhu' ma', tomi' inuhu' quem. Ma' tara xumuhu' cocon oro wari' nuhu' co taramaja mi' e' nunuhu' ma'. Ara xite jujun. Ta tomi' noro huhun me. Xi taramaxicon ne wi ara hun Taramaxicon nexi' co pe pawin ta. Wahu', wiricoco co taramaja mi' e' nunuhu' ma' quem, Taramaxicon ne wi hun ma' ira. Taxi' ara xi' hwein i ma' ta. Ac wiricoco ac wiricoco ari hwe con. Om ca tomi' querec te paxica' camain' cuhu'.

**Oro ca mam' mixita wa ca mi' capari' Iri' Jam, ma'
ta narain ho' xujuhu' con Caxicon Jam napari'**

¹⁰Tomi' xim inuhu' pain i ca' quem: Win cwere cara jun Taramaxicon nexi' ta, ma' ta to' hwara' opa cuhu' ca hwara' opa tamana nucun. ¹¹Cut cut pi' pin jein oro ca mam' narain ho' xujuhu' ca mi' cuhu' Iri' Jam ma'. Ma' ta ha' cuhu' pain ca hwara' opa hwe pain ca mixein mixein joc camara' pin xim cuhu' Caxicon Jam ta. ¹²Xi wari' caca co mixita iri' ta. Oro caxicon jam nana co mixita iri'. Mixita ururun oro caxicon jam cocon oro taramaxicon nucucun co taramaxicon to ho' nanain oro ca om awi wa pain macan' ca', cocon oro wari' co ac ca to cacain ca jitacat nein na pain ca ari cocon Iri' Jam ma' quem. Mixita ururun oro caxicon jam co hwara' opa to nanain nanawin cain quem. Wiricoco co mixita iri' ta. ¹³Je ta cut pi' pin qui' hwein oro ca mam' narain ho' xujuhu' ca mi' cuhu' Iri' Jam ta. Maqui' iri tara xec nein ca joc camara' pin xim cuhu' Caxicon Jam ne, na ac cuhu' tara pain ca mam' mixita hun pain oro ca mam' narain ho' xujuhu' ca mi' cuhu' Iri' Jam. Hwara' opa hwara' opa to wet ac hwe ma' tara ta.

¹⁴Awori to je. Ac ca cut hwein tara oro ca mam' narain ho' xujuhu' pain ca mixita hun Caxicon Jam. Noro jun soldado co cut xo' nain oro ca mam' narain ho' xucun pain ca mixita con wari' co noc non ma'. Tucu na pain ximijacon cinturão nucun. Je ca mam' to' hwara' opa pan xucun.

Ac i ma' je pain ca iri'o' e' hwe ma' quem. Ta mixein camain' hwe me ta. Xuruxut xo' je, ara e' jein ca param nucun Iri' Jam ta. Na ac cuhu' tara pain ca narain ho' xujuhu' con Caxicon Jam. Ac i ma' na soldado pain ca pe cain arain too ca pe caho' nain quimacon je waracon ma' quem. Na ac con na pain ca nain ho' xucun. ¹⁵Noro jun soldado pain ca pe cain caji caxim pain caximacon quem. Ma' ta om i'ina xut ta' ca' na, ma' ta om toron capa' xumu pain ca xut ta' ca' na. Ac i ma' je quem, ac ca to hwein caji caxim pain caximahu' tara pain ca win xumu hwein capijacon Iri' Jam con Jeju ma', co to' om pin nain ca toron ne ximixi' ca' quem. Na ac cuhu' tara pain ca hwara' opa cara hwe ta. ¹⁶Ca howa tocwa Iri' Jam ma', je ca an xiho' nain pana ca mam' tac caho' xucun soldado ma' quem. Je ca tomi' xuhu' ca': Howa cara jun Iri' Jam ta. Na ac cuhu' tara pain ca narain ho' xujuhu' con Caxicon Jam pain ca caracat je taxipa' cuhu' ma'. Win ca soldado pain ca mam' wap jo' pin cain pain pana nucun oro conacocon oro wari' co mixita xun nonon ma', ac i ma' tara pain ca mam' narain ho' xujuhu' pain ca howa nuhu' ta. ¹⁷Noro jun soldado pain ca pe cain caji waji' pain winacon ma' quem. Mam' quep caho' nain winacon pain caji waji' nucun. Ac i ma' je quem, ac ca quep caho' hwein tara ca coromicat nuhu' ma', pain ca mam' pe wet cara hwein i ca' con Jeju quem, pain ca to' witan ca' cuhu' pain ca wap wa pain ca caracat nuhu' ma'. Noro jein capijacon Iri' Jam ca an xiho' nain cote ne quit nucun soldado ca mam' mixita ca ma' quem. Mam' tomi' napari' pain capijacon Iri' Jam Tamataracon. Na e' na pain ca noro hwein pain ca tomi' ha' hwein ta. Na ac cuhu' tara pain ca mam' ari hun pain Caxicon Jam. ¹⁸Tama' tomi' jun Iri' Jam ma', pain ca cut hwein oro ca mam' narain ho' xujuhu' ca mi' cuhu' ma'. Pain ca mi' cuhu' pain oro ca tomi' wa Tamataracon ma', je tara ca tomi' hun ta. Ma' tara xumuhu' me. Ta pi'am ca' hun pain ca tomi' hun me. Ta an to pin hwein ca tomi' wa quem me. Tama' tomi' mi' tomi' mi' pi' pin jujun con oro wari' nucun quem.

¹⁹Wata' quem, tomi' mi' xine con quem. Ma' ta mi' capa' pain ca pijim' xo' wa pain ca aram aram pijim' ta' ta' ca'. Ma' ta pijim' quereme tain capijacon Iri' Jam ca an hwet mi' capari' con Jeju ma', pain ca to' witan toton capari' ca'. ²⁰Wirico Cristo co pijim' rain capija napa' pane. Wirico co mi' napa' pain ca tomi' hwet tain iri' capijacon. Je ca tao' pe cacapa' ca'. Tomi' mi' xine con Iri' Jam me. Ma' ta pijim' quereme ta'. Je ca param mi' capa' ca'.

Ca pi' pin ne ca xirao' nucun Paulo

²¹ Coxari' Tíquico cwa', co om noc ta' cwa', co taramaja mi' xo' non Taramaxicon nexi' cwa', pijim' hwet turuhu' pata'. Taxi' ac mahu' tara pain carawa ca ara napa'. ²² Je ca hwet roron ta ton ca' pahu'. Tomi' hwet roron pain carawa ca ara naparut ca' inon pahu'. To' hwara' opa roron pain ximicocon quem inon pahu'.

²³ Param inon Cotere' Iri' Jam con Taramaxicon nexi' Jeju Cristo pain ca mi' cucuhu' pain ca om toron ne xumuhu'. Param inonon pain ca mi' cucuhu' pain ca om noc xujuhu' je pain ca howa cara hwe ma' quem. ²⁴ Wahu' pain ca om noc cara hun Taramaxicon nexi' Jeju Cristo ma', param inon Iri' Jam pain ca quep xiho' quep xiho' xam' cuhu' pain ca mi' e' cuhu' pain ca param nucun.

Je i ca' ca xirao' ne ca'.

Filipenses

Ca xirao' mi' tococwa co howa nonon Jeju pain Filipos

1 Paulo ina pain ca xirao' mi' xuhu' ca'. Wirico Timóteo cwa' quem, xirao' mi' urut pahu'. Wari' nucun Cristo Jeju urut pain ca taramaja mi' urut con ca'.

Xirao' mi' xirao' mi' pi' pin urut pahu' pain ca wari' nucun Iri' Jam ma', pain ca win cwere hun Cristo Jeju hwe ma', pain ca to hwein Filipos ma'. Wahu' pain ca pastor hwe pain ca querec wet huhun oro co howa nana ma', wahu' pain ca diácono hwe ma' quem, xirao' mi' urut pahu' quem.

²Param urut con Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param urut cocon pain ca mi' cucuhu' pain ca om toron ne xumuhu' quem.

Ca tomi' mi' tococwa con Iri' Jam, je pain ca tomi' querec te urut con Iri' Jam pahu' ta tococwa quem

³Mam' pe wet iri inuhu' ne, tomi' querec te taxipa' ac ton na Iri' Jam ne pahu'. ⁴Pain oro ca tomi' ton Iri' Jam cwa', tama' tomi' querec te inon pain ca tomi' mi' xuhu' con, ⁵xi om ne ca quep xiho' ara mahu' pain ca pijim' tain capijacon Iri' Jam ca tomi' hwet napari' con Jeju ta. Wara quep xiho' mahu' pain cara pane, pain ca xo' howa ten qui' hwe pane, quep xiho' quep xiho' wet mahu' pain xocori ca' quem. ⁶Wara meo nain xumuhu' Iri' Jam pane, wirico co ara nain ca awi wa pain xumuhu' ma', pain ca to' xocoricon wari' pin cuhu' ma'. Taxi' inon pain ca meo meo tiquin' tain cain xumuhu' quem. Aram aram maqui' pa' ac cuhu' tara xec nein ca in qui' ta' nucun Cristo Jeju ma', awori pin ac ne tara oro ca awi wa ca ara pe cain xumuhu' ma' quem.

⁷Ac i ma' na ca coromicat mi' coromicat mi' pi' pin xuhu' ca'. Hohot na quem, xi tomi' querec te ara xuhu' pain iri' xumu ta. Taramaja wi iri', xi om ne ca quep xiho' quep xiho' xam' ara mahu' pain ca taramaja ne ca mi' capa' Iri' Jam ta. Quep xiho' mahu' pain ca tao' pe cacapa' pain xirinain ca tao' to tao' to to wa ca', quep xiho' mahu' pain ca tomi' xo' toton co

tomi' napat nanain capijacon Iri' Jam ca tomi' hwet napari' con Jeju cwa', je pain ca tomi' tomi' na pin toton pain ca iri'o' nein ca' quem. ⁸Mija na ca coromicat xuhu' ta, jain jain inuhu'. Tomi' iri'o' ina, taxi' napa' Iri' Jam pain ca coromicat tamana xuhu' ca'. Tomi' querec te tamana inuhu'. Win ne ca tomi' querec te tamana cuhu' Cristo Jeju cwa', ac i ma' na ca tomi' querec te xuhu' ca'.

⁹Je i ca' ca tomi' ton Iri' Jam pain ca tomi' mi' xuhu' con: To' hwara' pin rain ca tomi' querec te cara xucucun ta inon pahu'. Mi' roron pain ca querec pin' quequem, je pain ca taraju pa' taraju pa' pi' pin cacain oro ca param nem quem inon pahu'. ¹⁰Ma' ta querec pin' cacain iri' ca xuruxut xo' wa ta inon pahu'. Ma' ta om pan teretem caca, ma' ta om ma' camain' cocon oro ca to' em' nonon pain xec nein ca aram aram in qui' ta ca Cristo ma' inon pahu'. ¹¹Ma' ta ara taxipa' cacain oro ca awi wa ta inon pahu'. Wirico tara Jeju Cristo co mi' nuhu' pain oro ca ara xo' wa ma'. Querec pin' ac tocwa tara Iri' Jam pahu', pain ca hwara' opa nucun, je pain ca awi tamana nucun quem.

Ca pijim' pijim' tiquin' xine capijacon Iri' Jam, xi om ne oro ca ara non Paulo

¹²Je ca tomi' xuhu' ca' xere, taraju pa' jein ca tomi' xuhu' ca'. Oro carawa ca ara napa' pain xirinain ca tao' to tao' to to wa ca', om paxi' na ca to' i'ina capa'. Xi om ne ca pijim' tiquin' ara xine capijacon Iri' Jam ca tomi' hwet napari' con Cristo ta. ¹³Je ca taxi' taxi' pi' pin cacapa' oro soldado co querec wet nanain xiricon taramaxicon ca', taxi' taxi' pi' pin nanapa' oro wari' cwa' quem. Taxi' nanapa' pain ca tao' pe capa' taramaxicon pain xirinain ca tao' to tao' to to wa ca', xi om ne ca pijim' taxipa' ara tain capijacon Iri' Jam con Cristo ta. ¹⁴Mija nana oro xerexi' co pijim' hwet nanain capijacon Iri' Jam quem. Taxi' iri' nanapa' pain ca pe tain xirinain ca tao' to tao' to to wa ca' ne, to' hwara' opa ac tococwa na. Wirico Taramaxicon nexi' co to' hwara' opa nonon ma', pijim' hwara' opa ac caca na quem. Om ca pijim' jin' caca.

¹⁵Ma' paxi' nana co om xumu xo' nana pain ca pijim' hwet cacain capijacon Iri' Jam con Cristo quem, xi om ne ca joc in pin xun Paulo ta ara caca pain ca noc mi' cacapa' pain ca pijim' ne ta. Je i ma' ira ina cocon ta. Oro xucucun iri' nana ne, xumu xo' nana pain ca pijim' caca ma', pain

ca quep xihō' xim ta cacapa' ma' quem. ¹⁶ Co quep xihō' xim nanapa' ma', pijim' hwet nanain capijacon Iri' Jam, xi om ne ca tomi' querec te ara cacapa' ta. Taxi' nanapa' pain ca wara tomi' capa' Iri' Jam pane, pain ca tomi' xo' roron co tomi' napat nanain capija ca tomi' hwet nuhu' con Cristo cwa' capa' pane. Je ca pijim' caca ma'. ¹⁷ Oro xucucun ma' iri nana ne, co noc mi' nanapa' pain ca pijim' ne ca', pijim' paxi' nanain capijacon Iri' Jam, ane om xumu xo' caca pain ca pijim' nucucun ne. Pijim' capijacocon e' nana. Querec pin' tatarapari' oro wari' pain ca pijim' awi nexi' ta nana. Coromicat ca' nana quem: Taraju iri tara Paulo pain ca pijim' awi nexi' ca' ne, tomi' xaxa' tamana tara, hwara' pin tara ca jain jain nucun pain xirinain ca tao' to tao' to to wa ta nanapa'. ¹⁸ Je i ma' ira ina ta! Co xumu xo' nana pain ca pijim' nucucun ma', co om xumu xo' nana quem, je i ma' ira. Na e' na pain ca pijim' hwet xine capijacon Iri' Jam con Cristo ta. Je ca tomi' querec te ta' ca'.

Tomī' querec te tomi' querec te tiquin' ta' quem. ¹⁹ Ma' paxi' na oro carawa ca to' i'ina napa' ca', ane tomi' mi' mahu' con Iri' Jam ne. Quep xihō' napa' Tamataracon Jeju Cristo quem. Je ca taxi' ton Iri' Jam pain ca mi' xim capa' pain ca hwet ca' tain xirinain ca tao' to tao' to to wa ca'. ²⁰ Param tamana inain i ca' quem, jain jain inain: Ara xo' xitain na inain oro ca ara ra capa' Iri' Jam cwa' ina. Noc tamana inain ca ara wa carawa ca to' wixipa' napa' ta. Om ta pijim' jin' ta', pijim' hwara' opa ta'. Win ne ca om pijim' jin' ta' pane. Mo ta e' e' tiquin' ta', mo ta mi' pin ta' ta' quem, param e' inon Cristo pain ca querec pin' tocwa pain ca awi tamana nucun pata'. ²¹ Ca' na ca coromicat ne ca': Mo ta e' e' tiquin' ta' pain macan' ca', param e' inon Cristo pain ca querec pin' tocwa pain ca awi tamana nucun pata'. Mo ta mi' pin ta' ta', hohot tarapa' quem. Hwet ton ara xi' inon pain ca aram aram mi' pin ta' ne ta. ²² Mo ta e' e' tiquin' ta' pain macan' ca', ha' ac capa' tara pain ca taramaja taramaja tiquin' ta' ca', pain ca taramaja mi' ton Cristo. Tara pata' ta'a, om ca taxi' tain ca param ne. ²³ Param param pi' pin paxi' inain. Param inain ca e' e' tiquin' wa, param inain ca mi' pin wa ca' quem. Param paxi' inain ca mi' pin wa, pe ho' xiton Cristo na ina. Hohot tamana xirapa' ca mi' pin wa ta. ²⁴ Ane hohot tamana pan ne ca e' e' tiquin' ta' ne. Ha' ac capa' tara pain ca quep xihō' xuhu' quem. ²⁵ Je i ma' tara pata', e' e' tiquin' ta' ta, taxi' ina. Quep xihō' quep xihō' pi' pin xuhu'. Ma' ta hwara' opa hwara' opa tiquin' hwe pain ca howa nuhu' ma', ma' ta tomi' querec te tomi' querec te tiquin' hwe pain quem inuhu'. ²⁶ Je

ca tomi' xuhu' ca'. Hwet iri xuhu' ne, tomi' querec te tamana ac hun tara Cristo Jeju pain ca pe ho' mami' xuhu' ta.

²⁷ Je ca tomi' xuhu' ca', win xumu cain' jein ca xuruxut xo' wa ta. Ac oro wari' co xuruxut xo' nana pain ca howa cacain capijacon Iri' Jam ca tomi' hwet napari' con Cristo ta je, ac i ma' tara ca xuruxut xo' nuhu' ta. Am ha' capa' pain ca hwet xuhu', am om ha' capa'. Am taraju e' xuhu' pain ca tomi' hwet xihwe pain ca xuruxut nuhu' ma', je i ma' ira. Taxi' xuxuhu' na inuhu' pain ca hwara' opa hwe pain ca ac ca xica' pe ne ne xumuhu' ma', pain ca tomi' in pin wi huhun oro wari' co ari nanain capijacon Iri' Jam ca tomi' hwet napari' con Cristo ta. ²⁸ Quereme jujun oro wari' co ari nunuhu' ma', ta jin' camain' huhun me. Quereme iri jujun ne, querec pin' caracan ac xucucun tara pain ca to' quiji' pin xun tococwa ma'. Querec pin' pan ac xujuhu' tara pain ca witan xi' hwe ma' quem. Wirico Iri' Jam tara co ara tain nain i ma' pahu'. Wirico pan tara co to' quiji' pin nonon, wirico pan tara co to' witan xim nuhu' ma' quem. ²⁹ Xi om ne ca xiram pa' ara cuhu' pain ca mi' cuhu' pain ca howa hun Cristo ta. Om ca xiram pa' e' cuhu' pain ca mi' cuhu' pain ca howa hun, xiram pa' nuhu' pain ca mi' cuhu' pain ca to' i'ina cuhu' oro carawa pain ca howa hun quem. ³⁰ Jain jain ara xi' hwe pain ca to' i'ina cuhu' oro carawa pain ca howa hun ma'. Win ta' pane, querec mahu' pain ca to' i'ina capa' oro carawa pane. Taxi' mahu' pain ca to' i'ina to' i'ina wet capa' pain xocori ca' quem.

Ca om xec xec nucun Cristo Jeju

2 To' hwara' opa napari' Cristo, xi om ne ca win cwere ara xun ta. Ta noc xujuhu' me napari'. Jao jao ma' xixexi' pain ca pe ho' capari' Tamataracon Iri' Jam. Xiram pa' tamana napari' quem. ² Je ca tomi' xuhu' ca', ac je ac je ari tara ca coromicat nuhu'. Ta noc xujuhu' me. Ac ca xica' pe ne tara xumuhu' pain oro ca coromicat nuhu', ac je ac je ari tara ca coromicat nuhu' pain ca om noc xujuhu' ma' quem. Mo ta ac i ma' hwe, ja' tomi' querec te tamana ac mahu' tara ta. ³ Ta win xumu e' hwein ca param nuhu' pain oro ca xuruxut nuhu' me. Ta coromicat ca' hwe me: Querec pin' tatarapa' oro wari' pain ca xut xo' ne ta, ta coromicat ac i ma' camain' hwe me ta. Ta xec xec hwe me. Coromicat ca' je: Awi ca' nanapa' oro win ma' ne cwa', ac i ma' tara ca coromicat nuhu' ta. ⁴ Je ca tomi' xuhu' ca',

tomi' tomi' xam' inuhu': Ta win xumu e' hwein ca param pan nuhu' me.
Win xumu jein ca param nucucun oro win ma' hwe ma' quem.

⁵Ca coromicat nuhu' ma', an xiho' e' tarain ca coromicat nucun Cristo Jeju ta.

⁶Iri' Jam paxi' na Cristo pain iri' ximicon pane,
ane om jain jain cain ca hwara' opa nucun ne.

Om ca coromicat ca' ca: Om ta wari' pin ta' ta, xi Iri' Jam ara ta' ta,
om ca coromicat ac i ma' camain' ca pane.

⁷Coromicat ca' e' na:

An pe pin tain ca ac Iri' Jam wa ta na.

Wari' pin ta' ta na.

Ac wari' co taramaja mi' e' non xucun wari' pin ta' ta na.

⁸Pain ca wari' pin ca ma', tomi' ha' cara non Cote ca
pain ca om xec xec nucun.

Xin ne pan non pain ca to' pa' pin teterem ta con.

Om ca nain ho' pan xucun pain ca tomi' noro tocwa ma', pain
ca tatatain mi' tocwa pain pana pane.

⁹Je ca mi' con pain iri' ca hwara' opa wa Iri' Jam ta.

Mi' non pain ca iri' ca Taramaxicon pin wa.

Om na xucun co win Taramaxicon ca quem.

¹⁰Ma' ta pe torotop mi' cocon oro wari' ta na Iri' Jam.

Co to nanain pawin cain, co to nanain macan' ca', co
wara cono' nana quem,

pe torotop mi' pe torotop mi' pi' pin totoron Jeju.

¹¹Querec pin' totoron pain ca hwara' opa nucun quem.

Iri' Taramaxicon na Jeju Cristo ta tatara oro wari'
pain oro xijein macan'.

Ac i ma' tara ca an hwet pe cacain ca awi nucun Cotere' Iri' Jam ma' quem.

Ca an hwet jein ca howa nuhu' tococwa

¹²Je ca tomi' xuhu' pain ca tomi' querec te xuhu' ca'. Pain cara pane,
pain ca pe ho' xuhu' pane, tama' tomi' ha' hun Iri' Jam. Je ta tomi' ha' mip
qui' hun pain ca pe ni ca' xuhu' pain xocori ca' quem. Tiquin' ca' tarain
ca wara tomi' ha' nuhu' ta, win xumu mip jun pain ca tomi' ha' tamana
nuhu'. An hwet pe jein ca xuruxut xo' nuhu', ma' ta querec pin' cucuhu'

oro wari' pain ca to' witan pin cuhu' Iri' Jam. Querec pin' tuturu' pain ca in ac tamana hun quem. ¹³Xi om ne ca wirico Iri' Jam ara ca co mi' nuhu' pain ca tomi' ha' xixi' na wa ma', wirico co mi' nuhu' pain ca ara hwein iri' ca param nucun quem.

¹⁴Ara xo' jein oro ca ara hwe pain ca tomi' ha' hun Iri' Jam. Ta tomi' wijimi hwe pain me, ta tomi' mana' xujuhu' pain me. ¹⁵Ma' ta querec pin' xihwe pain ca xumu xo' nuhu' ma', pain ca om hwet ne wuxuhu' pain ca caracat wa ma'. To ho' paxi' huhun oro caracat co pan teretem nana ma', co ara taxipa' nanain oro ca om awi wa ma'. Ane om hohot camain' ne pain ca ma' cuhu' oro ca to' em' nuhu' pain ca caracat wa pain ca mana panxica Iri' Jam hwe ne. Ac oro pijo' co toha to nain pawin je. Ac ca toha mi' huhun tara pain naran ma', to' querec pin' jujun pain ca xuruxut xo' wa ta. ¹⁶Tomi' hwet cara jujun pain capi' Iri' Jam ca to' e' napari' ca'. Mo ta ac i ma' hwe, tomi' querec te tamana ac xuhu' tara pain xec nein ca in qui' ta' nucun Cristo. Taxi' ac xije tara pain ca om taramaja taramaja jam' pin ximao ta' ca' pahu'.

¹⁷Pain ca howa hun Iri' Jam ma', ac ca mi' hun na pain carawa ca awi ca hohot non ma'. Mo ta param mi' capa' pain ca mi' pin wa pain ca pijim' xuhu' pain capi' ca', mo ta quep xiho' cuhu' pain ca howa nuhu' ca mi' pin ne quem, je i ma' ira ina, mi' pin ma' ta' ne pahu' ta ina. Ac ca mi' wi xun tara pain carawa ca awi Iri' Jam quem. Tomi' querec te tamana ac ta' tara pain ca howa nuhu', tomi' querec te wi ac xuhu' tara quem. ¹⁸Je ca tomi' xuhu' ca'. Tomi' querec te je quem, tomi' querec te wi xi' ta.

Timóteo con Epafrodito

¹⁹Param inon Timóteo pain ca hwet xim cuhu' ta. Mo ta tomi' ron ta capa' con Taramaxicon nexi' Jeju ma', tomi' ac ton tara, hwet roron ta ac ton tara pahu', ma' ta ja' tomi' querec te capa' pain ca aram aram pijim' hwet xim capa' pahu' ta ton pahu'. ²⁰Xi om ne ca toron tamana ara ne ximicon pain ca xiram pa' iri'o' cuhu' ta. Om napa' xucun co an xiho' non pain ca quep xiho' xitoton na cuhu' ma'. ²¹Oro xucucun cwa', win xumu win xumu pi' pin nanain oro ca param pan nucucun. Om ca win xumu cacin ca param pan nucun Jeju Cristo. ²²Ane querec pin' hun Timóteo ne. Taxi' hun pain ca taramaja xo' nucun ca', pain ca quep xiho' capa' pain ca pijim' wi urut pain capi' Iri' Jam con Jeju. Win ca co xo' ho'

tarama' ma', co taramaja wi non cote ca ma', ac i ma' na ca taramaja wi capa' Timóteo pain ca tomi' hwet urut cocon oro wari' con Jeju. ²³ Je ca param ton pain ca hwet xim cuhu' ma'. Taxi' pin iri tain carawa ca ara xim napa' ca' ne, tomi' ac ton tara, hwet roron ta ac ton tara pahu'. ²⁴ Ane howa ton Taramaxicon nexi' pain ca mi' xim capa' pain ca hwet pan xuhu' ne. Om ta om om ta', hwet xuhu' ta.

²⁵ Coromicat ca' ina con coxari' Epafrodito cwa', co quep xiho' napa' pahu'. Taramaja wi napa', ari wi urut cocon oro wari' co noc nonon Cristo cwa'. Wara mam' paxi' mahu' con pane. Hwet ron, quep xiho' ron ta hun pain cara pane. Quep xiho' paxi' napa' pain oro ca to' i'ina napa' ca' quem. Ane na e' ne pain ca in hwet roron oro win ma' nem ta ton pahu' ne. ²⁶ Xi om ne ca coromicat pan ara cuhu' ta. Coromicat coromicat pi' pin nuhu', toron tamana na ximicon pahu', xi om ne ca taraju ara hun pain ca caxi nucun pane ta. ²⁷ Tomi' iri'o' ina quem, caxi na pane, mi' pin na ira. Ane xiram pa' con Iri' Jam ne. Om ca xiram pa' xica' pe con, xiram pa' napa' quem. Ma' ta om hwara' tiquin' hwara' tiquin' ne ca tomi' xaxa' nem ta napa'. ²⁸ Je ca tomi' ho' ton ta' ca', in hwet roron oro win ma' nem ta ton pahu', ma' ta tomi' querec te hwe pain ca aram aram querec mami' hun ma' inuhu'. Ma' ta wa pin capa' xumu con ta inon quem. ²⁹ Je ca tomi' xuhu' ca'. Tomi' querec te jun. Win ne ca tomi' querec te tamana xijexi' pain ca howa wi xun Taramaxicon nexi' cwa', ac i ma' tara ca tomi' querec te tamana hun ta. Querec pin' querec pin' xam' jujun oro wari' co an xiho' nonon. ³⁰ Xi om ne ca win xumu ara con Cristo ta. Je ca mi' pin ta' ca ira. Om iri na ca ha' cuhu' pain ca quep xiho' pan mahu', quep xiho' pan ac capa' na. Om ca nain ho' cain curucun pain ca quep xiho' xim ta capa' pahu'.

Ca tomi' querec te je tococwa

3 Tomi' xim inuhu' pain i ca' quem xere: Tomi' querec te je, xi om ne ca win cwere ara hun Taramaxicon nexi' ta. Ca xirao' mi' xuhu' ca', xirao' mi' paxi' inuhu' pain. Ane om horoman capa' pain ca xirao' mami' xuhu' pain ne. Quep xiho' turuhu' ca xirao' ne ca' quem, to' hwara' opa turuhu' pain ca ari huhun co pijim' mixein xim nunuhu' ta.

² Ma' tara xumuhu' cocon caram ma' co an xiho' nonon caxicon oromijac ma', co pan teretem nana ma', co tomi' ximama' nonon co om judeu nana

pain ca wac xirac jein taparinain ca xirac nuhu', ma' ta wari' nucun Iri' Jam pin hwe ta cocon ma'. ³Xi iri' wari' nucun Iri' Jam pan caca ta. Wari' pan, pain ca howa xun Cristo cwa', wari' co iri' wari' ne ca Iri' Jam ta. Tamataracon pan ca mi' napari' pain ca in ac xun ca'. Tomi' querec te pan urun Cristo Jeju co to' wari' nucun Iri' Jam napari' quem. Om ca howa camain' xin carawa ca ara pan iri' ca', om na.

⁴Hohot paxi' xira pain ca coromicat mi' ca' xije: Wari' nucun Iri' Jam ina, xi om ne ca tomi' ha' cara ara tain oro ca ara ra capa' ta, hohot paxi' xira pain ca coromicat mi' ac i ma' xije. Ma' ara xi' nana co coromicat ac i ma' nana quem, xi om ne ca tomi' ha' ara cacain oro ca ara je cocon Iri' Jam ta. Je xi coromicat ac i ma' ta' quem? Xi om ne ca tomi' ha' tiquin' ca' ara toton pain oro ca ara ra capa' Iri' Jam ta. Ca' paxi' ina pane: ⁵Wac xirac nanain taparinain ca xirac ne pain ca pije' ne pane, pain ca 8 pin capa' xec pain ca xo' pan' qui' ne pane. Iri' wari' nein Israel ina quem. Iri' hwanana ne nonon Benjamim waram jeo' pane quem. Iri' hebreu ina. Fariseu ina quem, tomi' ha' xo' inain oro ca xirao' nucun Moisés pane. ⁶Win xumu tamana inain ca howa nuxut pain ca judeu urut ca', pain ca tomi' ha' jein ca xirao' nucun Moisés ta toton oro win ma' ne. Je ca ja' tequi' ja' tequi' quep em' toton oro judeu co howa pin nonon Jeju pane quem. Tomi' ha' inain oro ca xirao' nucun Moisés pane, om ca hwet camain' ne wuxu pain ca om tomi' ha' wa quem.

⁷Quep xihó' tamana napa' xi' ma inain oro i ma' pane ira, ac i ma' paxi' na ca coromicat ne pane. Ane querec pin' tain pain xocori ca' ne. Om ca quep xihó' capa' oro ca tomi' ha' tain ca xirao' nucun Moisés ma', quep xihó' e' napa' Cristo ta. ⁸Om ca noc xica' pe tain oro ca ara ta' cocon hwanana ne pane, noc noc pi' pin inain oro ca hohot napa' pane quem, xi om ne ca hohot tamana pin ara capa' Taramaxicon ne Cristo Jeju ta. Noc pin inain, om ca howa mami' tain oro ca ara ta' pane. Ac oro carawa ca wixicaracao' pin wa ma' napa', noc pin inain ta. Ma' ta iri' wari' nucun Cristo ta' ina, ac i ma' pin na ca coromicat ne ca'. ⁹Win cwere ton ta inon quem. Om na ca xirao' nucun Moisés ca to' hohot napa' con Iri' Jam ta, om

3.5 Hebreu nana iri' hwanana nucucun oro judeu pain cara pane. Hebraico na wixinain capijacocon quem. **3.5** Judeu nana oro fariseu pane. Ac taramaxicon nana. Tomi' ca' nonon oro win judeu caca: Na e' na pain ca tomi' ha' xin oro ca xirao' nucun Moisés ca tomi' ha' je capari' Iri' Jam ta. Na e' na pain ca tomi' ha' xin oro ca xirao' nucucun oro hwanana nexi' ca tomi' ha' je cacapari' quem. Ma' ta querec hohot capari' Iri' Jam ta nana pane.

na. Wirico Iri' Jam pan co to' hohot pin napa', xi om ne ca howa ara ton Cristo ta. Howa inon Cristo, je ca to' hohot pin capa' Iri' Jam. ¹⁰ Querec pin' xiton na inon Cristo ta, je ca param ta' ca'. Mi' xirapa' na inon pain ca hwara' opa nucun ca pe ho' non pain ca to' e' mami' tocwa pane. Jain jain wi xiton na ina pain oro ca to' i'ina non pane, ac wirico pain ca mi' pin nucun xita' na ina quem. ¹¹ Ma' ta e' mami' ta' ta ina quem. Je ca howa ta' ca'. Mi' pin iri ta' ne, e' mami' ac ta' tara ta.

Ca win xumu cara jun Cristo Jeju ta tococwa

¹² Taxi' paxi' xije pain ca om om wet capa' oro ca ara mi' xim capa' Cristo Jeju cwa'. Om om wet paxi' na ca to' iri' wari' pin capa' quem. Ane win xumu cara ton ta' ne. Ma' ta aram aram ac wirico ta' ta ina. Je ca param mi' capa', je ca wari' ne capa' ca' quem. ¹³ Tomi' ca' inuhu' ta xere: Om ca coromicat mi' xije pain ca ma' pin capa' oro ca ara mi' xim capa' ca'. Om ca coromicat mi' xije pain ca iri' wari' pin ta' ca' quem. Ma' xica' pe na carawa ca ara ta' ta' ca': Om ca mam' pe wet mami' tain oro carawa ca ara napa' pain cara pane. Win xumu e' inain oro carawa ca ara xim napa'. ¹⁴ Win ca wari' co mo ma', pain ca jein hwet xin tawiri wana cocon oro win ma' ca ma'. Om ca noro in cain waracon. Mo mip e' na, hwet cain' tain tawiri wana, ma' ta an tain carawa ca awi ta na. Ac i ma' ina quem. Win xumu e' inon Cristo Jeju, ma' ta aram aram mi' xim capa' pain ca param nucun Iri' Jam pain pawin ina.

¹⁵ Je ca tomi' xuhu' ca'. Wari' pain ca ximicon hwanana iri' con Cristo cwa', coromicat ac i ma' coromicat ac i ma' xam' ac iri' tara ta. Tara pahu' pain ca coromicat jimama' hwe ma'. Mo ta coromicat jimama' hwe, main mi' turuhu' pain ca coromicat xo' wa Iri' Jam quem. ¹⁶ Xuruxut xo' xi'. Tomi' ha' tomi' ha' tiquin' xun Iri' Jam. Win ne ca wara tomi' ha' je capari' pain cara pane.

¹⁷ An xiho' an xiho' pi' pin xine pain ca xut xo' ne ca' xere. Querec pin' jujun co an xiho' nanaparut pain ca xuruxut xo' nuxut ca an hwet mi' urut pahu' ca'. ¹⁸ Xi mija ara caca co xuruxut pan teretem nana ma'. Xuruxut an xiho' ara xi' nonon co noc nonon Cristo ma', pain ca pijim' hwet tocwa pain ca mi' pin pe cain pana pane. Wara hu inuhu' cocon pane, hu ho' hu ho' inuhu' cocon pane. Tomi' xaxa' ina cocon, aca xoc ina pain ca hu mami' xuhu' cocon ca'. ¹⁹ Mama' tatarain cote ne xe, xi om ne ca win xumu ara

cacain ca param pan nucucun ta. Ac ca iri' jam ne cacain na ca param pan nucucun. Xec xec nana pain ca pan teretem nucucun, xi wixipa' pan caca pain ta. Coromicat e' nanain oro caramaji macan'. ²⁰ Ane om ac i ma' iri' ne. Wari' nein pawin iri', je i cain ca pe ne iri' macaraxi'. Maqui' tarain i cain Taramaxicon nexi' Jeju Cristo co to' witan napari'. Winim' urun, jain jain urun pain ca maqui' ta' nucun. ²¹ To' jimama' tarain oro cwerexi' ca om hwara' opa ca', ca cono' taxipa' ca'. An xiho' ac xin tara curucun ca awi tamana ma', ca om mi' pin camain' ma'. To' jimama' tarapari' pain iri' ca hwara' opa nucun. Ha' toron pain ca to' jimama' capari' quem, xi om ne ca to' jimama' xim ara capari' pain ca hwara' opa nucun ca mam' taramaxicon pe ho' tococwa oro wari' je oro carawa ta.

4 Je ca tomi' xuhu' pain ca tomi' querec te xuhu' ca' xere. Coromicat tamana inuhu'. Ja' tomi' querec te mahu' quem. Taraju iri inuhu' pain ca xuruxut xo' nuhu' ne, tomi' querec te tamana ac ta' na. Mija na ca om noc xuhu' ta! Je ca tomi' xuhu' ca': Hwara' opa cara je pain ca howa hun Taramaxicon nexi' ta.

Ca hu tococwa

² Hu xim inem Evódia. Wum quem Síntique, hu xim inem quem. Tomi' querec te xujuhu' me. Ac ca xica' pe ne tara ca coromicat nuhu' pain ca win cwere hun Taramaxicon nexi' ta. ³ Wum co taramaja wi taxipa' napa' pain ca taramaja ne pane, tomi' xim inem quem. Quep xiho' raram, ma' ta tomi' querec te mami' xequequem. Xi wara quep xiho' tamana ara cacapa' pain ca taramaja ne pane ta. Wiricacam, wirico Clemente, wiricoco oro xucucun co quep xiho' nanapa' pane, pain ca pijim' hwet tain capijacon Iri' Jam con Jeju pane, xirao' to ta wixicacam pain tapari carawa ca xirao' to xine wixicocon oro co e' cara xi' nana quem.

⁴ Tama' tomi' querec te je me, xi om ne ca win cwere ara hun Taramaxicon nexi' ta. Tomi' mami' inuhu': Tomi' querec te je me. ⁵ Tomi' toto e' jujun oro wari', querec pin' querec pin' pi' pin tuturuhu' pain ca tomi' wixite nuhu'. Wixicam pin ara xi' na ca in qui' nucun Taramaxicon nexi' ta. ⁶ Ta toron camain' ne xumuhu' pain oro carawa me. Tomi' hwet e' jun pain Iri'

4.3 Oro livro cocon hwanana pain cara pane, om ca an xiho' nein oro livro nexi' pain xocori ca'. An e' nanain tapari carawa, xirao' xirao' ac cacain na, joc top ac cacain na quem. Ac i ma' na livro nucucun hwanana pane.

Jam ta. Tomi' xun iri hun ne, tomi' hwet tomi' hwet pi' pin ac hun tara pain. Xiram pa' xut pain jun. Tomi' querec te jun pain ca xiram pa' xut pain hun quem. ⁷ Mo ta tomi' ac i ma' hun pain Iri' Jam ma', to' om pin ac cain tara ca toron ne xumuhu'. Om ca mam' camain' tocwa wari' co to' om ac i ma' nain ca toron ne ca xumu wa ta, om om na. To' om pin iri tarain ca toron ne xumuhu' ne, querec wet ac cain tara quem. Ac ca narain ho' cain tara pain oro ca toron ximao wa. Mi' turuhu' pain ca coromicat xo' wa quem, xi om ne ca win cwere ara hun Cristo Jeju ta.

⁸ Tomi' xim inuhu' pain i ca' quem xere: Coromicat e' jein oro ca iri'o' wa pain ca om mixein wa ma'. Coromicat e' jein oro ca hohot ma'. Coromicat e' jein oro ca ara xo' wa ma'. Coromicat e' jein oro ca om pan tem wa ma'. Coromicat e' jein oro ca om noc wa ma'. Coromicat e' jein oro ca om tomi' napat wa ma'. Oro ca awi ma', oro ca hohot ne pain ca in ac iri', je i ma' tara ca coromicat e' hwe. ⁹ Tama' ara jein oro ca ca' na xuhu' ca'. Tama' ara jein oro ca xin ne mahu' pain. Tama' ara jein ca taraju hwe pata', je pain ca querec mahu' pain oro ca ara ne ca' quem. Ara taxipa' jein. Pe ho' ac cuhu' tara Iri' Jam co to' om pin nain ca toron ne ximixi' quem.

Ca tomi' querec te tococwa pain ca quep xiho' cocon

¹⁰ Tomi' querec te tamana inuhu' pain ca xiram pa' mami' mahu' pain xocori ca', pain ca quep xiho' mahu' ca'. Tomi' querec te inon Taramaxicon nexi' pahu'. Wara xiram pa' paxi' mahu' pane, taxi' inuhu' pain. Ane om an hwet mi' mami' ac mahu' pain ne. ¹¹ Pain ca tomi' ac i ma' xuhu' ca', om ca xiram pa' xirarapa' pain ca ximin ne na xuhu', om na. Tomi' hwet e' inuhu' pain ca coromicat ne ca'. Xi om ne ca taxi' pin ara ton Iri' Jam pain ca querec wet pan capa' ta. Ma' iri napa' carawa ne, tomi' querec te ac ta' na. Om iri napa' carawa ne, tomi' querec te ac ta' na quem, je je ari na pata'. ¹² Wara ma' napa' oro xec pain ca ximin ta' pain ca om capa' carawa pane, wara ma' napa' oro xec pain ca mija capa' carawa pane quem. Taxi' inon Iri' Jam pain ca ja' tomi' querec te capa' pain oro ca ara napa'. Ja' tomi' querec te napa' pain ca ma'am ta', ja' tomi' querec te napa' pain ca pe' ta' quem. Ja' tomi' querec te napa' pain ca ma' capa' carawa, ja' tomi' querec te napa' pain ca ximin ta' quem. ¹³ Quereme quereme pi' pin inain oro ca ara napa', xi om ne ca wirico ara ca co to' hwara' opa napa' ta.

¹⁴ Ane hohot tamana capa' pain ca quep xihó' mahu' ne, pain ca xiram pa' mahu' pain oro ca to' i'ina napa' ca'. ¹⁵ Wara taxi' hwein i ca' quem: Wahu' pain ca cut in xujuhu' pain Filipos ma', pain ca xo' taraju ten qui' hwein capijacon Iri' Jam con Jeju pain cara pane, xica' to hwe pain ca quep xihó' mahu' pane. Pain ca xo' paca' qui' tain macarahu' pane, pain Macedônia ma', xica' to hwe pain ca xiram pa' mahu' pane. Oro co cut in xucucun pain ca howa to cacain oro xijein cidade pain Macedônia ma', om ca quep xihó' cacapa'. Xica' to hwe pain ca quep xihó' mahu'. ¹⁶ Om pin iri napa' carawa pain ca pe qui' tain Tessalônica pane ne, quep xihó' ac mahu' na, mam' ac mahu' na pain carawa, aram aram mam' mami' ac mahu' pain na quem. ¹⁷ Tomi' hwet e' inuhu' pain, om ca mam' mami' xine pain carawa me xuhu' ca', om na. Param e' inon Iri' Jam pain ca ara mi' tamana cuhu' pain ca awi wa, xi om ne ca quep xihó' ara mahu' ta. ¹⁸ Je ca tomi' xuhu' ca'. Epafrodito cwa', mi' napa' pain carawa ca mam' mahu' con. Cut mi' cut mi' pi' pin napa' pain, moin' pin napa' quem. Ma' pin napa' oro carawa ca param ta', ma' tiquin' ca' napa' pain ca param ne. Carawa ca mam' mahu' ca', mi' pan hun pain Iri' Jam quem. Hohot tamana non pahu', tomi' querec te tamana nuhu' pain quem. ¹⁹ Iri' Jam ne cwa', co taramaja mi' ta' cwa', mija tamana na oro caramaxicon. Je ca ha' con pain ca mi' mi' pi' pin xim cuhu' pain oro ca param nuhu' pain ca ximin nuhu' ma'. Xi om ne ca win cwere ara hun Cristo Jeju ta.

²⁰ Na e' na pain ca tomi' querec te xun Cotere' Iri' Jam co awi tamana cara ta! Amém, iri'o' na ca xirao' ne ta.

Ca pi' pin ne ca xirao' nucun Paulo

²¹ Mam' pe wet mam' pe wet pi' pin inuhu' pain ca wari' nucun Iri' Jam hwe ma', pain ca win cwere hun Cristo Jeju ma'. Tomi' tomi' pi' pin nunuhu' oro xerexi' co to ho' nanapa' pain i ca' quem: Mam' pe wet urut cocon ta nunuhu'. ²² Oro wari' nucun Iri' Jam cwa', wiricoco co taramaja to nanain xiricon taramaxicon César ma' quem, mam' pe wet urut cocon ta nunuhu'.

²³ Param inon Taramaxicon nexi' Jeju Cristo pain ca quep xihó' cuhu' ma', pain ca mi' e' cuhu' pain ca param nucun pain iri' xumuhu' ta.

Amém, iri'o' na ca xirao' ne ta.

Je i ca' ca xirao' ne ca'.

Colossenses

Ca xirao' mi' tococwa co howa nonon Jeju pain Colossos

1 Paulo ina pain ca xirao' mi' xuhu' ca'. Apóstolo ra napa' Cristo Jeju pane, pain ca tomi' hwet roron pain capiija oro wari' capa' pane. Xi om ne ca wirico ara ca Iri' Jam co param mi' napa' pain ta. Wata', wirico coxari' Timóteo cwa', ca' urut pain ca xirao' mi' urut pahu' ca'.

²Xirao' mi' urut pahu' pain ca to hwein Colossos ma', pain ca wari' nucun Iri' Jam hwe ma', je pain ca tomi' ha' cara hun Cristo pain ca howa hun ma' quem xere.

Param urut con Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param urut cocon pain ca mi' cucuhu' pain ca om toron ne xumuhu' quem.

Ca tomi' querec te urut con Iri' Jam pahu' ta tococwa

³Tomi' mi' iri urut pahu' con Iri' Jam co Te ca Taramaxicon nexi' Jeju Cristo ne, tama' tomi' querec te urut con pahu'. ⁴Xi om ne ca taraju ara urut pahu' pain ca howa hun Cristo Jeju ta. Taraju urut pahu' pain ca tomi' querec te tomi' querec te pi' pin huhun oro wari' nucun Iri' Jam quem. ⁵Howa hun Cristo Jeju, tomi' querec te huhun oro wari' nucun Iri' Jam quem, xi om ne ca howa ara hun pain ca an to xo' mi' cuhu' pain oro ca awi wa pain pawin cain. Wara tomi' hwet xihwe pain pane, taraju hwein cocon co tomi' hwet nunuhu' pain capiijacon Iri' Jam ca iri'o' ma', ca tomi' hwet cucuhu' con Jeju co to' witan xim napari' ma'. ⁶Capiijacon Iri' Jam con Jeju ca pijim' hwet xihwe pane, pijim' hwet pijim' hwet xam' tata pain oro wari' pain oro xijein macan' quem. Oro co howa nanain ma', to' jimama' pin ac tococwa na. Win cuhu' pain ca xo' taraju ten qui' hwein pain cara pane, pain ca xo' querec pin' ten qui' hun Iri' Jam pain oro ca xiram pa' iri'o' capari' ma'. ⁷Wirico Epafras co ca' na nuhu' pain capiijacon Iri' Jam con Jeju pane. Tomi' querec te tamana urut con Epafras cwa'. Taramaja wi naparut, taramaja xo' na pain ca quep xiho' cuhu' pain ca taramaja mi' con Cristo quem. ⁸Wirico co tomi' hwet naparut pahu' quem.

Tomi' hwet naparut pain ca meo cuhu' Tamataracon Iri' Jam ma', pain ca mi' cuhu' pain ca tomi' querec te huhun oro wari' nucun ma' quem.

Ca tomi' mi' tococwa con Iri' Jam

⁹ Je ca tama' tomi' mi' urut pahu' con Iri' Jam quem. Je curuxut mao na, pain xec nein ca xo' taraju qui' urut pahu' pain ca tomi' hwet caparut Epafra pane, mao ac ne ma' na pain ca tomi' mi' urut pahu' con Iri' Jam. Mi' roron pain ca querec pin' cacain oro ca param nem ta urut con pahu'. Mi' roron pain ca taxi' taxi' pi' pin cacain ta urut con pahu'. Je Tamataram tara ca mi' nonon pain ca taraju pa' cacain oro ca param nem ta urut con pahu'. ¹⁰ Tomi' mi' ac i ma' urut pahu' con, ma' ta xuruxut xo' hwe pain ca howa hun Taramaxicon nexi' ma'. Ma' ta hohot hun pain oro ca ara hwe ma', pain ca ara cara hwein oro ca awi wa ta urut pahu'. Ma' ta horon horon tiquin' hwe pain ca querec pin' hun Iri' Jam ta urut pahu'. ¹¹ Param urut con Iri' Jam pain ca to' hwara' opa cuhu' ma', mam' to' hwara' opa turuhu' pain ca hwara' opa pan nucun. Ma' ta tomi' querec te cara hwe pain ca quereme hwein oro ca to' i'ina nuhu', je pain ca om toron ne xumuhu' pain quem urut pahu'. ¹² Ma' ta tomi' querec te hun Cotere' quem urut pahu'. Wirico pan co to' hohot napari', pain ca main mi' xim xuhu' pain oro caramaju ca wara tomi' pe mi' xuhu' ca' capari' pain ca wari' ne capari' ca'. Ame hwe e', main cut xin irin pain pawin cain, ca toha pe ne naran nucun cain. ¹³ Xi wirico ara ca co to' witan ca' napari' con Caxicon Jam ma', co taramaxicon pe nain ca jitacat nein xim ma'. To' witan ca' napari' con, an to pin ac capari' na pain ca taramaxicon pe ca Panxica co om noc ca ma'. ¹⁴ Wirico Panxica co to' witan napari' cwa'. Wirico co xic am pin nain ca caracat nexi' ca'.

Ca hwara' opa tiquin' ca' cocon oro co hwara' opa nana Cristo

¹⁵ Om paxi' na ca querec ac tocwa Iri' Jam, ane querec pan tocwa Cristo ne. An tan pan non Iri' Jam, ac iri' wirico na. Wara ma' na pain ca om om wet ne oro carawa pane. Iri' Taramaxicon na, hwara' opa tiquin' ca' nain oro ca tomi' ma' pin ca Iri' Jam quem. ¹⁶ Xi om ne ca wirico ara ca co win mu pan ca Iri' Jam pain ca tomi' ma' tomi' ma' pi' pin cain oro carawa pane. Win mu non Cristo Iri' Jam pain ca tomi' ma' pin cain oro carawa

ca to nain pawin ma', ca to nain macan' ca' quem, oro ca querec iri', oro ca om querec iri' quem, win mu non Cristo Iri' Jam pain ca tomi' ma' pin cain pane. Win mu non pain ca tomi' ma' pin cain oro carawa, oro wari' cocon oro jam ma' quem, oro co taramaxicon to nanain pawin ma', co hwara' opa nana ma', win mu non Cristo pain ca tomi' ma' tomi' ma' pi' pin tococwa pane. Ma' ta querec pin' xim pain ca awi tamana nem ta non. ¹⁷ Wara ma' ma' xam' ca' nain oro carawa Cristo, wirico co to' teren nain. Wara ma' ma' xam' ca' nonon oro wari' cocon oro jam ma' quem, to' teren to' teren pi' pin nonon. Wara ma' na pain ca om tomi' ma' querec tocwa wari' cocon oro jam ma' quem. ¹⁸ Wirico co taramaxicon pe ho' napari' pain ca howa xun ca', taramaxicon pe ho' napari' pain ca ac curucun iri' ca'. Wirico co to' e' napari', xi om ne ca wirico ara ca co e' mami' cain' ta. Ma' ta Iri' Taramaxicon ma ta non Iri' Jam. ¹⁹ Je ca param ca Iri' Jam pane. An tan pan ne pain ca Iri' Jam ne ta, an tan pan ne pain iri' xumum ta non Cristo. ²⁰ Ao mao tara cocum pain ca mi' pin pe main pana, ma' ta in hwet in hwet pi' pin cacapa' oro wari', je oro carawa quem, in hwet in hwet pi' pin tatarapa' oro co to nanain macan' je pawin ta. Tomi' querec te mami' tatarapa', taxipa' taxipa' pi' pin ac cacapa' tara quem. Ac i ma' na ca tomi' con Cristo Iri' Jam ma'.

²¹ Wahu' ma', pain ca om howa querec hwe pane, to pira ca' hun Iri' Jam. Noc hun pane. Xi om ne ca pan teretem ara hwe pain ca coromicat nuhu', je pain ca xuruxut nuhu' pane ta. ²² Ane cut in pan cuhu' pain xocori ca' ne. Xi om ne ca mi' pin pan ara ca Cristo pain ca wari' nucun pane ta. Mi' pin na, ma' ta om pin cuhu' ca caracat wa ta nuhu', ma' ta om ma' camain' cuhu' ca to' em' nuhu' pain ca aram aram o mi' xuhu' con Iri' Jam ta nuhu'. ²³ Mo ta howa tiquin' howa tiquin' hun Cristo ma', mo ta hwara' opa cara hwe pain ca howa nuhu' ma', mi' ac cuhu' tara pain ca om ma' camain' cuhu' ca to' em' nuhu' ma'. Ta howa ni ca' camain' hwein capiJacon Iri' Jam con Cristo me ta. Howa howa tiquin' jein oro ca wara tomi' pe nucun ca ara mi' xim cuhu' con. Wara pijim' xihwe pain pane, taraju hwein. Pijim' hwet pijim' hwet xam' tata pain oro xijein macan' oro wari' quem. Je ca taramaja ne ca' quem. Wata' pain ca Paulo ta' ca', pijim' hwet taxipa' inain capiJacon Iri' Jam con Cristo.

Ca taramaja ne pain ca pijim' tain capijacon Iri' Jam con Cristo

²⁴Jain jain paxi' ina pain xocori ca', xi om ne oro ca taramaja ne pain ca quep xiho' toton oro win ma' nuhu' pain ca om judeu hwe ma'. Ane tomi' querec te pan ta' ne. Ac ca jain jain wi ta' con Cristo na, ac ca moin' pin ne na ca jain jain ne pahu'. Xi om ne ca quep xiho' ara xihwe pain ca jain jain ne ca', pain ca ac curucun iri' pain ca howa xun ca'. ²⁵Mi' napa' pain ca taramaja ne Iri' Jam ma', pain ca taramaja mi' roron co howa nanapa' ta capa' pahu'. Ara tain quem ina. Je ca pijim' mi' pijim' mi' pi' pin toton pain capijacon Iri' Jam oro win ma' hwe pain ca om judeu hwe ma'. ²⁶Om paxi' na ca taraju pa' cacain ca coromicat nucun oro hwanana pane. Ane an hwet pin cain pain xocori ca' ne, an hwet mi' napari' pain capijacon pain ca wari' ne capari' pain xocori ca'. ²⁷Awi tamana na ca coromicat nucun Iri' Jam ca an hwet pin ca pain xocori ca'. Ac i ca' na ca coromicat mi' cuhu' pain ca om judeu hwe ma': Pe ho' turuhu' Cristo, win cwere turuhu' pain iri' xumuhu'. Wirico co to' taxi' nuhu' pain ca aram aram to ho' xun hun pain pawin cain.

²⁸Pijim' hwet pijim' hwet pi' pin urut cocon con Cristo oro wari' ta. Hu hu pi' pin urut cocon, ca' na xo' ca' na xo' pi' pin urut cocon pain capijacon Iri' Jam pain ca taraju pa' urut pain quem. Ma' ta querec pin' xihwe pain ca iri' wari' pin hwe, je pain ca ximicon hwanana pin hwe pain ca win cwere pin hun Cristo ta urut cocon. Wara ac i ma' tatara ta urut pahu' pain ca aram aram o mi' xut pahu' con Iri' Jam ta, ac i ma' na ca coromicat nuxut. ²⁹Je ca taramaja tamana ta' ca', mija na ca taramaja ta' ca'. Mam' taramaja inain ca hwara' opa nucun Cristo co pe ho' napa' cwa' quem.

2Xirao' mi' ac i ma' inuhu', ma' ta taxi' mahu' pain ca taramaja tamana mi' xuhu' ca'. Jain jain ina pain ca quep xiho' xim xuhu'. Wahu', oro co howa to nanain Laodiceia ma', oro xucucun xerexi' co om querec pin' querec nanapa' ma' quem, jain jain jain jain pi' pin inuhu' pain ca quep xiho' xim xuhu' ca'. ²Jain jain inuhu', ma' ta hwara' opa hwe pain xumuhu' ta inuhu'. Ma' ta xica' pe ne xumuhu' pain ca tomi' querec te caracan xujuhu' ma' inuhu'. Ma' ta taraju pa' taraju pa' pi' pin hwein ca coromicat nucun Iri' Jam ca om taraju pa' hwe con Cristo ira inuhu'. Ma' ta querec pin' iri'o' hun ta inuhu'. ³Wirico Cristo co an hwet mi' napari' pain ca taxi' tamana nucun Iri' Jam ca awi, wirico co an hwet mi' napari' pain ca taraju pa' xin quem. ⁴Tomi' ac i ma' inuhu', ma' ta om howa huhun co ac

ca iri'o' xi' ca' tara me nana pain ca tomi' ximama' nucucun pain ca tomi' tomi' na xun paxi' cucuhu' ma'. ⁵Pira ca' paxi' inuhu' pain cwere ca', ane mam' pe wet xuhu' ne. Ac ca pe ho' xuhu' na pain xumu ca'. Tomi' querec te inuhu', xi om ne ca taxi' ara xuhu' pain ca xuruxut xo' hwe ma', je pain ca hwara' opa hwe pain ca howa hun Cristo ma'.

Ca xuruxut nexi' pain ca win cwere xun Cristo

⁶Je ca tomi' xuhu' ca'. Xuruxut xo' xuruxut xo' tiquin' je pain ca win cwere hun Cristo Jeju ma'. Win ne ca howa hwein ca pijim' xihwe con, pain ca Taramaxicon na ta xihwe con pane. ⁷Win ne pana ca hwara' opa ma', pain ca corom mama' nein paxicom caximain ma', ac i ma' tara pain ca hwara' opa hwe con Taramaxicon nexi'. Horon horon tiquin' je pain ca win cwere hun ma'. Howa mip jein oro ca pijim' xihwe con pane. Tama' tomi' hwet tomi' hwet tiquin' jein ca tomi' querec te nuhu' con Iri' Jam quem.

⁸Ma' tara xumuhu' me. Ma' ta om cuc cucucuhu' oro co tomi' tomi' na xim nunuhu' ma', pain ca pijim' pijim' camara' pin xim cucuhu' pain ca coromicat pan teretem nucucun je pain ca pijim' mixein nucucun ma'. Oro ca pijim' ximama' nucucun ma', maqui' nain ca coromicat pan nucucun oro wari'. Maqui' nain oro ca howa ximama' nucucun pain macan' ca'. Om ca maqui' con Cristo.

⁹Wari' paxi' na Cristo. Ane pe ho' pan con Iri' Jam ne. Iri' wirico na pain oro ca coromicat nucun, je pain oro ca ara nucun, je pain oro ca hwara' opa nucun quem. ¹⁰Je ca ma' ma' pi' pin cuhu' oro ca to' hwara' opa nuhu' ma', xi om ne ca win cwere ara hun pain ca iri' Taramaxicon ca ma', pain ca hwara' opa tiquin' ca' cocon oro co hwara' opa paxi' nana ma', co taramaxicon nana ma'. ¹¹Oro judeu ma', wac xirac xucucun pain taparinain ca xirac nucucun ma', ma' ta querec pin' cacapari' oro wari' pain ca wari' nucun Iri' Jam iri' ca' nana. Wahu' iri na ne, pain ca win cwere hun Cristo ma', je ca iri' wari' nucun Iri' Jam pin hwe quem. Om ca wari' ca co to' iri' wari' nucun Iri' Jam pin nuhu' ma', om na. Wirico Cristo co to' iri' wari' nucun Iri' Jam pin nuhu' ma'. To' jimama' pin nuhu', an ca' nuhu' pain wara curuhu' ca caracat taxipa' ma'. ¹²Ja' iri xihwe pain com pane ne, ac ca cut corom to wi xihwe con na, ac ca e' mami' wi hwe con

na quem. Xi om ne ca howa ara hun Iri' Jam pain ca hwara' opa nucun ma', pain ca ha' con pain ca to' e' mami' con Cristo pane.

¹³Wahu' pain ca om judeu hwe ma', pain ca om an ca' querec xihwe pain wara curuhu' ca to' caracat nuhu' pane, ac ca cono' hwe na pain xumuhu' pane, xi om ne ca caracat taxipa' ara hwe ta. Ane to' e' cuhu' Iri' Jam ne. To' e' wi nuhu' con Cristo. Xic am xic am pi' pin nain oro ca caracat nexi' quem. ¹⁴Xic am pin nain ca xirao' pe nein oro ca dever iri' pain ca caracat nexi' pain ca om tomi' ha' xin oro ca ara je capari' pane, je pain ca coromicat an pe pin cain ca wap xim capari' pane ira. To' om pin nain. Ac ca tatatain mi' cain na pain panaxicon Cristo pane. ¹⁵To' quiji' pin iri tata oro caxicon jam co taramaxicon nana ma', co hwara' opa paxi' nana ma', querec pin' querec pin' pi' pin ac tococwa na pain ca hwara' opa hwara' opa om pin caca ma'. Wirico Iri' Jam co hwara' opa tamana ma', xi om ne ca ara pan ara ca Cristo pain ca mi' pin pe cain pana ta.

¹⁶Je ca tomi' xuhu' ca'. Miri'om jujun oro wari' co tomi' em' nunuhu' pain ca om ein hwein oro ca cao' wa pain oro ca toc wa ma', je pain ca om tomi' querec te wi huhun pain ca mam' pe wet cacain oro xec nucucun, je pain ca om tomi' querec te wi huhun pain ca xo' hwet xo' hwet ca panawo' ma', je pain ca om xao to wa wi huhun pain xumuhu' pain oro sábadó ma' quem. ¹⁷Oro i ma' ca ara caca oro judeu ma', ca tomi' ha' je caca co tomi' em' nunuhu' ma', tomi' joc mam' mi' e' nain oro ca ara ta' ne con Cristo pain ca om maqui' querec ca ira. Ane maqui' pin ca ne. Wara ara pin nain oro ca tomi' joc mam' mi' nein con. ¹⁸Oro co hohot urut xi' ma nana pain ca in ac cocon oro jam co taramaja mi' nonon Iri' Jam ma', tomi' ca' nunuhu': Win ne ca tohwein' urut ca' nana, tomi' hwet tomi' hwet ac cucuhu' na pain oro coximinain ca tohwein' nucucun ma'. Mo ta om tomi' ha' hwein ca tomi' hwet urut pahu' ca', om ta witan hwe ta nunuhu'. Je ca tomi' xuhu' cocon: Miri'om jujun. Xec xec ximama' e' nana, xi om ne ca coromicat an xiho' ara cacain ca wari' wa ta. ¹⁹An pe pin nonon Cristo co Taramaxicon ne iri' cwa', co hu napari' pain ca ac curucun iri' ca'. Ac winaxi' ara xi' na Cristo, xi om ne ca Taramaxicon pe ho' ara capari' ta. Wirico co to' hwara' opa napari', wirico co to' jao jao ma' napari' quem. Win ne oro carapitaxi' pain oro caramaxi' ca to' wi nain oro araxi' pain caramaxi' ma', pain cwerexi' ca', ac i ma' napari' Cristo cwa'. To' jao jao ma' napari', to' horon horon tiquin' ac capari' na pain ca howa nexi' ca' quem. Je ca param mi' capari' Iri' Jam.

²⁰Wahu' pain ca howa hun Cristo ma', ac ca cono' wi hwe con na. Je ca cono' ca' hwein oro ca howa ximama' nucucun oro wari' nein macan' ca'. Om ca hwara' opa mami' cuhu' oro ca hu nucucun quem. Je xi miri'om huhun quem? Ac ca hwara' opa hwara' opa wet cucuhu' a xira ta. Para tomi' ha' tomi' ha' wet huhun pain ca hu cucuhu' quem? ²¹Hu ca' nunuhu': Ta an main i ma' me. Ta cao' main i ma' me. Ta quep main i ma' me, ac i ma' nunuhu'. ²²Cain' cain' xihwe quem? Oro ca narain ho' cucuhu' ma', mo ta an pin hwein, mo ta cao' pin hwein, mo ta quep pin hwein quem, om pin ac ne na. Je ca tomi' xuhu' ca': Oro ca hu nucucun co narain ho' ximama' nana ma', maqui' e' nain ca coromicat nucucun. ²³Ac ca hohot ne paxi' na ca hu nucucun pain ca narain ho' xucucun pain oro carawa. Ac ca win xumu iri'o' cocon na Iri' Jam, ac ca tomi' iri'o' caca na pain ca om ca xec xec urut ta caca ma', ac ca miri'om iri'o' cacain na ca param pan nucucun ma'. Ane om iri'o' caca ne. Om ca quep xiho' camain' tococwa oro wari' co an xiho' nonon quem, xi ha' cocon pain ca an to pin cacain oro ca param pan teretem nucucun ta.

**Ca hu tococwa pain ca xuruxut xo' je,
ma' ta hohot hun Iri' Jam ta tococwa**

3 Je ca tomi' xuhu' ca': Ma' pin nuhu' xocori ca e' wa pain ca howa hun Cristo. Ac ca to' e' mami' wi xihwe con na. Je ta win xumu qui' hwein oro caramaji pawin cain, ca xao pe pe ca Cristo cwain, pain ca xao pe ho' cain iri' curucun Iri' Jam cwain, pain ca taramaxicon wi pin con co Te ca quem. ²Coromicat cara jein caramaji pawin cain. Ta coromicat cara hwein caramaji macan' me. ³Xi cono' ca' ara hwein caramaji macan' ta. Xocori ca e' nuhu' ma', ac ca joc xa mi' xine na con Cristo pain ca win cwere hun ma'. Ac ca wara to ho' hun na Iri' Jam ma' quem. ⁴In qui' iri tara Cristo co mi' nuhu' pain xocori ca e' nuhu' ma' ne, maqui' wi ac hun tara, an xiho' ac hun tara pain ca awi tamana nucun quem.

⁵Je ca tomi' xuhu' ca'. To' om pin jein oro ca param pan teretem ne wara curuhu' ma', ac ca to' parapa' pin hwein tara. Ta quep hwem xequem narima' me. Wahu' quem, pain ca narima' hwe ma', quep e' turuhu' taxuhu' ma'. Ta mam' pe wet hwein oro ca quep ximama' wa me. Ta jain jain hwein oro ca om awi wa me. Ta param hwein ca pan teretem wa me. Ta param ximama' hwein oro carawa me. Wari' co param ximama' nanain

oro carawa ma', ac ca Iri' Jam ne cacain na. ⁶Ta ara ac i ma' camain' hwe me ta, xi om ne ca wap xun ara tococwa oro wari' co om tomi' ha' ac i ma' nana ta. Iri' Jam pan tara co wap toton nonon.

⁷Ac i ma' paxi' na ca xuruxut nuhu' pain cara pane, pain ca param ximama' ac i ma' hwe pane. ⁸Ane na e' ne pain ca an to an to pi' pin hwein oro i ca' pain xocori ca' ne. Mo na: Oro ca mana' wa, oro ca hwerehwet ne ca mixita wa, oro ca pan teretem wa, oro ca tomi' napat wa, oro ca tomi' xine caji topac ca om hohot ma' quem, an to an to pi' pin jein. ⁹Ta tomi' mixein xujuhu' me. An pe pin ara xi' hwein wara curuhu' ta. An to pin hwein oro ca ara taxipa' hwe pain ca om howa querec hun Cristo pane. ¹⁰Xocoricon wari' pin hwe quem. Tama' to' xocoricon to' xocoricon ac wata' pin hwe ta nuhu' Iri' Jam quem. Ma' ta querec pin' mip mahu' ta nuhu'. ¹¹Pain ca to' xocoricon wari' pin capari' Iri' Jam cwa', om ca jimama' ca' xijexi' pain ca wari' nexi' ca'. Wahu' pain ca om judeu hwe ma', pain ca om wac xirac xihwe ma', warut quem, pain ca judeu urut ca', pain ca wac xirac urut pain taparinain ca xirac nuxut ca' quem, om ca jimama' ca' xijexi' pain ca to' xocoricon wari' pin capari' Iri' Jam cwa'. Oro wari', oro tatirim co capija ni ca' nonon oro xucucun wari' ma', oro co om to xo' nana pain ca to e' cacain mi ma' quem, oro co taramaja mi' e' nonon xucun wari' ma', oro co taramaja mi' pan xucucun ma' quem, om ca jimama' ca' xucucun. Ac wiricoco ac wiricoco ari nana, xi om ne ca to' xocoricon wari' pin ara tococwa ta. Wirico pan ara xi' na Cristo co iri' taramaxicon. Om na xucun co win hwara' opa ca. Wirico co win cwere win cwere pi' pin napari' pain ca howa xun ca' quem.

¹²Tora' nuhu' Iri' Jam, iri' wari' ne nuhu'. Om ca noc camain' cuhu'. Je ca hohot ne pain ca xiram pa' tamana xujuhu' ma'. An hwet mi' xujuhu' pain ca awi wa. Ta xec xec hwe me ta. Tomi' wixite xujuhu'. Tomi' pan hot xujuhu' quem. ¹³Ma' iri tara ca to' i'ina nuhu' cocon oro win ma' hwe ne, tomi' pan hot ac xujuhu' tara. Ji'am pin jein ca mana' nuhu' pain ca ara cup xujuhu' quem. Win ca Taramaxicon nexi' pain ca ji'am pin cain ca caracat nexi' ca', ac i ma' tara ca ji'am pin hwein ca mana' nuhu' pain ca ara cup xujuhu' ma' quem. ¹⁴Ta noc camain' xujuhu' me, je ca param mip ca Iri' Jam ma', pain ca om noc camain' xujuhu' ma'. Pain ca tomi' querec te tamana xijexi' ca', je ca to' jao jao ma' capari' pain ca xica' pe pin ne ximixi'.

¹⁵Wirico Cristo co mi' nuhu' pain ca tomi' querec te xujuhu', je pain ca xin ne xujuhu' ma'. Tomi' ha' jun pain ca coromicat xo' je cuhu' pain oro ca ara xi' hwe ma' quem. Je ara xi' na ca param mi' cuhu' Iri' Jam pain ca xo' howa xine qui' cuhu' pane. Tomi' querec te xujuhu' pain ca jao jao ma' xujuhu', xi om ne ca xica' pe ara ne xumuhu' ta nuhu'. Tama' tomi' querec te jun pain oro ca ara mi' cuhu' quem. ¹⁶Mam' pe wet cara jein capijacon Iri' Jam con Cristo ta. Coromicat xo' je pain ca ca' na xujuhu' pain, je pain ca hu xujuhu' ma' quem. Com jein oro xijein tamara' ma' quem, oro salmo ca xirao' to xine pain capijacon Iri' Jam ma', je oro xijein tamara' ca in ac non Iri' Jam, je oro xijein tamara' ca mi' cuhu' Tamataracon Iri' Jam quem. Mam' com je pain ca tomi' querec te hun Cotere' Iri' Jam pain oro ca ara mi' cuhu' ma' quem. ¹⁷Pain oro ca ara xi' hwe ma', je pain oro ca tomi' xi' hwe ma' quem, querec pin' pan tuturuhu' oro wari' pain ca taramaja mi' hun Taramaxicon nexi' Jeju. An hwet jein wixicon Jeju pain ca tomi' querec te hun Cotere' Iri' Jam quem.

Ca xuruxut xo' nexi' cocon oro win ma' nexi' cwa'

¹⁸Tomi' inuhu' pain ca narima' hwe pain ca ma' cuhu' tarama' ma': Tomi' ha' jujun taxuhu'. Hohot ara xi' na pain ca tomi' ha' huhun ma', xi om ne ca win cwere ara hun Taramaxicon nexi' ta.

¹⁹Wahu' quem, pain ca cut hwehwem narima' ma', tomi' inuhu' quem: Ta noc hwehwem manahu' me. Ta tomi' mana' hwehwem me, tomi' wixite e' jem ta.

²⁰Wahu' quem oro hwijima', tomi' inuhu' quem: Tomi' ha' jun cote hwe cam juhu' ma'. Tama' tomi' ha' jejem pain oro ca ara je cucuhu' ma'. Xi om ne ca hohot ara con Taramaxicon nexi' pain ca tama' tomi' ha' hwehwem ta.

²¹Wahu' quem, pain ca wanxi' hwe ma', tomi' inuhu' quem: Ta tomi' taparam' mana' hwehwem mana panxihwe me. Mo ta tomi' taparam' mana' hwehwem, naro ac cacama tara.

²²Tomi' inuhu' pain ca taramaja mi' e' huhun taramaxicon nuhu' pain macan' ca' quem. Tama' tomi' ha' jujun pain oro ca ara je cucuhu' ma'. Ta tomi' ha' e' huhun pain ca querec hohot xuxun pain ca ja' noro cacapari' ta hwe me. Tomi' ha' iri'o' jujun, tomi' ha' querec te tara iri' xumuhu' ta, xi tomi' ha' pan ara hun Taramaxicon nexi' ta. ²³Oro ca ara xi' hwe ma', mam'

ara jein pain iri' ca tomi' querec te nuhu'. An xiho' jujun wari' co taramaja mi' nonon Taramaxicon nexi' ma'. Ta an xiho' huhun wari' co taramaja mi' e' nonon wari' me ta. ²⁴Xi om ne ca taxi' ara hun Taramaxicon nexi' pain ca main mi' xuhu' pain carawa ca taramaja mi' hwe pane cuhu' ma'. Mi' xuhu' pain iri' caramaju ca wara tomi' pe mi' xuhu' pane ta nuhu'. Wirico Taramaxicon nexi' Cristo co taramaja mi' hwe ma' ira. ²⁵Oro wari' co pan teretem nana ma', win hwe pane ac cocon tara Iri' Jam, wap wap ac tococwa tara pain ca pan teretem nucucun. Xi tomi' querec te paxica' ca Iri' Jam ta.

4 Tomi' inuhu' pain ca taramaxicon hwe ma' quem. Querec wet xo' jujun co taramaja mi' e' nunuhu' ma'. Ara xo' je cocon, ta tomi' querec te paxica' huhun me ta. Xi om ne ca taxi' ara hwein i ca' quem, pain ca ma' pan cuhu' iri' Taramaxicon co pe nain pawin cain.

**Ca hu tococwa pain ca tomi' cocon Iri' Jam, je pain
ca to ho' cocon oro xucucun wari'**

²Ta an pe camain' hwein ca tomi' hun Iri' Jam me. Ta coromicat ni ca' hun pain ca tomi' hun me. Tomi' querec te jun pain ca tomi' hun quem. ³Tomi' iri jun ne, tomi' mi' ac maparut con tara quem. Mi' roron pain ca pijim' wa capijam ta jun. Tao' pe ara xi' nanapa' pain xirinain ca tao' to tao' to to wa ca', xi om ne ca pijim' hwet ara toton pain capijacon Iri' Jam oro wari' ta. Je ca tomi' xut pahu' ca': Tomi' mi' xut con Iri' Jam me, ma' ta ha' caparut pain ca pijim' pijim' tiquin' xut pain ca coromicat an pe xo' nucun Iri' Jam ca tomi' hwet pin capari' con Cristo pain xocori ca'. ⁴Tomi' mi' xine con Iri' Jam me, ma' ta ha' capa' pain ca pijim' hwet xo' toton con Cristo oro wari' ta, ma' ta taraju pa' caca quem ina. Na e' na pain ca pijim' ac i ma' ta' ta.

⁵Xuruxut xo' je cocon oro co om howa nana ma'. Coromicat xo' je cocon. Ta miri'om camain' huhun me, ma' ta ha' cuhu' pain ca tomi' hwet huhun con Cristo ta. ⁶Tama' tomi' toto jujun, taraju hohot totonon ca tomi' nuhu'. Ma' ta ha' cuhu' pain ca tomi' xo' huhun pain ca tomi' querec cucuhu' pain ca om taraju pa' nucucun.

Ca pi' pin ne ca xirao' nucun Paulo

⁷ Tomi' hwet turuhu' pain oro carawa ca ara napa' coxari' Tíquico cwa', co tomi' querec te iri' cwa'. Taramaja xo' na Tíquico cwa'. Taramaja wi napa' pain ca taramaja mi' urut con Taramaxicon nexi'. ⁸ Je ca hwet roron ta ton pahu'. Ma' ta taxi' cacaparut pain oro carawa ca ara naparut ca', ma' ta to' hwara' opa momon pain iri' ximicocon quem inon pahu'. ⁹ Ja' ja' ron inon coxarut Onésimo co tomi' querec te urut cwa', co win ma' ne hwe pain ca wari' nein cidade nuhu' ca ma'. Howa iri'o' non Jeju. Je ca tomi' xuhu' ca', tomi' hwet tuturu' pain oro carawa ca ara naparut pain i ca'.

¹⁰ Mam' pe wet inonon ta nuhu' Aristarco co win tao' pe ta' cwa'. Mam' pe wet inonon ta nuhu' Marcos coxa' ca Barnabé cwa' quem. Wara tomi' xo' inuhu' con Marcos cwa'. Mo ta hwet cuhu', tomi' querec te jun me. ¹¹ Mam' pe wet inonon ta nuhu' Jeju co Justo na xijein wixicon cwa' quem. Aristarco con Marcos con Justo cwa', taramaja wi nanapa' pain ca pijim' mi' urut cocon con Iri' Jam oro wari' ma', pain ca taramaxicon pe ho' xim ta capari'. Hwara' opa ra e' nanapa'. Pain ca taramaja wi cacapa' oro win ma' ne cwa', xica' to nana caram cwa' co judeu nana.

¹² Mam' pe wet inonon ta nuhu' win ma' nuhu' Epafra cwa', co taramaja mi' non Cristo Jeju cwa'. Mija na ca tama' tomi' mi' cuhu' con Iri' Jam quem. Ma' ta ximicon hwanana caca ma', ma' ta hwara' opa caca pain ca howa nucucun ma', ma' ta om tara con ta'a camain' quequem pain oro ca param nem ca ara je momon ma' non pain ca tomi' mi' cuhu' con Iri' Jam. ¹³ Taramaja tamana na Epafra pain ca quep xiho' xim cuhu', je pain ca quep xiho' toton cocon oro co howa to nanain xijein cidade ma', pain Laodiceia je pain Hierápolis ma'. Taxi' inon pain ca taramaja tamana nucun.

¹⁴ Mam' pe wet inonon ta nuhu' doutor Lucas co tomi' querec te iri' cwa'. Wirico Demas cwa', mam' pe wet inonon ta nuhu' quem.

¹⁵ Mam' pe wet urut cocon oro xerexi' co to nanain Laodiceia cwain. Wiricam Ninfa cocon oro xerexi' co cut in to nanain xiricam ma', mam' pe wet urut cacam quem.

¹⁶ Noro iri jein carta ca xirao' mi' xuhu' ca' ne, mi' mi' tiquin' ac hun pain tara oro co howa to nanain Laodiceia cwain. Co howa to nanain Laodiceia quem iri tara ne, mi' mi' tiquin' ac cuhu' pain tara carta ca xirao' mi' toton ca' quem.

¹⁷Tomi' ca' jun Arquipo ma': Ara xo' ara xo' pi' pin rain ca taramaja nem ca mi' xima ma', xi om ne ca win cwere ara mon Taramaxicon nexi' ta jun.

¹⁸Wata' pain ca Paulo ta' ca', xirao' pan inain wuxu pain tawirinain ca xirao' ne ca'. Mam' pe wet xine pain ca tao' pe pe cacapa' pain xirinain ca tao' to tao' to to wa ca'.

Param inon Iri' Jam pain ca quep xiho' cuhu' ma', pain ca mi' e' cuhu' pain ca param nucun ma'.

Je i ca' ca xirao' ne ca'.

1 Tessalonicenses

*Ca xirao' mi' cain' tococwa co
howa nonon Jeju pain Tessalônica*

1 Paulo ina pain ca xirao' mi' xuhu' ca'. Wata', wirico Silvano, wirico Timóteo, ca' urut pain ca xirao' mi' urut pahu' pain ca cut in xujuhu' pain Tessalônica ma', pain ca win cwere hun Cotere' Iri' Jam con Taramaxicon nexi' Jeju Cristo ma'.

Param urut con Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param urut cocon pain ca mi' cucuhu' pain ca om toron ne xumuhu' quem.

Ca querec te urut con Iri' Jam pahu' ta cocon

²Tomi' iri urut con Iri' Jam ne, tomi' mi' ac urut pahu' con na. Tama' tomi' querec te tomi' querec te xam' urut pahu' con. ³Tama' mam' pe wet urut pahu' pain ca taramaja nuhu' ma'. Taramaja mi' hun Iri' Jam, xi om ne ca howa ara hun ta. Jain jain huhun oro win ma' nuhu' pain ca quep xiho' xun huhun ma', xi noc camain' huhun ta. Quereme hwein oro ca to' i'ina cucuhu' ma' quem, xi om ne ca winim' ara hun Taramaxicon nexi' Jeju Cristo pain ca in qui' ta' nucun ma' quem. Je ca mam' pe wet urut ca', pain ca tomi' mi' urut pahu' con Cotere' Iri' Jam. ⁴Om ca noc cuhu' Iri' Jam ta xere. Taxi' urut con pain ca tora' cuhu' pain ca wari' ne pin cuhu' ma'. ⁵Xi pijim' mi' ara urut pahu' pain capiijacon Iri' Jam ca tomi' hwet napari' pain ca to' witan xim capari' Cristo Jeju pane ta. Om ca capiijacon wari' ne ca pijim' urut pahu' pane, om na. Quep xiho' naparut Tamataracon Iri' Jam pain ca pijim' hwara' opa urut pahu' pane. Iri'o' na ca pijim' nuxut pane quem, taxi' urut. Querec pin' maparut pain ca xuruxut nuxut pain ca to ho' urut pahu' pane quem, pain ca quep xiho' xim urut pahu' pane. ⁶Taxi' urut pahu' pain ca tora' cuhu' Iri' Jam ma', xi xuruxut xo' ara hwe pain ca hohot hun ta. Win caca ne maparut, win ca ne hun Taramaxicon nexi' quem. Jain jain hwe pain oro carawa ca to' i'ina nuhu' ma', jain jain paxi' hwe pain, ane querec te pan hwe pain ca howa pin hwein capiijacon

Iri' Jam ne. Je Tamataracon Iri' Jam ca ja' tomi' querec te nuhu' ma'. ⁷ Je ca querec pin' cucuhu' co howa nonon Jeju ma', co to nanain oro xijein cidade pain Macedônia je pain Acaia ma'. Win caca ne nunuhu'. ⁸ Pijim' iri hwein capiacaon Iri' Jam con Taramaxicon nexi' ne, pijim' mi' pijim' mi' tiquin' ac tococwa na oro wari' co to nanain Macedônia je Acaia. Om ca pijim' mi' e' tococwa co to nanain Macedônia je Acaia ma'. Taraju taraju pi' pin nana oro wari' co to nanain oro xijein macan' ma' quem. Taxi' taxi' pi' pin nunuhu' pain ca howa hun Iri' Jam quem. Tomi' hwet xuxun paxi' urut cocon pain ca howa nuhu' ma'. Ane wara taxi' cucuhu' ne. Wara taraju nunuhu' pain ca howa nuhu' ma'. ⁹ Hwet iri urut cocon pain macaracocon ne, wiricoco pan ac caca na co tomi' hwet nanaparut pahu'. Tomi' hwet nanaparut pain ca tomi' querec te hwein capiacaon Iri' Jam pain ca xo' hwet urut pahu' pain cidade nuhu' pane. Tomi' hwet nanaparut pain ca howa howa om pin hwein caji pacun ca Iri' Jam xi' ma hwe pane ira. Tomi' hwet nanaparut pain ca howa pin hun Iri' Jam, je pain ca taramaja mi' hun Iri' Jam co e' cara ma', co iri'o' ma'. ¹⁰ Tomi' hwet nanaparut pain ca winim' hun Panxica ma', co to' e' mami' ca ma'. Winim' hun Jeju pain ca in qui' tain cain pawin. Wirico Jeju co to' witan ca' xim napari' con Cote ca co wap toton nonon oro caracat ma', pain ca mama' jein cote ne xe toton cocon ma'.

Ca taramaja nucun Paulo pain Tessalônica

2 Je ca tomi' urut pahu' ca' xere. Hwet iri urut pahu' pain ca pijim' mi' urut pahu' pain capiacaon Iri' Jam pane ne, om ca hwet ximama' urut pahu', taxi' maparut. Xi howa cara ara hun Iri' Jam ta. ² Pain ca om hwet querec urut pahu' pain Tessalônica pane, wara quep em' paxi' nanaparut oro wari' co to nanain Filipos. Wara tomi' xirac paxi' nanaparut pane, taxi' maparut. Ane quep xiho' caparut Iri' Jam nexi' pain ca to' i'ina cacaparut oro win ma' nuhu' ne. To' querec naparut pain ca pijim' mi' urut pahu' pain capiacaon ca tomi' hwet napari' con Jeju. ³ Pijim' iri urut pahu' pain ca howa jun Iri' Jam urut pahu' pane ne, om ca tomi' ca' xujuxut: Hu mixein xuxun, ma' ta howa cacapari' ta urut pahu', om ca pijim' ac i ma' urut pahu'. Om ca mam' pijim' urut pahu' pain ca caracat wa. Om ca mixein urut pahu' quem, om na. ⁴ Pijim' mi' e' urut pain iri' capiacaon Iri' Jam ca tomi' hwet napari' con Cristo Jeju. Win ne ca hohot hwe caparut

Iri' Jam pane, pain ca pijim' jein capiija ta caparut pane. Om ca tomi' ca' xujuxut cocon oro wari' pain ca pijim' mi' urut cocon pain capiijacon Iri' Jam: Tomi' toto xuxun, ma' ta tomi' querec te cacapari', om ca tomi' ac i ma' xujuxut cocon. Pijim' xo' xuxun, ma' ta tomi' querec te pan capari' Iri' Jam co noro nain ximixi' ca', co taxi' napari' pain ca coromicat nexi' ca', ac i ma' xujuxut pain ca pijim' urut cocon oro wari' ma'. ⁵ Om ca tomi' ximama' urut pahu' pain ca awi hwe awi hwe urut pahu', ma' ta om noc maparut ta urut pahu' ca', taxi' maparut pain ca om tomi' ac i ma' urut pahu'. Om ca mixein urut pahu', ma' ta mi' maparut pain dinheiro nuhu' ta urut pahu' quem, taxi' naporut Iri' Jam pain ca om mixein urut pahu' quem. ⁶ Om ca in ac xut pain ca pijim' nuxut urut pahu', om ca in ac xut pain ca pijim' nuxut urut cocon oro xucucun wari' ma' quem. ⁷ Hohot paxi' xira pain ca in ac xut urut pahu' pain ca quep xiho' xut urut pahu' pane, xi om ne ca apóstolo ara urut pain ca pijim' jein capiija caparut Cristo Jeju ta. Ane om ac i ma' urut pahu' pain ca to ho' urut pahu' pane ne. Tomi' pan hot e' urut pahu' pane. Win cama jicacam hwijima' pain ca tomi' pan hot cacam humaxicacam ma', ac i ma' urut pahu' pane. ⁸ Je ca hohot tamana caparut pain ca pijim' mi' urut pahu' pain capiijacon Iri' Jam ca tomi' hwet napari' con Cristo Jeju pane. Xi tomi' querec te tamana ara urut pahu' ta. Hohot tamana naporut pain ca quep xiho' urut pahu' pane quem. Jain jain tamana urut pahu' pain ca quep xiho' xim urut pahu' pane. Xi querec te tamana ara urut pahu' pane ta. ⁹ Om ca mam' pe wet maparut pain ca taramaja tamana nuxut pain ca cut xin urut pain dinheiro ca mam' cut urut pain carawa ca cao' wa pane ra xere? Mam' pe wet maparut pain ma' ira. Jam' tamana urut pane. Ca taramaja urut, ca pijim' pijim' mi' ac urut pahu' na pain capiijacon Iri' Jam con Jeju, ca taramaja taramaja urut, ca pijim' pijim' ac urut na pane. Pain xec je pain xim, taramaja tamana urut pane. Ma' ta om to' i'ina xuxun pain ca tama' xiram pa' xut xuxun ta urut pahu'.

¹⁰ Wahu' pain ca howa hwe ma', taxi' maparut pain ca xuruxut nuxut pain ca to ho' urut pahu' pane. Taxi' naporut Iri' Jam quem. Ara e' urut pain ca param nucun Iri' Jam pahu'. Xuruxut xo' urut, om ca hwet ne wuxuxut pain ca caracat wa pahu' quem. ¹¹ Taxi' maparut pain ca tomi' querec te tomi' querec te xam' urut pahu' pane quem. Win ca wari' co tomi' querec te tamana nanam mana panxica ma', ac i ma' na ca tomi' querec te tamana urut pahu' pane. ¹² Ac cote cacama hwijima' urut pahu'

pain ca hu urut pahu' ma'. Tomi' toto urut pahu', hu urut pahu' pain ca xuruxut xo' je urut pahu' ma'. Win ne ca howa pin hun Iri' Jam co tora' nuhu' ma', pain ca taramaxicon pe ho' xim cuhu' ma', je pain ca jao jao ma' xine pain ca awi tamana ne cuhu' ma' urut pahu' pane.

¹³Pijim' mi' iri urut pahu' pain capijacon Iri' Jam pane ne, querec pin' ac hwein na pain ca om maqui' nein ca coromicat nuxut. Om ca capijacon wari' ne hwein. Capijacon Iri' Jam ma' ira hwein. Je ca tama' tomi' querec te urut con pahu'. Iri'o' na quem, maqui' non Iri' Jam co meo cara nain xumuhu' pain ca howa hwein capijacon ma'. ¹⁴Taxi' urut pahu' pain ca howa hwein capijacon quem xere. Xi hwara' opa cara hwe pain ca quep em' cucuhu' oro win ma' nuhu' ma'. Win caca oro xerexi' co cut in xucucun pain Judeia cain, co howa nonon Iri' Jam pain ca win cwere cocon Cristo Jeju cwain. Momon hwara' opa nana pain ca quep em' cocon oro taramaxicon nucucun oro judeu cwain. Carawa ca ara nuhu' pain ca quep em' cucuhu' oro win ma' nuhu' ma', je ca ara nonon pain ca quep em' cocon oro taramaxicon nucucun oro judeu quem. ¹⁵Oro taramaxicon nucucun oro judeu pane, wiricoco co to' pa' pin nonon Taramaxicon nexi' Jeju pane. Wiricoco co to' parapa' pin nonon oro profeta pane quem. Wiricoco co quep em' nanaparut quem. Om ca hohot camain' cocon Iri' Jam. Noc noc xam' nonon oro wari' quem. ¹⁶To' i'ina nanaparut pain ca pijim' mi' urut cocon pain capijacon Iri' Jam oro wari' co om judeu nana ma', pain ca to' witan xim nuhu' Iri' Jam ta urut cocon ma'. Je curucucun. Mija pin na ca caracat nucucun. Cote ne pin na cocon. Mana' tamana pin nonon Iri' Jam. Mama' jein cote ne xe ta toton nonon quem.

Ca in hwet mami' xut pahu' ta cocon

¹⁷Je ca tomi' xut pahu' ca' xere. Paca' iri urut pahu' pain ca to' i'ina xim cacaparut oro win ma' nuhu' co ja' jein ca' nanaparut pahu' pane ne, tomi' xaxa' tamana ac urut na. Om paxi' na ca pain ne ca to pira ca' urut pahu' pane, ane mam' pe wet urut pahu' ne. Mija na ca coromicat urut pahu' pane. In hwet xuxun na urut pahu' pane. Querec mami' xixin curucucun na urut pahu' pane ta. ¹⁸In hwet xuxun na urut pahu' pane. Wata' pain ca Paulo ta' ca', in hwet xitoton na paxi' inuhu' pane. Om ca xica' pe ne ca hwet toton xuhu'. Ma' 2 pin na ca in hwet toton paxi' xuhu' pane. Ane to' i'ina caparut Caxicon Jam ne. ¹⁹Ma' co taxi' urut pain ca howa cara

cocon Iri' Jam quem? Ma' co ja' tomi' querec te nanaparut quem? Ma' co tomi' hwet xun xut con Taramaxicon nexi' Jeju pain ca coco' quima hwet xun urut con pain ca aram aram in qui' tain cain macan' ca' quem? Om ca wahu' ne? Wahu' ne ma' ira! Mija tara ca tomi' querec te xut pahu' pain ca aram aram querec pin' cuhu' Taramaxicon nexi' pain ca howa cara nuhu' ta. Win ca wari' co tomi' querec te tamana ma', pain ca hwet cain' cain tawirinain wana pain ca maji jein xi' ca cocon oro win ma' ca ma', pain ca an cain carawa ca awi. Ac i ma' urut pahu'. ²⁰ Je ca tomi' urut pahu' ca'. Wahu' co tomi' hwet iri' pain ca tomi' querec te tamana urut pahu' ca'. Wahu' co ja' tomi' querec te pan nanaparut quem.

3 Coromicat tamana urut pahu' pane. Om ca quereme mami' ac urut pain ca coromicat nuxut quem. Je ca hwet roron urut con coxari' Timóteo pahu' pane. Mon to wet pan ac urut na pain Atenas. Wata', Silvano, ca' urut, mon to wet ac urut na pa'ao'. Timóteo ma', taramaja wi naparut pain ca taramaja mi' urut con Iri' Jam cwa', pain ca pijim' hwet urut pain capijacon ca tomi' hwet napari' con Cristo. Hwet roron urut con pahu'. Ma' ta to' hwara' opa momon pain ca howa nucucun urut con pahu'. Quep xihó' roron, ma' ta howa cara caca quem urut con pahu'. ³ Hwet roron, ma' ta om to' i'ina tococwa pain ca quep em' tococwa pain ca howa nucucun ta urut con pahu'. Wara taxi' ara xi' hwein ca coromicat an pe xo' nucun Iri' Jam pari', pain ca main quep em' tuturuhu' oro wari' pain ca howa mahu' ta capari' pane. ⁴ Pain ca to ho' to ho' wet urut pahu' pane, wara tomi' pe urut pahu' pain ca main quep em' xuxun cacapari' oro wari' pain ca howa nexi' ca' urut pahu' pane. Je ca ara napari' quem, taxi' hwein. ⁵ Toron tamana napa' xumu pahu', xi coromicat ara xuhu' pane ta. Am tomi' querec cocon Caxicon Jam ma', am joc camara' cocon ma', am taramaja ximama' iri' pain ca pijim' mi' xuxun pain capijacon Iri' Jam ma', ac i ma' na ca coromicat ne pahu' pain ca jain jain ta' pahu' pane. Je ca hwet roron ton Timóteo pahu' pane. Ma' ta taxi' toton pain ca howa nucucun ta inon pahu' pane.

⁶ Ac i ma' paxi' na ca toron tamana ne xumu pahu' pane. Ane in hwet caparut Timóteo ne. Xo' wa' qui' nain ca to hwe ma'. Tomi' hwet ac caparut na pahu': To wet nana. Howa howa wet nonon Cristo. Tomi' querec te nonon oro wari' quem, ac i ma' na ca tomi' hwet caparut pahu'. Mam' pe wet nunuhu' quem, querec xuxun na nunuhu' ta naparut pahu'. Je ca param urut quem, querec xuxun na urut pahu' ta. ⁷ Je ca tomi' querec te

pin urut ca' pahu'. Ximin paxi' urut pain ca to' i'ina caparut oro carawa ca', je pain ca quep em' cacaparut oro wari' co noc nanaparut cwa'. Ane tomi' querec te pin urut pain ca tomi' hwet caparut Timóteo pahu' ne, pain ca hwara' opa nana pain ca howa cara cocon Iri' Jam ta caparut pahu'. ⁸Wa' pin na xumuxut pahu', xi om ne ca hwara' opa ara hwe pain ca howa cara hun Taramaxicon nexi' Jeju ta. ⁹Om ca ha' caparut pain ca tomi' hwet tomi' hwet pi' pin urut con Iri' Jam nexi' pain ca tomi' querec te nuxut ca' pahu', xi mija ara ne ca tomi' querec te urut con pahu' ta. ¹⁰Tama' tomi' urut con pain xec je pain xim quem. Jain jain urut con, tomi' mip ca' urut con pain iri' xumuxut ca': Mi' xut pain ca querec mami' urut cocon pain iri' curucucun ta urut con pahu'. Mi' xut pain ca quep xiho' urut cocon pain capijam ca om taraju pa' querec caca ma', ma' ta hwara' opa cara caca pain ca howa nucucun ta urut con pahu'. ¹¹Mi' xut pain ca hwet xo' urut cocon ta urut con pahu' quem, ac i ma' na ca tomi' urut con Cotere' Iri' Jam con Taramaxicon nexi' Jeju quem. ¹²Ca' na ca tomi' mi' urut pahu' con Taramaxicon nexi' quem: To' hwara' tiquin' to' hwara' tiquin' pin rain ca om noc xucucun je pain ca om noc cocon oro wari' ma' quem urut con pahu'. Win urut pain ca tomi' querec te tamana urut cocon ca' quem urut con pahu'. ¹³Ac i ma' na ca tomi' mi' urut pahu' con. Ma' ta to' hwara' opa momon pain iri' ximicocon ma' urut con pahu'. Ma' ta hohot cocon Cotere' Iri' Jam, ma' ta om ma' camain' cocon carawa ca ja' tomi' em' cocon pain ca caracat wa pain ca aram aram coco' quima hwet xun cocon ma', pain ca in qui' tain main macan' ca', pain ca ja' ja' xim quequem oro wari' nem quem urut con pahu'.

**Ca na e' ne pain ca xuruxut xo' hwe, ma' ta
hohot hun Iri' Jam ta cocon Paulo**

4 Tomi' xun urut pahu' pain i ca' quem xere. Wara hu urut pahu' pain ca xuruxut xo' je, ma' ta hohot hun Iri' Jam ta urut pahu' pane. Querec pin' paxi' urut pahu' pain ca tomi' ha' maparut quem. Xuruxut xo' hwe ma' ira. Ane hu ca' urut pahu' pain xocori ca' ne. Win ne ca tomi' jujun caparut Taramaxicon nexi' Jeju cwa'. Xuruxut xo' cara je me urut pahu'. Win xumu win xumu tiquin' jein ca xuruxut xo' wa ta urut pahu'. ²Xi taxi' ara hwein ca pijim' mi' urut pahu' pain ca hu urut pahu' pane ta. Wirico Taramaxicon nexi' co pijim' ac i ma' jujun ta naparut pahu' pane.

³Param nuhu' Iri' Jam pain ca xuruxut xo' hwe pain ca iri' wari' ne cuhu' ma', pain ca ara e' hwein oro ca hohot non ma'. Wahu' pain ca tarama' hwe ma', ta quep hwem xequem narima' me. Wahu' quem oro narima', quep e' turuhu' taxuhu' ta. ⁴Tomi' tomi' xam' inuhu': Na e' na pain ca cut xo' hwem narima' ma', je pain ca cut xo' hun tarama' pain ca narima' nuhu' ma' quem. Ta caracat camain' hwe pain me. ⁵Ta tomi' ha' camain' hwein ca param ximama' wa pain ca win xumu wa oro ca om awi wa me. Ac i ma' ara xi' nana oro wari' co om querec pin' nonon Iri' Jam ta. ⁶Ta mam' ara cup xujuhu' pain ca param ximama' wa me. Ta mam' mixein camain' xujuhu' pain me. Ma' tara xumuhu' me. Taramaxicon nexi' ma', wap toton nonon oro wari' co quep nanam xequem narima'. Wap tatam nanam oro narima' co quep ne nonon xucun tarama' ma' quem. Wara tomi' ac i ma' urut pahu' pain ca hu mip urut pahu' pane ta. ⁷Xi quep jem xequem narima' capari' pain ca xo' howa xine capari' pain ca tarama' nexi' Iri' Jam ta. Om ca quep ne jun xucun tarama' tacacama oro narima' ma' quem. Xuruxut xo' je, hohot xine pain ca wari' ne xuhu' ta capari' pain ca xo' howa xine capari' ma' ira. ⁸Je ca tomi' urut pahu' ca': Mo ta tomi' in pin hwein ca xirao' mi' urut pahu' ca', om ca wari' ca co tomi' in pin hwe. Tomi' in pin hun Iri' Jam co mi' nuhu' pain Iri' Tamataracon ca ara awi e' ma'.

⁹Xirao' mi' xun paxi' urut pahu' pain i ca' quem, pain ca om noc xujuhu' pain ca xere xujuhu' ma'. Ane hohot ne pain ca om xirao' mi' urut pahu' pain ne. Xi wara hu pan ara cuhu' pain Iri' Jam ta. Ta noc camain' xujuhu' me ta cuhu' ma' ira. ¹⁰Xi wara tomi' ha' ara hun ta. Tomi' querec te tomi' querec te xam' huhun oro xerexi' co to nanain oro xijein xirim pain Macedônia ma' ira. Ac i ma' paxi' hwe. Ane hu mip xim urut pahu' pain i ca' ne xere: Tomi' querec te cara jujun me, iri' cote ne ac ne tara ca om noc huhun ta urut pahu'. ¹¹Win xumu mip jein ca xuruxut xo' wa, ma' ta om to' i'ina cuhu' oro carawa pain ca to ho' xujuhu' ma'. Ta querec wet hwein oro ca ara nucucun oro win ma' hwe me, querec wet e' jein oro ca ara pan nuhu' ma', ma' ta ma' cuhu' oro carawa ca param hwe ma', pain ca cut xin hwein carawa ca cao' wa ma'. Win ne ca wara hu urut pahu' pane. ¹²Ma' ta querec pin' cucuhu' pain ca xuruxut xo' nuhu' oro wari' co om howa nana ma'. Ma' ta om mi' ne mi' ne huhun pain carawa oro wari' quem urut pahu'.

Ca in qui' ta' nucun Taramaxicon nexi'

¹³ Tomi' xo' xim urut pahu' cocon oro xerexi' co wara cono' nana quem xere. Taraju pa' je e'. Ma' ta om an xiho' huhun oro wari' co om coromicat xo' nana ma', co tara ta'a nana pain ca e' mami' xi' caca co wara cono' nana ma'. ¹⁴ Mi' pin na Jeju pane. E' mami' ac ca na quem. Je ca howa iri' ca'. Je ca howa xin i ca' quem: Iri' Jam ma', main to' e' mami' totoron oro xerexi' co wara cono' nana ma', co win cwere nonon Jeju pain ca howa cocon pane, ame hwe e'. To' e' mami' iri totoron ne, jao jao cut qui' ac cocon tara con Jeju pain ca aram aram maqui' tain cain macan' ca'. ¹⁵ Tomi' xim urut pahu' pain i ca' quem, xi wirico ara ca Taramaxicon nexi' co tomi' hwet nain pane: Wari' pain ca om cono' querec iri' ca', pain ca e' e' wet xi' iri' pain ca in qui' ta' nucun ca', om ta wara hwet cain' xun Taramaxicon nexi'. Om ta o pan xuxun co wara cono' nana ma'. ¹⁶ Wirico pan tara Taramaxicon nexi' co quiji' qui' tain nain pawin cain. Harahap je iri tarapari' ne, merem ac ca tara taramaxicon nucucun oro jam co taramaja mi' nonon ma', ca on on ac ne tara caji taracom nucun Iri' Jam ma'. E' mami' cain' ac caca tara oro xerexi' co wara cono' nana pane, co howa nonon Taramaxicon nexi' pain ca e' e' wet nucucun pane. ¹⁷ Wari' pain ca e' e' wet nexi' ca' iri tara ne, cut hap ac capari' tara Iri' Jam. Cut wi ac capari' tara cocon oro xerexi' co wara e' mami' nana ma', hwet wi ac xun tara Taramaxicon nexi' pain tajain nanawin cain. To ho' cara ac xun tara Taramaxicon nexi' ta. ¹⁸ Je i ma'. Tomi' toto xujuhu' pain ca tomi' urut pahu' ca'. Tomi' xaxa' tomi' xaxa' om ac hwe tara ta.

Ca winim' xo' jun Taramaxicon nexi' pain ca in qui' ta' nucun cocon Paulo

5 Hohot paxi' na pain ca om xirao' mi' mami' urut pahu' pain i ca' quem xere, pain xec nein ca in qui' ta' nucun Taramaxicon nexi' ca', ² xi wara taxi' pin ara hun pain ca ane ane maqui' ta' nucun ta. Ac pain ca ane ane maqui' towa ca wari' co an noc xa tain nain carawa ma' tara pain ca om winim' tocwa ma', ac i ma' tara ca ane ane maqui' ta' nucun Taramaxicon nexi'. Om ta maqui' hap ca ma' totoron oro wari' co om howa nana ma'. ³ Maqui' ta' iri tara xec nucun ne, ca' ac ne tara ca coromicat nucucun: Om na xin carawa ca to' i'ina napari' ne? Om na wari' co mana' nanapari',

hohot tamana napari' oro carawa, ac i ma' tara ca coromicat ximama' caca ma'. Ame hwe e', ane ane maqui' pa' ac cocon tara ca jain jain tamana wa pain ca wap xun tococwa. Win ne ca ane ane caxi cama narima' pain ca pan' ta' ca cawinacam ma', ac i ma' tara ca ane ane maqui' pa' cocon ca jain jain wa. Om ta witan ca' camain' cacain ta.

⁴Je ca tomi' urut pahu' ca' xere. Wahu' iri na ne, om ca an xiho' huhun oro wari' co om taraju pa' nana ma', co ac ca to cacain na ca jitacat nein xim nana ma'. Om ta jaxicao' cuhu' xec nein ca in qui' ta' ca Taramaxicon nexi'. Noro jein ca jaxicao' tocwa waximain xirim con caxicon wari' co an noc xa tain nain caramaxicon ma', om ta jaxicao' ac i ma' cuhu' ca maqui' nucun Taramaxicon nexi'. ⁵Wahu' pain ca howa hun Taramaxicon nexi' ma', xuruxut xo' xuruxut xo' pi' pin hwe, ara xo' ara xo' pi' pin hwe. Ac ca to hwein na naran nucun Iri' Jam ma', ac wari' nein xec hwe. Om ca an xiho' xun wari' co pan tem ma', co ac ca xut cain na ca jitacat nein xim.

⁶Je ca tomi' urut pahu' ca': Ma' tara ximixi' me. Om ta ara e' xin ca param pan nexi'. Om ta an xiho' xuxun oro wari' co om howa nana ma', co ac ca pi'am caca na pain ca om querec pin' cacain carawa ca maqui' pa' cocon ma'. ⁷Xi ma' ne ximicocon oro wari' co om querec nana ma', co ac ca pi'am caca na. Ac ca pi'am towa caca na pain xim. Oro wari' co ara e' nanain ca param pan nucucun ma', pain ca toc tamanain to cacain comi uva ca mana' ma', ac ca toc tamanain to cacain na pain xim ma'. Om ca querec pin' cacain carawa ca maqui' pa' toton nonon. ⁸Wari' iri na ne, pain ca wari' nein xec iri' ca', na e' na pain ca ma' ne ximixi'. Noro jun soldado pain ca pe cain arain too ca tac caho' nain quimacon je waracon ma', pain ca narain ho' xije cocon oro co to' i'ina nanapa' ta ca ma'. Ac i ma' xi' pain ca narain ho' xijexi' con Caxicon Jam ma', pain ca howa cara xun Iri' Jam, je pain ca tomi' querec te caracan xijexi' quem. Noro jun soldado pain ca pe cain caji waji' ca mam' quep caho' cain winacon ma' quem. Ac i ma' xi' pain ca coromicat nexi' quem, pain ca howa cara xun Taramaxicon nexi' pain ca to' witan toton capari' ma' quem. ⁹Xi mana' capari' Iri' Jam ta. Om ca mama' jein xe capari' pain ca xo' howa xine capari' pane, om na. To' witan xuhu', xi om ne ca howa ara hun Panxita' pain ca mi' pin caho' cuhu' ta napari' con Taramaxicon nexi' Jeju Cristo. ¹⁰Mi' pin caho' napari' Taramaxicon nexi' Jeju Cristo. Ma' ta to ho' cara cacapa' ta napari' pain ca win cwere xun ca'. Mo ta e' e' wet iri' pain ca aram aram in qui' tain cain macan' ca', mo ta wara cono' iri' quem, to ho'

cara ac xun tara pain ca win cwere xun ta. ¹¹ Je ca tomi' urut pahu' ca': Wara tomi' toto xujuhu' pain ca hu caracan xujuhu' pane, wara to' hwara' opa xujuhu' pain ca quep xiho' xujuhu' pane quem. Ara cara jein quem.

Ca hu mam' tococwa pain ca win pi' pin ta' ne ca xirao' nucucun

¹² Tomi' ho' xim urut pahu' pain i ca' quem xere: Querec pin' jujun co taramaja tamana nana pain ca querec wet cucuhu' ma', pain ca tomi' xo' cucuhu' con Taramaxicon nexi' ma', je pain ca hu cucuhu' pain capijacon ma'. ¹³ Tomi' querec te jujun pain ca querec pin' huhun pain ca taramaja nucucun ma'. An hwet mi' jujun pain ca om noc huhun quem. Xi ma' ara ne ca taramaja nucucun pain ca quep xiho' cucuhu' ma'. Tomi' querec te xujuhu' pain ca to ho' xujuhu' ma' quem.

¹⁴ Hu ca' urut pahu' pain i ca' quem xere: Tomi' jujun co jam' curucucun ma', co noc nanain ca taramaja wa ma'. Tomi' toto jujun co naro curucucun pain ca tomi' xaxa' nucucun ma'. Quep xiho' jujun co om hwara' opa nana pain ca howa nucucun ma'. Tomi' pan hot tomi' pan hot xam' jujun oro wari' ma' quem. ¹⁵ Ma' tara xumuhu' con wari' co quep xiram nuhu' ma'. Ta win mapa' ne hun me. Xiram pa' pan e' xujuhu' pain ca ara mi' xujuhu' pain ca awi wa me. Tama' xiram pa' xujuhu' pain ca xere xujuhu' ma', tama' xiram pa' jujun oro wari' ma' quem.

¹⁶ Tama' querec te je me. ¹⁷ Tama' tomi' jun Iri' Jam quem. Ta an pe camain' hwein me. ¹⁸ Tomi' querec te jun pain oro ca ara nuhu' ma' quem. Mo ta hohot cuhu' oro carawa ma', mo ta om hohot cuhu' ma' quem, je je ari na. Tomi' querec te jun pain Iri' Jam. Je ca param mi' cuhu' ma', pain ca win cwere hun Cristo Jeju ma'.

¹⁹ Ta tomi' am pin hwein Tamataracon Iri' Jam pain ca meo cuhu' pain xumuhu' me. ²⁰ Ta tomi' napat hwein ca pijim' nucucun oro win ma' hwe me, pain ca tomi' hwet rain capijacon Iri' Jam napa' Tamataracon ta caca ma'. ²¹ Ta tomi' napat hwein ca pijim' nucucun me. Na e' na pain ca coromicat xo' hwe pain ca tomi' querec xujuhu' pain oro ca pijim' wa ma'. Am an xiho' nein iri' capijacon Iri' Jam ca wara pijim' xihwe ma', am om an xiho' nein. Mo ta querec pin' hwein pain ca maqui' con Iri' Jam ma', awi na ta ac hwein tara, howa ac hwein tara ta. ²² Tomi' in pin tomi' in pin pi' pin jein oro ca pijim' wa ca pan tem ma', ca om maqui' non Iri' Jam ma'. Miri'om jein ta.

²³Tomi' mi' urut pahu' con Iri' Jam co mi' napari' pain ca om toron ne ximixi' ca'. Tomi' ca' urut con pahu': To' hohot mip roron pain oro ca xuruxut nucucun pum ta urut con pahu'. Mi' roron pain ca win xumu quequem pain iri' ximicocon, je pain oro ca param nucucun quem urut con pahu'. Ma' ta om ma' camain' cuhu' ca ja' tomi' em' pan cuhu' pain ca caracat wa pain ca aram aram in qui' ta' ca Taramaxicon nexi' Jeju Cristo ta urut con pahu'. ²⁴Iri' Jam ma', co hohot xine nuhu' ma', mi' turuhu' pain ca hohot mip hun quem. Xi mixein taxi' capari' ta. Tama' ara mi' napari' pain oro ca tomi' pe mi' capari' ta.

²⁵Tomi' mi' xut con Iri' Jam me xere. ²⁶An hwet mi' xujuhu' pain ca tomi' querec te xujuhu' pain ca xere xujuhu' quem. ²⁷Wata' pain ca Paulo ta' ca', tomi' ca' inuhu' quem, xi ma' ara capari' Taramaxicon nexi' ta. Noro mi' noro mi' xam' xujuhu' pain ca xirao' nuxut ca'. Taraju taraju pi' pin tatara oro xerexi' ma' pahu'. Je ca tomi' xuhu' ca'.

²⁸Param urut con Taramaxicon nexi' Jeju Cristo pain ca quep xiho' cuhu' ma', pain ca mi' cuhu' pain ca param nucun ma'.

Je i ca' ca xirao' nuxut ca'.

2 Tessalonicenses

*Ca xirao' mi' mami' tococwa
co howa nonon Jeju pain Tessalônica*

1 Paulo, Silvano, Timóteo, ca' urut pain ca xirao' mi' mami' urut pahu' ca'. Xirao' mi' urut pahu' pain ca cut in xujuhu' pain Tessalônica ma', pain ca win cwere hun Cotere' Iri' Jam con Taramaxicon nexi' Jeju Cristo ma'.

²Param urut con Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param urut cocon pain ca mi' cucuhu' pain ca om toron ne xumuhu'.

**Ca tomi' mi' cocon con Iri' Jam, je pain ca tomi'
querec te urut con Iri' Jam pahu' ta cocon quem**

³Na e' na pain ca tama' querec te urut con Iri' Jam pahu' ta xere. Hohot non Iri' Jam pain ca tama' tomi' querec te urut con pahu' quem, xi om ne ca howa cara ara hun ta. Win xumu win xumu tiquin' hun pain ca howa hun ma'. Mija pin na ca tomi' querec te tomi' querec te xam' xujuhu' ma' quem. ⁴Je ca tomi' hwet urut cocon oro win howa iri' cwa' pahu'. Hwet iri urut cocon pain ca cut in to nucucun pain ca howa cocon Iri' Jam ne, tomi' hwet tomi' hwet ac urut cocon na pain ca hwara' opa nuhu' pain ca quereme hwein oro ca jain jain wa ma'. Quep em' paxi' nunuhu' oro wari' co noc nunuhu' ma'. To' i'ina paxi' nuhu' oro carawa ma' quem. Ane quereme hwein ne. Howa cara hun Iri' Jam ma' quem.

⁵Oro ca ara nuhu' ma', je ca to' querec pin' cuhu' con Iri' Jam ma', pain ca hohot hohot pi' pin ne oro ca ara nucun ma', pain ca mi' toton cocon pain oro ca taramaja mi' caca oro wari' ma'. To' querec pin' nuhu' pain ca param nucun ma' quem, pain ca to' hohot inuhu', param inuhu' pain ca to ho' mahu' pain ca taramaxicon pe ta' ca' toton cuhu' ma' quem. Je ca jain jain hwe cocon oro wari' co quep em' nunuhu' pain ca pijim' mi' huhun con Iri' Jam co taramaxicon ma' quem. ⁶Hohot na oro ca ara nucun Iri' Jam ma', tama' ara xo' na. Je ca taxi' xun pain ca to' i'ina toton cocon oro

wari' co to' i'ina nunuhu' ma'. ⁷ Ara xo' na pain ca to' om pin tain cain ca jain jain nuhu' pain ca quep em' xihwe ma' quem. To' om pin tarain ca jain jain nuhu', to' om pin tarain ca jain jain nuxut ca' quem, pain ca aram aram qui' qui' tain cain pawin Taramaxicon nexi' Jeju. Maqui' wi tara pain ca weo nein xe. Ja' ja' totoron oro jam co taramaja mi' nonon ma', co hwara' opa nana ma'. ⁸ Oro wari' co noc nonon Iri' Jam ma', co om tomi' ha' je na nanain capi'acon ca tomi' hwet napari' con Taramaxicon nexi' Jeju ma', wap ac tococwa tara pain ca win hwe pane tococwa ma'. ⁹ Em' hwe, mama' jein cote ne xe cain xun iri tata ne, jain jain cara ac caca tara. Om ta pi' ra ha' ne cocon. To ni ca' totoron Taramaxicon nexi'. Om ta querec camain' cacain ca toc meremem nucun ca to' querec pin' napari' pain ca hwara' opa tamana nucun. ¹⁰ Wap ac i ma' totoron Taramaxicon nexi' pain xec nein ca in qui' ta' nucun. Tomi' querec te pan ac xun tara pain ca wari' nucun iri' quem. Awi ma, xi om ne ca to' witan ara maparut ta ac xun tara, tomi' ac i ma' tomi' ac i ma' xam' xun. In ac in ac xam' xun pain ca howa xun quem. Wahu' tara quem, in ac in ac xam' jun, xi om ne ca howa ara hwein capi'acon ca pijim' hwet urut pahu' pane ta.

¹¹ Je ca tama' tomi' mi' urut pahu' con Cotere' Iri' Jam quem. Tomi' ca' urut con pahu': Quep xiho' roron, mi' roron pain ca hohot quequem pain ca xuruxut nucucun urut con pahu'. Win ne ca xuruxut xo' je momon pain ca xo' howa xine qui' momon pane urut con pahu'. Mam' quep xiho' roron pain ca hwara' opa tamana nem quem urut con pahu'. Ma' ta ara ara pi' pin cacain oro ca awi wa ca ara xi' caca pain ca howa cocon Jeju ta urut con pahu'. ¹² Tomi' ac i ma' urut con pahu'. Ma' ta awi na awi na cocon Taramaxicon nexi' Jeju oro wari' pain ca querec pin' cucuhu' pain ca to' witan pan cuhu' ma'. Ma' ta awi hwe awi hwe cuhu' Taramaxicon nexi' quem. Ha' taraparut quem. Om paxi' xira ca awi hwe capari' Cotere' Iri' Jam con Taramaxicon nexi' Jeju Cristo ma'. Ane xiram pa' pan cacapari' ne. Mi' taxipa' nanapari' pain oro ca param nucucun ta.

Caxicon wari' co iri' waximain ca caracat wa

2 Tomi' xo' xim urut pahu' pain i ca' quem xere pain ca in qui' ta' nucun Taramaxicon nexi' Jeju Cristo, je pain ca cut in xim capari' pain ca cut mama' xim capari' quem. Tomi' xo' ca' urut pahu': ² Mo ta tomi' mixein ca' cuhu' wari' ma': Wara maqui' pin na xec nein ca in qui' nucun Taramaxicon

nexi' ta tara. Am tomi' ca' cuhu': Om na, je ca tomi' ca Paulo pane. Tomi' xo' napa' pain Tamataracon Iri' Jam pane ta na, taraju inon ta. Tomi' hwet taxipa' nain pain oro ca pijim' nucun. Xirao' ac i ma' na pain oro ca xirao' nucun quem. Mo ta tomi' mixein ac i ma' cuhu' ma', coromicat xo' je ta. Om ca na ne pain ca toron hap ne xumuhu' con. Om ca na ne pain ca jin' hwe ma' quem. ³Om ca na camain' ne pain ca howa hun wari' co tomi' mixein ac i ma' nuhu'. Xi iri'o' ne ca tomi' nucun ta. Om ta maqui' hap ne xec nein ca in qui' ta' nucun Jeju ta. Maqui' cain' tara oro xec pain ca ari tamana cocon Iri' Jam oro wari'. Mija pin iri tatara co an to pin nanain ca howa wa ne, ane ane maqui' ac ca tara xucun wari' co iri' waximain ca caracat wa. Iri' caxicon wari' tara. Main xin mi' pan toron pain cote ne xe Iri' Jam ta, ame hwe e'. ⁴Caxicon wari' ma', co iri' waximain ca caracat wa ma', noc tamana toron Iri' Jam. Noc tamana tarain oro caji pacun ca Iri' Jam xi' ma caca oro wari' ma' quem. Oro ca pe torotop mi' querec te caca pain ca howa cacain ma', noc tamana tarain quem. Xec xec tamana tara. Xao pe pin tarain cote ne xiricon Iri' Jam ca in ac pe tocwa. Wata' co Iri' Jam ta ac ca tara.

⁵Pain ca pe ho' pe ho' wet xuhu' pane, tomi' hwet taxipa' inuhu' pain ca in qui' ta' nucun Jeju, je pain ca ari tamana xun cocon Iri' Jam oro wari' quem. Tomi' hwet taxipa' inuhu' con caxicon wari' co iri' waximain ca caracat wa quem. Om ca mam' pe wet hwein ca tomi' ne pane ra? Mam' pe wet hwein ma' ira! ⁶Taxi' hwein carawa ca ma' caho' non caxicon wari' pain ca maqui' ca quem. Om ta mam' maqui' ca. Maqui' e' tara pain xec nein ca wara coromicat an pe xo' ca Iri' Jam. ⁷Wara hwara' opa pin paxi' na Caxicon Jam pain xocori ca'. Wara meo taparu paxi' nain ximicocon oro wari' pain ca to' ari pin cocon con Iri' Jam. Ane ma' ne i ma' ca ma' caho' non caxicon wari' co iri' waximain ca caracat wa ne. Ma' caho' ma' caho' pan toron, aram aram an in mao pan ac cain tara Iri' Jam. ⁸An in mao iri tarain i ma' ca ma' caho' non ne, maqui' pan ac ca tara caxicon wari' co iri' waximain ca caracat wa ma', co to' pa' pin ton pan ca Taramaxicon nexi' Jeju pain ca aram aram in qui' ta' nucun. Mam' to' pa' toron pain ca huco' nucun. Mam' to' om pin tarain ca hwara' opa nucun pain ca toc meremem nein ca in qui' nucun.

⁹Pain ca om to' pa' pin querec tocwa caxicon wari' ma', co iri' waximain ca caracat wa ma', hwara' opa tamana tara. Wirico Caxicon Jam tara co mi' ton non pain ca ara cain ca om ara taxi' ne ca wari' wa ma'. Wa wa

ximama' ac cocon tara oro wari'. Mija tara ca mixein cocon. ¹⁰Mixein tamana totron oro wari', mam' mixein totron pain ca ara cain oro ca om awi wa. Oro wari' co mixein xi' wawa ma', xumu tatarain cote ne xe. Xi om ne ca noc ara cacain capiacaon Iri' Jam ca iri'o' ta. Mo xi howa cacain capiacaon Iri' Jam ca iri'o' ma', witan pin ac caca xira. ¹¹Je ca mi' pan cocon pain ca howa ximama' wa Iri' Jam quem. Mi' nonon pain ca howa ximama' cocon caxicon wari' ma', co iri' waximain ca caracat wa ma'. Ma' ta howa hwein ca mixein nucun ta nonon. ¹²Ma' ta tomi' mi' tomi' mi' pi' pin xuhu' pain ca wap wa pain ca em' hwe ta xuhu' ca', pain ca mama' jein cote ne xe ta xuhu' ta nonon oro wari' co om howa nanain capiacaon ca iri'o' ma', co tomi' querec te pan nanain ca caracat wa ma'.

Ca na e' ne pain ca hwara' opa cara hwe con Jeju ta cocon

¹³Je ca tomi' urut pahu' ca' xere. Om ca noc cuhu' Taramaxicon nexi'. Na e' na pain ca tama' tomi' querec te urut con Iri' Jam pahu'. Xi om ne ca wara tora' qui' ara cuhu' pain cara pane, pain ca main to' witan xuhu' ta qui' cuhu' pane. Mam' to' witan nuhu' pain ca hwara' opa nein Tamataracon ma', ca to' hohot pin nuhu' ma'. Mam' to' witan nuhu' pain ca howa nuhu' pain ca howa hwein capiacaon ca iri'o' ma' quem. ¹⁴To' witan xim nuhu' pane. Je ca howa xine cuhu' pain ca xo' taraju hwein capiacaon ca tomi' hwet urut pahu' con Jeju quem. Ma' ta aram aram mi' xim cuhu' pain ca awi nucun Taramaxicon nexi' Jeju Cristo ma', je pain ca hwara' opa nucun ma', je pain ca om caracat nucun ma' quem.

¹⁵Je ca tomi' urut pahu' ca' xere. Hwara' opa cara je pain ca howa nuhu' ma'. Howa cara jein capiacaon Iri' Jam ca wara tomi' hwet pan caparut Jeju Cristo, ca an xin tiquin' mi' urut pahu' pain ca tomi' hwet pan urut pahu' pain, je pain ca xirao' mi' urut pahu' pain quem.

¹⁶Tomi' mi' urut pahu' con Taramaxicon nexi' Jeju Cristo con Cotere' Iri' Jam. Om ca noc capari' Iri' Jam. Om ca pi' ra ha' ne ca to' hwara' opa cara capari'. Xiram pa' napari' pain ca mi' e' capari' pain ca momon winim' xun pain ca main mi' xim capari' pain carawa ca awi ca wara coromicat an pe xo' mi' capari' quem. Om xi mi' capari' pain, xi iri' wari' iri' ta. Ane xiram pa' pan capari' ne. Je ca mi' e' capari' pain. ¹⁷Tomi' mi' urut pahu' cocon. To' hwara' opa jujun pain iri' ximicocon ta urut cocon pahu'. Quep xih' cara jujun, mi' cara jujun pain ca tama' ara cacain ca awi wa ta urut

cocon pahu'. Pain oro ca ara nucucun, je pain oro ca tomi' nucucun quem, quep xiho' cara jujun pain ta urut con pahu'.

Ca tomi' mi' xut con Iri' Jam quem cocon

3 Tomi' xim urut pahu' pain i ca' quem xere. Tomi' mi' xut con Iri' Jam me. Ma' ta na caparut pain ca pijim' pijim' tiquin' xut pain capiacion con Taramaxicon nexi'. Ma' ta mija mija tiquin' hap caca oro wari' co taraju nanain ma'. Tomi' querec te tatarain pain ca howa cacain quem. Win hwe pane. ²Tomi' mi' xut con, ma' ta to' witan ca' caparut cocon oro caxicon wari' co caracat tamana nana ma'. Xi howa howa pi' pin caca oro wari' ta. ³Ane om mixein capari' Taramaxicon nexi' ne. Tama' ara mi' napari' pain oro ca tomi' pe mi' capari' ca'. To' hwara' opa turuhu' pain iri' xumuhu'. Narain ho' turuhu' con Caxicon Jam quem. ⁴Taxi' urut con Taramaxicon nexi' pain ca quep xiho' cuhu' ma', pain ca mi' cuhu' pain ca tomi' ha' cara maparut pain ca pijim' nuxut pain ca hu urut pahu' pane. ⁵Tomi' mi' urut pahu' con, ma' ta mi' cuhu' pain ca querec pin' cara hun Iri' Jam pain ca om noc cuhu' ma', je pain ca querec pin' cara hun Cristo pain ca to' hwara' opa cuhu' pain xumuhu' ma' quem.

Ca taramaja xo' je tococwa oro wari' co howa nonon Jeju Cristo

⁶Tomi' mip xim urut pahu' pain i ca' quem xere. Wirico Taramaxicon nexi' Jeju Cristo co mi' napanarut pain ca tomi' mip ca' urut pahu' ca': To ni ca' jujun oro xerexi' co jam' curucucun ma', co om taramaja je na nana ma'. Om ca tomi' ha' cacain ca tomi' nucun Jeju Cristo ca an xin tiquin' mi' urut pahu' pane, pain ca tomi' ac i ca' napari' Jeju Cristo ta urut pahu' pane. ⁷Xi taxi' ara hwein i ca' ta, pain ca na e' ne pain ca an xiho' maparut pain ca xuruxut nuxut pane, pain ca taramaja tamana urut pane. Om ca jam' ne curuxut pain ca to ho' urut pahu' pane. ⁸Om ca wajim' e' urut pahu' pain carawa ca cao' wa quem. Taramaja tamana pan urut pane, pagar pagar ac urut pahu' pain na quem. Pain xec je pain xim quem, jam' tamana urut pain ca taramaja nuxut pane. Ma' ta om to' i'ina xut pahu' pain ca tama' wajim' xut pahu' pain carawa ca cao' wa ta urut pahu' pane. ⁹Hohot paxi' xira pain ca wajim' urut pahu' pain carawa ca cao' wa pane. Ane noc urut pain ta urut ne. Taramaja pan e' urut pane, ma' ta win caca

ne maparut ta urut pahu' pane. Na e' na pain ca an xiho' maparut pain ca taramaja nuxut quem. ¹⁰Je ca tomi' urut pahu' pain ca to ho' to ho' wet urut pahu' pane, hu ca' urut pahu' pane: Wari' co noc nain ca taramaja wa ma', om ta cao' ca quem, ac i ma' na ca hu urut pahu' pane.

¹¹Je ca xirao' mi' ac i ma' urut pahu' ca'. Xi taraju ara urut cocon oro win ma' hwe co jam' e' curucucun ma'. Noc nanain ca taramaja wa, to' i'ina e' nonon oro win ma' caca pain ca taramaja pan nucucun ta nanaparut co tomi' hwet nanaparut cocon. ¹²Tomi' mip urut cocon co ac i ma' nana ma' pahu'. Wirico Taramaxicon nexi' Jeju Cristo co mi' naparut pain ca hu ca' urut cocon ca': Na e' na pain ca taramaja xo' hwe. Mam' cut ac hwein tara carawa ca cao' wa je oro ca param hwe ma' quem. ¹³Wahu' quem xere, pain ca wara taramaja xo' hwe ma': Om ta jam' camain' ne curuhu' pain ca ara wa ca awi wa me ta. Ara cara jein ta.

¹⁴Mo ta ma' ca win ma' nuhu' co om tomi' ha' naparut pain ca hu urut con pain ca xirao' nuxut ca', pain ca taramaja xo' ra urut con ca', tomi' hwet jein wixicon pain ca cut in xujuhu' ma'. Om ac ne tara ca taxipa' hun ma', ma' ta wixipa' pin ca pain ca om taramaja xo' nucun. ¹⁵Ta noc hun me ta. Hu pan e' jun. Win ne ca xere xujuhu' ma'.

Ca pi' pin ne ca xirao' nucucun

¹⁶Tomi' mi' urut pahu' con Taramaxicon nexi' co mi' napari' pain ca om toron ne ximixi'. Wirico co mi' pan napari' pain. Mi' roron pain ca om toron ne ximicocon ma' urut con pahu'. Ma' paxi' tara oro ca ara nuhu' ma', pain ca to' i'ina cuhu' ma'. Je i ma' ira, mi' roron pain ca om toron ne ximicocon ta urut con Taramaxicon nexi' pahu'. Param urut con pain ca pe ho' pe ho' xam' cuhu' ta.

¹⁷Wata' pain ca Paulo ta' ca', xirao' pan inain wuxu pain tawirinain ca xirao' ne ca'. Je cwere pain oro ca xirao' ne ta. Xirao' taxipa' inain wuxu pain tawirinain oro ca xirao' ne, ma' ta querec pin' mahu' pain ca wata' pan ne co xirao' nain ca' inuhu'. Tomi' querec te inuhu' pain ca mam' pe wet xuhu' ca', pain ca xirao' mi' xuhu' pain wuxu ca'. Ac i ca' na ca xirao' ne ca'.

¹⁸Param urut con Taramaxicon nexi' Jeju Cristo pain ca quep xiho' quep xiho' xam' cuhu' ma', pain ca mi' e' cuhu' pain ca param nucun ta.

Je i ca' ca xirao' nuxut ca'.

1 Timóteo

Ca xirao' mi' cain' con Timóteo Paulo

1 Paulo ina pain ca xirao' mi' xim ca'. Wari' nucun Cristo Jeju ina, xi om ne ca apóstolo ra ara capa' pain ca tomi' hwet roron pain capija oro wari' capa' pane. Iri' Jam ma', co to' witan napari' ma', wirico co apóstolo nucun Panxita' ra napa' ca'. Cristo Jeju ma', co howa iri' pain ca winim' xun ca', pain ca aram aram in qui' ta' ca ma', wirico co mi' napa' pain ca taramaja ne ca'.

²Wata' co xirao' mi' nem cwa' Timóteo. Tomi' querec te tamana inem. Ac ca iri' panxita' xim na, xi om ne ca howa ara ma pain ca tomi' hwet xim con Cristo Jeju pane ta.

Param inon Cotere' Iri' Jam con Taramaxicon nexi' Cristo Jeju pain ca quep xihó' quequem pain ca mi' quequem pain ca param nucucun. Param inonon pain ca xiram pa' quequem, je pain ca mi' quequem pain ca om toron ne xumum quem.

Ca hu con cocon oro wari' co ca' na mixein nanain capijacon Iri' Jam

³Wara tomi' inem pane, tomi' mip inem pain ca mao tain qui' tain Macedônia pane. Mon to wet rain Éfeso ta inem pane. Ma' ta hu mip momon pain ca pijim' mahó' je ta momon co pijim' pan teretem nanain capijacon Iri' Jam ta inem pane. ⁴Pijim' mahó' jein oro ca pijim' ximama' wa ca pijim' caca oro hwanana ta roron inem cocon pane. Mam' pe wet ximama' mahó' jein oro wixicocon quem roron ta inem cocon pane. Pain ca pijim' ximama' tococwa oro hwanana, je pain ca mam' pe wet ximama' xine oro wixicocon ma' quem, je ca maqui' ne ca mana' caracan ximama' wa. Oro ca pijim' ximama' nucucun ma', om ca to' querec pin' camain' capari' con Iri' Jam pain ca to' witan xim capari' ca'. Xica' pe na ca howa nexi' ca' con, je ca to' querec pin' capari' pain ca to' witan xim capari' ca'.

⁵Je ca tomi' ac i ma' xim ca': Hu xo' roron co pijim' pan teretem nana ma'. Xumu xo' je, querec pin' jein carawa ca param mi' cuhu' Iri' Jam, howa iri'o' jein capijacon ca ca' na xihwe ta roron. Na ac ne tara pain ca

om noc xucucun, je pain ca om noc cocon Iri' Jam quem. ⁶Co pijim' pan teretem nana ma', an to pin nanain ca xumu xo' wa, an to pin nanain oro carawa ca awi ma', ca taxi' caca pain ca hohot con Iri' Jam. An to pin nanain ca howa iri'o' wa. Param e' nanain ca tomi' ximama' wa. ⁷Tomi' ca' nana: Hu e' xuxun oro win ma' nexi' cwa'. Ca' na e' xuxun pain oro ca tomi' nucun Iri' Jam ca tomi' ha' je tococwa oro wari' con Moisés pane. Xi taraju pa' pan cacain ta. Warut co taxi' ta paxi' nana. Ane om taraju pa' camain' cacain oro ca tomi' nucun Iri' Jam ca tomi' ha' je tococwa ma' ne.

⁸Oro ca tomi' nucun Iri' Jam ca tomi' ha' je capari' ca', mo ta taraju pa' xo' xin ca coromicat nucun pain ca hu capari' pain, awi na. Awi na oro ca tomi' nucun, taxi' iri'. ⁹Taxi' irin i ca' quem: Pain ca hu cocon oro wari' Iri' Jam ma', pain ca tomi' ha' je cocon ma', om ca em' hwe ta tococwa co xuruxut xo' nana, om na. Mo nana co em' hwe ta wawa ma': Co miri'om nanain oro ca tomi' nucun Iri' Jam. Co ari nonon. Co om howa nonon. Co caracat taxipa' nana. Co miri'om nanain oro caramaxicon Iri' Jam. Co om win xumu nanain oro ca param nucun quem. Co to' pa' pin nonon mana cote caca cacam waram jicocon. Co to' pa' pin nonon oro win ma' caca quem. ¹⁰Co quep nanam oro xequem narima', wiricacam oro narima' co quep xut nonon oro xucun tarama' ma' quem. Co quep tarama' xucucun, wiricacam co quep narima' xequequem quem. Co cut mama' nonon oro wari' pain ca vender tiquin' xun cocon ma' quem. Co tomi' mixein taxipa' nana ma', wiricoco co tomi' an pe mi' mixein nanain ca tomi' nucun pain ca ara xin cacain ma' quem. Oro wari' co ari nanain oro capijacon Iri' Jam ca pijim' iri' ca' quem. Oro wari' co ara ac i ma' nana ma', wiricoco co em' hwe ta wawa pain ca om tomi' ha' cacain oro ca tomi' nucun Iri' Jam ca tomi' ha' je capari' ca'. ¹¹Ca pijim' nexi' ca', maqui' nain capijacon Iri' Jam con Jeju cwa', pain ca to' witan xim capari' ca'. Iri' Jam ma', co in ac iri' cwa', co awi tamana cwa', wirico co an hwet mi' napari' pain ca pijim' nexi'. Pijim' rain ta napa' quem.

Ca querec te inon Iri' Jam pain ca xiram pa' capa' ta ca Paulo

¹²Tomi' querec te inon Jeju Cristo co Taramaxicon ne iri' cwa', pain ca quep xiho' capa' pain ca taramaja ne ca'. Tomi' querec te inon pain ca querec pin' capa' pain ca om taramaja nene ta' ca' quem. Je ca taramaja mi' ne ta capa' ca'. ¹³Tomi' xirac paxi' inon pain cara pane. Ja' tiquin'

inonon oro wari' co howa nonon pane. Quep em' tamana inonon pane quem, ac i ma' paxi' ina pain cara pane. Ane xiram pa' capa' Cristo Jeju ne. Om paxi' napa' xumu pane. Hohot tara ma' inain ca quep em' toton pane. Xi howa ton Jeju pain ca Panxica Iri' Jam ca pane ta. ¹⁴Om xi xiram pa' capa' Taramaxicon nexi' Cristo Jeju pane, xi iri' wari' ta' ta. Ane xiram pa' tamana pan capa' ne. Mi' e' napa' pain ca howa ton. Mi' e' napa' pain ca om noc ton, je pain ca om noc toton oro wari' co howa nonon ma' quem.

¹⁵Maqui' iri nain macan' Cristo Jeju pane ne, to' witan toton oro caracat ta ac ca na. Iri'o' na ca tomi' ne ca'. Na e' na pain ca howa howa pi' pin xin ca tomi' ne ca'. Wata' co iri' caracat ta. Om na xucun wari' co an xiho' napa' pain ca caracat ne ta. ¹⁶Caracat ac i ma' paxi' ina pane. Ane xiram pa' pan capa' Cristo Jeju ne. Ma' ta querec pin' cacapa' oro wari' pain ca an hwet mi' toton pain ca tomi' pan hot tamana ne ca', je pain ca winim' toton pain ca howa cacapa' ta nonon. Tomi' pan hot tamana ara xi' napa' pain ca winim' capa' pain ca howa ton pane quem. Tomi' ca' nonon oro wari' co howa xun nonon pa'ao': Win ton Paulo pane nonon. Caracat tiquin' ca' paxi' nuhu' pane, ane tomi' pan hot tamana ton pain ca winim' ton pain ca howa xim capa' pane nonon. ¹⁷Je ca na e' ne pain ca tomi' querec te tamana cara xun Iri' Jam ta. Xica' pe na Iri' Jam co taramaxicon cara. Om ca mi' pin ra ha' ca. Om ca querec tocwa quem. Na e' na pain ca in ac cara xun ta. Na e' na pain ca querec pin' cara xun pain ca awi tamana nucun ta. Amém, iri'o' na ca tomi' ne ta.

¹⁸Ac ca panxita' xim na Timóteo, je ca tomi' xim pain ca hu xim ca' pain ca xirao' mi' xim ca' arain. Win ne ca wara tomi' pe quequem xerexi' co pijim' nanain capiijacon Iri' Jam pane, pain ca tomi' xo' quequem pain ca taramaja nem pane. Tama' mam' pe wet rain ca tomi' quequem pane. Ma' ta ara xo' main ca taramaja nem. Ma' ta hwara' opa ma pain ca tomi' in pin momon co pijim' pan teretem nanain capiijacon Iri' Jam ma'. ¹⁹Howa cara rain capiijacon Iri' Jam ca iri'o'. Ara e' rain oro ca awi wa ma', ca taxi' ma pain ca hohot con Iri' Jam ma'. Ma' ara xi' nana co an to pin nanain ca param nucun Iri' Jam. Taxi' paxi' xucucun pain ca om hohot con Iri' Jam oro ca ara caca ma'. Ane opain pin ne ximicocon ne. Je ca an to pin cacain ca howa wa. ²⁰Ma' nana oro win ma' caca ma', Himeneu con Alexandre ma', an to pin nanain ca howa wa. Je ca an to mi' toton con Caxicon Jam ma'. Ma' ta quep xirac tococwa, ma' ta wap tococwa, ma' ta ma' pin ne

ximicocon, ma' ta tomi' napat tomi' napat om pin cocon Iri' Jam pain ca pijim' pan teretem nucucun ta inonon.

Ca hu tococwa pain ca in ac cocon Iri' Jam

2 Tomi' mip inem pain i ca' quem: Hu iri roron co howa nana pain ca cut in xujuhu' ma' ne, na e' na pain ca tomi' cain' ca' momon: Tomi' mi' xuxun con Iri' Jam oro wari' ta roron. Quep xiho' roron, mi' roron pain oro carawa ca om nonon, ca' xun cocon. Tomi' querec te xun pain oro carawa ca ara mi' capari', ac i ma' tara ca hu momon ta. ²Tomi' mi' xuxun con Iri' Jam oro taramaxicon cocon oro xucucun wari' co querec wet nanapari' quem. Ma' ta om to' i'ina capari' oro ca to ho' xijexi' ca'. Na ac capari' tara pain ca xuruxut xo' iri' pain ca ara xin oro carawa ca hohot non Iri' Jam, ac i ma' tara ca hu momon ma'. ³Awi na pain ca tomi' ac i ma' xun Iri' Jam co to' witan napari'. Hohot non ta. ⁴Param param xam' napari' pain ca witan wa Iri' Jam, wiricoco oro wari' pain oro xijein macan' ma' quem, param param xam' napari' pain ca witan wa. Param napari' pain ca taraju pa' xin capijacon ca iri'o'. ⁵Xi ma' xica' pe ara ca Iri' Jam ta. Ma' xica' pe na co to' wixicam pin napari' con, pain ca to' hohot capari' con. Wirico Cristo Jeju co wari' pin ma', wirico co to' wixicam napari' con. ⁶Om ca narain ho' xucun pari'. To' pa' pin ma' tatarapa' ne na pane. Ma' ta to' witan ca' toton pain ca caracat nucucun ta napari'. Maqui' iri na xec nein ca wara coromicat an pe xo' ca Cote ca pane ne, je i ma' xec nein ca to' querec pin' capari' pain ca to' witan xuhu' ta capari' ca'. ⁷Je ca wari' ne capa' pain ca apóstolo ra capa' pane. Pijim' hwet mi' roron pain capija oro wari' co om judeu nana ta napa' pane. Je ca na e' ne pain ca pijim' hwet toton pain capijacon Iri' Jam. Na e' na pain ca ca' na toton pain capijacon ca iri'o' con Jeju ta. Om ca mixein ta', tomi' iri'o' ina ta.

⁸Je ca tomi' toton co tomi' xun nonon Iri' Jam. Tomi' xun iri nonon pain oro ca cut in nucucun ma' ne, na e' na pain ca xumu xo' caca pain ca tomi' xun cocon ma'. Na e' na pain ca hohot cocon Iri' Jam ca xuruxut nucucun. Om ca na ne pain ca mana' caca pain ca tomi' cocon Iri' Jam. Om ca na ne pain ca tomi' caracan xucucun pain quem.

⁹Tomi' inanam oro narima' pain ca ma' ne ximicacam quem. Om ta mam' xec xec cocon oro wom co to cacama ma'. Ma' tara ximicacam pain tenenequequem ma' quem. Om ta pan xic xirac cacamain. Om ta

an warawa pan xequequem pain ouro, je pain oro wijimain pacun ca awi tamana ma' quem, ca pérola caca oro wari' ma'. Om ta mi' hwara' cacamain dinheiro pain ca cut cocon oro womiacam co to xi' cacama ma'. ¹⁰Na e' na pain ca mam' to' awi e' xequequem pain oro carawa ca ara pan cacama pain ca quep xiho' cocon oro win ma' cacama ma'. Je ca hohot ne cacam oro narima' co howa urun Iri' Jam ta nana ma'.

¹¹Na e' na pain ca tacana to cacama oro narima' pain ca ca' na tacacama pain capijacon Iri' Jam ta. Taraju e' tatará, tomi' ha' totoron co pijim' nana ma'. ¹²Oro narima' ma', om ca na ne pain ca ca' na pan cocon pain capijacon Iri' Jam tarama' pain ca cut in wa ma'. Om ca na ne pain ca taramaxicon to ho' cocon quem, om na. Tacana to e' tatará. Na e' na pain ca taraju e' cacama pain ca ca' na xine capijacon Iri' Jam. ¹³Xi quep cain' ara con Adão Iri' Jam pane, pain ca quep qui' cacam pane ta. Quep cain' non Adão, quep ac cam pa'ao' na Eva. ¹⁴Om ca Adão ca co tomi' mixein ca Caxicon Jam pane. Wiricam Eva co tomi' mixein wa pane. Tomi' mixein iri ta ne, caracat pan ac cama na pain ca ara camain carawa ca tomi' caho' cam Iri' Jam ira. ¹⁵Ara ac i ma' paxi' na Eva pane, ane quep xiho' tam cacam oro narima' Iri' Jam ne. Ara xi' iri tatarain oro ca taramaja nequequem pain ca narima' cacama ma' ne, je pain ca wijima cacama ma', je pain ca querec wet cacam humaxiacam ma' quem, to' witan ca' ac tacacama tara pain ca tomi' mixein mami' cacam Caxicon Jam. Ane na e' ne pain ca howa cara cocon Iri' Jam ne. Na e' na pain ca tomi' querec te cara cacam oro win ma' cacama, je pain ca xuruxut xo' cara cacama pain ca ara cacamain oro ca hohot non Iri' Jam ma', je pain ca ma' ne ximicacam quem.

**Wari' co querec wet nonon co howa nonon Jeju,
wiricoco wari' co diácono nana quem**

3 Wari' co querec wet xitoton na nonon co howa nana ma', awi tamana na ca taramaja nucun ca param ca ma'. Iri'o' na ca tomi' ne ca'. ²Je ca tomi' xim ca': Wari' co querec wet nonon co howa nana ma', om ca na camain' ne pain ca hwet ne wixicon pain ca caracat wa. Xica' pe tara manacon. Ma' tara ximicon pain ca om ara e' cain ca param pan nucun. Coromicat xo' tara. Xut xo' tara. Tomi' querec te totoron oro wari' co hwet nonon pain xiricon. Ca' na taxi' totoron pain capijacon Iri' Jam co

howa nana ma'. ³Om ta toc tamanain pe cain caji tocwa ca mana'. Om ta to' xitoton na cocon co tomi' taparam' nonon ma'. Ara xite e' totron oro wari'. Om ta tomi' mana' ximao cocon quem. Om ta tama' param cain dinheiro. ⁴Querec wet xo' taxi' tataram mana panxica cam jicacam mana panxica. Hu taxi' tataram quem. Ma' ta tomi' ha' pan cocon. Ma' pan tara ximicacam, om ta tomi' ximama' cacama. ⁵Mo ta om querec wet xo' taxi' cacam mana panxica cam jicacam mana panxica ma', cain' xi querec wet xo' taxi' ac cacam co howa nonon Iri' Jam quem? ⁶Om ca na ne pain ca querec wet ca wari' co xo' howa non Jeju quem. Mo ta querec wet ca wari' co xo' howa ma', am xec xec ta' ca, am tomi' mi' ton con pain ca wap wa Iri' Jam quem. Win ca Caxicon Jam pain ca tomi' mi' qui' tocwa pain ca wap wa pain ca xec xec nucun pain cara pane. ⁷I ca' quem, wari' co querec wet nonon co howa nana ma', na e' na pain ca querec pin' tocwa pain ca xut xo' nucun. Na e' na pain ca awi na co ma' awi na co ma' ta cocon oro wari' co om howa nonon Jeju. Ma' ta om tomi' napat tocwa, ma' ta om tomi' querec pan con pain ca caracat wa Caxicon Jam ma', ma' ta om pan' mao ca con quem.

⁸Ac i ma' tataro oro diácono co quep xiho' nonon co howa nana ma' quem. Na e' na pain ca querec pin' tococwa pain ca xuruxut xo' nucucun. Om ta tomi' capijacocon e' caca. Om ta toc tamanain to cacain comi uva ca mana'. Om ta tama' param cacain dinheiro. ⁹Howa iri'o' tatarain capijacon Iri' Jam ca an hwet mi' capari' ca'. Om ta tara ta'a camain' cacain. Na e' na pain ca xuruxut xo' caca pain ca tomi' ha' iri'o' cacain quem. ¹⁰Na e' na pain ca querec pin' cain' tococwa pain ca xuruxut xo' nucucun. Mo ta om mam' xine carawa ca to' i'ina nonon, hohot ac ne tara pain ca ara cacain ca taramaja nucucun oro diácono.

¹¹Ac i ma' tataro ca narima' nequequem quem. Na e' na pain ca querec pin' tacacama pain ca xuruxut xo' nequequem. Om ta tomi' em' cacam oro win narima' cacama. Ma' tara ximicacam pain ca om ara e' cacamain ca param pan nequequem. Om ta mixein camain' cacama.

¹²Wari' co diácono ma', xica' pe tara manacon. Querec wet xo' taxi' tataram mana panxica cam jicacam mana panxica. Hu xo' taxi' tataram quem. ¹³Oro diácono co ara xo' nanain ca taramaja nucucun ma', querec

3.11 Am tomi' tacacama oro narima' co quep xiho' nonon co howa nonon Iri' Jam ma'. Am tomi' tacacama manacocon oro diácono ma' quem. Om ca taraju pa' xo' xine ca xirao' nucun Paulo pain i ca'.

pin' ac tococwa tara pain ca querec pin' tococwa pain ca taramaja xo' nucucun. Ha' ac cocon tara pain ca om tomi' hwet jin' cacain ca howa nucucun pain ca howa cocon Cristo Jeju quem.

^{14–15}Hwet ho' xim paxi' inem. Tara pata' ta'a, am om om ta'. Om ca taxi' xije. Je ca xirao' mi' xim pain carta pain xocori ca'. Ma' ta wara taxi' main ca param mi' capari' Cotere' Iri' Jam co e' cara ma'. Xuruxut xo' je napari' pain ca mana panxita' capari' ca'. Ca xuruxut xo' nexi' ca', pain ca cut in xijexi' pain ca howa xun ca', je ca mam' to' hwara' opa xin capijacon Iri' Jam ca iri'o'. ¹⁶Iri' Jam ma', om ca an hwet querec cain ca coromicat an pe xo' nucun ca howa iri' con Cristo Jeju pane. Pain xocori ca' iri na ne, an hwet mi' napari' con. Ca' napari' con:

Wari' pin na Cristo.

An hwet mi' napari' pain ca awi nucun Tamataracon Iri' Jam.

Querec nonon oro jam co taramaja mi' nonon Cote ca.

Pijim' hwet ac tocwa na cocon oro wari' co om judeu nana.

Mija nana oro wari' co howa nonon pain oro xijein macan'.

Piri' in hwet ac con na Cote ca pain pawin.

Ac i ma' na tamara' ca com mi' xun ca'.

Co om pijim' xo' nanain capijacon Iri' Jam

4 Tomi' xo' ca' napari' Tamataracon Iri' Jam: Wixicam pin iri tara xec nein ca in qui' ta' nucun Cristo Jeju ma' ne, ma' ac caca tara oro wari' co an to pin nanain capijacon Iri' Jam ca pijim' iri' ca'. Howa howa om pin tatarain. Howa pin ac cacain tara ca pijim' nucucun oro wari' co taraju wet e' nonon oro caxicon jam co mixein nana ma'. Ac i ma' na ca tomi' capari' Tamataracon Iri' Jam. Tomi' xo' napari' pain. ²Mixein nana co pijim' ac i ma' nana ta. Ac ca iri'o' xi' ca' tara me nana. Om ca ha' mami' cacain Tamataracon Iri' Jam pain ca caracat hwe nonon ma'. Xi querec pin' mami' cacain ca mixein wa ta. Iri'o' tara ma' nanain. Om pin na ximicocon. ³Pijim' ca' nana: Ta cut hwem narima' nanapari' pain ca tarama' nexi' ca', ta cut hun tarama' nanam pain ca narima' nequequem ma' quem nana. Ma' na carawa ca tomi' caho' capari' Iri' Jam ma', ta cao' hwein me ta napari' ma' nana. Cain' cain' xirara quem? Tomi' ma' mi' ara xi' napari' pain oro carawa Iri' Jam. Ma' ta cao' hwein ta napari'. Wari' pain ca howa xun Cristo ca', taxi' irin capijacon ca iri'o'. Mi' napari' pain

carawa ca cao' wa. Mo ta tomi' mam' xun pain ca tomi' querec te urut pum pain ca mi' maparut pain carawa ca cao' wa ca' Te Iri' Jam xut, hohot ac ne na pain ca cao' xin ta. ⁴Xi awi ara ne oro carawa ca tomi' ma' pin ca Iri' Jam ta. Om ca na ne pain ca noc inain ta xin. Mo ta tomi' mam' xun pain ca tomi' querec te urut pum pain ca mi' maparut pain carawa ca cao' wa ca' Te Iri' Jam xun, hohot ac ne na pain ca cao' xin ta. ⁵Xi to' hohot ara cain Iri' Jam ta. Win ne ca awi na ta cain oro carawa pain cara pane, pain ca xo' tomi' ma' pin qui' cain pane. To' hohot nain ca tomi' nexi' pain ca tomi' mam' xun ca', pain ca tomi' querec te urut pum pain ca mi' maparut pain carawa ca cao' wa ca' xun ca'.

Ca xut xo' ra pain ca ara main ca taramaja nem ta con Timóteo Paulo

⁶Mo ta tomi' hwet main oro ca xirao' mi' xim ca', mo ta tomi' hwet momon pain xerexi' ma'. Mo ta to' hwara' opa xijem pain ca noro tamana main capijacon Iri' Jam ca iri'o' ca'. Mo ta to' hwara' opa xijem pain capijacon Iri' Jam ca pijim' iri' ca', ca wara howa ma ma', ara xo' ac main tara ca taramaja nem pain ca taramaja mi' mon Cristo Jeju. ⁷Je ca tomi' xim ca': Ta taraju wet main oro ca pijim' ximama' wa ca om maqui' nain capijacon Iri' Jam me. Noc rain. Xi quep xiho' capari' ta. Tama' to' hwara' opa xijem pain ca xut xo' ma pain ca win xumu e' main ca param nucun Iri' Jam ta. ⁸Quep xiho' paxi' napari' ca to' hwara' opa xijexi' pain cwerexi' ca'. Ane quep xiho' tamana pan capari' ca to' hwara' opa xijexi' pain ximixi' pain tamataraxi' ne, pain ca win xumu e' xin ca param nucun Iri' Jam. Quep xiho' napari' pain ca e' e' wet nexi' pain macan' ca', quep xiho' tarapari' pain ca e' cara xi' pain pawin cain quem. Je ca tomi' pe capari' ca'.

⁹Iri'o' na ca tomi' ne ca'. Na e' na pain ca howa howa pi' pin xin ta. ¹⁰Je ca taramaja tamana iri' ca'. Xi howa ara xun Iri' Jam co e' cara ma', co to' witan ton nonon oro wari' ma'. Iri' Jam ma', pain ca howa xun ca', param tamana napari' pain ca witan wa.

¹¹Ca' na roron pain oro ca xirao' ne oro xerexi' ma'. Hu mip roron pain ca tomi' ha' jein ta momon ta. ¹²Xo' hwara' paxi' ma. Ane om na ne pain ca tomi' napat quequem co howa nana ma' ne. Om ca na ne pain ca tomi' napat quequem pain ca xo' hwara' nem ma'. Na e' na pain ca win ca ne quequem pain ca querec pin' quequem pain ca tomi' xo' nem ma', je

pain ca xut xo' nem ma' quem. Na e' na pain ca win ca ne quequem pain ca om noc momon oro wari', je pain ca howa mon Iri' Jam ma', je pain ca miri'om main oro ca caracat wa ma' quem. ¹³Noro mi' roron pain ca xirao' pe xine capijacon Iri' Jam pain ca cut in xujuhu' ma'. Hu mi' roron pain, ca' na xo' roron pain, ma' ta taraju pa' cacain. Aram aram hwet ac xim tara pain ca pe ma ma'. ¹⁴Ta miri'om main ca taramaja nem ca mi' quem Tamataracon Iri' Jam pain ca quep qui' quequem pain winam xerexi' co querec wet nonon co howa nana pane. Quep iri nenem pain winam ne, wara tomi' pe ac quequem na pain ca taramaja nem co pijim' nanain capijacon Iri' Jam pane.

¹⁵Tama' ara cara rain ca taramaja nem ca xirao' mi' xim ca'. Win xumu rain. Ma' ta querec pin' quequem oro xerexi' pain ca taxi' taxi' tiquin' main ca pijim' wa pain ca ca' na wa capijacon Iri' Jam. ¹⁶Ma' tara xumum me, ara xite xijem pain ca xut xo' ma ma', je pain ca pijim' main capijacon Iri' Jam ma'. Mo ta win xumu main ca taramaja nem ca ara ra xim ca', om ta xica' pe ma pain ca witan ma ma'. Witan tatara oro wari' co taraju nenem ma' quem.

**Ca tomi' xo' con Timóteo Paulo ma', cocon
co howa nana co querec wet ca ma'**

5 Mo ta ma' cocon carawa ca to' i'ina nonon co howa nana co querec wet ma ma', tomi' xo' ac momon tara pain ca hu toton momon ma'. Ac ca te momon tara pain ca tomi' xo' momon ma'. Tomi' wixite roron co xo' horon nana ma' quem. Ac ca xere momon tara. ²Tomi' xo' raram oro mon horon ma' quem. Ac ca na' mamam tara. Tomi' wixite raram oro mon xojam' ma' quem, ac ca xere mamam tara. Xumu xo' ra cacam. Om ta coromicat ximao camain' ma cacam ta.

³Querec wet xo' raram oro narima' co cono' ca' nanam waram taxicacam ma', wiricacam co om nana ca nari nequequem co querec wet nanam ma'. Na e' na pain ca quep xiho' tacacama pain ca mi' tacacama pain carawa ca om nanam ta. ⁴Mo ta ma' cacama humaxicacam cacam waram winacacam ma', wiricacam pan tatara co querec wet nanam. An hwet tatarain ca howa nequequem pain ca tomi' ha' cocon Iri' Jam ma', pain ca querec wet taxi' cain' cacam oro ca nari nequequem ma'. Je ca hohot con Iri' Jam ta. Querec wet iri tataram waram jicacam cacam mana copa' cacama cacam

mana cojeo' cacama ne, ac ca pagar in hwet cacam na pain ca wara querec wet pan tacacama pain ca hwijima' nequequem pane. ⁵Narima' co mi' pin ca' nam taxicam ma', co om ma' camain' ca nari nequem co querec wet nam ma', howa non Iri' Jam pain ca xiram pa' cam ma'. Winim' non pain ca mi' cam pain carawa ca om nam. Tomi' taxipa' non pain xec je pain xim quem. Xiram pa' ne ta Te Iri' Jam, mi' ne pain carawa ca om napa' ca' non. ⁶Narima' co mi' pin ca' nam taxicam ma' iri na ne, co win xumu e' nain carawa ca param cama ma', ca mam' querec te cama ma', ac ca mi' pin cama na. E' paxi' na cwerequem. Ac ca mi' pin ne na ximicam pain ca coromicat nequem. ⁷Hu mip ac i ma' raram oro xerexi' ma', ma' ta om hwet ne wixicacam pain ca caracat wa. ⁸Wari' co miri'om nanam oro ca nari nucun ma', co om querec wet xo' camain' nanam mana panxica cam jicon con cote ca ma', ac ca an pe pin cain na capijacon Iri' Jam ca howa iri' ca'. Pan tem tiquin' ca' non wari' co om howa camain' non Cristo Jeju.

⁹Tomi' ho' xim cacam oro narima' co cono' ca' nanam waram taxicacam ma', co quep xiho' xi' wawa ma'. Narima' co tiquin' ca' nain ca 60 pin ne cawaxi' nequem ma', hohot ac ne tara pain ca quep xiho' wi tacama cacam oro xequem narima' co wara cono' ca' nanam taxicacam. Mo ta quep xiho' xim tacama, na e' na pain ca ma' xica' pe ca taxicam pain ca e' e' wet nucun pane. ¹⁰Hohot e' na pain ca quep xiho' tacama narima' co wara querec pin' wa pain ca ara taxipa' camain oro ca awi wa pane. Mo na: Co wara querec wet querec wet horon pin nanam humaxicam pane. Co querec te taxipa' nonon co howa nana co maqui' nanain xijein xirim pane, co cao' to ho' xine, pi'am to jein xuru ca' nonon pane. Co xiram pa' taxipa' nonon co howa nana pain ca ara mi' e' cocon pain oro carawa ca param caca pane quem. Co quep xiho' taxipa' nonon oro wari' co i'ina nonon oro carawa pane quem. Co win xumu taxipa' nain oro ca xiram pa' wa pain ca ara mi' cocon pain oro ca awi wa co howa nana pane quem. Mo ta xut xo' ac i ma' cama pain ca e' e' wet qui' ca taxicam pane, hohot ac ne tara pain ca quep xiho' tacama pain xocori ca'.

¹¹Co xo' horon nana ma' iri na ne, co om hwet querec nanain ca 60 ne cawaxi' nequequem ma', om ta quep xiho' wi tacacama cacam oro mon horon ma'. Xi maqui' ta' ara ne xec nein ca cut mami' xi' cacama tarama'. An to ac cacamain tara ca wara tomi' pe nequequem pain ca win xumu xun Cristo ta cacama pane. ¹²Em' pin ac cacama tara pain ca an to pin cacamain ca wara tomi' an pe mi' cocon pain ca tomi' nequequem. ¹³Je

ca tomi' xim ca': Mo ta quep xihó' wi tacacama cacam oro mon horon ma', jam' taxpá' ac ne tara cwerequequem. Corom corom ac cacamain tara xiricocon oro win ma' cacama, tomi' ximama' ac cacama tara pain ca tomi' xina cacamain waracocon oro xucucun wari' ma', pain ca querec wet e' cacamain caramaxicocon ma', pain ca om querec wet pan cacamain caramaxicacam ma' quem. ¹⁴ Je ca tomi' xim ca': Oro narima' co cono' ca' nanam waram taxicacam pain ca xo' horon xo' horon wet nequequem ma', na e' na pain ca cut cocon xucun tarama'. Wijima ac cacama tara, querec wet ac cacamain tara xiricacam. Om ac ne tara ca hwet ne wixicacam cocon oro wari' co noc nonon Iri' Jam ma'. ¹⁵ Ma' ara xi' nana co an to pin nonon Iri' Jam. Howa ni ac cacama na, ja' ja' pin ac cocon na Caxicon Jam quem.

¹⁶ Oro narima' co howa nonon Cristo Jeju ma', mo ta ma' cacama ca nari nequequem co cono' ca' nanam waram taxicacam ma', na e' na pain ca querec wet pan cacam. Om ta na ne pain ca to' i'ina cacam co howa nana pain ca xiram pa' xut me cacam ma'. Ma' ta quep xihó' pan tacacama co om nanam ca nari nequequem co querec wet nanam ta.

¹⁷ Wari' co querec wet nonon co howa nana ma', mo ta taramaja xo' caca pain ca querec wet cocon ma', na e' na pain ca querec pin' tococwa, je pain ca quep xihó' tococwa quem. Co win xumu tamana nanain ca taramaja nucucun pain ca pijim' cacain capijacon Iri' Jam ma', pain ca hu cocon co howa nana ma', wiricoco tatara co querec pin' tamana wawa ma'. Wiricoco tatara co quep xihó' wawa ta. ¹⁸ Win ne ca xirao' pe xine capijacon Iri' Jam pane: Ta tucu main capijain boi pain ca xom xom nein trigo me, ma' ta cao' ne pain ca taramaja nein ma', ac i ma' na ca xirao' pe nein. Ma' na xijein ca xirao' pe nein quem. Ca' na: Wari' co taramaja ma', na e' na pain ca pagar tocwa pain ca taramaja nucun, ac i ma' na ca xirao' pe nein ma'. Je ca tomi' xim ca': Wari' co pijim' mi' nonon pain capijacon Iri' Jam co howa nana ma', na e' na pain ca quep xihó' tococwa ta.

¹⁹ Mo ta tomi' em' tocwa pain ca caracat wa wari' co querec wet nonon co howa nana ma', mo ta ma' xica' pe ca co tomi' em' non ma', co querec inon pain ca caracat ca ta non ma'. Ta howa hap mon me. Mo ta ma' 2 caca, mo ta ma' 3 caca co querec urut con pain ca caracat ca ma' cocon ma', howa ac momon tara. ²⁰ Mo ta iri'o' ne pain ca caracat ca ma', na e' na pain ca tomi' mon pain taraxicon. Taraju tatara co howa nonon Jeju

pain ca cut in xujuhu' ma', taraju tatara pain ca tomi' mon pain taraxicon. Ma' ta jin' caca, ma' ta om win ca ne cocon ma'.

²¹ Je ca tomi' xim ca': Tomi' ha' ne pain oro ca hu xim pain ca xirao' ne ca'. Pain oro carawa ca ara ma ma', pain ca tomi' main taraxicocon co querec wet nonon co howa nana ma', ta xiram pa' paxica' momon me ta. Om ca na camain' ne pain ca tomi' querec te paxica' momon. Tomi' mip inem ta. Taraju na Iri' Jam con Cristo Jeju cocon oro jam co tora' ca ma', pain ca taramaja mi' xine cocon ma', taraju nanapa' pain ca tomi' mip xim ca'. ²² Mo ta ma' ca wari' co querec pin' paxi' ma ma', pain ca hohot ne pain ca querec wet cocon oro co howa nana ma', ta quep hap main winacon pain ca tomi' xo' mon pain ca taramaja nucun me. Querec pin' cain' ron pain ca xut xo' nucun. Mo ta tomi' xo' mon pain ca taramaja wa pain ca ma' con ca caracat wa ma', ac ca caracat wi ma con tara. Ma' tara xumum me. Pe ni ca' rain oro ca caracat wa me. Om ca na camain' ne pain ca hwet ne wuxum ta.

²³ Tomi' xim inem pain i ca' quem. Ta toc e' ma com me ta. Toc wijimain ra comi uva ca mana'. Xi om ne ca caxi ho' caxi ho' ara ne pemenem pain xumum ma'.

²⁴ Je ca tomi' xim cocon wari' co quep tain main winacocon pain ca taramaja nucucun ma', tomi' querec ac tococwa tara. Ma' tara xumum me, ta quep hap main winacocon me. Ma' ara xi' nana wari' co wara querec pin' wawa pain ca caracat nucucun ma'. Wara querec pin' tata pain ca om tomi' xo' querec tococwa pain carawa ca ara caca ma'. Oro xucucun iri nana ne, om ca querec pin' hap tococwa pain ca caracat nucucun ma'. Joc xim nanain. Ame ma e', main taxi' ac tococwa tara pain ca tomi' xo' xun tococwa pain carawa ca ara caca ma'. ²⁵ Ac i ma' nana oro wari' co ara nanain ca awi wa quem. Ma' nana co wara querec pin' wawa pain carawa ca awi ca ara caca ma'. Oro xucucun iri nana ne, om ca querec pin' hap tococwa pain carawa ca awi ca ara caca ma'. Ame ma e', main taxi' ac tococwa tara pain carawa ca awi ca ara caca. Om ta joc xim ac cacain ta.

Ca tomi' xo' con cocon co taramaja mi' e' nonon taramaxicon nucucun

6 Tomi' xo' ho' inonon xerexi' co taramaja mi' e' nonon taramaxicon nucucun ma'. Na e' na pain ca querec pin' cocon pain ca taramaxicon nucucun. Tomi' ha' totoron quem. Ma' ta om tomi' xirac cocon Iri' Jam oro

wari'. Ma' ta om tomi' xirac cacain capijacon Iri' Jam ca ca' na iri' quem. ²Mo ta howa cocon Cristo Jeju taramaxicon nucucun co taramaja mi' caca ma', om ca na ne pain ca tomi' ximama' ca' cocon quem: Om na, ac ca aji' ton na, xi howa howa pi' pin ara iri' ta, hohot na pain ca om taramaja hap ta' ca', om ta mana' capa' ta. Om ta tomi' ximama' ac i ma' camain' caca ta. Taramaja xo' pan xi' tatara. Xi howa pan ara caca taramaxicon nucucun co quep xihó' caca pain ca taramaja mi' e' cocon ta. Om ca noc cocon quem. Tomi' xo' ac i ma' roron. Tomi' ha' xine pain roron quem.

Ca na e' ne pain ca hohot pan capari' oro ca ma' napari'

³Ma' nana wari' co pijim' ni ca' nanain capijacon Iri' Jam ma'. Om ca xin ne cacain ca pijim' xo' nucun Taramaxicon nexi' Jeju Cristo. Om ca howa cacain ca pijim' nucun ca ca' na napari' pain ca xuruxut xo' wa pain ca ara e' xine ca param nucun Iri' Jam quem. ⁴Wari' co pijim' ac i ma' nana ma', xec xec nana. Om ca taraju pa' camain' caca. Ac ca ma' cocon na nan pain ximicocon pain ca param e' cacain ca tomi' caracan wa pain ca om taraju pa' xo' xine ca tomi' nucucun oro wari'. Oro wari' co taraju nonon pain ca pijim' nucucun ma', aram aram noc mi' ac xucucun na pain oro carawa. Mana' caracan ac xucucun na, tomi' napat ac xucucun na, coromicat mi' ac xucucun na pain oro ca om awi wa. ⁵Tama' teretem caracan ac xucucun na, xi em' pin ara ne ca coromicat nucucun ta. Om ca coromicat xo' taxi' mami' caca. Om ca taraju pa' mami' ac cacain capijacon Iri' Jam ca iri'o'. Coromicat ca' nana: Pain ca ac ca xut xo' ta' ca', pain ca pijim' ta' ca', caramaju tamana ac ta' tara ta na ca coromicat pan teretem nucucun.

⁶Mo ta xuruxut xo' iri' pain ca win xumu e' xin ca param nucun Iri' Jam ca', ac ca caramaju iri' na. Iri'o' na ta. Mo ta hohot capari' carawa ca mi' capari' Iri' Jam ca', mo ta om jain jain ximama' xin oro carawa ma' quem, je i ma' tara ca caramaju tamana qui' iri' con Iri' Jam. ⁷Xi wara ma' capari' carawa pain ca xo' camara' iri' pane. Om ta cut mama' xin caramajixi' pain ca aram aram cono' xi' iri' quem. ⁸Je ca tomi' xim ca': Mo ta ma' e' capari' carawa ca cao' wa, mo ta ma' e' capari' wom co to' iri' quem, na e' na pain ca hohot na ta iri' ta. ⁹Oro wari' co caramaju tamana xixi' na nana ma', caracac ac caca na pain ca tomi' querec tococwa pain oro ca om awi wa. Ac ca quep cocon na oro carawa ca param ximama'

caca ma'. To' ara nonon, to' i'ina nonon, aram aram to' om pin ac cocon na quem. ¹⁰Param tamana iri irin dinheiro ne, je ca maqui' ne oro ca om awi wa ma'. Ma' nana wari' co param tamana nanain dinheiro pane, howa howa om pin ac cocon na Cristo Jeju. To' ara pan ac xucucun na pain oro carawa ca param caca ma'. Mija na ca jain jain caca pane ta.

Ca hu con Timóteo Paulo

¹¹Ac i ma' nana oro wari' co param ximama' nanain dinheiro. Wum iri na ne, wari' nucun Iri' Jam ma. Mo ca' rain oro ca ara nucucun co om awi camain' nana. Win xumu e' rain carawa ca hohot non Iri' Jam. Xut xo' ra pain ca win xumu e' main ca param nucun quem. Howa cara ron Cristo Jeju. Tomi' querec te cara roron oro wari'. Quereme rain oro ca to' i'ina nem. Tomi' wixite roron oro wari'. ¹²Pain ca howa cara mon Cristo Jeju ma', ma' mija tara oro ca to' i'ina nem ma'. Je i ma' ira, na e' na pain ca momon hwara' opa tiquin' ca' main ta. Querec pin' ron Iri' Jam pain ca pe ho' cara ne ta quem, pain ca mi' xim pain ca om pi' ra ha' ne ca e' wa ta quem. Wara tomi' pe ara xi' nem pain ca e' cara wa pain ca xo' tora' qui' quem pane ta. Mija nana wari' co taraju nenem pain ca tomi' hwet main ca howa nem pane quem.

¹³Je ca tomi' xim ca', tomi' mip inem. Taraju napa' Iri' Jam co to' e' nain oro carawa ma', co to' e' napari' quem. Taraju napa' Cristo Jeju co om tomi' jin' non taramaxicon Pôncio Pilatos pain ca tomi' hwet con pain ca Taramaxicon ina con pane quem. Taraju nanapa' pain ca tomi' mip xim ca': ¹⁴Tomi' ha' rain oro ca tomi' ha' ra quem Iri' Jam ta. Ac ca querec wet main tara capijacon, ma' ta om to' jimao pin cacain co pijim' pan teretem nanain ma'. Ma' ta om tomi' napat xine quem. Querec wet cara rain. Aram aram in hwet ac capari' tara Taramaxicon nexi' Jeju Cristo. ¹⁵Maqui' iri tara xec nucun Iri' Jam pain ca in mao rain macan' ton con Panxica ne, in qui' ac ca tara. Wirico Iri' Jam co awi tamana cwa', co in ac iri' cwa'. Xica' pe na Iri' Jam co taramaxicon hwara' opa. Wirico co tomi' ha' xine nonon oro taramaxicon. ¹⁶Xica' pe na Iri' Jam co om mi' pin ra ha' ma'. Pe ho' nain naran ca toc meremem tamana. Je ca om xut hwet ac tocwa. Om na wari' co querec non. Om ca querec ac tocwa quem. Na e' na pain ca querec pin' xun pain ca awi cara nucun ma', je pain ca hwara' opa cara nucun ma' quem. Amém, iri'o' na ca tomi' ne ta.

¹⁷Hu mip roron co howa nana ma', co caramaju nana pain macan' pain xocori ca'. Ta xec xec hwe pain caramajuhu' me ta roron. Ta howa hwein me roron. Main om pin ta' ara xi' na oro caramajixi' ta. Howa e' jun Iri' Jam ta roron. Wirico pan na Iri' Jam co mi' mi' pi' pin napari' pain oro carawa ca om napari' ca'. Ma' ta tomi' querec te hwe ta napari'. ¹⁸Hu mip ca' roron quem: Tama' ara jein oro ca awi wa. Ta xiram pa' hwein caramajuhu' quem me. Wara awori to je pain ca mi' mi' tiquin' hwein pain ca quep xiho' huhun oro wari' co om nonon carawa ta roron. Oro carawa ca awi ca ara caca ma', je i ma' iri' caramaxicocon pain ca caramaju caca ma'. ¹⁹Mo ta ara ac i ma' caca co caramaju nana pain macan' pain xocori ca', ac ca cut in xo' tamana cacain na iri' carawa ca awi tamana pain pawin cain. Om ta pan' ara'am camain' ne caramaxicocon pain pawin quem, to wet cara tara ta. Mi' ac tococwa tara pain iri' ca e' wa pain ca e' cara caca quem.

²⁰Je ca tomi' xim ca' Timóteo: Ta waraju main ca taramaja nem ca mi' quem Cristo Jeju me. Querec wet rain capijacon, ma' ta om to' jimao pin cacain co pijim' pan teretem nanain ma'. Ta taraju wet camain' momon co tomi' ximama' nana me, pain ca miri'om cacain oro caramaxicon Iri' Jam. Ma' ara xi' nana wari' co taxi' urut pain capijacon Iri' Jam paxi' nana ma'. Ane om taxi' cacain ne. Ta taraju wet camain' momon me ta. ²¹Ma' nana wari' co taraju wet nonon quem. Howa howa om pin ac cacain na capijacon Iri' Jam ca howa iri' ca'.

Param inon Iri' Jam pain ca quep xiho' cuhu' ma', pain ca mi' e' cuhu' pain ca param nucun ma'.

Je i ca' ca xirao' ne ca'.

2 Timóteo

Ca xirao' mi' mami' con Timóteo Paulo

1 Paulo ina pain ca xirao' mi' xim ca'. Apóstolo ra napa' Cristo Jeju pane, pain ca tomi' hwet roron pain capija oro wari' capa' pane. Wirico Iri' Jam co param mi' napa' pain. Pijim' roron oro wari' napa' Cristo Jeju, pijim' hwet roron pain ca to' e' cara toton ta' oro wari' co howa nanapa' ta napa'. ²Xirao' mi' mami' inem ta Timóteo. Ac ca panxita' xim na. Tomi' querec te tamana inem ta arain.

Param inon Cotere' Iri' Jam con Taramaxicon nexi' Cristo Jeju pain ca quep xiho' quequem pain ca mi' quequem pain ca param nucucun. Param inonon pain ca xiram pa' quequem, je pain ca mi' quequem pain ca om toron ne xumum quem.

Ca tomi' querec te con Iri' Jam Paulo, je pain ca hu toto con Timóteo quem

³Tomi' querec te inon Iri' Jam co in ac ta' cwa', pain ca tomi' ha' iri'o' ton pain iri' xumu pain ca taramaja mi' ton ca'. Win caca oro hwanana nexi' pain cara pane, ac i ma' na pain ca in ac ton Iri' Jam ca'. Tomi' querec te inon pain ca tomi' mi' xim con. Tama' an hwet mi' inon pain wuxum, pain xec je pain xim quem. Tomi' querec te inem con ta inon pum. ⁴Coromicat inem quem. Mam' pe wet inain ca aca nem pain ca paca' xim pane. Querec mami' xixim na inem. Ma' ta tomi' querec te awi tamana ta' ina ta. ⁵Mam' pe wet inem pain ca howa nem quem. Howa iri'o' mon Iri' Jam. Win cama copa' ma Loide cam jim Eunice co howa cain' nana pane. Howa iri'o' nana pane, howa ac i ma' mon Iri' Jam quem, taxi' inem. ⁶Je ca tomi' xim ca'. Mam' pe wet rain ca taramaja xo' taxi' nem ca mi' quem Iri' Jam pane, pain ca xo' quep qui' tain winam pain mu pane. Ta miri'om main me. Win xumu cara rain. Ac ca ara nem pane tara ta. ⁷Ta taramaja jin' ma me. Xi mi' capari' pain ca jin' wa Tamataracon Iri' Jam ta. Mi' iri napari' pain Tamataracon ne, to' hwara' opa ac capari' na, mi' ac capari' na

pain ca om noc xijexi', mi' ac capari' na pain ca coromicat xo' wa quem, pain ca om ara e' xin ca param nexi'.

⁸ Je ca tomi' xim ca'. Ta wixipa' ma pain ca tomi' hwet momon con Taramaxicon nexi' oro wari' me. Ta wixipa' ma pain ca tao' pe cacapa' pain xirinain ca tao' to tao' to to wa quem me. Tao' pe e' nanapa', xi om ne ca taramaja mi' ara ton Taramaxicon nexi' ta. Je i ma' ira, ta wixipa' ma pata' me ta. Quereme rain ca jain jain wa pain ca pijim' hwet main capijacon Iri' Jam ca tomi' hwet napari' con Cristo ta. Win ta' ca'. To hwara' opa terem pain Iri' Jam ta. ⁹ Wirico co to' witan napari', wirico co tora' napari', iri' wari' ne napari' quem. Om ca mam' to' witan capari' pain carawa ca awi ca ara xi' paxi' iri', om na. Mam' to' witan napari' pain ca param pan nucun. Mam' to' witan napari' pain ca xiram pa' pan capari' quem. Om xi xiram pa' capari', xi iri' wari' iri' ta. Ane wara xiram pa' qui' capari' pain cara pane ne, pain ca om tomi' ma' pin querec cain macan' pane, wara coromicat an pe xo' mi' napari' pain ca xiram pa' nucun. Main to' witan turuhu' Cristo Jeju cwa' napari', ac i ma' tara ca xiram pa' xuhu' ta napari' pane. ¹⁰ Je win an hwet mi' capari' pain ca xiram pa' nucun quem. Xi maqui' pin ara ca Cristo Jeju co to' witan pin napari' cwa'. To' om pin nain ca hwara' opa nein ca mi' pin wa. An hwet mi' ac capari' na pain ca e' nucun quem. To' querec pin' napari' pain i ca' quem: Mo ta howa xin capijacon Iri' Jam ca tomi' hwet napari' pain ca to' witan xim capari' Cristo Jeju cwa', e' cara ac iri' tara pain pawin ta.

¹¹ Capijacon ca tomi' hwet napari' con Cristo Jeju ca', je ca pijim' ra capa'. Apóstolo ra, tomi' hwet roron pain capija oro wari' napa' pane. Tomi' xo' roron pain oro capija ca iri'o' quem napa' pane. ¹² Je ca jain jain ta' ca', pain ca tao' pe cacapa' pain xirinain ca tao' to tao' to to wa ca'. Ane om wixipa' ta' ne. Om ca naro ta'. Xi querec pin' ara ton Cristo co howa ta' cwa'. Taxi' inon pain ca ha' con ca querec wet cain ca taramaja ne ca mi' capa' ca'. Querec wet querec wet maqui' pa' ac capari' tara xec nein ca in qui' ta' nucun.

¹³ Capijacon Iri' Jam ca iri'o' ca', ca pijim' hwet xim pane, tama' mam' pe wet rain me. An xiho' rain ca pijim' ne. Howa cara ron Cristo Jeju. Tomi' querec te cara roron oro wari' quem. Wirico Cristo co mi' napari' pain ca howa cara xun, je pain ca tomi' querec te cara xuxun oro wari' quem. Xi om ne ca win cwere ara xun ta. ¹⁴ Querec wet rain capijacon

Iri' Jam ca pijim' ra quem ma'. Ta an in camain' main me ta. Mam' querec wet rain pain Tamataracon Iri' Jam ca pe ho' napari' pain ximixi' ca'.

¹⁵Taxi' mapa' pain ca an pe pin cacapa' oro xerexi' co maqui' nanain oro xijein cidade pain macarain Ásia ca'. Wirico Fígelo con Hermógenes quem, noc noc pi' pin nanapa'. ¹⁶Onesíforo iri na ne, quep xiho' napa' quem. Param inon Taramaxicon nexi' pain ca xiram pa' cocon oro ca nari nucun cocon oro wari' co to ho' nonon pain xiricon ma' quem. Xi quep xiho' ho' quep xiho' ho' ara capa' ta, to' wa' to' wa' napa' pain xumu quem. Om ca wixipa' ca pain ca tao' pe cacapa' pain xirinain ca tao' to tao' to to wa ca', om na. ¹⁷Wa' qui' iri nain Roma ca' ne, pirao' ac capa' na, pirao' pirao' mam' ac capa' na quem. ¹⁸Param inon Taramaxicon nexi' pain ca xiram pa' con pain xec nein ca in qui' ta' nucun. Taxi' mon Onesíforo pain ca quep xiho' capa' pain Éfeso pane. Taxi' mon ma' ira.

2 Je ca tomi' xim ca' arain. To' hwara' opa ne pain xumu ca' ron Iri' Jam. Na non pain ca to' hwara' opa quem. Xi om ca Cristo co xiram pa' e' nem ma', pain ca mi' e' quem, pain oro ca param nucun. ²Taraju mapa' pain ca pijim' mi' toton pain capiacaon Iri' Jam oro wari' pane. Oro ca pijim' ne ca taraju ma pata' pane, na e' na pain ca an xin tiquin' mi' momon pain oro wari' co ma' ximicocon ma', co iri' wari' nana pain ca an xin tiquin' mi' taxi' cocon pain oro xucucun wari' ma' quem. ³Quereme rain oro ca to' i'ina nem pain ca taramaja mi' mon Cristo Jeju ma'. Win ta' ca'. Win caca oro soldado co quereme nanain oro carawa ca to' i'ina nonon ma', ac soldado nucun Cristo Jeju ra quem. ⁴Noro ron soldado pain ca taramaja nucun ma'. Miri'om nain oro ca ara pan nucucun co om soldado nana ma'. Ma' ta om to' i'ina capa' pain ca taramaja ne pain ca soldado ta' ca' na. Je ca win xumu e' cain ca taramaja nucun. Ma' ta tomi' querec te capa' taramaxicon ne ta na. ⁵Ac i ma' na wari' co mo ma' quem, pain ca mo hwet cain tawirinain wana ca coco' to xi' caca ma', pain ca maji jein xi' caca ma' quem. Mo ta om tomi' ha' ca, mo ta om mo xo' ca, om ca an ac cain caji waji' nein ca wina wa ca an xi' caca ma' quem. ⁶Noro ron wari' co taramaja tamana pain totacon ma' quem. Paca' pin iri na tocwi ca oin' ca ma' ne, cat pin iri nain ne, na e' na pain ca cao' cain' pan cain quem. Ac i ma' ra quem, an xiho' ron wari' co taramaja tamana pain totacon ma'. Win xumu rain ca taramaja nem pain ca pijim' mi' momon pain capiacaon Iri' Jam oro wari' ma'. Ma' ta cut main carawa ca awi ca mi' xim quem Cotere' pain pawin cain. ⁷Coromicat rain ca xirao' mi' xim

ca'. Mi' xim ara xi' nem pain ca taraju pa' wa Taramaxicon nexi'. Taraju pa' taraju pa' pi' pin ac main tara ta.

⁸Mam' pe wet ron Jeju Cristo co to' e' pin ca Cote ca pane, co iri' hwanana ne non Taramaxicon Davi cara pane. Je ca pijim' ta' pain ca pijim' tain capijacon Iri' Jam ca tomi' hwet napari' pain ca to' witan pin xim capari' Jeju. ⁹Pijim' inain capijacon Iri' Jam con Jeju. Je ca jain jain ta' ca'. Quep xirac nanapa', ac querec querec ca iri' caxicon wari' co pan tem cwa' inonon pain ca tao' pe cacapa' pain xirinain ca tao' to tao' to to wa ca'. Ane om tao' pe xine capijacon Iri' Jam ne. ¹⁰Je ca quereme tain oro ca to' i'ina napa' ca'. Ma' ta quep xiho' toton oro wari' co tora' ca Iri' Jam ta ina. Quereme inain oro ca to' i'ina napa' ca'. Ma' ta to' witan pin tococwa pain ca howa cocon Cristo Jeju ma' inonon. Ma' ta mi' tococwa pain ca e' cara wa pain ca to ho' cara cocon Iri' Jam pain pawin cain. ¹¹Iri'o' na capijacon Iri' Jam ca ca' na taxipa' iri' ca'. Na e' na pain ca howa xin:

E' wi xun Cristo,

xi wara cono' wi ara xun pain ca an to pin xin ca caracat wa pane.

¹²Taramaxicon wi xun quem,

xi momon quereme ara xin oro ca to' i'ina napari' ca'.

Mo ta om querec pin' xim ta xun,

om ca querec pin' xim ta ac capari' tara quem.

¹³Om paxi' tara ca ara xin ca wara tomi' pe mi' xun ca'.

Ane ara pan tain cain ca wara tomi' pe mi' capari' ne.

Xi na con pain ca an in cain ca tomi' nucun ta.

Ac i ma' na ca tomi' ne capijacon Iri' Jam ca ca' na taxipa' iri' ca'.

Wari' co hohot non Iri' Jam pain ca taramaja mi' con ma'

¹⁴Tama' tomi' hwet tomi' hwet pi' pin roron pain oro ca tomi' ne oro xerexi' ma'. Mam' pe wet jein ta roron. Hu mip roron pain, querec napari' Iri' Jam pain ca hu xuhu' ca' roron. Miri'om roron co tomi' caracan xucucun pain ca om taraju pa' xo' cacain ca tomi' nucucun oro wari' ta roron. Xi quep xiho' capari' ca tomi' caracan ximao wa ta. Mo ta tomi' caracan ximama' iri', to' em' e' ururun oro wari' co taraju nanapari' ta.

¹⁵Taramaja tamana ra, win xumu rain ca taramaja nem, ma' ta hohot ma ta quem Iri' Jam. Win ca wari' co taramaja xo' ma', co om wixipa' pain ca taramaja nucun ma', ac i ma' ra quem. Pijim' xo' rain capijacon

Iri' Jam ca iri'o'. ¹⁶ Ta taraju wet momon oro wari' co tomi' ximama' nana me, pain ca miri'om cacain oro caramaxicon Iri' Jam. Oro wari' co tomi' ximama' ac i ma' nana ma', pan teretem mip pin ac caca tara quem. ¹⁷ Ca tomi' ximama' nucucun ma', ac caji nan ca quep quep xam' nain curucun wari' na. Ca tomi' ximama' nucucun ma', ca to' ara tamana ac tococwa na oro wari' co taraju nonon ma'. Ca tomi' ximama' nucucun ma', ca to' ara tamana to' ara tamana ac tococwa na, mija pin ac caca tara co to' ara wawa cocon. Noro roron Himeneu con Fileto ma'. Tomi' ximama' ac i ma' nana quem. ¹⁸ Pijim' xo' pijim' xo' om pin nanain capiiacon Iri' Jam ca iri'o'. Pijim' ni ac i ca' nanain: Oro wari' co howa nonon Jeju ma', wara e' mami' nana. Om ta e' mami' caca pain ca in qui' ta' nucun ta, xi wara e' mami' ara caca pain xocori ca', ac i ma' na ca pijim' ximama' caca ma'. Ma' nana wari' co to' em' pin caca, howa xo' howa xo' om pin ac caca na quem.

¹⁹ Pijim' ac i ma' paxi' nana, ane om ac i ma' ne capiiacon Iri' Jam ne. Taxi' irin pain ca iri'o' cara ne. Om ca mixein camain' capari'. To wet cara na, om ca an in ac xine. Tomi' ca' napari': Wata' pain ca iri' Taramaxicon ta' ca', querec pin' inonon oro wari' ne ta na. Tomi' ca' napari' quem: Oro wari' co howa inem ta nanapa' ma', na e' na pain ca an to pin cacain ca caracat wa ta na ca tomi' nein.

²⁰ Tomi' xin cote ne xirim ca awi ma', xiricon wari' co caramaju. Mija na oro prato ca mam' cao' ca ma'. Oro prato ca awi ma', ca hwara' dinheiro nein ma', an to xo' nain waximain. Maqui' iri na xec nein ca cao' querec te xi' cocon oro win ma' ca ne, mam' cao' ac cacain na. Oro prato ca om awi ma' iri na ne, ca om hwara' dinheiro nein ma', mam' cao' e' nain pain oro xijein xec. ²¹ Je ca tomi' xim ca': Wari' pain ca howa xun Cristo Jeju cwa', mo ta an to pin xin oro ca caracat wa, an xiho' ac xin tara oro prato ca mam' cao' e' ca waximain pain ca tomi' querec te wi cocon oro win ma' ca ma'. To' hohot ac capari' tara Taramaxicon nexi', mam' taramaja ac capari' tara quem. Xi wara awori to ara xi' pain ca ara xin irin oro ca awi wa ta.

²² Je ca tomi' xim ca'. Mo ca' rain ca caracat wa ca param taxipa' caca co xo' horon nana ma'. Win xumu e' rain carawa ca hohot non Iri' Jam. Howa cara ron quem. Ta noc camain' momon oro win ma' ma me. Ara xite roron, tomi' querec te roron. Na e' na pain ca ac i ma' ma quem, na e' na pain ca ac i ma' caca oro wari' co in ac nonon Taramaxicon nexi' pain iri' ximicocon ma' quem. ²³ Ta taraju wet camain' momon oro wari' co tomi' caracan ximama' xucucun pain ca om taraju pa' nucucun me ta.

Xi taxi' ara momon pain ca tomi' ximama' tomi' ximama' mana' caracan pin xucucun co tomi' caracan ac i ma' nana ta. ²⁴Pain ca taramaja mi' xun Taramaxicon nexi' cwa', om ca na ne pain ca mana' caracan iri'. Na e' na pain ca ara xite ara xite xam' xuxun oro wari'. Na e' na pain ca pijim' mi' taxi' xuxun pain capijacon Iri' Jam. Na e' na pain ca tomi' toto xuxun pain ca aram aram tomi' in pin cacapari' quem. ²⁵Na e' na pain ca hu wixite xuxun co tomi' in pin nanapari'. Am mi' ton cocon pain ca cwirin' wa Iri' Jam ma'. Am mi' ton cocon pain ca taraju pa' wa capijacon ca iri'o' ma' quem. ²⁶Mo ta ara ac i ma' cocon Iri' Jam ma', ma' pin ac ne tara ximicocon, witan ca' ac cocon tara Caxicon Jam co quep xat nonon ma', pain ca tomi' ha' xine cocon ma'.

**Ca caracat tamana nucucun oro wari' pain oro
xec nein ca in qui' ta' ca Cristo Jeju**

3 Taraju pa' rain i ca' quem: Maqui' ta' iri tara oro xec nein ca in qui' ta' ca Cristo Jeju ne, ximin tamana ac caca tara oro wari'. Mija tara ca to' i'ina ximama' xucucun. ²Xi ma' xi' ara caca wari' co miri'om nanain carawa ca param caca oro win ma' caca ma', win xumu e' tatarain ca param pan nucucun. Narain ho' ac xucucun tara pain carawa pain ca param ximama' nucucun ma'. Tomi' xec xec taxipa' tatara. Om ta wixipa' caca pain ca xin to nucucun. Tomi' napat totoron oro win ma' caca. Om ta tomi' ha' cocon mana cote caca cacam waram jicocon. Om ta tomi' querec te cocon oro win ma' caca co xiram pa' paxi' nonon. Miri'om tatarain oro caramaxicon Iri' Jam. ³Noc totoron oro wari', oro ca nari nucucun quem, om ta xiram pa' camain' cocon. Om ta mana' mana' om je na cocon oro win ma' caca co ara cup nonon. Tomi' em' totoron. Ara e' tatarain oro ca param pan nucucun, om ta an in cacain ca param nucucun. Quep xirac tamana totoron oro win ma' caca. Noc taxipa' tatarain oro carawa ca awi. ⁴Mixein totoron oro win ma' caca co taxipa' paxi' caca. Tamanain to tatara pain ca om coromicat xo' nucucun. Mija tara ca xin to caca pain ca wata' co awi ta caca. Noc totoron Iri' Jam, param e' tatarain ca waraju wa. ⁵Howa urut con Iri' Jam paxi' tatara pain ca ara xin urut pain carawa ca hohot non ta caca ma'. Ane om iri'o' xi' caca ne. Om ta ha' je na cacain Tamataracon Iri' Jam pain ca mam' to' xucun wari' ton cocon pain ca hwara' opa nein.

Je ca tomi' xim ca': Miri'om pan roron oro wari' co ac i ma' nana ma'. Ta wixicam camain' momon me ta.

⁶Wari' co ac i ma' nana ma', tomi' querec te mixein nana, ac ca iri'o' xi' ca' tara me nana, corom corom hwet ac tococwa na oro wari' pain xiricocon, pijim' pan teretem ac tacacama na oro narima' co om coromicat xo' nana ma', co to' i'ina nanam oro ca caracat nequequem. Om ca i'ina tomi' na pin tacacama, xin ne xin ne ac cacama na pain oro ca param ximao wa ca om awi. ⁷Taraju pa' xixi' na paxi' nanain oro xocori ca pijim' wa quem. Ane om querec pin' taxi' cacamain iri' capijacon Iri' Jam ca iri'o' ne. ⁸Wari' co pijim' pan teretem nana ma', ari pan nanain capijacon Iri' Jam ca iri'o'. Win caca Janes con Jambres cara pane, co ari nonon Moisés pane, ac i ma' nana oro wari' co pijim' pan teretem nana ma'. Ari nanain capijacon Iri' Jam ca iri'o'. Em' pin na ca coromicat nucucun, om ca coromicat xo' taxi' mami' caca. Om ca hohot hwe, xi howa iri'o' hwe ta pan nonon Iri' Jam quem. ⁹Na paxi' nonon pain ca tomi' tomi' na pin cacam oro narima' co om coromicat xo' nana ma', pain ca pijim' pan teretem cacam ma', na paxi' nonon pain xocori ca'. Ane om na cara xun tococwa pain ne. Main maqui' tara xec nein ca querec pin' tococwa pain ca tamanain nucucun, ame hwe e'. Win caca Janes con Jambres cara pane, pain ca aram aram querec pin' tococwa pain ca tamanain nucucun pane.

Ca howa cara rain ca ca' na xima pain capijacon Iri' Jam ta con Timóteo Paulo

¹⁰Ac i ma' nana co pijim' pan teretem nana ma'. Wum iri na ne, taxi' mapa' pain ca pijim' ne ca'. Taraju pa' mapa' pain. Taxi' mapa' pain ca xut xo' ne ca'. Taxi' mapa' pain ca param ne ca wara coromicat an pe xo' ta' pane, pain ca pijim' tain ta' capijacon Iri' Jam pane. Taxi' mapa' pain ca howa ton Cristo cwa', je pain ca tomi' pan hot toton oro wari' ma', je pain ca om noc toton ma' quem. Taxi' mapa' pain ca quereme tain oro ca to' i'ina napa' ca'. ¹¹Taxi' mapa' pain ca jain jain ta' pane, pain ca quep em' cacapa' oro wari' co noc nanapa' pane, taxi' mapa' pain ca quep em' pe cacapa' pain oro xijein cidade pain i cain pane, pain Antioquia, je pain Icônio, je pain Listra pane. Ximin tamana ina pain ca quep em' cacapa' pane. Ane quereme tain ne. To' witan ca' ac capa' cocon na Taramaxicon nexi' pane. ¹²Je cwerein ta. Quep em' quep em' xam' tata oro wari' co win

xumu xin nanain carawa ca hohot non Iri' Jam ma', pain ca howa cocon Cristo Jeju ma'. ¹³Oro wari' co caracat nana ma' iri na ne, oro wari' co mixein nana pain ca ac ca iri'o' xi' ca' tara me caca ma' iri na ne, caracat caracat mao ac ne ma' tara cocon, caracat mip pin ac caca tara quem. Mija tara ca mixein caca, mija tara ca mixein tococwa quem.

¹⁴Wum iri na ne, howa howa tiquin' rain capijacon Iri' Jam ca ca' na mi' xima ma', ca taxi' ma pain ca iri'o' nein ma' quem. Xi querec pin' ara momon pain ca xuruxut xo' nucucun oro wari' co pijim' xo' nenem pain ta. Warut quem, taxi' maparut pain ca pijim' xo' urut pum pain quem. ¹⁵Taxi' main capijacon Iri' Jam ca xirao' je tococwa oro hwanana pane quem. Wara taxi' qui' ma pain ca pije' nem pane. Je capijacon Iri' Jam ca to' coromicat xo' nem ma'. Mi' nem pain ca querec pin' mon Cristo Jeju ma', pain ca to' witan ne mon, xi om ne ca howa ara xim ta mon ma'. ¹⁶Oro capijacon ca xirao' to caca oro hwanana pane, maqui' maqui' pi' pin nain ca coromicat nucun Iri' Jam. Quep xiho' napari'. To' querec pin' napari' pain oro ca iri'o' wa. Pan to' nain tarajixi' pain ca pan teretem nexi'. Tomi' xo' napari', an to pin jein ca caracat nuhu' ta napari'. Hu napari', an hwet mi' napari' pain ca param nucun Iri' Jam pain ca xuruxut xo' je capari' quem. Ma' ta hohot mahu' ta napari'. ¹⁷Je ca mi' capari' pain capijacon. Tomi' ca' napari' pain ca wari' ne capari' ca': Mo ta noro hwein capija ca', mo ta tomi' ha' hwein quem, na ac cuhu' tara pain ca ara ara pi' pin hwein oro ca awi wa ca ara je xuhu' ca' napari'.

4 Maqui' iri tara Cristo Jeju pain ca taramaxicon pe pin tain cain macan' ca' ne, tomi' hwet tomi' hwet xam' ac tococwa tara oro wari' pain oro carawa ca ara caca ma'. Co e' e' wet nana ma', co wara cono' pin nana ma' quem, tomi' xo' tomi' xo' xam' totoron. Hohot hwe ta totoron co hohot nana ma', em' hwe ta totoron co em' nana ma' quem. Je ca tomi' xim ca'. Taraju napa' Iri' Jam con Cristo Jeju pain ca tomi' mip xim ca': ²Pijim' mi' roron pain capijacon Iri' Jam oro wari'. Am taraju wet xin cacain, am om taraju wet xin cacain. Je i ma' ira, wara awori xo' ra pain, pijim' mi' roron pain. Mo ta caracat caca, tomi' roron pain taraxicocon pain ca pan teretem nucucun. Cwirin' jein ta roron. Hu roron, tomi' pan hot roron pain ca pijim' momon pain capijacon Iri' Jam ma'. ³Xi maqui' ta' ara ne xec nein ca om taraju wet je na cacain capijacon Iri' Jam ca iri'o' oro wari'. Param e' tatarain oro xijein ca tomi' wa, taraju wet e' totoron oro wari' co tomi' cut in pan caca. Pijim' xut pain ca capija wa ca ac pan naparut ta

totoron. ⁴Om ta taraju wet je na cacain capijacon Iri' Jam ca iri'o'. Taraju wet e' tatarain oro ca pijim' ximama' wa ca pijim' caca oro hwanana. ⁵Ac i ma' tataca co noc nanain capijacon Iri' Jam. Wum iri na ne, ma' tara xumum ta Timóteo. Tama' coromicat xo' ra pain oro carawa ca ara nem. Quereme rain oro ca to' i'ina nem ma'. Pijim' mi' roron pain capijacon Iri' Jam oro wari', pijim' mi' roron pain capijacon Iri' Jam ca tomi' hwet napari' con Cristo Jeju co to' witan xim napari'. Ara ara pi' pin rain oro ca ara ra quem Iri' Jam pain ca taramaja mi' mon ma' quem.

⁶Je ca tomi' xim ca'. Xi wixicam pin ara ne xec pain ca mi' pin ta' ne. To' pa' pin tatarapa'. Om ta nain ho' xije quem, mi' pan xije con Iri' Jam ta. ⁷Pain ca taramaja mi' ton Iri' Jam ca', om ca nain ho' camain' tain cwere pain ca taramaja ne. Om ca taramaja nene camain' ta'. Ara ara pi' pin inain oro ca taramaja ne ca mi' capa' pane. Howa cara inon quem, om ca an pe camain' ton. ⁸Wara an pe xo' mi' napa' pain carawa ca awi ma', ca an xiho' paxi' nain caji waji' nein ca wina wa ca an ca wari' co ganhar pain ca maji jein xi' caca oro wari' ma'. Maqui' iri tara xec nucun Taramaxicon nexi' co Juiz ma' ne, co ara xo' taxipa' ma', mi' ac capa' tara pain carawa ca awi. Xi om ne ca hohot ara mapa' pain ca xut xo' nem pane tarapa'. Om ta xica' pe ta' pain ca mi' xim capa' pain quem, mi' mi' xam' totoron pain oro wari' co winim' nonon pain ca jain jain cacain ca in qui' nucun.

Ca tomi' hwet con pain carawa ca ara non, je pain ca tomi' xo' con pain ca param nucun ca ara mi' ne pain con quem

⁹Maqui' hap ra me. Ta om om ma me, miri'om rain oro ca to' i'ina nem pain ca hwet hap xim mapa' me. ¹⁰Xi paca' ara capa' Demas cara pane. Win xumu ara xi' nain oro caramaji macan', paca' ac capa' na, mao ac cain na Tessalônica. Mao nain Galácia Crescente, mao nain Dalmácia Tito quem. ¹¹Pe ho' xica' pe napa' Lucas cwa'. Hwet xim iri ne ne, o qui' ac mon tara Marcos quem. Quep xiho' ara xi' napa' pain ca taramaja ne ta. ¹²Mao rain Éfeso inon Tíquico. ¹³Hwet xim iri ne ne, an qui' ac mon tara to' om capin' ne co pin ta' pain xiricon Carpo pane, pain Trôade pane. Cut

qui' rain oro livro ne ma' quem, je oro tapari carawa ca joc top ma', ca xirao' pe xine ma' quem, je ca param tamana ta' quem.

¹⁴To' i'ina tamana napa' Alexandre co quep quep jami carawa nain too ma'. Wap ma' toron Taramaxicon nexi' ne. Xi to' i'ina ara capa' pane ta. ¹⁵Querec ron me. Xi mija ara ne ca ari tamana caparut pain ca pijim' nuxut pane.

¹⁶Pain ca tomi' nain ho' xije pain ca tomi' em' cacapa' pane, pain ca xo' tomi' querec cacapa' oro taramaxicon pane, om na wari' co quep xiho' napa', om nana oro win ma' ne co tomi' in pin nonon pain ca tomi' em' cacapa' pane. Wara paca' paca' pi' pin nanapa'. Je i ma' ira, tomi' mi' inonon con Iri' Jam quem. Ta mana' momon pain me ta inon cocon. ¹⁷Paca' pin paxi' nanapa' pane, ane pe ho' pan capa' Taramaxicon nexi' ne. To' hwara' opa napa' quem. Ma' ta ara ara pi' pin main ca taramaja nem pain ca pijim' main oro capija ta napa', ma' ta taraju cacain ca pijim' nem oro wari' co om judeu nana ta napa' quem. To' witan napa' quem. Om ca to' pa' pin cacapa'. Ac ca to' witan ca' capa' na con copacao' ta. ¹⁸To' witan napa' Taramaxicon nexi'. To' witan ca' tarapa' pain oro carawa ca om awi ca ara xim napa' quem. Querec wet tarapa', querec wet querec wet an mao ac capa' tara pain ca taramaxicon pe ca pain pawin cain. Na e' na pain ca tomi' querec te cara xun co awi tamana ta! Amém, iri'o' na ca tomi' ne ta.

Ca pi' pin ne ca xirao' nucun Paulo

¹⁹Mam' pe wet nuhu' Paulo ta raram Priscila con Áquila ma'. Oro ca nari nucun Onesíforo ma' quem, mam' pe wet nuhu' Paulo ta raram. ²⁰To' wet nain Corinto Erasto cara pane. Trófimo iri na ne, an pe pin inon pain Mileto quem. Xi om ne ca caxi ara ca pane ta. ²¹Maqui' hap ra me. Ta om om ma me, miri'om rain oro ca to' i'ina nem pain ca hwet hap mapa' pain ca om maqui' querec ne oro xec ca xio tamana ma'.

Mam' pe wet urut pum ta nenem xerexi' cwa', Êubulo con Prudente con Lino cwa', wiricam Cláudia cwa' quem. Oro xucucun xerexi' cwa' quem, mam' pe wet urut pum ta nenem.

4.13 Oro livro cocon hwanana pain cara pane, om ca an xiho' nein oro livro nexi' pain xocori ca'. An e' nanain tapari carawa, xirao' xirao' ac cacain na, joc top ac cacain na quem. Ac i ma' na livro nucucun hwanana pane.

²²Param inon Taramaxicon nexi' pain ca pe ho' quem pain iri' xumum ma'. Param inon pain ca quep xiho' quem pain ca mi' e' quem pain ca param nucun. Wum, oro xerexi' co to ho' nenem ma' quem, param inon Taramaxicon nexi' pain ca quep xiho' quep xiho' xam' cuhu' pain mi' cuhu' pain oro ca param nucun.

Je i ca' ca xirao' ne ca'.

Tito

Ca xirao' mi' con Tito Paulo

1 Paulo ina pain ca xirao' mi' xim ca'. Wari' nucun Iri' Jam ina pain ca taramaja mi' e' ton ca'. Apóstolo ra napa' Jeju Cristo quem, pain ca tomi' hwet roron pain capija oro wari' ta capa' pane. Quep xiho' roron oro wari' co tora' ta' cwa' napa' pane. Ma' ta howa xo' cacapa' ta napa' cocon. Ma' ta taraju pa' cacain capija ca iri'o' ca', ca ca' na nonon pain ca xuruxut xo' taxi' wa pain ca win xumu e' cacain ca param ne ta napa'. ²Ma' ta om tara pum ta'a camain' cacapa' pain ca mi' ton toton pain ca e' cara wa ta napa' cocon. Wara tomi' pe mi' napari' pain ca e' cara wa Iri' Jam. Pain ca om tom ma' querec cain macan' pane, wara tomi' pe mi' napari' pain. Om ca tomi' mixein camain' capari' ta. ³Maqui' pin iri na xec nein ca wara coromicat an pe xo' ca pane ne, an hwet mi' ac capari' na pain capijacon ca'. Pijim' rain ta napa' Iri' Jam co to' witan napari' quem.

⁴Xirao' mi' inem pain ca xirao' ne ca' Tito. Ac ca iri' panxita' xim na. Xi om ne ca howa wi ara xun Cristo Jeju. Tomi' inon Cotere' Iri' Jam con Cristo Jeju co to' witan napari'. Param inonon pain ca quep xiho' quequem pain ca mi' quequem pain ca param nucucun. Param inonon pain ca mi' quequem pain ca om toron ne xumum quem.

Ca taramaja nucun Tito pain Creta

⁵Je ca tomi' xim pane, pain ca an pe pin xim pain xixi pan nein macan' Creta ma'. Ma' ta ara pi' pin main oro ca taramaja nexi' ca om na capari' pain ca ara pi' pin iri' pane inem. Ma' ta tora' momon co querec wet nonon co cut in xucucun pain ca howa cocon Jeju pain oro xijein cidade ma'. Win ne ca tomi' xo' xim pane. Tomi' ca' inem pane: ⁶Wari' co querec wet nonon co howa nonon Jeju ma', om ca na ne pain ca hwet ne wixicon pain ca caracat wa ta. Na e' na pain ca xica' pe cama manacon. Mana panxica ma', na e' na pain ca howa cocon Iri' Jam. Om ta hwet ne wixicocon pain ca tamanain to wa pain ca om tomi' ha' wa ta. ⁷Wari' co querec wet nonon co howa nonon Jeju ma', na e' na pain ca om hwet ne wixicon.

Xi wirico pan ara ca Iri' Jam co mi' non pain ca taramaja nucun pain ca querec wet roron co howa nonon Jeju ta con. Om ta tomi' xec xec ca. Om ta mana' ximao ca. Om ta toc tamanain pe cain comi uva ca mana'. Om ta to' xitoton na cocon oro wari' co tomi' taparam' nonon ma'. Om ta mixein con win ma' ca pain ca param ximao cain dinheiro. ⁸Om ca na camain' ne pain ca ara ac i ma' ca ma'. Ara ca' e' tara: Tomi' querec te totoron oro wari' co hwet nonon pain xiricon. Param e' tarain ca awi wa. Coromicat xo' tara. Xut xo' tara. Win xumu e' tarain oro ca param nucun Iri' Jam. Ma' tara ximicon pain ca om ara e' cain ca param pan nucun. ⁹Wari' co querec wet nonon co howa nonon Jeju ma', na e' na pain ca howa cara cain capijacon Iri' Jam ca wara pijim' iri' ca', ca iri'o' ca'. Na e' na pain ca tomi' ha' cara cain quem. Om ca mixein camain' capari' capijacon Iri' Jam ca tomi' hwet napari' con Jeju ta. Mo ta howa cara cain pain ca tomi' ha' cain, na ac con tara pain ca quep xiho' cocon oro win ma' ca pain ca hu xo' cocon ma'. Na ac con tara pain ca tomi' tomi' na cocon oro win ma' ca co ari nanain quem.

¹⁰Xi mija ara caca co ari nanain capijacon Iri' Jam ca ca' na xo' iri' ca'. Om ca tomi' ha' je na caca. Pijim' iri' tata oro win ma' caca ne, tomi' ximama' e' ac tococwa na. Om ca quep xiho' tococwa pain ca pijim' nucucun. Mixein e' tata. Caram ma' co tomi' ha' nanain oro ca xirao' nucun Moisés ma', co howa paxi' nonon Jeju ma', wiricoco nana co pijim' tamana ac i ma' nana ma'. Mo ta om tomi' ha' hwein ca xirao' nucun Moisés ma', om ta to' witan cuhu' Jeju ta tata oro win ma' caca ma'. ¹¹Na e' na pain ca pijim' ximama' maho' je e' momon ta. Xi to' i'ina ara tococwa co howa nonon Jeju ta. Caram ma' co howa nonon ma', to' i'ina pin ac tococwa na, to' i'ina pin ac tacacama na oro ca nari nucucun ma' quem. Om xi pijim' caca ta. Pijim' ximama' e' nana, ma' ta cut tamana xin dinheiro pain ca mixein nexi' ta nana. ¹²Ma' na hwanana nucucun cara pane, co profeta xi' ma caca oro wari' nein Creta pane, tomi' ca' nonon oro win ma' ca pane. Ca' nonon pane: Mixein taxipa' nana oro win ma' nexi' pain Creta ca'. Ac carawa nein mi ca mana' nana. Om ca awi camain' caca. Noc taxipa' nanain ca taramaja wa, param e' nanain ca cao' wa ta na pain ca pan to' cain taraxicocon oro win ma' ca pane. ¹³Iri'o' na ca tomi' nucun quem. Je ca tomi' xim ca'. Tomi' mip rain taraxicocon co howa ximama' nonon ma'. To' querec pin' roron pain ca pan teretem nucucun co pijim' ximama' nana ma' quem. Ma' ta howa xo' caca. ¹⁴Ma' ta om taraju wet cocon co

pijim' ximama' nanain oro ca pijim' nucucun hwanana nucucun oro judeu. Ma' ta om taraju wet cocon oro wari' co tomi' ha' xut me nana ma', co ari taxipa' nanain capijacon Iri' Jam ca iri'o' quem. ¹⁵ Xi to' em' taxi' capari' carawa ca cao' wa pain ca howa xun Cristo Jeju ta. Oro wari' co xumu xo' nana con Iri' Jam ma', co hohoc pin wawa pain ca caracat nucucun ma', querec awi nonon oro carawa ca cao' wa. Om ca ein cacain, cao' cao' pi' pin nanain quem. Oro wari' co om xumu xo' nana con Iri' Jam ma' iri nana ne, co om hohoc pin wawa pain ca caracat nucucun ma', co om howa nonon Cristo Jeju ma', om ca quep xiho' cocon oro ca ara xi' paxi' caca ma', pain ca to' hohot pin xijexi' con Iri' Jam caca ma'. Om ca to' querec awi ac tococwa con Iri' Jam ta. Em' cara na ca coromicat nucucun. Om ca toron camain' ne ximicocon pain ca caracat nucucun quem. ¹⁶ Taxi' urut con Iri' Jam paxi' nana, ane mixein caca ne. Querec pin' tata pain ca noc cocon ma', xi om ne oro ca ara nucucun pain ca pan teretem pan caca ta. Om ca querec awi cacapa' ta nonon Iri' Jam. Xi tomi' ha' caca ta. Om ca ara taxi' cacain ca awi wa quem.

Ca hu ca' roron co howa nonon Jeju ta con Tito Paulo

2 Tomi' ximama' ac i ma' nana co pijim' pan teretem nana ma'. Wum iri na ne, pijim' xo' e' roron pain capijacon Iri' Jam co howa nana ma'. Ca pijim' nem ma', na e' na pain ca an xiho' nein iri' capijacon Iri' Jam ca howa iri' ca'. ² Tomi' ca' roron co wara tiquin' mama' cawaxi' nucucun ma': Ma' tara xumuhu' pain ca om ara e' hwein ca param pan nuhu' ta roron. Na e' na pain ca querec pin' cucuhu' oro wari' pain ca xuruxut xo' nuhu' ta roron. Coromicat xo' je roron. Howa xo' jein capijacon Iri' Jam, ta noc camain' huhun oro wari' me, quereme cara jein oro ca to' i'ina nuhu' ta roron quem.

³ Ac i ma' raram oro narima' co wara tiquin' mama' cawaxi' nequequem ma' quem. Tomi' ca' raram: Pain ca xuruxut nuhu' ma', xuruxut xo' je, ma' ta querec pin' xihwe pain ca howa hun Iri' Jam ta raram. Ta tomi' napat huhun oro wari' me ta raram. Ta toc tamanain to hwein comi uva ca mana' me ta raram. An hwet mi' jejem pain ca awi wa ⁴ oro narima' co xo' horon nana ma', ma' ta win cacama ne cucuhu' quem raram. Na ac cacam tara pain ca ca' na cacam pain ca om noc cocon waram taxicacam cacam humaxicacam ma', pain ca querec wet cacam ma'. ⁵ Na ac cacam tara pain

ca ca' na cacam pain ca coromicat xo' wa, je pain ca ma' ne ximicacam quem. Na ac cacam tara pain ca ca' na cacam pain ca querec wet xo' cocon waram taxicacam cacam humaxicacam ma', pain ca taramaja to cacamain xiricacam ma'. Na ac cacam tara pain ca ca' na cacam pain ca xiram pa' cocon oro wari' ma', je pain ca tomi' ha' cocon waram taxicacam ma'. Mo ta xuruxut xo' ac i ma' cacama co xo' horon nana ma', om ac ne tara ca tomi' napat cacain capijacon Iri' Jam oro wari' cacam ta.

⁶Ac i ma' roron co xo' horon nana ma' quem, hu ca' roron: Coromicat xo' je, ma' tara xumuhu' me roron. ⁷Wum quem Tito, an hwet mi' roron pain ca awi wa, tama' ara xo' ra. Ma' ta win ca ne quequem pain oro ca ara nem ma'. Pijim' iri roron pain capijacon Iri' Jam ne, om ta tomi' capijacon e' ma' pain. Na e' na pain ca maqui' nein iri' xumum ca pijim' nem. Na e' na pain ca querec pin' quequem pain ca xut xo' nem pain ca pijim' momon quem. ⁸Pijim' xo' e' roron pain iri' capijacon Iri' Jam quem, ma' ta om pijim' pan tem na ta ac quequem oro wari'. Mo ta pijim' ac i ma' momon, om ta na cocon pain ca tomi' napat cacapari' oro wari' co noc nanapari' ma'. Xi ma' ne ca tomi' napat ac cacapari' ta. Hehe e' tatara, wixipa' pin ac caca tara ta.

⁹Ac i ma' roron oro wari' co taramaja mi' e' nonon taramaxicon nucucun ma', tomi' ca' roron quem: Taramaxicon nuhu' ma', co taramaja mi' e' hwe ma', tama' tomi' ha' jujun pain oro ca ara je cucuhu' ta roron. Win xumu jein ca taramaja nuhu', ma' ta hohot maparut ta cucuhu' ta roron. Ta win capija huhun me ta roron. ¹⁰Ta an noc xa hwein carawa nucucun me ta roron. An hwet mi' pan jujun pain ca xuruxut xo' nuhu' ma', ma' ta querec pin' cucuhu' pain ca om mixein camain' nuhu' pain ca ara cara xin hwein oro ca param nucucun ta roron. Querec pin' iri tuturuhu' pain oro ca taramaja xo' nuhu' oro wari' ma' ne, taraju toto napa' me ac caca tara pain ca taraju cacain ca pijim' xine capijacon Iri' Jam co to' witan napari' ta roron.

¹¹Na e' na pain ca xuruxut xo' ac i ma' caca co howa nonon Jeju ta. Xi an hwet mi' ara capari' pain ca awi nucun Iri' Jam ma', pain ca mi' capari' pain ca querec pin' xun ca', pain ca xiram pa' e' capari' ca', pain ca to' witan to' witan pi' pin xuhu' ta capari' ca'. Om xi to' witan capari', xi iri' wari' iri' ta. Ane xiram pa' pan capari' ne. To' witan pan xuhu' ta napari'. ¹²Hu ca' napari' quem: An to pin jein oro ca ara nuhu' ca om hohot napa' ta napari'. An to pin jein oro ca param pan teretem wa ca ara caca oro wari'

co om howa nanapa' ta napari'. Coromicat xo' je, xuruxut xo' je, tama' hohot xine ta napari'. Win xumu jein ca param ne pain ca e' e' wet nuhu' pain macan' ta napari' quem. ¹³Xuruxut xo' ac i ma' xi' pain ca winim' xin xec nein ca ja' tomi' querec te tamana xim capari', je xec nein ca main in qui' ta' ca Jeju Cristo pain ca toc meremem tamana nucun ta. Wirico Jeju Cristo co Iri' Jam ne iri' cwa'. Wirico co to' witan napari' cwa'. ¹⁴Om ca nain ho' xucun pari' pane, mi' pin caho' xuhu' ta napari' pane. Ma' ta to' witan ca' xuhu' pain oro ca pan teretem nuhu' ta napari'. Ac ca hohoc capari' na pain quicon. Ma' ta to' om pin tain ca caracat nuhu' ta napari'. Ma' ta iri' wari' ne xuhu' ta napari'. Param napari' pain ca win xumu xun pain ca tama' ara xin oro ca awi wa quem.

¹⁵Je ca tomi' xim ca'. Pijim' mi' roron pain oro ca tomi' ne oro wari' co howa nonon Jeju pain Creta ma'. Hu roron pain. Tomi' rain taraxicocon quem. An hwet mi' roron pain ca hwara' opa ne capijam pain ca tomi' momon quem. Tomi' mip roron. Om ca na ne pain ca miri'om quequem ta.

Ca xuruxut nexi' pain ca howa xun Jeju

3 Mam' pe wet jein i ca' ta roron oro xerexi' ma' quem: Tomi' ha' jujun oro taramaxicon ta roron. Oro taramaxicon ma', oro wari' co taramaxicon to ho' nunuhu' ma', ta tomi' in pin huhun me ta roron. Tama' quep xihó' jujun pain oro carawa ca awi ca ara xi' caca quem roron. ²Ta tomi' napat huhun oro wari' me ta roron. Ta tomi' mana' huhun me, tomi' querec te e' jujun, tama' tomi' wixite tomi' wixite pi' pin jujun oro wari' ta roron quem.

³Tomi' ac i ca' inem, xi coromicat xo' iri' pain cara pane ta, pain ca om howa querec iri' pane. Win caca oro wari' co om howa nana pain xocori ca' quem. Om na ximixi' pane. Om ca tomi' ha' xun Iri' Jam quem. Hehe e' ururun co mixein nanapari', om ca ari xuxun. Ac ca quep xat capari' na oro ca param pan teretem nexi' pain oro ca waraju nexi' ca hohot napari' pane, om ca miri'om ac xixin. Ximin iri'. Pan teretem e' iri' pane, tama' noc mi' xijexi' pain oro ca ara iri' quem. Noc nanapari' oro wari', noc ururun pane quem. ⁴Ac i ma' paxi' iri' pane ira. Ane xiram pa' capari' Iri' Jam co to' witan napari' ne. An hwet mi' iri' napari' pain ca xiram pa' nucun ne, je pain ca tomi' querec te tomi' querec te xam' capari' ma', ⁵to' witan pin ac

capari' na. Om ca to' witan capari' pain carawa ca awi ca ara xi' paxi' iri' pane, om na. To' witan e' napari' pain ca xiram pa' pan capari'. Mam' to' witan napari' pain ca hwara' opa nein Tamataracon ca hohoc napari' pain ximixi' ca', ca to' xo' camara' mami' napari' pain ca mi' capari' pain xocori ca e' nucun quem. Mam' to' xocoricon wari' pin napari' pain quem. ⁶Mi' napari' pain Tamataracon, om ca narain ho' camain' capari' pain. Xi om ca Jeju Cristo co to' witan napari' ta. ⁷Mi' napari' pain Tamataracon. Ma' ta om tara con ta'a camain' mahu' pain ca mi' xim xuhu' pain ca e' cara wa ca' napari'. Je ca howa iri' ca' quem. To' hohot pin napari' con Jeju. Om xi to' hohot pin capari', xi iri' wari' iri' ta. Ane xiram pa' pan capari' ne. Je ca to' hohot pin capari' con.

⁸Iri'o' na ca tomi' xim ca'. Je ca tomi' xim ca'. Param inem pain ca tama' pijim' mi' momon pain ca tomi' ne oro wari' co howa nonon Iri' Jam ma'. Iri'o' na ta roron. Ma' ta tama' ara cacain ca awi wa, ma' ta win xumu cacain quem. Hohot tamana na ca pijim' ac i ma' momon ma'. Quep xiho' nonon oro wari' quem. ⁹Ane om quep xiho' capari' oro ca tomi' ximao wa ne. Ta taraju wet momon oro wari' co tomi' caracan ximama' xucucun pain ca tomi' querec xucucun pain oro wixicocon hwanana me ta. Miri'om roron pain oro ca tomi' caracan ximama' nucucun. Miri'om roron pain oro ca tomi' mana' xucucun, miri'om roron pain oro ca tomi' in pin xucucun pain ca tomi' xo' xim paxi' xucucun pain ca xirao' nucun Moisés quem. Om ca quep xiho' camain' capari' oro ca tomi' ximama' nucucun ta. ¹⁰Mo ta ma' ca wari' co ja' teretem nonon oro win howa ca ma', pain ca to' coromicat ni cocon ma', na e' na pain ca hu mon ta. Mo ta om ha' quem pain ca hu mon ma', hu mami' ac mon tara. Mo ta om ha' camain' quem pain ca hu mami' mon ma', tomi' in pin mip ac mon tara. Om ta win ma' ne mami' mon ta. ¹¹Querec pin' ara xi' ta wari' co ac i ma' ta. Howa ni ca' nain capijacon Iri' Jam ca iri'o'. Taxi' paxi' xucun pain ca caracat taxipa' ca ma', ane caracat cara pan ca ne. Em' ma ta pan xucun pain ca coromicat nucun pain ximicon.

Ca pi' pin ne ca xirao' nucun Paulo

¹²Mam' ho' xim con win ma' ne cwa'. Am Ártemas cwa', am Tíquico cwa', hwet ron Tito ta ton pum. Wa' mao iri tara ne, mao hap ac main tara xijein cidade ma', Nicópolis ma'. Je i cain tara ca mam' pe mapa' ta.

Maqui' ta' iri tara oro xec ca xio tamana ne, mao ac tain tara Nicópolis, mon to wet ac tain tara i cain, cawaxi' pa' pe ac capa' tara pain i cain.

¹³ Paca' xim iri terem Apolo con Zenas ne, co tomi' xo' taxi' nain oro ca tomi' nucucun oro taramaxicon ma', quep xiho' tamana ac momon tara. Ma' ta ma' cocon oro carawa ca om nonon pain ca mama' xi' nucucun ta.

¹⁴ Ac i ma' tatara oro xerexi' pain Creta ma' quem. Tomi' roron, ara taxipa' jein ca awi wa ta roron. Quep xiho' jujun oro wari' pain carawa ca om nonon ta roron. Om ta jam' ne curuhu' ta roron, xi quep xiho' capari' ca jam' ne ca cwere wa ta roron quem.

¹⁵ Mam' pe wet urut pum ta nenem oro xerexi' co to ho' nanapa' cwa'. Tomi' roron oro xerexi' co tomi' querec te nanaparut pain ca howa wi iri' ma' quem. Mam' pe wet urut cocon ta nuhu' Paulo cocon xerexi' ta roron.

Param inon Iri' Jam pain ca quep xiho' quep xiho' xam' cuhu' ma', pain ca mi' e' cuhu' pain ca param nucun ta.

Je i ca' ca xirao' ne ca'.

Filemom

Ca xirao' mi' con Filemom Paulo

¹ Paulo ina pain ca xirao' mi' xim ca' Filemom. Tao' pe nanapa' pain xirinain ca tao' to tao' to to wa ca', xi om ne ca taramaja mi' ara ton Cristo Jeju ta. Wata', wirico coxari' Timóteo cwa' quem, xirao' mi' urut pum pain ca tomi' querec te tamana urut pum ca', je pain ca taramaja wi maparut ma'. ²Xirao' mi' urut pahu' quem we Áfia con Arquipo ma'. Wum Arquipo, taramaja wi maparut, jain jain wi maparut pain ca pijim' hwet xin capijacon Iri' Jam con Cristo ma'. Xirao' mi' urut cocon oro xerexi' co cut in to nanain xurum ma' quem Filemom.

³Param inon Cotere' Iri' Jam con Taramaxicon nexi' Jeju Cristo pain ca quep xiho' cucuhu' pain ca mi' cucuhu' pain ca param nucucun. Param inonon pain ca mi' cucuhu' pain ca om toron ne xumuhu' quem.

Ca tomi' querec te inon Iri' Jam pum ta con

⁴Je ca tomi' xim ca' Filemom. Tomi' mi' iri inem con Iri' Jam ne ne, tama' tomi' querec te inem con. ⁵Xi om ne ca taraju ara toton oro wari' co tomi' hwet nanapa' pum, pain ca howa mon Taramaxicon nexi' Jeju ma'. Tomi' hwet nanapa' pain ca tomi' querec te tomi' querec te pi' pin momon oro wari' nucun quem. ⁶Tomi' mi' inem con Iri' Jam, ma' ta tomi' hwet tomi' hwet tiquin' momon pain ca howa nem oro wari' ma', ma' ta querec pin' querec pin' tiquin' main oro ca awi wa ca mi' capari' Cristo pain ca win cwere xun ca'. ⁷Ja' tomi' querec te tamana mapa' xa'. To' hwara' opa mapa' quem. Xi om ne ca tomi' querec te ara momon oro wari' nucun Iri' Jam ma', pain ca to' hwara' opa pin momon pain ximicocon ma'.

Ca xiram pa' ron Onésimo cwa' con Filemom Paulo

⁸Je ca tomi' xim ca'. Hohot paxi' na pain ca tomi' ha' ne ta xim pain ca tomi' xim xim ca'. Wirico ara xi' na Cristo co mi' napa' pain ca hu xim xim ca'. ⁹Ane tomi' toto e' xim pain ne, xi om ne ca tomi' querec te ara xim

ta. Wata' pain ca Paulo ta' ca', pain ca horon pin ta' ca', pain ca tao' pe pin cacapa' pain ca taramaja mi' ton Cristo Jeju ca', ¹⁰tomi' toto e' inem. Xiram pa' ron Onésimo cwa', co ac panxita' cwa'. Ac ca wanxi' ton na, xi om ne ca howa pin ara ca pain ca tomi' hwet ton con Cristo pain xirinain ca tao' to tao' to to wa ca'. ¹¹Om paxi' na ca quep xiho' xo' quem pain cara pane. Ane quep xiho' pin capari' pain xocori ca' ne. Quep xiho' nem, quep xiho' napa' quem.

¹²In hwet ron taramaxicon nem ta inon pum. Ac ca mam' xim na pain iri' xumu ca', xi om ne ca tomi' querec te tamana ara ton ta. ¹³Om ca quep xiho' ac mapa' pain xirinain ca tao' to tao' to to wa ca'. Je ca pe ho' cara xirapa' na ton Onésimo cwa', ma' ta quep xiho' capa' pum inon. Ac ca pe cain maxum xira, quep xiho' ac capa' xira pain ca tao' pe cacapa' pain xirinain ca tao' to tao' to to wa ca', pain ca pijim' tain capijacon Iri' Jam con Jeju cwa'. ¹⁴Ane om ha' ne pain ca ara e' tain ca param ne con ne, noc inain. Mo xi wara tomi' xo' xim con, mo xi wara xiram pa' ne, pe ho' cara xirapa' na inon, mo xi wara tomi' xo' ac i ma' xim con. Ane om ha' ne pain ca tomi' tomi' na xim con ne, pain ca tomi' ha' ne con ta xim ca'. Awi na pain ca ara pan main ca param nem con. ¹⁵Am coromicat ac i ca' ca Iri' Jam con pum, pe ni pije' ca' nem, ma' ta pe ho' cara xim quem, ac je tara ca coromicat nucun pahu'. ¹⁶Om ta pe ho' cara e' quem, pain ca taramaja mi' quem ma'. Pe ho' cara terem, xi om ne ca aji' pin ara quem con Cristo ta. Xa' pin mon quem, tomi' querec te tamana ac xujuhu' tara ta. Tomi' querec te tamana inon pain ca xa' pin ton ca'. Wum iri na ne, pain ca xa' pin mon pain ca howa wi hun Cristo ma', je ta tomi' querec te tamana mip qui' mon ta.

¹⁷Je ca tomi' xim ca' Filemom. Om ca win ma' ne xijexi' pain ca howa xun Cristo ra? Win ma' ne xijexi' ca' ira. Je ta xiram pa' qui' mon Onésimo pain ca in hwet xim quem. Tomi' querec te ron. Ac ca tomi' querec te mapa' tara pain ca tomi' querec te mon ta. ¹⁸Am ara cup quem pane, am ma' ne carawa ca dever quem, pain ca mo ca' quem pane. Tomi' xo' ne pain me. Pagar ac xim pain tara con. ¹⁹Wata' pain ca Paulo ta' ca', xirao' pe xo' pan inain ca tomi' ne ca': Dever iri nem pain carawa Onésimo ma'

1.11 Wari' nucun Filemom na Onésimo pane. Taramaxicon ne non, taramaja mi' e' non pane. Wari' co quep xiho' taxipa' ta na ca tomi' mao ne wixicon. Ac je paxi' na ca tomi' mao ne wixicon, ane om quep xiho' homa con pane ira. Taramaja mi' e' paxi' non pane ira, ane mo mao taparu ca ne. Quep xiho' quep xiho' om pin ac con na pane.

ne, pagar pan ac xim pain tara con. Ac i ma' tara ca xiram pa' ton. Xiram pa' ne con quem. Win ne ca xiram pa' xim pain ca pijim' hwet xim con Jeju pane. Je ca ma' pin quem ca om pi' ra ha' ne ca e' wa ma' quem. ²⁰ Je ca tomi' xim ca' xa'. Xiram pa' ne con me inem. Quep xiho' ne con me. Win ne ca ma' capari' Taramaxicon nexi' cwa'. To' hwara' opa ne pain xumu ca'. Win cwere ara xi' urun Cristo cwa'.

²¹ Je ca xirao' mi' xim ca'. Taxi' inem pain ca tomi' ha' xim mapa' ma'. Taxi' inem pain ca tomi' ha' tiquin' ca' tain main ca tomi' xim ca' quem.

²² Tomi' xim inem pain i ca' quem: Wara quep xo' mi' ne pain ca pi'am pe ta' pain xuru' ma'. Xi om ne ca winim' ara ton Iri' Jam pain ca om pin xim cacapa' pain xirinain ca tao' to tao' to to wa ca'. Win ne ca tomi' mi' mahu' con, ha' turuhu' quem. Hwet ac xuhu' tara ta.

Ca pi' pin ne ca xirao' nucun Paulo

²³ Mam' pe wet inon ta nem Epafra co win tao' pe ta' cwa'. Tao' pe nonon Epafra, xi om ne ca taramaja mi' ara con Cristo Jeju ta. ²⁴ Mam' pe wet urut con ta nenem Marcos con Aristarco con Demas con Lucas cwa' quem. Wiricoco co taramaja wi nanapa' pain ca taramaja mi' urut con Iri' Jam.

²⁵ Param inon Taramaxicon nexi' Jeju Cristo pain ca quep xiho' quep xiho' xam' cuhu' ma', pain ca mi' e' cuhu' pain ca param nucun pain iri' xumuhu' ta.

Je i ca' ca xirao' ne ca'.

Hebreus

Ca xirao' mi' tococwa oro hebreu co xo' howa nana pane

**Ca hwara' opa tiquin' ca' cocon oro jam
co taramaja mi' nonon Iri' Jam Jeju**

1 Wirico Iri' Jam co tomi' nonon oro hwanana nexi' pain cara pane. Tomi' ho' tomi' ho' tata, mija nana oro profeta co tomi' hwet jujun pain capiija ta ca pane, ac i ma' na ca tomi' cocon oro hwanana nexi' pane. ²Pain xocori ca' iri na ne, pain ca tomi' xim capari' ca', wirico Panxica co tomi' hwet roron pain capiija ta ca quem. Wirico Panxica co tora' ca pain ca mene rain oro carawa ta con pane quem. Wirico Panxica co win mu ca pain ca to' ma' qui' cain macan' je pawin, je oro caramajinain ca' quem. ³Wirico Panxica co toha pan, pain ca an hwet pan cain ca toc meremem nucun Iri' Jam pain ca awi tamana nucun, je pain ca hwara' opa tamana nucun ma' quem. Xi iri' wirico pan ara ca pain ca Iri' Jam nucun ta. Wirico co quep xat nain oro carawa pain oro maxinain ma' quem. Tomi' e' nain, ma' ac ne na, xi hwara' opa ara ca pain ca tomi' cain ta. Hohoc pin iri napari' pain ca caracat nexi' ca' ne, xao pe ho' ac cain na iri' curucun Cote ca co hwara' opa tamana cwain, pain pawin cain. ⁴To' hwara' opa tamana non Cote ca, to' hwara' opa tiquin' ca' non cocon oro jam co taramaja mi' nonon ma'. Xi iri' Panxita' ara xim ta non. Oro jam ma', co taramaja mi' nonon Cote ca ma', om ca mana panxica Iri' Jam caca. Taramaja mi' e' nonon Iri' Jam.

⁵Xi ma' camain' ca jam co tomi' ac i ca' ca Iri' Jam cwa', ca xirao' pe xine pain capiijacon ca':

Panxita' inem,

1.1 Pain ca xirao' xine oro hwanana nexi' ma', tomi' tata oro hwanana nucucun oro wari' nein Israel ma'. **1.3** Taraju pa' jein ca tomi' mao ne ca xao pe ho' xine iri' curucun taramaxicon ma'. Xao pe ho' pin iri nain iri' curucun taramaxicon wari' ne, querec pin' ac tocwa na pain ca taramaxicon wi ca con. Ac i ma' na Jeju ma' quem. Xao pe ho' pin iri nain iri' curucun Iri' Jam ne, querec pin' ac tocwa na pain ca Taramaxicon wi pin con quem.

Te pin mapa' pain xec ca'.

Om na jam co tomi' ac i ma' ca Iri' Jam. Om na jam co tomi' ca' ca quem:

Te tarapa',

Panxita' ton quem.

Om ca ma' camain' ca jam co tomi' ac i ma' ca quem. ⁶Maqui' pin iri na xec pain ca hwet roron oro wari' pain macan' ta con Panxica ne, tomi' ac ca na:

Na e' na pain ca in ac in ac xam' cocon Panxita' oro jam
co taramaja mi' nanapa' ta.

Ac i ma' na ca tomi' tococwa oro jam co taramaja mi' nonon pane. ⁷Tomi' ca' tata oro jam co taramaja mi' nonon quem:

To' jimama' pin inonon, ac hotowa nana pata',
ac xe nana pata' ta.

Tomi' ac i ma' tata. ⁸Ane tomi' ca' ca con Panxica ne:

Iri' Jam ma, taramaxicon cara ra.

Om ta pi' ra ha' ne ca taramaxicon nem ma'.

Taramaxicon xo' ma pain ca taramaxicon hwara' opa pe
ho' momon oro wari' nem ta.

⁹Tomi' querec te main ca xut xo' wa.

Noc main ca xut pan tem wa.

Je ca tora' xim ca'.

Wata' pain ca Iri' Jam ta' ca', pain ca Iri' Jam ne mapa' ca',
tora' inem pain ca to' hwara' opa tiquin' ca' xim cocon
oro win ma' ma ma'.

Ja' tomi' querec te inem ta.

Ac i ma' na ca tomi' con Iri' Jam. ¹⁰Ma' na xijein ca tomi' nucun pain ca tomi' con Panxica quem. Tomi' ca' non:

Wum co tomi' ma' pin main macan' pain cara pane ta Taramaxicon.

Wum co quep nain pawin pane quem.

Wum co quep pan nain pane.

¹¹Om pin ta' paxi' tara macan' pain pawin ma',

ane e' cara ta' ma ne.

Main em' pin tara macan' pain pawin.

Win ca wom co main em' pin ta' ma' quem.

¹²Win ca wari' co joc top ton non to' om capin' ma', pain ca an pe pin
ton con ma', pain ca pe ni ta' xucun wom ca ma' quem,

ac i ma' tain main macan' pain pawin.

Ane iri' wirico cara ta' ma ne,

om ta mi' pin ra na ma ta.

Ac i ma' na ca tomi' con Panxica. ¹³Om na jam co tomi' ca' ca Iri' Jam:

Xao pe ho' ne pain iri' cwere ca',

aram aram maqui' pa' ac quem tara xec pain ca to' quiji'

pin toton ta' co noc nenem ma'.

Mi' ac xim tara pain ca taramaxicon pe ho' cara momon ta.

Ac i ma' na ca tomi' con Panxica. Om ca ma' camain' ca jam co taramaja mi' non ma', co tomi' ac i ma' ca ma'.

¹⁴Cain' cain' caca oro jam co taramaja mi' nonon quem? Om ca tomi' ha' tomi' ha' pi' pin cocon Iri' Jam pain ca quep xiho' jujun oro wari' co to' witan xuxun ta tococwa ra? Je i ma' ca taramaja nucucun ma' ira!

Ca om na ne pain ca miri'om xun Taramaxicon nexi'

2 Hwara' opa tamana pan na Taramaxicon nexi' Jeju Cristo. Je ca na e' ne pain ca taraju wet xin ca tomi' nucun ca taraju iri' ca'. Ma' ta om aram aram an pe pin xin quem. ²Noro jein ca xirao' nucun Moisés cara pane. Oro jam co taramaja mi' nonon Iri' Jam pane, wiricoco nana co xirao' ca' ra ta nonon Moisés. Iri'o' na ca tomi' nucucun quem, om ca tomi' ximama' e' caca pane. Oro wari' co om tomi' ha' nanain ca xirao' nucun pane, wap ac tococwa na. Hohot na pain ca wap tococwa quem. ³Je ca tomi' xuhu' ca'. Mo ta miri'om xun Jeju pain ca to' witan pin xim capari', ma' tara ca witan ac iri' ra? Wirico Taramaxicon nexi' pan ara xi' na co pijim' hwet cain' nonon pain oro wari' ca to' witan pin xun wawa pane, tomi' hwet ac cacapari' pain na oro co taraju nonon. Iri'o' na ca tomi' nucun ta nanapari'. ⁴Iri'o' na ca tomi' nucucun ta ac ca na Iri' Jam quem, ac ca tomi' wi cocon na pain ca mi' tococwa pain ca ara cacain oro ca om ara taxi' ne ca wari' wa, wa wa tamana ac caca na oro wari' ma' quem. Ma' iri na wari' co param pan ca ne, pain ca mi' tocwa pain ca taramaja taxi' wa ca mi' ne Tamataracon ma', mi' ac tocwa pain na quem. Ac i ma' na ca an hwet cain ca tomi' iri'o' nucucun oro co tomi' hwet nanapari' con Jeju pane.

Ca an tan pan capari' Jeju pain ca xere capari' ca'

⁵Iri' Jam ma', pain ca coromicat an pe xo' cain xocori macan' je xocori pawin ca maqui' ta' ma', om ca taramaxicon to ho' jein ta tococwa oro jam co taramaja mi' nonon ma'. ⁶Ma' ara xi' na wari' co xirao' an pe ca' na pain capiijacon Iri' Jam pane:

Para mam' pe wet momon oro wari' cwa' Iri' Jam?

Para xiram pa' momon quem?

⁷Mi' paxi' momon pain ca hwara' opa wa oro jam co taramaja mi' nenem ma',

hwara' opa tiquin' pije' ca' paxi' nonon oro wari' quem.

Ane mi' pan momon pain ca awi tamana wa ne.

Tomi' querec te tamana momon quem.

⁸Mi' momon pain ca taramaxicon to ho' taramaxicon to ho' pi' pin cacain oro carawa ca' quem.

Ac i ma' na ca xirao' an pe xine pain capiijacon Iri' Jam pane.

Pain ca mi' tococwa pain ca taramaxicon to ho' taramaxicon to ho' pi' pin cacain oro carawa oro wari' ma', om paxi' na carawa ca om tomi' ha' nonon. Om ara xi' na ca taramaxicon to ho' taramaxicon to ho' querec xine oro carawa pain xocori ca'. ⁹Ane taxi' xun Jeju ma' ne, pain ca querec pin' tocwa pain ca awi tamana nucun ma', je pain ca in ac tamana tocwa ma', xi om ne ca mi' pin caho' ara capari' ta. Xiram pa' ara xi' napari' Cote ca ma'. Je ca tomi' ca' con pane: Mi' xim pain ca hwara' opa tiquin' ca' quequem oro jam co taramaja mi' nanapa' cwa'. Ma' ta mi' pin caho' momon oro wari' ta non. Om ta momon hwara' opa tiquin' ca' quequem, to' hwara' opa hap mami' ac xim tara ta, ac i ma' na ca tomi' con pane.

¹⁰Wirico Iri' Jam co tomi' ma' tomi' ma' pi' pin nain oro carawa ma', co querec wet querec wet pi' pin nain ma' quem. Hohot na ca coromicat an pe xo' nucun pain ca jain jain jain jain mi' pin caho' roron ta con Jeju pari'. Ma' ta ha' quem pain ca ara pi' pin main ca taramaja nem pain ca to' witan toton momon ta non pari'. Ma' ta mija caca oro mana panxita' co to ho' xim nanapa' pain pawin ca' quem non pari'. Wum tara co o mi' napa' cocon ta non pari'. ¹¹Wirico Jeju co to' hohot napari' ma', wari' cwa' quem, pain ca to' hohot capari' ca', Te Te pi' pin urun Iri' Jam cwa' ira. Je ca om wixipa' ca Jeju pain ca xere capari' ca'. ¹²Tomi' ca' na pain ca tomi' con Iri' Jam pari':

Tomi' hwet toton xere pain oro ca ara nem ta.

Cut in iri xujuxut ne,

tomi' hwet ac xim tara pain ca tomi' querec te xim ca'.

Ac i ma' na ca tomi' con Iri' Jam Jeju pari'. ¹³Tomi' ca' na quem:

Howa ton ina ta.

Ac i ma' na ca tomi' con ma'. Tomi' mami' na quem, tomi' ca' na:

Je ca pe ta' ca'.

To ho' nanapa' caram cwa' co ac mana panxita' nana cwa' quem,
pain ca mi' xim cocon ta capa' Te quem.

Ac i ma' na ca tomi' con pari'.

¹⁴Je ca tomi' xuhu' ca'. Wari' cwa', pain ca mana panxita' capari' Iri' Jam cwa', wari' e' iri'. Je ca wari' pin ca Jeju pane quem. An tan pan napari' pain ca wari' nexi'. Ma' ta na capa' pain ca mi' pin wa ta na, ma' ta mam' to' quiji' pin ton pain ca mi' pin ne Caxicon Jam ma', co hwara' opa paxi' pain ca to' cono' taxi' cain ca wari' wa ta na. ¹⁵Mi' pin ina, ma' ta to' witan ca' xuhu' pain ca jin' hwein ca cono' wa ta napari' quem. Ac ca quep xat capari' na ca cono' wa ira, xi om ne ca jin' taxipa' jin' taxipa' cara ara xin pain ca e' e' wet nexi' pain xocori ca' quem. ¹⁶Taxi' ara xi' irin i ca' quem, pain ca maqui' nucun Jeju pane. Om ca maqui' ca pain ca quep xiho' toton oro jam co taramaja mi' nonon Te ta ca, om na. Maqui' na pain ca quep xiho' toton oro waram winacon Abraão ta ca pane. ¹⁷Je ca na e' ne pain ca an tan pan pin capari' pain ca xere capari' ca'. Ma' ta ha' con pain ca sacerdote wa pain ca iri' taramaxicon pin ta' ca ma', pain ca xiram pa' capari' ma', pain ca ara xo' cain ca taramaja nucun pain ca taramaja mi' con Cote ca ma' quem. Ma' ta pe cain maxixi' pain ca mi' pin caho' capari' ca', pain ca xic am pin cain ca caracat nexi' Cote ca quem. ¹⁸Ha' non Jeju pain ca quep xiho' capari' pain ca tomi' querec capari' Caxicon Jam ma', pain ca caracat je capari' ma'. Xi om ne ca jain jain pan ara ca pain ca caracat ra con Caxicon Jam pane ta.

Ca hwara' opa tiquin' ca' con Moisés Jeju

3 Je ca tomi' xuhu' ca' xere, pain ca wari' ne cuhu' Iri' Jam ma', je pain ca tora' cuhu' pain ca howa xine cuhu' ma' quem. Tomi' xim inuhu'.

2.13 Oro ca tomi' nucun Jeju pain versículo 12 je pain versículo 13 ma', je ca xirao' pe xine pain capiacaon Iri' Jam.

Mam' pe wet cara jun Jeju cwa', co tomi' hwet napari' pain ca tomi' nucun Iri' Jam cwa', co sacerdote co iri' taramaxicon cwa'. Wirico co howa iri' cwa'. ²Jeju cwa', ara xo' taxipa' nain ca taramaja nucun pane, pain ca sacerdote co iri' taramaxicon ra ta qui' tocwa pane. Win ca Moisés cara pane, pain ca ara xo' cain oro ca taramaja nucun pain ca querec wet cain xiricon Iri' Jam pane quem. ³Hohot paxi' na pain ca querec pin' tocwa Moisés pain ca taramaja xo' nucun pane, ane hohot tamana pan ne pain ca querec pin' tocwa Jeju ne, pain ca taramaja xo' tiquin' ca' con Moisés pane. Win ca wari' co quep nain xirim ma'. Hohot paxi' na pain ca querec pin' xine xirim pain ca quep awi xine ma', ane hohot tamana pan ne pain ca querec pin' tocwa wari' co taramaja xo' pain ca quep cain ne. ⁴Oro xijein xirim ma', ma' ma' xam' ara xi' nain wari' co quep nain. Ane wirico Iri' Jam pan ca co tomi' ma' tomi' ma' pi' pin nain oro carawa ne. ⁵Je ca tomi' xuhu' ca'. Moisés cara pane, ara xo' taxipa' nain oro ca taramaja nucun pain ca querec wet cain xiricon Iri' Jam. Oro ca taramaja xo' nucun pane, tomi' joc mam' mi' nain oro ca main an hwet mi' xim capari' Iri' Jam cwa'. ⁶Cristo cwa' iri na ne, co taramaja xo' taxipa' ma', querec wet xo' nain xiricon Cote ca, xi om ne ca iri' panxica ara ca ta. Xiricon Iri' Jam iri' quem. Je ca tomi' xuhu' ca'. Mo ta howa cara urun pain ca winim' xin oro carawa ca mi' xim capari' Iri' Jam cwa', xiricon ac iri' na ta.

Ca hu capari' Tamataracon Iri' Jam pain ca howa cara je ta capari'

⁷Je ca tomi' xuhu' ca'. Ac i ca' na ca xirao' an pe xine ca tomi' nein Tamataracon Iri' Jam pain capijacon:

Mo ta taraju hun Iri' Jam pain ca tomi' cuhu' pain xec ca',

⁸tomi' ha' ac hun tara, ta opain ne xumuhu' me.

Ta an xiho' huhun oro hwanana nuhu' pain ca to

cacain mahweri pane,

pain oro xec nein ca ari qui' cocon pain ca tomi'

taparam' qui' cocon pane.

3.2 Om paxi' na ca tomi' mi' xine iri' xirim ca', pain ca querec wet nain xiricon Iri' Jam Moisés ta ca ma'. Tomi' joc mam' mi' tata oro wari' nucun Iri' Jam. Tomi' mi' ta Moisés pain ca querec wet xo' qui' cocon oro wari' nucun Iri' Jam pain mahweri pane. Tomi' nain ca querec wet cain xirim ca mam' quep xine pain tapari carawa quem.

⁹Querec paxi' nanapa' pain ca an hwet mi' toton pain
oro ca hwara' opa ne pane,
ane tomi' taparam' ho' tomi' taparam' ho' cacapa' ne.
Ma' 40 na cawaxi' pain ca tomi' taparam' cacapa' pane.

¹⁰Je ca mana' pin toton pane.

Tomi' ac xije na:

Tama' howa ni ca' nanapa' caram cwa' ta.

Om ca querec pin' cacain ca param ne ca', pain ca
tomi' ha' xine toton ca'.

¹¹Je ca mana' tamana toton ca'.

Tomi' pe mi' ac toton na pain ca tomi' ne ca':

Om ta tan' mama' hwein macan' ca mi' xim paxi' xuhu' pane,

om ta mi' camain' xuhu' pain ca xao to wa hwein xumuhu' ta inonon.

Ac i ma' na ca tomi' cocon oro hwanana Iri' Jam pane.

¹²Ma' tara xumuhu' me xere. Ma' ta om ma' camain' ca win ma' nuhu'
co pan tem ximicon ta. Ma' ta om ma' camain' ca win ma' nuhu' co om
howa xo' ra na ma', co an pe pin ton non Iri' Jam co e' cara cwa'. ¹³Ta ac
i ma' camain' hwe me ta. Hu caracan pan xujuhu' pain oro xijein xec ca',
pain ca ha' ha' wet cuhu' pain ca taraju xin hwein capiiacon Iri' Jam ma',
pain ca tomi' ha' xun hwe ma' quem. Ma' ta om opain pin ne xumuhu'
pain ca mixein cuhu' Caxicon Jam ma', pain ca caracat je cuhu' ma'. ¹⁴Mo
ta howa cara xun Cristo cwa', win ne ca howa mip urun pain ca xo' howa
qui' urun pain cara pane. Mo ta cono' pa' ma' xin ca howa nexi' ca' ne iri'
quem, iri' win ma' ne pin ac xun na, iri' win ma' ne pin ac capari' na quem.

¹⁵Je ca xirao' an pe ca' xine pain capiiacon Iri' Jam:

Mo ta taraju hun Iri' Jam pain ca tomi' cuhu' pain xec ca',
tomi' ha' ac hun tara, ta opain ne xumuhu' me.

Ta an xiho' huhun oro hwanana nuhu' co ari qui' nonon pane.

Ac i ma' na ca tomi' cocon hwanana nuhu' Iri' Jam pane na ca xirao' an
pe xine pain capiiacon ma'.

¹⁶Je ca tomi' xuhu' ca'. Ma' co taraju nanain ca tomi' nucun Iri' Jam
pane? Ma' co ari nonon quem? Om ca wiricoco caca oro hwanana co
cut in qui' ca Moisés pain Egito pane ra? Wiricoco caca ma' ira. ¹⁷Ma'
co mana' ca Iri' Jam pain mahweri pane quem? Om ca mana' tococwa
co caracat nana pane ra? Wiricoco caca ma' ira. Ma' 40 na cawaxi' pain
ca mana' tococwa pane, cono' to ac cacain na mahweri pane. ¹⁸Ma' co

tomi' ca pain ca tomi' pe mi' cocon pain capiiacon quem, pain ca om ta tan' mama' hwein macan' ca mi' xim paxi' xuhu' pane cocon ma', pain ca om ta mi' xuhu' pain ca xao to wa hwein xumuhu' ta cocon ma' quem? Wiricoco caca ma' ira, tomi' tata oro co om tomi' ha' nonon pane. ¹⁹ Je ca taxi' xuxun pain ca om tan' mama' ac caca pane. Xi howa je na caca ta.

Ca mi' xim capari' pain ca xao to wa xin ximixi' Iri' Jam

4 Wara tomi' pe mi' napari' pain capiiacon Iri' Jam pane, pain ca mi' xuhu' pain ca xao to wa hwein xumuhu' ta capari' pane. Tomi' tomi' wet napari' quem. Je ca na e' ne pain ca ma' ne ximixi' ca'. Ma' ta om ma' camain' ca win ma' nexi' co om ha' non pain ca xao pe wa ne ximicon ma', pain ca am mi' xim capa' pain ca xao pe wa ne xumu Iri' Jam cwa', am om mi' xim capa' pain ca ma'. ² Taraju ara xi' irin capiiacon Iri' Jam pain ca to' witan xuhu' ta capari' quem. Win caca oro hwanana nexi' pane. Taraju paxi' nanain, ane om howa cacain ne. Je ca om ja' tomi' querec te ac tococwa pain oro ca taraju cacain pane. ³ Wari' iri na ne, pain ca howa iri' ca', ha' napari' pain ca xao to wa xin ximixi' con Iri' Jam. Je ca tomi' ca Iri' Jam pane:

Je ca mana' tamana toton ca'.

Tomi' pe mi' ac toton na pain capiia ca':

Om ta tan' mama' hwein macan' ca mi' xim paxi' xuhu' pane,
om ta mi' camain' xuhu' pain ca xao to wa hwein xumuhu' ta inonon.

Ac i ma' paxi' na ca tomi' tococwa oro hwanana nexi' pane, ane wara coromicat an pe mi' tococwa pain ca xao' to wa xin cacain ximicocon pain cara pane ne, pain ca xo' tomi' ma' tomi' ma' pi' pin qui' cain oro carawa pane. ⁴ Ma' ara xi' na ca xirao' an pe xine pain capiiacon pane:

Ma' 7 pin iri na xec pane ne,

xao pe wa pin ac cain na ximicon Iri' Jam,

xi om ne ca ara ara pi' pin ara cain oro ca taramaja nucun pane ta.

Xirao' an pe ac i ma' ta pain capiiacon pane. ⁵ Tomi' mi' nain ca xao to wa xine ca xumu wa ca wara noro iri' ca' quem:

Om ta mi' camain' xuhu' pain ca xao to wa hwein xumuhu' ta inonon.

Ac i ma' na ca tomi' tococwa pane.

⁶ Je ca tomi' xuhu' ca'. Oro hwanana nexi' cara pane, co taraju cain' nanain capiiacon Iri' Jam pain ca to' witan xuhu' ta tococwa pane, om ca

mi' tococwa pain ca xao to wa cacain ximicocon, xi tomi' ha' je na caca ta. Ane ma' ma' wet caca oro xucucun wari' co mi' xun wawa pain ca xao to wa cacain ximicocon ne. ⁷ Je ca aram aram tomi' mi' cain xijein xec nucun Iri' Jam pane. Om iri na ca howa cocon oro hwanana nexi' pain ca ari qui' cocon pane ne, pain pin iri na ne, aram aram tomi' ac tocwa na Davi cara pane. Xirao' an pe rain ca tomi' ne pain xijein xec ne ta ac tocwa na. Wara noro irin ca xirao' an pe nucun ca'. Ca' na con:

Mo ta taraju hun Iri' Jam pain ca tomi' cuhu' pain xec ca',
tomi' ha' ac hun tara, ta opain ne xumuhu' me.

Ac i ma' na ca xirao' an pe xine capijacon pain xijein xec nucun Iri' Jam pane. ⁸ Mo xi wara mi' tococwa pain ca xao to wa cacain ximicocon pain ca o mama' qui' cocon pain Canaã Josué cara pane, om xi tomi' hwet mami' capari' pain xijein xec nein ca main mi' xuhu' pain ca xao' to wa pin hwein xumuhu' ta capari' Iri' Jam quem. ⁹ Je ca taxi' iri' ca' quem: Main xao to wa jein xumuhu' ta tarapari' Iri' Jam pain ca wari' ne capari' ca'. Win ta' pane, pain ca xao pe wa ca' tain ca taramaja ne pain xec nein sábadó pain cara pane ta napari'. ¹⁰ Je ca ara capari' pain ca mi' capari' pain ca xao to wa xin ximixi' ca' quem. Xao to wa ca' irin oro ca taramaja nexi' ca'. Win ne ca xao pe wa ca' cain ca taramaja nucun Iri' Jam pane. ¹¹ Je ca tomi' xuhu' ca'. Howa xun Iri' Jam, jain jain xun, ma' ta mi' capari' pain ca xao to wa xin ximixi' ta. Ma' ta om ma' camain' ca win ma' nexi' co pan' mao ma', pain ca om tomi' ha' nucun ma'. Noro jujun oro hwanana nexi' co om tomi' ha' je na nana pain cara pane. Om ta an xiho' xuxun ta.

¹² Oro capijacon Iri' Jam ma', ac ca e' ne ara xi' na. Meo napari'. Hwara' opa na. An xiho' paxi' nain cote ne quit ca ma' 2 quirinain ma', ca xa xa pi' ma'. Ane xa mip pan ne capijacon Iri' Jam ne. Ac ca wac corom capari' na. Ac ca hwet nein na iri' ximixi' pain tamataraxi' je pain oro ca param nexi' ca'. Ac ca hwet nein na oro ca coromicat nexi' pain ximixi'. An hwet mi' napari' pain ca coromicat nucun pain ca coromicat mi' pan capari' pain oro ca param nexi' je pain oro ca coromicat nexi' ca' quem. ¹³ Oro carawa ca tomi' ma' pin ca Iri' Jam ma', om ca xaraxa ca' ac con. Wari' quem, om ca xaraxa ca' ac xun quem. Om ca ma' camain' ne ca mam' tatep pa' ac xijexi' con. Querec querec pi' pin napari', taxi' taxi' pi' pin nain oro ca ara iri' quem. Main maqui' tara xec pain ca tomi' hwet xun iri' pain oro ca ara iri' quem.

Jeju co sacerdote co taramaxicon hwara' opa ta

¹⁴ Je ca tomi' xuhu' ca'. Ma' napari' sacerdote co iri' taramaxicon hwara' opa cwa', wirico Jeju co Panxica Iri' Jam cwa'. Corom hwet non Cote ca pain iri' ca pe pan ca pain pawin cain. Je ta hwara' opa cara xi' pain ca howa xun ca', pain ca tomi' hwet xuxun oro wari' pain ca howa xun quem.

¹⁵ Xi taxi' ara capari' pain ca om hwara' opa nexi' pain ca wari' nexi' ta. Ha' non pain ca xiram pa' capari', xi wara tomi' querec ximao pan ara tocwa pain oro ca caracat wa pane ta. Wirico Caxicon Jam co caracat ra caracat ra non pane, win capari' pain xocori ca' quem. Ane om caracat camain' ca ne. ¹⁶ Je ta wixicam xun Iri' Jam co xiram pa' taxipa' ma', co quep xiho' taxipa' ma' quem. Om ta jin' xun, ac ca wixicam xun tara pain iri' ca xao pe pe ca pain pawin cain. Ma' ta xiram pa' capari', ma' ta quep xiho' capari' quem. Ximin iri xi' ne, pain ca ma' capari' oro ca to' i'ina napari' ma', xiram pa' hap ac capari' tara, quep xiho' hap ac capari' tara quem.

5 Tora' iri ta sacerdote co iri' taramaxicon ne, wum ta ac tocwa na wari' ma', co win ma' ne nonon oro wari' ma'. Taramaja mi' ne, quep xiho' roron oro win ma' ma ma', pain ca taramaja mi' mapa' ta pan ac con na Iri' Jam. Wum tara co mi' napa' pain oro carawa nucucun ca mi' xim cacapa' ma', tom tain' mi' ne pain winacocon quem. Ma' ta xic am pin tain ca caracat nucucun ta ac con na quem. Ac i ma' ac i ma' xam' tata oro sacerdote co iri' taramaxicon nana pain ca tora' tococwa pane. ² Sacerdote co iri' taramaxicon ma', ha' non pain ca xiram pa' cocon oro win ma' ca co om taraju pa' nana ma', co xuruxut ximama' nana ma', xi wari' ara ca ta. Ma' non oro ca to' i'ina non quem. ³ Je ca tom tain' mi' taxipa' ne pain carawa ta con Iri' Jam ma'. Ma' ta xic am pin tain ca caracat nem, ma' ta xic am pin tain ca caracat nucucun oro win ma' ma ma' quem non.

⁴ Pain ca tora' tocwa sacerdote co iri' taramaxicon ma', om ca na ne pain ca wata' ta, param inain ta ca ma'. Wirico Iri' Jam pan na co tora' non pain ca sacerdote co iri' taramaxicon pan ra ta con ma'. Win con Arão cara pane, pain ca tora' pan con pain cara pane. ⁵ Ac i ma' na con Cristo pane quem. Om ca tomi' ca' ca: Wata' tara, param inain, sacerdote co iri' taramaxicon pan ta' ta, om ca tomi' xec xec ac i ma' ca pane. Wirico Iri' Jam co mi' non pain. Tomi' ca' non:

Panxita' inem,

Te pin mapa' pain xec ca'.

Ac i ma' na ca tomi' con pane. ⁶Ma' na wirain ca tomi' nucun ca xirao' an pe xine pain capijacon quem. Ca' na con:

Sacerdote cara ra,

win ne ca sacerdote ca Melquisedeque pane.

Ac i ma' na ca tomi' nucun pane.

⁷Pain ca pe pe wet cain macan' Jeju pane, tomi' non Cote ca. Merem na, merem mip na pain ca tomi' con ma'. Aca na quem. Xiram pa' ne me Te ac con na. Wum co to' witan taxi' ca' napa' pain ca mi' pin wa ca' ac con na. Ha' ac ca na quem, xi om ne ca xut xo' pan ara ca pain ca win xumu e' cain ca param nucun ta. ⁸Panxica Iri' Jam paxi' na, ane mam' tomi' ha' taxi' pin con Cote ca pain oro ca to' i'ina non pane ne. ⁹Pi' pin iri na ca taramaja nucun ca ara ra con Cote ca ne, pain ca hohot pin mapa' ta con ma', ha' pin ac con na pain ca to' witan cara tococwa oro co tomi' ha' nonon. ¹⁰Xi wara tora' ara con Iri' Jam pane ta. Sacerdote co iri' taramaxicon ra ta non, win ne ca sacerdote ca Melquisedeque cara pane ac con na pane.

Ca om na ne pain ca an pe tocwa Iri' Jam

¹¹Mija mija wet paxi' na ca tomi' xo' xim xuhu' con Jeju cwa', pain ca an xiho' con Melquisedeque cara pane. Ane i'ina capa' pain ca tomi' xo' xuhu' ne, xi taraju wet hwe ta. Ac ca horoman pin cuhu' na ca taraju wa. ¹²Pain paxi' na ca howa hun Jeju pane. Wahu' pan xirara co ca' na nonon pain capijacon Iri' Jam oro win ma' hwe ta. Ane om ha' cuhu' ne. Na e' na pain ca winim' hun wari' co ca' na mami' nuhu' pain capijacon Iri' Jam ca om i'ina taraju pa' wa. An xiho' huhun oro hwijima' co xo' camara' nana ma', co xoc e' nana catat, co om cao' ac nanain cwerein carawa ta. ¹³Noro jun wari' co param e' nain leite ma'. An xiho' non pije' co xo' pan'. Om om wet na ximicon. Om ca taraju pa' cain capijacon Iri' Jam pain ca xuruxut xo' je, param e' jein carawa ca hohot napa' ta capari'. ¹⁴Co ximicon hwanana nana ma' iri na ne, om ca an xiho' cocon hwijima' pain ca param e' cacain leite. Param nanain cwerein carawa, param nanain oro coximain capijacon Iri' Jam. Taraju pa' nana, coromicat xo' nana. Querec pin' taxipa' nanain ca awi wa, querec pin' taxipa' nanain ca pan tem wa quem.

6 Je ca tomi' xuhu' ca'. Hohot na pain ca om noro in hwet noro in hwet e' xin oro capijacon Iri' Jam con Cristo ca wara ca' na qui' urut pahu' pain cara pane. Ca' na ca' na tiquin' xut urut pahu' pain oro xocori capijacon Iri' Jam con Cristo quem, ma' ta horon horon tiquin' hwe pain ca howa nuhu' ta urut pahu'. Wara pijim' ca' ara xi' urut pahu' pane: An to pin jein oro ca ara ximama' ne wara curuhu' ma'. Howa e' jun Iri' Jam ta, ac i ma' na ca wara pijim' urut pahu' pane. ²Wara tomi' xo' urut pahu' pain ca ca' na xine pain oro ca ja' wa com, je pain ca quep tocwa pain winacon wari' ma' quem. Wara tomi' xo' urut pahu' pain ca to' e' mami' xun tococwa co wara cono' nana, je pain ca tomi' xo' xun tococwa pain oro ca ara caca oro wari' pain ca e' e' wet nucucun pane quem. ³Je ca tomi' xuhu' ca'. Mo ta mi' caparut pain ca ca' na ca' na tiquin' urut pahu' pain oro xocori capijacon Iri' Jam con Cristo cwa', ca' na mi' ac urut pahu' pain tara ta.

⁴Tomi' xuxun oro wari' co wara taraju pa' paxi' nanain capijacon Iri' Jam ma', xi om ne ca toha mi' ara tococwa pain naran nucun pain ca coromicat nucucun ta. Wara querec pin' paxi' nanain oro ca mi' xim capari' Iri' Jam. Wara meo paxi' nonon Tamataracon quem. ⁵Wara querec pin' paxi' nanain ca awi tamana nein oro capijacon Iri' Jam ma'. Wara querec pin' paxi' nanain ca hwara' opa nucun ca an hwet pe ta' ca Cristo pain ca aram aram in qui' ta' nucun quem. ⁶Ane an pe pin cocon Iri' Jam ne. Om ca ha' mami' ne pain ca cwirin' je cwirin' je tococwa ta. Xi an xiho' ara cocon co tatatain mi' nonon pain pana Panxica pane ta. Ac ca tatatain mi' mami' pan cocon na pain pana. Oro wari' co querec nonon pain ca om cwirin' nucucun ma', tomi' xirac tomi' xirac pan ac cocon na quem.

⁷Noro jein macan' pain xitot ma'. Pan' ho' pan' ho' iri na xowi' ne, tototoc ac nein na com, mi xo' ac ne na oro ca oin' ca waximain, cao' cao' ac cacain na quem. Iri' Jam ma', param mi' nain pain ca awi wa xitot ca ac i ma' ma'. ⁸Xitot ca om awi camain' ma' iri na ne, pain ca mi e' nein oro caji pi je oro caji nahwarac ma' quem, noc ac xine na. Tomi' noro ta. Aram aram tom pin ac xine tara quem.

⁹Je ca tomi' xuhu' pain ca tomi' querec te xuhu' ca'. Xirao' mi' ac i ma' paxi' inuhu', ane om toron capa' xumu pahu' ne. Taxi' inuhu' pain ca om an xiho' huhun oro co an to pin nonon Iri' Jam pane. Howa hun Iri' Jam pain ca to' witan pin xim cuhu' ma'. ¹⁰Om ca pan tem camain' ca Iri' Jam, ara xo' taxipa' na. Om ta ji'am pin cuhu' pain ca taramaja tamana nuhu'

ma', om ta ji'am pin cuhu' pain ca an hwet hwein ca tomi' querec te nuhu' pain ca om noc hun ma' quem, xi quep xiho' ara huhun oro win howa hwe ta, quep xiho' quep xiho' wet huhun pain xocori ca' quem. ¹¹ Param param xam' inuhu' pain ca quep xiho' quep xiho' tiquin' huhun quem. Jain jain jujun pain. Quep xiho' quep xiho' maqui' pa' ac cuhu' tara Jeju. Ma' ta om i'ina ne xumuhu' pain ca winim' xin hwein oro ca param mi' cuhu' Iri' Jam ta urut pahu'. ¹² Ma' ta om jam' ne curuhu'. Param inuhu' pain ca an xiho' huhun oro co howa nonon Iri' Jam ma', co winim' cara nonon ma', co cut xin nanain oro ca wara tomi' pe mi' tococwa pain ca howa nucucun je pain ca winim' cara nucucun ta.

Ca om mixein ca Iri' Jam pain ca tomi' an pe xo' cain ca tomi' nucun

¹³ Noro jun Iri' Jam con Abraão cara pane. Tomi' pe mi' iri non pain ca tomi' nucun ne, tomi' ac con na. Ara mi' xim pain ca tomi' pe xim ca' non. Wata' pain ca Iri' Jam ta' ca', ara mi' xim pain ta non, an hwet mi' pan ac con na pain wixicon pain ca tomi' an pe cain ca tomi' nucun quem. Om ca an hwet mi' con pain wixicon xucun wari', xi ma' ca xucun wari' co hwara' opa tiquin' ca' non ta. ¹⁴ Tomi' ac con na: Tomi' iri'o' inem, ara mi' xim pain ca awi wa ta, to' mija toton oro waram winam quem ta na ca tomi' con pane. ¹⁵ Winim' cara ac con na Abraão. Om ca toron ne ximicon. Winim' winim', aram aram ara mi' ac tocwa na pain ca wara tomi' pe mi' tocwa pane. ¹⁶ Ac i ma' ara xi' nana oro wari' co tomi' an pe mi' xucucun pain ca tomi' nucucun ma'. An hwet iri nanain wixicon wari' co hwara' opa tiquin' ca' nonon ma', am an hwet cacain wixicon Iri' Jam ma', tomi' ac xucucun na: Tomi' iri'o' ina ta, ara tain ca wara tomi' pe ne ta. Taraju napa' Iri' Jam ta. Mo ta om ara tain, wap ma' tarapa' ne, ac i ma' na pain ca an hwet cain wixicon Iri' Jam. Tomi' ac i ma' iri xucucun ne, tomi' caracan tomi' caracan om pin ac xucucun na quem. ¹⁷ Ac i ma' na Iri' Jam pane quem. Param napari' pain ca querec pin' xun pain ca om an in tain cain ca wara tomi' an pe xo' nucun ma', pain ca main ara mi' xim xuhu' pain oro ca wara tomi' pe mi' xuhu' ca' capari'. Je ca an hwet pan cain wixicon pain ca tomi' pe mi' capari' pain ca tomi' nucun. ¹⁸ Je ca tomi' xuhu' ca'. Ma' 2 na ca tomi' nucun Iri' Jam ta. Om ca an in camain' cain quem. Tomi' pe mi' napari' pain carawa ca ara mi' xim capari' ma', an hwet ac cain na wixicon pain ca tomi' an pe cain quem. Tomi' iri'o' na

quem, om ca mixein ac ca Iri' Jam. Tomi' ac i ma' napari', ma' ta hwara' opa hwe pain ca howa mahu' ma', pain ca wixicam mahu' pain ca winim' hwein xec nein ca ara mi' xim xuhu' pain oro ca wara tomi' an pe mi' xuhu' ca' napari'. ¹⁹⁻²⁰ Winim' cara iri urun Iri' Jam pain ca mi' xim capari' pain oro ca wara tomi' pe mi' capari' pane ne, to' hwara' opa pan ac capari' na pain ximixi' je tamataraxi' ca'. Om ca tara con ta'a camain' xun, xi om ne ca wara corom hwet ara con Jeju pane ta. Corom hwet non pain iri' ca pe pan ca pain pawin cain, pain iri' maxicon pain xijein cacaracon cote ca wom co wa pe nain xiricon cain. Wara corom hwet ca' napari' con, ma' ta tomi' mi' xuhu' con Te ta napari'. Xi sacerdote co iri' taramaxicon pin ara ca ta. Mao ac ne ma' tara con. Win ne ca sacerdote ca Melquisedeque pane quem.

Melquisedeque co sacerdote pane

7 Melquisedeque cara pane, wirico co taramaxicon pe ho' nonon oro wari' co to nanain Salém. Sacerdote na quem, taramaja mi' non Iri' Jam co Iri' Taramaxicon pan. In qui' iri na Abraão cocon oro wari' nucun pane ne, pain ca mixita qui' cocon oro taramaxicon pain ca to' quiji' qui' cocon pane, xut hwet pan ac con na Melquisedeque, tomi' mi' ac con na con Iri' Jam. Xiram pa' ron, ara mi' ron pain oro ca awi wa ta non. ² Abraão ma' iri na ne, mi' ac con na pain dízimo nein carawa ca cut ca' cocon pain oro taramaxicon ira. Ma' na ca tomi' mao ne wixicon Melquisedeque pane. Co taramaxicon xo' ta na ca tomi' mao ne wixicon. Wixinain cidade ca taramaxicon pe ca ma' iri na ne, je Salém ma', ma' na ca tomi' mao nein quem. Ca om toron ne ca xumu wa ta na ca tomi' mao ne Salém ma' quem. Je ca Taramaxicon co mi' nain ca om toron ne ca xumu wa ta na ca tomi' mao nein wixicon Melquisedeque pane. ³ Om ca taxi' tocwa cote ca cam jicon, om ca taxi' tococwa mana cojeo' ca quem. Om ca taxi' xine xec nein ca pan' qui' nucun, om ca taxi' xine xec nein ca mi' pin nucun quem. Sacerdote cara na. Je ca an xiho' paxi' con Panxica Iri' Jam pane.

⁴ Querec pin' xin ca hwara' opa nucun Melquisedeque cara pane. Taramaxicon na, hwara' opa tamana na pane. Je ca mi' pan con pain

7.1 Xijein wixinain Jerusalém na Salém ma'. 7.2 Ac i ca' na wari' co mi' nain dízimo nein oro carawa ca cut ca ma'. Cut 100 iri nain ne, mi' 10 ac cain. Cut 10 iri nain oro carawa ne, mi' xica' pe ac cain na quem.

carawa hwanana nexi' Abraão cara pane. Mi' non pain dízimo nein oro carawa ca cut in ca' cocon pain oro taramaxicon co mixita ca pane. ⁵Ma' na ca xirao' nucun Moisés pain ca mi' xun tococwa pain dízimo oro waram winacon Levi co sacerdote nana pane. Xirao' mi' ca' tata: Mi' tuturuhu' pain dízimo nucucun oro win ma' nuhu' ta tata. Ca nari nuhu' paxi' tatara, xi om ne ca hwanana ne hwanana ne pi' pin ara hun Abraão cara pane ta tata. ⁶Melquisedeque ma' iri na ne, om paxi' na ca hwanana ne con Levi cara pane, ane cut cain dízimo nucun Abraão ne. Tomi' mi' ac con na con Iri' Jam. Xiram pa' ron, ara mi' ron pain oro ca awi wa ta non. Wirico Abraão pan, co wara tomi' pe mi' ca pain ca tomi' nucun Iri' Jam pane, wirico co tomi' mi' wa con Iri' Jam. ⁷Taxi' irin i ca', pain ca om hwara' opa homa ca wari' co tomi' mi' wa con Iri' Jam ma'. Hwara' opa pan na wari' co tomi' mi' non con. ⁸Ma' na i ca' quem, cocon oro sacerdote co hwanana ne nonon Levi cara pane. Mi' tata pain dízimo nucucun oro win ma' caca ma', aram aram cono' pin ac caca na quem. Melquisedeque cara pane iri na ne, co mi' wa pain dízimo quem, e' cara na ta na ca xirao' pe xine pain capiacaon Iri' Jam. ⁹Ma' na i ca' con Levi cara pane quem. Cut paxi' nain dízimo nucucun oro wari' pane, ane ac ca mi' pan con ne pain dízimo Melquisedeque quem ne. Mi' iri non pain dízimo Melquisedeque Abraão pane ne, ac ca mi' wi pan con pain na Levi quem, ac je na. ¹⁰Xi om om wet ara ca Levi pane ta. Xut hwet iri non Abraão Melquisedeque pane ne, om ca pan' querec ca Levi ira. Ac ca pe ho' pe ho' wet cain na curucun hwanana nucun Abraão pane ira. Je ca ac ca mi' wi con na pain dízimo Levi pane, pain ca mi' con pain dízimo Melquisedeque Abraão pane quem.

¹¹Je ca tomi' xuhu' ca'. Mi' iri tata pain ca xirao' nucun Moisés oro wari' pane ne, mi' ac tococwa na pain ca taramaja nucucun oro waram winacon Levi co sacerdote nana quem. Mo xi to' witan taxi' capari' ca taramaja nucucun ma', je xi om mi' mami' capari' con xucun sacerdote co an xiho' non Melquisedeque quem? Je xi om mi' capari' con xucun co jimao ca' non Arão quem? ¹²Om na, taraju pa' xi' e'. An in iri ta ca tomi' xo' xine ca tora' ac xine oro ca ara je tococwa oro sacerdote ne, na e' na pain ca an in xine oro ca xirao' nein quem. ¹³Je ca tomi' xuhu' ca'. Xucun sacerdote co tomi' mi' wa cwa', pain ca an xiho' con Melquisedeque cwa', om ca hwanana ne con Levi cara pane. Hwanana ne non xucun hwanana co om sacerdote camain' nana oro waram winacon pane. ¹⁴Xi taxi' ara

xun Taramaxicon nexi' Jeju cwa', taxi' urun pain ca hwanana ne con Judá cara pane. Om ca tomi' camain' tococwa oro waram winacon Judá pain ca sacerdote je tococwa pane, om ca xirao' camain' cain i ma' Moisés cara pane. ¹⁵ Pain ca tomi' ac i ma' iri' ca', taraju pa' xo' iri', xi ma' pin ara ca xucun sacerdote co an xiho' non Melquisedeque ta. ¹⁶ Xucun sacerdote co tomi' mi' iri' cwa', om ca sacerdote ra tocwa pain ca tomi' ha' xine oro ca xirao' nucun Moisés cocon oro sacerdote ta tocwa ma', om na. Sacerdote pin na, xi om ne ca hwara' opa nucun pain ca e' cara nucun. ¹⁷ Je ca xirao' an pe xine con, pain capijacon Iri' Jam quem:

Sacerdote cara ra,

win ne ca sacerdote ca Melquisedeque pane ta.

Ac i ma' na ca xirao' pe nein.

¹⁸ Je ca tomi' xuhu' ca'. Je i ma' ca to' om pin xine ca xirao' nucun Moisés cocon oro sacerdote. Xi hwara' opa ne pain ca quep xiho' cocon pain ca to' hohot tococwa con Iri' Jam. ¹⁹ Om ca to' hohot ac capari' con Iri' Jam ca xirao' nucun Moisés. Je ca mi' capari' pain xijein ca coromicat xo' nucun ma', pain ca mi' capari' con Jeju cwa', co awi tiquin' ca' nain ca xirao' nucun Moisés. Wirico co mi' napari' pain ca wixicam pin xun Iri' Jam.

²⁰ Sacerdote pin ra ta iri non Jeju Iri' Jam pane ne, tomi' an pe mi' non pain ca tomi' nucun quem, tomi' mip non. Wata' co sacerdote pin ra ta xim ca', om ta an in tain ca tomi' ne pum ta non. Om ca ac i ma' tococwa oro waram winacon Levi pain ca sacerdote je tococwa pane. ²¹ Ane tomi' mip con Jeju ne. Sacerdote pin ra ta iri non ne, tomi' ca' ac con na:

Tomi' an pe mi' inem pain ca tomi' ne ca'.

Wata' pain ca Iri' Taramaxicon ta, om ta an in tain ca tomi' ne ta.

Sacerdote cara ra ta.

Ac i ma' na ca tomi' mip con pane. ²² Je ca taxi' xun Jeju pain ca tomi' an pe xo' xim capari' pain xocori ca tomi' xo' nucun Iri' Jam cwa', ca awi tiquin' ca' nain ca xirao' nucun Moisés ma'.

²³ Je ca tomi' xuhu' ca'. Mija nana oro sacerdote pain cara pane. Om ca sacerdote cara caca, xi om ne ca cono' ho' cono' ho' caca ta. Ma' iri na xucun ma' ne, taramaja taramaja ac ca na, mi' pin ac ca na, ja' corom mao ac con na xucun ma' quem. Je curucucun mao na pain ca ja' corom mama' xucucun pane. ²⁴ Ane sacerdote cara ca Jeju ne, xi e' cara ara ca ta. ²⁵ Je ca ha' con pain ca to' witan cara capari' pain ca to' wixicam pin

capari' con Iri' Jam. To' witan cara napari', xi e' cara pan ara ca ta. Ma' ta tomi' mi' xuhu' con Te ta napari'.

²⁶Wirico Jeju co sacerdote co iri' taramaxicon ta. Wirico co hohot ma', pain ca quep xiho' capari' pain ca ximin nexi' ca'. Awi tamana na pain ca om caracat camain' nucun. Om ca pan tem camain' ca. Om ca ma' camain' con carawa ca ja' tomi' em' tocwa pain ca caracat wa. Pe ni ca' nonon oro caracat. Mi' non pain ca taramaxicon hwara' opa wa Cote ca, taramaxicon pe tiquin' ca' nain iri' pawin cain. ²⁷Om ca an xiho' cocon oro xucucun sacerdote co iri' taramaxicon nana pane, om ca cuc cuc tocwa pain ca tama' tom tain' mi' ne pain carawa pain oro xijein xec ta con Iri' Jam. Oro xucucun sacerdote co iri' taramaxicon nana pane, tom tain' mi' nonon pain carawa pain oro xijein xec, ma' ta xic am pin main ca caracat nuxut ta nonon, tom tain' mi' ac cocon na pain carawa, ma' ta xic am pin main ca caracat nucucun oro wari' cwa' ta nonon quem. Jeju ma' iri na ne, mi' pan xucun con Iri' Jam pain ca om nain ho' xucun pain ca mi' pin wa pane. Pain ca mi' pin nucun pane, mi' pin na. Om ta mi' pin mami' ca quem. ²⁸Je ca tomi' xuhu' ca'. Pain ca xirao' nucun Moisés ma', tomi' xo' tata pain ca tora' tococwa oro sacerdote co iri' taramaxicon nana pane. Wari' nana co tora' wawa, ma' taxipa' na oro ca to' i'ina nonon. Pain pin iri na ne, aram aram tomi' mip pan ac ca na Iri' Jam ma', pain ca tomi' an pe cain ca tomi' nucun con Panxica pane. Wirico Panxica co sacerdote co iri' taramaxicon. Hohot cara tara, om ta caracat camain' ca ta.

Ca ma' capari' sacerdote co iri' taramaxicon cwa', co tomi' mi' napari' con Iri' Jam

8 Oro ca xirao' mi' xuhu' ca' ne, pain ca tomi' xo' xuhu' cocon oro sacerdote cwa', tomi' mi' inuhu' con sacerdote co iri' taramaxicon. Taraju pa' je e'. Ma' napari' sacerdote co iri' taramaxicon. Xao pe ho' nain iri' cwerein ca mam' xao pe nucun Iri' Jam cwain, co hwara' opa tamana cwain, co pe pawin cwain. ²Taramaja pe nain iri' xirim ca in ac pe tocwa Iri' Jam cwain, ca quep pan ca cain. Om ca quep cain wari', quep pan nain Taramaxicon Iri' Jam.

³Pain ca tomi' xo' tococwa oro sacerdote co iri' taramaxicon nana ma', wirico Iri' Jam co taramaja mi' xine nonon. Cut mi' xine pain oro carawa

ca mi' xim cacapa' oro wari', tom tain' mi' xine pain oro winacocon quem tata. Ac i ma' na con sacerdote nexi' co iri' taramaxicon quem. Na e' na pain ca ma' con carawa ca mi' ton con Iri' Jam quem. ⁴Mo xi pe cain macan' pain xocori ca', om xi sacerdote co iri' taramaxicon camain' ca, xi wara ma' ara caca oro xucucun sacerdote co ara nanain oro ca taramaja wa ca xirao' mi' ca Moisés cara pane, pain ca cut mi' cocon pain carawa Iri' Jam ma'. ⁵Taramaja to nanain xiricon Iri' Jam ca pe nain macan' ca', ca an xiho' e' nein xiricon Iri' Jam ca pe nain pawin cain. Je ca hu tocwa Moisés pane quem, pain ca quep tain cain xiricon Iri' Jam ca mam' quep xine pain tapari carawa pane. Hu ca' non Iri' Jam: Ma' tara xumum me. An xiho' an xiho' pi' pin rain oro jaminain coximinain ca an hwet mi' xim pain tamain pacun ca' non. ⁶Ca taramaja wa ca mi' tocwa Jeju ma' iri na ne, pain ca to' wixicam capari' con Iri' Jam ma', hwara' opa tamana na. Hwara' opa tiquin' ca' nain ca taramaja nucucun oro sacerdote co taramaja to nanain macan' ca'. Win ne ca awi tamana pan ne xocori ca tomi' pe nucun Iri' Jam ca tomi' an pe xo' pan ca Jeju ma' quem. Awi tiquin' ca' nain ca wara tomi' xo' nucun pain ca xirao' nucun Moisés cara pane. Carawa ca tomi' pe capari' Iri' Jam pain xocori ca' quem, awi tiquin' ca' nain carawa ca wara tomi' pe mi' tococwa oro hwanana pane quem.

⁷Je ca tomi' xuhu' ca'. Om ca quep xiho' cocon oro hwanana wara ca tomi' an pe xo' nucun Iri' Jam. Je ca na e' ne pain ca tomi' an pe xo' mami' capari' pain xocori ca'. ⁸Ane om hohot pan cocon Iri' Jam ne. Tomi' ac tococwa na:

Maqui' ta' iri na oro xec pain ca tomi' an pe xo' mi' toton pain
xocori ca tomi' xo' ne oro waram winacon Israel ma',
cocon oro waram winacon Judá ma' quem.

⁹Tomi' xo' iri toton pain xocori ca tomi' xo' ne ne, om ta an
xiho' nein ca tomi' xo' ne pain ca tomi' cain' qui'
toton hwanana nucucun pain cara pane,
pain ca o qui' toton pane, pain ca cut in qui' toton pain
macaracocon oro wari' nein Egito pane.

Tomi' xo' paxi' inonon pane,
ane om howa cara cacapa' pane ne.
Je ca in ca' toton ma',

8.6 Pain xocori ca tomi' xo' nucun Iri' Jam ma', je ca tomi' pe mi' capari' pain ca to' witan xim capari' pain ca howa xun Jeju cwa'.

ac i ma' na ca tomi' ca Taramaxicon Iri' Jam.

¹⁰Maqui' iri tara oro xec nein xocori ca tomi' xo' ne ne, pain ca
tomi' xo' mami' toton ta' oro waram winacon Israel ma',
tomi' ca' ac toton tara ta na Taramaxicon Iri' Jam.

An pe xo' mi' xuhu' pain ca coromicat nuhu' oro capiija
ca tomi' ha' je xuhu' ta.

Ac ca xirao' pe mi' xuhu' tara pain xumuhu'.

Iri' Jam ne ac mahu' tara, oro wari' ne ac xuhu' tara quem.

¹¹Om ta hu mami' camain' xujuhu' pain ca je xi querec pin' xun
Taramaxicon Iri' Jam quem xujuhu',
xi wara querec pin' xim ara mahu' ta.

Pain ca om hwara' opa nuhu' ma', pain ca hwara'
opa nuhu' ma' quem,

querec pin' querec pin' pi' pin ac mahu' tara ta.

¹²Xic am pin tain oro ca pan teretem nuhu'.

Om ta mam' pe wet mami' tain oro ca caracat nuhu' ta,
ac i ma' na ca tomi' ca Taramaxicon Iri' Jam.

¹³Pain ca xocori na ta cain ca tomi' xo' mami' nucun ma', taxi' urun
pain ca maho' pin cain ca wara tomi' xo' nucun pane. To' om pin nain ca
hwara' opa nein. Pan' am pin ta' na quem.

Xirim ca in ac pe tocwa Iri' Jam pain macan'

9 Je ca tomi' xuhu' ca', pain ca wara tomi' xo' qui' cocon oro hwanana
Iri' Jam pane. Tomi' xo' tata pain ca ac i ca' tara ca in ac mahu' ta
tococwa, tomi' xo' tata pain xirim ca quep je tococwa quem. ²An xat ac
cacain na xirim ca in ac pe xun tocwa Iri' Jam ma', ma' 2 na manain pain
tequipain. Maxinain Caramaxicon Iri' Jam nanain manain ca pe in qui'
ma'. Je ca pe ne too ca mam' tom pe ne naran. Je ca pe ne pana pain oro
capam' ca an toco' xo' mi' tocwa Iri' Jam ma' quem. ³Wa pe nain ximijain
xirim cote ca wom co tao' caho' nain wirain manain pain paxicom cain.
Pain xijein cacaracon ma', je ca pe ne Iri' Maxicon Iri' Jam. ⁴Je ca pe ne
pana ca toto pa' xine pain ouro ma', ca mam' tom pe xine incenso ma'.
Pe nain i ma' wirain pana quem, iri' panaxicon Iri' Jam ca mam' querec
pin' tocwa pain ca tomi' an pe xo' mi' qui' tococwa pain ca tomi' nucun

oro hwanana pane quem. Toto pa' ta pain ouro quem, pain tequipain je pain xonein ca hwet pe nein, je pain oro quirinain quem. Pain tequipain ma', je ca pe ne too ca cut ho' to xine capam' ca camara' qui' nain pawin pain mahweri pane. Ouro na too nein. Ma' na pana ca mam' pan xu ca Arão cara pane quem, panaxicon ca orot pin pane. Ma' na pacun ca xirao' pe xine ca wara tomi' xo' nucun Iri' Jam pane quem. Je ca cut ho' to xine pain iri' panaxicon Iri' Jam ma'. ⁵Ma' 2 na jamicon querubim co pa xat tapaxicocon ma', co coco' to nain cacarain capijain panaxicon Iri' Jam. Pa xat na tapaxicocon, taxo' caho' ac cacain na ca pe pan ne ca hwara' opa nucun Iri' Jam pain capijain panaxicon ma', ca xic am pe xine ca caracat nucucun oro wari' ma'. Om ca ha' capa' pain ca tomi' xi' ca' tomi' xi' ca' xam' xuhu' pain oro coximinain caramajinain xirim ca'.

⁶Quep awori xo' pin ac i ma' nanain xirim je oro caramajinain ma', taramaja to ac cacain na oro sacerdote. Corom taxipa' nanain manain ca pe in qui' ma', ca Maxinain Caramaxicon Iri' Jam caca ma'. ⁷Pain wirain manain ma' iri na ne, ca pe in mao ma', pain Iri' Maxicon Iri' Jam ma', corom xica' pe na sacerdote co iri' taramaxicon. Om ca corom ximao ca pain oro xijein xec quem. Maqui' iri na iri' xec pain oro cawaxi' ne, corom ac cain na. Om ca na ne pain ca corom e' cain quem. Na e' na pain ca mam' corom ca pain wic. Mi' ac con pain na Iri' Jam. Ma' ta xic am pin main ca caracat ne ca', ma' ta xic am pin main ca caracat nucucun oro wari' pain ca ara mapi' cacain ca caracat nucucun ma' quem ac con na. ⁸Ac i ma' na ca taramaja caca oro sacerdote pain cara pane, pain ca taramaja to cacain xiricon Iri' Jam ca pe nain macan' pane. Je ca mam' to' querec pin' capari' Tamataracon Iri' Jam pain i ca' quem. Tomi' xo' ca' napari': Pain ca taramaja to taramaja to wet cacain Maxinain Caramaxicon Iri' Jam ma', ca pe in qui' ma', om ca pa querec ne wanaji Iri' Maxicon cain. ⁹Xiricon Iri' Jam ca pe nain macan' pane, tomi' joc mam' mi' nain oro ca ara ne pain ca in ac tocwa pain xocori ca'. Oro wari' co in ac nonon ma', pain ca mi' cocon pain carawa nucucun ma', je pain ca tom tain' mi' cocon pain winacocon ma' quem, om ca to' om pin ac xine ca toron ne ximicocon pain ca caracat nucucun ta. ¹⁰Oro ca ara caca pain ca in ac cocon Iri' Jam

9.5 Ac jam co taramaja mi' nonon Iri' Jam paxi' nana oro querubim ma', tomi' joc mam' mi' nonon Iri' Jam pain ca pe pan cain i ma'. 9.9 Tomi' mi' iri nain i ca' ne, pain ca in ac tocwa pain xocori ca' ca ca', tomi' mi' nain oro xec nein ca xo' xirao' qui' xine Hebreus pane.

ma', ara taxipa' e' nanain ca hu pan tococwa pain carawa ca cao' wa, je pain ca toc wa quem, je pain ca hohoc xo' xucucun quem. Tomi' ha' je e' tata, tomi' ha' tomi' ha' maqui' pa' ac cuhu' tara xec nein ca to' xocori pin tain cain oro ca tomi' xo' xim xuhu' ta nonon ma'.

Ca hwara' opa pan ne quicon Cristo

¹¹ Je ca tomi' xuhu' ca'. Maqui' pin na Cristo co sacerdote co iri' taramaxicon pane, co ara mi' napari' pain oro ca wara tomi' pe mi' capari' Iri' Jam cwa'. Corom pin nain xiricon Iri' Jam ma', ca om em' camain' ma', ca awi tiquin' ca' nain xiricon ca pe nain macan' ca', xi quep cacain wari' ta. ¹² Corom mao iri nain Iri' Maxicon Iri' Jam Cristo ne, pain xiricon pain pawin cain, om ca mam' corom cain quinain bode, om ca mam' corom cain quinain wijimain boi quem, om na. Mam' corom pan nain iri' quicon. Pain ca corom mao cain pane, corom mao na. Om ca corom mao mami' cain quem. To' witan cara ac capari' na quem. ¹³ Je ca tomi' xuhu' ca'. Noro jun wari' co ma' non carawa ca om hohot non Iri' Jam ma'. Cam huco' iri ta pain quinain bode je pain quinain boi ne, pan tatain mi' iri ta pain topacon nein wijimain aramanain boi ca tom pin xine ma' ne, to' hohot ac xine na curucun con Iri' Jam. ¹⁴ Ac i ma' na ca hwara' opa ne quinain oro carawa ma'. Hwara' opa paxi' na quinain oro carawa, ane hwara' opa tamana pan ne quicon Cristo ne. Hwara' opa tiquin' ca' nain quinain carawa, xi om ne ca awi tamana ara ca Cristo ta. Om ca em' camain' ca. Ha' non pain ca mi' pan xucun con Iri' Jam pane, xi quep xiho' pan ara con Tamataracon ca e' cara ta. To' hohot pin napari' quicon. To' om pin nain ca em' nexi' pain ximixi' pain ca coromicat nexi'. To' om pin nain ca toron ne ximixi' pain ca caracat nexi'. Om ca to' i'ina mami' capari' oro ca ara nexi' ca to' cono' pin napari' ca'. Ha' pin ac capari' na pain ca in ac xun Iri' Jam co e' cara quem.

¹⁵ Je ca tomi' an pe xo' cain xocori ca tomi' xo' nucun Iri' Jam Cristo ma'. Ma' ta ha' cuhu' pain ca aram aram cut xin hwein oro ca awi wa ca tomi' pe mi' xihwe ca', ca om pi' ra ha' ca' tata pain ca xo' howa xine qui' tococwa pane. Xi mi' pin pe ara cain maxicocon Cristo pane ta. To' witan ca' ac tococwa na pain oro ca caracat nucucun pain ca om tomi' ha' qui' cacain ca wara tomi' xo' nucun quem.

¹⁶ Tomi' xin documento ca xirao' pe ca waximain carawa ma', pain ca xirao' pe cain wixicocon oro wari' co cut xin nanain caramaxicon pain ca aram aram mi' pin nucun ma'. Mo ta aram aram mi' pin ca waximain carawa ma', mo ta cut pin xin cacain caramaxicon oro wari' co xirao' pe wa wixicocon ma', na e' na pain ca querec pin' cain' tocwa pain ca mi' pin ca waximain carawa. Mi' tiquin' ac tococwa tara pain caramaxicon. ¹⁷ Mo ta e' e' wet ca waximain carawa ma', om ca mi' tiquin' ac xine caramaxicon. Xi mi' tiquin' e' ara xine caramaxicon pain ca aram aram mi' pin nucun ta. ¹⁸ Je ca to' pa' mi' jun pain winahu' Iri' Jam ta tococwa oro hwanana pain ca wara tomi' xo' nucun pane quem. Om iri na ca ao ne quinain winacocon ne, om ca to' hwara' opa ac xine ca wara tomi' xo' nucun ta. ¹⁹ Noro jun Moisés cara pane. Tomi' hwet tomi' hwet pi' pin iri nonon oro wari' pain oro ca ara je cocon Iri' Jam pane ne, cam pe ac cain na quinain wijimain boi je quinain bode ma', joc wanan ac ca na pain com. Cam huco' mi' na pain ca xirao' pe xine oro ca ara je ca Iri' Jam ma', cam huco' mi' ac cocon na oro wari' quem. Mam' cam huco' na pain tenenein ovelha ca toto paca' ma', ca pao' pe xine pain wijimain taparain pana ma', hissopo na wixinain. ²⁰ Tomi' ac tococwa na oro wari': Je i ca' wic ca mam' tomi' an pe xo' nain ca tomi' xo' nucun Iri' Jam ca', pain ca tomi' ha' jein oro ca ara je xuhu' ca' na ca tomi' tococwa pane. ²¹ Cam huco' ac i ma' nain wic pain xiricon Iri' Jam je oro coximinain ca mam' in ac cocon quem. ²² Ac i ma' na ca to' om pin xine ca em' nein oro carawa quem. Oro carawa paxi' na, je wic ca to' om pin nain ca em' nein. Mo ta om ao mao ne wic, om ca xic am pin ac xine ca caracat wa ta na. Tomi' ac i ma' ara xi' na ca xirao' nucun Moisés.

²³ Xiricon Iri' Jam ca pe macan' pane, an xiho' e' nain iri' xiricon ca pe pawin cain. Oro coximinain quem, an xiho' e' nain oro coximinain ca to pawin cain. Na e' na pain ca mam' to' hohot pin xine pain quinain carawa pane quem. Iri' xiricon je coximinain ca to pawin cain iri na ne, na e' na pain ca mam' to' hohot pin xine pain xijein wic ca awi tiquin' ca' nein quinain carawa ma' quem. ²⁴ Je ca tomi' xuhu' con Cristo cwa'. Om ca corom hwet con Iri' Jam pain Iri' Maxicon pain xirim ca quep pan caca wari' pane, ca an xiho' e' nain iri' xiricon pain pawin cain, om na. Corom hwet non pain pawin cain. Je ca pe pan ca pain xocori ca'. Pe ho' non Iri' Jam, tomi' mi' napari' con. ²⁵ Om ca an xiho' con sacerdote co iri' taramaxicon co corom taxipa' nain Iri' Maxicon Iri' Jam pain xiricon pain

oro xijein cawaxi' ma'. Om ca an xiho' con sacerdote co iri' taramaxicon pane, pain ca mam' corom cain quinain carawa ma' quem, om na. Om ca mi' ho' mi' ho' pan xucun con Iri' Jam. ²⁶Mo xi mi' pin ho' mi' pin ho' ca ma', na e' na pain ca jain jain ho' jain jain ho' qui' ca pain ca xo' tomi' ma' qui' xine macan' pain cara pane. Ane om ac i ma' ca ne. Pain ca maqui' cain macan' ca', pain oro xec nein ca pi' pin ta' ne macan' ca', maqui' xica' pe na. Om ca maqui' mami' ca. Ma' ta mam' xic am pin tain ca caracat wa pain ca mi' pin ne ca', pain ca mi' pan xije con Te Iri' Jam ta na pane. ²⁷Na e' na pain ca cono' cono' xam' xi' iri' pain ca wari' nexi' ca'. Xica' pe tara ca cono' nexi', om ta cono' mami' iri'. Cono' pin iri xi' ne, tomi' xo' ac capari' tara Iri' Jam pain oro carawa ca ara iri' pain ca e' e' wet nexi' ca'. ²⁸Ac i ma' na Cristo pain ca mi' pin nucun quem. Mi' pan xucun con Iri' Jam, om ca ara mami' cain, om ca mi' pin mami' ca quem. Ma' ta to' om pin tain ca caracat nucucun oro wari' co mija nana ta na. Maqui' mami' tarain macan' quem. Maqui' mami' iri tara ne, om ta to' om mami' cain ca caracat nexi'. To' witan xuhu' pain ca winim' mahu' ta napari'.

Ca to' witan cara capari' Cristo

10 Oro ca xirao' nucun Moisés cara pane, an xiho' wijimain e' nain oro ca ara mi' xim capari' pain ca awi wa Iri' Jam cwa'. Om ca an xiho' iri'o' nein, tomi' joc mam' mi' e' napari' pain, ac ca querec tocohon e' xin na quem. Noro jujun oro co wixicam xun nonon Iri' Jam pain ca tom tain' mi' paxi' cocon pain winacocon ma'. Tom tain' ho' tom tain' ho' paxi' nanain pain oro xijein cawaxi' quem. Ane om to' hohot pin ac tococwa ne. Om ca to' hohot camain' tococwa pain ta. ²Mo xi mam' to' hohot pin tococwa oro co in ac xun nonon Iri' Jam ma', pain ca tom tain' mi' cocon pain oro carawa ma', tom tain' mi' tom tain' mi' om pin ac cocon pain xira. Je ca tomi' xuhu' ca'. Mo xi mam' xic am pin xine ca caracat nucucun pain ca tom tain' mi' tocwa pain carawa Iri' Jam ma', om xi toron mami' ne ximicocon pain ca caracat nucucun quem. ³Ane om ac i ma' ne cocon ne. Tom tain' mi' tom tain' mi' iri nonon pain carawa nucucun Iri' Jam

9.26 Taraju pa' je e'. Om ca tomi' mi' xine oro xec nein ca e' e' wet iri' pain xocori ca', om na. Tomi' mi' ta oro xec pain ca e' e' wet ca co ma' co xirao' pe nain Hebreus ca'. Ac i ma' ara xi' na ca coromicat nucucun oro hwanana cara pane. Pi' pin ta' ho' tara macan' ta nana pane.

pain oro xijein cawaxi' ne, to' mam' pe wet to' mam' pe wet ac tococwa na pain ca caracat nucucun. ⁴Xi ha' camain' nein quinain boi je quinain bode pain ca xic am pin nein ca caracat wa ta.

⁵Je ca tomi' ca' ca Cristo pain ca maqui' cain macan' pane quem. Tomi' ca' non Cote ca pane:

Om ca param main winacocon oro wari' ma',
pain ca tom tain' mi' xim pain quequem ma'.

Om ca param main oro carawa ca mi' xim quequem ma' quem.

Je ca to' ma' mi' mapa' pain cwere ca'.

⁶Om ca hohot quem winacocon ca tom tain' mi' quequem pane.

Om ca hohot quem pain ca xic am pin rain ca caracat
nuxut, xi om ne ca mi' ara urut pum pain
oro carawa ca' quequem ma'.

⁷Tomi' ac xim na:

Noro ne, awori pin ina ta Te Iri' Jam.

Ara tain inain ca param nem.

Win ne ca xirao' an pe xine pain capijam pata',

ac i ma' na ca tomi' con Cote ca pane. ⁸Pain ca tomi' con Iri' Jam Cristo pane, tomi' cain' ac con na: Om ca param main winacocon ca tom tain'

mi' quequem ma', om ca param main oro carawa ca mi' quequem quem.

Om ca hohot quem oro ca mi' quequem pain ca mam' xic am pin rain ca caracat nuxut pain ta quequem ma', ac i ma' na ca tomi' cain' con Iri'

Jam Cristo pane. (Taraju pa' je e'. Mi' jun pain oro carawa Iri' Jam ta paxi' nonon oro wari' Moisés ma', pain ca xirao' nucun ma', ane tomi' ac i ma' pan con Iri' Jam Cristo ne.) ⁹Tomi' tomi' wet ac con na. Noro ne, awori

pin ina ta Te Iri' Jam. Ara tain inain ca param nem, ac i ma' na ca tomi' con ma'. Wirico Iri' Jam co to' om pin nain ca wara coromicat xo' nucun

pane, ara hwara' opa pin ac cain na xocori ca coromicat xo' nucun quem.

¹⁰To' hohot pin napari' Jeju Cristo, xi om ne ca tomi' ha' ara con Iri' Jam ta. Je ca om nain ho' xucun pain ca mi' ne pain cwerem ta con pane. Mi'

pin ac ca na. Mi' xica' pe na, om ta mi' pin mami' ca quem.

10.9 Cain' ca coromicat xo' ca Iri' Jam quem? Taraju pa' je e'! To' om pin nain ca hwara' opa nein oro carawa ca mi' tocwa pane, pain ca xic am pin rain ca caracat nuxut caca oro hwanana pane. Ara hwara' opa pin ac cain na ca mi' pin nucun Jeju quem. Ca mi' pin nucun Jeju ma', pain ca ao mao ne quicon ma', je i ma' ca xic am pin nein ca caracat nexi' pain xocori ca' quem.

¹¹ Oro sacerdote ma', coco' to ho' nanain pana ca tom tain' pe mi' cocon pain carawa Iri' Jam. Ara ara nanain ca taramaja nucucun pain oro xijein xec. Tom tain' mami' tom tain' mami' nanain. Ane om to' om pin taxi' ac nein ca caracat wa oro carawa ca tom tain' caca ne. ¹² Carawa ca mi' ca Cristo ma' iri na ne, pain ca mi' pin caho' capari' pain ca caracat nexi' ca', mi' xica' pe pan ac xucun na con Iri' Jam. Hohot cara na ca mi' pin nucun, om ta mi' pin caho' mami' capari'. Mi' pin caho' iri napari' pane ne, xao pe ho' pin ac con na pain iri' curucun Iri' Jam quem. ¹³ Xao pe ho' xao pe ho' wet non pain xocori ca' quem. Winim' nain xec nein ca aram aram to' quiji' pin xun tococwa cocon oro co noc nonon ma'. Taramaxicon pe ho' cara ac tococwa tara ta. ¹⁴ Je ca tomi' xuhu' ca'. Xica' pe na carawa ca mi' con Iri' Jam pane, pain ca mi' pan xucun con. Je ca ha' con pain ca to' hohot cara pin capari' ca'.

¹⁵ Je ca tomi' cain' capari' Tamataracon Iri' Jam ca'. Tomi' ca' ac ne na:

¹⁶ Tomi' ca' na Taramaxicon Iri' Jam:

Maqui' iri tara xec nein ne,

tomi' xo' ac toton tara oro wari'.

Oro ca tomi' ne ca', pain ca tomi' ha' je toton ca',

an pe xo' mi' toton pain ximicocon.

Ac ca xirao' pe mi' toton tara pain ca coromicat nucucun.

Ac i ma' na ca tomi' hwet cain' capari' Tamataracon Iri' Jam. ¹⁷ Tomi' tomi' wet ac capari' na quem:

Om ta mam' pe wet mami' tain oro ca caracat nucucun.

Om ta mam' pe wet mami' tain oro ca pan teretem nucucun quem.

Ac i ma' na ca tomi' capari'. ¹⁸ Je ca tomi' xuhu' ca'. Om ca tom tain' mi' mami' ximahu' pain winahu' ca mam' xic am pin tain ca caracat nuhu' ta capari' Iri' Jam. Xi wara xic am pin ara capari' pain ta.

Ca wixicam pin xun Iri' Jam pain ca howa cara xun ca'

¹⁹ Je ca tomi' xuhu' ca' xere. Ha' pin napari' pain ca wixicam pin xun Iri' Jam. Om ca jin' xun, om ca hehe xun. Ac ca corom hwet xun na pain Iri' Maxicon cain, xi om ne ca ao mao ara ne quicon Jeju pain ca mi' pin caho' capari' ta. ²⁰ Mi' pin iri na ne, ac ca wein mao ca na cote ca wom co tao' caho' nain Iri' Maxicon Iri' Jam ca pe pan ca cain. Ac i ma' na ca

pa mi' capari' pain xocori wana ca corom hwet ac xun ca', e' cara ac iri' tara quem. ²¹ Je ca tomi' xuhu' ca'. Ma' napari' iri' sacerdote co hwara' opa tamana cwa', co querec wet napari' pain ca xiricon Iri' Jam iri' ca'. ²² Je ca tomi' ca' xuhu' ca': Mam' wixicam pin xun Iri' Jam pain ca win xumu iri'o' xun, je pain ca howa mip xun ca'. Om ta tara con ta'a camain' xun pain ca xic am pin capari' pain ca caracat nexi' ta. Ac ca cam huco' mi' capari' na pain quicon Jeju pain ca coromicat pan teretem nexi' ca', ac ca hohoc xo' capari' na pain com ca awi tamana pain cwerexi' quem. ²³ Howa cara xun pain ca winim' xun pain ca mi' xim capari' oro ca tomi' pe mi' capari' ca'. Tomi' hwet xuxun pain ca howa nexi' oro wari' quem. Xi om ne ca taxi' ara xun Iri' Jam pain ca om mixein nucun ta. ²⁴ Ma' tara ximixi' pain ca hu caracan xijexi', ma' ta tomi' querec te tomi' querec te tiquin' xijexi'. Ma' ta ara mi' xijexi' pain oro ca awi wa quem. ²⁵ Om ta an to pin xin ca cut in xijexi' pain ca howa xun Jeju cwa'. Ma' ara xi' nana oro win ma' nexi' co an to taxipa' nanain ta. Om ta an xiho' xuxun. Tama' corom xi'. Ma' ta to' hwara' opa xijexi' pain ca howa nexi'. Na e' na pain ca hu xijexi', xi om ne ca taxi' ara xun Jeju pain ca maqui' ta' nucun. Wixicam pin ara xi' na xec nucun ta.

²⁶ Mo ta taraju pa' paxi' xin capijacon Iri' Jam ca iri'o' con Cristo cwa', mo ta je i ma' ira, caracat cara ma' xi' ne iri'. Cain' cain' xixi'? Xi ma' ne xijein carawa ca xic am ra ha' nain ca caracat nucucun oro wari' ta. Ma' xica' pe e' na curucun Jeju ta. ²⁷ Mo xi ac i ma' iri', mo xi caracat cara ma' xi' ne iri', na e' na pain ca jin' tamana xi' pain ca winim' xin carawa ca maqui' ta' ma'. Jin' e' xuxun Iri' Jam pain ca wap xim capari' pain ca caracat nexi'. Jin' e' xixin cote ne xe pain ca tom tom pi' pin xun tococwa oro wari' co noc nonon quem. ²⁸ Noro jun wari' co om tomi' ha' ra na nain ca xirao' nucun Moisés pain cara pane. Ma' 2 iri nana wari' co querec urut con nonon pain ca caracat nucun ne, am ma' 3 caca co querec urut con ta nonon ma', to' pa' pin ac tocwa na. Om ca xiram pa' camain' tocwa. ²⁹ Wap ac i ma' ta wari' co om tomi' ha' ra na nain ca xirao' nucun Moisés pane. Je ca tomi' xuhu' ca'. Cain' ca coromicat mi' hun wari' co tomi' xirac non Panxica Iri' Jam quem? Cain' ca coromicat mi' hun wari' co tomi' ximao nain quicon Jeju ca mam' tomi' an pe xo' cain xocori ca tomi' xo' nucun Iri' Jam ma', ca mam' to' hohot ton paxi' non ma' quem? Cain' ca coromicat mi' hun wari' co tomi' xirac nain Tamataracon Iri' Jam ca xiram pa' pan non quem? Om ca hohot ne pain ca wap mip tocwa ra? Hohot ne ca'

ira! ³⁰Taxi' ara xi' urun co ma' co tomi' ca' ma': Wata' co wap nonon oro caracat. Win hwe pane ac toton tara ta na. Tomi' nain i ca' quem: Wata' pain ca Taramaxicon Iri' Jam ta' ca', querec pin' iri inonon oro wari' pain ca caracat caca ma' ne, wap ac toton tara ta na. ³¹Je ca tomi' xuhu' ca'. Wari' co quep xat ca Iri' Jam co e' cara ma', pain ca wap ton tocwa ma', jin' tamana ac ca tara ta.

³²Ane tomi' xim xuhu' pain i ca' ne: Mam' pe wet jein oro ca hwet pa' nuhu' pain cara pane, pain ca xo' toha mi' qui' cuhu' naran nucun Iri' Jam pain ca taraju pa' pin hwein capijacon con Cristo pane. Mija paxi' na oro ca to' i'ina nuhu' pane. Jain jain paxi' hwe pane. Ane quereme hwein ne. ³³Ma' ho' ma' ho' na oro xec pain ca cut in xucucun oro wari' pahu', tomi' xirac tomi' xirac ac cucuhu' na, quep em' quep em' ac cucuhu' na quem. Ma' ac ne na oro xec pain ca quep xiho' huhun oro win ma' nuhu' co quep em' wawa pane quem. ³⁴Xiram pa' tamana huhun oro co tao' to wawa pain xirinain ca tao' to tao' to to wa ma'. Cut ca' iri xihwe pain oro caramajuhu' ne, tomi' querec te cara ac hwe na quem. Je i ma' ira, ma' ma' wet ara xi' napari' iri' carawa ca om pi' ra ha' cain, ca to pawin cain. Awi tiquin' ca' nain caramajixi' ca pe macan' ca' quem ac hwe na pane quem. ³⁵Je ca tomi' xuhu' ca'. Quereme cara je, ta jin' camain' hwe me ta. Mo ta howa cara hun Iri' Jam con Jeju Cristo ma', mi' ac xihwe tara pain ca awi tamana wa ta. ³⁶Na e' na pain ca quereme cara hwein oro carawa ca to' i'ina nuhu' ma'. Ara cara jein oro ca param nucun Iri' Jam ma', ma' ta aram aram mi' xim cuhu' pain oro ca tomi' pe mi' cuhu' ma'. ³⁷Je ca tomi' capari' capijacon Iri' Jam ca':

Maqui' ta' iri na co ma' co maqui' ta' ma'.

Om ta om om ca, maqui' ho' ta' na.

³⁸E' cara tara wari' ne co to' hohot ta' cwa', xi om
ne ca howa ara capa' ta.

Mo ta in ca' capa' ma', om ta hohot capa' ta,
ac i ma' na ca tomi' ca ma'. ³⁹Ane om an xiho' xuxun oro wari' co in ca' nonon Iri' Jam ne, co to' om pin xun wawa ma'. Xi an xiho' ara xuxun co howa cara nonon Iri' Jam con Jeju Cristo ta. To' witan capari' ca' ira.

Oro hwanana nexi' co howa nonon Iri' Jam

11 Howa iri urun Iri' Jam ne, taxi' ac xun na pain ca ara mi' xim capari' pain oro ca winim' iri' ca', pain ca hwet pa' xim capari' ca'. Om paxi' na ca querec xin, ane taxi' xin ne. Ma' na ta irin, xi om ne ca howa ara xun Iri' Jam ta. ²Howa nonon Iri' Jam oro hwanana nexi' cara pane. Je ca hohot mahu' ta tococwa pane.

³Howa urun Iri' Jam. Je ca taraju pa' xin i ca' quem, pain ca tomi' ma' pin e' cain macan' je pawin pane. Mam' tomi' ma' pin nain pain carawa ca om querec ac xine, ma' pin ac ne na oro carawa ca querec iri' quem.

⁴Howa non Iri' Jam Abel cara pane. Je ca hohot napa' carawa ca mi' mapa' ta tocwa pane. Caim ma' iri na ne, om ca hohot con Iri' Jam carawa ca mi' con quem. Je ca querec pin' tocwa Abel ma', pain ca hohot con Iri' Jam. Xi om ne ca howa ara con ta. Aram aram mi' pin paxi' na Abel pane, ane hu hu wet capari' pain ca an xiho' xine pain ca howa ne ta capari' pain xocori ca' ne.

⁵Howa non Iri' Jam Enoque cara pane. Je ca an mao hap e' con pain ca e' e' wet nucun pane. Om ca mi' pin ca. Om ca mam' tocwa, xi om ne ca an mao hap ara con Iri' Jam pane ta. Xi querec pin' ara tocwa pain ca wara hohot con Iri' Jam pain ca om an mao hap querec tocwa pane ta. ⁶Je ca tomi' xuhu' ca'. Mo ta om howa xun Iri' Jam cwa', om ca hohot ac xun. Wixicam pin xun iri urun ne, na e' na pain ca howa xun pain iri' ca Iri' Jam nucun ma'. Na e' na pain ca howa xun pain ca mi' xim capari' pain oro ca awi wa pain ca win xumu xun ca'.

⁷Howa non Iri' Jam Noé cara pane. Tomi' hwet iri ta pain carawa ca om hwet pa' querec nonon ne, tomi' ha' ac con na. Quep ac cain na mam' horoho wa, ma' ta witan pin ta' cocon oro ca nari ne cwa' ta na pane. Howa pan iri na Noé ne, querec pin' ac tococwa na oro win ma' caca pain ca om howa nucucun ma', wap pin ac tococwa na quem. To' hohot pin inem, xi howa ara mapa' ta pan ac con na Iri' Jam quem.

⁸Howa non Iri' Jam Abraão cara pane. Je ca tomi' ha' con pain ca mao rain xijein macan' ca aram aram mi' xim ta con pane. Om paxi' na ca taxi' cain ca mao ta' ca pane, ane tomi' ha' ca ne. Mao ac ca na quem. ⁹Howa non Iri' Jam. Tatirim pe ac cain na macan' ca tomi' pe mi' tocwa ma'. Ac

11.7 Tomi' mi' nain cote ne xowi' ca pan' ta' ma'. Mija tara xowi' ta na. To' om to' om pi' pin totoron oro wari', to' om to' om pi' pin tarain oro carawa pain macan' ta non Iri' Jam.

macaracocon oro tatirim non. Pe nain caji xirim ca mam' quep xine pain tapari carawa. To nanain caji xirim Isaque con Jacó ma' quem, co tomi' pe mi' wi wawa pain macan' ca tatirim pe ca Abraão ma' quem. ¹⁰ Abraão ma', tatirim pe cara nain macan' ca wara tomi' pe mi' con Iri' Jam ma', xi om ne ca winim' ara cain xec nein ca pe tain cain iri' macaracon Iri' Jam ca pe pawin cain, ca xat pe nein iri' pacun ca to' teren nain cain. Wirico Iri' Jam co coromicat an pe xo' nain macaracon cain, wirico co quep nain quem.

¹¹ Howa non Iri' Jam Sara ma', manacon Abraão ma' quem. Om paxi' na ca ha' cam pain ca nam' wa ira. Mara' pin paxi' na ira. Ane mi' tacama pain ca wijima wa ne. Howa inon Iri' Jam, om ca mixein capa', ara mi' xim tarapa' pain ca tomi' pe mi' capa' ca' non pane. ¹² Mara' pin paxi' na Abraão, om paxi' na ca wanxi' mami' ac ca ira. Xica' pe paxi' na pain ca wari' nucun pane, ane mija pan caca oro waram winacon con panxica ne. Ac ca mija mija qui' ca oro pijo' pain pawin nana. Om ca pijim' ac tococwa, ac ca mija mija qui' ne namaji pain cacarain cote ne com nana pain ca mija nucucun.

¹³ Howa howa pi' pin nana oro co wara tomi' pe wawa pane. Howa howa, aram aram cono' pin ac caca na quem. Om paxi' na ca ara mi' tococwa pain oro ca wara tomi' pe mi' tococwa pain ca e' e' wet nucucun pane, ane howa cara caca ne. Main ara mi' tarapari' pain ta nonon Iri' Jam. Ac ca querec pira cacain na. Winim' nanain, tomi' querec te nanain. Tatirim e' urut, om ca wari' nein macan' ca' urut ta nana. ¹⁴ Pain ca tomi' ac i ma' caca pane, querec pin' tata pain ca win xumu cacain iri' macaracocon. ¹⁵ Mo xi mam' pe wet cacain wara macaracocon ca paca' caca pain cara pane, ha' xiroron pain ca in mama' wa quem. ¹⁶ Ane jain jain cacain xijein macan' ca awi tiquin' ca' nain wara macaracocon ne, jain jain nanain iri' macaracocon ca pe pawin cain. Je ca om wixipa' pan cocon Iri' Jam ma'. Tomi' querec te inuhu' pain ca Iri' Jam ne mahu' ta nonon. Je ca quep an pe xo' mi' cocon pain iri' macaracocon pain i cain.

¹⁷⁻¹⁸ Tomi' mami' xin ca howa nucun Abraão cara pane, co wanxi' non Isaque pane. Wara tomi' pe pan non Iri' Jam con Isaque ira: Wirico Isaque tara co wanxi' ton non winam ta, mija tamana ac caca tara oro waram winam con ta non ira, ac i ma' paxi' na ca wara tomi' pe con Iri' Jam pane. Ane tomi' pan xucun ne. Iri'o' tara xin ca howa capa' Abraão cwa' na, ara

querec ton ta ac ca na, tomi' ac con na. Mi' ne con iri' panxima co xica' xat nem ma', tom tain' mi' ne con ta ac con na. Ma ac ca na, om ca hehe ca, tomi' ha' xim ta ac con na. ¹⁹Ca' na ca coromicat nucun con Iri' Jam quem: Mo ta mi' pin ca panxita' cwa', ha' ac con tara Iri' Jam pain ca to' e' mami' con ta na ca coromicat nucun. Ac je paxi' na ca ara ca Iri' Jam quem. Ac ca to' e' mami' con na Isaque.

²⁰Howa non Iri' Jam Isaque cara pane. Je ca tomi' mi' cocon con Iri' Jam mana panxica ma', Jacó con Esaú ma'. Param inem pain ca ara mi' momon pain oro ca awi wa, ara mi' roron pain oro ca wara tomi' pe ma cocon me non Iri' Jam.

²¹Howa non Iri' Jam Jacó cara pane. Mi' pin ta' iri na ne, tomi' mi' mam' ac cocon na con Iri' Jam waram winacon con panxica José ma', tomi' mi' tomi' mi' xam' nonon con. Param inem pain ca ara mi' momon pain oro ca awi wa ta non cocon, quep xat ac cain na pana mam' pan xu ca pain ca in ac con quem.

²²Howa non Iri' Jam José cara pane. Mi' pin ta' iri na ne, tomi' mam' ac cocon na xurucun: Main paca' tatarain Egito oro waram winaxi' ta nonon, tomi' xo' ac cocon na pain aracon ma' quem. Aram aram mama' iri tataro oro waram winaxi' ne, cut mama' ac cacain tara ara ta ac cocon na quem.

²³Howa non Iri' Jam cote ca Moisés cam jicon cara pane. Je ca om jin' cocon taramaxicon pain ca tomi' mip nucun pane. Pan' mao iri na Moisés ne, noc xa pin ac cocon na. Xi querec pin' ara cocon pain ca awi tamana nucun ta. Ma' 3 na panawo' pain ca noc xa cocon pane.

²⁴Howa non Iri' Jam Moisés ma' quem, je ca tomi' ca' pan xucun pain ca aram aram hwara' pin nucun pane: Noc inonon oro wari' pain ca cawinacam panxica taramaxicon mami' cacapa' ta na ca tomi' nucun. ²⁵Ca' na ca coromicat nucun: Hohot napa' pain ca quep em' wi cacapa' cocon oro wari' nucun Iri' Jam cwa', je ca param ta' ca'. Hohot tiquin' ca' napa'

11.23 Jin' pan nonon oro wari' nucun Iri' Jam taramaxicon nucucun oro wari' nein Egito pane. Mija pin nana, hwara' opa tiquin' ca' tatarapari' ta nonon. Je ca tomi' mip tococwa. Camara' iri tara ca tarama' nucucun mana panxihwe ma' ne, to' parapa' pin ac tococwa tara ta, ac i ma' paxi' na ca tomi' mip tococwa oro wari' nucun Iri' Jam pane. Ane om jin' con cote ca Moisés cam jicon ne. **11.24** Taraju pa' je e'. Om iri na ca to' pa' pin tocwa Moisés pain ca xo' pan' qui' ca ne, noc xa pin ac con na cote ca cam jicon pain xiricacam. Ma' 3 pin iri na panawo' nucun ne, noc xa pe pin ac cocon na pain wijimain mam' horoho wa pain com. Mam' ac con na panxica taramaxicon, xiram pa' ac con na, pe horona ton e' ac cama na quem.

pain ca ja' tomi' querec te cara capa' ca caracat wa ta na ca coromicat nucun. ²⁶Mo ta tomi' xirac cacapa' oro wari' ma', je i ma' ira, tomi' xirac ma' tatarapa' ne! Hohot pan napa' ca jain jain wa pain ca howa ton Cristo ma', co wara tora' ca Iri' Jam pain ca wirico tara co Iri' Taramaxicon ta ca ma', hohot tiquin' ca' nain ca cut wa oro carawa ca awi pain Egito ta, ac i ma' na ca coromicat nucun pane. Xi win xumu pan ara cain oro ca awi wa ca aram aram mi' xim pain con Iri' Jam ta. ²⁷Howa non Iri' Jam Moisés, je ca paca' cain Egito quem. Om ca jin' con taramaxicon co mana' non, xi howa pan ara con Iri' Jam ta. Quereme cara nain oro ca to' i'ina non, xi ac ca querec con ara ne co ma' co om querec ac wa ta. ²⁸Howa non Iri' Jam, je ca tomi' querec te wi ca cocon oro win ma' ca pain Páscoa pane. Cam huco' mi' xin quinain wijimain taramaji ovelha pain panajinain manain xirixi' ma', pain quirinain je pain pawin ma'. Ma' ta witan pin caca mana pantiri' co wara camara' cain' nana cwa', pain ca wari' nein Israel iri' ca'. Ma' ta om to' parapa' pin cocon jam co to' pa' toton nonon wari' co om tomi' ha' nana ta na tata pane.

²⁹Howa nonon Iri' Jam oro wari' nein Israel pane quem. Je ca xuruxut xom tacaracam' mama' cacain xijein cacarain Com Ca Paca' ma'. Xuruxut xom tacaracam' mama' e' nanain, ac macan' ca cawain' e' nonon. Oro wari' nein Egito ma' iri nana ne, xuruxut xom tacaracam' mama' xi' paxi' nanain quem, ane om ha' cocon ne. Pan corom mama' ac caca na, cono' cono' pi' pin ac caca na quem.

³⁰Howa nonon Iri' Jam oro wari' nein Israel pane, je ca pa horohot pin ne ca tao' caho' nein oro xirinain Jericó quem. Ma' 7 pin iri na xec pain ca xuruxut morojam' cacain ne, pa horohot pi' pin ac ne na ca tao' caho' nein oro xirinain. Xi om ne ca howa ara cocon Iri' Jam ta.

³¹Howa non Iri' Jam Raabe quem, co caxicam narima' quem. Je ca om mi' pin wi cama cocon oro win ma' cama co om tomi' ha' nonon Iri' Jam

11.26 Ma' na ca tomi' mao ne ca Cristo wa ma': Co wara tora' ca Iri' Jam pain ca wirico tara co Iri' Taramaxicon ta na ca tomi' mao nein. Om paxi' na ca querec con Cristo Moisés pane, om paxi' na ca maqui' querec ca Cristo pain oro xec nucun Moisés cara pane. Ane tomi' mi' e' con pain ca taxi' con pain ca aram aram maqui' ta' nucun ne. Wara howa non, pain ca om maqui' querec nucun pane. **11.27** Taraju pa' je e'. Pain ca querec con co ma' co om querec ac wa ma', tomi' mi' non Iri' Jam. Om paxi' na ca querec tocwa Iri' Jam, ane ac ca querec con ne pain ca howa con ne. **11.29** Je i ma' wixinain cote ne com ca xuruxut xom tacaracam' mama' caca ma'.

ma'. Xi quep xiho' ara cocon wari' nein Israel co noro noro nanain oro macan' pain Canaã ira.

³²Ma' paxi' nana oro xucucun hwanana nexi' co howa nonon Iri' Jam pane, ane om ha' capa' pain ca pijim' hwet pi' pin xuhu' cocon ne. Cote ne xira ca xirao' ne ca'. Ma' na Gideão con Baraque con Sansão con Jefté ma'. Ma' na Davi con Samuel cocon oro profeta nucun Iri' Jam ma' quem.

³³Howa nonon Iri' Jam. Je ca ma' caca co mixita nonon oro tatirim, to' quiji' pin ac cocon na quem. Ma' ac caca na xucucun co ara xo' nana pain ca taramaxicon to ho' cocon oro win ma' caca. Ma' ac caca na xucucun co cut nanain oro ca wara tomi' pe mi' pan cocon Iri' Jam. Ma' ac caca na xucucun co to' om pin nanain ca hwara' opa nucun copacao'. Om ca ha' mami' con pain ca cao' con wari' quem. ³⁴Ma' nana xucucun co wap jo' pin nanain cote ne xe. Ma' ac caca na xucucun co witan ca' nonon wari' co to' parapa' pin xun nonon pain cote ne quit. Ma' ac caca na xucucun co om hwara' opa nana, aram aram hwara' opa pin ac caca na quem. Mi' tata pain ca to' quiji' pin cocon oro soldado nucucun tatirim co mixita xun nonon, ja' wawaran pin ac tococwa na quem. ³⁵Ma' ac cacama na oro narima' co to' e' mami' wawa ca nari nequequem co wara cono' nana quem. Ma' ac caca na xucucun co quep em' tamana wawa. Mo ta an to pin hun Iri' Jam ma', om pin ac xut pahu' tara paxi' tata. Ane tomi' in pin tococwa ne. Om ta an to xut con Iri' Jam ta tata, quep em' quep em' cono' pin ac tococwa na quem. Hohot naparut ca cono' wa, ma' ta to ho' cara xut con Iri' Jam pain ca aram aram e' mami' xut ta tata pane. ³⁶Ma' nana co tomi' xirac wawa, tatam' tatam' ac tococwa na, wap mip ac tococwa na quem. Ma' ac caca na xucucun co pao' to wawa pain arain too, tao' to ac tococwa na pain xirinain ca tao' to tao' to to wa quem. ³⁷Ma' nana co to' to' cono' pin wawa pain pacun, ma' ac caca na co wac tapiripit caracan wawa pain cote ne quit ca mam' wac xine pana ma'. Ma' ac caca na co to' parapa' pin e' wawa pain cote ne quit quem. Ma' nana co xuruxut ximama' e' nana quem. Om nonon wom, to e' nanain taparinain ovelha je bode. Om nonon carawa quem, ximin nana. To' i'ina tata, quep em' tata quem. ³⁸Wawaran mama' e' ac cacain na oro mahweri ca om to caca wari' ma', wawaran mama' ac cacain na oro ca tamaja ne pacun quem. To ximama' ac cacain na oro manain pacun je oro manain macan' ma' quem. Je ca tomi' xuhu' ca': Hohot tamana nonon Iri' Jam, om xi to ho' tococwa oro wari', xi awi ara caca ta.

³⁹Howa howa pi' pin nonon Iri' Jam oro hwanana nexi' co pijim' hwet xuhu' cwa'. Hohot mahu', xi howa ara mahu' ta tata. Ac i ma' paxi' na ca tomi' pan cocon Iri' Jam, ane om ara mi' cocon pain ca wara tomi' pe nucun ne. ⁴⁰Xi ma' ara ne ca coromicat xo' mi' capari' cocon ta. Awi tiquin' ca' nain ca wara coromicat xo' mi' tococwa oro hwanana cara pane. Ca' na ca coromicat xo' nucun pari': Om ta ara mi' ho' toton pain ca wara tomi' pe ne ca' napari'. Winim' xuhu' pain ca aram aram howa xim mahu', to' hohot wi ac xuhu' cocon tara ta napari'.

Ca hu xo' capari' Iri' Jam pain ca mana panxita' capari'

12 Noro jujun oro hwanana nexi' cara pane, co howa nonon Iri' Jam pane. Ac ca coco' coco' morojam' cacapari' na. Ac ca ja' noro cacapari' na pain ca howa iri' ca'. Mija nana, om ca paric camain' caca. Je ca na e' ne pain ca an to an to pi' pin xin oro ca to' i'ina napari' ca'. An to pin xin oro ca caracat nexi' ca quep mip napari' ca' quem. Ac oro wari' co jein hwet xin nanain tawiri wana xi'. Quereme cara xin oro ca to' i'ina xim napari' pain ca win xumu xun Iri' Jam cwa'. ²Win xumu cara e' xun Jeju ma', xi wirico ara ca co mi' napari' pain ca howa wa pain ca xo' howa qui' xun pane, wirico co mi' xim napari' pain ca howa cara xun quem. Wixipa' paxi' nana wari' co tatatain mi' wawa pain pana ma', ane je i ma' ira ta pan ca Jeju ne. Quereme na pain ca tatatain mi' ma' tatarapa' pain ne ca pane, xi om ne ca coromicat ara cain ca aram aram tomi' querec te tamana ta' nucun pain pawin ta. Je ca pe ca pain xocori ca' quem, xao pe ho' nain iri' curucun Iri' Jam cwain. ³Mam' pe wet jun pain ca jain jain tamana nucun pane. Querec pin' jun pain ca quereme cocon oro caracat co noc tamana nonon quem. Mam' pe wet cara jun, ma' ta om naro hwe, ma' ta hwar'a opa cara hwe quem.

⁴Tomi' in pin paxi' hwein oro ca caracat wa, ane om cono' querec hwe pain ca tomi' in pin nuhu' ne. ⁵Je ca tomi' xuhu' ca'. Ji'am pin ara xi' hwein ca tomi' nucun Iri' Jam ma', pain ca hu ca' cuhu' pain ca mana panxita' cuhu' ma':

Wata' pain ca Taramaxicon Iri' Jam ta' ca', tomi' ca' inem arain.

Ta miri'om mapa' pain ca hu xo' xim ca' me.

Ta naro ma pain ca tomi' tain tarajum me.

⁶Xi hu xo' ara toton oro wari' co om noc ta' cwa'.

Wap wap pi' pin inonon oro wari' co mana panxita' ta' cwa',
ac i ma' na ca hu cuhu' Taramaxicon Iri' Jam.

⁷ Quereme jein oro ca to' i'ina nuhu' ma'. Jain jain iri hwein ne, je ca mam' hu xo' cuhu' Iri' Jam ma'. Tomi' xo' nuhu' pain tarajuhu', xi mana panxita' ara cuhu' ta. Je ca tomi' xuhu' ca'. Ma' tara wari' co wanxi' ma', co om hu xo' non panxica pain ca tomi' cain taraxicon ra? Om na ta. ⁸ Hu xo' hu xo' pi' pin nonon mana panxica Iri' Jam. Mo ta om hu xo' cuhu' ma', mo ta om tomi' xo' cuhu' pain ca tomi' cain tarajuhu' ma', om ca iri' panxica hwe. Ac ca om ca na cote hwe ma'. ⁹ Noro jujun mana cotere' pain macan' ca' quem. Hu xo' nanapari', tomi' xo' nanapari' pain ca tomi' cacain tarajixi'. Tomi' ha' ac ururun na quem. Je ca tomi' xuhu' ca'. Na e' na pain ca tomi' ha' xun Cotere' co pe pawin cain. E' cara ac iri' tara quem. ¹⁰ Hu nanapari' mana cotere' pain macan' ca', om ca mija homa ne cawaxi' pain ca tomi' cacain tarajixi' pain ca hwijima' nexi' quem. Maqui' nain ca coromicat nucucun pain ca am hohot ne pain ca tomi' ac i ma' tain taraxicocon mana panxita' cwa', je pain ca wap toton ta nana pane. Cotere' Iri' Jam cwa' iri na ne, hu xo' napari'. Tomi' xo' napari' pain ca tomi' cain tarajixi'. Quep xiho' iri'o' napari' pain ca wap capari' quem. Ma' ta an xiho' mahu' pain ca om caracat ne ca' napari'. ¹¹ Tomi' xaxa' paxi' iri' pain ca xo' hu capari', je pain ca xo' tomi' cain tarajixi' ca'. Om ca ja' tomi' querec te capari' quem. Ame hwe e'. Mo ta tomi' ha' xun pain ca hu capari', je pain ca tomi' xo' capari' pain ca tomi' cain tarajixi' ca', xuruxut xo' ac iri' tara, toron toron om pin ac ne tara ximixi'.

Ca hu capari' pain ca xuruxut xo' je capari' ca'

¹² Je ca tomi' xuhu' ca', pain ca naro pin hwe ma', pain ca an xiho' pin hun wari' co om hwara' opa mami' micon ma', je pain ca an xiho' hun wari' co cocoroc aracon ma' quem. Hwara' opa mami' je e'. ¹³ Xuruxut xo' je, ma' ta om camara' caca co om hwara' opa nana ma', co ac caji at nana pain ca howa nucucun ma'. Querec pin' iri tuturu' pain ca xuruxut xo' nuhu' ne, hwara' opa ac caca tara ta.

¹⁴ Win xumu jein i ca' quem, pain ca tomi' querec te xujuhu' pain ca jao jao ma' xujuhu' ma', je pain ca to ni ca' hwein ca caracat wa ma' quem. Wari' co om pe ni ca' nain ca caracat wa ma', om ta querec con Iri' Jam ta. ¹⁵ Ma' tara xumuhu' me, ma' ta om ma' camain' ca win ma' nuhu' co

tomi' ximao ma', pain ca noc inon Iri' Jam pain ca xiram pa' capa' ca' ca ma'. Ma' tara xumuhu' me, ma' ta om ma' camain' ca win ma' nuhu' co juhum' ximicon ma', aram aram ma' mija pin ac caca tara co pan teretem pin nana con. Om ca na camain' ne pain ca to' ara ac i ma' cuhu' pain ca cut in xujuhu' ta. ¹⁶Ma' tara xumuhu' me, ma' ta om ma' camain' ca win ma' nuhu' co quep ximao ma', co miri'om nain oro caramaxicon Iri' Jam ma', co om coromicat camain' non ma', co an xiho' non Esaú cara pane. Wirico paxi' xira co ara mi' wa pain ca wara tomi' pe nucun cote ca pane, xi om ne ca wara pan' cain' ara ca con coxa' ca ta. Ane param ni ca' cain ne. Param pan ac cain na wijimain carawa ca cao' wa pane. ¹⁷Taxi' hun Esaú pain ca aram aram in pin ne ximicon quem. Tomi' xo' pan xirapa' te ta, tomi' mi' pan xirapa' con Iri' Jam ma', pain oro ca tomi' pe mi' capa' ta, ac i ma' na ca coromicat nucun. Tomi' mip paxi' non, aca xoc paxi' na quem. Ane noc pin tocwa ne, xi ha' con pain ca an in cain ca ara ca pane, pain ca param ni ca' cain ca tomi' pe mi' qui' con cote ca pane ta.

¹⁸Je ca tomi' xuhu' ca'. Wixicam xun iri hun Iri' Jam ma' ne, om ca ac oro wari' nein Israel hwe pain ca wixicam e' cacain cote ne pacun ca tom tamana pane, je pain Sinai pane. Wixicam pin iri nanain pane ne, mixem pin ac cocon na xim, nuru mip ac cocon na camana' quem. ¹⁹Taraju ac cacain na ca on ne caji taracom, taraju ac cacain na ca tomi' nucun Iri' Jam quem. Taraju iri nonon ne, tomi' ac cocon na Moisés, tomi' mip nonon. Om xi tomi' mami' capari' Iri' Jam ta ac caca na quem. ²⁰Xi jin' ara cocon pain ca tomi' nucun ta. Om ca na camain' ne pain ca quep xine xiquijinain pacun ca' tata. Mo ta quep cain wari', to' to' mi' pin ac tocwa tara pain pacun. Mo ta quep nein carawa quem, to' to' mi' pin ac xine tara pain pacun quem, ac i ma' na ca tomi' mip tococwa. ²¹Querec iri nanain ne, mija tamana ac ne na ca jin' nucucun. Jin' tamana na Moisés quem. Cocoroc ina pain ca jin' ne ta ac ca na.

²²Ane om wixicam hwein cote ne pacun pain mahweri ne, om na. Wixicam pan hwein xijein pacun ma', Sião ma', je ca pe ne macaracon Iri' Jam co e' cara ma'. Wixicam hwein Jerusalém ca pe pawin cain. Wixicam huhun oro jam co taramaja mi' nonon Iri' Jam ma', co mija tamana nana pain ca cut in xucucun pain ca tomi' querec te tamana nucucun ma' quem. ²³Wixicam huhun oro co cut in xucucun pain ca howa cocon Jeju ma', co ac iri' panxica Iri' Jam co pan' cain' ma', co xirao' to wa wixicocon pain pawin cain. Wixicam hun Iri' Jam ma', co Juiz ma', co tomi' xo' tomi'

xo' pi' pin nonon oro wari' pain oro carawa ca ara caca ma'. Wixicam hwein tamataracocon co wara cono' nana ma', co xuruxut xo' nana pain ca e' e' wet nucucun pain macan' pane, co to' hohot pin wawa ma' quem. ²⁴Wixicam hun Jeju cwa', co tomi' an pe xo' nain xocori ca tomi' xo' nucun Iri' Jam ma'. Wixicam pin hwein quicon ca mam' to' hohot pin napari' pain ca cam huco' mi' capari' pain. Hwara' opa tamana na quicon Jeju, hwara' opa tiquin' ca' nain quicon Abel cara pane, xi om ne ca tomi' pe mi' ara capari' pain ca oro ca awi wa ta.

²⁵Ma' tara xumuhu' me. Taraju wet jun Iri' Jam co tomi' nuhu' cwa', ta ari hun me. Noro jujun oro hwanana nexi' cara pane, co om taraju wet jun na nonon pain ca hu to tococwa pain macan' pane. Wap tata, om ca witan ca' cocon Iri' Jam pain ca wap toton cocon pane. Wari' pain xocori ca' iri na ne, mo ta om taraju wet xun Iri' Jam co pe pawin cain, mo ta ari xun pain ca hu capari' ca', ma' tara ca witan ca' ac xun pain ca wap xim capari' ra? Om na ta. Wap tamana tarapari' ta. ²⁶Tomi' iri nonon oro hwanana nexi' Iri' Jam pane ne, to' cocoroc ac nein na macan' ca tomi' nucun. Tomi' pe ca' napari' pain xocori ca' quem: To' cocoroc mami' tain macan' ta. Om ta to' cocoroc e' tain macan' ma', to' cocoroc tain pawin ma' quem, ac i ma' na ca tomi' pe capari' pain xocori ca'. ²⁷Pain ca tomi' pe cain i ma', pain ca to' cocoroc mami' tain macan' ca ma', taraju pa' irin i ca' quem: Main to' om pin tarain oro carawa ca tomi' ma' pin ca pane. To' cocoroc tarain, om pin ac ne tara. Ma' ta to wet cara e' ne oro carawa ca om cocoroc ac ne ma' ta na.

²⁸Je ca na e' ne pain ca tomi' querec te xun Iri' Jam cwa', xi mi' xim ara capari' pain ca to ho' cara xun pain ca taramaxicon pe ho' xim capari' ta. Om ta pi' ra ha' ne quem. Tomi' querec te xun, in ac xun. Querec pin' xun pain ca Iri' Jam nucun, tomi' ha' xun quem. ²⁹Xi ac xe ca tom tom pi' pin nain oro carawa ara ca Iri' Jam nexi' ta.

12.24 Mam' pe wet hun Abel cara pane? Ac ca tomi' con na Iri' Jam quicon pane, pain ca ao mao ne quicon pain ca to' pa' pin con cwaji' ca pane. Ac ca win capa' ne con na, ac ca wap ron, xi om ne ca to' pa' pin ara capa' ta con na Iri' Jam. Jeju ma' iri na ne, pain ca ao mao ne quicon pain ca mi' pin caho' capari' pane, ac ca tomi' ca' con na Iri' Jam quem: Xiram pa' jujun, xic am pin rain ca caracat nucucun me na, ac i ma' na ca tomi' con Iri' Jam pari' pane. **12.29** Tomi' mi' ta Iri' Jam pain ca wap ton cocon oro caracat ta. An xiho' nain xe ca tom tom pi' pin nain oro carawa ta.

Ca hu mam' tococwa pain ca win pi' pin ta' ne ca xirao' nucun

13 Ta noc caracan camain' xujuhu' pain ca xere xujuhu' ma'. ²Ta miri'om huhun oro wari' co aram aram tan' mama' nanain macarahu' ma'. Tomi' querec te jujun pain ca cao' to ho' xine, pi'am to jein xuru ta huhun ma'. Ac i ma' iri nana oro hwanana pane ne, ma' ac caca na co om querec pin' wawa quem. Wari' tara ma' tata, ane om wari' caca ne. Jam co taramaja mi' nonon Iri' Jam nana pane. ³Ta ji'am pin huhun oro win ma' nuhu' co tao' to wawa pain xirinain ca tao' to tao' to to wa me. Xiram pa' jujun, ac ca tao' to wi xihwe cocon tara pain ca xiram pa' huhun. Ta ji'am pin huhun oro co quep em' wawa pain ca howa cocon Cristo quem. Xiram pa' jujun quem, ac ca quep em' wi xihwe cocon tara pain ca xiram pa' huhun ta.

⁴Na e' na pain ca coromicat ca' hwe ma', pain ca awi tamana ne ca an wa narima' ma', je pain ca awi tamana ne ca an wa tarama' ma' quem. Om ca na camain' ne pain ca an wa xequem narima', om ca na camain' ne pain ca an wa xucun tarama' ma' quem. Wari' co quep ximao ma', co an nam xequem narima' ma', wap ac con tara Iri' Jam. Narima' co quep ximao ma' quem, co an non xucun tarama' ma' quem, wap ac cam tara Iri' Jam quem. ⁵Ta win xumu ximama' hwein oro caramaji macan' me, pain ca caramaju xita' na ina me hwe ma'. Carawa ca wara ma' nuhu' ma', hohot napa' ta jein. Xi tomi' pe mi' ca' ara capari' Iri' Jam ta:

Om ta an pe camain' xuhu'.

Om ta in ca' camain' xuhu' ta,

ac i ma' na ca tomi' pe capari' ta. ⁶Je ca ha' capari' pain ca tomi' hwet xin ca xirao' pe xine capijacon Iri' Jam ta. Om ca tara ta'a camain' xin ca xirao' pe nein:

Wirico Taramaxicon Iri' Jam co quep xiho' napa' ta.

Je ca om jin' ta' ca'.

Ma' tara ca quep em' ac capa' wari' ra?

Ac i ma' na ca xirao' pe xine capijacon Iri' Jam.

⁷Mam' pe wet jujun co querec wet nunuhu' pain ca howa hwe ma', pain ca tomi' hwet qui' cucuhu' pain capijacon Iri' Jam pain cara pane. Querec pin' jujun pain ca xuruxut xo' nucucun pain ca e' e' wet nucucun pane, querec pin' jujun pain ca howa howa aram aram cono' pin caca quem. An xiho' jujun pain ca howa nucucun ta. ⁸Om ca xin in camain' ca

Jeju Cristo. Om ca xin in ca pain cara pane, om ca xin in ca pain xocori ca', om ta xin in ca pain oro cawaxi' ca maqui' ta' ma' quem. Wirico cara tara, om ta xin in camain' ca ta.

⁹Je ca tomi' xuhu' ca'. Ta xin ne huhun oro wari' co pijim' ximama' nunuhu' me, pain ca pijim' jimama' ca' cacain capijacon Iri' Jam ma'. Ta howa huhun pain me. Xiram pa' iri napari' Iri' Jam ne, je ca quep xiho' capari', je ca to' hwara' opa capari' pain iri' ximixi' ca'. Om ca to' hwara' opa capari' ca tomi' ha' ximama' xuxun oro wari' co hu nanapari' pain oro carawa ca cao' wa. Cao' e' jein i ca' ta, ta cao' hwein i ma' me ta nanapari'. Om ca quep xiho' camain' tococwa oro wari' co tomi' ha' nanain ca hu ximama' nucucun ta. ¹⁰Xi ma' ara capari' maxinain ca tomi' querec te pe xun Iri' Jam cwa', ca an xiho' nain pana ca tom tain' pe mi' tocwa pain carawa ma'. Oro co taramaja to nanain xiricon Iri' Jam ma' iri nana ne, pain ca howa e' cacain carawa ca tom tain' mi' cocon ma', om ca quep xiho' ac cocon ca mi' pin nucun Jeju.

¹¹Noro jein ca taramaja nucun sacerdote co iri' taramaxicon pain cara pane. Maqui' iri na xec nein ca corom mao cain Iri' Maxicon Iri' Jam ne, to' pa' ac cain na carawa, mam' corom ac cain na quinain, mi' ac con pain na Iri' Jam. Ma' ta xic am pin main ca caracat nuxut ta non. Cwerein iri na ne, an mamam' ac cacain na, an mamam' an mamam', pira ca' iri nanain xiricocon oro wari' ne, tom pe ac cacain na pain i cain quem. Tom tom pi' pin nanain. ¹²Je ca mi' pin pe ni ca' cain oro xirim pain Jerusalém Jeju quem. Ma' ta to' hohot pin toton oro wari' ne na, mam' to' hohot toton pain cocu ta na. ¹³Je ca tomi' ca' xuhu' ca'. Hwet xun Jeju ma', pain ca pe ni ca' cain oro xirim ca to ho' pan xucucun oro wari' pane, ca tomi' xirac pe tocwa pane. Quereme xin ca tomi' xirac wa con, win ne ca quereme pan cain quem. ¹⁴Xi ma' capari' ca to xo' cara iri' pain macan' ta. Winim' e' irin iri' macaraxi' pain pawin cain. Main maqui' tara ta, ame hwe e'.

¹⁵Je ca tomi' xuhu' ca'. Tomi' querec te cara xun Iri' Jam ma', pain ca tama' awi ma awi ma xun ca'. Wirico Jeju co mi' napari' pain ca tomi'

13.10 Pain ca tomi' mi' xine maxinain ca tomi' querec te pe xun Iri' Jam cwa', tomi' mi' ta pana ca tatatain pe tocwa Jeju pane. Je ca mi' pe pan xucun con Iri' Jam Jeju pane.

13.13 Ma' na ca tomi' mao nein versículo ca'. Hwet iri xun Jeju ne, ac ca hwerehwet ca' xin tara oro ca wara howa nexi', hwet ac xun tara pain ca hwet pe ca ma', pain ca pe ni ca' cain oro xirim pain Jerusalém pane. Ac i ma' tara pain ca an to pin xin ca howa ximama' nexi' quem. Mo ta tomi' xirac cacapari' oro wari' pain ca howa e' xun Jeju cwa', je i ma' ira xi'. Quereme xin. Win ca Jeju pane ta.

querec te ac i ma' xun ca'. Ac ca mi' xun pain carawa ca awi ma' tara pain ca tomi' hwet xun pain ca tomi' querec te nexi' ca', je pain ca wum co iri' Taramaxicon ne urut cwa' xun quem. ¹⁶Ta miri'om xujuhu' me. Ara mi' iri' xujuhu' pain ca awi wa ma' ne, pain ca quep xihu' caracan xujuhu' ma', ac ca ara mi' hun na pain ca awi wa Iri' Jam ma'. Hohot napa' pain ca ara ac i ma' hwe ta nuhu' quem.

¹⁷Tomi' ha' jujun co querec wet nunuhu' pain ca hu cucuhu' ma'. Ta tomi' in pin huhun me. Wiricoco ara xi' nana co querec wet xo' nunuhu' pain ca howa nuhu' ma', xi taxi' pan ara xucucun pain ca maqui' ta' ne xec nein ca coco' quima hwet xun cocon Iri' Jam ma', pain ca tomi' hwet xun cocon pain oro ca taramaja nucucun pain ca querec wet cucuhu' ta. Je ca tomi' xuhu' ca'. Tomi' ha' jujun, ma' ta ara tomi' querec te cacain ca taramaja nucucun ta. Mo ta om tomi' ha' huhun, mo ta ara tomi' xaxa' e' cacain ca taramaja nucucun pahu', om ta quep xihu' ac cucuhu' ta.

¹⁸Tomi' mi' xut con Iri' Jam me. Xi taxi' pan ara urut pain ca hohot ne oro ca ara urut ta. Je ca param urut quem, param urut pain ca xuruxut xo' cara urut quem. ¹⁹Tomi' mip pan inuhu' quem, tomi' mi' xine con Iri' Jam me. Ma' ta mi' capa' pain ca in hwet hap xuhu' ta inuhu'.

²⁰Quicon Taramaxicon nexi' Jeju ma', ca ao mao pane, je ca mam' tomi' an pe xo' cain ca tomi' xo' nucun Iri' Jam ma'. Om ta xic am camain' cain ca tomi' xo' nucun, mao ac ne ma' tara, to wet cara tara ta. Je ca to' e' mami' con Jeju ma', co iri' co querec wet xo' napari' pain ca ac ovelha nucun iri' ca'. Je ca tomi' xuhu' ca'. Tomi' mi' inuhu' con Iri' Jam cwa', co to' om pin nain ca toron ne ximixi' ca'. Param inon ²¹pain ca mi' cuhu' pain ca ara taxi' hwein ca awi wa ma', ma' ta ha' cuhu' pain ca ara hwein ca param nucun ma'. Param inon pain ca meo capari' pain iri' ximixi' ca', pain ca mi' capari' pain ca ara e' xin ca hohot pan non quem. Wirico Jeju Cristo ara xi' na co mi' napari' pain ca ara e' xin ca hohot pan non quem. Na e' na pain ca tomi' querec te cara xun co awi tamana ta! Amém, iri'o' na ca tomi' ne ta.

²²Tomi' mip inuhu' pain i ca' quem xere. Taraju wet xine, na ra xine pain ca hu xuhu' ca'. Xi hwara' ne ca xirao' ne ca' ta.

²³Tomi' hwet xim inuhu' con coxari' Timóteo co tao' pe wa pain xirinain ca tao' to tao' to to wa pane. Pa hwet pin nonon. Mo ta hwet hap capa', ja' ja' ac capa' tara pain ca hwet xim xuhu' ca'.

²⁴Mam' pe wet inuhu' ta nuhu' cwajiri' ta jujun oro co querec wet nunuhu' pain ca howa hun Jeju ma', tomi' tomi' xam' jujun pain ca tomi' ne ca'. Tomi' tomi' xam' jujun oro co win howa hwe ma' quem, pain ca wari' ne cuhu' Iri' Jam ma' quem.

Mam' pe wet urut pahu' ta nunuhu' oro co to nanain Itália quem.

²⁵Param inon Iri' Jam pain ca quep xiho' quep xiho' xam' cuhu' pain ca mi' e' cuhu' pain ca param nucun ta.

Je i ca' ca xirao' ne ca'.

Tiago

Ca xirao' mi' cocon oro win judeu ca Tiago

1 Tiago ina pain ca xirao' mi' xuhu' ca'. Taramaja mi' e' inon Iri' Jam con Taramaxicon nexi' Jeju Cristo. Xirao' mi' inuhu' pain ca judeu iri' ca', pain ca wawaran to hwein oro xijein macan' ma'. Tomi' querec te inuhu' ta.

Oro ca to' i'ina tococwa

²Je i ca' ca xirao' mi' xuhu' ca' xere. Ma' iri turuhu' oro ca to' i'ina wa ne, je i ma' ira je, tomi' querec te tamana je pain. ³Xi om ne ca taxi' ara hwein i ca' ta: Mo ta howa cara hun Iri' Jam pain ca to' i'ina cuhu', hwara' opa hwara' opa tiquin' ac ne tara ca howa nuhu'. ⁴Na e' na pain ca hwara' opa hwara' opa tiquin' hwe pain ca howa hun Iri' Jam ta. Ma' ta ximicon hwanana hwe pain ca howa nuhu' ma', ma' ta hohot pin hun Iri' Jam pain oro ca ara hwe ma' quem. Hohot cara ac hun tara pain ca xuruxut xo' nuhu' ta. ⁵Mo ta ma' ca win ma' nuhu' co om taraju pa' xo' ma', pain ca om querec pin' cain ca param nucun Iri' Jam ma', tomi' pan toron ta. Mi' ne pain ca taraju pa' wa, mi' ne pain ca querec pin' tain ca param nem pain ca xut xo' wa ta toron. Mi' ac tocwa pain tara. Xi xiram pa' taxipa' ara capari' pain ca tomi' xun ca'. Om ca pan to' cain tarajixi' pain ca tomi' xun quem, ara mi' querec te napari' pain, je curucun mao na. ⁶Howa xun pain ca mi' ne pain xun ca'. Om ta tara con ta'a camain' xun pain. Wari' co tara con ta'a non Iri' Jam ma', pain ca tama' waran ne ca howa nucun ma', an xiho' ara xi' nain com ca wap in wap in ma', pain ca nocom nocom ne pain hotowa ma'. ⁷Wari' co coromicat ac i ma' ma', om ta cut cain carawa ca mi' ne pain con Taramaxicon nexi'. Om ca ha' ne pain ca mi' tarapa' pain con. ⁸Xi om ne ca tocwan ara ne ca coromicat nucun ta. Coromicat ximao na, om ca taxi' camain' cain carawa ca ara ta' ca.

**Co ximin nana pain ca om cocon carawa,
wiricoco co caramaju nana quem**

⁹Wari' co howa ma', co ximin pain ca om con carawa ma', tomi' querec te e' tara pain ca xiram pa' pan con Iri' Jam. Ac ca to' caramaju pin tocwa na pain ximicon. ¹⁰Wari' co howa ma', co caramaju ma' iri na ne, tomi' querec te e' tara pain ca ximin pin ca pain ca om pin ne caramaxicon quem. Xi om ne ca to' querec pin' ara tocwa pain ca om quep xiho' con caramaxicon. Main pan' am ta' ara xi' na, win ne hwijein tononoin ma'. ¹¹Nonoc pin iri na xina pain ca hwet qui' ca pain xo' xec ne, xain ac cain na tononoin, cono' pin ac ne na, camara' pin ac ne na hwijein. Awi awi om pin ac ne na quem. Ac i ma' na wari' co caramaju ma' quem. Taramaja taramaja ca' na pain oro ca taramaja nucun ma', aram aram mi' pin ac ca na quem.

¹²Param mi' ta pain ca awi wa wari' co hwará' opa cara pain ca querec cain oro ca to' i'ina non ma'. Querec pin' pan iri toron Iri' Jam ne, pain ca hohot mapa' ta con ma', mi' ac con pain tara carawa ca wara tomi' pe con ma', pain ca e' pe ho' cara ne ta con ma'. Wari' pain ca om noc xun ca', wara tomi' pe napari' pain i ma' ta.

¹³Wari' co tomi' querec wa pain ca caracat ra tocwa ma', om ca na ne pain ca tomi' ca' ca: Wirico Iri' Jam co tomi' querec napa' ma', wirico co caracat ra napa' ma', om ca na camain' ne pain ca tomi' ac i ma' ca ta. Xi caracat ra ha' ca Iri' Jam ta. Om ca caracat je capari' quem. ¹⁴Wari' pan ara xi' na co param nain ca caracat wa. Caracat je pan napari' ximixi' pain ca param pan teretem nexi' ta, ac i ma' ac i ma' xam' napari' ximixi'. Mixein napari', ac ca cuc cuc capari' na, ac ca cuc in capari' na pain ca caracat je caracat je capari' ximixi' pain ca param pan teretem nexi'. ¹⁵To' ara ac i ma' iri napari' ca param pan teretem nexi' ne, to' caracat ac capari' na, aram aram to' parapa' pin ac capari' tara quem.

¹⁶Je ca tomi' xuhu' pain ca tomi' querec te xuhu' ca' xere. Ma' tara xumuhu' me, coromicat xo' je. ¹⁷Oro carawa ca awi ca ma' napari' ca', wirico Iri' Jam co mi' napari' pain. Maqui' nain pawin, maqui' non Cotere' co tomi' ma' pin non xina con panawo' con pijo' pane. Xin in taxipa' paxi' na ca toha nucun xina con panawo' con pijo' ma'. Iri' Jam ma' iri na ne, om ca xin in camain' ca. Je curucun mao na. ¹⁸Mi' iri napari' pain ca howa xin capijacon ca iri'o' ca' ne, to' e' ac capari' na, mana panxita' pin

ac capari' na quem. Maqui' nain ximicon, wirico co coromicat an pe mi' napari' pain. Tomi' ca' napari': Tomi' querec te paxi' inain oro carawa ca tomi' ma' ta' ca', ane tomi' querec te tamana pan xuhu' pain ca wari' ne xuhu' ca' ne napari'.

Ca tomi' ha' jein capijacon Iri' Jam tococwa

¹⁹ Je ca tomi' xuhu' pain ca tomi' querec te xuhu' ca' xere. Mam' pe wet jein i ca': Tomi' iri xujuhu' ne, momon taraju wet cain' ac hwe tara. Ta tomi' hap hwe me, tacana to cain' je pain ca taraju wet xujuhu'. Ta xain ne winahu' me, ta mana' hap hwe me. ²⁰ Xi quep xiho' capari' ca mana' wa ta. Mo ta mana' iri', om ca hohot ac xun Iri' Jam. ²¹ Je ca tomi' xuhu' ca': An to an to pi' pin jein oro ca caracat wa je oro ca pan teretem wa ta. Ta xec xec hwe me, tomi' ha' jein capijacon Iri' Jam ca pijim' mi' xihwe ma'. Ac ca oin' pe xine ara xi' na pain xumuhu' ta. Hwara' opa na, to' witan taxi' nuhu' quem.

²² Tomi' ha' jein capijacon Iri' Jam. Ta taraju e' hwein me, tomi' ha' jein. Mo ta taraju e' hwein, om na xumuhu', xi coromicat xo' hwe ta. ²³ Mo ta taraju e' hwein capijacon Iri' Jam, mo ta om tomi' ha' hwein, an xiho' hun wari' co noro e' nain jamicon pain ca mam' querec ca jamu wa. ²⁴ Noro noro ca' nain jamicon, in ca' iri nain ne, ji'am hap pin ac cain na ca noro e' ca ma', pain ca noro e' cain jamicon ma'. ²⁵ Ane om ac i ma' ne con wari' co noro wixite nain capijacon Iri' Jam ma', pain ca coromicat xo' cain ca tomi' nucun ca om em' camain' ma', ca to' witan capari' ma'. Mo ta jain jain cain pain ca tomi' ha' xitain na cain ma'. Mo ta om taraju e' cain, mo ta om ji'am pin cain, mo ta tomi' ha' taxipa' cain, quep xiho' pan ac con na Iri' Jam pain oro ca ara ca ma'. Param mi' ac con na pain ca awi wa quem.

²⁶ Wari' co coromicat ca' ma': Xut xo' ina pain ca win xumu ton Iri' Jam ta, mo ta coromicat ac i ma' ca, mo ta om an in an in cain ca tomi' nucun, mo ta tomi' ximao e' ca, om ca quep xiho' camain' con ca xut xo' paxi' nucun. Om na ximicon, xi xut xo' ca ta. ²⁷ Wari' co hohot ton non Cotere' Iri' Jam ma' iri na ne, pain ca xut xo' iri'o' ca pain ca win xumu xo' con ma', ara ac i ca' na: Querec wet nonon oro hwijima' co cono' ca' nanam mana cote cacama cacam waram jicacam ma', querec wet nanam oro narima' co cono' ca' nanam waram taxicacam ma', querec wet nanam pain oro ca

to' i'ina nanam quem. Ara xite xucun, om ca to' em' camain' xucun pain ca an xiho' cocon oro caracat co om howa nonon Iri' Jam quem.

Ca om ha' ne pain ca tomi' querec te paxica' tococwa oro wari'

2 Je ca tomi' xuhu' ca' xere. Wahu' pain ca howa hun Taramaxicon nexi' Jeju Cristo co awi tamana ma', pain ca om caracat nucun pain ca hwara' opa tamana nucun ma', om ca ha' ne pain ca tomi' querec te paxica' huhun oro wari' ta. ²Tomi' xun wari' co corom hwet nuhu' pain ca cut in xujuhu' ma', pain ca howa hun Taramaxicon nexi' ma'. Am corom hwet cuhu' wari' co caramaju ma', co to nain micon oro anel ca mam' quep xine pain ouro ma'. Awi tamana na womicon quem. Corom ac ca na xucun wari' co iri' co ximin ma'. ³Mo ta tomi' querec te paxica' huhun, mo ta tomi' querec te tamana hun co awi tamana womicon ma', mo ta tomi' ca' hun: Hap ra, xao pe rain i ca', xao pe rain pana ca awi ca', mo ta tomi' ac i ma' hun pain ca tomi' querec te tamana hun ma'. Mo ta om tomi' querec te homa hun co ximin ma', mo ta tomi' ca' hun: Xat cara pe rain i ma' ta. Am tomi' ca' hun quem: Xao pe rain macan' ma', xao pe ho' e' ne pain caxima ca', mo ta tomi' ac i ma' hun. ⁴Cain' cain' xihwe quem? Om ca tomi' querec te paxica' huhun ra? Tomi' querec te paxica' huhun ma' ira! Om ca querec querec ac wiricoco cucuhu'. Tomi' querec te e' hun xucun pain ca awi ca womicon ma', noc ac hun na xucun pain ca ximin nucun ma' quem.

⁵Je ca tomi' xuhu' pain ca tomi' querec te xuhu' ca' xere. Taraju wet je e'. Oro wari' co ximin nana pain macan' ca', wiricoco co tora' pan ca Iri' Jam ma', pain ca howa xine cocon ma'. Tomi' ca' tata: Howa iri mahu' ne, ac ca caramaju tamana hwe na. Main mi' xuhu' pain ca to ho' mahu' pain ca aram aram taramaxicon pe ho' xuhu' ta' ta. Wara tomi' pe ara xi' inuhu' pain, xi om noc ara mahu' ta pan tata. ⁶Je ca tomi' xuhu' ca'. Tora' paxi' nonon co ximin nana Iri' Jam ma', ane noc pan huhun ne. Para tomi' querec te e' huhun co caramaju nana ma' quem? Om ca wiricoco caca co to' i'ina nunuhu' pain ca quep em' cucuhu' ra? Om ca wiricoco caca co o mi' nunuhu' cocon oro juiz ra? ⁷Om ca wiricoco caca co tomi' napat nonon Jeju co wari' ne nuhu' ra? Tomi' napat nanain wixicon ca awi tamana quem.

⁸Ma' na ca xirao' an pe xine ca tomi' ha' je capari' Iri' Jam. Xirao' mi' ca' napari': Ta noc momon oro win ma' ma me ta. Win ne ca om noc pan xijem ma' quem napari'. Mo ta tomi' ha' hwein ca tomi' nucun ca', ara xo' ac hwe tara ta. ⁹Ane om ara xo' hwe pain ca ari hwein ca tomi' nucun ne. Mo ta tomi' querec te paxica' huhun oro wari' ma', em' hwe, xi om ne ca caracat ara hwe pain ca ari hwein ca tomi' ne ta ac cuhu' tara Iri' Jam. ¹⁰Je ca tomi' xuhu' ca'. Wari' co tomi' ha' paxi' nain oro wirain ca tomi' ha' je capari' Iri' Jam ma', mo ta ma' xica' pe ne ca tomi' nucun ca om tomi' ha' ca ma', ari ari pi' pin nain oro ca tomi' nucun. Em' ma, xi tomi' ha' tomi' ha' pi' pin main ca tomi' ne ta non Iri' Jam. ¹¹Xi wirico ara ca Iri' Jam co tomi' ca' napari': Ta quep mam xequem narima' me ta napari'. Wirico co tomi' ca' napari' quem: Ta to' pa' mon wari' me ta napari'. Wirico Iri' Jam co tomi' tomi' pi' pin nain. Om paxi' tara ca quep mam xequem narima' ma'. Mo ta to' pa' mon wari' ma', ari ari pi' pin main oro ca tomi' nucun.

¹²Je ca tomi' xuhu' ca', ma' tara xumuhu' me. Main tomi' xo' xim ara xi' napari' Iri' Jam pain oro ca ara iri' ca'. Am tomi' ha' hwein oro ca tomi' ne ca to' witan nuhu' ca', am om tomi' ha' hwein, ac i ma' tara pain ca tomi' xo' xim capari'. Je ta ma' ne xumuhu' pain oro ca tomi' nuhu' ma', je pain oro ca ara nuhu' ma' quem. ¹³Oro wari' co om xiram pa' nonon oro win ma' caca ma', om ta xiram pa' pan tococwa pain ca tomi' xo' xun tococwa pain oro ca tomi' caca, je pain oro ca ara caca quem. Oro co xiram pa' nonon oro win ma' caca ma' iri nana ne, xiram pa' ac tococwa tara pain ca tomi' xo' xun tococwa ta.

Ca an hwet pe jein ca howa nuhu' tococwa

¹⁴Je ca tomi' xuhu' ca' xere: Hohot tara pain ca howa ina ta e' iri' ra? Mo ta om an hwet pe xin ca howa nexi', mo ta om tomi' ha' xun Iri' Jam pain ca ara jein ca awi wa ta capari' ca', je pain ca xiram pa' jujun oro wari' ta capari' ca', ma' tara ca witan ac iri' pain ca howa ina ta e' iri' ra? ¹⁵Tomi' xixim oro xerexi' co ximin nana cwa'. Am om cacam wom, am om cacam carawa ca cao' wa. ¹⁶Hwet iri nanapari' ne, tomi' tomi' ca' nanapari', mama' urut ta ac cacapari' na quem. Mo ta tomi' ca' e' xixim: E'e', mama' je ta. To jun to' om capin' nuhu' ma', cao' cao' ma'am je quem, mo ta tomi' ximama' ac i ma' e' xixim pain ca om xiram pa' xixim ma'. Cain' cain' xixi' quem? Hohot na ca tomi' ximama' e' iri' ra? Om na ta. ¹⁷Je

ca om na ne pain ca howa e' iri' pain ca om tomi' ha' xun Iri' Jam pain ca ara jein ca awi wa ta capari' ca', je pain ca xiram pa' jujun oro wari' ta capari' ca' quem. Wari' co ac i ma' ma', howa ina ximao e' na, xi querec pin' tocwa pain ca howa nucun ta. Ac wari' co mi' pin ma', co pe ximao e' ma' quem. Ac ca mi' pin ne na ca howa nucun ta.

¹⁸ Am ma' ca wari' co tomi' ca' napa' ma': Ma' na wari' co howa non Iri' Jam, je ca to' witan tocwa ma'. Ma' ac ca na xucun wari' co xiram pa' nonon oro wari', je ca to' witan tocwa ma', am ac i ma' ne ca tomi' capa' wari' ma'. Cain' cain' xira quem ac ton na. Mo ta howa inon Iri' Jam ta e' mapa' ma', mo ta om an hwet mi' mapa' pain ca howa nem pain ca xiram pa' momon oro wari' ma', om ca querec pin' ac xim pain ca howa iri'o' nem. Wata' iri' na ne, xiram pa' inonon oro wari', je ca querec pin' mapa' pain ca howa iri'o' ne ca', ac i ma' tara ca tomi' ton ta. ¹⁹ Ma' xica' pe na Iri' Jam ta na ca howa nem ra? Je i ma' ira! Howa ac i ma' nana oro caxicon jam quem. Howa paxi' nonon Iri' Jam, ane jin' cocon ne, cocoroc nana pain ca jin' cocon ta.

²⁰ Om ca coromicat xo' ca wari' co howa ac i ma' ta. Je xi taraju pa' ca quem? Taraju wet je e'. Tomi' xo' xuhu' pain i ca': Om ca na ne pain ca howa e' iri' pain ca om tomi' ha' xun Iri' Jam pain ca ara jein ca awi wa ta capari' ca'. Pain ca howa ac i ma' iri', om ca howa iri'o' iri' ta. ²¹ Noro jun hwanana nexi' Abraão cara pane. Para to' hohot pin inem ta con Iri' Jam quem? Taraju pa' je e': To' hohot pin inem, xi om ne ca ara pan nem pain ca an terem' pe mon panxima Isaque pain pacun ca tom tain' pe mi' xim mapa' con ta non pane. ²² Taraju pa' hwe? Howa non Iri' Jam Abraão pane, tomi' ha' non pain ca ara cain ca ara ra tocwa quem. Ara iri' nain ca ara ra tocwa pane ne, querec pin' ac tocwa na pain ca howa iri'o' nucun. ²³ Hwet pin ac ne na ca xirao' an pe xine capijacon Iri' Jam quem. Ca' na con: Howa non Iri' Jam Abraão. Je ca tomi' tocwa ma', tomi' pan non Iri' Jam: To' hohot pin inem, xi om ne ca howa ara mapa' ta non. Iri' win ma' ne inem ta non quem. ²⁴ Taraju pa' je e'. To' hohot napari' Iri' Jam pain ca tomi' ha' xun ca', pain ca ara xin carawa ca ara je capari' ca'. Om ca to' hohot capari' pain ca howa e' iri' pain ca om tomi' ha' xun quem.

²⁵ Je ca ara ne cam Raabe pane quem. Caxicam narima' paxi' na ira. Ane to' hohot tacama pain ca ara pan nequem pane ne. Quep xiho' iri' tata wari' nein Israel ne, pain ca noro noro cacain oro macan' pain Canaã pane, narain ho' ac tococwa na cocon oro soldado co quep xun nonon ira.

Mam' pe mi' ac tococwa na pain xijein wana, in mama' ac caca na pane. Je ca to' hohot cam Iri' Jam quem.

²⁶ Je ca tomi' xuhu' ca': Noro jun wari' co mi' pin ma'. Om pin iri na ca wereme ca ne, pain ca hwet ca' con tamataracon ma', taxi' ac xun na pain ca mi' pin nucun. Ac i ma' na pain ca howa nexi' quem. Mo ta om an hwet pe xin ca howa nexi' ca', mo ta om tomi' ha' xun Iri' Jam pain ca ara jein ca awi wa ta capari' ca', je pain ca xiram pa' jujun oro wari' ta capari' ca', om ca howa iri'o' iri'. Ac ca mi' pin ne na ca howa nexi' ta.

Ca hwara' opa pan ne petehwet nexi'

3 Ta mija caca co jain jain nanain ca ca' na wa capijacon Iri' Jam pahu' ta xere. Ma' paric ca' e' tatara co param nanain pahu', xi om ne ca taxi' ara hun Iri' Jam ma', pain ca tomi' xo' xim capari' pain ca xuruxut nexi' pain ca ca' na xin capijacon ta. Om ta tomi' xo' mip tococwa pain ca xuruxut nucucun oro co om ca' na nanain capijacon. Wari' pain ca ca' na xin capijacon ca' iri tara ne, tomi' xo' mip pan tarapari' pain oro coximinain ca xuruxut nexi'. ² Camara' camara' pi' pin ara xi' iri', xi om ne ca ma' taxipa' ara capari' oro xijein ca caracat wa ta. Wari' co om pan' ma', pain ca om tomi' pan tem ca ma', wirico co iri' wari' ta. Ximicon hwanana na, xi om ne ca miri'om taxi' ara cain ca param nucun. Om ca ara e' cain ca param nucun.

³ Noro jein cavalo ma'. Tucu pan caho' irin capijain pain arain too. Mama' xin i cain ta iri iri' ne, cuc in cuc in ac xin na, tomi' ha' ac capari' na. ⁴ Noro jein oro mam' horoho wa ma' quem. Cote ne paxi' na, joc in joc in paxi' ta pain camana' quem. Ane joc wat taxi' pan cain wari' co quep nain ne. Mo ta mao tain cain ca, mam' joc wat joc wat xo' ac cain na pain wijimain arain xinain pain nomoji ma'. ⁵ Ac i ma' na pain petehwet nexi' quem. Om paxi' na ca hwara' ne, ane hwara' opa pan ne ne. Je ca mam' tomi' xec xec ximama' iri' ca'. Noro jein wijimain xe ma' quem. Om paxi' na ca hwara' ne pain ca xo' caraho' ne ma', ane ha' ne pain ca tom tom pi' pin nein cote ne nahwarac ne. ⁶ Ac xe ca to' em' nain oro pana pain mi na petehwet nexi' quem. Pan tem tamana na. Pe paxi' nain winaxi', ane to' em' to' em' pi' pin nein oro coximinain cwerexi' ne. Ac ca tom tom pi' pin capari' na. Wirico Caxicon Jam co caraho' nain xajinain petehwet nexi' ta, ac je na.

⁷Ha' napari' pain ca to' quereme pin xin oro carawa, tomi' ha' pin ac capari' na. Je oro carawa ca to nain mi, oro me, oro em', oro carawa ca to nain com ma' quem, ma' nana wari' co to' quereme taxipa' nanain, tomi' ha' pin ac tococwa na quem. ⁸Ane om tomi' ha' ra na ne petehwet nexi' ne. Om na wari' co to' quereme taxi' nain petehwet nucun, om na wari' co to' tacana pe taxi' nain. Xi awi ra na ne ta. Ac cominain xicon caxicon em' cwa' na pain ca huru huru mi' pin con wari' ma', ac i ma' na petehwet nexi'.

⁹In ac urun Taramaxicon Iri' Jam co Te iri' cwa', mam' in ac urun pain petehwet nexi', mam' tomi' noro ac xuxun na pain oro win ma' nexi' co tomi' ma' pin ca Iri' Jam quem, co an xiho' tatarapa' ta ca pain ca xo' tomi' ma' qui' tococwa pane. ¹⁰Cain' cain' xixi' quem? Xica' pe paxi' na capijaxi', ane tocwan ne ca tomi' nexi' ne. In ac urun Iri' Jam, tomi' noro tomi' noro ac xuxun na oro win ma' nexi' ma'. Om ca na ne pain ca ac i ma' iri' ta xere. ¹¹Noro jein comicon hoi hoi ma'. Weweweo qui' iri nain com ca toc awi ne, ma' tara ca weweweo qui' ac nein com ca toc quirijo ra? Om na ta! ¹²Noro jein oro xijein panaji memem quem xere. Panajinain figo ma', mi nain azeitona ra? Om na. Panaji uva ma' quem, mi nain figo ra? Om na quem. Ac i ma' na comicon hoi hoi ma' quem. Mo ta weweweo qui' nein com ca toc quirijo ma', om ca jao jao weweweo qui' ac nein com ca toc awi ma' quem.

Ca coromicat xo' nucun Iri' Jam

¹³Wahu' pain ca coromicat xo' ina ta hwe ma', je pain ca taraju pa' xo' ina ta hwe ma' quem, an hwet pe jein ca xuruxut xo' nuhu' pain ca ara hwein oro ca awi wa ta. Om ta xec xec hwe pain, tomi' wixite e' je pain. Querec pin' ac xihwe tara pain ca xuruxut xo' nuhu'. ¹⁴Wahu' pain ca juhum' ne xumuhu' pain ca noc mi' caracan xujuhu' pain oro carawa ma' iri nana ne, je pain ca joc in pin xujuhu' pain ca ara e' hwein ca param pan nuhu' ma', om ca ha' ne pain ca xec xec hwe pain. Je xi om ari hwein capijacon Iri' Jam ca iri'o' ma', pain ca xec xec ac i ma' hwe ta. ¹⁵Oro ca coromicat ximama' ac i ma' wa ma', om ca maqui' nein pawin. Maqui' nain macan'. Maqui' nain ca coromicat nein ca wari' wa pain ca om howa

3.12 Om paxi' na ca tomi' mi' cain comicon hoi hoi ma'. Tomi' mi' nain ca tomi' nexi'. Om ca na ne pain ca joc wanan nein ca tomi' ximao wa pain ca tomi' awi wa ta.

tocwa Iri' Jam ma'. Maqui' non Caxicon Jam. ¹⁶Mo ta noc mi' caracan xijexi' pain oro carawa ma', mo ta joc in pin xijexi' pain ca ara e' xin ca param pan nexi' ca', ja' teretem ac xijexi' na, ara tamana ac xin na oro ca om awi wa quem.

¹⁷Ane jima' ne ca coromicat xo' wa ca maqui' nain pawin ne. Mo ta coromicat xo' iri', to ni ca' ac xin na ca caracat wa pain ca win xumu cain' xun Iri' Jam. Ca' ac iri' na quem: Quep xih'o' ururun oro win ma' nexi' pain ca mana' caracan xucucun ma'. Tomi' querec te caracan xijexi'. Tomi' wixite xijexi' pain ca win xumu xin ca param pan nucucun oro win ma' nexi'. Xiram pa' tamana xijexi' pain ca ara mi' xijexi' pain oro ca awi wa. Om ca tomi' querec te paxica' xijexi', om ca tomi' capijacocon e' xijexi', tomi' iri'o' xijexi'. ¹⁸Mo ta quep xih'o' ac i ma' xuxun oro win ma' nexi' cwa', quep xih'o' ac i ma' ac cacapari' tara, xuruxut xo' xuruxut xo' pi' pin ac iri' tara pain ca ara e' xin ca param pan nucun Iri' Jam quem.

Ca win xumu jein ca param pan ne Iri' Jam tococwa

4 Main ca maqui' ac ne ca tama' noc xujuhu' pain ca tama' mana' caracan xujuhu' ma' quem? Om ca maqui' nein ca param ximama' nuhu' pain ca ari hwein ca param pan nucun Iri' Jam ra? ²Param ximama' hwein caramaji macan', ane om ha' cuhu' pain ca cut hwein ne. Jain jain hwein, to' pa' pin ton waximain ta ac hwe na, ane om cut ca' ac xujuhu' pain ne. Je ca mana' caracan xujuhu' ma', noc mi' xujuhu' pain quem. Om om nuhu' carawa ca param hwe ma', xi mi' xut pain hun Iri' Jam ta. ³Mi' xut pain iri hun ne, om ca mi' cuhu' pain, xi mi' xut pain xo' hun ta. Mi' xut pain paxi' hun, ane param e' hwein ne, ma' ta mam' waraju ximama' xi' pain ca param pan nexi' ta hwe ma'.

⁴Cain' cain' xihwe pain ca an pe pin hun Iri' Jam quem? Om ca taraju pa' hwe ra? Wari' co win ma' ne nonon oro co tama' pan teretem nana pain ca om howa cocon Iri' Jam ma', wirico co noc non Iri' Jam. ⁵Tomi' ximao tarapari' Iri' Jam pain ca xirao' an pe xine capijacon ra? Tomi' ca' napari':

Tamataracon Iri' Jam ca an pe mi' capari' ca', pain ca
pe ho' roron ta cain pari',
param tamana napari'.

Jain jain napari', win xumu e' xine ta napari'.

⁶ Ac i ma' paxi' napari', ane quep xiho' capari' pain ca xiram pa' tamana capari' ne. Je ca xirao' an pe xine pain capiijacon Iri' Jam quem:

Ari nonon oro co xec xec nana Iri' Jam ta.

Oro co om xec xec nana ma' iri nana ne,

xiram pa' tata, quep xiho' tata quem.

Ac i ma' na ca xirao' pe xine pain capiijacon Iri' Jam pane.

⁷ Je ca tomi' xuhu' ca', tomi' ha' cara jun Iri' Jam. Ari jun Caxicon Jam, mo ca' ac cuhu' tara. ⁸ Wixicam pin jun Iri' Jam, wixicam pin ac cuhu' tara quem. Wahu' pain ca caracat hwe ma', cwirin' pin je. Win ne ca hohoc xo' hwein muhu' pain ca mixem tamana nein ma', ac i ma' tara ca an to pin hwein ca caracat nuhu'. Wahu' pain ca param tocwan hwe ma' quem, an to pin jein ca param ximama' nuhu', win xumu e' jun Iri' Jam. ⁹ Tomi' xaxa' tamana je pain ca pan teretem nuhu'. Awaran je, awaran xoc je. Tatam' maho' je, awaran e' je. Tomi' querec te ximama' maho' je, tomi' xaxa' e' je. ¹⁰ Querec pin' xujuhu' pain ca ximin nuhu' pain ca om querec awi cuhu' Taramaxicon Iri' Jam. An tequi' to ac cuhu' tara, mi' ac cuhu' tara pain ca querec awi cuhu' quem.

Ca om ha' ne pain ca tomi' em' xujuhu'

¹¹ Ta tomi' napat xujuhu' me xere. Wari' co tomi' napat non win howa ca ma', am tomi' em' con quem, wirico co tomi' napat nain capiijacon Iri' Jam ca tomi' ha' je capari'. Tomi' in pin nain quem. Je ca tomi' xuhu' ca', tomi' inon wari' co tomi' in pin nain capiijacon Iri' Jam ca tomi' ha' je capari'. Mo ta tomi' in pin main capiijacon Iri' Jam, om ca tomi' ha' main. Joc in pin main, ac juiz ma pain ca joc in pin main quem. ¹² Xica' pe na Iri' Jam co Taramaxicon ma', pain ca tomi' ha' xine capari' ca'. Wirico co Juiz ma' quem, pain ca tomi' xo' ton cocon oro wari' pain oro ca ara caca ma' quem. Wirico co to' witan taxi' ma', wirico co wap taxi' ma' quem. Je ca tomi' xim ca', ma' na ca an xiho' ac mon Iri' Jam pain ca tomi' em' mon win howa ma ra? Xi taramaxicon ma ta.

**Ca om ha' ne pain ca xec xec wa pain ca coromicat an
pe xo' xine carawa ca ara xi' wa ma'**

¹³Tomi' xim inuhu' pain ca coromicat an pe xo' xin hwein carawa ca ara xi' hwe ma'. Taraju wet je e'. Tomi' ac i ca' hwe: Mama' xin urut pain cidade cain, mama' ho' xi' urut pain xec ca', am pain xijein xec tara, mama' xi' urut ta. Cawaxi' pa' taraparut pain i cain. Taramaja xi' urut, cut xut pain carawa, vender vender ac xut pain tara, cut tamana ac xut tara pain dinheiro ta, ac i ma' na ca tomi' nuhu' ma'. ¹⁴Cain' cain' xihwe quem? Xi taxi' hwein carawa ca xec ara xim nuhu' ta. Am e' e' wet hwe pain xijein cawaxi', am cono' hap xi' hwe. Ac murucucu' ara xi' hwe. Win ne murucucu' pain xo' xec ma'. Piri' mao na, pi' pin hap ac ne na. Ac i ma' hwe quem. ¹⁵Om xi tomi' ac i ma' hwe ta. Tomi' ca' e' je: Tara parut ta'a, mo ta param mi' caparut pain ca e' e' wet urut pain oro xijein xec Taramaxicon Iri' Jam cwa', mo ta param mi' caparut pain ca ara xut pain carawa ca ara xi' urut ca', tara con ta, ac i ma' tara ca tomi' nuhu' ta. ¹⁶Ane xec xec e' hwe ne. Xin to hwe pain ca coromicat an to xo' ximama' hwein oro ca ara xi' hwe ma'. Pan teretem hwe pain ca xin to ac i ma' nuhu' ta. ¹⁷Je ca tomi' xuhu' ca': Wari' co querec pin' paxi' nain carawa ca awi ca ara ra con Iri' Jam ma', mo ta om ara cain, caracat ac ca na.

Ca hu tococwa co caramaju nana ma', co quep em' nonon oro wari'

5 Tomi' xim inuhu' pain ca caramaju hwe ma' quem. Taraju wet je e'. Awaran je, awaran tamana je. Xi om ne ca ma' ara ne carawa ca om awi ca maqui' pa' xim nuhu' ta. Ximin je, jain jain tamana je. ²Em' pin na oro caramajuhu'. Cao' pin non womuhu' caxicon tohoru' quem. ³Oro caramajuhu' ca cut moin' ximama' hwe ma', je ouro nuhu' pain prata nuhu' ma', tot mao ac ne na pahu'. Je tara i ma' ca to' querec pin' xim xihwe pain ca win xumu e' pan xujuhu' ma', pain ca narain ho' taxipa' hwein oro caramajuhu' ma'. Ac xe turuhu', ac ca wiran pin cuhu' turuhu'. Cut moin' tamana a xihwein oro caramajuhu' pain oro xec nein ca win pi' pin ta' ne macan' ta. ⁴Noro jujun oro co taramaja to nanain totahu' ma'. Merem awaran nunuhu', xi pagar huhun pain ca taramaja nucucun ta. Mixein huhun, narain ho' huhun pain dinheiro nucucun. Taraju nain ca merem awaran nucucun Taramaxicon Iri' Jam co hwara' opa tiquin' ca' nonon oro

taramaxicon ma' quem. ⁵Ma' ma' pi' pin nuhu' oro carawa ca param hwe pain macan' ca', mija na ca tomi' querec te ximama' nuhu' pain ca waraju nuhu' ma' quem. Pain ca win xumu e' hwein oro ca param pan nuhu' ma', ac ca pa' mi' pa' mi' towe pin xujuhu' na. Win ne caji carawa ca pa' mi' pa' mi' towe pin wa ca', pain ca to' pa' pin xi' wa ca', ac i ma' xujuhu' ta. ⁶Em' hwe ta huhun wari' co xuruxut xo' nana ma', to' parapa' pin huhun. Om ca quep in pin ac cucuhu' quem.

Ca quereme cara je tococwa pain oro ca to' i'ina nuhu' ta tococwa

⁷Je ca tomi' xuhu' ca' xere. Winim' cara jun Taramaxicon nexi' pain ca in qui' ta' nucun. Noro jun wari' co tota ma', pain ca oin' tain cain oro ca oin' ca ma'. Winim' nain xowi' pain ca xo' oin' tain ca ma', je pain ca paca' pin ta' ne ca oin' ca ma' quem. Winim' nain macan' pain ca to' orot nein, winim' nain ca mi xo' nein quem. Om ca toron ne ximicon, winim' cara e' na. ⁸Winim' cara ac i ma' jun Taramaxicon nexi' quem. Quereme je, hwara' opa je pain iri' xumuhu' ma', xi om ne ca wixicam pin ara ne xec nein ca maqui' ta' nucun ta. ⁹Ta tomi' wijimi xujuhu' me xere. Ma' ta om tomi' em' pan xihwe ta. Xi om ne ca wixicam pin ara ne ca maqui' nucun co ma' co iri' Juiz ma', co tomi' xo' xim napari' pain oro carawa ca ara iri' ca'. Wara xat pe ho' pin nain man ca corom wa ma', pain ca corom hwet xim capari' ma'.

¹⁰Noro jujun oro profeta co tomi' hwet jujun pain capija oro wari' ta ca Taramaxicon Iri' Jam pane. Jain jain paxi' nana pain oro ca to' i'ina nonon pane. Ane quereme cara cacain ne. An xiho' jujun ta xere. ¹¹Querec pin' ururun oro wari' co quereme cara nanain carawa ca to' i'ina nonon ma', querec pin' ururun pain ca param mi' pan cocon pain oro ca awi wa Iri' Jam ta. Wara taxi' ara xi' hwein i ma' cocon. Taxi' hun Jó cara pane. Quereme cara nain ca ximin nucun pane. Taxi' hun pain ca aram aram quep xiho' con Taramaxicon Iri' Jam quem. Xi om ne ca xiram pa' tamana taxipa' ara ca Taramaxicon Iri' Jam ta, je curucun mao na.

5.5 Pain ca pa' mi' pa' mi' towe pin xine caji carawa ma', om ca taxi' pan ne pain ca mi' pin ta' nein. Tomi' querec te e' na pain ca pa' mi' xine, hohot tamana nain ca pa' mi' pa' mi' towe pin nein. Maqui' ta' iri tara xec nein ca to' pa' pin xin xine ne, jain jain tamana ac ne tara. Ac i ma' nana oro taramaxicon co tomi' querec te ximama' nana pain ca waraju nucun ma'. Hohot hohot ca' nonon, maqui' iri tara xec nein ca wap xun tococwa ne, jain jain tamana ac caca tara ta.

¹²Tomi' xim inuhu' pain i ca' quem xere, tomi' mip xim inuhu': Mo ta wara tomi' pe xujuhu' pain ca ara xi' hwe ma', ta an hwet ximama' hwein wixinain pawin pain ca tomi' nuhu' me. Ta an hwet ximama' hwein wixinain macan' je oro carawa nein quem me. Ta an hwet ximama' camain' hwein wixinain oro carawa pain ca ma' ta howa cacapa' oro win ma' ne pain ca ara tain ta' ca' hwe me. Mo ta wara tomi' pe xujuhu' pain ca ara xi' hwe ma', ara xin ta e' je. Mo ta om ara xin hwein, om ta ara xin ta e' je. Ma' ta om wap cuhu' Iri' Jam ta inuhu'.

Ca om ha' ne pain ca tara con ta'a hun Iri' Jam pain ca tomi' hun ma'

¹³Tomi' querec inuhu': Ma' na win ma' nuhu' co to' i'ina non carawa ma' quem? Tomi' toron Iri' Jam ta. Ma' na win ma' nuhu' co tomi' querec te ma' quem? Com querec te mi' toron pain tamara' Iri' Jam ta. ¹⁴Ma' na win ma' nuhu' co caxi ma' quem? Tomi' ca' turuhu': Mo'o jujun co querec wet nanapari' pain ca cut in xijexi' pain ca howa xun Jeju ma'. Tomi' mi' tatarapa' con Iri' Jam, ji'ao mi' tatarapa' pain wina pain homain oliva quem. To' xio ron ta ac cocon tara Taramaxicon nexi' Jeju pata' ta, ac i ma' tara ca tomi' cuhu' ma'. ¹⁵Mo ta tomi' mi' cocon con Iri' Jam co caxi ma', mo ta howa xo' cocon pain ca ha' tarapari' ta caca ma', xio pin ac ca tara ta. An tequi' pe toron Taramaxicon nexi' quem. Am caracat ca quem. Je i ma' ira, xic am pin ac xine tara ca caracat nucun ta. ¹⁶Je ca tomi' xuhu' ca'. Tomi' hwet mi' xujuhu' pain ca caracat nuhu' ma'. Tomi' mi' xujuhu' con Iri' Jam quem. Ma' ta xio pin hwe. Wari' co xut xo' ma', tomi' mi' iri non con Iri' Jam win ma' ca ne, hwara' opa tamana na ca tomi' nucun. Mi' pan non pain ca tomi' nucun Iri' Jam ta.

¹⁷Noro jun profeta Elias cara pane. Wari' na, ac iri' ca' na quem. Ane tomi' con Iri' Jam ne, tomi' mip non pain iri' ximicon. Om ta pan' mami' ne xowi' pum ta Te Iri' Jam iri non ne, am pin ac ne na quem. Cawaxi' pa' nonon, cawaxi' pa' mami' nonon quem. Ma' 3 pin iri na cawaxi' pain ca om pan' mami' ne xowi' cocon ne, maqui' pa' ac cocon na ximijain xijein quem. ¹⁸Tomi' mami' ac con na Iri' Jam. Pan' tara xowi' pum ta Te Iri'

5.14 Ac i ca' na ca taraju pa' nucucun oro co noro taxpá' nanain capijacon Iri' Jam: Homain oliva ca ji'ao mi' xine pain winacon co caxi ma', tomi' joc mam' mi' nain ca hwara' opa nein Tamataracon Iri' Jam pain ca quep xio taxi' con wari'.

Jam iri non ne, pan' ac ne na, tarama' ac ne na oro ca oin' ximama' caca pane quem.

¹⁹ Tomi' xim inuhu' pain i ca' quem xere. Mo ta ma' ca win ma' nuhu' co tomi' ha' tomi' ha' om pin nain capijacon Iri' Jam ca iri'o' ma', mo ta ma' ca xucun win ma' nuhu' co an in ton non ma', pain ca in hwet ron Iri' Jam, tomi' ha' mami' rain capijacon ca iri'o' ta con ma', ²⁰ mam' pe wet ac hwein tara i ca': To' cwirin' pin iri non pain ca caracat nucun win ma' ca ne, to' witan ca' ac con tara pain ca mi' pin wa. Xic am mija pan tarain ca caracat nucun Iri' Jam ta.

Je i ca' ca xirao' ne ca'.

1 Pedro

Ca xo' xirao' ten qui' nucun Pedro

1 Pedro ina pain ca xirao' mi' xuhu' ca'. Apóstolo ra napa' Jeju Cristo pane, pain ca tomi' hwet roron pain capija oro wari' capa' pane.

Xirao' mi' inuhu' pain ca wara tora' cuhu' Iri' Jam pane. Ac ca tatirim to hwein na oro macarahu' ma', pain Ponto, pain Galácia, pain Capadócia, pain Ásia, je pain Bitínia ma' quem. ²Wara querec pin' nuhu' Cotere' Iri' Jam pain cara pane. Tora' nuhu', to' hohot pin nuhu' Tamataracon quem. Ma' ta tomi' ha' hun Jeju Cristo ta nuhu'. Ma' ta hohoc pin cuhu' pain quicon ta nuhu'.

Param inon Cotere' Iri' Jam pain ca quep xiho' tamana cuhu' pain ca mi' cuhu' pain ca param nucun. Param inon pain ca mi' hwara' cuhu' pain ca om toron ne xumuhu' quem.

Ca tomi' querec te xun Iri' Jam pain xocori ca e' wa ca mi' capari' ca'

³Tomi' hwet xin ca awi tamana nucun Iri' Jam co Te ca Taramaxicon nexi' Jeju Cristo ta. Xiram pa' tamana napari'. Mam' mi' napari' pain xocori ca e' wa pain ca to' e' mami' con Jeju Cristo ta. Je ca om tara con ta'a camain' xun pain ca howa xun ca', pain ca winim' xun pain oro ca mi' xim capari' ma'. ⁴Om ta pi' ra ha' ne oro ca mi' xim capari' ma', om ta em' ac ne, awi cara tara quem. Wara an to xo' mi' nuhu' pain, querec wet xo' nain pain pawin cain. ⁵Querec wet xo' nuhu' quem, xi om ne ca howa ara hun ta. Mam' querec wet xo' nuhu' pain ca hwara' opa nucun. Querec wet xo' querec wet xo', aram aram maqui' pa' ac cuhu' tara xec nein ca to' witan pin toton cuhu' ma'. Wara awori xo' na, winim' e' nain xec nein ca an hwet mi' toton cuhu' pain ca param nucun ma', pain ca to' witan pin toton cuhu' ma'. ⁶Je ca tomi' querec te tamana hwe ma'. Tomi' xaxa' paxi' hwe pain xocori ca', xi ma' ara ne oro ca to' i'ina nuhu' ta. Ane om to' i'ina cara xim cuhu' ne, ame hwe e'. ⁷Noro jein ouro ca om awi cara ma', ca an tom pe xine ma'. Awi paxi' na, ane awi tamana pan capa' ca

howa nuhu' ne nuhu' Iri' Jam. Je ca to' i'ina cuhu' oro carawa pain xocori ca' nuhu', ma' ta querec pin' xihwe pain ca howa iri'o' hun Jeju ta nuhu'. Ma' ta awi hwe, tomi' querec te tamana inuhu', hohot tamana mahu' ta xuhu' ca' turuhu' pain xec nein ca aram aram in qui' ta' nucun Jeju Cristo ta. ⁸Om paxi' na ca querec hun Jeju pane, ane om noc hun ne. Om paxi' na ca querec hun pain xocori ca' quem, ane howa hun ne. Tomi' querec te tamana hwe con. Mija na, om ca tomi' ac xine ca tomi' querec te tamana nuhu' con ta. ⁹Xi to' witan pin xi' ara xihwe ta. Je ca howa hwe ma'.

¹⁰Oro profeta co tomi' hwet nanain oro ca tomi' hwet je tococwa pane, pain ca main to' witan e' turuhu' Iri' Jam ta cocon oro wari' pane, i'ina na ximicocon pain ca cain' cain' xira ne caca, je pain ca cain' xi to' witan ac tococwa ne caca pahu', noro noro ac cacain na capijacon Iri' Jam. ¹¹Taraju pa' xixi' na nanain ca tomi' nein Tamataracon Cristo ca pe ho' nonon pane, pain ca tomi' ca' tococwa pane: Jain jain tamana iri tara Cristo ne, awi tamana ac ne tara oro ca aram aram ara ton non ta, ac i ma' na ca tomi' tococwa pane. Ma' xec ca tomi' mi' ne quem, cain' cain' xira quem ac caca na pain ca noro cacain capijacon Iri' Jam pane. ¹²Tomi' xo' ca' tata oro profeta pane: Tomi' hwet iri hwein oro carawa jimao ca maqui' ta' ma' ne, om ca quep xiho' pan xujuhu', om na. Quep xiho' pan huhun oro xucucun wari' co maqui' xi' nana pa'ao' ta na ca tomi' xo' tococwa pane. Je ca tomi' xuhu' ca'. Wahu' pan co quep xiho' xi' wawa pain ca tomi' hwet nucucun pane. Je ca pijim' hwet xihwe pain xocori ca' quem. Oro co pijim' hwet nunuhu' pain capijacon Iri' Jam con Jeju ma', mam' pijim' hwet nunuhu' pain ca hwara' opa nein Tamataracon Iri' Jam ca mam' capari' pain pawin pane. Capijacon Iri' Jam ca pijim' xihwe ma', jain jain pan nanain oro jam co taramaja mi' nonon ma'. Taraju pa' xixi' na nanain.

Ca xuruxut xo' je pain ca wari' nucun Iri' Jam ta tococwa

¹³Je ca tomi' xuhu' ca'. Coromicat xo' je. Wara awori xo' je pain ca ara xin hwein ca param nucun Iri' Jam. Ma' tara xumuhu'. Howa mip jun Iri' Jam pain ca xiram pa' xim cuhu' ma', pain ca to' witan e' xim cuhu' pain ca in qui' ta' nucun Jeju Cristo ta. ¹⁴Tomi' ha' jun Iri' Jam, win ne ca mana

1.7 Win ne ouro pain ca xo' cut xine ma'. Awi paxi' na, ane main om pin ta' ne ne, xi ma' ara ne ca em' nein ta. Je ca an tom pe xine ma', ma' ta om pin ne ca em' nein ta na co quep nain.

panxita' cuhu' ma'. Ta tomi' ha' mami' hwein oro ca param pan teretem nuhu' ca ara taxipa' hwe pane, pain ca om querec pin' querec hun Iri' Jam pane. ¹⁵To ni ca' jein ca caracat wa pain oro ca ara hwe ta. Win ne ca pe ni ca' cain ca caracat wa Iri' Jam co howa xine nuhu' ma'. ¹⁶Xi xirao' pe ara xine pain capijacon Iri' Jam ta, ca' na con: To ni ca' jein ca caracat wa ta. Win ta' ca', pain ca pe ni ca' tain ca caracat wa ca' na ca xirao' pe nein.

¹⁷Tomi' xo' tomi' xo' xam' tarapari' pain oro carawa ca ara iri' Iri' Jam. Om ta tomi' querec te paxica' capari', an an ari tara ca tomi' nucun pain ca tomi' mi' xim capari' pain. Co om ara xo' nain ca ara nucun ma', wap ac tocwa tara. Co querec hohot ca pain ca ara nucun ma' iri na ne, om ta wap tocwa. Je ta in ac qui' hun quem. Tomi' ha' jun pain ca to to wet hwein macan' ca'. Xi Te ara hun ta. ¹⁸Xi taxi' ara hwein carawa ca mam' to' witan cuhu' Iri' Jam pane ta. Taraju pa' je: To' witan ca' iri nuhu' pain oro ca xuruxut pan teretem ximama' nuhu' ca ca' na cucuhu' oro hwanana nuhu' pane ne, om ac ne na ca mam' to' witan cuhu' pain carawa ca main om pin ta' ma', je prata, je ouro ma' quem, om na. ¹⁹Mam' to' witan nuhu' pain wic ca awi tamana ma', je quicon Cristo co ac wijimain taramaji ovelha ca om em' camain' ma'. ²⁰Wara tora' paxi' non Cristo Iri' Jam pain cara pane, pain ca om tomi' ma' querec qui' cain macan' pane. Ane an hwet e' con pain xocori ca' ne. Ma' ta to' witan pin cuhu' ta nuhu'. ²¹Je ca howa pin hun Iri' Jam ma', xi om ca Cristo co to' e' mami' ca pane, co to' hwará' opa ca pain ca mi' con pain ca in ac in ac pi' pin cocon oro wari' quem. Je ca howa hun Iri' Jam ma'. Howa hun pain ca winim' hun ma', pain ca mi' xim cuhu' pain oro ca wara tomi' pe mi' cuhu' ma'.

²²An to pin hwein ca caracat wa, xi om ne ca tomi' ha' pin ara hwein capijacon Iri' Jam ca iri'o'. Ha' pin nuhu' pain ca om noc iri'o' xujuhu' pain ca xere xujuhu' ma'. Je ca tomi' xuhu' ca', tama' tomi' querec te cara xujuhu'. Ta tomi' querec te e' ne capijahu' me, tomi' querec te iri'o' xujuhu', maqui' tarain iri' xumuhu' pain ca tomi' querec te xujuhu' ma'. ²³Xi mi' ara cuhu' pain xocori ca e' wa pain ca to' camara' mami' cuhu' Iri' Jam ta. Xocori ca e' nuhu' ma', om ca maqui' con wari' co mi' pin. Maqui' non Iri' Jam co e' cara ma'. Mam' to' camara' nuhu' pain capijacon ca e' ma', ca om pi' ra ha' ma'. ²⁴Win ne ca xirao' pe xine pain capijacon:

1.19 Tom tain' mi' xun iri nonon pain winacocon oro wari' nein Israel Iri' Jam pane ne, an e' ac cacain na wijimain taramaji ovelha ca om em' camain'. Xi tomi' joc mam' mi' ara con Jeju Cristo co om em' camain' ta.

Ac oro tononoin nana oro wari'.

Oro ca awi paxi' nucucun ma', an xiho' e' nain hwijein tononoin.

Cono' hap na, camara' hap na hwijein quem.

²⁵Ane to wet cara ne capijacon Taramaxicon nexi' ne.

Ac i ma' na ca xirao' pe xine pain capijacon Iri' Jam ma'. Je ca tomi' xuhu' ca'. Je i ma' capijacon Iri' Jam con Jeju ma', ca pijim' hwet xihwe pane.

2 Je ca tomi' xuhu' ca'. An to an to pi' pin jein oro ca pan teretem wa je oro ca mixein wa ma'. An to pin jein ca ac ca iri'o' xi' ca' tara me hwe ma'. An to pin jein ca noc mi' caracan xujuhu' pain oro ca ara nuhu' ma'. An to pin jein ca tomi' napat xujuhu' ma' quem. ²An xiho' jejem oro hwijima' co xo' camara' nana ma', pain ca tama' param cacamain comi catat. Param tamana jein capijacon Iri' Jam ma', ca ac iri' comi catat ca om em' camain' ma', ca mi' capari' Tamataracon Iri' Jam ma' quem. Ma' ta horon horon tiquin' hwe ta nuhu'. Aram aram maqui' pa' ac cuhu' tara xec nein ca to' witan pin xim cuhu' ma'. ³Querec pin' ara xi' hun Taramaxicon nexi' pain ca awi nucun ta.

Pacun ca e' ma', cocon oro wari' nucun Iri' Jam quem

⁴Wixicam pin hun Taramaxicon nexi' Jeju co an xiho' nain pacun ca e' ma', ca to' teren nain xirim. Noc urut pum ta paxi' nonon oro wari' pane, ane tora' pan con Iri' Jam ne. Hohot tamana ara xi' mapa' ta non pane.

⁵An xiho' hwein pacun ca e' ma' quem. Ac ca mam' quep xihwe na pain xirim ca pe pan ne Tamataracon Iri' Jam. Ac ca taramaja to hwein na pain ca taramaja mi' hun ma' quem. Win caca oro sacerdote ma'. To' sacerdote nuhu' Iri' Jam. Tora' inuhu' pain ca taramaja mi' mahu' ta nuhu', in ac taxipa' xine, an hwet mi' xine pain ca tomi' querec te nuhu' ta nuhu'. Je ca hohot capa' ta nuhu'. Wirico Jeju Cristo co mi' nuhu' pain ca taramaja mi' ac i ma' hun ta. ⁶Je ca xirao' pe xine pain capijacon Iri' Jam ma' quem.

Taraju wet xine.

Tora' inon wari' co hohot tamana napa' cwa'.

An pe inon pain Sião.

Ac iri' pacun ca to' teren nain xirim.

Wari' co howa non ma', om ta xat camain' ne ximicon.

2.6 Sião na xijein wixinain Jerusalém. Tomi' joc mam' mi' tata oro co howa nonon Jeju Cristo quem.

Ac i ma' na ca xirao' pe nein ma'. ⁷Je ca tomi' xuhu' ca'. Hohot tamana nuhu' Cristo co an xiho' nain pacun ca to' teren nain xirim ma', xi om ne ca howa ara hun ta. Oro co om howa nonon ma' iri nana ne, an xiho' nonon oro co noc nonon ma'. Win ne ca xirao' pe xine pain capijacon Iri' Jam ma' quem:

Pacun ca noc caca caram ma' co quep xin nanain xirim ma',
aram aram iri' pacun ca to' teren nain xirim pin na ta.

Ac i ma' na ca xirao' pe nein ma'. ⁸Ma' na xijein capijacon Iri' Jam ca xirao' pe xine quem:

Co ma' co an xiho' nain pacun ca noc caca ma',
an xiho' nain pacun ca xut tao' pan' non wari' ma' quem.

Ac i ma' na ca xirao' pe nein ma'.

Je ca tomi' xuhu' ca': Xuruxut tao' pan' camara' tata co om howa nana ma', xi tomi' ha' cacain capijacon Iri' Jam ca pijim' hwet tococwa ma'. Wara coromicat an pe xo' mi' ara xi' nonon pain ca camara' wa Iri' Jam ta.

⁹Wahu' iri na ne, tora' nuhu' Iri' Jam pain ca wari' ne cuhu' ma'. Ac sacerdote nucun pin hwe pain ca taramaja mi' hun pain ca Iri' Taramaxicon ca ma'. Xica' pe na Iri' Jam co wari' ne nuhu'. Ma' ta tomi' hwet huhun oro wari' pain ca hwarar' opa tamana ne ca', pain ca ara mi' toton pain oro ca awi wa ca' nuhu'. Wirico co hwerehwet ca' jein ca jitacat nein xim ta nuhu' pane, wirico co wixicam pin xine pain naran ne ca awi tamana ca' nuhu' pane quem. ¹⁰Om paxi' na ca wari' ne cuhu' Iri' Jam pain cara pane, ane wari' ne pin cuhu' pain xocori ca' ne. Om paxi' na ca xiram pa' cuhu' pane, ane xiram pa' pin cuhu' pain xocori ca' ne.

Ca xuruxut nexi' pain ca howa xun Jeju Cristo

¹¹Je ca tomi' xuhu' pain ca tomi' querec te xuhu' ca'. Ac ca tatirim hwe na pain macan' ca', pain ca om to xo' hwe ma'. Je ca hu ca' xuhu' ca': Ein jein oro ca param ne ca cwere wa ca to' i'ina nuhu' ma', ca ac ca mixita cuhu' ne pain ca to' quiji' pin xim cuhu' ma'. ¹²Xuruxut xo' je pain ca to

2.7 Ma' xirim ca to' teren ca Cristo cwa'? Om na, taraju pa' je e'. Tomi' mi' pan napari' pain ca howa xun ca'. Xi ac xirim ara pan iri' pain ca pe ho' capari' Tamataracon Iri' Jam pain ximixi' ta. **2.9** Pain ca tomi' mi' cain ca jitacat nein xim ma', tomi' joc mam' mi' nain ca caracat wa. Pain ca tomi' mi' cain naran nucun ca awi tamana ma' iri na ne, tomi' joc mam' mi' pan xucun pain ca to ho' xine ta tococwa.

ho' huhun oro wari' co om howa nana ma'. Tomi' em' paxi' tuturu'hu', pan teretem nana ta paxi' tuturu'hu'. Je i ma' ira, xuruxut xo' je, ma' ta querec pin' cucuhu' pain ca ara hwein oro ca awi wa ta. Aram aram awi na Iri' Jam ta ac caca tara pain xec nein ca in qui' ta' nucun quem.

¹³ Tomi' ha' tomi' ha' pi' pin jujun oro co taramaxicon to ho' nunuhu' pain macan' ca'. Je ca param mi' cuhu' Taramaxicon nexi'. Tomi' ha' jun rei co iri' taramaxicon ma' quem, xi wirico ara ca co hwara' opa tamana tiquin' ca' nonon oro xucucun taramaxicon pain macan' ca'. ¹⁴ Tomi' ha' jujun oro xucucun taramaxicon ma' quem. Wiricoco ara xi' nana co tomi' xo' pan ca rei ma', pain ca taramaja je tococwa ma'. Wap jujun co pan teretem nana ma', awi hwe ta jujun co ara nanain ca awi wa ma', ac i ma' na ca tomi' xo' tococwa pain ca taramaja nucucun. ¹⁵ Xi param mi' ara cuhu' pain ca ara e' hwein ca awi wa Iri' Jam ta. Ma' ta to' hehe pin huhun oro co tomi' napat ximama' nana pain ca om coromicat xo' nucucun. ¹⁶ To' witan paxi' nuhu' Iri' Jam ma', om paxi' na wari' co tama' cuc cuc nuhu' pain ca tomi' ha' e' xine ta cuhu' ma' quem. Ane hohot ne pain ca coromicat xo' hwe ne. Ta coromicat ximama' ca' hwe me: Je i ma' ira, to' witan ara xi' napa' Iri' Jam ta, je ta pan tem ta' ta, ta coromicat ac i ma' camain' hwe me ta. Xuruxut xo' je pain ca ara e' hwein ca param nucun Iri' Jam ma', pain ca taramaja mi' hun ma'. ¹⁷ Tomi' xo' tomi' xo' pi' pin jujun oro wari'. Tomi' querec te xujuhu' pain ca xere xujuhu' ma'. In ac jun Iri' Jam, tomi' ha' jun pain ca ara e' hwein ca param nucun. Querec pin' jun rei co iri' taramaxicon ma', co hwara' opa tamana ma'.

**Ca win ta' ne capari' Cristo pain ca
quereme cain oro ca quep em' wa pane**

¹⁸ Tomi' ca' inuhu' pain ca taramaja mi' e' huhun oro taramaxicon nuhu' ma': Tomi' ha' jujun. Tomi' xo' jujun, ta tomi' ximama' camain' huhun me. Om ta tomi' ha' e' huhun co awi nana ma', co tomi' toto nunuhu' ma'. Tomi' ha' jujun co tomi' mana' nunuhu' ma' quem. ¹⁹ Mo ta quep em' ximama' xihwe, om paxi' tara ca pan teretem hwe, mo ta quep em' ximama' e' xihwe. Mo ta coromicat ca' hwe: Je i ma' ira, taxi' urun Iri' Jam pain ca quep xihw' capari' pain ca wap ximama' cacapari' ca', mo ta coromicat ac i ma' hwe, tomi' querec te ac cuhu' tara Iri' Jam. ²⁰ Ane tomi' xuhu' pain i ca' ne: Mo ta pan teretem hwe, mo ta quep em' xihwe pain ca pan teretem

pan nuhu' ma', tomi' querec te nuhu' Iri' Jam pain ca quereme hwein ra? Quep xiho' xuruhu' pain ra? Om na ta! Tomi' querec te e' nuhu' pain ca quereme hwein ca jain jain wa pain ca wap ximama' cucuhu' pain ca ara hwein ca awi wa ta. ²¹ Je ara xi' na ca wara param mi' cuhu' pain ca xo' howa xine ta qui' cuhu' pain cara pane. Mo ta quep em' ximama' xihwe, je i ma' ira je, quereme ac hwein tara ta nuhu'. Xi om ne ca quereme ara ca Cristo pain ca quep em' ximao pan tocwa pain ca mi' pin caho' cuhu' pane ta. Win ta' pane, an xiho' xine pain ca quereme ta' pane nuhu' quem. ²² Om ca caracat camain' ca pane. Om ca mixein camain' ca quem. ²³ Tomi' xirac iri nonon ne, om ca win capiija pan cocon quem. Jain jain iri na pain ca quep em' cocon ne, om ca win mahu' ne cocon. Je i ma' ira, wum co taxi' napa' ta non Cote ca co wap xo' taxipa' nonon oro caracat. ²⁴ Wirico co quereme ma', pain ca tatatain pe tocwa pain pana pane. Cut pi' pin nain ca caracat nexi' pain curucun. Ma' ta caracat caracat om pin hwe ta napari'. Ma' ta xuruxut xo' hwe pain ca ara e' hwein ca awi wa ta napari' quem. To' xio pin nuhu', xi om ne ca wap wein pin ara xine curucun pane ta. ²⁵ An xiho' paxi' hwein ovelha ca xuruxut ximama' pane, ane cwirin' pin hwe ne. Coco' tucu in hwet hun co ma' co querec wet nuhu' ma', co narain ho' taxi' nuhu' pain oro ca om awi wa ma'.

Ca hu tacacama oro narima' cocon waram taxicacam

3 Wahu' quem oro narima', pain ca ma' cuhu' tarama' ma' quem. Tomi' ha' tomi' ha' xam' jujun taxuhu'. Am ma' caca waram taxuhu' co om howa nanain capiijacon Iri' Jam ma'. Je i ma' ira, tomi' ha' cara jujun. Om paxi' tara ca cuc cuc huhun pain ca howa je howa je huhun ma'. Querec pin' iri tuturuhu' pain ca xuruxut xo' nuhu' ne, aram aram howa pin ac caca tara pain ca querec e' cucuhu' pain ca xuruxut xo' nuhu', je pain ca in ac iri'o' hun Iri' Jam ma' quem. ³ Ca awi nuhu' ma', om ca na ne pain ca maqui' e' nein oro carawa ca mam' ara awi pan xujuhu' ma', je pain ca pan xic xin to hwein tununu' ma', je pain ca an warawa xin to xujuhu' pain ouro ma', je pain ca to xec xec hun wom co awi tamana ma' quem. ⁴ Ca awi nuhu' ma', maqui' pan tarain xumu' ma', pain ca om xec xec nuhu' je pain ca tacana pe ne iri' xumu' ma'. Om ca pi' ra ha' ne ca awi nequem narima' co awi ac i ma' ma'. Querec awi tamana non Iri' Jam quem. ⁵ Xi ac i ma' ara cacama oro narima' co howa nonon Iri' Jam pain

cara pane, pain ca winim' e' cocon Iri' Jam pain ca ara pin tain cain ca wara tomi' pe nucun pane. Ara awi xequequem pain ca tomi' ha' taxipa' cocon waram taxicacam ta. ⁶Noro jem Sara cara pane. Tomi' ha' taxipa' non taxicacam Abraão. Taramaxicon ne non quem. Mo ta ara xo' taxipa' hwe ma', mo ta om toron ne xumuhu' pain oro ca to' jin' nuhu' ma' quem, ac waram jinacam ac hwe tara ta.

⁷Wahu' quem, pain ca ma' cuhu' narima' ma' quem. Ma' tara xumuhu' pain ca to ho' xujuhu' ma'. Tomi' querec te jejem pain ca querec wet xo' hwehwem ma'. Querec pin' jejem pain ca om hwara' opa homa cacama ma', je pain ca om an xiho' cucuhu' pain ca hwara' opa nuhu' ma'. Xi mi' ara cacam pain ca om pi' ra ha' ne ca e' wa Iri' Jam ta. Win cuhu' ma'. Ac i ma' jejem manahu', ma' ta om i'ina hwe pain ca tomi' xun hun Iri' Jam ma' quem.

Ca jain jain paxi' iri', xi om ne ca ara xo' ara xin ca awi wa

⁸Tomi' xim inuhu' pain i ca' quem: Je je ari tara ca coromicat nuhu' pain ca tomi' querec te xujuhu' ta. Quep xiho' xujuhu'. Ta noc camain' xujuhu' me, win ne ca xere xujuhu' ma'. Xiram pa' xujuhu', ta xec xec hwe pain ca quep xiho' xujuhu' me. ⁹Mo ta quep em' cuhu' wari' ma', mo ta tomi' xirac cuhu', ta win mapa' ne hun me. Tomi' mi' pan jun con Iri' Jam. Xiram pa' ron, quep xiho' ron ta Te Iri' Jam jun. Xi wara param mi' xuhu' pain ca awi wa ta ara cuhu' pain ca xo' howa xine ta qui' cuhu' pane ta. ¹⁰Je ca xirao' pe xine pain capiiacon Iri' Jam quem:

Wari' co param nain ca tomi' querec te wa ma',
 co hohot tarapa' oro carawa ca hwet pa' xim napa' ma',
 om ta tomi' ximao cain carawa ca om awi,
 om ta tomi' mixein ca quem.

¹¹In ca' tarain oro ca om awi wa.

Ara e' tarain ca awi wa.

Tomi' querec te caracan xijexi' ta totoron oro win ma' ca,
 om ta mana' caracan camain' xijexi' ta totoron.

¹²Xi om ne ca querec wet ara cocon oro co ara xo'
 nana Taramaxicon nexi' ta.

Querec hohot mahu' ta nonon,
 taraju wet nonon pain ca tomi' xim urut pum ta cocon quem.

Oro co ara pan teretem nana ma' iri nana ne, ari tata.

Ari pan nonon Taramaxicon nexi'.

Ac i ma' na ca xirao' pe xine pain capijacon Iri' Jam quem.

¹³Ma' tara wari' co quep em' nuhu' pain ca tama' ara xixi' na hwein ca awi wa ra? Om na ta! ¹⁴Tara cocon, am ma' paxi' caca co to' jain jain toton nunuhu' pain ca ara hwein ca awi wa ma'. Je i ma' ira, param mi' turuhu' pain ca awi wa Iri' Jam ta. Ta jin' huhun me, ta toron ne xumuhu' cocon me. ¹⁵Win xumu jun Cristo, in ac e' jun pain iri' xumuhu'. Taramaxicon ne jun. Mo ta tomi' querec cucuhu' oro wari' ma', mo ta para howa hun Iri' Jam ma' cucuhu'. Wara awori xo' taxipa' ac hwe tara pain ca tomi' in hwet xo' huhun pain ca tomi' querec nucucun ma'. ¹⁶Tomi' in hwet xo' iri jujun ne, tomi' wixite e' ac huhun tara, ta tomi' ximama' huhun me ta. Tomi' hwet e' jujun pain carawa ca taxi' hwe pain ca hohot con Iri' Jam. Ma' ta wixipa' pin caca co tomi' napat nunuhu' pain ca xuruxut xo' nuhu' pain ca howa hun Cristo ta. ¹⁷Mo ta param mi' capari' pain ca jain jain wa Iri' Jam ma', mo ta jain jain je pain carawa ca awi ca ara xi' hwe ta capari', je i ma' ira, hohot na. Xi hohot ne pain ca jain jain wa pain ca pan tem wa ta. ¹⁸Xi jain jain ara ca Cristo pain ca mi' pin caho' capari' pain ca caracat nexi' pane ta. Pain ca mi' pin nucun pane, mi' pin na. Om ta mi' pin mami' ca. Om ca caracat camain' ca, xut xo' na, awi na. Ane mi' pin caho' pan capari' pain ca pan teretem nexi' pain ca om xuruxut xo' nexi' ne. Ma' ta o mi' xuhu' con Iri' Jam ta napari'. To' pa' pin iri ta pane ne, mi' pin ac ne na curucun. To' e' mami' iri ta ne, je Tamataracon Iri' Jam ac ne na ca to' e' mami' non quem. ¹⁹Je Tamataracon Iri' Jam ca ja' ja' non Jeju pain ca hwet tococwa jamicocon oro wari' co wara cono' nana pain cara pane, co tao' to wawa pane. Pijim' ac tococwa na ²⁰co om tomi' ha' nonon Iri' Jam pain cara pane, pain oro xec nucun Noé pane. Om ca toron ne ximicon Iri' Jam pain ca winim' cara cocon. Winim' cara e' tata pain ca quep qui' cain cote ne mam' horoho wa Noé pane. Ane om ha' caca ne. Ma' paric ca' e' nana co corom mama' nanain mam' horoho wa, ma' 8 e' nana, witan pin ac caca na pain ca horoho mama' cacama pain com pane. ²¹Com ca to' witan nanam pane, tomi' joc mam' mi' nain com ca ja' iri' pain ca howa nexi' pain xocori ca' quem. Ja' iri irin com ne, om ca hohoc xin homirixi', om na. An hwet e' irin ca wara tomi' xun Iri' Jam pain ca hohoc pin rain ca caracat ne pain xumu me xun ca'. To' witan pin napari', xi om ne ca to' e' mami' ara con Jeju Cristo ta. ²²Wirico

Jeju Cristo co mao nain pawin, pe ho' pin ac cain na iri' curucun Iri' Jam ma' quem. Taramaxicon pe ho' pin ac tococwa na oro jam co taramaja mi' nonon Iri' Jam, cocon oro co taramaxicon nana ma', cocon oro xucucun jam co hwara' opa nana ma' quem.

Xocori ca e' wa

4 Je ca tomi' xuhu' ca'. Jain jain na Cristo pain ca wari' nucun pane, pain ca ma' ne curucun pane. Je ta wara awori xo' qui' hwe pain ca an xiho' hun pain ca coromicat nucun quem, pain ca om nain ho' pan xucun pain ca jain jain wa pane. Xi ac i ma' ara ca wari' co quereme nain ca jain jain wa pain ca caxi ne curucun ma'. Noc nain ca caracat wa ta. ²Wari' co ac i ma' ma', tomi' ha' cara ac con tara Iri' Jam. Mao ac ne ma' tara pain ca e' e' wet nucun, om ta ara cain ca param pan tem ne ca wari' wa, ara e' tarain ca param pan nucun Iri' Jam. ³Pain cara pane, ara taxipa' hwein oro ca param ximama' nucucun co om howa nonon Iri' Jam. Quep ximama' taxipa' hwe. Tamanain to taxipa' hwe pain ca win xumu hwein oro ca om awi wa. Tama' toc tamanain to hwein caji tocwa ca mana'. Tamanain to hwe pain ca waraju ximama' nuhu', tamanain to hwe pain ca pe torotop mi' querec te ximama' hwein oro caji pacun ca Iri' Jam xi' ma hwe pane, ca noc tamana pan ca Iri' Jam. ⁴Cain' cain' xira cocon ne nunuhu' oro co ara ara wet nanain i ma', tomi' xirac tomi' xirac ac cucuhu' na quem. Xi jao jao ma' mami' huhun pain oro ca quep ximama' nucucun pain ca ara pan teretem nucucun ta. ⁵Je i ma' ira, ame hwe e'. Main maqui' tara xec nein ca coco' quima hwet xun cocon Iri' Jam co wara awori xo' ma', pain ca tomi' xo' xun tococwa pain oro carawa ca ara caca ma'. Co e' e' wet nana ma', co wara cono' nana ma' quem, wap wap ac tococwa tara ta. ⁶Co wara cono' nana pane, wap paxi' tata pain ca to to wet cacain macan'. Win ne ca mi' pin taxipa' ne ca wari' wa ca'. Ane pijim' mi' tococwa con

3.22 Taraju pa' jein ca tomi' mao ne ca xao pe ho' xine iri' curucun taramaxicon ma'. Xao pe ho' pin iri nain iri' curucun taramaxicon wari' ne, querec pin' ac tocwa na pain ca taramaxicon wi pin con quem. Ac i ma' na Jeju Cristo ma' quem. Xao pe ho' pin iri nain iri' curucun Iri' Jam ne, querec pin' ac tocwa na pain ca Taramaxicon wi pin con quem. **4.6** Para mi' pin taxipa' ne ca wari' wa quem? Taraju wet je e'. Caracat pin iri na Adão cam Eva pain cara pane ne, wap pan ac cacam na Iri' Jam, cono' je ta ac cacam na quem. Je ca mi' pin taxipa' ne ca wari' wa pain xocori ca' quem.

Jeju ne, ma' ta e' cara ne tamatarahu' ta tata. Win ne ca e' cara ca Iri' Jam ta tata.

⁷Wixicam pin na xec nein ca pi' pin ta' ne macan' je oro carawa jimao quem. Je ta coromicat xo' qui' hwe ta. Ma' tara xumuhu' quem. Ma' ta ha' cuhu' pain ca tomi' hun Iri' Jam ta. ⁸Ta noc camain' xujuhu' me, je ca param mip ca Iri' Jam. Ta tomi' querec te e' ne capijahu' me, tomi' querec te iri'o' xujuhu' ta. Tomi' querec te iri'o' iri xijexi' ne, ha' ac capari' tara pain ca mana' mana' om pin xijexi' pain oro ca ara cup xijexi' ta. ⁹Tomi' querec te jujun oro win ma' nuhu' co hwet nunuhu' pain xuruhu'. Ta tomi' wijimi hwe cocon me. ¹⁰Wara mi' mi' xam' nuhu' pain oro xijein ca taramaja taxi' wa Iri' Jam. Je ta ara xo' qui' hwein ta. Mam' quep xiho' caracan ac xujuhu' tara pain oro ca taramaja taxi' wa ca mi' cuhu' ma'. ¹¹Mo ta mi' cuhu' pain ca pijim' wa ma', pijim' xo' ac hwe tara. Xi capijacon Iri' Jam pan ara ne ca pijim' hwe ta. Mo ta mi' cuhu' pain ca quep xiho' hun win ma' nuhu' ma', mam' quep xiho' ac hun tara pain ca hwara' opa nucun Iri' Jam ca mi' taxipa' ca ma'. Ma' ta awi na Iri' Jam ta caca oro wari'. Wirico Jeju Cristo tara co mi' nonon pain ca tomi' ac i ma' caca ma'. Hohot na pain ca tomi' querec te xun pain ca awi tamana cara nucun. Na e' na pain ca tomi' querec te xun pain ca hwara' opa tamana cara nucun ma' quem. Amém, iri'o' na ca tomi' ne ta.

Ca quereme jein ca quep em' xihwe pain ca howa hun Jeju ta tococwa

¹²Je ca tomi' xuhu' pain ca tomi' querec te xuhu' ca'. Mija paxi' na ca quep em' xihwe ma', ma' ta querec pin' xihwe pain ca howa hwara' opa nuhu' ma'. Je i ma' ira, ta wa ina me hwe me, ta tomi' ximama' hwe pain ca para quep em' cacapa' ne hwe me, je xi nain ho' capa' pain ca jain jain tamana wa Iri' Jam ca' hwe quem me. ¹³Jain jain iri hwe pain ca quep em' xihwe pain ca howa hun Cristo ne, jain jain wi ac hun na. Je ta tomi' querec te qui' hwe pain, ma' ta tomi' querec te tamana hwe pain ca aram aram an hwet mi' xim capari' pain ca hwara' opa nucun pain ca awi tamana nucun quem. ¹⁴Tomi' xirac iri nunuhu' oro wari' pain ca howa hun Cristo ne, param mi' ac cuhu' na pain ca awi wa Iri' Jam. Xi querec pin' ara xihwe pain ca corom pe ho' cara cuhu' Tamataracon Iri' Jam ca awi tamana ta. ¹⁵Hohot paxi' na pain ca jain jain hwe pain ca ara hwein ca awi wa ma', ane om hohot camain' ne pain ca jain jain hwe pain ca

to' pa' pin hun wari' ma' ne, je pain ca an noc xa hwe ma', je pain ca pan teretem taxipa' hwe ma', je pain ca to' i'ina hun win ma' nuhu' pain ca taramaja nucun ma' quem. ¹⁶Pain ca jain jain hwe pain ca howa hun Cristo ma' iri na ne, om ta na ne pain ca wixipa' hwe pain. Tomi' querec te e' jun Iri' Jam pain ca querec pin' xihwe pain ca howa hun Cristo ta. ¹⁷Xi maqui' pin ara ne xec nein ca to' i'ina capari' oro carawa ta. Mi' cain' napari' pain Iri' Jam, ma' ta hwara' opa mip hwe pain ca howa nuhu' ta napari'. Pain ca to' i'ina capari' oro carawa ca', jain jain paxi' iri'. Oro co om tomi' ha' nanain capijacon ca pijim' mi' tococwa con Jeju ma' iri nana ne, ximin pan tatara, mija tara ca jain jain nucucun pain ca wap tamana xun tococwa ta. ¹⁸Je ca xirao' pe xine pain capijacon Iri' Jam ma':

Oro wari' co xuruxut xo' nana ma', co to' witan xun wawa ma', ma' paxi' na ca to' i'ina nonon.

Oro caracat co miri'om nonon Iri' Jam ma' iri nana ne, ximin tatara, to' i'ina tamana totoron oro carawa jimaio.

Ac i ma' na ca xirao' pe xine pain capijacon Iri' Jam.

¹⁹Je ca tomi' xuhu' ca'. Param mi' iri napari' pain ca jain jain wa Iri' Jam ne, howa cara pan ac xun tara. Wum co quep naparut pane, wum co om mixein camain' pain ca querec wet xo' maparut ta xun. Ara ara cara ac xin tara oro ca awi wa ta.

Ca hu tococwa co querec wet nonon co howa nonon Jeju, ca hu tococwa co xo' horon nana ma' quem

5 Je ca tomi' xuhu' pain ca querec wet huhun oro co howa nonon Jeju ma'. Tomi' mip inuhu', xi om ne ca querec wet pan ara toton oro co howa nonon Jeju pain i ca' ta. Tomi' hwet inonon oro wari' pain ca jain jain nucun Cristo, jao jao ma' ton pain ca an hwet pe xine ca awi nucun pain ca hwara' opa nucun quem. ²Je i ca' ca tomi' mip xuhu' ca'. Querec wet xo' jujun oro co howa nonon Jeju ma', co querec wet jujun ta ca Iri' Jam ma'. Win ca pastor pain ca querec wet xo' cain ovelha nucun ma', ac i ma' je pain ca querec wet xo' huhun co howa nonon Jeju. Om ca na ne pain ca cuc cuc a xirapa' na inon me hun Iri' Jam pain ca querec wet jujun ta cuhu' ma'. Maqui' tarain iri' xumuhu' pain ca querec wet huhun. Je ca param mi' cuhu' Iri' Jam quem. Querec wet xuxun iri je ne, ta cut ta' dinheiro pain ca taramaja ne ca', pain ca querec wet toton ca' hwe

me. Taramaja e' je pain ca param pan nuhu' ma', pain ca taramaja mi' e' ton Iri' Jam ta hwe ma'. ³Om ca na ne pain ca tomi' xec xec ca' huhun co querec wet hwe ma': Wata' co taramaxicon cwa', tomi' ha' e' xine, om ca na camain' ne pain ca tomi' ac i ma' huhun. Xuruxut xo' e' je cocon, ma' ta win caca ne cucuhu' ma'. ⁴In qui' iri tara Iri' Pastor nexi' ne, co Taramaxicon ne iri' cwa', mi' ac cuhu' tara pain ca awi tamana wa ca om pi' ra ha' ma'.

⁵Tomi' mip inuhu' pain ca xo' horon hwe ma' quem. Tomi' ha' jujun oro co wara tiquin' mama' cawaxi' nucucun ma'. Tomi' tomi' pi' pin inuhu', an hwet mi' xujuhu' pain ca om xec xec nuhu' ta, xi xirao' pe ara xine pain capiacion Iri' Jam ta. Ca' na ca xirao' pe nein:

Ari nonon oro co xec xec nana Iri' Jam ta.

Oro co om xec xec nana ma' iri nana ne,

xiram pa' tata, quep xiho' tata quem.

Ac i ma' na ca xirao' pe xine pain capiacion Iri' Jam. ⁶Je ca tomi' xuhu' ca'. Ta xec xec camain' hwe pain ca hwara' opa pan ta' ta hwe me. Tomi' ha' e' jun Iri' Jam co hwara' opa pan, pain ca Taramaxicon ne hun ma'. Ma' ta aram aram to' hwara' opa pin cuhu' pain xec nein ca wara coromicat an pe xo' ca pane. Hohot mahu' ta ac cuhu' tara quem. ⁷Tomi' hwet tomi' hwet pi' pin jun pain Iri' Jam oro ca to' toron nain xumuhu' ma'. Howa jun pain ca quep xiho' xim cuhu' pain, xi om ne ca wirico ara ca co querec wet xo' nuhu' ta.

⁸Ma' tara xumuhu' con Caxicon Jam ma', co noc nuhu' ma'. Pirao' nuhu', an xiho' non copacao' co xararac ma', co tama' xut in xut in pain ca pirao' cain carawa ca cao' wa ma'. Ac i ma' nuhu' Caxicon Jam quem. Quep xim nuhu'. ⁹Ari jun Caxicon Jam. Hwara' opa je, howa cara jun Iri' Jam. Xi taxi' ara huhun oro xerexi' co to nanain oro xijein macan' ma', pain ca jain jain caca pain ca to' i'ina tococwa. Win cuhu' ma'.

¹⁰Ame hwe e', om ta jain jain cara hwe, main pi' pin tara ca jain jain nuhu'. To' hohot pin ac cuhu' tara Iri' Jam. To' hwara' opa turuhu', mi' turuhu' pain ca om naro camain' wa, to' hwara' opa cara ac cuhu' tara. Xi wirico ara ca co xiram pa' taxipa' nuhu'. Wirico co wara param mi' nuhu' pain ca jao jao ma' hun pain ca awi nucun pain ca hwara' opa nucun ca om pi' ra ha' ma', xi om ne ca win cwere ara hun Cristo Jeju ta. ¹¹Na e' na pain ca tomi' querec te xun pain ca hwara' opa cara nucun ta. Amém, iri'o' na ca tomi' ne ta.

Ca pi' pin ne ca xirao' nucun Pedro

¹²Wirico coxari' Silvano co quep xiho' napa' pain ca xirao' mi' wijimain e' xuhu' ca'. Taxi' inon pain ca win xumu cain ca taramaja nucun pain ca taramaja mi' con Iri' Jam. Je ca tomi' xuhu' pain ca xirao' mi' xuhu' ca', to' hwara' opa xuhu' pain xumuhu' ta inuhu'. Tomi' hwet inuhu' pain ca quep xiho' iri'o' cuhu' Iri' Jam ma', pain ca xiram pa' e' cuhu' ma'. Hwara' opa cara je pain ca howa hun pain quem.

¹³Mam' pe wet urut pahu' ta nunuhu' oro co howa to nanain Babilônia ca'. Tora' pan nonon Iri' Jam quem. Win cuhu' pane.

Mam' pe wet inuhu' ta nuhu' Marcos cwa', co ac panxita' cwa' quem.

¹⁴An hwet pe mi' xujuhu' pain ca tomi' querec te xujuhu' ma'.

Je ca tomi' xuhu' pain ca win cwere hun Cristo ma'. Param inon Iri' Jam pain ca mi' mi' pi' pin cuhu' pain ca om toron ne xumuhu' ta.

Je i ca' ca xirao' ne ca'.

2 Pedro

Ca xirao' mami' nucun Pedro

1 Simão Pedro ina pain ca xirao' mi' xuhu' ca'. Taramaja mi' inon Jeju Cristo. Apóstolo ra napa' pain ca tomi' hwet roron pain capija oro wari' capa' pane.

Xirao' mi' inuhu' pain ca win ma' ne xijexi' pain ca howa xun Jeju Cristo. Wirico co Iri' Jam ne iri' cwa', co to' witan napari' cwa'. Om ca tomi' querec te paxica' capari', mi' mi' pi' pin napari' pain ca howa xun ca'. An an ari xijein ca howa nexi' quem.

²Taxi' inuhu' pain ca querec pin' mip hun Iri' Jam con Taramaxicon nexi' Jeju ma'. Je ca param ton Iri' Jam pain ca quep xiho' tamana cuhu' pain ca mi' cuhu' pain ca param nucun. Param inon pain ca mi' hwara' cuhu' pain ca om toron ne xumuhu' quem.

Ca horon horon tiquin' je pain ca hohot mahu' ta capari' Iri' Jam

³Quep xiho' tamana napari' Iri' Jam, xi om ne ca hwara' opa ara ca pain ca mi' mi' pi' pin capari' pain oro ca to' xuruxut xo' napari' pain ca win xumu e' xin ca param nucun. Ha' napari' pain ca xuruxut xo' wa quem, xi mi' ara capari' pain ca querec pin' xo' xun Jeju Cristo. Wirico co wari' ne napari', ma' ta jao jao ma' mahu' pain ca hwara' opa ne ca', je pain ca awi tamana ne ca' quem napari'. ⁴Je ca mam' ara mi' capari' pain oro ca wara tomi' pe ca pane. Awi tamana na oro ca wara tomi' pe nucun, om ca em' camain' ne, hohot tamana na oro ca param mi' capari'. Ma' ta witan ca' hwein oro ca to' em' nuhu' ma', ca maqui' nein oro ca param pan tem wa pain macan' ca' napari'. Ma' ta an xiho' mahu' pain ca ara xo' ne pain ca Iri' Jam ne ta napari' quem.

⁵Je ca tomi' ca' xuhu' ca'. Ara jein ca tomi' mi' xuhu' ca', win xumu jein. Howa iri jun Jeju Cristo ne, awi ac hwe tara, xuruxut xo' ac hwe tara quem. Xuruxut xo' iri je ne, taraju pa' ac hwe tara, querec pin' ac hun tara Iri' Jam. ⁶Querec pin' iri jun Iri' Jam ne, miri'om ac hwein tara ca param pan nuhu'. Miri'om iri jein ca param pan nuhu' ne, quereme cara ac hwein

tara oro ca to' i'ina nuhu'. Quereme cara iri jein oro ca to' i'ina nuhu' ne, xuruxut xo' ac hwe tara pain ca win xumu hwein ca param pan nucun Iri' Jam. ⁷Win xumu iri jein ca param pan nucun Iri' Jam ne, tomi' querec te caracan ac xujuhu' tara pain ca xere xujuhu'. Tomi' querec te caracan iri xujuhu' pain ca xere xujuhu' ne, tomi' querec te querec te pi' pin ac huhun tara oro wari'. ⁸Je ca tomi' xuhu' ca', mo ta xuruxut xo' ac i ma' hwe, mo ta ara ara tiquin' hwein oro ca tomi' mi' xuhu' ca', querec pin' iri'o' ac hun tara Taramaxicon nexi' Jeju Cristo, ha' ac cuhu' tara pain ca taramaja mi' hun, je pain ca quep xiho' caracan xujuhu' ma' quem. ⁹Wari' co om ara nain ca tomi' mi' xuhu' ca' iri na ne, ac ca om ne na tocon, ac ca paxi' pe ca na, xi taraju pa' ca ta. Ji'am pin nain ca ara nucun Iri' Jam pane, pain ca xic am pin qui' cain ca caracat nucun pane.

¹⁰Je ca tomi' xuhu' ca' xere. Ara ara tiquin' jein ca tomi' mi' xuhu' ca', win xumu mip jein. Ma' ta querec pin' xihwe pain ca wari' ne cuhu' Iri' Jam ma', pain ca tora' iri'o' cuhu' ma'. Mo ta ara ara tiquin' hwein, om ta an pe camain' hwein ca howa wa Iri' Jam. ¹¹Tomi' querec te tamana ac cuhu' tara Taramaxicon nexi' Jeju Cristo co to' witan napari' ma', pain ca aram aram corom xi' hwein ca taramaxicon pe ca pain pawin cain. Corom je, to ho' cara xine ta ac cuhu' tara. Om ta pi' ra ha' ne ca taramaxicon pe ca pain pawin cain.

¹²Je ca tomi' xuhu' ca'. Wara taxi' paxi' hwein oro ca tomi' mi' xuhu' ca'. Taxi' paxi' inuhu' pain ca howa hwein capijacon Iri' Jam ca ca' na xihwe pane. Taxi' paxi' inuhu' pain ca om tara ta'a camain' hwein. Ane tama' mam' pe wet jein ta xuhu' ne. ¹³Ca' na ca coromicat ne ca', pain ca e' e' wet ta' ca': Hohot tamana napa' pain ca tama' to' mam' pe wet xuhu' pain oro capijacon Iri' Jam ca ca' na xihwe pane, ac i ma' na ca coromicat ne ca'. ¹⁴Xi taxi' ara xije pain ca mi' pin ta' ta' ca'. Om ta pain homa ne, mi' pin ac ta' tara. Win ne ca wara tomi' hwet capa' pain Taramaxicon nexi' Jeju Cristo pane. ¹⁵Je ca win xumu tain ca taramaja ne ca', pain ca xirao' mi' xuhu' ca'. Jain jain inain. Ma' ta ha' cuhu' pain ca tama' mam' pe wet hwein pa'ao' inuhu', pain ca aram aram mi' pin ta' ta' ca'.

¹⁶Xi tomi' ximama' urut pain ca pijim' urut pahu' pane ta, om ca maqui' nein ca coromicat ximama' pan nuxut. Tomi' hwet iri urut pahu' con Taramaxicon nexi' Jeju Cristo pain ca hwara' opa nucun pain ca in qui' ta' nucun ne, tomi' iri'o' ac urut pahu' na. Querec urut con pain iri' ca hwara' opa tamana nucun. ¹⁷Wirico Cotere' Iri' Jam co mam' tomi' non

Panxica pain ca hwara' opa tamana pan nucun pain ca an hwet pe cain ca awi nucun pain ca mi' con pain ca toc meremem nucun pane. Tomi' ca' non: Mon cwa' panxita' co om noc camain' ta' cwa'. Hohot tamana napa' ta na ca tomi' con. ¹⁸To ho' urut con pain tamain pacun pane, pain iri' pacun nucun Iri' Jam, taraju urut pain ca tomi' nucun ca maqui' nain pawin quem.

¹⁹Je ca taxi' xuxun oro profeta pain ca pijim' xo' nucucun pane quem. Iri'o' na ca pijim' nucucun, om ca tara ta'a camain' xuxun. Awi na pain ca taraju wet hwein ca pijim' nucucun quem. Xi an xiho' ara nein naran ca toha pe nain xim ta. Toha toha xec pa' ac cuhu' tara, hwet pa' ac cuhu' tara pijo' nein xo' xec pain xumuhu' ma'. ²⁰Tomi' xim inuhu' pain i ca' quem, tomi' mip inuhu', taraju pa' je. Oro ca xirao' nucucun oro profeta pain ca xirao' pe cacain capijacon Iri' Jam pane, om ca maqui' pan nein ca coromicat nucucun pain ca tomi' xo' cacain ca taraju pa' pan nucucun. ²¹Xi maqui' camain' nein ca coromicat nucun wari' oro ca tomi' nucucun oro profeta ta. Maqui' pan non Iri' Jam. Je Tamataracon Iri' Jam ca tomi' nonon pain ca tomi' nucucun, an xin tiquin' jein ca tomi' ne ta ac tococwa na oro wari' co tomi' hwet nanain ta.

Oro co ca' na mixein nanain capijacon Iri' Jam

2 Om paxi' na ca maqui' nein ca coromicat nucun wari' oro ca tomi' nucucun oro profeta pane. Ane ma' taxipa' caca oro co profeta urut mixein nonon oro wari' nucun Iri' Jam pain cara pane ne. Ac i ma' tuturuhu' oro wari' co ca' na mixein xim nunuhu' pain xocori ca' quem. Iri'o' na ca ca' na urut pahu' ca' tuturuhu', to' em' to' em' ac tococwa tara co taraju wet xun nonon. Tomi' ha' urut con Jeju ta paxi' tatara, ane om tomi' ha' xun cocon ne. Om ta tomi' ha' mami' cocon Taramaxicon nexi' co to' witan nonon pane. Ame hwe e', ane ane wap xun ac tococwa tara, to' em' pan ac

1.17 Pain ca xirao' nucun Pedro cwa', tomi' mi' nain ca ara non Jeju pain tamain pacun pane, pain ca toc meremem pin ne tocon pane. (Mateus 17.1-8, je pain Marcos 9.2-13, je pain Lucas 9.28-36) **1.19** Taraju pa' jein ca xirao' nucun Pedro cwa', pain ca tomi' mi' cain naran ca toha pe nain xim. Tomi' joc mam' mi' nain capijacon Iri' Jam ca pijim' caca oro profeta co wara tomi' to nanain ca in qui' ta' nucun Jeju pane. Pain ca om in qui' querec nucun ca', ac ca toha pe nein na xim ca pijim' nucucun. Tomi' xo' nanapari' pain ca in qui' ta' nucun Jeju. Toha toha xec pa' ac capari' tara, in qui' ac ca tara, ac ca hwet pa' capari' tara pijo' nein xo' xec pain ximixi' ca' quem.

tococwa tara ta. ²Mija tatara co an xiho' xun nonon pain ca pan teretem nucucun, je pain ca quep ximama' nucucun. Oro co om howa nana ma', co querec xun nonon pain ca pan teretem nucucun ma', tomi' napat ac cocon tara co pijim' xo' nanain capijacon Iri' Jam ca iri'o'. ³Pain ca ca' na mixein xim cucuhu' ma', mixein ac cucuhu' tara, pijim' ximama' e' ac cucuhu' tara, xi jain jain ara cacain oro caramajuhu' ta, param e' nanain. Ane wap ho' xun tococwa ne. Wara awori xo' na Iri' Jam, wara coromicat an pe xo' nain ca wap xun tococwa pain cara pane. Querec na, om ca pi'am ca' cocon, wap ho' toton ta na.

⁴Taxi' urun Iri' Jam pain ca wap toton cocon ma', xi xiram pa' tococwa oro jam co caracat nana pain ca taramaja mi' cocon pane. Wixicaracao' mi' tata pain cote ne man ca om tawirinain cain, ca jitacat tamana xim nein cain. Pao' to tata, to wet iri caca ma' ac tococwa na. Winim' e' jein xec nein ca wap xim xuhu' ta tata. ⁵Om ca xiram pa' tococwa oro hwanana pain cara pane quem. Mi' tata pain cote ne xowi', we' pa' ac cocon na com, cono' cono' pi' pin ac caca na, xi caracat ara caca pain ca miri'om cocon Iri' Jam ta. Noé iri na ne, pijim' taxipa' nonon oro win ma' ca pane. Howa jun Iri' Jam ta nonon. Je ca to' witan tocwa pane. To' witan 7 tata ca nari nucun pane quem. ⁶Wap tata oro wari' nein Sodoma je Gomorra quem. To' om pin ta cidade nucucun pane. Oro xiricocon, wiricoco quem, topacon pi' pin nana. Wap ac i ma' toton oro wari' co caracat nana pain ca miri'om cacapa' ta ac cocon na. ⁷Ane to' witan tocwa Ló ne, co ara xo' taxipa' pane. Toron tamana na ximicon cocon oro win ma' ca co om ximicocon pane, co quep ximama' e' nana pain ca om tomi' ha' nucucun. ⁸Ca pe ho' pe ho' qui' cocon pane, ca querec querec ca' ac cain na ca pan teretem nucucun, ca taraju taraju ca' ac cain na oro ca ara ximama' nucucun pain ca pan teretem nucucun pane. Toron tamana na ximicon pain oro xec. Xi ara xo' taxipa' pan ara ca pane ta. ⁹Mam' pe wet iri irin oro ca ara ca Taramaxicon Iri' Jam pane ne, querec pin' ac urun na pain ca xiram pa' taxi' cocon oro co win xumu nanain ca param pan nucun ma', je pain ca to' witan ca' taxi' cocon pain oro ca to' i'ina nonon ma', querec pin' ac urun na pain ca pao' to taxi' cocon oro caracat co miri'om nonon quem. Pao' to pao' to maqui' pa' ac tococwa tara xec nein ca wap toton cocon pain ca caracat nucucun. ¹⁰Wap xun paxi' tata oro caracat, ane wap tamana pan xun tococwa oro co xuruxut pan teretem nana pain ca

win xumu e' cacain ca quep ximama' wa ne, je pain ca tomi' napat cocon Iri' Jam pain ca om tomi' ha' jun na caca ma' quem.

Oro co ca' na mixein nunuhu' ma', tomi' xec xec e' nana. Om ca ara jin' cacain ca param pan nucucun. Tomi' napat nonon oro jam co hwara' opa nana cwain, co to nanain pawin cain. Om ca jin' cocon quem. ¹¹Oro jam co taramaja mi' nonon Iri' Jam ma' iri nana ne, hwara' opa tamana nana, hwara' opa tiquin' ca' nonon oro co ca' na mixein nunuhu' pain capijacon Iri' Jam ma'. Ac i ma' paxi' na ca hwara' opa nucucun ma', ane tacana to pan caca pain ca coco' quima hwet cocon Taramaxicon Iri' Jam ne. Om ca tomi' napat camain' cocon oro win jam caca quem. ¹²Oro co ca' na mixein nunuhu' ma' iri nana ne, an xiho' nanain oro carawa nein mi ca om ximi ma', ca ara e' nain ca param pan ne cwerein. Hohot na pain ca quep xine, hohot na pain ca to' om pin xine quem. Ac i ma' na ca om ne ximicocon oro co ca' na mixein nunuhu' ma'. Tomi' napat ximama' nanain oro ca om taraju pa' caca. To' om pin totonon Taramaxicon Iri' Jam quem, win ne ca to' om pin xine carawa nein mi ca om ximi ma' quem. ¹³Win hwe pane ac tococwa tara, to' i'ina ac tococwa tara, xi om ne ca to' i'ina pan ara cocon oro wari' ta. Mija nana, hohot tamana nonon ca tamanain to wa pain ca quep ximama' wa ma'. Om ca ara e' caca pain xim, ara nana pain xec quem. Corom hwet iri nunuhu' pain ca cut in xujuhu' ne, pain ca cao' querec te wi xijexi' hwe ma', tamanain to ac caca na, ja' wixipa' ac cucuhu' na pain ca mixein nucucun. ¹⁴Tama' querec param nanam oro narima' ma', quep xitatom na nanam, om ca maho' camain' cacain ca caracat wa. Mixein nonon co om hwara' opa nana pain ca howa nucucun, hohot na pain ca caracat hwe ta tata. Param taxipa' nanain oro caramaxicocon oro win ma' caca, win xumu nanain. Iri' caxicon wari' nana! Wap pan totonon Iri' Jam ta. ¹⁵Xuruxut xo' xuruxut xo' om pin nana, xuruxut ni ca' ac cacain na wana ca mao xo' ma', xuruxut ximama' ac caca na. Ac ca ja' ja' cocon na Balaão panxica Beor cara pane, co param nain dinheiro ca pagar xun tococwa pain ca pan tem nucun pane. ¹⁶Profeta paxi' na Balaão pane, ane pan to' xine taraxicon ne. Burro nucun ca pan to' nain taraxicon. Om paxi' na ca tomi' taxi' ne burro ma', ane tomi' pan ne ne, tomi' ac wari' na. Para caracat ma ma' quem non, na ra ac ca na, an pe pin ac cain na ca om coromicat xo' wa pane.

¹⁷Oro co ca' na mixein ac i ma' xim nunuhu' ma', an xiho' e' nanain manain com ca am pin ne comi ma'. An xiho' nanain ca mixem ne tajain

nanawin ca nuru om pin nain camana'. Wara an pe xo' mi' tata pain ca jitacat nein xim ta. ¹⁸Xi tomi' xec xec ximama' ara cocon oro co witan ca' xun paxi' nonon oro win ma' caca co pan teretem nana ma'. Hohot na pain ca ara hwein ca param ximama' ne curuhu' ta tata. ¹⁹Tomi' pe ac tococwa na: Mo ta xin ne maparut, witan ca' ac huhun tara oro co hu xim nunuhu' ma', ha' ac cuhu' tara pain ca ara e' hwein oro ca param nuhu', ac i ma' na ca tomi' pe mixein tococwa ma'. Ane om ha' pan cocon pain ca witan ca' cacain oro ca ara xi' caca ta, taramaxicon ne nanain oro ca to' em' pin nonon ma'. Je cwerein pain ca wari' nexi' ca', pain ca quep xat capari' carawa ca om awi ca ara taxipa' iri'. To' quiji' pin napari', taramaxicon ne irin carawa ca quep xat napari' ca'. ²⁰Je ca tomi' xuhu' ca'. Oro wari' co witan ca' paxi' nanain oro ca to' em' nonon ma', ca maqui' nein oro ca param pan tem wa pain macan' ca', co mam' witan ca' nanain pain ca querec pin' paxi' cocon Taramaxicon nexi' Jeju Cristo co to' witan napari' cwa', mo ta in hwet cacain oro ca pan teretem wa ma', mo ta quep xat mami' tococwa, ximin tamana ac caca tara. Ximin paxi' nana pain cara pane, pain ca om querec pin' querec cocon Jeju pane. Ane ximin tamana pan caca pain ca in hwet cacain ca pan teretem nucucun ne. ²¹Awi xira pain ca om querec pin' cacain ca xuruxut xo' wa con Iri' Jam ta. Ane querec pin' cacain ne. Xin in ca' ac cacain na oro ca hu pan cocon Iri' Jam pane. ²²Oro ca ara caca ma', an xiho' nain ca tomi' joc mam' mi' taxipa' caca oro wari' ma'. Tomi' ca' nana: Cao' pin iri na oromijac ma' ne, we' pin ac cain na, in hwet ac cain na xicawiricon, cao' pin mami' ac cain na quem, ac i ma' na ca tomi' joc mam' mi' taxipa' caca ma'. Ma' na xijein quem: Ja' iri ta pain com caji mijac ne, xuc in hwet ac nein na horowa nein, ac i ma' na ca tomi' joc mam' mi' taxipa' caca oro wari' ma'.

2.17 Taraju pa' jein ca xirao' nucun Pedro cwa', pain ca tomi' mi' tococwa co ca' na mixein nana ma'. Pain ca an xiho' cacain manain com ca am pin ne comi ma', je pain ca an xiho' cacain ca mixem ne tajain nanawin ca nuru nuru om pin ne camana' ma' quem, ac ca quep xiho' xun tococwa na oro wari' co taraju nonon ma'. Cam xi' com paxi' nana, pan' xira xowi' na paxi' nana quem. Ane he caca ne, xi ma' ne com pain manain com ta. Om ca pan' ne xowi' ma' quem. Ac i ma' nana oro co ca' na mixein nana ma' quem. Om ca quep xiho' camain' tococwa oro co taraju nonon ma'. **2.21** Ma' xira ca awi ne pain ca om querec pin' cacain ca xuruxut xo' wa con Iri' Jam quem ra? Om na, taraju pa' je e'. Oro co wara querec pin' paxi' nanain ca xuruxut xo' wa con Iri' Jam ma', xin in ca' iri nanain oro ca hu pan tococwa ne, wap tamana ac tococwa tara. Ximin tiquin' ca' totoron oro co om querec pin' camain' nanain ca xuruxut xo' wa con Iri' Jam ta.

Ca in qui' nucun Taramaxicon nexi'

3 Je ca tomi' xuhu' pain ca tomi' querec te xuhu' ca'. Wara xirao' mi' inuhu' pain cara pane, je win xirao' mi' mami' xuhu' pain xocori ca' quem. Pain oro ca xirao' ne ca', hu xim inuhu' pain ca mam' pe wet jein oro ca ca' na xo' xihwe ma' xuhu' ca', ma' ta ma' ne xumuhu' pain ca coromicat xo' nuhu' ta inuhu'. ²Mam' pe wet jein ca tomi' nucucun oro profeta nucun Iri' Jam pane, pain ca tomi' pe cacain oro ca hwet pa' xim napari'. Mam' pe wet jein ca ara je capari' Taramaxicon nexi' co to' witan napari' cwa' quem, ca tomi' hwet urut pahu' pain ca apóstolo urut ca'.

³Tomi' xim inuhu' pain i ca' quem, tomi' mip inuhu', taraju pa' je. Maqui' ta' iri tara oro xec nein ca in qui' ta' ca Cristo Jeju ne, mija ac caca tara oro co ara e' nanain ca param pan nucucun. Tatam' tatam' tomi' xirac ac cucuhu' tara. ⁴Tomi' ximama' ca' tuturuhu': Win ne ca tomi' pe ca Cristo pane, pain ca main in qui' ta' ina ta ca pane? Mon quem? Je xi in qui' ho' ca quem? Wara winim' paxi' nonon mana cojeo' iri' cocon mana coteré' cara pane, ane cono' ca' cocon ne. Maxinain cara ac ne na oro carawa pain ca xo' tomi' ma' pin qui' xine pain cara pane ta, ac i ma' tara ca tomi' ximama' cucuhu'. ⁵Ane noc cacain ca mam' pe wet wa ca ara nucun Iri' Jam oro co tomi' ximama' ac i ma' xi' nana ne, pain ca tomi' ma' pin e' cain nanawin pain macan' pain cara pane. Tomi' e' na pane, hwet ca' rain com ta e' nain macan', hwet ca' ac nein na, ximija pe ac nein na oro com. ⁶Tomi' e' nain com pane quem. We' pa rain macan' ta nain, we' pa' pin ac nein na, to' em' pin ac xine na quem. ⁷Ac i ma' na pain ca querec wet xo' cain nanawin pain macan' ca querec iri' pain xocori ca' quem. Tomi' ca' e' na: Main maqui' tara xec nein ca wara coromicat an pe xo' ta' ca', pain ca tom pin tain nanawin pain macan', je pain ca wap toton toton oro caracat co miri'om nanapa' quem. To' om to' om pi' pin ac toton tara ta na ca tomi' nucun.

⁸Je ca tomi' xuhu' pain ca tomi' querec te xuhu' ca'. Ta ji'am pin hwein i ca' ca tomi' xim xuhu' ca' me: Ca xica' pe nein xec ma', je pain ca 1.000 nein cawaxi' ma' quem, an an ari na con Taramaxicon Iri' Jam. Om ca querec pira con ca 1.000 nein cawaxi'. Ac ca xica' pe ne na xec con. ⁹Xi ma' ara caca oro wari' co coromicat ca' nana: I'ina na Iri' Jam, xi ara pin cain ca wara tomi' pe nucun ta nana. Ane om i'ina ca ne, om ca om om ca. Winim' cara e' nuhu'. Noc noc xam' napari' pain ca pan' ara'am iri' pain

ca wap xim capari'. Param e' napari' pain ca cwirin' cwirin' pi' pin xin ca caracat nexi' ta.

¹⁰ Ac ca om om ca paxi' na Taramaxicon nexi' ma', ane maqui' ta' ca ne. Ane ane maqui' tara xec nein ca in qui' ta' nucun. Ac pain ca ane ane maqui' ca wari' co an noc xa tain nain carawa ma' tara pain ca om winim' tocwa ma', ac i ma' tara ca ane ane maqui' ta' ne xec nucun Taramaxicon nexi'. Taraju ac xine tara ca coc irija' wa, ac jam tara, ane ane om pin ac ne tara pawin. Wiran mao ac ca tara xina con panawo' con pijo', wiran mao tara macan' je oro carawa ca to nain quem. Om om pi' pin ac ne tara ta.

¹¹ Ac i ma' tara ca om pin ta' ne oro carawa. Je ta ma' qui' ne xumuhu' ta. Xuruxut xo' je. Ta caracat hwe me. Win xumu e' jein oro ca param nucun Iri' Jam ¹² pain ca winim' hwein xec nucun. Ma' ta maqui' hap ca. Maqui' iri tara xec nucun ne, wiran mao ac ne tara pawin, om om pi' pin tara. Xain tamana tara xajinain, om pin ac ne tara oro coximinain. ¹³ Ane winim' pan xin xocori pawin je xocori macan' ne. Win ne ca wara tomi' pe mi' capari' pain. Ara e' ac cacain tara ca awi wa oro wari' co to xin nanain i cain ta.

¹⁴ Je ca tomi' xuhu' pain ca tomi' querec te xuhu' ca'. Pain ca winim' xin hwein xec nucun Taramaxicon nexi' ma', xuruxut xo' e' je, win xumu jein. Ma' ta querec hohot cuhu' Iri' Jam pain ca om toron ne xumuhu' ma', je pain ca om cuhu' ca caracat wa ma', je pain ca om ma' camain' cuhu' oro ca tomi' em' xihwe pain ca caracat wa pain ca aram aram coco' quima hwet xun hun ma'. ¹⁵ Mam' pe wet jun Taramaxicon Iri' Jam ma', pain ca winim' cara cocon oro wari'. Ma' ta ha' cocon pain ca witan ca' cacain ca wap wa ta tata. Ac i ma' na ca xirao' mi' cuhu' cwajiri' Paulo ma', co tomi' querec te iri' ma'. Wirico Iri' Jam co mi' non pain, xirao' mi' ac cuhu' pain na quem. ¹⁶ Xirao' ac i ma' taxipa' na pain oro ca xirao' nucun ma', pain ca tomi' mi' cain xec nein ca in qui' ta' ca Taramaxicon nexi'. Ma' paxi' na ca xirao' nucun ca i'ina napari' pain ca taraju pa' wa. Oro co om taraju pa' nana cocon oro co om hwara' opa nana pain ca howa nucucun ma', tomi' ni ca' nanain ca tomi' mao nein oro ca xirao' nucun Paulo. Om ca xica' pe ne ca tomi' mao nein oro ca xirao' nucun Paulo ca tomi' ni ca' caca ma', tomi' ni ca' nanain ca tomi' mao nein oro xijein capijacon Iri' Jam quem. Je ta wap xun tococwa ta.

¹⁷ Je ca tomi' xuhu' pain ca tomi' querec te xuhu' ca'. Wara taxi' huhun caram ma' co ca' na mixein xim nunuhu' ma'. Je ta ma' qui' ne xumuhu'

cocon. Ma' ta om tomi' tomi' na cucuhu' pain ca pan teretem nucucun pain ca quep ximama' nucucun ma', je pain ca om ne ximicocon pain ca howa ni ca' jein oro ca howa nuhu' pane ta cucuhu' ma'. Ma' ta om camara' hwe pain ca caracat wa, ma' ta howa xo' cara hwein capijacon Iri' Jam ca ca' na xihwe ma', ca taraju pa' hwe ma'. ¹⁸Xuruxut xo' xuruxut xo' tiquin' e' je, ma' ta querec pin' hun Taramaxicon nexi' Jeju Cristo co to' witan napari' cwa', co xiram pa' e' napari' cwa'. Tomi' hwet xin ca awi nucun pain xocori ca', tomi' hwet cara xin ca awi nucun pain oro xec ca maqui' ta' ma' quem.

Amém, iri'o' na ca tomi' ne ta.

Je i ca' ca xirao' ne ca'.

1 João

Ca xo' xirao' ten qui' nucun João

1 Xirao' mi' urut pahu' con Jeju Cristo co wara ma', pain ca om om wet ne macan' pane, co ma' ma' wet pain xocori ca' quem. Taraju urut con, querec urut con pain tocoxut. Querec pin' urut con, quep urut con pain muxut quem. Je ca tomi' hwet urut pahu' con. Wirico co capijacon Iri' Jam ma', co an hwet mi' napari' pain ca om pi' ra ha' ne ca e' wa ta. ²Hwet naparut pain macan' pane. An hwet mi' xucun pain ca mi' cain ca e' wa. Querec urut con, wirico co tomi' hwet urut cwa'. Pijim' hwet urut pahu' con, pain ca wirico co mi' nain ca om pi' ra ha' ne ca e' wa ta urut pahu'. Wara pe ho' paxi' non Cote ca pain cara pane, ane an hwet mi' caparut con ne. ³Tomi' hwet urut pahu' pain oro ca querec urut con, je pain oro ca taraju urut con quem, ma' ta jao jao ma' maparut pain ca taxipa' xijexi' ca'. Win ne ca jao jao ma' urut con Cotere' Iri' Jam con Panxica Jeju Cristo pain ca taxipa' urut cocon ta urut pahu'. ⁴Je ca xirao' mi' urut pahu' ca', ma' ta tomi' querec te tamana wi xijexi' ta urut pahu'.

Ca xuruxut xin naran nucun Iri' Jam pain ca ara e' xin ca param nucun

⁵Je i ca' ca pijim' caparut Jeju pane. Tomi' hwet ac urut pahu' pain na quem. Ca' na ca tomi' nucun: Iri' naran na Iri' Jam. Om ca ma' camain' con ca jitacat nein xim. ⁶Tomi' ca' iri iri' ne, taxipa' inon Iri' Jam ta, am tomi' ac i ma' paxi' xi' pain ca xuruxut xin ca jitacat nein xim ma', pain ca win xumu xin ca caracat wa ma', mixein ac iri' na. Mo ta xuruxut xin ca jitacat nein xim ma', pain ca win xumu xin ca caracat wa ma', mixein ac iri' na. Om ca tomi' ha' xin capijacon Iri' Jam ca iri'o'. ⁷Xuruxut cara iri irin naran nucun Iri' Jam ma' ne, pain ca win xumu xin oro ca param nucun ma'. Win ne ca pe cain naran ma' quem. Xuruxut ac i ma' iri irin naran nucun ne, tomi' querec te caracan ac xijexi' na pain ca taxipa' xijexi' ca'. Hohoc pin ac capari' na pain ca caracat nexi' quicon Panxica cwa', Jeju cwa'. Ac i ma' na ca to' om to' om pi' pin cain ca caracat nexi' quem.

1.5 Ca jitacat nein xim ma', tomi' joc mam' mi' nain ca caracat wa pain ca pan tem wa.

⁸Tomi' ca' iri iri' ne, om napa' ca caracat wa ta, am tomi' ac i ma' iri'. Cain' cain' xixi' quem? Om na ximixi', xi coromicat xo' iri' ta. Om ca win cwere capari' Iri' Jam co iri'o' quem. ⁹Tomi' hwet mi' iri urun pain ca caracat nexi' Iri' Jam ne, xic am pin ac cain na. Xi mixein capari', om ca mixein camain' capari'. Tama' ara xo' na, ara mi' taxipa' napari' pain oro ca tomi' pe mi' capari' quem. To' om to' om pi' pin napari' pain oro ca caracat nexi'. ¹⁰Tomi' ca' iri iri' ne, om ca caracat camain' ta' ta, am tomi' ac i ma' iri'. Mixein na Iri' Jam ta urun. Tomi' ac i ma' iri iri' ne, om ca pe ho' camain' capari' capijacon pain ximixi' quem.

2 Xirao' mi' ac i ma' inuhu' pain ca ac ca mana panxita' xuhu' ne ca'. Ma' ta om caracat hwe ta inuhu'. Ane tomi' ca' xuhu' pain i ca' ne: Am ma' ca wari' co caracat ma'. Mam' pe wet xin i ca': Ma' napari' Jeju Cristo co om caracat camain' ma', co tomi' mi' napari' con Cotere'. ²Wirico co pe nain maxixi' pain ca mi' pin caho' capari' pane. Ma' ta xic am pin cain ca caracat nuhu' Iri' Jam ta napari'. Om ca xica' mi' pin caho' capari' pain ca caracat nexi' quem, om na. Mi' pin caho' mi' pin caho' pi' pin tata pain ca caracat nucucun oro wari' pain oro xijein macan' ta.

³Tomi' ha' iri urun Iri' Jam pain oro ca ara je capari' ne, taxi' ac xijexi' na pain ca querec pin' xun ca'. ⁴Wari' co tomi' ca' ma', querec pin' inon Iri' Jam ta na. Mo ta om tomi' ha' con pain oro ca ara ra con ma', mixein ac ca na. Xi tomi' ha' pan con Iri' Jam co iri'o' ta. ⁵Ane tomi' ca' xuhu' pain i ca' ne: Wari' co tomi' ha' nain capijacon Iri' Jam ma', wirico co om noc iri'o' non. Tomi' ha' ac i ma' iri urun Iri' Jam ne, querec pin' ac xijexi' na pain ca win cwere pin xun ca'. ⁶Wari' co tomi' ca' ma', win cwere inon Iri' Jam ta, am tomi' ac i ma' ca. Na e' na pain ca xut xo' ca quem. Win ca Jeju pain ca xut xo' ca pane.

⁷Je ca xirao' mi' xuhu' pain ca tomi' querec te xuhu' ca'. Xirao' mi' e' inuhu' pain ca hu nucun Iri' Jam cwa', pain ca om noc caracan xujuhu' ta cuhu' ca'. Om ca xocori ne ca hu nucun quem. Wara hu ac i ma' nuhu' pain cara pane. Wara taraju hwein pain ca xo' pijim' mi' qui' xihwe pain capijacon con Jeju pane. ⁸Ane xocori ne ca hu nucun ca xirao' mi' xuhu' ca' ne, ac je na. Querec pin' urun Cristo pain ca om noc iri'o' capari', querec pin' xihwe pain ca om noc iri'o' xujuhu' ma' quem. To' om pin ara xi' nain ca jitacat nein xim pain xumuhu' ta. Toha pin nuhu' iri' naran ca iri'o' ta.

⁹Wari' co tomi' ca' ma', pe cara inain naran nucun Iri' Jam ta, am tomi' ac i ma' paxi' ca pain ca noc con win howa ca ma'. Cain' cain' xira quem?

Xi pe cara ara cain ca jitacat nein xim ta. ¹⁰Wari' co om noc non win howa ca ma', wirico co pe cara nain naran nucun Iri' Jam. Om non carawa ca to' caracat non. ¹¹Ane om ac i ma' ne con wari' co noc non win howa ca ma'. Pe cara nain ca jitacat nein xim, xut cara nain quem. Om ca taxi' cain ca mao ta' nucun, xi ha' con pain ca querec wa pain ca jitacat nein ta.

¹²Xirao' mi' inuhu' pain ca ac ca mana panxita' xuhu' ne ca'. Xi om ne ca xic am pin ara xine ca caracat nuhu' pain ca mi' pin caho' cuhu' Jeju ta. ¹³Xirao' mi' inuhu' pain ca wara horon hwe ma' quem. Xi om ne ca querec pin' ara hun co wara ma' ma', pain ca om om wet ne macan' pane. Wahu' pain ca xo' horon hwe ma' quem, xirao' mi' inuhu'. Xi om ne ca to' quiji' pin ara hun Caxicon Jam ta. ¹⁴Xirao' mi' inuhu' pain ca ac ca mana panxita' xuhu' ne ca'. Xi om ne ca querec pin' ara hun Cotere' ta. Xirao' mi' inuhu' pain ca wara horon hwe ma' quem. Xi om ne ca querec pin' ara hun co wara ma' ma', pain ca om om wet ne macan' pane ta. Wahu' pain ca xo' horon hwe ma' quem, xirao' mi' inuhu'. Xi om ne ca hwara' opa ara hwe ta. Pe ho' nuhu' capijacon Iri' Jam pain xumuhu', to' quiji' pin hun Caxicon Jam quem.

Ca om na ne pain ca win xumu xin ca caracat wa ta

¹⁵Ta win xumu hwein oro ca om hohot non Iri' Jam pain macan' ca' me, ta win xumu hwein oro ca param ximama' caca oro caracat co to nanain macan' ca' quem. Wari' co win xumu nain oro ca om hohot non Iri' Jam pain macan' ca', om ca win xumu con Cotere'. ¹⁶Xi maqui' con Cotere' oro ca param ximama' wa ta. Oro ca param ximao ne ca cwere wa ma', oro ca querec param ximao xine oro carawa ma', oro ca xec xec ximao wa pain oro ca cut xine ma' quem, om ca maqui' con Cotere', om na. Maqui' nonon oro co om howa nonon Iri' Jam. ¹⁷Main om pin tara oro carawa ca om hohot non Iri' Jam pain macan' ca'. Main om pin tara oro ca param ximama' caca oro co om howa nonon ma' quem. Wari' co ara nain ca param pan nucun Iri' Jam ma' iri na ne, e' cara ac ca tara ta.

Ca hu tococwa cocon oro wari' co noc nonon Cristo

¹⁸Je ca tomi' xuhu' ca', pain ca ac ca mana panxita' xuhu' ne ca'. Wixicam pin na xec nein ca pi' pin ta' ne macan' ca'. Maqui' nain i ma'

wari' co noc tamana non Cristo ma', co ari mip non ma'. Wara taraju hun pain ca maqui' ta' nucun. Wara mija pin nana oro win ma' ca co ari nonon Cristo pain ca noc cocon ma' quem. Je ca taxi' xin ca wixicam pin ne xec nein ca pi' pin ta' ne macan' ca'. ¹⁹Co ari nonon Cristo pain ca noc cocon ma', cut in wi paxi' nanapari' pane, ane om iri' win ma' ne cacapari' pain ca howa nexi' con Cristo ne. Je ca paca' cacapari' pane. Mo xi iri' win ma' ne cacapari' con Cristo ma', je xi momon cut in cut in cara cacapari' quem. Ane paca' cacapari' ne. Je ca querec pin' tococwa pain ca om win ma' ne cacapari' con Cristo.

²⁰Wahu' iri na ne, ma' nuhu' Tamataracon Iri' Jam. Wirico co awi tamana ma', co pe ni ca' nain ca caracat wa ma', wirico co mi' nuhu' pain Tamataracon. Je ca querec pin' querec pin' pi' pin hwein oro ca pijim' xo' xine pain capijacon ma'. Querec pin' ac hwein na oro ca pijim' mixein xine ma' quem. ²¹Pain ca xirao' mi' xuhu' ca', om ca coromicat mi' ca' xuhu': Xirao' mi' toton, xi querec pin' cacain capijacon Iri' Jam ca iri'o' ta, om ca coromicat mi' ac i ma' xuhu' ta. Taxi' inuhu' pain ca querec pin' hwein capijacon Iri' Jam ca iri'o'. Taxi' inuhu' pain ca taraju pa' hwein i ca' quem, pain ca om mixein camain' ne capijacon Iri' Jam ca iri'o'. ²²Je ca tomi' xuhu' ca'. Ma' co mixein ma' quem? Om na, taraju pa' je e'. Wari' co om querec pin' non Cristo pain ca wara tora' pan con Iri' Jam pain ca to' witan roron pain ca caracat nucucun oro wari' ta con pane, wirico co mixein ta. Wirico co ari non Cristo pain ca noc tamana con ma'. Noc non Cotere' Iri' Jam, noc non Panxica quem. ²³Oro wari' co noc nonon Panxica Iri' Jam ma', om nonon Cotere'. Wari' co Panxica Iri' Jam na Jeju ta, ma' non Cotere' quem.

²⁴Je ca tomi' xuhu' ca'. Pe ho' tarain xumuhu' oro ca taraju qui' hwe pain ca xo' howa ten qui' hwe pane ta. Pe ho' cara iri turuhu' oro ca taraju hwe pain ca xo' howa qui' hwe pane ne, win cwere ac hun tara Cotere' Iri' Jam con Panxica Jeju Cristo. ²⁵Je ca wara tomi' pe mi' capari' ca'. Mi' xuhu' pain ca om pi' ra ha' ne ca e' wa ta napari' ta.

²⁶Je ca xirao' mi' xuhu' ca'. Xirao' mi' inuhu' cocon caram ma' co pijim' mixein xim nunuhu' pain ca howa ni ca' jein capijacon Iri' Jam con Cristo ta nunuhu' ma'. ²⁷Ane ma' cuhu' Tamataracon Iri' Jam ne. Win cwere nuhu' quem. Ca' na nuhu' pain oro capijacon Iri' Jam ca taxi' je cuhu' ma'. Om ca ximin hwe pain, om ca ma' xirapari' na hun xucun co ca' na nuhu' pain, om na. Ca' na xo' nuhu' pain. Om ca ca' na mixein cuhu', ca' na iri'o'

nuhu' pain oro capijacon Iri' Jam ca taxi' je cuhu' ma'. Je ta win cwere qui' hun Cristo ta.

²⁸ Je ca tomi' xuhu' ca', pain ca ac ca mana panxita' xuhu' ne ca'. Win cwere jun Cristo. Ma' ta quere me iri' pain ca aram aram in qui' ta' nucun. Ma' ta om jin' iri', ma' ta om wixipa' iri' pain ca to quima hwet xun quem.

²⁹ Wara taxi' hun pain ca ara xo' nucun ma', pain ca hohot con Iri' Jam pain oro ca ara nucun. Je ca taxi' hwein i ca' quem: Oro wari' co ara xo' taxipa' nana ma', pain ca hohot cocon Iri' Jam pain oro ca ara nucucun ma', wiricoco co mana panxica Iri' Jam nana quem.

Ca mana panxica Iri' Jam iri'

3 Taraju pa' xin i ca' e': Om ca noc camain' capari' Cotere' Iri' Jam ta, xi mana panxita' inuhu' ara capari' ta. Te urun ma' ira! Oro wari' co om howa nonon ma', om ca querec pin' cacapari' pain ca mana panxica Iri' Jam iri' ca', xi querec pin' pan cocon quem. ² Je ca tomi' xuhu' pain ca tomi' querec te xuhu' ca'. Mana panxica Iri' Jam iri' pain xocori ca', pain ca to to wet xin macan' ca'. Om ca an hwet mi' querec capari' pain ca cwere mama' xi' iri' pain ca to' jimama' xim capari' ca'. Ane taxi' xin i ca' ne: In qui' iri' tara Cristo ne, ac wirico pin' ac iri' tara, xi om ne ca querec xun ara xi' pain iri' curucun pain iri' ca' e' nucun ta. ³ Oro wari' co winim' nanain xec nein ca mi' xun tococwa pain ca ac wirico Cristo pin' caca ma', to ni ca' taxipa' nanain oro ca caracat wa ma'. Win ca Cristo pain ca pe ni ca' cain ca caracat wa ma' quem.

⁴ Oro wari' co caracat taxipa' nana ma', ari nonon Iri' Jam pain oro ca ara je tococwa ma'. Xi ari ara cocon Iri' Jam oro co caracat taxipa' nana ta. ⁵ Taxi' hun Cristo pain ca maqui' nucun pane. Maqui' nain macan', ma' ta to' om pin' tain ca caracat nuhu' ta napari'. Taxi' hun pain ca om caracat camain' ca quem. ⁶ Oro wari' co win cwere nonon ma', om ca caracat taxipa' caca. Oro wari' co caracat taxipa' nana ma', om ca taxi' cocon Cristo pain ca param nucun, om ca querec pin' camain' cocon ta.

⁷ Je ca tomi' xuhu' ca', pain ca ac ca mana panxita' xuhu' ne ca'. Ma' tara xumuhu' me. Coromicat xo' je. Om ca na camain' ne pain ca howa hun wari' co tomi' mixein nuhu' ma', pain ca hohot na pain ca caracat hwe ta nuhu' ma'. Wari' co ara xo' taxipa' ma', wirico co hohot non Iri' Jam. Win ca Jeju Cristo pain ca hohot con Cote ca quem. ⁸ Wari' nucun

Caxicon Jam na co ma' co caracat taxipa' ma', xi caracat taxipa' pan ara ca Caxicon Jam ta. Wara caracat qui' ara xi' nain ca xo' tomi' ma' ten qui' xine macan' pane. Je ca maqui' cain macan' Panxica Iri' Jam quem. Ma' ta to' om pin tain oro ca ara nucun Caxicon Jam ta na pane. ⁹Oro wari' co mana panxica Iri' Jam pin nana ma', om ca caracat taxipa' caca, xi ma' ara cocon iri' ca e' nucun Iri' Jam ta. Om ca caracat taxipa' ac caca, xi mana panxica Iri' Jam ara caca ta. ¹⁰Je i ca' ca to' querec pin' napari' ca jimama' ca' xucucun mana panxica Iri' Jam cocon mana panxica Caxicon Jam: Wari' co om ara xo' taxipa' ma', co noc non win howa ca ma' quem, om ca panxica Iri' Jam ca co ma'.

Ca om noc caracan xujuhu' pain ca mana panxita' xuhu' ca' capari' Iri' Jam

¹¹Je i ca' capijacon Iri' Jam ca pijim' mi' xihwe pane, ca wara taraju hwe pain ca xo' howa ten qui' hwe pane quem: Tomi' querec te caracan xujuhu' ta napari'. ¹²Om ta an xiho' xun Caim co wari' ne ca Caxicon Jam pain cara pane. To' pa' pin non coxa' ca pane. Para to' pa' pin con quem? Om na, taraju pa' je e'. To' pa' pin non coxa' ca, xi om ne ca pan tem taxipa' pan ara ca ta. Noc non coxa' ca pain ca ara xo' taxipa' ca quem.

¹³Je ca tomi' xuhu' ca' xere. Ta wa ina me hwe pain ca noc cucuhu' oro co om howa nonon Iri' Jam me. ¹⁴Taxi' xijexi' pain ca wara witan ca' xin ca cono' wa. Taxi' xijexi' pain ca e' pin iri' pain iri' ximixi' quem. Xi tomi' querec te taxipa' ara xuxun oro xerexi' co howa nonon Iri' Jam ta. Wari' co noc taxipa' non win ma' ca ma', ac ca mi' pin cara ca na. Om ca witan ca' camain' cain ca mi' pin wa ta. ¹⁵Wari' co noc taxipa' non win howa ca ma', ac ca to' pa' pin con na. Cain' cain' xira quem? Ma' non ca om pi' ra ha' ne ca e' wa pain ca to' pa' pin con win ma' ca ra? Om na, wara taxi' irin i ma' ta.

¹⁶Mi' pin caho' iri napari' Jeju Cristo pane ne, to' querec pin' ac capari' na pain ca om noc camain' capari' ta. Om ca nain ho' xucun pari', mi' pin caho' napari'. Ac i ma' xi' quem, om ta narain ho' xijexi' cocon oro xerexi' cwa'. Quep xiho' xijexi', am cono' xi' iri' pain ca quep xiho' xijexi' ca'. Je i ma' ira xi'. ¹⁷Wari' co ma' non oro carawa ma', mo ta taxi' con win howa ca pain ca ximin ca ma', pain ca om con carawa ma', mo ta om xiram pa' con quem. Ma' tara ca an xiho' cara ac con Iri' Jam pain ca om noc

capari' ra? Om na ta. ¹⁸Je ca tomi' xuhu' ca', pain ca ac ca mana panxita' xuhu' ne ca'. Ta tomi' capijacocon e' xijexi' pain ca tomi' querec te inuhu' ta ximama' xijexi' me. Xiram pa' xijexi', quep xiho' xijexi'. Tomi' querec te iri'o' xijexi' quem. ¹⁹Tomi' querec te ac i ma' iri xijexi' ne, querec pin' ac xijexi' tara pain ca mana panxita' capari' Iri' Jam co iri'o'. Quereme ac iri' tara pain ca tomi' xun quem. ²⁰Am wixipa' paxi' iri' pain ca tomi' xun iri' ca', xi om ne ca taxi' pan ara xijexi' pain ca caracat iri' ca'. Taxi' paxi' irin ca coromicat nexi' pain ximixi' ca', ane taxi' taxi' tiquin' ca' capari' pain oro ca coromicat nexi' pain ximixi' Iri' Jam ne. Je ca ha' capari' pain ca quereme iri' pain ca tomi' xun ca'.

²¹Je ca tomi' xuhu' pain ca tomi' querec te xuhu' ca'. Om iri na ca wixipa' iri' pain ca tomi' xun Iri' Jam ne, pain ca taxi' xijexi' pain ca caracat iri' ca', om ca hehe iri' pain ca tomi' xun ca'. ²²Mi' mi' pi' pin ac capari' tara pain oro ca mi' ne xun quem. Xi om ne ca tomi' ha' taxipa' ara xun pain oro ca ara je capari' ta. Xi om ne ca ara taxipa' e' ara xin oro ca hohot non quem. ²³Je i ca' ca ara je capari': Howa jun Panxita' Jeju Cristo cwa' napari'. Tomi' querec te taxipa' xujuhu' ta napari' quem. Je ca ara je capari'. ²⁴Oro wari' co tomi' ha' taxipa' nonon Iri' Jam pain oro ca ara je tococwa ma', wiricoco nana co win cwere nonon ma'. Win cwere cara pan nonon Iri' Jam quem. Taxi' urun pain ca win cwere capari' quem, xi mi' ara capari' pain Tamataracon ta.

Ca pijim' xo' wa pain ca pijim' mixein wa

4 Je ca tomi' xuhu' pain ca tomi' querec te xuhu' ca'. Ta howa ximama' huhun oro wari' co pijim' nunuhu' me ta. Taraju wet xo' jujun, tomi' querec jujun pain ca pijim' nucucun. Am maqui' con Iri' Jam ca coromicat nucucun ma', am maqui' pan nein ximicocon ca coromicat nucucun ma', tara cocon ta. Je ta coromicat xo' qui' hwe cocon, xi om ne ca mija ara caca co tomi' hwet mixein nonon pain capijacon Iri' Jam oro wari' pain oro xijein macan' ma'. ²Oro co tomi' ca' nana ma': Iri' wari' pin na Jeju Cristo pain ca maqui' cain macan' pane, an tan pan napari' pain ca wari' nexi' ca', mo ta tomi' ac i ma' caca, ha' ac cuhu' tara pain ca querec pin' hwein ca coromicat nein Tamataracon Iri' Jam cocon. Wirico Iri' Jam co mi' nonon pain ca tomi' nucucun. ³Oro co tomi' jimama' nana ma' iri nana ne, co tomi' ca' nana: Om ca iri' wari' pin ca Jeju Cristo, om ca an tan pan

capari' pain ca wari' nexi' ca', mo ta tomi' ac i ma' caca, om ca maqui' con Iri' Jam ca coromicat nucucun. Maqui' pan nain ca coromicat nucun co ma' co ari mip non Cristo ma', co noc tamana non ma'. Wara taraju ara xi' hun pain ca maqui' ta' ca ma'. Wara maqui' pin ca ca' ira, wara mi' pan nain ca coromicat nucun, mi' tata pain oro co pijim' mixein nana ma'.

⁴ Je ca tomi' xuhu' ca', pain ca ac ca mana panxita' xuhu' ne ca'. Wari' nucun Iri' Jam hwe ta. To' quiji' pin huhun oro co pijim' mixein nana ma'. Xi om ne ca hwara' opa ara ne Tamataracon Iri' Jam ca win cwere nuhu' ta. Hwara' opa tiquin' ca' non Caxicon Jam co win cwere nonon oro co om howa nonon Jeju ma'. ⁵ Co pijim' mixein nana ma', om ca howa cocon Jeju. Je ca pijim' an xiho' e' cocon oro co om howa nana ma'. Taraju wet pan nonon oro co om howa nana ma' quem. ⁶ Mana panxica Iri' Jam pan iri'. Taraju wet nanapari' oro wari' co querec pin' nonon Iri' Jam quem. Oro co om querec pin' nonon Iri' Jam ma' iri nana ne, om ca taraju wet cacapari'. Ac i ma' na ca querec pin' xin ca coromicat nucucun co pijim' nana ma'. Co taraju wet nanapari' ma', maqui' nain Tamataracon Iri' Jam ca iri'o' oro ca coromicat nucucun. Co om taraju wet nanapari' ma' iri nana ne, maqui' non Caxicon Jam co pan tem oro ca coromicat nucucun ma' quem.

Ca om noc capari' Iri' Jam, je pain ca mi' capari' pain ca om noc xijexi' quem

⁷ Je ca tomi' xuhu' pain ca tomi' querec te xuhu' ca'. Ta noc xijexi' me, xi wirico Iri' Jam ara ca co mi' napari' pain ca om noc xijexi' ta. Wari' co om noc non win ma' ca ma', wirico co panxica Iri' Jam ta. Querec pin' ac con na quem. ⁸ Wari' co noc non win ma' ca ma', om ca querec pin' con Iri' Jam, xi noc con wari' Iri' Jam ta. ⁹ Mam' napari' con Panxica co xica' xat Iri' Jam pane. Ma' ta e' cara caca pum ta non pari'. Ac i ma' na ca an hwet mi' capari' pain ca om noc camain' capari' ta. ¹⁰ Pain ca om noc xun Iri' Jam ma', tomi' querec te paxi' urun. Ane om noc iri'o' pan capari' ne. Je ca mam' capari' con Panxica pane. Pe rain maxicocon, mi' pin caho' roron, xic am pin rain ca caracat nucucun ta non pari'. Je ca querec pin' xun pain ca om noc iri'o' capari' ta. ¹¹ Je ca tomi' xuhu' pain ca tomi' querec te xuhu' ca'. Ac i ma' na ca om noc capari' Iri' Jam cwa'. Je ta om noc qui' xijexi' ca' quem. ¹² Om paxi' na ca querec tocwa Iri' Jam. Ane taxi' xin i

ca' ne: Mo ta om noc caracan xijexi', win cwere cara pan ac capari' na, an hwet pe pin ac xin na ca om noc iri'o' capari' pain ca wari' nexi' ca.

¹³Taxi' xijexi' pain ca win cwere xun Iri' Jam. Taxi' urun pain ca win cwere capari' quem, xi om ne ca mi' ara capari' pain Tamataracon ta.

¹⁴Querec urut con Panxica pain ca maqui' cain macan' pane. Tomi' hwet urut cocon oro wari' pain ca mam' capari' con Cote ca quem. Hwet roron oro wari' pain macan' cain, to' witan ca' roron pain ca caracat nucucun ta non pari'. ¹⁵Wari' co tomi' ca' ma': Panxica Iri' Jam na Jeju ta, mo ta tomi' ac i ma' ca, wirico co win cwere cara ca Iri' Jam. Win cwere cara pan non Iri' Jam quem. ¹⁶Querec pin' urun Iri' Jam pain ca om noc capari' ca'. Howa urun pain ca om noc ac i ma' capari' quem.

Om ca noc camain' cocon oro wari' Iri' Jam, je curucun mao na. Oro co an xiho' nonon Iri' Jam pain ca om noc cocon oro wari' ma', win cwere ac cocon na Iri' Jam. Win cwere pan nonon Iri' Jam ma' quem. ¹⁷Je ca mi' capari' pain ca an xiho' xun pain ca om noc iri'o' xijexi' ca'. Ma' ta quereme hwe pain xec nein ca wap toton oro wari' pain ca caracat nucucun Iri' Jam ma'. Om ta jin' xun, xi wara an xiho' ara xun pain xocori ca' ta. ¹⁸Om ca noc capari' Iri' Jam. Je ca om jin' xun ca', xi noc camain' capari' ta. Jin' xuxun xi wap xim capari' ta. Ane om wap xim capari' ne. Je ca tomi' xuhu' ca'. Wari' co jin' non Iri' Jam ma', om ca querec pin' querec con pain ca om noc iri'o' con ma'.

¹⁹Om ca noc xun Iri' Jam, om ca noc xijexi' quem, xi om ne ca wirico pan ara ca co om noc cain' napari' ta. ²⁰Wari' co tomi' ca' ma', om ca noc ton Iri' Jam ta, am tomi' ac i ma' paxi' ca pain ca noc con win howa ca ma'. Cain' cain' xira quem? Xi mixein ara ca ta. Noc iri non win howa ca co querec ca ma' ne, om ca ha' con pain ca om noc ac con Iri' Jam co om querec ca ma' quem. ²¹Je ca ara je capari' quem. Wari' co om noc napa' ma', om ta noc cocon oro win howa ca ta, ac i ma' na ca tomi' capari' Iri' Jam.

Ca howa xun Panxica Iri' Jam Jeju Cristo

5 Mana panxica Iri' Jam nana oro wari' co howa nonon Jeju ma', pain ca Cristo ca ma'. Oro wari' co om noc nonon Cotere' Iri' Jam cwa', om ca noc cocon oro win ma' caca co Te nonon quem. ²Om iri na ca noc xun Iri' Jam ne, tomi' ha' iri xin oro ca ara je capari' ne, taxi' ac xijiexi' na pain ca om noc xun oro win ma' nexi' pain ca mana panxica Iri' Jam iri' ca'. ³Tomi' ha' taxipa' iri urun pain oro ca ara je capari' ne, ac i ma' na ca an hwet pin xin ca om noc xun ca'. Om ca i'ina capari' pain ca tomi' ha' xin oro ca ara je capari' quem. ⁴Wari' co panxica Iri' Jam ma', ha' ara xi' non pain ca to' quiji' pin cain oro ca om awi wa ca i'ina non pain macan' ca'. Je ca tomi' xuhu' ca': Je i ca' ca mam' to' quiji' pin xin quem, mam' to' quiji' pin irin pain ca howa xun Jeju Cristo ta. ⁵Ma' co to' quiji' pin nain oro ca om awi wa pain macan' quem? Om na, xica' pe tara co howa non Jeju ma', pain ca Panxica Iri' Jam ca ma', wirico co to' quiji' pin nain ta.

⁶Wirico Jeju Cristo co maqui' nain macan' pane. Mam' maqui' nain com, mam' maqui' nain wic quem. Om ca mam' maqui' e' cain com ma'. Mam' maqui' nain com je wic ta. Je Tamataracon Iri' Jam ca to' querec pin' napari' con Jeju Cristo ma', pain ca tomi' hwet capari' pain ca mam' maqui' cain com je wic. Iri'o' na ca tomi' hwet nein quem, xi iri'o' taxipa' ara ne ta. ⁷Ma' 3 na ca tomi' hwet napari' pain ca maqui' con Iri' Jam Jeju Cristo: ⁸Tamataracon Iri' Jam ma', je com ma', je quicon ma' quem, je ca tomi' hwet capari' con Jeju Cristo. An an ari na ca tomi' mao nein quem. ⁹Tomi' hwet iri nanapari' pain carawa oro wari' ne, pain ca tomi' iri'o' ina ta cacapari' ma', howa ac xuxun na. Awi na ca tomi' nucucun ta paxi' ururun, ane awi tamana pan ne ca tomi' nucun Iri' Jam pain ca tomi' iri'o' ina pain ca tomi' hwet xuhu' con Jeju Cristo ta capari' ne. Awi tiquin' ca' nain ca tomi' hwet nucucun oro wari'. Xi Iri' Jam pan ara ca co tomi'

5.1 Ca' na ca tomi' mao nein ca Cristo wa cocon oro judeu pane. Iri' wari' co wara tora' ca Iri' Jam pane ta nanain. Iri' Taramaxicon tara, wirico co to' witan toton nonon oro wari' ta nanain. **5.6** Ca' na ca tomi' mao ne ca xirao' nucun João ca': Com ca mam' maqui' cain macan' Jeju Cristo pane, tomi' mi' nain com pain ca ja' qui' con pain com João Batista pane. Ja' iri na ne, maqui' ac nein na pawin ca tomi' nucun Iri' Jam: Wirico co cwa' Panxita' cwa' ta na. Om ca noc camain' ton. Hohot tamana napa' ta na ca tomi' nucun pane (Mateus 3.17). Wic ma' iri na ne, pain ca mam' maqui' cain macan' pane, tomi' mi' nain ca mi' pin nucun pain ca ao ne quicon pain ca tatatain mi' tocwa pain pana pane. Je ca ha' con pain ca to' witan ca' capari' pain ca caracat nexi' quem.

hwet napari' con Panxica ta. ¹⁰Wari' co howa non Panxica Iri' Jam ma', howa nain ca tomi' nucun Iri' Jam con Jeju Cristo. Wari' co om howa non Iri' Jam ma' iri na ne, tomi' napat non quem. Mixein na Iri' Jam ta non, xi howa cain ca tomi' nucun con Panxica ta. ¹¹Je i ca' ca tomi' hwet capari' con Jeju Cristo Iri' Jam: Wata' co mi' nuhu' pain ca e' cara wa ta napari'. Je ca tomi' capari' ca'. E' cara xi' iri' pain ca win cwere xun Panxica Iri' Jam ta. ¹²Wari' co win cwere non Panxica Iri' Jam ma', e' cara ac ca na. Wari' co om win cwere non Panxica Iri' Jam ma' iri na ne, om ca e' cara ca.

Ca ha' capari' Iri' Jam pain ca tomi' xun ca'

¹³Je ca xirao' mi' xuhu' ca', xirao' mi' inuhu' pain ca howa hun Panxica Iri' Jam ma'. Ma' ta taxi' xujuhu' pain ca e' cara xi' hwe ta inuhu'. ¹⁴Om ca hehe iri' pain ca tomi' xun Iri' Jam pain ca ara mi' xut pain carawa xun ca'. Xi taxi' ara xun pain ca ha' capari' pain ca ara mi' xut pain xun pain iri' ca param nucun ta. ¹⁵Taxi' iri' urun pain ca ha' capari' pain ca ara mi' xut pain oro ca tomi' xun ne, taxi' ac urun na pain ca ara mi' xim capari' pain.

¹⁶Mo ta querec xun win howa iri' pain ca caracat ca ma'. Querec iri' xun pain ca caracat ca ne, pain ca hohot na pain ca om mi' pin ca pain ca caracat nucun ta wa ma', tomi' mi' ac xun tara con Iri' Jam, mi' ac tocwa tara pain ca e' wa. Pain ca tomi' ac i ma' xuhu' ca', tomi' e' inuhu' cocon oro co caracat nana pain ca hohot na pain ca om cono' caca pain ca caracat nucun ta wa ma'. Ane ma' ca wari' co caracat ma' ne, pain ca hohot na pain ca mi' pin ca pain ca caracat nucun ta wa ma'. Om ca tomi' xuhu' pain ca tomi' mi' jun con Iri' Jam xuhu' con co caracat ac i ma' ma'. ¹⁷Caracat caracat pi' pin paxi' nana oro wari' co ara nanain oro ca om awi wa ma'. Ane om aram aram cono' cono' xam' xi' caca pain ca caracat nucun ne.

¹⁸Oro co mana panxita' ca Iri' Jam ma', taxi' ururun pain ca om caracat taxipa' caca ma'. Xi narain ho' pan ara tococwa con Caxicon Jam ta. Wirico Panxica Iri' Jam co narain ho' nonon ma'. Om ca quep xirac pan ac cocon Caxicon Jam ta. ¹⁹Taxi' xijexi' pain ca mana panxita' capari' Iri' Jam. Taxi' ururun oro co caracat taxipa' nana ma' quem, pain ca taramaxicon pe ho' pan cocon Caxicon Jam ma'. ²⁰Taxi' urun Panxica Iri' Jam pain ca wara maqui' cain macan' pane quem. Mi' napari' pain ca taraju pa' wa, ma' ta querec pin' hun Te Iri' Jam co iri'o' ta napari'. Win cwere urun co ma'

co iri'o' quem, win cwere urun Panxica Iri' Jam Jeju Cristo. Wirico Jeju Cristo co iri' co Iri' Jam iri'o' ta. Wirico co e' cara ta.

²¹ Je ca tomi' xuhu' ca', pain ca ac ca mana panxita' xuhu' ne ca'. Ma' tara xumuhu' me, ein jein oro carawa jimao ca Iri' Jam xi' ma wa ma'. Ta howa camain' hwein me ta.

Je i ca' ca xirao' ne ca'.

2 João

Ca xirao' mami' nucun João pain ca ma' 2 pin ne ca xirao' nucun

¹ Wata' pain ca querec wet toton oro co howa nonon Jeju cwa', wata' pan co xirao' mi' xim ca' we. Tora' pan nem Iri' Jam. Xirao' mi' inonon humajum ma' quem. Om ca noc camain' xuhu', tomi' querec te iri'o' inuhu'. Om ca xica' pe ta' pain ca om noc xuhu' ca', tomi' querec te tomi' querec te pi' pin nunuhu' co taraju pa' nanain capijacon Iri' Jam ca iri'o' con Jeju ma' quem. ² Om ca noc urut pahu', xi om ne capijacon Iri' Jam ca iri'o' ta. Pe ho' napari', pe ho' cara tarapari' quem.

³ Quep xihó' tarapari' Cotere' Iri' Jam con Panxica Jeju Cristo ma', pain ca mi' xim cacapari' pain ca param nucucun. Xiram pa' tatarapari', mi' tatarapari' pain ca om toron ne ximixi' quem. Quep xihó' ac i ma' tatarapari' pain ca howa xin capijacon ca iri'o' ma', je pain ca om noc caracan xijexi' quem.

Ca om noc xijexi', je pain ca na e' ne pain ca ma' ne ximixi' cocon oro co pijim' mixein nana ma'

⁴ Ma' nana humajum co querec ta' pane. Tomi' querec te tamana inonon, xi xuruxut xo' ara caca pain ca howa cacain capijacon Iri' Jam ca iri'o'. Tomi' ha' nonon Cotere' pain oro ca ara je capari' quem. Je ca tomi' querec te tamana toton ca'. ⁵ Tomi' xim inuhu' pain i ca' quem we. Ta noc caracan xijexi' me. Pain ca hu ac i ma' capari' Iri' Jam ma', om ca xocori ne ca hu nucun. Wara hu ac i ma' napari' pain cara pane, pain ca xo' pijim' ten qui' xin capijacon con Jeju pane. ⁶ Xuruxut xo' iri iri' pain ca tomi' ha' xin oro ca ara je capari' Iri' Jam ne, om ac ne na ca noc xun, om ac ne na ca noc xijexi' quem. Win ne ca wara hu capari' pain cara pane, pain ca xo' taraju

1.1 Pain ca xirao' mi' inem we ca João cwa', je pain ca xirao' mi' inonon humajum ma' quem ca cwa', tomi' joc mam' mi' tata co howa nonon Cristo ma'. We tata pain ca cut in xucucun, humajum tata pain ca howa caca quem.

ten qui' xin ca pijim' xine capijacon con Jeju pane. Xuruxut xo' je pain ca om noc mahu', je pain ca om noc caracan pan xujuhu' ta capari' ca' ira.

⁷Mija ara xi' nana co mixein nana ma', co hwet nonon oro co om howa nana ma', pijim' mixein pijim' mixein ac cocon na quem. Om ca an tan pan capari' pain ca wari' nexi' Jeju Cristo ta nana pain ca pijim' mixein nucucun. Wari' co pijim' ac i ma' ma', wirico co mixein taxipa' ma', co ari mip non Cristo pain ca noc tamana con ma'. ⁸Ma' tara xumuhu' me. Mo ta ha' huhun co pijim' mixein ac i ma' nana ma', waraju ac hwein tara oro ca taramaja nexi' pain ca taramaja mi' xun Iri' Jam. Howa cara iri jein oro ca pijim' mi' xihwe pain capijacon Iri' Jam ne, cut mi' cut mi' pi' pin ac cuhu' tara pain oro ca an to xo' mi' cuhu' Iri' Jam pain pawin cain. ⁹Oro wari' co om howa cara nanain capijacon Iri' Jam ca ca' na ca Cristo pane, co tacan hwara' nanain ca coromicat pan nucucun pain ca ca' na cacain ma' quem, om ca win cwere cocon Iri' Jam. Oro wari' co howa cara nanain ma' iri nana ne, win cwere nonon Cotere', win cwere nonon Panxica quem. ¹⁰Mo ta hwet cuhu' wari' co ca' na mixein nain capijacon Iri' Jam con Cristo ma', om ac ne tara ca tomi' querec te hun ta. Ta corom ra hun pain xuruhu' me, ta maqui' ma ra aji' camain' hun me ta. ¹¹Xi taramaja wi pin ara con wari' co tomi' querec te non pain oro ca ara pan tem nucun ta.

Ca pi' pin ne ca xirao' nucun João

¹²Mija paxi' na oro ca tomi' hwet xim xuhu' ca', ane noc tain ca xirao' mi' xuhu' pain ne. Hwet pan xim inuhu', tomi' ac xijexi' tara. Ma' ta tomi' querec te tamana xijexi' ta inuhu'.

¹³Mam' pe wet urut pahu' ta nunuhu' humaxicam cowe ma cwa', co tora' ca Iri' Jam cwa'.

Je i ca' ca xirao' ne ca'.

3 João

Ca xirao' mami' nucun João pain ca ma' 3 pin ne ca xirao' nucun

¹ Wata' pain ca querec wet toton oro co howa nonon Jeju cwa', wata' pan co xirao' mi' nem cwa' Gaio. Om ca noc camain' xim, tomi' querec te iri'o' inem.

² Je ca tomi' xim pain ca tomi' querec te xim ca'. Tomi' mi' inem con Iri' Jam. Mi' ron pain ca awi wa, mi' ron pain ca om caxi wa quem inon pum. Mi' ron pain ca hohot hohot pi' pin con oro carawa, mi' ron pain ca awi wa pain iri' ximicon quem inon pum. ³ Ma' nana xerexi' co hwet nanaparut pane. Tomi' querec te tamana ina pain ca tomi' hwet cacaparut pain ca win xumu cara mon Iri' Jam ma', je pain ca xut xo' ma pain ca tomi' ha' cara main oro capijacon ca iri'o' ma' quem. ⁴ Je i ma' ca ja' tomi' querec te tamana napa' ma', pain ca taraju toton oro co ac ca mana panxita' caca ne ma', pain ca xuruxut xo' caca pain ca tomi' ha' cara cacain capijacon Iri' Jam ca iri'o' ta.

⁵ Je ca tomi' xim pain ca tomi' querec te xim ca'. Quep xiho' iri momon oro xerexi' co win howa ma ma' ne, om paxi' na ca wara querec pin' momon pane, ane ara xo' tamana main ca taramaja nem pain ca quep xiho' momon ne. ⁶ Hwet iri nanaparut xerexi' pain ca cut in xujuxut pain ca howa urut con Jeju cwa' ne, tomi' hwet ac cacaparut na pum: Tomi' querec te naparut Gaio, om ca noc camain' caparut ta nanaparut pum. Je ca tomi' xim ca'. In hwet iri tuturuhu' ne, hohot ac ne tara pain ca quep xiho' momon pain ca aram aram mama' xin xijein cidade ta caca ma' quem. Win ne ca hohot con Iri' Jam pain ca ara ac i ma' iri' ta. ⁷ Awi na pain ca quep xiho' tococwa, xi taramaja mi' ara cocon Jeju Cristo pain ca hwet cocon oro wari' pain ca pijim' mi' xuxun pain capijacon Iri' Jam ta caca ma'. Om ca quep xiho' xut ta tococwa oro wari' co om howa nonon Cristo quem. ⁸ Je ca na e' ne pain ca tomi' querec te xuxun oro xerexi' co taramaja mi' ac i ma' nonon Cristo ma'. Quep xiho' xuxun, ma' ta taramaja wi xuxun pain ca pijim' hwet cacain capijacon Iri' Jam ca iri'o' ta.

Diótfefes con Demétrio

⁹Xirao' mi' paxi' inuhu' pain ca cut in xujuhu' pain ca howa hun Jeju pane, ane om taraju wet capa' pain ca xirao' ne Diótfefes ne. Xi tomi' ximao ara cuhu' ta: Wata' co hwara' opa tiquin' ca' nuhu' ta nuhu', ac i ma' na ca coromicat nucun pahu'. ¹⁰Je ca tomi' xim ca', hwet iri xuhu' ne, tomi' xo' ac xuhu' tara pain oro ca pan tem nucun ma'. Tomi' napat taxipa' ara xi' naparut ta. Om ca tomi' napat xica' pe caparut, noc noc tata oro xerexi' co pijim' hwet nonon pain capiacaon Iri' Jam oro wari' pain oro xijein cidade ma' quem. Noc tata co tomi' querec te nonon quem. Ta tomi' querec te huhun me ac tococwa na co tomi' querec te xuxun pan nonon ma', xin hwerehwet pin ac tococwa na pain ca cut in to xujuhu' ma' quem.

¹¹Je ca tomi' xim pain ca tomi' querec te xim ca'. Ta an xiho' momon oro co pan teretem taxipa' nana me, an xiho' e' roron co ara nanain ca awi wa. Wari' co ara taxipa' nain ca awi wa ma', wirico co Te non Iri' Jam. Wari' co pan tem taxipa' ma' iri na ne, om ca querec pin' camain' con Iri' Jam.

¹²Win ca Demétrio ma'. Taraju urut cocon oro wari' co awi na awi na pi' pin nonon. Tomi' iri'o' nana quem, querec pin' ara xi' ta pain ca awi nucun, je pain ca xut xo' nucun ta. Taxi' urut con quem, awi na urut con. Taxi' maparut pain ca tomi' iri'o' nuxut ca' quem.

Ca pi' pin ne ca xirao' nucun João

¹³Mija paxi' na oro ca tomi' hwet xim xim ca', ane noc tain ca xirao' mi' xim pain ne. ¹⁴Hwet ho' xim inem, om ta om om ta', hwet ho' xim. Tomi' ac xijexi' tara ta.

¹⁵Param inon Iri' Jam pain ca mi' quem pain ca om toron ne xumum ma'. Mam' pe wet urut pum ta nenem oro win ma' nexi' co to ho' nanapa' cwa'. Tomi' roron oro win ma' nexi' pain i ma' quem. Mam' pe wet mam' pe wet xam' urut cocon.

Je i ca' ca xirao' ne ca'.

Judas

Ca xirao' mi' cocon oro co howa nonon Jeju Judas

¹ Judas ina pain ca xirao' mi' xuhu' ca'. Taramaja mi' inon Jeju Cristo. Aji' inon Tiago quem.

Xirao' mi' inuhu' pain ca howa xine cuhu' Cotere' Iri' Jam, je pain ca om noc camain' cuhu', je pain ca querec wet xo' cuhu' Jeju Cristo ma' quem.

² Param inon Cotere' Iri' Jam pain ca xiram pa' tamana cuhu' ma'. Param inon pain ca mi' hwara' cuhu' pain ca om toron ne xumuhu', je pain ca mi' hwara' cuhu' pain ca querec pin' hun pain ca om noc camain' cuhu' ma' quem.

Oro co caracat nana pain ca miri'om cocon Iri' Jam

³⁻⁴ Je ca tomi' xuhu' pain ca tomi' querec te xuhu' ca'. Jain jain paxi' ina pain ca xirao' mi' xuhu' pain ca to' witan to' witan pi' pin capari' Iri' Jam cwa'. Ane coromicat ni pin ta' pain xocori ca' ne. Xi ma' pin ara caca co corom hwet taparu nunuhu' pain ca cut in xujuhu' ma', co wara tomi' mi' wawa pain ca wap wa pain cara pane. Joc xim nanain ca howa pan teretem nucucun. Caracat nana pain ca miri'om cocon Iri' Jam ma', pain ca ca' na ni ca' cacain capijacon ma'. Tomi' ca' nunuhu': Hohot na pain ca quep ximama' iri'. Om ta wap capari' Iri' Jam, xi om ne ca xiram pa' ara capari' ta nana. Noc nonon Jeju Cristo co xica' taramaja mi' iri' cwa', co Taramaxicon ne iri' cwa' quem. Je ca tomi' xuhu' ca'. Jain jain pin ina pain ca xirao' mi' xim xuhu' pain i ca' quem, pain ca hu ca' xim xuhu' ca'. Ari mip jujun oro co tomi' ni pin nanain capijacon Iri' Jam ca iri'o' ma', ca howa pan iri' ca', ca mi' capari' pain ca wari' ne capari' ca'. Mao ac ne ma' na con. Om ca mi' mami' capari' pain xijein capijacon quem.

⁵ Wara taxi' paxi' hwein oro ca xirao' mi' xim xuhu' ca', ane to' mam' pe wet xim xuhu' pain i ca' ne. Taxi' hun Taramaxicon Iri' Jam pain ca to' witan cocon oro wari' nein Israel pane. To' witan ca' paxi' tata pain Egito

1.1 Aji' non Jeju Tiago con Judas. Wijima wijima pi' pin nonon Maria cara pane, ane xica' to caca Tiago con Judas co wanxi' ca José pane ne. Pe horona e' non Jeju José.

pane, ane wap tococwa co om howa je na nonon ne, aram aram cono' pin ac caca na quem. ⁶Mam' pe wet jujun oro jam co taramaja mi' nonon Iri' Jam pane quem. Taramaja mi' paxi' nonon, hwara' opa paxi' nana pane ira. Ane om ara xo' cara pan cacain ca taramaja nucucun ne. An to pin nanain, an to pin nanain ca to pan caca pain pawin cain quem. Je ca tao' to pin cocon Iri' Jam quem. Tao' to to nonon pain ca jitacat nein xim cain. Pao' to mip nonon pain arain too ca om em' ra na ma'. To wet iri caca ma' ac tococwa na, winim' e' jein iri' xec nein ca wap xim xuhu' ta ac tococwa na. ⁷Pan teretem ac i ma' nana oro wari' co to nanain Sodoma je Gomorra je oro xijein cidade ca to ja' pan nain pane quem. Mija na ca quep ximama' caca, ara taxipa' nanain ca om hohot camain' ma', je pain ca quep caracan xucucun pain ca tarama' nucucun ma' quem. Je ca wap tococwa ma', mam' wap tata pain xe ca om pi' ra ha' ma'. Tomi' ac tococwa na oro wari': Ma' tara xumuhu' me. Ac i ma' inonon oro wari' co pan teretem nana ta ac tococwa na.

⁸Oro wari' co corom hwet nunuhu' ma', pan teretem ac i ma' nana quem. Tomi' ca' nana: Om na, tohwein' ina, tomi' napa' pain ca tohwein' ne Iri' Jam ta nana, ara ximama' ac caca na, to' em' pin ac xucucun na pain ca caracat nucucun. Om ca tomi' ha' jun Iri' Jam na caca, tomi' napat nonon oro jam co hwara' opa nana cwain, co to nanain pawin cain quem. ⁹Om xi tomi' napat cocon quem, xi tomi' napat con Caxicon Jam Miguel co taramaxicon pe ho' nonon oro jam co taramaja mi' nonon Iri' Jam pane ta. Mi' pin iri na Moisés cara pane ne, tomi' caracan ac xucucun na Caxicon Jam con Miguel. Pe ho' pan tarapa' curucun Moisés cwa' ne iri na Caxicon Jam ne, om na ta pan ac ca na Miguel. Om ca tomi' napat xiton na con, om na. Tomi' e' non: Pan to' pan tarain tarajum Taramaxicon Iri' Jam ta non. ¹⁰Oro wari' co caracat nana pain ca miri'om cocon Iri' Jam ma' iri nana ne, tomi' napat ximama' ac cacain na oro ca om taraju pa' pan caca ma'. Ma' paxi' na oro carawa ca taraju pa' paxi' caca pain ca an xiho' cacain oro carawa nein mi ca om ximi ma'. Je i ma' ca mam' to' em' pan xucucun ta.

¹¹Wa inonon me! Ximin nana. Wap tamana totoron Iri' Jam ta. Xi an xiho' ara cocon Caim cara pane, an xiho' nonon pain ca xut pan tem nucun. Param tamana nanain dinheiro. Win ca Balaão cara pane, co mixein nonon oro wari' pane. Ac ca ja' ja' cocon na pain ca pan tem nucun. To' om pin

ac tococwa tara. Win ne ca to' om pin tococwa Corá cocon oro win ma' ca pane quem.

¹²Caram ma' co caracat nana pain ca miri'om cocon Iri' Jam ma', to' i'ina nunuhu' pain ca cao' querec te wi xijexi' pain ca xere xijexi' ca' hwe ma'. Win ne ca to' i'ina cuhu' oro pacun ca om hwet pe pain iri' cwerein com ma', pain ca to' mapi' irin, ac i ma' na ca to' i'ina cucuhu' pain ca cao' querec te wi xujuhu' ma'. Om ca wixipa' camain' caca pain ca xocomu caca pain ca wata' ta wata' ta caca pain ca warao' nucucun pain ca cao' xi' caca quem. Om ca quep xiho' camain' cucuhu', quep xiho' e' xucucun. Win ne tajain nanawin ca jitacat paxi' ma', pain ca pan' ta' paxi' ne xowi' ma'. Ane om pan' ne ne, xi om ne ca nuru om pin ara nein hotowa ta. Ac i ma' na ca om quep xiho' cucuhu' ma'. Win ne oro panaji memem ca om mi ma' quem. Wara maqui' paxi' na oro xec nein ca xac xin xine ma', ane om ne winain ne. Wara cono' na, wara horohot pin ta. Taparain, panaji, caximain, horohot pi' pin ta. Ac i ma' nana caram ma' quem, ac ca wara cono' pin caca na. ¹³An xiho' nanain cote ne com ma', pain ca wap tamana ne com pain camana' ma'. Wap iri na ne, an to pin ac nein na oro homirinain pain ca toroto nein pain cacarain com pain namaji. Ac i ma' nana caram ma' quem, xi om ne oro ca pan teretem nucucun ta. Wixipa' xirara. An xiho' nonon oro pijo' co ac ni ca' nain wanaxicon quem. Wara coromicat an pe mi' tata pain ca jitacat tamana nein xim ta. To cara ac cacain i cain tara ta.

¹⁴Adão cara pane, wanxi' ac ca na, wanxi' ac caca na waram winacon quem. Aram aram to' 7 pa' ac cocon na Enoque co wara tomi' pe nain carawa ca hwet pa' xun tococwa oro co caracat nana pain ca miri'om cocon

1.11 Pain ca xirao' nucun Judas cwa', ma' 3 nana hwanana co tomi' mi' ca. Caim ma', co noc non coxa' ca Abel ma', to' pa' pin ac con na quem. Balaão ma', co mixein nonon oro wari' nucun Iri' Jam, to' caracat ac cocon na, xi om ne ca param ara cain dinheiro ca pagar xun tocwa pain ca pan tem nucun. Corá cocon oro win ma' ca ma' iri na ne, ari nonon Moisés co taramaxicon. To' om pin ac cocon na Iri' Jam quem. **1.13** Taraju pa' jein ca xirao' nucun Judas cwa': Oro wari' co horoho mama' nanain oro cote ne com ma', om ca querec ac cacain cacarain com. Om ca querec pin' cacain ca to pan nucucun pain ximijain cote ne com. Je ca noro e' cocon oro pijo' ma', querec pin' ac cacain na ca to pan caca pain cote ne com. Mo xi ac ni ca' cain wanaxicon oro pijo' ma', ac ximama' pan ac caca xira oro co to nanain mam' horoho wa pain cote ne com ma'. Je ca tomi' joc mam' mi' tococwa oro co caracat nana pain ca miri'om cocon Iri' Jam ma'. An xiho' nonon oro pijo' co ac ni nain wanaxicon. To' i'ina nonon oro co howa nonon Iri' Jam, to ni ca' ac cocon na pain iri' wana ca awi.

Iri' Jam. Tomi' ca' tata pane: Taraju wet je e'! Maqui' ta' tara Taramaxicon nexi'. Maqui' wi tara cocon oro jam co taramaja mi' nonon ma', co mija tamana nana ma', co mija tiquin' ca' nanain ca 1.000 nucucun ma'. ¹⁵Ma' ta tomi' xo' tomi' xo' pi' pin xun tococwa oro wari' pain oro carawa ca ara caca pane. Maqui' tara, ma' ta em' hwe, mama' jein cote ne xe ta ac tococwa tara oro co caracat nana pain ca miri'om cocon Iri' Jam pane, je pain oro ca pan teretem nucucun, je pain oro ca tomi' napat nucucun pain ca tomi' napat cocon Iri' Jam pane. Ac i ma' na ca wara tomi' pe nucun Enoque cocon oro co caracat nana pain ca miri'om cocon Iri' Jam. ¹⁶Xi tomi' wijimi taxipa' ara caca ta. Tama' tomi' em' xucucun. Ara taxipa' nanain ca param pan nucucun ca om awi. Tomi' xec xec taxipa' nana, tomi' ximama' nonon oro wari' pain ca awi hwe awi hwe cocon, ma' ta ara mi' maparut pain ca param pan nuxut ta tata.

Ca hwara' opa je pain ca howa nuhu' ta tococwa

¹⁷Ane tomi' xim xuhu' pain i ca' ne, tomi' inuhu' pain ca tomi' querec te xuhu' ca'. Mam' pe wet jein ca wara tomi' caca oro apóstolo co tomi' hwet nanain capiacaon Taramaxicon nexi' Jeju Cristo pain cara pane. ¹⁸Tomi' ca' nunuhu' pane: Wixicam pin iri tara oro xec nein ca in qui' ta' ca Jeju Cristo ne, ma' ac caca tara oro wari' co tatam' tatam' tomi' xirac nonon Iri' Jam cocon oro wari' nucun. Ara e' tatarain ca param pan nucucun pain ca miri'om cocon Iri' Jam. ¹⁹Wiricoco co to' i'ina nunuhu', mi' nunuhu' pain ca coromicat ni ca' xujuhu'. Xuruxut pan teretem nana pain ca win xumu e' cacain ca coromicat ne ca wari' wa ca'. Om nonon Tamataracon Iri' Jam quem.

²⁰Ane tomi' ca' xuhu' pain ca tomi' querec te xuhu' ca' ne. To' hwara' opa xujuhu' pain ca howa cara hwein oro ca ca' na xihwe ca maqui' non Iri' Jam. Tomi' xun Iri' Jam iri je ne, mam' tomi' ac hun tara pain ca hwara' opa nein Tamataracon. ²¹Tama' mam' pe wet jun Iri' Jam pain ca om noc cuhu' ma'. Winim' cara jein xec nein ca mi' xim cuhu' pain ca om pi' ra ha' ne ca e' wa Taramaxicon nexi' Jeju Cristo quem. Mi' turuhu' pain, xi xiram pa' ara cuhu' ta.

²²Ma' iri tatara co tara ta'a tara ta'a wet nana pain ca howa nucucun ne, xiram pa' ac huhun tara. ²³Ma' iri tatara oro xucucun co wixicaracao' mi' xun wawa pain cote ne xe ne, quep xiho' ac huhun tara, ac ca cut

ca' huhun tara pain xe. Ma' iri tatara oro xucucun co pan teretem nana ne, xiram pa' ac huhun tara quem. Ma' tara xumuhu' cocon me, ma' ta om camara' wi huhun pain ca pan teretem nucucun. Noc jein ca caracat nucucun, querec querec ac homiricon wom jein ca caracat nucucun.

Ca awi na Iri' Jam ta ca pain ca pi' pin ne ca xirao' nucun

²⁴⁻²⁵Xica' pe na Iri' Jam co Iri' Jam ma', co mam' to' witan napari' con Taramaxicon nexi' Jeju Cristo. Hwara' opa na. Ha' non pain ca narain ho' cuhu' pain ca camara' wa pain ca caracat wa ta. Ha' non pain ca to' om pin cain oro ca to' em' nuhu' ma', je pain ca ja' tomi' querec te tamana cuhu' pain ca aram aram coco' quima hwet xine pain ca awi tamana ne ta cuhu' ma'. Na e' na pain ca tomi' querec te xun pain ca awi tamana nucun ma', je pain ca iri' Taramaxicon nucun ma', je pain ca hwara' opa tamana nucun ma', je pain ca taramaxicon hwara' opa tamana pan ca quem. Wara ac i ma' na pain cara pane, pain ca om quep querec cain oro carawa pane, ac i ma' ac i ma' wet na pain xocori ca', ac i ma' ac i ma' cara tara ta.

Amém, iri'o' na ca tomi' ne ta.

Je i ca' ca xirao' ne ca'.

1.23 Ma' na ca quep xiho' ac tococwa co wixicaracao' xun wawa pain cote ne xe ra? Om na, taraju pa' je e'. Pijim' mi' xuxun pain capijacon Iri' Jam con Jeju. Cwirin' je cwirin' je xuxun. Mo ta howa pin cocon Iri' Jam con Jeju ma', om ta wixicaracao' xun tococwa pain cote ne xe. Ac ca cut ca' xun tococwa tara pain cote ne xe ta.

Apocalipse

Carawa ca maqui' ta' ma', ca an hwet mi' con João Jeju Cristo

1 Je i ca' carawa ca maqui' ta' ma', ca an hwet pe ca Jeju Cristo pane. Wirico Iri' Jam co an hwet mi' pan non pain, an xin tiquin' mi' roron pain oro co taramaja mi' nanapa' pain macan' ta non. Om ta pain homa ne, maqui' ac ne tara ta non. Mam' ac capa' na con jam co taramaja mi' non ma', tomi' hwet ron pain João cwain, co taramaja mi' napa' cwain non, tomi' hwet ac capa' pain na quem. ²Je ca an xin tiquin' mi' xuhu' pain ca xirao' pe ta' ca'. Iri'o' na oro ca xirao' ne ca', xirao' xirao' pi' pin inain oro ca querec ta' con, je oro ca tomi' nucun Iri' Jam ma', xirao' xirao' pi' pin inain oro ca tomi' hwet capa' Jeju Cristo pane. ³Iri' Jam ma', param mi' non pain ca awi wa wari' co noro nain ca xirao' ne ca', param mi' nonon pain ca awi wa oro wari' co taraju nanain pain ca noro xine ma', wiricoco co tomi' ha' nanain quem. Xi om ne ca wixicam pin ara ne oro xec nein ca maqui' ta' ne oro ca xirao' ne ta.

Ca wata' co xirao' mi' nuhu' ta ca João

⁴João ina pain ca xirao' mi' xuhu' ca'. Xirao' mi' inuhu' pain ca howa hun Jeju ma', pain ca cut in xujuhu' pain oro cidade ca ma' 7 ma', ca to nain Ásia ma', je i ma' wixinain macan' ca to ne oro cidade ma'. Tomi' mi' inuhu' con Iri' Jam co ma' cara ma', co wara ma' pain cara pane, co maqui' ta' ma' quem. Param inon pain ca quep xihó' cuhu' pain ca mi' cuhu' pain ca param nucun, param inon pain ca mi' cuhu' pain ca om toron ne xumuhu' quem. Je ca param ta' pain Tamataracon ca ma' 7 ma' pain ca xat quima hwet nein ca mam' xao pe pe ca ma', pain ca Taramaxicon ca ma'. Param inain pain ca quep xihó' cuhu' pain ca mi' cuhu' pain ca param nein, je pain ca mi' cuhu' pain ca om toron ne xumuhu' ma' quem. ⁵Param

1.4 Taraju pa' xin i ca': Om paxi' na ca ma' 7 ne Tamataracon Iri' Jam. Ma' xica' pe na Tamataracon Iri' Jam ta. Pain ca ma' 7 na Tamataracon Iri' Jam ca João cwa', tomi' mi' nain ca hwara' opa tamana nein. Ac ca ma' 7 ne na ca querec pin' mao xin ca hwara' opa tamana nein.

inon Jeju Cristo pain ca quep xihu' cuhu' pain ca mi' cuhu' pain ca param nucun, param inon pain ca mi' cuhu' pain ca om toron ne xumuhu' quem. Wirico Jeju co tama' tomi' iri'o' ma', co to' e' mami' cain' ca Iri' Jam pane, co iri' Taramaxicon co hwara' opa tiquin' ca' nonon oro taramaxicon co taramaxicon to nanain oro xijein macan' ca'.

Wirico Jeju Cristo co om noc napari' ta. To' witan ca' napari' pain ca caracat nexi' ca'. Mam' to' witan napari' pain quicon. ⁶Wari' ne napari' pain ca taramaxicon pe ho' capari', sacerdote je pain ca taramaja mi' hun Te Iri' Jam cwa' napari' pain ca Iri' Jam ne con Cote ca. Na e' na pain ca tomi' querec te xun Jeju Cristo co awi tamana cara ta. Wirico co iri' Taramaxicon cara quem. Amém, iri'o' na ca tomi' ne ta.

⁷Noro je!

Maqui' tara pain tajain nanawin Jeju.

Querec querec pi' pin totoron oro wari'.

Oro wari' co xucun' pa' nonon quem, querec querec pi' pin totoron.

Awaran awaran pi' pin ac caca tara con oro xucucun

wari' pain oro xijein macan'.

Amém, iri'o' na ca tomi' ne ta.

⁸Tomi' ca' na Taramaxicon Iri' Jam: Wata' co Alfa cwa', wata' co Ômega cwa'. Wata' co ma' cara cwa', wata' co wara ma', pain cara pane, wata' co maqui' ta' ma' quem. Wata' co hwara' opa pan. Ac i ma' na ca tomi' ca pane.

Ca hwet pa' con João Cristo co e' mami'

⁹João ina pain ca xirao' mi' xuhu' ca'. Xere xijexi' pain ca howa xun Jeju. Win ma' ne xijexi' pain ca jain jain wi iri' cocon oro wari' co quep em' nanapari', xi om ne ca taramaxicon ne ara xun Iri' Jam ta. Win ma' ne xijexi' pain ca querec cara xin oro ca to' i'ina napari' pain ca howa xun Jeju quem. Pe inain xixi pan nein macan' Patmos. An mao nanapa' pain i cain pane, xi om ne ca pijim' ara tain capijacon Iri' Jam pane, xi om ne ca

1.8 Alfa ma', je Ômega ma', je i ma' letra nein alfabeto pain capijacocon oro grego. Pain iri' tamain alfabeto nucucun ma', je ca ma' pe ne alfa. Pain iri' tawirinain ma' iri na ne, je ca ma' pe ne ômega. Pain ca Wata' co Alfa cwa', wata' co Ômega cwa' ca Iri' Jam ma', je i ca' ca tomi' ta' ca: Wata' co wara ma' cain' pain ca om om wet ne oro carawa pane, wata' co ma' cara pain ca om pin ta' ne ma' quem, ac i ma' na ca tomi' mao ne ca tomi' nucun.

tomi' hwet ara toton con Jeju oro wari' pane quem. ¹⁰Xec nein ca mam' pe wet xine ca e' mami' ca Taramaxicon nexi' pin iri na ne, pain domingo pain cara pane, pe ho' mip ac capa' na Tamataracon Iri' Jam. Taraju ac tain na ca tomi' wa ma', pain wara ma'. Tomi' mip na. Ac ca on xine caji taracom napa'. ¹¹Tomi' ac capa' na: Xirao' pe ra pain tapari carawa oro ca querec ta' ma ma'. Mam' ac momon pain tara oro co howa nanapa' ma', co cut in xucucun pain oro cidade ma', ca ma' 7 ma'. Mo na oro cidade nucucun: Éfeso ma', Esmirna ma', Pérgamo ma', Tiatira ma', Sardes ma', Filadélfia ma', je Laodiceia ma' quem. Ac i ma' na ca tomi' capa' pane.

¹²Noro in ac ta' na, querec ton co tomi' napa' ma' ina ira. Noro in iri ina ne, querec ac tain na oro ca mam' tom pe ne naran ma', ca mam' quep xine pain ouro ma'. Ma' 7 na. ¹³Ximija pe nain oro naran wari' ma'. Ac wari' paxi' na. Pe non cote ca wom co hwet nain caximacon. Tucu pan xucun pain quimacon, mam' quep ta pain ouro ca mam' tucu pan xucun ma'. ¹⁴Towo' tamana na tununucun pain winacon ma', towo' mip na. Joc xec na tocon ma', ac ca tom ne xe na. ¹⁵Toc meremem na caximacon ma', an xiho' nain bronze ca an tom pe xine pain xe ma', ca xic mip ac xine na quem, querec ac i ma' na caximacon. Ca tomi' nucun ma' quem, ac ca xain ne pacun pain ca weweweo tamana ne com na. ¹⁶Cut 7 non pijo' pain micon ma', pain iri' curucun ma'. Hwet qui' nain capijacon cote ne quit ca ma' 2 quirinain ma', ca xa xa pi' ma'. Toc meremem na tocon quem, an xiho' non xina pain ca toha mip ca ma'.

¹⁷Querec iri inon ne, pan' hwet ac ton na pain caximacon. Ac wari' co mi' pin ma' ina pain ca pan' hwet ton pain caximacon. Quep ac capa' na pain micon ma', pain iri' curucun ma'. Tomi' ac capa' na: Ta jin' mapa' me ta. Wata' co ma' cain' pane, pain ca om om wet ne oro carawa pane. Wata' co ma' cara ta' ma' quem, pain ca win pi' pin ta' ne oro carawa quem. ¹⁸Wata' co e' cara cwa'. Mi' pin paxi' ina pane, ane e' cara ta' pain xocori ca' ne. Om ta pi' ra ha' ne ca e' ne ta. Wata' co taramaxicon hwara' opa tiquin' ca' nain ca cono' wa. Taramaxicon pe ho' inonon oro co cono' nana ma' quem, to ho' napa' oro ca mam' pa xine ca to pan caca ta, ac i ma' na ca tomi' capa' ma'.

1.11 Oro livro cocon hwanana pain cara pane, om ca an xiho' nein oro livro nexi' pain xocori ca'. An e' nanain tapari carawa, xirao' xirao' ac cacain na, joc top ac cacain na quem. Ac i ma' na livro nucucun hwanana pane.

¹⁹Je ca tomi' xim ca' ac capa' na. Xirao' pe ra pain tapari carawa pain oro ca querec ma cara ne, je pain oro ca querec ta' ma pain xocori ca', je pain oro ca maqui' ta' pa'ao' ma' quem, xirao' xirao' pi' pin rain. ²⁰Tomi' xo' xim inem con oro pijo' pain oro ca mam' tom pe ne naran ca' quem. Ma' na ca tomi' mao nucun oro pijo' co ma' 7 cwa', co querec ma cwa', co cut ta' pain mu pain iri' cwere ca'. Ma' na ca tomi' mao nein ca mam' tom pe ne naran ca' quem, ca ma' 7 ca'. Oro pijo' cwa', co ma' 7 cwa', tomi' joc mam' mi' nonon co an xin tiquin' mi' nonon pain ca tomi' ne oro co howa to nanain oro cidade ca ma' 7 ma'. Oro ca mam' tom pe ne naran ca' iri na ne, ca ma' 7 ca' quem, tomi' joc mam' mi' nonon oro co cut in xucucun pain ca howa cacapa' ma', co to nanain oro cidade nucucun ca ma' 7 ma'. Ac i ma' na ca tomi' capa' ma'.

Ca xirao' mi' tococwa oro co howa to nanain Éfeso

2 Tomi' ac capa' na: Xirao' mi' ron co ma' co querec wet nonon co howa to nanain Éfeso. Xirao' mi' ac i ca' ron:

Je i ca' ca tomi' xim cuhu' co cut 7 non pijo' pain micon ma', pain iri' curucun ma', co xut in pe nain ximijain oro ca mam' tom pe ne naran ma', ca ma' 7 ma', ca mam' quep xine pain ouro ma' quem, tomi' ca' xim nuhu': ²Taxi' inuhu' pain oro ca ara hwe ma'. Taxi' inuhu' pain ca taramaja tamana hwe ma', je pain ca quereme cara hwein oro ca to' i'ina nuhu' ma'. Taxi' inuhu' pain ca noc mip huhun oro wari' co pan teretem nana ma', je pain ca tomi' querec huhun caram ma' co apóstolo urut mixein nana ma'. Xi iri' apóstolo caca ta. Querec pin' huhun pain ca mixein nucucun ma'. ³Taxi' inuhu' pain ca quereme cara hwein oro ca to' i'ina nuhu' ma', je pain ca hwara' opa hwe pain ca jain jain nuhu' cocon oro wari' co quep em' nunuhu' pata'. Taxi' inuhu' pain ca om an pe mahu' ma' quem.

⁴Taxi' paxi' inuhu' pain ca ara ac i ma' hwe ma', ane ma' ne carawa ca om hohot napa' pahu' ne. Win xumu win xumu om pin mahu'. Win ne ca tomi' querec te qui' mahu' pain ca xo' howa qui' mahu' pane quem. ⁵Je ca tomi' xuhu' ca': Mam' pe wet jein ca tomi' querec te nuhu' pane, pain ca tomi' ha' xixim na mahu' pain ca xo' howa ten qui' mahu' pane. Cwirin' pin jein ca caracat nuhu', jain jain mami' xine pain ca tama' tomi' ha' xixim na mahu' ma', tomi' querec te ac i ma' mami' xine. Ac pain cara pane tara pain ca xo' howa qui' mahu' pane. Mo ta om cwirin' pin hwein ca caracat

nuhu' ma', hwet ac xuhu' tara, an ca' ac xuhu' tara pain ca mam' tom pe ne naran nuhu' ma'. Pe pe om pin ac nein tara maxinain pahu'.

⁶Ac i ma' paxi' na ca om hohot mahu' ma', ane ma' ne carawa ca hohot pan napa' pahu' ne, pain ca noc mip hwein oro ca ara caca oro nicolaíta ma'. An xiho' mahu' pain ca noc tain oro ca ara caca quem.

⁷Mo ta taraju pa' xixi' na hwe ma', je ta taraju wet qui' hwein ca tomi' nein Tamataracon Iri' Jam ca', pain ca tomi' cocon oro co cut in xucucun pain ca howa cacapa' ma'. Main tomi' ca' toton oro wari' co hwara' opa cara nana pain ca howa nucucun ma': Xac jein winain panaji memem ca mi' nain ca e' cara wa ma', ca tarama' pe nain totacon Iri' Jam ta toton. Om ta narain ho' toton pain, xac jein ta toton. Je ca xirao' mi' roron oro co howa to nanain Éfeso ta capa' pane.

Ca xirao' mi' tococwa oro co howa to nanain Esmirna

⁸Tomi' ac capa' na: Xirao' mi' ron co ma' co querec wet nonon co howa to nanain Esmirna. Xirao' mi' ac i ca' ron:

Je i ca' ca tomi' xim cuhu' co ma' cain' pane, pain ca om om wet ne oro carawa pane, co ma' cara ta' ma' quem, pain ca win pi' pin ta' ne oro carawa quem, wirico co mi' pin pane, co e' mami' ma' quem. Tomi' ca' xim nuhu': ⁹Taxi' inuhu' pain ca jain jain nuhu' pain ca quep em' xihwe ma'. Taxi' inuhu' pain ca ximin hwe ma', pain ca om cuhu' oro carawa ma' quem. Om paxi' nuhu' carawa, ane ma' cuhu' iri' carawa pata' ne. Taxi' inuhu' pain ca tomi' napat cucuhu' caram ma' co judeu urut paxi' nana ma'. Xi iri' judeu caca ta. Oro wari' nucun Satanás ara xi' nana pain ca ca' na cacain oro ca tomi' nucun ta. ¹⁰Ta jin' hwein oro ca jain jain wa ca maqui' pa' xim nuhu' con Caxicon Jam me ta. Ma' tatara oro win ma' nuhu' co wixicao' mi' ca pain xirinain ca tao' to tao' to to wa, quep em' querec ac tococwa tara, am an pe pin xin hwein ca howa nuhu' ta ac tococwa tara quem. Ma' 10 tara xec pain ca jain jain xi' hwe pain ca quep em' xim cuhu' Caxicon Jam. Win xumu cara xine me. Mo ta to' parapa' pin xim cucuhu'

2.6 Om ca taxi' homa tococwa oro nicolaíta cara pane. Taxi' e' tata pain ca om pijim' xo' cacain capijacon Iri' Jam pane. Hohot na pain ca cao' xine oro carawa ca mi' querec te xine oro caji pacun ca Iri' Jam xi' ma caca oro wari' ma', hohot na pain ca quep tacacama oro xequem narima' ma' quem, ac i ma' na ca pijim' pan teretem nucucun pane.

2.9 Satanás na xijein wixicon Caxicon Jam.

pain ca howa mahu' ma', je i ma' ira, to' parapa' pin ma' tatarapa' ne ac huhun tara. Mi' pan ac xuhu' tara pain ca om pi' ra ha' ne ca e' wa ta.

¹¹ Mo ta taraju pa' xixi' na hwe ma', je ta taraju wet qui' hwein ca tomi' nein Tamataracon Iri' Jam ca', pain ca tomi' cocon oro co cut in xucucun pain ca howa cacapa' ma'. Oro wari' co hwara' opa cara nana pain ca howa nucucun ma', om ta cono' mami' caca, om ta mama' cacain cote ne xe, om ta to ni ca' cocon Iri' Jam ta. Je ca xirao' mi' roron oro co howa to nanain Esmirna ta capa' pane.

Ca xirao' mi' tococwa oro co howa to nanain Pérgamo

¹² Tomi' ac capa' na: Xirao' mi' ron co ma' co querec wet nonon co howa to nanain Pérgamo. Xirao' mi' ac i ca' ron:

Je i ca' ca tomi' xim cuhu' co ma' non cote ne quit ca xa xa pi' ca'. Tomi' ca' xim nuhu': ¹³ Taxi' inuhu' pain ca to hwein i ma', pain ca taramaxicon pe ca Satanás ma'. Ane win xumu mahu' ne. Om ca an pe pin mahu', howa cara mahu'. To' pa' pin paxi' ta Antipas co win xumu napa' pain ca tomi' hwet capa' cocon oro wari' pane, to' pa' pe paxi' ta pain ca to pan nuhu' pain Pérgamo ma', ca pe pan ca Satanás ma'. Ane howa cara pan mahu' ne.

¹⁴ Taxi' paxi' inuhu' pain ca ara ac i ma' hwe ma', ane ma' ne oro carawa ca om hohot napa' pahu' ne. Ma' nana win ma' nuhu' co tomi' ha' nanain oro ca hu nucun Balaão cara pane, pain ca hu qui' con Balaque pain cara pane, pain ca ara ac i ca' roron oro wari' nein Israel ma', ma' ta caracat caca ta con pane. To' caracat pin ac tococwa na, cao' cao' pin ac cacain na cwerein carawa ca mi' querec te xine pain oro caji pacun ca Iri' Jam xi' ma caca oro wari' pane. Quep ximama' quep ximama' ac tacacama na oro xequem narima' pane, quep quep ne ac cocon na oro xucun tarama' oro narima' pane quem. ¹⁵ Ac i ma' ara xi' nana oro win ma' nuhu' ma' quem, pain ca tomi' ha' cacain ca hu nucucun oro nicolaíta ma'. ¹⁶ Je ca tomi' xuhu' ca': Cwirin' pin jein ca caracat nuhu'. Mo ta om cwirin' pin hwe, hwet hap ac xuhu' tara, mam' mixita ac toton tara pain cote ne quit ca hwet qui' nain capija ta.

¹⁷ Mo ta taraju pa' xixi' na hwe ma', je ta taraju wet qui' hwein ca tomi' nein Tamataracon Iri' Jam ca', pain ca tomi' cocon oro co cut in xucucun

2.16 Cote ne quit ca hwet qui' nain capijacon ma', tomi' joc mam' mi' nain ca tomi' nucun pain ca hwara' opa tamana nucun. Mam' mixita toton pain ca tomi' pan nucun.

pain ca howa cacapa' ma'. Oro wari' co hwara' opa cara nana pain ca howa nucucun ma', mi' toton pain capam' ca maná caca oro wari' nein Israel pane, ca joc xa xine pain xocori ca' quem. Mi' toton pain wijimain pacun ca towo' quem, ca xirao' to xine xocori wixicocon. Taraju pa' xica' to e' pan tatarain xocori wixicocon caram ma' co cut pan nanain quem. Je ca xirao' mi' roron oro co howa to nanain Pérgamo ta capa' pane.

Ca xirao' mi' tococwa oro co howa to nanain Tiatira

¹⁸ Tomi' ac capa' na: Xirao' mi' ron co ma' co querec wet nonon co howa to nanain Tiatira. Xirao' mi' ac i ca' ron:

Je i ca' ca tomi' xim cuhu' co Panxica Iri' Jam cwa', co ac ca tom ne xe na tocon pain ca joc xec nein ma', co toc meremem caximacon pain ca an xiho' nein bronze ca xic mip xine ma' quem. Tomi' ca' xim nuhu': ¹⁹ Taxi' inuhu' pain oro ca ara hwe ma'. Taxi' inuhu' pain ca om noc mahu', je pain ca om noc xujuhu' ma'. Taxi' inuhu' pain ca howa mahu' ma', je pain ca quep xiho' xujuhu' ma', je pain ca querec cara hwein oro ca to' i'ina nuhu' ma' quem. Oro ca ara hwe pain xocori ca', tiquin' ca' nain oro ca ara hwe pain ca xo' howa qui' mahu' pane.

²⁰ Taxi' paxi' inuhu' pain ca ara ac i ma' hwe ma', ane ma' ne carawa ca om hohot napa' pahu' ne: Om ca tomi' in pin hwem caxicam narima' ma', co an xiho' nam Jezabel cara pane. Profeta ina, tomi' hwet inain capijacon Iri' Jam ta na. Mixein na, tomi' mixein nonon oro co taramaja mi' nanapa' ma'. To' caracat tata pain ca tomi' ca' tococwa ca': Hohot na pain ca quep ximama' xujuhu'. Hohot na pain ca cao' hwein cwerein carawa ca mi' querec te xine pain oro caji pacun ca Iri' Jam xi' ma caca oro wari' ma', ac i ma' na ca tomi' tococwa ma'. ²¹ Cwirin' pin rain ca caracat nem ta paxi' inam, winim' paxi' inam pain ca an pe pin camain ca caracat nequem ma', ane noc camain ca cwirin' wa ne. Quep ne quep ne tiquin' nonon oro xucun tarama' ma'. ²² Je ca tomi' xuhu' ca': To' caxi tamana tam, jain jain

2.17 Capam' ca joc xa xine pain xocori ca', ac ca tomi' joc mam' mi' nein na oro caramaji pawin ca mi' xim capari' Iri' Jam pain pawin cain, ca mi' xim capari' pain ca e' cara wa.

2.20 Om paxi' na ca tomi' mi' cain ca quep ximama' xequequem tarama' cam narima' ma'. Om paxi' na ca tomi' mi' cain ca cao' xine cwerein carawa ca mi' querec te xine pain oro caji pacun ca Iri' Jam xi' ma caca oro wari' ma' quem. Tomi' joc mam' mi' tata pain ca param ni ca' cocon Iri' Jam ma', je pain ca an xiho' cacam caxicam narima' co param ni ca' non taxicam pain ca noc pin con ma'.

ac cama tara. To' jain jain tamana toton co quep nanam quem, mija tara ca jain jain caca. Mo ta om cwirin' pin cacain ca caracat nucucun ma', mo ta om an to pin cacain ca pan teretem nucucun ma', to' jain jain ho' toton ta. ²³To' parapa' pin toton oro co an xiho' nanam ma', co ac humaxicam nana ma'. Querec pin' ac cacapa' tara oro co howa nana ma', pain ca cut in xucucun pain oro cidade ma', querec pin' tatarapa' pain ca taxi' tain oro ca coromicat nucucun oro wari' ma', je pain ca taxi' tain oro ca param nucucun ma' quem. Wahu' pain ca pan teretem hwe ma', wap wap xam' xuhu'. Win hwe pane xuhu', win ne ca ara ara hwe pane xuhu', ac i ma' tara ca wap xuhu' ta.

²⁴Tomi' ho' inonon oro xucucun co to nanain Tiatira ma': Wahu' pain ca om an xiho' hwem caxicam narima' ma', pain ca om taxi' xixi' na hwein oro coximinain caramaxicon Satanás ca tomi' hwet cama ma', ca wirico Satanás co an hwet mi' napari' pain ta pan caca oro wari' nequem ma', tomi' ca' inuhu': Wara tomi' ha' hwein oro xijein ca tomi' ne ca'. Om ta hu mami' xuhu' pain xocori ca', om na xijein ca tomi' ne ca tomi' ha' je xuhu' ca'. ²⁵Param e' inuhu' pain ca win xumu cara mahu'. Ta an pe camain' mahu' me ta. Aram aram maqui' pa' ac xuhu' tara ta.

²⁶Oro wari' co hwara' opa cara nana pain ca howa nucucun ma', co tomi' ha' cara nanapa' ma', co mi' pin pa' ma' tain ca tomi' ha' ne ne nana ma', mi' ac toton tara pain ca taramaxicon to ho' cocon oro wari' pain oro xijein macan'. ²⁷⁻²⁸Win ne ca mi' pan capa' pain ca taramaxicon wa Te cwa', mi' mi' tiquin' ac toton pain tara quem. Iri' taramaxicon tatara, taramaxicon hwara' opa tatara. Om ta xiram pa' camain' cocon oro wari' co om tomi' ha' nonon Iri' Jam. To' quiji' pin totonon, ac ca to' taparapa' pin xine oro tapaxi' ma' tara pain ca to' parapa' pin xun tococwa ta. Oro wari' co hwara' opa cara nana pain ca howa nucucun ma', co tomi' ha' cara nanapa' ma', mi' ac toton tara con pijo' co hwet nain xo' xec quem.

²⁹Mo ta taraju pa' xixi' na hwe ma', je ta taraju wet qui' hwein ca tomi' nein Tamataracon Iri' Jam ca', pain ca tomi' cocon oro co cut in xucucun pain ca howa cacapa' ma'. Je ca xirao' mi' roron oro co howa to nanain Tiatira ta capa' pane.

2.27-28 Pain ca tomi' mi' con pijo' co hwet nain xo' xec Jeju ma', am tomi' mi' pan xucun. Mi' pan xije cocon oro co taramaxicon hwara' opa nana ma'. Win cwere toton, to ho' cara ac xujuxut tara ta, am ac i ma' ne ca tomi' mao nein con.

Ca xirao' mi' tococwa oro co howa to nanain Sardes

3 Tomi' ac capa' na: Xirao' mi' ron co ma' co querec wet nonon co howa to nanain Sardes. Xirao' mi' ac i ca' ron:

Je i ca' ca tomi' xim cuhu' co ma' co taramaxicon pe ho' nain Tamataracon Iri' Jam ma', ca ma' 7 ne ca hwará' opa nein ma', co ma' co taramaxicon pe ho' nonon oro co ac pijo' co ma' 7 nana ma' quem. Tomi' ca' xim nuhu': Taxi' inuhu' pain oro ca ara hwe ma'. Ac ca howa xo' mahu' na, howa xo' totonon xi' ma nunuhu' oro wari' pata'. Ane om howa iri'o' mahu' ne. ²Ma' tara xumuhu' me. Naro maho' je, hwará' opa mami' je pain ca howa nuhu' ma'. Wijimain pin ara xi' na ca howa nuhu' ma', ac ca om pin ta' ne na ca howa nuhu' ma'. Xi tomi' ha' tomi' ha' pi' pin hwein oro ca tomi' ha' je cuhu' Iri' Jam ta. Taxi' inuhu' pain ca om hohot ne oro ca ara nuhu' ma', om ca querec hohot cuhu' Iri' Jam ne cwa'. ³Je ca tomi' xuhu' ca': Mam' pe wet jein oro capiacaon Iri' Jam ca ca' na xihwe pane, ca taraju hwe pane. Tomi' ha' jein. Cwirin' pin jein ca caracat nuhu'. Mo ta om cara ne xumuhu' ma', mo ta naro cara hwe ma', ane ane maqui' pa' ac xuhu' tara, win ne ca ane ane maqui' ca wari' co an noc xa ta' ma', ac i ma' tara ca ane ane maqui' pa' xuhu'. Jaxicao' xuhu', om ta taxi' mahu' pain xec nein ca maqui' pa' xuhu' ta.

⁴Ac i ma' paxi' hwe, ane ma' paric ca' e' caca oro win ma' nuhu' co om ara em' xucucun pain Sardes ma' ne. Om ca ara mixem pin cocon womicocon. Ame hwe e', main to totonon wom co towo', xuruxut wi ac cacapa' tara. Xi querec pin' ara tococwa pain ca hohot cacapa' ta. ⁵Ac i ma' tatara oro wari' co hwará' opa cara nana pain ca howa nucucun ma', to totonon wom co towo' ma' quem. Om ta xic am camain' tain wixicocon pain tapari carawa ca xirao' to xine wixicocon oro wari' co e' cara xi' nana. Wari' ne inonon caram cwa' ta ac ton tara Te cocon oro jam co taramaja mi' nonon ma', taraju taraju xam' tatarapa' pain ca tomi' ac i ma' toton ta.

⁶Mo ta taraju pa' xixi' na hwe ma', je ta taraju wet qui' hwein ca tomi' nein Tamataracon Iri' Jam ca', pain ca tomi' cocon oro co cut in xucucun pain ca howa cacapa' ma'. Je ca xirao' mi' roron oro co howa to nanain Sardes ta capa' pane.

3.4 Om paxi' na ca tomi' mi' tococwa pain ca om ara mixem pin cocon womicocon ma'. Tomi' mi' tata pain ca xuruxut xo' nucucun ma', pain ca om caracat wi cocon oro caracat ma'.

Ca xirao' mi' tococwa oro co howa to nanain Filadélfia

⁷Tomi' ac capa' na: Xirao' mi' ron co ma' co querec wet nonon co howa to nanain Filadélfia. Xirao' mi' ac i ca' ron:

Je i ca' ca tomi' xim cuhu' co ma' co wara tora' ca Iri' Jam pane, co pe ni ca' nain ca caracat wa ma', wirico co iri'o' ma'. Je i ca' ca tomi' xim cuhu' co pe ho' non ca mam' pa xine manain ca corom ac xine cidade nucun Taramaxicon Davi cara pane. Mo ta pa cain manain, om ca tao' pa' ac cain xucun wari'. Mo ta tao' pa' cain, om ca pa ac cain xucun wari' quem. Tomi' ca' xim nuhu': ⁸Taxi' inuhu' pain oro ca ara hwe ma'. Om paxi' na ca hwara' opa hwe ma', xi om ne ca paric to ara hwe ta. Ane tomi' ha' cara mahu' ne. Om ca an pe pin mahu', howa cara mahu'. Noro je, pa mi' inuhu' pain man ma'. Om ca tao' pa' ac cacain oro wari' quem. ⁹Taraju wet je e'. Cut in toton caram ma' co judeu urut paxi' nana ma'. Xi iri' judeu caca ta. Mixein nana, wari' nucun Satanás caca ma' ira. Cut in toton, tomi' mip ac toton tara, pe torotop mi' jujun pain caximacocon caram cwa' co howa nanapa' cwa', querec pin' xine pain ca om noc toton ta toton pahu'. ¹⁰Wara hu inuhu' pane, quereme cara jein oro ca to' i'ina nuhu' me inuhu' pane. Tomi' ha' mahu' quem. Je ca narain ho' xim xuhu' pain ca jain jain wa pain oro xec pain ca to' jain jain toton ta' oro wari' co to nanain macan' ma'.

¹¹Maqui' ho' ta' ina, om ta om om ta', maqui' hap ta' ina. Win xumu cara xine, ta an to camain' hwein oro ca ara xo' hwe ma', ma' ta om cut ca' xihwe pain carawa ca awi ca main mi' xim xuhu' ta. ¹²Oro wari' co hwara' opa cara nana pain ca howa nucucun ma', to' hwara' opa ac toton tara, quep ac xipain xirim pin toton, pain xiricon Iri' Jam ne cwa', coco' to cara ac cacain tara, om ta hwerehwet ca' camain' cacain. Xirao' toton pain wixicon Iri' Jam co taramaja mi' ta' cwa', xirao' toton pain wixinain cidade nucun quem, je wixinain Xocori Jerusalém ca quiiji' qui' nain ca pe pan ca pain pawin cain quem. Xirao' toton pain xocori wuxu ca' quem.

3.7 Je i ca' ca tomi' mao ne ca pe ho' con ca mam' pa xine manain ca corom ac xine cidade nucun taramaxicon Davi ma'. Xica' pe na Jeju co mi' nonon pain ca corom wa pain Xocori Jerusalém oro wari'. Xi wirico ara ca co iri' winacon taramaxicon Davi ma', co wara tomi' pe ca Iri' Jam pain cara pane ta. **3.12** Pain ca xirao' toton cocon pain xocori wixicon Jeju ma', tomi' ca' na: Xirao' iri toton pain xocori wuxu ca' ne, querec pin' ac tococwa tara pain ca wari' ne toton ta na.

¹³Mo ta taraju pa' xixi' na hwe ma', je ta taraju wet qui' hwein ca tomi' nein Tamataracon Iri' Jam ca', pain ca tomi' cocon oro co cut in xucucun pain ca howa cacapa' ma'. Je ca xirao' mi' roron oro co howa to nanain Filadélfia ta capa' pane.

Ca xirao' mi' tococwa oro co howa to nanain Laodiceia

¹⁴Tomi' ac capa' na: Xirao' mi' ron co ma' co querec wet nonon co howa to nanain Laodiceia. Xirao' mi' ac i ca' ron:

Je i ca' ca tomi' xim cuhu' Iri' Wari' co wara tora' ca Iri' Jam pane, wirico co iri'o' ma'. Je i ca' ca tomi' xim cuhu' co Amém na wixicon ma', co om mixein camain' pain ca tomi' hwet cain oro ca iri'o' wa con Iri' Jam ma', co taramaxicon pe ho' nain oro carawa jimao ca tomi' ma' pin ca Iri' Jam pane. Tomi' ca' xim nuhu': ¹⁵Taxi' inuhu' pain oro ca ara hwe ma'. Om paxi' na ca ari mahu', ane om win xumu mahu' ne. Win xumu xirarapa' na inuhu'. Tara pahu', mo ta om win xumu mip mahu', je i ma' xira ca ari mip mahu' ta. ¹⁶Je i ma' ira mahu'. Mo xi win xumu mip mahu'. Xi om ne ca an xiho' ara hwein com ca xain wijimain ma'. Noro jun wari' co toc nain com ma'. Toc iri nain ca xain wijimain nein ne, we' hwet pin ac cain na. Ac i ma' xuhu' quem, an xiho' ara xi' hwein com ca xain wijimain ma'. We' hwet pin ac xuhu' tara ta. ¹⁷Tomi' ac i ca' hwe: Caramaju urut, mija naparut oro carawa. Om na carawa ca om naparut, ma' ma' pi' pin naparut oro carawa ca param urut, ac i ma' paxi' na ca tomi' hwe ma'. Ane om querec pin' hwein ca ximin nuhu' ne. Xiram pa' inuhu' ta. Xi querec pin' xujuhu' pain ca om cuhu' iri' carawa ta. Om na tucuhu', om na womuhu' quem. ¹⁸Hu ca' inuhu': Cut xine pain ouro ne ca om em' camain' ca', ma' ta caramaju iri'o' pin hwe ta inuhu'. Cut jun wom co towo' cwa' quem, ma' ta to hun, ma' ta wixipa' wixipa' om pin hwe pain ca om cuhu' wom ma', pain ca hwet pe e' ne curuhu' ma' inuhu'. Cut jein aramao aramao toc ma', ma' ta aramao xio pin hwein tucuhu' ma', ma' ta querec iri'o' hwe ta inuhu'.

3.17 Pain ca om na tucuhu' ta tococwa ma', tomi' joc mam' mi' tata pain ca om taraju pa' cacain capijacon Iri' Jam. Pain ca om na womuhu' ma' iri tococwa ne, tomi' joc mam' mi' tata pain ca om pe cocon wom co tomi' joc mam' mi' nain ca hohot tocwa Iri' Jam ma', pain ca to' witan ca' tococwa pain ca caracat nucucun ma'.

¹⁹Tomi' inain taraxicocon oro wari' co om noc ta' cwa'. Hu xo' hu xo' pi' pin inonon. Je ca tomi' xuhu' ca': Ma' tara xumuhu' me, win xumu jein ca xuruxut xo' wa, cwirin' pin jein ca caracat nuhu' ta. ²⁰Taraju wet xine me. Xat pe inain manain xuruhu'. Tataca ina quem. Mo ta taraju mahu' pain ca corom hwet xim xuhu' ca', mo ta pa mahu' pain, corom hwet ac xuhu' tara, cao' wi ac xijexi' tara ta.

²¹Oro wari' co hwara' opa cara nana pain ca howa nucucun ma', mi' ac toton tara pain ca xao to ho' cacapa' pain ca mam' xao pe ne pain ca taramaxicon pin ta' ta' ca'. Taramaxicon wi ac cacapa' tara. Win ta' pain xocori ca', pain ca to' quiji' pin ton Caxicon Jam pane, je pain ca xao pe ho' pin ton Te pain ca mam' xao pe nucun pain ca taramaxicon nucun quem.

²²Mo ta taraju pa' xixi' na hwe ma', je ta taraju wet qui' hwein ca tomi' nein Tamataracon Iri' Jam ca', pain ca tomi' cocon oro co cut in xucucun pain ca howa cacapa' ma'. Je ca xirao' mi' roron oro co howa to nanain Laodiceia ta capa' pane.

Ca querec cain ca taramaxicon pe nucun Iri' Jam João

4 Pi' pin iri na ca tomi' capa' ne, noro ac ta' na, querec ac tain na man ca pa xat pain pawin ma'. Tomi' mami' ac capa' na co wara tomi' napa' ma', co an xiho' nain caji taracom ca tomi' nucun ma'. Tomi' ac capa' na: Piri' qui' ra, an hwet mi' ac xim tara pain oro carawa ca maqui' ta' ma' quem, ac i ma' na ca tomi' capa' ma'.

²Ane ane pe ho' mip ac capa' na Tamataracon Iri' Jam. Pe quima hwet ac capa' na ca mam' xao pe ca taramaxicon ma', pain pawin ma'. Querec inon co xao pe pe nain ma'. ³Toc meremem na co xao pe pe nain, awi tamana na ca toc meremem nucun. An xiho' nain ca toc meremem nein pacun ca awi, je jaspe, je sárdio. Morojam' in nain ca mam' xao pe nucun wanaxicon comerem. Awi tamana na, tom mip na, an xiho' nain pacun ca tum awi, esmeralda na wixinain. ⁴To to mam' pin nain ca mam' xao pe nucun oro wirain ca mam' xao pe wa, ma' 24 nana xucucun taramaxicon co xao to nanain quem. To nonon wom co towo', to nanain caji waji' nucun taramaxicon pain winacocon quem. Mam' quep ta pain ouro caji waji' nucucun. ⁵Mija na ca coc wein ca comerem ma', coc wein qui' nain

3.20 Om ca tomi' mi' cain iri' manain xiricocon. Tomi' joc mam' mi' nain ximicocon wari'. Ac ca xat pe cain na manain xiricocon pain iri' ximicocon.

ca mam' xao pe nucun taramaxicon ma'. Toroho mip na comerem quem, mija na. To quima hwet non naran ca wara tom ma', ca ma' 7 ma', ca ac Tamataracon Iri' Jam ma' quem. ⁶Pe quima hwet nain ca mam' xao pe nucun cote ne com ma' quem. Ac ca mam' querec ca jamu wa paxi' na. Awi tamana na, om na homiri, om ca tocohon camain' ne.

To nanain ximijain caram ma' co e' nana ma', co ac jam paxi' nana ma'. Ma' 4 nana. Mija na tococon, to to xam' na tococon pain quimacocon, je pain waracocon. To to mam' pin nanain ca mam' xao pe nucun taramaxicon ma'. Pe nain quimacon xucun, pe nain waracon xucun, pe nain quiricon xucun, pe nain xijein quiricon xucun ma' quem. ⁷Ac leão na xucun. Ac boi na xucun. Ac tocon wari' na tocon xucun. Ac wajo co ho pe pawin na xucun. ⁸Tapaxu nana quem, ma' 6 ma' 6 xam' na tapaxicocon. Mija na tococon pain curucucun je pain tequipain tapaxicocon quem. Com cara nanain tamara' quem, pain xec je pain xim. Om ca maho' camain' cacain ca com wa tamara'. Com mi' ac i ca' nonon Iri' Jam:

Wum co awi tamana ma', co pe ni ca' nain ca caracat wa ta Iri' Jam.

Iri'o' ta, wum co awi tamana ma', co pe ni ca' nain ca caracat wa ta.

Wum co Taramaxicon ne urut ta Iri' Jam.

Hwara' opa pan ma.

Wum co wara ma' pain cara pane, wum co ma' cara cwa',
wum co maqui' ta' ma' quem.

Ac i ma' na ca com mi' cara cocon Iri' Jam caram ma' co e' nana ma', co ac jam paxi' nana ma'.

⁹Caram ma' co e' nana ma', co ac jam paxi' nana ma', com mi' nonon co xao pe pe nain ca mam' xao pe nucun ma', co e' cara ma', co om pi' camain' ca e' nucun ma'. Wum co awi tamana, querec pin' urut pum pain ca awi tamana nem. Tomi' querec te tamana urut pum ta nonon. Com mi' ac i ma' iri nonon ne, ¹⁰pe torotop mi' pan ac cocon na xucucun taramaxicon ma', co ma' 24 nana ma'. Pe torotop mi' querec te nonon co xao pe pe nain ca mam' xao pe nucun ma', co e' cara ma', co om pi' camain' ca e' nucun ma'. An toco' mi' ac cocon na pain caji waji' nucucun. Tomi' ho' tomi' ho' ac cocon na:

¹¹Taramaxicon ne urut pum ta Iri' Jam.

Iri' Jam ne urut pum quem.

Na e' na pain ca tomi' hwet urut pain ca awi tamana nem.

Na e' na pain ca querec pin' urut pum pain ca awi tamana ma ma',
je pain ca hwara' opa tamana ma ma' quem.

Xi om ne ca to' ma' to' ma' pi' pin ara main oro carawa ta.

Je i ma' ca param nem pane.

Je ca ma' ne oro carawa ma' quem.

Ac i ma' na ca tomi' cocon ma'.

Tapari carawa ca joc top ma', wirico co ma' co ac Wijimain Taramaji Ovelha ma' quem

5 Querec ac tain na tapari carawa ca joc top ma', ca an ca co xao pe pe nain ca mam' xao pe nucun ma'. An na pain micon ma', pain iri' curucun ma'. Wara xirao' nain pain quimain je xonein. Mam' hupa' caho' na pain carawa ca ac catocwan' ma' quem. Ma' 7 na ca hupa' caho' nein. Ma' ta pa xica' pe cain co pa rain ta ta' ca' na. ²Querec inon jam co taramaja mi' non Iri' Jam quem. Hwara' opa na. Merem mip ac ca na: Ma' xi wari' co awi tamana ma', co hohot pain ca pa cain ca hupa' caho' nein ma', je pain ca pa pan cain tapari carawa ca joc top ma' quem? Ac i ma' paxi' na ca merem mip ca ma', ³ane om mam' tocwa wari' co hohot pain ca pa cain ne. Pirao' paxi' ta pain pawin ma', je pain macan' ca', je pain ca to pan caca co wara cono' nana ma' quem. Ane om mam' camain' tocwa wari' co hohot pain ca pa cain ne. Om ca mam' tocwa wari' co hohot pain ca noro cain quem. ⁴Aca tamana ac ta' na, xi mam' tocwa wari' co awi tamana, co hohot pain ca pa cain tapari carawa ca joc top ma', je pain ca noro cain quem. ⁵Tomi' ac capa' na wiracon taramaxicon ma', co win ma' ne nonon oro taramaxicon co ma' 24 nana ma'. Am moin' ra. Noro ron co ma' co ac Leão ma', co Taramaxicon hwara' opa ma', co hwanana ne non Judá cara pane. Iri' winacon taramaxicon Davi cara pane. Hwara' opa pan na, xi om ne ca to' quiiji' pin ara con Caxicon Jam pain oro ca om awi wa ta. Na e' na pain ca pa pan cain tapari carawa ca joc top ma', na e' na pain ca pa cain ca hupa' caho' nein ma', ca ma' 7 ma' quem. Ac i ma' na ca tomi' capa' ma'.

⁶Querec ac ton na co ma' co ac Wijimain Taramaji Ovelha ma'. Xat pe nain i ma', pe ja' pan nain ca mam' xao pe nucun taramaxicon ma', pain ximijain ma'. To to mam' pin nonon caram ma' co e' nana ma', co ac jam paxi' nana ma', co ma' 4 nana ma'. To to mam' pin nonon oro taramaxicon

ma' quem. Ac ca wara to' pa' pin tocwa na, ane e' mami' ca ne. Ma' 7 na pixicon, ma' 7 na tocon quem. Oro tocon ma', tomi' joc mam' mi' nain Tamataracon Iri' Jam ca ma' 7 ma' quem, ca mama' mama' xam' jein oro xijein macan' ta pan ca Iri' Jam ma'. ⁷Co ma' co ac Wijimain Taramaji Ovelha ma', xut hwet ac con na iri' Taramaxicon co xao pe pe nain ca mam' xao pe nucun ma', an ca' ac con na pain tapari carawa ca joc top ma'. An ca' non pain micon ma', pain iri' curucun ma'. ⁸An ca' iri non pain ne, pe torotop mi' pan ac cocon na caram ma' co e' nana ma', co ac jam paxi' nana ma', co ma' 4 nana ma'. Pe torotop mi' nonon caram ma' co ma' 24 nana ma' quem. Ma' ma' xam' nonon ca mam' tao' wa, ac violão paxi' na cocon. Ma' ma' xam' nonon too ca mam' quep xine pain ouro ma', ca moin' to pain incenso ma', ca tomi' joc mam' mi' nain ca tomi' nucucun oro wari' nucun Iri' Jam ma', pain ca tomi' cocon ma' quem. ⁹Com ac cacain na xocori tamara':

Wum co awi tamana, wum co hohot pain ca an main
 tapari carawa ca joc top ma',
 je pain ca pa main oro ca hupa' caho' nein ma'.
 Xi om ne ca to' pa' pin ara xima pane ta.
 Cut mi' momon con Iri' Jam oro wari' co xucun wari'
 xucun wari' pi' pin nana ma',
 co capija ni ca' nonon oro xucucun wari' ma',
 co to ni ca' nonon oro xucucun wari' pain macaracocon ma',
 co to nanain oro xijein macan' ma' quem.
 Pain ca cut mi' momon con Iri' Jam ma', mam' to'
 witan momon pain cocum.

¹⁰Wari' ne momon pain ca taramaxicon pe ho' momon.
 Sacerdote je momon pain ca taramaja mi' xine momon.

Taramaxicon to ho' ac cocon tara oro wari' pain oro xijein macan' ta.
 Ac i ma' na xocori tamara' ca com caca ma'.

¹¹Noro ac ta' na, taraju ac toton na oro jam co taramaja mi' nonon Iri' Jam. Mija tamana nana, om ca tomi' ac tococwa, xi mija tamana ara caca ta. Coco' coco' mam' pin nanain ca mam' xao pe nucun iri' Taramaxicon ma', coco' coco' mam' pin nanain caram ma' co e' nana ma', co ac jam paxi' nana ma', coco' coco' mam' pin nanain oro taramaxicon ma' quem.

¹²Com mip ac caca na:

Awi tamana na co ma' co ac Wijimain Taramaji Ovelha
ma', co to' pa' pin wa pane.

Na e' na pain ca querec pin' xun pain ca iri' Taramaxicon ca ma'.

Na e' na pain ca caramaju tamana ca ma'.

Na e' na pain ca querec pin' xun pain ca taxi' tamana ca ma'.

Na e' na pain ca querec pin' xun pain ca hwara' opa tamana
ca ma', je pain ca awi tamana ca ma'.

Na e' na pain ca tomi' hwet xin ca awi tamana nucun.

Na e' na pain ca in ac xun quem.

Ac i ma' na ca com mip nucucun ma'.

¹³Taraju ac tain na ca tomi' wa. Oro carawa ca tomi' ma' pin ca Iri'
Jam ma', oro wari' quem, co to nanain pawin ma', co to nanain macan'
ca', co to nanain ca to pan caca co cono' nana ma', pain tequipain macan'
je pain cote ne com ma', oro carawa ca tomi' ma' pin ca Iri' Jam ma' quem,
tomi' ac caca na:

In ac cara xun iri' Taramaxicon co xao pe pe nain ca
mam' xao pe nucun ma'.

In ac cara xun co ma' co ac Wijimain Taramaji Ovelha ma' quem.

In ac cara xuxun.

Tomi' querec te cara xuxun.

Tomi' hwet cara xin ca awi tamana nucucun.

Querec pin' cara xuxun pain ca iri' Taramaxicon nucucun.

Ac i ma' na ca tomi' nucucun ma'.

¹⁴Amém, iri'o' na ca tomi' nuxut ta ac caca na caram ma' co e' nana ma',
co ac jam paxi' nana ma', co ma' 4 nana ma'. Oro xucucun taramaxicon
co ma' 24 nana ma', pe torotop mi' querec te ac cocon na co ma' co
ac Wijimain Taramaji Ovelha ma', pe torotop mi' querec te nonon Iri'
Taramaxicon co xao pe pe nain ca mam' xao pe nucun quem.

**Ca pa xine oro ca ac catocwan' ca hupa' caho'
nain tapari carawa ca joc top ma'**

6 Querec ac ton na co ma' co ac Wijimain Taramaji Ovelha ma'. Querec
inon pain ca pa cain ca hupa' caho' nein tapari carawa ca joc top ma'.
Ma' 7 na ca hupa' caho' nein ma'. Pa ac cain na ca ma' cain' nein. Taraju ac
ton na win ma' caca co e' nana ma', co ac jam paxi' nana ma'. Tomi' mip

na, ac comerem na ca tomi' nucun. Hap ra ta ac ca na. ²Noro ac ta' na, pe quima hwet ac capa' na cavalo ca towo'. An nain temem' co ma' co xao pe nain. An pe mi' ac tocwa na pain winacon caji waji' nucun taramaxicon. Hwet mao ac ca na, ma' ta to' quiji' pin toton oro co noc nanapa' ta, win ta' pane na.

³Co ma' co ac Wijimain Taramaji Ovelha ma', pa pin ac cain na wirain ca hupa' caho' nein tapari carawa ca joc top ma', ma' 2 pin ac ne na ca pa nein. Pa pin iri nain ne, taraju ac ton na wiracocon co e' nana ma', co ac jam paxi' nana ma'. Hap ra ta ac ca na quem. ⁴Hwet qui' ac ne na wirain cavalo ma'. Paca' na. Co ma' co xao pe nain ma', mi' ac tocwa na pain ca hwara' opa wa, tomi' pan ac tocwa na: Ja' teretem pin roron oro wari' pain oro xijein macan' ma', ma' ta mana' xucucun, ma' ta mixita xucucun, ma' ta to' parapa' xucucun ta na ca tomi' tocwa ma'. Mi' ac tocwa na pain cote ne quit quem.

⁵Co ma' co ac Wijimain Taramaji Ovelha ma', pa pin ac cain na wirain ca hupa' caho' nein tapari carawa ca joc top ma', ma' 3 pin ac ne na ca pa nein. Pa pin iri nain ne, taraju ac ton na wiracocon co e' nana ma', co ac jam paxi' nana ma'. Hap ra ta ac ca na quem. Noro ac ta' na, pe quima hwet ac capa' na cavalo ca mixem. Co ma' co xao pe nain ma', an nain arain too ca mam' querec pin' xine ca xite nein carawa. An nain pain micon. ⁶Taraju ac ta' na, ac ca tomi' nucun wari' paxi' na ca taraju ta'. Maqui' nain ximijacocon caram ma' co e' nana ma', co ac jam paxi' nana ma', co ma' 4 nana ma'. Tomi' ac ne na: Mija pin tara dinheiro nein oro carawa ca cao' wa. Co ma' non ca xica' pe ne denário ma', om ta cut homa cain carawa ca cao' wa. Am an xica' pe tain ca quilo nein trigo, am cut 3 e' tain ca quilo nein cevada ma', ac i ma' e' tara carawa ca cut ta' ca pain ca xica' pe nein denário. Ta to' em' main oro panaji oliva je oro macori winain uva me ta, ac i ma' na ca taraju ta' ma'.

⁷Co ma' co ac Wijimain Taramaji Ovelha ma', pa pin ac cain na wirain ca hupa' caho' nein tapari carawa ca joc top ma', ma' 4 pin ac ne na ca

6.6 Denário na wixinain dinheiro nucucun oro romano pain cara pane. Wari' co taramaja mi' non xucun wari' ma', pain ca taramaja qui' cain iri' xo' xec, taramaja taramaja irawin pa' ac con na pain ca taramaja nucun ma', an xica' pe ac cain na denário pain ca taramaja nucun. **6.6** Pe' tamana tatara oro wari' pain oro xijein macan', xi om ne ca to' em' pin xin xine oro trigo je cevada ca oin' xi' caca ta. Wari' co an tain nain, om ta mam' cain, iri' wijimain e' tara oro trigo je cevada ca cut xi' caca. Xica' to tara oro panaji oliva je oro macori winain uva ca om to' em' xin xine.

pa nein. Pa pin iri nain ne, taraju ac ton na wiracocon co e' nana ma', co ac jam paxi' nana ma'. Hap ra ta ac ca na quem. ⁸Noro ac ta' na, pe quima hwet ac capa' na cavalo ca coxic. Ma' na wixicon co ma' co xao pe nain. To' Cono' Wari' na wixicon. Ma' na xucun co ja' ja' non ma'. Ma' na wixicon co ma' quem, Maxicocon Co Cono', ac i ma' na wixicon. Mi' ac tococwa na ca hwara' opa wa quem. Tomi' ac tococwa na: To' parapa' um quarto pin jujun oro wari' pain oro xijein macan' ma'. Mi' jujun pain ca mixita caracan xucucun. Mi' jujun pain ca pe' tamana wa, mi' jujun pain oro ca xirac wa. Mi' jujun pain oro caji carawa ca mana' tamana quem, ac i ma' tara ca to' parapa' pin tococwa ta. Ac i ma' na ca tomi' tococwa ma'.

⁹Co ma' co ac Wijimain Taramaji Ovelha ma', pa pin ac cain na wirain ca hupa' caho' nein tapari carawa ca joc top ma', ma' 5 pin ac ne na ca pa nein. Pa pin iri nain ne, querec ac tain na tamataracocon co to' parapa' pin wawa pain ca howa cacain capijacon Iri' Jam, je pain ca tomi' hwet cocon con Jeju oro wari' ma'. To nanain xiquijnain maxinain ca tomi' querec te pe tocwa Iri' Jam. ¹⁰Merem mip ca' nana: Cain' cain' ta' ma ma' quem Iri' Taramaxicon co iri'o' ma', co awi tamana pain ca pe ni ca' main ca caracat wa ma'? Cain' cain' ta' ma ma' quem? Je xi wap hap momon oro wari' co to nanain oro xijein macan' quem? Em' hwe, mama' jein cote ne xe ta ximomon quem? Win ne ca to' parapa' pin cacaparut pane, ac i ma' na ca merem mip cocon ma'. ¹¹Mi' mi' xam' ac tococwa na con wom co towo'. Ame cain' hwe e', ma' ma' wet ara xi' nana oro xuruhu' co win howa hwe ma', co taramaja wi nunuhu' pain ca taramaja mi' mahu' ma'. Xam' cain' tatara pain ca to' parapa' pin xun wawa, win xihwe ma', ac i ma' na ca tomi' tococwa ma'.

¹²Querec ac ton na co ma' co ac Wijimain Taramaji Ovelha ma', pain ca pa cain wirain ca hupa' caho' nein tapari carawa ca joc top ma', ma' 6 pin ac ne na ca pa nein. Pa pin iri nain ne, cocoroc mip ac ne na macan'. Mixem pin ac ne na tocon xina. Iri' mixem na, win ca wom co mixem mip ma', ac i ma' na ca mixem pin ne tocon xina. Paca' pin ac ca na panawo'. Win ne wic pain ca paca' nein ma' quem, ac i ma' na ca paca' pin ca panawo'. ¹³Camara' qui' ac cain na pawin oro pijo'. Win ne ca camara' ne orowaji memem pain ca nuru mip ne camana' ma', ac i ma' na ca camara'

6.8 Ac i ca' na ca taraju pa' xine um quarto: Pain ca ma' 40 caca wari', to' parapa' 10 ac tococwa tara. Pain ca ma' 400 caca, to' parapa' 100 ac tococwa tara. Pain ca ma' 4.000 caca ma' iri na ne, to' parapa' 1.000 ac tococwa tara quem.

hwet cain macan' oro pijo'. ¹⁴Ane ane om pin ac ne na nanawin ma'. Win ne tapari carawa pain ca joc top in xine ma', ac i ma' pin na nanawin pain ca ane ane om pin ne ma'. Oro pacun je oro xixi pan ne macan' ma', cut in pin ac xijein na pain oro maxinain quem.

¹⁵Jin' tamana ac caca na oro wari', xaraxa mama' xi' ta ac caca na quem. Oro taramaxicon co taramaxicon to nanain oro xijein macan' ma', oro xucucun taramaxicon ma' quem, oro comandante nucucun oro soldado ma', oro wari' co caramaju nana ma', oro co hwarar' opa paxi' nana ma', xam' nana oro wari'. Co taramaja mi' e' nonon xucun wari' ma', co om taramaja mi' e' nonon xucun wari' ma' quem, xaraxa mama' xaraxa mama' pi' pin ac cacain na oro manain pacun. Mo corom to nanain xiquiji cote ne pacun ma' quem. ¹⁶Merem ac cacain oro pacun na: Camara' hwet xut ta pacun! Tequi' pa' xut, ma' ta om querec caparut co cwain co xao pe pe nain ca mam' xao pe nucun cwain. Narain ho' xut pain ca mana' nucun co cwain co ac Wijimain Taramaji Ovelha cwain. ¹⁷Xi maqui' pin ara xi' ne xec nein ca wap xim cacapari'. Om na wari' co witan ca' nain ca wap wa ta na ca merem nucucun.

Ca xirao' tococwa pain jitaracocon oro wari' nucun Iri' Jam

7 Pa 6 pin iri ta ca hupa' caho' nein tapari carawa ca joc top ma' ne, querec ac toton na oro jam co taramaja mi' nonon Iri' Jam. Ma' 4 nana. Coco' to nanain oro cacarain macan'. Pe nain ca maqui' ac ca xina xucun, pe nain ca corom mao ac ca xucun, pe nain xijein quiricon xucun, pe nain xijein quiricon xucun ma' quem. Quep xat caho' nanain hotowa. Ma' ta om nuru pa' nein macan' je oro cote ne com je oro pana ta nanain. ²Querec ac ton na xucun jam co taramaja mi' non Iri' Jam. Piri' ca' nain ca maqui' ac ca xina. An nain ca mam' xirao' nucun Iri' Jam co e' cara. Merem mip ac ca na, merem mip tata oro jam co taramaja mi' nonon Iri' Jam ma', co ma' 4 nana ma', co to' em' jein macan' je oro cote ne com je oro pana ta wawa ma'. ³Ame hwe e', ta to' em' querec hwein macan' pain oro cote ne com pain oro pana me ta ac tococwa na. Xirao' cain' xut pain jitaracocon oro co taramaja mi' nonon Iri' Jam nexi' cwa', to' em' pin ac hwein tara macan' je oro cote ne com je oro pana ta ac tococwa na. ⁴Taraju ac ton na co tomi' hwet nain ca mija nucucun ma', co xirao' wawa pain ca mam'

xirao' nucun Iri' Jam pain jitaracocon ma'. Ma' 144.000 nana ta na. Wari' nucucun oro waram winacon Israel pi' pin nana ta na.

⁵Ma' 12.000 nana waram winacon Judá.

Ma' 12.000 nana waram winacon Rúben.

Ma' 12.000 nana waram winacon Gade.

⁶Ma' 12.000 nana waram winacon Aser.

Ma' 12.000 nana waram winacon Naftali.

Ma' 12.000 nana waram winacon Manassés.

⁷Ma' 12.000 nana waram winacon Simeão.

Ma' 12.000 nana waram winacon Levi.

Ma' 12.000 nana waram winacon Issacar.

⁸Ma' 12.000 nana waram winacon Zebulom.

Ma' 12.000 nana waram winacon José.

Ma' 12.000 nana waram winacon Benjamim.

Ac i ma' nana oro waram winacon Israel co xirao' wawa pain ca mam' xirao' nucun Iri' Jam pain jitaracocon ma'.

Oro wari' co to nonon wom co towo'

⁹Xirao' pin iri tata pain jitaracocon oro waram winacon Israel ne, noro ac ta' na, querec ac toton na oro wari' pain ca cut in tamana nucucun. Mija nana wari' ta, om ca tomi' ac tococwa, xi paric caca ta. Maqui' nanain oro xijein macan'. Xucun wari' xucun wari' pi' pin nana, to ni ca' nonon oro xucucun wari' pain macaracocon, capija ni ca' xucucun quem. Coco' quima hwet nanain ca mam' xao pe pe ca Iri' Jam co Iri' Taramaxicon ma', coco' quima hwet nonon co ma' co ac Wijimain Taramaji Ovelha ma' quem. To nonon wom co towo', cut nanain tahot pain micocon quem.

¹⁰Merem mip ac caca na:

Tomí' querec te xun Iri' Jam nexi' cwa', co xao pe pe
nain ca mam' xao pe nucun ma',

Tomí' querec te xun co ma' co ac Wijimain Taramaji
Ovelha ma' quem.

Wiricoco nana co to' witan nanapari' ta.

Ac i ma' na ca merem mip caca ma'.

¹¹Oro jam co taramaja mi' nonon Iri' Jam ma', coco' coco' mam' pin nonon pain ca mam' xao pe pe ca ma'. Coco' coco' mam' pin nonon xucucun

taramaxicon ma', coco' coco' mam' pin nonon caram ma' co e' nana ma', co ac jam paxi' nana ma', co ma' 4 nana ma'. Pe torotop mi' ac cacain na ca mam' xao pe nucun ma', ca camara' tucu hwet mi' ac cacain na macan' ma', pe torotop mi' querec te ac cocon na Iri' Jam ma' quem. ¹² Tomi' ac caca na:

Amém, iri'o' na ca tomi' urut pum ca'.

Wum co Iri' Jam ne urut cwa'.

In ac cara xim urut pum.

Tomi' hwet cara xim urut pain ca awi tamana nem.

Querec pin' cara xim urut pum pain ca taxi' tamana ma ma'.

Tomi' querec te cara xim urut pum pain oro ca ara mi' maparut ca'.

Querec pin' cara xim urut pum pain ca awi tamana nem
ma', je pain ca Iri' Taramaxicon ma ma', je pain
ca hwará' opa tamana ma ma' quem.

Amém, iri'o' na ca tomi' urut pum ca'!

Ac i ma' na ca tomi' caca ma'.

¹³ Tomi' ac capa' na co ma' co win ma' ne nonon oro taramaxicon ma', co ma' 24 nana ma'. Cain' ca wari' caca caram cwa' co to nonon wom co towo' cwa'? Main ca maqui' caca quem? Ac i ma' na ca tomi' capa'.

¹⁴ Om ca taxi' toton ta taramaxicon. Tomi' hwet ne cocon ac ton na.

Tomi' hwet ac capa' na: Wiricoco co jain jain tamana nana pain oro cawaxi' pain ca quep em' tamana tococwa pain ca howa cocon Jeju pane. Hohoc hohoc towo' pin nonon womicocon pain quicon co ma' co ac Wijimain Taramaji Ovelha ma'. ¹⁵ Je ca coco' quima hwet cacain ca mam' xao pe ca Iri' Jam ma' ac capa' na. In ac to nonon pain xiricon ma', pe torotop mi' querec te nonon pain xec, je pain xim quem. Co ma' co xao pe pe nain ca mam' xao pe nucun ma', pe ho' cara totoron, querec wet cara totoron quem. ¹⁶ Om ta pe' mami' caca, om ta toc xi' com mami' caca quem. Om ta jam' cocon xina, om ta xain camain' cocon xina. ¹⁷ Xi om ne ca querec wet xo' toton ara cocon co ma' co ac Wijimain Taramaji Ovelha ma', co pe ja' pan nain ca mam' xao pe ca Iri' Jam ma'. O mama' ac tococwa tara pain ca hoi hoi ne com ca mi' nain ca e' cara wa. Xiram pa'

7.14 Pain ca hohoc hohoc towo' pin cocon womicocon pain quicon co ma' co ac Wijimain Taramaji Ovelha ma', tomi' mi' nain ca howa cocon Jeju pane. Howa nonon pain ca mi' pin caho' tococwa pain pana, je pain ca ao mi' tococwa pain quicon, je pain ca xic am pin tococwa pain ca caracat nucucun pane.

totoron Iri' Jam quem, xic cawain' xic cawain' pi' pin tarain comi tococon pain ca awaran nucucun ma'. Ac i ma' na ca tomi' capa' ma'.

Ca pa xine tawirinain ca hupa' caho' nein tapari carawa ca joc top ma'

8 Pa pin iri ta tawirinain ca ac catocwan' ca hupa' caho' nein tapari carawa ca joc top ma' ne, ma' 7 pin ac ne na ca pa nein. Tacana to pin ac caca na oro co to nanain pawin. Tacana to tacana to pi' pin nana, om ca tomi' camain' caca. Ac ca ma' 30 ne na minuto nein ca om tomi' camain' caca ma'.

²Querec ac toton na oro jam co taramaja mi' nonon Iri' Jam ma', pain ca coco' quima hwet cocon ma'. Ma' 7 nana. Mi' mi' xam' ac tococwa na pain caji taracom.

³Querec ac ton na xucun jam co taramaja mi' non Iri' Jam. An nain ouro ca mam' tom pe xine incenso ma'. Xut hwet ac cain na pana ca in ac pe tocwa Iri' Jam. Pe ja' pan nain. Cut mi' moin' pin ac tocwa na pain incenso. Moin' tamana na. Tomi' ac tocwa na: Tomi' xim iri tatarapa' oro wari' ne ne, win tom pe ac main tara incenso pain pana ca tom tain' pe xine ma', ca mam' toto pa' xine pain ouro ma', ca pe quima hwet nain ca mam' xao pe ne ca', ac i ma' na ca tomi' tocwa ma'. ⁴Tom pin iri nain incenso jam co taramaja mi' non Iri' Jam ma' ne, piri' hwet ac con Iri' Jam na tajain. Piri' hwet wi nain ca tomi' nucucun oro wari' nucun ma' quem. ⁵An ac cain na too ca mam' tom pe xine waraqui pana ma', cut ho' moin' ac cain na pain tirijein xe ca to nain pana ca in ac pe tocwa Iri' Jam, wixicaracao' camara' mi' ac cain na pain macan' ma' quem. Toroho mip ac ca na comerem, mija na. Coc irija' ac ca na, cocoroc ac ne na macan' quem.

Ca on xine oro caji taracom

⁶Coco' xo' ac caca na oro jam co taramaja mi' nonon Iri' Jam ma', co ma' 7 nana ma', co cut nanain caji taracom ma'. On xin ac cacain na.

⁷Xucun ma', co on cain' ta' ma', on ac cain na. On iri nain ne, wixicaracao' camara' mi' ac xine na pain macan' caji pacun nein xowi'. Wixicaracao'

camara' mi' ta pain macan' xe ca joc wanan xine pain wic quem. Wiran um terço pin ac xine na macan', je oro pana, je oro tononoin ma'.

⁸ On ac cain na caji taracom nucun xucun ma', co ja' corom mao non ma', ma' 2 pin ac caca na jam co on nanain ma'. On iri nain ne, ma' ac ne na carawa ca xin pocom mi' wa pain cote ne com. Ac iri' cote ne pacun ca mao tamana pawin na. Wiran na. Wic um terço pin ac ne na cote ne com ma' quem. ⁹ Cono' um terço pin na oro carawa ca to nain com, pa caracat um terço pin ac xine na oro mam' horoho wa ma' quem.

¹⁰ On ac cain na caji taracom nucun xucun ma', co ja' corom mao non ma', ma' 3 pin ac caca na jam co on nanain ma'. On iri nain ne, pan' qui' ac cain pawin na cote ca pijo'. Weo tamana na xe nucun. Pan' mao um terço pin nain oro iri' cwerein com je oro ca hoi hoi ne com ma' quem.

¹¹ Ma' na ca o' ma' tocwa, To' Wijein' na wixicon. Wijein' um terço pin ac ne na oro com ma'. Mija ac caca na oro wari' co cono' nana quem, xi toc ara cacain ca wijein' nein com ta.

¹² On ac cain na caji taracom nucun xucun ma', co ja' corom mao non ma', ma' 4 pin ac caca na jam co on nanain ma'. On iri nain ne, to' em' um terço pin ac tocwa na xina con panawo' con oro pijo'. Mixem um terço pin na xina pain xec, mixem um terço pin na panawo' con pijo' pain xim quem.

¹³ Noro noro wet inain, taraju ac ton na wajo co ho pe pawin. Tomi' mip ac ca na: Ximin tamana tataro oro wari' ta. On iri tatarain caji taracom oro xucucun jam co taramaja mi' nonon Iri' Jam ma' ne, co ma' 3 nana ma', co om on querec nanain caji taracom nucucun ma', ximin tamana ac caca tara oro wari' co to nanain macan' ma', pain ca maqui' pa' toton cocon carawa ca om awi. Wa inonon me, wa inonon me, wa inonon me, ac i ma' na ca tomi' mip ca ma'.

9 On ac cain na caji taracom nucun xucun ma', co ja' corom mao non ma', ma' 5 pin ac caca na jam co on nanain ma'. On iri nain ne, querec ac ton na co ma' co ac pijo' ma', co wara pan' hwet nain macan'. Mi' ac

8.7 Ac i ca' na ca taraju pa' xine um terço: Tomi' xin ca wiran xine pana. Pain ca ma' 30 ne pana ma', wiran 10 ac xine tara. Pain ca ma' 300 ne ma', wiran 100 ac xine tara. Pain ca ma' 3.000 ne ma' iri na ne, wiran 1.000 ac xine tara quem. **9.1** Oro co taraju pa' nanain capiacaon Iri' Jam ma', om ca an an ari xijein ca taraju pa' nucucun con pijo' co pan' hwet nain macan'. Am jam co taramaja mi' non Iri' Jam ta na ca taraju pa' nucucun oro xucucun ma'. Oro xucucun ma' iri nana ne, am jam co taramaja mi' non Caxicon Jam ta ac ne na ca taraju pa' nucucun.

tocwa na pain ca mam' pa xine capijain cote ne man ca om tawirinain. ²Pa pin iri nain ne, hwet qui' ac ne na tain'. Mija na tain', ac tajain iri' cote ne xe na. Mixem pin ac ne na tocon xina je pawin ma'. Xi mija ara ne tain' ca hwet qui' nain cote ne man ca om tawirinain cain ta. ³Hwrehwet qui' ac cain tain' na caxicon can ma'. Toin wawaran mama' ac cain na oro xijein macan'. Mi' ac tocwa na pain ca tan caxi wa quem. Ac ca tan tan qui' capari' cun cwa' na ca tan nucun. ⁴Tomi' ac tocwa na: Ta cao' main oro tononoin je pana je oro ca oin' ximama' wa me. Tan caxi e' roron oro wari' co om xirao' wawa pain jitaracocon pain ca mam' xirao' nucun Iri' Jam ta. ⁵Ta to' parapa' momon me ta ac tocwa na. Tan caxi e' roron, caxi tamana tatara pum. Ma' 5 tara panawo' pain ca to' caxi momon ta na ca tomi' tocwa oro caxicon can ma'. Tan iri tata oro wari' ne, caxi tamana ac caca na. Ac ca caxi caxi qui' ca cun na pain ca caxi cocon ma'. ⁶Pain oro xec pain ca tan caxi xun tococwa oro wari' ma', jain jain tamana tatara. Cono' xixi' na paxi' tatara, om ta ha' cocon ca cono' wa. Param tamana paxi' tatarain ca cono' wa, om ta ha' cocon ta.

⁷Oro caxicon can ma', an xiho' nain cavalo ca wara awori xo' ma', pain ca mixita xi' caca oro waximain ma'. Ma' non carawa pain winacon ma', ac caji waji' nucun taramaxicon na, ca mam' toto pa' xine pain ouro ma'. Ac tocon wari' na tocon ma' quem. ⁸Quiji' non xun quem, ac tenenequem narima' na. Ac xicon leão na xicon ma' quem. ⁹Ma' na carawa pain quimacon ma', ac tocoxicon paxi' na, ac arain too na con. Pe caho' nain quimacon. Awaran iri na tapaxicon ne, ac ca iriman iriman ne ca mija ne cavalo pain ca cuc nein oro carroça ma', pain ca mixita xi' caca oro waximain ma', ac i ma' na ca iriman ne tapaxicon. ¹⁰Ma' na cahurucun, ma' na xiquinacon quem, ac xiquinacon cun na. Je xiquinacon ca mam' to' jain jain tamana xun tococwa oro wari' ma', pain ca tan caxi xun tococwa ma'. Ma' 5 tara panawo' pain ca to' jain jain tamana xun tococwa. ¹¹Ma' na caxicon jam co taramaxicon pe ho' non quem, wirico caxicon jam co taramaxicon pe nain cote ne man ca om tawirinain. Abadom na wixicon pain hebraico ma', je i ma' wixinain capijacocon oro judeu. Pain capijacocon oro grego ma' iri na ne, Apoliom na wixicon.

¹²Je i ma' carawa ca om awi ca hwet pa' cain' nonon oro wari' pain macan' ca', pain ca to' ximin tamana cain' cocon ma'. Ame hwe e', ma' 2 ma' 2 wet na carawa ca om awi ca hwet pa' ton nonon quem.

¹³On ac cain na caji taracom nucun xucun ma', co ja' corom mao non ma', ma' 6 pin ac caca na jam co on nanain ma'. On iri nain ne, taraju ac tain na ca tomi' wa ma', ca maqui' nain ca puxu xirac nein pana ca tom tain' pe xine waraqui pana ca hu awi ma', ca mam' quep xine pain ouro ma', ca pe quima hwet non Iri' Jam ma'. ¹⁴Tomi' ac tocwa na jam co xo' on nain caji taracom ma': Tacom' horohot pin roron oro jam co ma' 4 nana ma', co pao' to ja' pan wawa pain cacarain cote ne iri' cwerein com ma', ca Eufrates ne wixinain ma'. Ac i ma' na ca tomi' nucun ca maqui' nain ca puxu xirac nein pana ma'. ¹⁵Tacom' horohot pin ac tococwa na. Wara awori xo' nana, xi om ne ca wara an pe xo' pan ara cain ca coromicat nucun Iri' Jam pane ta. Wara an pe xo' nain jamicon xina pain xec con panawo' pain cawaxi' ma' quem, pain ca to' parapa' um terço pin xun tococwa oro wari' ma'. ¹⁶Mija nana oro soldado nucucun quem. Ma' 200 milhões nana ta, ac i ma' na ca taraju ta' pain ca tomi' hwet cain ca mija nucucun ma'.

¹⁷Querec inonon pain ca tohwein' ne ca', querec inain oro cavalo nucucun, querec inonon co xao to nanain quem. Oro arain too ca to caho' nain quimacocon ma', paca' na, ac ca paca' nein xe na. Tum na, ac ca tum nein pacun ca awi ma' na, ca safira caca oro wari' ma'. Coxic na quem, ac ca coxic nein pacun ca weo ma' na, ca enxofre caca quem. Ac winacon leão na winain cavalo nucucun ma'. Hwerehwet qui' nain capijain xe je tain' je pacun ca weo ma' quem. ¹⁸To' parapa' um terço pin ac tococwa na oro wari'. Mam' to' parapa' tata pain oro ca xirac wa ca ma' 3 ma', ca hwerehwet qui' nain capijain cavalo ma', je tain' pain xe pain pacun ca weo ma'. ¹⁹Pe ho' ara xi' nain capijain ca hwara' opa nein ma', pe ho' nain cahwerein ma' quem. Ac caxicon em' na cahwerein, ac winacon em' na pain tamain quem. Je ca mam' quep em' tococwa oro wari'.

²⁰Oro xucucun wari' co om to' parapa' wawa pain oro ca xirac wa ma', witan ca' paxi' nanain, ane om cwirin' pin cacain oro ca pan teretem nucucun ne. Om ca pe torotop mi' querec te maho' cocon oro caxicon jam, om ca pe torotop mi' querec te maho' cacain oro ca Iri' Jam xi' ma caca ma' quem, ca mam' quep pan caca pain ouro je bronze je pana je pacun ma' quem. Om paxi' na ca querec ac ne, om paxi' na ca taraju ac ne, om paxi' na ca xuruxut ac ne quem, ane pe torotop mi' querec te cara cacain ne. ²¹Om ca cwirin' cacain oro ca ara caca ma', pain ca to' parapa' cocon oro

wari', je pain ca ara xirac cocon, je pain oro ca quep ximama' xucucun, je pain ca an noc xa cacain caramaxicocon oro win ma' caca quem. Om ca cwirin' camain' caca ta.

**Jam co taramaja mi' non Iri' Jam ma', co an nain
wijimain tapari carawa ca joc top ma'**

10 Querec ac ton na xucun jam co taramaja mi' non Iri' Jam. Hwara' opa na. Quiji' qui' nain pawin. Wiric pa' non tajain nanawin, ac wom na con. Ma' na wanaxicon comerem pain winacon ma', pain tamacon. Ac xina na tocon. Ac xipain xirim ca tom ma' na aracon ma' quem. ²Pain micon ma', an nain wijimain tapari carawa ca joc top ira. Wara pa na. Xijein caximacon pain iri' curucun ma', xin cam pe nain cote ne com. Xijein caximacon pain paraxicon ma' iri na ne, xom pe nain macan'. ³Merem mip ac ca na, ac ca xum mip ca leão na pain ca merem mip ca ma'. Merem iri na ne, toroho mip ac ca na comerem. Ma' ⁷ na ca mana' nucun. Ac ca tomi' ca na pain ca mana' nucun ⁴Toroho mip iri na comerem ne, xirao' tain paxi' inain ca tomi' nucun ira. Ane taraju tain ca tomi' wa ca maqui' nain pawin ne. Joc xim rain ca tomi' ca comerem cwa', ta tomi' hwet main me. Ta xirao' main me ta ac capa' na.

⁵An piri' ac cain na micon jam co taramaja mi' non Iri' Jam ma', co querec ta' pain ca xin cam pe cain cote ne com je pain ca xom pe cain macan' ma' quem. An piri' nain micon pain iri' curucun. ⁶Om ta winim' mami' ca Iri' Jam ta ac ca na. Iri'o' na ca tomi' ne ca', wara an pe xo' nain ca coromicat nucun Iri' Jam co e' cara cwa', co tomi' ma' pin nain pawin je macan' je cote ne com je oro carawa ca to nain quem. Om ta winim' mami' ca. ⁷On tain caji taracom ta iri tara jam co taramaja mi' non ne, co ja' corom mao nonon win ma' ca ma', pain ca ma' ⁷ pin ta' nucun ma'. On tain iri tarain ne, ara pin ac cain tara ca param nucun Iri' Jam. Ara tarain carawa ca ara ta' ca pane, ca om an hwet querec ca pane ira. Win ne ca wara tomi' an pe mi' tococwa pain ca tomi' nucun oro profeta cocon co taramaja mi' nonon pain cara pane.

⁸Tomi' mami' ac capa' na co wara tomi' napa' ma', co tomi' qui' nain pawin ma'. Hwet ron jam co taramaja mi' non Iri' Jam ma', co xin cam pe nain cote ne com, co xom pe nain macan' ma'. An rain wijimain tapari

carawa ca joc top ira, ca an ca pain micon ma', ca wara pa ma', ac i ma' na ca tomi' capa' ma'.

⁹Hwet ac ton na, mi' ne pain wijimain tapari carawa ma' ac ton na. Ma, an rain, cao' pin rain ta ac capa' na. Wita cain' terem pain capijam ma', ac tawi terem. Pain pemenem ma' iri tara ne, wijein' ac quem tara ta. Ac i ma' na ca tomi' capa' ma'.

¹⁰An ca' ac ton pain na, cao' ac tain na. Wita cain' napa' pain capija. Cao' pin iri inain ne, wijein' pin ac capa' na pain pemene. ¹¹Tomi' ac capa' na: Tomi' hwet mami' rain carawa ca hwet pa' ton nonon oro wari' cocon oro taramaxicon pain oro xijein macan' ma', wiricoco co to ni ca' nonon oro xucucun wari' pain macaracocon ma', co to nanain oro xijein macan' ma', wiricoco co capija ni ca' xucucun ma' quem. Tomi' hwet mami' roron pain carawa ca hwet pa' ton nonon ta, ac i ma' na ca tomi' capa' ma'.

Ca ma' 2 caca co tomi' hwet nanain ca ara ta' ca Iri' Jam

11 Mi' ac capa' na pain taparain pana ca mam' tacan wa ma', ac pana ca mam' xut wa na. Tomi' ac capa' na: Tacan rain cote ne xiricon Iri' Jam ma', tacan rain pana ca tom tain' pe xine carawa ma' quem. Tomi' rain ca mija nucucun oro co to nanain quem, co pe torotop mi' querec te nanapa' pain ca in ac cacapa' ma'. ²Miri'om rain ca tao' caho' nein ma', ta tacan main me. Xi mi' ara tococwa pain oro xucucun wari' co om judeu nana ta. Ma' 42 tara panawo' pain ca to' em' xin cacain cidade ne ca', je Jerusalém ca'. ³Ma' 2 tatara wari' ne co pijim' xin nanain capija ca iri'o'. To totoron caxicon wom, ma' ta querec pin' cacapari' pain ca tomi' xaxa' nexi' pain ca caracat nucucun oro wari' ta tatara. Pijim' hwet ac cacain tara capija. Ma' 1.260 tara xec pain ca pijim' nucucun. Ac i ma' na ca tomi' capa' ma'.

⁴Caram ma' co pijim' hwet nanain capijacon Iri' Jam ma', tomi' joc mam' mi' nanain panaji oliva ca ma' 2 ma', je oro ca mam' tom pe ne naran ca ma' 2 ma' quem. To quima hwet nonon iri' Taramaxicon co taramaxicon pe ho' nonon oro wari' pain oro xijein macan'. ⁵Mo ta quep em' toton ca wari' ma', hwerehwet qui' ac nein capijacocon tara xe, to' om pin ac tocwa tara. Cono' ac i ma' tatara oro wari' co noc nonon ma',

11.4 Ac ca tomi' mi' cain na panaji oliva je oro ca mam' tom pe ne naran ca querec ca profeta Zacarias pain cara pane, pain ca ac ca tohwein' ca ne pane.

co quep em' xun nonon ma'. ⁶Caram ma' co pijim' hwet nanain capiiacon Iri' Jam ma', mi' ac tococwa na pain ca hwara' opa wa pain oro xec nein ca pijim' caca. Ha' nonon pain ca tac caho' cacain xowi', je pain ca to' wic pin cacain com, je pain ca mam' to' em' pin cacain macan' je carawa pain oro ca xirac wa. Ara xin iri tatarain ne, ara ara ac cacain tara.

⁷Pijim' hwet pi' pin iri tatarain oro ca pijim' je tococwa ne, hwet qui' ac ca tara co ma' co ac caji carawa ca mana' tamana, hwet qui' tarain cote ne man ca om tawirinain cain. Quep toton ta ac tococwa tara, to' quiji' pin ac tococwa tara, to' parapa' pin ac tococwa tara quem. ⁸To wet iri caca ma' ac tococwa tara pain wana ca xuruxut ac caca oro wari' pain ximijain cote ne cidade ma', pain Jerusalém ma', ca tatatain pe tocwa pain pana Taramaxicon nexi' co taramaja mi' caca ma'. Ma' na ca wuxu ni mao ne Jerusalém ma' quem. Sodoma, je Egitto, ac i ma' na ca wuxu ni mao ne ma'. Tomi' joc mam' mi' ara xi' tata oro wari' nein pain ca caracat tamana nucucun ta. ⁹Querec querec xam' totoron oro wari' co to ni ca' nonon oro xucucun wari' pain macaracocon ma', co xucun wari' xucun wari' pi' pin nana ma', co capiia ni ca' xucucun ma', co maqui' nanain oro xijein macan' ma' quem, querec querec xam' tatarain curucucun co to' parapa' wawa ma'. Ma' 3 tara xec pain ca querec e' cacain curucucun. Tocon xina pain xijein xec pa' totoron quem, querec e' tatarain curucucun. Narain ho' ac tococwa tara oro wari' pain ca tequi' pa' cocon quem. ¹⁰Tomi' querec te tamana tatara oro wari' co to nanain oro xijein macan' ma', tomi' querec te tamana tatara pain ca cono' pin nucucun. Tomi' querec te xi' e', xi om ne ca cono' pin ara caca caram ma' co to' jain jain nanapari' pain ca to xin oro xijein macan' ta tatara, mi' querec te caracan ac xucucun tara pain oro carawa quem.

¹¹Ma' 3 pin iri na xec pain ca to' parapa' pin tococwa ne, je pain ca tocon xina pa' pin tococwa pain xijein xec quem, huco' mi' pan ac cocon na pain iri' ca e' nucun Iri' Jam. Tequi' to pin ac caca na, jin' tamana ac caca na oro wari' co querec nonon pain ca tequi' to pin nucucun. Om ca jin' pije' camain' caca. ¹²Caram ma' co tequi' to pin nana ma', taraju ac cacain na ca tomi' wa ca maqui' nain pawin. Tomi' mip tata. Piri' qui' je ta ac tococwa na, piri' mama' ac cacain na pawin pain tajain nanawin ma'. Oro wari' co noc nonon ma', ja' noro nonon pain ca piri' mama' nucucun.

¹³Piri' mama' iri nana ne, cocoroc mip ac ne na macan'. Jao horohot um décimo pin ac ne na oro xirim ma', pain Jerusalém ma'. Cono' 7.000 ac caca na oro wari' quem. Co witan ca' nanain ma', jin' tamana ac caca na, in ac tamana ac cocon na Iri' Jam co pe pawin ma' quem.

¹⁴Je ca ma' 2 pin ne carawa ca om awi ca hwet pa' mami' nonon oro wari' pain macan' ca', pain ca to' ximin tamana mami' cocon ma'. Ame hwe e', ma' ma' wet na wirain carawa ca om awi ca hwet pa' ton nonon quem.

**Ca on mami' xine caji taracom ma', pain
ca ma' 7 pin caca co on nanain ma'**

¹⁵On ac cain na caji taracom xucun jam co taramaja mi' non Iri' Jam, ma' 7 pin ac caca na co on nanain ma'. On iri nain ne, taraju ac toton na co tomi' mip to nanain pawin ma'. Tomi' ac i ca' nana:

Taramaxicon pin na Iri' Jam co Taramaxicon ne iri' cwa'.

Taramaxicon pin na Cristo co tora' pan ca quem.

Wirico Iri' Jam na co taramaxicon pe ho' taramaxicon pe ho' pi' pin toton nonon oro wari' pain oro xijein macan'.

Taramaxicon cara tara quem.

Ac i ma' na ca tomi' mip caca ma'.

¹⁶Xucucun taramaxicon co ma' 24 nana ma', to quima hwet nonon Iri' Jam pain ca xao to to cacain ca mam' xao to nucucun ma', pe torotop mi' ac cocon na Iri' Jam. Camara' tucu hwet mi' nanain macan' ma', pe torotop mi' querec te ac cocon na quem. ¹⁷Tomi' ac cocon na:

Tomi' querec te urut pum ta Taramaxicon Iri' Jam.

Wum co hwara' opa pan.

Wum co ma' cara cwa', co wara ma', pain cara pane quem.

Tomi' querec te urut pum, xi om ne ca an hwet pin ara main ca hwara' opa pan nem ma'.

Taramaxicon pe pin main macan' ma'.

¹⁸Mana' tamana paxi' nana oro wari' co to nanain oro xijein macan' ma',

11.13 Ac i ca' na ca taraju pa' xine um décimo: Pain ca ma' 100 ne oro xirim pain Jerusalém ma', jao horohot 10 ac ne na. Pain ca ma' 1.000 ne ma' iri na ne, jao horohot 100 ac ne na quem.

ane maqui' pin ne xec nein ca mana' toton pan momon pain
ca win hwe pane toton momon ne.

Maqui' pin na xec nein ca wap toton momon oro wari'
co wara cono' nana.

Wap toton momon pain oro carawa ca ara caca pain
ca e' e' wet nucucun pane.

Win hwe pane ac momon tara oro co taramaja mi' nenem pane,
cocon oro profeta cocon oro wari' nem ma', cocon
oro co tomi' ha' taxipa' nenem pane,

co hwara' opa nana ma', co om hwara' opa nana ma' quem,
win hwe pane ac momon tara,
mi' ac momon tara pain oro ca awi wa.

Maqui' pin na xec nein ca to' parapa' pin toton momon oro co to'
parapa' pin nonon oro wari' pain macan' quem.

Ac i ma' na ca tomi' cocon Iri' Jam.

¹⁹Pa ac xine na xiricon Iri' Jam pain pawin ma'. Querec ac tain na
iri' panaxicon ma', ca cut ho' pe xine pacun ca xirao' pe mi' tococwa oro
wari' nucun ma', pain ca tomi' ha' xine tococwa ma'. Coc irija' ac ca na
comerem ma', toroho mip pan na comerem quem, mija na. Cocoroc ac ne
na macan' ma' quem. Nuru mip ac ne na camana', camara' ac ne na caji
pacun nein xowi' ma' quem. Mija na.

Narima' con co ma' co ac cote ne hop

12 Hwet qui' ac ne na carawa pain pawin ma'. Wa wa tamana inain.
Ac narima' na. Tomi' joc mam' mi' nain carawa ca maqui' ta' ma'
quem. Cwere mam' pin nam xina, ac womicom na. Xat pe non panawo'. Pe
nain caji waji' nucun taramaxicon ca ma' 12 ca pijo' pain winacam quem.
²Nam' na quem. Jain jain tamana na pain ca pan' ta' ca cawinacam. Mija
na ca u cama.

³Hwet qui' ac ne na xijein carawa pain pawin. Tomi' joc mam' mi' nain
carawa ca maqui' ta' ma' quem. Co ma' co ac iri' cote ne hop na co hwet
qui' ma'. Paca' na. Ma' 7 na winacon, ma' 10 na pixicon quem. Pe pe xam'
nain oro winacon caji waji' nucun taramaxicon. ⁴Pain cahurucun ma',
mam' wap camara' um terço pin non pijo' co to nain pawin. Wixicaracao'
camara' mi' non pain macan'. Hwet pin ac cam na narima' ma', co pan'

ta' cawinacam ma', xat quima hwet ac cam na, winim' ac cain na ca pan' nucun cawinacam. Ma' ta cao' pin ton ta na. ⁵ Pan' qui' ac ca na cawinacam. Cao' ton paxi' na co ma' co ac caji hop ma', ane an mao hap pan tocwa pain pawin cain ne, pain ca pe pan ca Iri' Jam cwain. Cawinacam co xo' pan' ma', wirico tara co taramaxicon pe ho' toton nonon oro wari' pain oro xijein macan'. Iri' taramaxicon tara, taramaxicon hwara' opa tamana tara. Om ta xiram pa' camain' cocon oro wari' co om tomi' ha' nonon ma' quem.

⁶ Mo mao ac cama na jicon ma', pain mahweri ma'. Wara an pe xo' nain ca pe ra cam Iri' Jam. Ma' ta querec wet pe xima pain i cain ta nam. Je ca mo mao cama ma'. Ma' 1.260 na xec pain ca querec wet tacama pain i cain.

⁷ Mixita ac xucucun na pain pawin. Miguel cocon oro win jam ca co taramaja mi' nonon Iri' Jam ma', mixita ac cocon na co ma' co ac caji hop ma'. Wirico, wiricoco oro caxicon jam co taramaja mi' nonon ma' quem.

⁸ Mixita paxi' na co ac caji hop ma', cocon oro caxicon jam co taramaja mi' nonon ma', ane om hwara' opa pan caca ne. To' quiji' pin ac tococwa na. Om ca to mami' ac cacain pawin. ⁹ Xin hwet pin ac tocwa na co ma' co ac cote ne caji hop ma'. Wirico co ma' co caxicon em' cara pane, co mixein nonon hwanana pain cara pane. Wirico co Caxicon Jam ma', co Satanás na xijein wixicon ma', wirico co mixein taxipa' nonon oro wari' pain macan' ca'. Xin pan' hwet pin ac tocwa na pain macan'. Wixicaracao' camara' hwet pin ac tococwa na pain macan' oro caxicon jam co taramaja mi' nonon ma' quem.

¹⁰ Taraju ac tain na ca tomi' wa ca maqui' nain pawin. Tomi' mip ca' na:

Maqui' pin iri na xec nein ca to' witan pin toton oro

wari' ne ta na Iri' Jam nexi',

je pain ca tomi' joc mam' mi' cain ca hwara' opa nucun,

je pain ca Taramaxicon pin ca ca'.

Maqui' pin iri na xec nein ca tora' ca Cristo ma' quem, pain ca

hwara' opa pan ca pain ca Taramaxicon pin ca ca'.

Xi xin hwet pin ara tocwa co ma' co xina non Iri' Jam ma',

co tomi' em' taxipa' nonon oro xerexi' pain xec je pain xim quem.

¹¹ Oro xerexi' ma', wiricoco co to' quiji' pin nonon.

Mam' to' quiji' pin nonon pain ca hwara' opa nein quicon co ma'

co ac Wijimain Taramaji Ovelha ma'.

Mam' to' quiji' pin nonon pain capijacon Iri' Jam ca pijim'
 caca con Jeju ma' quem.

Mo ta to' parapa' xim cacapari' pain ca howa xun Iri' Jam cwa',
 je i ma' ira, to' parapa' ma' tatarapari' ne nana.

¹²Je ta tomi' querec te tomi' querec te xam' hun pain
 ca to hwein pawin ma'.

Wahu' pain ca to hwein macan' je cote ne com ma' iri na ne,
 xiram pa' e' xihwe pain ca ximin nuhu' ma'.

Xi quiji' hwet pin ara cuhu' Caxicon Jam ta.

Mana' tamana na,

xi taxi' ara ca pain ca wijimain pin ta' ne oro xec nein ca
 ara tain cain oro ca ara ta' ca ma'.

Ac i ma' na ca tomi' mip ne ca tomi' wa ca taraju ta' ma'.

¹³Xin hwet pin iri ta co ma' co ac caji hop pain macan' ne, tomi' ac
 xucun na: Ja' tequi' tam narima' ma', co xo' pan' qui' cawinacam ma' ac
 ca na, ja' tequi' ac cam na quem. ¹⁴Quep tam paxi' na, ane mi' cam pain
 tapaxicon cote ca wajo Iri' Jam ne, ma' 2 na tapaxicon wajo ca mi' cam
 ma'. Ma' ta ha' quem pain ca taqui' mao main mahweri cain, ca wara an
 pe xo' mi' xim cain nam. Querec wet pe ac xim tara pain i cain ta nam.
 Ma' 3 tara cawaxi' pain ca querec wet pe xim pain i cain, ximijain xijein
 cawaxi' pa' terem quem, querec wet xo' xim ta. Om ta quep ac quem co
 ma' co ac caji hop ma', co caxicon em' ma' nam. ¹⁵We' hwet ac cain na
 com pain capijacon. Ac iri' cwerein com na con. Weweweo hwet ac cam
 na narima' ma'. Ma' ta joc hwet pin tam ta paxi' na. ¹⁶Ane quep xiho' cam
 macan' ne. Tototoc pin nain iri' cwerein com ca we' hwet ca co ma' co ac
 caji hop ma'. ¹⁷Mana' tamana pin ac cam na narima' ma', mixita toton
 ta ac tococwa na humaxicam cocon oro waram winacam ma', wiricoco
 co tomi' ha' nonon Iri' Jam ma', co om an to camain' nanain oro ca tomi'
 hwet xine con Jeju.

¹⁸Co ma' co ac caji hop ma', xat pe ac cain na namaji pain cacarain
 cote ne com.

**Co ma' co ac caji carawa co mana' tamana
ma', co hwet qui' nain cote ne com**

13 Querec ac ton na co ma' co ac caji carawa co mana' tamana ma'. Hwet qui' nain cote ne com. Ma' 7 na winacon, ma' 10 na pixicon quem. Pain oro pixicon ma', ma' ma' xam' nain caji waji' nucun taramaxicon. Xirao' pe pan nain oro winacon oro ca om awi wa ca tomi' napat non Iri' Jam quem. ²Co ma' co ac caji carawa co querec ta' ma', ac cote ca copacao' mixem mixem na curucun. Caximacon ma', an xiho' nain caximacon urso. Capijacon ma', an xiho' nain capijacon leão quem. Co ma' co ac caji hop ma', mi' non pain ca hwara' opa pan nucun. Taramaxicon pe rain ca taramaxicon pe pan ta' ca' non, mi' ac con na pain ca taramaxicon pin wi con quem. ³Ac ca wara to' tocwa na pain xijein winacon ma'. Mi' pin xira pain, ane xio pin ca ne. Wa wa wa wa pi' pin nonon oro wari'. Taxipa' ac cocon na quem. ⁴Pe torotop mi' querec te nonon co ac caji hop ma', co mi' non pain ca hwara' opa nucun co ac caji carawa ma', pe torotop mi' querec te nonon co ac caji carawa ma' quem. Tomi' ca' nana: Noro jun co ma' co ac caji carawa ma'. Om na win hwara' opa ca. Om na wari' co ha' non pain ca mixita ton con. Ac i ma' na ca tomi' nucucun pain ca wa wa cocon ma'.

⁵Mi' ac tocwa na pain ca tomi' ximao wa co ma' co ac caji carawa ma' quem. Tomi' xec xec na, tomi' napat non Iri' Jam. Mi' ta pain ca taramaxicon pe cain macan' quem. Ma' 42 tara panawo' pain ca taramaxicon pe rain macan' ta tocwa ma'. ⁶Mija na ca tomi' napat con Iri' Jam. Tomi' noro non, tomi' noro nain ca pe pan ca, tomi' noro nonon oro co to nanain pawin quem. ⁷Mi' ta pain ca mixita cocon oro wari' nucun Iri' Jam, mi' ta pain ca to' quiji' pin cocon quem. Mi' ta pain ca taramaxicon pe ho' cocon oro co xucun wari' xucun wari' pi' pin nana ma', cocon oro co to ni ca' nonon oro xucucun wari' pain macaracocon ma', cocon oro co capiija ni ca' nonon ma', cocon oro co to nanain oro xijein macan' ma' quem. ⁸Co ma' co ac Wijimain Taramaji Ovelha ma', co wara coromicat an pe xo' ca Iri' Jam pain cara pane, pain ca om tomi' ma' pin querec cain macan' pane, co main to' pa' pin xim nenem oro caracat ta ca pane, ma' non tapari carawa ca xirao' to xine wixicocon oro co e' cara xi' nana ma'. Oro wari' co to nanain oro xijein macan' ma', co om xirao' to wa wixicocon pain tapari carawa nucun co ma' co ac Wijimain Taramaji Ovelha ma', wa wa

wa wa xam' totoron co ma' co ac caji carawa ma'. Pe torotop mi' querec te totoron quem.

⁹Mo ta taraju pa' xixi' na hwe ma', je ta taraju wet qui' hwe ta:

¹⁰Wari' co wara coromicat an pe mi' ca Iri' Jam pain
ca quep xun tocwa ma',

quep ac tocwa tara.

Wari' co wara coromicat an pe mi' ca Iri' Jam pain ca to' pa'
pin xun tocwa pain cote ne quit ma',

to' pa' pin ac tocwa tara pain cote ne quit.

Je ca tomi' xuhu' pain ca wari' nucun Iri' Jam hwe ma': Quereme cara jein oro ca to' i'ina nuhu' ma'. Win xumu jun Iri' Jam, howa cara jun ta.

Co ma' co ac caji carawa co mana' tamana ma', co hwet qui' nain macan'

¹¹Querec ac ton na xucun co ac caji carawa co mana' tamana. Hwet qui' nain macan'. Ma' 2 na pixicon, ac pixinain wijimain taramaji ovelha na pixicon. Ca tomi' nucun ma' iri na ne, ac capiiacon co ma' co ac caji hop ma'. ¹²Taramaja mi' non co ma' co ac caji carawa co hwet qui' cain' ma', co xio pin pain ca to' tocwa pain winacon pane. Oro carawa ca ara ca ma', mam' ara nain pain ca hwara' opa nucun co ma' co hwet qui' cain' ma'. Tomi' mip tata oro wari' co to nanain oro xijein macan' ma': Tomi' ha' xine, pe torotop mi' querec te jun co ma' co hwet qui' cain' cwa' ta tata.

¹³Co ma' co hwet qui' nain macan' ma', ara nain oro ca om ara taxi' ne ca wari' wa ma', ca to' wa wa tamana nonon oro wari'. Tomi' camara' nain pawin xe, camara' hwet ac nein na macan'. Querec querec pi' pin nonon oro wari' co to nanain oro xijein macan'. ¹⁴Mixein mixein pi' pin tata oro wari' co to nanain oro xijein macan', xi om ne oro ca ara ca ma', ca om ara taxi' ne ca wari' wa ma', ca ara ra pan con co hwet qui' cain' ma'. Tomi' ac tococwa na oro wari': Quep jein caji pacun ma', ara an xiho' jein curucun co ma' co hwet qui' cain' ma', co to' pa' pin paxi' wa pain cote ne quit ma', co e' mami' ma'. Pe torotop mi' querec te ac hwein tara ta, ac i ma' na ca tomi' tococwa oro wari'. ¹⁵To' e' pin rain caji pacun ca an xiho' nein curucun co hwet qui' cain' ma' ac tocwa na co hwet qui' nain macan'. Ma' ta ha' nein pain ca tomi' wa, ma' ta ha' nein pain ca to' parapa' to' parapa' pi' pin tococwa oro co om pe torotop mi' querec te jein ha' nana ma' ac tocwa na. ¹⁶Cuc cuc ac tococwa na oro wari' pain ca xirao' xirac tococwa

ma'. Am pain micocon pain iri' curucucun ma', am pain jitaracocon ma', cuc cuc ac tococwa na pain ca xirao' xirac tococwa. Co om hwara' opa nana ma', co hwara' opa nana ma' quem, co caramaju nana ma', co om caramaju nana ma', co taramaja mi' pan xucucun ma', co taramaja mi' nonon xucun wari' ma' quem, cuc cuc ac tococwa na pain ca xirao' xirac xirao' xirac pi' pin tococwa ta. ¹⁷Wari' co om xirao' xirac wawa ma', om ca cut ac cacain carawa, om ca vender ac cacain quem. Cut xica' to nanain co xirao' xirac wawa ma', vender xica' to nanain quem. Ca xirao' xirac wa ma', je i ma' wixicon co ma' co ac caji carawa co mana' tamana ma', co hwet qui' cain' ma'. Número nein wixicon na ca xirao' xirac wa ma'.

¹⁸Taraju pa' xin i ca': Wari' co taraju pa' ma', querec pin' tarain ca tomi' mao ne número nein wixicon co ac caji carawa co hwet qui' cain' ma'. Número nucun ma', tomi' joc mam' mi' nain wixinain ca wari' wa. Je i ca' número nucun: 666 na ta.

Ca com caca tamara' co witan nana

14 Noro ac ta' na, querec ac ton na co ma' co ac Wijimain Taramaji Ovelha ma'. Xat pe nain tamain pacun ma', ca São caca oro wari' ma'. Ma' 144.000 nana wari' co coco' to ho' nonon quem. Wara xirao' to tata pain jitaracocon pain wixicon co ma' co ac Wijimain Taramaji Ovelha ma', je pain wixicon Cote ca quem. ²Taraju ac tain na ca ac ca tomi' wa paxi' ne ma'. Maqui' nain pawin. Ac ca xain ne pacun pain ca weweweo tamana ne com na, ac ca toroho mip ca comerem na quem. Ac ca tao' xine na cote ne ca ac violão paxi' ma' quem. ³Oro wari' ma', co ma' 144.000 nana ma', com ac cacain na xocori tamara'. Coco' quima hwet nanain ca mam' xao pe pe ca Iri' Jam ma', cocon caram ma' co e' nana ma', co ac jam paxi' nana ma', co ma' 4 nana ma', cocon oro taramaxicon ma' quem, je ca com to cacain xocori tamara'. Om ca taxi' xixi' na ac cacain oro xucucun wari'. Xica' to nana caram ma' co ma' 144.000 nana ma', co to' witan ca' wawa cocon oro caracat co to nanain oro xijein macan' ma', xica' to nana caram ma' co com taxi' nanain xocori tamara'. ⁴Xumu xo' nana, an xiho' nanam xojam' co om quep camain' wawa ma', om ca ara em' xucucun, om na. Win xumu e' nonon co ma' co ac Wijimain Taramaji Ovelha ma', taxp'a e' nonon. Tora' tata pain ca to' witan ca' tococwa cocon oro caracat co to nanain oro xijein macan' ma'. Wari' ne pan nonon Iri' Jam con co ma'

co ac Wijimain Taramaji Ovelha ma'. Ac ca mi' cain' tococwa cocon na. Win ne ca mi' cain' tocwa pain oro tocwi trigo ca cat caca oro hwanana pain totacocon Iri' Jam pane, ac i ma' na ca mi' cain' tococwa cocon Iri' Jam con co ma' co ac Wijimain Taramaji Ovelha ma'. ⁵Om ca tomi' mixein camain' caca. Iri' wari' nana, om ca xuruxut pan teretem camain' caca.

Oro jam co taramaja mi' nonon Iri' Jam ma', co ma' 3 nana ma'

⁶Querec ac ton na xucun jam co taramaja mi' non Iri' Jam. Ho pe nain iri' pawin. Tomi' hwet tain capijacon Iri' Jam ca om pi' ra ha' ma', ca tomi' hwet nonon pain ca to' witan pin toton cocon oro wari' Iri' Jam ta na. Tomi' hwet toton pain oro wari' co to nanain macan' ma', wiricoco co to nanain oro xijein macan' ma', cocon oro co xucun wari' xucun wari' pi' pin nana ma', cocon oro co capija ni ca' nonon oro xucucun wari' ma', cocon oro co to ni ca' nonon oro xucucun wari' pain macaracocon ta na. ⁷Tomi' mip ac ca na: Tomi' ha' jun Iri' Jam ta. In ac jun pain ca hwara' opa tamana nucun. Xi maqui' pin ara ne xec nein ca wap toton cocon oro caracat. Pe torotop mi' querec te jun co ma' co quep nain pawin je macan' je cote ne com je oro ca hoi hoi ne com ca weweweo qui' nain macan' ta na ca tomi' ca ma'.

⁸Mao iri na jam co taramaja mi' non Iri' Jam ne, co maqui' cain' ma', maqui' ac ca na xucun jam co taramaja mi' non Iri' Jam. Ma' 2 pin nana. Tomi' ac ca na: Om pin na cidade pain Babilônia, om pin na Babilônia co hwara' opa tamana nana oro wari' nein ma'. Tomi' joc mam' mi' nam caxicam narima' co param ni ca' non taxicam ma'. Ac ca caracat wi xijexi' ta tococwa na oro xucucun wari' co to nanain oro xijein macan' ma', ac ca toc jein ta tococwa na pain comi uva ca mana' ma', ca an xiho' nain ca param ximama' xine oro ca om awi wa. Ac i ma' na ca tomi' ca ma'.

⁹Mao iri na co ma' ne, maqui' ac ca na xucun jam co taramaja mi' non Iri' Jam. Ma' 3 in nana. Tomi' mip ac ca na: Wari' co pe torotop mi' querec te nain caji pacun ca ara an xiho' xine curucun co ac caji carawa co mana' tamana ma', co hwet qui' cain' ma', wari' co xirao' xirac wa pain wixicon

14.8 Cote ne cidade na Babilônia, hwara' opa tamana nana oro wari' co to nanain pane. Caracat tamana nana, noc nonon Iri' Jam quem. Tomi' joc mam' mi' nanam caxicam narima' co param ni ca' non taxicam. Je ca ac caxicam narima' pan ne Babilônia pane. Caxicam narima' iri ta Babilônia ne, tomi' mi' tata oro wari' co to nanain.

ma', pain jitaracon ma', am pain micon pain iri' curucun ma', ¹⁰wap ac tocwa tara, wap pan toron Iri' Jam. Ac ca toc rain ta tocwa tara pain comi uva nucun ca mana' ma', ca tomi' joc mam' mi' nain ca mana' tamana nucun ma', ca ji'ao mi' ca pain ca mam' toc nucun ca an xiho' nain ca mana' tamana nucun ma'. Iri' comi uva nucun, om ta joc wanan xine pain com, mana' tamana tara comi uva nucun. Om ta xiram pa' camain' tocwa wari' co toc rain wa ma'. Jain jain tamana tara pain xe, je pain pacun ca weo tamana ma', ca enxofre caca oro wari' ma'. Oro jam co taramaja mi' nonon Iri' Jam ma', wirico co ma' co ac Wijimain Taramaji Ovelha ma' quem, querec totoron pain ca jain jain tamana nucun. ¹¹Oro wari' co pe torotop mi' querec te ac i ma' nonon co ma' co ac caji carawa co mana' tamana ma', co hwet qui' cain' ma', oro wari' co pe torotop mi' querec te ac i ma' nanain caji pacun ca an xiho' nain curucun ma', co xirao' xirac wawa pain wixicon ma', jain jain cara tataru, pain xec je pain xim. Piri' cara tara tajain xe pain ca jain jain to caca. Om ta pi' pin camain' ne ca jain jain nucucun. Ac i ma' na ca tomi' ca co ma'.

¹²Je ca tomi' xuhu' ca': Wahu' pain ca wari' nucun Iri' Jam hwe ma', pain ca tomi' ha' hwein oro ca tomi' ha' je cuhu' ma', je pain ca win xumu cara hun pain ca howa cara hun Jeju ma', querec cara jein oro ca to' i'ina nuhu' ta.

¹³Taraju ac tain na ca tomi' wa ca maqui' nain pawin. Xirao' ca' ra ta ac ne na. Param mi' tata pain ca awi wa oro wari' co cono' pa' nanain ca howa nucucun pain xocori ca', pain ca howa cocon Taramaxicon nexi' Jeju cwa' na ca tomi' nein ma'.

Tomi' ac ne na Tamataracon quem: Tomi' iri'o' ma, xao to wa tatarain ximicocon, xao to wa ca' tatarain ca taramaja tamana nucucun. To ho' cara totoron oro carawa ca awi ca mi' xun tococwa, xi om ne ca taramaja tamana ara caca pane ta na ca tomi' ne Tamataracon Iri' Jam ta.

Xec nein ca cut in xun tococwa oro caracat Iri' Jam

¹⁴Querec ac tain na tajain nanawin ca towo'. Ma' na co xao pe pe nain quem. Ac Iri' Wari' na. Pe nain winacon caji waji' nucun taramaxicon ma', ca mam' quep xine pain ouro ma'. An na pain micon caji quit ca wara xa

14.10 Comi uva nucun Iri' Jam ca mana' ma', je ca mam' toc nucun ca tomi' joc mam' mi' nain ca mana' tamana nucun ma', tomi' joc mam' mi' nain ca wap mip wa.

ma', ca mam' wawac wa caramaji xitot ma' quem. ¹⁵Hwet qui' ac cain xiricon Iri' Jam na xucun jam co taramaja mi' non ma'. Merem mip ac con na co ma' co xao pe pe nain tajain nanawin ma'. An rain caji quit nem ma', wac cut rain winain pain oro caramaji xitot pain oro xijein macan' ma'. Xi paca' pin ara ne ta. Maqui' pin ara xi' na xec pain ca cut xin xine ta. Ac i ma' na ca tomi' con ma'. ¹⁶Ara ac cain na co ma' co xao pe pe nain tajain nanawin quem. Wac cut ac cain na winain pain oro caramaji xitot pain oro xijein macan'. Cut cut pi' pin nain quem.

¹⁷Hwet qui' ac cain xiricon Iri' Jam na xucun jam co taramaja mi' non ma'. An na caji quit ca wara xa ma', ca mam' wac xine winain uva ma'. ¹⁸Hwet qui' ac ca na xucun jam co taramaja mi' non Iri' Jam, hwet qui' nain pana ca tom tain' pe xine incenso. Wirico co ma' co querec wet nain xe pain pana ma'. Hwet qui' iri na ne, merem mip ac con na co ma' co an nain caji quit ca wara xa ma', ca mam' wac xine winain uva ma': Mam' wac rain oro winain uva pain oro macori pain oro xijein macan' ma'. Cut in rain, xi paca' pin ara ne ta, ac i ma' na ca tomi' con ma'.

¹⁹Wac ac cain na oro winain uva pain oro macori pain oro xijein macan'. Wixicaracao' mi' ac ca pain na manain cote ne pacun ca xom torotot pe xine ma', ca tomi' joc mam' mi' nain ca mana' tamana nucun Iri' Jam. ²⁰Xom xom torotot pin ac xine na pain manain pacun ca pe ni ca' nain cidade ma'. Weweweo hwet qui' ac nein na wic quem. Mija na wic ta. Weweweo mao nain pira, ac ca ma' 300 ne na quilômetro nein ca weweweo mao nein pira. Xopain na quem, hwet nain paramain cavalo ca xopain nein.

**Ca ma' 7 ne oro ca xirac wa ca to'
jain jain nonon oro wari' pain oro xijein macan'**

15 Querec ac tain na xijein carawa pain pawin. Tomi' joc mam' mi' nain carawa ca maqui' ta' ma'. Wa wa tamana inain. Querec inonon jam co taramaja mi' nonon Iri' Jam. Ma' 7 nana. Ma' 7 na oro ca

14.16 Om paxi' na ca tomi' mi' xine iri' caramaji xitot ma'. Tomi' joc mam' mi' tata oro wari' co to nanain oro xijein macan'. **14.20** Om paxi' na ca tomi' mi' cain iri' xirinain winain uva ma'. Om paxi' na ca tomi' mi' cain manain cote ne pacun ca xom torotot pe xine ma' quem. Tomi' joc mam' mi' tata oro caracat, tomi' joc mam' mi' tata pain ca to' parapa' pin xun tococwa quem.

xirac wa ca ara xi' caca ma', ca to' jain jain xun nonon oro wari' pain oro xijein macan' quem. Pi' pin iri tara ca to' jain jain xun tococwa ne, pi' pin ac ne tara ca mana' nucun Iri' Jam. ² Querec ac tain na carawa ca ac cote ne com ma' quem, ca an xiho' nain ca mam' querec ca jamu wa ma'. Ac ca weo ne na xe pain ximijain. Querec ac toton na caram ma' co to' quiiji' pin nonon co ac caji carawa co mana' tamana ma' quem, co hwet qui' cain' ma'. Caram ma' co querec ta' ma', to' quiiji' pin nonon co ac caji carawa ma', xi pe torotop mi' querec te cacain caji pacun ca ara an xiho' tocwa ta, tomi' in pin nonon oro co xirao' xirac xut pahu' pain número nein wixicon ta nonon ma' quem. Coco' ja' pan nanain cacarain cote ne com ca an xiho' nain ca mam' querec ca jamu wa ma'. Cut nana ca mam' tao' wa ma', ca ac violão paxi' ma', ca mi' pan cocon Iri' Jam ma'. ³ Com ac cacain na tamara' ca wara com ca Moisés co taramaja mi' non Iri' Jam pain cara pane. Com querec te mi' nonon co ma' co ac Wijimain Taramaji Ovelha ma' quem. Com ca' nana:

Wum co hwara' opa pan ta Taramaxicon Iri' Jam.

In ac tamana urut pain oro ca ara ma ma'.

Wum co taramaxicon pe ho' nonon oro wari' co to
nanain oro xijein macan'.

Ara xo' taxipa' main oro ca coromicat an pe xo' nem.

Iri'o' taxipa' ma quem.

⁴ Tomi' ha' cara teterem oro wari' ta Taramaxicon Iri' Jam.

In ac cara teterem quem.

Xi xica' pe ara ma pain ca awi ma ma', pain ca pe ni
ca' main ca caracat wa ma'.

Hwet hwet xam' teterem oro wari' co to nanain oro xijein macan'.

Pe torotop mi' querec te teterem.

Xi om ne ca querec pin' ara quequem pain oro ca
ara xo' tamana ma ma'.

Ac i ma' na ca com nucucun.

⁵ Pi' pin iri na ca com nucucun ne, querec ac tain na xiricon Iri' Jam pain pawin ma', pain ca pa xine ma'. Querec inain iri' ca pe pan ca Iri' Jam ma', ca to pan ne pacun ca xirao' to xine oro ca tomi' ha' je ca pane.

⁶ Hwrehwet qui' ac cacain na xiricon Iri' Jam oro jam co taramaja mi' nonon ma', co ma' 7 nana ma', co to' jain jain xun nonon oro wari' pain oro ca xirac wa ma', ca ma' 7 ma'. To nonon wom co awi tamana. Om ca em'

camain' ca womicocon, toc meremem na cocon. Tucu pan xucucun pain quimacocon, mam' quep ta pain ouro ca mam' tucu pan xucucun. ⁷Ma' na co win ma' ne nonon caram ma' co e' nana ma', co ac jam paxi' nana ma', co ma' 4 nana ma', mi' mi' xam' ac tococwa na pain ouro ma', ca wara moin' pe nain carawa ca tomi' joc mam' mi' nain ca mana' tamana nucun Iri' Jam ma', co e' cara ma'. ⁸Mija ac ne na tain' pain xiricon Iri' Jam. Maqui' nain ca toc meremem nucun, maqui' nain ca hwara' opa tamana nucun quem. Om ca corom ac xine xiricon. Pain ca om ara ara pi' pin cacain ca ara xi' caca oro jam co ma' 7 nana ma', co taramaja mi' nonon Iri' Jam ma', pain ca to' jain jain xun cocon oro wari' pain oro ca xirac wa ma', ca ma' 7 ma' quem, om ca corom ac xine xiricon Iri' Jam.

**Oro too ca moin' to nein oro ca xirac wa ca tomi' joc
mam' mi' nain ca mana' tamana nucun Iri' Jam**

16 Taraju ac tain na ca tomi' wa ca maqui' nain xiricon Iri' Jam. Tomi' mip tata oro jam co taramaja mi' non Iri' Jam, co ma' 7 nana ma': Wara mama' je ta, cut jein too nuhu' ca ma' 7 ma', ca moin' pe nain oro ca xirac wa ma'. Ji'ao mi' jujun pain oro wari' co to nanain oro xijein macan' ta. Ac i ma' na ca tomi' mip tococwa ma'.

²Xucun ma', co mao cain' ta' ma', mao ac ca na, ji'ao pin ac cain na ca xirac wa ca moin' pe nain too nucun. Ji'ao mi' nain pain oro xijein macan'. Ji'ao mi' iri nain pain ne, nona pin ac caca na oro wari' co xirao' xirac wawa pain wixicon co ma' co ac caji carawa co hwet qui' cain' ma'. Nona pin nana co pe torotop mi' querec te nanain pacun ca ara an xiho' xine curucun ma'. Om ca xio camain' ne oro nonacocon. Caxi tamana nonon.

³Mao ac ca na xucun ma', co ja' corom mao non ma', ma' 2 pin ac caca na jam co mama' nana. Ji'ao pin ac cain na ca xirac wa ca moin' pe nain too nucun. Ji'ao mi' nain pain cote ne com ma'. Ji'ao pin iri nain ne, wic pin ac ne na com. Ac quicon wari' co mi' pin ma'. Corojo na, taracu na. Cono' cono' pi' pin ac ne na oro carawa ca to nain oro com.

⁴Mao ac ca na xucun ma', co ja' corom mao nonon win ma' ca ma', ma' 3 pin ac caca na jam co mama' nana. Ji'ao pin ac cain na ca xirac wa ca moin' pe nain too nucun. Ji'ao mi' nain pain oro iri' cwerein com je oro ca hoi hoi ne com ca weweweo qui' nain macan'. Ji'ao mi' iri nain pain ne,

wic pin ac ne na quem. ⁵Tomi' ac con Iri' Jam na jam co taramaja mi' non ma', co querec wet nain oro com ma'. Taraju inon pain ca tomi' nucun:

Wum co ara xo' taxipa' ma' ta Iri' Jam.

Wum co awi tamana ma', pain ca pe ni ca' main ca caracat wa ma'.

Wum co ma' cara cwa', co wara ma' pain cara pane quem.

Xi om ne ca ara xo' ara ma pain ca wap xo' momon oro caracat ta.

⁶Xi to' parapa' pin ara cocon oro wari' nem cocon
oro profeta nem ta.

Ara xo' ma pain ca win hwe pane momon pain ca
toc jein wic ca' momon ta.

Ac i ma' na ca tomi' ca jam co taramaja mi' non Iri' Jam ma', co querec wet nain oro com ma'.

⁷Taraju ac tain na ca tomi' wa ca maqui' nain pana ca in ac pe tocwa Iri' Jam. Tomi' ac ne na:

Iri'o' na ca tomi' ca co ma' ta Taramaxicon Iri' Jam
co hwara' opa pan.

Iri'o' taxipa' ma, ara xo' taxipa' ma pain ca wap momon oro caracat.
Ac i ma' na ca tomi' ne ma'.

⁸Mao ac ca na xucun ma', co ja' corom mao nonon win ma' ca ma', ma' 4 pin ac caca na jam co mama' nana. Ji'ao pin ac cain na ca xirac wa ca moin' pe nain too nucun. Ji'ao mi' non pain xina. Ji'ao mi' iri non pain ne, mi' ac tocwa na pain ca xain mip cocon oro wari'. Ac xe nonon xina.
⁹Jam' tamana nonon. Tomi' noro ac cocon na Iri' Jam ma', co to' jain jain nonon pain oro ca xirac wa ma'. Ximin paxi' nana, ane om cwirin' je ha' caca ne. Om ca in ac jun ha' cocon Iri' Jam quem.

¹⁰Mao ac ca na xucun ma', co ja' corom mao nonon win ma' ca ma', ma' 5 pin ac caca na jam co mama' nana. Ji'ao pin ac cain na ca xirac wa ca moin' pe nain too nucun. Ji'ao mi' nain pain ca mam' xao pe pe ca co ma' co ac caji carawa co hwet qui' cain' ma'. Ji'ao mi' iri nain pain ne, xim pin ac ne na pain oro xijein macan' ca taramaxicon pe ca quem. Caxi tamana nana oro wari', quio quio nanain petehwet nucucun, xi om ne ca caxi tamana ara caca ta. ¹¹Tomi' napat nonon Iri' Jam co pe pawin ma', xi caxi tamana ara cocon oro nonacocon ta. Ximin paxi' nana, ane om cwirin' je ha' cacain oro ca om awi wa ca ara taxipa' caca ne.

¹²Mao ac ca na xucun ma', co ja' corom mao nonon ma', ma' 6 pin ac caca na jam co mama' nana. Ji'ao pin ac cain na ca xirac wa ca moin'

pe nain too nucun. Ji'ao mi' nain pain cote ne iri' cwerein com ma', pain Eufrates ma'. Ji'ao mi' iri nain pain ne, am pin ac ne na quem. Pit pin na com. Ac ca wara quep xo' mi' tococwa na pain wana oro taramaxicon co maqui' xi' nana pain pira cain, pain ca maqui' ac ca xina cain. ¹³ Querec ac toton na oro caxicon jam co ac tururu nana. Ma' 3 nana. Hwet qui' nain capijacon co ma' co ac caji hop xucun. Xucun ma', hwet qui' nain capijacon co ma' co ac caji carawa co hwet qui' cain' ma' quem. Xucun ma' iri na ne, hwet qui' ac cain na capijacon co ma' co hwet qui' pa'ao' ma', co profeta mixein ma', pain ca tomi' hwet taxipa' cain oro ca tomi' mixein nucun co hwet qui' cain' ma' quem. ¹⁴ Iri' caxicon jam nana. Ara nanain oro ca om ara taxi' ne ca wari' wa ma', ca wa wa caca oro wari' ma'. Hwet ac tococwa na oro taramaxicon pain oro xijein macan'. Cut in xijexi', mixita xun Iri' Jam ta ac tococwa na. Xec nein ca mixita xi' nucucun ma', je i ma' tara iri' xec nein ca hwara' opa pan ca Iri' Jam.

¹⁵ Je ca tomi' capari' ca': Taraju wet xine me. Ane ane maqui' pa' xuhu'. Win ne ca ane ane maqui' ca wari' co an noc xa ta' ma', ac i ma' tara ca ane ane maqui' pa' xuhu'. Iri' Jam ma', param mi' totonon pain ca awi wa oro wari' co winim' xo' cara nanapa' ma', pain ca wara an pe xo' cocon womicocon ma', pain ca om an xiho' cocon wari' co pi'am ca' nonon co an noc xa ta' ma'. Om ta wixipa' caca pain ca ane ane maqui' pa' toton pain ca ac ca hwet pe ne ne curucucun pain ca om winim' xo' cacapa' pain ca maqui' ta' ne ta. Ac i ma' na ca tomi' capari' ca'.

¹⁶ Harahap je ac caca na oro caxicon jam co ma' 3 nana ma'. Cut in xijexi', mixita xun Iri' Jam ta ac tococwa na oro taramaxicon ma'. Cut in ac xucucun na pain Armagedom ma', je i ma' wixinain ca cut in to xucucun pain capijacocon oro judeu ma', pain hebraico ma'.

¹⁷ Mao ac ca na xucun jam ma', co ja' corom mao nonon win ma' ca ma', ma' 7 pin ac caca na jam co mama' nana. Ji'ao pin ac cain na ca xirac wa ca moin' pe nain too nucun. Ji'ao na pain pawin. Ji'ao iri nain ne, taraju ac tain na ca tomi' wa ca maqui' nain xiricon Iri' Jam ma', maqui' nain ca mam' xao pe nucun ma'. Tomi' mip ac ne na: Ara pi' pin inain oro ca ara ta' ta' pane na. ¹⁸ Coc wein ac ca na comerem ma', toroho mip pan na comerem quem, mija na. Cocoroc tamana ac ne na macan' ma' quem. Pain ca xo' ma' ten qui' caca oro wari' pain macan' pane, om ca cocoroc mip ac i ma' ne ira. Je win cocoroc mip tamana ne pain xocori ca'. ¹⁹ Cocoroc

iri na macan' pain cidade ma' ne, je pain Babilônia co hwara' opa tamana nana oro wari' nein ma', taparapa' pin ac ne na, taparapa' pan na macan'. Ma' 3 na cote ne ca taparapa' nein. To ni to ni xam' ac ne na. To' om pin ac xine na oro cidade pain oro xijein macan' quem. Iri' Jam ma', om ca ji'am pin cain ca pan teretem nucucun oro wari' nein Babilônia ma', co hwara' opa tamana paxi' nana pane. Toc jein ta ac tococwa na pain comi uva nucun ca mana' ma', ca tomi' joc mam' mi' nain ca mana' tamana nucun ma', ca ji'ao mi' ca pain ca mam' toc nucun ca an xiho' nain ca mana' tamana nucun ma'. ²⁰ Ane ane om pin ac ne na oro xixi pan nein macan' je oro cote ne pacun. Pan' ara'am pan' ara'am pi' pin na. ²¹ Camara' pa' ac cocon na oro wari' caji pacun nein xowi'. Camara' qui' nain pawin. Iri' cote ne caji pacun nein xowi', xite na, ac ca ma' 35 ne na quilo nein ca xica' pe nein. Tomi' napat nonon Iri' Jam oro wari' quem, xi om ne ca xirac wa pain cote ne caji pacun nein xowi' ca camara' pa' nonon ta. Jain jain tamana nana pain.

Caxicam narima' co hwet tamana wixicam

17 Hwet ac capa' na jam co taramaja mi' non Iri' Jam ma', co win ma' ne nonon co cut nanain too ca ma' 7 ma', ca moin' pe nain oro ca xirac wa ma'. Tomi' ac capa' na: Hap ra, an hwet mi' xim pain carawa ca hwet pa' tam nam caxicam narima' ma', co hwara' opa paxi' ma', co xao pe pe nain ca mija pe nein oro iri' cwerein com ma'. An hwet mi' xim pain carawa ca ara tam cam Iri' Jam ma', pain ca wap tam cam ma'. ² Caracat wi xi' ta nonon oro taramaxicon co taramaxicon to nanain oro xijein macan', win ne ca param ni ca' ton taxi cwa', param ni ca' jun Iri' Jam ta nonon. Oro wari' co to nanain oro xijein macan' ma' quem, ac ca toc tamanain to cacain na comi uva nequem ca mana' ma', ca tomi' joc mam' mi' nain oro ca om awi wa ca ara cama pain ca caracat wi cocon oro xucucun taramaxicon.

16.19 Comi uva nucun Iri' Jam ma', je ca mam' toc nucun ma' quem, tomi' joc mam' mi' nain ca wap mip wa. **17.1** Om paxi' na ca tomi' mi' tacama caxicam narima' ma'. Tomi' joc mam' mi' tata oro wari' co param ni ca' nonon Iri' Jam ma', je ca tomi' joc mam' mi' cacam caxicam narima' co param ni ca' non taxicam pain ca noc pin con ma'. Pain ca xao pe pe camain ca mija pe nein oro iri' cwerein com ma', tomi' joc mam' mi' ta cote ne cidade. Am Babilônia ma', am Roma ma', om ca taxi' xine cidade ca xao pe pe cama.

³Pe ho' mip ac capa' na Tamataracon Iri' Jam. O mao ac capa' na jam co taramaja mi' non ma', o mao napa' pain mahweri. Querec ac tam na narima' co xao pe pe nain xunucun co ma' co ac caji carawa co hwet qui' cain' ma', co paca' ma'. Xirao' pe xirao' pe xam' ta pain oro curucun oro ca om awi wa ca tomi' napat non Iri' Jam. Ma' 7 na winacon, ma' 10 na pixicon quem. ⁴Caxicam narima' ma', pe non wom co tum ma', co paca' ma' quem. Mija na dinheiro nucun womicom. An warawa pan xequem pain oro xijein too ca mam' xec xec cama ma' quem, je ouro, je oro pacun ca awi tamana, je oro xijein wijimain pacun ma' quem, pérola na wixinain. An na pain micam ouro ca moin' pe nain oro ca om awi ma', ca noc tamana pan ca Iri' Jam. Moin' pe nain oro ca pan tem tamana nequem pain ca param ni ca' con Iri' Jam ma'. ⁵Xirao' pe na pain jitaracam wixicam quem. Ma' na ca tomi' mao ne wixicam, i'ina na ca taraju pa' xine ca tomi' mao nein. Ca' na ca xirao' pe nein wixicam:

Babilônia cwa', co hwara' opa tamana nana oro wari' nequem cwa',
ac ca wijima cacam na oro caxicam narima' co param ni
ca' nonon waram taxicacam ma'.

Ca' na nanam pain oro ca pan teretem wa ca noc pan ca Iri' Jam. Je i ma' ca tomi' mao nein wixicam ca xirao' pe xine pain jitaracam. ⁶Querec pin' inam pain ca hohot tamana cam ca to' parapa' pin tococwa oro wari' nucun Iri' Jam pain ca howa cara cocon Jeju ma'. Pain ca tomi' querec te nequem pain ca cono' pin nucucun ma', ac ca toc tamanain pe camain na quicocon.

Querec iri inam ne, wa wa tamana ac tam na. ⁷Tomi' ac capa' na jam co taramaja mi' non Iri' Jam: Para wa wa tamana mam narima' ma' quem? Tomi' xo' xim cam, tomi' xo' xim pain carawa ca tomi' joc mam' mi' cama ma'. Tomi' xo' xim pain carawa ca tomi' joc mam' mi' ca co ma' co ac caji carawa co hwet qui' cain' ma', co xao pe pe cama ma', co ma' 7 ne winacon ma', co ma' 10 ne pixicon ma' quem. ⁸Co ac caji carawa co querec ma ma', e' paxi' na ira, ane om e' mami' ca pain xocori ca' ne. Mi' pin na. Wara piri' ca' tain nain cote ne man ca om tawirinain cain. Main to' om pin ac tocwa tara ta, ame ma e'. Oro wari' co to nanain oro xijein macan' ma', co om xirao' to wa wixicocon pain tapari carawa ca xirao' to xine wixicocon oro wari' co e' cara xi' nana ma', co om xirao' to wa wixicocon pain ca om tomi' ma' pin querec xine macan' pain cara pane quem, querec iri totoron co ac caji carawa co ma' 7 ne winacon ma' ne, wa wa ac cocon tara. E'

paxi' na ira, ane om e' mami' ta' ca pain xocori ca' ne. Ame ma e', main e' mami' tara quem, ac i ma' na ca tomi' capa' ma'.

⁹Mo ta coromicat xo' ma, ha' terem pain ca taraju pa' wa ta ac capa' na. Winacon co ac caji carawa ma', ca ma' 7 ma', tomi' joc mam' mi' nain oro ca tamaja ne macan' ca ma' 7 ma' quem, ca xao pe pe cama narima' ma'. ¹⁰Oro winacon ma', an xiho' nonon oro taramaxicon co ma' 7 nana ma' quem. Wara to' om 5 pin tata, taramaxicon taramaxicon wet ac ca na xucun ma', om ca maqui' querec ca xucun ma' quem. Maqui' pin iri tara xucun ne, mi' ac tocwa tara pain ca taramaxicon wijimain e' ca, om ta taramaxicon cara ca. ¹¹Co ac caji carawa co hwet qui' cain' ma', co e' paxi' pane, co om e' mami' pain xocori ca', tomi' joc mam' mi' non taramaxicon quem. To' 8 pin nonon oro xucucun taramaxicon co ma' 7 nana ma'. To' om pin ac tocwa tara quem.

¹²Tomi' tomi' tiquin' ac capa' na: Querec main oro pixicon co ma' co ac caji carawa ma'. Ma' 10 na. Oro pixicon ma', tomi' joc mam' mi' nonon oro taramaxicon co ma' 10 nana quem. Om ca taramaxicon querec caca, ame ma e'. Mi' xun ac tococwa tara pain ca taramaxicon wa. Taramaxicon wi tatara con co ma' co ac caji carawa ma'. Om ta taramaxicon cara caca, pi' pin hap tara ca taramaxicon nucucun. ¹³Xin ne ac xucucun tara, an an ari tara ca coromicat nucucun. Tomi' xo' ac xucucun tara, mi' xun pain ca hwara' opa nexi' co ma' co ac caji carawa ma', co hwet qui' cain' ma', taramaxicon pan ac ca tara ta, ac i ma' tara ca tomi' xo' xucucun. ¹⁴Mixita paxi' totonon co ma' co ac Wijimain Taramaji Ovelha ma', ane to' quiji' pin xun tococwa ne, xi wirico pan ara ne co hwara' opa tamana pan, co taramaxicon hwara' opa tiquin' ca' nonon oro xucucun taramaxicon ma'. Oro wari' co tora' ca ma', co howa xine ca ma', co win xumu nonon ma', to' quiji' wi totonon cocon oro xucucun taramaxicon. Ac i ma' na ca tomi' capa' jam co taramaja mi' non Iri' Jam.

¹⁵Tomi' tomi' tiquin' ac capa' na quem. Oro iri' cwerein com ca querec ma ma', ca xao pe pe cama caxicam narima' ma', tomi' joc mam' mi' nonon

17.9 Ac i ca' na ca taraju pa' nucucun oro co noro taxipa' nanain capiacaon Iri' Jam: Ca xao pe pe cama narima' ma', ac ca tomi' joc mam' mi' tococwa na oro taramaxicon co ma' 7 nana ma', co taramaxicon to nanain oro xijein macan'. Ma' nana xucucun co taraju pa' ac i ca' nana: Am tomi' joc mam' mi' xine cidade pain Roma, xi om ne ca ma' 7 ara ne oro ca tamaja ne macan' pain Roma ta. Ma' ac caca na oro xucucun co taraju pa' ac i ca' nana quem: Am tomi' joc mam' mi' xine cidade pain Jerusalém ta, ac i ma' na oro ca taraju pa' nucucun.

oro wari' co to nanain oro xijein macan'. Mija nana, capiija ni ca' xucucun. ¹⁶Co ma' co ac caji carawa co hwet qui' cain' ma', wiricoco co ac oro pixicon co ma' 10 nana ma' quem, noc pin tataram caxicam narima'. Cut ca' cut ca' pi' pin tataram pain oro carawa nequem. Womicam quem, hot ca' tataram con womicam, hwet pe ac ne tara cwerequem. Cao' pin ac cacain tara cwerequem, tom tom pi' pin ac cacam tara quem. ¹⁷Wirico Iri' Jam ara xi' na co an pe mi' nonon pain ximicocon pain ca ara xin cacain ca param pan nucun. Wirico Iri' Jam pan co mi' nonon pain ca tomi' xo' xucucun ma', pain ca mi' xun pain ca hwara' opa nexi' pain ca taramaxicon iri' ca' cocon co ma' co ac caji carawa co hwet qui' cain' ma', pain ca taramaxicon pan ra ta cocon ma'. Taramaxicon ac ca tara, taramaxicon taramaxicon maqui' pa' ac con tara xec nein ca ara ara pi' pin tain cain oro ca wara tomi' pe pan nucun Iri' Jam. Taramaxicon taramaxicon om pin ac ca tara ta. ¹⁸Narima' co querec ma ma', tomi' joc mam' mi' nain cidade ca wa wa caca oro wari' ma'. Wiricam co taramaxicon pe ho' nonon oro xucucun taramaxicon co taramaxicon to nanain oro xijein macan'.

Ca to' om pin xine Babilônia ca tomi' joc mam' mi' nam caxicam narima'

18 An hwet mi' iri napa' pain carawa ca hwet pa' xim tacama caxicam narima' jam co taramaja mi' non Iri' Jam ne, querec ac ton na xucun jam co taramaja mi' non Iri' Jam. Quiji' qui' nain pawin. Hwara' opa tamana na. Toc meremem tamana na, toha mi' nain oro xijein macan'. ²Merem mip ac ca na:

Om pin na, om pin na Babilônia co hwara' opa tamana
nana oro wari' nein ma'.

Ma' e' nana oro caxicon jam co om querec awi nana ma', wiricoco
co xaraxa to nanain Babilônia pain xocori ca'.

Oro caji me co om querec awi ma', co noc tamana ca Iri' Jam,
je ca xaraxa to nain quem.

³Xi ara em' pin ara tococwa oro wari' co to nanain
oro xijein macan' ta.

Ac ca toc jein ta tococwa na pain comi uva ca mana'
ma', ca tomi' joc mam' mi' nain oro ca param
ximama' cama caxicam narima' ma'.

Ac ca caracat wi xi' ta tococwa na oro xucucun taramaxicon co
taramaxicon to nanain oro xijein macan' ma', pain
ca param ni ca' xun Iri' Jam ta tococwa ma'.

Oro wari' co maqui' nanain oro xijein macan' ma', co vender taxipa'
nanain oro carawa ma', caramaju tamana pin nana,
xi om ne ca param ximama' ara cacain oro carawa ca
awi oro wari' nein Babilônia ta.

Ac i ma' na ca tomi' mip capa' jam co taramaja mi' non Iri' Jam ma', co
quiji' qui' nain pawin ma'.

⁴Taraju ac tain na xijein ca tomi' wa ca maqui' nain pawin. Tomi' ac
ne na:

Wahu' pain ca wari' ne xuhu' ca', taraju wet xine.

Paca' jein Babilônia ma'.

Ma' ta om caracat wi hwe cocon pain ca pan teretem nucucun
oro wari' co to nanain ta inuhu'.

Ma' ta om wap wi xihwe pain ca camara' hwet cocon
oro ca xirac wa ta inuhu'.

⁵Xi mija pin ara ne ca caracat nucucun ta.

Ac ca moin' tamana cocon na ca caracat nucucun,
ac ca xi' xi' hwet nein na pawin cocon.

Om ca ji'am pin cocon Iri' Jam quem, mam' pe wet nain
ca pan teretem nucucun.

⁶Win huhun pane jujun.

Ca quep em' pan cocon oro wari' pane, ac i ma' tara ca
quep em' tamana pan huhun ta.

Win cocon oro wari' pane, pain ca ac ca ji'ao mi' cocon
ne pain iri' ca mana' nein comi uva ma', ca
om joc wanan xine pain com ma',

ac i ma' tara pain ca ac ca ji'ao mi' tamana pan huhun
ne pain comi uva ca mana' quem.

18.6 Ac ca om tomi' tococwa na oro wari' nucun Iri' Jam pain versículo 6 ca'. Ac ca tomi' pan tococwa na oro jam co taramaja mi' nonon Iri' Jam, co wap pan jujun oro wari' co an xiho' nanam caxicam narima' ta wawa ma'. Ac i ma' na ca taraju pa' nucucun oro co noro tamana nanain capijacon Iri' Jam.

⁷Mija na ca xin to tamana caca, mija na ca waraju tamana
cacain oro caramaxicocon ca mam' tomi'
querec te ximama' caca ma'.

Ac i ma' tara ca jain jain tamana nucucun, ac i ma' tara ca
tomi' xaxa' tamana nucucun quem.

Xi coromicat ac i ca' pan ara xucucun pain ximicocon ma', pain
ca an xiho' cacam caxicam narima' ma' ta:

Wata' co iri' taramaxicon ta.

Om ca an xiho' tatam oro narima' co cono' ca' nanam waram
taxicacam ma', co awaran nonon ma',

xi ma' capa' tarama' ta. Om ta tomi' xaxa' camain' ta' ta.

Ac i ma' na ca coromicat pan xucucun pain ca an xiho'
cacam caxicam narima' ma'.

⁸Je ca wap hap xun tococwa ta.

Xica' pe tara xec nein ca maqui' pa' hap cocon oro ca xirac wa.

Ma' tatara oro win ma' caca co cono' pin nana.

Tomi' xaxa' tamana ac caca tara.

Om pin totoron carawa ca cao' wa, pe' ac caca tara.

Tom pin ac tococwa tara quem.

Xi om ne ca hwara' opa pan ara ca Iri' Jam co iri' Taramaxicon
ma', co wap toton nonon ma'.

Ac i ma' na ca tomi' wa ca maqui' nain pawin.

⁹Tomi' tomi' tiquin' ac ca na co tomi' qui' nain pawin: Oro xucucun
taramaxicon co taramaxicon to nanain oro xijein macan' ma', co caracat
wi nana cocon oro wari' nein Babilônia ma', pain ca param ni ca' cocon
Iri' Jam ma', co waraju wi nonon pain oro caramaxicocon ca mam' tomi'
querec te ximama' caca ma', querec iri' tatarain tain' pain ca tom pin
tococwa ma' ne, awaran tamana ac tococwa tara. ¹⁰Jin' tamana tatara, am
wap xim cacapari' quem tatara. To pira ca' e' totoron, merem ac caca tara:

Wa urut pahu' ta oro wari' nein Babilônia!

Ximin hwe!

Wa wa tamana paxi' nunuhu' oro wari' pane ira.

Hwara' opa tamana paxi' hwe pane ira.

Ane maqui' pa' hap huhu' carawa ca to' ximin huhu' ne,
pain ca wap pin huhu' Iri' Jam.

Ane ane ximin pin hwe ta.

Ac i ma' tara ca merem caca oro xucucun taramaxicon.

¹¹ Oro wari' co maqui' nanain oro xijein macan' ma', co vender taxipa' nanain oro carawa ma', awaran tamana tatara, xi om pin ara caca wari' co cut xin nanain carawa nucucun. ¹² Mo na oro carawa ca vender taxipa' caca ma': Ouro, je prata, je oro pacun ca awi tamana, je oro wirain pacun ca awi ca pérola caca ma'. Vender taxipa' nonon oro wom co awi tamana, co mija dinheiro nucun ma', oro wom co quep maram toto, oro wom co paca' ma' quem. Vender taxipa' nanain oro xijein pana ca hu awi ma', je oro ca mam' quep xine pain xinain elefante ma', ca mam' quep xine pain oro pana ca awi tamana, je oro ca mam' quep xine pain oro too ma', bronze pain ferro ma', je oro pacun ca awi ca towo' tamana ma' quem. ¹³ Vender taxipa' nanain canela ca hu toto pain ca tom nein ma', je oro homain pana ca hu awi ma', je incenso ma', je oro caji towaxi' ca hu awi ma' quem. Vender taxipa' nanain oro comi uva, je oro homain winain oliva, je oro ca tarara nein trigo je tocwi ma' quem. Vender taxipa' nanain boi je ovelha je cavalo je carroça ca mam' jein ne ma' quem. Vender taxipa' nonon wari' ma' quem. Mi' xut pain dinheiro cocon caram cwa', taramaja mi' e' tuturuhu' ta nonon, mi' ac tococwa na pain cocon quem. Om pin na wari' co cut nanain oro ca vender taxipa' caca.

¹⁴ Tomi' ac tococwa tara oro wari' nein Babilônia ma', co tomi' joc mam' mi' nanam caxicam narima' co param ni ca' non taxicam:

Om pin na oro carawa ca awi ca param tamana hwe pane ira.

Pan' ara'am ca' nuhu' oro caramajuhu' ca awi ma', ca
mam' xec xec hwe pane.

Om ta mam' mami' camain' hwein.

Ac i ma' na ca tomi' tococwa ma'.

¹⁵ Oro wari' co vender taxipa' nanain carawa ma', co caramaju pin nana pain ca vender mi' cocon pain carawa oro wari' pain Babilônia ma', to pira ca' ac cocon tara. Jin' tamana tatara, am wap xim cacapari' ta tatara. Awaran tamana tatara, ¹⁶ merem ac caca tara:

Wa urut pahu' pain ca to hwein cidade ma', pain Babilônia ma'.
Ximin hwe!

Wa wa tamana paxi' nunuhu' oro wari' pane ira.

To paxi' hun wom co awi tamana, co mija dinheiro nucun pane,
to paxi' hun wom co paca' pane quem.

An warawa paxi' xujuhu' pain oro xijein too ca mam'
 xec xec hwe pane,
 je oro pacun ca awi tamana, je oro xijein wijimain
 pacun ma' quem, pérola ma'.

¹⁷Maqui' pa' hap nuhu' carawa ca to' ximin nuhu' ma',
 pain ca to' om pin xine oro caramajuhu'.

Ac i ma' na ca merem caca oro wari' co vender taxipa' nanain oro carawa
 ma'.

Oro taramaxicon nein cote ne mam' horoho wa ma', cocon oro wari'
 co to nanain ma', cocon oro wari' co taramaja to nanain ma', cocon oro
 xucucun wari' co cut nana dinheiro pain ca taramaja to cacain cote ne
 com ma' quem, to pira ca' totoron quem. ¹⁸Querec iri tatarain tain' pain
 ca tom pin xine Babilônia ne, merem ac caca tara: Om ca ma' camain' ne
 xijein cidade ca an xiho' nain Babilônia ma', ca wa wa caca oro wari' ma',
 ac i ma' tara ca merem nucucun. ¹⁹Wixicaracao' mi' ac xucucun tara pain
 winacocon pain tajain macan'. Awaran tamana tatara, mija tatara. Merem
 ac caca tara:

Wa urut pahu' ta oro wari' nein cidade ma'.

Ximin hwe!

Wa wa tamana paxi' nunuhu' oro wari' pane ira.

Caramaju pin paxi' nana oro waximain cote ne mam' horoho wa,
 xi om ne oro caramajuhu' pane ta.

Ane to' om pin xine ne.

Ane ane ximin hap hwe ta.

Ac i ma' tara ca merem nucucun.

²⁰Merem ac tococwa tara oro wari' nucun Iri' Jam:

Wahu' pain ca to hwein pawin ma', tomi' querec te tamana je!

Wahu' quem, pain ca wari' nucun Iri' Jam hwe ma',

wahu' quem oro apóstolo cocon oro profeta ma' quem,

tomi' querec te tamana je!

Wap pin nonon oro wari' nein Babilônia Iri' Jam ma',

wap pin nonon oro co an xiho' nanam caxicam narima'.

Xi om ne ca quep em' ara cuhu' pane ta.

Ac i ma' tara ca merem tococwa ma'.

²¹ An ac cain na cote ne pacun jam co hwara' opa ma', co taramaja mi' non Iri' Jam. Cote ne pacun ta, ac iri' cote ne pacun ca mam' ep wa ma'. Xin pocom pin ac ca na pain cote ne com. Tomi' ac ca na:

Ac i ma' tara ca xin mi' xine pain macan' cote ne cidade ma',
Babilônia ma', ca wa wa tamana caca oro wari'.

Om ta querec mami' camain' xine.

²² Tomi' pan inuhu' ta oro wari' nein Babilônia.

Oro win ma' nuhu' co tao' nanain ca ac violão pane,
co com nanain tamara' pane quem, om ta
taraju mami' camain' tococwa.

Co on nanain oro caji xiwiwio' je caji taracom pane, om ta
taraju mami' camain' tococwa quem.

Co quep taxi' nanain oro carawa pane, oro co taramaja
to ho' nunuhu' pane, om pin nana, om ta
mam' mami' camain' tococwa.

Co ep nana pane, om ta taraju mami' camain' tacacama
pain ca ep cacama ma'.

²³ Om ta tom xica' pe camain' ne naran pain oro xuruhu'.
Om ta taraju mami' tocwa wari' ma', pain ca tomi' cam
manacon pain ca tomi' querec te xequequem
pain ca xo' an xequequem ma'.

Hwara' opa paxi' nana oro win ma' nuhu' co vender tiquin' taxipa'
nanain carawa nucucun pain oro xijein macan' ma'.

Ane mixein mixein pi' pin cocon oro wari' co to nanain
oro xijein macan' ne.

Ara xirac nonon oro wari'.

Ac i ma' na ca tomi' ca jam co taramaja mi' non Iri' Jam ma', co xin mi'
na pain com cote ne pacun ma'.

²⁴ Wap pin tata oro wari' nein Babilônia, xi om ne ca to' parapa' to ara
tococwa pain cidade nucucun oro profeta cocon oro wari' nucun Iri' Jam
pane ta. Tomi' em' pin tata cocon oro xucucun wari' co to' parapa' pin
wawa pain oro xijein macan' ma' quem.

Ca tomi' querec te xucucun pain pawin

19 An hwet mi' iri napa' pain oro ca hwet pa' tain nain Babilônia ne, taraju ac tain na ca tomi' pa tamana wa. Ac ca miya caca na oro co tomi' querec te xucucun pain pawin ma'. Merem mip ca' nana:

Aleluia! Tomi' querec te xun Iri' Jam nexi' cwa'!

Wirico co to' witan napari'.

Tomi' hwet xin ca awi tamana nucun.

Querec pin' xun pain ca hwara' opa tamana nucun.

²Xi om ne ca iri'o' taxipa' ara ca ta.

Ara xo' taxipa' na pain ca wap tococwa oro caracat co to nanain

Babilônia ma', co hwara' opa tamana paxi' nana ma',

co ara em' pin nonon co to nanain oro xijein macan' ma',

pain ca an xiho' xut ta tococwa pain ca param ni

ca' cocon Iri' Jam pane.

Wap pin nonon Iri' Jam, wahu' pan co em' nana ta nonon, xi

om ne ca to' parapa' pin ara tococwa oro wari'

ne co taramaja mi' nanapa' ta nonon.

Ac i ma' na ca merem mip caca co tomi' querec te xucucun pain pawin ma'.

³Merem mami' ac caca na co tomi' querec te xucucun pain pawin:

Aleluia! Tomi' querec te xun Iri' Jam ta!

Piri' cara tarain tajain xe pain ca tom pin cam ta.

Ac i ma' na ca merem nucucun.

⁴Torotop to ac caca na oro taramaxicon co ma' 24 nana ma'. Pe torotop mi' querec te nonon Iri' Jam ma', co xao pe pe nain ca mam' xao pe nucun pain ca Taramaxicon ca ma'. Merem ac caca na:

Amém, iri'o' na ca tomi' nuxut ta.

Aleluia! Tomi' querec te xun Iri' Jam ta!

Ac i ma' na ca merem caca ma'.

⁵Taraju ac xine na ca tomi' wa ca maqui' nain ca mam' xao pe ca Iri' Jam ma'. Merem ac ca na:

19.2 Tomi' mi' paxi' ta caxicam narima' co ac oro wari' nein Babilônia ma'. Pain ca an xiho' xine tococwa oro xucucun wari' pain ca param ni ca' con taxicam pane, ac ca tomi' ca' tococwa na: Param ni ca' jun Iri' Jam, param ximama' e' je, howa e' jein oro ca an xiho' ximao non Iri' Jam ta tata oro wari' ma', ac i ma' na ca ara em' pin tococwa pane.

Tomi' querec te jun Iri' Jam nexi' cwa'.
 Tomi' tomi' pi' pin inuhu' pain ca taramaja mi' hun ma',
 pain ca tomi' ha' taxipa' hun ma',
 wahu' pain ca om hwara' opa hwe ma',
 wahu' pain ca hwara' opa hwe ma' quem,
 tomi' querec te jun Iri' Jam ta!

Ac i ma' na ca merem ca ma'.

⁶Taraju ac tain na ca tomi' pa tamana wa quem. Ac ca mija caca na wari' co tomi' pa pan xucucun. Ac ca xain ne pacun pain ca weweweo tamana ne com na, ac ca toroho mip ca na comerem ma' quem. Merem ac caca na:

Aleluia! Tomi' querec te xun Iri' Jam nexi' ta!

Xi om ne ca Iri' Taramaxicon ara ca ta.

Hwara' opa pan na ta.

⁷Tomi' querec te xi', tomi' querec te tamana xi'!

Awi tamana ma ta xun.

Xi om ne ca maqui' pin ara ne xec nein,

pain ca an tam cam narima' co ma' co ac Wijimain

Taramaji Ovelha ma'.

Wara ara xo' pan xequem narima' co an ta' ca ma'.

⁸Wara mi' nam con iri' wom co awi tamana Iri' Jam.

Toc meremem na, om ca em' camain' ca quem.

Ac i ma' na ca merem caca ma'.

Ma' na ca tomi' joc mam' mi' ca wom co pe cama ma', co awi tamana ma'. Tomi' joc mam' mi' nain oro carawa ca awi ca ara caca oro wari' nucun Iri' Jam.

⁹Xirao' ca' ra ta ac capa' na jam co taramaja mi' non Iri' Jam: Param mi' tata pain ca awi wa oro wari' co tomi' wawa pain ca harahap je, cao' querec te wi xijexi' con co ma' co ac Wijimain Taramaji Ovelha ma', co an pin tam nam narima' ta na. Tomi' tomi' tiquin' ac capa' na: Je ca tomi' ca Iri' Jam cwa'. Iri'o' na ca tomi' nucun ta na.

19.7 Pain ca tomi' mi' cam narima' co an ta' ca co ma' co ac Wijimain Taramaji Ovelha ma', tomi' joc mam' mi' nonon oro co howa nonon Jeju. Wirico Jeju co ac Wijimain Taramaji Ovelha ma' quem. Ac ca an tam ca narima' na pain ca tomi' querec te cocon oro co howa nonon ma', pain ca to ho' cara xine cocon pain pawin cain.

¹⁰Pan' hwet ac ton na pain caximacon jam co taramaja mi' non Iri' Jam. Ma' ta pe torotop mi' querec te ton inon ira. Ane tomi' capa' ne: Ta pe torotop mi' querec te mapa' me ta. Xi ac wum ara ta' ta, taramaja mi' e' inon Iri' Jam. An xiho' inem, an xiho' inonon oro win howa ma ma', co win xumu cara nonon Jeju ma', pain ca om an to camain' cacain oro ca tomi' hwet xine con. Pe torotop mi' querec te pan ron Iri' Jam ta! Xi wirico pan ara ca Jeju co tomi' hwet iri' pain ca pijim' hwet xuxun con oro wari' ta. Ac i ma' na ca tomi' capa' jam co taramaja mi' non Iri' Jam.

Co ma' co xao pe nain cavalo ca towo'

¹¹Querec ac tain na pawin pain ca pa xat ne ma'. Pe quima hwet napa' cavalo ca towo'. Wari' co xao pe nain ma', tocwan na wixicon. Co Om Mixein Camain', Co Iri'o' Taxipa', je i ma' oro wixicon. Tomi' xo' iri tata oro wari' pain oro carawa ca ara caca ne, om ca wap ximao tococwa, wap xo' e' tata. Mixita xo' tata oro co noc nonon ma', om ca mixita ximao camain' tococwa. ¹²Joc xec na tocon ma', ac ca tom ne xe na. Tocwan na caji waji' nucun taramaxicon pain winacon. Wara xirao' pe ta pain curucun iri' wixicon quem. Xica' pe pan na co taxi' nain wixicon, om na xucun wari' co taxi' nain wixicon. ¹³Wara xin cam ta womicon pain wic. Ma' na wirain wixicon quem, Capijacon Iri' Jam na wirain wixicon. ¹⁴Ja' ja' nonon oro wari' nucun co to nanain pawin quem. To nonon iri' wom co awi tamana. Ac soldado nucun nana. Xao to nanain cavalo ca towo' quem. ¹⁵Hwet qui' nain capijacon cote ne quit ca xa ma', ca mam' to' quiji' pin toton cocon oro wari' co to nanain oro xijein macan'. Iri' taramaxicon tara, taramaxicon hwara' opa tamana tara. Om ta xiram pa' camain' cocon oro wari' co om tomi' ha' nonon. To' quiji' pin toton, ac ca xom xom torotot pin xine tara winain uva pain manain cote ne pacun ca tomi' joc mam' mi' nain ca mana' nucun Iri' Jam ma', co hwara' opa tamana pan. ¹⁶Xirao' ta wirain wixicon con womicon ma', je pain hocon ma' quem. Ca' na ca tomi' mao ne wirain wixicon:

Taramaxicon co hwara' opa tamana ma',

19.11 Wirico Jeju co xao pe nain cavalo ca towo'. **19.15** Cote ne quit ca hwet qui' nain capijacon Jeju ma', tomi' joc mam' mi' nain ca tomi' hwara' opa nucun. Ac cote ne quit tara ca tomi' hwara' opa nucun pain ca to' quiji' pin toton cocon oro wari' co to nanain oro xijein macan'.

co taramaxicon hwara' opa tiquin' ca' nonon oro taramaxicon.

Taramaxicon co tomi' ha' xine nonon oro taramaxicon.

Ac i ma' na ca tomi' mao ne wirain wixicon.

¹⁷Querec ac ton na jam co taramaja mi' non Iri' Jam. Xat pe non xina. Merem mip ac con na oro maho co ho to nain iri' pawin: Harahap ra, cut in xijem, cao' querec te rain carawa ca mi' xim quem Iri' Jam cwa', mija tara carawa ta. ¹⁸Cao' rain curucucun oro taramaxicon cocon oro comandante cocon oro soldado nucucun ma'. Cao' rain cwerein cavalo, cao' rain curucucun co xao to nanain, cao' rain curucucun oro wari' co noc nonon Iri' Jam ma'. Co taramaja mi' pan xucucun ma', co taramaja mi' e' nonon xucun wari' ma', co om hwara' opa nana ma', co hwara' opa nana ma' quem, cao' pin rain curucucun ta. Ac i ma' na ca merem mip con oro maho jam co taramaja mi' non Iri' Jam.

¹⁹Querec ac ton na co ma' co ac caji carawa co mana' tamana ma', co hwet qui' nain cote ne com ma'. Querec inonon oro taramaxicon co taramaxicon to nanain oro xijein macan', querec inonon oro soldado nucucun ma' quem. Wara cut in xucucun pain ca mixita xun cocon co ma' co xao pe nain cavalo ma'. Mixita xun nonon oro soldado nucun ma' quem. ²⁰Mixita xun paxi' totoron, ane quep pan tococwa ne. Quep ta co ma' co ac caji carawa co hwet qui' cain' ma', quep wi ta con co ma' co profeta mixein ma', co tomi' hwet taxipa' nain oro ca tomi' nucun ma'. Wirico co ma' co mi' ca pain ca hwara' opa nucun pain ca ara taxipa' cain oro ca om ara taxi' ne ca wari' wa ira. To' wa wa tamana nonon oro wari' pane ira. Oro ca ara ca ma', je i ma' ca mam' mixein cocon oro wari' co xirao' xirac wawa pain wixicon co ma' co ac caji carawa ma', co pe torotop mi' querec te nanain pacun ca ara an xiho' xine curucun ma'. Xin mi' ac tocwa na pain cote ne xe ma', ca ac xuterem' ma'. Co ma' co ac caji carawa co hwet qui' nain com ma', wirico win ma' nucun ma' quem, wixicao' mi' nunucun ac tococwa na pain cote ne xe ca wiran wi nain pacun ca weo tamana ma', ca enxofre caca oro wari' ma' quem. ²¹Oro taramaxicon cocon oro soldado nucucun ma' iri nana ne, to' parapa' pin ac tococwa na, mam' to' parapa' tata pain cote ne quit ca hwet qui' nain capijacon co ma' co xao pe nain cavalo ma'. Cao' cao' pi' pin ac cocon na maho. Ma'am ca' nonon quem.

Ca ma' 1.000 ne cawaxi' pain ca pao' pe tocwa Caxicon Jam, je pain ca taramaxicon pe cain macan' Jeju Cristo

20 Querec ac ton na jam co taramaja mi' non Iri' Jam. Quiji' qui' nain pawin. An nain ca mam' pa xine cote ne man ca om tawirinain. An nain cote ne arain too quem. ²⁻³ Quep xat ac con na co ma' co ac caji hop ma', co caxicon em' pain cara pane, co Caxicon Jam ma', co Satanás na xijein wixicon. Pao' pe ac con na pain arain too, xin mi' ac con na pain cote ne man ca om tawirinain cain. Tao' pa' ac cain na, tao' pa' mip nain, ma' ta om mixein mami' momon oro wari' co to nanain oro xijein macan' ta non. Tao' pa' cara ac tocwa tara, maqui' pa' toron ca 1.000 nein cawaxi' pain ca tao' pa' tocwa ta. Pi' pin iri tara ca 1.000 nein cawaxi' ne, pa hwet wijimain ac tocwa tara, ame hwe e'.

⁴ Querec ac tain na oro ca mam' xao to nucucun oro taramaxicon. Ma' tocwan na. Xao to to nanain caram ma' co mi' wawa pain ca hwara' opa wa ma', pain ca tomi' xo' jujun oro wari' pain oro carawa ca ara caca pain ca e' e' wet nucucun pane wawa ma'. Querec inain tamataracocon co wara cono' nana ma' quem, co ton tapit pin wawa pain winacocon pane, xi om ne ca tomi' hwet ara cocon con Jeju oro wari' pane. Pijim' nanain capijacon Iri' Jam pane, je ca ton tapit pin xine winacocon pane. Om ca pe torotop mi' querec te cocon co ma' co ac caji carawa co hwet qui' cain' pane, om ca pe torotop mi' querec te cacain pacun ca an xiho' nain curucun pane quem. Om ca xirao' xirac tococwa pain wixinain pain jitaracocon pain micocon pane quem. E' mami' nana, taramaxicon wi ac cocon na Cristo quem. Ma' 1.000 na cawaxi' pain ca taramaxicon wi cocon Cristo. ⁵ Caram ma' co e' mami' nana ma', co taramaxicon wi nonon Cristo ma', wiricoco co e' mami' cain' nana. (Oro xucucun co wara cono' nana pain cara pane, om ca e' mami' querec caca. Pi' pin cain' tara ca 1.000 nein cawaxi' cocon, ame hwe e'.) ⁶ Param mi' tata pain ca awi wa oro co e' mami' cain' nana ma', co iri' wari' nucun Iri' Jam nana ma'. Om ta cono' mami' caca, om ta wixicaracao' mi' tococwa pain cote ne xe. Sacerdote pin tatara pain ca taramaja mi' xun cocon Iri' Jam con Cristo ma', taramaxicon wi ac cocon tara, ma' 1.000 tara cawaxi' pain ca taramaxicon wi xun cocon ta.

Ca to' quiji' pin tocwa Satanás

⁷Pi' pin iri tara ca 1.000 nein cawaxi' ne, pa hwet pin ac tocwa tara Satanás ma', pain ca tao' pa' pe tocwa pain cote ne man ca om tawirinain cain, pa hwet pin ac tocwa tara. ⁸Mixein toton oro wari' co to nanain Gogue je Magogue ma' ac ca tara, hwet ac tococwa tara pain ca to cacain oro xijein macan'. Cut in xi', mixita xuxun oro wari' nucun Iri' Jam ta ac tococwa tara. Mija tatara oro wari' co cut in xi' nana, ac namaji pain cacarain cote ne com tatara pain ca tamana nucucun. ⁹Maqui' ac cacain tara oro xijein macan', to to mam' pin ac tococwa tara oro wari' nucun Iri' Jam pain ca cut in xucucun ma', pain cidade ca tomi' querec te pan ca Iri' Jam ma' quem. Ca to to mam' pin xun cocon ma', pan' qui' ac nein pawin tara xe ma', to' om pin ac tococwa tara ta. ¹⁰Xin mi' ac tocwa tara pain cote ne xe Caxicon Jam ma', co mixein nonon oro wari' ma', xin mi' ac tocwa tara pain cote ne xe ca ac xuterem' ma', ca wiran wi nain pacun ca weo tamana ma', ca enxofre caca oro wari' ma'. Wara xin mi' ta pain cote ne xe co ma' co ac caji carawa co hwet qui' cain' ma', wara xin mi' ta pain co ma' co ac caji carawa co hwet qui' pa'ao' ma' quem, co profeta mixein ma', pain ca tomi' hwet taxipa' cain oro ca tomi' nucun co ma' co hwet qui' cain' ma' quem. Je ta xin mi' pe tocwa Caxicon Jam ma' quem. Jain jain cara ac caca tara pain xec je pain xim quem. Om ta pi' camain' ne ca jain jain nucucun, mao ac ne ma' tara cocon ta.

Ca wap tococwa oro caracat

¹¹Querec ac tain na cote ne ca mam' xao pe ca taramaxicon. Towo' na. Querec inon co xao pe pe nain quem. Jein ca' non macan' je pawin quem. Om ca querec mami' xine. ¹²Querec inonon co wara cono' nana ma' quem. Co hwara' opa nana ma', co om hwara' opa nana ma' quem, querec inonon pain ca coco' quima hwet cacain ca mam' xao pe nucun. Pa ac xine na oro tapari carawa ca xirao' to xine oro ca ara caca pain ca e' e' wet nucucun pane. Pa ac xine na wirain tapari carawa ca xirao' to xine wixicocon oro wari' co e' cara xi' nana quem. Noro iri ta ca xirao' to xine oro ca ara nucucun ne, win ne ca ara hwe pane ac tococwa na, wap wap

20.8 Gogue je Magogue ma', tomi' mi' nain xijein wixinain macaracocon oro wari' co noc nonon Iri' Jam cocon oro wari' nucun. **20.9** Tomi' mi' nain Jerusalém.

ac tococwa na. ¹³Oro wari' co wara cono' nana pane, co cono' to nanain cote ne com pane, co cono' to nanain macan' pane, co wara mama' nanain ca to pan caca oro co cono' nana ma' quem, coco' quima hwet nonon co ma' co xao pe pe nain cote ne ca mam' xao pe ca taramaxicon ma'. Win ne ca ara hwe pane ac tococwa na, wap wap xam' ac tococwa na quem. ¹⁴Oro wari' co wara cono' nana ma', wiricoco co to nanain ca to pan caca oro co wara cono' nana ma', wixicaracao' mi' ac tococwa na pain cote ne xe ca ac xuterem' ma'. Cote ne xe ma', ca ac xuterem' ma', tomi' joc mam' mi' nain ca cono' mami' wa. ¹⁵Oro wari' co om xirao' to wa wixicocon pain tapari carawa ca xirao' to xine wixicocon co e' cara xi' nana ma', wixicaracao' mi' ac tococwa na pain cote ne xe ca ac xuterem' ta.

Xocori pawin pain xocori macan'

21 Querec ac tain na xocori pawin je xocori macan'. Wara om pin ara xi' na wara pawin je wara macan' pane. Wara om pin na cote ne com quem. ²Querec ac tain na cidade nucun Iri' Jam ma', Xocori Jerusalém ma'. Quiji' qui' nain ca pe pan ca pain pawin cain. Awi tamana na, an xiho' nam narima' co ara awi pan xequem con wom co awi ma', pain ca winim' con taxicam co an tam nam ma'. ³Taraju ac tain na ca tomi' wa ca maqui' nain ca mam' xao pe ca Iri' Jam. Tomi' mip ac i ca' na: Aram aram pe ho' pin toton nonon oro wari' Iri' Jam ta. Pe ho' pin toton nonon, wari' ne pin ac tococwa tara. Wirico Iri' Jam pan tara co pe ho' toton nonon, Iri' Jam ne pan ac cocon tara oro wari' nucun quem. ⁴Xic cawain' xic cawain' pi' pin tarain oro comi tococon pain ca awaran nucucun. Om ta cono' mami' wa, om ta tomi' xaxa' mami' wa, om ta awaran mami' wa, om ta caxi mami' wa quem. Xi om pin ara ne oro coximi wara macan' ta. Ac i ma' na ca tomi' wa ca maqui' nain ca mam' xao pe ca Iri' Jam.

⁵Tomi' ac ca na co ma' co xao pe pe nain ca mam' xao pe nucun taramaxicon: Ara xocori ara xocori pi' pin inain oro carawa ta na. Tomi' tomi' tiqin' na quem: Xirao' rain oro ca tomi' xim cara ne. Iri'o' na oro ca tomi' ne. Om ca mixein ta', na e' na pain ca howa cacapa' pain ca tomi' ne oro wari' ta. Ac i ma' na ca tomi' ca co ma'.

⁶Tomi' tomi' tiqin' ac capa' na: Ara ara pi' pin inain oro ca ara ta' ta' ca'. Wata' co Alfa cwa', wata' co Ômega cwa', wata' co tomi' ma' pin nain oro carawa, wata' co to' pi' pin nain quem. Wari' co pe' ma', co toc ta' com

ma', mi' ac ton tara pain ca toc wa comicon hoi hoi ma', ca mi' nain ca e' cara wa. Mi' e' ton pain, om ta pagar ne pain ton. ⁷Oro wari' co hwara' opa cara nana pain ca howa nucucun ma', mi' ac toton tara pain oro ca wara tomi' pe ta' ca'. Iri' Jam ne tatarapa', mana panxita' ac toton tara quem. ⁸Ac i ma' paxi' toton oro co hwara' opa cara nana pain ca howa nucucun ma', ane om ac i ma' toton oro xucucun co caracat cara nana ne. Mo nana: Co jin' nanain ca quep em' wa pain ca howa nucucun ma', co om howa je ha' nana ma', co ara taxipa' nanain oro ca om querec awi non Iri' Jam ma', co to' parapa' pin nonon wari' ma', co quep ximama' xequequem ma', co ara xirac nonon oro wari' ma', co pe torotop mi' querec te nanain oro caji pacun ca Iri' Jam xi' ma caca ma', oro co tomi' mixein nana ma' quem, wixicaracao' mi' ac tococwa tara pain iri' maxicocon ma', je pain cote ne xe ca ac xuterem' ma', ca wiran wi nain pacun ca weo tamana ma', ca enxofre caca oro wari' ma'. Cote ne xe ma', tomi' joc mam' mi' nain ca cono' mami' wa pain ca to ni cara ca' xun cocon Iri' Jam ta.

Xocori Jerusalém

⁹Hwet ac capa' na jam co taramaja mi' non Iri' Jam ma', co win ma' ne nonon co cut nanain too ca ma' 7 ma', ca moin' pe nain oro ca xirac wa ca ma' 7 ma' quem, tomi' ac capa' na: Hap ra, an hwet mi' xim cam narima' ma', co an ta' ca co ma' co ac Wijimain Taramaji Ovelha ma', ac i ma' na ca tomi' capa' ma'. ¹⁰Pe ho' mip ac capa' na Tamataracon Iri' Jam. O mao ac capa' na jam co taramaja mi' non quem, o mao napa' pain cote ne pacun ca mao tamana pawin. An hwet mi' ac capa' na pain Jerusalém ma', iri' cidade nucun Iri' Jam ma', ca quiiji' qui' nain pawin ma'. Maqui' nain ca pe pan ca Iri' Jam. ¹¹Toha tamana na, xi om ca Iri' Jam co toc meremem mi' nain ta. An xiho' nain ca toc meremem nein pacun ca awi tamana, an xiho' nain jaspe. Om na homiri, om ca tocohon camain' ne. ¹²Ma' na cote ne pacun ca tao' caho' nain, mao nain pawin. Ma' 12 na oro ca corom ac xine, ma' 12 nana co coco' to ho' nanain quem. Oro jam co taramaja mi' nonon Iri' Jam ma', wiricoco co coco' to ho' nanain oro manain ca corom ac xine. Xirao' pe xirao' pe xam' ta wixicocon mana panxica Israel pain cacarain oro manain ca corom ac xine quem, xirao' xirao' xam' ta oro wixicocon pain ca ma' 12 ne ca xucun wari' xucun wari' xam' caca pane. ¹³Ma' 3 ma' 3 xam' na manain ca corom ac xine pain oro quirinain quem.

Quirinain ca maqui' ac ca xina ma', ma' 3 na manain ca corom ac xine. Quirinain ca corom mao ac ca xina ma', ma' 3 na manain ca corom ac xine. Xijein quiricon xina ma', ma' 3 na manain ca corom ac xine, xijein quiricon ma' quem, ma' 3 na manain ca corom ac xine quem. ¹⁴Ma' 12 na cote ne pacun ca to' teren nain caximain ca tao' caho' nein ma' quem. Iri' cote ne pacun pain oro caximain. Xirao' ta wixicocon oro apóstolo nucun co ma' co ac Wijimain Taramaji Ovelha ma', xirao' pe xirao' pe xam' ta pain oro cote ne pacun pain caximain.

¹⁵Jam co taramaja mi' non Iri' Jam ma', co tomi' napa' ma', an nain taparain pana ca mam' tacan wa, ac taparain pana paxi' na, mam' quep ta pain ouro. Tacan tain cidade ma', je oro manain ca corom ac xine ma', je cote ne pacun ca tao' caho' nain ma' quem ac ca na. ¹⁶Om ca hwara' paxica' ne oro quirinain cidade, an an ari xijein oro quirinain. Tacan ac cain na cidade pain ca mam' tacan nucun. Iri' cote ne cidade ta, ma' 2.200 na quilômetro pain ca hwara' nein. An an ari xijein oro quirinain pain ca hwara' nein pain pawin quem. ¹⁷Tacan ac cain na ca tao' caho' nein quem. Iri' cote ne, ma' 65 na metro pain ca iriquito nein. Ca mam' tacan ca jam co taramaja mi' non Iri' Jam ma', an an ari nain ca mam' tacan nexi' pain ca wari' nexi' pain xocori ca'. ¹⁸Ca tao' caho' nein ma', mam' quep ta pain jaspe, je i ma' wixinain pacun ca mam' quep xine ca tao' caho' nein. Cidade ma' iri na ne, mam' quep ta pain ouro ca awi tamana quem. Om ca em' camain' ne. Ac ca mam' querec ca jamu wa na. Awi tamana na, om ca tocohon camain' ne. ¹⁹Ma' 12 na oro cote ne pacun pain caximain ca to' teren nain ca tao' caho' nein quem, ara awi ta pain oro xijein pacun ca awi tamana. Mo na ca mam' ara awi xine ma':

Ca ma' cain' ma', mam' ara awi ta pain jaspe.

Wirain ma' iri na ne, mam' ara awi ta pain safira.

Wirain ma' iri na ne, mam' ara awi ta pain calcedônia.

Wirain ma' iri na ne, mam' ara awi ta pain esmeralda.

²⁰Wirain ma' iri na ne, mam' ara awi ta pain sardônio.

Wirain ma' iri na ne, mam' ara awi ta pain sárdio.

Wirain ma' iri na ne, mam' ara awi ta pain crisólito.

Wirain ma' iri na ne, mam' ara awi ta pain berilo.

Wirain ma' iri na ne, mam' ara awi ta pain topázio.

Wirain ma' iri na ne, mam' ara awi ta pain crisópraso.

Wirain ma' iri na ne, mam' ara awi ta pain jacinto.

Wirain ma' iri na ne, mam' ara awi ta pain ametista.

Ac i ma' na oro wixinain pacun ca mam' ara awi xine oro cote ne pacun pain caximain oro manain ca mam' corom ac xine cidade ma'.

²¹ Ca mam' tao' pa' nein oro manain ca mam' corom ac wa ma', quep ta pain pérola, je i ma' wixinain pacun ca mam' quep xine oro manain ca corom ac wa ma'. Awi tamana na. Mam' quep mam' quep xam' ta pain ca xica' pe nein pérola. Wana pain ximijain cidade ma' iri na ne, ca xuruxut ac caca oro wari' ma', mam' quep ta pain ouro ca awi tamana quem. Om ca em' camain' ne, ac ca mam' querec ca jamu wa na. Awi tamana na quem, om ca tocohon camain' ne.

²² Om ca querec camain' tain xirim ca in ac pe tocwa Iri' Jam pain cidade ma' quem. Xi om ne ca pe pan ara cain Taramaxicon Iri' Jam co hwara' opa tamana pan ta. Pe nain co ma' co ac Wijimain Taramaji Ovelha ma' quem. In ac pan tata, to pan nanain maxinain xirim ca in ac to tococwa. ²³ Om ca ma' xira xina co toha mi' napari' na caca oro wari' co to nanain cidade. Om ca ma' xira panawo' co toha mi' napari' na caca quem. Xi toha mi' pan ara cocon ca toc meremem nucun Iri' Jam ta. Co ma' co ac Wijimain Taramaji Ovelha ma', toha mi' nonon quem, wirico pan co ac naran nonon. ²⁴ Oro wari' co to nanain oro xijein macan' ma', toha mi' tata pain ca toc meremem nein cidade. Oro co taramaxicon to nanain oro xijein macan' ma', cut tan' tatarain oro caramaxicocon quem. ²⁵ Om ta irawin tao' pa' camain' xine oro manain ca corom ac xine, xi ma' ta' ne xim pain i cain ta. Xec cara e' tara. ²⁶ Oro wari' co to nanain oro xijein macan' ma', cut tan' tatarain oro caramaxicocon ca awi tamana, oro caramaxicocon ca mam' to' querec pin' tococwa pain ca hwara' opa nucucun ma', cut tan' tatarain pain cote ne cidade ma'. ²⁷ Om ta corom camain' caca oro wari' co to' em' xucucun pain ca pan teretem nucucun ma', cocon oro co ara taxipa' nanain oro ca om querec awi non Iri' Jam ma' quem, cocon co mixein nonon oro win ma' caca ma' quem, om ta corom camain' caca. Corom xica' to e' tatara oro wari' co xirao' to wa wixicocon pain tapari carawa nucun co ma' co ac Wijimain Taramaji Ovelha ma', corom xica' to e' tatara co xirao' to wa wixicocon pain ca e' cara xi' caca ma'.

21.20 Awi tamana na oro xijein pacun pain caximain ca tao' caho' nein cidade. Ma' na ca tum nein, ma' na ca paca' nein, ma' na ca coxic nein, ma' na ca ururu nein ma' quem.

21.24 Tomi' mi' tata oro wari' co to nanain oro xijein macan' pain xocori macan' ca'.

Iri' cwerein com ca mi' nain ca e' cara wa

22 An hwet mi' ac capa' na pain iri' cwerein com ca mi' nain ca e' cara wa. Awi tamana na comi, om na homiri, om ca tocohon camain' ne. Weweweo qui' nain ca xao pe pe ca Iri' Jam, je ca xao pe pe ca co ma' co ac Wijimain Taramaji Ovelha ma' quem. ² Weweweo ac nain ximijain wana ca xuruxut ac caca oro wari' ma', pain ximijain cidade ma'. To nain cacarain com panaji memem ca mi' nain ca e' cara wa, pain xijein cacarain, je pain xijein cacarain ma' quem. Oro winain memem ca mi ne ma', mi mi xam' non oro panawo', mi mi hwet pa' nain xijein cawaxi' quem. Oro tenenein ma', je ca mam' to' om pin xine ca caxi nucucun oro wari' co to nanain oro xijein macan'. ³ Om tarain cidade nucun Iri' Jam oro ca tomi' noro ca, om tatara oro wari' co tomi' noro ca quem, om om tara oro ca om querec awi non. Pe tarain i ma' ca mam' xao pe pe ca Iri' Jam con co ma' co ac Wijimain Taramaji Ovelha quem. Oro co taramaja mi' e' nonon ma', pe torotop mi' querec te totoron quem. ⁴ Querec pin' tatarain iri' tocon Iri' Jam. Xirao' ac xine tara wixicon pain jitaracocon oro wari' nucun quem. ⁵ Om ta xim mami' ne pain i cain. Om ta ma' xirapari' naran na caca oro wari', om ta ma' xira xina co toha mi' napari' na caca quem, xi om ne ca toha mi' pan toton ara cocon Taramaxicon Iri' Jam ta. Taramaxicon cara ac caca tara quem.

⁶ Tomi' ac capa' na jam co taramaja mi' non Iri' Jam. Oro ca tomi' xim cara ne, na e' na pain ca howa cacapa' pain ca tomi' ne oro wari' ta. Xi om ne ca tomi' iri'o' ara ta' ta. Om ca mixein ta'. Taramaxicon nexi' ma', co Iri' Jam ma', co mi' nonon pain ca tomi' hwet wa oro profeta ma', wirico co tomi' ca' napa' pain ca taramaja mi' ton ca'. Hwet roron oro wari' ne co taramaja mi' nanapa' ma', an hwet mi' roron pain oro carawa ca maqui' ta' ma'. Om ta om om ne, maqui' ho' tara ta napa'. Ac i ma' na ca tomi' capa' ta.

Ca in qui' ta' nucun Jeju

⁷ Je ca tomi' ca Jeju cwa': Taraju wet je e'. Maqui' ho' ta' ina. Om ta om om ta', maqui' hap ta' ina. Wari' co tomi' ha' nain oro ca xirao' pe xine pain tapari carawa ca joc top ca', ca tomi' mi' nain oro carawa ca maqui'

ta' ma', param mi' ac tocwa tara pain oro ca awi wa. Ac i ma' na ca tomi' ca ma'.

⁸Wata' pain ca João ta' ca', wata' co taraju nain oro ca ara ta' ne ma', ca xirao' pe ta' ca'. Querec inain quem. Taraju iri inain ne, querec iri inain ne, pan' hwet ac ton na pain caximacon jam co taramaja mi' non Iri' Jam ma', co an hwet mi' napa' pain oro ca taraju ta' pain oro ca querec ta' quem. Ma' ta pe torotop mi' querec te ton inon ira. ⁹Ane tomi' capa' ne, ta pe torotop mi' querec te mapa' me ta. Ac wum ina, taramaja mi' e' inon Iri' Jam ta. An xiho' inem, an xiho' inonon co win howa ma ma', an xiho' inonon oro co tomi' hwet nanain capijacon Iri' Jam ma'. An xiho' inonon co tomi' ha' nanain oro ca xirao' pe xine pain tapari carawa ca joc top ca'. Pe torotop mi' querec te pan ron Iri' Jam ta! Ac i ma' na ca tomi' capa' ma'.

¹⁰Tomi' tomi' tiquin' ac capa' na: Ta joc xim main oro ca xirao' pe ma pain tapari carawa ma', ca tomi' mi' nain oro carawa ca maqui' ta' ma' me ta. Xi wixicam pin ara ne oro xec nein ca maqui' ta' ne ta. ¹¹Co pan teretem nana ma', pan teretem cara ma' tatara ne. Co to' em' xucucun pain ca caracat nucucun ma', to' em' cara ma' ac xucucun tara. Oro wari' co ara xo' taxipa' nana ma' iri na ne, ara xo' taxipa' cara ma' tatara ne. Co win xumu cara nonon Iri' Jam ma', win xumu cara ma' totoron ne. Ac i ma' na ca tomi' capa' jam co taramaja mi' non Iri' Jam.

¹²Je ca tomi' ca Jeju cwa': Taraju wet je e'. Maqui' ho' ta' ina. Om ta om om ta', maqui' hap ta' ina. Maqui' wi tarapa' carawa ca mi' toton toton oro wari' ma'. Win ne ca ara hwe pane toton, mi' mi' ac toton pain tara. ¹³Wata' co Alfa cwa', wata' co Ômega cwa'. Wata' co ma' cain' pane, pain ca om om wet ne oro carawa pane, wata' co ma' cara ta' ma' quem, pain ca win pi' pin ta' ne oro carawa quem. Wata' co tomi' ma' pin nain oro carawa, wata' co to' pi' pin nain quem.

¹⁴Param mi' tata pain ca awi wa oro wari' co hohoc nonon womicocon ma'. Om ta narain ho' tococwa pain ca xac wa winain panaji memem ca mi' nain ca e' cara wa. Ha' nonon pain ca corom mama' cacain cidade pain oro manain ca mam' corom ac xine quem. ¹⁵Om ta corom ac caca oro caracat co ac caxicon oromijac. Mo nana: Co ara xirac nonon oro wari' ma', co quep ximama' xequequem ma', co to' parapa' pin nonon wari' ma', co pe torotop mi' querec te nanain oro caji pacun ca Iri' Jam xi' ma caca

ma', oro co hohot nonon ca tomi' mixein wa ma', co tomi' mixein taxipa' nana ma' quem. Oro wari' co ara nanain i ma', om ta corom ac cacain cidade nucun Iri' Jam.

¹⁶Wata' pain ca Jeju ta' ca', mam' inuhu' con jam co taramaja mi' napa' ma'. Tomi' hwet roron pain oro carawa ca maqui' pa' toton nonon pain ca cut in taxipa' xucucun pain ca howa cacapa' ta inon pahu'. Wata' co iri' winacon taramaxicon Davi co tomi' pe ca Iri' Jam pain cara pane. An xiho' inon pijo' co toc meremem mip ma', co hwet na pain xo' xec. Ac i ma' na ca tomi' ca Jeju.

¹⁷Tomi' ac ne na Tamataracon Iri' Jam cam narima' co an ta' ca co ma' co ac Wijimain Taramaji Ovelha ma', maqui' hap ra ta ac caca na. Oro wari' co taraju nana ma', tomi' tatara quem, maqui' hap ra ta tatara. Oro wari' co pe' nana ma', co toc xi' com nana ma', maqui' tatara quem. Oro wari' co toc xi' nana ma', toc ac cacain tara comicon hoi hoi ma', ca mi' nain ca e' cara wa ma'. Comicon hoi hoi ma', mi' e' ac tococwa pain tara, om ta pagar cacain ta.

Ca pi' pin ne ca xirao' nucun João

¹⁸Wahu' pain ca taraju huhun co noro mi' nunuhu' pain oro ca xirao' pe tain tapari carawa ca joc top ca', ca tomi' mi' nain oro carawa ca maqui' ta' ma', tomi' mip ca' inuhu': Wari' co an in nain ca xirao' nein ca', pain ca xirao' hwara' pin cain, wap ac tocwa tara, wirico Iri' Jam tara co mam' wap ton non pain oro ca xirac wa ca xirao' pe ta' pain tapari carawa ca', ca to' jain jain xun nonon oro wari' ma'. ¹⁹Wari' co xic am nain ca xirao' nein ma', am xic am wijimain e' tarain, wap ac tocwa tara quem. Wirico Iri' Jam tara co wap ton non. Nain ho' toron pain ca xac wa winain panaji memem ca mi' nain ca e' cara wa, nain ho' toron pain ca corom wa cidade nucun quem.

22.16 Pain ca tomi' mi' con pijo' co toc meremem mip Jeju ma', ac ca tomi' joc mam' mi' pan xucun na. Wata' co to' querec pin' nuhu' pain ca pi' pin ta' ne ca jitacat nein xim. Xec pin ho' tara. Awi cara ta' tara oro xec pata', pain ca to' hohot cara xuhu' pain oro carawa ta, ac je tara ca tomi' joc mam' mi' pan xucun. **22.17** Wirico Jeju Cristo co maqui' hap ra ta wa.

²⁰Co ma' co tomi' hwet napa' pain oro ca xirao' pe ta' ca', tomi' ca' na: Maqui' ho' ta' ina. Om ta om om ta', maqui' hap ta' ina. Iri'o' na ca tomi' ne ca' na.

Amém, iri'o' na ca tomi' nucun. Maqui' hap ra ta Taramaxicon!

²¹Param inon Taramaxicon nexi' Jeju pain ca quep xiho' quep xiho' xam' cuhu' ma', pain ca mi' e' cuhu' pain ca param nucun ta.

Amém, iri'o' na ca tomi' nucun ta.